

清
實
錄

高宗純皇帝實錄（一七）

卷一二七二至卷一三四五
乾隆五十二年至五十四年

清實錄

第二五冊

中華書局影印

清 實 錄

（第 二五 冊）

高 宗 實 錄（一七）

*

中 華 書 局 出 版

（北京王府井大街 36 號）

北京市中國書店發行

中國建築工業出版社印刷廠印刷

*

787×1092 毫米 1/16 · 78 1/4 印張

1986 年 5 月第 1 版 1986 年 5 月北京第 1 次印刷

印數 0·001—1·500 冊

統一書號：11018·1355—25 定價：58.00 元

清實錄第二一五冊目錄

高宗純皇帝實錄（一七）

卷一二七二	乾隆五十一年正月上	一
卷一二七三	乾隆五十一年正月下	一八
卷一二七四	乾隆五十一年二月上	三五
卷一二七五	乾隆五十一年二月下	五八
卷一二七六	乾隆五十一年三月上	七九
卷一二七七	乾隆五十一年三月下	九三
卷一二七八	乾隆五十一年四月上	一一一
卷一二七九	乾隆五十一年四月下	一二九
卷一二八〇	乾隆五十一年五月上	一四三
卷一二八一	乾隆五十一年五月下	一五八
卷一二八二	乾隆五十一年六月上	一七五
卷一二八三	乾隆五十一年六月下	一八九
卷一二八四	乾隆五十一年七月上	二〇三
卷一二八五	乾隆五十一年七月下	二二七
卷一二八六	乾隆五十一年八月上	二三八
卷一二八七	乾隆五十一年八月下	二五三
卷一二八八	乾隆五十一年九月上	二六六
卷一二八九	乾隆五十一年九月下	二七九
卷一二九〇	乾隆五十一年十月上	二八九
卷一二九一	乾隆五十一年十月下	三〇五
卷一二九二	乾隆五十一年十一月上	三三八
卷一二九三	乾隆五十一年十一月下	三四六
卷一二九四	乾隆五十一年十二月上	三六三
卷一二九五	乾隆五十一年十二月下	三七九
卷一二九六	乾隆五十一年正月上	四〇六
卷一二九七	乾隆五十一年正月下	四二三
卷一二九八	乾隆五十一年二月上	四四一
卷一二九九	乾隆五十一年二月下	四六〇
卷一三〇〇	乾隆五十一年三月上	四七四
卷一三〇一	乾隆五十一年三月下	四九二
卷一三〇二	乾隆五十一年四月上	五一五
卷一三〇三	乾隆五十一年四月下	五三〇
卷一三〇四	乾隆五十一年五月上	五四八
卷一三〇五	乾隆五十一年五月下	五五七

卷一三〇六	乾隆五十三年六月上	五七二	卷一三二五	乾隆五十四年三月下	九三七
卷一三〇七	乾隆五十三年六月下	五九一	卷一三二六	乾隆五十四年四月上	九四七
卷一三〇八	乾隆五十三年七月上	六二一	卷一三二七	乾隆五十四年四月下	九五九
卷一三〇九	乾隆五十三年七月下	六三一	卷一三二八	乾隆五十四年五月上	九七七
卷一三一〇	乾隆五十三年八月上	六五八	卷一三二九	乾隆五十四年五月下	九九一
卷一三一一	乾隆五十三年八月下	六七六	卷一三三〇	乾隆五十四年閏五月上	一〇〇三
卷一三一二	乾隆五十三年九月上	六九二	卷一三三一	乾隆五十四年閏五月下	一〇一六
卷一三二三	乾隆五十三年九月下	七二七	卷一三三二	乾隆五十四年六月上	一〇三七
卷一三二四	乾隆五十三年十月上	七四〇	卷一三三三	乾隆五十四年六月下	一〇四〇
卷一三二五	乾隆五十三年十月下	七六五	卷一三三四	乾隆五十四年七月上	一〇六三
卷一三二六	乾隆五十三年十一月上	七八二	卷一三三五	乾隆五十四年七月下	一〇八六
卷一三二七	乾隆五十三年十一月下	七九六	卷一三三六	乾隆五十四年八月上	一一〇六
卷一三二八	乾隆五十三年十二月上	八二一	卷一三三七	乾隆五十四年八月下	一一一九
卷一三二九	乾隆五十三年十二月下	八三〇	卷一三三八	乾隆五十四年九月上	一二三六
卷一三三〇	乾隆五十四年正月上	八五〇	卷一三三九	乾隆五十四年九月下	一二四九
卷一三三一	乾隆五十四年正月下	八六〇	卷一三四〇	乾隆五十四年十月上	一二六六
卷一三三二	乾隆五十四年二月上	八七九	卷一三四一	乾隆五十四年十月下	一二八〇
卷一三三三	乾隆五十四年二月下	八九五	卷一三四二	乾隆五十四年十一月上	一二九一
卷一三三四	乾隆五十四年三月上	九一九	卷一三四三	乾隆五十四年十一月下	一三〇五

卷一三四四 乾隆五十四年十二月上 一三七

卷一三四五 乾隆五十四年十二月下 一三三

大清高宗法天隆運至誠先覺體元立極敷文奮武孝慈神聖純皇帝實錄卷之一千二百七十二

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官總纂官太子太傅文華殿大學士文淵閣領閣事稽察欽奉 上諭事件處管理刑部戶部主庫事務

世襲騎都尉軍功加十九級隨帶加二級又加二級尋常加二級軍功紀錄一次臣曹振鏞等奉

尋常紀錄十四次臣德瑛總纂官太子少保工部尚書紀錄六次臣曹振鏞等奉

敕修

乾隆五十二年丁未春正月庚午朔

上詣

奉先殿行禮○詣

堂子行禮○御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜皇子皇孫宗室王公

等宴○辛未

上御紫光閣賜蒙古王貝勒貝子公台吉年班

回部伯克暹羅國使臣並金川土司等宴○召大學士內廷翰林等茶宴以

開國方畧集成聯句○諭上年江蘇淮揚等處

因河水漫溢下游安東山陽清河桃源等縣

田禾被淹業經降旨令該督撫加意撫綏蠲

賑兼施災民自可不致失所第念今春正賑

已畢青黃不接之時民食恐不無拮据著再

加恩將淮安府屬之清河桃源安東三縣揚

州府屬之高郵寶應三州縣勘明成災十分

之各村莊無分極次貧民各加賑兩個月又

淮安府屬之山陽清河桃源鹽城阜寧五縣

揚州府屬之江都甘泉泰州東臺高郵寶應

興化七州縣直隸海州勘明成災九分八分

之各村莊無分極次貧民各加賑一個月以

資口食其餘淮安府屬之山陽清河安東桃

源鹽城阜寧六縣揚州府屬之江都甘泉高

郵泰州東臺五州縣直隸海州并所屬之沐

陽一縣又江寧府屬之江寧上元江浦三縣

勘明七分五分及勘不成災之各村莊戶口俱著酌借籽種口糧以資接濟該督撫務董飭所屬實心經理俾茅簷蔭屋均霑渥澤以副朕軫念窮黎普錫春祺之至意該部即遵諭行○又諭上年安徽省安慶鳳廬滁泗等府州屬夏間雨澤過多山水漲發低窪地畝間被淹浸節經降旨令該督撫詳晰查明分別蠲賑俾災黎口食有資不致失所第念今春正賑已畢青黃不接之時小民生計維艱著再加恩將鳳陽懷遠定遠靈璧鳳臺壽州泗州盱眙天長五河滁州全椒來安合肥廬江等十五州縣被災八九十分貧民無論極次概行加賑一個月以資接濟其衛所饑口及貧生兵屬並著照正賑之例一體辦理至被災七分五分貧民及勘不成災之區仍著該督撫察看情形或借給口糧籽種或減價平糶分別酌辦該督撫務須督飭所屬實心經理俾災黎均霑愷澤以副朕惠愛閭閻用

普春祺至意該部即遵諭行○諭軍機大臣等現在臺灣彰化地方有賊匪林爽文等糾眾滋擾刦縣戕官一案水師提督黃仕簡陸路提督任承恩俱已帶兵渡臺勦捕漳泉地方緊要不可無大員彈壓藍元枚係福建世家眾所深悉於該處情形自能熟諳著傳諭藍元枚即行馳驛迅速前往泉州署理福建陸路提督即駐劄蚶江一帶幫同常青調度接應一切事宜以期迅速肅清所有江南提督印務著李世傑於該省總兵內揀選暫行署理○閩浙總督常青奏接據臺灣鎮道會稟賊匪於十一月二十八日夜攻陷彰化縣城都司王宗武被害復欲由鹿仔港笨港一路來犯府城當即飛飭員弁帶兵救援又據興泉永道稟稱賊匪攻陷彰化復於十二月初六日攻陷諸羅現在柴大紀帶兵并召募鄉勇守城遣員來厦請救查林爽文籍隸漳州其附從率多漳屬難保無內外勾連漳泉

兩郡為內地根本。尤為緊要。臣一面移咨兩廣督臣於漳州連界之潮州等境一體防範。一面督催兵弁渡臺協力進剿。務期剋日蕩平。知府孫景燧業已被害。現飭福州府海防同知楊紹裘署理。其餘被害文武容俟查明具奏。又福建巡撫徐嗣曾奏彰化諸羅俱陷。賊勢方張。必須厚集兵力以速蕲事。現於臣標及督標水師撥兵一千五百名並調上游之建寧延平兵一千名來省備調。又飛咨廣東浙江撫提各臣於附近水師營內酌撥備戰兵二三千名於本境駐劄以備徵發。又據淡防新莊巡檢王曾錚稟稱賊人現踞後壠。當即招集鄉勇捕剿。現聞塹城已失。程同知被圍不知著落。淡水都司全營兵丁俱駐艋舺堵禦。但兵力單弱必須發兵赴援。臣即將現派備調之省兵一千五百名飭令閩安協副將徐鼎士等帶赴該處勦捕諭旨。常青此次所奏派兵勦捕各事宜較從前稍有主見。

畧知鎮定。但常青摺內稱逆首林爽文係漳州人。其附從之徒率皆籍隸漳屬。其中難保無內外勾連情事等語。此等匪徒糾眾滋事無論何處民人其從賊者即係夥黨。自應按名駢戮。若漳泉民人鄉勇果能應募拒賊出力堵禦防守自應加以獎賞。不應豫存岐視。稍露形跡轉致漳民心生惶懼。別滋事端。此時水陸兩提督先後帶兵渡臺已有六千餘名。徐嗣曾又經派撥兵丁一千五百名渡臺協剿。兵力不為不厚。但閩人性本慆慆若零星打仗致有挫失。是輕為嘗試轉足以張賊勢而餒官軍之氣。於事尤屬無益。著黃仕簡任承恩務須俟各路兵丁到齊約會日期同時併力夾攻自無難一舉蕲事。該督等總須鎮定持重。再徐嗣曾奏飛咨廣東浙江二省督撫提督於附近水師營內酌撥戰兵二千名各於交界本境駐劄如需策應便於徵發亦可藉為聲援等語。此時似可無需隣省

接濟兵。力然備撥亦可。總宜不動聲色。密為佈置。不可稍涉矜張。驚動衆聽。至臺地會匪。究係何會。與有幾年。聚衆數千。蔓延滋擾。刦縣戕官。該地方文武。平日所司何事。豈竟漫無覺察。並著常青於事定後。查明嚴叅示儆。但非目前急務。此時惟當鎮輯內地。速勦賊匪為要。○壬申諭。現在熱河備工銀兩較少。著於廣儲司撥銀十萬兩。照例運至熱河備用。○又諭。軍機大臣會同刑部。嚴議福建南靖縣匪犯陳薦等。糾夥行刦一案。將潘聰等十三犯。改擬絞決一摺。此等匪徒。逃匿山寨。糾夥搶刦。原非尋常盜犯可比。自應從重辦理。但念潘聰等十三犯。究係夥黨。並未傷人。情尚可原。朕斷不肯因現在臺灣有林爽文等。刦縣戕官之事。遽怒及彼。概予駢誅。所有潘聰、李雲、朱厚、林照、沈連用、沈民、林丑、邱奎、黃佛、林牽、沈銳、汪廣、陸潭、十三犯。俱著改為應絞監候。秋後處決。交該撫嚴行牢固收

禁省監候。本年辦理秋審時。再降諭旨。○諭軍機大臣等。臺灣賊匪林爽文等。聚衆滋事。刦縣戕官。一事。前據黃仕簡、任承恩各奏。俱帶兵先後渡臺進勦。朕初以此等匪徒。不過一時烏合。不值水陸兩提督前往同辦。嗣據常青奏。黃仕簡於十二月十五日自廈門放洋。任承恩於十七日登舟開行。會同進勦等語。任承恩既已同往。務須與黃仕簡同心協力。鎮定持重。努力勦捕。若能剋期撲滅。迅速肅事。是即有功。而無過。朕必將該提督等。加恩獎賞。其出力員弁兵丁等。亦必從優議敘。昨常青、徐嗣曾等。奏到各摺。內稱總兵柴大紀。帶兵堵住離府城十里之三坎店。召募鄉勇。緊守府城。十一日與賊打仗。大施火礮。賊勢稍退。是現在府城業經嚴密防守。可保無虞。俟大兵到齊。同時并力夾攻。自可即日蕩平。所有首夥各犯。拏獲之日。即在該處迅速正法。一面奏聞。毋庸再行分別請旨。辦理。致

滋耽延○癸酉諭軍機大臣等據保寧奏請
來京陛見並請將總督印務交鄂輝暫署等
語鄂輝來京瞻覲朕察其才具尚可暫署督
篆已諭令鄂輝即行起程回任保寧俟鄂輝
到川交卸督篆即來陛見再提督成德曾於
上年十一月內奏請陛見現在保寧已准令
來京該省將軍提督止有鄂輝一人成德未
便遽離該處著傳諭成德緩至冬間即帶領
年班土司赴京至藩司王站柱亦欲來京陛
見著俟保寧回任後已屆四五月之時該司
將奏銷辦理完竣再行起程來京將此傳諭
保寧并諭成德王站柱知之○又諭據福康
安奏西安城內鐘鼓樓座及潼關城垣年久
坍塌請動項修理一摺西安鐘鼓樓座及潼
關城垣既已坍塌自應修葺完整以壯觀瞻
德成現在川省驗收城工已延三業已陛見
回任著將原摺鈔寄德成俟伊在川省收工
完竣回京之便順道至西安潼關等處會同

已延三詳悉履勘覈實估計奏聞辦理除傳
知巴延三外將此由四百里傳諭德成知之
○甲戌

上詣

雍和宮行禮○諭據書麟奏安徽安慶廬州鳳
陽潁州等府屬之十六州縣應徵舊欠及歷
年災緩錢糧等項為數較多若同時並徵民
力不無拮据等語安慶等府各屬俱係災歉
之後去年春夏雨水稍多又災後疫氣交作
民間元氣未能遽復若令新舊並徵小民輸
將未免拮据所有安慶府屬之懷寧桐城潛
山太湖宿松望江廬州府屬之舒城鳳陽府
屬之宿州潁州府屬之阜陽潁上亳州蒙城
太和霍邱和州并所屬之含山等十六州縣
去年應徵舊欠及歷年災緩錢糧借欠本折
籽種口糧等項俱著緩至今歲秋成後補徵
以紓民力該部即遵諭行○乙亥享
太廟遣肅親王永錫恭代行禮○遣官祭

太歲之神○

上詣

大高殿行禮○詣

安佑宮行禮○幸圓明園○諭原授公銜鄂爾多斯台吉衮扎布多爾濟從前因唆伊母混行首告將伊拘禁空房今已數載當亦知悔罪安靜矣著施恩釋放交該盟長等嚴行約束至原封公爵宗室永芝因蓋房匠役侵蝕銀兩令家人毆傷匠役致斃業將伊家人擬抵永芝著施恩釋放交該族長及伊伯叔輩嚴行約束毋再生事原任總督富勒渾獲罪監禁年已老邁念其向曾出力著施恩釋放回家俾自省愧悔以示新年推恩至意○丙子

世祖章皇帝忌辰遣官祭

孝陵○諭曰原任山東運河道沈啟震前因守制回籍迄今已一年有餘現在東省有辦理疏濬河渠事宜沈啟震尚為熟諳著即赴該

省專司挑辦聽候差委○又諭向來秋朝審人犯內有業經緩決三次以上人數積多每屆數年勅令刑部堂官量為查奏減等以示法外之仁今自乾隆四十九年十一月查辦之後至五十一年秋讞擬入緩決者又積有六千餘名其數已為不少著刑部堂官將上年秋朝審緩決至三次各犯照前次查辦之例逐一查明各按所犯情節分別減等發落以昭矜恤該部即遵諭行○諭軍機大臣等據蘭第錫奏運河東西兩岸支幹河渠現在均須挑挖疏濬前任運河道沈啟震於五十年守制回籍已經一年有餘請令赴東省協同催查辦理等語此屬可行之事已另降諭旨令該員前赴東省矣但現署運河道羅燦向聞其於水利河道頗為熟悉何以該督奏摺內祇稱工段繁多急需挑濬而於該署道辦理河務是否勝任之處並無一字提及轉似該道不能料理裕如需人幫辦光景看來

似因東省微山湖上年水勢微弱不能收蓄
又聞該處有太行隄一道經行旅車馬往來
碾踏隄工日漸傾圯且從前青龍岡缺口漫
水下注支幹河道不無淤墊前年雖經興工
挑挖究未一律深通以致坡水不能收束入
湖此時自應實力疏濬俾溝塍支幹通流宣
達以期來源旺盛微湖蓄水有盈無絀方為
妥善羅煥現在專管運河不能分身前往所
有微山湖上游一帶疏濬渠幹收蓄坡水事
宜著即交沈啟震來往履勘專司其事悉心
籌辦至現署運河道羅煥於辦理河務是否
實能勝任之處著該督據實覆奏將此諭令
知之尋奏署運河道羅煥在東二十餘年於
蓄洩機宜諳熟實堪勝任惟運河綿長一千
餘里現在各處挑工將來啟壩後糧艘經行
均羅煥一人往來稽查而微山湖水連年收
蓄不能充裕必得專員辦理今特派沈啟震
董司其事臣與羅煥仍不敢稍存諉卸報聞

○閩浙總督常青奏彰化賊匪林爽文等攻
占城池先經臣等派撥官兵六千名三路赴
勦因聞竹塹地方亦被賊踞隨又密飭海壇
鎮總兵郝壯猷統領赴淡官兵一千五百名
相度情形或赴新莊或赴南路而鹿耳門為
臺地咽喉尤須厚集兵力茲復添派督撫二
標兵一千名檄令原任閩安協副將徐鼎士
帶領福寧鎮并桐山羅源等營兵一千名令
福寧右營遊擊延山帶領由省城南臺口及
福安白石口配船過臺交水師提臣黃仕簡
調度俾賊匪剋期殄滅浙江巡撫覺羅琅玕
奏接准福建撫臣徐嗣曾咨會於附近水師
營內酌撥備戰兵三千名以待徵發臣即飛
咨各提鎮於提標及溫州黃巖二鎮標營內
揀派三千名在交界處所駐劄仍分委道府
等官酌派兵丁於各緊要海口實力防範諭
軍機大臣等從前勦捕朱一貴黃教二案調
兵若干名該督自有成案可查今常青既令

任承恩帶兵由鹿耳門前進。又復加調官兵陸續渡臺。并咨會粵東浙江酌備戰兵以資策應。臺灣常有糾眾不法之事。此次常青等何以張皇畏懼至此。徐嗣曾亦有移咨隣省一體豫備之舉。而琅玕此奏尚有主見。不至過於惶遽。著傳諭該督等務宜鎮定妥辦。不可張大其事。使沿海民心生恐懼。於地方大有關係。至常青摺內稱探得澎湖兵於二月十四日到臺。郡安平林遊擊亦帶兵赴援。現在賊勢稍退等語。郡城防守嚴密。全臺根本尚不致有他虞。黃仕簡等務須俟各路官兵到齊。約會日期。同時併力夾攻。自無難一舉蕺事。勦捕淨盡。常青徐嗣曾琅玕尤宜嚴飭沿海文武員弁截擊。逸回匪犯毋使一名倖脫。○丁丑

上御山高水長大。幄次賜蒙古王貝勒貝子公台吉年班回部伯克達羅國使臣並金川土司等宴。○諭曰。刑部將現在監禁官犯及蒙

古外省各官犯。摘敘事由開單進呈。朕詳覈案情。內蘇泰前因臺灣刁民聚眾一案。並不執法嚴拏。反出示勸和。實屬廢弛不職。現在又有奸民林爽文等搶劫滋擾之事。皆由該犯在任時諸事因循玩誤所致。又格通額因周八與伊妾商約同逃。該犯起意將周八誘至家中。連砍斃命。有心致死。蘇泰格通額情罪俱難輕貸。仍著牢固監禁。至蘇卜東阿玉慶一因勸令伊妻節省用度。不服起衅。一因伊妻不聽伊姑教訓。斥責爭鬧。毆斃均係毆死不順之妻。情有可原。著即行釋放。德克進布扣存塘工木價。係為家人劉三所愚。與侵欺帑項者有間。業已二次未勾。著發往伊犁効力贖罪。劉得主士瀚楊仁譽司得壽三達子素爾方阿。聞世豪長明永善圖山沛滿成納蘇圖姜興舟。主治岐蔡薰均係歷次免勾之犯。覈其情節皆尚可原。俱著加恩減等照例發落。蒙古台吉齊巴克多爾濟博和岱。一

係侵蝕恩賞一係致斃人命情罪較重。但係外藩蒙古已經免勾。俱著加恩釋放。交與該盟長等嚴行管束。不許復滋事端。以示朕格外施仁。用普春祺至意。該部即遵諭行。○閩浙總督常青奏。臣前聞竹塹被賊占踞。當即密飭統兵赴淡水之總兵官郝壯猷前往相機策應。今撫臣又派兵一千五百名赴勦。實為緊要。得加惟是臣續調之兵已派令副將徐鼎士帶領。而撫臣所調之兵據稱亦派該副將實緣省城距泉較遠。同時調派以致關會不及。臣隨改派在省之延平副將林天洛帶臣續調之兵過臺。隨水師提臣黃仕簡進勦。再查督撫兩標除派撥防守外。統計兵四千四百名。今已派出三千三百名。會垣重地尚須留兵駐守。據撫臣札稱復調上游之延建鎮兵一千名來省備遣。應俟該二處兵丁到時即留會城駐守。福建巡撫徐嗣曾奏。臣以淡水地方緊要。即飭閩安協副將徐鼎士

遊擊吳秀統領省兵一千五百名進發。連日接據蚶江通判陳惇廈門同知劉嘉會等稟報。鹿仔港一帶現有泉州興化廣東客民各書義民字樣。共相守護。復准提臣黃仕簡亦因淡水新莊巡檢王增鐔稟報。現於艋舺地方募雇鄉勇堵禦。咨臣撥兵救援。臣即添派員弁隨副將徐鼎士等前往。正在候風。適發接准督臣來咨。亦調督撫二標兵一千名交徐鼎士統領赴鹿耳門協勦。查淡水等處待援既急。而鹿耳門一路必須厚集兵力。臣前所調延建兵一千原以備督臣調遣。應即飭令赴泉候督臣派員統領進勦。再廈門對渡鹿耳門較閩安更便。臣已飛飭廈門備船俟兵到飛渡。諭軍機大臣等。總督統轄營制全省兵弁。凡有調遣自當聽督臣主政。巡撫雖亦有封疆之責。不得稍存膜視。但調發兵弁應札商督臣。公同檄調。况無迫不及待之情。形也。此乃國家體制。不可紊越。今徐嗣曾惟

恐毫無調度。跡涉推諉。是以紛紛徵發。以見留心努力。並咨會廣東。浙江等處。挑備戰兵。豫資策應。使本省兵弁。號令兩歧。事權不一。且省垣重地。自應多兵駐守。今輟轉更調。亦非慎重根本之道。該撫於此案初起時。尚能鎮定。其後何以冒昧若此。但究屬為地方起見。尚無大咎。亦不得因有此旨。過於畏葸。而置要務於不問。且督撫因此。或致不睦。更於公事無益。徐嗣曾惟當與常青彼此和衷。籌酌機宜。協同妥辦。以期迅速。藏事至該督等摺內所稱。鹿仔港等處。有客民義民共相糾集。守護地方等語。該處商民等。激發公義。保護地方。甚屬可嘉。著該督撫。俟事竣後。公同查明。分別獎勵。○戊寅

上還宮。○是日起。

上以祈穀於

上帝。齋戒三日。○己卯。諭。每年新正元旦。及八月慶萬壽之期。所有守護各

陵貝勒貝子公大臣等。皆輪班特來朝賀。朕念伊等逢朕巡幸各處。既已接駕朝覲。而新年及朕萬壽各處。又有望闕拜賀之例。嗣後朝正慶壽。毋庸前來。俾省勞費。其總管等。亦著一體遵行。○又諭。曰。琅玕奏。浙省漕白幫船。節年借領各款。有未完銀一十六萬八百餘兩。本年應扣八萬二千兩。零請旨分別寬限完繳。以紓丁力。又另片奏稱。浙漕本年應行搭解四十七萬八千九百兩。緩交餘米及失風賠補米共二萬二千九百七十餘石。請於本年先搭解一半。餘俟下運解交各等語。浙省丁力疲乏。各幫扣項既多。辦運恐致拮据。著加恩將極疲扣款較多之台前。台後。溫前。溫後。處前。處後。金衢所。杭頭。杭二。嚴所。嘉白。湖白。十二幫。借款銀十三萬九千一百五十六兩零。於五十一年為始。分作八限扣繳。次疲扣款較少之寧前。寧後。杭三。杭四。湖所。海所。嘉海。紹前。紹後。九幫。借款銀三萬一千六百八

十三兩零。於五十一年為始。分作六限扣繳。其各幫應行搭解餘米二萬二千九百七十餘石。亦著加恩。於本年先行搭解一半。餘俟下運全數解交。以示體恤。該部即遵諭速行。○又諭。前據常青等奏。閩省臺灣有奸民林爽文等。糾眾戕官。占奪縣城一案。即經諭令該督等。督飭鎮道等。實力查辦。並經提督黃仕簡等。帶兵渡臺。堵截搜捕。嗣據常青等奏。總兵柴大紀等。用礮轟擊。十四日澎湖兵到。賊勢退避。本日復據常青奏。有賊夥吳異人。到艋舺地方。稱欲帶兵接應賊人。經署都司守備易連。將吳異人等四犯。拏解營中。梟示。又有監生黃朝陽等。並本處及廣東省義民各五六百名不等。募集鄉勇。協力攻殺賊匪。鎗礮齊發。殺死匪犯數百名。餘賊望風奔散。各等語。林爽文。於光天化日之下。膽敢糾眾戕官。占據縣城。實屬罪大惡極。法不容誅。該署都司易連。於賊夥吳異人等。前往助賊時。

即擒拏斬梟。以安民心。所辦甚屬可嘉。易連俟事竣後。著該督給咨送部引見。至該處生監商民。激發公義。糾眾攻殺賊匪。保護地方。實可嘉獎。著該督等。查明分別旌賞。以示優獎。其義民內有被賊傷害者。并著該督等於事竣後。查明具奏。照陣亡兵丁之例。一體議卹。○又諭。曰。臺灣奸民林爽文等。糾眾滋事一案。該督常青。勦捕逆匪。一切調度。堵禦機宜。辦理尚屬鎮靜妥協。現在水陸兩提督葉經渡臺會剿。逆匪自無難立時撲滅。惟是海疆重地。將來善後事宜。均須妥協籌辦。常青係初任總督。恐未能料理裕如。李侍堯久任封疆。雖於軍旅未嫻。而辦理地方事務。於輕重緩急。機宜較為熟練。李侍堯著調補浙閩總督。即馳驛前赴新任。湖廣係腹地。省分且地方寧謐。無事。常青自能勝任。即著調補湖廣總督。俟李侍堯到閩接印後。常青即來京請訓。再行赴任。現在李侍堯。自京啟程。常青

到楚往返尚需時日李封年老兼署督篆恐精神未能周到所有湖廣總督印務著舒常馳驛前往署理俟常青抵任後再行回京○諭軍機大臣等常青甫經擢用總督即遇地方有此等案件亦其年運所致會逢其適但伊於辦理此案尚無不合惟是事定後一切善後要務均須妥協籌辦常青究係新任恐未能料理裕如李侍堯久任封圻能知事體之輕重緩急是以降旨將伊與常青對調所降諭旨俟李侍堯將次到閩時再行發鈔若不然該省一聞李侍堯來閩之信常青必心疑獲咎恐欽差查辦意存畏懼轉致驚惶失措於事尤屬無益常青接奉此旨固不可因調任在即於調度勦捕一切事宜稍存觀望尤不可稍露端倪致地方文武員弁聞總督業經更換各存弛懈之見以致呼應不靈并傳諭徐嗣曾一體慎密諸事幫同常青實力妥辦若稍有洩漏致文武員弁聞知常青遇

事掣肘朕必重治其罪恐徐嗣曾不能當此重戾也○又諭曰李世傑奏亳州知州趙霖稟稱准山東魚臺縣來咨緝獲代段文經拉車之張二小供稱上年八月二十三日曾送段文經至亳州北關禮拜寺西北李姓飯店當據該州分派委員將開設飯店之李端士李福海等逐一搜查並無段文經蹤跡恐李端士等因無人質證狡供不吐已委員押解山東質審等語張二小現據魚臺縣拏獲並有拉車送段文經至亳州李姓飯店之語該縣既咨會亳州斷無不稟報明與之理何以該撫竟未將此情節具奏獨不知要犯未獲朕時時煩懣耶明興著傳旨申飭仍即將張二小於何日緝獲其如何替段文經拉車及送至亳州後在何處分手逐一訊取確供再李端士等解到後曾否質對明確有無段文經實在下落之處著一併迅速覆奏將此由五百里傳諭明興並諭李世傑知之○又諭

曰琅玕奏。浙省幫船積欠銀兩。酌請分限扣還一摺。已明降諭旨准行矣。至摺內所稱新船義會銀兩。及幫丁寬限扣項外。應行找發銀兩。於沿途找發等語。所奏殊未明晰。閩省屢有結會滋事之案。現在臺灣復有奸民林爽文等。糾眾立會。正當勦除搜捕。以淨根株。此等義會名色。日久相沿。恐滋事端。且幫船內人夫衆多。稂莠不一。尤宜嚴禁。嗣後即將義會字樣。另行酌改。毋得仍沿舊習。以資影射。至幫丁找發銀兩。如應行給發。尚未全給之項。為之找發。此等寬限。後於沿途陸續補給者。只應寫補發字樣。何得謂之找發。轉致眉目不清。總緣該撫不諳文義。所致以後。務宜留心檢點。又該撫奏。浙省民竈沙地。題請升科。及奏銷完欠錢糧。各摺內稱。正課珠車并正珠銀兩。此項究係何款。何以有此名色。摺內並未聲敘明晰。著傳諭琅玕。即查明各款。詳晰覆奏。尋奏。浙省幫丁借欠銀兩。係乞

恩緩扣。自應聲敘補發字樣。至義會一項。係各幫旗丁。公借幫貼新船費用。義會名目。舊習相沿。應請改為新船公借名目。又浙省民竈沙地。題請升科。及奏銷完欠錢糧內。有正課滴珠并車腳各名色。歷來奏銷冊內。率將正課滴珠併為正珠。將滴珠車腳併為珠車字樣。未經分晰改正。請嗣後將三項分行開列。不敢併寫牽混。得旨。以後慎之。毋為俗幕實所誤。又批。實為可笑。外省省文陋習。可厭之極。○庚辰

上詣
南郊齋宮齋宿。○諭。據毓奇管幹珍奏。淮安等屬頭進幫船。業於上年十二月二十八日盤驗過淮。其後接之揚州等幫。亦據報次第開行。現在派員迎催。務期依限來淮等語。此次南漕頭進首幫。依限催趲。於年前發盤過淮。其後接之幫船。亦俱銜尾前進。無虞阻滯。辦理尚為妥協。上年回空漕船南下時。毓奇正

在患病。茲新漕得依限渡淮。自係管幹珍上緊督催。幫同妥辦。所致管幹珍著交部議敘。○諭軍機大臣等。琅玕奏謝恩賞一摺。內恩賜福字並鹿肉麋肉到省等語。各省督撫年例俱賞給麋鹿。且字典內並無麋字。自係麋字之訛。已用硃筆點出。此皆緣琅玕不諳文義。一任庸幕率行繕寫所致。此等陳謝之摺。繕寫舛誤。尚非緊要。若遇地方事務亦如此。漫不經心。可乎。著傳諭琅玕。嗣後於具奏事件務宜加意自己檢點。莫任庸幕疎忽舛錯。疎忽尚可。至於作弊則不可也。○辛巳祈穀於上帝。

上帝。上親詣行禮。○辛圓明園。○諭軍機大臣等。據畢沅奏。盤獲直隸清豐縣人樊永錫。訊係震卦邪教餘黨。並究出該犯上年閏七月內與素識之南樂人張興相遇。張興令其糾約會衆同往大名。該犯畏懼。未經前往。現將該犯

解回直隸。交劉戡審辦等語。樊永錫既係邪教餘黨。且經張興相約謀逆。顯係大名案內夥黨。自應嚴行根究。劉戡現在查閱營伍公出著傳諭梁肯堂。一俟豫省將該犯解到。即派委妥員迅速解送刑部審訊。並飭沿途小心管押。毋致疎縱。○壬午諭軍機大臣等。閩粵境壤毗連。臺灣賊匪糾衆滋事。孫士毅接准咨文。派兵前往豫備策應。及嚴飭各隘口嚴密盤詰。此係當辦之事。至孫士毅係隣省總督。止當鎮靜地方。堵拏逸犯。豈得輕離省城。以致粵東內地民心懷疑。惑外省各督撫遇有此等事件。每以親身前往。見其急公而不權事理之輕重緩急。孫士毅此時如尚未起程。即毋庸前往。若業已起程。亦即速回省。○癸未。

上御奉三無私殿。賜皇子皇孫皇曾孫諸王等宴。○臺灣鎮總兵柴大紀奏。臣於初七日拏獲奸細林馬。訊供賊匪現分水陸兩路來犯。

郡城。臣相度形勢。惟鹽埕橋扼要。隨馳往察。看見賊船數百隻。浮水而來。當飭弁兵。施放鎗礮。打沉小船數十隻。餘船逃去。而遍野賊匪萬餘衆。又至。復督兵勦殺。至初九日。打死數十名。連日旋退旋來。我兵奮戰。斃賊數十名。數百名不等。生擒十餘人。俱即正法。又奏接臺灣道永福札稱。鳳邑叅將瑚圖里。於十二日。聞賊欲犯鳳山城。即帶兵駐劄城外防禦。十三日。賊匪二千餘名來攻。瑚圖里即督兵攻擊。轟斃五六人。賊匪俟其追勦。乘虛入城。該叅將即縱馬南去。不知下落。知縣湯大奎。見賊已入城。當即自刎。臣現派澎湖協。及城守兵一千名。赴南路抵禦。臣仍駐兵鹽埕。截擊北路賊匪。諭軍機大臣等。此次柴大紀與賊打仗。奮勇得勝。尚屬可嘉。北路賊勢蔓延。鹽埕橋係水陸扼要之區。該鎮自應仍在。彼督率勦捕。未便遽回郡城。以致賊人踵後。且南路既經該鎮派撥澎湖協。及城守兵丁。

共一千名前往。諒亦足資抵禦。至林爽文等。輒敢豎旗結會。並用鎗礮攻犯城池。竟屬有心謀逆。此皆由從前辦理械關各案。該地方官等。止期就案完結。將就了事。並未徹底嚴辦。以致刁民肆無忌憚。釀成巨案。此次惟有痛加誅捕。以示懲創。斷不可使一名倖逃。顯戮。但此時不可稍露端倪。俾使賊匪自知必死。負隅固守。轉於攻捕無益。總之助賊者。即係亂民。法無可貸。其不肯從賊。及幫同官軍出力者。無分漳泉。俱係良民。自應一體獎勵。使賊勢日孤。易於竣事。○甲申。

上 詣

安佑宮行禮。○御正大光明殿。賜朝正外藩等宴。召左翼科爾沁和碩親王。恭格喇布坦。旺扎勒多爾濟多羅郡王。鄂勒哲特穆爾額爾克巴拜。喇什噶勒當烏珠穆沁和碩親王。瑪哈索哈喀喇沁親王。品級多羅郡王。喇特納錫第巴。林親王。品級多羅郡王。巴圖固山貝

子德勒克。奈曼多羅郡王拉旺喇布坦。翁牛特多羅貝勒。濟克濟扎布。阿魯科爾沁多羅貝勒。阿爾達什第。教漢固山貝子桑濟扎勒。右翼喀爾喀和碩親王固倫額駙拉旺多爾濟。和碩親王車登扎布。教漢多羅郡王齊默特。噶瓦。阿巴噶多羅郡王喇特納什第。科爾沁多羅貝勒三音察衮。土默特貝勒索諾木巴勒珠爾。翁牛特固山貝子圖們巴顏鄂爾多斯固山貝子丹巴達爾濟等。至御座前賜酒成禮。○閩浙總督調任湖廣總督常青。奏接署守備陳邦光兩次稟稱。林爽文於十一月二十七日。夜搶劫大墩營。盤遊擊耿世文。全軍俱陷。二十九日。即攻入彰化。知府孫景燧等數十人被害。復來犯鹿仔港。并淡水諸邑。懇請救援。一稱十八日。賊匪謀犯鹿仔港。陳邦光傳集義民。豫先埋伏。殺賊百餘名。焚燬賊莊數處。復於二十日辰刻。率義民攻襲賊巢。賊匪退踞烏日莊。又稱十二日午刻。督

率義民抵彰化。攻勦擒獲偽副元帥楊振國等四名。殺賊百餘名。獲馬二匹。礮位。刀械八十餘件。餘賊逃逸。將擒獲偽官解送泉州。候勘。二十三日。林爽文黨羽陳泮。吳領等。燒燬泉粵民莊。隨率義民等追捕。殺賊三十餘名。拾獲紅旗器械四十餘件。該署備及義民等奮勇可嘉。俟查明後。奏請優獎。至水師提臣黃仕簡。陸路提臣任承恩。均於二十八日。放洋計期。兩三日內。即可揚帆直達。諭軍機大臣等。賊匪敢用鎗礮。攻犯城池。罪大惡極。不特首惡之父兄。妻子應行緣坐。即如現在。拏獲之楊振國等。四犯俱曾受偽職。并與官兵抗拒者。亦應一律緣坐。該犯等係漳州民人。其家屬想仍在內地。若此時遽行查辦。恐漳民聞而生駭。轉多未便。著常青。俟楊振國等四犯解到時。訊明各要犯家屬下落。密為存記。俟黃仕簡等。在臺搜捕賊匪事竣。大兵撤回時。按名查拏。辦理自無虞。其免脫漏網。至

署守備陳邦光督率兵民殺退賊衆並擒獲賊目解送內地審辦尚屬奮勇可嘉著常青於事竣後查明給咨送部引見其義民鄉勇等亦當分別旌賞以示獎勵至賊匪滋擾鳳山時叅將瑚圖里乘馬追賊轉被賊人乘虛撲入城內兵丁衝散瑚圖里由南而去不知下落是該叅將之不能抵禦賊衆由於兵散與臨陣退縮者不同此時尚可不治以委城而去之罪若該叅將能收集兵民再行出力殺賊則其功罪足相抵統俟常青於事竣後查明具奏到日再行覈辦其知縣湯大奎雖未能堵賊守城但既經自刎究屬可憫亦應查明議卹至黃仕簡與任承恩因海洋風色不順難涉險輕進朕亦不責以遲延計此時各路大兵俱已早到黃仕簡等務宜督率兵弁分路會剿奮勇勦賊速奏蔽功○順天府行鄉飲酒禮

實錄卷一百三

三

大清高宗法天隆運至誠先覺體元立極敷文奮武孝慈神聖純皇帝實錄卷之一千二百七十二

實錄卷一百三

三

大清高宗法天隆運至誠先覺體元立極敷文奮武孝慈神聖純皇帝實錄卷之一千二百七十三

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十二年丁未正月乙酉

上御正大光明殿。賜大學士尚書等宴。○諭軍機大臣等。據明興覆奏。魚臺縣拏獲張二小。訊據供出之段姓客人。年貌俱與段文經相同。看來必係段文經。劉勤上年實屬逃至亳州。現在自仍在亳州一帶。及江省境內藏匿。著傳諭李世傑。書麟。務宜督飭所屬。購線蹤蹠。實力捕緝。以期必獲。即或該犯上年逃至亳州後。其窩留之人。見查拏緊急。知難久藏。懼于連累。任令該犯自戕。或將伊致斃。以飾

其窩留之罪。皆不可知。然此時如果據實呈首。轉可寬其從前知情不舉之罪。但此事僅出示曉諭。恐愚民無知。仍不肯首出。須令該地方官。到處詳悉曉諭。開導速令呈首。首出後。並當驗明屍身。方可完結此案。此事該督撫既失察於前。若現在再不能實力查緝。將來別經拏獲。審出該犯又在江南潁亳等處藏匿。恐該督撫不能當此重戾也。再湖北。江南二省。俱與安徽省毗連。段文經等。見徐克展被拏。恐其到案供出。果由鹽船逃至漢口一帶。否則又由鳳潁轉至歸德。周家口等處。潛回原籍。探聽消息。均未可定。並著劉我。舒常。畢沅。李封。嚴飭所屬。上緊緝拏。務須跟尋該匪等實在下落。毋得因日久生懈。若視為海捕具文。則劉我。等獲咎滋重矣。將此由六百里傳諭劉我。李世傑等。並諭明興知之。○丙戌。諭曰。王進泰奉職中外。宣力有年。近因年逾八旬。曾經降旨加恩。准其原品休致。賞給

內大臣職銜。給與全俸。俾得優游閒居。並令伊子王柄回京侍養。而王進泰旋即溘逝。殊屬可憫。著加恩賞給銀五百兩。辦理喪事。以示優卹。老臣之至意。所有應得卹典。著該部查例辦給。○諭軍機大臣等。據陳杰奏。查看統轄漕屬鹽廟五營。實存火藥。與冊檔不符。詰問其故。皆因歲需硝磺。不能按期到營。只得借動儲備。又查得鎮屬通州中左右三營。四十九。五十一。三年之硝。祇有二年到營。其一年之硝。三年之磺。皆未到營等語。所奏實屬可嘉。已於摺內批示。各營火藥。為兵丁操演之需。最關緊要。自應照數實貯。以資儲備。況該省沿海地方甚多。尤應隨時查察。乃陳杰到任未幾。即查出漕屬及通州等營。歲需硝磺。俱不能按期到營。以致借動儲備。可見該省營務廢弛。殊不可問。此項火藥。係由江寧藩司委員採辦。自應年清年款。以實軍需。何以遲玩若此。著傳諭李世傑。毓奇等。

即行會同東公據實詳查。如係藩司辦理遲延。不能如期運到。即將該藩司嚴行叅奏。若藩司已經派委。而承辦之員。採運延玩。即將該委員一併効叅。倘該藩司及委員等俱係按期採辦。運送各營。而營員別有那移短缺情弊。亦應將該營員據實叅奏。況藩司採辦火藥。年終俱有報銷。若並未按期送營。而年底造報冊內。已有此項開銷。若非承辦之員私自分肥。即係以採買價銀。那移侵用。尤不可不徹底查辦。又據陳杰檢查舊案。內有四十七。八。兩年。歲需之磺。係五十年六月間奉借蘇州軍火局內磺一千九百餘觔。分給狼標八營配用。直至五十一年秋間。採辦之員。方買回撥還蘇局等語。看來此事弊端已非一日。李世傑等。務須逐層嚴究。覈實詳查。使積弊清釐。營儲充實。毋得稍存瞻徇迴護之見。將此由四百里傳諭李世傑等。並諭陳杰知之。○又諭。本日據書麟奏。尋常案犯已未。

緝獲。分別覈記功過一摺。已於摺內批示。該省於大名案內徐克展一犯。在亳州藏匿時。並未能立時拏獲。現在段文經。據山東獲犯張二小供出。亦曾在亳州經過。該督撫等。迄今並未將該犯緝獲。可見該省於督緝要犯。尚不過視為海捕具文。此等尋常彙奏之事。祇係空言敷衍。更不可信矣。李世傑書麟。著傳旨嚴行申飭。該督等務須督飭所屬。上緊緝拏要犯。毋得因日久稍存懈弛。仍蹈海捕具文致干咎戾。○丁亥諭。前於十公主指額駙時。曾經降旨。俟年及歲。再將指婚一切禮儀。著該部查例舉行。茲公主年已十三歲。朕之幼女。生質端莊。天性敏慧。溫和篤厚。朕優愛之。本年又值及笄吉禮。著加恩晉封為固倫公主。所有指婚一切應行禮儀。該部即查例遵照辦理。○又諭。向來大學士缺出。多按資格。以協辦大學士補授。劉墉在尚書中資分較深。且協辦有年。本應實授。惟是上年在

熱河時。及回鑾後。曾與軍機大臣等論及嵇璜年老。若求回籍。不忍不從。及曹文植現有老親。若求回籍養親。亦不忍不從而皆惜之。此不過尋常議論耳。然見嵇璜精力尚未就衰。在漢大臣中。最為老成。且欲留以相伴。又部院諸臣。一時乏人。曹文植亦屬能事。故胥遲之意。軍機大臣自不敢以議論之言。即行宣露。事隔多時。嵇璜等亦並未有所陳請。昨終召見劉墉。偶曾與之閒論及此。乃次日曹文植於召見時。即有告養之奏。朕詢之軍機大臣。俱稱並未向嵇璜等說及。同稱係劉墉在懋勤殿所言者。朕召見諸臣。君臣之間。原如家人父子。且以劉墉係劉統勳之子。內廷行走之人。非不可與聞者。是以向其論及。乃劉墉即以告之嵇璜等。其意不過欲嵇璜聞知請告。劉墉即可覬覦補授大學士。以此言語不謹。此時豈可即以劉墉實授。以遂其躁進之私耶。現在尚書中。王杰資俸亦深。在內

廷行走有年。且現在大學士。軍機處已有滿洲二人。亦不可無一漢大學士。王杰著補授大學士。所有兵部尚書員缺。著彭元瑞調補。其禮部尚書著紀昀補授。德保。紀昀俱屬中材。王杰著管理禮部事務。以資經理。將此通諭知之。○諭軍機大臣等。近聞李封年力就衰。有重聽健忘之處。恐湖北巡撫事務繁劇。李封未能辦理裕如。著傳諭舒常於到湖北後。留心體察。如李封精神尚能周到。堪以勝任。即行具奏。若該撫果係精力就衰。於地方事務未能辦理妥協。難以勝任。亦即據實奏聞。候朕另行簡放。○又諭據書麟奏。搜查亳州李姓家。並無段文經蹤跡。一摺。內稱重犯雇車逃竄。自必隱姓埋名。斷無向張二小自道名姓之理。即李端士等各飯鋪。亦何由而知。未經留歇。段文經等語。書麟所奏。頗為有見。已於摺內批示矣。段文經係大名首逆。自該犯逃逸後。各省畫影圖形。通行緝捕。該犯

自知罪大惡極。到處自必易姓移名。希圖竄匿。斷不肯向張二小自稱姓段之理。或係張二小素與段文經認識。恐干容隱之咎。故將段文經說出。為卸罪地步。或係地方官向其嚴訊。張二小畏刑妄供。俱未可定。著傳諭明興。即提張二小。反覆開導。令將前此所供。是否屬實。如果實係段姓。即將段文經實在下落。該犯是否確知之處。逐一根究。務令據實供吐。即行覆奏。毋得迴護原奏。稍存諱飾。將此傳諭明興。並諭書麟知之。○兩廣總督孫士毅奏。臺匪糾眾滋事。臣密札鎮將等訪查。凡在漳泉游食民人。有回潮形跡可疑者。一面盤詰。一面拘管。毋許輕易釋放。諭。現在臺灣勦捕賊匪。即有粵東義民在彼。幫同官兵出力殺賊者。此時如有回潮民人。正係不肯從賊。及避亂回籍之人。該督應令地方官收恤安慰。何得轉令拘管。不准釋放。是毆良民。轉令從賊。更屬不成事體。著傳旨嚴行申飭。

該督係軍機司員出身曾經隨同出兵非若未經軍務者可比乃於事體輕重毫無定見適足為朕所輕矣孫士毅當於該處明白曉諭以此事辦理錯誤現奉諭旨訓飭所有回潮民人仍俱各安生業毋須拘管俾該處民人安居樂業不致驚疑設遇有漳州臺匪餘黨竄匿粵省自應訪拏究辦○軍機大臣奏查閱大清會典載有固倫額駙服色與貝子同一節其一切穿戴並未詳細開載復詢之從前固倫額駙色布騰巴勒珠爾未襲王爵以前及緣事革去王爵以後皆係戴紅寶石帽頂三眼花翎金黃帶紫韁服色與貝子同得旨固倫額駙豐紳殷德即著照此例○戊子禮部題朝鮮國王李祘遣使表賀萬壽冬至元旦三大節及進歲貢方物賞賚筵宴如例○己丑諭據李世傑奏查辦狼山鎮統轄之鹽城等營歲需硝磺均有缺額一摺內稱推求欠解之故因各營硝觔向在徐州各

屬採辦長途往返不無折耗是以每年查辦之硝不能一一清款其硝觔一項係委員赴山西採辦兩年并辦一次每屆辦硝之年又搭買運司衙門歲需烟盒硝觔此項價銀各屬催解不前委員守候需時不能適合兩年一辦之期遂致支絀等語此事昨據陳杰於到任後查出各營火藥短少情形據實具奏已有旨查辦矣今李世傑因該鎮陳奏在先知難掩飾方以一奏塞責為此取巧之言已大屬非是而摺內並以歲需烟盒為詞更無此理硝磺為軍火要需向來俱係委員採辦足額如期運送到營即以兩江而論如安徽省亦有採辦硝磺據奏足額何獨江蘇遂形短缺不能年清年款其兩淮年例每歲不過烟盒七架大小爆竹一箱所需能幾較之京師每歲製辦烟火等項尚不及十分之一而內府花爆竹每歲開銷僅需硝磺一千餘觔是兩淮承辦烟盒所用硝磺更屬無幾且此

項係鹽商自行買辦。年例進貢。與通省營伍毫無關涉。何得以此藉口。况硝磺產自民間。鋪戶製造。花爆售賣者甚多。即如京城。每遇除夕元旦燈節。居民所放花爆。晝夜喧闐。不可勝計。從未聞有關礙健銳。火器。驍騎。巡捕。各營軍火之需。此人所共知者。若果於軍器所儲有礙。國家早有定制。禁止民間花爆矣。即如江浙等省。商賈輻輳之區。此風尤盛。而兩淮商人爭新闢勝。烟金花爆。備極繁靡。由來已久。即該處地方官衙門。遇新年令節。亦宣竟不施放花爆。此等硝磺所用不知凡幾。又從何而來。豈皆官為採辦。致與營伍軍火有關礙乎。明係承辦委員。採運遲延。故創為此語。以為卸罪地步。乃該督不以為怪。轉以此牽涉聲歆。巧為支飾。有是理乎。李世傑向來辦事。尚為細心。今乃為此奏。看來該督竟係因病精神恹懣。顛倒督亂。而本來又不通文理。於此等事不能認真查覈。輕聽承辦之

藩司委員等巧飾之詞。一任庸劣幕友率行繕摺入告。李世傑著交部嚴加議處。並著將採辦硝磺不敷。由於歲需烟盒之處。此語得自何人。會同徵瑞據實具奏。毋得稍有諱飾。致干咎戾。又據另片奏稱。江南沿海各營火藥。本屬急需。現在臺匪滋事。尤應豫為儲備。已於附近各營內。借動火藥。撥赴狼山。崇明。各營等語。臺灣匪徒。不過一時烏合之衆。現在官兵會剿。無難立時撲滅。何至需用他省兵力。即廣東。浙江。鄰省。朕尚以其張皇。屢行申飭。李世傑以此為詞。尤為不知事體輕重。總屬一錯百錯。籍詞掩咎。欲蓋彌彰耳。至各營火藥。關繫緊要。乃節年解送短缺。其弊自非一日。非李世傑一人所能查辦。徵瑞向來細緻。著會同該督秉公嚴查。據實參奏辦理。其現在短缺火藥。務須嚴飭委員。採買足額。迅速解營。若再因循玩誤。恐李世傑不能當其咎也。將此并諭知之。○又諭曰。魁亮。自發

遣以來業經十有餘年。當亦自知前罪。痛加省改矣。著加恩寬免。令其來京。○又諭曰。江寧副都統武德禮。年力衰邁。著以原品休致。○諭軍機大臣等。本日據李世傑奏。江南各營歲需硝磺。不能依限到營。實因各屬採辦往返遲延。並搭買運司衙門歲需烟盒磺觔等項。價銀催解不齊。不得不為守待。以致支絀等語。業經明降諭旨。交該鹽政會同李世傑查辦矣。向來鹽運司衙門承辦年例呈進烟盒花爆硝磺如何採買。係屬何商承辦。每年發價若干。共採買硝磺若干。是否商人自行備辦。該鹽政到任數月。自當訪問明悉。著傳諭徵瑞。即將向年採買磺觔如何辦理。因何於營伍硝磺搭解。致相牽涉之處。詳悉查明。據實覆奏。李世傑原摺及朕硃筆諭旨。並著鈔寄閱看。其通省遲延買運之故。著徵瑞認真嚴查。並申明通省應買硝磺。鹽商進烟盒花爆所用幾何。並其中有無弊竇。據實明

白查奏。不可顛預了事。○閩浙總督調任湖廣總督常青奏。臺地將賊目楊振國。高文麟等解到。據供。逆犯林爽文。住彰化大里杙莊。平日窩賊搶竊。樹黨結會。經該縣俞峻訪聞。差役楊咏。即楊振國往拘。嗣知從前林爽文犯竊被獲。係該役賣放。遂將該役收禁。又聞別案逆犯張烈等。亦逃避林爽文處。該縣即稟知鎮道。帶兵搜捕。林爽文起意戕官。占據縣城。即於十一月二十九日。攻破彰化。自稱盟主大元帥。楊振國為副元帥。分攻諸羅。淡水。楊振國等。旋經陳邦光募集鄉勇擒獲。又供。天地會。係平和縣人莊烟。即嚴烟。於五十二年過臺起會。云係廣東後溪鳳花亭和尚洪二房。同一十五六歲朱姓人倡立等語。該犯等膽敢從逆戕官。占據城池。實屬罪大惡極。應請解京究辦。一面派員密訪嚴烟下落。一面飛咨粵省。躡緝洪二房及朱姓人蹤跡。期於必獲。以便歸案辦理。諭曰。常青辦理此

事。初時未免稍涉矜張。嗣據該督等節次奏到調度進剿各事宜。辦理漸有主見。至所獲匪犯。朕意本欲令其解京。今該督於獲犯審明後。即請解京審辦。並鎮靜辦理各事宜。皆與朕意適合。不意常青竟能如此甚屬可嘉。至嚴烟籍隸漳州。不難即時擒獲。並著常青於拏獲該犯後。一併妥速解京。前因該處善後事宜緊要。恐常青究係初任。因思李侍堯外任有年。較為諳練。是以降旨調任。令其前往辦理。此時該督惟應督率弁兵。於應行辦理之事。悉心調度。以期迅速。歲事朕必加恩嘉獎。更不必以調任繫心。稍存疑畏。轉於勦捕無益。現在黃仕簡任承恩。自必已到臺灣。厚集兵勢。合力勦捕。賊匪自無難立就殲滅。一得捷音。迅速馳奏。○又諭曰。臺灣逆匪倡立會名。戕官占城。實屬罪大惡極。至所供起會根由。係和尚洪二房。并姓朱的。俱是廣東人。朱姓年祇十五六歲。何能糾眾匪徒興起。

會名。輒敢有謀叛等事。恐即係洪二房依附朱姓名目。從中煽誘。又如從前朱一貴謀逆情事。皆未可定。不可不嚴行根究。著孫士毅查明後。溪鳳花亭。究在何府州縣。即將和尚洪二房。并朱姓。嚴密躡緝。迅速查拏。一經緝獲到案。訊得確情。即一併派委妥幹員役。迅速解京。歸案審辦。並著飭令沿途地方。一體小心押送。毋得稍有疎虞。○庚寅諭。據曹文植奏。伊母年逾八旬。陳請終養等語。曹文植供職有年。如伊母本迎養在京。自毋庸令其回籍。茲念伊母年登大耋。遠處本籍。若不准其歸養。朕心實有所不忍。亦非以孝治天下之意。曹文植著准其終養。伊久直內廷。辦理部務。頗為出力能事。著施恩加太子太保銜。並御書扁額。賞給伊母。以示優眷。所有戶部尚書員缺。著董誥補授。彭元瑞著充補武英殿總裁。蔣賜榮著調補戶部左侍郎。兼管順天府尹事務。其倉場侍郎員缺。著劉秉恬調

補。○又諭曰。興福係由乾清門侍衛補放。察哈爾副都統年班來京。陛見祇隨衆請安。而朕前行走一切差使。伊不與列。竟不似向在禁廷行走之人。可見少年一得外用。坐享安逸。便心足意滿。著調補烏里雅蘇台副都統。換回阿克東阿。興福到彼後。當感激朕恩。協同將軍辦理諸事。詔勉學習。○諭軍機大臣等。臺灣地方。自康熙年間。始隸版圖。因遠隔海洋。該處府廳各縣。俱未建立城垣。後經朱一貴聚衆滋事。平定後。總督滿保曾議建城。惟時以地處海外。無城雖難於防守。然失之易。復之亦易。是以未經建立。以節繁費。但該處久成郡縣。與內地無異。而城圍尚相沿用。竹木編插。不足以垂久遠。且此次林爽文糾衆猝起。縣城遂被攻破。究由荊竹不能防禦所致。朕意與其失之復取。既煩我兵力。又駭衆聽聞。何如有城可守而勿失。更為有備無虞乎。況方今國帑充盈。該處郡城廳縣。不過

五處。即建立城垣。動用不過百萬。何惜而不為。至建城時。如該處可立窩座。或用外磚內土之法。如窩座不便。該處徧地皆山。即開採石料。以代磚工。更為鞏固。著李侍堯於臺匪蕩平之後。詳細熟商。歸入善後事宜案內。一併妥議。勘估繪圖具奏。○又諭曰。高文麟等係臺匪案內。領受偽職要犯。必須解京嚴行究訊。盡法懲治。著沿途各督撫於該犯等到境時。務須遵委妥員。多派兵役。小心防範。迅速解京。毋致中途稍有疎虞。致干咎戾。○以鑲白旗滿洲副都統薩炳阿。為江寧副都統。散秩大臣吉慶。為鑲白旗滿洲副都統。○辛卯。諭曰。戶部奏。五十一年分。揚關由開收稅贏餘銀兩。比照上屆。及再上兩屆短少。請照例以短少最多之六萬七千二百五兩零。著落管理關稅前後任道員。按照經徵月日。分別賠補等語。固係照例辦理。但查上年春間。因運河築壩蓄水。夏秋以來。又因湖河漫溢。

商賈稍稀。其收稅銀兩短缺。尚屬有因。所有應行賠補銀六萬七千二百五兩零著加恩寬免一半。餘仍著該管道員各按經徵月日分別賠補。○又諭松筠著即在庫掄辦事。佛住著調補察哈爾副都統。佛住所遺正黃旗蒙古副都統員缺著伊齡阿補授。○又諭地方偶有聚眾滋事之處。總督既經前往巡撫。自當在省靜鎮。不應輕離會城。以致人心疑駭。昨孫士毅奏親赴潮州彈壓。今徐嗣曾復有前往閩安之奏。惟知出力急公。而不權事體之輕重緩急。朕并不嘉其不辭勞苦。轉為朕所鄙矣。此時各路官兵自早已分頭會剿。賊匪無難立就殲滅。惟竄匿賊黨恐有逃至內地者。當於各海口不動聲色嚴行防範。截擊此則徐嗣曾應辦之事。該撫務督飭所屬嚴行妥辦。不可張皇疎忽。如得有勦賊情形信息。仍著由驛迅速具奏。○以兵部尚書彭元瑞為三通館總裁。○命禮部尚書紀昀內

閣學士劉躍雲充經筵講官。○壬辰孝聖憲皇后忌辰遣官祭

泰東陵。○諭軍機大臣等。閱孫士毅摺內。准閩省咨會。原不過令其豫備。何嘗有徵調之語。乃該督不揆事理輕重。率行派委將弁紛紛帶兵。即赴廈門。實屬非是。辦一烏合匪。遽行令廣東浙江江南等省紛紛徵調。成何事體。外省習氣。非失之懈弛。即過於矜張。偶過地方此等事件。率奏請親往。以見其急公勉力。為站脚地步。全不計事體之緩急輕重。及騷動地方甚無謂也。試思粵省巡撫現未回任。該督又遠赴潮州。海疆重地。關係緊要。芟塘沙灣附近省垣。該督如此辦理。張皇萬一有一二奸匪乘勢鼓動。又將何以應之乎。孫士毅接奉前旨。即星速回駐省城。其所派水師一千名。既已起身。聽閩省督提調遣。若事已定。即令撤回。其續派之兵俱著撤回本營。以鎮靜地方。安戢人心為要。○癸巳諭曰。那

爾瑚善所遺領隊大臣員缺。著格綢額調補。格綢額所遺員缺。伊犁協領同福保著賞給副都統職銜。補授庫爾喀喇烏蘇之領隊大臣。那爾瑚善所遺正白旗漢軍副都統員缺。著張漢傑坐補。○諭軍機大臣曰。書麟奏魚臺縣盤獲之張二小。據該縣復提該犯訊問。稱與段文經並不認識。因八月二十三日自開州起身。在途詢知客人姓段。是否段文經。不能確指。但該犯先供八月二十三日曾與馬成章拉車送段文經至亳州。茲又供八月二十三日自開州起身。供詞不符。仍應切實根究等語。前因段文經係大名案內首逆。逸後自必改姓移名。豈肯向張二小自稱段姓。或係張二小平素認識。段文經恐干容隱之罪。故將段文經說出。為卸罪地步。已降旨令明興。即提該犯嚴切根究。至今未據奏覆。今據書麟奏張二小先供八月二十三日送段文經至亳州。又供八月二十三日自開州起

身前後供詞閃爍。自相矛盾。其中必有隱匿支飾情弊。著傳諭明興。即提張二小。將前後供詞不符之處。逐一嚴究。務令該犯供出段文經實在下落。上緊緝拏。毋任狡飾。○又諭大名案內首犯段文經。在逃節經降旨嚴飭各督撫上緊緝拏。至今尚未就獲。此案段文經與徐克展二人商謀起意。在大名滋事。係劉戡專管地方。乃徐克展一犯上年係河南委員拏獲。而為首之段文經。迄今半載有餘。該督並未設法查緝。得其實在下落。明興於段文經未經就獲。猶可諉為鄰省之犯。然徐克展係豫省委員拏獲。豈豫省能獲鄰省之犯。而東省獨不能乎。且東省二次越獄人犯。係該撫本省之事。今尚有七名在逃。總未據奏報。續獲一名。前吏部於年終提奏。朕因該督等現在督率查拏。未便遽易生手。是以降旨暫行留任。原欲稍寬時日。以觀後效。劉戡明興尤應感懼。愧勵。乃竟因已邀留任。安然

坐視。以緝拏要犯為具文。寧不思轉瞬又屆限滿。獨不可將伊等從重治罪耶。劉我明興著傳旨嚴行申飭。若仍前因循怠玩。不能將要犯速獲。則是自取罪戾。不俟限滿即可治罪。斷不能再邀寬宥。毋謂朕恩可以長恃。留任可以屢邀也。再段文經。現據山東拏獲張二小供。有送至亳州李姓飯店。又有傳聞段文經逃上鹽船等語。是該犯行蹤詭秘。或潛匿江南。湖廣及河南。山西等省地方。均未可定。現在臺灣雖有逆匪林爽文滋事一案。但與江南等省毫無關涉。該督撫等不得以朕無暇及此。稍有疎懈。以致要犯日久不獲。自干咎戾。著傳諭李世傑。書麟。舒常。李封。畢沅。勒保。務飭屬上緊設法緝捕。倘經別省拏獲。恐該督撫等不能當其咎也。至附天保一犯。屢經諭令永保。已延三等。嚴密訪拏。亦未據該督等奏報拏獲。附天保有年貌服色可以辨識。且在洮岷一帶。詐騙招搖。並非難以蹤

跡之人。此案已逾數月。自當得有消息。或由肅州出口。逃往新疆。或混入番回部落。均未可定。該督等務須嚴飭所屬。及出口一帶地方。迅速緝拏務獲。毋任遠颺潛匿。俾得漏網。將此各諭令知之。仍將現在各犯有無拏獲如何設法躡緝之處。迅速覆奏。○又諭。前據李世傑奏。江南各營歲需硝磺。不能依限到營。因搭買運司衙門歲需烟盒磺觔等項。價銀催解不齊。不得不為守候。以致支絀等語。殊無此理。業經明降諭旨。將李世傑交部嚴加議處。並傳諭徵瑞。會同認真查辦矣。京師每歲製備烟火等件。除烟盒外。即爆竹一項。有十一萬之多。其兩淮年例。每歲不過烟盒七架。大小爆竹一萬。較之京師所製尚不及十分之一。乃內府花爆作。每歲開銷僅需硝磺一千數百餘觔。而健銳火器。驍騎巡捕。各營需用軍火。從未聞因製造烟火爆竹。稍形短缺。兩淮承辦烟盒。較內務府所用硝磺亦

不過十分之一。更屬無幾。且係商人買辦。而藉詞於營伍軍火。致多關礙。斷無此理。昨詢之伊齡阿。據稱此項烟火。係由運司衙門發銀五千兩。交與徽州程姓商人置辦。除年例進貢外。凡鹽務各衙門總商等。自用爆竹等項。均於此內通融等語。是此項烟火。係鹽商自行置辦。並非官為購採。與通省營伍有何關涉。況其中必有羨餘。可賺商人。惟利是圖。斷不肯稍有賠累。如果購辦維艱。則鹽務各衙門及總商等。自用花爆等項。又何能亦於此內通融製造。且硝磺在在出產。並非難購之物。鋪戶售賣花爆者甚多。不特京城。每遇除夕元旦燈節。民間所放。晝夜喧闐。不可勝計。江浙湖廣等省。商賈輻輳之區。此風尤盛。雖中秋端午等節。及鋪戶船戶。遇有尋常賽神之事。亦無不施放花爆者。此等硝磺。不知所用凡幾。又從何而來。若果於軍器所儲有礙。則國家早應禁止。乃從未設有例禁者。可

見習俗相沿。由來已久。實於軍火所需。並無關涉。且商人年例備進烟火等項。所用硝磺。或竟致有礙軍火。該督等亦不妨據實奏聞。停止。朕豈肯以年例所需娛玩之物。致於營伍要務。稍有短絀耶。此必李世傑病後精神恍惚。顛倒替亂。見不及此。而承辦之藩司及委員等。因見陳杰先行據實查奏。恐致獲咎。為此巧飾之詞。以為卸罪地步。李世傑不察虛實。遂率任劣幕行文。遽以入告。看來此事非李世傑所能查辦。徵瑞向來細緻。而此項烟火。又係鹽務衙門專管。著傳諭該鹽政。於查辦時。即將此等情節。切實逐層指駁。並著將採辦硝磺不敷。由於歲需烟金之語。得自何人。及陳杰查各營軍火解送短缺。緣何遲延積欠。有無弊竇之處。據實明白查奏。不可顛預了事。將此由五百里傳諭知之。仍將接奉前旨。查詢大概情形。迅速據實覆奏。○吏部奏請大學士王杰。應定何殿閣及兼銜。得

旨。王杰著為東閣大學士兼禮部尚書。○甲午刑部議准。雲南巡撫譚尚忠奏稱。雲南通省徒犯。向例就昆明等州縣所設多羅松林等十二驛發配。日積日多。非羣集為匪。即起意脫逃。請照軍流人犯派撥之例。於通省州縣內。不拘有無驛站地方。均勻酌配。又情重徒犯。例發各鹽井鉛廠當差。但滇省各廠均僻處山箐。竈丁鑪戶。人衆雜處。本難管束。若再以作奸犯科之徒。集最易藏奸之地。恐勾串鑪竈。私熬私煎。轉致遺誤額課。請將定發各井廠之例。一併停止。均應如所請。再各省無驛之州縣較多。嗣後徒犯。均應照滇省之例。於通省州縣。均勻派撥。從之。○乙未諭曰。常青奏。據黃仕簡之子內閣中書黃澁呈稱。上年八月內。因聞伊父黃仕簡患病。請假半年。回閩省視。現在二月內假期已滿。請寬予限期。俾展為私。據情代奏等語。黃仕簡年老染病。尚未全愈。近因臺匪滋事。即帶兵渡臺。

勦捕。勤奮可嘉。今伊子黃澁。以伊母現亦患病。懇請展假侍養。自屬實情。著准其展限在籍奉侍。俟黃仕簡事竣回署。伊母病體全愈。若無須伊子在彼奉養。黃仕簡再行酌令黃澁來京供職。常青不必因有例限。促令赴京。以示朕體恤加恩至意。○又諭曰。法靈阿於明伯克莫羅爾雜等。控告鄂斯瑞之事。並不詳細查覈。堅執偏見。欲實其事。殊屬不曉事體。若留之在彼。竟屬無用。著拔去花翎。以五品頂戴。自備資斧回京。自烏什叅贊大臣移駐喀什噶爾以來。烏什地方事務簡少。特成額一人在彼駐劄。儘可辦理。德勒格楞著授為英吉沙爾領隊大臣。率同老格辦事。德勒格楞著賞。平素尚屬曉事安靜。又熟悉蒙古語。到英吉沙爾。當將所屬回人。善為約束。悉心辦事。不可似法靈阿如此冒昧。○諭軍機大臣等。工部奏。駁革蕩右營新淤蕩地。添建樵兵一摺。內稱該河督原題。每年交柴十七

萬束原指蕩地新淤而言。一二年後自應加增。今奏請添設樵兵。何以竟將十七萬束作為定數。又查雍正年間新淤灘地。每畝計產柴三束。今新淤蕩地。計每地一畝。竟不及一束。前後大相懸殊等語。該營新淤產柴蕩地。雖係河督管理之事。但李世傑係兩江總督。兼管河道。其淤地所產柴束。何以並不留心查覈。竟將十七萬束作為定數。又不詳查舊案。致每畝產柴數目。與雍正年間多寡懸殊。

實錄卷一百二十七

七

看來竟係李世傑病後精神恍惚。於地方事務不能照料周到。漫無查察所致。不特前日所奏硝磺短少一事。辦理乖謬也。著傳諭該督。將是否實因病後精力衰頹。以致辦事多有錯誤之處。據實覆奏。其新淤蕩地。實在產柴數目。仍著該督會同李奉翰。確切查奏。辦理。母任營員朦混具報。將此傳諭李世傑。李奉翰知之。○丙申。諭軍機大臣曰。李世傑辦理地方事務。多有錯誤。恐究係病後精神未

能周到所致。李侍堯路過江南。雖不由江寧行走。未經會晤。但沿途自必有所聞知。著傳諭李侍堯。將所聞李世傑近日病體究竟若何。能否就痊之處。據實覆奏。○福建巡撫徐嗣曾奏。漳浦縣知縣羅澤坤。浦城縣知縣孫鈕琨。均經部議降調。懇請暫行留任。又候補知縣郭廷魁。亦係緣事降調之員。請令暫署莆田縣事。以資駕輕就熟。諭。現在該省兵差往來正需熟手。所有降調人員。自應留本任。

實錄卷一百二十七

七

以資駕輕就熟。但該省似此等降調人員。自必尚有。李侍堯到閩後。應於勦捕事竣。會同徐嗣曾覈其功過。分別辦理。此時祇須彙總咨部存案。亦可毋庸逐員特奏也。又徐嗣曾奏。拿獲匪犯陳樵。訊係賊匪。遣回探聽官兵消息。恐所遣不止一人。亦不止一處。現經督臣提犯審訊等語。此應留心者。該督等務須嚴飭所屬。慎密查拏。加意防範。毋任竄逸偷渡。○丁酉。諭軍機大臣等。據毓奇覆奏。廟灣

鹽城等處及淮安中左右各營。歷年需用硝磺。藩司不能按期解發。以致火藥短缺。尚非營員別有那移情弊。其是否該藩司辦理遲延。抑係承辦之員採運延玩。現在咨會該督撫秉公查辦等語。此項火藥。為各營兵丁操演所需。最關緊要。自應照數儲備。何得採辦遲延。以致歷年短缺。前已降旨。諭令李世傑會同徵瑞徹底查辦。尚未據該督等奏到。著再傳諭李世傑、徵瑞。將此項火藥究係因何短缺遲延之處。據實查明覆奏。並將毓奇原摺鈔寄該督等閱看。令其歸案辦理。毋得瞻徇迴護。○又諭。昨據徐嗣曾奏稱。黃仕蘭到臺後。開礮打死賊匪二千餘人。賊俱星散。奔逃內山等語。內山係生番巢穴。向聞遇有內地民人到彼。即行殺害。但現在賊匪被官兵追剿窮蹙。逃竄。明知一經官兵擒獲。萬無生理。或將所掠財物賄結生番。容留藏匿。或恃其人眾脅制生番。而生番畏其兇惡。任聽竄

處。並恐將來倣兵後。賊匪等轉勾結生番。潛出滋擾。更為可慮。尤不可不豫行籌辦。淨其萌蘖。現在水陸兩提督帶領多兵在臺會剿。自應乘此兵力。搜剿殲除。勿令賊匪得以逃匿負隅。但黃仕蘭與任承恩均係提督。一同帶兵在彼辦理。體制不相上下。且水陸各有所轄。難以統攝。常青於辦理善後事宜。自不如李侍堯之諳練。而督率搜捕。則常青為優。著李侍堯到閩後。即駐劄蚶江。常青即親自渡臺。督同黃仕蘭統領官兵。將竄入內山賊匪餘黨。盡數搜捕。務淨根株。仍不得因追捕賊匪。或致擾動生番。方為妥善。其任承恩於常青抵臺後。即令先回本任。以資彈壓。如此庶事權歸一。有所責成。現在湖廣有舒常署理督篆。常青無須急赴新任。惟當督同黃仕蘭悉心妥辦。鎮戢海疆。以為一勞永逸之計。再臺灣地方。前聞楊景素在道員任內。設立土牛。分別内外地界。其是否辦理妥協。並著

常青會同黃仕簡於勦捕事竣後親往履勘斟酌妥善歸於善後事宜內一併妥辦。戊戌。

上還宮。○諭軍機大臣等。本日常青由六百里加緊奏到一摺。以為勦滅臺灣逆賊之信。及至拆看。祇係覆奏事件。又何必由驛馳遞。徒勞驛馬乎。常青何不知事體輕重。若此前曾有旨令藍元枚赴閩署理陸路提督。并諭常青探聽臺地消息。一俟藏功即可傳知藍元

實錄卷二百七十三

三

枚。行抵何處。速回江南本任。今思任承恩在臺統兵會勦。於該處情形皆所目擊。而松江提督已有人署理。現無緊要應辦之事。著常青俟抵臺後。即令任承恩迅速馳驛來京。候朕面加詢問一切。其福建陸路提督藍元枚仍行署理。毋須即回江南本任。至林爽文王芬。二犯係此案首惡渠魁。如經官兵生獲。著該督等。派委妥幹員弁解京審辦。並飭該委員等沿途小心加意防範。毋得稍有疎虞。致

干咎戾。○是月直隸總督劉峩奏據大興等七十八州縣申報。本月各屬陸續得雪。自二三寸至盈尺不等。不特春麥可以及時播種。即大田亦易於耕作。得旨欣慰覽之。○河南巡撫畢沅奏。據開封歸德河南衛輝南陽陳州各屬稟報。於初九十七等日。各得雨雪三四寸不等。地脈優滋。田苗旺盛。現在市糧充裕。價值平減。得旨欣慰覽之。○貴州巡撫李慶棠奏。黔省每年應辦楚鉛二百五十萬觔。委員解赴湖北漢口鉛局。以供各省採買鼓鑄之用。其銷售鉛價銀兩。向責成湖北漢陽府同知查驗。解交漢陽府庫暫貯。俟委員銷售事竣。領解回黔報銷。請嗣後委員到漢口採買鉛觔價銀。仍令漢陽府同知查驗。徑解湖北藩庫收存。俟黔省後運委員到楚。立即催令前運交代清楚。給咨領解銀兩。回黔報銷。得旨允行。下部知之。

實錄卷二百七十三

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十三

實錄卷之一千二百七十三

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十四

肅州總督經略官太子太傅文淵閣大學士文淵閣學士領侍衛內大臣稽察欽奉 上諭軍機處管理

吏部理藩院事務正黃旗滿洲都統世襲騎都尉果功加七級道帶加一級尋常加二級軍功紀錄一次臣慶桂

總管官經選講官太子太傅文華殿大學士文淵閣學士領侍衛內大臣稽察欽奉 上諭軍機處管理刑部戶部工部事務

世襲騎都尉軍功加十九級尋常加二級又加二級尋常加內大臣戶部尚書鑲黃旗滿洲都統果功紀錄五次

尋常紀錄十四次臣德麟經選講官太子少保工部尚書紀錄六次臣曹振鏞等奏

敕修

乾隆五十二年丁未二月己亥朔遣官祭

闕帝廟諭軍機大臣曰秦承恩奏據署鳳

翔府經歷陳希賢稟報盤獲大名府元城縣

人王六一名查與直隸通緝大名案內未獲

餘犯王六姓名籍貫相同嚴訊該犯堅供上

年並未回過大名現在解赴直隸質審等語

王六姓名籍貫既與大名案內未獲逸犯相

同明係實證無人狡供不吐解到時劉裁自

應嚴切究訊且該處鄉保地鄰俱素所熟習

易於辨識自不慮其稍有諱飾如果審訊屬

實。則段文經。劉勣實在下落。亦可從此根究。倘實係無辜。亦應質審明確。不可拖累良民。但此事必須研訊確鑿。毫無疑義。方可完結。若該督不能質對確實。即將王六解京交刑部審訊辦理。再本日劉勣奏。新舊命盜已未完結。各案一摺。此係年終彙奏事件。該督不過照例具奏塞責。段文經等要犯。至今未獲。且並無消息下落。此等尋常命盜各案。更不經心。所謂一事不可信。事事皆不可信矣。著再傳諭劉勣。務飭屬將段文經等上緊設法查拏。勿因日久生懈。俾要犯不能就獲。致干重戾。又諭據徵瑞覆奏。硝磺一項。例禁私買私賣。是以兩淮歲需硝磺。照例由運司衙門。將價銀豫解藩庫。委員搭辦。應請嗣後兩淮所用硝磺。逕由鹽政衙門給批。令商前赴出產地方採買等語。所奏亦未免拘泥見小。此項硝磺。既由運司豫發價銀。該委員等不過過便代為搭買。且每年採辦。價止開銷一

百一十餘兩。較之通省各營所需硝磺。為數不及百分之一。與營伍軍火。全無交涉。其短缺係該藩司及委員等藉詞卸責。徵瑞接奉諭旨。自應將鹽城各營額貯硝磺。因何短缺。其中有無弊竇。並硝磺短解。由於歲需烟盒之語。得自何人。據實明白查叅。辦理方中肯綮。乃摺內惟恐此事於鹽務干涉。總總然代為聲說。意存迴護。此究由徵瑞識見不能開展。見小所致。取笑於朕矣。著再傳諭該鹽政。務遵節次所降諭旨。逐層指駁。徹底查明具奏。嗣後辦理一切。益當擴充識見。以期得當。毋得仍前見小拘泥也。仍將會同查辦情形。迅速由驛覆奏。又諭。近日李世傑於辦理地方事務。多有錯誤。恐究係病後精神恍惚。未能周到所致。該督上年冬底。由清口回江寧。路過揚州。徵瑞曾經見面。且現在會同查辦硝磺虧欠一案。自必與之會商。近日李世傑病體究竟如何。徵瑞在彼目擊。必得確切。

著傳諭徵瑞。即將李世傑近日精神若何。是否即能就痊。於公事不致貽誤之處。遇便據實覆奏。不可瞻顧。○福建巡撫徐嗣曾奏。水師提臣黃仕簡。於初四日抵鹿耳門。陸路提臣任承恩。於初六日抵鹿仔港。皆剋期於十三日進剿。適徐鼎士等兵亦抵北淡水。三路圍攻。自必一舉蕘事。諭曰。此等么膺賊匪。原不過一時烏合。現在黃仕簡。任承恩。督兵會合搜剿。自無難立時撲滅。前因徐嗣曾輕離省城。恐致人心疑駭。曾降旨飭諭。此時人情大定。非同前比。且大兵抵臺。三路圍攻。賊匪自必四散潰竄。恐有逃至原籍及內地者。尤應於各口岸嚴密截拏。徐嗣曾不妨視其地方緊要。間一親往各處搜查。前有旨令李侍堯抵閩後。即駐劄蚶江。督辦一切。常青親自渡臺。督同黃仕簡等。搜剿賊匪。著傳諭該督等。遵照妥協辦理。常青抵臺後。即令任承恩迅速馳驛來京。該提督輕於舉動。未免跡涉

張皇。然究屬遇事勇往。尚無不應。今令其來京。不過欲面詢臺地事宜。常青可告知該提督。毋庸心生疑懼。○庚子。諭曰。修撰戴衢亨。御史百齡。均於山西學政任內。失察武生裴泰祥。戕斃多命一案。吏部分別議以降調。固屬咎所應得。但念其究係失察公罪。戴衢亨。百齡。俱著從寬。改為革職留任。○又諭曰。李世傑奏查辦各營火藥缺額緣由。據江寧布政使袁鑒。將運司衙門需用烟盒礮。混同未解。鋪礮價值。一併敘入詳覆。李世傑即據詳具奏。請將袁鑒交部嚴加議處一摺。夫礮礮為軍火所需。最關緊要。各營解送缺額。自係承辦之該藩司。及委員等。採辦遲延所致。乃袁鑒率以運司衙門需用礮。牽混具詳。今據徵瑞奏。兩淮年例所製烟盒等項。需用礮礮無幾。向由運司發給價銀。交委員等。遇便代為搭買。且每年採辦。止開銷銀一百一十餘兩。較之通省各營所需礮。為數不及

百分之一。與營伍軍火全無交涉。况現據李世傑查明運司衙門四十九。五十一。五十三。年礦勛價值。係豫行解司。年清年款。並未遲逾。何以袁鑒以此率混具詳。顯係藉詞支飾。為卸罪地步。李世傑自因病後精神昏亂。不能認真查覈。至此事係該藩司專辦。既遲誤於前。又復巧飾於後。其過甚大。袁鑒係屢經獲罪之人。朕棄瑕錄用。擢任藩司。不思感激奮勉。其辦事荒唐。若此。斷不足以勝藩司之任。亦不值再交部議。袁鑒著即行離任。其江寧布政使員缺。著王兆棠補授。所遺江蘇按察使員缺。著康基田補授。成汝舟著補授。淮徐道。其江寧府知府員缺。即著袁鑒降補。仍革職留任。俟八年無過。方准開復。所有查出各營短缺硝磺。著袁鑒按照價值十倍罰賠。以示懲儆。此乃朕格外加恩。從寬辦理。若為誅心之論。則袁鑒獲罪甚重。豈尚能復邀錄用耶。袁鑒益當感愧。圖報。痛改前非。以

觀後效。○諭軍機大臣等。據李世傑彙奏。五十一年承緝盜竊各案一摺。上年大名案內首犯徐克展。逃至亳州。經豫省委員緝獲。張均德一犯。亦曾在江寧逗留。被直省委員盤獲。該督於首逆正犯在該處地方經過潛藏。不能飭屬查拏。俱係他省緝獲。則現在所奏尋常盜竊各案。不過具文塞責。以一奏了事。一事不可信。即百事不可信矣。李世傑著傳旨嚴行申飭。至首犯段文經。劉勤。至今尚未弋獲。著傳諭該督務飭各屬上緊緝拏。毋致重犯久稽顯戮。如再仍前疎懈。恐該督不能當其咎也。○又諭。現在兩提督厚集兵力。剋期會剿。自必立時撲滅。惟前據徐嗣曾奏。黃仕簡到臺後。開礮打死賊匪二千餘人。賊俱奔逃內山。而本日藍元枚亦奏及賊匪竄入內山。與生番勾結。將來搜捕需時等語。內山雖係生番巢穴。但賊匪窮蹙無歸。或以賄結。或以脅脅。生番容留藏匿。將來大兵徵後。潛

出滋擾。尤屬不成事體。該提督等務須乘此兵力。上緊搜捕。俾盡根株。以靖海疆。至賊首林爽文。王芬二犯。及此外有名頭目。如經官兵生獲。即選派員弁。解京審辦。以彰憲典。再前已降旨。令任承恩侯常青抵臺後。即馳驛來京。陛見。詢問該處情形。其陸路提督著藍元枚署理。現在江南提督署理有人。藍元枚俟任承恩回任後。再回江南本任。○兵部奏八旗大臣官員。盈甲軍器。例屆五年請派王大臣點驗一次。今請於四月內點驗。得旨。文職七品以下武職六品以下。微員盈甲軍械。嗣後著停其點驗。其餘應行點驗各員。盈甲軍械。上年秋收。雖屬豐稔。但現在物價尚未甚平減。亦著展至明年。再行奏請點驗。○辛丑。春分。朝。

日於東郊。遣肅親王永錫行禮。○以舉行仲春經筵。遣官告祭。

奉先殿。

傳心殿

上御文華殿。講官暨侍班之大學士九卿詹事等。行二跪六叩禮。分班入殿內序立。直講官四人出就講案前。行一跪三叩禮。復位。直講官德保。劉墉進講。孟子天與賢則與賢。天與子則與子。二句講畢。

上宣御諭曰。天與賢則與賢。天與子則與子。斯二語也。以為答萬章之前問。從而為之辭。則可。以為示後之繼業。為萬世法。則不可。蓋自啓賢繼業之後。但有與子無與賢之事矣。其有托於賢而攘竊者。皆亂臣賊子之流。非唐虞之所謂禪也。且

天何言哉。與賢與子。將命者誰。以予論之。天視自我民視。天聽自我民聽。民之所與。即天之所與。然與子雖為萬世不易之規。而其敗德隳行。恃天之與已。而不知凜難諶靡常之義。存如保赤子之懷。則民必不與之。而天亦厭之。而不與。斯不大可畏乎。紂之言曰。我生不

有命在天。此豈非恃天之與已乎。吾是以祇申難諶靡常之義。而戒負宸者慄慄畏懼。以敬天愛民。慎守其器。而前此之與子與賢。胥不必論。後此之與子與賢。皆不可恃。故曰。斯二言不足以示後之繼業。為萬世法則也。至於較年之多少。及地之遠近。所謂愈去愈遠。而更甚之。乃曰。故仲尼不有天下。余又以謂斯言也。仲尼必不為之。仲尼而為斯言。亦非仲尼而已矣。蓋孟子嘆王道之不行。萬民之受害。未嘗無已。欲得天下。以施號令。行王道之意。然而仲尼無此心也。人非孟子。更不可有此心也。嗚呼。此孔子所以為至聖。而孟子祇可稱其亞乎。講官侍班官跪聆畢。與直講官德明謝墻進講。易經剛健篤實輝光。日新其德二句講畢。

上宣御論曰。乾剛健而艮篤實。此言各具其用。而相資以成其德也。蓋剛健而無篤實。或失之躁。篤實而無剛健。或失之固。躁與固。則不

能日新其德矣。然乾元之體。無所不貫。八卦之德。何一非乾德哉。故在大畜言大畜。則曰剛健而濟之以篤實。以日新其德耳。夫日新其德。非所謂自強不息乎。解大畜者。或謂畜之者大。或謂能畜其大。至於不家食。則率謂人君大烹養賢。而其臣不食於家。予以為家者。私也不食於家。去私也。君與臣胥無私。以勅幾協民。有不日新而輝光者乎。若夫九二為剛中之臣。六五為柔中之主。此正剛柔相濟。不失其養。亦日新其德之道也。若必訓二以說其尤。戒五以防其惡。是君臣之間。先自猜貳矣。獨占其一爻者。或可曲解。然非大畜全體養賢之義。茲故申而論之。講官侍班官跪聆畢。大學士公阿桂。大學士嵇璜奏曰。

皇上時幾救命。中正綏猷。以體天者敬。

天而篤祐無疆。本心法為治法。而健行不息。洵所謂斟元建極。錫福宜民者矣。臣等幸侍

講筵親承

聖訓。曷勝誠服。奏畢。諸臣出就拜位。行二跪六叩禮。禮成。

上御文淵閣賜茶。還宮。復賜宴於文華殿東廡之本仁殿。○諭曰。原任按察使楊廷樺。在閩年久。該處情形。較為熟悉。其獲咎係因越獄案情雖重。究非私罪可比。現值用人之際。楊廷樺著自行赴閩。交與李侍堯差遣委用。如果出力。著以同知通判酌量題補。○又諭。前

經理藩院議准。將回子哈第爾所襲郡王品級貝勒。照內地扎薩克例出缺。降至公爵。准其世襲罔替。但伊父霍集斯。從前曾經出力報効。且又拏獲達瓦齊。頗著勞績。著施恩將哈第爾現襲郡王品級貝勒。准其世襲罔替。嗣後缺出。不必降等襲封。再額色尹。託克託所襲公爵。降至三等台吉。方准世襲罔替。因圖爾都並無子嗣。曾將額色尹之孫託克託。過繼與圖爾都為嗣。承襲公爵。其額色尹。圖

爾都實係回部和卓後裔。伊等從前俱屬効力。託克託。又係額色尹之孫。伊現在承襲輔國公爵。缺出。不必削除。准其世襲罔替。以示朕軫恤。回部臣僕之至意。○壬寅。福建臺灣鎮總兵柴大紀奏。十四日子刻。接據臺灣道永福來札。知鳳山又被賊陷。隨督飭弁兵赴援。乃出城未遠。即遇賊匪來犯。郡城查郡城並無牆圍。惟以木柵籬竹環繞。難於固守。當於城南桶盤棧地方。飭遊擊蔡攀龍。併南路叅將瑚圖里。帶兵駐劄。又飭守備邱能成。李步雲等。於城東之萬壽亭駐劄。其西南沿海一帶。亦令守備李球等。帶兵把守。臣仍駐北路鹽埕橋防禦。四面嚴固。郡城可保無虞。俟內地兵到。即當長驅前往。諭軍機大臣等。前賊匪滋擾鳳山時。瑚圖里縱馬由南而去。不知下落。朕以該叅將之不能抵禦。由於兵散獨力難支。與臨陣退縮者不同。曾諭令常青俟事定後。覈其功罪。分別辦理。今該叅將業

已回至郡城。率兵堵禦。如果奮勉殺賊。則功過尚足相抵。著常青俟事竣後。東公覈實具奏。並給咨送京。候詢問臺地一切情形。再柴大紀摺內。稱郡城並無牆圍。惟以木柵荊竹環繞。官兵難以固守等語。前曾諭令李侍堯。於臺匪蕩平後。將是否可以建城之處。酌量辦理。今閱柴大紀所奏體察情形。彰化等三縣一廳。應否改建城垣。尚可俟籌辦善後事宜時。確實勘估繪圖。妥議請旨辦理。至郡城為全臺根本。即應速建城垣。以資保障。著李侍堯。常青。俟事竣。即熟商妥議。一面奏聞。一面興工辦理。

○癸卯

上御太和殿視朝。文武陞轉各官謝恩。遣官祭昭忠祠。○諭。據尚安奏稱。喀喇沙爾之土爾扈特和碩特等。歸服年久。今既寬裕。馬匹牲畜滋繁。且能貿易者頗多。嗣後不必勒令耕種。為生任從伊等自謀生理等語。所奏尚是。

著照尚安所奏。任從伊等自謀生理。○又諭。據常青奏。接據臺灣府城叅將宋鼎遊擊鄭嵩左淵。署遊擊王天植會稟。上年十二月內。有防守小北門把總高大捷。逃赴鹿耳門。覓船內渡。隨將該弁鎖解到郡。訊供因賊匪猖獗。欲逃內地。隨商同臺灣道。恭請王命。將高大捷即行正法等語。綠營恒怯積習。最為可惡。在兵丁臨陣脫逃。已屬大干軍紀。況高太捷身係把總。當臺匪滋事之時。帶兵防守。輒敢擅離郡城。首先逃避。情罪更重。自應立正典刑。以肅軍令。該叅將宋鼎等。一聞高大捷逃赴鹿耳門之信。立即鎖解到郡。會同訊明正法。所辦甚是。武職中叅遊等官。雖非專閫大員。於例不應專戮。但行軍之際。非尋常無事時可比。該叅將等。能知事體輕重。一經訊明。脫逃屬實。即會同該道。將高大捷先行正法。使在事兵弁。咸知儆畏。甚屬能事。可嘉。宋鼎鄭嵩左淵。王天植。俱交部議敘。仍著事竣。

後俱給咨送部引見。向來逃兵拏獲。尚且即行正法。況高大捷。以武弁委城脫逃。尤為可惡。雖已正法。尚不足蔽辜。著該督查明伊子奏聞發遣。並將辦理緣由。著各督撫通行曉諭綠營兵弁。使知避賊潛逃。希圖倖免。不但戮及其身。即其子嗣亦難邀寬宥。庶懲一儆百。不敢復蹈。恒怯惡習。以勵戎行。而申法令。將此通諭知之。○諭軍機大臣曰。保寧奏成都省城城工現已修竣驗收。所有承修各員。在工三年。認真辦理之知州張官五等。請量予議叙等語。此等城工係發帑興修。承辦各員尚可藉霑餘潤。即督催稽察亦屬分內之事。向來各省辦理城工。並無議叙之例。即如陝西西安城工。較川省更為浩繁。報竣後亦未奏請議叙。且京師內外城垣亦曾經大修。及其餘各項鉅工甚多。均無特予議叙之例。此次川省承辦各員果能實心經理。著有微勞。該督不妨隨時量加甄錄。以示鼓勵。不值

特請邀恩議叙也。將此傳諭保寧知之。○又諭。從前辦理緬匪時。曾調福建水師兵二千名。隨同進剿。該兵丁等沿途滋事。鞭責夫役。甚至將民夫雙耳割去。當將首犯正法。以示懲儆。及隨京兵打仗時。又復怯懦。竟有聞鎗聲。恐懼戰慄。欲泗水逃避者。可見該省兵丁。勇於私鬪。怯於公戰之習。牢不可破。皆由該省將弁平日不能認真訓練。以致軍無紀律。著李侍堯於勦捕臺匪事竣後。實心訓練。申明軍律。隨時懲創。俾各弁兵共凜法紀。有勇知方。痛改從前積習。以作士氣。而勵戎行。方為有備無患。該督不可惟知辦理地方事。件為重。而轉置軍旅專責於不問也。○又諭。現在大兵已到。賊匪望風膽落。潰逃四散。黃仕簡任承恩統領官兵。剋期分路進剿。捷音何以至今遲滯未到。林爽文等於光天化日之下。糾眾不法。攻占城池。戕害文武官弁。實屬罪大惡極。神人共憤。所有逆犯渠魁。及有

名頭目。務須按名擒拏。殲戮如經官兵生獲。即選派員弁解京。盡法處治。不可任其逃入內山。搜捕需時。該督等更須窮究黨羽。按名從嚴辦理。務使淨盡。以靖海疆。方為妥善。

甲辰

上御乾清門聽政。○遣官祭

先醫之神。○諭曰。正白旗蒙古副都統雅滿泰。現駐藏辦事。其缺著海寧署理。鑲紅旗蒙古副都統德勒格楞。著貴。現在英吉沙爾辦事。

其缺著伍彌烏遜署理。○廣東巡撫孫士毅奏。拏獲天地會匪犯許阿協等四名。供在漳州地方。被賴阿邊等糾引入會。其會起於乾隆三十二年。凡入其教者。以三指按心為號。便可免於搶奪。諭軍機大臣等。天地會名色起自三十二年。為時已久。且該犯等輒敢轉相糾約。暗用記號。奪取財物。毫無忌憚。而許阿協等俱在漳州地方。被誘入夥。並未渡臺。可見此等邪教。閩省內地已有尚不止臺灣

一處。從來倡教立會。最易煽惑人心。為地方之害。上年大名糾眾戕官一案。段文經亦借立八卦會為名。互相勾引。遂成逆案。而閩省匪徒公然立天地會名色。肆行搶奪。較之大名邪教。其案更久。此總由地方官平時不肯實力查察。及遇有犯事者。又不能徹底根究。以致姑息養奸。即如上年臺灣楊光勳一案。所立會名。即係現經查出之天地會。乃地方官改作添弟二字。明屬化大為小。希圖規避處分。此次林爽文等滋事不法。即由從前養癰貽患所致。不可不嚴切究辦。以淨根株。著該督等於事定後。密訪嚴拏。痛予懲創。勿再稍留餘孽。並將三十二年以後失察邪教之督撫及文武大小員弁。徹底查明。據實奏。其辦理楊光勳一案。將天地二字改作添弟字樣之臺灣地方官。其咎更重。並著確查嚴。以示懲儆。至許阿協供出勾引入教之賴阿邊等犯。俱籍隸漳州。該督等俟臺匪辦完

後。即飭屬嚴緝務獲。訊明黨羽。按名究辦。毋任奸徒漏網。○以工部左侍郎李綬為左都御史。轉兵部右侍郎沈初為左侍郎。以左副都御史吳玉綸為兵部右侍郎。○旌表守正捐軀直隸饒陽縣民宋明智妻路氏。○乙巳諭。向來各省承審命盜案件。遲延者例有處分。而所逾之限。有過五月以上者。亦祇照例議處。不足以示區別。嗣後承審之員。其逾限在五月以內者。仍照定例辦理。若再遲至五月以上。自應加重分別議處。著交該部另行酌擬處分。妥議具奏。所有湖北武昌縣熊之玉。夥劫葉組耀等家衣物一案。其承審遲延各員。即照新例辦理。尋議。向例命盜初參。遲逾統限。議以罰俸之後。若有逾違二參分限者。即應革職。其盜案歷限五月。命案歷限七月以上之案。因尚未逾二參。故未定有加重議處之例。請嗣後承審命盜重案州縣官。於初參限滿之後。計初參已遲至五月七月以

上。向例罰俸一年者。今增定予以降一級留任。其逾二參分限者。仍照舊例革職。從之。○又諭。上年山東司監及歷城縣。連有越獄之案。該撫明興。既未能先事防範。臨時又不能妥速拏獲。及該犯等竄逸後。至今尚有七名在逃。又大名糾眾戕官一案。首犯段文經。徐克展等。雖在直隸聚眾滋事。而八卦會邪教。在東省單。冠。二縣者居多。明興疎縱之咎。已無可辭。及段文經等。逃至館陶。又不能即時弋獲。以致正犯日久稽誅。況徐克展一犯。即係豫省委員在亳州訪拏。山東亦係鄰省。明興何以獨不能代為緝獲。看來該撫於兩案要犯。始猶望其奮勉補過。今日久未獲。該撫又恐懼惶惑。一籌莫展。竟至手足無措。山東地方緊要。難望其振作有為。豈可復留巡撫之任。致滋貽誤。明興著來京候旨。所有山東巡撫員缺。著長麟補授。○又諭。原任大學士高斌。宣力年久。伊之子孫。皆經獲罪。現在

並無服官者。著將伊孫候補通判高杞調取來京。以內務府郎中補用。以示朕軫念前勞。眷注舊臣之意。○又諭。據徐嗣曾奏。接據署侯官縣稟稱。該縣驛夫郭世名。高岳。遞送總督六百里奏摺遲延。究出郭世名。因醉貽誤。逃匿高岳。同伊兄高陞。裝虎跡。扶同捏結。請將高陞。郭世名。高岳。均發伊犁。給厄魯特為奴等語。軍臺文報。關係緊要。況現值勦捕臺匪之際。軍情尤為機密。譬如緊急發兵之事。如是延緩。豈不致誤待救者。此項摺匣。雖現據尋獲。幸未拆動。設因遲誤延擱。致中途稍有漏洩。更屬不成事體。該縣驛夫郭世名。得受高岳錢文。應允一人跑遞。輒敢貪飲。任意玩誤。復行逃匿。情節甚屬可惡。僅予發遣。不足蔽辜。郭世名。應按照軍法。著即於該站正法示衆。至高岳。同伊兄高陞。輾轉尋獲報匣。尚知畏法。著照原奏。發往伊犁。給厄魯特為奴。其失察之署按察使凌廣赤。署福州府知

府李浚原。均著交部嚴加議處。徐嗣曾辦理錯誤。失之輕縱。亦著交部議處。○調任湖廣總督仍辦臺灣軍務常青奏。賊匪於十二月三十。正月初一等日。分路攻逼郡城。經鎮道等督率弁兵義勇。協力勦殺。斃賊甚多。又臺灣府知府。現飭福州府同知楊紹裘署理。諭軍機大臣等。此次與賊打仗。文武官弁。及兵民義勇人等。協力勦殺。奮勇得勝。保護郡城。實屬可嘉。俟常青抵臺灣。於勦捕完竣後。查明實在出力人員。分別奏請。交部議敘。所有義民鄉勇。激發公義。協力勦賊。尤堪嘉獎。僅令地方官分別獎賞。尚不足以示鼓勵。著當責於抵臺灣後。查明各義民鄉勇內。如係務農經商生理者。即酌免交納賦稅。若係首先倡義。紳衿。本有頂帶者。即開列名單。奏明。酌予職銜。以示優異。至黃仕簡。係承恩於正月。初四。初六。前後抵臺。迄今已一月有餘。何以尚未據奏報勦賊消息。該提督等係專聞大

員抵臺灣已久。即待厚集兵力。剋期進攻。亦應將賊匪情形。隨時奏報。乃至今總無消息。所辦何事。黃仕簡任承恩。著傳旨嚴行申飭。看來黃仕簡任承恩。全不諳事理。輕重緩急。且彼此俱係提督。不相統攝。竟有互相觀望之意。於勦捕事宜。不能得力。近來常青屢次奏報。甚有主見。籌辦一切。頗合機宜。此時李侍堯自己抵泉州。常青交印後。即速渡臺灣。督同黃仕簡等。勦捕賊匪。務將賊首林爽文。王芬。及此外有名頭目。擒拏解京。盡法懲治。不可任其逸入內山。原任山東按察使楊廷樺。曾任臺灣道。且在閩省年久。於該處情形。自所熟習。其獲咎因監犯越獄。究非私罪可比。前已有旨。交與李侍堯。帶往差遣。委用。現值用人之際。即著楊廷樺。補授臺灣府知府。仍帶革職留任。並傳諭常青。俟李侍堯到後。即令楊廷樺渡臺灣接印任事。○又諭曰。閩省匪徒。私行倡立天地會。已閱二十年之久。

在其黨者。自必隨同搶奪。而被搶者。豈有甘心隱忍。不行呈控之理。乃從未見該督有查辦會匪搶奪之案。若被搶之人。呈控到案。該地方官。又何所迴護。竟置不辦。其故殊不可解。且事歷多年。其黨羽必多。著李侍堯。常青。均俟勦捕完竣後。李侍堯在閩省內地各屬。密訪嚴拏。常青在臺灣地方。即速嚴行搜捕。毋得稍留餘孽。仍應不動聲色。妥協辦理。並將此會究係起自何年。該省有無被搶控告。地方官沉擱不辦之案。確查叅劾。○又諭。據徵瑞奏。查辦硝磺一案。已調取江寧蘇州兩藩司衙門案卷。根究遲悞緣由。現復行催。俟各卷到日。會同確查嚴叅辦理等語。所奏殊不解事。已於摺內批示矣。此案短解硝磺各營。皆係大江以北地方。又係江寧藩司專辦一切卷宗。自皆在該藩司衙門收貯。徵瑞接奉諭旨。即應前往江寧。就近提卷。會同李世傑。迅速查奏。辦理方為得當。即以體制而論。

亦當鹽政往就總督。斷無總督轉就鹽政之理。且朕因恐李世傑病未痊愈。已降旨令徵瑞將目擊該督病體情形。據實覆奏。何以該鹽政此時尚安坐揚州。候提案卷。並不親身前往江寧。徵瑞前在長蘆鹽政任內。朕見伊辦事詳細。方望其可有出息。欲資委用。前閱該鹽政覆奏之摺。惟恐此事與鹽務干涉。意存迴護。已覺其拘泥見小。今又如此不曉事體。大失朕期望之意。豈一得淮揚鹽政坐享豐贍。遂爾志得意滿。不思上進乎。徵瑞著傳旨嚴行申飭。並著該鹽政速往江寧。遵照節次諭旨。會同李世傑。迅即查明。據實具奏。毋再遲延。自干咎戾。○是日起。

上以祭

社稷壇。齋戒三日。○丙午。諭曰。明興於本省。越獄要犯。及直隸大名滋事首犯段文經等。不能認真緝獲。昨已降旨令其來京候旨。第念明興獲咎。因辦理地方事務。不能振作。有為。

尚無大過。所有刑部右侍郎員缺。著加恩即令明興補授。仍帶革職留任。八年無過。方准開復。○丁未。祭。

先師孔子。遣協辦大學士劉墉行禮。○福建巡撫徐嗣曾奏。連日接據臺灣鎮道具報。鳳山賊首王啟郎曾錦等。亦被拏獲。該鎮道等。又偵知賊匪於三十日分路來攻。豫為準備。殺賊數百名。遊擊蔡攀龍復督率兵民奮勇截殺。餘匪逃散。諭軍機大臣曰。王啟郎曾錦。係鳳山滋事賊首。與高文麟等四犯無異。既經拏獲。著該督撫等派員押解來京。聽候審辦。其遊擊蔡攀龍督率兵民奮勇殺賊。尚屬可嘉。並著事竣後。給咨送部引見。此時各路官兵。早已齊抵臺灣。賊人望風膽落。勢必紛紛逃竄。各口岸巡防堵緝。尤為最要。李侍堯於二月初二日。經過杭州。計日內已可抵泉州。常青交印後。迅即前往臺灣。遵節次所降諭旨。妥協督辦。總期迅速肅事。○戊申。祭。

大社

大稷

上親詣行禮。○幸圓明園。○賜予告大學士蔡新御札曰。卿佳否。聞卿家居。戒飭族衆甚屬安靜。朕甚嘉之。所謂身江湖而心魏闕也。近作數種寄去看。在朝竟無可與言古文者。不可阿好徒頌。據見奏來。以為何如。某乾幾種並寄。○諭。據恆秀等奏。發往為奴之遣犯楊天植。乘間將伊家主大小五口殺死逃走。已經拏獲。凌遲處死等語。一摺。已於摺內批示矣。此等發遣人犯。俱係減等免死之人。本屬兇惡之徒。乃至配所。益復逞兇肆惡。忍心戕害多命。可恨之極。著通飭東三省將軍等。嗣後遇有減等免死發遣人犯。如不悔罪。不思守分。氣質強很。難以管束。使令者。儘可聽伊主報官打死。不必論犯罪輕重。即行結案。與其容留逞殘。不若先行消弭。亦可令此等遣犯知所懲戒。○調山東按察使王德。為安徽

按察使。安徽按察使馮光熊。為山東按察使。

○已酉。

孝康章皇后忌辰。遣官祭。

孝陵。○諭曰。秦承恩奏。拏獲糾夥拒捕。砍斃差役二命之王添德等。審擬分別辦理一摺。內稱萬東山因毆逼曹曾氏自縊身死。旋即脫逃。經白河縣差役嚴得謂緝拏。緣王添德素與萬東山交好。向伊根究蹤跡。該犯堅稱不知去向。嗣聞萬東山潛匿該犯家內。復添派差役往拏。該役因王添德素有拳勇。各帶刀棍前往。王添德即糾約韓老二。張老二等各執器械抗拒。該役等畏其兇惡。不敢拘拏。王添德復詎令將刀棍擄去。後反臉欲毆。差役嚴得謂等躲避。王添德復喝令張老二等追趕。將差役李起隆王魁。用刀砍傷。先後殞命等語。州縣遇有緝拏兇犯。自應遴選幹役往捕。庶該犯不敢抗拒行兇。可以立時拘獲。今白河縣差拏王添德一案。該役畏懼兇惡。不

敢上前捉拏。捺去刀棍躲避。逃跑反被兇犯追趕毆傷。致斃二命。此等差役怯懦無能。皆由地方官未能慎選充當。以致遇有查拏要犯事件。不能強幹得力。於緝捕事宜大有關係。嗣後各該督撫轉飭各州縣。於選充差役時。務須加意慎重。擇其年力壯健者充當。仍不時留心察看。不得以退縮庸懦之人濫行充數。庶差遣時不致貽誤。方為妥協。至現在拏獲王添德等三犯之降調縣丞張恒。於積年未獲兇犯能留心緝獲。自應送部引見。其從前僉差不慎。以致該犯拒捕傷差之知縣。並著查取職名。送部議處。餘著該部議奏。○又諭稽察上諭處著添派綽克托。○又諭據奎林等奏稱。盟長扎薩克台吉阿克薩哈勒。現在患病。暫不能痊愈。前阿克薩哈勒陞見時。盟長事務。曾令車凌烏巴什管理。今仍交車凌烏巴什暫管。俟阿克薩哈勒病痊時。仍交阿克薩哈勒等語。阿克薩哈勒病症。現今

既未痊愈。即著解任。盟長員缺。著車凌烏巴什補放。令阿克薩哈勒安心調攝。○諭軍機大臣曰。黃仕簡雖係病後。但身為專閫大員。既抵臺灣。理應親身帶兵勦賊。何得僅以派員前往了事。且彰化縣城久經守備陳邦光收復。而該提督摺內。何以尚稱令柴大紀前往收復彰化等處。任承恩由鹿仔港登岸。係在北路。即當知會黃仕簡分路夾攻。辦理方中竅要。乃迄今月餘。尚無進兵確信。看來伊二人竟各不相下。心存觀望。此即朕於起事時。不欲令任承恩去之意。今竟不出所料。常青不可不迅渡臺灣。督率辦理。並著常青於到臺灣後。即行秉公嚴查。如該提督等實有觀望不前之處。即當據實嚴參。不可因已調任。意存迴護。兩可完事。再任承恩似此遲延不奏。則該提督及副將徐鼎士。前後奏守風待渡之說。亦恐不足信。並著常青一併據實查奏。如該督稍有瞻徇。將來經朕查出。即首

領亦不能保不可不慎也。至該督雖已調任湖廣。但此事究係伊在閩浙任內之事。尤宜督同妥速辦竣。方可將功補過。即李侍堯以現任閩浙總督。駐劄泉州。凡臺灣勦捕等事。亦應聽常青就近調度。協同幫辦。和衷共濟。其各弁兵內。如有因常青係別省總督。呼應不靈。致誤機宜者。該督不妨按軍法從事。使士卒咸知儆惕。現在帶兵大員。有總兵柴大紀。郝壯猷。普吉保三人。足以分路勦捕。著常青於抵臺灣後。留心察看。若黃仕簡實係病體未愈。即留於彼處。亦屬無益。可令其回至廈門。本任調養。又常青審明賊夥正法摺內。稱劉實林。天球二犯。據供並未傷人。惟携木棍。隨同附和等語。此等叛賊。豈可復以尋常附和而論。況該二犯業於審明後正法。摺內又何必為之聲說。致蹈辦常案故套。著該督嗣後於拏獲逆匪時。其首要各犯。仍遵旨派員解京。其餘各犯。審明後。即一面正法。一面

具奏。以淨根株。○又諭。前據常青奏。鹿仔港署守備陳邦光。帶領弁兵。率同泉州粵省義民。攻復彰化縣城。擒獲賊目高文麟等四犯。又據徐嗣曾奏。鳳山滋事不法之賊首王啟郎。曾錦等。已被拏獲。賊人於十二月三十日。來犯郡城。鎮道親督義民。與遊擊等分路勦殺賊匪無數。各等語。是彰化縣城。久經陳邦光等收復。其鳳山等處。亦經柴大紀等派兵分路勦捕。郡城已無事矣。何以黃仕簡摺內。僅稱派委總兵等。分赴南北二路進勦。恢復縣城。竟似該處軍情。全未知悉者。看來黃仕簡。竟思安坐郡城。並不親赴各該處督率勦捕。大屬非是。提督為專閫大員。領兵是其專責。黃仕簡深受朕恩。現帶兵勦賊。雖係病後。理宜奮勉出力。乃於勦捕事宜。奏報遲延。全不得領軍要領。該提督所司何事。試思臺灣郡城。經賊人屢次攻犯。該鎮等當大兵未勦之先。尚能保護無虞。焉有此刻又添提督所

帶大兵。轉須協同守禦之理。豈黃仕簡竟欲以守護郡城為名。遷延坐視耶。黃仕簡著傳旨嚴行申飭。至任承恩由鹿仔港登岸。即應將該處賊匪情形。及辦理勦捕事宜。先行具奏。乃日久並未據有奏報。現據常青摺內稱。該提督尚無進兵確信。探聞現在駐劄彰化等語。任承恩係自請前往臺灣捕賊。既由鹿仔港一路進兵。即應督同陳邦光等。上緊追捕殺賊。並知會黃仕簡。分路會合夾攻。何以駐守彰化。漫無籌畫。其心何居。任承恩亦著傳旨嚴行申飭。又諭曰。李世傑近於地方公務。辦理頗多舛錯。恐係病後精神恍惚。不能照料周到。該督上年與書麟同在清江督辦河工。且安徽距江寧不遠。其病體精神如何。書麟知之必真。兩江總督事務緊要。著傳諭書麟。將李世傑病體曾否全愈。現在精神氣體如何。於地方一切公事。辦理是否不致貽誤之處。據實明白覆奏。毋得稍存迴護。避

嫌之見。尋奏臣與李世傑同在工所半年。見其操勞太甚。步履需人。而綜理一切。精神均能周到。近聞回至江寧。即探聞各營官兵。辦理地方事務。並無貽誤。本月十三日。復赴蘇松等處查閱營伍。且聞近日精神已旺。報聞。○庚戌諭。昨據黃仕簡奏。派令總兵郝壯猷。柴大紀。分路勦捕賊匪。該提督在郡城南北衝要處。堵禦擒捕等語。所奏殊不詳悉。又據常青奏。任承恩由鹿港登岸之後。迄今尚無進兵確信等語。不知其故。實屬可疑。已降旨將黃仕簡。任承恩嚴行申飭矣。黃仕簡於賊匪滋事之始。如果病體未愈。何妨據實奏明。即不能親身前往勦辦。朕必加恩原諒。乃既經帶兵前往。又未將病未全愈。不能親往之處奏明。伊係專閫大員。即應探明賊蹤。躬率士卒。迅速追勦。何得安坐郡城。僅以派員分捕了事。任承恩係自請前往。更應奮勇出力。乃於正月初六日。由鹿港登岸。迄今月餘。總

未據奏報勒賊情形。是該提督前此自請前往。並非踴躍急公。不過以有此一奏。可以為後日站脚地步。是誠何心。此由伊二人同條提督。職分相等。彼此心存觀望。以致辦理遲延。從來行軍之道。貴於紀律嚴明。尤貴事權畫一。而機宜緩急。總在隨時酌辦。此事初起時。朕以伊等跡涉張皇。屢諭令鎮靜辦理。今該提督等於抵臺灣後。如此遷延觀望。朕又不得不嚴加策勵矣。且彼時水陸兩提督俱奏請前往。朕即以任承恩不應同赴臺灣。亦恐水師非其所轄。呼應不靈。未免掣肘。轉於勦捕無益。但因任承恩業已登舟配渡。並思多一人。或可得一人之益。是以未令轉回。今該提督等竟如此漫無籌畫。而所帶水陸弁兵。各顧所轄。彼此不相統屬。因而互為觀望。不能剋期竣事。果不出朕之所料。設彼時任承恩不赴臺灣。則所調陸路弁兵。俱聽水師提督統轄調遣。權歸於一。或早已奏報蔽功。

亦未可定。而賊匪不過么膺烏合。又經官兵義民。疊次痛剿。紛紛逃避。不敢更肆滋擾。倘賊人狡猾奸譎。見弁兵等漸形懈弛。復乘間侵犯。豈不轉墮其計。尚復成何事體。但現在賊匪未得撲滅淨盡。看此光景。究由該提督等遷延貽誤所致。則常青不得不速往督辦矣。若該提督等仍前延緩。尚不親率將弁實力會剿。迅速辦竣。朕於軍務。賞罰分明。伊二人豈尚未知。恐不能當此重戾也。此旨著由六百里加緊發往。傳諭黃仕簡。任承恩外。並通諭知之。○諭軍機大臣等。昨據徵瑞覆奏查辦硝磺一案。祇調取江寧。蘇州。兩藩司案卷查閱。並不親赴江寧。會同李世傑辦理。已傳旨嚴行申飭。本日復據徵瑞奏到查辦情形一摺。仍安坐揚州。將該藩司送到案卷。敷衍陳奏。並未同李世傑面查。不料伊糊塗至此。徵瑞向來辦事。尚能細緻認真。乃一得兩淮鹽政。坐享豐腴。遂爾志得意滿。不思上緊

真所謂利令智昏矣。又據另片將李世傑上年冬間病後情形聲叙覆奏。更屬無謂。朕之所以詢問徵瑞者。原謂伊查辦硝磺一案。早應前赴江寧。面晤李世傑。會同辦理。其身體精神。究竟若何。必能親見。知其詳悉。不謂徵瑞接奉此旨。尚未起程前往。轉將年前李世傑經過揚州情形。據拾具奏。更不可解。試思揚州有何可貪戀。且朕豈能任伊貪戀乎。徵瑞著再傳旨申飭。並著該鹽政。即遵朕前旨。速赴江寧。面見李世傑。將硝磺一項。究係因何短缺遲延之故。會同徹底根究。據實查參。並將李世傑近日辦事精神。是否不致貽誤之處。一併據實覆奏。毋得稍有瞻徇迴護。致干咎戾。將此由六百里傳諭知之。○辛亥。諭曰。朱珪現出學差。所有禮部右侍郎著謝墉兼署。○又諭。據郝壯猷奏。奉派帶兵起程到臺灣日期一摺。所奏甚不明晰。該總兵經總督派令前往進剿逆匪。既已率領官兵。於初

四日登岸。自應奮勉出力。迅速剿捕。並將賊匪現在情形。詳悉聲叙。方得窺要。乃摺內並未叙明。祇將起程及行抵臺灣日期。敷衍陳奏。於剿賊事宜。全無頭緒。郝壯猷著傳旨嚴行申飭。該總兵接奉此旨。務須奮勇殺賊。毋得稍有疎懈。致干咎戾。○又諭曰。臺灣賊匪林爽文。糾眾滋事。現據任承恩奏。臺灣府知府孫景燧。彰化縣知縣俞峻。鹿仔港巡檢馮敏宗。同時被害。各將印信。令家屬呈繳等語。孫景燧等。守禦城池。猝被戕害。殊堪憐憫。俱著交部從優議卹。○諭軍機大臣等。本日任承恩奏到。派撥官兵。於鹿仔港一帶。焚燬賊莊。擒殺匪夥一摺。所辦雖畧有頭緒。但殺賊甚少。前經降旨。諭令任承恩。俟常青到臺灣後。即馳驛來京。陛見。但此時任承恩正在帶兵勦捕。著常青於到日。察看情形。如果任承恩奮勉得力。即令其在彼率領將弁。追捕賊匪。以期迅速。肅清。若伊在彼不甚得力。即據

實具奏仍遵照前旨飭令赴京陛見候朕面詢一切現在該處領兵大員尚有總兵柴大紀郝壯猷普吉保三人足資帶兵勦捕也○又諭據任承恩奏派兵分路進剿共有千四百名又有鄉勇等幫同勦捕而所殺賊人首級割取耳紀為數甚少前此署守備陳邦光以微末員弁尚能督率兵民多殺賊衆並擒獲要犯高文麟等四名出力可嘉任承恩等轉不及該弁寧不知愧乎現在賊衆既分屯

下奉 上諭旨

聖

諸羅縣城及鐵線橋地方黃仕簡任承恩二人務宜親督弁兵南北夾攻以期一舉集事勿再遲延至摺內所稱各莊生監義民人等擒獻賊目并呈繳逆渠王芬首級一顆此等擒獻賊匪之生監義民如官兵未到之先本未從賊及見官兵到彼即擒賊來獻自應優加獎賞若先被賊逼脅觀望附從後見官兵勢盛懼而擒獻只可免其治罪不得令其偉功著常青於到臺灣後查明分別覈辦至林

奕文王芬係此案首犯今王芬雖已殲斃若林奕文復臨陣被戮或情急自戕轉使首逆倖逃憲典無以示懲著常青於到臺灣時務使設法將林奕文生擒解京方為妥善其呈出之王芬首級並著覆驗明確查明係何人所殺若此時不能詳加辨認設將來又有王芬其人尚復成何事體該督不可不慎也劉志賢身充書吏竟敢受賊偽職公然到任實屬罪大惡極凡應行緣坐者一概不可寬宥該督於訊供後一併派員妥速解京至拏獲乘機搶奪之楊禮等十一犯雖已挑斷腳筋但該犯等輒敢乘機搶奪騷擾良善即與賊匪無異僅以挑斷腳筋完結不足示儆並著常青查明搶奪屬實即將該犯正法示衆再據黃仕簡奏欲殲其渠魁必先散其黨羽等語所奏非是此等辦法或因起事之初兵少賊多為一時權宜之計則可今軍威壯盛自應趁此兵力蕩洗賊巢勿使轉留餘孽若黨

羽既散。將來如何按名究辦。況大兵一徹。賊夥散而復聚。豈不更煩兵力。此皆伊等平日將就完案之見。此次林奕文等糾衆滋事。即由從前姑息養癰所致。今該犯等肆逆至此。豈可不殲戮淨盡。以絕根株。且現據任承恩奏賊人勾結內山生番。日出滋擾。可見賊人自知罪在必死。負嵎煽聚。非痛加剿洗。勢必仍行肆擾。現在兵力既盛。亦不難將所結之生番等一併勦辦。上年戕害同知潘凱一案。即係生番滋事。倘能趁此肅清。將來內山等處俱成熟番。不更一勞永逸乎。著傳諭常青即遵照節次所降諭旨。相機妥辦。總以勦賊務盡。勿留後患為要。○命原任湖南按察使姚頤。在尚書房行走。○予故阿巴噶輔國公齊巴克扎布。致祭如例。○壬子諭。此次臺灣逆匪林奕文等糾衆謀逆。到處搶掠。義民鄉勇人等。同官兵奮勇殺賊。守禦郡城。甚屬可嘉。業經降旨。令該督等查明優賞。惟念逆匪

滋事之初。經過地方。百姓田廬牲畜。被其蹂躪。及被賊遷徙流離者。殊為可憫。亦宜一體加恩。普施惠澤。所有臺灣府全屬五十二年應徵地丁錢糧。悉行蠲免。以副朕優加軫卹之至意。並著該督撫。接奉此旨。即行謄黃稿諭各處。該部遵諭速行。○諭軍機大臣等。本日常青奏。接據陸路提督咨報。勦賊情形。一摺。皆係任承恩業經奏聞之事。何用六百里加緊。徒勞驛站。林奕文係此案首犯。必須生擒解京。盡法懲治。方足以伸國法而快人心。據稱該鎮訪聞林奕文被破打傷之語。畢竟有何確據。大里杙等處。即係賊人巢穴。林奕文又逃往何處。若因林奕文有被破打傷之語。將弁等不能將首犯生擒。或又捏報因傷身死。希圖將就完結。致首逆重犯。倖逃顯戮。設將來又有林奕文復出。非獨黃仕簡任承恩罪無可寬。即常青亦恐不能當此重戾。至王芬一犯。據義民等將首級呈繳。亦恐不足

深信昨有旨著常青等確查覆奏。若此時未經驗明確據。將來他處又有王芬其人。一經發覺。惟常青等是問。○又諭。前因孫士毅接准閩省咨文。立即調發弁兵。親赴潮州。不過見其遇事急公。而不權事理之輕重緩急。且恐粵東內地民人心懷疑惑。是以降旨飭諭。現在黃仕簡任承恩。齊抵臺灣。分路進攻。賊匪四散逃竄。各莊生監義民擒獻賊目賊夥。並割取賊渠王芬首級呈繳。大兵合剿。餘黨自可即日蕩平。此時大局已定。孫士毅又當親往稽查彈壓。況惠潮民人入天地會匪者不少。其從外竄逃入境。及內地勾引入會之人。均應逐一搜捕。不留餘孽。若孫士毅往來督緝。豈不較總兵彭承堯及道府等更為有益。乃該督率行回省。全不知事體緩急。因時制宜。何以拘泥錯謬。若此。著傳旨申飭。該督接奉此旨。即仍往潮州一帶督率辦理。○癸丑調盛京禮部侍郎宗室宜興為盛京戶部

侍郎兼管奉天府府尹事務。吏部右侍郎宗室玉鼎柱為盛京禮部侍郎。兵部左侍郎瑪興阿為吏部右侍郎。以署正白旗蒙古副都統海寧為兵部左侍郎。

大清高宗法天隆運至誠先覺體元立極敦文奮武孝慈神聖純皇帝實錄卷之一千二百七十四

大清高宗法天隆運至誠先覺體元立極敷文奮武孝慈神聖純皇帝實錄卷之一千二百七十五

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事內閣總理

吏部理藩院詹事府正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣等謹

總裁官總纂官太子太傅文華殿大學士文淵閣領閣事稽察欽奉 上諭事內閣總理刑部戶部工部等

世襲騎都尉軍功加十九級隨帶加二級又加二級臣等謹將內大臣戶部尚書總辦滿洲副都統軍功紀錄一次

尋常紀錄十四次臣等謹將太子少保工部尚書紀錄六次臣等謹將尋常

校修

乾隆五十二年丁未二月初甲寅諭軍機大臣

等前據常青奏黃仕簡等帶兵登舟開駕以後屢被風信阻回朕當即於次日清晨齋心默禱叩

天虔告以祈

天佑嗣據該督節次奏報風水順利所帶官兵船隻於二月初二初六等日先後俱抵臺灣剋期進剿可見誠敬感孚聿昭

靈佑朕欣慰之餘益深寅凜著李侍堯即親詣

天后宮虔申報謝以答神庥旌表守正捐軀湖南桂陽縣民李得臣妻朱氏乙卯遣官祭

歷代帝王廟福建陸路提督任承恩奏擦知林爽文因聞鹿港將有兵到恐大里杙失去隨領眾繞回內山當即派員帶兵分路至馬鳴山埔心莊一帶防禦二十二日至柴坑仔遇賊官兵施放鎗礮殺賊數十名嗣因天晚撤兵賊匪衝圍突出千總葉榮等奮勇抵禦被傷陣亡我兵併力格殺賊眾潰散水師提督黃仕簡奏據總兵柴大紀咨報正月二十一日在外山部竹地方生擒偽將軍廖東一名餘賊二十一名二十二日於西洋拳獲偽軍師侯辰一名番婦八十二名斃賊甚多併奪獲鎗礮馬匹等項守備邱能成攻開城門將城內賊匪搜拏淨盡又總兵郝壯猷咨報二十一日派員在西園莊地方三路夾攻斃賊三百餘名並將賊巢數百間盡數焚燬

福建巡撫徐嗣曾奏。現在兩提臣分投勦賊。自可立就殲滅。此時沿海各口。尤宜防範。已飭派員弁。實力截擊。以防竄逸。諭軍機大臣曰。任承恩既探知賊首林爽文潛回巢穴。自應多帶弁兵。親往擒捕。乃分派遊擊都司等零星堵禦。殺賊甚少。而千總葉榮等轉被賊鎗傷陣亡。更屬不成事體。從來行軍制勝。合則勢強。分則勢弱。況閩人性本剽輕。若令零星打仗。輕於嘗試。轉恐挫失氣餒。朕屢降諭旨甚明。任承恩豈不知之。而乃輕分兵力。以致損失威重乎。前此署都司易連署守備陳邦光。以微末員弁。尚能督率兵民鄉勇等多殺賊衆。收復鹿港。彰化。竹塹等處。任承恩到彼後。惟就已得之處。駐劄觀望。僅以派員堵禦了事。是誠何心。任承恩著嚴行申飭。至黃仕簡前此所奏南北二路殺獲賊匪情形。亦係接據總兵柴大紀。郝壯猷咨報。並未躬率士卒。迅速追勦。黃仕簡所辦何事。大非向日

嘉予期望之意。亦著嚴行申飭。伊二人俱不免遲延觀望。而任承恩為尤甚。恐於勦捕不能得力。常青速渡臺灣。遵照節次所降諭旨。實力督率。以期一舉蕆事。朕於軍務。從來賞罰嚴明。其奮勇出力者。必優加甄錄。而畏葸退縮者。亦必重治示懲。黃仕簡。任承恩等寧未聞知。豈可自蹈重愆。以致百身莫贖乎。並著常青詳悉諭知該提督等。俾各知儆惕。以期帶罪圖功。奮勉集事。○又諭曰。賊匪廖東。侯辰俱受林爽文偽封名號。看來賊匪林爽文肆逆不法。或竟有自稱為王。及僭立年號之事。林爽文膽敢糾衆戕官。占奪縣城。已屬罪大惡極。若果有此等偽僭名號。該督即應據實奏聞。正可明正其罪。無所用其諱飾也。所有現獲之廖東。侯辰二犯。著即派委妥員解京審辦。守備邱能成奮勇當先。攻開諸羅城門。並將城內餘匪殲盡。甚屬可嘉。著該督於事竣後。送部引見。此次柴大紀。於官兵未

到之先能督率兵力竭力守禦郡城現在帶兵赴北路搜剿又能多殲賊衆收復縣城并生獲要犯甚屬出力著常青抵臺灣後先行嘉獎惟是臺灣係該鎮專管地方今有此賊匪聚衆不法之事該鎮本有應得之咎若能及時勇往勦捕豈止可以將功抵過朕必將伊從優議敘至任承恩正值年富力強且自請前往勦賊乃亦遽巡觀望並著常青到彼察訪實在情形如任承恩尚知出力或有需該提督在彼協勦之處即令任承恩暫留臺灣隨同搜捕俟事竣後再覈其功過據實具奏倘於勦捕不能得力即遵照前旨一面令其來京陛見一面據實奏奏常青固不必因有此旨過事吹求亦不可稍存瞻徇迴護致令倖免其功過大概朕已知悉常青亦不能欺朕為好人也○又諭前因臺灣賊匪滋事之初督臣既經前往泉州駐劄該撫自當在省靜鎮彈壓乃徐嗣曾曾前往閩安之奏

是以降旨申飭今臺灣賊匪業經兩提臣會兵搜剿縣城早經收復賊匪紛紛潰散大局已定偷越內地餘匪正復不少則此時情形又與前日不同嚴拿逸匪最為緊要該撫又應往來沿海各口岸親自督率擒拿不使一名漏網方合機要況省城距廈門一帶不遠就近往來仍可回省辦理一切兩不致誤乃徐嗣曾拘泥前旨將搜捕餘匪等事僅委之文武員弁該撫轉安坐省城何總不知輕重緩急若此徐嗣曾著再傳旨申飭該撫接奉此旨即速赴海口一帶親自往來查察將偷越餘匪嚴密截拿勿稍留餘孽○丙辰清明節遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵

上命

皇十五子顥琰祭

孝賢皇后陵○遣官祭

端慧皇太子園寢○遣官祭黑龍潭

昭靈沛澤龍王之神王泉山

惠濟慈佑龍王之神○

上詣

安佑宮行禮○諭曰喀喇沁親王品級多羅郡

王喇特納錫第宣力有年辦理盟長及圍場

事務俱屬妥協今赴五臺瞻禮後病故朕心

深為軫惜著加恩賞銀五千兩辦理喪事仍

派奏蒙古事務侍衛伯伍彌烏遜齋賞經被馳

驛前往奠醑仍著該地方官備辦人夫照料

起程諭軍機大臣等本日藍元枚徐嗣曾

奏到各摺皆係常青黃仕簡等業經奏到之

事乃各用六百里馳奏徒勞驛站甚屬無謂

嗣後各提督等拿獲逸犯等事應行奏聞者

仍令專摺具奏外若不過接准臺灣提鎮咨

報搜剿情形業經督臣提臣馳奏者均無庸

重複聲敘由驛奏報以省煩擾至常青此時

自己親渡臺灣督率鎮將等實力搜剿但常

青已經調任湖廣總督今以欽差前往督辦

一切題陞調補若專俟本省總督李侍堯辦

理則所統將弁等見常青不能專主或心中

以為即奮勉出力亦不能即邀拔擢未免稍

生懈怠著傳諭常青現在臺灣將弁被賊戕

害多有懸缺未補者常青到彼即應於勦賊

弁兵內覈其實在出力者官則酌予陞擢兵

則拔補千把一面具奏一面知會李侍堯俾

常青得有事權以便策勵將卒呼應較靈可

期迅速集事○以鑲黃旗漢軍叅領崔承玉

為鑲白旗漢軍副都統○丁巳諭曰福建臺

灣逆匪林奕文等聚眾滋事一案。節經該提鎮等奏報。勦捕情形。摺內據稱。賊匪蜂擁團聚。各有萬餘。及數千不等。竟似現在賊眾。已不下數萬。而所奏每次打仗殺賊之數。或稱數百。或稱無數。又似被殺之賊。已不下數千。賊人倉猝起事。其糾約黨羽。及沿途被脅入夥者。何能即至數萬之多。此必緣營將弁。畏懼無能。捏詞多報。既可掩其怙怯。又可藉以冒功。不知被殺之賊。俱有首級耳記屍身可驗。而黨羽之多寡。將來生擒林奕文等。亦無難根究確數。著常青於勦捕事竣後。務將所報賊數。與所殺所拏賊數。詳細覈查。據實具奏。毋任朦混。至林奕文等。攻犯城池。戕害官民。罪大惡極。不特首要各犯。罪應寸磔。而入其黨夥者。均屬法無可貸。但現在賊眾。雖未必如該提鎮等所報之多。而林奕文等到處煽惑糾結。為日稍久。看此情形。人數又當有萬餘。其中被賊逼脅附從者。想亦不少。若概

予駢誅。朕心有所不忍。著常青於官兵勦捕時。臨陣痛加殲戮。不計外。其續行搜獲。暨賊黨畏懼。縛獻乞降之犯。著該督逐加審明。此內如受賊偽職。及曾戕害抗拒官兵者。仍當即行正法。其止於被脅隨行。並未與官兵打仗者。尚可免其一死。量予遠徙。該督其恪遵妥辦。以副朕仰體。

上天好生之德。法外施仁至意。又諭曰。臺灣賊匪林奕文滋事一案。署都司事守備易連。

守備邱能成。署守備事千總陳邦光。于克復諸羅生擒要犯。並保獲鹿港。新莊等處。俱能率領兵民奮勇出力。甚屬可嘉。所有現出臺灣鎮標中營遊擊耿世文。員缺。即著易連補授。左營遊擊索中揚。員缺。即著邱能成補授。北路協都司王宗武。員缺。即著陳邦光補授。伊等率眾爭先收復擒拏。是以逾格超擢。用示優獎。其臺灣北路協副將赫生額。及諸羅守備郝輝龍。員缺。仍著常青於帶兵各員內。

擇其功績最著者酌量奏請陞補以昭獎勵。諭軍機大臣等現在臺灣勦捕官兵節經常青奏報先後調派共計一萬二千餘名軍威已極壯盛任承恩等並不親臨行陣僅派委將弁零星打仗致首惡潛匿稽誅轉以賊勢蔓延必須派兵進勦為辭可見任承恩懦弱無能不過藉此以掩飾其遷延觀望之咎。昨已降旨嚴行申飭著再傳諭常青於到臺灣時遵照前旨留心查察據實嚴參毋得稍有瞻徇計此時兵力已足更無庸再議添兵至現在大兵四路會勦賊人勢在危急其有擒獲賊目割取首級呈獻及臨陣乞降者已諭令常青分別查辦果係被賊脅從尚可寬其一綫分別發遣新疆等處給厄魯特兵丁為奴但此時賊黨尚多此等匪徒目前冀緩誅戮恐有挾詐偽降情事尤應嚴密防範並著常青察看確情慎重辦理毋得稍有疎忽所謂受降如受敵不可不知也○理藩院奏

多羅貝勒衮布多爾濟請借六年俸銀駁令准借四年得旨貝勒衮布多爾濟請借六年俸銀尚屬因災養贍屬下並非私用著照所請賞借其所借之銀展限四年作為十年扣繳以示朕撫卹蒙古之意○戊午諭軍機大臣等據倉場侍郎蘇凌阿奏從前巡幸熱河俱於秋間啟鑾是以由通州雇往船隻搭蓋浮橋自三十七年以後均於五月啟鑾惟時尚無大雨所雇船隻竟無所用請停其雇備等語所奏是此項船隻原因豫備搭蓋橋座而設近年以來既無所用自應早行停止即或遇春雨稍多之年必須應用亦隨時酌察情形再為雇備何得因循舊例徒費項至六千餘兩之多著將原摺鈔寄劉綏闕看令其將因何不奏請停止之處據實明白回奏尋奏此項橋船未經奏請停止緣歷任藩司與臣衙門均未留心詳查遽循例咨撥實係疎忽應請將臣與藩司梁肯堂均交部照例議

處並請將節年動用銀兩由倉場衙門查知確數著落歷任督臣暨歷任藩司名下均攤賠補以為率忽糜費者戒下部議又諭前據熱河總管全德等奏李獲偷進行宮之賊犯于九恭一名訊據供稱初次曾由外圍扒牆潛入撬取鐵葉售賣因未即被拏復希圖進內偷取物件當被官兵拏獲現交熱河道審辦等語行宮禁地該犯膽敢兩次潛入行竊情罪較重非熱河道所能審結著傳諭劉我即轉飭該道派委妥幹兵役將該犯于九恭解交刑部審擬具奏○又諭曰明興奏李獲傳習坎卦邪教人犯嚴審定擬一摺已批交軍機大臣會同法司覈議速奏矣孔玉顯傳習坎卦邪教指稱養贍劉二洪為名斂錢惑眾李文功王秉禮之父兄本習坎卦邪教該犯等復聽從孔玉顯造言傳布情罪均屬重大該犯等既俱係劉省過教內餘犯復自稱坎卦教長上年大名案犯有欲往單縣搶

救劉大洪之語則孔玉顯等所供與劉二洪並不認識亦無勾通段文經謀逆之處俱不可信必須徹底研訊究出實在情節方成信識此事非東省所能完結著傳諭長麟即派委妥員將孔玉顯李文功王秉禮三犯小心管押迅速解京交軍機大臣會同法司審辦毋得稍有疎虞其餘各犯俟覈擬具奏後再行分別辦理○又諭前因黃仕簡任承恩奏報各摺僅派委將弁等零星打仗並未親臨行陣屢經降旨嚴行申飭然尚以黃仕簡或因年老多病猶存憐憫之心今據伊所奏摺內於現在軍務情形置若罔聞是黃仕簡與任承恩互相觀望遷延時日黃仕簡不宜如此朕亦不能因其老病曲為憐宥矣至任承恩摺內有鎮定持重之語伊現在如此退縮不前竟屬怯懦無能豈可藉詞持重乎伊二人於勦捕賊匪種種遲延難辭貽誤之咎任承恩知斗六門一帶有賊踞守即應督同將

弁等親往追捕將賊衆痛加殲戮俾與黃仕簡一路聲息相通庶賊人聞風膽落首犯得以剋日就擒今伊等如此遷延觀望幸賊人亦如伊等畏葸無能不致更肆鴟張倘賊衆偵知官兵鬆懈復轉相糾衆逞其狡獪致大軍稍失威重尚復成何事體耶又任承恩奏稱接據都司馬元勲稟報埔心莊打仗殺斃賊目餘黨逃散當委親隨妥弁前往確查之處尤屬不成事體任承恩如果親往該處督勦於該都司稟報虛實何用更委員弁前往確查豈任承恩竟思安坐彰化觀望不前乎黃仕簡任承恩著再傳旨嚴行申飭并著該提督等親帶弁兵會同勦捕勿再仍前延緩致干重戾○又諭本日黃仕簡任承恩六百里報到竟係覆奏諭旨並未帶兵進剿且摺內有鎮定持重之語已降旨將伊二人嚴行申飭矣黃仕簡之摺係正月二十七日拜發距伊二十四日拜發之摺又有三日此三日

自應與賊打仗何摺內竟無一字提及若云府城緊要從前崇大紀與永福二人尚能保護無虞豈此時須添黃仕簡在彼防守之理前因黃仕簡年老患病朕尚為之原諒今玩誤至此不惟不覺可原轉覺可惡矣至斗六門為南北咽喉之地任承恩即應帶兵前往奮勇勦殺以通要道乃任承恩尚駐劄彰化而黃仕簡又駐劄郡城一南一北互相觀望以致道路不通此明係退縮畏怯安得藉詞持重乎從來用兵之道貴乎神速官兵一到即訂期夾攻使賊無暇抗拒渠魁既得其黨羽自可殲擒幸而賊匪不過么虜草寇亦如黃仕簡之懦怯無能若使稍知謀畧乘隙鴟張一路之兵稍有失利其餘兵弁雖多自必因而氣餒撲滅為難尚復成何事體看來此事斷非黃仕簡二人所能辦理常青務即速赴臺灣遵照節次諭旨相機妥辦必須堅持定見親督官兵調度指揮務使壁壘一新以

期一舉集事。至黃仕簡任承恩。彼此推諉。一味因循。其貽誤之咎。已無可辭。豈可復行寬貸。著常青於抵臺後。嚴切查明。如該提督實有逗留觀望情事。即一面據實奏。一面傳旨將伊二人解任。令回內地。交李侍堯請旨辦理。所有水師提督印務。交與柴大紀暫署。陸路提督印務。交與郝壯猷暫署。俟朕另降諭旨。朕於軍務紀律。嚴明信賞必罰。其有能著績成功者。必格外加恩。如阿桂在金川奏

凱。賞給寶石帽頂。四團龍補服。以昭寵異。其老師糜餉臨陣失機者。亦無不寘之重典。歷歷可數。豈黃仕簡任承恩。尚未之知。即常青雖擢用總督。辦事未久。然歷任中外多年。自當知朕用人之道。既經朕特交查辦。亦不能為之瞻徇也。吏部議准。兩江總督李世傑奏稱。徐屬邳睢一廳。管轄黃河南北兩岸。埽工必須於南北兩岸分設同知。庶於修防有益。查有六塘同知事簡。可以移設。請將邳睢

南岸改為睢南廳。仍歸原設同知管理。北岸改為邳北廳。即歸新移同知管理。其六塘汛務。仍歸運河中河分汛兼管。從之。兩廣總督孫士毅奏。閩省拏獲臺匪楊咏等。供出天地會根源。起於廣東和尚洪二房及朱姓人。前經浙閩督臣常青咨會查拏。嗣將許阿協等訊供。俱不能據實指出。而楊咏所供之後溪鳳花亭。亦尚未能查出。現在惠來海口。又盤獲閩省漳州陳孟琴等七名。恐亦係會匪

黨羽。其許阿協等犯。應暫緩解京。以備質訊。報聞。已未。諭軍機大臣等。上年大名匪犯糾眾戕官一案。首犯段文經等。現今尚未就獲。前據長麟面奏。各省緝拏過於嚴緊。轉恐該犯畏懼。潛匿不出。即窩留之家。亦不敢輕於出首。必須不露形跡。外似遲緩。密為躡緝。或可得其實。在下落等語。此言似有所見。該撫此時已經到任。如何飭屬設法密行查緝。曾否得有段文經等蹤跡。再上年東省兩次

越獄人犯尚有七名未獲亦當一體照此辦理方可速期就獲著傳諭長麟即將到任後如何設法查拏各犯情形據實覆奏○又諭曰何裕城奏贛南道吳承緒幕友蔡甫亭撞騙貢生吳成紱銀兩據該道自行訪稟其中恐有通同容隱情事請將吳承緒革職提犯嚴審等語已降旨將吳承緒革職交該撫審辦具奏矣吳承緒身為監司大員容留蔡甫亭在闕辦事任其出入署內指名撞騙已屬

非是今雖該道自行訪稟但此案係五十年九月之事何以遲至年餘始行訪拏稟究自係蔡甫亭在該道署中劣蹟甚多或已經發覺恐人告訐不能隱瞞始捏稱自行訪聞希圖規避處分且其中難保無通同婪索情事著傳諭何裕城即親提犯證徹底根究確審定擬具奏○又諭前據巴延三奏於藍田縣地方盤獲貌似段文經之許魁一名解直質審因令軍機及刑部司員帶同王成功迎赴

前途認識茲據福康安奏在徐溝縣地方適遇該員等押犯到彼當即提訊據供實係許魁籍隸安徽於四十三年前往陝西找尋親戚因貧難度日沿途求乞本年正月行至藍田即被拏獲畏刑誣認等供質之王成功亦稱並非段文經但恐其中或有隱瞞情弊仍飭委員解赴直隸再行認識等語段文經一犯係大名案內首逆節經降旨令各督撫上緊緝拏迄今日久未獲經陝西盤獲貌似該

犯之許魁解直審辦現雖認明並非段文經但係狀貌相似查拏究係急公若因此即治該員等以誤獲之咎恐地方官畏懼處分疎於盤詰果遇該犯轉致兔脫漏網於緝捕更屬無益所有誤拏許魁之藍田縣知縣等俱著福康安不必因此飭誡仍令其上緊留心緝捕段文經劉勤為要並傳諭各督撫設法躡緝嚴行查訪務得真犯蹤跡或不露形跡外似遲緩使該犯不復畏懼深藏或敢潛出

即易於蹤跡。無難立時就獲。亦密緝要犯之法也。至許魁供稱籍隸安徽。而口音不似。或係大名案內餘犯。亦未可定。並著劉義於陝西委員解到時。即著該員小心管押。解送刑部。再行質審。辦理將此各諭令知之。○予故客爾喀扎薩克輔國公巴克巴扎布致祭如例。庚申。

上御勤政殿聽政。○遣官祭賢良祠。○諭據李世傑徵瑞奏查明營伍硝磺缺額。實由採運稽遲。請將三十六年以後辦磺遲延。四十六年以後辦磺遲延之歷任江寧蘇州各藩司。交部嚴加議處一摺。硝磺為軍火要需。我國家武備修明。戎行整飭。凡遇臨敵制勝。尤藉鎗礮為利器。必需平時操演精熟。方能所向無前。即如京師健銳火器等營。按期每日操演。需費硝磺甚多。而各直省營伍。亦皆按期操演。是採辦火藥。為兵丁練習之需。最關緊要。斷無因多費硝磺。遂停止操演之理。且各

省俱經委員採辦。未聞缺額。何獨江南遂形短絀。至李世傑前奏硝磺不敷。由於歲需烟盒之語。更無是理。硝磺係自然之利。鋪戶製造花爆。售賣者甚多。即如京城每遇除夕元旦燈節。居民所放花爆。晝夜喧闐。不可勝計。又如江浙等省。商賈輻輳之區。售賣花爆。何止數千百萬。與營伍軍火。有何闕涉。若果於軍器所儲有礙。朕必早降旨禁止民間花爆矣。況現據李世傑等奏。江蘇通省各營。歲需硝磺八萬九千餘觔。而匠鋪硝磺。每年約需十七八萬。或二十餘萬。觔不等。其數倍於營伍。可見民間所用花爆。需費硝磺。無礙軍火。已與該督前奏自相矛盾。至兩淮年例。歲進烟盒七架。大小爆竹一萬。所需無幾。前據徵瑞查明。每年採辦。止開銷銀一百一十餘兩。較之通省各營。及匠鋪所需硝磺。為數不及百分之一。即內府花爆作。每歲開銷。僅需硝磺一千餘觔。其數較之江蘇匠鋪。亦不過二

十分之一。而謂硝磺不敷。由於烟盒。有是理乎。明係承辦之藩司等。採運遲延。創為此語。以為卸罪地步。豈能上而欺朕。下而惑衆。而該督不以為怪。轉以此牽涉聲敘。其過甚大。但該督既有此奏。轉不值以年例所需。致伊等得有藉口。所有兩淮每年例進烟盒爆竹。著即行停止。京城花爆竹。何所不可。至該藩司等採辦遲延。託詞支飾。李世傑冒昧陳奏。均應重治其罪。但恐外間無識之徒。不知伊等貽誤軍火。妄謂摺內牽涉烟盒聲敘。以致獲咎。是誠全無人心者。不得不反覆剴切曉諭。此案案鑒係屢經獲罪。加恩錄用之員。乃敢如此巧為諉卸。最為可惡。前經降補知府。尤不足以蔽厥辜。著即革去頂戴。仍留知府之任。三年不准支食廉俸。李世傑本當照部議革任。但念其平日辦理地方事務尚屬留心。且究因病後精神昏瞶。未能認真查覈所致。著從寬免其革任。亦三年不准支領養廉。

至蘇松各營硝磺。既有缺額。操演時。又將儲備火藥動用。蘇州藩司亦有遲延。閱鶚元身為巡撫。豈竟毫無聞見。所司何事。何以並未查辦。著明白回奏。所有三十六年以後辦硝磺遲延。四十六年以後辦硝磺遲延之。歷任江寧蘇州布政使。著交部嚴加議處外。並著照各營短缺硝磺例價。各令十倍罰賠。以示懲儆。餘俟該督等查送職名到部。一併議處。經此次查辦之後。各營火藥。務須嚴飭委員採買足額。迅速解營。年清年款。若再因循遲玩。朕必照貽誤軍需之例。重治其罪。決不稍為寬貸也。陳杰據實直奏。可嘉。著交部議敘。將此通諭知之。又諭曰。工部奏湖廣江西造船撥船所開物料夫價。與例不符。應令據實刪減。再行覈銷等語。固屬照例辦理。但念前年湖廣適遇歲旱歉收。一切木料匠工。未免昂貴。且辦理尚為迅速。江西省承造船隻。亦能妥速完竣。所有該二省請銷撥船價值銀兩。

著加恩准照該督撫等所題覈銷。諭軍機大臣等大名案内首犯段文經等至今未獲。節經降旨令各督撫上緊躡緝。前據陝西省奏報盤獲貌似段文經之犯。特派司員帶同王成功迎赴前途識認。又非段文經。是該犯尚無實在蹤跡。因思上年該犯等曾有逃上鹽船及往武當漢口之信。此時直隸山東等省查拏緊急。不致潛匿。或竟由鹽船逃往漢口或竄入武當山藏避。均未可定。徐克展一犯係毛師沆在亳州訪獲。尚屬能事。著傳諭畢沅仍密飭該員帶同眼目前赴漢口武當山一帶及各鹽船上。不露形迹。設法購線查拏。若該員果能再將段文經劉勤盤獲。朕必破格加恩陞擢該員不可不倍加奮勉也。將此諭令知之。又諭曰總兵柴大紀督率官兵義勇保護郡城。最為出力可嘉。郝壯猷在南路一帶督兵攻剿。殺賊多人。亦屬認真奮勉。自應酌量加恩。以示獎勵。著常青查明該

鎮等如未經賞過花翎。即傳旨加恩賞戴。令其益加奮勵。各帶官兵分投勦捕。以期迅速。藏事至黃仕簡任承恩並不親臨行陣。貽誤事機。已降旨令常青查明即行奏解任。將水師陸路提督印務交與柴大紀郝壯猷暫署。常青務須飛渡臺灣。遵照節次所降諭旨督率柴大紀等分帶官兵相機妥辦。黃仕簡任承恩並著先即摘去花翎。兵部議覆署河東河道總督蘭第錫奏稱河營協辦守備分管各廳工程統轄把總董率修防與正備相同請照守禦所千總之例作為從五品應得封典即改照從五品給予應如所請至協備品級究與正五品之守備有間遇有河營都司缺出自應先儘正備題補如實無合例應陞之員該督務於摺內切實聲明始准於協備中遴選請旨補用不得率以正備人缺未宜輒將協備題補致啟越次之漸從之。轉工部右侍郎趙鏞為左侍郎以內閣學士

劉躍雲為工部右侍郎。○以光祿寺卿陸錫熊為左副都御史。○辛酉諭現在陸錫熊已補授左副都御史所遺光祿寺卿員缺著管幹珍補授仍留巡漕之任。○又諭曰索諾木巴勒珠爾著補放正盟長所遺副盟長員缺著補放端珠布色布騰圍場事務亦著端珠布色布騰管理。○諭軍機大臣等據福海奏淮安地方於二月初九日子時起至初十日午時止復得密雨連綿入土深透等語春膏應候二麥藉以滋培覽奏甚為欣慰福海係淮關監督業經具摺奏報李世傑閱鶚元身任封疆何以於地方雨水情形轉未據奏及李奉翰近在淮安豈皆不知朕屢念民依無時或釋耶著傳諭該督等將因何未經奏及之處據實覆奏嗣後所屬地方得有雨澤務隨時速奏毋得遲緩。○又諭直隸大名糾眾戕官案内首逆段文經劉勤節經降旨緝拏迄今未獲昨據巴延三奏盤獲貌似段文經

之許魁一名經派員帶同夥犯王成功迎往認識實係畏刑誣認並非正犯是段文經劉勤或竄入川省潛匿冀圖苟延殘喘亦未可定著傳諭保寧嚴飭所屬設法躡緝密訪嚴拏務期弋獲毋因日久生懈以致正兇漏網稽誅。○壬戌諭曰康基田補授江蘇按察使伊由河南河北道調任江南淮徐道於河工事宜最為諳習且辦事認真不辭勞瘁每年伏秋大汛時仍應令其赴淮徐一帶幫辦修防諸務庶於河工有裨其本任臬司事件著交該督撫或委藩司兼署或於道員內揀選一員署理不過數月俱無不可至上年降旨令書麟於伏秋大汛以前赴清江一帶幫辦河務嗣遇河湖並漲隄工漫溢數處書麟在彼督率工員趕辦堵築事宜李世傑病後精神未能照料全仗書麟認真督辦會同李奉翰分投飭催漫口得以妥協竣事著書麟以後於伏秋大汛時應赴工將修防各務會同

李世傑李奉翰詳悉講求。豫行籌辦。以期永慶安瀾。又諭前據徵瑞奏長蘆商人呈請捐銀三十萬兩。備造撥船。以為撥運漕糧之用。民船得免官封。商引即無虞壅滯。是以准其所請。今湖廣江西二省。先行動項趕造。解直備用。仍令該商等分限交納歸款。前據該二省題銷成造撥船。共一千二百隻。實用銀二十八萬二百五十兩零。覈計原捐銀三十萬兩。共節省銀一萬九千七百四十三兩零。除已降旨准將該督撫原題覈銷外。所有該二省節省銀一萬九千七百四十三兩零。著該鹽政於該商等應行歸款時。按數扣除。毋庸照原捐之數交納。以示體恤。○諭軍機大臣等。昨召見安省保舉堪勝道員之知府錢金殿。見其才具祇屬中平。並非出色之員。該員前於江安糧道任內。因公降調。補授徐州府知府。據該督撫奏調太平府知府簡缺。復由太平調任廬州府。廬州雖在安省為中繁

缺分。較之徐州已屬事簡。何以轉將該員保奏。前降旨令各督撫特保道府。原欲伊等於屬員中察其才具出眾。實能勝衝繁要缺。諳練地方事務者。秉公保列。以備簡用。今錢金殿不過中材。又加以年老。若似此循分供職之員。各部院京察記名人員內。較為優勝者。正不乏人。又何須該撫特登薦剡耶。著傳諭書麟將因何保奏之處。據實覆奏。或朕於引見時。看其才具中平。而該員在安省實有何事辦理出力。該撫因將該員特行保奏之處。亦著書麟一併覈實具奏。固不可意存迴護。亦不必因有此旨。稍為遷就。以致屈抑人材。所有記載原片。並著發交書麟閱看。遇便繳還。將此諭令知之。尋奏錢金殿在江年久。於吏治民情最為熟練。前署廬鳳道時。適值該處水災。該員查辦賑務。頗見實心。於關務亦屬妥協。且曾任道員。是以保奏。得旨看其人。妥當自守之流。要缺斷不能。癸亥諭曰。伊

犁領隊大臣那旺來京陛見看其年力衰邁若令回任不惟不能得力伊亦不情願從前那旺曾經効力多年著加恩賞給散秩大臣職銜前赴察哈爾游牧地方原品休致所遺領隊大臣員缺著散秩大臣職銜總管那彥補授代那旺管轄部落事務○又諭據奎林等奏審訊戮死民人馬成龍之馬海是否果係獨子及馬成龍有無兄弟之處現在行查內地如應留養由部辦理等語所辦錯誤新疆地方豈可拘泥內地章程辦理且馬成龍不過拳毆馬海脊背而馬海輒用金刃戮傷斃命自應照例定擬乃奎林等援獨子留養之例行查內地實屬拘泥新疆地方不可如此辦理奎林等著傳旨申飭○諭軍機大臣等前因大名首犯段文經等至今未獲屢經降旨令書麟實力嚴密緝拏乃本日書麟奏到地方情形一摺祇將麥苗長發及展賑日期具奏而於段文經下落並無一字提及其

意竟似不能拏獲惟以慚愧了事不復置議况前經東省獲犯張二小供稱段文經曾逃往亳州是該犯曾在該省地方潛匿書麟不能隨時弋獲遂以該犯已經他竄心生疎懈竟視為海捕具文全不留心上緊查拏書麟著傳旨申飭並著該撫密飭各屬仍於潁亳一帶實力躡緝毋再疎懈使要犯久稽顯戮又諭連日盼望臺灣捷報甚為懸切本日黃仕簡有六百里報到朕以為必係奏報剿賊情形及加披閱係接到恩賞及覆奏諭旨於剿捕賊匪之處竟無一字提及而任承恩連日亦無奏報是黃仕簡任承恩互相觀望皆屬一籌莫展朕前因黃仕簡年老患病一聞賊匪滋事即帶兵親赴臺灣屢降溫旨獎勵並令加意調攝勿過勞勩並賞給荷包等物以朕高年如此體恤周至黃仕簡宜何如感激圖報以慰朕懸切亦應將受恩深重雖年老病後仍當身先士卒勦滅賊匪以圖報

効之處懇切聲敘即非出於至誠亦當數行謝恩乃竟於此等處所全無一言敘及豈朕眷念老臣而黃仕簡轉不知仰體高年之主宵旰焦勞之意乎著常青到彼即將此旨詰問黃仕簡嚴行申飭況總兵普吉保一到臺灣即率領弁兵親往諸羅一帶會同柴大紀相機進剿普吉保身係滿洲遇事頗能奮勉黃仕簡在御前行走非外省提督不曉事者可比乃安然坐視並普吉保之不若乎且臺

灣原設兵丁不為不多乃黃仕簡等屢次派兵進剿止令郝壯猷徐鼎士等帶往之兵分投勦捕而於臺灣本地官兵並未將作何派撥之處奏及現在普吉保已帶延建及水師兵一千六百名前赴諸羅黃仕簡即應督同親往何以僅委之該鎮黃仕簡竟若置身事外者豈竟因病氣餒觀望不前乎至任承恩年富力強尤非黃仕簡尚可以老病藉口乃駐劄彰化並不帶兵親往賊巢奮勉勦殺竟

如溫福在木果木將弁兵各處分截以致賊衆乘間竊發遂至債事光景此事初起時朕尚不甚介意以為么庸竊發黃仕簡一到即可捕滅無餘乃不意伊二人竟敢如此遷延觀望殊出意料之外現據黃仕簡奏到拏獲賊匪蔡紹等訊據供稱賊首林爽文等團聚斗六門勢尚猖獗猶思復攻諸羅而任承恩柴大紀俱有官兵單薄需撥兵接應之語雖業經普吉保率領原帶兵一千六百前往協剿但恐賊夥為數較多黃仕簡任承恩屢派弁兵分投堵禦零星打仗或一路之兵稍有失利其餘兵弁雖多自必因而氣餒倘賊匪見黃仕簡等漫無籌畫乘隙鴟張或有挫失更為可慮常青到臺灣後務須察看情形如果必須增添兵力即一面具奏一面咨照李侍堯於附近各營再撥二三千名速度臺灣俾資策應李侍堯接准來咨即行飛調配渡毋致遲誤至常青經朕特派前往臺灣督辦

勦捕諸務固應親督官兵調度指揮但伊係總督大臣理宜持重於臨陣打仗時相度事機籌酌輕重此事已專委常青一人辦理當堅持定見勇往前進酌量事宜運籌制勝以正黃旗漢軍副都統德成額為江寧副都統旌表守正捐軀湖北荊門州民金文妻蕭氏甲子

上謁

東陵自圓明園啟鑒

孝昭仁皇后忌辰遣官祭

景陵諭此次恭謁

東陵迴蹕便道巡幸盤山所有沿途經過地方本年應徵地丁錢糧著加恩蠲免十分之三○是日駐蹕烟郊行宮○乙丑諭軍機大臣曰劉戡奏據蠡縣拏獲惑眾斂錢之董敏家內起出鈔寫邪教經曲歌單語多悖妄並據教內之郭林供稱係同內邱縣人劉進心買自山西長子縣田景盛家等語田景盛膽敢

編造經曲輾轉收徒惑眾誑騙實屬惡不畏法著傳諭勒保即將田景盛一犯飭屬嚴拏務獲定擬具奏並搜查該犯家內如有前項歌單板片即行解京銷燬該犯既經授徒傳習恐同會被惑者人數必多務須逐細嚴查按名弋獲倘此外無知愚民有將此項經曲歌單私自收藏者即令其及早呈出若止係被騙鈔襲自與編造者有間尚可免其治罪並著勒保出示曉諭伊等不必隱匿致干重

罪再據奏劉順供稱伊父劉進心向與田景盛家來往於上年十二月內又赴山西貿易等語恐該犯尚在田景盛家潛藏亦未可定著勒保即將該犯一併嚴拏務獲勿致遠颺漏網將此諭令知之○又諭前因林爽文等不過烏合匪犯聚眾滋事各省遽紛紛徵調辦理過涉張皇恐內地民人聞而生駭是以諭令停止今黃仕簡任承恩二人自到臺灣後並不親帶兵弁迅速追捕一味因循恇怯

互相觀望以致賊匪尚未撲滅業令常青速往臺灣實力督率會勦自無難一鼓殲擒但恐賊人自知罪在不赦負隅抗守或又有須添兵力之處是前此粵省已經派調之兵現今自未便全令撤回歸伍仍應於交界處所酌量暫為留駐如常青到臺灣後察看賊匪情形尚須兵力接濟即一面據實具奏一面知照孫士毅調取應用更為便捷此時圖薩布諒已回任孫士毅正當在潮州一帶往來稽察使臺灣匪犯知有總督在彼督拏不敢潛行竄入且潮州距閩較近該督親督弁兵就近駐劄更足以壯聲援而資策應即於搜捕餘匪亦為有益又諭本日柴大紀克復諸羅縣城一摺尚係黃仕簡奏報情形所奏已遲至臺灣本設有重兵黃仕簡現帶有本標兵丁未經親臨行陣復將勦賊之參將潘韜兵三百名留駐郡城祇圖自為護衛不意黃仕簡恒怯無能竟至於此現在常青自己

前抵臺灣著將柴大紀摺發交常青閱看並令常青到彼嚴查黃仕簡所帶本標官兵及臺灣原有兵丁現作何用因何復將參將潘韜兵三百名留守郡城之處一併查明據實奏奏並將何日已抵臺灣作何籌辦勦捕情形迅速具奏又諭曰臺灣不過海外一隅其戶口不及內地之繁庶林爽文等倉猝起事該處民人必不肯盡被脅從且節據該提鎮等奏各路攻勦賊匪俱有義民鄉勇幫同出力是百姓中被賊脅誘入夥者究屬無多乃該提鎮等節次奏報摺內動稱賊匪萬餘及數千不等若如所云豈非臺灣之人全係賊黨而每次打仗又動云殺賊數百或稱殺賊無算如果屬實賊幾於殲戮靡遺何以尚稱其勢猖獗看來皆由綠營將弁飾詞誑報既可掩其恒怯又可藉以冒功前已有旨令常青秉公嚴查該督到臺灣後務遵前旨確實查明勿任朦混至此事總由黃仕簡任承

恩因循畏蒞以致遷延時日賊人因得乘隙復相糾結蟻聚成群未得速就撲滅常青到臺灣後務悉心調度加之鼓舞若能就現有官兵一鼓殲滅賊衆固屬甚善倘必須添兵接濟即遵昨降諭旨一面具奏一面飛調內地暨粵省附近兵丁應用以期妥速肅事若賊匪本不甚多竟係綠營官兵增數誑報必當據實嚴叅示儆勿稍迴護是日駐蹕白澗行宮丙寅軍機大臣奏遵旨將李國梁

所奏古北口米價較貴應否平糶與劉義李國梁梁肯堂公同酌議查口外現在米價與京師不甚懸殊約俟三四月間價或未減須籌接濟承德府各州縣均有常平義社等倉應交總督劉義屆期查看情形於倉貯米穀內減糶十分之三報聞○是日駐蹕隆福寺行宮丁卯

上謁

昭西陵

孝陵

孝東陵

景陵俱未至碑亭即降輿慟哭步入

隆恩門詣

寶城前行禮躬奠哀慟王以下文武大臣官員隨行禮○至

孝賢皇后陵奠酒○諭軍機大臣曰劉志賢一犯前有旨令該督等派員解京審辦今既據訊明並無緊要情節業已先行斬梟自因未

接前旨如此辦理但該犯身充縣書受賊偽職其子嗣未便寬宥即不至擬以重辟亦當發往伊犁給厄魯特為奴以示懲儆著常青於抵臺灣後即查明遵照辦理又據前奏海壇官兵赴臺灣剿賊船至澎湖洋面陡遇狂風淹斃各員弁兵丁等殊堪惻憫著常青查明照例咨部分別議卹其受傷病重者即酌量加賞用示軫恤再前因徐嗣曾等以覆奏事件由六百里馳奏徒勞驛遞曾降旨飭諭

但現在尚未撲滅。著傳諭徐嗣曾如目下得有勦賊捷音及緊要信息。仍當由六百里迅速馳奏。其尋常覆奏事件。即遵前旨。不必紛紛馳遞。以省郵傳。至李侍堯由京赴閩。僅於浙江途中拜摺一次。雖該督到泉州。廈門。尚須時日。然此時自早入閩境。接見屬員。及閱看稟報。於近日勦賊情形。亦必得有信息。即當於入境後。隨時具奏。何以未有隻字提及。豈該督竟不知朕懸盼軍報。宵旰焦勞。無時或釋耶。是日駐蹕桃花寺行宮。戊辰吏部議覆江西巡撫何裕城奏稱。江西湖北交界之處。向設城子鎮巡檢一員。駐劄乾隆二十三年。移駐德化縣之小池口。遂無專員分駐該處。為江西扼要之區。應仍設巡檢。以資查緝。第小池口地亦緊要。不便移回。查有石城縣赤江司巡檢。雖通閩省。而距縣咫尺。兼有典史分任。應裁汰移設城子鎮。并請定為揀調要缺。再萍鄉縣蘆溪市巡檢。與湖南水

陸交界。實為衝要。請改為繁缺。在外揀調。都昌縣周溪司巡檢。改為簡缺。歸選。應如所請。從之。旌表守正被戕山東臨淄縣民孫存義姪女李孫氏。守正捐軀。陝西靈臺縣民景大悅子妻郭氏。是日駐蹕盤山行宮。至壬申。皆如之。是月直隸總督劉戡奏。保定省城於初八初九日。得雨一寸。房山等四十五州縣。各得雨雪自一二寸至四五寸不等。土脉滋潤。於二麥春耕。深有裨益。得旨。近京微欠分數。更望再霈益佳。四川總督保寧奏。四川達州屬太平縣幅員八百餘里。近年山多開墾。五方雜處。政務紛繁。應改為衝繁難要缺。且應於該縣之北隅城口場。添設主簿一員。以資佐理。查成都府經歷一缺。閑冗。應裁。所有該經歷衙門原設吏役。改撥太平縣城口主簿應役。又查茂州屬汶川縣。從前原定中缺。嗣後金川善後事宜。案內改為要缺。今應仍改中缺。歸部選。從之。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十五

實錄卷一千二百七十五

四十五

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十六

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十二年丁未三月初己巳朔福建水師

提督黃仕簡奏二月初三日接任承恩咨稱
現在分兵進攻賊巢需添兵力臣即飛檄徐
鼎士帶兵前赴鹿港勦捕合計北路官兵共
有七千名足資勦洗至南路賊夥雖疊被官
兵勦殺但崗山賊勢尚屬鴟張現又派撥官
兵由後路抄襲與郝壯猷等會合夾攻迅期
殄滅再柴大紀拏獲之偽官侯辰等五名檻
解到郡嗣因侯辰吳映張請先三名先後病
危當即正法惟是臺地辦理多人實恐不便

嗣後拏獲之犯應請解交督臣辦理汀州鎮總兵普吉保奏提臣任承恩前報林爽文潛回大里杙勢復猖獗臣隨於二月初七日自諸羅起程帶兵會勦至大埔尾地方有賊匪千餘人迎拒當即督兵攻勦擒獲賊目張貴等四名殺斃賊人甚多初十日行抵鹿港即將張貴等訊明正法現與提臣任承恩整合兵力籌勦賊巢諭軍機大臣等此事初起時柴大紀止能於扼要處所堵禦自不能進搗

賊巢悉數擒捕今大兵雲集黃仕簡惟安坐郡城留兵衛己且稱臺灣拏獲之犯本處不便辦理多人更不成話即此足見其畏蒞任承恩亦以巡防堵禦為詞分派弁兵零星打仗俱不親身會合前往勦捕似此辦理何時事了耶從來用兵之道合則勢盛分則力單黃仕簡任承恩帶兵前往不特官兵不應零星分撥即鄉勇義民等亦應加之鼓舞俾與官兵圍聚一處庶伊等見軍威壯盛益加奮

勵踴躍從事乃該提督等如此漫無籌畫致兵氣不能振作倘義勇等稍有失利其良善者即不至從賊亦難望其仍前出力其狡黠之徒甚或轉為賊用別滋事端尚復成何事體著將本日硃批普吉保各摺發交常青閱看該督一到臺灣後即將交查黃仕簡任承恩違誤之處詳細確查並本日批出情節面加嚴審具奏毋稍存迴護再任承恩摺內所奏各路之賊動則數百至數千不等而斬獲

賊匪首級不過一二十顆生擒者不過一二名看來皆不實在並著常青一體嚴查毋任朦混又昨據徐嗣曾委員將受賊偽職之逆犯高文麟等三名解到令軍機大臣研審究出林爽文等與通事杜善有勾結生番希圖將來竄匿內山等事著將原審奏片發交常青閱看令其嚴密搜查勿致首要各犯遁入內山致稽顯戮事竣後即將內外界址重加勘定以期周密不致再滋事端其平日防守

疎虞之文武員弁一併查叅並將杜美一犯嚴拏務獲解京審辦○庚午諭軍機大臣等據保寧秦拏獲伊陽案內逸犯王進城因狀貌與原咨不符現解交豫省審辦又據另片秦盤獲河南信陽州人王福訊據供稱上年閏七月十四日在大名黃土岡地方有素識之張敬才引與段文經劉公等相見誘赴城內行劫該犯未從逃至川省但查直隸原咨內並無王福及張敬才劉公等姓名無從覈對現亦委員解赴直隸審辦等語所辦奸足見留心已於摺內批示矣王福一犯所供段文經徐克展年貌均與原咨相符其素與該犯等熟識已無疑義如未入夥何必潛蹤遠竄顯因質證無人不肯據實供吐且此案人犯衆多直省原咨自不能無遺漏之處若將該犯仍解直省審辦恐該省原辦官員意存迴護自應解京審訊以便徹底根究至王福既經川省盤獲看來段文經劉勤等犯亦必

因川省距直隸較遠可以潛匿逃至該處希圖漏網著傳諭保寧務遵前旨嚴飭所屬實力查拏或在峨嵋山內根緝若能擒獲首犯解京審辦更屬可嘉其王福供出之張敬才劉公二犯並著該督一體偵緝務獲除就近傳知劉義外將此由五百里諭令保寧知之又諭大名案內首犯段文經等至今未獲前經降旨諭令畢沅密飭毛師沅帶同眼目前赴漢口武當山一帶購線查拏本日據保寧奏拏獲王福一名訊據供稱與段文經等相識曾誘赴大名城內行劫該犯並未隨行逃往四川等語看來此案人犯或因附近省分查拏緊急復逃至川省希圖潛竄漏網亦未可定該省峨嵋山高峻深遠易於藏匿奸匪著傳諭畢沅即速飭知毛師沅如漢口武當山等處查無段文經等蹤跡即由該處逕赴川省峨嵋山一帶改裝逐細根緝務獲解京審辦必邀格外加恩也將此由五百里諭

令知之○辛未賜扈從王公大臣蒙古王公及直隸總督長蘆鹽政等食○諭朕此次恭謁

東陵駐蹕盤山所有平糶山道人夫著加恩賞銀二百兩○軍機大臣議奏署湖廣總督舒常奏審擬江陵縣刦盜周國泰等分別斬決發遣知縣湯廷芳等各員分別發遣杖革均如所擬得旨此案於乾隆四十三年即經事主具報被盜該守令等俱不上緊審辦上司

亦未查催任意遲延幾及十年之久足見湖北吏治廢弛已極不可不嚴加懲創除歷任之督撫司道交部查照職名嚴加議處具奏候朕另降諭旨外其知縣湯廷芳著於該處先行枷號一年黃燁著枷號半年俟滿日再照議分別發遣杖徒議以革職之知縣元依祿王嘉謨孔毓檀俱著枷號三個月革職知府曾恆德廷毓俱著枷號一個月汪獻琛俟解到之日該督撫審擬具奏後即照此辦理

此內應行枷號各員如有回籍者並著提至該省枷號以為親民之官尸祿不理民事之戒其盜犯周國泰著即處斬餘依議○調甘肅按察使景安為河南按察使以原任湖南按察使姚頤為甘肅按察使○壬申諭軍機大臣等前以賊匪不過烏合之衆無難立時撲滅是以曾諭常青到臺灣後即令任承恩來京常青在彼督同黃仕簡辦理搜捕事宜今任承恩黃仕簡並不帶兵前進甚不如前竟不可恃矣即如常青摺內所稱賊匪退守巢穴於諸羅之斗六門大里杙等處羣聚滋擾任承恩所帶之兵勢覺單薄又李侍堯奏稱現在兩提臣南北兩處信息雖已從海邊彼此知會而腹地道路尚未相通等語賊匪既圍聚斗六門大里杙等處兩提督如果彼此知會奮勇夾攻軍威壯盛自可迅擣賊巢何至賊匪得負隅圍聚文報尚從海邊知會伊二人觀望遲誤之咎已無可解免屢經降

旨交常青到彼嚴查。奏該督此摺。自係未接諭旨時所發。計日下該督已可到彼。務宜遵照。秉公嚴審。據實具奏。不可稍事姑息。至一切勦賊善後事宜。全在常青妥協經理。該督須於奮勇之中。加意持重。以期尅期肅事。慰此厘懷。其兵丁接應口糧及稽查內地各口岸。亦係要務。李侍堯向能辦事。自能就近妥辦。不至貽誤。所奏臺灣軍務。既由常青專摺具奏。李侍堯即不復由驛馳奏。所見甚是。自應如此。以省驛馬之勞。○癸酉諭曰。李國梁。參奏燕河營署都司觀音保。於盧龍縣民王化青。酗酒滋事一案。未經送縣懲治。輒將王化青杖責致斃。請將該署都司觀音保革職等語。燕河營距縣城窩遠。都司衙門駐劄該處。本有彈壓地方之責。王化青酗酒滋事。被人控告。已屬匪徒。及經官審問。仍敢出言不遜。該署都司予以杖責。本屬罪所應得。又係如法決責。非違例濫刑者。可比所有燕河

營署都司觀音保著加恩毋庸革職。其該管上司一體免其交部議處。○諭軍機大臣等。昨據李侍堯奏。兩提臣南北各處信息。雖已從海邊彼此知會。而腹地道路尚未相通等語。復查看總兵普吉保摺內。則稱由臺灣郡城帶兵先抵諸羅。於初十日到鹿港。與任承恩併籌勦賊。雖該鎮於大埔尾等處曾遇賊打仗。然既由郡城直達鹿港。並未為賊所阻。看此情形。自係賊人蟻聚斗六門。大里杙等處。馳遞文報。隻身往來。或懼其潛出擾害。若帶兵前往。亦無虞。中途梗阻。想李侍堯初入閩境。無由即知彼處情形。係地方官稟報。即據以入奏。其所稱道路未通之處。本屬未確。今普吉保既可帶兵由郡城前往鹿港。豈黃仕簡任承恩獨不能行乎。且黃仕簡帶兵到彼。賊人並未再來。可見賊知官兵勢盛。已畏避不敢復來。即使賊人復至郡城。黃仕簡正可迎頭截殺。不應轉避賊衆。豈賊人一日不

至黃仕簡寸步不進乎况昨據解到賊夥楊咏等有林興文與通事杜美勾結生番希圖將來竄入內山之供倘賊人竄入內山日久不出黃仕簡任承恩亦終歲在郡城株守竟不往內山搜捕耶昨據該督奏於二十日由泉州起身前往若風水順利計此時早到臺灣何以未見具奏此事全在常青妥協督辦迅速藏功朕盼望甚切不可如黃仕簡任承恩之漫無籌畫坐視貽誤也○是日駐蹕大新莊行宮○甲戌諭曰向來情節較重罪不至死人犯有發遣伊犁給厄魯特為奴者第念彼此言語不通難於役使未免不能約束易致脫逃應將此等發遣為奴人犯發給伊犁察哈爾或伊犁駐防官兵為奴庶易於役使且該處有協領佐領總管等官管束不致脫逃嗣後如有發遣伊犁給厄魯特為奴人犯著刑部發往伊犁分給該處察哈爾及駐防滿洲官兵為奴所有從前給厄魯特為奴

之例著停止○以署鑲紅旗蒙古副都統伍彌烏遜為正黃旗漢軍副都統○以禮部左侍郎藍應元為會試知貢舉大學士王杰為正考官刑部左侍郎姜晟內閣學士瑞保為副考官○予故原任內大臣王進泰祭葬如例謚恭勤○予故喀喇沁扎薩克親王品級多羅郡王喇特納錫第致祭如例○是日駐蹕三家店行宮○乙亥遣官祭先農之神吏部議覆陝甘總督福康安奏嘉峪關外距內地稍近如安西州玉門敦煌二縣哈密通判吐魯番同知鎮西府暨宜禾奇台二縣及所屬教職佐雜請照廣東儋州等缺例五年俸滿回至內地留於本省分別題咨陞用極遠如鎮迪道迪化直隸州昌吉阜康綏來三縣伊犁撫民同知理事同知烏魯木齊理事通判並所屬教職佐雜等官請照廣東崖州福建臺灣等缺之例三年俸滿於內地屬員揀選調往協辦半

年准俸滿人員調回內地分別題咨陞用。應如所請。惟伊犁撫民同知理事同知有由廢員揀補者。應改為五年俸滿調回至理事同知向例俸滿後以員外郎即用之員。烏魯木齊理事通判向由部揀補論俸以員外郎陞用之員該督請留於本省陞用之處應不准行從之。以故雲南元江直隸州屬新平縣土縣丞楊際泰子聖舉襲職。旌表守正被戕直隸藁城縣民何述女何氏。是日駐蹕湯山行宮。丙子以重修明陵告成。

上親臨閱視。諭順治年間因明陵附近居民於陵旁樵採曾奉

諭旨禁止并添設陵戶看守。數十年來地方官並未小心稽查以致殿宇損漏牆垣欹側之處甚多。前年朕親臨奠醊緬懷前蹟是用惻然因特發帑金揀派大臣監督將各陵重加修葺茲屆工竣朕便道親臨閱視殿宇煥然松楸如舊第恐閱時既久地方官查禁不力

復不免有私行樵採及殿宇牆垣間被風雨損壞等事嗣後應交直隸總督責成霸昌道就近專管稽查仍於每年十月著工部屆期奏請派該部堂官一員前往查勘如有殿宇牆垣樹株傷損等事惟該管道員是問以示朕加禮勝朝保護舊陵至意著為令。福建陸路提督任承恩汀州鎮總兵普吉保奏本月十三日林爽文帶領賊眾由番婆莊來攻鹿港臣任承恩即督令遊擊穆騰額等領兵堵禦臣普吉保領兵抄截後路至番仔溝見賊眾放火燒莊官兵奮勇擊殺賊甚多擒獲匪夥鄭實等十六名鎗礮刀矛多件搜獲書信三封當將鄭實等訊明正法又署叅將馬元勳同日於埔心莊遇賊三四十來攻該署將奮力追殺賊人敗退搜獲書信二封生擒女犯一口訊係賊匪逼令露體出陣冀厭鎗礮當即正法書信五封并咨送督臣查覈諭軍機大臣曰林爽文既敢親至鹿港滋擾

即係自來就死任承恩正當親帶弁兵迎頭痛加勦殺將首惡擒縛則其餘附和自必紛紛瓦解何以任承恩並不親身擒捕僅派令遊擊等與賊打仗且任承恩與普吉保現在一處普吉保既帶兵勦賊而任承恩竟安坐鹿港豈欲因人成事抑待賊自斃乎殊出情理之外況賊將所掠婦女逼令露體出陣冀厭鎗礮可見賊勢已窮行徑可笑無難一鼓殲擒乃任承恩一味畏葸遲延不進看此情形現在賊匪尚未撲滅竟係任承恩與黃仕簡始終兩相觀望貽誤緊要軍務向來黃仕簡辦事尚知奮勉此次因有任承恩同往致生觀望設任承恩不赴臺灣黃仕簡專辦此事無可推諉轉未必恒怯至此任承恩斷不可再留該處致隳士氣著常青一抵臺灣即傳旨將任承恩飭令即行赴京候旨其陸路提督員缺前有旨交郝壯猷暫行署理但行軍之際須將奮勉出力之員加之鼓舞以勵

戎行並著常青於普吉保郝壯猷二人內察看孰為出力一面奏聞一面將陸路提督即行交與署理以示鼓勵至黃仕簡如查明貽誤屬實亦不可留於該處即遵照前旨將伊解任送回內地請旨辦理其水師提督印務交柴大紀暫署候另降諭旨○是日駐蹕工部廠大營○丁丑駐蹕湯山行宮○戊寅上還圓明園○己卯

孝賢皇后忌辰遣官祭

陵寢○諭曰國棟病故所遺阿克蘇辦事大臣員缺著福崧調補錦格著賞給四品頂帶馳驛前往和聞同伯興辦事○閩浙總督李侍堯奏常青於二十二日已至廈門一得順風即當開駕其兵糧軍械一切臣已籌畫分路運送再接任承恩來咨知十三日將賊匪大加勦殺移送賊書五封謹封呈覽但移文稱有五紙今僅有四紙又閩省所有副將叅遊多奉派出師今內地各營僅有叅將七員遊

擊七員。不足以昭嚴重。今擬於浙省副將叅遊內酌派四五員來閩備用。諭軍機大臣曰。黃仕簡自二月奏報之後。又閱十餘日。未據續有奏報。該提督所辦何事。至任承恩竟安坐鹿港。意欲因人成事。殊出情理之外。即如搜出賊屍所帶結盟底稿。及糾約書信。自應隨摺進呈。乃轉行咨送總督。其信稿五紙。又只有四紙。足見其誤事不小。再柴大紀於賊匪起事時。保守郡城。尚能奮勇。近亦不能如前此之奮勇出力。又一向並無奏摺。自係該提督等互相觀望。該鎮等亦心生懈怠。是黃仕簡任承恩之咎。更無可諉。著常青一抵臺灣。即遵照節次諭旨。嚴切查叅。毋得稍存瞻徇。至閱搜出賊匪所帶書信。內有由休生等門會齊之語。賊匪么廢烏合。尚知八門遁甲之法。然此不過鬼域伎倆。藉以煽惑人心。官兵以順討逆。以正祛邪。無難撲滅淨盡。此事惟在常青相機調度。以期迅奏膚功。又閱搜

出賊匪書稿。內有廣東鳳花亭高溪菴馬溪廟洪二房和尚及朱姓人犯曾諭令孫士毅密速查拏。前據該督覆奏。加緊嚴緝。至今曾否拏獲。未據續行奏報。此係要犯。著孫士毅務須嚴飭所屬設法躡緝。毋任遠颺漏網。○庚辰諭曰。常青題叅急玩廢弛之詔。安營守備毛天俊請旨革職一本。閩省正值派撥弁兵。勦捕臺灣逆匪。該守備有經管汛地海口。並不親歷巡查。安知非故意怠玩。欲求叅革。以遂其規避領兵打仗之私。情節甚屬可惡。毛天俊著革職。仍於該處枷號俟軍務告竣再行釋枷充徒。以示懲儆。○又諭。戶部議覆九江關一年期滿。短收盈餘銀三萬五千四百餘兩。請著落前任監督虔禮寶現任監督海紹各按經徵月日。照數賠補。並請將該監督等交部治罪一摺。固屬照例辦理。第念上年楚省歉收。以致木商解把過關較少。稅課短絀。尚屬有因。著加恩寬免銀二萬五千四

百四十二兩。其餘銀一萬兩。著令虔禮寶海紹各按經徵月日。照數分賠。並從寬免其治罪。諭曰。復興等奏審訊由邊卡入境偷竊牲畜之烏梁海賊犯。分別擬罪。並將私行寢息之駐卡侍衛。台吉等分別枷責。及交部議處等語。此案復興等如此輕擬完結。實屬錯誤。設立卡座。派令侍衛駐劄。原為稽察行人防範賊盜地方。與軍營何異。今該處賊人數次往來竊去許多牲畜。該侍衛即獲重罪。乃德永並不呈報該管大臣。竟敢私罰牲畜。侵蝕寢息甚屬膽大。復興等僅將德永革職枷責完結。所奏殊為妄誕。德永著即處絞。為衆示儆。同德永侵蝕息事之台吉桑濟扎布桑濟策楞著擬絞。解部另行請旨辦理。其額布肯哈噶爾阿爾奇齊巴布什鄂爾古庫巴祿寨葉句達什查汗等尚未侵蝕入已。但私同寢息已屬失察。著即照復興等所奏行。再復興等奏杜爾伯特親王車凌烏巴什給與德

永回書亦屬不合。並請交部議處。車凌烏巴什係愚蠢蒙古。伊何能想到必須呈報將軍大臣。此事如果係伊起意。先欲寢息。給德永書信。朕必將伊一并從重治罪。今車凌烏巴什僅給回書。尚屬無罪。車凌烏巴什著加恩免其議處。總管達什查知此事。即行呈報。辦理尚屬可嘉。豈有反行議處之理。達什著寬免。仍發賞大緞二匹。以示獎勵。總管色爾克。去年前往木蘭。此事與伊無干。亦無庸交部。復興阿克東阿辦理此事。甚屬懦弱。錯謬。著傳旨嚴行申飭外。仍交部嚴加議處。復興等接奉此旨。於駐卡侍衛官員等逐一嚴禁。嗣後各以德永為戒。即通行新疆將軍大臣等。傳知所有邊卡地方。一體嚴慎遵行。並曉示京城三旗侍衛知之。○諭軍機大臣曰。任承恩一味遷延觀望。直至此時始同普吉保親往帶兵進剿。但此次攻剿賊匪。亦因普吉保親督遊擊等進攻關口。八卦山各賊莊柵。而

任承恩不過於西門一路。從後策應彰化城內外搜查窩藏賊匪。並未親至賊巢。其所稱出其不意。派兵痛剿。蓋亦係普吉保之意。任承恩但因人成事。如許多日。所辦何事。且該提督前此既心存恒怯。則此次所稱親督官兵。分路夾攻之處。恐亦未可盡信。況賊匪既屢經官兵勦殺。而此次任承恩所奏摺內。又稱官兵奮力。殺賊無數。是賊匪幾於殲戮靡遺。何以摺內又稱賊勢尚在蔓延。南北官兵未能會合。看來皆由綠營將弁飾詞誑報。既可掩其恒怯。又可藉以冒功。所言殊不可信。著常青即將任承恩曾否親自帶兵赴八卦山打仗。及所報殺賊數目。是否確實。秉公嚴查。如有捏飾虛報情節。即行據實參奏。○辛巳祭

先蠶之神。遣妃行禮。○諭曰各省舉人教職。由本班截取銓選知縣。例應該省督撫驗看。其不勝民社者。隨時奏聞。改為司鐸。或仍留

教職。本任於澄敘官方之中。原寓體恤寒畯之意。在各督撫受朕簡任。身為封疆大吏。於驗看時。本應悉心甄別。秉公辦理。不致徇情受賄。任意愛憎。俾才具衰庸者。得以濫竽。而年力尚堪驅策者。轉致屈抑。但思舉班選用知縣。需次多時。人人各思自効。一經督撫驗看。不勝民社。遽停其銓用。未免心懷缺望。妄生訾議。究不足以服人心。而昭公當。嗣後直省舉人教職。由本班截取知縣。經該督撫驗看。難勝民社。如該員不甘就教。情願赴京引見者。仍著該督撫照例給咨送部。候朕鑒定。其或因路途跋涉維艱。不能赴京者。准赴鄰省督撫呈明。覆加驗看。倘係年力未衰。原驗督撫果有不甚確實之處。即由鄰省督撫奏明。再行給咨送部引見。以示朕用人行政。一秉至公。即微員亦不使稍有向隅至意。○聞浙總督李侍堯奏。總兵郝壯猷一路。於二月二十一日。收復鳳山縣城。北路賊匪。自必聞

風震懾如鳳山無須重兵即可全力專注北路。又查出逆匪林爽文偽示三張謹封固呈覽諭軍機大臣等官兵已將鳳山縣城收復是南路賊匪業經潰散竄逃無難收勒淨盡黃仕簡即應督率將弁迅赴北路會合任承恩分路夾攻以期一舉殲事乃竟仍安坐郡城按兵不舉而任承恩亦惟於賊匪來擾時派撥弁兵零星堵禦並未親身帶兵直抵賊巢李侍堯心思周到自早已看出伊二人之誤事但以黃仕簡承襲公爵久任提督素昔恩遇較優而任承恩係任舉之子朕軫念伊父前勞特加錄用擢至提督不免為之稍留地步是以不肯直奏但該提督之因循貽誤朕於數千里外尚早經洞燭况李侍堯駐劄泉州耳目較近而所屬文武員弁內亦必有議論及此併探聽情形稟報者現已節次降旨令常青嚴行查辦李侍堯如果有所見聞即據實具奏不必稍為瞻徇諱飾也至逆匪

林爽文竟敢自稱年號其悖逆之處罪大惡極覆載不容俟將來逆首生擒必當嚴行盡法以申國憲而快人心此時常青惟當申明紀律鼓舞士氣俾壁壘一新人人用命以期擒拏首夥迅速殲功○壬午諭據琅玕奏署西安縣試用知縣張義路於兵部發遞福建之奏事夾板一副並不由江山縣轉遞乃由常山一路遞送江西以致道途紆遠遲誤請將該署縣張義路革職並將不行查出轉遞出境之常山縣知縣于知誦交部嚴加議處該管知府舒慶雲按察使孫栝一併交部分別議處一摺現在正值臺灣勦捕賊匪之時郵遞軍報最關緊要乃似此舛誤率行遞送不可不嚴加懲治署西安縣知縣張義路即著革職於該處枷號示儆待事完發往軍臺効力其誤行接遞並未駁回之常山縣知縣于知誦亦著革職即發往軍臺効力以示懲儆所有失察之該管知府舒慶雲按察使

孫枯著交部嚴加議處。仍著該撫提齊該縣管站家人書役嚴審定擬具奏。該部知道。○諭軍機大臣曰。黃仕簡奏。勦洗南路賊匪。克復鳳山縣城一摺。其所陳功案。俱係罪案。且一味飾詞。推托。即如該提督摺內。既稱南路之崗山。崙仔頂等處。俱係賊藪。勢甚猖獗。亟應一舉撲滅。何不親率弁兵。前往勦捕。乃惟添遣官兵。飛檄該鎮將等進攻。似此東堵西禦。疲於來往。適足為賊所輕。公庸草竊。自然毫無顧忌。日聚日多。至遊擊鄭嵩等。分路進攻鳳山。收復城池時。伊仍安然坐守。又不親往。是誠何心。又摺內稱官兵疊次勦賊。餘匪東徙西奔。四處皆有賊蹤等語。黃仕簡並不能親赴賊巢。將首逆擒獲。致賊夥蔓延。團結乃尚稱除盡根株。不留餘孽。伊試自思。數月之久。所辦何事。賊勢尚如此。鴟張。惟與任承恩互相推諉。非伊二人貽誤。而何。尚覲顏為此語乎。且大兵雲集。各縣俱已次第收復。

豈臺灣郡城。轉慮其意外疎虞之理。乃黃仕簡仍稱守城。明係藉詞掩飾。以文其遷延觀望之罪。著將黃仕簡原摺。發交常青閱看。向黃仕簡逐一嚴審詰訊。至黃仕簡任承恩。始終貽誤緊要軍機。其咎甚重。必須鞫問。常青到臺灣後。遵照前旨。先將伊二人摘去花翎。任承恩令其由北路回至內地。廈門。勿令伊二人同在一處。致有彼此關照。通同捏飾之事。並著李侍堯於任承恩到後。即令委員解京。黃仕簡留廈門候旨。常青李侍堯此時且當慎密。不可稍露端倪。另候諭旨辦理。想亦不久。待常青奏到。即有旨諭矣。至常青現在自己抵臺灣。應照節次所降諭旨。悉心籌畫。統率各路官兵。親赴賊巢。一鼓勦滅。以期迅奏膚功。○癸未。諭據孫士毅奏。李世榮勒索站規案內。部議降級各員。前經奏明暫緩離任。令其查拏閩省匪犯。該員等辦理尚屬認真。俟部選人員到粵。再令該州縣六員。照例

離任等語。現在閩省正在勦捕賊匪廣東惠潮一帶境壤毗連沿海口岸必有餘匪偷渡所有前案降調各員俱著准其留於該處協同緝捕統俟臺灣軍務告竣再行給咨該部知道。諭軍機大臣等據長麟奏盤獲大名從逆案犯謝三麻子即謝朝宗訊係段文經案內楊林之徒聽從楊林糾約曾到大名府城內隨同搶殺砍傷幼孩並未進署戕官所供情節恐係狡詞支卸請交刑部將該犯同

奉
上
聖
旨

奉
上
聖
旨

案之王成功等提出究訊等語謝朝宗素習震卦邪教又聽從糾約入城持刀傷人斷無不隨段文經等進署滋事之理今祇供認在街搶殺並未入署殺官自係該犯恃無質證匿情狡賴所供殊不可信著傳諭長麟即派委員將謝朝宗解交刑部令與從前拏獲之逆犯王成功等面加質審定擬又所供伊父兄並非同教實未知情謀逆及供出與段文經認識之府役謝居業於上年病故亦恐係

該犯飾詞代為掩護均難憑信著傳諭劉裁即將所供情節據實嚴查辦理至直省拏獲大名案內各犯時曾否將謝朝宗一犯移咨鄰省抑係查辦遺漏未經究出實情咨緝之處一併著劉裁查明覆奏○兩廣總督孫士毅奏續獲天地會匪犯林功裕供出之朱洪德洪李桃二犯與閩省從前供出之洪二和尚及朱姓形跡相同已移咨閩省嚴緝諭此案倡會結盟煽惑人心首犯不可不嚴緝務

奉
上
聖
旨

奉
上
聖
旨

獲跟究黨羽以盡根株現據所供姓名住址俱在閩省且有記號歌訣轉相糾約搶奪財物是該犯等在閩省結會滋事竟係明目張膽毫無忌憚其黨羽必多無難跟蹤緝獲徹底究辦李侍堯現駐劄蚶江籌辦軍糧一切及善後事宜自不能分身前往徐嗣曾在漳泉一帶海口督查尚無緊要事件著該撫即親赴各該處將朱洪德洪李桃二犯嚴緝務獲訊明夥黨一面按名查拏一面即派委幹

員將二犯迅速解京歸案審辦該撫務須不
動聲色嚴密妥速辦理毋任奸徒漏網

實錄卷之二十七

夫

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十六

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十七

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂
總裁官總纂官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級尋常加二級軍功紀錄五次
尋常紀錄十四次臣德慶總纂官太子少保工部尚書紀錄六次臣曹振鏞等奉

敕修

乾隆五十二年丁未三月甲申諭昨據琅玕

參奏署西安縣試用知縣張義路於兵部發
遞福建奏事夾板誤遞江西一摺已降旨將
該員等分別革職枷號發往軍臺効力示儆
矣現在正值臺灣勦捕賊匪之時郵遞軍報
最關緊要此項夾板既經誤遞江西何裕城
接據屬員稟報理應一面具奏一面行查浙
省何以該撫並不奏聞僅以一咨了事設或
琅玕亦不行據實參奏則此等舛錯貽誤之
劣員竟可倖免參處各省驛站何知儆畏雖

臺灣逆匪。不過么脅草竊。易於戡事。將來設遇緊要軍務。亦似此舛錯。豈不有誤機宜耶。何裕城。自係瞻顧浙省。不行參奏。外省官官相護積習。牢不可破。著傳旨嚴行申飭外。仍交部嚴加議處。副都御史劉權之奏。大挑各直省舉人。上屆派出之王大臣。係於十日之前。豫行奏派。為日既久。恐外間有借名指撞等事。請令承辦衙門。於前一日奏派。並令王大臣等。聞命後。即至朝房住宿。不得攜帶多人。以杜弊竇。得旨。所奏是大挑舉人。原為疏通寒畯。俾得及時自効。必當秉公揀選。以杜夤緣。撞騙情弊。其如何定立章程。嚴防弊竇之處。著將劉權之原摺。發交軍機大臣會同該部。悉心妥議具奏。○乙酉。上御勤政殿聽政。○諭。據柯藩奏。現在已滿三年之期。例應奏請陞見。但現有查緝匪犯。及催遣糧艘事務。請俟重運回空後。再行奏請等語。向來各省提鎮布按。每屆三年陞見之

期。即遇有地方要務。無不循例奏請。其意並非出於至誠。今柯藩因有催遣重運等事。奏請暫緩陞見。所見甚是。現在東省正值南糧重運。漕船過境。該鎮自應在彼親赴沿河一帶督率查催。俾重運迅速前進。俟回空過竣。再行來京陞見。○以國子監祭酒鄒奕孝為內閣學士兼禮部侍郎。○吏部議秋審錯擬情實之前任山西巡撫。現駐哈密辦事副都統銜伊桑阿。照例降級。得旨。伊桑阿著革任。註冊。仍以副都統職銜留該處辦事。○丙戌。上詣安佑宮行禮。○諭。軍機大臣等。據舒常奏。准陝西咨。會有潁州張良功。資給段文經錢文逃往陝省之語。現派文武各員。在陝楚交界之處認真偵緝。以期就獲等語。舒常此奏。係准陝省咨會。自非無據。其所稱張良功一犯。既經資給段文經錢文。即為案內要犯矣。現在曾否就獲。何不問之此人。且此語從何而來。

是否係拏獲張良功到案供出。抑係該省緝獲別犯。訊出張良功資助情節。或他省咨會到陝。該省復轉咨湖北。何以總未見陝西安徽具奏。况昨據保寧奏。亦稱近日傳聞段文經奔赴陝西之語。則該犯逃往陝西一帶。更非無因。著傳諭已延三。秦承恩即將此語得自何人。及此項咨文。係已延三任內所發。抑係秦承恩護理撫篆時所發。並因何不奏之處。據實速行覆奏。仍飭屬嚴密躡緝。務將段

文經等拏獲。解京審辦。毋令又至遠颺。致干重戾。至段文經一犯。前據徐克展張小二俱供曾至亳州。今陝省咨內。復有潁州張良功資給該犯錢文。逃往陝西之供。是段文經曾在潁州逗留藏匿。已屬確實。正應速拏張良功一犯。向其根究。以便追蹤跟緝。著傳諭書麟再行密速查緝。務得段文經實在下落。並將張良功曾否就獲之處。迅速覆奏。將此由六百里各諭令知之。○又諭前因段文經逃

竄後。恐其潛逸陝省。當經降旨。令周樽在潼商一帶督率躡拏。今陝省咨會。有張良功資給段文經錢文之語。此語得自何人。是否即係該臬司在潼商地方拏獲案犯。究出情節。抑係拏獲張良功。訊供轉咨湖北。該臬司係專司緝捕之員。既得有張良功資助錢文之事。該臬司自無不知之理。何以未經奏聞。著傳諭周樽。即將此語從何究出。張良功曾否拏獲之處。據實覆奏。將此由六百里傳諭。即

令六百里覆奏。○軍機大臣等議覆。副都御史劉權之奏。大挑各省舉人之王大臣。請於前一日奏派。應如所奏。至所稱朝房住宿一節。應毋庸議。朝房在午門之外。官員人等出入必經。不能概行禁止。轉恐滋弊。請仿驗看月選官例。奏派滿漢御史各二員。監視稽察。並令步軍統領衙門。會同五城御史。一體嚴密訪查。更為慎重。得旨。依議。此次大挑舉人著在午門內挑選。並添派護軍統領一員。

稽察所有派出之王大臣俱著在內閣住宿。以昭嚴肅。○丁亥諭四庫全書處進呈續繕三分。李清所撰諸史同異錄書內稱我朝世祖章皇帝與明崇禎四事相同。妄誕不經。閱之殊堪駭異。李清係明季職官。當明社淪亡。不能捐軀殉節。在本朝食毛踐土。已閱多年。乃敢妄逞臆說。任意比擬。設其人尚在。必當立正刑誅。用彰憲典。今其身既倖逃。顯戮其所著書籍悖妄之處。自應搜查銷燬。以杜邪說。而正人心。乃從前查辦遺書時。該省及辦理四庫全書之皇子、大臣等。未經掣燬。今續辦三分全書。猶復一例繕錄。方經朕摘覽。而得。甚屬非是。因檢閱文淵、文源兩閣所貯書內。已刪去此條。查係從前覆校官編修許琅。初閱時簽出擬刪。是以未經繕入。但此等悖妄之書。一無可採。既據覆校官簽出擬刪。該總纂、總校等。即應詳加查閱。奏明銷燬。何以僅從刪節。仍留其底本。其承辦續三分書之

侍講恭泰。編修吳裕德。雖係提調兼司總校。但率任書手誤寫。均難辭咎。所有辦四庫全書之皇子、大臣及總纂紀昀、孫士毅、陸錫熊、總校陸費墀、恭泰、吳裕德。從前覆校許琅。俱著交部分別嚴加議處。至議敘舉人之監生朱文鼎。係專司校對之人。豈竟無目者。乃並未校出。其咎更重。朱文鼎本因校書特賜舉人。著即斥革。以示懲儆。所有四閣陳設之本及續辦三分書內。俱著掣出銷燬。其總目提要。亦著一體查刪。○軍機大臣等議覆。成都將軍鄂輝。四川總督保寧奏。稱川省新疆五營屯兵。自奏裁後。實存兵二千六百三名。從前辦屯所需牛隻。係官為採買。每年倒斃。動項買補。所收糧石。盡數交官。嗣經奏明停支鹽菜口糧。將地給兵自種自食。惟該兵等領有官牛。未繳原價。遇有倒斃。仍須買補。或借扣餉銀。及遇事故除糧。更不免公賠攤派。殊多未便。查該處地久經墾熟。非若辦屯之初。

必資牛力如需用牛不妨聽其自行措買。所有原領牛價請令分年繳納清款以紓兵力。應如所奏從之。○戊子諭前經降旨令各省督撫保舉堪勝道府人員。現據陸續奏到。因令軍機大臣開單進呈。此項保舉人員原因甄拔人才以備簡擢在各督撫自當秉公保奏不敢稍涉瞻徇。但思滿漢大臣子弟現居外任者自復不少。其中如果才具優長堪膺保薦原不必有意避嫌轉令屈抑。且由該部

帶領引見朕無難臨時鑒察分別棄取。惟是大臣子弟中或外任者不止一人伊等父兄既身居膺仕若其子弟分宦各省復得同膺薦剏不免有占寒畯地步。且其中才具豈俱過人實非朕旁求器使之意。著將原單發交該部詳查。有係內外大臣子弟者俱著註明。候朕酌量簡用。嗣後部中若有似此公保陞用者亦如此例。○又諭曰李世傑等奏淮徐道缺緊要必得久任河工者方可勝任。請將

師彥公調補淮徐道其淮揚道一缺擬即將成汝舟調補等語。如此不泥於遵旨甚是。已批照所請行矣。李世傑等此奏係為河工要缺起見。且師彥公成汝舟二人之孰能河務與否亦朕所素知。是以准其對調。至各省道員缺原有美惡各督撫不得託詞遷調以開趨避疊緣之弊。若實因繁簡不同不得不調當奏請將二人一併送部引見。將此通諭知之。己丑諭臺灣逆匪林爽文等糾眾滋事

水陸兩提督帶兵分路進剿並不親臨行陣定期會攻黃仕簡株守郡城任承恩安居鹿仔港僅派委將弁等零星打仗二人彼此觀望不思埋根首進。惟事遷延致賊匪日久未就撲滅。節經降旨嚴飭並諭令常青前赴臺灣督辦。將黃仕簡任承恩貽誤之處據實嚴審查參。茲據李侍堯奏到軍務情形一摺內稱南北兩路該提鎮等各有牽掣不免坐費時日等語。果不出朕所料。黃仕簡受恩最久

向來辦事尚屬黽勉。乃於勦捕逆匪一事。漫無籌畫。安坐郡城。因循玩誤。本即應拏問治罪。姑念其年老。且係病後。將黃仕簡即遵前旨送回厦門內地候旨。水師提督著郝壯猷暫署至任。承恩經朕屢加拔擢。用至提督。且係自請前赴臺灣勦賊。伊年力正強。理應加倍奮勉。以期迅速。歲功乃亦逡巡畏蒞。並不親督將弁上緊追勦。與黃仕簡互相諉卸。實屬辜負朕恩。前已有旨。令常青將任承恩解任。送回內地。俟伊到後。即著傳旨革職。拏交刑部治罪。並著李侍堯派委妥員押解來京。其陸路提督員缺。前因柴大紀保守郡城。尚為出力。本欲將伊擢用。但柴大紀於林爽文等滋事之先。不能豫為防範。以致逆匪蔓延。本即有罪。且臺灣原設兵額一萬餘名。該鎮督率守城之兵。不過一千餘名。此外兵丁。現作何用。並未據柴大紀奏及實有應得之咎。即將來事竣時。若查明果能如前奮勇自効。

亦僅可以將功抵罪。不當復邀優擢。所有福建陸路提督員缺。即著藍元枚調補。所遺江南提督員缺。著陳杰補授。陳杰於江南營用。硝磺缺額一事。據實陳奏。並不瞻徇。甚屬可嘉。現在李世傑等因此獲咎。或該督等心懷嫌怨。亦所不免。是以朕轉加陞擢。用示勸懲。將此通諭知之。○又諭。向來大挑舉人。俱於會試榜後。該部定期。奏請揀選。但念各省會試舉人。旅食京師。俟榜發後。再行挑選。未免有需時日。此次大挑舉人。著即在榜前辦理。俾得及早回籍。無需守候。以示體恤。再此內有老舉人。精力已衰。情願得授京銜者。並著派出之揀選王大臣。照上屆之例。按其年齒。分別存記。俟榜後開單具奏。照例賞給職銜。用昭嘉惠耆齡。壽考作人至意。○諭軍機大臣曰。舒常奏武昌縣典史會同河南委員。拏獲貌似段文經之吳添德一犯。訊據供稱。係直隸宛平縣人。向在湖南開膏藥鋪。因有同

鄉人楊四。在漢口謀生。來索舊欠錢文。隨傳訊楊四。亦稱欠錢屬實。查驗該犯吳添德。與段文經形貌相符。現在解交直隸認識等語。吳添德雖供非段文經。但形貌既與相似。保無畏罪隱匿不吐情事。著傳諭劉我。一俟楚省解到時。直省自有眼線。該督必須詳加質認。如果確係段文經。即行迅速遞派幹員。解京審辦。而楊四一犯。即其夥黨。亦必有知情容隱之罪。不得任其逃匿。著劉我於質對屬

實後。即飛咨舒常。將楊四一併解京審辦。倘吳添德質認實非段文經。亦應奏明解京。再令逆犯王成功等對質。以成信讞。將此由五百里傳諭劉我。並諭舒常知之。○又諭。昨據李世傑奏。江蘇安徽兩省。本年雨水充盈。二月初八九十等日。渥澤優霑。遍及上下江兩省。最為普足等語。各省地方雨水情形。於歲收豐歉。最為關係。朕心深為廑注。李世傑現將上下江得雨透足情形。具摺奏報。書牘係

安徽巡撫。何以於該省得雨優渥之處。尚未特奏。豈不知朕廑念安徽。為前歲災傷之後。無時或釋耶。著傳諭該撫。將因何未經具奏。並現在各屬得雨分寸。速行據實覆奏。尋奏查安徽徽州等十三府州屬。三冬雨雪優霑。入春以來。復屢被甘膏。十分透足。現在大麥黃熟。小麥吐穗。將齊。至十九二十等日。省城及各屬。均又連得膏雨。與秧田大有裨益。得旨欣慰覽之。○又諭。曰。李侍堯亦看出黃仕

簡。任承恩二人貽誤情形。但所奏未免畧遲。現在惟望常青到彼。大加振作。方可制勝。如該督到彼。即將賊匪一鼓殲擒。自屬甚善。如賊匪負隅抗守。勦捕稍需時日。自應量為增調兵丁。以期迅速。肅事。但聞省之兵。存營者已少。且該省兵力已弛。現在派往臺灣者。零星打仗。又復氣餒。更恐不能得力。不如就近於粵省挑選豫備。李侍堯籌慮及此。已咨孫士毅密為調備。尚為周到。惟粵省所備之兵。

既有四千名。恐陸廷柱一人不能照料。高廉鎮總兵梁朝桂曾在軍營打仗。於軍務自為熟悉。著孫士毅即密劄該鎮。速赴閩粵交界處所駐劄。聽候調遣。至臺灣額設兵共有一萬餘名。林爽文滋事時。作何調撥堵禦。何以柴大紀在鹽埕橋拒守。亦止帶兵一千數百名。此外兵丁又在何處。柴大紀此次保護郡城。雖為出力。近日以來。漸覺觀望不前。著常青到臺灣後。一併查明據實具奏。又據李侍

堯奏。漳泉一帶。民情輕剽。近日漸覺寧帖。所有粵省咨拏天地會各犯。現密為存記。俟事竣後辦理等語。所辦甚是。著孫士毅即照李侍堯所奏。將現獲各犯。暫行監禁。俟事竣後再為辦理。○以湖廣督標中軍副將強都為江南狼山鎮總兵。○蠲緩江蘇上元。江寧。江浦。山陽。清河。桃源。安東。阜寧。鹽城。江都。甘泉。高郵。寶應。泰州。興化。東臺。海州。沐陽。十九州縣。并淮安。大河。鎮江。揚州。四衛。五十一年分

水災。應徵民屯地丁草場漕項。麥折。廬課。一十萬四千七百兩有奇。○直隸提督李國梁奏。古北口石匣地方。白龍潭龍神廟。素稱靈應。臣因入春以來。雨澤稀少。即詣廟虔禱。今於十七日至十八日。得雨六寸有餘。邊口內外均被霑渥。懇賜扁額。以酬靈貺。得旨。早有此心。即書送去。

御書扁曰。需甘時若。○庚寅。諭。據謝墉條奏。洪澤湖淤墊日高。前之如釜者。今已如盤。請如疏濬一摺。經大學士九卿議駁在案。茲李世傑等奏到。洪澤湖水下注。清口暢出。因將原摺交與謝墉閱看。據稱。本未諳習河工。前年在江寧接見王兆崇。言及洪澤湖日漸淤高。是以據傳說之言具奏。本年王兆崇陞見來京。復與講論。仍如前說等語。前年湖水甚少。清口不能暢出。屢訓諭籌畫。以期濟運。禦黃。仍即以盈虛消息。事理之常。朕即慮及必有盛漲之事。亦豫行諭飭該督等。加意防範。上

年湖水大漲果不出朕之所料。是前年清水短少。實是意中所知。謝墉既未親至其地。目擊情形。何以率行入告。現在洪湖水勢日長。清口暢出。已非如盤之明驗。謝墉復稱得之王兆崇所言。而本年王兆崇來京。陛見。經朕面詢該處情形。亦奏稱清水暢順。並未有淤墊如盤之說。謝墉身為卿貳。王兆崇究係司員。體制所關。自不屑令其來京面加質對。但謝墉既有此說。不可不詳查覈辦。著該侍郎

自行前往洪澤湖。會同李世傑等。周圍履勘。測量湖中深淺。實在有無淤墊。秉公據實具奏。○諭軍機大臣等。昨經降旨。將任承恩革職。拏問。黃仕簡撤回廈門。其水師提督員缺。即令藍元枚調補。所有陸路提督員缺。除柴大紀。另看其如何奮勉。將功抵罪。其餘總兵郝壯猷。普吉保。二人現在帶兵臺灣打仗。尚屬踴躍。常泰雖未帶兵前往勦賊。然在漳州一帶。彈壓地方。亦為鎮靜有方。該鎮係朕簡

調之人。著傳諭常青。李侍堯。於郝壯猷。普吉保。常泰。三人內。察看孰為出力。並才具堪勝提督者。保舉一人。一面將陸路提督印務。令其署理。一面會同據實具奏。候朕簡放。○旌表守正被戕山西太平縣民郭釗妻杜氏。○辛卯諭曰。據留保住奏。伊至後藏。將賞班禪額爾德尼呼畢勒罕之父巴爾丹敦珠克公爵諭旨宣示。并准照仲巴呼圖克圖代巴爾丹敦珠克所請。給予頂戴。回任之後。方知錯

謬。移咨撤回所給頂戴。自行請罪等語。留保住既知未經奏聞。遽與之非。惟當奏請認罪而已。何必徹回。甚屬錯誤。著嚴行申飭。外。仍交部嚴加議處。雅滿泰此時如已到藏。即將留保住錯誤之處。轉行曉示。仲巴呼圖克圖等。仍照所請。給予頂戴。雅滿泰若尚未到。留保住接奉此旨。即將伊業經錯誤。已蒙申飭。仍行議處之處。曉示。所給頂戴。仍令照前戴用。○諭曰。湖北巡撫李封來京。陛見。奏稱年

力就衰遇事健忘。恐貽誤封疆要務。懇請留京補用等語。觀其詞意出於忱悃可憐。著照所請。准其留京。姜晟著補授湖北巡撫。所遺刑部侍郎員缺。即著李封補授。湖北現有舒常在彼兼署巡撫事務。姜晟俟會試出榜請訓後。即行前赴新任。○諭軍機大臣曰。湖北巡撫李封來京。陛見。朕面詢伊原籍地方雨水情形。據稱聞得青州一帶雨澤短缺。兼有未經種麥之處。現在正值麥苗長發之時。必須雨膏露潤。方資暢遂。今青州一帶既經缺雨。并至麥苗不能一律栽種。是該處望澤甚殷。何以並未據該撫奏及。著傳諭長麟。即行詳細確查。現在曾否續得雨澤之處。據實速奏。如果有種麥失時者。其應否酌籌接濟之處。雖未屆時。亦應留心酌辦。毋使一夫失所。朕屢念民依。無時或釋。該撫務須仰體朕意。毋得稍存諱飾。以副委任。尋奏東省望雨甚殷。臣抵任後。即設壇祈禱。無如久晴之後。地

土乾燥。大田仍多未種。嗣於十七、十八等日得雨。不成分寸。臣恐糧價增長。商販居奇。商同藩司將各屬存庫穀價錄兩。派員赴江南。河南一帶收買雜糧。以備接濟。得旨覽奏俱悉。京師亦如之。甚為慚悶。○又諭據琅玕奏臬司孫枯陛見起程。檄委鹽道舒其紳兼署臬篆一摺。前孫枯奏請陛見。朕准其來京。並非令其即行起程。現在正值辦理秋審之時。係臬司專責。琅玕自應俟秋審事竣。再令進京。乃因該臬司奉到硃批。即聽交部起程。委員署篆。琅玕係刑部司員出身。寧不知秋審重典。關係緊要。何漫不經心。若此。今孫枯業已起身。自無庸復令轉回。所有秋審事務。該撫務須督飭該道。詳慎審辦。毋得稍有疎忽。嗣後於此等處。尤宜加意留心。毋負委任。將此諭令知之。○又諭據劉戡奏。本月十九日。省城得雨寸餘。又據順天府屬之大興等六十五州縣陸續申報。於三月初間。各得雨

自一二寸至六七寸。已足資霑透等語。近日京師望雨甚殷。於本月十六七日得雨三寸。尚未霑透。現在李封來京。陛見經朕面詢沿途雨水情形。據稱直隸順德廣平一帶均屬望雨。可見該省會城及近京各屬。雖連得微雨。並未一律均優。豈得云均已霑足乎。又據李封奏。豫省大河以南雨水調勻。河北亦覺望雨而畢。沅亦並未奏及。看來劉裁畢沅於地方雨水均不無心存隱飾。豈不知朕屢念民依。無時或釋耶。著傳諭劉裁畢沅將所屬近日曾否得有透雨。及何處實在短少之處。據實覆奏。毋得仍前諱飾。以慰屢念。○諭軍機大臣等。臺灣初起事時。朕即不願任承恩前往者。恐二人不相統屬。未免有推諉觀望之事。因將李侍堯調補閩浙總督。並令常青前往臺灣督辦。以防緩不濟急。幸而事豫為布置。否則該處止有常青一人。既不能分身前往。而黃仕簡任承恩。今竟如此因循貽

誤。賊匪日久蔓延。設乘間別生枝節。致蹈從前朱一貴滋擾故轍。或竟如木果木之失事。尚復成何事體。即今李侍堯果看出該提鎮彼此觀望。坐廢時日。賊黨益多。兵氣漸餒。不俟常青知會。即飛咨粵省。令豫派之將弁兵丁剋日起程籌辦。甚為周到。動合機宜。頗慰朕懷。惟粵省豫備之兵。既有四千名。恐陸廷柱一人不能照料。已有旨令梁朝桂赴閩粵交界處所。聽候調遣。著孫士毅即飛劉梁朝桂。速行前往。帶兵赴鹿仔港。勉力會剿。從前賊匪初起時。孫士毅調發弁兵前往策應。朕以本省兵力已厚。是以降旨諭令撤回。今復須徵調。雖似多一番往返之勞。然竟實受撤回之益。設使彼時粵兵早抵臺灣。不過分屬任承恩黃仕簡二人帶領。仍派令零星打仗。該兵丁見閩兵不能得利。自必日漸氣餒。徒使有用之兵。亦歸無用。此番新調之兵。初抵臺灣。聽常青帶領。其銳氣方盛。正可資其生

力轉於軍務有裨。至黃仕簡任承恩。玩誤緊要軍務之罪。均應按律正法。但念黃仕簡年老。又係病後。且伊從前辦事。尚屬黽勉。姑貸其一死。令其退廢家居。自思咎戾。所有公爵。仍加恩令伊長孫承襲。至任承恩之父任舉。前在金川陣亡。任承恩又現無子嗣。朕軫念前勞。不忍令捐軀殉忠者絕嗣。任承恩俟刑部照例定擬具奏時。尚可加恩貸其一死。但老師糜餉之罪。伊二人百身難贖。若使倖免。餘生之人。坐享豐厚。不足以示廢弛軍旅之戒。將來事竣後。所有多延時日。糜費之軍需銀兩。均應於黃仕簡任承恩名下追賠。以示懲儆。至常青於初六日放洋。現在早抵臺灣。務照節次所降諭旨。悉力籌畫。妥速督辦。○壬辰。諭據書麟奏。安省連年災歉。蒙恩蠲緩。司庫耗羨。不敷支用。請於鄰省協撥銀十五萬兩。以資接濟等語。著照所請。於江寧藩庫協撥耗羨銀十萬兩。蘇州藩庫協撥耗羨銀

五萬兩。照例解往備用。○又諭據長麟奏。濟南兗州府各屬。上年雨雪短少。麥田未能普種。現屆青黃不接之時。應完地糧米穀及籽種銀兩。數目繁多。小民輸將稍形竭蹶等語。東省濟南等府屬。頻歲歉收。上年雖秋成豐稔。復因雨雪短少。麥田未能普種。今春雨澤亦尚未一律優霑。際此青黃不接之時。若新舊並徵。民力不無拮据。所有濟南府屬之歷城章邱。長清齊河。禹城平原齊東。鄒平長山。新城兗州府屬之嶧縣滕縣。鄒縣陽穀壽張泗水。東昌府屬之聊城高堂莘縣。恩縣在平。清平堂邑博平冠縣。館陶青州府屬之益都昌樂高苑博興樂安壽光臨淄臨朐泰安府屬之東平東阿。平陰萊蕪武定府屬之濱州利津霑化曹州府屬之荷澤單縣濮州。城武定陶鉅野鄆城。范縣觀城。朝城并臨清州。共五十三州縣。及坐落衛所。除本年新糧。照例徵收。外。其五十一年分應徵地糧米穀籽種。

及前次未經分年帶徵之項俱著加恩緩至本年秋後分作二年帶徵節年地糧米穀籽種定限二年之項著分作三年帶徵定限三年之項分作四年帶徵統於本年秋後開徵為始俾得從容輸納民力益資寬裕副朕惠愛閭閻有加無已之至意該部即遵諭行○諭軍機大臣曰徐鼎士於上年十二月即經常青徐嗣曾派令帶兵一千五百名赴臺灣進剿乃該副將所帶之兵屢稱因風阻滯直

至二月初旬始據稟報陸續前赴淡水已不免遲延及到鹿仔港總未報其剿殺一賊現經任承恩檄令帶兵會攻復以艋舺民人懇求留駐並未前往會剿看來究係有心逗留畏懦不前藉詞支飾不可不嚴行查辦行軍之道全貴紀律嚴明信賞必罰若將弁臨陣出征心懷怯懦惟恐遇賊接仗而畏葸退避者即可倖免無事使人人效尤則將弁兵丁孰肯奮勇直前致命效死耶著常青即嚴查

該副將前赴臺灣曾否稽遲及現在任承恩檄調何以不行前往若徐鼎士果有畏縮逗留托詞規避之處即應立行拿問據實參奏當按軍法從重辦理俾在事兵弁咸知儆畏並著李侍堯一體嚴切訪查據實參奏至柴大紀自派往諸羅以後於剿捕一切不能如從前之出力並著常青一併查奏○旌表守正捐軀廣東曲江縣民張文魁妻華氏○癸巳諭曰直隸提督李國梁宣力有年奉職勤

慎茲聞溘逝深為軫恤著加贈太子少保銜所有應得卹典該部察例具奏○又諭直隸提督員缺著俞金鰲調補俞金鰲未到任以前著李奉堯署理閔正祥著調湖廣提督其甘肅提督員缺著蘇靈補授所遺河州鎮總兵員缺著福康安於總兵中揀選一員調補所遺員缺著佛喜補授○甲午禮部以會試中額請得旨這會試滿洲蒙古取中三名漢軍取中一名直隸取中十四名奉天取中一

名。山東取中十一名。山西取中八名。河南取中七名。陝西取中四名。江南取中三十一名。浙江取中十八名。江西取中十二名。湖北取中四名。湖南取中三名。福建取中七名。廣東取中四名。廣西取中二名。四川取中三名。貴州取中二名。雲南取中二名。○諭軍機大臣等。昨據李封來京。陞見。詢以該處地方情形。據奏湖北吏治甚為廢弛。遇有地方事件。經督撫交辦。屬員敷衍成習。並不認真辦理。一味延緩等語。各省地方事務。全在督撫實力整飭。隨時董戒。俾屬員有所畏憚。方能吏治肅清。諸務就理。今湖北省急玩相沿。至屬員不畏上司。事多闌茸。自係從前歷任督撫。因循日久。不加整飭所致。即舒常已不能辭其咎矣。李侍堯在彼尚能振作。今已調任閩浙。新授巡撫姜晟。到任尚需時日。現在舒常兼署督撫兩篆。務宜董率屬員。遇事認真督辦。如有仍前懈弛不職者。即當據實嚴參懲治。

庶積年玩愒習氣。日漸改觀。若舒常於此時再不實心整理。則日甚一日。伊於何底。恐不能當其咎也。將此諭令知之。○又諭曰。黃仕簡任承恩於本月十三四等日奏到之後。迄今將屆半月。何以並未將勒捕情形隨時奏報。況朕因黃仕簡畏縮不前。是以特派常青前往督辦。伊二人一聞此信。苟稍有人心。即當自知愧懼。趣常青未到之前。親帶弁兵迅速進剿。以冀將功抵罪。乃竟閱多日。並未將如何勒捕情形具摺馳奏。可見伊二人竟係自甘頹惰。觀望玩延。其貽誤之罪更無可逭。著該督即將黃仕簡任承恩於前次拜發奏摺後。此十餘日內。在彼辦理何事。何以並無一字奏及之處。據實查明參奏。○乙未。諭軍機大臣等。前據舒常奏。接准陝省咨會。有潁州民人張良功。資給段文經錢文逃往陝西之語。即經降旨傳諭已延三等嚴密查拏。並令將此語得自何處緣由。據實覆奏。茲據秦

承恩等奏稱正月初八日。接准河南藩司江蘭來札。轉據大名道龍舜琴來信稱。奉直隸總督札查。聞得段文經在潁州張良功家窩藏半月。現今拏獲。訊出資送錢文。逃往陝西等語。段文經係大名案內首逆。張良功膽敢窩留半月。資送錢文。即為此案要犯。既在安徽潁州地方拏獲。究出段文經有逃往陝西之語。該州豈有不稟知本省巡撫之理。書麟自當一面飛咨陝省緝拏。一面即行奏聞。何

以事隔數月。竟無一字奏及。再張良功供出段文經逃往陝西之語。係直隸寄知豫省。又豫省復寄知陝西。是劉戡早經得有此信。何以並未具奏。即朕巡幸途中。屢次召見劉戡。亦無一語提及。朕因段文經日久未獲。時切憤懣。此語即使該督得自夢中。亦應驚心留意。乃以張良功確鑿可據之供。竟爾置之度外。並未奏聞。是何意見。豈非笑話。該督何昏憤至此。著傳諭書麟。劉戡。即將因何不行具

奏之處。據實明白回奏。仍飭屬嚴密緝緝。務將段文經等拏獲。解京審辦。勿令遠颺。○又諭本日李侍堯奏到臺灣情形一摺。並鈔錄海防同知楊廷理原稟。據稱賊匪滋事以來。大兵僅屬固守。皆以兵單難於遠捕。為辭。如彰化早經恢復。而任承恩駐兵鹿仔港。普吉保駐兵埔心莊。諸羅收復月餘。而柴大紀駐兵城外鳳山。復經收復。郝壯猷分駐四門靜守。黃仕簡駐守郡城。以致賊匪各路嘯聚。現

在臺灣之兵。統計一萬三千有餘。合之則多。分之則寡。等語。該同知所稟各情形。早在朕遙度之中。可見兵力以分而見單。伊等貽誤實由於此。昨經降旨。將任承恩革職。等因。尚以黃仕簡年老有病。僅令革職。撤回內地。伊等如此玩誤。則二人厥罪惟均。黃仕簡亦難稍為寬宥。著李侍堯一俟黃仕簡撤回廈門。即傳旨一併革職。拏交刑部治罪。該提督等株守延玩。令將弁等效尤觀望。不能早擒賊

首。俾賊匪得轉相嘯聚。逼脅平民。其中不肖之徒。勢必與賊烏合。日積日衆。滋擾蔓延。昨經李侍堯奏。添調粵兵四千名。一由廈門赴鹿耳門。一由蚶江赴鹿仔港等語。看此情形。常青處所有之兵。尚未免單薄。著傳諭李侍堯。如粵兵尚未分路配渡。即檄令前赴鹿耳門。直抵臺灣府城。俾常青處兵力壯盛。足資調遣。如業經分路配渡前進。著常青於粵兵將抵鹿仔港者。亦即調來合為一處。常青親帶勇往將弁。徑赴大里杙賊巢。鼓勵弁兵。務將首惡林爽文一鼓擒獲。其餘賊衆。不難撲滅。淨盡。又聞該同知原稟內。現在府城諸羅彰化之間。各處皆有賊人屯集。常青經過地方。中途遇有賊匪抗拒。正可痛加殲戮。俾賊匪聞風膽落。路途無阻。直抵賊巢。此事惟仗常青遵照節次指示。悉心籌辦。紓朕南顧。不致復蹈黃仕簡任承恩故轍也。其柴大紀郝壯猷。普吉保。因二提臣觀望。不無效尤。今二

提臣已拏問其柴大紀三人效尤之罪。且敕不問令其効力帶兵贖罪。如伊等亦有畏憚觀望情事。或不可令其効力。即著常青據實參奏。毋得稍有徇隱。○又諭據奎林奏。拏獲逃犯丙著雷明擬以斬決等語。奎林等所擬尚是丙著著照依所奏。即行正法。從前各處逃犯皆藉別省代緝。節經降旨嚴飭。後今各處始能緝獲。大凡罪犯一經脫逃。即飭屬上緊搜捕。自必就獲。何至越境遠颺。若止海捕具文。不但難以緝獲。適足縱其逋遁矣。奎林等嗣後於捕逃一事。務須遵朕節次所降諭旨。努力從事。此次拏獲丙著之為民罪犯黃壽尚屬出力。著照例遣令回籍。以示獎勵。○丙申諭軍機大臣等。據孫士毅奏。是該省官兵全數在潮。起程已在四月中旬。加以配渡放洋。計四千名陸續全到臺灣。極早亦須至四月下澣。常青於三月初六起旋放洋。不

過初十內外。業抵臺灣。若必俟粵兵到日始行進剿。則歲事之期。竟須至五月。豈不曠日持久。著傳諭常青體察情形。若臺灣現有之兵。一經鼓勵。覺屬可恃。即擇其精壯者。親身帶至大里。找賊巢。痛加殲戮。將首逆林爽文擒獲。其餘附從。自紛紛瓦解。固屬甚善。如該處之兵。實不可恃。必須接濟。或俟粵省數起官兵到後。酌量足數。勦捕。即帶同前往。俾新舊間用。庶新到者勇氣方張。舊存者心有可恃。亦自必旌旆改觀。不可拘泥。必俟粵兵到齊。始行辦理。致再遲延。或臺灣現有之兵。其氣已餒。必須全仗粵兵到齊。方能前往勦捕之處。常青亦不可因有此音。稍存輕率之見。務在相機妥辦。動出萬全。以副委任。至粵省未經起程官兵。著孫士毅另行籌酌。令其併起行走。並先知會李侍堯。豫備渡船。其已入閩境官兵。著李侍堯飛飭沿途。催趲前進。李侍堯即當親至廈門料理。隨到隨渡。至此事

書奏事

主

總由黃仕簡任承恩。二人互相觀望。以致久稽歲事。其罪實無可逭。孫士毅駐劄潮州。相距不遠。其於黃仕簡任承恩玩誤之處。自必有風聞。著該督即將所聞據實覆奏。勿稍迴護。○丁酉。諭曰。工部奏。各省工程報銷。應駁應准各案。分別開單進呈。此內有雲南省各營辦解硝磺。及黑鹽井地方修理井座礮岸。楚雄縣修理兵房。直隸省豐寧縣移建墩臺。營房。山西省大同鎮等新添兵丁。應需操演藥鉛。江南省沛縣移建新城等六款。俱係乾隆五十年駁查之後。迄今未據造報。應令該督撫即行查參。並上緊催辦完結等語。此等工程照例報銷之案。既經該部駁查。各該督撫即應據實查覈。上緊完結。何至逾限一年有餘。均屬遲緩。著即令各該督撫明白回奏。並將部駁各案。分別查明。迅速報部覈銷。毋得再行延宕。其餘逾限各員。並著照例查參。交部議處。○是月。予告大學士蔡新奏。臣接

書奏事

主

奉

殊諭併

聖製文四篇。大而經國遠猷。細而詞章訓詁。無不可為奕祺之遵守。羣言之折衷。惟有中心感悅。永矢弗諼等語。得旨。覽卿一片誠懇之言。如親見面論文矣。臘雪太優。正月一切行慶甚佳。至二月望後。則畧望雨。日引月長。雖屢微雨。總未霑足。加之臺灣逆賊尚未勒盡。邇來意甚焦愁。祿言一章寄示。可知朕況節。

物數種並賜。

御製詩曰。九十春光減兩日。侵尋速至三月盡。明當首夏從頭數。韶冶去付東流允。歲除前日雪優霑。華滋景物殊常婉。孟春猶稚仲春麗。御園花事爭妍繁。我已畧厯望雨心。肯以賞花間民隱。李春上中下之澣。日甚一日早象引。昨看弄田麥苗綠。及時嘉霽豐猶準。十日不雨恐無之。難言大田已播畛。近每生雲隨散風。嗟哉膏澤懼尚遠。沉經捷信盼臺灣。

庸臣失律增慙憤。祿言遣問弗成章。莫勝其慚辭亦窘。予告戶部尚書曹文植奏。二月初三日。臣由京起程歸里。所過直隸各州縣。因上年雪澤霑足。春麥均屬菁蔥。正需雨膏。渥被自泰安至江蘇浙江安徽數千里晴雨應時。二麥繁茂。其浙江之杭嘉湖一帶。桑陰並茂。得旨。迤南實好。直隸山東正望雨。心甚不寧。江南河道總督李奉翰奏察看東清禦黃二壩。內外探量清水之勢漸旺。東清壩逼近運口。應先拆展十丈。留口門共寬三十丈。使湖水多出。以暢其東注之勢。批。好。又奏。禦黃壩逼近黃河。此時尚在桃汛。仍留口門二十丈。使清水多而出口有力。敵黃刷沙。更屬有益。批。更是。又奏。現今清水仍至彭家馬頭。迤下會黃東注。惟有隨時相機。總期節宣有制。得旨。欣慰覽之。

大清高宗法天隆運至誠先覺體元立極敷文
奮武考慈神聖純皇帝實錄卷之一千二百七十七

實錄卷之一千二百七十七

三

清 實 錄 乾隆五十二年四月上

大清高宗法天隆運至誠先覺體元立極敷文
奮武考慈神聖純皇帝實錄卷之一千二百七十八

監修總裁官臣等謹撰官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹撰滿洲都統軍功紀錄五次

尋常紀錄十四次臣等謹撰經筵講官太子少保工部尚書紀錄六次臣等謹撰等奉

敕修

乾隆五十二年丁未夏四月戊戌朔享

實錄卷之一千二百七十八

一

太廟遣誠郡王弘暢恭代行禮○諭軍機大臣
等從前晉省教匪田進泰案內有牛經元李
朝傑李榮祖田履端田志端等五犯曾經發
遣伊犁烏魯木齊等處彼處所有罪犯皆非
守分之徒該犯等既經發往恐仍不知安分
復興邪教煽惑人心著交奎林永鐸等悉心
訪查伊等解到後安靜與否倘仍有惑眾情
事查出即行正法不可姑息如再有能捕獲
逃犯者即遵前降諭旨釋令回籍但伊等原

犯情罪輕重不能具知嗣後有似此拏獲逃犯者將各原犯情罪事由於摺內夾片具奏候旨著一併傳諭黑龍江將軍彼處如有似此邪教違犯一體留心辦理已亥諭軍機大臣等康熙年間奸民朱一貴聚眾滋擾經提督施世驤統領大兵悉由廈門進剿不及一月即已收復歲功蓋因大兵會合一路由廈門進攻聲威壯盛賊匪望風膽落故能一舉殲滅此次賊匪起事之初黃仕簡任承恩領兵進剿分路配渡其餘將弁又各由別途陸續進發已覺兵勢稍分伊二人一抵臺灣即應彼此會合厚集兵力直搗賊巢將首惡擒縛餘黨自必瓦解乃黃仕簡任承恩僅派撥將備零星打仗四處堵禦以致賊匪從而生心得由山徑繞道蔓延各處嘯聚官兵轉為所牽掣兵分而力見單幸而賊匪不過么膺草竊並無謀計設遇狡黠奸徒逞其鬼蜮伎倆豈不又蹈木果木之覆轍耶著常青抵

臺灣後即將各路官兵調集會合一處其添調粵兵遵照前旨全歸常青統率以期兵威壯盛士氣振奮專力全赴賊巢搜剿斷不可又蹈黃仕簡任承恩故轍輕分兵力觀望遲延俾賊匪得以四散牽掣歲事致稽時日也

庚子

上還宮諭軍機大臣等現在京城缺雨麥價較昂小民口食所需自宜豫籌調劑向聞豫省大河以南上年麥收豐稔今春復雨水調勻該處麥價頗為平減每觔止須制錢七八文若量為採買運送京城以資接濟豈不甚有裨益但恐商民聞知京城麥價昂貴在豫採買不無居奇牟利或致京城市價未能得減而河南本省麥價轉致加增亦不可不慮著傳諭畢沅密為訪察該處實在情形除商民自行糴買者聽其自便以資流通外若能採買四五萬石仍可於該處民食市價兩無妨礙即奏聞派員妥協辦理運京若實與豫

省民情不便或於彼處市價轉致加昂亦即據實奏明不可因有此旨稍涉遷就至該省麥價現雖甚賤若採買運京自當照彼處市價每觔酌加二三文於豫省民人亦可稍需餘潤畢沅惟當酌籌妥辦期於兩得其益以副朕廑念民食衷多益寡之意○福建水師提督黃仕簡奏總兵郝壯猷柴大紀等馳赴南北二路分勦賊匪郡城為全臺根本不可無大員彈壓是以親督官兵居中堵禦搜捕並為兩路接應聲援日內督臣常青到臺臣即親率官兵進勦諭軍機大臣曰黃仕簡不過因遷延日久連奉諭旨嚴飭為此飾詞以掩其退縮之罪幸而朕先事豫籌派令常青前往督辦黃仕簡得有所藉口若使朕不派常青前抵臺灣黃仕簡又將何辭豈竟思久坐郡城以待賊之自斃乎況林爽文既歸巢穴其餘附近賊匪不過么麼草竊如易連陳邦光等皆可堵截搜捕又豈專賴提督大員

坐擁重兵以防其後來滋擾之理即總兵柴大紀郝壯猷等收復二縣城後自應統領官兵直抵大里代賊巢奮勇勦除乃該鎮等即以防守為名並不上緊追捕截拏任其竄伏團聚以致賊匪繞道蔓延官兵轉為牽掣是該鎮等效尤觀望畏葸不前即郝壯猷之罪亦與柴大紀之失陷城池漫無籌畫者相等現據李侍堯奏逆匪林爽文與各賊黨將大里代一帶掘壕放水復築土牆安設礮位等語賊黨盤踞穴巢以圖併力拒守看其光景別無他圖竄匿之計轉可聚而殲戮其事尚屬易辦恐大兵雲集四路圍攻賊匪計窮力蹙或竄入內山希圖苟延殘喘搜捕轉稽時日不可不豫為籌辦著常青抵臺灣後即將各路官兵調集會合一處揀派精銳親行帶領直赴大里代奮力圍勦務將首惡林爽文一鼓擒獲餘黨殲除淨盡其堵截賊後路不使竄入內山一事則專責之柴大紀並著常

青詳悉曉諭柴大紀伊係有罪之人姑令帶罪圖功現在大兵進剿賊匪竄入內山之路最關緊要即責成該鎮專力堵截若能將賊首拏獲不使餘黨一名竄逸不但宥其前罪並當仍錄其功若再不能實力奮勉立功自贖以致賊首林爽文從伊防守之地竄逸及餘匪復有逃入內山等事則惟柴大紀是問恐伊不能當此重罪也○是日起

上以常寧記

天於

園丘齋戒三日○辛丑諭曰黃仕簡奏三月初十日海壇鎮總兵郝壯猷來至臺灣郡城據稱初四日參將瑚圖里稟報自山猪毛被賊攔截不能過溪該總兵隨派員帶兵前往接應行至疏磺溪猝遇賊匪圍截衝散官兵未回甚多賊即來攻營盤併攻縣城東門該總兵將城外官兵移駐城內防禦初八日賊匪益見加增攻犯更急由南門進城放火攻殺

以致官兵衝散等語郝壯猷係派往南路剿捕大員既經收復鳳山縣城自應一面派兵設卡防守一面親率將弁追剿賊匪乃安坐營盤既聞瑚圖里被賊攔截不即親往接應以致賊匪乘勢攻圍縣城復陷況該總兵所帶之兵計有三千餘名不為不多當賊匪來犯時兵丁等畏賊退避該總兵即應將退避者立時正法數人使知儆懼其餘策令向前一鼓作氣同心抵禦何至紛紛潰散即或賊多兵少勢不能支亦應奮不顧身殺賊而死甚至無能自刎庶不失城亡與亡之義從前征剿緬甸時如明瑞觀音保扎拉豐阿皆因綠旗兵丁怵怯不能勝敵今日適有松潘鎮總兵穆克登阿來京陛見經朕詢問據稱征緬甸時伊即跟隨明瑞等打仗目擊彼時情事將軍等非不可以退出而明瑞等貪言受恩深重兵散勢窮寧死於賊不死於法即或退出後倖邀寬典亦何忍覩顏視息是以不

肯生還等語。朕聞其言，猶欲為之墮淚。明瑞等能知大義，咸以身殉，其身後既邀優卹，世職復予專祠。子孫至今受恩勿替，歿有餘榮。郝壯猷以專閫大員，寧不聞知，乃亦效綠旗兵弁，恒怯惡習，自罹重辟。且日前降旨，將任承恩革職，拏問時，其陸路提督員缺，朕因郝壯猷收復鳳山，尚為出力，曾諭令常青查明。如果郝壯猷堪勝提督，即行奏明，候朕簡放。今伊於賊匪復犯鳳山時，既不能先事防禦，又不能督率弁兵奮勇殺賊，潛回郡城，似此畏怯倖生之員，若不明正典刑，其何以肅戎行而昭軍紀。常青接奉此旨，即將郝壯猷在臺灣郡城傳集衆將弁，將伊正法，並將前旨本欲用為提督及現在又因其棄城潛回，是以按軍法從事各緣由，向其宣諭，俾知賞罰分明。禍福惟其自取。郝壯猷即身伏刑誅，亦當死而無怨。其派往接應及城內各官兵，又皆何往，並著常青查明據實奏至，瑚圖里。

身係滿洲，前於賊匪滋擾鳳山時，因兵丁衝散，該參將遂乘馬馳至郡城，已有應得之罪。第念其究因倉猝兵散所致，與自行脫逃者有間，是以仍令帶罪効力。今據黃仕簡奏，該參將又於山猪毛地方被賊攔截，不能過溪。若係賊人踞守溪河險隘，尚屬可原。倘竟係該參將畏懼賊勢，借詞躲避，亦如郝壯猷之逃回，則其罪更無可逭。著常青即查明一面奏聞。一面將該參將正法示衆。此事總由黃仕簡任承恩二人一南一北互相觀望，以致各鎮將效尤玩誤。久稽歲事，幸而朕洞燭幾先，早令常青往臺灣督辦，得以及時整頓。設朕亦不豫為籌及，直遲至此時始派常青前往該處，無人統率，而黃仕簡又以病軀懦怯，諸事督亂，或竟至墮賊術中，為其所擄，更屬損失威重。尚復成何事體。現據常青將該提鎮等罪狀查明奏，並自請議處。除郝壯猷應行正法及黃仕簡任承恩拏問之處，另經

降旨外柴大紀普吉保姑念其從前奮勉現令帶罪自贖暫著從寬交部嚴加議處以觀後效常青從前率據黃仕簡等咨報冒昧入告咎亦難辭但念其遠隔重洋未能得知確信且該督現在臺灣督辦本日奏到各摺悉合機宜常青著加恩免其議處該督自當益加感激思奮妥速籌辦昨據李侍堯奏所調粵省兵丁四千名抵閩時即陸續配渡現有添派閩省駐防及內地官兵共三千餘名交恒瑞藍元枚分帶前往各兵未到以前與其閒住待兵常青應就臺灣現有官兵選派精壯者先令前赴郡城附近處所或南路鳳山一帶將窺聚賊匪掃除淨盡廓清後路指日官兵雲集會合勒捕直搗賊巢更無返顧之憂料此么膺草竊無難一鼓殲擒此事現交常青督辦常青即著授為將軍恒瑞藍元枚著授為叅贊俾事權歸一軍威益振以期迅奏蕩平綏靖海疆將此通諭中外知之○又

諭前因李侍堯奏南北兩路提督各有牽掣不免坐費時日等語已降旨將任承恩革職交刑部治罪黃仕簡撤回廈門候旨矣此次臺灣逆匪林爽文等糾眾滋事任承恩亦奏請前往朕意即以任承恩不應同赴臺灣亦恐水師非其所轄呼應不靈未免掣肘轉於勦捕無益但因任承恩業已登舟配渡多一人或可得一人之益是以未令轉回詎伊二人抵臺灣後並不親臨行陣定期會攻一南一北互相觀望果不出朕所料以致賊匪日久蔓延迄今未能撲滅其玩延貽誤厥罪維均即或黃仕簡因年老患病不能親身帶兵及任承恩到彼後不能零星堵禦抑或賊匪衆多兵力實不敷勦捕之處伊二人早應隨時據實直陳候朕指示籌辦乃伊等並無一字奏及是其種種貽誤實無可置喙而黃仕簡係水師提督臺灣乃其專轄現在勦捕事宜又經朕特交督辦乃安坐郡城漫無

籌畫伊尚如此畏葸因循更無怪任承恩之意存推諉其罪視任承恩為尤重任承恩既經革職拏問黃仕簡亦難寬宥昨已降旨將黃仕簡徹回內地俟伊到廈門時著李侍堯即傳旨將伊一併革職拏交刑部治罪若論黃仕簡任承恩貽誤緊要軍務之罪均應按律即行正法朕辦理軍務信賞必罰而於畏葸退縮者尤必重加懲治故能紀律嚴明將士用命所向克捷底績成功今黃仕簡任承恩恇怯貽誤若在他入必當正法但念黃仕簡年老又係病後且伊從前辦事尚屬勉勉受恩最久所有公爵係伊祖所立功績自應承襲即照黃仕簡從前原奏令伊長孫黃嘉謨承襲至任承恩係任舉之子任舉前在金川出兵時打仗受傷陣亡其長子又以巡捕營遊擊因救火得傷身故亦無子任承恩現無子嗣若將任承恩正法是任舉臨陣捐軀竟至絕嗣朕心實有所不忍黃仕簡任承恩

俟到部時該部自當照例定擬具奏然均可加恩貸其一死所有福建水師提督員缺著藍元枚調補其陸路提督員缺自當於臺灣總兵內擢用柴大紀於林爽文滋事不能豫為防範到諸羅後又不進剿斗六門賊匪本不當復邀陞擢但念其防守郡城尚為奮勉出力功罪自不相掩所有陸路提督員缺著加恩令柴大紀暫行署理以觀後效○諭軍機大臣等據常青奏到臺灣後查明官兵遲誤據實指參及添調兵丁情形所辦俱合機宜惟任承恩身為提督乃畏葸不前既不駐劄彰化縣城以逼賊巢又不與柴大紀夾攻斗六門其罪奚辭豈可復留該處再令帶兵仍滋貽誤著遵前旨將任承恩解京治罪至郝壯猷所遺海壇鎮總兵員缺著常青於現在帶兵將備內詳加體察實有奮勇出衆人員則不拘階級之崇卑即奏請破格超擢以示獎勵至常青現在飛咨添調本省及廣東

浙江兵共七千名俱由鹿耳門進口會集粵東潮碭二鎮兵丁前據李侍堯等奏業經徵調四千名已較常青所調者多一千名於三月十六日自粵省分起起程即可陸續到彼至浙省兵向來柔懦更遜閩省且距閩稍遠此時徵調亦緩不濟急著傳諭琅玕竟可停止派撥現於常青原調兵數止少一千名朕思福建駐防滿兵雖不能如京師健銳火器等營勁旅所向無前究屬心力堅定較之綠營恒怯尚為得力況常青曾任福州將軍駐防兵皆其舊屬呼應自靈著恒瑞於滿營內挑選一千名并派得力之協領佐領等官分起管帶恒瑞即親身統領前赴臺灣會合進剿所有兵丁口糧配渡各事宜即著徐嗣曾妥為料理其福建續調之綠營兵二千名即著藍元枚親身統領前往臺灣會剿內地亦不可無提督彈壓所有水師提督事務著漳州鎮總兵常泰暫行署理現在粵省添調兵

丁四千名及本地續調之內地官兵自己陸續至廈門會齊著李侍堯妥速料理即令其配渡常青於新調官兵未到之前固不宜冒昧輕進然坐待稽延恐賊匪又生別計亦非良策自應將現有官兵內詳加挑選擇其壯健者派令奮勇將備帶領先至南路鳳山一帶搜捕賊匪逐一殲除淨盡俾後路肅清將來大兵往北攻剿不致有反顧之慮較為妥善至鳳山駐守兵丁三千餘名何至遇賊即行潰散現據常青奏先後奔回之兵止存四百餘名餘兵皆向何往豈有俱從賊之理著常青俟事定後嚴查為首之人從重辦理現在退回之兵按照兵法俱應概予駢誅但念人數衆多究係領兵將弁不能首先奮勇以致兵氣不振姑暫貸其一死著常青明白曉諭該兵丁等令其激發天良奮勉自効

上詣

壬寅

南郊齋宮齋宿○諭軍機大臣等據李侍堯奏於浙省原調兵三千名外再增調兵一千名一節浙省兵丁懦弱朕南巡時閱看浙兵與閩兵角藝即形畏怯況現在臺灣賊匪皆係閩人之剽悍者閩兵攻勦尚不能勝何況浙兵更不如閩調往協勦豈能得力是以昨據常青奏調已傳諭琅玕停止今據李侍堯奏為海疆緊要存兵無多請於浙省派撥所奏亦是此項浙兵止可分撥內地海口各營協防若以之進勦自不若本省兵丁為得濟自應遵照所降諭旨○在閩省各營先行抽撥其浙兵到閩時竟留於內地防守至李侍堯請調浙省兵丁四千名較之常青原調浙兵數目已多二千名昨又經朕籌及閩省駐防滿兵自較綠營為優則此一千滿兵抵浙兵二千況係常青舊屬已諭恒瑞揀選一千名帶往會勦此時李侍堯止須調浙省三千名自屬敷用浙省溫衢地方距閩較近該處兵丁

在浙省中稍為彊健著琅玕陳大用即於該二鎮所屬各營揀派兵丁三千名速赴閩省交李侍堯酌量派撥至李侍堯奏鹿仔港一路現經常青調去普吉保兵一千六百名分往諸羅恐任承恩兵單力薄不能支持等語所慮亦是但任承恩種種玩誤漫無調度即留該處亦終不能得力昨已降旨將藍元枚授為叅贊帶領閩兵二千前赴常青處會勦今思常青既有粵兵四千並駐防滿兵一千及存城各兵足敷進勦其藍元枚所帶兵二千名竟著由蚶江配渡前赴鹿仔港藍元枚到彼接代後將任承恩送回內地即行拏問解京再常青奏賊匪攻得鳳山乘勢來犯府城已到十里之外是其自來送死雖閩兵甫經失利不足倚恃而常青可以簡其精壯鼓其勇氣未始不可以逸待勞設法堵截勦殺亦足破賊人之膽該將軍接奉此旨即將如何殺退賊匪之處迅速奏聞○癸卯常寧祀

天於

園丘

上親詣行禮。幸圓明園。甲辰。軍機大臣等議覆四川總督保寧奏稱武職綠營千總一項向例凡遇卓異豫保俸滿及邊俸年滿六年留任等項均須送部引見。逮奉旨推陞分別推題得缺如已逾三年又須送部引見。即未推陞得缺而屆滿六年亦須再行引見。是千總一項例應引見之處較文職佐雜為多。該弁等出身卒伍家計非饒長途往返維艱請仿照文員佐雜之例先行咨部註冊俟推題得缺再行送部等語。查千總雖微末員弁而一經陞轉即為將備即僅予留任者亦有訓練操防之責如將應行引見各員概行停止至陞用時始行引見是保送者尚有引見之期而留任千總即歷俸多年終不調取行之日久該督撫或有遷就姑容部中無從稽覈應請嗣後無論邊疆內地各項千總統以

引見一次為定如俸滿保送留任改為保送及豫保卓異各項千總應行分別題推營衛請旨欽定者均照舊例引見其俸滿僅予留任既不即行陞用可暫停送部若至二次甄別仍係留任其中難保無濫竽應棧應仍令送部引見至卓異在俸滿後併甄別拔置題補即用及仍留候陞各項千總業經引見之員均毋庸再行送部至陞用守備時該督撫提鎮秉公驗看人才弓馬如有改變即行參劾若堪以勝任即發給憑劄令其赴任仍出具切實考語報部存案該督撫等倘草率辦理別經查出照徇庇例降三級調用不准抵銷得旨此項保送千總陞用守備時若僅交督撫提鎮驗看咨部不復調取引見如該督撫等果能秉公考驗將衰劣者據實參劾固可將原保之督撫提鎮議處第恐該弁陞任後各該督撫提鎮彼此瞻顧雖經看出該員年力已衰或弓馬平常慮原保各上司因此

被議不免有官官相護之見致衰庸之員仍得應機不可不防其漸嗣後保送千總陞用守備者著於抵任三年後仍即令出具考語來京引見一次在該員久經遷擢廉俸自比千總微員稍優無慮拮据如此內有督撫提鎮驗看不實經朕看出者即將原保及陞任後姑容之督撫提鎮一併照徇庇例嚴加議處如此辦理則各督撫等恐干議處隨時留心叅劾衰劣者自揣難邀留任當必及早引

退其年力壯盛者引見時如果人才出色並可量加陞擢該員等知上進有階亦不憚於跋涉庶於優加體卹之中仍遇精明考覈之道立法更為周備著為令○乙巳諭今春以來熱河地方穀價較昂兵丁生計不無拮据著施恩借給看守避暑山莊之千總兵丁等一年錢糧自明年起作為三年扣完○諭軍機大臣等據蘭第錫奏微山湖水現深六尺一寸有餘並委原任河道沈啟震查勘運河

西岸疏濬河渠情形酌修涵洞暨開通道溝田渠各事宜二摺同日又據毓奇奏本年微山湖水甚弱必須撙節啟放計算將來船抵八閘雖數浮送實不能遠注下游等語微山湖為濟運水樞今湖水甚弱不能遠注下游自應及早辦理以期收蓄轉輸但蘭第錫所請疏濬之處甚多朕亦未曾經歷其地事關濟運不可不詳加確勘此內地方俱在河南山東兩省境內目下距伏汛止有六十日為

期已迫著傳諭蘭第錫畢沅長麟接奉此旨蘭第錫往兩省適中處畢沅自河南而東長麟自山東而西履勘應疏應濬處所將沈啟震所勘各工是否實係應辦及此外有無應行添辦於運道有裨之處悉心妥酌一面繪圖貼說據實具奏一面即確估興工派員辦理但所辦工程道路綿亘段落繁多若僅交沈啟震督辦恐一人不能照料且地方非其所轄亦恐呼應不靈除河道已經蘭第錫派

出沈啟震外著單沅長麟即各於本省道員內擇其明幹能事者各派一員赴工會同沈啟震督辦該撫等俟派出道員到工後再行回省務於伏汛以前趕辦完竣如式驗收以冀大雨時行之際源源挹注使微湖存水速符定制重運得資浮送又據蘭第錫奏稱此內有向係民修之工現分飭地方官勸用民力妥為疏濬等語豫東二省俱係前歲災歉之餘民力未能寬裕且現在應辦工程既多

若俟勸諭辦理未免緩不濟急著傳諭該督撫等將此次凡係民修之工即先動帑興修俟完竣後覈明動項若干將來尚可分年帶徵補項以紓民力如動項過多或遇年歲不能十分豐稔民力拮据未能依限完繳並著該撫等據實奏明候朕降旨豁免朕於國計民生所關從不稍存靳惜該撫等當善體朕意妥協經理也○丙午

上御勤政殿聽政○諭本日召見湖北按察使

張廷化據奏伊父現年七十八歲未經迎養懇請留京等語張廷化著准其留京侍養胡翹元現出山東學差所有鴻臚寺卿即著張廷化署理所遺湖北按察使員缺著李天培補授○以山西冀寧道歸景煦為浙江按察使○予故奉恩輔國公永璫祭葬如例○添建陝西平利縣鎮坪巡檢衙署從巡撫覺羅巴延三請也○丁未諭據知貢舉藍應元奏本年會試舉子內九十歲以上者七名八十

歲以上者三十七名七十歲以上者九名皆三場完竣揭曉後未經中式等語此次各省舉子年老應試者多至五十餘人俱龐眉皓首踴躍觀光允為昇平人瑞除馮出佐田集盛張自道業於上次大挑後賞給光祿寺署正等銜及本年大挑選入二等之唐泰鄭國祥孫有謚楊士元照例以教職銓補外所有年屆九十九歲之李宏道著加恩賞給翰林院編修銜其八十九以上之彭一猷謝璜

葉有聲王協恭謝啟祚涂紅鵬朱紹璧蘇彩
飛梁元鈺王泓陳詩張宗賢許承恩趙宏誠
張啟滿李良棟葛維楠王澤週何紹怡程鳴
岐閔遜齡韋元勛毛景燧全思義王輝祖彭
省非譚諭美曾錫璣林復發王渭揚軒棘圻
劉子旭李晃桑振東方永祥王家賓李作朋
萬邦獻主志禮陳養源俱著賞給翰林院檢
討銜七十歲以上之項朱張琴張維焯柴杰
姜价俱著賞給國子監學正銜以示朕嘉惠

耆儒壽考作人之至意○戊申

上幸靜宜園駐蹕至壬子皆如之 己酉諭據

李侍堯奏虹江上下一帶洋面屢有被刦之
案嚴飭該管總兵羅英笈專派弁兵出洋偵
緝並未擒獲一名本月二十三日粵省第二
起官兵自海澄縣水路赴廈到嶼仔尾地方
有盜賊二十餘人駕船來刦兵丁猝不及防
互相格鬪受傷者六人賊旋逸去請將海澄
縣知縣侯謹度水師提標中軍守備李光輝

革職留於地方協緝勒限一年如限滿不獲
交部治罪其督緝之石瑪通判安靜水師提
標中軍參將王祖烈並該管總兵羅英笈一
併交部嚴加議處等語沿海地方盜賊出沒
最為商民之害甚至駕船行刦渡海官兵尤
屬不法已極該管地方文武員弁並不能立
時緝獲非尋常疎縱可比候謹度李光輝俱
著即革去頂戴暫行留任勒限半年在該處
緝捕如限滿不獲即行據實參奏從重治罪

總兵羅英笈係常青調赴彈壓之員乃於所
轄地方因循怠惰全無整飭若僅交部議處
不過革職留任不足示儆羅英笈亦著即革
去翎頂暫行留任在該處督緝其通判安靜
參將王祖烈均著革去頂戴暫行留任督緝
務於半年限內將各盜犯按名緝獲速正刑
誅如限滿不獲即著該督據實參奏分別從
重治罪○又諭現在福建臺灣地方賊匪林
爽文膽敢聚眾煽亂抗拒官兵殊屬可恨已

就近派兵往勦須派曾於軍營閱歷之巴圖魯侍衛章京等令其分領打仗始得勦滅賊匪迅速藏事著派健銳營副翼長烏什哈達護軍叅領岱三保副護軍叅領官保德成額果勒敏色三等侍衛雅爾江阿富克精額委署護軍叅領塔斯哈著每人各賞銀一百兩作速束裝馳驛前往晝夜加緊赴福建臺灣府交常青等令其分管兵丁奮勉出力於沿途驛站不可騷擾遲緩○諭軍機大臣等據

常青奏查明鳳山失事及黃仕簡任承恩觀望遷延種種貽誤之處果不出朕所料郝壯猷身為總兵大員於賊匪復犯鳳山時既不能先事防禦又不能督率弁兵奮勇殺賊潛回郡城早經降旨令常青將伊正法以示懲儆至臺灣現有兵丁經屢次挫擄不免氣餒常青不可不大加振作如兵丁臨陣時有一二畏縮退避者即立時正法懲一儆百即將備內有恒怯不前者亦即一面正法一面奏

聞而才能出衆奮勇殺賊之兵弁即奏請破格超擢今賞去翎子以備鼓勵戒行之用俾知死生呼吸之際退則必死進則可以殺賊立功邀恩拔擢即不幸陣亡國家自有優卹如此賞罰嚴明自必人人知所感奮可期鼓勇集事至總兵柴大紀普吉保功罪原不相掩前已有旨令柴大紀署理陸路提督普吉保仍留軍營俱令帶罪督兵以觀後效果能奮勇出力不但宥其前罪並當旌錄其功現

在曾經行陣之侍衛章京內派出八員即日起程令其晝夜星馳前往但臺灣距京較遠到彼究須時日著傳諭常青不必待伊等到彼始行進勦以致稽遲俟所調粵兵四千名及駐防滿兵一千名到齊酌量可用時即行帶領直搗賊巢生擒首逆務須奮勇持重計出萬全以期迅速藏事○庚戌諭軍機大臣等昨日召見新放湖南岳常澧道臧榮青看其才識拘謹止係循分供職之員岳常澧道

有分巡地方之責恐該員不能勝任著傳諭舒常浦霖於該員到任後留心察看倘於巡道事務辦理不能裕如即據實奏聞如其才具尚能勝任亦不可因有此旨稍存遷就又諭曰書麟保舉堪勝道員之知府錢金殿臧榮青二員錢金殿才具中平年已衰老難勝要缺今召見臧榮青觀其才識亦屬拘謹並非出色之員何以書麟將該二員俱登薦剡豈安徽知府中無過此二人者乎看來書

麟平素小心謹慎是以屬員中亦擇其謹飭者加以甄拔不知地方官有察吏安民之責必須才猷出衆通達事體者方稱特令保薦之意若似此循分供職之員在在不乏設遇地方要務豈能措置裕如且督撫鑒別人材不可意存偏見如專取謹飭之員則巧詐者皆得有心迎合貌飾淳謹以邀識拔於吏治風俗兩屬無益書麟在巡撫中尚堪造就其查辦賑務協理河工亦能實心實力是以降

旨教導開其識見嗣後務當留心體察不可以一格取人使屬員得以揣摩轉受其愚以副朕訓勉策勵至意又諭沿海盜賊最為商民之害今閩省蚶江一帶劫案甚多並未將首夥即時拏獲而嶼仔尾地方僅距廈門十餘里盜賊竟敢縱橫無忌行劫兵船可見該省政務廢弛已非一日地方官怠玩諱飾全不以緝盜安民為事遇有劫案僅以尋常械鬪將就完結希圖了事以致釀成巨案且

臺灣遠隔重洋最關緊要道府廳縣必須才守兼優之員方能勝任朕久聞該省督撫遇有臺灣缺出不問屬員才具是否相宜多以私人調補而得缺之員從不以冒險渡海為慮反視之為利藪又安望其整頓地方實心辦事此等劣員若到臺灣無所津益何皆視為美缺而其津益非取之商民何從而得則致民怨滋事劫縣戕官實有由來矣從前歷任督撫已多身故難以追究雅德由該省巡

撫擢用總督在閩最久。非若富勒渾之尚得藉口在浙江辦理海塘者可比。今貽誤地方。至於此極。著令其自思罪狀。明白回奏。若稍有不實不盡。無難將伊等回照黃仕簡任承恩。一律治罪。雅德不能似彼二人之尚可寬一線也。至富綱在閩撫任內。雖未及雅德之久。在任亦有二年。而於地方事緝盜安民。全未整頓。實難辭咎。亦著據實明白回奏。○辛亥。

上御演武廳。閱健銳營操。諭軍機大臣等。昨據常青奏。請簡派曾經行陣之侍衛章京前往帶兵進剿。已照所請。派烏什哈達等八員。令其即日起程。星馳前往矣。此次臺灣剿捕賊匪。未經簡派御前乾清門侍衛前往者。因常青素非內廷行走大臣。恐呼應不靈。轉不能得力。是以於侍衛章京內揀選。派往常青。現已授為將軍。即如領侍衛內大臣加意管轄方妥。若該員等打仗出力。著有勞績。即據

實保奏。倘有不遵約束。率意妄行者。即嚴行叅辦。不可稍存瞻顧。該員等起程時。已令軍機大臣面行訓諭。俟伊等到彼。並著常青將此旨諭知。俾各敬凜。至此等侍衛章京。皆係武職。恐見小貪利。沿途或有需索。亦未可定。不可任其所求。伊等果能勦賊立功。朕自優加恩賚。設該員等不知自愛。沿途經過。稍有額外需索。該督等一經查出。即行據實奏。朕必將該員等加倍治罪。以示懲創。○又諭。據舒常奏。安徽民人龔文奇等。赴川覓食。經川省遞送回籍。解到天門縣地方。該縣沈清直。派役接解。並不小心。看管以致龔文奇等男婦三十餘名。口全行散去。請將沈清直交部嚴加議處。解役人等嚴究定擬等語。已降旨將沈清直交部嚴議矣。貧民出外覓食。地方官酌量資給口糧。聽其自行回籍。原毋庸派役遞送。但既經差役轉解。即應妥為照料。今天門縣役奉差解送回籍貧民。並不速行

遞送以致中途散去或該役等竟有需索不遂藉端苦累情事亦未可定著傳諭舒常將解役人等飭屬提訊如果有需索勒捐情弊自應從嚴究治至此等貧民本非有罪之人自行散去回籍尚無不合著傳諭書麟於龔文奇等回籍至安徽時妥為安插聽其自便不必復加追究致滋擾累 豁免福建彰化縣船戶郭有成遭風漂沒運臺兵米九十石 壬子諭據蘭第錫奏接奉諭旨前赴豫東

實錄卷千言

五

交界適中之處履勘河道應行挑濬各工又據長麟奏由萊州府起程趕赴工次會同蘭第錫畢沅公同妥議勘估並派濟東道齊克慎會同沈啟震辦理又派同知佐雜等官赴工聽候分委等語此次運河西岸應行疏濬處所工段綿長非沈啟震一人所能辦理雖現據東省遵旨派委道員赴工幫辦又前經諭令畢沅於豫省能事道員內派委一人協同辦理但現在應辦工程須於伏汛前一律

完竣關係緊要必須專派大員董率稽查方能妥速周到蘭第錫現已將屆防汛之期畢沅長麟又應趕辦本省秋審及地方事務難以分身兼顧因思明興曾任東省巡撫現在河道各工即係伊任內兩次未經料理妥協之事伊在京並無經手要務著明興即日起程不准馳驛前赴工次督同沈啟震等實心辦理以已力往來稽察俟伏秋二汛過後再行回京供職伊係前任巡撫呼應自靈務須

實錄卷千言

五

督率在工各員上緊趕辦以期妥速完竣稍贖前愆設工員等因伊已離巡撫之任稍存玩視於公事有誤即著明興據實參奏倘明興竟以前任巡撫自居於舊日屬員中或因需索不遂藉端苛刻經朕查出必將明興加倍治罪決不稍貸○諭軍機大臣等據長麟奏經過濟南武定青州各府屬望雨甚殷惟登萊二府雨水需足若旬日內再得膏雨不惟麥收飽綻即大田亦可豐收等語該省迤

東各府自可無慮。所慮者迤北數府。係連年被旱之區。前據該撫奏稱。業經設壇祈禱。本日又據奏。若四月間得有透雨。大秋有望。成災尚輕。是各該府待澤孔殷。現在曾否得有甘霖。大田能否播種。朕心實深懸注。著傳諭長麟。即飛飭查明。迅速具奏。至迤北各屬。既屬缺雨。麥收難望。雖屢經降旨。蠲借緩徵。恐糧價仍不免加增。何以所開三月分糧價單內。於濟南、東昌各府屬。尚註價平稍增等字。

實錄卷千二百八

聖

樣。豈該撫因朕盼雨焦勞。不肯據實奏明耶。地方雨水糧價。民瘼所關。詎可稍存隱飾。況東省頻歲歉收。朕軫念綦切。該撫務當詳悉確查。如有因雨水缺少。糧價昂貴者。應作何調劑。俾貧民不至乏食之處。即一面辦理。一面據實奏聞。不可稍存諱飾。至直隸、安肅等二十九州縣。均因雨澤稀少。麥收稍減。昨據劉綦奏。請緩徵。已批交該部准行。此間連日天氣濃陰。所有安肅等處。曾否得被醴膏。劉

綦籍隸山東。於東省雨水情形。自必確有所聞。現在直省望雨較之東省如何。並著該督據實覆奏。以慰廑念。○豁免雲南委員黃韶音。沉失銅六萬九百四十觔。有奇。

實錄卷千二百八

聖

大清高宗法天隆運至誠先覺體元立極敷文奮武孝慈神聖純皇帝實錄卷之一千二百七十八

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百七十九

監修總裁官總纂修官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

敕修

乾隆五十二年丁未四月癸丑

上迴圓明園○諭京城自入春以來雨澤稀少

近日雖屢次得雨不成分寸現屆麥秋之際

大田亦須乘時播種民間情殷望澤朕心甚

切焦勞著該部敬謹設壇虔誠祈禱以期速

霽甘霖○又諭曰刑部覈覆福建省具題李

吳氏砍傷李魏氏幼子李連生身死一案將

李吳氏依故殺律問擬斬候閱其情節吳氏

之夫雖係魏氏之夫總麻服叔尊卑名分猶

存吳氏與魏氏口角爭論又被魏氏用刀劃

傷手心然業經勘散何至相隔數日後復至

魏氏家中吵鬧輒將伊四歲幼孩用力連砍

致斃兇殘已極未便照尋常故殺律辦理使

兇悍之婦久稽顯戮上年刑部具題楊張氏

致死八歲之李么兒一案以其因姦謀殺僅

擬斬候不足蔽辜曾降旨改為立決並諭該

部嗣後遇有謀殺十歲以下幼孩者俱照楊

張氏問擬斬決原欲使兇惡之人共知懲創

童稚亦多所保全但立法固已周詳恐愚民

未能家喻戶曉仍不免無知逞兇自罹重辟

雖國家定律如行刳大盜應問斬梟因姦謀

死親夫者應問凌遲處死此等律案愚賤皆

所稔悉而姦盜之案仍所時有固屬莠民慙

不畏死然教化不能臻於刑措致尚有淫兇

殘忍之案我君臣當引以為愧夫世風日下

作奸犯科者實所難免今既不能道德齊禮

不得不道之以政齊之以刑而不教而誅又

非辟以止辟之道著各直省督撫即將上年

所降辦理楊張氏一案諭旨通行謄黃出示並轉飭各地方官務宜隨時剴切訓誡俾窮鄉僻壤咸知戕死幼孩法在不赦庶免暴有所創懲童稚免於戕害此即明刑弼教之意所有李吳氏一案著該部趕入本年秋審情實辦理並諭中外知之○甲寅

孝端文皇后忌辰遣官祭

昭陵諭軍機大臣等蘭第錫奏挑濬湖渠一摺已如議速行矣微山湖中東北一面地勢

稍仰湖水不能下注自應由昭陽南陽湖接挑長渠一道使湖水得就下之勢直抵韓莊引入運河更為得力但微山湖東北形勢高仰處所或實係山根綿亘或因前年淤淺所致該督當據實奏明妥協辦理不可迴護現在湖內應挑各工與疏濬上游坡河之處二案原係一事著即傳諭明興會同履勘並督率在工各員迅速趕辦勒限五月內一律完竣俾大雨時均得暢流下注多為收蓄以利

漕運將此傳諭蘭第錫並諭明興知之○又諭向來閩省內地民食全賴臺灣稻田豐熟得以源源接濟現在賊匪林爽文等糾眾滋事農民未能及時栽種朕心深為軫念通省民食關係緊要必須豫為籌畫俾糧食充裕市價不致翔踴方為妥善浙省溫處一帶與閩省毗連從前該省商販往往由海道運至閩省接濟現距秋收之期尚遠彼時閩省竟無須鄰省接濟固屬甚善倘民食稍有未敷

即應設法早為調劑俾得有備無患李侍堯統轄閩浙兩省著會同徐嗣曾悉心酌議豫行知照浙省屆期如有必須接濟之處即委員採買務令裒多益寡民食無虞缺乏至閩省因有臺灣之事內地糧價自不免稍昂倘有奸商乘機囤積居奇射利最為可惡著該督等飭屬密訪嚴查一經拏獲即應從重懲辦一二以儆其餘不可稍存姑息戶部議覆四川總督保寧疏稱茂州營屬之十七寨

羌民呈懇改歸茂州民籍報出耕熟地畝估種三十五石六斗有奇按照茂州完糧科則應納正耗銀一十二兩有奇請於乾隆五十二年為始由州徵解該羌民等歸入州籍一體編戶應如所請從之○乙卯諭據劉戡奏天津府屬之慶雲鹽山二縣得雨濡遲大田雖已播種尚未出土民力未免拮据等語慶雲鹽山二縣得雨較少秋禾未能出土際此青黃不接之時若照例開徵小民迫於輸將未免更形竭蹶著加恩將該二縣應徵本年并節年新舊錢糧倉穀一體緩至本年秋成後徵收以紓民力該部即遵諭行○諭軍機大臣曰劉戡奏安肅皇都等七州縣先後稟報於十三四五等日各得雨一二三寸不等已種之秋禾固可藉資潤澤即待耕之地亦趁此土脈潮潤翻犁播種等語前於途次召見劉戡詢以田禾兩水情形據奏各屬大田俱已播種齊全朕蹕路所經田畝原未一律

栽種而劉戡此次覆奏摺內又稱待耕之地亦趁此土脈潮潤翻犁播種是劉戡前次面奏時未經詳查明確或有諱飾豈仰體朕廑念民依之意耶著該督另行飭查大田曾否一律播種齊全並有無續得透雨之處據實覆奏以慰廑念毋得仍前稍有不實致干咎戾○又諭據保泰奏都蘭哈喇地方不可挖鉛請即禁止等語此等處所與扎哈沁部落相近倘聚集多人挖鉛均係無藉貧民不免滋生事端理宜嚴禁但不可有名無實聽其私行偷挖保泰等務須嚴行禁止仍不時出派官兵搜查倘有擅自偷挖者一經發覺從重辦理以示懲儆切不可因循塞責將此併諭永鐸知之○又諭據藍端多爾濟等奏出派圖薩拉克齊二員稽查喀爾喀卡座等語庫倫卡座皆係喀爾喀駐守若僅派喀爾喀台吉稽查則不免於瞻徇理宜兼派彼處章京協同稽查始可憑信著嗣後稽查卡座時

即派章京二員會同前往倘章京不敷差委奏聞另行添派現當嚴禁通商緊要之際著傳諭蘊端多爾濟等即遵旨辦理○丙辰諭總管內務府大臣等昨徵瑞逞進節貢內雕漆鑲嵌花卉壁屏二對屏上皆嵌真珠此等壁屏不過豫備令節陳設之用何必過事奢華徵瑞自任兩淮鹽政後查辦硝磺一案並不親身前往江寧惟恐與鹽務干涉意存迴護今呈進貢品又將真珠飾此無用之物取巧見長看來竟是坐享豐腴心思督亂除將壁屏擲還外仍傳旨嚴行申飭○丁巳內閣翰林院帶領甲辰科及辛丑科補行散館修撰編修庶吉士引見得旨此次翰林散館之修撰錢榮茹茶編修汪學金邵玉清業經授職其清書二甲之庶吉士吳芳培崔景儀吳廷選周兆基漢書二甲之庶吉士陳萬全曹振鏞王錫奎程嘉謨文寧李驥元蔣攸銛溫汝适謝振定俱著授為編修三甲之庶吉士

張翱倪思淳蔡共武朱依吳鄧再馨劉斯俱著授為檢討潘奕藻賀賢智劉若琛楊志信俱著以部屬用○閩浙總督李侍堯奏臺灣遠隔重洋運送兵丁糧餉等項俱雇民船應用查部頒軍需則例但有內河運腳並無海運明文其水運條例內開運糧水腳順水每石每站三分六釐逆水每石每站七分等語海運只趁順風應即照內河順水之例給價守候回空俱不另支口糧至送兵解餉及官員奉差往來則就船之大小可載若干石數計算以歸畫一又鳳山再失之後賊匪益肆滋擾府城現添雇鄉勇萬餘人又彰化縣屬僅存鹿仔港一處尚在固守各村老幼男婦來避匿者不下萬餘人無處得食經該道府等請撥銀十萬兩米十萬石接濟賑卹臣以鄉勇本義民所雇固屬急公向義實亦自衛身家避難民婦應於勦匪事竣量為安插撫卹是以概行議駁諭軍機大臣等現在賊匪

勢尚猖獗。竟敢攻犯府城。常青親率官兵鄉勇臨陣。多有斬獲。此時粵東兵丁陸續到彼。常青得此。自可鼓其精銳。迅速進攻。李侍堯在廈門一帶籌辦照料。當以催兵速渡。接運軍儲糧餉。濟用為要。餘可徐論。乃李侍堯摺內。總總慮及多用錢糧。恐事竣後難於報銷。止將常青咨取銀十萬兩解往。而該道府等之另請銀十萬兩。米十萬石。概行議駁。仍飭將用過款項。一一報查。所見甚屬錯謬。所有

該道府請發銀十萬兩。米十萬石。即著李侍堯速行照數運往。以備接濟。並著常青就近先行酌量。如有多餘兵糈。或米或穀。散給貧民。務使不致逃散。方為妥協。不然。非去而從賊。即窮極搶奪。皆足債事。況鄉勇義民。既為國家禦賊。兼可衛其資產。是以為我出力。今既日久賠墊。既有陣傷亡故。又不能保其所。有。亦必逃散。從賊。兵丁弁備。尚難望其枵腹從事。而況此眾民乎。封疆大吏。遇此要務。惟

應以速行勦賊。不誤軍行為念。何必慮及賠累。此輩無知百姓。轉令其竭貲自効。始終忠義。自守斷不能也。李侍堯平日心思。尚為周到。不應不識大體。若此。前據常青奏稱賊匪將所掠錢米。廣為散給。要結人心。以致日積日眾。豈閱時未久。該督遽致忘懷耶。著傳旨嚴行申飭。再前經降旨。因浙省兵力脆弱。停調兵一千名。又添調閩省駐防兵一千名。以足原調四千名之數。今兵丁如已撤回。即令

各歸營伍。倘已行入閩境。即令其前赴廈門。交與李侍堯酌量調撥。多多益善。即留於內地巡防。亦無不可。惟在該督等相度事機。辦理總期不誤公事。為要。更不必拘泥迴護。致令歧誤。周章轉使屬員得以藉口也。○大學士公阿桂等奏。向例殿試讀卷官八員。閱卷時各以己見品評優劣。用夾片分作八行。各標識於姓下。在進呈及前列卷。標識多佳。難以移動。其餘諸卷。層次記認。分別無多。恐粘

貼時不無錯誤。甲第前後頗有關係。臣等公同酌議於卷後彌封之外。列讀卷八人之姓。就卷標識不用浮簽。庶免移換之弊。得旨允行。戊午。

上詣黑龍潭祈雨。策試天下貢士。顧鈺等二百三十七人於太和殿前。制曰朕撫馭九寓。膺祚久長。於今五十有二年。仰荷

昊蒼眷佑。幸而精神純固。車書乂安。五世一堂。胥宙合臻於蕃祉。老壽如前。代紀政無一葉

茅庶底小康。見於向之古稀說矣。然而宵旰益懋。惟日孜孜。罔敢自暇逸。思欲鑒古觀文。與民遊大道而裕所天。教養大備。式躋郅隆。茲多士觀光沐浴誦習之已久。庶幾敷贊其敬。聽予詢史。非徒紀事。所以監先式後等百世。以為因革損益者也。則表志尚矣。顧曰書曰志曰考。或有或無。或取他家以益之。或越數代以補之。或統及古今。或併詳五朝。徵其體例。能較然與。且或作通史。而全書以志名。

能著其凡與地理之山川。物產古蹟。經籍之類。例撰人何者。為當符瑞釋老。不已細與。傳之隱逸。止足。獨行。孝義。更易其名。儒林道學。文苑紛歧。其品可類。指與贊論。評母乃贅與。論史家體例者。劉知幾。鄭樵。能述晰與。本大公至正之心。慎守器勿失之戒。聞紀載失實之誣。屢經論斷。宜遜聞而心識之。其抒所見焉。夫虞書標言志之文。宣聖示辭達之旨。經典所垂。具有明訓。迨後世體裁遞變。門徑各殊。論詩論文。遂多乖正。旨劉勰文心雕龍。雖局於齊梁之儷偶。然其書首以原道。次以徵聖。次以宗經。次以正緯。所見實在諸家上。能約舉其說歟。杜詩韓筆。為後來作者冠冕。其論詩論文之宗旨。具見本集。能舉其得失歟。昭明文選。多取華藻。真德秀文章正宗。深矯其弊。然蕭之末流。至於綺靡。真之末流。亦或傷樸儻。欲酌文質之中。其何道之從歟。且詩文之體。雖殊。其為載道。則一也。宰之以理運。

之以氣亦既文成數萬矣所期以化成天下而共泳聖涯同遊藝府能知所致力歟古人有言積貯者生民之大命周禮之廩人遂人屋粟勸粟後人師其遺意而耿壽昌長孫平朱子皆有規制及夫上熟中熟下熟之歛和糴俵糴兌糴之名言積貯者靡弗能詳固不必泥古而覲縷也朕截漕平糴所以為閭閻計朝夕之供者數十年時舉亦無一日或間然欲求實貯則墨吏之虧缺宜繩欲孚惠心

則猾胥之蠶蠹宜察欲平市價則駟儉之囤積宜懲而且穀數民數歲報可稽酌盈劑虛詐易言給足歟採買則慮價昂散給則虞中飽籌後日之饑節目前之食朝三暮四寧善術歟作民父母仰我乳哺即一餐飧計而為君之難如此諸生服疇食德亦有一二區畫可採裨乎昔先王設奇衷之禁嚴左道之誅立法恭詳誠以邪說誣民易於熒惑非豫遏其萌恐為世道人心之患也我國家化澤涵

濡士大夫讀書明理自不為異論所移至鄉里愚氓或誘於罪福之說姦黠匪徒或借為箕斂之術自扞法網者間亦有之如概從禁絕則祈報蜡社皆將為胥吏需索之端若慮其滋擾不為區畫又恐日累月積久且草蔓今將為杜漸防微清源正本使人人知禮義之維而謾妄之言不能盡其視聽其何道之從焉朕撫臨悠久無時不以稽古明理期天下之士無時不以正德厚生籌天下之民多

士以讀書起家宜明古今著述之源流又新自田間來宜悉土俗民生之利弊其以夙所抱者臚於簡末毋浮毋隱朕親覽遶焉○以大學士公阿桂大學士嵇璜內閣學士阿肅胡高望吏部尚書劉墉禮部尚書紀昀兵部尚書彭元瑞左都御史李紱為殿試讀卷官○已未諭朕此次駐蹕熱河巡幸木蘭著怡親王質郡王大學士阿桂嵇璜留京辦事所有吏兵二部應行引見官員文職知縣以上

武職守備以上於未啟鑒進木蘭之前著該部每月派堂官一員輪流帶赴熱河引見其文員內佐雜等官武員內八旗護軍校驍騎校及外省送到之補放水手驍騎校並年滿千總等官弁仍著王大臣照例驗放至八月以後月選等官亦照向例辦理其各省督撫提鎮等奏摺著齋摺人前赴行在投遞進哨後著兵部派員駐劄哨門接遞各省奏摺封送行在候朕批示發回仍於哨門交付齋摺

人祇領該部即通諭知之○又諭曰長麟奏濟南府屬之濟陽陵縣臨邑淄川德州德平武定府屬之商河惠民樂陵青城蒲臺海豐陽信青州府屬之博山泰安府屬之泰安肥城新泰等十七州縣從前或與災地毗連或因被旱歉收俱有歷年未完之項現在雨澤未霑麥秋無望請將該州縣等舊欠錢糧緩至秋後徵收等語濟南等屬上年既被旱歉收本年又雨澤愆期若將新舊錢糧一併徵

收民情未免竭蹶所有濟陽陵縣臨邑淄川德州德平商河惠民樂陵青城蒲臺海豐陽信博山泰安肥城新泰等十七州縣及坐落衛地除本年應徵錢糧照例徵收外其節年積欠未完正耗錢糧及緩徵帶徵籽種口糧米穀等項著加恩自本年秋後為始分作二年帶徵以紓民力該部即遵諭行○諭軍機大臣等昨因京師市集麥價昂貴今金簡前往通州查各鋪戶有無堆積居奇茲據金簡

覆奏親赴各鋪戶逐細查勘尚無此等情弊惟該鋪戶等供稱探聽德州一帶現有河南山東各商運來麥二十餘萬石因河水稍淺不無阻滯東省糧船又須起撥若將麥船一并封雇則到通益遲等語現在京城麥價較昂急需各處商販運到接濟若德州一帶因糧米起撥將商民船隻一併封雇於民食大有關係直隸天津一帶現有官造撥船一千三百隻以備將來撥運南糧之用此時南糧

抵直尚早此項撥船正當閒空之時自應令其前赴德州一帶起撥糧米既可省封雇之煩而商販更無阻礙自屬一舉兩得著傳諭梁肯堂於何時接到此旨一面派員將備用撥船調撥數百隻押送德州一面即先行馳赴德州交界處所督同該地方官陸續撥運藩司即在該處往來稽察上緊督催俾漕糧迅速轉運至河南山東各商運販麥石既無封雇之虞自可過行無阻並著該藩司曉諭

各商販令其迅速前進源源而來以濟民食至豫省應運京麥共有一萬八百餘石除現在搭運到通九百餘石外其餘麥石須至五月中旬抵通未免尚須時日現在通州收漕等事有蘇凌阿在彼足資料理著劉秉恬即親身迎赴前途會同梁肯堂辦理撥運並迎催此項麥石令其迅速運通早到一日即可得一日之益再東省糧米起撥可雇船隻諒復不少何以將麥船一併封雇顯係胥役人

等藉端勒索以致商販裹足不前著劉秉恬梁肯堂詳悉飭查如有此等情弊即行據實嚴叅究辦以示懲儆將此由四百里傳諭劉秉恬梁肯堂並諭劉裁長麟知之○豁除直隸萬全縣乾隆五十一年被水衝塌地一百三十七畝額賦旌表守正捐軀山東荷澤縣民段二妻朱氏○庚申諭本日大挑舉人引見時適值陰雨衣服未免濡濕著加恩各賞紗二疋以示體卹寒峻至意○兩廣總督

黃承玄書

天

孫士毅疏報廣東陽江縣雙恩場墾築生鹽漏三十八口○辛酉

上還宮 御乾清宮召讀卷官入親閱定進呈十卷甲第○壬戌

上御太和殿傳臚賜一甲史致光孫星衍董教增三人進士及第二甲朱理等四十五人進士出身三甲焦以厚等八十九人同進士出身 幸圓明園 癸亥緩徵直隸安肅望都肅寧宣化萬全懷安西寧良鄉涿州順義景

州阜城交河獻縣故城寧津冀州棗強永年廣平磁州清河大名元城開州東明長垣清豐南樂等二十九州縣連年旱災新舊額賦以浙江紹興協副將哈攀鳳為甘肅河州鎮總兵甲子

上御演武廳閱火器營操諭據常青奏報臺灣南路賊匪侵擾府城屢經親率官兵出城迎捕堵殺將弁用命義民爭先奮勇協剿接仗數次共鎗礮打死賊匪二千餘人生擒正

法者五十餘名割獻首級奪獲器械甚多並有賊目帶領手下二千餘人棄械投順隨同殺賊現在南路賊匪經此番截殺勢漸稍退一俟添調官兵到日即統率大兵前往諸羅等處各賊巢合兵會剿務期生擒首逆殲盡根株等語此次賊匪有侵犯府城之信常青豫先設法防堵於桶盤棧等衝要地方派令遊擊蔡攀龍等各帶兵分劄營盤相機堵剿籌畫調度俱合機宜逮賊匪分路攻犯府城

常青親率官兵鄉勇迎捕截殺斬獲甚多賊匪敗退常青年逾七旬尚能如此勇往督戰朕心深為嘉獎伊係年老之人宣力海疆無親子在旁侍奉殊堪繫念著將伊子刑部筆帖式喜明賞給三等侍衛馳驛前往臺灣省親並將賞給常青之御用玉搬指一個大荷包一對小荷包二對並節物庫紗二匹葛紗二匹香珠一匣香牌一匣香袋一匣宮扇十柄即著伊子帶往以示優眷常青感激朕恩益思奮勇迅能剿除賊匪永靖海疆朕必格外加恩也至遊擊蔡攀龍前據孫士毅奏稱聞伊帶兵打仗頗為賊匪所畏之語今據常青奏稱該遊擊於上年賊匪攻圍郡城時即督率弁兵奮勇截殺保護無虞追赴南路進剿嗣又調回郡城防守屢經打仗無不身先士卒奮勇直前且能審度機宜弁兵用命義民悅服是以屢次均獲勝仗殲賊甚多等語該遊擊甚屬奮勇出力為賊匪所畏宜加恩

擢蔡攀龍著照常青所請。即起補臺灣北路協副將。仍賞戴花翎。若再能感激奮勇打仗。遇有總兵缺出。常青即奏請陞補。以示獎勵。其陣亡遊擊邱維揚。把總余壽王澤高及陣亡受傷各兵丁。均查明照陣亡例賞卹。至鄉勇義民。隨同官兵晝夜防範。為國家禦賊。實屬可嘉。其殺賊立功者。應遵照前旨。拔補千把總。實缺。其陣亡受傷者。均著照兵丁之例。加倍卹賞。以示鼓勵。此事總由黃仕簡任承

實錄卷三十三

五

恩二人。一南一北。互相觀望。以致各鎮將效尤。玩誤久稽歲事。幸而朕及早料及。豫令常青前往臺灣督辦。得以及時整頓。並將失陷城池。私自回至郡城之總兵郝壯猷。正法。如此賞罰嚴明。自必壁壘一新。士氣振奮。所有添調各處官兵。日內諒已陸續到齊。軍威壯盛。常青廓清後路。賊匪即統率大兵。赴北路。諸羅等處。合兵會剿。直擣賊巢。生擒首夥。各犯料此。么膺草竊。無難一鼓殲擒。膚功迅奏。

將此通諭中外知之。○諭軍機大臣等。據常青奏。賊目莊錫舍悔罪投誠。帶領所屬二千餘人。隨同官兵殺退賊匪。並飛往竹滬等處。截殺莊大田等。招集泉州義民。立功贖罪。自係真心投順。著常青即賞守備職銜。其屬下人等有奮勇出力者。並酌量分別給予千把總外委職銜。以示鼓勵。而廣招徠。匪徒甘心從逆。原不過希圖偽職。今見伊夥黨投順者。即有頂戴之榮。自必聞風嚮慕。悔罪輸誠。即

實錄卷三十三

五

籍隸漳州者。亦未必始終附賊。似亦臨事行權。解散賊黨之一法。並著常青明白曉諭。莊錫舍等。果能奮勉出力。將賊首林爽文及有名賊目擒獻。必大加恩。擢優賞。較大職銜。如此剴切諭知。伊等自必鼓舞踴躍。或能擒獻首惡。亦未可定。再前據李侍堯奏。續調粵兵四千名。全由廈門配渡。前赴府城。恒瑞奏。駐防滿兵均已分起配渡。起程。想必指日可到。常青即可親自率領。將南路賊匪掃除。即統

率大兵往北路會剿。直擣賊巢。務將賊首林爽文生擒解京審辦。餘黨殲除淨盡。至柴大紀駐劄諸羅。屢有勝仗。戰守得宜。前已有旨。令伊署理陸路提督。如果始終奮勉。俟剿賊事竣。常青查明據實奏到。朕必加恩擢用。其餘有功出力人員。均著常青查明註冊。俟事定後。分別獎擢。再常青自三月二十一日發摺後。直至四月初三日。始將堵殺賊匪情形具奏。朕盼望信息。宵旰焦勞。無時或釋。嗣後常青當仰體朕懷。於督兵攻剿時。務將該處情形。於十日之期。隨時奏報。以慰廑注。○又諭曰。莊錫舍悔罪投誠。常青恐其挾詐誑騙。入城。或有內應情事。先令殺賊。自効。方准投降。所辦持重。甚合機宜。已降旨賞給莊錫舍守備職銜。其餘賊目酌量賞給千把總外委職銜。令其隨營効用。並著常青曉諭賊衆。如能誠心投順。擒獻賊匪頭目者。即照莊錫舍之例。分別擢用。但細思臺灣民情剽悍。反側

不常。此時進剿之際。兵不厭詐。固宜示以優異。設法招徠。將來事定後。如莊錫舍究不可留於該處。又致故智復萌。別滋事端。著常青李侍堯俟辦理善後事宜。酌量將莊錫舍等投誠賞職之人。酌調內地別省各營備弁。其帶降人亦令陸續渡回內地。分別他省安插。為是。但此時且勿稍露端倪。致賊黨聞之轉足堅其負固死守之心。○豁除甘肅靖遠縣糜子灘乾隆五十年被水衝塌地二十二頃。二十二畝。有奇額賦。乙丑諭據尚安奏。土爾扈特汗策凌納木扎勒率伊所屬貝子公台吉等。往尚安處叩謝朕恩。復與尚安叩拜。公拜濟瑚等。長跪告稱。策凌納木扎勒已有子嗣。請將土爾扈特汗印信。盟長印信。交伊掌管。嗣策凌納木扎勒之母帶伊屬下人等。亦來尚安處稟稱。伊所監守土爾扈特汗印信。盟長印信。可否交與策凌納木扎勒管守。均已准令交付等語。此事尚安所辦尚好。但

策凌納木扎勒係土爾扈特汗不當與尚安叩拜如伊為領取印信及欲為恭坦休妻等私事跪求尚可若為公事或尋常來見則不可令其跪拜蓋伊等已封汗王等爵即係朕臣僕若來見時俱令跪拜則於品級無所區別著交理藩院將此通行內外扎薩克西北二路嗣後公爵以上謁見欽差大臣不得因公事行跪拜禮著為令○署河東河道總督蘭第錫等覆奏會勘河道情形查微山一湖

實錄卷五十九

五

上承曹單鄆鉅等州縣坡水宣濟八閘及江境邳宿一帶運道邇年雨少坡水下注無多湖流淺弱各河渠亟應疏治至南旺湖各斗門引渠遇汶河水漲藉資分洩今於該河圈隄之西將芒生廢閘改為雙涵洞其上下引渠一併挑濬則湖中無用之水可以引入牛頭河彙眾流而下達於湖是以汶水之有餘濟河流之不足以上各條除南旺引渠及涵洞工程先經臣蘭第錫奏明即於搶修項下

辦理各州縣民修各工如曹縣之白花夏月順城等河單縣之樂成灤嘉八里等河城武之新衝桶子冉家等河鉅野之豬水河嘉祥之蔡河牛頭河濟寧之牛頭顧兒等河及汶上之宋家窪引渠間段受淤或有過窄之處亦已蒙恩先行動項興修惟趙王一河由曹縣紙房集至荷澤雙河口分為二支一北流會沙河之水至張秋一東流至鉅野鄆城又名濟河歷汶上嘉祥入牛頭河歸舊運河而

實錄卷五十九

五

下達於南陽等湖長三百餘里河寬三四十丈曹河以下坡水由此灌輸極為得力惟河身久淤工費不貲是以從前未經估辦今當下源微弱正應設法疏通以暢來勢茲擬於河身內抽挑子溝一道其挑出之土即堆兩崖以資攔束如遇坡水旺盛仍可普暢下流再於雙河口迤北一支築柴土壩一道高以六尺為度庶水小時過之東注水大時仍漫壩北流以為宣洩異漲之地至河身內有因

兜灣過大及沙阜壅高即酌於附近處所取直開通以節糜費其原挑河內有與直隸東明長垣交錯之地現准直隸督臣劉戡派委永定河道陳琮到工會同商勘即交該地方官一體趲辦再太行隄南洶北河一道係封邱長垣等洩水之路臣畢沅沿路查看間段淤墊即委糧鹽道張朝綰照東省河渠酌為疏濬得旨允行下部知之○丙寅諭軍機大臣等臺灣向來一歲三熟是以產米甚饒足

實錄卷二百一十九

五

敷內地民食今林爽文滋事不法民皆失業農耒歸耕以致米無所出常青於所過地方務須督令該道府等妥為安輯詳悉曉諭該處百姓於收復處所即令其先行儘力補種仍可收即不能接濟內地於本處民食亦屬有益再李侍堯稱漳浦平和一帶有械鬪滋事之案札知藍元枚暫留漳浦辦理藍元枚前已授為叅贊令其前赴鹿仔港督兵會剿該處現在只有普吉保一人在彼且正近

賊巢最關緊要其漳浦匪徒現在如已辦竣固屬甚善倘尚須時日即著李侍堯前赴漳浦督辦自無難迅就弋獲此時當以勦捕臺灣賊匪為重藍元枚自當迅速赴鹿仔港無庸在漳浦留滯也○予守城被害臺灣府知府孫景燧彰化縣知縣俞峻鹿港巡檢馮啟宗祭葬贈卹如例○旌表守正被戕江西樂平縣民程應誥妻羅氏○是月暫署四川總督成都將軍鄂輝奏川省自平定兩金川分

實錄卷二百一十九

五

設五屯歸松茂道管轄已逾十年應請將兼理新疆屯政字樣增入松茂道勅書關防得旨是下部知之○安徽巡撫書麟覆奏保舉道府人員並謝訓示恩得旨識人用人之道最難豈可一言以盡之但存心誠明勉之而已○河南巡撫畢沅奏報通省得雨霑足並新挖引河暢流情形得旨覽奏欣慰之至惟益加敬畏不敢滿盈同此志可也○又覆奏豫省連年麥收豐稔所有酌買運京麥五萬

石從容易辦又前歲歸德一帶截漕賑濟應採買補運京倉請一體買麥抵米俟今冬糧船起運時附搭運通得旨甚好速行妥辦

實錄卷之百十九

堯

大清高宗法天隆運至誠先覺體元立極敷文奮武孝慈神聖純皇帝實錄卷之一千二百七十九

大清高宗法天隆運至誠先覺體元立極敷文奮武孝慈神聖純皇帝實錄卷之一千二百八十

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官總纂官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛總纂官太子少保工部尚書紀錄六次臣曹振鏞等奉
敕修

乾隆五十二年丁未五月丁卯朔諭前因豫省上年麥收豐稔今春復雨水調勻麥價平減曾經諭令畢沅採買運京以資民食業據該撫奏明買運京麥五萬石並將前歲該省截留漕米買麥抵補亦即運送京倉昨金簡由通州回京覆奏詢據各鋪戶等聞德州一帶現有河南山東各商販運麥二十餘萬石因東省糧船正在起撥若將麥船一併封雇恐抵通稍遲當即令劉秉恬梁肯堂前赴德州一帶催查俾前項麥石得以通行無阻茲

據長麟奏稱該省東昌等處亦有麥船三百餘隻等語此項麥船著蘭第錫飭令管閘各官不必俟南漕到閘即令各商麥船一齊過閘并派委員弁上緊催趲前進抵德州時仍著劉秉恬梁肯堂一體催令迅速抵通俾麥石源源接濟以期民食益臻充裕市價大加平減仰副朕恤民便商之至意○又諭據復興奏貢楚克扎布目疾甚重等語烏里雅蘇臺叅贊大臣職任緊要貢楚克扎布目疾既不能速愈著解任回伊游牧處調養所遺叅贊大臣員缺著三丕勒多爾濟補授並管理驛站事務諭軍機大臣等據長麟奏四月二十七八等日東昌府得雨深透是日雲氣彌漫得雨之處必普俟查明分寸另行具奏等語本年東省雨澤愆期麥收歉薄而東昌府屬亢旱尤甚今幸得此甘霖普遍趕種大田秋成可望該撫惟當益加敬畏於應為之事小心妥辦以冀少紓民困仰答

天庥不可稍存滿足怠玩之意至該省奏請緩徵之十七州縣前已加恩降旨允准該撫接奉諭旨後即應轉飭各屬遍行曉諭俾閭閻早免追呼共霑愷澤何必等候部文始行繕刻謄黃豈所奉諭旨尚不可信耶所辦殊屬拘泥著傳諭長麟即遵照前旨分別緩徵出示曉諭務使小民均霑實惠以副朕勤求民瘼至意其各屬應行酌借口糧之處既據該撫奏稱近日雖經得雨但去秋獲之期尚遠恐不無乏食之虞著長麟督率所屬確切查明一面奏聞一面妥協辦理以資接濟○戊辰上御勤政殿聽政諭朕恭閱世宗憲皇帝實錄內載直隸州縣太監之父兄弟姪在地方不無生事令該州縣詳報總督具題並交內務府約束懲治又內務府大糧莊頭並諸王大臣莊頭等滋事梗法之處分別嚴懲二條煌煌

聖訓實萬世所當遵守我朝

家法相承太監祇備內廷灑掃供役不令干與政事從無似前代內監假竊威福任意妄行之批政即內務府莊頭及王公大臣屬下莊頭人等均知畏法設有不肖者亦皆有犯必懲實與編氓無異經我

皇考復加整飭官府肅然朕御極以來守而勿替方今綱紀修明各內監等皆敬謹守法其父兄弟姪自不致藉端滋事而總管內務府

大臣及諸王公等身荷重恩於伊等屬下亦必嚴行管束不致倚勢招搖是目今實無此等事但奉行既久或恐視為泛常積久生玩防範稍疎於政體甚有關係著交直隸總督嚴飭各州縣實力查察倘有太監家屬及莊頭等在外生事輕則隨時懲治重則奏辦理不得因現在尚無此等弊端稍存玩忽以副朕祇承

前訓杜漸防微之至意此後著直隸總督十年

一奏永為例定世襲武職大員先在侍衛

上行走之例諭本日兵部帶領武職人員引見內承襲伯爵之趙曰泌一員係趙良棟五世孫現在陝甘督標學習期滿此項世職人員向來學習年滿後例應發往該省或留部皆當以副將補用副將係武職大員且可護理總兵設遇徵調即有專帶弁兵之責今趙曰泌尚屬年輕未曾諳練若遽以副將補用於地方營伍不能整飭倘致貽誤轉非所以

保全其祖父立功之意伊等爵秩較大又不便改補微末將弁嗣後此項承襲公侯伯子男世職人員於學習年滿帶領引見後應令在侍衛上行走俟三年後領侍衛內大臣看其才具如果能勝武職大員出具考語咨送兵部帶領引見再以副將等官補用如才具中平難期勝任仍令在侍衛上行走若能始終勤慎無過即以散秩大臣補用亦無不可所有本日引見之趙曰泌一員即照此例行

實授蘭第錫為河東河道總督○已巳

孝誠仁皇后忌辰遣官祭

景陵 諭軍機大臣等賊匪攻擾鳳山時尚存兵二千餘名據常青奏潰回者計七百餘名其餘一千三百餘名作何下落兵丁臨陣脫逃皆應按律正法但念人數眾多驟予駢誅在朕心究有不忍此項兵丁若祇逃亡潰散將來只須查明為首者數人正法其餘尚可免死分別發遣若去而從賊甚至隨同抗拒官兵則竟不可一名寬貸矣賊黨與官兵抗拒其罪尚在不赦況身隸行伍既經臨陣潰逃復敢從賊肆逞此而不嚴行辦理何以昭憲典而肅戎行著常青俟事竣後嚴查遵辦不可稍存姑息御史祝德麟奏都察院額設各道行走筆帖式應辦繕譯事件每月惟註銷一本每歲惟勾到一本該員等皆雇人代寫並不進署詳慎覈對及至京察之年例由該道御史考察率以通衙門風氣如此礙

難舉劾出具中平考語似非三載考績之方請勅交都察院堂官查辦將所有之筆帖式盡數考驗如其材堪造就或派令兼廳行走或挑取別項差使果其勤奮不懈酌予鼓勵其才具中平者仍令在道行走繁道二人簡道一人交該道御史留心察看於京察之年據實舉劾得旨是著交都察院堂官明白回奏據實辦理○庚午

上詣

大高殿行禮 還宮○諭據穆騰額奏東省近來雨澤愆期海水不能上潮產鹽缺少請將本年及上年應完課銀並節年帶徵課項一體分限緩徵等語前歲東省雨澤愆期本年春夏雨水又復稀少以致各灘場產鹽日少行銷停滯若同時並徵商力不無拮据所有應徵本年課銀及五十一年正接引課帶徵五十年初限正接引課票價餘票課銀共四十二萬八百餘兩著加恩准其緩至五十三

年秋後起徵分限四年帶完以紓商力該部即遵諭行諭軍機大臣等據劉秉恬奏德州一帶運河於四月二十日陡長水三四尺糧艘商船足資浮送將直隸調往德州撥船四百隻俱行截回劉秉恬仍赴德州與梁肯堂體察該處情形如該處需設撥船請將上年江西湖廣新造撥船三百隻於經過德州時即交山東巡撫照直隸之例安設俟每年糧運到時於德州安陵一帶起撥等語東省

德州一帶現因上游得雨水勢充裕糧艘商船俱暢行無阻所有前項直隸撥船四百隻自應停止前往以省繁費至江西湖廣新造官撥船不日即應經過德州著照劉秉恬所請安設德州以備每年糧艘出閘後德州以南臨清以北一帶間有水淺處所即用此項官船起撥但此事長麟未經辦過著劉戡即照天津辦定章程詳細咨會長麟令其遵照妥辦以省封雇之擾將此傳諭劉戡長麟並

諭劉秉恬梁肯堂知之授一甲一名進士史致光為翰林院修撰一甲二名孫星衍一甲三名董教增為翰林院編修是日起上以夏至祭

地於

方澤齋戒三日辛未諭軍機大臣等據長麟奏各屬續報得雨情形一摺內稱濟南等府州屬之歷城等八十四州縣陸續具報二十三四日及二十七八等日俱經得有雨澤等

語閱單內所開歷城等縣得雨四五寸者自屬有濟即三寸亦可畧為接潤而長山臨邑等處得雨僅此一二寸恐該處望澤甚殷得此微雨一經日曬旋即乾燥於田禾仍無裨益著傳諭長麟再行查明長山臨邑等處曾否續得雨澤如尚未能霑足有應行設法調劑者即一面奏聞一面辦理毋得稍存諱飾致有失所今歲豫省雨澤普霑麥收大熟山東近在鄰省商賈販運甚便且彼此可得交

易之利長麟自當早為籌及招集商販俾東省均獲接濟之益何以長麟並未奏及耶將此傳諭知之。內閣翰林院帶領新進士引見得旨新科進士一甲三名史致光孫星衍董教增業經授職朱理王觀李如筠秦恩復馬履泰何道冲范逢恩龍廷槐謝恭銘李傳熊任銜蕙何泌柳邁祖胡鈺王祖武陳士雅汪彥博初喬齡吳烜顧鈺潘紹經杜南棠陳若霖張溥翁樹培瑚圖禮尹英圖周維壇趙繼昌俱著改為翰林院庶吉士湯藩彭希洛馬書欣方建鐘邱垚談祖綬周維祺吳煦郭均邱先德何道生李承端陸元鎔雷維霈周廷森潘鷺焦以厚施履亨周鶚高樂生劉廣恕包愷薛淇毛登瀛錢豫章章守勲王國元沈叔埏徐森王肇成任澍南賈揆馬維馭張祥雲茅豫鄭文明瑚圖靈阿楊維翹楊彥青漆鑾際良楊夢符任尚蕙馬潛蛟宋鳴琦胡永煥俱著分部學習。吳于宣康綸鈞唐仁埴

龔鶴鳴葉中鯉蔡振中劉德懋俱著以知縣即用餘著歸班銓選。欽差刑部侍郎明興奏奉旨會勘挑濬湖渠各事宜先經蘭第錫等勘明具奏現已飛飭工員趕辦再查有運河東岸之泗河係從泗水縣陪尾山發源彙合諸泉至兗州府城東分為二支一南行由金口壩出魯橋濟運一西行由黑風口經郛城而南出濟寧之楊家開濟運名曰府河臣由南旺至南陽留心履勘因連年水弱泗河由魯橋出水尚順其府河一支久未挑濬間有淤墊現在西岸坡河通行挑挖東岸汶源各泉亦一律疏濬此河為泗水分支自應一體挑辦現交該地方官按境分段上緊承挑得旨好一切實力為之正汝補過之處也。○壬申諭曰步軍統領衙門奏京城內外米價昂貴屢經曉諭各鋪戶減價售賣並出示禁止囤積現在豫省採買麥石運京並各商販源源而來米麥不至缺乏詎該商等惟利是

圖糧價仍未平減現於各糧鋪內查出囤積米共五萬九千三百五十四石麥共七千六十八石零於京城內外分設官廠減價糶賣等語所辦甚是商人有心壟斷高擡糧價任意居奇查出後即將米麥入官按律治罪亦所應得但念該商等究係出資販運謀利若遽行入官未免虧折資本轉非朕一視同仁之意所有此項米麥著照所請令該衙門派委妥員會同五城順天府官員酌減價值糶賣所賣錢文仍給付該商等收領此係格外加恩從輕辦理現在京城已得透雨且豫東二省採買額運麥石並各商販源源而來若鋪戶等復敢仍前囤積擡價居奇一經查出不特將所囤米麥入官並將該商等從重究處以示懲儆其附近京城之天津府河西務通州楊村及各城市鎮集處所並著順天府及直隸總督派委明幹妥員仿照步軍統領衙門一體認真查辦詳細出示曉諭通禁仍

將各鋪戶囤積數目及如何減價平糶之處先行據實具奏○癸酉夏至祭

地於

方澤

上親詣行禮 幸圓明園○以湖南辰州協副

將馬定為湖北宜昌鎮總兵 甲戌

上以秋獮木蘭自圓明園啟鑾○諭朕此次巡

幸木蘭駐蹕熱河所有經過地方著加恩蠲

免本年地丁錢糧十分之三 諭軍機大臣

曰常青奏酌籌勦賊先後事宜所見俱合機要賊黨雖有萬餘不過么虜烏合一俟擒獲賊首林爽文餘黨自必紛紛潰散勢如摧枯拉朽無難撲滅淨盡蓋聚易者散亦易原不虞其多也此時粵兵計已全抵臺灣駐防滿兵及浙兵亦即陸續到彼軍威壯盛常青即可親自總統廓清南路賊匪乘勝直搗賊巢生擒送首林爽文迅奏膚功至崇大紀於賊衆攻搶諸羅時復能督率官兵民番協力殺

死賊匪數百。生擒匪犯蔡瑞等十一名。正法。尚知感激奮勉。勇往出力。前經降旨。令其暫署陸路提督。以資策勵。續經降旨。將陸路提督一缺。諭令常青。會同李侍堯。於帶兵打仗。總兵內。擇其最為出力者。保奏一人。候朕簡放。著該將軍。仍遵前旨。於柴大紀。普吉保。二人。孰為奮勉出力。據實會同。東公保奏一人。候朕另行降旨。補授。再莊錫舍殺賊立功。以圖自効。固屬誠心。而所屬二十餘人。其中豈皆可信。此等新降之人。究不免心生疑貳。見官兵勢盛。連得勝仗。自必懾伏威棱。始終出力。設我兵稍不順。遂即恐心懷疑貳。常青於領兵攻勦時。不可心存大意。務須慎之又慎。揀選勇往得力。素為賊所畏憚。將備伴押莊錫舍同行。以防萬一不虞。即可先發以制。有備無患。仍勿稍露端倪。致滋疑畏。至莊大田。現為賊目。糾約萬餘人。肆出滋擾。最為不法。該犯與林爽文同謀。互為聲援。且藉隸漳州。

自不肯遽行投順。但莊大田將來或見林爽文勢日窮蹙。官兵聲勢愈盛。而莊錫舍投誠後。復邀官職之榮。欲效莊錫舍所為。率眾投誠。亦事理所有。此等奸狡兇徒。心懷叵測。總不可信。如果伊等棄械投出。若拒而不納。堅其負固死守之心。既非權宜應變之道。若輕信受降。聽其隨營自効。則伊等黨羽眾多。勢難防範。倘或該犯等自知罪重。野性難馴。乘隙生心。別有竊發。內應情事。即不致有意外之虞。而兵心已先為其所亂。此處最難措置。得宜。惟在常青時刻留心。相度情形。隨機應變。或權時受納。設法解散。俾官兵之力。足以鉗制。管束伊等。無從生變。或將伊等陸續送回內地。設法辦理。以杜後患。而徹兇頑。若降者不拒。設或林爽文將來勢窮投出。豈亦貸其死命。置之不辦乎。常青於此等處。務須加倍慎重。再四斟酌。以期妥善。是日駐蹕南石槽行宮。乙亥。諭。此次密雲縣迎駕站道。

兵丁著賞給半月錢糧○直隸總督劉綎奏
潯沱河發源山西由五臺縣入直隸平山縣
境經由靈壽正定至藁城縣廣陽村有兜灣
迎溜之勢舊有趙州寧晉藁城等處民人所
修土埝一道名廣陽隄使水由北岸晉州東
鹿深州衡水等處入滄陽河時廢時築乾隆
五十年潯水南徙隄身衝刷成河趙州等處
民人合力堵築而晉州等四州縣民人則又
呈請停修經臣飭委清河道朱瀾往勘潯水
現由趙州寧晉直達滄陽其勢甚順所有廣
陽隄工已經衝刷成河臣查潯沱水勢遷徙
靡常北淤勢必南趨即使隄工暫就堵塞而
水性就下入汛必復被衝且以經由各州縣
村莊多寡遠近而論北路則由晉州東鹿深
州衡水四州縣入滄陽河計程一百六十餘
里南路則由趙州寧晉並藁城之一隅至滄
陽河計程一百餘里勢亦不能舍近就遠應
請將廣陽隄工停止修築尋諭潯沱河既已

南遷所有北岸從前漲出地畝久已民人耕
種自不便改撥致令失業然聽其自便則洩
出之地日增水占之地日減又非裒多益寡
一視同仁之意著自今為始嗣後再有淤出
地畝交地方官東公查丈南岸水占幾畝即
將北岸淤出之地如數撥還南岸之民耕種
若將來水勢北趨則亦將南岸淤地照此撥
給北岸之民以昭平允○是日駐蹕密雲縣
行宮 丙子諭軍機大臣等據李侍堯奏粵
兵坐船黑夜被劫現獲盜犯二名飭提研訊
並稱閩省盜案繁多由文武員弁視為故常
並不嚴速查拏以致匪徒肆行無忌現在飭
屬上緊緝拏旬日以來福清等縣報獲盜犯
三十餘名等語沿海盜賊最為商民之害閩
省文武各員遇有劫案並不即時訪拏惟是
怠玩諱飾全不以緝盜安民為事惡習實為
可恨今李侍堯到任後嚴飭各屬上緊緝捕
旬日間已獲盜犯三十餘名之多可見地方

事務。如果督撫認真辦理整頓之成效無不立見。從前原任督撫所司何事。一任地方廢弛。若此。惟德由該省巡撫擢用總督在閩最久而富綱在任。亦有二年。何以於緝盜安民之事並不實力督拏。毫無整飭。一任地方官玩誤至此。著傳諭富綱。惟德據實明白回奏。○是日駐蹕要亭行宮。○丁丑。予浙江調赴臺灣第四起官兵。中途遭風淹斃兵丁王榮等五名。賞卹如例。○是日駐蹕兩間房行宮。

○戊寅。諭此次熱河迎駕站道兵丁及看守避暑山莊千總兵丁等。均有四個月差使。著施恩。各賞給一月錢糧。其邊外南北兩路看守行宮者。差使無多。仍照舊賞給半月錢糧。又諭據穆騰額奏。長蘆商人王世榮承辦引地。應交帑利並帶徵銀二十五萬四千一百餘兩。現在資本不能接濟。難以清繳。懇請分年暫予緩交等語。該商王世榮承辦官引。虧折成本。告運維艱。本應照例斥革。另召新

商接辦。姑念該商行銷引地多在河南。而豫省連年旱歉。商鹽停滯。以致工本虧耗。未能將應交官項按限清還。尚屬有因。著照該鹽政所請。將王世榮五十二、三兩年每年應交官引地帑利銀九萬五千餘兩。並應交帶徵四十八年兩限帑利銀六萬三千四百餘兩。暫予緩交。自五十四年起。分作六年帶徵。每年交銀四萬二千三百餘兩。扣至五十九年。照數清款。以舒商力。自此次清釐之後。倘該商不知節儉妥辦。再有延宕。必須參革治罪。不能復邀寬貸也。○諭軍機大臣等。據蘓凌阿奏。豫省有應運京麥一萬八百餘石。已全數抵壩。起運收倉。河南山東等處商販麥船到通者。已有三萬四千七百餘石。恐通州為卸載馬頭。奸商乘機壟斷。現在嚴密查拏等語。京城內外糧食價昂。前因步軍統領衙門查出該商等囤積米麥。令該衙門會同五城順天府官員酌量價值糶賣。所賣錢文仍給

發該商人收領。今豫省額運麥石業已全數抵通。而商販麥船又復源源而來。到通者已有三萬四千餘石。正足以資接濟。但恐奸商乘機截買。私行囤積。俟價昂擡價出售。又不可不防其弊。所有運到商麥。應即出示曉諭該商等。令其全數運京。毋許在通起卸。並著留京王大臣等於商麥到京後。仍照前次章程。交步軍統領衙門會同五城順天府官員。比前所定之價。再加酌減。價值糶賣。以平市

價。仍各一體稽察。毋許各鋪戶囤積居奇。將此傳諭留京王大臣等。並諭蘓凌阿知之。○又諭曰。常青初抵臺灣。存城兵數無多。賊匪分路攻犯府城。常青親率官兵鄉勇迎捕截殺。斬獲甚多。賊匪敗退。續調官兵未到以前。尚能如此。連得勝仗。現在大兵雲集。軍威壯盛。常青統領廓清後路。無難將竄聚賊黨盡數殲除。是此時南路情形儘可無慮。惟北路鹿仔港一帶。前據常青奏稱。避賊難民俱在

該處。恐賊乘虛竊發。欲留任承恩在彼帶罪督兵。今既將任承恩遵旨送回內地。則該處止有柴大紀。普吉保二人。恐兵勢單薄。難以支持。且兵民人等見提督解任送回內地。未免心生疑懼。而鹿仔港距大里杙賊巢最近。深慮賊匪聞而生心。乘間竊發。著傳諭藍元枚赴鹿仔港。會同柴大紀。普吉保整頓兵力。遙為聲援。牽綴賊勢。○以內閣學士宗室祿康為盛京禮部侍郎。是日駐蹕常山峪行

宮。已卯遣官祭

關帝廟。○諭軍機大臣等。據舒常浦霖同日奏到。接鎮草鎮總兵尹德禧辰沅靖道王家賓報稱。湖南鳳凰廳所屬之栗林汛勾補寨苗人潛赴道旁偷竊。並搶奪路人棉花布匹。牛隻。勒人取贖。隨密派文武各員率領百戶寨長協掣現。雖將牛隻放還。而苗匪尚負隅不出。吶喊放鎗。現在提鎮道員帶兵往捕。浦霖亦帶同臬司恩長前往查辦等語。鎮草所

屬各寨苗人安居向化久與編氓無異何以有此等搶奪勒贖負隅抗拒之事或係聞臺灣賊匪聚眾滋擾從而效尤不法浦霖俞金鰲一聞稟報即親身馳往查拏審究所辦甚是舒常駐劄湖北省城距該處較遠且已有巡撫提鎮帶兵赴彼舒常若復踵行前往未免跡涉張皇統俟續有信息再酌定行止可也至浦霖奏稱現在飛札鎮道徧行出示曉諭各寨苗人官兵止擒賊首究治脅從各戶

概不株連所辦亦是苗人素性善疑若此時速行嚴辦恐各寨苗人聞而驚懼互相勾結恃險抗拒轉足堅其負固之心自應先為開導以安反側俾附近良苗各安本業不致激成事端但苗性難馴不可不示以懲創此案各首犯自應按名擒拏倘有勾結不法情事必須嚴切根究供出黨夥亦應逐一查拏按律辦理不可稍存姑息從前黔省古州等處逆苗滋事經官兵痛加殲戮從重辦理苗民

始知懾伏威棱數十年來相安無事浦霖俞金鰲等固不可遇事吹求波及無辜亦不可將就完案使苗民無所儆畏日後又滋事端至閏正祥已調湖廣提督諒已將次抵任著即前赴湖南會同俞金鰲查辦此案庶多人更為得力現在直隸提督有李奉堯署理俞金鰲俟查辦事竣再來新任亦不為遲將此由六百里各諭令知之○以故雲南鶴慶州屬在城驛土官田文治子榮襲職是日

駐蹕喀喇河屯行宮○庚辰

上詣熱河

文廟行禮諭據浦霖奏湖南鳳凰廳屬勾補寨苗人石滿宜等搶奪路人牲畜拏陷人口勒限取贖經該鎮道派委文武各員查拏各犯竟敢占踞山梁抵拒不服總兵尹德禧會同該道親率將備官兵前往直搗賊巢立時平燬生擒首犯石滿宜龍觀音等並擒殺賊苗五十餘名其餘苗戶現在安居並無驚

擾等語。此案總兵尹德禧於所屬苗匪滋事當即會同該道帶領將弁兵丁等前往勦捕立時擒獲辦理甚為妥速殊堪嘉獎著交部從優議叙。巡撫浦霖提督俞金鰲雖未經行抵該處賊匪業已擒獲但一聞稟報即親身馳往亦屬可嘉並著交部議叙仍著各賞給大荷包一對小荷包二對以示獎勵。其在事出力之文武員弁著浦霖會同俞金鰲查明具奏交部分別議叙至受鎗傷斃兵丁二名

及受傷外委一名兵丁三名並著兵部照例議給賞卹。所有究出未獲要犯並著該撫等督率查拏務獲嚴辦以示懲儆。又諭據琅玕奏海塘石工加貼銀兩遵照部駁刪減十三款共銀五萬餘兩著令賠繳外其石匠夫工開槽還土架木跳板橋木三款應減銀九萬八百餘兩查係實用實銷勢難刪減等語浙省原辦續辦魚鱗塘工用過加貼工料銀兩經軍機大臣會同工部駁令刪減十三款

其石匠夫工等三款反覆查驗係實用在工並無浮冒開銷勢難刪減自係實在情形若交部議未免格於成例仍致議駁工員業經賠繳銀五萬餘兩無力再賠又須懇請具奏徒滋往返案牘於事無益且此項工程在琅玕未到任以前辦理如果工員等有浮銷情弊該撫亦不值為之袒護奏請所有石匠夫工等三款應減銀九萬八百餘兩著加恩准其報銷其另片奏稱新建塘工石價較續辦

石塘每丈加增銀一錢三分既據查明實係宕深路遠不得不較舊工稍增亦皆按款實給並無浮冒亦著一併據實造報此後皆不得援以為例。○是日駐蹕避暑山莊至八月庚戌皆如之。辛巳諭曰湖南鳳凰廳屬苗匪石滿宜等滋事一案提督俞金鰲一聞稟報即親帶兵弁馳往該處嗣聞鎮道等業已擒獲首惡平燬賊巢俞金鰲將所帶弁兵微令歸伍仍行親往查辦所見甚是現今該提

督會同浦霖查明出力官弁議叙及搜拏逸犯各事宜。俞金鰲於楚省苗地情形素所諳悉，著仍留湖廣提督之任，以資駕輕就熟。所有直隸古北口提督員缺，即著閔正祥調補。閔正祥接奉此旨，即來熱河任事。○諭軍機大臣等：據留京辦事王大臣等奏，豫東商麥到通者已有三萬四千餘石，足資接濟。此項麥石係商人自行販運，若令剋期送京羅賣，恐一時車腳昂貴，商人未能獲利，或致將來

實錄卷二百八

二十六

商販聞風不前，轉不能源源接濟。又據綿恩奏：此次查封米麥共六萬餘石，鋪戶共有數百家，概令載運入廠，腳價不無糜費。莫若將鋪戶米麥停其入廠，即就近在本鋪內按照減定之價零星羅賣，各等語。前經和珅以京城米價昂貴，遵旨出示禁止囤積，而該商等惟利是圖，糧價未減，因查出各糧鋪囤積米麥共六萬餘石，奏請於京城內外分設官廠減價羅賣，所賣錢文仍給付該商等收領。原

因該商等有心壟斷，囤積居奇，按律治罪亦所應得。今不將米麥入官，僅令入廠減價，平糶而所賣錢文仍給該商等收領，本所以懲儆奸商，囤積使軍民咸資口食。該商等知所儆戒，不致高擡價值，米糧漸就平減，商民兩便，亦不過一時權宜之計耳。並非欲將嗣後所有商販米麥俱令官為辦理也。今留京王大臣等及綿恩所奏，似有為難掣肘之意，自係誤會朕旨。然既有此情節，何不直奏現在

實錄卷二百八

三

商麥抵通，正應飭禁商人等不准在通囤積居奇。至其於何時運京羅賣，原可聽商人自便，不必官為經理。勒令剋期送京，多費腳價，轉致商人無所獲利，裹足不前。此事惟在各該衙門隨時飭查。若該商販運抵京，仍有私行囤積，擡價病民及往外路販運，惟利是圖者，一經查出，即將為首奸商從重治罪。所有米麥一併入官，不必如前此僅令入廠減價平糶，仍將賣價給還也。若伊等照依市價漸

加平減糶賣即可任從其便以期商販流通此時祇可且從綿恩所請仍著步軍統領衙門會同五城順天府官員於京城內外留心訪查寔力查辦俾商民兩有裨益將此諭令知之又諭據舒常奏勾補寨苗匪拒捕不法業經擒獲一摺另片奏稱石滿宜等搶奪行人牛隻布匹等項勒限取贖似非一日之事何以該地方文武各官不豫為查禁從前亦並無報案其素日之疎懈廢弛已可概見

實錄卷五百

吏

現咨撫臣一併查明嚴參等語所辦是苗人滋事不法該地方文武各官平日漫無覺察並不豫為查禁固有應得之咎但該鎮道等一聞信息即親率將備官兵前往直搗賊巢勦平甚速功過亦足相抵著傳諭浦霖將此案起事緣由該地方官何以並不查禁稟報有無廢弛諱匿及勦平苗匪何人最為出力之處一併秉公查明據實覆奏自可覈其功過酌量辦理至未獲之石隆後等三名係為

首要犯必須按名擒獲如有供出同夥苗匪亦應搜拏淨盡浦霖俞金鰲務須督率員弁上緊查拏就獲嚴辦以示懲儆

實錄卷五百

吏

大清高宗法天隆運至誠先覺體元立極敷文奮武孝慈神聖純皇帝實錄卷之一千二百八十

大清高宗法天隆運至誠先覺體元立極敷文奮武孝慈神聖純皇帝實錄卷之一千二百八十一

監修總裁官總纂官太子太傅文淵閣大學士文淵閣領侍衛內大臣稽察欽奉 上諭軍機處管理

文淵閣院事務並兼滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭軍機處管理刑部戶部工部事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德璉經筵講官太子少保工部尚書紀錄六次臣曹振鏞等奉

敕修

乾隆五十二年丁未五月壬午月食○諭據

常青奏接奉諭旨將郝壯猷押赴軍前正法在軍將弁無不共知儆懼現俟粵省兵四千名及駐防滿兵一千名到齊即親自統領嚴整紀律從南路以至中路北路乘勝長驅自可剋期蕩事又據柴大紀同日奏到賊匪於二月十二二十六三月初二二十九四月初四初十二三等日賊首林爽文聚集夥黨分路侵擾諸羅縣城該總兵帶領遊擊楊起麟守備邱能成等督率官兵義民番壯出城迎

捕堵殺爭先奮勇接仗數次共鎗礮打死賊匪數十名生擒正法者五十餘名割獻首級奪獲器械甚多並有奸匪張慎徽假充義民先將與逆首林爽文不和之偽先鋒吳聰擒獻以為憑信帶匪夥三十八名求在軍前効力希圖內應該總兵見其形跡可疑密飭將備將匪夥盡行擒獲審得實情將該犯等即行正法各等語所辦甚是柴大紀駐守諸羅兩月有餘賊首糾合匪徒萬餘屢次侵擾該總兵督率官兵義民奮勇截殺連得勝仗斬獲甚多賊匪敗退並能識破內應奸匪擒拿正犯柴大紀前此保衛郡城及此次駐守諸羅堵剿賊匪始終奮勉出力朕心深為嘉獎並將私往村莊強取民人衣物之兵丁陳恩成審明正法衣物給還原主所辦尤為得當柴大紀著交部議敘並賞給大荷包一對小荷包二對仍賞常青恒瑞奶餅各一匣藍元枚柴大紀普吉保奶餅共一匣著各查明打

仗出力將備官員分散賞給俾得均霑恩賚以示鼓勵至該鎮摺內稱四月初十日與賊接仗時有鎮標外委劉欽兵丁程忠吳春三名遇賊懼怯不放鎗礮即行逃回以致賊衝入隊當經遊擊楊起麟把總陳洪猷等奮勇殺賊隊伍得以不亂隨將劉欽等三名恭請王命在軍前正法將首級徧傳各營示眾等語所辦甚是柴大紀深明軍律將臨陣退縮之弁兵立正典刑並將私取民家衣物之兵丁亦按軍法從事是以將弁兵丁共知儆懼用命爭先得以屢次克捷郝壯猷守禦鳳山所帶之兵計有二千餘名不為不多當賊匪來犯兵丁等畏賊退避即應將首先退縮數人立時正法使眾知儆懼其餘策令向前同心抵禦何至紛紛潰散乃郝壯猷不惟不能如柴大紀之賞罰嚴明且亦從而逃回身為總兵大員似此畏怯倖生若不明正典刑其何以肅戎行而昭軍紀是郝壯猷之身伏刑

誅尤為情真罪當至常青所奏遊擊鄭嵩延山在鳳山殺賊陣亡又委放兵餉之原任同知王雋一員罵賊被害俱屬可憫鄭嵩延山王雋均著交部照例賜卹又柴大紀連次打仗所有陣亡受傷弁兵俱著該部查明照例賞卹至鄉勇義民隨同官兵晝夜防範奮勇殺賊實屬可嘉其陣亡受傷者均著遵奉前旨照兵丁之例加倍卹賞以示鼓勵又柴大紀奏番民吧咆被賊礮打死阿里稍被礮受

傷較之鄉勇義民更當優賞著常青分別妥為賞卹其隨同柴大紀打仗出力之武舉陳宗器黃奠邦亦著常青酌量獎賞具奏現在粵兵及駐防滿兵均已到齊常青即可親自統領厚集聲勢一鼓作氣廓清後路以至中路北路會同藍元枚等合兵進剿直搗賊巢生擒首夥各犯自可剋期蕞事終靖海疆將此通諭中外知之○諭軍機大臣等前據和珅以京城米價昂貴遵旨出示禁止囤積而

商人惟利是圖糧價久未平減因查出各鋪店囤積米麥六萬餘石奏請於京城內外減價糶賣而於如何派員稽查及作何減價平糶之處未及聲敘明晰亦屬疎忽因閱日即扈從啟程未經酌定章程分晰辦理迨綿恩接署步軍統領事務自應將此項查出米麥即就城內城外飭令該鋪戶遵照減定價值公平糶賣仍會同五城順天府遴委委員隨時稽查不使奸商從中仍得弊混以遂其居奇壟斷之錮習則辦理自不虞掣肘而軍民皆需實惠乃計不出此而惟拘於設廠平糶之言概令各鋪商載運入廠則所需腳價既未便令該商自備亦斷無官為給發之理遂致措施維艱殊不思奸商圖利詭計百出若聽其自行糶賣漫無稽察則京城地方廣遠糧鋪散處該商等賣少報多暗中仍私自囤積或竟偷往外路販運又何從悉其弊端則禁止囤積減價平糶仍屬有名無實且該商

等囤積居奇經官飭減未遵已干禁讞今不將其米麥入官止勒令減價糶賣已屬從寬辦理若伊等復敢投遞公呈不遵禁約即係市儈齊行罷市惡習必應嚴加懲治將其米麥入官平糶以示懲儆無論此事係業經奏明奉旨固應官為查辦即步軍統領有管轄九門五營稽查地方之任既已明出禁示亦豈可任奸販刁商抗違梗令置之不辦乎若因商鋪衆多公具呈詞阻撓政令即曲從其請則嗣後步軍統領又將何以辦事設遇有糾衆抗官不法情事豈亦將惟所欲為從而聽之乎綿恩究係辦事日淺未能諳練阿桂係曉事之人自能善體朕意著傳諭留京辦事王大臣等詳悉告知綿恩務須派員實力嚴查並令五城順天府各衙門一體稽察毋任奸商陽奉陰違得以肆其狡獪伎倆如有投遞公呈不遵禁示者即當究出為首或囤積最多者一二人枷號示衆並將該商米麥

入官平糶則其餘各鋪戶知所儆惕自不敢
仍前效尤庶不勞而事易集若惟事因循調
停以博寬大之名將來設遇年歲稍歉奸商
擡價居奇又將何以辦理耶所謂水濡民玩
轉足以長刁風而玩官法留京辦事王大臣
等及綿恩不可不咸諭此意○又諭曰柴大
紀駐守諸羅在大里杙賊巢之南普吉保駐
守鹿仔港在大里杙賊巢之北若柴大紀一
俟添兵到彼即率領進剿直搗賊巢設賊匪
負隅死守一面分布黨羽從山僻小路繞出
官兵之後復滋擾諸羅則柴大紀前後受敵
退無所歸不可不慮前經有旨諭令藍元枚
一到鹿仔港祇須會同柴大紀普吉保整頓
兵力作為進攻大里杙以牽綴賊勢無庸急
於進兵想常青已見及此矣此時柴大紀即
有常青續撥官兵來到諸羅仍應固守該處
或會同普吉保先將南北通衢斗六門大武
壠等處之占踞賊匪勦除廓清總俟常青統

領大兵到時合力直搗賊巢無難一舉集事
不可冒昧輕進置諸羅於不顧現在審訊賊
夥林家齊有賊首林爽文事勢窮蹙欲逃往
內山之語雖混供不足憑信但賊匪將來勢
窮力竭明知一經官兵擒獲萬無生理或竄
入內山勾結生番希圖苟延殘喘亦事理所
有生番伏處內山性同禽獸未必通曉禮義
但利害或知趨避常青即可先趁此時懸立
賞格令其縛獻首夥各犯即給以花紅布匹
生番貪圖貨利自必踴躍樂從並廣行出示
開誠曉諭該生番以賊匪數千人竄入爾境
必將占踞爾之地界侵奪爾之牲畜日久受
其擾累若能擒獲獻出即可得受恩賞又可
免賊人侵害如此令明白通事剴切宣諭生
番自為生計貪圖利便自不致容留藏匿常
青仍應揀派奮勇能事將領帶兵於通內地
各要隘處所嚴密防堵將來進兵時四路截
擊更可一鼓殲擒搜捕淨盡至鳳山潰回兵

丁常青處前後有一千一百餘名。柴大紀處又稱有潰回兵五百餘名。想係在鳳山敗逃之數。該兵丁等逃後如敢去而從賊查獲後自當即行駢誅。今竟尚知大義自行投到。隨同官兵打仗出力。尚有一綫可原。自可貸以一死。令其戴罪圖功。至副將徐鼎士所稟被百姓留於艍舫。勦捕賊匪之處。是否確實。統俟事竣後查明。如有捏飾再行參處。○科布多參贊大臣保泰奏副都統特古斯蒙克病故。伊子古嚕扎布年甫七齡。可否准其承襲。得旨特古斯蒙克所遺副都統職銜著伊子古嚕扎布承襲。古嚕扎布尚未及歲。所有旗務即著散秩大臣烏爾圖那遜暫行兼管。○癸未諭昨據柴大紀奏將劉欽等三名正法示衆。又有強取民物之兵丁陳恩感審明正法。衣物給還原主。所辦俱屬公當。嚴明已將該鎮交部議敘矣。武職大員如或心存私見於所屬弁兵有需索不遂及挾嫌專戮情事

不但當革職治罪。即予以抵償亦所應得。若行軍之際紀律責在嚴明。綠營惡習最為可惡。平時則強取民物。臨陣則恒怯退回。此而不誅其何以昭軍令而肅戎行。柴大紀深明紀律。將臨陣退縮之弁兵立正典刑。並將私取民家衣服之兵丁亦按軍法從事。是以將弁兵丁共知儆懼。用命爭先。得以屢次克捷。而郝壯猷駐守鳳山。不惟不能如柴大紀之策勵士卒。抵禦賊匪。且畏怯倖生。從而逃回。是以身伏刑誅。朕於軍務從來信賞必罰。其奮勇出力者必從優甄錄。而畏葸退縮者亦必重治示懲。國家累洽重熙。兵可百年不用。不可一日無備。前於甘省勦捕逆回。嚴事後曾命軍機大臣會同該部將行軍紀律擇其緊要數條頒發各營操演講習。乃尚有郝壯猷等之畏葸偷生者。著將柴大紀用法嚴明得邀獎敘。郝壯猷怯懦逃回。按律正法之處補行載入通行訓諭。各營伍俾專聞大員曉

然於敵愾大義共矢蓋愧而將備兵丁人人有勇知方恪遵軍紀盡成勁旅以副朕整飭戎行諄切告誡之至意○甲申諭曰副都御史劉權之條奏籌辦民食一摺內稱雍正五年設有八旗官局二十四處內務府官局三處收買旗米官為轉糶後因經理不善裁併停止請仍復八旗官局欽派大臣總理稽查按照舊日章程酌定辦理等語米糧盈絀民食攸關總在轉運流通源源接濟方不至市價騰踊商民兩受其益如有奸商牙販囤積居奇擡價病民者自應嚴加查察隨時懲治現在京城查出囤戶酌令減價平糶原以平價便民使商販無從逞其壟斷之術而軍民不致食貴之虞但杜弊之法惟在去其太甚若概欲官為經理勢必有所難行從前雍正年間設立八旗內務府官局收買旗米官為轉糶原係一時調劑之法行之日久即不免滋生弊端是以仍行歸併停止况國家重熙

累洽生齒日繁百物價值勢不能不較前增貴即如從前一人之食今且將二十人食之其土地所產仍不能有加是以市集價值不能不隨時增長若如該副都御史所奏欲仿照舊例設立官局無論弊端難以杜絕前已礙難經久施行且官局共有二十七處而辦事大臣為朕親信者不敷簡派况大臣中非辦理機務即係兼綜部旗各事豈能合緊要政務於不辦令其專司收米販糶之理若僅隨便充數管理於事仍屬無益抑且更滋弊竇均所難免且經管大臣耳目難周雖悉心稽查督辦家人胥吏等俱難保無暗中串通滋弊情事而奸商狡獪倩雇之人亦難一一從而辨識是欲防弊而弊即叢生仍屬有名無實殊多未便但該副都御史既有此奏未必竟無所見著交留京王大臣會同大學士九卿八旗都統等將該副都御史所奏是否可行之處詳晰妥議具奏○以正黃旗漢軍

副都統伍彌烏遜為烏里雅蘇台叅贊大臣
乙酉諭軍機大臣等熱河文津閣所貯四
庫全書朕偶加繕閱其中訛謬甚多已派隨
從熱河之阿哥及軍機大臣並部院隨出之
阮葵生阿肅胡高望嵩貴吉夢熊再行詳加
校閱改正因思文淵文源二閣所貯四庫全
書其訛舛處所亦皆不一而足除年老大學
士嵇璜不派外著派科甲出身之尚書侍郎
京堂以及翰詹科道部屬等官分司校閱其
尚書侍郎管理事務繁多者每日每人著各
看書一匣六阿哥八阿哥及事簡之堂官各
看書二匣京堂翰詹科道部屬等官每人每
日各看書二匣再六部司員中並著該堂官
每司各派出一人每日各看書二匣總計大
小各員不下二百餘人每人每日二匣計算
不過兩月兩閣書籍即可校閱完竣其文淵
閣書籍著在文華殿內閣等處閱看文源閣
書籍著在圓明園朝房閱看內天文推算等

書交欽天監堂司各官專看樂律等書交樂
部專看醫藥等書交太醫院官員專看文淵
閣書著六阿哥阿桂專司收發其挖改換頁
等事交彭元瑞金簡管理文源閣書著伊齡
阿巴寧阿專司收發其挖改換頁等事著八
阿哥劉墉專管八阿哥現住圓明園劉墉係
總師傅自必隨同阿哥等在彼居住即著八
阿哥劉墉常川往彼以資料理並揀派武英
殿匠役前往圓明園承辦仍著六阿哥阿桂
總司其事除校出一二錯字即隨時挖改毋
庸零星進呈如有語句違礙錯亂簡編及誤
寫
廟諱並繕寫荒謬錯亂過多應行換五頁以上
者再隨報進呈仍查明原辦總纂總校提調
校對各員分別治罪並將業經議敘已登仕
版之該謄錄亦予斥革俾甄敘不得濫邀而
藏書益臻完善並著六阿哥阿桂一面即行
酌派分閱天氣炎熱閱書諸人家中早飯於

辰正進申初出仍給與清暑茶湯京中金簡園中伊齡阿司其事一面將如何分派校勘酌定章程之處隨報具奏又諭朕自啟鑒駐蹕熱河已閱旬餘未見京師奏報兩水情形頗為懸切昨夜亥子之間熱河得有雷雨勢甚滂沛現尚濃陰田禾藉資長發未知京師曾否一律霽霑現在地土是否不致乾燥有無望澤之處著傳諭留京辦事王大臣據實覆奏丙戌命副都御史劉權之提督山

東學政予福建因公出洋遭風淹斃之遊擊林朝紳守備王澤浩把總陳開桂外委洪海沈贊武周明黃正棟及兵丁陳聞等二十一名分別祭葬廕卹如例丁亥諭向來滿洲蒙古繙譯鄉會試每屆三年將應否舉行之處請旨辦理但思旗人進身之途甚廣並不專藉繙譯且其中亦未見出有真才也三年奏請考試一次為期太近嗣後竟著每屆五年舉行一次亦不必請旨可行與否矣

戊子以故廣西太平府屬龍英土知州趙承業子鎔襲職己丑

孝恭仁皇后忌辰遣官祭

景陵諭軍機大臣等據孫士毅等奏接據安南國王黎維禰之孫黎維祚咨稱該國輔政鄭棟專擅威福上年五月有西山土豪侵入國城鄭棟出奔被擄亡其國印嗣伊祖黎維禰病故伊父早亡黎維祚以嫡孫權管國事咨請權給憑信嗣後遇有題奏事件用此為驗等因其中疑竇多端不便遽如所請現酌擬檄稿詢問等語自應先如所擬辦理安南世守藩服最稱恭順該國既有土豪侵擾失去印信之事其時國王黎維禰尚在何以不行咨請直至此時始行咨報况印信係該國王執掌何以不在國王處所轉似鄭棟經管以致土豪侵掠鄭棟出奔被擄竟將國印遺失其中恐尚有別項情節自應檄飭查詢俟其登覆到日再行酌量辦理至黎維禰病故

該國既未經具本咨請題達。則該督等檄文此時不應將代為具奏之處敘及。現已令軍機大臣等將所擬檄稿酌刪。並經朕改定。諭以現據該國嗣孫黎維祁咨稱。輔政鄭棟專擅威福。乾隆五十一年五月有西山土豪侵入國城。鄭棟出奔被擄。亡其國印。是年七月十七日祁祖父病故。祁父早亡。祁以世嫡權管國事。未及專員。諸闕告哀。請命咨請轉達天聽。並請權給憑信。令本國嗣後遇有題奏事件。用此為驗等情。據此查爾祖臣事天朝。最稱恭順。大皇帝俯鑒忱悃。恩禮有加。今忽因病溘逝。若奏聞大皇帝。自必渥予恩榮。但據爾咨係上年七月間爾祖病故。其時即應咨報。候覆專遣陪臣詣闕告哀。請命襲封庶幾弗墜爾國世守之勳。用昭天朝賞延之澤。何以閏歲至今始行咨請代為題奏。又據來咨輔政鄭棟擅作威福。以致西山土豪侵入國城。鄭棟出奔被擄。雖係彼此挾嫌仇殺。但

爾國印信自應爾祖執掌。何以轉似在鄭棟處。所以致遺失自由。爾國綱紀未能肅清。且上年五月爾祖尚在。因何不即將失印緣由據實咨請題報。試思爾嗣孫未經具本告哀。未經奉旨承襲。遽請給以憑信。無此體制。我封疆大臣亦不敢擅行此事也。且爾國失去印信。是否係因土豪構亂。一時倉猝遺失。抑實有肆橫攘竊之人。尚須聽爾國勒令繳出。及國印何以不歸爾祖執掌。轉似在鄭棟處所咨內均未分晰聲明。倘奏明大皇帝垂詢。根由無憑。登覆獲咎。非輕何敢草率代題。乞恩所有失去國印一事。合就移查。為此檄諭該國嗣孫遵照。文到即將印信是否遺失。無存。或今尋獲。抑尚可追繳。奉為世守之處。速即具咨。一一聲敘。以便另為據情代奏。請旨遵行。該督等可遵照檄行。○四川總督保寧疏報。榮縣竈民謝笠等具報。開淘長福富泉二井。新設煎鍋四十九口。應納課稅銀二百

四兩有奇。以故四川拈佑惡革寨土百戶汪扎爾子折旺蚌襲職。旌表守正被戕直隸深州民馬成仁女馬氏。庚寅諭軍機大臣等本日姜晟奏。四月十八九等日經由直隸順德府境內。及至豫省河北。麥收雖較勝。而望雨正殷等語。前據畢沅奏稱四月十六十八等日。衛輝彰德各屬得雨。遠近普霑。計姜晟行抵豫省境內。約在四月二十以外。何以彼時該處尚有望雨情形。本年豫省麥收雖已豐稔。而大田秋禾亦需甘霖接潤。著傳諭畢沅詳悉查明前次所得之雨。各該處是否霑足。及現在有無待澤之處。即速據實覆奏。想畢沅自不敢稍存諱飾。再本日又據畢沅奏河北懷慶衛輝彰德等府州屬於五月初二初九十一等日。續得雨澤三四寸至深透不等。其各州縣曾否一律普霑之處。並著一併查明具奏。湖廣總督仍辦臺灣軍務將軍常青奏臺灣賊匪醜類衆多。自府城十

里之外村莊已被盤踞。又署福建陸路提督柴大紀奏。四月十六日賊匪萬餘來攻諸羅。各情形諭軍機大臣等看來南路賊匪蜂屯蟻聚。勢尚蔓延。常青發摺時只有粵兵四千名。於進剿事宜似不敷用。計此時恒瑞所帶滿兵一千名。及李侍堯奏撥浙江兵一千名。早抵臺灣。兵力益厚。軍威愈壯。常青恒瑞親督率前赴南路。跟蹤搜剿。廓清後路。並揀派得力將備。於賊匪出沒各要隘駐兵守禦。防其繞出來犯鳳山郡城之路。最為緊要。至賊匪日積日多。蔓延滋擾。皆無藉貧民迫脅從賊。一將林爽文擒獲。自必紛紛潰散。至鄉勇義民。隨同官兵晝夜防範。奮勇殺賊。實屬可嘉。其陣亡受傷者。前經降旨照兵丁之例。加倍卹賞。本日柴大紀摺內有武舉陳宗器黃真邦等率領義民奮勇殺賊。此等武舉義民非弁兵可比。能打仗出力。更應格外優獎。著即查明將陳宗器等拔補千總等官。以示鼓勵。

厥其有奮勇出衆者即超擢守備亦無不可並著常青一體查明義民向有實在出力者必須迅速嘉獎破格拔擢庶伊等共知獎勵用命爭先於勦捕更為得力其署諸羅縣知縣陳良翼堵禦賊匪甚屬奮勉即著實授○質郡王永琮等奏遵旨詳校文淵文源兩閣所貯四庫全書擬派部院各官二百五十餘員兩閣各分派一百二十餘員專司校閱其應改各簽必須彙齊覆覈以免舛誤應請旨令彭元瑞紀昀總司其事毋庸兼看書籍凡各員校勘之簽均由彭元瑞等覆看一過送交臣永璇劉墉金簡派員登記檔冊挖改後再照檔銷簽並於書前粘簽注明詳校官恭閱銜名如有仍前錯誤即惟詳校之員是問再從前司校之員若槩令迴避人數不敷分派請將原校之書另派他員詳校報聞○辛卯諭軍機大臣等據長麟奏湖廣江西新造撥船三百隻業已陸續到齊分撥沿河之德

州等六州縣安設現在東省河水充足重運無虞淺阻新到撥船俱飭趕緊油艙倘遇有應用之處即飛行酌調專員押赴等語此項撥船甫經成造豈有即須油艙之理明係地方官藉詞捏飾為將來冒銷地步長麟平日辦事尚屬細心何以見不及此輕聽屬員蒙混飾詞遽以入奏長麟著嚴行申飭至此項撥船前據徵瑞奏先造一千二百隻尚不敷用是以添造三百隻運送直省嗣據劉秉恬奏將此項撥船留於山東一帶安設現據長麟奏東省漕運遇淺則撥過淺仍即歸船其起撥之處自二三里及數十里不等果如是則東省並非必須撥船應用而直省既經添造自屬數不可少今復截留東省未免辦理兩歧及起撥時是否不致短缺之處著劉裁會同長麟酌量情形據實具奏毋得稍存迴護再東省安設撥船舵工水手工食等項起撥時自有旗丁給以錢米至閒空時如何令

該水手等自行攬載營運謀生之處何以長
麟亦未奏及仿照直省章程辦理並著劉義
長麟會同議定章程詳悉具奏○又諭凡用
兵以已圖魯名號為榮現在調集多兵勦辦
臺灣逆匪其節次奮勉出力人等即賞給已
圖魯名號以示鼓勵著交常青將此旨通行
曉諭使衆心益知踴躍再前此有如柴大紀
之實在奮勉者並確查二三人遇便奏聞賞
給以故喀喇沁扎薩克多羅杜稜郡王喇

特納錫第子端珠布色布騰襲爵士辰諭
軍機大臣等據馮光熊奏經過地方情形一
摺內稱山東濟南等處雖屢霽時雨尚未能
一律深透撫臣現在率屬虔禱適日雲勢布
漫十五十七等日省城一帶又得陣雨數次
等語東省本年雨澤短少屢經降旨詢問並
令該撫設法調劑現在節過小暑農民盡力
大田正資甘霖接濟長麟率屬虔禱尚未徹
壇著傳諭該撫即詳悉查明省城一帶十五

十七等日所得之雨是否霑足現在曾否續
得雨澤於大田有無妨礙之處即行據實覆
奏毋得稍存諱飾○癸巳諭據柴大紀奏四
月二十一二十三二十七等日賊首林爽文
潛聚夥黨分路侵擾諸羅縣城該總兵帶領遊
擊楊起麟林光玉邱能成守備楊彰署諸羅
縣陳良翼武舉陳宗器黃奠邦等督率官兵
義民出城迎捕截殺爭先奮勇接仗數次共
鎗斃打死賊匪數百名生擒正法者十餘名

割獲首級奪獲器械甚多賊匪被官兵殺退
四散逃竄等語柴大紀自駐守諸羅以來賊
首糾合匪徒屢次攻擾該總兵督率官兵義
民奮勇截殺連得勝仗賊匪敗退實屬可嘉
柴大紀著交部議敘其隨從打仗出力之遊
擊楊起麟林光玉邱能成守備楊彰陳明德
署諸羅縣陳良翼武舉陳宗器黃奠邦貢監
生張明義等著交常青俟將來到彼時查明
具奏候朕降旨議敘獎擢○又諭曰常青自

抵臺灣即慰撫義民鄉勇。俾伊等共知激勵。用命爭先。至賊匪攻犯府城。豫先設法防堵。並督率官兵鄉勇。迎捕截殺。屢次克捷。甚合機宜。朕心深為嘉獎。著交部從優議敘。至李侍堯駐劄廈門一帶。照料官兵配渡迅速。及辦理軍需糧餉。均能先事豫籌。源源接濟。孫士毅挑備粵兵。遠赴閩省。所有火藥鉛彈等物。均能寬裕籌備。解送應用。皆屬急公可嘉。李侍堯、孫士毅亦著交部議敘。○甲午

諭向來內外文武大臣。遇有應得處分。該部議以降調革職。革任經朕從寬留任。及免其革任者甚多。竟有一人而累至十餘案者。蓋因該大臣等屢經簡擢。任事有年。朕念人才難得。且因其尚係公過。是以每遇議處之案。酌量案情從寬留任者不一而足。但愈積愈多。未免視為故常。無所警惕。轉屬有名無實。亦非整飭吏治之意也。著交吏兵二部。將內而大學士。九卿八旗都統副都統。外而督撫

將軍副都統提鎮現任各員。部議降調革職。革任經朕從寬留任。及免其革任者。查明每名名下所積之案。各若干次。數分別開單進呈。候朕詳加察覈。其案情較重處分數多者。或酌量議罰。再准其開復。其情節尚輕處分數少者。或竟予開復。庶屢獲愆咎人員。知所警勸。而宥其小過。益當感激思奮。如此各予以自新之路。於澄敘官方。較為覈實。嗣後並著吏兵二部。每屆五年。即查明具奏一次。請

旨辦理。著為令。○諭軍機大臣等。現在臺灣調往征兵。所有額缺。自應先於義民鄉勇內。擇其奮勇出力者。拔補至臺灣。曩時輪班駐守之戍兵。向例本由內地各營派往。朕思此等戍兵。由內地調遣。既不免往返繁費。而該兵丁等。一經調派戍守。更不免繫念家室。若專用臺灣本地民人充補。又恐日久該處情形。內地不能熟悉。亦非萬全無弊之道。朕意嗣後此等換班兵丁。一半用該處土著一半

仍由內地各營抽調派往換班則內地既可稍省調遣繁費又能熟悉臺灣風土人情實為一舉兩得且游手無藉之徒得以歸伍食糧更可化無用為有用著常青李侍堯於勦捕賊匪事竣後公同熟商遵照辦理又天地會名目上年係林爽文倡起由臺灣而至內地現據藍元枚訪知會匪多係漳屬之平和長泰等縣人是林爽文不但窺伺臺灣並欲勾結漳泉一帶蔓延滋擾顯有先得臺灣便

可漸入內地之意甚為奸險可惡但此時不可遽行查辦以致人心驚擾將來勦賊事竣後常青李侍堯務將結會根由及附從入教者詳悉查明痛加懲創不可稍留餘孽○以浙江乍浦副都統永慶為江寧將軍甘肅莊浪城守尉科凌阿為乍浦副都統○乙未諭軍機大臣等據翁方綱奏考試情形一摺內稱考至臨江府有疊次干訟滋事不遵約束之武生傅振起查明屬實即褫革衣頂示警

等語武生倚恃衣頂干與訟事最易滋生事端各省皆所不免全在該學政平時訓飭嚴加管束俾該生等咸知守分不敢妄為方足以整頓士習著將翁方綱奏摺鈔寄各省學政閱看並令該學政等於所管武生留心約束倘有健訟滋事者即隨時懲治俾各知所警惕又諭前據福康安於本月初九日奏到蘭州等府州屬三月中得雨深透者僅止數處其餘各屬尚未霑足四月以後省城微

覺暎乾現在率屬虔誠祈禱等語甘省地處邊陲河東河西節候遲早不一當夏禾長發之際全賴雨澤滋培該督自前次具奏之後迄今已閱二旬尚未據續報得雨自係未獲甘膏是以尚稽奏報朕心深為廛注自福康安蒞甘以來該省每歲雨暘咸若惟今歲稍覺缺雨著傳諭福康安將現在該處缺雨各屬曾否續霑渥澤於大田有無妨礙之處據實具奏若果實有災歉應行撫卹平糶緩借

各接濟事宜該督一面妥速辦理一面奏聞想福康安深知朕軫念民依必不稍存諱飾也○又諭將來勦捕事竣柴大紀屢著勞績自應即實授提督但該鎮任臺灣總兵已經數年該處情形較為熟悉且領兵勦賊屢次克捷威望較著即日賊匪蕩平所有善後事宜皆須該鎮隨同常青悉心籌辦而臺灣經此次賊匪滋擾官兵平定之後尤宜加意整頓若將柴大紀授為提督則須駐劄內地臺灣即無熟手經理之人朕意將來事竣後應令柴大紀以提督管臺灣鎮總兵事務在彼彈壓料理二三年再調回內地於綏靖地方更為有益所有內地提督員缺著常青李侍堯於梁朝桂陸廷柱二人中察其才具並何人最為打仗出力之處酌舉一人可以署理提督者據實具奏至常泰現署提督留駐漳州雖未經領兵打仗如量其才具堪勝提督之任並著一併奏聞候朕酌量簡署至臺灣

遠隔重洋屢有械鬪搶奪之案今林爽文等竟敢立會糾眾刦縣殺官自係歷任道府廢弛關冗擾累地方以致養癰啟怨激成事端不可不嚴加治罪以儆將來著傳諭常青李侍堯於勦賊事竣即將歷任道府嚴切查明據實叅奏○丙申諭本日召見新授狼山鎮總兵強都據奏伊母年老懇請留京供職等語強都著准其留京在頭等侍衛上行走所有江南狼山鎮總兵員缺著袁國璜補授○諭軍機大臣等熱河自前次得雨之後晴霽日久本日午未之間大雨滂沱入土深透田禾藉資長發雲勢自西南而來京師自必先行普霑渥澤著傳諭留京辦事王大臣即將此次雨澤京師是否需足之處由報即行據實覆奏○又諭朕披閱藍鼎元所著東征集係康熙年間臺灣逆匪朱一貴滋事官兵攻勦時伊在其兄藍廷珍幕中所論臺灣形勢及經理事宜其言大有可採如所稱諸羅一

縣地方遼濶鞭長莫及應劃虎尾溪以上另設一縣分駐半線地方並於各要隘處所增添巡檢千把總員弁以資防守等語後從其說添彰化一縣至該處迄今又閱六十餘年土地日闢戶口日滋酌量情形有須添設文武員弁以資控制撫馭之處前經降旨令常青李侍堯於勦賊完竣辦理善後事宜時一併籌酌今閱藍鼎元即有此議是臺灣增設官弁實為最要又覆閱總督滿保經畫疆理

書奏事

書

一書內稱臺灣地方地土廣饒糖穀之利甲天下過此再四五十一年即內山山後皆將為良田美產若劃定疆界將人民驅逐不許往來耕種勢難禁止等語所言亦屬有理臺灣疆土既開民安耕鑿處處皆成膏腴之地自楊景素議立界限之後界外良田美產轉界生番而生番以射生為業不事耕種勢必內地民人仍往偷墾日久徒滋事端又與提督施世驤書內稱賊衆至三十萬其中畏死脅

從非盡出於本願或有掛名賊黨以保身家者若盡誅之多殺生靈亦屬無益似應止殲巨魁反側皆令自新等語現在林爽文糾合匪衆所到村莊以勢迫脅如有不從者即行焚殺小民畏死偷生出於不得已勉強附從以致日積日多前後自出一轍朕於此事初起時即經降旨諭令該督等惟將渠魁首逆及實在黨惡不法者殲戮無遺其被賊迫脅聽從者准其悔罪自新以解散賊黨藍鼎元

書奏事

書

之語適與朕意相合常青於整齊兵力進勦時不妨先將此意出示曉諭使被脅良民及從賊夥黨得以畏罪投誠亦解散賊黨先聲奪人之一法此外書內所列各條尚多可採者藍鼎元籍隸漳浦所著東征集閩省通行者必多著常青李侍堯即行購取詳閱於辦理善後時將該處情形細加察覈如其書內所論各條有與現在事宜確中利弊要者不妨參酌採擇俾經理海疆事事悉歸盡善

以為一勞永逸之計。○是月直隸總督劉莪等覆奏會商撥船安設事宜。內稱東省三四月間如遇漳衛各河水勢淺弱自臨清至德州一帶間有古淺處所相距二三里至十餘里不等。向係該州縣臨時雇備民船零星起撥。旗丁自行給價。每米一石給錢一二文不等。過淺後仍即歸糧船。倘遇河水充足之年即可毋庸備撥。至起撥之時每一糧船或起數十石至百餘石。總以重船能行為度。不能如直省之起六存四。均有一定章程可比。今若將撥船三百隻留於東省當春夏之交河水長落靡常不便聽其遠出貿易。而近地又無別項可以營運。水手口食維艱。若令糧船增給錢文則旗丁力不能支。若欲另籌款項酌給養贍是以常川不斷之工食養此偶一備用之撥船未免虛糜經費。此東省難以請留官撥船之實在情形。硃批。如此竟以仍歸直隸為是。又稱添造撥船原因直省而設。

惟是臨清一帶自未便仍雇民船。臣等悉心酌議。如果東省水淺需用撥船。先行酌計數目咨會直省。即於官撥船內撥往備用。俟水勢充足令其仍回楊村。硃批。竟可不令地方官照向例可也。如有似今年必需之處原可隨時降旨。所謂多一事不如少一事也。又稱撥船調赴東省船戶水手人等應酌給飯銀之需。得旨。照硃批可也。○山東巡撫覺羅長麟覆奏。山東本年雨澤愆期。恩准緩徵者已有七十州縣。其餘委無偏枯向隅之處。得旨。目今得需足雨澤否。河南麥大熟。山東鄰省自獲接濟之益。何未奏及。○湖南巡撫浦霖奏。審辦勾補寨苗匪各事宜。得旨。好應嚴懲。以儆其後。又奏附近各苗寨。隨同搜捕。夥犯並無勾結為匪。餘黨得旨。知道了。○湖南鎮軍鎮總兵尹德禧奏。謝議欽恩。得旨。更當勉力整飭營伍。安靖地方。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十一

實錄卷之一千二百八十一

三十五

清 實 錄 乾隆五十二年六月上

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十二

監修總裁官總纂修官太子太傅文淵閣大學士文淵閣領事領銜內大臣稽察欽奉 上諭事件護理
吏部理藩院事務正黃旗滿洲副都統世襲騎都尉軍功加七級隨帶加一級奉常加二級軍功紀錄一次慶桂
總纂官經筵講官太子太傅文華殿大學士文淵閣領事稽察欽奉 上諭事件護理刑部戶部三庫事務
世襲騎都尉軍功加十九級隨帶加二級又加二級軍功內大臣戶部尚書鑲黃旗滿洲副都統軍功紀錄五次
尋常紀錄十四次臣德瑛總纂修官太子少保工部尚書紀錄六次臣曹振鏞等奉

敕修

乾隆五十二年丁未六月丁酉朔諭軍機大

臣等據保成奏湖南勾補寨苗人石滿宜等
抗捕滋事一案當即馳抵銅仁督飭各卡員
弁將苗民石老稞等八名拏獲解交湖南歸
案辦理查勘本境苗民俱屬寧謐即起程回
署等語此案湖南苗匪滋事黔省境壤毗連
該提督一聞稟報即馳往交界處所彈壓本
境苗寨並將竄入該省之苗犯拏獲八名解
往審訊勇往急公所辦尚為得當但此後設
有鄰省地方案件須權事理輕重不可冒昧

妄行。若遇不甚緊要事務。亦復如此轉致人心疑惑。跡涉張皇。將此傳諭保成。並諭浦霖俞金鰲知之。○戊戌。諭軍機大臣等。據留京辦事王大臣奏稱。於五月二十五日微雨。即晴等語。京城左近尚在望雨。著交留京辦事王大臣等。即傳集能祈雨之回人。呢哱爾布庫爾等。照例敬謹祈禱。○又諭。據巡漕給事中阿那布奏報。南糧二進頭幫。趨入東境日期。一摺。內稱。大河前船隻。於十七日已催出東境。後跟之幫。亦俱陸續北上。閘河衛河水勢充足。船隻經行。浮送裕如等語。本年運河一帶。連得透雨。水勢充盈。重運得以銜尾通行。迅速北上。無虞遲滯。但今年係全漕抵通。且有搭解上年截留米石。為數甚多。務須隨到隨收。令其及早回空。最為緊要。況本年節氣較早。尤不可不趕緊辦理。著傳諭該倉場侍郎等。豫行籌畫。扣算兌收日期。如不能一律在通起卸。即酌量於天津北倉暫行兌收。

俾尾後各幫。迅速回次。收兌新漕。毋致遲誤。直省現有官造撥船。至明春陸續運赴通倉存貯。亦屬妥便。○福建巡撫徐嗣曾疏報。古田龍溪霞浦漳平等四縣。開墾各則田四頃十七畝。有奇。侯官縣開墾原荒各則屯田十畝。有奇。○以光祿寺卿依蘭奏為內閣學士兼禮部侍郎。○予故直隸提督李國梁祭葬如例。諡恪慎。○已亥。諭軍機大臣等。本日據留京王大臣奏雨水糧價一摺。因思前次京城查出囤積米麥減價平糶。因商人等擅具公呈。綿恩等遂顛預了事。反覆思維。愈增鬱懣。前此查封米麥。因疊經出示禁止囤積。而該商等惟利是圖。並不遵奉。是以議令減價平糶。尚未及議定章程之際。綿恩即據商鋪呈詞。奏請改辦。是不但該商等得以倚恃人眾。阻撓政令。為齊行罷市之漸。並使小民等聞知。竟若因該商等有具呈一節。禁令遂格於不行。更復成何政體。若使各行奸儉。復從

而效尤。豈不益長刁風。此不過事之最小者。尚如此茫無定見。若遇緊要重務。及作奸犯科之大於此者。又將何以處之乎。此時成事不說。毋庸再議。惟是京城米麥民食攸關。必須先事豫籌。朕啟蹕之前。京師三四月間。麥麩價值昂貴。朕即令將倉貯及內務府應用麥石。全行撥出平糶。以濟民食。此係軍機大臣共知者。後因總管內務府大臣查出所存無幾。不敷平糶之用。是以諭令豫省採買五萬石運京。復據畢沅奏。豫省前歲冬間。因歸德一帶賑糧需米。截留漕米三萬一千餘石。應行採買補運京倉。懇一體改買麥石。抵米運京。前後採辦麥石。共有八萬餘石。較為寬裕。且豫東二省商販運麥源。而至將來抵道者甚多。市價自可日就平減。但恐明歲京城青黃不接之時。麥價設又增長。小民不無食貴之虞。不可不豫行籌辦。或於豫省每歲應徵小米等項。令其酌改麥石。或十之三。或

十之二。運送到京。朕意於彼時。五城地方分設官廠平糶。各派大臣一員。御史二員。及步軍統領順天府等衙門。分派官役董司其事。如有奸商刁僧私行糶買。囤積居奇。及偷往他處販運漁利等弊。一經查出。自可隨時嚴行懲治。惟在司事之臣。實心經理。但恐麥石存貯日久。易致霉變。或將麥磨麵存倉。以備價昂時。即將麵飭出糶。以濟民食。亦屬有備無患之一法。但磨麵之後。比較麥石貯倉。是否。可以經久之處。著綿恩。阿桂。會同戶部。及倉場侍郎。悉心酌覈妥議。並將豫省應徵小米等項。如何改折麥石若干之處。一併酌議具奏。○又諭曰。莊錫舍自投誠後。屢次隨同官兵打仗殺賊。茲聞莊大田帶領番婦等屯聚南潭。即密行稟報。並自帶義民與官軍內外應合。當將番婦及賊犯林紅擒獻。甚屬出力。可嘉。莊錫舍著即賞給守備。並著常青面加曉諭獎勵。俾益知感奮。力圖自効。聞賊首

林爽文所給番婦札內有到府城相會之語。是其意實欲窺伺府城。特因大里杙是其巢穴。與諸羅相近。林爽文惟恐遠離該處。為柴大紀所乘。是以尚在諸羅一帶滋擾。而莊大田屯聚南潭等處。糾集夥黨。分踞要路。其意則專在府城。此時若能先將莊大田擒獲。則南路賊匪自可以次廓清。現在常青於粵兵到齊後。帶領出城勦捕。即連得勝仗。已覺壁壘一新。聲威壯盛。恒瑞所帶駐防滿兵及藍元枚所帶浙兵。一得順風。自可過渡。常青於恒瑞等到後。即可會同統領大兵。前赴南路。逐一殲除。乘勝疾趨。擄穴擒渠。一舉蕺事。再朕披閱藍鼎元所著平臺紀畧。藍廷珍進攻鹿耳門。收復郡城。不過七日。而其餘黨竄逃各處。乘間竊發。輾轉收捕。幾及二年。始能辦理完結。將來常青藍元枚南北兩路。進兵攻勦。擒獲首逆林爽文。莊大田等。自應解京。盡法處治。其被賊脅從。隨同附和之村莊百姓。

應先行曉諭。令其速行改悔。棄械歸農。即貸其一死。各為安分良民。以解散其黨羽。至賊目及天地會匪。自知罪在不赦。一見首逆被擒。勢必紛紛竄入內山。希圖苟延殘喘。及大兵徹後。又復勾結滋事。將來辦理轉為棘手。不妨權宜招致。並曉諭生番。如有竄入該境者。即時縛獻。賞以花紅布匹。如此辦理。俾賊匪餘孽無所逃竄。庶可淨絕根株。庚子調廣西布政使奇豐額為江蘇布政使。以山西按察使皮禮寶為廣西布政使。直隸口北道明祿為山西按察使。辛丑諭稽察庫倫各處卡座。應派蒙古章京協同彼處台吉等辦理。著交理藩院。於現任官員內熟諳蒙古語者。揀選一員。奏請發往。嗣後三年更換一次。其應得行糧等項。即照彼處章京例支給。諭軍機大臣等。據李奉翰奏。河湖水勢暴漲。各工搶護平穩情形。一摺。內稱現在湖

水加長。禦黃束清三壩已大加展拆而湖水仍長無消。則山盱五滾壩與其於盛漲時全行開放似不若豫啟一二壩使湖水循序下注。由高寶諸湖入運歸江。免致驟壅為患等語。此係李奉翰豫為占地步之計。斷不可行。已於摺內批示矣。從前下河一帶年年被水。田廬淹浸。小民生計可憫。是以高斌任總河時。總以謹守五壩為最要。而未思及拆清口之束水壩。是以有二閘之決裂也。朕於壬午

年南巡。指授機宜。立定水誌。山盱五滾壩非遇盛漲之年。不可啟放。以保下河民廬田畝。上年因五十年春夏亢旱日久。高寶諸湖俱經乾涸。是以令該總河等酌量情形。或將智信二壩啟放。俾清水宣洩入湖。以備將來水小時濟運之用。嗣因湖水盛漲。各處隄工漫溢。經該總河等將五壩全行啟放洩水。此係萬不得已之計。本年江南各屬春夏之間。雖雨水稠密。河湖水勢俱有增長。朕意應將清

口東西壩口門再行拆展。俾湖水東注暢達。歸海。其山盱五壩仍應謹守。如果湖水盛漲宣洩不及。實有不可不啟放一二壩之勢。該總河等臨時再行酌量情形。奏聞辦理。將此傳諭李奉翰並諭李世傑知之。壬寅諭軍機大臣等。據奎林奏將私行銷毀制錢鑄造普爾錢之回人密爾咂等定擬具奏一摺。已依議行矣。回人等膽敢作此不法。自因獲利甚厚。伊犁地方如是。烏什葉爾羌阿克蘇等

處皆設局鑄錢。理宜一體悉心訪查。務將私鑄制錢者嚴緝究辦。喀什噶爾地方曾否開鑄。如亦經設局。應令明亮等嚴查私鑄。所有伊犁烏什葉爾羌阿克蘇等處現鑄錢文及回疆普爾錢各行取數文。遇便呈覽。○癸卯以故四川建昌道屬苗出土百戶穀扒甲子姜磋襲職。○甲辰諭軍機大臣等。閱臺灣圖內斗六門有溪河數道。俱係通海之路。大埔林牛稠山一帶。現在俱有賊匪竄聚。斗六門

久被賊踞南北聲息不通經常青派令叅將潘韜帶兵一千名前往諸羅協剿該叅將因陸路賊多不能前進仍回至府城由海道至諸羅是沿海一帶尚無賊匪即日大兵進剿四路夾攻將斗六門大武壠等處竄踞賊匪廓清掃除設賊匪計窮勢蹙或偷覓小舟由斗六門至溪河逸出海口洋面島嶼叢雜易於竄匿希圖苟延殘喘亦未可定不可不豫行設法防備著傳諭常青等務揀派得力將備帶領弁兵於通海各溪河處嚴密防守所有通內山各要隘亦務遵節次諭旨派兵堵截並將船隻收藏毋令近岸如此四面防堵水陸兩路俱無虞乘間竄逸庶可搜剿無遺又諭據明亮奏請將喀什噶爾七城兵丁鹽菜銀兩照喀喇沙爾之例每銀一兩改折給普爾錢一百六十文已照所請行矣但錢價無定增減難憑現在每銀一兩換普爾錢一百七十八文久後錢價復減亦未可定著

明亮存記如遇一二年後價減之時即以時價具奏改辦○乙巳諭據留京辦事王大臣等會同議駁副都御史劉權之條奏仍復八旗米局一摺官局之設原為益於旗民但當米價方昂之時設立官局即須抑令旗人賤賣於官勢轉近於勒糶而經理不能妥協弊竇叢生仍屬有名無實自應停止已依議行矣至綿恩阿桂會同戶部順天府另摺議奏籌辦麥石以備明歲平糶一摺內稱豫省每年應徵粟米十二萬八百餘石以十之三改折麥石覈算可得麥三萬六千餘石恐尚不敷用因思山東地方向來種麥者亦多每歲應徵粟米二十四萬七千餘石若酌改麥石以十之一覈算亦可得二萬餘石二共有麥六萬石以之豫備平糶可資充裕等語東省本年春夏以來雨澤愆期麥收歉薄節經降旨緩徵並令該撫酌借口糧開倉平糶以資接濟是東省今年斷不能改徵麥石運京朕

所深知應俟明歲雨澤調勻麥收豐稔再行酌量辦理至豫省地土平行民間種麥較廣本年俱屬豐收現據畢沅奏請以麥抵米是便著依議行即令豫省改徵運京以備明年平糶之用設或明年麥價平減無須出糶而麥石久貯陳朽為虞即照綿恩等所奏於俸米甲米均勻搭放更可行之經久又綿恩等摺內夾片奏稱現在麥麵價值既已平減惟

米價一時未能即減懇請於京倉內撥米三萬石交與五城設廠平糶等語米糧價值民食攸關現在市價稍昂自應平糶以資調劑所請撥米三萬石為數尚少著竟於京倉內撥米五萬石每城交與一萬石若仍照舊例每城設立官廠既不免經費之繁而經管之大臣官員耳目難周勢不能不諉之司坊官家人吏胥等承辦難保無暗中串通滋弊情事仍屬有名無實朕意不若於五城各派大

臣一員在城內城外公同揀擇殷實大鋪戶各一處將官米交給該鋪戶自行糶賣仍官為酌定價值令其稍霑餘潤俾資贍給所有賣出價值即隨時繳納著派尚書胡季堂侍郎惠齡汪承霈海寧德成各分管一城率同該城御史專辦其事並會同步軍統領順天府嚴密查察如該鋪戶不遵官定價值仍私行擡高牟利者一經查出不但將官米撤回另選殷實大鋪承糶並將其鋪內自買米石

一併入官為平糶之用仍將該商治罪其有不願領米者即是把持禁令奸商治罪如前另選一人充之如此懲一儆百則糶賣官米之商人知所畏懼自不敢復蹈故轍而各城既有官米鋪戶平價出售小民自必皆赴該鋪糶買其餘民間米鋪若擡價居奇亦無人向彼糶買則該商等自不能不仿照官定價值出售米價不期賤而自賤所謂無官局之名而得便民之實似為妥善至倉內官米若

概行發給恐該鋪無地容貯著酌定數目陸續發交該鋪戶收領零星糶賣並著留京王大臣總司其事現定於六月二十日即行開釋其應如何酌定章程辦理之處即行詳悉妥議迅速奏聞以便屆期舉行○諭軍機大臣等刑部奏請定民人婚娶蒙古婦女殺姦治罪之例一摺據稱直隸山西有同一釁起殺姦之案直隸則以蒙古婦女非民人所得婚娶概以凡人闖殺定擬而晉省則以婚娶已久既為夫妻即以殺姦科斷辦理參差請嗣後民人娶蒙古婦女在本年六月申明定例以前者悉照民人夫妻服屬各例畫一辦理其在定例後概以凡人謀故闖殺各本律分別治罪仍通行奉天等處將民人不得婚娶蒙古婦女曉諭揭示並載入例冊等語所奏大意近是定例徒滋繁擾衆仍難於遵行國家休養生息中外一家本無畛域之分從前定例內地民人不准婚娶蒙古婦女或因

民人等暫時出口謀生在彼婚娶易滋事端是以設有明禁近來生齒日繁內地民人子身出口貿易種地者不可勝計伊等相處日久往來婚娶勢難禁止設遇有姦殺等案自當按律辦理何必分別多立條款刑部堂官於此等案件如直隸具題民人吳得義扎死梁作棟及崔明亮砍斃伊妻烏雅里二案該二犯既經婚娶蒙古婦女是夫妻名分已定該督何以又援蒙古婦人非民人所得婚娶以凡人闖殺定擬刑部自應按律改擬科斷如晉省鄰南惟子毆斃郭秉元一案鄰南惟子因伊胞叔告知伊妻與郭秉元有姦起意毆打該犯聽從糾約毆斃郭秉元與親屬捉姦之例相符亦應照律辦理以昭畫一而歸平允至民人不得婚娶蒙古婦女不但此條可刪並可無庸形之章牘將來遇有此等案件原可隨案定擬行所無事何必又生一番議論另立條款將此諭令知之○丙午諭軍

機大臣等。前因京師缺少雨澤。曾屢經降旨詢問。昨據留京王大臣等奏稱。現在遵旨設壇祈求。尚未得霑。渥澤等語。本日熱河自寅時得雨。起綿密滂沛。點滴入土。至辰刻勢尚未已。且雲氣自西南而來。勢甚廣遠。本日又據託倫奏報。初六日保定省城復得雨三寸。四野均霑。計保定又在京師西南。則京城一帶。亦自必同時普被。本年直省各屬雨水尚屬調勻。惟近畿地方。稍覺望澤。現在是否一

律普霑之處。著傳諭留京王大臣。即行隨報查明覆奏。○丁未諭。向來南糧餘米。俱准在通州變賣。以資日用。今年南來全漕餘米。必多。各省糧艘抵通。旗丁於交足正供之外。所有多餘米石。情願出售者。仍著加恩准其就近於通州糶賣。在旗丁等既所樂從。而近畿地方糧米益充。於市價民食均有裨益。該部即遵諭行。○諭軍機大臣等。前據保興奏。宣化府屬並附近地方。於五月三十。及六月初

二日兩次得雨。二三寸及五寸餘不等。昨又據烏爾圖納遜奏稱。本年張家口一帶。未得透雨等語。張家口距宣化近止九十里。相隔不遠。宣化附近地方。連得雨澤。而張家口一帶。何以尚未均霑。或係前次所得之雨。祇在宣化迤南。亦未可定。著傳諭劉綬查明張家口。是否一律續被甘膏。農田有無妨礙之處。據實覆奏。○命大學士公阿桂。大學士王杰。教習庶吉士。旌表守正捐軀河南安陽縣

民劉成子妻宋氏。○戊申諭。前因熱河文津閣所貯四庫全書。朕偶加披閱。其中訛謬甚多。因派扈從之阿哥。及軍機大臣等。覆加詳閱。並令在京之阿哥。及大學士九卿等。將文淵。文源。二閣所貯書籍。一體校閱。今據和坤等閱看各書。其訛舛處不一而足。此內閣若璩。尚書古文。疏證一書。有引李清錢謙益諸說。未經刪削。並黃庭堅集詩注。有連篇累頁空白未填者。實屬草率已極。著將承辦之總

校分校等。交部議處。現據紀昀奏請將尚書古文疏證內各條。遵照刪改。陸續賠寫。並請將文源閣所貯明季國初史部。集部。及子部之小說。雜記諸書。自認通行校勘。凡有違礙。即行修改。仍知會文淵。文津。三閣詳校。官畫一辦理。再行賠寫。抽換。務期完善等語。從前辦理四庫全書。係總纂紀昀。陸錫熊。總校陸費墀。專司其事。朕因該員等纂輯訂正。著有微勞。不次超擢。數年之間。晉階卿貳。乃所辦

書籍。竟如此荒謬舛錯。如果從前繕寫時。謄錄率意脫落遺漏。自不難將已邀議敘。現膺民社各員。斥革治罪。但此等訛謬。該謄錄等。惟知照本繕寫。勢不能考訂改正。而纂校各員。則係專司考訂之責。自應詳加細閱。方不致訛謬叢生。乃一任其襲謬沿訛。竟若未經寓目者。該員等所辦何事。其咎實無可辭。今紀昀既自認通行覆閱。明末各書復請將看出應換篇頁。自行賠寫。交部議處。而陸錫熊

則因現出學差。陸費墀丁憂回籍。轉得置身局外。是使紀昀一人獨當其咎。轉令現在派出之大小各員。分任其勞。實不足以昭平允。著將文淵。文源。文津。三閣書籍。所有應行換寫篇頁。及裝釘挖改各工價。均令紀昀。陸錫熊二人一體分賠。至陸費墀。本係武英殿提調。復充總校。所有四庫全書。伊一人實始終其事。而其洊陞侍郎。受恩尤重。較之紀昀。陸錫熊。其咎亦更重。現在續辦三分書。應發文

淵。文匯。文宗。三閣陳設者。經該鹽政等陸續領運。俟各書到齊時。除書格久經成造。安設外。所有面頁。裝釘。木匣。刻字等項。俱著陸費墀自出已貲。仿照文淵等三閣式樣。罰賠妥協辦理。就近陳設。以示懲儆。而服衆心。不必令鹽商等承辦。再朕聞各省從前送到遺書。底本發繕時。即有殘闕遺失。向坊間售買刻本。抵作原書之事。嗣於四分全書辦竣時。經總裁等奏准。所有底本。將來俱應存貯翰林

院衙門今續辦三分全書已經告竣此項底本自應查齊收貯但從前底本皆有印記可憑易於覈對且文淵等三閣所貯各書恐有名目參錯不齊及彼此互異之處著交六阿哥阿桂即將原書底本詳悉查覈是否係有印記呈進原書有無將坊本抵充再將文淵文源兩閣書籍逐一覈對卷帙書目是否相符按冊詳查據實具奏毋得稍存迴護俟查明後再將文淵文源兩閣書目總冊寄至熱

河以憑稽查畫一俾無魯魚亥豕之訛而功過益昭懲勸○諭軍機大臣等據富綱等奏暫請停辦粵鹽更定墮銷遲誤處分一摺已批交該部議奏矣摺內稱滇省委員辦銅赴粵領鹽視粵省委員辦鹽來滇易銅多需時日滇員一次銅易之鹽未到粵員兩次易銅之鹽已來逾年積壓現在粵鹽已存有七百萬餘觔已數三年行銷之用請暫停三年俟積鹽銷竣銅本歸清再行奏請並更定

墮銷處分等語滇粵兩省銅鹽互易自應年清年款方不致積壓墮銷今粵省易銅之鹽先後擁至積存七百餘萬觔自係滇省辦銅未能依限迅速而運到之鹽各屬又不能趕緊行銷以致陳陳相因愈積愈多且粵鹽不能行銷則民間將食淡乎抑更有私鹽乎今既已挨年疊壓不得不亟為疏通所有暫停運鹽及更定墮銷處分自應聽候部議但粵省以鹽易銅行之已久現在地方官銷售鹽

觔何以遲誤積壓並致課項懸宕且粵省運到之鹽即不能依限報銷間有存積亦應於積存之鹽約計逾年即奏明設法辦理何以積至七百餘萬觔足數三年行銷之用始行奏請停運此等情節富綱等摺內牽引煩絮總未詳晰聲敘著傳諭富綱等將粵鹽積壓是否因滇省辦銅遲延及地方官何以行銷延緩並該督等何以不及早設法籌辦之處一併查明據實覆奏○已酉戶部奏定新疆

辦事各員支給俸廉之例。內外大臣官員由現任作為叅贊領隊大臣或賞給職銜派往辦事者在京之俸銀俸米隨甲養廉在外之養廉鹽糧馬駝等項均照銜支給。派往新疆人員但經賞給頂戴及有効力併効力贖罪字樣者均令其自備資斧在京在外一切得項不准支給。革職後棄瑕錄用賞給職銜派往者無論已未補缺所有俸祿養廉隨甲俟差竣回京得缺及到任後再行照例支給。至鹽菜糧馬駝准其照銜支給並不准給與在外養廉一向例藩臬兩司或曾經獲咎或係不能勝任以本銜派往新疆辦事者所有俸廉及鹽菜馬駝等項分例一概不准支給。是獲咎與不勝任之督撫亦應照此辦理。惟並無過犯祇以新疆辦事需人奉旨以本銜派往之督撫兩司除不准支給俸廉外所有鹽菜馬駝等項及在外養廉仍准支給。一外任大臣官員丁憂回旗由京派往有

實錄卷二百八十二

五

賞銜者照賞銜支給俸廉隨甲司道照郎中俸知府照員外俸其外應得之項均照指派地方分例支給得旨允行。庚戌諭軍機大臣等據蘭第錫等奏黃河水勢異漲南岸睢州下汛十三堡於初九日寅時隄工漫水二十餘丈大溜仍走大河尚未全掣口門分溜不過二三分現在督率文武員弁捆埽堵截以冀掛淤集事等語已於摺內詳悉批示矣前因該督等奏黃河水勢於伏汛前暴漲即諭令加意修防今睢州下汛十三堡復有漫溢之事該處原無埽工究由水勢陡長又值急風暴雨以致搶鑲不住所有蘭第錫等奏請交部治罪議處之處皆可寬免至漫口不過二十餘丈正河溜勢未掣口門分溜不過二三分尚屬不幸中之幸且李六口開放引渠分溜將舊土山刷去六七十丈十三堡原無埽工之處既經漫水則迤下十四等堡險要埽工可免著重而漫水仍走舊河將來原

實錄卷二百八十二

五

歸故道。或轉屬好機會。亦未可定。該督等此時不必心存惶懼。惟應督率在工文武員弁。速將口門兩頭裹護。不令塌寬奪溜。一面趕緊捆埽堵截。以冀掛淤集事。至黃水經過。民田廬舍。未免被淹。著傳諭畢沅。即派委妥員。詳悉查勘。妥為撫卹。無致一夫失所。○豁免浙江仁和鹽場被潮衝沒各則蕩地共一萬一千五百三十六畝額課。○辛亥。留京辦事王大臣永琅等奏。酌定平糶章程事宜。查向

實錄卷一百一十五

書

來五城平糶。皆於內外城適中之地。各設廠一二處。使小民便於糶食。今雖改交商辦。仍應於內外城適中地方。每城選擇殷實鋪戶二家。令其承辦。至倉貯均係粗糧。民間逐日所買無多。勢難自為舂碾。從前平糶粗米。小民糶買後。兌給碾房。每一升換細米八合。雍正九年。曾將細米平糶。亦以粗米加二覈算。此次若照從前出糶粗米。則輾轉兌換貧民既未能即時煮食。且恐啟鋪戶及碓房轉買

囤積之弊。臣等擬將領出之米。即交該鋪戶舂細。令其按八折交出細米。每細米八斗。仍照粗米一石。比市價酌減平糶。所餘碎米糠粃。儘可抵給舂碾工費。至向來各處報部糧價。參差不一。茲據五城等處。呈報實在糧價。每粗糶米一倉石。制錢一千五百四十文。今較市價酌減一百文。其糶出細米。即照此以八折覈算。如此後市價再能平減。即將出糶官米。續行遞減。至應糶米五萬石。自應陸續

實錄卷一百一十五

五

發交。現擬令五日一領。每次領米二千五百石。於本月二十日開糶。先期知會戶部。劉知倉場。派定倉口。令五城司坊官親身赴倉支領。與臣等派員。眼同量給。各鋪戶收賣。至各鋪戶所用升斗。大小不一。現在臣胡季堂會同戶部。照依官設倉斗。較準烙印。領取給用。其赴倉領米車價。例按道路遠近覈給。此次係歸商辦。應即於出糶米價內。按部定車腳。隨時給發。不得另行開銷。所有糶出之錢。即

照例令司坊官陸續解交戶部搭放兵餉工程處等項之用。以省易銀折耗。至鋪戶等難保無私擡價值。短少升合等弊。臣胡季堂等及派出司員。並步軍統領衙門。順天府五城御史。人數衆多。若在各鋪逐日稽查。又恐吏胥借端滋擾。臣等惟有會同各衙門。於各鋪戶左近地方。另覓寺廟公所。常川親往密行查察。務使商民兩便。得肯依議速行。尋諭軍機大臣曰。留京王大臣等奏。平糶章程一摺。已依議速行矣。惟摺內稱。另覓公所。親往密查一節。斷不可行。此次平糶米石。交於殷實鋪戶。不設立官廠。原恐家人吏胥。從中滋弊。今復於各鋪戶左近地方。另覓寺廟。大臣等常川稽查。勢仍不能不各帶司員人役。則一切費用。皆無所出。即難保無借端滋擾各鋪戶情事。是無官廠之名。轉滋勒索之弊。此事祇令派出之監糶大臣。步軍統領。順天府。五城。或五日。或十日。輪流親往各該處抽查。情

實錄卷二百三

三

弊自無難立見。倘於米色升斗價值內。或恐隨時參差不齊。暗中舞弊。不能即時查出。何難密遣親信員役。前往糶買升斗。則米色之純雜。升合之大小。及照官定價。有無私自增加之處。無難水落石出矣。又何必另覓寺廟。徒滋擾累耶。將此諭令知之。

實錄卷二百三

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十二

大清高宗法天隆運至誠先覺體元立極敷文
奮武孝慈神聖純皇帝實錄卷之二千二百八十三

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆五十二年丁未六月壬子諭前經降旨

將藍元枚調補福建水師提督其福建陸路
提督員缺令常青李侍堯於柴大紀普吉保
常泰三人內察看孰為出力並才具堪勝提
督者保舉一人候朕簡放今觀柴大紀自駐
守諸羅以來屢次將賊敗退實屬奮勉可嘉
柴大紀著即補授福建陸路提督但柴大紀
任臺灣總兵已經數年於該處情形較為熟
悉將來剿賊完竣所有善後事宜正須該提
督隨同常青悉心籌辦柴大紀著以陸路提

督兼管臺灣鎮總兵事務在彼彈壓照料俟
軍務告竣候朕酌量可以調回內地時再行
降旨柴大紀未回任以前所有福建陸路提
督事務著常泰暫行署理○湖南巡撫浦霖
奏武陵縣於本年五月間大雨時行湖河泛
溢衝塌城外官隄二百九十大有奇除水府
廟白沙隄二處潰口一百四十二丈係上年
請修之工應令承修之員按段賠修外其餘
一百四十八丈應請動項興修再於地形低

下處酌加子隄一道高寬皆以二三尺為度
其被淹田畝二十七村莊共田七千一百九
十五頃有奇內有旋即消退禾苗並無傷損
者三千七十八頃現已涸出補種者一千四
百八頃尚未涸出者二千七百八頃該地民
人前歲被旱去歲被水俱有應徵舊欠及應
完借給籽種口糧請緩至明歲秋後徵收得
旨允行下部知之○癸丑諭湖南鳳凰屬
苗匪石滿宜等搶奪拒捕滋事不法一案經

總兵尹德禧會同該道親率將備官兵前往直搗賊巢立時平燬生擒首犯石滿宜等所辦受速可嘉已明降諭旨將該總兵交部從優議叙矣此案該總兵本屬有功無過但尹德禧有奏事之責於所屬苗匪滋事不法帶兵前往勦捕理應一面查辦一面具奏由驛馳遞何以該鎮於此事始終並不專摺具奏僅以咨報浦霖俞金鰲聽其具奏完事耶各省總兵俱例得專摺奏事者原不獨藉悉地方情形且據伊等所奏朕隨事可以觀其才具器識如該鎮等有喜事見長之人干與地方事務越俎妄陳者奏到時自難逃洞鑒至其本分應奏之事理應隨時據實陳奏乃近來各省總兵所奏不過具報到任及查閱營伍等事即雨水收成亦間有奏及但該鎮等果能將實在情形據以入告披閱之下設所奏與督撫不同或督撫有諱飾之處原可叅互照察降旨詢問以收兼聽並觀之益乃該

鎮等即使奏及雨水收成亦不過仿照督撫所奏敷衍塞責又安用此具文為耶著通諭各省總兵此後遇有地方緊要事件皆須專摺奏聞即尋常雨水收成情形亦應隨時據實奏報毋得循照舊例虛應故事並著尹德禧於苗匪滋事一案何以不將查辦情形自行具摺之處據實覆奏○乙卯諭據毓奇奏江西贛州幫永建幫漕船於五月初二日在鄱陽湖陡遭風暴將贛州幫船三隻永建幫船六隻同時打散漂蕩米一萬一千四百餘石請將委運千總路悅書楊嘉穀革職留任並准何裕城咨將所漂米石著落糧道初之朴賠補並將該道及押運通判徐坤叅奏等語江西贛州等幫重運漕船在鄱陽湖地方揚帆渡湖之際陡遇暴風猛雨搶救不及以致糧艘打散漂失米石究係人力難施尚非該旗丁等有心玩誤所有漂蕩糧米一萬一千四百六十三石零著加恩豁免毋庸令其

賠補該道初之朴。及運員徐坤亦著寬免議處。至該丁軍船遭風漂沒。隨船什物土宜亦漂失一空。且淹斃人口至十七名之多。情殊可憫。所有該幫漕船九隻。著加恩一體免其賠造。照例官為成造。隨船席竹等物一併免賠。淹死人口均著照例分別卹賞。其委運千總路悅書楊嘉穀不能及早催趲渡湖。自有應得之咎。俱著從寬革職留任。俟八年無過。方准開復。以示懲儆。○又諭現在臺灣勦捕賊匪林爽文等尚未完竣。辦理軍需糧餉等事。該省官員恐不敷差。委著派伊轍布德明額李滉李華國袁秉義成明。即各由驛起程。前赴閩省。交與常青李侍堯酌量分派差遣。委用。諭軍機大臣等。據常青等奏請再調廣東兵四千。京兵一千。湖廣兵四千。貴州兵二千。臺匪即可勦捕淨盡等語。湖廣貴州距閩省遼遠。京兵前往更需時日。且長途調撥。跡涉張皇。今常青等已咨會孫士毅調兵四

千。該省原有挑備兵二千。前後共有六千名。此外著存泰圖薩布於粵省駐防滿兵內挑選一千五百名。並著寶琳琅玕等於浙省杭州駐防滿兵內挑選一千名。乍浦駐防滿兵內挑選五百名。合之李侍堯挑備督提兩標及延建等營兵二千名。已足常青等所請之數。著傳諭孫士毅等星即遵照迅速派往。所有粵省駐防滿兵著副都統博清額帶領。浙省駐防滿兵著已陞將軍乍浦副都統永慶帶領。其粵省綠營兵著孫士毅於曾經行陣之總兵內簡派一員統領前往。並於將弁內揀派熟諳軍旅者分起帶領。又常青等請派一大員督辦軍需。李永祺曾任川省道府軍需尚為熟手。著該臬司速赴臺灣督辦。閩省秋審已過。臬司尚無要務。著李侍堯於道員內揀派一人署理。○又諭曰。常青等統兵進剿。遇賊蟲湧前來抗拒。乍見兵少賊多。未免驚惶。但調兵動經數省。又隔重洋。未免緩不

濟急。臺灣更覺炎溽。尤恐水土不服。若簡派京兵。又須大員帶往。未免駭人觀聽。已另降諭旨。派廣州杭州駐防滿兵。及李侍堯先行調備本省兵。合之常青等。現在咨調粵省兵。及孫士毅挑備兵。已足該將軍所奏一萬一千之數。以九千名前赴常青處。聽候調撥。其餘二千名。著往鹿仔港。以助藍元枚之力。自足敷南北兩路攻勦之用。再藍元枚進到圖說內。有岸裏社熟番三千餘人。不肯從賊等語。此等熟番。被賊誘脅。不肯附從。即與義民無異。藍元枚應速為慰撫。給與馬兵糧餉。令隨同官兵打仗。於聲勢益覺壯盛。若不給與養贍。該番等莊社既為賊匪焚燬。無以資生。豈不去而從賊。並著傳諭常青等。南路如有似此不肯從賊之番社。民壯皆應招集獎撫。或令入伍。以壯聲威。而分賊勢。但須詳慎查察。恐其中有賊匪混入。希圖內應之事。不可不加意嚴防也。再現在大里杙水沙連等處。

賊巢內有民人十餘萬。因衣食缺乏。多有從賊入夥者。若因其從賊打仗。即不准其悔罪投誠。此等脅從民人。永無自新之路。轉堅其從賊負固之心。所關匪細。著常青藍元枚等一面出示曉諭。無論從賊打仗。及被賊驅使者。一經棄械投誠。即為良民。或諭令歸耕。各安本業。或有隨營自効。勦賊立功。如莊錫舍者。即酌量獎拔。以解散賊黨。尤為此時要務。至林爽文不但上干國法。而且累及父母。實屬罪大惡極。覆載不容。斷無不速就殲滅。即使藉詞地方官平日擾累。以致伊等激成事端。但地方文武俱為所戕害。已足相抵更復何所藉口。且朕惠愛黎元。休養生息。雖臺灣遠隔重洋。撫綏軫卹。從無岐視。現在被脅民人。具有天良。斷無始終附逆。甘心從賊之理。況賊匪雖猖獗。皆為烏合。究易潰散。此時脅從者。將來徒受其累。同歸殲戮。亦何所貪戀。而不速行悔罪自新耶。著常青藍元枚將此。

傳旨詳悉出示曉諭。俾脅從百姓及早投出。歸耕賊黨。自日見離散。漸就窮蹙。○丙辰。諭軍機大臣曰。常青本由都統將軍。甫經簡授。總督更事未多。今自到臺灣後。一切調度。尚能妥協。已出意料之外。但伊究竟年逾七旬。精神未能周到。而恒瑞又係年輕。未曾更事之人。殊不可恃。常青等昨奏請派一大員到臺灣督辦軍需。其意未必非自揣難以勝任。欲朕另簡大臣前往督辦軍務。不可不豫為籌及。朕思此事自應阿桂前往督辦。但念伊亦年逾七十之人。不忍令其遠涉重洋。和珅又不時手足舊疾復發。且朝夕扈從。承旨書諭。難以分身。將來派出之領兵大臣。如海蘭察等。亦非常青李侍堯所能統轄駕馭者。因思福康安年力富強。於軍旅素為諳練。又能駕馭海蘭察等。若以前前往督辦。足資倚任。現在甘省亦無緊要應辦之事。著福康安接奉此旨。即帶印由驛起程。前來行在。陛見。豫

備差遣。所有陝甘總督著勒保赴甘省署理。福康安於途次遇見時。即可將印信交接。尤為便捷。若常青等續有奏報勦捕賊匪業已得手。不難剋期集事。即馳諭福康安仍可於途次回甘省本任。勒保亦回晉撫之任。○丁巳。諭軍機大臣等。昨據常青奏稱官兵勦賊出臺灣府城。於關第廳安營等語。朕意此處必有

關聖廟宇。常青等避寫帝字。改書為第。如果

有。關聖廟竟應書寫帝字。從前西路用兵之時。兆惠扎卡因守我官兵曾蒙

關帝顯靈護佑。我朝開基之初。亦曾累顯靈應。我滿洲無不敬奉。常青等皆係滿洲。應即往拈香虔祝。以祈默佑。○戊午。諭軍機大臣等。據明亮等奏。鄂斯瑞遣伊屬人將私鑄普爾錢之為從。回匪薩木薩克等四人拏獲。審明。照例定擬。並行知塔琦將已回葉爾羌回

人呼圖魯克蘇丕圖爾第蘇丕緝拏等語鄂斯瑞急公如此甚屬可嘉著加恩賞給大荷包一對小荷包一對所有拏獲回匪即照明亮等所擬完結呼圖魯克蘇丕等既回至葉爾羌著塔琦即將伊等查拏照例審辦從前鄂斯瑞曾拏獲私鑄回匪呢雅斯經朕賞給大緞今又查出此案葉爾羌亦必有似此藐法私鑄者色提巴爾第務宜留心躡緝果能飭屬嚴查朕當照鄂斯瑞一例加恩但不可濫及無辜也已未遣官祭

火神廟諭曰何裕城奏據星子縣稟報江西贛州永建二幫漕船出口時阻風落後在左蠡地方陡遇暴風打散船隻漂蕩米石又據署糧道初之朴稟稱照料糧船先至前途催趲贛永二幫阻風在後致遭漂沒各等因但押運廳弁不行沿途照料任聽尾船落後署糧道顧前失後率行捏報出境請旨將押運之建昌府通判徐坤革職署糧道初之朴

交部嚴加議處所有漂失米石即今初之朴照數賠交並自請一併交部嚴加議處等語前據毓奇奏贛永二幫漕船在鄱陽湖陡遇暴風人力難施非運員玩誤失事可比是以降旨加恩將漂沒米石免其賠補並該道廳等處分俱行寬免今據何裕城奏該幫糧艘因阻風並未出境該道先至前途催趲率行捏報出境該廳又不沿途小心照料以致尾船落後猝遇暴風打散船隻漂沒米石閱其情節毓奇係在淮聞信具奏自不若該撫見聞較切而該道廳等顧前失後捏報不實自有應得之咎不得諉之風狂浪湧人力難施倖邀寬宥著照該撫所奏將押運之建昌府通判徐坤革職署糧道初之朴交部嚴加議處其漂失漕米一萬一千四百餘石即著初之朴照數賠交補運其運丁撫卹免賠造船之處仍照前旨何裕城既據實奏聞著免交部庚申諭曰臺灣逆匪林爽文等糾眾不

法刦縣戕官該處知府同知知縣等同時被害前經常青等查明具奏朕因各該員究係守禦城池猝被戕害尚屬因公是以降旨交部從優議卹今細思徐訪知逆匪林爽文等起事之由皆因該地方官平日廢弛貪黷視臺灣缺分為利藪不以冒險渡海為畏途轉以得調美缺為喜督撫之無能者又或徇情保薦明知不察曖昧牟利皆不可知而劣員等並不整頓地方撫綏安戢於作奸犯科者又不及早察辦惟知任意侵漁肥橐以致斂怨殃民擾累地方遂使桀驁奸民有所藉口即如上年楊光勲等結黨倡會拒捕戕官一案該地方官並不徹底嚴究痛示懲創轉將所立天地會名目改為添弟字樣希圖化大為小將就了事此即明證也以致會匪奸民等由此益無忌憚肆意妄行是林爽文等滋事不法實由該地方官養癰貽患釀成事端且林爽文恃其險阻將所住大里杙巢穴繕

完布置竟成負固之勢又私造旗幟器械是其蓄謀已非一日該地方官平日惟利是圖漫無覺察形同木偶以致逆匪等乘機竊發猖獗蔓延至今勦捕尚未歲事除近年歷任督撫已令罰賠軍餉及現任文武各員令常青李侍堯等於事竣後嚴行查叅辦理外至此次被害各員身任地方全無整頓致使民怨滋事賊匪縱橫使其身若在尚當治以重罪今雖身被戕害已為僥倖非衅起倉猝仗節抱忠歿於王事者可比今不加追究將伊等家屬治罪已屬格外從寬而伊等種種廢弛激變縱惡養奸貽害地方該處民人受其荼毒若此等劣員仍得復邀恩卹之榮於身後又何以警貪劣而肅官方不可託之善善欲長惡惡欲短也所有已經具題議給卹典者著暫停辦給其未經咨部具題者概從緩辦此等被害各員內或有平日居官尚稱廉謹當被賊戕害時實能抗節罵賊而死及到

任未久在倡會以後者該省官民自有公論著交常青李侍堯詳確訪查據實具奏到日另行分別降旨以示彰善癉惡微勞必錄至意又諭據綿恩奏訪查西山西峯寺有婦人張李氏自號西峯老祖活佛能看香治病誑騙財物當即派司員同宛平縣密赴該處查辦搜出符咒經卷畫像及金銀衣服器皿均非該氏應有之物並詢出原任大學士三寶之寡媳現任銀庫員外郎恒慶之妻俱施銀蓋廟捨婢焚修等情節一摺聞之殊堪駭異張李氏係鄉野愚婦膽敢潛住近畿妄稱活佛畫符賣藥煽惑人心誑騙貲財至數萬金置買房地開設鋪面且該犯擅用黃緞坐褥靠墊情節甚為可惡著交留京王大臣會同綿恩刑部堂官嚴切審究該犯張李氏並非喇嘛竟敢擅用黃緞坐褥將來定案時應照例從重問擬不得僅照邪教惑眾辦理致有輕縱所有該犯及伊子財產俱應入官恒

慶著解任歸案聽候審訊其張李氏之子張明德廣月及案內有名犯證一併嚴審定擬具奏又諭軍機大臣等據烏爾圖納遜奏張家口等處自春間得雨未及一寸高阜之地至今尚未耕種該處氣候早寒立秋以後雖得微雨亦不能趕種等語張家口一帶春夏以來雨澤稀少大田尚未布種農民不無失望彼處即係宣化所屬戶口亦為繁庶前已諭令劉戡查明撫卹嗣據該督奏已飭該府親往各屬查勘實在情形豫行酌給籽種口糧俟查覆到日再行照例辦理等語現在已屆立秋該處地近邊疆天寒較早晚禾恐不及趕種著傳諭劉戡即將宣化近邊一帶地方迅速確查如有業經成災者即行實力撫卹毋使一夫失所尋奏宣化懷來保安西寧懷安萬全等六州縣及萬全縣之張家口被旱較重請借給兩月口糧得旨允行下部知之辛酉諭軍機大臣等本日據江蘭奏查

勘被水地方情形一摺已於摺內批示矣。睢州十三堡漫工前據蘭第錫等奏籌辦圍隄築壩現在東隄頭已經裏定不復再塌一俟採買料物齊全即相機進占等語。此次漫水仍循四十九年以前黃流故道該處地勢淤平辦理自易為力該督等委員購買稽蔴料物自己陸續運工著傳諭蘭第錫等務須督率在工員弁上緊趕辦及早蒞事並著將現在堵築壩工已有幾分約於何日可以合龍之處迅速具奏至下游被淹地方現經江蘭親往查勘著傳諭畢沅即行按照被水輕重情形妥為撫卹毋致一夫失所。又諭本日李世傑等奏洪澤湖因十五日西北風暴較大兼之大雨如注湖中浪若排山異常汹涌信壩已被風浪掣動過水仁義二壩尚未刷通風息雨止後趕緊補築等語。湖河驟漲下游高寶諸湖雖尚可容納但山圩五壩封土不可輕動今既將智禮信三壩先後開放所

有仁義二壩及車邏等壩務須敬慎保護倘或湖水盛漲宣洩不及實有不能不啟放之勢須隨時酌量相機啟放下游一帶民田廬舍所關甚大不可不豫為籌及或先行曉諭該處民人早為遷避並將秋禾及早收割以防淹浸該督等務實力妥辦以副朕軫念民依至意。又諭前經降旨令常青藍元枚等就郡城鹿仔港一帶廣行招募即曾經被賊迫脅附從者一經應募投到不妨即令食糧充伍既可以添我兵力又可以解散賊黨今藍元枚於未奉諭旨之前已將難民勇壯者挑作義民給予口糧令其幫助官兵自屬得力即予錢糧入伍均無不可並著常青於該處被難之人一體挑募給糧充伍至大甲溪岸裏社之義民熟番不肯從賊現經藍元枚差弁曉諭令其攻迫賊巢分掣賊勢所辦甚合機宜。常青年過七十親歷行陣督率侍衛章京將備併力向前人人用命朕心深為嘉

獎著賞戴雙眼花翎。叅贊藍元枚自抵鹿仔港以來一切調度合宜。打仗得勝。伊係藍廷珍之子。伊父從前勦辦奸民。朱一貴收復金臺。奮勇克捷。聲威久著。今藍元枚在鹿仔港統兵進勦。能繼家聲。實為可嘉。亦著賞戴雙眼花翎。臺灣道永福。知府楊廷樺率領義民打仗。亦屬奮勉。均著賞戴花翎。至鳳山潰兵。前據常青奏。投回府城有一千一百餘名。續據柴大紀奏。又稱有潰兵五百餘名。已許令

戴罪圖功。是前次鳳山兵丁潰散已回者數目不甚相懸。該將軍止須於柴大紀處覈對。即可得實在數目。至臺灣百姓被賊侵擾。焚燬村莊。耕種失業。該將軍等於收復各路時。務妥為安撫。俾得盡力補種。既可免其失所。更得多獲糧食。兩有裨益。此為最要。○壬戌諭前據蘭第錫畢沅奏。黃河水勢異漲。南岸睢州下汎十三堡。本無修防。處於六月初九日寅刻。隄工漫水二十餘丈。分溜不過二三

分。現在督率文武員弁。捆埽堵截。以期掛淤集事。并各自請交部治罪等語。前因該督等奏黃河水勢於伏汎前暴漲。即經降旨諭令加意修防。乃睢州下汎十三堡。竟有漫溢之事。但念該處原無埽工。且因水勢陡長。又值疾風暴雨。以致搶鑲不住。是以將蘭第錫畢沅所請交部治罪之處。加恩寬免。至漫口不過三十餘丈。正河溜勢未掣口。門分溜不過二三分。尚易堵築。是以諭令該督等上緊籌

辦。以期速行堵合。本日據蘭第錫等奏稱。漫口漸次塌寬。已掣溜六七分。十八十九二十等日。大雨傾注。北風大作。河水復又增長。大溜全注口門。正河存水僅止一分。現在催趨承辦之員。竭力上緊堵築等語。是睢州下汎十三堡已成決口。大溜全掣。不可無重臣前往督辦。阿桂於堵築事宜。屢經任使。素為諳練。呼應較靈。著即馳驛前往睢州工次。熟籌妥辦。並即自京起程。毋庸前來行在請訓。昨

據李奉翰書麟等奏聞豫省南岸隄工有漫溢之處。即派令臬司康基田遊擊韓勝帶領備弁兵丁馳赴豫工。隨同進埽堵築。李奉翰亦俟過秋汛。即前往幫同辦理。書麟俟淮揚廳修守事宜商定。即往漫水下注之亳州蒙城一帶查勘被水情形等語。但本年湖水節經漲發。水勢較大。現在睢州南岸漫水。由亳州等處下注入淮。匯歸洪澤湖。將來湖水自必日就增長。該處高堰一帶隄岸關係緊要。

皆須李奉翰在彼督率修防。李奉翰不必前赴豫省。竟當在清口洪澤湖等處。會同李世傑加意防護。以期鞏固。書麟赴亳州蒙城等州縣查勘被淹情形。即由彼至睢州。本屬順道。著書麟於查勘災務事畢。即交地方官妥協經理。勿使一夫失所。即行就便前赴工次。彼時阿桂自己到工。即可幫同蘭第錫等商辦堵築事宜。至睢州漫工。現築圍隄挑水壩。固為挑溜進占而設。但亦須察看情形。現在

大溜全掣口門必寬。不妨次第進占。若口門漸收。溜勢湍激。遽行進埽。不能堅實到底。徒資糜費。則不可不相機妥辦。目下已過立秋。節屆處暑。但庚伏未過。又值大雨之際。水勢有增無減。恐一時未能堵合。然計阿桂書麟抵工。正屆秋汛末期。伊等商辦一切。雖未免有需時。即不久即過白露。俟水勢漸退。自易為力。彼時料物充足。兵夫踴躍。合龍可期。穩固。至蘭第錫等奏現須稽料等項。幸今歲秋田豐稔。購辦尚易等語。本年秋成尚早。摺內所稱秋田豐稔。自指去歲而言。乃誤寫今歲字樣。已於摺內改正。至採青一事。斷不可行。新料既不堅實。體又重脆。於壩工既不能得益。且未經成熟。即行刈割。以致小民不能收穫。甚為可惜。及至將來築壩急需料物時。轉致短絀。殊屬兩有妨礙。自應先儘去歲舊料買用。斷不可存欲速之見。用青苗也。阿桂已差往豫省督辦漫工。著添派綽克托辦理。留

京事務。綽克托身兼兩部。職任較繁。著暫不必辦理。戶部事務。所有未回鑾以前。戶部尚書。著金簡暫行兼署。○豁除河南鄭州。乾隆五十一年被水衝沒民地一百五十頃十四畝。旌表守正捐軀直隸南皮縣民劉相女劉氏。癸亥諭。前因內外文武大臣。遇有應得處分。部議降革。經朕從寬留任。及免其革任者甚多。竟有一人而累至十餘案者。未免視為故常。無所警惕。轉屬有名無實。非所以

重懲李書全

重

整飭官方之意。是以諭吏兵二部。將內外文武大臣。每人名下所積處分。查明具奏。候朕覈辦。並令嗣後每屆五年。查奏一次。茲據該部摘敘原案次數。開單呈覽。朕詳加察覈。在京大臣內。如喀寧阿。穆精阿。所得降革處分。俱已積至七案。姜晟積至九案。處分數多。喀寧阿。穆精阿。著將任內應得廉俸分例。各罰出二年。姜晟已任湖北巡撫。但其所處分俱係在刑部侍郎任內之事。仍著將侍郎任

內應得廉俸分例。罰出二年。所有喀寧阿。穆精阿。姜晟。從前降革處分。俱准其開復。至各省督撫處分。積至六案以上。至十案者八人。內如尚書德保。侍郎李封。所得降革處分。多係從前在巡撫任內之事。德保。李封。俱著罰出巡撫養廉二年。劉戡。李世傑。孫士毅。閔鶚元。畢沅。俱著照本任罰出督撫養廉二年。內劉戡。因大名府段文經等滋事一案。停止本年廉俸。李世傑。因各營火藥短少一案。停止

重懲李書全

重

三年廉俸。此二案不比尋常失察。仍著照舊扣支。外畢沅。並未拏獲要犯。其本年廉俸。仍照前旨支給一半。雅德。現以副都統銜。在喀什噶爾辦事。所得處分。俱在從前督撫任內者。著罰出總督養廉二年。所有德保。劉戡。李世傑。孫士毅。雅德。閔鶚元。畢沅。李封。從前降革處分。既已議罰。俱著准其開復。伊等俱係屢獲愆尤。經朕從寬留任。今又概予開復。益當倍加警省。感激思奮。以副朕棄瑕委任之

意此外降革處分俱在五案以下之各員統
候五年查辦時該部查明具奏再行覈辦○
甲子諭軍機大臣等據福康安奏甘省六月
初河東河西連得雨澤蘭州省城初八初十
日亦獲甘霖附近金縣河州等屬及稍遠之
隴西等處並俱得雨霑足惟節候業已稍遲
前奏皋蘭等屬被旱較重地方仍不免夏收
失望如有必須撫卹蠲緩事宜俟該司道查
勘明確督率妥辦等語甘省地處邊陲當夏

實錄卷一百一十五

五

禾長發之際全賴雨澤滋培今蘭州及隴西
等處雖已節次得雨霑足但節候業已稍遲
夏收失望其被旱較重地方業經福康安酌
借籽種口糧並量撥倉糧減價平糶但恐乏
食貧民不無拮据著傳諭勒保於到蘭州後
一俟該司道查勘明確如有必需撫卹蠲緩
者即一面奏聞一面督率所屬實力妥辦毋
致一夫失所其各屬內間有被雹及山水驟
發田禾被傷並淹斃人口衝塌房屋之處均

關民瘼亦著飭屬查明分別輕重一體撫卹
以副朕惠卹邊黎至意○又諭曰勒保奏大
同府大同豐鎮天鎮陽高山陰懷仁等六廳
縣六月以來未得雨澤頗形亢旱現在出穀
平糶委霍州知州前往查勘俟查覆到日再
行妥辦等語大同等各廳縣均係關外地方
土瘠民貧況本年麥收較歉現又雨澤愆期
農民不無失望該撫業已將倉穀出借平糶
委員查勘著傳諭鄭源璠俟查覆到日務將

實錄卷一百一十五

五

大同等屬受旱輕重情形是否成災應須酌
量緩徵賑卹之處妥協辦理據實具奏毋致
一夫失所以副朕厯念民依之意○乙丑諭
據長麟阿那布同日奏宣州幫漕船於六月
十九日在鉅野縣通濟閘地方猝遇風暴雨
雨交作掀起大樹帶斷錨纜旗丁王宗城等
軍船六隻被風扳倒大桅船身板裂登時沉
溺除已撈獲濕米外計衝瀆虧折米九百五
十石押令抵通買補交納等語漕船在內河

失風沉失米石例應著落旗丁賠補但念此
次宣州幫船猝遇風暴斷纜扳挽又值昏夜
風大溜急究屬人力難施非該旗丁等玩誤
失事者可比所有碰裂船隻仍令該旗丁自
行修造撈獲濕米准其分限臨倉買餘抵補
其漂沒米石著加恩免其賠補○以兵部侍
郎海寧為鑲藍旗蒙古副都統○是月直隸
總督劉綎奏宣化府屬大田望雨情形得旨
已據保興奏報得雨矣若有未足及成災者

實錄卷二百八十三

吏

仍當撫卹不可粉飾○兩江總督李世傑等
奏伏汎河湖水勢情形得旨覽奏欣慰秋汎
正長當益加敬慎○河南巡撫畢沅覆奏昨
汎漫口被淹地境尚少現在查明戶口照例
撫卹得旨一切撫卹事宜實力為之俾受實
惠○山東巡撫覺羅長麟奏濟南府屬之歷
城章邱齊河禹城齊東鄒平新城陵縣臨邑
東昌府屬之聊城清平高唐莘縣茌平博平
青州府屬之益都昌樂高苑博興樂安壽光

臨淄臨朐泰安府屬之泰安肥城東阿平陰
萊蕪武定府屬之濱州利津霑化惠民青城
蒲臺海豐陽信曹州府屬之濮州鄆城范縣
觀城朝城兗州府屬之陽穀壽張等四十三
州縣本年得雨稍遲請借給兩月口糧得旨
允行下部知之

實錄卷二百八十三

吏

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十三

大清高宗法天隆運至誠先覺體元立極敷文奮武孝慈神聖純皇帝實錄卷之一千二百八十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉

世襲騎都尉軍功加十九級隨帶加二級又加二級尋常加二級軍功紀錄一次臣等謹

尋常紀錄十四次臣等謹將講官太子少保工部尚書紀錄六次臣等謹將等奉

校修

乾隆五十二年丁未秋七月丙寅朔享

太廟遣怡親王永琅恭代行禮○諭曰阿桂現在出差所有四庫全書遺失底本及書目卷帙著添派惠齡一體嚴行查辦○丁卯諭曰八旗都統副都統等管轄八旗人眾當如父兄教訓子弟留心管束並非止令其辦理旗務挑選兵缺而已也即如三寶之孀媳恒慶之妻被邪教婦人煽惑任意前往各處遊蕩以致耗費數萬銀兩修造廟宇實屬不堪皆由各旗都統副都統及叅佐領等並不留心

管教所致八旗婦人等如果因有正務看望親戚未為不可若似此恣意遊蕩前往各廟宇燒香並在城外遠處住宿實於風化有關理宜嚴行禁止著飭令宗人府八旗王大臣等嗣後務將各該管旗人嚴行約束並傳諭各該族長叅佐領等留心稽查倘再有此等事件將該管王大臣官員一併治罪○諭軍機大臣等現在天氣炎熱所有在京派出辦理校閱文淵文源兩閣書籍之大臣官員等

內劉墉彭元瑞金簡伊齡阿四員著每人賞給紗二匹葛布二匹其餘看書大小官員每人各賞給紗一匹葛布一匹其管理收發各員每人各賞給紗一匹著交六阿哥八阿哥分別賞給以示體恤○又諭曰副都統王柄係王進泰之子曾任總兵人尚明敏現在閩省總兵調赴臺灣進剿賊匪者甚多署缺需員王柄著即馳驛前往福建交李侍堯酌量委署不必來行在請訓○戊辰兩江總督李

世傑奏前據何裕城咨稱江西運閩米石分起由新城縣五福一路運進又檢查舊案海運較為便捷已咨明江南豫備海船接運等語查上海口岸所到閩廣船隻甚少現在江浙運米赴閩雇用不敷若再添運江西米石恐求速反遲臣飛咨何裕城令其全由新城陸路運送旋准何裕城咨覆以新城陸路險阻運送頗艱必須由海道分運方克迅速隨飭司道等速備船隻俟江西運米到日即行

過載但何裕城來咨於分運米若干石及何日開行之處均未聲敘諭曰李世傑素能辦事所奏原委始為詳晰是此事竟係何裕城辦理錯誤軍需米石關係緊要何裕城既查明改由海運較為便捷即應一面將應運米石數目及開行日期飛咨李世傑等豫備船隻一面將應運之米運至海口等候以便裝載開行並應以海口船隻倘屬短少或將江浙米石先行運送俟江西之米陸續運赴海

口時再行接運之處一併咨明庶李世傑等可以酌量籌辦乃徒事往返札商並不將運米實數及何日可以運到海口過載開行之處詳晰咨會而又不詳晰奏明是何裕城不但意存推諉并不知事理輕重實屬糊塗著交部議處○已已湖廣總督仍辦臺灣軍務將軍常青等奏六月初八日賊匪乘雨直撲大營臣等令侍衛章京將備帶兵迎擊賊眾敗走初十日賊復攻營及府城小南門外桶

盤棧臣等分派在營將弁一面分路截殺一面飛赴桶盤棧堵禦殺賊一百餘人再鹿耳門洋面賊艘經將弁帶兵追捕盡行焚滅又鳳山東港諸羅笨港鹽水港被賊占擾糧路不通已酌派兵民勦禦又福建陸路提督署臺灣鎮總兵柴大紀奏諸羅縣南大排竹地方有賊匪千餘人來攻臣親督兵民追擊殺賊數十人賊皆四散遠竄諭軍機大臣等閱常青等奏到情形是伊等尚劉營駐守因賊

匪乘雨攻擾營盤督兵堵禦殺死賊匪僅一百餘人不及十分之一未能乘機進剿此次添調各兵計粵省先行調撥兵二千及李侍堯挑備兵二千此時均可前抵臺灣此外添調兵丁尚需時日常青等斷無坐待株守之理前曾諭令該將軍等統領侍衛章京將備徑往南潭擒拏賊首莊大田設餘賊奔救即可聚而殲戮但賊匪出沒無定甚為狡獪若因常青等統兵前往南潭賊匪即糾合夥黨

繞截後路亦不可不慮該將軍等務須加意防範或派奮勉將弁斷後使我兵首尾相應不致被其抄襲方好鹿耳門等處有賊船騷擾之事自應嚴飭官兵於各口岸梭織往來巡查防範毋致稍有疎虞又賊匪攻擾諸羅動稱千萬而官兵勦殺僅止數十人總未見大加勦洗其餘匪是否屯聚各處或遁往山簦之處柴大紀均未分晰奏及著柴大紀務將該處近日打仗攻勦並道路是否不致梗

阻各情形據實覆奏○庚午諭軍機大臣等偶閱通鑑輯覽見魏司馬懿破襄平一事懿以公孫淵使其將率步騎數萬屯遼隧圍塹二十餘里乃欲以老師攻之正隨其計且賊大衆在此其巢穴空虛若直至襄平可期必破遂多張旗幟出其南牽綴敵勢潛濟師出其北直抵襄平遂大破之此乃兵家聲東擊西之法因思臺灣賊匪四處蔓延若紛紛堵禦處處剿殺則兵分勢單疲於應接轉恐不

能得力若常青等於郡城外剗營處所派撥疑兵虛張聲勢佯與賊牽綴相持而該將軍統領精銳帶同侍衛章京將備或乘夜輕騎直趨南潭擒拏賊目莊大田使之猝不及備藍元枚亦派奮勉將備於鹿仔港亦虛張聲勢堵禦附近一帶屯聚賊匪而該叅贊率領弁兵會同大甲溪義民熟番前擣大里杙賊巢如此乘虛進剿出其不意使賊匪倉皇失措首尾不能相顧衆夥自必驚疑潰散是亦

構穴擒渠之一策。兵家虛實互用。古人屢有出奇制勝。以少擊衆者。原不可不隨機應變。以防株守力疲也。著常青藍元枚察看情形。如可相機進取。竟即當照此辦理。不可坐失事機。以期迅速集事。至漳泉一帶。現今缺雨。田禾黃萎。小民秋收失望。恐米價更有增昂。甚關緊要。前因閩省需用米石已早降旨。令浙江等省備辦起運。著徐嗣曾再詳晰出示。俾各屬通行曉諭。市價不至踊貴。方為妥善。

○又諭據勒保奏查辦舊案。邪教子孫交各該縣一體造冊。按期點卯。取保管束。仍飭地方各官不時留心體察等語。自應如此辦理。邪教煽惑愚民。最易滋生事端。不可不嚴淨根株。以靖地方。今該省舊案俱已辦竣。其匪犯子孫雖現在尚無持齋念經等事。但必須嚴加約束。庶免出外滋事。勒保現赴甘省。著傳諭鄭源璣嚴飭各屬。不時留心稽查。務令匪徒萌孽。別除淨盡。方為妥善。勿得以具文。

塞責。辛未諭軍機大臣等。據何裕城奏。碾運閩省米石。全由五福陸路運送。李世傑等前因江西米石。應由海運業經豫備船隻。今江西之米既仍由該省陸路起運。無需江南海船。前諭保寧將川米備辦二十萬石。即由川江運至江南。正需海船撥運。現在江南豫備分運江西米石船隻。將來即留為運送川米之用。可以星速配渡。豈不一舉兩得。著將此傳諭李世傑。閱鶚元遵照妥辦。並著保寧將應運川米。務即迅速運赴江南。配船接運。以期迅速。抵閩得資接濟。並諭何裕城知之。

○調太常寺卿德瑛為光祿寺卿。以太常寺少卿多永武為太常寺卿。○壬申諭據太常寺奏。稱秋祭雙忠祠。出派弘豐行禮等語。各神祠及祭各王等。自應出派宗室等行禮。至雙忠祠。昭忠祠。俱係祭功臣之所。理應由各散秩大臣內出派行禮。何必派宗室大臣。德保等見不及此。甚屬不曉事體。所有此次派

出

關帝廟行禮之善明著與弘豐調換改簽外即著為令。癸酉諭據御史莫瞻菴奏續辦三分書從前校對生監僅二十餘人又止校過一次恐多訛謬請將現在詳校官所閱書籍簽改冊檔令三分書原校對蔡本俊等查對挖改並各迴避原校之書以防迴護仍令大臣一二員總覈簽檔其挖補填字紙張匠役及派出各員茶湯等費均令該校對等承辦等語續辦三分書止由該生監等校對一次其中訛謬必多現在文淵文源兩閣業經詳校官簽改記檔自應將三分書查照挖改以免舛錯著照該御史所奏於文淵閣校對完竣即令原辦三分書校對在武英殿悉心覆校逐一更正但該御史請令該校對等迴避原校之書以防迴護一節尚未妥善三分書既係該校對等承辦即彼此互相閱看皆係原辦之人仍難免心存迴護所有此項書

籍著令該校對等覆閱查改後仍交現在派

出校勘文淵文源兩閣書籍之大臣官員等再行詳校如有看出語句狂悖及潦草荒謬者詳校大臣即行奏明將原校對斥革除書內校出錯字應行填寫並抽換篇頁應令該原校對自行繕辦及收發書籍等事交原管提調經理外其紙張匠役及派出各員茶湯等項仍著照文淵文源兩閣之例官為辦理至三分書內業經發往江浙各冊著於校勘

事竣後將簽改冊檔鈔寄陸費墀一體遵照查改以臻完善○甲戌諭本年熱河滿洲兵丁射步把甚好且平素當差亦皆奮勉著施恩普賞一月錢糧厄魯特兵丁亦各賞一月錢糧以示鼓勵之意○乙亥

孝懿仁皇后忌辰遣官祭

景陵○留京辦事王大臣奏審訊西峯寺惑眾斂錢之張李氏及工匠任五均擬絞立決諭此案工匠任五即任極盛因修廟圖利起意

為張李氏裝點畫像妄稱該氏為菩薩佛祖轉世惑誘遠近民人是張李氏之種種不法皆該犯慙慙所致實為此案罪魁且騙得修廟工銀八百餘兩亦應依竊贓滿貫例辦理任五著照留京王大臣等所擬即行處絞至張李氏假神畫符以燒香治病為名惑眾斂錢固屬不法但鄉村愚婦不過為圖騙錢財起見究無悖逆詞語張李氏著從寬改為按例應絞監候秋後處決○閩浙總督李侍堯

奏臺灣北路之蔴豆社笨港南路之東港竹仔港等處被賊攻占糧路阻絕現派副將丁朝雄酌帶兵民在沿海一帶巡拏柴大紀連次打仗甚為奮勉近因分兵往救鹽水港等處兵力益單亟須添兵往援臣所豫調在泉厦駐劄兵二千於六月十三十五等日配渡開洋粵省先到兵二千亦於二十四日開駕此四千兵一到當可驅勦東港等處之賊諭軍機大臣等現在賊匪將南北兩路運米社

港占踞雖經副將丁朝雄等挑派官兵義民前往巡拏究恐不能痛加勦戮此時常青或與賊相持不能分身何不於鎮將內如蔡攀龍之奮勇可恃者酌派一員令同侍衛章京一二人帶領官兵竟往蔴豆社笨港等處先將占踞社港賊匪悉力殲除俾道路肅清販運米糧不致阻隔仍飭該處副將丁朝雄等實力巡拏海邊船隻不使賊匪搶占此為最要此等賊匪四處侵擾多係脅從其實賊首

賊目不過數人該將軍若能將其渠魁擒獲其餘夥匪自可不攻而潰且賊首林爽文與其有名賊目各負一隅而分遣黨羽四出滋擾使官兵分路堵禦疲於應接而賊匪轉得暇逸此乃賊人奸狡之計該將軍等不可為其所愚斷無賊匪東至則於東堵禦西至又於西堵禦以一兵抵禦一賊之理若徒事紛紛堵禦稽延一日則師老一日恐官兵日久力疲致有挫失更屬不成事體柴大紀處兵

力亦單自應添兵助守但常青處現在正當相機進剿難以分兵往援且道路阻隔亦屬緩不濟急朕意藍元枚現駐鹿仔港距諸羅較近且該處現已添撥兵丁即可到此時或令普吉保駐守鹿仔港該叅贊先帶兵數千前往諸羅幫助柴大紀更可保護無虞著藍元枚相度情形隨宜酌辦務使柴大紀處不致稍有疎虞亦不可有顧彼失此之慮方為妥善至現在笨港蔴豆社等處有賊匪

占據藍元枚亦應撥派將弁帶兵前往該處奮力勦散打通糧路為要再臺灣府本年應徵錢糧已有旨豁免至漳泉二府前據徐嗣曾奏春夏缺少雨澤恐致歉收且該處有過兵運糧等事亦應酌量加恩但此時已過徵收之期其業經完納者自未便給還且恐徒為州縣吏胥肥橐若尚有全行未徵李侍堯即可一面傳旨出示緩徵一面據實覆奏○又諭現在臺灣軍務尚未告竣一切兵食及

平糶撫卹等事在在急需不妨多為儲備川省素為產米之區連歲收成豐稔積儲較裕著保寧再行採買米三十萬石如或市糧不敷採辦即於附近川江各縣常社倉內碾動穀石以足三十萬之數接續運赴江南交李世傑等一併委員運往閩省以資接濟其碾動倉穀不妨暇時買補至此次運閩米數需用海船較多著傳諭李世傑閱鴉元將海船寬為豫備俟前次川米二十萬石抵江起運

後所有續辦米石一經運到江省即接續配船起運以期迅速抵閩毋誤要需○予因公出洋遭風淹斃之福建南澳鎮標左營把總林廷貴祭葬及兵丁三名賞卹如例○丙子諭軍機大臣曰何裕城奏農田雨水情形一摺內稱早禾現屆秋成豐稔有象中晚二禾亦俱長發暢茂糧價中平等語是該省各屬秋收豐稔米價自當平減及披閱所開五月分糧價單則南昌等十四府州屬米價俱較

上月增貴已於摺單內逐一用硃筆點出矣何裕城身任封圻於閭閻口食糧價增減自當體訪實在情形據實入告乃摺內既稱豐稔有象糧價中平而單內所開又屬價增價貴如單內所開糧價屬實則摺內所云豐稔有象等語即係虛詞若果歲收豐稔則市集糧價即不應轉至增貴何自相矛盾若此豈該撫於辦事素乏長策而陳奏事件一任庸劣幕友率意書寫並未寓目耶著傳諭何裕

城即將摺單何以互異及該省秋收實在如何及糧價何以增昂之處據實覆奏毋得稍存迴護○以山西蒲州協副將劉允桂為陝西興漢鎮總兵○丁丑諭軍機大臣等本日據福康安奏洮州等二十九廳州縣於六月初九至十四五日各得雨深透蘭州省城於十三四兩日亦得透雨所種豆麥早者業已登場遲者亦次第黃熟至早壤山區內有尚能翻種晚秋者亦俱出土可望秋成其不能

翻種歉象已成及各屬內間有被雹被水處所現在查明覈辦等語前因蘭州及隴西等處夏間雨澤稀少田禾被旱農民不無失望業經降旨令勒保於抵蘭後查勘明確妥為撫卹茲據福康安奏六月初九至十四五日洮州等屬及蘭州省城已得透雨但節候稍遲仍恐於大田不甚有濟且有早壤山區實不能翻種雜糧歉象已成不可不亟為撫卹著再傳諭勒保於抵蘭州後即將福康安現

在查明各屬實在被旱成災地方及被雹被水處所一併詳查撫卹妥協辦理無使一夫失所以副朕廑念邊黎之至意○湖廣總督仍辦臺灣軍務將軍常青等奏據柴大紀稟稱賊匪攻踞鹽水港現撥兵一千在彼處駐劄並於鹿仔草添駐兵二百而駐縣之兵為數益少又笨港汛亦聞賊已攻陷請速添兵應援等語臣等當派總兵魏大斌等帶兵一千五百名前赴鹽水港協力攻剿再鳳山之

東港在鹿耳門左。諸羅之笨港在鹿耳門右。今俱被賊占據。則鹿耳門尤宜慎守。臣等已派撥官兵防禦至鹽水港。距府城止五六十里。賊眾圍攻鹽水港。固意在諸羅。而實覬覦府城。臣等創營府城以南。未敢移動。俟添調官兵到齊。相機勦捕。諭軍機大臣等。鹽水港在諸羅之南。笨港在諸羅之北。皆為運糧要路。今俱有賊匪搶占。以絕糧餉。諸羅勢甚危急。所關甚重。看來賊人狡計。竟係因大兵俱在府城。諸羅一路兵勢單弱。故作窺伺。府城以牽綴官兵。使常青等不能速離。該處營盤。而其意實欲斷我糧道。攻逼諸羅縣城。若諸羅有失。則臺灣府城勢更孤懸。四面受敵。大有關係。前曾有旨令常青等或舍南趨北。直搗大里杙。賊巢或竟往南潭擒拏賊目莊大田。今看此情形。該將軍等不必向南。竟宜先往北路。常青此時或於總兵副將內擇其奮勇可恃者酌撥一員。令其固守營盤。而常青

等竟揀選精銳。親自帶領。同侍衛章京將備等數人直趨北路。前至諸羅會同柴大紀并力擒渠。搗穴或再分派勁旅將鹽水港屯占。賊匪悉力殲除。打通糧道。此為上策。藍元枚昨已有旨令即帶兵前往鹽水港勦殺賊匪。後自南而北。呈赴諸羅接應柴大紀。或能先將笨港一帶屯踞賊匪乘勢掃除。更為妥善。柴大紀處得此兩路兵力接應。鹽水港笨港道路肅清。米糧通運。南北聲勢連絡。人心自定。似於進剿機宜極為得力。著常青藍元枚酌量情形迅速籌辦。斷不可坐失事機。再用兵之道全在先聲奪人。現在添調兵丁。不為不多。即日陸續前抵臺灣。常青等不妨再行曉諭軍民。以此次添調官兵之外。現又有旨於廣東及福建本省添調兵數萬接續前進。俾軍民等心膽益壯。兵氣益為振作。且使賊人聞之亦不敢肆。意鴟張此亦先聲後實之一法。仍著李侍堯孫士毅廣為召募數萬多。

多益善以備調遣。再臺灣府城官兵糧餉大藥等項存貯甚多。常於帶兵前往鹽水港等處進剿時。除將戰守官兵應用糧餉大藥隨身攜帶外。所餘糧餉大藥。若仍貯積府城。該處係編竹為城。恐易生賊人窺伺之心。不可不慮。莫若悉行攜帶隨行。即使府城萬一稍有不虞。亦祇係空城。賊人一無所獲。亦不能久占。並著該將軍酌籌妥辦。但此時該將軍等須密之又密。只可暗為派撥。不得稍露風聲。使軍民間之心中搖動。轉多未便。至鳳山之東港。為賊占踞。於鹿耳門甚有關係。現已據常青派撥官兵前往防禦。但恐該處官兵未能分身。尚不能殲除淨盡。著李侍堯於內地總兵副將內奮勇者。揀派一員帶兵一千前往剿除。占踞東港賊匪打通糧路。更可得力。○又諭據常青等奏稱。此次征剿臺灣逆匪。柴大紀蔡攀龍臨陣打仗。實屬奮勉。超衆等語。柴大紀蔡攀龍在陣打仗。如此超

衆向前奮勉。實屬可嘉。著加恩賞給柴大紀壯健巴圖魯名號。蔡攀龍強勝巴圖魯名號。仍照巴圖魯例。由彼處各賞銀一百兩。以示獎勵。○又諭曰。長班校尉二十四名。著施恩每名賞給一月錢糧。○戊寅。諭軍機大臣等。據圖薩布奏。惡棍謀殺多命一案。審明辦理。及收存動支耗羨銀數。照例各摺尾。俱以督臣孫士毅駐劄潮州。不及會銜聲敘。但如地方棍徒謀殺多命。該撫審明辦理後。即繕摺具奏。不及與督臣會銜。原屬應辦之事。至動支耗羨等項。則係尋常按例事件。並非如命盜要案。必須急辦者。可比况孫士毅駐劄潮州。距省亦不甚遠。即稍遲數日。與該督會銜具奏。亦無不可。有何迫不及待。而圖薩布亦一例以不及會銜聲敘。取看來。竟係圖薩布有意與孫士毅不和。非關孫士毅之事矣。此雖小事。但因此心存嫌隙。必至遇地方緊要事件。亦有意齟齬。則斷乎不可。况孫士毅在

總督中係能實心任事之人該撫正宜推誠相助公同辦事乃似此心懷私見豈和衷共事之道圖薩布著傳旨申飭該撫若不知改悔因小及大致有貽誤之事朕不責備孫士毅惟該撫是問恐不能當其咎也將此諭令知之並令寄與孫士毅看○又諭據陳步瀛奏勘明亳州被水情形一摺內稱該州渦河上接豫省商邱鹿邑等境因豫省漫水下注渦河不能容納以致該州東北西北各鄉田禾俱被淹沒房屋亦多坍塌現在委員分赴各鄉逐一查勘等語該處各鄉既被水淹所有撫卹事宜自當妥為查辦前已諭令書麟由漫水下注之亳州蒙城一帶查勘被水情形順赴睢州工次商辦堵築事宜著傳諭該撫即將亳州渦河一帶被淹各鄉查勘是否成災如有應行撫卹之處一面奏聞一面即交該藩司陳步瀛督飭所屬實力妥為撫卹務俾災黎均霑實惠毋使一夫失所將此傳

諭書麟並陳步瀛知之○又諭南路賊匪四處乚聚現在將軍叅贊俱在一處府城外所立營盤自屬寬濶若常青帶領官兵前往北路兵力較分營盤寬敞照應不易常青應於起身時先將營盤酌量收小以便隨時堵禦可保無虞然此皆朕於數千里外思慮所及隨宜指示用兵機要倏忽變換其是否可以如此辦理之處惟在該將軍等悉心籌畫隨機應變不必過於拘泥節次諭令常青等曉諭附從賊匪民人令其投誠歸伍各安耕種但恐該民人等未能盡加曉諭常青等竟當刊刻謄黃令各處偏貼或射入賊巢通行曉諭則從賊民人自當紛紛投出不但賊黨可以解散且使賊眾彼此自相猜疑生心內潰實屬不戰可勝之良策常青藍元枚即當妥速辦理一面仍奮勉攻擊不可坐視○又諭曰福建陸路提督署臺灣鎮總兵柴大紀自勦捕逆匪以來督率官兵義民奮勇殺賊一

切調度深合機宜著授為叅贊協同將軍常青等悉心籌辦以期迅奏膚功○又諭據舒常姜晟奏湖北省早稻豐收秋成可卜大有現在動支倉穀二十萬碾米一十萬石遵委妥員分別四起由江西一路運往閩省舒常並往湖南與浦霖酌議動穀碾米運閩以資備用等語現在臺灣勦捕逆匪尚未歲事一切軍糧及撫卹平糶等事所需糧石較多不妨寬為豫備該督等能不分畛域先事豫籌殊屬急公舒常姜晟俱著交部議敘○又諭此次湖北所碾米石亦由江西運赴閩省著何裕城即將江西米石於何時可以運竣其湖北米石接續由該省運閩道路便捷之處一面酌定一面飛咨舒常令其速將碾就米石分起撥運由江西五福一路前進不可似前次推諉以致遲延如江西實有礙難辦理之處一面飛即知會舒常等令其將米石裝載撥船由水路運往江南交李世傑等由上

海出口運往閩省但前經先後降旨令保寧豫備米五十萬石陸續由川江載赴江南備船運閩為數較多恐江蘇船隻驟難添雇轉恐有誤要需莫若即由五福早運為是○閩浙總督李侍堯奏閩省額兵除調往臺灣勦匪外餘兵不敷差防應酌量募補查水師提鎮協及陸路提標與化長福省城福寧所轄各營均沿海要地請照調往輪戍臺灣兵數先挑補十分之三其汀邵延建各營挑補十分之二○諭據李侍堯奏酌補營兵一摺所辦未免拘泥前已屢經有旨令該督廣行召募不必拘定額數如恐經費不敷即行奏請再行撥解應用現在正須多兵接應之時內地亦當操防備用如果募得多兵既可備撥軍營以助聲勢即內地巡防調撥亦為寬裕著李侍堯即廣行添募毋庸拘定原額並著常青藍元枚各就臺灣處所一體迅速召募○己卯免江蘇南匯縣本年分冊沒田蕩一十

三頃九十三畝額賦有差○庚辰中元節遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○福建水師提督叅贊藍元枚奏現在鹿仔港四面受敵又彰化淡水交界之大甲溪岸裏社等處亦被賊滋擾官兵分路堵剿不敷調用請添撥閩兵二千粵兵三千再查鹿仔港至斗六門六十餘里至諸羅九十餘里沿途皆有賊匪屯聚臣即日

帶兵由東螺西螺等處直攻斗六門並與柴大紀訂期會剿諭軍機大臣等前已有旨令李侍堯將添調兵一萬一千名內撥粵兵二千名與藍元枚又據李侍堯奏豫備漳州有眷屬兵二千亦有旨令派赴鹿仔港今該叅贊既請添兵五千著孫士毅再於廣東挑撥兵一千名速赴閩省並著李侍堯於漳泉等處速行召募兵一千接濟調撥若漳泉召募之兵於粵兵未到之前業經召募齊集即將募兵一千撥往鹿仔港應用以足所請添兵五千之數其餘一千著李侍堯即由五虎門配渡竟赴淡水接濟徐鼎士再賊匪南北四出擾攘意在牽綴官兵而常青藍元枚等墮其術中竟有應接不暇之勢用兵之道合則勢盛分則勢弱今賊首林爽文賊目莊大田等明知重兵俱在常青藍元枚兩處而林爽文牽綴北路莊大田牽綴南路使我兵分投堵禦奔走不暇賊匪得以乘間蹈隙將南北

兩路緊要各港社隘口任意搶占賊勢轉得聯絡狡計顯然乃常青等為其所愚止知結營自守分兵防備遇賊匪擊東應東擊西應西警之奕棋使賊人著著占先通聯一氣而官兵止辦接應並無制勝之策轉致疲於抵禦何時方可竣事該將軍等自當統領大兵舍南趨北與柴大紀會合藍元枚亦應即帶兵前往諸羅與常青柴大紀會合一處使我官兵聲勢聯絡軍威壯盛其間阻隔七聚賊眾即可順便乘勢剿殺使南北道路相通偵探林爽文現在何處即以大兵全力前往搜捕但能將渠魁擒獲則其餘賊目如莊大田陳泮吳領等自無難迎刃而解勢成破竹即使林爽文窮蹙竄入內山而賊目匪夥失其首逆勢必紛紛奔潰彼時我兵將賊黨痛加勦洗乘此得勝兵威再向生番令其獻出想逆首林爽文即有翼亦難遁也此乃擒渠制勝之策該將軍等當勉力相機籌辦不可坐

失事機況現在添調各兵俱係生力正當乘此新到銳氣及鋒而用若再因循又致疲弱仍與不添無異又節次降旨令常青藍元枚各就近廣為召募無論從賊與否一經應募投到即令食糧充伍此固為增添兵力解散賊黨之計但賊匪狡獪異常其自行投到者不可不留心防備當擇素能管束兵丁之將備令其統轄或分隸各營令官兵箝束庶可免肘腋之患此為最要至北淡水一路現既有賊匪滋擾藍元枚應飭令副將徐鼎士加意堵禦奮力剿殺毋致稍有疎虞現在沿海口岸俱有賊船潛伏內地解往臺灣等處糧米餉銀火藥鉛彈等項著李侍堯嚴飭文武員弁加意小心防範再該叅贊所請添兵五千名現已有旨如數發往但到彼尚需時日此時豈有株守坐待之理今藍元枚約會柴大紀訂期親帶官兵直趨斗六門奮力攻勦此舉畧見奮勇自應如此辦理

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十四

實錄卷一千二百八十四

完

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十五

監修總纂官是議官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級案功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書錄監滿洲都統軍功紀錄五次

尋常紀錄十四次臣等謹將是議官太子少保工部尚書紀錄六次臣等謹將尋常

敘修

乾隆五十二年丁未七月辛巳諭據德成奏

京通各倉收兌新漕之際易滋弊端派員前往分查有新舊相攙及蟲蛀之米將米樣包封進呈又據蘇凌阿等奏本年南糧各幫米色原有參差不等現在驗係米粒堅實者隨即起卸運進京倉令幫船及早回空乃侍郎德成派委工部光祿寺司官筆帖式等三十餘員進倉監收混分等第有悞兌收時日各等語前因閱鴉元琅玕具奏江浙兩省上年秋成之際霜信早寒米質間有青腰白臍未

能一律純淨。因諭令毓奇驗明通融收運於抵通倉後。並令倉場侍郎等分別收貯酌量支放。原因江浙二省上年被霜較早。米質未能純淨。是以准該撫等所請。俾小民易於輸納。且因今歲係全漕抵通之年。特令該倉場侍郎等不必過事苛求。隨到隨收。以便及早回空。無誤冬兌。乃德成於上年即誤聽人言。奏稱各幫漕船所載之米多不足額。於抵通後採買陳米交倉。以致京城米價昂貴。當經

欽派大臣會同德成在通州及德州安陵一帶查驗。並無情弊。即德成亦不能指出實在情弊。今又欲實其前言。分派司員前往通倉監收米石。過為區別。此項南糧漕米。如果有弊竇。自當由本省地方交兌時暗中舞弊。但閔鶚元琅玕身任封疆。且有漕運總督及倉場侍郎等盤驗兌收。伊等俱身為大臣。豈肯任其朦混。自擔干係之理。乃德成因一時誤聽。必欲實其前言。雖亦為公事起見。但有意

吹求強為分別。必致抵通漕米兌收遲滯。有誤回空。況胡季堂金簡與德成俱係查倉大臣。若通倉收米果有弊竇。胡季堂金簡豈有不聯銜具奏之理。自係伊等見此事無弊。不肯會銜。且朕之信德成亦在。胡季堂金簡之次。而乃欲實前言。固執紛撓。貽誤公事。甚屬非是。德成著交部嚴加議處。其派出司員等監收查驗。究係該堂官指使。尚無不合。著德成即行掣回。仍著該倉場侍郎等將抵通漕

米。秉公迅速收兌。俾得及早回空。以副朕恤丁利運之意。○又諭各省理事同知通判各缺。有例應在外揀補者。有應由部中請旨簡放者。今勒保奏請將該省理事同知通判遇缺先儘試用人員補用。俟補完後再由部臣請放。實於銓政未協。部中自應照例議駁。但念該省現有試用者四員。未免守候無期。嗣後該省遇有缺出。著由部中請放一人。後再於試用人員內請補一人。如此分缺間用。庶

在部記名人員不致無缺可補而分發人員亦得及時自効至現在阿明阿等四員補完後即應照舊由部請放不得援以為例且該撫既稱該省理事同知通判試用人員得缺無期嗣後并不准再請揀發以重銓政○諭軍機大臣等鹽水港笨港麻豆社等處被賊匪搶占已節次諭令常青等迅速剿殺今披閱臺灣全圖澎湖一處正與笨港鹽水港鹿仔草等處相對且相距不遠該處原駐有官兵李侍堯自應飭令駐劄澎湖將弁帶兵就近配渡前往鹿仔草笨港鹽水港一帶接應會攻如澎湖駐守兵丁為數不多該督亦應於內地派撥官兵由澎湖前往協剿庶內外夾攻屯踞各港社賊匪自可迅速剿殺肅清道路使官兵聲勢聯絡於剿賊機宜方為有益況賊既占踞沿海各港社保無滋擾澎湖之事亦應豫為籌備常青李侍堯藍元枚等總未言及今因觀圖甚為厯念著傳諭李侍

堯並將圖發交閱看酌籌妥辦迅速覆奏尋奏鹽水港鹿仔草兩處俱有將弁帶兵駐守而笨港被賊搶擄之後臣已撥贈船二隻水師兵二百前往防護至澎湖原設兵一千八百名除調赴臺灣堵禦外尚存四百臣前撥豫備調遣之汀州兵五百在彼防範近又於新募水師兵內酌派六百於澎湖及各港口往來梭織巡防得旨嘉獎○免山西代州五臺等縣繁峙定襄等五州縣乾隆五十年分被水淤地一百七十四頃四十四畝額賦有差○壬午諭軍機大臣曰德成分派司員前往各倉強分米色過事吹求是其執拗性成紛擾公事固有應得之咎但胡季堂金簡與德成俱係查倉大臣若通倉收米果有弊端豈有不聯銜具奏之理自係伊等見此事無弊德成所辦瑣碎不肯會銜胡季堂金簡俱係尚書雖與侍郎無所統屬但職分較大即係長官若知德成所辦事不可行即應勸

阻勸之不從即將德成奏亦無不可乃既不會銜又不勸阻劾奏朕揆伊二人之意在金簡平素與德成本屬意見不和明知德成所辦事涉紛擾斷難辦理而置之不問任其率行陳奏此語公否明否自蹈愆尤在旁笑視胡李堂則袖手旁觀置身局外漠不相關者然德成既經查出米色新陳攙雜兼有蟲蛀即應查明來歷究問實於何處收買陳米弊端乃又不能指出實在證據是德成有心固執不過欲實前言而非本心除弊固不能逃朕洞鑒而胡李堂金簡身為大臣朕特派與德成同辦查倉事務又各懷私見任其所為并不若蘇凌阿劉秉恬尚能將德成紛擾情節據實具奏胡李堂金簡居心如此豈大臣實心任事之道而金簡明知其不可行挾平日之私忿有心笑觀其敗朕轉薄其為人矣將此傳諭胡李堂金簡令其將何以既不

會銜又不勸阻叅劾之處據實覆奏並著將

此旨交德成閱看○癸未諭軍機大臣等昨圖薩布呈進貢物內有鑲金嵌珠等物殊屬無謂已將各件全行駁回矣從前遇有督撫呈進貢物內鑲嵌金珠等件屢經降旨飭諭不准再行進獻今圖薩布又復以此呈進豈任土作貢之道況此等金珠物件尤非古雅玩器尚可供陳設之用實覺鄙俗可厭圖薩布何以侈靡相尚若此著傳旨申飭嗣後該撫毋得再以此等無用之物進獻將此諭令知之○又諭據留保住等奏稱將互相爭鬪致毆傷人命之兇惡番子貢覺策旺登住札什審明後即行正法將不行嚴加約束之噶布倫伊什旺堆等議罪一摺留保住等將藏內毆傷人命兇惡番子即行正法所辦甚是噶布倫伊什旺堆等俱係愚蒙止不過未能嚴加約束下人尚無重罪不必將伊等交部但飭令嗣後各宜善自督率下人外仍令慶麟等嗣後遇有此等事件照伊番地之例完

結不必拘泥內地之例辦理○又諭曰鑲黃旗蒙古都統奏德勒克多爾濟所出公爵照例請旨等語此公爵非由勲勞而得特因額駙策凌公主施恩賞給者出缺後若即行裁除朕心不忍羅布藏尼瑪又係蘇布錫里之子著施恩命羅布藏尼瑪帶公爵銜作為頭等台吉承襲○甲申諭軍機大臣等現在睢州下汎十三堡黃水漫溢已命阿桂前往河南會同蘭第錫等商辦堵築事宜因思蘭第錫等前奏漫口漸次塌寬大溜全注口門正河存水僅止一分等語是大溜全掣正河此時早已斷流固應相度機宜趕緊堵築但近年大河溜勢日趨於南以致南岸隄工倍形著重今該處李六口引渠前經蘭第錫等開放時據稱刷去舊土山六七十丈則所開引渠較為得勢或從此可引溜北趨未必非極好機會現在正河既經斷流何不趁此時將李六口引渠再行挑挖倍加寬深將來睢州

十三堡堵合後俾大溜順勢逼入李六口引渠形勢既為徑直且可引溜北趨南岸隄工不致著重豈不甚善其舊土山既經衝刷六七十丈土性自鬆亦應趁此斷流之時將未經衝刷者全行剝去使將來合龍之後溜勢直趨去南岸益遠更當暢順得力再南河雲梯關外海口淤高曾經阿桂李世傑等酌量情形將二套地方開挖引河嗣經開放未能得力現據李世傑等奏洪澤湖自豫省睢州十三堡漫溢之後由淮入湖日漸加長現將東清禦黃兩壩全行啟拆俾由清口暢出歸江並將山盱五壩全行開放此時黃河全係清水等語洪湖水勢既經盛漲自應即令由二套引河歸海但前此所開二套引河較窄若能挑挖深通並照原擬堆築子堰之處一律展寬俾資容納而引河頭亦可展向西首於就下之勢較屬順當使河內清水順注由二套引河入海既可宣洩湖水或能將二套

引河漸加衝刷。走成熟路。則將來豫省合龍大溜仍歸正河之後。清黃匯合。竟可從二套引河下注歸海。更為便捷。倘溜勢未能全行逼入。或再於三套舊走地方酌量建築攔黃壩一道。約攔水勢。使大溜全趨二套引河。自更得力。已於二圖內皆用硃筆標誌。此亦先事豫籌之一法。朕偶因想及。隨時指示。其是否。可以如此辦理之處。著傳諭阿桂等於抵工後。會同蘭第錫等熟籌妥辦。並著李世傑

李奉翰。趁此閒空。親往二套查勘引河酌量辦理。一併據實覆奏。將此各諭令知之。並著將硃筆原圖二張發交閱看。○又諭據明興奏。微山湖自五月二十五日起。至七月十五日止。共長水五尺八寸。量驗誌椿。現深一丈一尺。實已收符定誌。一俟重運過完。再將上游之南陽昭陽獨山等湖水口單開。悉行開放。俾諸湖之水源源暢達。加以新挑各坡河內通流無阻。層遞灌輸。約計微山湖於定誌

尚可多收一尺等語。微山湖為東省水櫃。收蓄濟運最關緊要。前因東省支幹淤墊。來源不能下注。兼之雨澤稍稀。坡水微弱。以致湖水不能增長。特發帑金。令明興等會同將該湖上游坡水河渠通行挑濬。俾支幹各河之水。下注歸湖。以符定誌。現在儲蓄充盈。本年全漕重運北上。回空南下。俱可無虞。匱乏。但此等坡水河渠。原以引支幹各河及溝塍吠澮之水源。源下注。必須一律通利。方無阻滯。

若此次大挑一二年後。地方官不能留心聽其淤墊。日復一日。仍復壅塞。豈有逾時未久復興大工挑濬之理。著傳諭蘭第錫長麟嗣後於新挑各河渠。每年留心查勘。如有淤墊之處。即隨時疏濬。毋致日久淤墊。又費周章。並著每年於霜降後。將有無淤墊及如何疏濬之處具奏一次。或另差大臣往勘。亦未可定。明興摺並著鈔寄閱看。○吏部議直隸總督劉我奏山東學政劉權之春船於靜海縣

內河地方被盜行劫。應將該處疎防文武各員分別議處。諭此案劉權之春船被盜。係天津府靜海地方該處地近畿輔。竟有此等肆行劫盜之事。該管地方文武各員漫無查察。非尋常失察疎防可比。知縣劉以觀把總王崇書均著革職。都司劉法程著降三級調用。天津道王成天津鎮總兵托賓泰均著照部議降調。仍著該二員留於地方勒限一年務將盜犯緝獲。尚可加恩錄用。如限滿不獲。

再行覈辦。按察使託倫自陞任臬司以來上年即有大名府段文經等滋事等案。今內河地方復有盜劫官船之事。係該司之責。難以留任。託倫前在熱河道任內尚為熟諳。著降補熱河道。所有直隸按察使員缺即著富尼善補授。至總督劉我係統轄大員平日不能整飭亦難辭咎。著改為革職從寬留任。署提督李奉堯署事未久且隨從熱河尚有可原。著改為降三級從寬留任。○山東巡撫長麟

奏壽光縣典史鄧林森聽受胡廷宣賄囑故入人罪。但係許以事後酬謝。贓無定數。未便計贓科罪。臣因照故入人死罪未決律擬以發遣。今部臣駁回覆審。欲令計贓定罪。倘鄧林森認受贓銀四十兩。豈能畧其故入之罪。而計贓擬徒。應將鄧林森仍照前擬發遣。諭此案典史鄧林森聽受胡廷宣賄囑捏供許以事後酬謝。原未定有實數。若必欲計贓定罪。則枉法八十兩擬絞。五十五兩滿流。四十

兩滿徒。該典史又豈肯自認多贓。轉可就輕避重。該撫照故入人死罪未決律從重擬遣。所辦自屬允當。若如部駁必欲計贓科罪。設鄧林森竟認得受輕贓。照例擬徒役滿。仍得安然回籍。是部駁欲重反輕。非曰害之轉所以愛之也。看來刑部竟不免於該撫有意吹求。此案著交留京辦事王大臣會同刑部秉公悉心覈擬具奏。○乙酉諭軍機大臣等據常青恒瑞奏加派官兵應援諸羅一摺。所辦

著著皆錯瑚圖里等前因鳳山失事被賊攔截在山猪毛駐守數月該將軍等因中間道路阻隔無從知彼處信息以致日久並未遣兵救援今瑚圖里既從山猪毛小路翻山進攻南潭聲勢可得聯絡該將軍等一得稟報即應親統大兵直往南潭一帶合力夾攻則賊目莊大田可期就獲南路即可乘勢肅清乃常青等計不及此僅派那穆素里烏什哈達等帶兵五百名接應於事何益且官兵前在山猪毛被困數月既全藉廣東莊義民助糧接應此次瑚圖里等回至大營其廣東義民自應令其留守本莊自為捍衛乃竟帶同來至大營令其隨營征勦該義民等既繫戀室家心懸兩地不能得力且使賊匪聞知該義民等隨營助勦必心懷忿恨將其村莊焚燬家屬殺戮義民轉致受累灰心且常青等統兵往北路進勦到處俱有義民協助若見廣東莊義民投營出力轉致家屬房產被賊

摧殘不但不能招徠鼓舞轉使義民等望而生畏豈非驅之從賊所關匪細觀之實生憤懣着常青等即傳旨將現在山猪毛義民俱令速回本莊自行守護家屬田產或仍令瑚圖里親自帶領義民等回至山猪毛並酌添兵護送以安其心而資守禦至柴大紀現在諸羅被賊匪糾合夥黨攻踞鹽水港四處斷絕糧道又請添兵救援常青等即應領將備親身速統大兵前往接應乃僅派魏大斌等帶兵一千五百名已不足以資勦殺而魏大斌又不曉事復留兵五百名防守鹽水港止帶兵千名前往諸羅以致兵力益單遇賊擁至不能抵敵勦殺收回鹿仔草營盤仍不能前抵諸羅且官兵義民多有受傷陣亡者及魏大斌請援常青等又止派游擊田藍玉帶兵一千名赴鹿仔草應援似此零星派撥何濟於事而伊等在府城又何曾殺戮多賊能進尺寸之地哉且常青等見魏大斌請援即

撥兵一千前往接應。若他處復有求救者。又撥兵援應。似此各處派撥分投堵禦。則大營即有多兵。亦必所存無幾。豈又將屢請添兵而不已耶。常青恒瑞何漫無布置。辦理錯謬。若此俱著嚴行申飭。看來該將軍等此時竟茫無主見。一錯百錯。於勦捕機宜。竟不能得有把握。增朕南顧之憂。為今之計。該將軍等惟有遵照節次所降諭旨。直赴諸羅藍元枚。亦應自北而南。與常青柴大紀會合一處。全

力搜捕。該將軍等勿再株守。坐待以致老師糜餉。坐失事機。自取重戾。○又諭據劉我奏前准常青咨。拏臺灣賊匪高文麟等。供出從前之各犯姓名。開單移知。今於沿海各港口嚴密堵緝。茲據天津鎮道等稟稱。查有福建來津糖船內。有水手趙榮林光二名。與高文麟所供夥匪姓名相同。隨訊據趙榮供。係同安縣人。原名歐陽煥林。光供係彰化縣人。原名魏寵。其趙林二姓。實係造船時報官姓名。

歷年換照。均係頂認。並不添改。原籍俱有住址。親屬可問。並有天津行鋪人等。見該水手到過天津。十數次。情願具結。等因。現飛咨閩督查照。所供是否屬實。再行覈辦。等語。所謂愈細愈遠。殊屬不成事體。常青等一正賊未獲。而用心於無用之地。可笑。可鄙。今之大臣等。辦事率多如此。實增愧慙也。且臺灣逆匪滋事。其夥黨即或竄逸。不過在廈門附近一帶海口潛匿。斷無遠逾數省。直至天津之理。

無論趙榮等係屬誤拏。即或實係逃匪。伊二人逃至天津。又何能滋生事端。况船戶等俱係身家殷實。天津行鋪皆為出結。更屬可信。乃劉我率行拘訊。殊為失當。此等船隻。皆係裝載貨物。投行售賣。若如此混行查拏。將來商販未免畏累。裹足不前。必至百貨騰貴。於閭閻日用大有關係。况該督及天津道府等於所屬地方。現有劉權之眷船被劫一事。並未將盜犯拏獲。轉因數千里外。閩省咨緝。

之案紛紛查究劉我何不曉事至此著交部嚴加議處並著將水手趙榮林光二名即行釋放不得再行拖累並曉諭該船戶等以此二人實係誤拏業經奉旨即行釋放該督亦治罪矣嗣後各安商業不必心存疑懼至常青現在勦捕賊匪於應行會合夾攻之處不能安速前進乃於餘匪竄逸咨緝至數省之遠徒滋煩擾實屬不知事體輕重著傳旨申飭常青既遠咨直省於海口查拏逆匪則江浙等省自己早有咨會並著李世傑琅玕於沿海各口岸止須飭屬密行訪拏逸匪遇有商船不得如劉我之過事搜求累及無辜以致商販聞風裹足又諭曰直隸天津鎮總兵員缺著強都補授強都前因親老奏請留京供職今天津距京不遠強都即可就近迎養並著速赴新任不必前來行在請訓丙戌諭軍機大臣等據書麟奏本年安徽州等府州屬五六月中雨水調勻現在早稻已

陸續刈獲中晚禾雜糧亦長發茂盛實為豐年有象此外廬州鳳陽等府州所屬內間有一二處因夏間雨水稍多窪地間有積水若從此連晴涸復尚可補種雜糧以冀有收等語安徽等屬本年雨水調勻早稻業已登場新米入市糧價日漸平減秋成可期豐稔但亳州蒙城一帶為豫省睢州漫水下游田禾廬舍多被淹浸朕心深為廕念該撫現在照例先行撫卹並已遵旨前赴被水各屬周歷履勘著傳諭該撫將亳州等處逐加察看分別被災輕重督同司道等實力撫綏務使災黎均霑實惠至該省除亳州被水幾州縣外現在將屆秋成其通省各屬收穫統共約有幾分較之前歲通省收成豐歉情形若何並著書麟一併詳查確覈具奏毋稍諱飾又諭現今福康安前來行在陛見俟其到熱河後即令帶領侍衛章京拜唐阿等由驛前赴臺灣督辦勦捕事宜所有需用車輛馬匹著

劉我先行豫備。並派出藩司梁肯堂妥為照料。計福康安所帶侍衛章京拜唐阿等不過百人。需用車馬等項為數不多。該督等務須妥速辦理。毋得稍涉張皇。致有擾累。○又諭曰。常青前值林興文等滋事不法。調遣將弁。派撥兵丁及解送糧餉火藥等事。亦尚有條理。旋因黃仕簡任承恩貽誤事幾。就近派赴臺灣督辦。彼時朕不甚意。滿及常青到彼。鼓勵義勇。撫卹難民。及一切調撥。頗覺井井有條。朕心出於望外。乃為之稍慰。方以該將軍等為可倚恃。足資委任。數月以來。節次奏到各摺。屢次打仗。雖未見出奇制勝。大加勦洗。尚無措置乖方。錯誤顯然之處。至昨日所奏魏大斌前赴諸羅應援。未能前進。又派田藍玉帶兵一千前往接應。似此零星派撥。於事何濟。又將廣東莊義民留營助勦。辦理錯謬。無甚於此。常青恒瑞二人俱未曾經歷軍務。而恒瑞又復少不更事。此時隨同常青辦理。

軍務。恐其因職分相等。又以身係宗室。稍存矜貴習氣。且未免有袒護滿洲兵丁之意。於商辦一切事務。未能和協。亦未可定用兵全在主將和衷。方能集事。若各不相下心存意見。以致諸事多有掣肘。所關匪細。李侍堯現在駐劄廈門。見聞較切。且該督久任封疆。受恩最為深重。伊平日於該將軍等勦捕機宜。原不應有所軒輊。至現在常青等辦理諸務。動多錯誤。朕日夕焦急。特行降旨詢問。該督自應將常青與恒瑞有無意見不和。彼此牽掣。及該將軍等能否辦理此事。可期完竣之處。據實覆奏。毋得稍存瞻顧。再現已有旨令福康安速赴行在。面授機宜。令其前往臺灣更換常青督辦軍務。但軍中屢易主帥。亦非所宜。特恐常青等不能了結此事。以致因循日久。不免藏功轉不若及早更換。尚可保全之為愈。此實朕無奈之計也。並著李侍堯酌量情形。就其所見。是否必須如此辦理。一併

據實速奏○又諭此次攻勦臺灣賊匪常青等屢次奏到摺內未將滿兵如何向前打仗之處聲敘看來明係常青等未將滿兵派令在前不惟使滿兵無以出力報効且使綠營軍心為之銜怨滿洲臣僕累世受國厚恩遇此等用兵之事自當出衆奮勇爭先殺敵豈可退怯居後而令漢兵在前衝鋒者乎從前兩金川用兵時阿桂等每遇打仗令綠營番子兵在前已屬錯謬既已功成事竣當時未經深究現在臺灣滿兵雖屬無多應令其在官兵義民之前奮勇打仗以為伊等表率著傳諭常青恒瑞等知之○丁亥兵部奏准閩浙總督李侍堯咨稱閩省各州縣統計五十七驛額設夫三百一十四名現值臺灣賊匪滋事往來摺報緊要應酌添臺站遞夫今自福州府上至浦城下至同安二路並漳州汀州邵武福寧永春龍巖等府州屬於原設正站五十七驛外共添設正站二十二處腰站

一百九十八處至添站必須添夫自浦城至廈門為遞送軍報孔道每正站設夫六十名腰站三十名次漳州府屬之詔安龍溪福寧府屬之福鼎霞浦汀州府屬之長汀上杭等縣與浙粵江右連界調兵運糧亦關緊要每正站設夫三十名腰站十五名其偏僻小路正站設夫八名腰站四名又自廈門至鹿耳門蚶江至鹿仔港兩處海口照臺站例各設渡海夫六十名等語查閩省軍務旁午固應酌添站夫但該督未將道里遠近事務繁簡詳悉聲明均難懸議應飭令查明具奏到日再議再閩省至京經由各省驛站恐額設夫馬不敷供遞並請行文直隸山東江蘇浙江各督撫於各本省簡僻之驛遞夫馬內量為抽撥協濟事竣徹回諭曰兵部奏准閩浙總督知會福建省應行添設站夫未將道里遠近事務繁簡分別聲明難以懸議請敕交該督查明具奏一摺現在臺灣正在勦捕賊匪

之時所有文報往來最為緊要自應酌量添設驛站以便迅速接遞朕早經想及未及降旨而李侍堯亦並未先行具奏僅咨部辦理未免遲緩此時該省軍務繁多若俟來往行查更需時日所有福建省應行添設站夫著照該督所咨辦理其餘各省應行添設驛遞夫馬之處著照該部所請行但各省驛站須有大員專司督辦直隸省著派梁肯堂山東省著派繆其吉江蘇省著派通恩浙江省著派歸景照福建省著派伍拉納照料查察毋致遲延貽誤○諭軍機大臣等前因福康安前來熱河陛見諭令勒保赴甘署理督篆其山西巡撫印務令藩司鄭源璫暫行護理今思東省疏濬坡水河渠業已竣工微山湖蓄水充裕即來年隨時宣洩事宜昨已降旨令蘭第錫長麟妥為料理明興在彼亦無應辦之事至山西巡撫印務未便久懸著傳諭明興接奉此旨即由濟寧工次馳赴山西署理

巡撫事務毋庸前來行在請訓本日徐績由新疆差竣前來熱河召見時朕詢及途次情形據伊面奏路過大同一帶缺雨間有被旱處所並著明興於抵任後將大同等處被旱地方詳加察看有無成災之處一面妥為撫卹一面具奏毋稍諱飾○又諭據保寧奏四川總督衙門額設筆帖式二員除由理藩院揀補一缺仍照舊辦理外由部揀補一缺請就近於成都將軍衙門現任筆帖式二員內揀選一員調補等語固為酌歸省便起見但例由部中揀補之缺既由將軍衙門筆帖式揀選調補而所遺之缺即以滿洲候補筆帖式揀補則將軍衙門可以多出一缺且總督衙門筆帖式所得分例自必較為優厚是名為體卹京員往來跋涉而本省添出一缺陞途較廣所得分例亦優毋謂朕未經看出也此次既經該督奏請姑准其所奏辦理嗣後不得援以為例將此諭令知之○戊子諭軍

機大臣等據阿桂奏會看睢工漫水及堵築情形一摺內稱現在疏導堵築事宜所有挑挖引河為目前第一要事此次估挑引河自河頭新築土壩以東直至商邱河尾止估挑引河連抽挑引溝共長九千七百六十丈共土一百八十餘萬方等語此次漫口即係舊時黃流故道內外地勢相去不過數尺辦理當易為力所估挑挖引河自應如所奏辦理前因想及蘭陽李六口引渠開放時將舊土山刷去較為得勢曾諭令阿桂等會同商酌或將李六口引渠再行挑挖寬深將來漫口堵合後可以引溜北趨使南岸隄工不致著重今阿桂等估挑引河雖在李六口引渠下游但李六口引渠前此原因蘭陽十四堡埽工險要而設今既經開放得勢自亦應再加挑挖使將來大溜順勢逼入引渠相離南岸稍遠是亦保護隄工之一法不知辦理及此否仍著阿桂等酌量情形是否可以次第施

工之處熟籌妥辦據實覆奏尋奏李六口引渠距十三堡漫口幾及百里從前溜勢去隄尚遠嗣因該處溜往南趨於十四堡建築挑水壩並開挑引渠一道引溜北趨現在引渠已刷寬至五十餘丈水深一丈七八尺不等分溜五分有餘舊土山刷去一百七十餘丈十四堡埽前水勢甚為平緩但大河由李六口歸入新河本有斜向東南之勢直至睢州下汛始向東北徑達商邱河尾是以李六口一帶河形往北本不甚順雖節經設法利導而溜勢仍未北注且查蘭陽十四堡儀封七堡及睢州上汛頭二三堡並下汛二堡東西挑水壩各該險工壩臺埽面俱極寬厚隨時鑲護尚可無虞至此次十三堡迤東在大河內估挑引河形勢總屬直向東北歸入商邱舊河將來漫口合龍之時再將硃筆指示之挑水壩接長加鑲不惟金門得資保障即下游寧陵商邱一帶南隄不至著重是李六

口引渠此時無庸復加挑挖其舊土山亦俟大工告竣後將積土剋低並多開缺口明年汛發時即可衝刷淨盡得旨如所議行○己丑閩浙總督李侍堯奏臺灣府庫貯兵餉等款銀兩故守孫景燧任內墊用無存兵餉不敷支放本應查究但現當勦捕逆匪之時未便遽行辦理諭軍機大臣等臺灣府庫貯兵餉等款銀兩係五十一年奏銷以前徵收錢糧實貯在庫與本年被賊擾累官莊無涉何得藉稱墊用無存明係孫景燧那移虧空無疑孫景燧係臺灣知府平日於地方事務既浸無整頓以致釀成林爽文等糾眾不法肆行滋擾之事而於庫貯銀兩又復任意虧缺是其侵漁歛怨激成事端不可因已被賊害而寬其罪使其家屬仍坐享豐厚著琅玕即將孫景燧家產查封以抵官項○又諭曰孫景燧在任釀成事端又復任意虧缺即應參奏查辦乃該督請於事竣後再行辦理試思

孫景燧業已身故將來又復向何人查究乎現已降旨諭令琅玕將孫景燧原籍實財嚴密查抄以抵官項至李侍堯現值閩省地方廢弛之時正當實力整飭乃於此案辦理失之寬縱若此殊屬非是著傳旨嚴行申飭用兵之際諸事宜嚴李侍堯不宜如此做好人也○庚寅上御卷阿勝境賜扈從王公大臣蒙古王貝勒貝子公額駙台吉等食至甲午皆如之○諭刑部議駁雲南按察使王懿德條奏款款皆是王懿德甫任臬司於例外多設科條徒滋煩擾無謂殊屬非是著交部嚴加議處○又諭曰長麟奏德平縣壽民趙琳現年一百五歲五代同堂請旨旌表等語趙琳年逾期頤孫曾慶洽洵屬昇平人瑞特賜御製詩章御書扁額以示寵榮所有應行加恩賞賚及旌表之處仍著該部察例辦理○御製詩曰西川張氏西江古五代同堂夙詠箋

齊彼二家示尚齒。建茲三事喜齊肩。螽斯衍慶宮闈始。燕翼綿禧寰宇駢。壽世熙民宜賦詠。或殊麟鳳紀祥篇。○

御書扁曰。頤壽鍾祥。○辛卯。諭軍機大臣等。前因德成。分派司員前往通倉查驗米色。混分等第。恐誤兌收時日。已將德成。交部嚴加議處。復因胡李堂等。既不與德成會銜具奏。又不勸阻叅劾。曾經降旨詢問。嗣據胡李堂。金簡將德成辦理此事。曾經勸阻。德成執拗不聽情形。具摺覆奏。至德成接奉前旨。亦應將如何誤聽人言之處。據實奏明。何以並未據該侍郎覆奏。豈德成竟以所奏未允。遂爾負氣。不行覆奏。有是理乎。將此傳諭德成。因何不行覆奏之處。據實覆奏。○又諭本日詢問。常青齋摺。差弁繞成龍。據稱將軍劉營。在南門外十里之桶盤棧地方。賊目莊大田。所踞南潭。距桶盤棧營盤。只有五里等語。常青等自駐劄臺灣。已經數月。其桶盤棧營盤。相

距南潭。不過五里。該將軍等。早應統領大兵。將賊目莊大田。先行剿除。乃惟知結營自守。似此肘腋之間。任其逼處。竟不思乘勢攻剿。實不可解。前以為南潭離大營尚遠。故屢次諭令該將軍等。酌留官兵。固守營盤。親統大軍。舍南趨北。與崇大紀藍元枚。會同進剿。此時如尚未啟行。該將軍等。即行帶領官兵。速將五里外南潭屯聚之莊大田。痛加剿洗。以清肘腋。且此次續調兵丁。其粵兵二千。據李侍堯奏。業經配渡前往。其餘浙粵官兵。自己陸續到彼。常青等。正當乘其新到銳氣。相機進取。詎可曠日持久。坐失事機。又諭。前因臺灣勦捕逆匪。需用軍糧。且漳泉一帶地方。缺雨。恐米糧市價昂貴。民情不無拮据。已有旨諭。令該撫查明妥辦。並節經降旨。於浙江江西江南四川湖廣等省。派辦米共一百餘萬石。令該督撫等。迅速運閩接濟。是閩省米石。日逐充盈。除應付軍糧之外。儘有多餘。漳

泉二府如有缺雨成災處所該督撫務須詳
悉查明一面奏聞一面即行督飭所屬妥為
撫卹俾閭閻均霑實惠毋使一夫失所以副
朕軫念民依至意○壬辰諭曰海蘭察著為
叅贊大臣護軍統領舒亮普爾普著為領隊
大臣各帶侍衛章京拜唐阿等二十名舒亮
領頭隊海蘭察領第二隊普爾普領第三隊
一同前往福建臺灣勦滅逆賊其由熱河前
往之海蘭察普爾普各賞銀二百兩舒亮亦

賞銀二百兩侍衛章京官員人等各賞銀一
百兩護軍校驍騎校拜唐阿兵丁人等各賞
銀五十兩均令整理行裝分隊馳驛速往所
有需用銀兩即由廣儲司照數領給應領綿
甲戰箭等項照例迅速辦給○命編修關槐
提督廣東學政○癸巳諭軍機大臣等據陳
步瀛奏查明被水各州縣內亳州蒙城為重
懷遠鳳陽靈璧五河泗州盱眙次之宿州又
次之至定遠鳳臺天長全椒無為等州縣因

夏間雨水過多間有積水之處再為分別辦
理一摺本年睢州隄工漫水由渦河入淮泛
溢下注以致亳州蒙城一帶田禾廬舍俱被
淹浸業經該藩司勘明被災輕重情形自應
即將被災較重地方先行照例撫卹現在書
麟已赴豫省幫辦河工堵合約在季秋回任
尚需時日所有亳州蒙城等處賑卹事宜著
即交陳步瀛實心妥協經理督率該地方官
逐戶挨查散給撫卹銀兩毋任不肖吏胥侵

漁中飽俾災黎均霑實惠將此傳諭李世傑
書麟並諭陳步瀛知之○又諭曰副將林天
洛叅將廖光宇病故員缺著常青即於軍營
帶兵人員內擇其奮勇出力者不拘廣東浙
江及福建本省即遴選二員補授行軍之際
全在得人不妨通融拔補以示鼓勵原不必
拘定本省也即嗣後遇有缺出常青等俱應
就隨征出力人員酌量揀補俾勇敢員弁知
所獎勵再據常青等奏賊匪將道路削小田

水堵滿賊人屯剽之所俱有蔗園深溝阻礙去路等語道路既經削小官軍人馬難行則賊匪行走自亦不易乃數月以來賊人四出侵犯動稱萬數是皆由何道而行乎而官兵輒以道窄沙淤為辭豈賊能行而官軍即不能行有是理乎況行軍之道貴在隨宜制變即遇崎嶇險阻亦當設法開道直前推破若因賊匪鬼域伎倆削小道路放水淤陷即束手無策則從前平定金川時跬步皆山又將何以進兵破賊耶常青等務宜悉心籌畫設法前進以期迅速藏事斷不可因循坐待以致師老力疲為要○又諭閩省米石關係軍需要務所有運米海船自應豫為封雇不致臨時遲誤但此等海船俱係裝載貨物各處售賣若截留太多致商賈聞風裹足將來天津等處商船稀少必致百貨騰貴於京師日用所需大有關礙著李世傑閱鴉元琅玕務須悉心籌酌招集海船足資運送即可停止

封雇並隨時嚴行稽察毋使商販等稽延守候吏胥乘間擾累方為妥善○甲午諭據鄭源璣奏大同府屬豐鎮等九廳州縣秋禾被旱成災農民不無拮据請將應徵錢糧暫緩徵收並賞給口糧以資接濟等語大同地居關外土瘠民貧今歲被旱成災自應蠲賑兼施以資口食所有豐鎮大同天鎮陽高山陰懷仁廣靈應州渾源九廳州縣本年應納錢糧及應完倉穀等項俱暫緩催徵以紓民力並著將被災貧民賞給一月折色口糧其如何應蠲應緩分別加賑之處著該撫查明具奏實心辦理毋使一夫失所以副朕軫念災黎之至意○諭軍機大臣曰白石湖山內賊匪經徐鼎士等帶兵搜捕並令兵役義民人等開誠撫慰即有扶掖歸順者三千餘人鹿藿金包裹等處又招出難民千餘人俱經該副將送歸各莊安業可見賊黨雖衆如果能設法招徠勸撫互用無難即行解散此事徐

嗣曾既得該副將稟報則李侍堯駐劄廈門豈有不得信息之理何以未據奏及著李侍堯將曾否續得徐鼎士稟報及此後南北各路有無續行投順民人一併據實覆奏至徐鼎士帶兵駐大甲溪搜勦彰化賊匪前已諭令李侍堯撥兵一千名接濟徐鼎士所撥兵丁於何日配渡前往及近日鹿仔港大甲溪等處勦捕殺賊情形並著迅速馳奏尋奏前據徐鼎士稟報招撫白石湖鹿藿金包裹等處難民多係漳州人與逆賊林小文等同鄉其中有從賊者有不從賊者因泉粵之人概從搶殺以致避難白石湖等處今陸續招撫歸業北淡水地方寧貼至徐鼎士已移駐大甲該處係淡水南境與彰化接界該副將帶領兵民幾及一萬現又遵旨撥兵一千於八月初配渡前往益足添助聲勢自當剋日進攻得旨此亦牽制禦賊之一法得有信息即速奏來又諭據徐嗣曾奏浙省朱石運到

泉廈者已七萬有餘是閩省此時已有朱石接濟其江南江西續運之米亦當接踵而至可以無虞缺乏若因各省米石皆須由江南浙江出口船隻不能應手一時紛紛封雇擾累商民轉多未便著李世傑閱鴉元琅玕務須量其緩急酌籌妥辦次第起運所有江南本省及湖北四川運閩之米止須隨到隨辦使之源源不絕俾船隻流通足敷裝載不必一時齊運將船隻全行截留封雇其湖南應運米石並著舒常浦霖亦由該處徑運江南海口交李世傑等接續配運毋庸咨商江西省轉致耽擱至川省續運之米該督務須妥協辦理陸續接運竟由川江順流而下亦由江浙海運抵閩可也欽差大學士公阿桂奏臺灣西臨大海東憑大山大山之東係生番居住為民人所不到迤西之麓則現為賊匪占據官兵進勦勢須仰攻無由察其虛實而賊眾居高臨下且其中如水沙連虎仔坑

斗六門等處南北在在可通足以伺官兵之隙前邀後截四出滋擾若徒撥兵堵禦則官兵不敷分派惟有將緊要地方如郡城諸羅鹿仔港等處先為駐兵防守再選可戰之兵二三萬擣其巢穴惟臺灣現有兵丁除分守府城等處外為數無多且其中亦少可用之兵勢不得不增添兵力現奉旨令福康安前往督辦應令先行通盤籌畫臺灣現有兵丁若干尚須添兵若干及檄調何省兵用之得方或竟調慣於跋涉山路之黔楚兵各一萬合之粵兵萬餘兵力充裕賊必指日授首得旨俟其到時自當詳酌○乙未諭軍機大臣等本年睢州隄工漫水由渦河入淮泛溢下注以致亳州蒙城一帶田禾廬舍俱被淹浸前已降旨令陳步瀛實力撫卹以資接濟並諭書麟知之矣今據書麟奏亳州蒙城懷遠鳳陽靈璧泗州五河盱眙八州縣業已先行賞給一月口糧其定遠鳳臺等州縣查明被

水尚輕俟委員勘履分別辦理亳州蒙城等州縣連年被災地方積歉小民口食無資殊屬可憫書麟現在睢州工次著飭知該藩司務須督飭所屬實力賑卹俾災黎均霑實惠其定遠等州縣一經勘明如有應行撫卹者亦即迅速妥辦毋使一夫失所將此諭令知之○又諭據圖桑阿奏稱莊浪所出馬甲拜唐阿之缺現無壯丁挑補請將涼州壯丁酌補莊浪馬甲拜唐阿等語所奏殊不明晰且行之亦有未便此項馬甲拜唐阿缺出應即在本處挑補如挑取他處壯丁不惟不均且如涼州壯丁挑補莊浪之缺單身遣往必致棄却家室既非伊等所願若令攜眷而去伊等所得月糧無多又豈有自備資斧攜帶之力朕意莊浪既有年未及歲閑散幼丁莫若遇有馬甲拜唐阿缺出以一缺暫分為養育兵二缺坐補閑散幼丁二名給與錢糧俟成丁時酌其勤勉者一人作為馬甲其餘養育

兵一缺仍行裁去以符原額如此辦理伊等
希圖補缺自必留心習學技藝而年未及歲
幼丁可得錢糧亦於生計有益著傳諭圖桑
阿令其熟籌奏聞○是月閩浙總督李侍堯
奏臺灣殉難各官或素係貪殘即殞身難贖
釀禍之罪或尚稱廉謹則捐軀宜邀死事之
褒臣訪查確實再行具奏得旨此二語至公
該府之虧空豈可恕乎○福建漳州鎮總兵
常泰奏臣奉命署陸路提督當此勦滅臺匪
之際惟有督率員弁認真巡緝得旨勉力為
之不可自滿亦不可畏事徒知自守立於無
過之地○山東巡撫覺羅長麟奏微山湖上
游支幹各河現經借帑興挑嗣後應加意保
護查疏濬河道州縣是其專責但興工之時
雖知急公趨事及收工後每任意玩視請嚴
定處分如州縣境內河道淤墊即將該管官
照河工隄岸豫先不行修築例降一級調用
兼轄官罰俸一年捏報挑濬者州縣革職兼

轄官降一級調用得旨以此明示各州縣或
稍知懼耳然總在汝留心時查

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十五

大清高宗法天隆運至誠先覺體元立極敷文奮武孝慈神聖純皇帝實錄卷之二千二百八十六

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事務處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領侍衛內大臣稽察欽奉 上諭事務處管理刑部戶部工部事務
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次
尋常紀錄十四次臣德齡經筵講官太子少保工部尚書紀錄六次臣曹振鏞等奉
敕修

乾隆五十二年丁未八月丙申朔諭軍機大

臣曰彰化等處賊匪屯聚雖據稱有一二十萬人但係被賊用威迫脅勉強聽從不過烏合之衆今經藍元枚傳旨曉諭即有民人從賊巢投出自訴並非賊黨該叅贊詳加開導諭以擒殺賊匪立功自効皆知歡欣鼓舞共慶更生是賊匪雖衆易聚亦易散若能設法招徠自當紛紛投出賊黨日就解散至藍元枚與柴大紀札商會攻因道路阻隔尚未得有覆信鹿仔港兵力稍單未能前進但藍元

枚所請添調兵五千名早經如數撥往藍元枚當乘此兵力厚集速行進剿以此時情形而論當以打通諸羅接應柴大紀為急務又柴大紀駐劄諸羅督率官兵義民竭力堵禦賊匪屢次攻擾縣城俱被官兵殺退擊破枋車礮賊甚多並將賊首林爽文用事頭目蔡福等用礮擊斃賊首為之奪氣常青等所派魏大斌田藍玉接應之兵此時自己打通道路併力前進柴大紀得此兵力援應自更為得力近日如何殺賊攻剿情形著柴大紀迅速馳奏○丁酉祭

先師孔子遣協辦大學士劉墉行禮○諭軍機大臣等現在諭令福康安前來行在面授機宜令其前赴臺灣更換常青督辦軍務至臺灣前後所調兵丁自己足敷攻剿但該處山深菁密路徑崎嶇因思湖廣貴州兵丁前經調赴金川軍營於馳涉山險較為便捷若調往臺灣助剿自更得力著傳諭舒常等於

湖北湖南各挑備兵二千富綱李慶茶於貴州挑備兵二千揀選曾經行陣奮勇幹練之將備帶領一切軍裝火藥妥為密行豫備聽候調撥如必須調遣或俟諭旨到日或接到福康安檄調文書即行分起迅速前進其湖廣官兵即從本省由江西一路行走貴州兵丁從廣西廣東一帶行走所有沿途經過地方並著該督撫等一體豫為籌備俟兵丁到境即可迅速通行仍須妥協經理毋致張皇擾累○又諭曰川省屯練降番素稱趨捷前經調往甘省勦捕逆回甚為得力著保寧即於屯練降番內挑選二千名並揀派曾經行陣奮勇出力之將領張芝元等分起帶領從川江順流而下由湖北江南浙江一路前赴閩省所有沿途應用船隻及一切應付事宜並著舒常李世傑琅玕等豫為籌備免致臨時遲誤○又諭曰臺灣逆匪林爽文等於光天化日之下膽敢糾眾不法劫縣戕官前特

派總督常青前往臺灣授為將軍督辦勦捕事宜數月以來該將軍督率調度尚無過失但統領多兵駐守府城營盤雖屢有新獲並未能痛加殲戮挪移尺寸之地相機進剿是常青雖屬無過亦不得為有功且該將軍年逾七旬究恐精神不能周到茲特命福康安前來行在面授機宜令其攜帶欽差關防馳赴臺灣更換常青督辦軍務即授福康安為將軍並授海蘭察為叅贊大臣普爾普舒亮為領隊大臣其恒瑞藍元枚柴大紀仍著照前叅贊軍務並揀派曾經戰陣之巴圖魯侍衛章京一百餘人分起前往領兵征勦至臺灣初次調撥及續調官兵已有數萬嗣又於廣東浙江添調綠營及駐防兵萬餘名並於福建本省派撥兵六千現又添派四川屯練降番并於湖北湖南等省挑備兵數萬陸續造程前往合計徵調各兵不下十餘萬福康安到臺灣後察看情形如以兵力多多益善

再應添兵若干。即一面檄調。一面奏聞。所有應用軍糧。已於浙江。江南。江西。湖廣。四川等省。撥運米百餘萬石。軍營火藥等項。亦已廣為儲備。著李侍堯。通盤覈算。妥為經理。俾足數十餘萬官兵之用。毋致稍有短缺。似此大兵雲集。加以派出帶兵之巴圖魯。侍衛。章京等。皆係屢經行陣。一以當千。是百餘人已足當萬餘人之敵。諒此公聲小醜。一時烏合。何難立見殲除。指日授首。至常青勦捕賊匪。雖

未能藏功奏績。念伊究係年老。尚無貽誤。著於福康安到臺灣後。即行來京。陛見。再赴湖廣總督之任。○署湖廣總督舒常奏。湖北宜昌。施南二府屬之長陽。興山。鶴峯。歸州。來鳳。建始等州縣。出產硝觔。向係商民自備工本。赴產硝地方採辦解省。交局給價。以供各營歲需之用。現在籌備閩省。採買硝五萬觔。若仍照常俟商民採辦。勢必貽誤。應先行動項。給發產硝州縣分飭上緊辦理。勒限解省。一

俟閩員到楚。即可給領運回。得旨嘉獎。○戊戌祭

大社

大稷遣肅親王永錫恭代行禮。○

上御卷阿勝境。賜扈從王公大臣蒙古王貝勒貝子公額駙台吉等食。至辛丑皆如之。○諭軍機大臣等。朕特命福康安前往更換常青之意。並非因常青辦理軍務大有詒誤。實因常青年逾七旬。軍旅之事。本非素練。恐日久

因循不能辦理完結。是以特命福康安前往接辦。以期迅速藏功。福康安未到之前。常青接奉前旨。不必心懷疑懼。轉致遇事茫無主見。遇有可進之機。仍當督率將弁相機進剿。若因有福康安前往接辦之旨。心存觀望。稍有懈弛。不復努力前進。則常青不但無功。而且有过。即大負朕委任之意。該將軍當明諭朕意。倘此時能將逆首林爽文擒獲。固屬甚善。即首逆尚在稽誅。而賊目莊大田若能擒

獲官兵已操勝勢已諭福康安於途中得有捷報即先行拆看若見常青於勦捕事宜業已得力並可無須前往即由途次仍回甘肅本任將來辦理善後一切原屬常青所優為更無須福康安前往幫助也○又諭據塔琦等奏稱燕起糾合布魯特數百人到色呼庫勒地方搶去牲畜人口無數由喀喇烏蘇逃走一面派侍衛官兵追捕一面行知明亮截拏等語逃犯燕起在外窮迫膽敢糾合布魯特多人搶擄色呼庫勒部落實屬可惡著派老格即帶索倫兵並勇健布魯特回人追拏務獲塔琦明亮仍曉諭各處卡座小心防範如敢再來搶擄務必竭力截拏痛加勦殺○旌表守正捐軀直隸武清縣民李之發妻張氏守正被戕山東陽信縣民趙能妻徐氏已亥遣官祭

關帝廟○禮部尚書管太常寺事德保等奏向例遣官致祭

文廟於節次行禮之後俱有一揖今協辦大學士劉墉於祭祀時未照例行一揖之禮請交部查議諭曰太常寺堂官叅奏劉墉違祭文廟未行一揖禮一摺從前朕為皇子時曾經致祭

文廟記所行儀注並無一揖之禮今禮部所用儀注仍有此一揖自係相沿未經改定劉墉於祭祀時以一揖之禮不可行未經照例行禮該堂官固應據實叅奏但此一揖之禮俱在上香獻爵飲福受胙之後本係小節俗禮劉墉未經遵行尚非大過姑免交部但劉墉之意既以為斷不可行自應奏明更改乃並未陳奏而於向用儀注率任臆改此則非是至相沿一揖之禮本不可行嗣後著於儀注內改正以昭誠敬○閩浙總督李侍堯奏漳州一帶出產硫磺匪徒私挖煎販現經地方官拏獲究辦諭軍機大臣等硫磺一項為軍火要需該犯等膽敢私行煎挖販賣或被

海洋盜賊買製火藥以供刼掠。或奸民輾轉販售透入賊中。皆所必有。不可不從重治罪。所有孥獲之地方官亦當記功陞用。至該省既有產礮地方。自應開採煎用。乃歷任督撫並未查辦。而營中額用礮礮。轉向湖南遠省採買。其本地土礮。一任奸民私行煎挖。輾轉售賣。以供盜賊刼掠之用。雅德富綱富勒渾俱任浙閩督撫。於此等地方事務關係軍營火藥者。既未能查出。就近採辦。而於奸民挖煎售賣。又漫無覺察。以致私販紛紛。所司何事。除富勒渾業經革職治罪。令留京辦事。王大臣就近傳諭詢問。令其自行登答。至雅德富綱前在閩省時。地方事務廢弛。若此。均令其自行議罪。並即據實明白回奏。○實授李化龍為廣東左翼鎮總兵。○庚子遣官祭昭忠祠。○諭軍機大臣等。南漳賊匪經官兵義民奮勇勦殺。莊大田已有潛逃之信。是賊勢業經潰散。勦捕事務大有轉機。該將軍等乘

此賊人潰散。兵威振作之時。急應親統大兵奮力追殺。若於福康安未到以前。將林爽文莊大田等即時擒獲。則克復全臺俱係常青之功。受朕恩眷。豈復可量。至莊大田潰散潛逃。其勢自己窮蹙。現在北路一帶。鹿仔港有藍元枚在彼領兵堵截。而諸羅接應之兵。已經三路會合。莊大田逃往北路。自無他處可。以竊踞。必逃至大里杙。以為負隅苟延之計。若賊首賊目同聚一處。正可聚而殲戮。即使負隅死守。以大兵全力四面合圍。賊人資糧有盡。無所得食。自當束手就斃。該將軍不可不益加勉力。深入長驅。速行奏績。但仍當酌派弁兵嚴防後路。勿使餘匪得以乘隙潛出。此為最要。至魏大斌前經常青派令帶兵接應。諸羅在鹿仔草被賊攔截。小有阻滯。該鎮能督率官兵透出重圍。前抵諸羅。與柴大紀會合。亦屬奮勉出力。著賞戴花翎。其由藍玉特克什布張萬魁同往接應。能與魏大斌奮

力勦殺直抵諸羅亦尚奮勇著常青查明何人最為出力即於前次發去花翎酌量賞給戴用以示鼓勵至李侍堯辦理軍務調度接應俱為妥協周到此次一得常青處殺散南路賊匪及柴大紀援兵會合信息即行馳奏以慰朕懷亦著賞蟒袍一件大小荷包各一對以示獎勵其常青俟奏報到日再行賞給辛丑諭軍機大臣等京師自招商平糶官米以來已將兩月五城米價是否不致仍前昂貴較前價值大加平減若干朕心深為廕念至本年南糧全漕抵通攜帶百貨自當充集現在南米貨物自己源源而至其價值較前有無平減之處著傳諭綿恩查明據實覆奏尋奏京城因有官米平糶糧價日減各漕幫所帶貨物陸續運京貨值亦平報聞○又諭本日常青齎摺差弁前來令軍機大臣詢問據稱前此瑚圖里帶領廣東莊義民到營止有一二千人其廣東莊所住民人甚多約

有數萬人儘可防守等語前因瑚圖里在山猪毛帶領廣東莊義民前到大營常青等留於大營助勦恐其本莊祇係老弱或被賊人懷恨肆意摧戕曾經降旨飭諭今據該弁所稱廣東莊所住民人有數萬餘其本莊足資捍衛此即常青時運好處現在南路賊匪已經官兵勦殺賊目莊大田思欲潛逃勦捕事務大有轉機該將軍亟當親統官兵長驅北路至大里杙係賊首巢穴四面皆山將來官兵圍攻恐路徑險峻艱於馳陟倘圍攻之後賊人尚在負隅固守則前此派出之海蘭察普爾普舒亮所帶已圖魯侍衛章京六十人令其分三起行走伊等俱經歷行陣勇健趨捷一以當十是數十人已足當萬人之敵到彼後即令帶兵攻撲更當得力並著李侍堯續得臺灣官兵打仗得勝信息即隨時星速知會福康安及海蘭察等如官兵益操勝勢可以尅期集事海蘭察等當加倍趲行早抵

該處即助拏逆匪亦屬甚好倘常青等統兵會剿未能長驅深入設有意外之虞則當仍令海蘭察等在廈門等候俟福康安到彼會齊全力一同配渡放洋方為妥善此則朕不自滿假居安思危之處該將軍等不可不仰體朕意也○又諭前降旨令將湖北湖南之米俱歸江南海運今據何裕城奏江西陸運既屬可行著舒常等即將湖北湖南之米一併運赴江西交何裕城竟由五福一路接運赴閩毋庸再由江南海運何裕城當妥速辦理陸續轉運俾閩省足資接濟至江南海口既無需再運楚米所用船隻較少俟川省兩次撥運米石到時正可隨到隨運陸續載往海船無虞缺之更不必將商船全行封雇致滋擾累也 壬寅

上御卷阿勝境左部哈薩克汗幹里蘇勒坦之弟哈咱木及副使達雅爾等五人入覲並同扈從王公大臣蒙古王貝勒貝子公額駙台

吉等賜食○予奉調出征遭風淹斃之廣東駐防滿兵舒通阿賞卹如例其被溺撈獲兵丁七名俱賞給一月錢糧○癸卯土爾扈特貝子奇布騰等五人杜爾伯特貝子鄂勒哲布圖庫等七人入覲

上命隨至獅子園賜食○諭軍機大臣等向來漕運總督於押運事竣後即前赴行在瞻覲此次毓奇督運北上約計全漕抵通時已在朕進哨以後屆期正須催趲回空船隻著傳諭毓奇竟可不必前赴行在若重運尾幫俱經抵通即由通州回程若在天津起卸即由天津督押回空漕船上緊催趲以期早回水次於新漕受兌之期不致有誤方為妥善○又諭曰李侍堯請將福寧鎮何俊暫署水師提督一節何俊如果熟悉海疆足資彈壓自可令暫署否則前次派出赴閩之王柄人亦明白著該督於此二人內酌其才具實堪勝任者量委一人署理水師提督於巡緝稽查

更當得力。甲辰

太宗文皇帝忌辰遣官祭

昭陵。諭軍機大臣等。前因豫省睢州有漫口之事。偶憶及上年阿桂會同李世傑等開挖二套引河。分洩清水。現在洪澤湖水勢盛漲。若再將二套引河挑挖深通。走成熟路。將來豫省合龍清黃會合。竟可從二套引河下注歸海。並於三套地方築建攔黃壩。逼溜全趨引河。曾將圖內用硃筆標誌。命李世傑、李奉

翰二人查勘辦理。原因伊等繪進原圖內。二套引河形勢寬展。竟似正河三分之一。一經展挖。足資容納。是以諭令酌量再加開挖。為先事豫籌之一法。今據李世傑等奏。正河現在歸海之路。已屬寬深暢達。二套內外似可無需大辦。並稱正河內若築做攔黃壩。則歸海之路不暢。上游必致壅遏等語。此奏自係實在情形。但披閱新圖內。二套引河甚為窄小。原挑口寬僅止二十丈。至十餘丈不等。而

正河當大汎盛長時。水面寬至一千三百餘丈。似此情形。與原圖迥不相符。若原圖所繪二套引河。僅寬一二十丈。焉有將大河一千餘丈正溜逼令全趨入海之理。且正河歸海之路。既屬寬深。去歲又何須另開二套引河。糜費帑金。徒勞無用。看來伊等從前竟係因阿桂會辦之事。心存迴護。及朕降旨令伊等親往查勘。親見實不可行。又不肯據實奏聞。藉詞支飾。而前此硃筆標誌原圖。並未隨摺

繳還。可見伊等亦自知原圖尚多迴護。未為確實。恐兩相比較。其偽立見。朕豈能為所欺乎。所有挑挖二套引河。及築做攔黃壩之處。俱著毋庸辦理。將此傳諭李世傑等。并諭阿桂知之。尋李世傑等奏。臣等原估挑挖引河。今覆勘情形。實與原圖不符。又奉發照繪粘簽之圖。並未呈繳。尤為疎漏。得旨。非疎漏不過。恐露出前非耳。此等弄巧成拙。朕前不可。○又諭據李世傑等奏。本月初一二日風雨

交加高郵邵伯等湖水勢湧漲運河內陡長水三四尺東岸周家溝等處大隄有平水漫水處所搶護不及請將文武疎防職名照例查叅并自請交部治罪等語現在高寶等湖水勢盛長在工文武各員不能先事豫防以致邵伯迤上東岸隄工有漫水之處自應照例叅處至李世傑李奉翰彼時正赴二套查勘引河自不能兼顧所有自請交部之處著加恩寬免至下河州縣地方據奏晚稻尚未

刈穫恐小民口食不無拮据著該督撫飭屬查明妥為撫卹至關係驛路地方文報絡繹往來仍著督飭地方官妥為辦理勿致稍有阻滯又諭南潭一帶賊人藉為遮避之叢竹密菁現經常青於搜勦時隨路砍伐所辦較好該將軍等統兵前往北路遇有似此深林密菁處所即應隨路砍除廓清道路不使賊人得以潛藏方為妥善又此次隨同打仗之廣東莊義民甚為奮勇出力止賞給銀牌

番圓尚不足以酬勞著常青查明實在出力者拔補武弁數人俾該義民益加踴躍奮勉武舉陳宗器黃奠邦監生藍應舉各率義民為大兵嚮導護送同往亦屬可嘉俱著予以官職用示獎勵至賊匪潰敗恐其逃入內山已早經降旨令該將軍等晚諭生番令其縛獻而海口一帶尤應先事嚴防絕其去路至藍元枚所奏投到之藍啟能等挈其老弱自行投訴其畏賊迫脅自屬實情如有熟悉該

處路徑者正可用為眼目嚮導令其隨同征勦更為得力且既自行投出亦當遵照前旨令其自新從前有無從賊之處可以無庸追究○四川總督保寧奏續辦運閩米三十萬石船隻不敷裝載現飭忠夔等屬並檄調湖北荊州宜昌二府將各處船隻通查留雇諭此項運閩米石本為軍儲要需寬為儲備之用止須源源接濟若如該督所奏將川省及湖北宜昌荊州等處船隻紛紛押雇既有累

商民且恐不肖州縣及吏胥等從中需索藉端滋事尤為未便況江浙等省全賴川米接濟若將川省湖廣船隻盡行封雇則商販無船裝載川米即不能轉運各省米價必致騰貴於民食大有關係該督何見不及此著保寧務須設法妥辦止須陸續撥運期於要需無誤而商販仍不致有所妨礙方為妥善○旌表守正捐軀湖北隨州民辛正萬妻沈氏○乙巳

上御萬樹園大幄次賜扈從王公大臣蒙古王貝勒貝子公額駙台吉等及左部哈薩克汗幹里蘇勒坦之弟哈咱木並副使達雅爾等五人土爾扈特貝子奇布騰等五人杜爾伯特貝子鄂勒哲布圖庫等七人宴諭軍機大臣等現在京師平糴米石錢文俱歸貯戶部庫內恐市口錢價因此昂貴著交金簡於石道工程動支工價費用時將此項錢文先儘動用發給俾資流通以平錢價○丙午

太祖高皇帝忌辰遣官祭

福陵閩浙總督李侍堯奏現奉旨令臣與兩廣督臣孫士毅再募兵數萬以備調遣但近聞官兵焚燒南漳見賊寨內糧食就盡其夥黨乏食且互相欺奪彼此不睦是南路賊匪已有渙散之勢可不必再募兵數萬臣於泉州及沿海各營酌募兵五千備用如察看臺地情形尚非旦夕可了隨時再行增募以新兵存營訓練而以已練之舊兵派往亦足應手得旨籌畫精詳可嘉之外無可諭又奏前奉旨令藍元枚帶兵往鹽水港勦賊打通糧路但查鹽水港距府城近而距鹿仔港較遠如藍元枚自鹿仔港帶兵南行而賊兵乘此潛至鹿仔港及北淡水等處滋擾則藍元枚又須折回臣因移會藍元枚令其即從陸路進攻大里杙斗六門等處直逼賊巢以期一鼓擒獲得旨甚是用兵機宜原當相時而動前旨原為賊占鹽水港也今情形不同汝所

辦甚是○丁未秋分夕

月於西郊遣怡親王永琅恭代行禮○

上御卷阿勝境賜扈從王公大臣蒙古王貝勒

貝子公額駙台吉等及左部哈薩克汗幹里

蘇勒坦之弟哈咱木並副使達雅爾等五人

土爾扈特貝子奇布騰等五人杜爾伯特貝

子鄂勒哲布圖庫等七人宴至庚戌皆如之

○諭朕寅紹鴻圖仰承

昊眷臨御五十餘年壽躋上堦五世一堂錫光

萬慶介景延禧允為史冊罕觀昇平盛瑞茲

王公大臣及直省將軍大吏等以乾隆五十

五年朕八旬萬壽額請舉行慶典豫祝蕃釐

覽奏具見誠悃前此朕七旬慶節內外大臣

奏懇恭祝萬壽朕以徒增糜費未俞所請今

內而王公大臣外而將軍督撫大吏以朕壽

屆八旬臣工身際昌期久承渥澤感激惟忭

出自積誠朕若仍不允准無以申臣下臚懽

祝嘏之願轉似近於矯情且載稽前史三代

以後帝王克享大年莅國最久者不過六君

其年逾八旬者僅梁武帝宋高宗二君而其

在位則不過三四十一年一則侯景擅權一則

南渡內禪考其事蹟殊不足比數若朕躬膺

上壽海宇乂寧親理萬幾孜孜不倦五十餘

年如一日者實古所未有此皆朕仰賴

上天嘉佑

列祖垂庥用能膺受純熙康強逢吉允宜光昭

盛軌以答

景貺而洽輿情著照所請於五十五年舉行萬

壽典禮所有一切儀文俱恭照朕從前率天

下臣民恭祝

聖母皇太后六旬七旬八旬

萬壽慶典之例備辦毋得稍有加增致滋繁費

若內外臣工等不能仰體朕意惟務踵事增

華鋪張過甚轉非至誠愛戴之心逮時朕亦

必不受也至此次慶節率土歡騰宜特沛殊

恩以光鉅典除普免天下錢糧一節前經降

旨。俟朕歸政之時。於嗣君元年。再降恩旨。蠲免外。所有此次應行加恩各事宜。著內閣及軍機大臣。擬開條款。進呈候朕酌定。另降諭旨。○又諭。據毓奇奏。江蘇省領兌華亭。婁縣。奉賢等三縣。浙江省領兌海寧。臨安。新城。於潛。昌化。嘉興。海鹽。嘉善。平湖。秀水。石門。桐鄉。歸安。烏程等十四州縣。漕米各幫米色。微變。不堪交納。將行月耗米抵補。再加交倉贈耗。行糧外。不能復有餘米。請將此次應交三升八合餘米。俟下運分作兩年買補。帶交等語。各幫領運漕米。例有餘米。以資該丁等回空飯米之需。此次抵交外。若再令買補餘米。分年帶交。恐近年丁力疲乏。轉形支絀。所有江蘇省華亭等三縣。浙江省海寧等十四州縣。各船應交三升八合餘米。竟著加恩寬免。以示朕體卹丁力至意。○湖廣總督仍辦臺灣軍務將軍常青等奏。南路賊首莊大田。於附近各處糾衆攻擾。官兵接戰屢勝。凡被脅從。

賊之各莊民人。俱請給腰牌。歸莊臣等酌量發給。但賊匪尚在窺伺。滋擾若遽舍南趨北。恐近府賊窩。又思竊發。而已經安業各莊。不無惶惑。俟添調滿洲粵東官兵到營。再圖進剿。又遊擊邱能成。解押軍裝火藥。前赴諸羅。現在鹿仔草被賊攔截。請兵接應。已派將弁帶兵四百前往。諭軍機大臣等。今日據常青奏到情形。則又似南路賊匪仍未潰散。尚在窺伺。滋擾。而於賊匪乏食一節。並未奏及。以掩飾其不即分兵往北之咎。是誠何心。常青恒瑞同在府城營盤。一人統兵前往北路。一人留營駐守。有何可慮。豈得因賊匪牽制。並不挪移尺寸之地。若云保護村莊。則各處村莊甚多。即數萬之兵。亦不足敷零星分撥防守。豈又將增添大兵乎。賊匪圍攻鹿仔草。遊擊邱能成。請兵接應。常青等既知派兵四百接應。何不親統大兵前往。痛加剿殺。廓清路徑。似此弁兵四百。豈能得力。且鹿仔草係僻。

小村莊前後皆有賊匪此四百官兵應需口糧從何接濟若再有挫失咎將誰任常青於此等事何茫無主見若此又藍元枚處亦屢有旨令其統兵自北而南直抵諸羅合兵會剿乃亦並未前進看來常青藍元枚總因持重怯懦畏蒞不前常青不免蹈黃仕簡覆轍而藍元枚遷延觀望亦與任承恩相仿伊二人受恩深重非如黃仕簡之老病頹廢任承恩之少不更事者可比若再事因循其獲咎將甚於黃仕簡任承恩矣現在浙粵二省駐防綠營及續調漳州兵早已到齊計此旨到時節候又屆深秋暑氣已減雨水已稀該將軍惟當乘此兵力厚集會合進剿若俟福康安到彼一舉歲功伊二人將置身何地耶至南路被脅從賊之人俱請給腰牌歸莊該將軍等即應妥為撫慰設法招集遵照前旨或令入伍或令歸農俾聞風投出解散賊黨方為妥善○戊申

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵○遣官祭

顯佑宮

東嶽廟

城隍廟○

上御澹泊敬誠殿扈從王公大臣官員及蒙古王貝勒貝子公額駙台吉等行慶賀禮庚戌諭軍機大臣等昨據書麟奏到安徽省收成分數其約收十分者係蕪湖一縣九分者

係歙縣休寧等八縣八分者係婺源祁門等八州縣而於通省收成共有幾分並未提及且被水之亳州蒙城等州縣是否尚有幾分收穫之處亦未詳確查明著傳諭書麟即將安徽通省秋成合算實有幾分并被災州縣收穫情形若何詳查分晰具奏以慰厯念○又諭據李奉翰奏查勘邵伯上下隄工漫水情形一摺內稱東岸隄工內仲家莊漫水一處四堡營房頭漫水一處周家溝迤下漫水

一處各寬五六十丈黑魚塘漫水一處寬四十餘丈經由甘泉縣西北隅及泰州興化二州縣境內現在趕運料物一面盤鑲裹護一面進占堵築等語此次邵伯上下隄工漫水均係漕運經由之路現在同空糧艘絡繹南下趕回水次關係緊要乘此秋令水落之時且係運河隄岸堵築尚易為力著傳諭李世傑李奉翰督率將備廳縣各員將應用料物上緊趕運分投趨堵務期及早速竣至甘泉

泰州興化等州縣境內地方據奏民人見湖水盛大早已遷移高阜並未傷損人口早稻中稻俱先經收割登場惟晚禾尚未全行刈獲等語著傳諭李世傑閱鶚元督飭所屬將被災各州縣確切查明實力撫卹毋致一夫失所其橋梁驛路衝塌殘缺之處並著趕緊修理俾文報往來不致遲誤為要○又諭本日圖薩布奏雨水情形一摺稱省城及近省各地方六月初三初五初六等日俱獲細雨十

一十六等日復得中雨初二及二十六二十八等日大沛甘霖低田現已霑足高田亦覺滋潤等語是該省雨澤頻霑收成可望而摺內復稱再得透雨晚禾方可一律插齊則又似有望雨情形何以該撫所奏前後互異殊未明晰著傳諭圖薩布即將該省是否甘雨一律普霑及間有缺雨之處今得雨否或成災否查明詳晰具奏毋得稍有諱飾尋奏粵東濱海地方沙多土少雨水難蓄易消六月

間雖節據各屬報得透雨仍有續望雨澤補行栽插之處至七月後連獲大雨數次高低田畝均已霑足先後插蒔齊全間有高地不能積水之處農民亦改種雜糧即使收成未能一律稔熟可無慮成災得旨覽奏俱悉又諭曰魏大斌援應諸羅而邱能成所押糧餉火藥仍被賊匪梗阻不能前進看來竟係賊人狡計將魏大斌放出重圍聽其入城仍將糧餉截斷道路梗阻則柴大紀雖與魏大斌會合仍不能勦散賊匪而諸羅添此應援之兵糧餉又被截斷更恐軍糧不給著常青李侍堯將所運諸羅糧餉火藥究竟仍在鹿仔草或係全行運到及鹿仔草道路曾否打通不致梗阻之處迅速馳奏又據李侍堯奏徐鼎士稟稱令鹿仔港大兵密訂進期在大肚溪等處聲援而徐鼎士分兵兩路一攻大肚一攻烏日莊斷賊左右烏日一破即以大礮轟擊大里杙使賊人腹背受敵又可乘高

而下為擣穴擒渠之要策藍元枚前已有旨令其統兵徑赴諸羅會合常青柴大紀今大甲一路既有可乘之機該叅贊又當與徐鼎士速行訂期夾攻直搗賊巢用兵之道原貴相機而動不必拘泥前旨著李侍堯藍元枚傳諭徐鼎士若能督率兵民乘機進勦傾其巢穴則逆匪夥黨聞風解體更無難迅速掃除撲滅是平臺之功徐鼎士實為第一將來受朕恩眷豈復可量耶徐鼎士務須倍加努力速成大功

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十六

實錄卷一千二百八十六

五

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處總

纂修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處總

纂修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處總

纂修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處總

纂修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處總

教修

乾隆五十二年丁未八月辛亥

上自避暑山莊啟鑒辛木蘭。○是日駐蹕中關
行宮。○壬子諭曰喀爾喀公品級車登達什
係成衮扎布世子占楚布多爾濟之子著加
恩授為輔國公在乾清門行走。○是日駐蹕
波羅河也行宮。○癸丑諭軍機大臣等據明
亮等奏稱老格等帶領官兵追捕燕起至碩
提地方分守要隘飭令喀哩提金部落之沙
呢雅斯等將燕起擒獲等語老格帶兵追剿
燕起雖非親自縛獲究係伊措置有方勞績

懋著加恩賞給副都統銜。遇缺即補。仍賞銀一百兩。並給雲騎尉世職。喀哩提金部落之沙泥雅斯薩瑪齊訥德爾默特伯克特木爾等俱著賞給四品頂帶花翎。並分賞銀兩。現在燕起業經解至喀什噶爾。明亮等須派妥幹員弁速解來京。勿致中途稍有疎失。○是日駐蹕張三營行宮。○甲寅。

上行圍○閩浙總督李侍堯遵旨覆奏恒瑞在軍中聞其諸事與常青和衷辦理並無意見。不合惟常青滅賊之心雖切。而軍務素未歷練。是以不能扼要制勝。可否於武臣中如海蘭察者。授為叅贊大臣。令其前來會同常青督辦軍務。海蘭察久歷戎行。必能協力進剿。而常青處事亦極明白。自當坦懷商度。相與有成。得旨。已發往矣。恐常青管不住。他是求益而反損。已命福康安馳驛前往。○是日駐蹕阿貴圖大營。○乙卯。

上行圍○諭曰。吏部議處陸費墀等於經手書

籍底本。交代不清。致有遺失。又王燕緒等校對之書。訛脫錯謬。請將陸費墀革任。王燕緒降三級調用。其餘各員分別降調。罰俸二本。均已照簽發下矣。從前辦理四庫全書時。常諭軍機大臣等。若纂校諸臣。果能辦理完善。即徵俸數人。成此鉅典。亦所不妨。是以陸費墀由編修不數年間。擢至卿貳。王燕緒屢經獲咎。後復賞給編修。辦理總校。得邀優敘。洵陞侍講。伊等既蒙恩遷擢。自應倍加感奮。悉心校辦。今四庫書籍繕寫潦草。訛錯謬違。誤之處不可枚舉。而陸費墀於各省採進書籍。又漫不經心。致將有印底本遺失甚多。即此辦理。草率伊二人實難辭咎。是陸費墀王燕緒所得處分。俱由自取。豈可復為寬貸。其別有牟利鬻爵之私。亦不深究矣。○諭軍機大臣曰。管理綿億阿哥府中事務。德保奏據護衛正柱呈稱。前因通州莊頭韓三元呈報親丁盜典旗地五頃餘畝。正柱前往通州查

收地畝業經佃戶等指對過地一項餘畝將認票收存後因州役傳喚佃戶劉三指交地畝劉三並未在家無人指對即有民人劉七帶領多人到正柱寓所毆傷莊頭並所收旗地認呈一併搶去等語旗下護衛等官出外收租查地或藉端滋事固所不免而姦滑佃戶霸占旗地又復抗違毆鬧亦屬事之所有此案該佃戶等若既將旗地盜典而於該護衛前往清查時復藏匿不出率眾毆搶此等

刁風斷不可長著傳諭劉裁即行查明此案是否係該護衛藉端生事抑實係佃戶等抗違毆搶之處秉公查辦據實具奏並將該知州因何遲延不辦一并查明究處劉裁不可因係德保所奏畧有偏向○又諭曰柴大紀處半月以來總未據續有奏報因思魏大斌應援之兵既已會合柴大紀即不能進攻大里棧賊巢自應令魏大斌分兵出城將從前經過道路如鹿仔草一帶屯聚賊匪先行勦

散廓清道路縱使魏大斌不能分身亦應於將弁中擇其勇幹可恃者令其帶兵出城勦捕何以魏大斌到彼柴大紀仍復漫無舉動豈添此魏大斌兵力徒令幫守縣城甘心受賊圍困而不思乘其新到銳氣相機進剿耶著傳諭柴大紀應設法籌畫倍加奮勉○是日駐蹕海拉蘇台大營○丙辰

上行圍○遣官祭黑龍潭

昭靈沛澤龍王之神玉泉山

惠濟慈佑龍王之神○諭軍機大臣曰魏大斌殺散賊匪前抵諸羅而一切軍火糧餉仍不能運送入城道路梗阻是不惟柴大紀被圍而魏大斌又在賊圍之中常青等接到稟報即應親統大兵徑赴諸羅打通道路接應柴大紀方可得力乃僅添派蔡攀龍等帶兵一千六百名前往援應似此零星派撥無益於事不又似魏大斌乎況柴大紀處被圍日久其勢甚為急迫常青於此時尚不親往救

援豈擁此重兵徒以株守府城營盤為事耶
為今之計常青處添調官兵早已齊集竟應
留恒瑞駐守府城營盤常青速統大兵直抵
諸羅藍元枚若已由大肚溪進兵與徐鼎士
訂期夾擊固屬甚善否則即直赴諸羅會合
常青柴大紀則得二三萬大兵全力奮勇剿
殺進搆賊巢擒拏賊首賊目庶可期迅速集
事至川省屯練降番前已有旨派調二千人
該處兵丁自勝江西廣西遠甚是二千人足
抵二萬人之用尤可資以殺賊但屯練降番
到彼尚須時日常青此時不可坐待惟應就
現在添調已到之兵迅速帶往會合進剿毋
得再事因循致蹈黃仕簡等覆轍自干重戾
至福康安在途當趲程前往於抵廈門後毋
庸等候屯練兵到竟先帶同巴圖魯侍衛等
星速前渡臺灣即統領該處官兵徑赴諸羅
會合常青藍元枚柴大紀搆穴擒渠痛加剿
殺以期迅速奏膚功○是日駐蹕呼魯蘇台大

營丁已諭軍機大臣等昨據常青等奏派
兵接應諸羅一摺反復思之常青等辦理此
事實屬毫無定見一籌莫展既不能舍南趨
北又不分一人將南路之賊乘勢殲除豈在
臺灣坐守終老即能了事乎常青何並未計
及止請於江西廣西添調官兵試思江西廣
西之兵與浙江之兵相等豈能得力而江西
兵尤為綠營中之最無用者若以此等無用
之兵付伊等無用之人徒以虛糜糧餉輕試
賊鋒而常青又於各處東派西撥於事更屬
無益從前黃仕簡株守郡城猶得藉口兵少
力單不敷剿捕今常青原帶之兵已較黃仕
簡在彼時為多又經陸續添調閩省及粵東
浙江綠營駐防兵共計不下二萬兵力如此
厚集而復何所藉口常青可不勉圖進取稍
贖前愆耶至福康安已有旨令其趲程行走
一抵廈門竟當直赴諸羅會合藍元枚柴大
紀等直搆賊巢擒拏賊首賊目以期迅速集

事常青究係年老留於軍營亦屬無益且軍中有將軍二人恐事權不一將弁無所稟承轉多未便福康安到後察看情形如有必須留彼幫辦之處即令常青留於軍營亦可若留彼無用即當令其來京陛見至恒瑞年力精壯應仍留於軍營聽候調遣福康安帶有欽差關防即以欽差辦理將軍事務其常青所帶福州將軍印信仍著交與恒瑞可也○戶部議准協辦大學士吏部尚書前任陝甘

總督福康安奏皋蘭金縣河州狄道沙泥州判靖遠安定會寧等八州縣夏田被旱成災應照例查明賑卹蠲緩其河州伏羌被水被雹之處亦一體賑貸至渭源撫彝山丹東樂肅州高臺紅水寧遠秦州涇州巴燕戎格西寧等十二處雖勘不成災而收成未免歉薄所有應徵新舊正借銀糧亦分別緩徵如今冬明春有缺籽乏食者酌量接濟均應如所請辦理得旨依議速行○是日駐蹕納爾蘇

台達巴漢西大營翼日如之戊午

世宗憲皇帝忌辰遣官祭

泰陵○諭軍機大臣曰常青初到臺灣尚有振作之氣及不能取勝又見賊多竟致一籌莫展此事惟仗福康安迅速到彼督率籌辦以期壁壘一新及早歲事若福康安亦如此恇怯豈不失朕所望乎總之賊夥雖多不過脅從烏合易聚易散止須將其渠魁擒戮夥匪自必聞風瓦解彼時相機酌辦或勦或撫自無難迅速集事若如常青零星派撥分投堵禦徒使師老力疲毫無寸進轉與賊人以暇俾得肆其狡計惟知奏請添兵豈賊有二三十萬亦將以二三十萬官兵應之有是理乎從前伊犁金川等處皆係番回部落其人豈止百萬大兵所臨無不摧破克捷掃穴犁庭悉就平定況臺灣本屬內地林爽文等不過么膺小醜乘間竊發以如許兵力而賊首尚日久稽誅更復成何事體耶至李侍堯駐劄

廈門聞見自必真切乃並未將常青年老無用辦理竭蹶情形據實陳奏經朕降旨詢問尚以常青處事明白可無庸另派更換試思常青近日所辦之事尚能望其辦理完結乎看來李侍堯惟恐奏明常青於勦捕事宜不能得力必派伊前往臺灣接辦是以含糊其詞不肯直奏此等處亦不能逃朕洞鑒其實李侍堯於地方軍機辦理尚妥而軍旅素未嫻習石峰堡覆轍不遠即往臺灣與常青無

異朕亦斷不派伊前往也現在添調之兵計月內早已齊集常青若能先將南路賊匪悉力殲除賊目莊大田孥獲固可稍贖前愆否則速統大兵乘其新到銳氣直趨北路前抵諸羅亦尚可補過若惟知株守郡城坐視柴大紀被賊圍困致有疎虞則是常青罪上加罪恐不能當此重戾也又昨據常青奏派令蔡攀龍等由海道前往諸羅援應似由府城至諸羅之陸路已被賊人梗阻現在發往柴

大紀文報究係於何路行走而節次發給柴大紀諭旨總未見覆奏恐不免有在途遺失之事若被賊人檢得賊衆內不乏識字之人轉可得知官兵虛實關係緊要此後所發柴大紀文報若由臺灣府城齎遞即交常青專差奮勇弁兵遞送若由鹿仔港一路齎遞即交藍元枚專差奮勇弁兵齎遞毋致稍有遺失遲誤○御史施朝幹奏定例每月選授外省官員經大臣驗看後吏部帶領引見恭候欽定至八月分陞選各官遇

聖駕巡幸木蘭惟同知以上俟迴鑾日帶領引見而州縣人員即由王大臣等驗放其才具短長未蒙

聖明鑒定於慎重民社之意未協所有八月分銓選州縣等官請俟

聖駕迴京後歸於九月分月官一併帶領引見得旨所奏是依議行○已未

上行圍 欽差協辦大學士陝甘總督辦理將

軍事務福康安奏臣遵旨途折閱常青等奏摺知南北兩路官兵尚未得手所稱兵力不足似屬實在情形現雖有添調之浙粵官兵陸續配渡前往但該兵丁等向未出征恐不能十分得力至柴大紀力捍孤城坐困已及兩月常青雖派蔡攀龍等帶兵往援而兵力無多亦難即時進剿若於郡城各營中撥兵援救而賊人狡計百出見大兵全集諸羅又恐乘虛滋擾郡城臣通盤籌畫所有前奉

諭旨令貴州湖北湖南各挑備兵二千並四川屯練降番二千懇飭各督撫速撥赴閩聽候調用得旨即有旨諭毋畏難毋多慮勉力行之以全朕用人顏面○諭軍機大臣等前因常青等辦理剿捕事宜怯懦因循茫無定見是以特派福康安前往更換督辦軍務今閱奏到之摺看來福康安竟不免為常青所惑畧有畏難之意現在常青處兵力雖經零星派撥止存現兵四千名但添調之浙粵駐

防綠營兵五千名又李侍堯於閩省泉州各營派撥兵三千名早應陸續到彼加以川省屯練兵二千名昨已據鄂輝帶領星速前往是添調之兵不為不多況福康安帶領巴圖魯侍衛等百餘人皆屬屢經行陣趨健可用以如許兵力而又得奮勇帶兵之人更何必於此時先為總總過計乎況就福康安所慮如恐大兵往北賊人乘虛滋擾郡城試思賊匪等如由諸羅一路攻擾郡城則賊人來路

即福康安常青等北去之路正可迎頭截殺賊人焉能逼近郡城若慮賊從間道山徑潛出滋擾我兵豈不可堵其出路若慮南路之賊攻擾郡城則常青在彼數月添兵未及到齊尚能保守無虞豈福康安與海蘭察等同往各路增調之兵萬餘又已到齊且有巴圖魯侍衛等百餘人轉慮其乘虛滋擾之理即使常青於福康安未到之前業已帶兵前赴北路而郡城營盤尚有恒瑞帶兵駐守豈不

足以捍禦福康安又何所顧慮而先存畏怯之意甚不滿朕所望矣福康安身為統帥軍中俱視其意嚮若先有示怯之意則以下將弁等更必心存懦怯士氣豈能振奮耶況即如請添調貴州湖廣等兵亦必須兩月之久方能到彼設諸羅稍有意外之虞已屬緩不濟急於現在勦捕援應機宜有何裨益耶福康安務須堅持定見自有成算相機安辦不可稍涉游移總之此事全在得其竅要決機

制勝以期鼓勇直前朕屢念軍務早已通盤籌畫今不妨為福康安明白宣示使之安心若此時常青等勦捕得有轉機早晚捷音奏至即前此調備之黔楚兵竟當停止徵調福康安自應速渡臺灣督兵奮勦萬一常青等仍前株守諸羅勢竟不支甚或至臺灣全郡搖動則其事必須大辦且將調用京兵及各省兵并不止於調派貴州湖廣之兵而已彼時自應令福康安駐劄廈門俟大兵齊集再

圖進取必不令福康安止帶七練兵二千冒昧前進何必於此時先存疑難畏怯之見乎福康安接奉此旨更當安心鎮定勉圖克捷毋負朕委任之意再現在臺灣勦捕賊匪添兵甚多將來進攻大里代賊巢尤須用礮轟擊火藥鉛彈最關緊要若運送軍營時或被賊人乘間邀截搶奪貽誤非細著常青李侍堯藍元枚等務須加派弁兵小心押運加意防範倘稍有疎虞惟伊等是問○是日駐蹕

都穆達烏拉岱大營○庚申

上行圍○諭軍機大臣等昨據福康安奏稱添派官兵一摺已降旨詳悉開導指示朕臨御五十餘年於一切重大事務經歷不知凡幾無不通盤籌畫熟慮機先今委福康安以勦捕之任豈有令其冒險前進之理無論福康安久經簡任寄以股肱心膂事無鉅細無不休戚相關斷不肯置伊於險地即常青藍元枚柴大紀等身歷戎行皆係為國家出力亦

皆體卹周至。圖其萬全。下至蔡攀龍徐鼎弔。及大小將弁。朕亦無不時加軫念。弗令涉險。豈有福康安為朕所親信倚任之人。轉不為之計出萬全耶。况朕即不為福康安一身之計。寧不為朕一身國家軍旅重務。熟悉籌畫耶。朕屢念軍務。早夜思維。揆之天理。則朕子惠黎元於臺灣百姓。一視同仁。並無額外徵求之事。而以人事言之。則林爽文以無藉細民。負隅蟻聚。止係公膺小醜。即云不肖官吏。貪黷斂怨。亦俱被伊戕害。且肆其荼毒。地方良民受害者。更復不少。實為覆載所不容。亦斷無不速就撲滅之理。我國家荷蒙上蒼眷佑。軍興之際。即偶遇危難。無不轉敗為功。如從前兆惠之在錫伯。阿桂於木果木溫。福桂失之後。亦曾屢經危險。旋俱克成大勲。況回部金川。本其部落用兵。撻伐猶不無戰勝闢土之心。至臺灣本屬內地。林爽文止係編氓。適以自取其死。臨以大兵。有不如摧枯

拉朽。速就殄滅者乎。從前康熙年間。奸民朱一貴糾眾滋事。臺灣全郡俱陷。經總督滿保派令藍廷珍。以一總兵帶兵前往。即能剋期撲滅。况現在派如許重兵。有福康安等帶同巴圖魯侍衛。督率進剿。又何難迅奏膚功。蓋此等刁悍匪徒。一時蟻聚。緩則彼此相助。急則彼此相圖。無論林爽文等罪惡貫盈。斷無不立遭誅殛。即萬一逆匪等。竟將臺灣全郡搶占。而其黨惡匪夥。如莊大田等。亦斷不肯甘心屈服。自必爭為雄長。自相戕害。其勢必至內潰。從前朱一貴占據臺灣後。即有吳姓賊人。互相爭鬪之事。此即前事之證。是林爽文等縱使大肆猖獗。臺灣全郡為賊所占。亦無難設法圖之。指日授首。况此時賊人占據要隘。我兵前往攻剿。在賊匪或得以逸待勞。若賊匪竊據臺灣。官兵分路進攻。則匪徒四處守禦。其力亦必難支。此乃反客為主之勢。辦理更不致棘手。福康安寧未算及此乎。朕

之待福康安。不啻如家人父子。恩信實倍尋常。福康安亦當以伊父傳恒事朕之心為心。竭力奮勉。克紹箕裘。並揆度事機。驗之天理。人心。努力堅定。副朕體卹周至。宵旰焦勞之意。一力擔當。若遇事輒先涉張皇。不特朕將何所倚恃。而伊亦將置身何等耶。就目前情形而論。福康安屢膺軍旅聲威。素著。今領兵前往賊人計大兵必前抵臺灣郡城。自亦專注該處。以圖抵禦。而此處係久經保守。駐兵

之所。可保無虞。福康安竟不必前赴府城。應帶領巴圖魯侍衛等。由蚶江配渡。直抵鹿仔港。若藍元枚業已前抵諸羅。援應福康安。即應接續前進。在後督率會合攻勦。如藍元枚尚未前往。福康安即當會同藍元枚。并檄知徐鼎士。或竟前赴大里杙。賊巢夾攻。乘虛直搗。俾賊人聞知。自必回顧巢穴。眷屬。則諸羅之圍。可不攻而自解。而南路賊匪。亦必聞風驚潰。紛紛解散。此為聲東擊西之計。使其首

尾不能相應。必成擒矣。福康安務須安心鎮定。出奇制勝。勉圖奏捷。○又諭。調派臺灣兵丁所需棉衣等物。其借給工料銀兩。原應照例歸款。但該兵丁等調赴軍營。如果能奮勇出力。將逆匪即行勦滅。迅速厥功。則借支款項。即加恩賞給。免其扣還。著孫士毅。李侍堯。即將此旨宣諭各兵丁等。俾感激歡欣。倍加踴躍。○免四川犍為。西充。三臺。南部。內江。五縣。乾隆五十一年分坍塌上中下鹽井額課。

一千一百零三兩有奇。○是日駐蹕巴顏布爾噶蘇台大營。○辛酉。

上行圍。○遣官祭賢良祠。○諭軍機大臣等。臺灣尚須添兵協勦。著保成。李慶榮。即將挑備兵二千名。派威寧鎮總兵許世亨為總統。帶領速行。分起前進。由廣西廣東行走。迅抵閩省。聽候福康安調用。所有軍裝火藥等項。俱著妥協備帶。勿致稍有缺乏。○又諭。臺灣勦捕賊匪。自常青接辦後。續調官兵。不為不多。

乃福康安於途次一見常青之摺遽為所惑是以未即准行。今再四思維福康安並非不曉事之人於調度機宜豈有不悉心籌畫何至畏難若此推原其意自因於途次接閱常青等奏報情形勢甚急迫而伊前抵廈門尚需時日若俟到彼後該處有不得不添兵之勢臨期再行奏請調撥恐致緩不濟急是以豫為奏請若故違其意恐伊以兵力不給遇事不能卓有定見轉屬無益今已令保成李慶綏等速將備調黔省兵二千令許世亨帶領速行赴閩聽候調用至湖廣兵不能如黔省之得力且遠隔數省道里紆回此時亦可無須紛紛遠調福康安既有屯練兵二千又得此黔省兵丁是此四千勁兵可抵他省四萬加以節次續調之兵軍威已屬壯盛福康安亦可安心鎮靜堅持定見力圖奏績不必再存畏難怯懦之見○又諭曰蔡攀龍自到臺灣屢次奮勇殺賊著有勞績甚屬可嘉所

有海壇鎮總兵員缺即著蔡攀龍補授以示獎勵並著常青傳諭蔡攀龍令其加倍奮勉現在帶兵援應諸羅務將府城抵諸羅一帶屯聚賊匪悉力剿除廓清道路使糧餉火藥隨同官兵運送接濟再賊匪狡黠若蔡攀龍領兵前往未必不又施詭譎魏大斌之計讓出道路俟官兵過後復又邀截蔡攀龍當探知賊匪潛匿處所往前搜剿方能痛掃無遺廓清道路此為最要再賊人鬼域伎倆狡詐百出其所畏憚者係官兵鎗礮正可用以殺賊乃綠營習氣竟有未見賊匪即行施放鎗礮及賊匪猝然銜犯轉致措手不及著常青藍元枚等嚴加訓飭於鎗手後緊接短兵若賊匪相距較遠不可令其施放鎗礮將鉛丸火藥虛擲無用之地待賊匪近前即用短兵撲殺毋令賊匪得逞狡計○是日駐蹕巴顏溝大營○壬戌

上行圍○諭軍機大臣曰魏大斌帶兵二千七

百名前赴諸羅援應。而所傷官兵至一千一百名之多。綠營兵丁素為懦怯。往往遇賊即行奔潰。此項損失之兵。是否俱係陣亡。有無潰散從賊之處。福康安到彼。應即詳悉查明辦理。又常青前摺內稱。諸羅被賊圍困。兵力不足。懇於江西廣西兩省各撥兵三千名等語。是常青所請添兵之處。係屬候旨定奪。乃昨據孫士毅奏稱。接常青札會添調廣西兵丁業經知會如數撥調起程。常青身為將軍。

如遇有緊急。實在兵力不敷。原可自行檄調。但應一面檄調。一面據實具奏。乃常青前摺止稱懇請添兵。而於已經札知粵省之處。摺內並未聲敘。即此可見其遇事糊塗。漫無主見。至諸羅被賊攻圍緊急。柴大紀督率兵民竭力捍禦。甚屬奮勉。萬一賊匪猖獗。援應之兵未能會合。諸羅糧食匱乏。火藥不給。實有難支之勢。則柴大紀當酌量情形。竟率領兵民出城力戰。將賊匪乘勢勦殺。突圍而出。不

可拘泥城存與存。城亡與亡之見。固守勿去。致有意外之虞。既於體統有傷。且轉足以長賊人之氣。於事無益。柴大紀務須審度機宜。完師整旅。方為兩全。○工部議准雲南巡撫譚尚忠疏稱。滇省領運京銅委員駱煒。因在江南上元縣遭風沉失銅九萬觔。打撈一年無獲。照例請豁。應如所請。從之。○署湖廣總督舒常奏。湖北武昌武昌左二衛屯丁九十名。分派看守城門及火藥庫。乾隆十九年。

因荊州滿營火藥局需人看管。於該屯丁內抽撥四名。即將屯糧移營。就近雇募。臣查武昌省城共九門。每門原設營兵十名。分司啟閉稽查出入。其火藥局亦有目兵看守。而屯丁之設。不過備數。每歲徒糜屯餉。請全數裁汰。令其歸屯。所有城門一切差使。即責成營兵專管。火藥局令該管武昌府同知撥役協同目兵看守。至荊州滿營看守火藥局人夫。本係撥給屯餉雇募。應一體裁汰。即於荊州

城守營新添兵丁內酌撥四名稽管得旨如所議行○是日駐蹕達顏達巴漢昂阿大營

○癸亥

上行圍○是日駐蹕伊綿峪大營翼日如之○

甲子

上行圍○是月長蘆鹽政穆騰額奏每年蘆商裝運豫省引鹽由天津運至大名府屬之龍王廟白水潭等處水淺河狹必須另雇撥船轉運每值豫省運京豆麥及軍戶撥糧同時

並雇船戶因此居奇商費不貲甚至羈阻逾歲貽誤課帑今該商等情願捐造撥船一百五十隻專運引鹽請先於運庫存款內動支排造分限二年隨引完納得旨可行知道了○江南河道總督李奉翰奏徐屬豐陽銅沛邳北睢南宿虹桃源各廳埭工本年黃水盛漲屢經大溜衝刷埭多墊陷欹斜現今水勢陡消埭底顯露臣委員前往勘估豫為鑲修堅整俾黃水復歸故道時足資捍禦再徐城

一帶石工間有墊塌一律修補得旨以實為之○安徽布政使陳步瀛奏臣督飭亳州蒙城等屬賑卹災民並親歷各處逐戶抽查以防侵冒得旨覽奏稍慰藉此逐戶可蹤跡段

文經汝亦曾留心乎○閩浙總督李侍堯奏臺匪勢雖鴟張其實多係脅從若來投者加以安撫或就各村莊煮賑或散給銀米亦足散賊黨而省兵力請將浙江江南江西等處現在運到閩省米石多解臺灣南北兩路以供支應兵民及招撫脅從之用其續行解到者分運漳泉一帶平糶接濟民食得旨如此經理甚愜朕懷○又奏海洋劫案繁多皆由各營弁兵不能實力巡緝所致臣於沿海各營每營派兵四百配載繒船各船分作兩班飭令備弁輪流帶領出巡如有失事按照所轄之洋所輪之日嚴叅治罪得旨一切勉力實為之仍在汝不時詳察也

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十七

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級量給內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十二年丁未九月乙丑朔

上行圍○諭軍機大臣等朕前降旨令將編入
年班朝覲西北兩路之土爾扈特和碩特杜
爾伯特等其已經出痘者歸於年班入覲若
人數較少即間年入覲亦可其未經出痘者
不必來京著該部於每年可否令其前赴熱
河朝覲隨圍之處照青海一體具奏請旨其
如何酌定另行編班之處著交伊犁將軍烏
里雅蘇臺將軍及科布多叅贊大臣等會商
議奏但北路土爾扈特杜爾伯特等每歲俱

係自備資斧前赴熱河。若按年班赴京。路途較遠。恐伊等力有不逮。著傳諭奎林。復興。保泰等。除西路土爾扈特和碩特等。仍按原定章程。令其自備資斧。行抵哈密外。其北路土爾扈特杜爾伯特等。或令自備資斧。行至張家口。官為辦給馬匹送京。如力量仍有不敷。或於喀爾喀察哈爾毗連地方。即行官為辦理之處。據實查覈辦理。以副朕體恤外藩蒙古之意。至北路唐努烏梁海。阿勒台烏梁海等。非土爾扈特和碩特杜爾伯特等台吉後裔可比。不必同入年班朝覲。無論出痘與否。每年止赴熱河朝覲隨圍。若人數較少。間年遣派一次亦可。一併傳諭復興保泰知之。○是日。駐蹕安巴。究和羅昂阿大營。○丙寅。諭曰。刑部具題四川省秋審各案犯本內。九卿從緩決改入情實者。共有九起。朕逐案詳加披閱。內惟絞婦杜氏因姦好之僧元淨。搥死伊夫梁大潮一案。元淨因姦敗露。將梁大潮

搥傷斃命。杜氏見梁大潮搥斃。即行哭喊。被元淨用言嚇禁。回家隱忍。並不告知屍父。此案杜氏因姦起釁。致伊夫被元淨搥死。又懼恐嚇隱忍不言。覈其情節。本無可寬。但杜氏見伊夫被元淨搥斃。即行哭喊。究有不忍致死伊夫之心。尚有一綫可原。雖罪應情實。尚可免勾。至李明一案。因伊丐伴李娃子竊取葫豆煮食。李明索食不給。隨拾柴塊毆傷斃命。欺凌幼孩。兇毆致死。又復棄屍。搜物。龍現鰲一案。因向匡珍。元索找田價。致相爭毆。匡珍元拔刀向砍。互相搏奪。因刀落地。龍現鰲俯身拾取。又被按毆。即拾刀連砍。殞命。理曲肇釁。刃殺傷多。馮玉一案。因郭榮向伊索欠求緩。不允。被其毆罵。馮玉用刀架格。被揪。隨用刀砍傷。殞命。刃斃。徒手理曲傷重。倪世斌一案。因七十五歲之道人王復元。向隣寺借宿。倪世斌恐來歷不明。囑弗容留。王復元爭詈向毆。該犯奪棍毆傷。因被腳踢。復取磚香

鑪擲傷殞命毆斃老人傷多且重周興舉一案因妹出嫁嗔伊弟不與點燈持刀欲砍碎伊弟所紮轎子劃傷伊弟經葉開泰趨勸拉住周興舉掙不脫身用刀戳傷殞命逞忿遷怒刃斃徒手解勸之人郭元斌一案因曹芝試告知該犯九歲幼孩竊摘包穀郭元斌勸令不必理論被其毆罵隨用刀格傷因被腳踢復用刀戳傷殞命護子理曲刃斃徒手王潮一案因赴鄧熲家行竊被鄧熲追及抱住用刀戳傷事主竊匪拒捕刃戳事主多傷梅自重一案因李佐向伊父定買麥子未經交還途遇向索致相爭推被李佐棍毆梅自重用刀砍傷殞命負欠理曲刃砍傷重以上八案俱係情真罪當於法無可寬貸部改甚當自應入於情實乃概行列入緩決殊為寬縱陳奉茲身為臬司於此等案犯並不覈其輕重悉心定擬致九卿改擬多案實屬有意從寬以為要譽沽名之地陳奉茲著交部嚴加

議處鄂輝署理總督於該臬司辦理失當不能指駁改正亦有不合但鄂輝本係將軍因保寧來京陛見暫署督篆於刑名案件素所未諳應免置議至保寧身為總督秋獻大典關係緊要該督雖經准令來京陛見但應俟秋審事竣再行起程乃竟委之署任總督辦理以致獄案不能覈擬允當保寧著飭行嗣後各督撫除奉特旨令其來京陛見者自當即行起程此外奏請陛見允准後如遇該省有大計軍政及文武科場秋審等項要務俱俟辦理完竣後再行起程來京陛見不得移交署任卸責致有貽誤將此通諭知之○諭軍機大臣曰護衛正柱呈控佃戶盜典旗地抗違毆搶一案此事總由德保辦理不善所致德保身為尚書又係都統兼總管內務府大臣其所屬司員甚多阿哥府中此等查收地畝取租事件何不於所屬之內務府等司員中酌派一人前往清查乃派該府護衛等

官出京查辦此等護衛本係見小易於滋事之人以致藉端擾累德保係管理阿哥府中事務之人何以並無分曉若此著傳旨申飭嗣後業經分家之阿哥府中事務如京外地畝租息等事著管理阿哥等府中事務之大臣俱於所屬內務府等司員內酌派一員前往毋庸派護衛等官以免滋擾除就近諭知阿哥等將此傳諭德保金蘭伊齡阿知之○是日駐蹕烏蘭哈達南大營○丁卯

上行圍○諭今日首旗侍衛伊進泰等四人並不帶領首旗行走竟在看城近處等候俟首旗將到迎出塞責殊屬膽大偷安行圍與行師紀律無異昔

太宗

聖祖時於圍中失律之人俱曾從重治罪數年來屢經朕從寬宥免伊等毫無畏懼以致首旗侍衛等竟敢如此塞責偷安不可不嚴行懲治伊進泰塔勒必善六十四倭什勒等均

著革職伊等查係何處人即著交該處將軍等令其充當苦差其餘首旗侍衛進德四保亦係未帶領首旗行走但據稱曾至中軍處較伊進泰等尚屬有間俱著革職領圍大臣等並分別議處以示炯戒○諭軍機大臣等據劉秉恬等奏稱湖廣江西糧船抵津已在八月二十五日以後現經督率地方官雇備民船濟撥就近在天津回空等語向年糧艘由天津起撥回空原因氣候已近嚴寒恐

回空船隻中途凍阻是以在天津北倉即行截留較之抵通起卸為早俾空船得以迅速南下不誤新漕受兌之期此次江廣漕船抵津雖在八月二十五日以後但本年氣候較暖現在木蘭行圍進哨後天氣尚覺暄和想運河迤南一帶自必更暖若能趁此時將漕船設法催趲儘數抵通可省將來搬運之煩著傳諭蘇凌阿劉秉恬會同劉綬悉心籌酌辦理所有江廣未經起卸各船乘此氣候尚

暖上緊趲運俾得儘數抵通。多多益善。若時近沍寒再行截留。北倉尚不遲也。○是日駐蹕伊遜河東大營。○戊辰。

上行圍。○是日駐蹕六道河大營。○己巳。賜蒙古王貝勒貝子公額駙台吉等食。○諭軍機大臣等。據劉綎奏。酌定江廣糧船。分別全撥卸貯一摺。內稱於拜摺後。即起身回署等語。前據該督覆奏。綿億之護衛正柱。呈控佃戶霸占毆開一案。兩造各執一詞。是此案尚未完結。該督現在天津。距通州不遠。於酌籌漕糧事竣後。即應順赴通州。將此案確實審辦具奏。乃該督遽由天津回省。並未親往該處查辦。劉綎之意。不過因事關旗地。護衛係綿億府中之人。若將護衛所控情節審虛。恐有礙綿億府中。若以佃戶等抗租毆搶為實。則於地方官未便又不免心存袒護。是以因循不辦。不知朕辦理庶務。一秉至公。虛實惟求。其是斷無袒護皇孫之意。況此事孰是孰非。

一經研究。無難立辦。劉綎祇須秉公審辦。如係護衛藉端滋事。即將護衛照例懲治。若佃戶等果有霸占毆開情節。亦即將佃戶等按例辦理。以儆刁風。方為正辦。乃劉綎身為總督。於此等事件。竟至畏首畏尾。疑難不決。並不即時辦結。為大臣者。不應若此。劉綎著傳旨申飭。仍著將此案即行秉公訊明。定擬具奏。毋得再事因循也。○福建水師提督參贊藍元枚奏。大甲溪岸裏社義民熟番聲勢聯絡。該處路途頗平。可以攻迫賊巢。但查斗六門係賊要隘。勢在必爭。若多帶官兵。先剽西螺。進攻斗六門。較大甲溪更為著要。臣已飛咨常青。崇大紀訂期會攻。再彰化南北兩處生番現訪知熟悉番性之人。令其前往開導。諭以擒賊立功。衆番社無不踴躍樂從。諭軍機大臣等。諸羅被賊圍困。望救甚切。經崇大紀兩次請兵往援。該參贊自應帶領官兵星速前往策應。乃轉稱現在咨會崇大紀進攻。

該處此時正在被圍望救。焉有餘力與藍元枚會合夾攻斗六門之理。看來藍元枚明知諸羅被圍緊急。擁兵不救。徒以大甲溪斗六門等處輾轉推托。以掩飾其株守坐視之罪。豈能惑朕。藍元枚之祖父藍廷珍。以一總兵帶兵前渡臺灣。勦除賊匪。七日之內。剋期奏績。朕軫念前勞。是以將藍元枚屢加拔擢。用至提督。又以伊係本省人。必能深悉賊情。畀以勦賊之任。授為叅贊。並賞戴雙眼花翎。藍元枚自應倍加奮勉。效法伊祖克繼家聲。方為無負委任。今自到鹿仔港後。遲迴觀望。一籌莫展。即所稱曉諭生番。令其擒賊獻功等事。皆不過藉詞支飾。以為占腳地步。藍元枚受朕深恩。何得恇怯委靡若此。若再仍前觀望。按兵不動。則藍元枚即為任承恩之續。況尤非若任承恩尚可推兵少也。著先嚴行申飭。○是日。駐蹕張三營行宮。○庚午。遣官祭歷代帝王廟。○遣官祭

都城隍之神。○福建水師提督叅贊藍元枚奏。臣於七月後患病。雖屢次力疾勦賊。而精神漸不能支。將一切官兵移交普吉保管。束並飛咨常青速派大員前來經理。諭軍機大臣等。鹿仔港一路現駐重兵。最為緊要。藍元枚既經患病。此時常青處亦無人可以派撥前往統轄。福康安此刻已抵閩省。接奉此旨。即應星夜加倍兼程。竟由蚶江配渡。迅赴鹿仔港。即帶領藍元枚所統官兵奮勇打仗。接應諸羅。或與徐鼎士會合夾攻大里杙。惟當相機而行。不必俟屯練及貴州兵到齊。再行進發。彼時若藍元枚病症不能痊愈。所有水師提督。即令蔡攀龍署理。蔡攀龍素為奮勇。屢經打仗出力。是以特加擢任。著福康安先行傳諭蔡攀龍務須倍加奮勉。殺賊立功。至藍元枚自到鹿仔港後。辦理一切。尚為奮勉。後因其擁兵觀望。並無寸進。又不親往援應。諸羅節經降旨飭諭。今藍元枚既稱患病。難

以支持。其情殊可憐憫。現已頒賞大小荷包。以示軫念。福康安到彼。即傳旨賞給。○是日駐蹕波羅河屯行宮。○辛未。諭軍機大臣曰。李侍堯於八月初九日。曾奏帶領續調粵兵之總兵李化龍業已先到。現催令該鎮帶領已到之兵。即日開駕。速赴藍元枚一路協剿等語。是李化龍此時早已帶兵前抵鹿仔港。李化龍人尚明白。且曾經行陣。如蔡攀龍即時不能前抵鹿仔港。即著李化龍署理水師提督事務。並著鼓勵將弁等奮勇出力。相機攻剿。不得因循株守。致有貽誤。至普吉保與藍元枚同駐鹿仔港。藍元枚既經患病。又將官兵交伊管束。普吉保即應將藍元枚患病光景及現在如何督率官兵勦捕事宜。詳悉具奏。何以並未據專摺奏聞。著傳旨嚴行申飭。至鹿仔港現在各副參遊擊等官。俱係營伍大員。久隨藍元枚調度籌辦。已有章程。此時提督雖經患病。該員等正當各為國家出

力。勉圖報効之時。何未見有一人同普吉保勦賊者。福康安到彼。即應鼓勵在彼將弁。統率新到官兵。或會合徐鼎士直攻大里杙賊巢。或竟率領官兵徑赴諸羅救援。將沿途賊匪痛加勦殺。以期道路肅清。軍威丕振。○又諭現在諸羅被困緊急。常青等自應遵旨帶兵親赴北路援應。柴大紀而伊等又因府城存貯糧餉火藥兼之難民甚多。惟恐大兵起程後賊匪乘間侵擾府城。請俟浙粵駐防滿洲兵到後酌留一半駐守府城。帶領一半先淨南路所辦亦覺未中肯綮。此項駐防兵三千前抵臺灣後。軍勢壯盛。正當乘其銳氣。以全力直趨北路。今又以分派一半駐守府城。一半帶往南路勦賊。是兵力又以分而見單。但此時常青等如已帶兵前赴南路。果能將賊匪大加勦殺。擒獲莊大田恢復鳳山。肅清後路。俾無反顧之虞。亦屬甚善。但必當奮力搜勦。將屯占賊匪殲戮無遺。庶不虛此一舉。

不可徒分兵力以致兩處耽延。又據李侍堯奏藍元枚於八月十八日患病身故覽之深為軫惜。鹿仔港現駐重兵方圖進剿。又賊黨互相猜疑漸有潰散之勢。正是極好機會。而叅贊大員忽因病故。軍心不無惶怯。將弁等不無懈弛。觀望並恐賊人聞知藍元枚病故。信息生心。窺伺最為緊要。李侍堯所奏之摺。福康安在途次已經啟閱。自悉該處情形。惟當堅持定見及早馳抵該處。整頓兵力奮勇進剿。倘福康安尚未能剋日前抵鹿仔港。即應先發制勝。以該叅贊雖經身故。但官兵厚集聲勢壯盛。福康安現赴鹿仔港。即日可到。李化龍、普吉保及將弁官兵等務須倍加奮勉。努力自効。俾軍心鎮定。將弁等咸知奮勇。○又諭據柴大紀奏官軍在諸羅城外剿殺賊匪。城內紳耆鋪民挑送飯食涼水。兵丁得不饑渴。又據常青、李侍堯等奏牌腹村義民運糧接濟諸羅城中各等語。該處民人能各

知大義踴躍奉公。深堪嘉尚。自當特沛恩膏。以示獎勵。著福康安、常青、李侍堯即行查明。首先倡義之義民頭目一面奏聞。一面酌給官職。第念各該處義民眾多。若僅將頭目給官嘉獎。恩施猶未普徧。前曾降旨。蠲免臺灣本年應徵錢糧。著再加恩。將五十三年分臺灣府屬應徵錢糧亦概行豁免。並著該將軍等即行普貼謄黃。俾全郡民人共知感激。倍加奮勉。急公以副朕優獎義民有加無已之至。意該部即遵諭行。○又諭曰。福建水師提督藍元枚於臺灣逆匪林爽文糾眾滋事以來。屢經統領將弁奮勇直前。剿殺逆匪。并籌畫一切。皆有條理。特降旨授為叅贊。以示獎勵。昨據藍元枚奏染患痢症。屢次力疾統兵勇往堵剿。復降旨賞給大小荷包。用昭體恤。方冀速就痊癒。迅奏膚功。以承恩敘。茲據李侍堯奏藍元枚於八月十八日病故。聞之深為憫惻。藍元枚著贈太子太保。並賞銀一千

兩以示朕軫念勤勞。優恤戎臣之至意。所有應得卹典。著該部察例具奏。○是日。駐蹕中關行宮。○壬申。諭軍機大臣曰。福康安已屢經有旨。令其速赴鹿仔港。決策制勝。況藍元枚平日在彼督率調度。雖有條理。究不敵福康安。海蘭察二人之智勇兼濟。且藍元枚所轄將弁等。亦遠不如舒亮。普爾普等之久經行陣。奮勇可恃。加以巴圖魯侍衛章京等百餘人。驍勇趨捷。俱可一以當千。福康安統領如許勇將勁兵。又當賊匪猜疑渙散之勢。何堅不摧。何險不破。又何所疑畏。稍有瞻顧。後之見耶。且朕前派福康安等前往督辦時。初不料藍元枚猝有疾病。不能辦理軍務之事。而藍元枚今忽因染病。遂至不起。設非早派福康安等前往。則鹿仔港一路。統率竟至無人。其勢必至掣肘。今甫有藍元枚身故之信。而福康安已即日可抵鹿仔港。督率籌辦。又值新調官兵雲集。士氣振作。壁壘更為一

新此即
上天嘉佑。默膺朕衷。於端倪未兆之時。而有先事豫籌之計。朕實感謝
天恩。默深慶慰。即以此事會而論。實屬機宜。湊合已有成功先兆。諒此么膺草竊。又有何伎倆。能久延殘喘。負隅抗拒乎。福康安尤當堅持定識。乘機鼓勇。以期迅奏膚功。副朕委任。○免安徽無為。廬江。定遠。鳳陽等四州縣乾隆五十一年分水災學田額賦有差。○是日駐蹕避暑山莊。至己卯。皆如之。○癸酉。諭軍機大臣曰。山猪毛。粵東義民。聞知賊匪滋擾。公議挑出一千三百餘人。俱各安頓家室。隨同官軍打仗殺賊。隨營報効。實屬義勇可嘉。自應優加撫獎。令其殺賊立功。所有總理此事之舉人。曾中立。著常青等查明。如係文舉人。即酌量賞給文官。若係武舉人。即賞給武弁。如果人才可用。即予以實缺。亦無不可。此外義民中。尚有充當頭目隊長者。亦著查明

量給頂戴以示獎勵。俾伊等倍加感奮踴躍從事。以廣招徠。至藍元枚病故。普吉保正應激勵將弁。督率兵民。悉心籌辦。奮力自効。乃轉移咨常青等。派撥大員。前赴鹿仔港。試思普吉保身係總兵。豈非大員。於勦捕賊匪。寧非伊分內之事。即使提督印信。不敢擅用。亦豈得旁觀坐視。一籌莫展。看來普吉保竟沒志氣。將來在彼恐屬無益。即總兵亦不能勝任。徒令坐享俸廉。不足示儆。俟事竣後。福康安即飭伊回京候旨。令其前往新疆換班。以贖前愆。○又諭曰。藍元枚所有應襲輕車都尉雲騎尉世職。著伊長子藍誠。即行承襲。仍俟百日服滿。該督咨送到部。帶領引見。用昭優卹。勤勞有加。無已至意。○又諭。據常青等奏臺灣府知府楊廷樸。現已病故。所遺員缺。暫委海防同知楊廷理署理等語。楊廷樸自抵臺灣任事後。於一切堵禦巡防。及經理糧餉等事。均屬奮勉出力。楊廷樸著給還布政

使原銜。以示優卹。楊廷理隨營勦捕。甚屬奮勉。所有臺灣府知府員缺。即著楊廷理補授。○甲戌。以戶部右侍郎兼署兵部左侍郎汪承霈。知武舉。內閣學士鄒奕孝。為武會試正考官。工部右侍郎劉躍雲。為副考官。○予故奉恩輔國公盛昌祭如例。○旌表守正被戕直隸東光縣民王興魁妻張氏。湖北黃陂縣民沈敬睦女沈氏。○乙亥。

上御依清曠。勾到秋審官犯。服制。及雲南貴州。

情實罪犯。停決官犯一人。服制斬犯三十一人。絞犯一人。雲南絞犯八人。貴州斬犯一人。絞犯六人。餘五十二人。予勾。○諭軍機大臣等。據劉戡覆奏。查辦護衛正柱呈控佃戶霸占毆關一案。因劉七在逃。必須緝獲到案。始可定擬。現飭屬嚴拏候審。並於初九日馳赴通州等語。劉七係案內要犯。乃逃逸後。尚未拏獲。此案豈將懸宕不辦。看來劉戡查辦此事。不免畏首畏尾。難以定讞。著傳諭該督。即

將案內各犯及通州知州雷應方一併送京交軍機大臣會同刑部秉公嚴審以成信讞其在逃之劉七並著該督飭屬嚴緝速獲解京以憑歸案質訊 又諭曰常青等久駐府城營盤未得寸進其因循觀望實應自知慚愧今恒瑞既親帶官兵前往自應由陸路遇有賊匪即痛加剿殺速抵諸羅乃轉由海道行走竟是避賊且道里紆迴未免又致遲緩著常青等即將何以不由陸路往援之處據實具奏至藍元枚所遺水師提督員缺朕意欲即令柴大紀調補今因鹿仔港一路乏人經理是以先令蔡攀龍署理又恐蔡攀龍未能即抵鹿仔港續經降旨令字化龍暫行署理至陸路提督一缺朕意蔡攀龍屢次帶兵剿賊且為賊匪所畏最為出力將來自可擢用但伊甫由遊擊超擢副將又陞總兵為時不過幾月若遽任提督未免稍驟著福康安留心察看如果蔡攀龍實能打通諸羅道路

接應柴大紀打仗奮勉著有勞績即奏明將伊陞擢否則於軍前總兵內擇其實在奮勇出力者保奏一員補授以示獎勵○丙子諭軍機大臣等昨據常青等奏柴大紀咨稱賊匪四處打蔡逼近縣城欲暫徹鹿仔草鹽水港之兵以救縣城俟縣城圍解再行打通道路分兵駐守等語柴大紀乃有籌算之人伊豈不知從前魏大斌前往諸羅時將軍裝火藥留於鹿仔草交邱能成等看守若官兵一移賊匪必列搶劫乃為此微調之言明係因諸羅圍困常青等總不肯發大兵往救故為此言以激動常青等之意若常青等稍有見識自當將鹿仔草現存軍裝火藥甚為緊要之語飛檄柴大紀令其不可輕撤一面即自統兵由府城至諸羅陸路速往救援仍遵前旨留恒瑞駐守府城方合機要乃竟計不出此常青不往北而往南恒瑞不由陸而由海繞道避賊竟置鹿仔草鹽水港於不問看來

伊二人於軍旅之事全然不能措置即留於臺灣亦屬無用現在海蘭察等及各鎮將多人不乏領兵之員福康安當察看情形若南路實帶兵之人不妨仍留伊二人在彼令其立功贖罪若實在不能得力留彼亦屬無益即一面據實具奏一面令其回京候旨欽差協辦大學士陝甘總督辦理將軍事務福康安奏臣現在兼程馳赴廈門察看情形如鹿仔港一帶有機可乘即徑由蚶江配渡將

實錄卷五十六

十一

賊匪痛加勦殺諭曰福康安正當堅持定見遵照節次所降諭旨決計迅赴鹿仔港統領官兵安定人心振作士氣直搗大里杙賊巢方合機宜此乃一定不易之理豈可尚有游移林爽文以愚賤編氓乃敢糾眾倡亂刦縣戕官荼毒百姓豈有

上蒼不默鑒朕衷仁愛斯民而轉令此等逆匪肆逆滋擾久延殘喘之理且黨羽不過漳州一處之人較之粵東泉州義勇百姓僅止三

分之一即以臺灣之人攻臺灣之賊已屬事半功倍況加以如許官兵更復何往不克又況陸續添調之兵源源接應耶且林爽文所有糧食火藥等項止係在臺灣各處搶掠隨用隨盡豈能久支而官兵糧餉軍械鉛彈火藥絡繹運送用之不竭是賊人之力量有盡而官軍之接濟無窮賊匪又何能負固一隅相持日久乎此福康安尤可恃以無恐者福康安當決計鼓勇迅速籌辦以慰朕懷福康

實錄卷五十六

十一

安之志定則朕之心亦安不可不善體朕意勉圖奏績○命侍講鄭際唐提督山西學政

○丁丑

上御依清曠勾到四川情實罪犯停決斬犯十二人絞犯十三人餘六十八人予勾○免江西新建縣乾隆五十年分水衝沙壓田地一百二十畝額賦有差○戊寅

上御依清曠勾到廣東廣西情實罪犯停決廣東斬犯七人絞犯十人廣西斬犯四人絞犯

二人餘八十人予勾○諭軍機大臣曰常青奏令山猪毛廣東義民各回本莊所辦又屬拘泥該莊人衆心齊既自能防禦而挑出隨營之一千餘人又能激發義憤願隨官兵助剿常青正當聽從所請令其隨同殺賊立功正可以助官軍聲勢今復行拘泥遣回豈不阻伊等急公報効之心著常青於接奉此旨即派瑚圖里前往該莊傳旨嘉獎並諭以此事係屬常青辦錯現已有旨申飭該義民等仍當前赴軍營隨同官軍征剿如能殺賊立功即當邀恩得賞官職俾該義民等益加踴躍從事更可得力○以直隸宣化鎮總兵保興陝西興漢鎮總兵劉允桂對調○己卯諭軍機大臣曰魏大斌到諸羅後已越月餘惟知株守城中安然坐食專待他人救援伊竟袖手旁觀試思魏大斌前往諸羅係為何事且伊係總兵非若偏裨將弁必聽柴大紀調度派委者可比似此一味株守又安用該總

兵前往援應耶福康安到諸羅後切實查明將該鎮恒怯貽誤之處即行據實參奏

大清高宗法天隆運至誠先覺體元立極敷文奮武孝慈神聖純皇帝實錄卷之一千二百八十八

大清高宗法天隆運至誠先覺體元立極敷文奮武孝慈神聖純皇帝實錄卷之一千二百八十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄五次尋常紀錄十四次臣等謹

將太子少保二部尚書紀錄六次臣等謹將等奉

教修

乾隆五十二年丁未九月庚辰

上自避暑山莊迴鑾○御行殿勾到福建奉天情實罪犯停決福建斬犯四人絞犯十七人奉天斬犯三人絞犯六人餘一百二人予勾○諭軍機大臣等據孫永清奏請俟新任藩司虔禮寶到任將巡撫印務交伊護理再行起程赴京陛見等語現因臺灣勦捕事務未竣添調粵西兵三千名又黔省亦有添調之兵亦由該省經過該撫自應在彼親為點送妥協照料著俟本省及黔省官兵過境完竣

孫永清再將撫篆交新任藩司虔禮寶護理起程來京陛見不為遲也將此諭令知之○

又諭曰海蘭察等與福康安先後出浙江境入閩想海蘭察等抵蚶江時自必等候福康

安一同配渡齊抵鹿仔港激勵將士整頓兵

力即日前抵諸羅合兵進剿惟是常青一路

現在統兵搜剿南潭鳳山一帶賊匪該處帶

兵鎮將如蔡攀龍等已經常青派令援應諸

羅恒瑞亦已接續前往其餘將弁恐無奮勇

可恃之人應於所帶巴圖魯侍衛等酌派一

二十人令其前赴南路交常青派委帶兵擒

拏賊目莊大田更為得力至福康安抵諸羅

後若常青尚未將莊大田拏獲福康安不可

因常青尚未得手轉置大里杙而先赴南路

攻剿舍近就遠使賊首得以負固稽誅此為

最要徐鼎士處前曾諭李侍堯添撥兵一千

名徐鼎士又招集義民熟番數十人正可乘

機攻擊福康安亦應於所帶巴圖魯侍衛內

酌派數人前往幫同帶兵合剿。○兵部以武會試中額請得旨。這考試漢軍取中二名。直隸取中七名。陝西取中六名。廣東取中五名。河南取中一名。山東取中四名。江南取中二名。山西取中二名。湖北取中一名。湖南取中一名。四川取中一名。廣西取中一名。福建取中一名。浙江取中二名。江西取中一名。雲南取中一名。貴州取中一名。○是日駐蹕喀喇河屯行宮。○辛巳諭曰。刑部覈擬山東德平

縣劉致武毆死伊妻龐氏一案。因照凡論將劉致武擬斬。並聲明趕入本年秋審情實。所辦殊屬過當。秋讞大典人命攸關。該部於覈議時自應準酌情理。詳晰妥辦。以期無枉無縱。其間有趕入本年秋審情實者。原因案犯情罪重大。如關係倫常及連殺多命殘忍逞兇編造逆詞。邪教惑眾者。未便日久稽誅。是以趕入情實辦理。所以懲儆兇頑。申明法紀。實明刑弼教。不得已之心。並非欲速置之於

死也。若此等夫毆妻至死之案。不過尋常事。犯該部祇應按例覈辦。入於下年情實辦理。乃遽行趕入本年情實。豈所謂維持風化乎。轉使無識之徒。妄以朕有意從嚴。輕視人命。豈朕矜恤庶獄之意耶。朕辦理讞典。務持情理之平。每年秋審勾到時。於案犯招冊。無不詳加披閱。逐案推求。至再至三。其予勾之犯。必係情真罪當。法無可寬。若稍為曲貸。轉令死者含冤於地下。不得不予以勾決。以示與眾共棄之義。所謂求其生而不得者此也。該部堂官辦理秋讞。有年。豈尚未能深喻朕意。乃為此刻覈過當之事。殊屬無謂。除將原摺交刑部另行照例改正。並著該部嗣後遇有此等尋常命案。俱止須按律辦理。毋庸趕入秋審情實。外將此通諭知之。○諭軍機大臣等。廈門地方為拏獲臺灣匪犯解送經過要地。不可無滿兵彈壓。著李侍堯派調閩省駐防滿兵一千名前往。朕為軍旅要務。曉夜思

維凡所以代為籌畫之處無微不至李侍堯自能仰體朕意遵照妥協辦理也○是日駐蹕常山峪行宮○壬午

上御行殿勾到陝西浙江情實罪犯停決陝西斬犯五人絞犯十一人浙江絞犯七人餘八十二人予勾○諭據李侍堯奏諸羅剿散賊匪情形一摺內稱常青派令蔡攀龍等帶兵接應諸羅於八月二十日分隊進剿直抵縣城二十二日復自諸羅帶兵出城剿殺賊匪

廓清道路等語諸羅為臺灣南北兩路要區屢經賊匪窺伺糾眾滋擾柴大紀督率官兵義民悉力捍禦因兵少力單正在望援之際今蔡攀龍同貴林孫全謀楊起麟邱能成等帶領官兵直前攻剿殺散賊匪速達諸羅復帶兵出城將該處屯聚賊匪痛加剿殺實屬奮勇出力可嘉之至蔡攀龍自派赴軍營以來連次打仗殺賊屢著勞績已由遊擊疊加陞擢用至總兵此次援應諸羅尤能鼓勇前

進往來殺賊宜沛特恩以昭獎勵所有福建水師提督員缺著柴大紀調補其陸路提督員缺即著蔡攀龍補授並著授為叅贊至副將貴林等協力攻剿俱屬奮勇可嘉亦應加恩陞擢前此常青派令總兵魏大斌援應諸羅在中途被賊攔阻及抵諸羅後又祇知坐守縣城並未帶兵出城剿散賊匪實屬畏葸無能魏大斌著革職交福康安留於軍前効力贖罪所遺浙江温州鎮總兵員缺即著

貴林補授貴林所遺廣東羅定協副將員缺即著孫全謀補授孫全謀所遺廣東大鵬營叅將員缺即著楊起麟補授其遊擊邱能成著交福康安遇有叅將缺出即奏請陞補除蔡攀龍貴林已賞花翎外孫全謀楊起麟邱能成俱著賞戴花翎以示鼓勵○是日駐蹕兩間房行宮○癸未諭軍機大臣等孫士毅等奏接安南國嗣孫黎維祁咨覆失去國印一事因該國文移內並無將來具本遣陪臣

之語未便即如所請。並將所擬檄諭文稿一併進呈。所辦是惟是孫士毅等辦理此事。尚有未盡周到之處。該國既請給印信。固應具本恭遣陪臣齎達。方符定制。念該國臣服我朝。最為恭順。黎維祺既經病故。伊嗣孫自必籲請襲封。若於遣官請給國印之後。又復具本請封。未免往來跋涉。自應將懇請襲封給印二事一併具本遣官陳奏。以示體卹。速藩之至意。現今軍機大臣將此一節改入發去諭。以准該國嗣孫黎維祁咨覆。知爾祖國王暮年衰老。鄭氏弄權。脅印私藏。旋因西山侵擾。兵火之中。不知印信失落何處。並非有人攘竊。四處搜尋。迄無所獲。纔十數日。爾祖病篤。西山擁兵甫退。鄭孽乘虛復起。又數月而亂始定。所有爾國失印無追。及爾祖病故。咨報遲滯。緣由俱悉。但思爾祖病故。爾國未經具題告哀。大皇帝尚未聞知。承襲一事。何敢代為聲請。且爾嗣孫既未承襲藩封。則名號

未定。將何字樣給為憑信。事理未順。礙難陳奏。爾嗣孫自應一面恭遣陪臣詣闕告哀。並於本內聲敘遲滯緣由。冀邀大皇帝垂鑒。一面仰祈恩命。准爾嗣孫繼序外藩。永延先緒。并將失印始末據實數陳。大皇帝念爾臣事天朝。素稱恭順。自必恩俞嗣服。勅部重給篆文。用昭世守。夫告哀請封。乃爾國大事。失印補鑄。在其次也。此係非常恩寵。豈本部院所敢籲求。况爾祖國王既經病故。爾嗣孫黎維祁尚未請封。自必恭遣陪臣齎本奏懇。若於遣官請給國印之後。又復具本請封。未免往來跋涉。非天朝體恤速藩之意。爾嗣孫自應將請封給印二事一併具本陳奏。並即遴選陪臣齎本題達。庶幾渥膺主眷。弗墜前勲。該督即遵照繕寫檄諭。將此諭令知之。○福建汀州鎮總兵普吉保奏。鎮臣李化龍帶兵前來鹿仔港。即留在該處駐守。臣親領官兵往西螺斗六門一帶剿賊。諭軍機大臣曰。李化

龍前抵鹿仔港。普吉保即帶兵往西螺斗六門一帶攻勦。所奏較合機宜。是鹿仔港現屬安靜無虞。賊擾現在福康安已即日前抵鹿仔港。又有李化龍在該處駐守。普吉保自應乘粵兵新到。親督將弁。速往西螺斗六門一帶奮勇攻勦。力圖自効。至福康安到臺灣。正值秋涼晴爽。道路已乾。添調之兵陸續到齊。亟應趁此機會。以期剋日蕞事。○是日駐蹕要亭行宮。○甲申。

上御行殿。勾到湖廣情實罪犯。停決斬犯二十一人。絞犯十人。餘九十人予勾。○封閉甘肅西和縣中山嘴銅礦。從署陝甘總督勒保請也。是日駐蹕密雲縣行宮。○乙酉。旌表守正被戕陝西涇陽縣民安寧堂妻張氏。○是日駐蹕南石槽行宮。○丙戌。

上幸圓明園。○詣

安佑宮行禮。○丁亥。諭據舒常等奏靖州吏目陸禮興因家人華坤向兵丁李凱買梨喧鬧。

該吏目鎖入訊明。當令開放鎖鍊。並將家人責處。董世璉不許私開次日吏目路過副將衙門。董世璉等將該吏目用鍊套頸。並據飭司訊出。係副將尚維昭派令前往吏目衙門。不許開鎖。及發出稟稿。傳諭千總捏稟華坤用小錢買梨各情節。將尚維昭解任。一併質審等語。吏目陸禮興訊知家人與兵丁買梨起釁。押鎖兵丁即將家人責處。釋放兵丁。並無不是。乃兵丁董世璉扶嫌逞忿。始而不准開放。繼而用鎖套頸。其情甚屬可惡。吏目雖屬微員。究係職官。即有理曲之事。亦應稟請該管上司究辦。何得擅行鎖項。殊屬目無法紀。此而不嚴加懲治。必起兵丁鼓噪之漸。兵丁董世璉著照軍營鼓噪之例。即行正法。以昭懲創。至副將尚維昭平日既不能約束兵丁。復私寫稟稿。囑令捏稟。居心狡詐。已可概見。何待根究。尚維昭即著革職嚴審。此案情節較重。該督撫等自應親行提訊。從重辦理。

乃僅委之兩司審問。殊屬玩縱。著嚴行申飭。其案內有無別項情節。及其餘犯證。並著舒常等一併嚴審定擬具奏。該部知道。○戊子。禮部議准。廣東巡撫圖薩布奏稱。新寧縣客童四百餘戶。請附籍新寧應試。另編客籍字號。取進文童二名。武童一名。止准入考鄉試。廩增不准撥給等語。查新寧客童。既覈與寄籍應試之例相符。應如該撫所請。另加學額。聽學臣取錄。自後即應試人數較多。亦總以現額為限。取進生員。統歸新寧縣學管束。從之。○己丑。以故雲南鎮南州屬阿雄關土官者朝英子英文襲職。○旌表守正被戕河南杞縣民崔進寶妻宋氏。庚寅。

上詣

大高殿

壽皇殿行禮。○還宮。○辛卯。

孝慈高皇后忌辰。遣官祭。

福陵。○閩浙總督李侍堯奏。臣接閱恒瑞摺稿。

內稱。蔡攀龍等抵諸羅後。仍未能出城殺賊。隨同進兵之貴林、楊起麟等。並不知下落。幸恒瑞先帶兵一千五百。已到鹽水港。水路尚可無虞。至海蘭察等日內。已陸續到廈。福康安現行過省城。亦即日可到。諭軍機大臣等。前據李侍堯奏。蔡攀龍等已抵諸羅。後又帶兵出城殺賊。今據奏到各情形。是此次赴援之兵。又未得手。貴林、楊起麟。係隨同蔡攀龍帶兵援應。諸羅今蔡攀龍雖經柴大紀接應。入城仍未能夠殺出。而貴林、楊起麟。又無下落。自係被賊匪攔截。若有意外之虞。豈不可惜。福康安此時自早。已由蚶江配渡。前抵鹿仔港。該處兵力極為壯盛。福康安竟當派撥巴圖魯侍衛章京二十人。令舒亮帶領前往。徐鼎士處。若徐鼎士已由大甲溪進兵。舒亮等即速往幫同剿賊。即徐鼎士尚未進兵。亦應令舒亮速往會同攻擊。而福康安一面同海蘭察等統領巴圖魯侍衛章京督率大兵以

全力往大里代進。勦該處係賊匪巢穴。一聞大兵攻擊。賊首等自必回顧諸羅之圍不解。而自解。福康安應豫先知。會柴大紀等。如賊匪回救巢穴。即令柴大紀、恒瑞、蔡攀龍等領兵出城。由後跟蹤追勦。而福康安迎頭截殺。使其首尾受困。自可悉數擒擒。倘賊匪仍在。諸羅不顧巢穴。則福康安於掃平大里代後。即迴兵移救諸羅。賊匪見巢穴已傾。自可不戰而潰。最為善策。此即從前諭旨內所引魏

司馬懿欲擒公孫淵。先破襄平之計。福康安不可不決機制勝。至普吉保。如尚在西螺一帶駐守。福康安不妨將普吉保撤回鹿仔港。與李化龍協同防守。福康安竟帶其五千兵進擣大里代。則兵力既加。更可鼓勇前進。惟在福康安相度機宜。斟酌妥辦。再柴大紀處。於蔡攀龍抵縣後。總未據有奏報。恒瑞所駐鹽水港。距諸羅甚近。著即派委妥幹員弁。設法前往諸羅。令柴大紀、蔡攀龍將該處實在

情形及如何籌辦之處。詳晰聲敘。仍遵委能事員弁設法齎送。即行迅速馳奏。○予故喀喇沁扎薩克多羅郡王端珠布色布騰祭如例。○壬辰諭前因京城米糧市價昂貴。特經降旨於京倉內撥米五萬石分給五城地方。發交殷實鋪商減價平糶。並派監糶大臣率同五城御史專辦其事。并令會同步軍統領、順天府各衙門嚴密查察。以平市價。自平糶以來。雖覺糧價漸減。但恐難竣之後。又復漸

次加長。非朕軫念民依。隨時調劑之意。著再撥發京倉米五萬石。交與五城地方減價平糶。俱著照前次章程妥協經理。俾軍民均霑實惠。以副朕加惠無已至意。○諭軍機大臣等。鹿仔港距大里代雖不過數十里。但沿途村莊恐有賊匪屯聚。官兵即往大里代攻擊。恐賊匪又乘間潛出。將後路攔截。則官兵難免返顧之虞。不可不慮。現在川省屯練及廣西貴州兵自可陸續前抵。該處福康安即帶

兵前搗賊巢並知會徐鼎士兩路夾攻而於鹿仔港至大里杙一帶地方仍派巴圖魯侍衛章京等數十人酌帶弁兵沿途分佈堵禦截殺淨盡勿使賊人梗阻道路臺灣全圖前福康安起身時已繪出一分令其帶往今再將鹿仔港至大里杙一帶經朕指示之處另繪一圖發往並路徑地名黏簽註明易於展閱福康安接奉後更可按圖遵照辦理○又諭鹿仔港至大里杙沿途地方所有村莊民

人其中幫助官軍及安分良善者固多而心懷叵測或於官軍過後潛出滋擾轉為賊用者恐亦不少福康安於經過各莊時務須留心察看密行體訪如係義勇良善誠實可信者自當妥為撫慰令其自行守護並可助官軍聲勢倘有心懷反側附從賊黨者一經查出竟應於大兵經過時即將此等奸徒强悍者悉行殲戮止留老弱聽其在莊居住庶無後顧之虞福康安當隨處留心慎重妥辦但

不可冒昧先露風聲轉堅其從賊死守之心至崇大紀非至萬不得已自斷不肯棄城而出該處義民甚多其中如黃奠邦等現經崇大紀搜獲賊匪偽示有必欲甘心之語若崇大紀帶兵遠去義民必致受賊荼毒朕心更為不忍既使助義出力之人無辜受累且恐他處義民聞而生畏阻其踴躍投効之心大有關係著傳諭崇大紀如諸羅已無他慮自應悉力固守以待援應萬一實難守禦必須

出城另圖進取之時務將城內義民及其家屬妥為捍衛先行送出然後振旅出城俾該處義民不致被賊戕害方為妥善○命修撰錢榮在尚書房行走○是日起

上以孟冬享

太廟齋戒三日 癸巳

孝敬憲皇后忌辰遣官祭

泰陵 諭軍機大臣等現在臺灣勦捕賊匪調撥廣東兵已有一萬數千粵東與福建毗連

亦係海疆重地沿海口岸甚多存在需兵巡邏防守而臺灣勦賊事務尚未蒞功或將來尚不無添調官兵之處閩粵係屬隣省遇有調撥較為近便自應豫為籌備此時粵東調赴臺灣之兵甚多該省存兵較少孫士毅此時應於附近潮州一帶地方廣為招募勤加訓練不妨多多益善既可資該省巡防之用設遇有調撥亦可就近派往但須密籌妥辦不可稍涉張皇至粵省前後調赴臺灣官兵必有子弟人等隨往該兵丁內有在臺灣病故損失者自尚懸額未補應即於該兵丁隨行子弟內揀選補額一體充伍食糧隨營効用亦可增添兵力著交福康安常青即行遵照辦理○甲午諭軍機大臣等前據柴大紀奏到搜獲賊匪偽札內有防守海口要隘等語必係慮及將來窮蹙之時希圖竄逸入海可見賊人氣餒已豫思逃竄將來官兵四路追剿賊匪自必由海口遁逸不可不加意嚴

防著福康安常青等務須嚴飭弁兵於沿海各口岸要隘處所梭織往來巡邏稽察毋使賊人搶占船隻得以逃往洋面致搜捕有稽時日○賑貸河南商邱寧陵睢州鹿邑永城柘城等六州縣水災飢民緩徵新舊額賦並予葺屋銀兩○以原任江蘇布政使英善署正白旗滿洲副都統○是月欽差大學士公阿桂等奏睢州十三堡堵築漫口本擬九月底即可合龍因連日北風大作水力强悍西壩下首迴溜尤大以致壩臺陡陷衝失埽箇現將壩頭裹住俟口門水勢畧緩再行趕緊鑲做得旨待之數日早虞有此祇可盡人力以俟

天神之佑勉為之○江南蘇松鎮水師總兵魏轍奏臣於八月後親出外洋巡查各處島嶼並無違禁搭察打捕人等亦無奸匪藏匿海洋洵屬敦寧得旨綠旗習氣不堪非虛應故事則過於騷擾嚇詐牟利此奏祇在疑信各

半慎之○欽差協辦大學士陝甘總督辦理
將軍事務福康安奏臣行抵廈門詢問賊匪
情形近更猖獗自鳳山至彰化要隘處所半
被賊據南北兩路聲氣相通每於官軍經過
之地從中突出邀截以致郡城諸羅兩處受
困日久臣一到鹿仔港即整兵前進務將賊
匪屯聚相聯之處痛加剿殺使其首尾不能
相顧批是以彼巧計攻彼此語得之又稱臣
酌量情形或帶兵直抵諸羅或進逼大里杙
賊巢要領既得雖賊匪衆多無難剋期殲滅
批仍以安民為先解其脅從既安之後仍當
防之○河南巡撫畢沅奏豫省起運漕糧向
令軍船赴衛輝濬縣等處水次領運開行但
衛輝以東河身狹淺必須沿途起剝近年淺
澀更甚羈滯逾期查湯陰縣屬之五陵地方
原係兌運漕糧水次河水較為寬深若於該
處受兌上游漕米止須用小船剝運而近次
各屬更可就近上船尤為便捷請將本年冬

漕暫移五陵兌運一年如果辦理妥協再行
酌議移建倉廩得旨如所議行

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百八十九

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭軍機處管理

吏部理藩院事務五品銜滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭軍機處管理刑部戶部三庫事務

世襲騎都尉軍功加十九級隨帶加二級又加二級尋常加二級軍功紀錄一次臣慶桂

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十二年丁未冬十月乙未朔享

太廟

上親詣行禮○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。遣官祭

孝賢皇后陵。

端慧皇太子園寢。頒乾隆五十三年時憲

書。順天府行鄉飲酒禮。諭勅據王公大

臣及直省督撫大吏等。以乾隆五十五年朕

八旬慶節。舉行萬壽慶典。朕以內外臣工等。

臚歡祝嘏。出自積誠。是以降旨。允行。朕臨御

五十餘年。壽躋上耄。五世一堂。萬慶錫光。歡

勝率土。宜沛特恩。用光鉅典。除恩詔條款。屆

期頒發外。所有下屆鄉會試正科。著於五十

三年八月。五十四年三月。豫先舉行。五十四

年秋。舉行恩科鄉試。五十五年春。舉行恩科

會試。以示樂育敷恩。壽世作人至意。○命定

詩經樂譜。諭朕前披閱朱載堉樂律全書。樂

譜內填注五六工尺上等字。並未兼注宮商

角徵羽。而於雅頌。烝民思文諸詩。以時俗互

葉黃等牌名小令分譜。未免援古而入於俗。

又所著琴譜一絃之內用正應和同四聲長至十六彈不勝其冗而一音之中已有抑揚高下是徒滋繁縟而近於靡曼有類時曲曾經降旨交皇六子永瑤及鄒奕孝等將朱載堉樂律全書內疎漏歧誤之處詳晰訂正分列各條載於本書提要之後以垂永久而昭雅正因思詩三百篇皆可歌詠魏晉時尚有文王鹿鳴等四章但未著宮調學者茫然不知而朱載堉詩譜又固執周詩不用商聲之

說以角調譜國風徵調譜小雅宮調譜大雅羽調譜周頌而專以商調譜商頌夫商調乃宮商之商非夏商之商此其穿鑿拘墟不待辨而自明豈足與言五音述三百哉且古樂皆主一字一音虞書依永和聲雖有清濁長短之節合之五聲六律祇於一句數字內分抑揚高下不得於一字一音之內參以曼聲後世古法漸湮取悅聽者之耳多有一字而曼引至數聲此乃時俗伶優所為正古人所

幾煩手之音未足與言樂也從前朕親定韶樂細繹

皇祖欽定律呂正義考訂精審皆主一字一音實為古樂正聲永當遵守現在朝會大典鐘虞鏗鈞備極莊雅朕前於經筵之典令歌柳成之詩於瓊林鷹揚兩宴令歌棧樸于城之詩皆親為指定而三百篇全詩三代以後未有全行譜定者朱載堉所譜又復雜以俗調或自行杜撰不可為訓所當詳加訂正叶之

宮商俾操縵安絃之士皆得矢詩遂歌更足以昭美盛著派皇子等會同樂部大臣悉心精覈其詩篇內應用某宮某調者俱著詳審文義定為某宮某調仍於各譜駢注七音字樣彙成一書俾四始六義之文皆可歌詠分判節度悉符正始元音庶幾考古而益進於古以副朕條理集成引俗入古至意將來書成時即將此旨弁於簡端亦不必重為之序矣又諭據長麟奏推陞廣西柳州府知府

之現任山東運同王訥才情拘謹難勝知府之任請照例加一級留運同原任仍給咨送部等語所奏情弊顯然柳州向係烟瘴唐時柳宗元曾貶官其地人所共知雖今昔情形不同但該處究屬邊遠不免視為畏途今王訥現任山東運同缺分本為優厚推陞柳州知府自更憚於遠涉該撫所奏雖以王訥才情拘謹難勝知府為辭而該員轉得以陞銜仍留運同之任享其厚祿是名為刻覈其實隱為屬員規避地步所謂害之實以愛之也此等情節豈能逃朕洞鑒今於該撫瞻徇及王訥規避之咎姑免深究但王訥若准仍留運同原任轉得遂其規避之私無以示儆王訥著照例加一級即以原品休致毋庸送部引見至嗣後各督撫若因有此旨而於由部推陞人員無論其才具勝任與否並不據實陳奏聽其陞任則該員等原皆應送部引見之人也彼時經朕看出才具平庸難以勝任

惟該督撫是問恐不能當其咎也○丙申上御乾清門聽政諭據奎林等奏伊犁領隊大臣福寧墜馬身故所遺員缺請另派發往等語福寧前在軍營出力現因墜馬身故甚屬可憫著加恩賞銀二百兩所遺員缺著派承安授為伊犁領隊大臣馳驛前往諭軍機大臣曰阿桂等奏豫省睢州壩工因二十四等日北風大作水力猛悍壩前水深五丈西壩下首迴溜尤大分頭鑲壓無如隨鑲隨墊西壩壩臺陡陷搶鑲不及衝失兩埽並往後掣去坯鑲數層現將壩頭裹住俟水勢畧緩即設法趕緊進做等語已於摺內批示前據阿桂等奏引河開放順利壩工於二十六七兩日可以合龍乃待至數日尚未奏到朕正慮口門收窄或致塌陷之事今因連日北風水勢全由金門湧送堆高致壩工復有墊陷合龍又未免稍稽時日幸衝塌不過十餘丈引河溜勢暢達無虞淤墊施工尚易為力

阿桂等惟當督率在工各員俟水勢畧定即上緊設法鑲做務宜下埽追壓到底工程穩固以祈

天神之佑。剋日合龍。副朕軫念河防至意。仍即將數日內口門水勢及鑲做情形隨時覆奏。以慰廑注。將此諭令知之。○以光祿寺卿管幹珍為內閣學士兼禮部侍郎。○以副都統銜老格為正藍旗蒙古副都統。○丁酉。豁除浙江仁和錢塘二縣水坍沙地五十三頃六

十二畝有奇。額賦。○旌表守正捐軀福建浦城縣民王廷椒妻周氏。○戊戌。

上御懋勤殿。勾到江西安徽情實罪犯。停決江西斬犯十一人。絞犯七人。安徽斬犯十人。絞犯九人。餘七十三人予勾。○諭。現在臺灣勦捕逆匪。尚未竣事。所有軍需等項。動用較多。著該部於鄰近福建各省分酌撥銀三百萬兩。令各該督撫派委妥員迅速解往閩省備用。又諭曰。成都將軍鄂輝現在帶領四川

屯練兵丁赴臺灣勦捕賊匪。鄂輝久歷行陣。於軍旅較為諳習。亦著授為叅贊。協同福康安籌辦進剿。以期迅奏膚功。○諭軍機大臣曰。福康安由廈門配渡。前赴鹿仔港。仍聲言由鹿耳門前進。使賊匪猝不及防。所辦甚好。其所稱常青等調度失宜。官兵多有損失。及南北兩路賊匪處處相通。而我兵相距遼遠。聲勢不能聯絡。各情節實為切中肯綮。福康安於抵鹿仔港後。振作士氣。鎮定人心。探視賊蹤所至。沿途搜剿。實為此時要著。至賊人狡獪伎倆。往往於官兵過後阻截道路。今福康安擬將賊匪屯聚相聯之處併力截斷。使其首尾不能相顧。是即因賊人之巧計。用以攻賊。俾官兵所過之地不致旋通旋塞。深合機宜。惟福康安摺內所稱沿途搜剿一節。賊匪到處屯聚。所過村莊民人多被迫脅。今福康安統兵進剿。其經過地方固應乘勢掃除。不使於官兵過後潛出滋擾。但所過村莊若

悉行殲戮。恐一處被官兵勦洗。而他處聞風。畏懼。轉堅其助賊之心。若不留心防範。而於所過村莊。聽其聚處。又恐奸猾之徒。於官兵過後。生心梗阻。致為肘腋之患。福康安務須隨時體訪。加意密防。使良善得安其心。而奸究無由逞其伎倆。此為最要。所過之處。其原派駐守官兵。不可輕易撤調。以免疎虞。欽差協辦大學士陝甘總督辦理將軍事務福康安。護軍統領叅贊海蘭察奏。臣等擬赴鹿仔港。於十九日登舟。後風信靡常。現在大擔門守候。若得旁面順風。亦可折餞行走。諭軍機大臣等。海面九月內。風色不正。此原不可過於焦急。輕易冒險。但十月向係平順易渡。此刻雖因守風。稍為稽待。然似此兵威壯盛。機宜湊合。未始非成功先兆。李侍堯派令鄭國卿。帶往本省兵三千名。亦在大擔門候風。自即與福康安一同渡洋。此內一千五百名。前據李侍堯奏。擬撥往常青處。此時福康安

到鹿仔港後。即日相機進剿。其鄭國卿所帶兵三十名。竟可全數俱赴鹿仔港。不必撥往南路。更為壯盛。己亥。上御太和殿視朝。文武陞轉各官謝恩。庚子。吏部議覆。河東河道總督蘭第錫等疏稱。蘭儀廳舊管蘭陽儀封。及睢州七汛。隄河綿長。險工林立。請將蘭儀通判。改為蘭儀同知。專管蘭陽。及儀封上汛。建衙署於蘭陽縣城內。其儀封下汛。及睢州上汛。改為新設儀睢通判。經管。建衙署於睢州朱家寨。鑄給關封府。分管蘭儀。河務同知關防。歸德府分管儀睢。河務通判關防。儀封主簿。改為經歷。睢州縣丞。改為睢州州判。並給儀封廳管河經歷司印。睢州管河州判關防。均應如所請。從之。辛丑。上詣雍和宮行禮。壬寅。上御懋勤殿。勾到江蘇。河南。情實罪犯。停決江

蘇斬犯十一人。絞犯七人。河南斬犯四人。絞犯九人。餘七十一人。予勾。○諭。據書麟奏。安徽亳州等十八州縣。連歲被災。又壽州等四州縣。亦係積歉之區。若將緩徵帶徵錢糧。同時並徵。民力未免拮据等語。安省亳州等處。疊被災祲。本年睢州復有漫口之事。該處地居下流。又被淹浸。自應分別蠲緩。以紓民力。所有成災之亳州。蒙城。懷遠。鳳陽。靈璧。宿州。泗州。五河。盱眙。天長等十州縣。及勘不成災

之定遠。鳳臺。廬江。無為。和州。含山。滁州。全椒等八州縣。其節年帶徵緩徵正雜錢糧。及漕項漕米。著分別年限。遞行展緩。壽州。合肥。巢縣。來安。四州縣。應徵五十年帶徵緩徵各項銀米。著隨同本年新糧徵收。其五十一年帶徵緩徵銀米。著緩至五十三年秋後開徵。俾小民次第輸將。以副朕軫念災黎至意。○又諭。曰。孫士毅奏。據署海豐縣通判何鍾稟稱。親赴海口。駐劄巡防。見有雙桅船一隻。形跡

可疑。即會同汛兵截擊。旋據縣丞張士燧。盤獲三人。供係浙江溫州船戶。遭劫被禁在船。內閩省二十八人。均係江洋大盜。現在盜首王馬成。帶同夥盜十五人。駕三板船脫逃。其大船亦聞風開去。何鍾即親自駕船出洋。追至二十餘里。賊人欲圖拒捕。碣石守備彭日高。聞信駛至。四面圍拏。將盜犯十三名。一併擒住。復派人役。趕至鵝埠地方。同巡檢范椿。將盜首王馬成等十四名。拏獲。脫去盜夥陳

明一名。請將何鍾。彭日高。送部引見。張士燧。范椿。議敘等語。王馬成等。糾結多人。在海洋肆行劫掠。疊犯多案。甚至搶劫官兵船隻。傷斃多人。可惡已極。孫士毅能督飭屬員。留心查緝。無分畛域。將鄰省首夥盜犯。拏獲至二十七名之多。實屬可嘉。通判何鍾。守備彭日高。俱著給咨送部引見。仍將孫士毅。及究出根由。隨同追捕之縣丞張士燧。巡檢范椿。一併交部從優議敘。其已獲各犯。著孫士毅於

審明後。一面奏聞。一面即在該處正法。所有未獲盜夥陳明一犯。即嚴飭所屬。上緊查拏。務獲。毋致漏網。稽誅。兩廣總督孫士毅奏。據護南澳鎮副將鄭元好稟稱。千總莊大進。運送臺灣兵丁鞋褲帳房等項。行至銅山營洋面。被賊行劫。現在躡緝查拏。諭軍機大臣等。鞋褲帳房等項。俱係運送臺灣軍裝物件。被劫至一百餘簍之多。看來竟係林爽文夥匪在洋面潛出邀劫。不可不嚴拏究辦。此案被劫。係在閩省洋面。李侍堯自應飭屬一體嚴拏。但該督駐劄廈門。辦理軍務。照料官兵配渡事務繁多。無暇兼顧。徐嗣曾現在省城。並無經理要件。竟著責成。該撫督率所屬。實力查拏。務期按名弋獲。毋使漏網。徐嗣曾於臺灣剿捕事務。初時尚知留心。隨時陳奏。後見賊匪肆擾日久。一時未能辨結。未免心存畏難。轉似置身局外。緘默不言。若與已無干者。徐嗣曾係本省巡撫。何得漠不相關。若此。

著傳旨嚴行申飭。○癸卯直隸總督劉長泰據霸昌道同興稟稱。昌平州屬之雞冠崖僻處萬山中。商人採有礮砂。試煎成效。查直隸綠營各駐防。歲需礮一萬餘觔。均赴山西採買。今若准該商開採。自可就近收買。以省繁費。得旨。知道了。但禁其滋事。及胥役滋擾可耳。○甲辰旌表守正捐軀山西長治縣民原本利妻劉氏。○乙巳上幸圓明園。○諭據琅玕奏。閩民黃崑山商船在洋被盜。將押米交卸。搭船回營之兵丁十五名。殺傷拋海。並劫去軍器一案。先據太平縣營會詳訊。據兵丁等供稱。被劫處所。是名披山。不知是何洋面。請委員會勘等情。當經檄委寧波府知府陳鍾琛。並經提臣派委鎮海營參將熊灝。前往確勘。實係太平縣所轄外洋黃巖鎮標右營水師汛地。請將捏詳推諉之護遊擊事守備華封。太平縣知縣張景運。一併革職。留於該處協緝。如限滿不獲。即分別發往伊犁軍臺効力。並訊據已獲之夥犯郭亮。究出盜夥姓名。嚴行

追拏務獲等語。此案盜犯前據孫士毅奏
拏獲首夥王馬成等二十七名。業經降旨
令將拏獲各犯之員。送部引見。並將該督
及在事出力各員。交部從優議敘矣。海洋
地面最關緊要。孫士毅於鄰省刦殺兵船
盜犯。不分畛域。督飭所屬。拏獲要犯多名。
實為奮勉可嘉。至黃巖鎮標汛地。係浙江
所屬。該處文武各員。於本省刦盜重案。既
不能先事豫防。又復互相推諉。並不上緊
緝拏。外省積習。最為可惡。所有護遊擊之
守備華封著即革職。先枷號三月。再發往
伊犁効力贖罪。太平縣知縣張景運。一併
革職。發往軍臺。均不必留於地方協緝。以
杜借端耽延之弊。其疎防之千總趙以仁。
外委李朝龍。亦著一併革職。協緝至總督
李侍堯。現在駐劄廈門。辦理軍務。自不能
兼顧。而該撫琅玕。該提督陳大用。及黃巖
鎮弓斯發。於海洋刦盜重案。不能豫為防

範。又未能飭屬上緊拏獲。咎無可辭。琅玕
陳大用。弓斯發。俱著交部嚴加議處。仍著
嚴飭地方文武員弁。務將在逃各犯。實力
嚴查。務期弋獲。毋致正犯漏網稽誅。其已
獲之郭亮一名。即著該撫嚴審定擬具奏。
○丙午諭據畢沅奏。豫省商邱寧陵。睢州
被水地方。應徵漕糧等項。分別緩徵。帶徵
等語。該省自本年睢州十三堡漫口。商邱寧
陵。睢州三州縣地處頂衝。被災較重。民力未
免拮据。所有該三屬被水地畝。應徵米麥豆
三項。緩至五十三年徵收。四十九五十年。
帶徵漕糧。並著遞緩一年。其該三屬未經被
水村莊。秋禾雖屬有收。但與災地毗連。亦應
量加體恤。除本年應徵銀糧。照例徵收外。其
節年帶徵漕糧。亦著緩至五十三年輸納。以
示朕軫念災黎至意。至商邱等三屬。應徵麥
豆。亦准其於不被災州縣。應徵粟米內改徵。
以紓民力。該部即遵諭行。○諭軍機大臣等

昨據琅玕奏閩民黃崑山商船在洋被盜將搭船回營之兵丁十五名殺傷拋海並刦去軍器一案將捏詳推諉之營縣參奏一摺已降諭旨分別辦理矣細閱該撫所奏被盜情節前經孫士毅奏拏獲在浙省行刦之盜犯王馬成等據供七月十八日在浙江温州玉環地方洋面行刦戮翻三人下水戮死二人刦去烏鎗腰刀火藥鉛彈衣物等件並文書一角知係運未到閩搭船回浙官兵隨將受傷兵丁七人水手六人一齣網拋入海等語與琅玕所奏情節相同但琅玕摺內被盜日期係七月二十三日而孫士毅前奏摺內稱係七月十八日在温州地方行刦又粵省拏獲王馬成等二十七人止有夥犯陳明一人未獲而琅玕摺內則稱拏獲盜夥犯郭亮一名訊供共夥四十餘人該犯知其姓名者止周車等七名其盜犯姓名人數及被盜日期均不相符該撫琅玕所奏刦殺兵

船一案與孫士毅前奏拏獲盜犯是否即係一案抑或另是他案著琅玕即行查訊確鑿據實覆奏孫士毅原摺並著鈔寄閱看將此傳諭琅玕並諭孫士毅知之丁未諭曰兵部尚書慶桂差竣回京福長安毋庸署理兵部尚書現在舒常署理湖廣總督所有工部滿尚書事務即著福長安署理諭軍機大臣等向年東省運河有大修小修之例於回空糧艘過坡後攔河築壩興挑原因湖水來源微弱河底淤淺恐來歲新漕不敷浮送豫為疏濬之地今歲業經派令明興前往山東會同河臣撫臣等將運河應行疏濬坡水河渠發帑興挑俾支幹各河之水下注歸湖以符定誌嗣據明興等節次奏報徽山湖夏秋以來水勢增長運河一律深通漕船行走迅速是該處湖河之水已極充足來年重運北上無虞匪自不得因向有大小修之例仍踵行故事築壩興挑徒留開銷地步況挑挖

運河本慮河底淤墊若於河內築壩則壩土必致衝卸入河河底轉增淤墊於疏濬更為無益有損原非新費起見也且攔河築壩商民船隻往來阻礙尤多未便昨巡視東漕御史和琳請訓業經面諭令其到彼切實查勘但該御史祇係巡視漕務恐於地方呼應不靈亦未必深知河務現在蘭第錫在豫省堵築漫工尚未能分身前往東省會辦此事著交長麟親赴該處會同該御史及運河道逐加履勘如果運河儲蓄充盈支幹河渠一律通暢來年重運足資浮送竟可無須築壩興修即行據實具奏毋任河員藉稱向例浮冒開銷以歸覈實將此各諭令知之○戊申諭軍機大臣等昨因東省運河向有大修小修之例雖為疏濬淤墊起見但於河內築壩則壩土必致衝卸入河河底轉增淤墊且攔河築壩商民船隻往來阻礙尤多未便有名無實徒為屬員開銷地步已有旨諭令該河督

等會同切實查勘因蘭第錫現在豫省堵築漫工未能分身前往會辦將此事專交長麟令其親赴該處會同該御史及運河道逐加履勘覈實辦理矣本日據蘭第錫奏前任運河道沈啟震稟稱近因汛期已過雨水無多將曹濟各屬等處坡河上下查勘間有停聚新淤水流稍滯之處逐一疏導現在支幹各河身一律平順倍極深通等語該省坡河南經疏濬完竣若果實力挑挖一律深通何至為時未久即復有停聚新淤之處况築壩興挑於水中撈淤本屬虛應故事且致壩土衝卸入河以及壩根挑剝未淨轉將河底淤墊而建壩挑浚復將現有之水全行涸去更屬無益有損但蘭第錫既有此奏若不及時興挑又恐日久淤墊前據阿桂等奏豫省睢州漫工約本月初十前後可以合龍此時諒已堵合所有一切善後事宜有阿桂畢沅等商辦自能妥協蘭第錫於合龍後竟不必在彼

會辦即當馳赴東省會同長麟和琳及運河道將運河逐一詳細履勘若河水充足支幹河渠俱能通暢自當遵照前旨毋庸挑挖如實有必須疏濬處所亦不必拘泥前旨即秉公查明具奏督飭河員實力興挑以期一律通暢但總宜工歸實用毋致河員等有浮冒開銷之弊方為妥善將此再行傳諭知之

又諭據永瑋等奏所有

福陵週圍鹿角木內有斲朽者又察看各處房

屋內間有滲漏及木植斲朽油色脫落者應派員修理等語此項工程甚關緊要現在既有斲朽滲漏脫落之處理應徧行驗看敬謹修理以昭整齊皆由三和當日採取木料平常以致不久斲朽若此著傳諭永瑋等派出幹員採辦堅固木料仍悉心嚴查妥協辦理以期鞏固福州將軍恒瑞奏近日賊匪滋擾鹽水港惟有悉力固守諭軍機大臣等該處賊勢尚在猖獗恒瑞兵力有限未免進退

掣肘幸所帶之兵又續到五百名可資接應恒瑞此時亦不必過於焦急惟當在鹽水港悉力固守以待福康安到若賊匪眾多勢難守禦不妨竟棄鹽水港回至常青處再圖進取亦是一策但用兵之道以攻擊為先著堵禦為後著今官兵所到轉被賊人攻擾我兵日以抵禦為事是官兵祇辦接應著落後而賊人轉得占先客主之勢豈不倒置恒瑞此時既不能前抵諸羅又不能回至府城亦

斷無在彼株守之理況恒瑞在彼賊匪不時滋擾仍須堵禦勦殺不得休息與其賊來始應何若偵探附近賊匪何處單弱有隙可乘即帶兵直前攻勦使賊人救應不暇以成反客為主之勢豈不甚善恒瑞當察看光景酌量妥辦亦不必過於拘泥遵旨也至福康安自九月二十四日在大擔門發摺後迄今未據續有奏報前於陞辭時曾令到廈門後察看情形如臺灣府城及諸羅設有疎虞福康

安應俟添調官兵到齊再行放洋前進倘此旨到日福康安尚在守風待渡竟當俟川黔等省官兵到齊再行開駕若已得風配渡前抵鹿仔港不妨稍為等候俟川黔粵西官兵陸續到彼再行統領進剿或先赴鹽水港一帶剿殺賊匪援應恒瑞或徑由鹿仔港直攻大里杙賊莊使賊人迴顧巢穴前後牽綴則鹽水港等處賊匪自必紛紛解散其圍不攻自解福康安惟當審度機宜總以持重為要

至福建廣西二省召募新兵未經訓練若即用以剿賊難期得力著傳諭李侍堯孫士毅如遇福康安續有添調之處先將各營練習之兵派令前往其新募之兵留於該省巡查防守仍一面督飭將弁上緊訓練務期精熟可用庶於戰守均為有益就目下情形而論如賊匪盡往南路大里杙賊莊祇係家屬老弱則徐鼎士自應由大甲溪乘虛進搗賊巢以分賊勢若北路賊匪屯聚尚多徐鼎士且

勿輕進福康安到鹿仔港後距彼更近自悉該處確信其應如何籌辦之處即當檄知徐鼎士遵照辦理又諭前經降旨令浦霖於湖南挑選兵二千名以備檄調自己豫為挑備今臺灣剿捕逆匪尚未蒞事現須添兵協剿該省兵丁從前調赴金川軍營於馳陟山險較為便捷今調往臺灣助剿自更得力著舒常浦霖即將挑備兵二千名派鎮軍鎮總兵尹德禧為總統並著於副將內曾經身歷行陣者酌派一二員隨同帶兵前往至湖南鳳凰廳地方係苗疆緊要必須大員在彼駐劄以資彈壓著俞金鰲即行前往該處駐劄兼理總兵印務禮部題冬至節應行慶賀禮得旨今年冬至次日著停止行禮予故固山貝子明詔祭墓如例予故福建水師提督藍元枚祭墓如例謚襄毅己酉諭據阿桂等奏河南睢州十三堡漫工晝夜鑲築於初十日掛纜合龍至十二日金門以上業

經漸次停淤等語以手加額覽之此次睢州漫口命阿桂等前往會同蘭第錫等上緊堵築嗣因雨壩水勢湍急屢經墊陷阿桂等督令在工各員連夜搶鑲不遺餘力得以剋期蒞事阿桂蘭第錫畢沅書麟均著交部議敘其餘在工出力大小文武員弁著蘭第錫畢沅查明具奏交部分別議敘又諭據阿桂等奏豫省睢州漫工現已合龍淮徐河營遊擊韓勝幫辦河工最為得力請加恩賞給花翎南河守備莊剛革職守備包宗堯在工辦事俱屬奮勉請將莊剛賞給四品頂帶遇有應陞缺出陞用包宗堯以千把等官降補等語俱照所請遊擊韓勝著賞戴花翎守備莊剛先賞四品頂帶交與李奉翰等遇有缺出補用革職守備包宗堯亦交李奉翰降等以千把等官補用以示獎勵又據另摺奏革職開歸道蔣果在工効力往來催趲不辭勞瘁該員在豫多年請留於該省河工差遣如能

始終勤奮再行奏請捐復又革職留工効用通判朱文炤在工効力已將二年頗知奮勉請俟明年大汛後如勤慎無過即奏請錄用等語蔣果著加恩留工差遣並著該督等留心察看如果奮勉出力再行奏請捐復朱文炤著俟明年大汛後該員如果出力該督等即奏明酌量補用該部知道又諭據圖薩布奏福建委員試用知縣王履吉解赴淡水備用銀米火藥軍裝等項於八月二十三日放洋忽遇狂風將桅柁折斷隨風飄蕩至九月初七日風狂浪湧於廣東新安縣外洋船遇礁石撞破幸有漁船將該員等救起并搶出餉銀火藥軍械等物撈獲濕米九十餘石計沉失米七百二十八石零大礮一門等語該員解運軍餉於外洋陡遇颶風人力難施且飄蕩至十餘日之久幾遭淹溺情殊可憫王履吉著該督於臺灣事竣後給咨送部引見所有沉失米石等項自應免其賠補以示

體恤 又諭據御史莫瞻菴所奏此次詳校三閣書冊簽出錯謬甚多請將四庫館纂校議敘應陞各員概行註銷其已經陞用之員分別內外任酌罰廉俸等語所奏甚是從前辦理四庫全書時朕因卷帙浩繁編纂不易原曾諭于敏中凡興作大事不能不徵倖數人但朕此旨原指纂修詳覈讐校無訛而言是以不靳恩施優加錄敘今文淵等閣所貯四庫全書偶經批閱草率錯訛比比皆是因令諸皇子及在廷諸臣覆加詳校簽出錯誤之處累牘連篇不可枚舉是辦理此書者並未實心校閱竟以稽古右文之舉為若輩邀恩牟利之捷徑大負朕意此事發端於于敏中承辦於陸費墀其條款章程俱係伊二人酌定今所繕書籍荒謬至此使于敏中尚在必當重治其罪因伊業經身故是以從寬止徹出賢良祠不復追論保全始終陸費墀業已革職亦不深究所有業經議敘纂校各員

其已經陞用應行議罰廉俸及未經陞用將議敘註銷之處著該部覈議具奏 諭軍機大臣曰福康安進剿官兵多係調派勁旅其本地兵丁屢經挫失自不能如川黔兵丁之得力但現在臺灣統兵大員內如蔡攀龍等即籍隸閩省其偏裨千把諒復不少福康安仍當加以策勉鼓勵俾伊等各思振奮不可因現帶巴圖魯侍衛章京等皆驍勇絕倫所調各兵俱係生力可恃遂置閩省兵丁於不齒致阻伊等効用之心況現在各省調往兵力雖多於該處路徑民情未能熟悉亦須本省兵丁為之嚮導福康安務須隨時留心於閩省將弁兵丁中視其出力者鼓勵數人以作其氣而收其用不可稍存歧視也 又諭現在勦捕臺灣逆匪一切軍糧火藥等項皆由海洋運送其派往之將軍大臣及隨征將弁人等遠涉重洋均須風色順利方可揚帆徑渡因思該省向來崇祀

天后最為靈應此次剿除逆匪官兵配渡尤必仰藉

神庥恬波効順自應特隆昭報以祈助祐而達款裡著交李侍堯即查明附近海口向於何處建有廟宇最稱顯應之處如稍有傾圮即另行修葺完整以肅觀瞻並將該處應用扁額開明尺寸奏聞候朕親書頒發懸掛用昭虔敬將此諭令知之 又諭刑部具題山東省民人李德同夥行竊拒傷事主依竊盜

棄財逃走事主追逐執持金刀戮傷事主律擬絞監候一本竊賊拒捕傷人向論其贓物曾否入己是重財而輕人也況此案李德同趙三劉三夥竊李純武錢文被事主知覺出門追趕劉三攜錢與趙三奔逃李德被絆跌地李純武趕至扭住衣袖李德情急即拔刀扎傷李純武手背等處是所竊錢文業已被劉三等偷攜先逸李德不過偶因絆跌致被事主扭獲若倖而亦得走脫豈有不向同夥

分贓之理何得援引棄財逃走之例外省省

幕刑書相沿惡習往往於罪人故為寬假之詞比擬失當而臬司覈轉時又不細心詳覈率意轉詳該撫亦即依樣具題雖於該犯罪名無所增減而援引繁文殊屬支吾無當況長麟曾為刑部此豈不知嗣後遇有此等案件務宜悉心問擬毋再任劣幕刑書高下其手以致罪名牽混也除就近傳諭刑部外將此諭令知之 又諭前因東省運河大修小

修之例有名無實徒為屬員開銷地步曾諭令該撫等會同切實查勘如果無須築壩興修即行據實具奏昨因蘭第錫奏曹濟各屬等處坡河上下間有停聚新淤之處復降旨令蘭第錫於豫省睢州漫口合龍後即馳赴東省會同長麟和琳及運河道詳細履勘如實有必須疏濬處所仍即奏明興挑以期一律通暢但思該省運河究以不必興挑為是今歲派令明興前往山東會同河臣等將運

河應行疏濬坡水河渠發帑興修原為一勞
永逸之計該省支幹各河自應一律通暢即
或數年後間有淤墊之處原可隨時疏濬若
今歲甫經大辦之後為時未久即須動工挑
挖又安用明興等前往勘估大加興修為耶
現據阿桂等奏睢州漫工已於初十日合龍
穩固其善後事宜此時自亦已辦理完竣蘭
第錫即著馳赴東省會同長麟和琳及運河
道等秉公履勘如果河水充裕支幹河渠俱
能通暢竟可不挑挖以杜河員等浮冒開
銷之弊將此再傳諭知之

纂修臣

主

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十

纂修臣

主

大清高宗法天隆運至誠先覺體元立極敷文奮武孝慈神聖純皇帝實錄卷之一千二百九十一

監修總裁官總纂官太子太傅文淵閣大學士文淵閣領閣事領侍衛內大臣楊家欽奉 上諭軍機處管理

吏部理藩院事務正黃旗滿洲副都統世襲騎都尉軍功七級隨帶加一級尋常加二級軍功紀錄一次臣慶桂

鴻臚寺經歷議官太子太傅文學殿大學士文淵閣領閣事楊家欽奉 上諭軍機處管理刑部尚書三庫事務

世襲騎都尉軍功加十九級尋常加二級入加二級尋常加二級軍功紀錄五次

臣等紀錄十四次臣總纂經纂官太子少保工部尚書紀昶六次臣曹振鏞等奉

校修

乾隆五十二年丁未十月庚戌

上還宮。策試中式武舉楊景芬等三十九人於太和殿前。諭臺灣自逆匪林爽文滋事以來。節經降旨。令各省撥運米石。及添調兵丁。前往接應。現據各該督撫先後奏報。運閩米石。及調赴兵丁。俱各妥為照料。隨到隨行。辦理甚為妥速。甚慰朕懷。所有總督保寧。舒常。李世傑。巡撫姜晟。浦霖。何裕城。閩。鷺。元。琅。玕。孫永清。李慶榮。俱著交部議叙。閩。廣。二省。於此項兵米到境時。照料配渡。亦為妥協。總

督李侍堯。孫士毅。巡撫徐嗣曾。圖薩布。亦著一併交部議叙。以示獎勵。又諭吏部議覆琅玕題請。以陸費鑒實授崇明鹽大使一本。陸費鑒著該部於調補別省後。即准其實授。向來鹽大使。因無地方之責。並不迴避本省。是以陸費鑒籍隸浙江。仍發浙江委用。但思鹽場各員。與州縣官專司民社者。雖屬有間。然鹽餉既關係民食。且所屬曬丁。竈戶。錢糧詞訟。俱係該員經理。究係有徇私瞻顧等弊。嗣後鹽務各員。銓選分發。俱令迴避本省。其現在各省鹽務各員。有籍隸本省者。著該部一併查明。簽掣更調。以示慎重。官方之意。著為令。欽差協辦大學士陝甘總督辦理將軍事務。福康安奏。此次由鹿仔港進剿。必須南北兩路併力合攻。使賊匪分散。現咨會常。青。恒。瑞。葉。大。紀。蔡。攀。龍。等。臨期合攻。一面撫諭附近被脅民人。令其各保村莊。殺賊自効。道路自無虞梗塞。然後進逼大里杙。約會淡

水官兵由烏日莊夾攻。並令侍衛帶兵在牛罵快官等莊。杜其奔竄之路。不難一鼓殲擒。俟臣到彼。如有應行布置。再當相機妥辦。諭軍機大臣曰。福康安奏籌辦捕事宜。與朕節次所降諭旨。雖有大同小異。然已俱得要領。就此時情形而論。自先以援救諸羅為要。福康安到鹿仔港後。等候川黔廣西兵到齊。即直抵諸羅。柴大紀。蔡攀龍在彼日久。於該處情形。自為熟悉。福康安當與之悉心籌畫。至臺灣府城。現有常青在彼。看來雖未能進取。而自守尚屬有餘。即使府城守禦難支。或竟有疎虞之事。亦不難再為收復。福康安不必因身當重寄。不能為郡城保全。即為有負任使。心懷疑慮。以致顧此瞻彼。所帶巴圖魯侍衛章京等。皆係久經行陣。於行軍機宜。皆能熟悉。統兵進剿時。其旁路後路。或有賊匪潛出滋擾。伊等自能隨時察看。豫行防範。不致墮賊狡計。辛亥。

上御懋勤殿。勾到山東情實罪犯。停決絞犯二人。餘六十八人。予勾。○諭。據保寧奏。川東道黃軒。委令總理運閩米石。該道在重慶府地方。患病身故等語。此次川省辦運閩米。該道黃軒。督率地方官。悉心經理。不辭勞瘁。患病後。仍復力疾監辦。至米船全數開行。始請告假。實屬急公可嘉。今因病身故。殊堪憫惻。著加恩賞給按察使銜。以示軫恤。所遺四川東道員缺。著王啟焜補授。○諭。軍機大臣等。據琅玕奏。勘明應辦石塘坦水等工一摺。內稱。老鹽倉以西。至章家巷一帶。舊築柴橋。歲朽。並范公塘陸續建築埽工。地當頂衝間。被潑損。埽卸均難以資捍衛等語。老鹽倉以西一帶。多有新修工段。甫經修竣。為時未久。而范公塘新建塘工。朕於四十九年南巡時。親臨指示。今冬將屆完工。乃該撫奏稱。老鹽倉范公塘工段。俱有歲朽。埽卸之處。若果係舊築柴埽工程。被水衝刷。間有埽損。尚屬事之

所有如係新築工程則為時未及五年何以
即有坍塌之事恐係當日工員辦理草率或
竟有偷減物料任意冒銷情弊均未可定德
成現在出差伊於工程事務較為諳悉若不
必回京請訓即由該處馳驛前赴浙省詳悉
履勘老鹽倉以西應修各處是否係屬新工
並將范公塘一帶新築石塘是否一律如式
堅固之處一併確切查明據實具奏如不可
待一面與工奏聞將此各傳諭知之○又諭

據保寧等奏酌定年班進京各土司名數一
摺內稱除新疆雜谷各屯土弁員半已派赴
閩省餘飭留巢防守免其赴京等語川省各
路土司革布什咱等處久隸版圖與內地土
司無異該督於摺內用留巢字樣措詞殊屬
不通巢字名目係指匪徒聚集處所而言今
各土司歸順已久何得稱巢其屯練兵丁係
屬官地更不得稱留巢如是則該督豈非巢
長乎保寧不諳文理一任庸劣幕友率意填

寫殊屬非是著傳諭保寧嗣後奏牘務須留
心檢點勿再仍前失當又諭本日據天津
鎮總兵強都奏回空漕船於十月初四日全
過天津十四日全出直隸境等語回空漕船
催趲出境固係該鎮專責但前因托賓泰於
劉權之眷船在天津地方被盜一案降調出
缺是以將伊補放總兵又天津道玉成亦因
此案降調將慶章補授天津道伊二人係特
經簡用之員自應加意奮勉所有前案盜犯

必當實力查拏迅速緝獲何以至今並未見
拏獲一犯著劉我傳諭強都慶章即督飭所
屬員弁務須上緊嚴拏剋期就獲毋得因日
久生懈視為具文以致案犯漏網稽誅則惟
該二員是問也又諭本年直隸宣化府屬
州縣因雨澤愆期田禾被旱致成偏災山西
省大同府屬各廳州縣秋禾亦被旱成災又
河南省歸德府屬及安徽省亳州蒙城等各
州縣俱因黃水漫溢田畝被淹又江蘇甘泉

清河二縣。秋禾被災較重。又陝西華州。華陰。潼關三屬。及甘肅皋蘭。金縣等州縣。俱被水旱成災。雖經節次降旨。分別賑濟。令該督撫等實力撫卹。毋使一夫失所。第念各該處被災地方。秋收失望。於明春青黃不接之時。民食恐不無拮据。是否應需展賑蠲緩。並此外勘不成災地畝。應否量予加恩。分別酌借口糧籽種之處。著傳諭劉焄。明興。畢沅。閔鶚元。書麟。已延三。勒保。即行體察情形。查明據實覆奏。候朕於新正酌量加恩降旨。○又諭臺灣勦捕賊匪。尚未能剋期竣事。此輩狡獪性成。斷不肯束手待斃。或思由海道搶船避竄。笨港鹽水港。鹿仔草一帶。俱曾被賊匪焚搶。此等處所。均係通海口岸。將來賊匪避竄時。其大里杙巢穴。留存家屬甚多。自必思搶船隻同載逃逸。福康安等務須豫行留心。如沿海口岸。一經將賊殺散。即揀派水陸弁兵嚴行看守。並留一二大員。往來稽查。勿被賊人

搶占。若有商販船隻。亦當全行調開。勿令近岸。其運載軍需兵米等項船隻。於到後即令原船仍回內地。使賊人無船可奪。絕其逃竄入海之路。方為妥善。○壬子。上御紫光閣。閱中式武舉騎射。○癸丑。上御紫光閣。閱中式武舉技勇。○諭軍機大臣等。臺灣地方。奸民糾眾械鬪。皆由該處多係漳泉二郡。及廣東民人在彼居住。里居田土互相錯處。往往紛爭構釁。地方官並不實力查辦。將就完案。以致奸民無所敬畏。此次林爽文等倡亂不法。刦縣戕官。亦即因糾眾倡會而起。今福康安統領大兵。鼓勇進剿。自可剋期蒞事。因思廣東漳泉三處民人互相構釁。若能令其彼此分處。各不相涉。自屬甚善。但伊等居處多年。各有田產。安土重遷。一時概令離析。勢有所難。將來賊匪蕩平後。福康安應酌量情形。設法妥辦。如實在隨同官兵打仗殺賊者。既經奮勇出力。豈可轉令遷徙。

失其世業。若賊匪莊業。例應入官。當召募別處良善之民居處。至各近處村莊民人。雖無從逆實跡。而與賊匪同住一莊。心持兩端者。究不可信。或趁此兵威。將該處村莊民人。酌為遷徙。其籍貫分隸廣東漳泉者。令其各為一莊。俾相離較遠。以杜爭端。至臺灣南北各處村莊。多被賊焚燬。民人俱遭戕害。並賊人頭目。反被賊脅從之衆。所遺田土房產。既未便仍撥給漳泉之民。令其徒享利益。且恐遊手無藉之徒。從而聚處。又致滋事。自應將其田產查明入官。另行分撥。因念該處熟番向化日久。此次逆匪滋事。熟番並無從賊者。且淡水等處。現在招集鄉勇甚多。莫若將此項入官田產。如四川屯練之例。即給與熟番耕種。按則升科。令其安居管業。自為守護。既可示綏戢。又可招撫生番。豈不一舉兩得。再諸羅彰化等處地方遼濶。亦須酌量添設兵丁。以資防禦。該處止設知縣一員。恐職分較

小。不能彈壓。或應酌添丞倅將弁。在該處駐劄。更為有益。著福康安等。歸入善後事宜。酌辦。不必過於拘泥。將來應行籌辦之事甚多。若令李侍堯渡洋前往辦理。恐內地乏人。而常青於此等要務。未經諳練。恐亦不能籌辦裕如。福康安既遠涉重洋。於該處整頓地方。戢暴安良。一切善後之事。正應乘此大兵得勝之後。妥為區畫。不必急於回京。至海蘭察及巴圖魯侍衛章京等事竣後。自應令其先回。不妨酌留數人。以資臂指。其閩浙駐防滿兵。亦應令其各回本處。惟屯練黔兵。既經遠調到彼。將來辦理善後事宜。或有應須兵力鎮撫之處。亦不妨暫留該處。於諸事辦完後。應撤回時。再行撤回也。○旌表守正捐軀雲南威遠廳民陳易安妻徐氏。守正被戕。山東恩縣民胥桐妻馮氏。○甲寅。上御太和殿傳臚。賜中式武舉一甲馬兆瑞。侯寶參。鷹揚三人。武進士及第二甲楊雲龍等。

五人武進士出身。三甲楊景芬等二十八人同武進士出身。諭據蘇凌阿等奏本年全漕起卸完竣。及早回空南下。現在全漕軍船已於十月初四日催出津關。十一月內總可全行出江歸次等語。今歲係全漕年分。其額運及帶運各漕糧較往歲多至一倍有餘。該倉場侍郎等督同在事各員。上緊起卸。俾軍船得以及早回空。趕歸水次。受兌新漕。辦理甚為妥速。蘇凌阿、劉秉恬俱著交部議敘。其

坐糧廳等員並著該侍郎等查明。一律咨部議敘。諭軍機大臣曰。德成奏遵旨起程。前赴浙省查勘海塘工程一摺。所有海塘老鹽倉一帶。多係新修工段。而范公塘工程。今冬甫將修竣。琅玕前奏該處柴塘各工。被水衝刷。間有塌損之處。其為新工舊工。無難一目了然。若果係舊時柴樁埽工。間有微朽塌卸。尚為事之所有。如係新築工程。豈無保固限期。若為時未久。即有塌損。則當日承辦工員

難保無偷減物料。任意冒銷之弊。自應切實查辦。德成於工程尚為熟悉。是以令其前往。惟當詳悉履勘。據實覈辦。不得又如伊前此所奏。漕米攪雜等弊。有意苛求多事也。將此諭令知之。乙卯。

上御懋勤殿。勾到山西情實罪犯。停決絞犯三人。餘四十二人予勾。○諭兵丁等領過庫銀內。應行坐扣十二月分。次年正月分銀兩。著加恩展限兩月。又諭據鑲黃旗滿洲都統

奏原任布政使國棟名下著賠銀兩。請於伊子貼寫中書文孚應得俸銀。每年坐扣一半完結等語。國棟名下應賠銀兩。係工程所用。遺漏未奏。著伊賠繳之項。今國棟又在阿克蘇病故。著加恩寬免。毋庸在伊子俸銀內坐扣。諭軍機大臣曰。孫永清等奏。據左江道湯雄業等。查獲革弁郭崇德、李洪魁二人。俱情願赴臺灣効力。訊據供詞。罔懌。皆非安分守法之徒。且正當軍行絡繹之際。未便任

其潛隨混雜。致生事端。現將該弁等委員押回貴州原籍等語。臺灣現在大兵雲集。帶兵將領甚多。豈需此一二革弁。到彼効力。況郭崇德業經兩次叅革。其平日不能約束行伍。已可概見。李洪魁所稱病休得賞。亦不足信。該弁等即使欲赴軍營効力。亦應在本省具呈。乃竟暗隨官兵行走。自係欲藉此冒混邀功。希圖復用。情弊顯然。著傳諭李慶榮於該弁等解回原籍後。嚴行訊究。如果有別項影

射滋事情弊。即當據實叅奏。若訊無別項情節。即將該弁等交地方官嚴加管束。毋令再行出外滋事。將此並諭孫永清知之。○又諭。現在川黔廣西等省兵丁。即日陸續前抵鹿仔港。伊等遠涉數省。行走奮勉。安靜自應酌加獎賞。以示鼓勵。至新舊派調各兵。有打仗出力者。亦有怯懦不前者。福康安於進剿時。應將各該省中奮勇驍健之兵。臨時酌加賞賚。庶出力者倍加感奮。而怯懦者亦知所激

勵。爭先効用。於勦捕機宜。方收指臂之效。○湖北巡撫姜晟奏。寶武局每年鼓鑄額銅。經前撫臣鄭大進奏請。於知府內每年酌委四五員。領價採辦交局。竊思各府分領承買。檄催往返。頭緒紛繁。即倩人赴漢置辦。亦不免侵那糜費等弊。查銅價銀兩。向係鹽法道庫給發。請即飭該道購辦。責令漢陽縣稽查。如有行戶擡價居奇。即行究治。得旨。有治人。無治法。實力行之可也。○丙辰諭曰。孟生蕙奏

請停止劉戡所奏。昌平州開採硫磺一摺。內稱該州坐落正當京城乾坎之位。其山即京城北面之屏障。山以虛受。氣以實流。實者削之。使虛則甚易。虛者補之。復實則甚難等語。所奏已屬迂謬。至摺內復稱。安畿輔數百里內之坤輿。葆神京億萬斯年之元氣。則國家幸甚。天下幸甚。措語更屬荒誕。京城外西山北山一帶。開採煤座。及鑿取石塊。自元明以來。迄今數百餘年。取之無盡。用之不竭。從未

聞以關係風水設有例禁。豈開採硫磺遂致於地脈有礙。即云開設磺廠恐聚集多人滋擾地方。則每歲採取煤觔石料所用人夫不知凡幾。豈皆良善安分之徒。何以並未見有滋生事端之處。乃孟生蕙摺內妄以坤輿元氣為辭。並以封閉開採為天下國家之幸。夫此等重語。在楊繼盛叅嚴嵩。楊連叅魏忠賢。用之則可。今有其人。有其事。乎。明朝科道朋黨惡習。好為虛詞。激成廷杖為榮。以致屋社終無益於國。且開一磺礦。何關係要。而張大其詞。若此。況昌平係前明陵寢所在。若以開挖磺廠。有礙昌平風水。隱為明陵起見。則孟生蕙恐不能當此罪戾。且料伊庸陋之見。未必竟敢如此設想。亦不值加以深究耳。孟生蕙人本平常。今年夏間在熱河召見。奏對模糊。其才具已久在洞鑒之內。伊不過因近有京師缺出。日內正在題本。輒先為此奏。欲思見長。以為邀恩陞用地步。其居心殊為猥鄙。

妄詐。昨內閣進呈吏部題本。因伊係開列應陞之員。况員缺並非緊要。朕因山西在朝之大員少。原已將孟生蕙補用。今伊所奏如此支離荒謬。即不重治其罪。豈可復邀陞擢。所有吏部缺本著即徹回。候朕另行簡用。孟生蕙仍著交部嚴加議處。至昌平州開採硫磺一事。孟生蕙既有此奏。其產磺衰旺情形。應否開採之處。亦宜查勘確實。阿彌達現赴昌平州查看明陵工程。著派蔣賜棨即赴該處與阿彌達帶同該地方官。親至產磺處所。詳悉履勘。如該處產磺旺盛。自應設廠開採。以資軍火之需。若所產不旺。即行據實奏明。封閉停止。亦不必因有此奏。稍存迴護之見。孟生蕙原摺著擲還。尋奏。勘得磺礦現有磺線三條。鉛線一條。請准依線開採。報聞。諭軍機大臣等。本日戶部議覆富綱等奏。粵鹽遞年積壓情形。並請將停運三年應獲羨餘。著落分賠一摺。已依議行矣。但滇省本有產鹽。

之地何以又需粵東之鹽。運滇接濟從前既經銅鹽互易。辦理多年。何以復遲誤積壓。並致課項懸宕。且粵東運到之鹽。與滇省本地產鹽。向係如何分銷。粵東之鹽運到後。即不能依限報銷。間有存積。又何至積存七百餘萬觔之多。保無該省私鹽充斥。以致官鹽墮積。疏銷阻滯。粵東運到鹽觔。既多墮積。則滇省之鹽。亦必有滯銷之事。况停運三年。民間食鹽。恐不無缺乏。又將如何辦理。著傳諭富

綱等將該省既產鹽觔。何以又向粵東以銅鹽互易。及歷年何以積壓甚多。並停運後。該處食鹽作何籌辦。及有無私鹽充斥之處。分別查明據實具奏。毋得稍存諱飾。又諭據李世傑等奏。勘估臨湖風損磚石各工內。高堰。山盱。揚河。揚糧等廳屬。估需工料銀二十餘萬兩。又於揚糧廳屬三溝。開迤下。創築西隄一道。估需銀二萬餘兩。請就近於淮揚關庫撥項興修等語。本年豫省隄工漫溢。江南

下游各工。並無險要處所。雖洪澤湖承受豫省漫溢。稍覺旺盛。衝塌堤口甚小。不過三四處。隨即堵合。何致磚石各工。俱行塌卸。估修如許之多。且三溝開迤下一帶。從前並無隄岸。該處民田廬舍。向來作何保障。目下何又亟欲築隄。恐係江省本年黃河工程平穩。工員等無可開銷。藉此修理隄工。為影射冒銷地步。亦未可定。現在德成前往浙江查勘海塘。經由江省原可即派伊順道閱看。但伊於

工程雖為諳習。而於河務情形。究未熟悉。又復自是多事。茲據工業經告竣。阿桂昨已回京起程。著傳諭阿桂。接奉此旨。不必來京。即由該處馳赴江南。會同李世傑等將高堰。山盱等工。是否在保固限外。其揚糧揚河各工。是否應行修補之處。確切覆勘。其西岸三溝開迤下。是否應需添築西隄之處。難以懸斷。亦著阿桂一併查明據實具奏。隄工原為保護民生。如果有必應修築之處。朕豈肯靳惜

帑金不行與辦。倘所奏各工無關緊要。徒為工員影射冒銷地步。自應據實奏明。停止辦理。所有李世傑等奏請動撥准揚閩庫一節。阿桂查若應辦。即照所請與撥。咨部知之。其李世傑等原奏及圖樣著一併鈔寄阿桂閱看。將此傳諭阿桂。並諭李世傑。李奉翰知之。

丁巳。諭據李侍堯奏金門鎮總兵羅英蓂前經親自出洋督令將弁連獲盜犯一百餘名。茲又在洋盤詰盜船獲盜葉述等七十三

名。又起出烏鎗鐵礮等件。并有旗一面。上寫奉憲官運字樣。其為前次行劫浙省米船之盜無疑等語。前因洋面盜劫頻聞。兼之粵兵經過海澄縣被盜。均係金門鎮所轄。是以將該鎮羅英蓂革去頂帶勒限嚴緝。今該鎮屢次出洋。拏獲多盜。尚屬奮勉。著加恩賞還頂帶。以示獎勵。至浙省米船被劫盜犯。既經羅英蓂拏獲。而海澄縣行劫粵省兵船一案。亦經該縣及將弁等獲盜三十餘名。此等洋盜

肆行劫掠。殊屬可惡。並著該督將現獲各盜犯審明。後一面奏聞。一面正法。以示懲創。

又諭據李侍堯奏。接同知吳元琪稟稱。九月初一日。柴大紀有信至府城。稱蔡攀龍等援兵惟蔡攀龍。孫全謀帶兵七八百名。及運送糧餉之義民三千名到諸羅。其貴林。楊起麟。杭富俱在正音莊陣亡等語。貴林等前經常青派赴諸羅援應。奮勇打仗。甚為出力。是以降旨將貴林補授總兵。楊起麟補授參將。並俱賞戴花翎。今貴林。楊起麟。同都司杭富因勦捕賊匪。臨陣捐軀。殊屬可憫。貴林著照總兵例議卹。楊起麟前在鹽水港一帶堵禦防守。尤為出力。著加一等照副將之例議卹。其都司杭富亦著照例議卹。以示憫恤。

又諭曰。晉吉保奏。九月初六日帶領官兵由大突溪前往笨港援應諸羅。十三日行抵麥仔藔。有賊數千。苛派良民銀米。不能應付。賊匪欲焚燬村莊。百姓正驚惶無措。適官兵踵至。賊

衆奔逸。百姓歡聲動地。隨密探賊匪均集笨港。是夜賊匪暗放火號。並聞諸羅礮聲徹夜不絕。當飭將弁分作三隊。直前衝殺。賊衆蜂擁迎拒。普吉保督率官兵奮勇攻殺。鎗礮並施。打死賊匪數百人。生擒賊夥楊意蘇媽張固三犯。奪獲器械三十餘件。鞭礮二門。耳記十八個。米穀薯乾百餘石。並焚燒坂頭厝等賊莊七處。是日又有賊匪數百人。攻犯大營。官兵奮力堵禦。殺賊十餘人。燒燬賊莊。賊衆

退散。現在與恒瑞、柴大紀訂期三路會合。併力夾攻。賊匪可剋期殄滅。等語。臺灣逆匪林爽文等糾衆不法。肆行滋擾。搶占村莊。實爲罪大惡極。今普吉保督率將弁兵丁。由大突溪一路偵探賊蹤。奮勇勦殺。焚燬賊藪。生擒賊夥。奪獲器械銀米甚多。收復笨港。實爲出力可嘉。普吉保著交部議敘。出力兵弁著福康安查明咨部一體議賞。並賞給普吉保玉

搬指大小荷包。以示獎勵。數旬以來。因海洋

風色不順。臺灣府城及諸羅、鹽水港三處俱被賊擾。文報不能常通。朕心正深廬注。今普吉保已將笨港收復。殺散賊匪。該處距諸羅止二十里。距鹽水港止三十里。聲息密邇。普吉保乘勝直前。諸羅、鹽水港兩路形勢聯絡。恒瑞、柴大紀自可接應會合。而常青處前此曾有被賊滋擾之信。今據李侍堯奏據臺灣地方官稟報。常青因恒瑞在鹽水港被賊攔阻。未能前進。即派委總兵梁朝桂副將謝廷

選帶兵一千前往策應。恒瑞處原有兵三千。今復得此一千兵接濟。自更可統領勦賊。而常青處既能分兵援應。恒瑞則府城兵力充足。自守有餘。可知無虞。賊擾是諸羅、鹽水港及臺灣郡城三路均可自為保護。乘機攻勦。且賊匪在麥仔寮竊派良民銀米焚燬村莊。可見賊衆糧食將次就盡。已有潰散之勢。而百姓一見官兵踵至。歡聲動地。更可見民心効順。不肯從賊。即日福康安、海蘭察等統領

大兵分路進剿。諒此么膺草寇。無難一鼓成擒。福康安現據李侍堯奏。尚在大擔門候風渡洋。而新調廣西兵三千已抵廈門。四川屯練早入閩境。不日可到。而貴州湖南兵亦接踵而至。福康安正可帶領勁兵。揚帆同渡。徑抵鹿仔港。督率進剿。且臺灣府城及諸羅鹽水港三處。於福康安未到之前。俱各保守無虞。今福康安又帶領銳勇新兵。並總兵鄭國卿所帶之閩省兵丁。共計生力官兵。又有萬餘。且有海蘭察及巴圖魯侍衛章京等分隊統領。軍威振作。士氣百倍。即日與常青恒瑞。崇大紀。普吉保等。南北會合。直搗賊巢。似可掃穴擒渠。膚功迅奏。矧待捷音之至。將此通諭知之。諭軍機大臣等。賊匪經過地方。其附近民人。本非甘心從賊。特因賊匪逼迫。無奈聽從。即如麥仔蔴地方。幸官兵前往。該處民人得所倚仗。否則必致被賊脅從。是前此業經從賊民人。其中為賊所迫。勉強附從者。

自復不少。福康安此時尤應將安分良民妥為撫慰。安戢。即已經從賊者。亦應設法招徠。分別辦理。不可因已經從賊。概予殲除。轉致阻其自新之路。堅其助逆之心。此為最要。再朕恭閱雍正年間

實錄。舊例閩粵民人往臺灣耕種者。所有妻眷一概不許攜帶。經高其倬疏請。將在臺灣墾田耕種。及有房屋民人。准其搬眷居住。經九卿議駁。自因臺灣係海洋重地。是以不令內地民人挈眷前往。今臺灣民人俱有家屬。與前定之例不符。其准令攜帶眷屬。起自何時。著福康安。李侍堯。查明具奏。將來事定後。應如何趁此兵威。酌定章程。妥協辦理。抑或從來已久。有所不能之處。並著李侍堯歸入善後事宜。一併妥議。又諭。昨據李世傑等奏。勘估臨湖風損磚石各工。又請於三溝開墾。下。創築西隄一摺。已降旨諭令阿桂。即於途次前往。會同李世傑等。確切履勘矣。本年高

郵邵伯一帶。因洪澤湖受豫省浸水。稍覺旺盛。街塌隄口。碑石各工。或間有塌卸。該督等奏請勘估修補。尚屬事之所有。阿桂到彼勘明。如果實係風浪撞擊。工段殘缺。必須興工修築。自應覈實辦理。然其間尚應查係保固弗保固之別。至該督等所奏三溝閘迤下。創築西隄一道。似可不必。該處從前本無隄岸。凡遇水長。年分民田廬舍。亦俱保護無虞。何以此時忽議添築。且一經添建隄工。則每年即須有歲修等事。尤易啟工員冒濫支銷之漸。況建築隄工。原以防水勢漫溢。而今歲高郵邵伯一帶漫溢之處。俱有隄岸。則三溝閘迤下。即添建隄工。恐仍屬有名無實。不可不切實查勘。妥為覈辦。此事德成現赴浙江。看視海塘。原欲令順道閱看。但德成於工程雖為熟習。而於河務情形。究未諳悉。且素性偏執。不足服衆。若令前往。伊以為不應添建。外人未免疑其有心迎合。而朕亦即慮其有此。

若伊以為應須添建。朕又不能深信。阿桂於河工素為諳練。今往履勘。如係不應興工。據實奏明。可以折服衆論。倘以為必應添建。朕亦可以無疑。是以必須阿桂查勘。方得確實。但阿桂甫由豫省工竣起程。今又中途派往。現在正值寒冷之候。往來跋涉。朕心深為軫念。著賞給御用貂尾暖帽一頂。以示體恤。阿桂到彼。務須將該處各工應否修建之處。會同李世傑等詳悉履勘。據實具奏。將此諭令知之。○以太僕寺少卿李廷欽為光祿寺卿。○戊午。諭軍機大臣等。前因東省運河有大修小修之例。本年曾經發帑興挑。自當毋庸再行疏濬。已節次降旨。諭令蘭第錫等會同將該處運河及支幹各河詳加履勘。今據長麟奏。於二十日自省城赴臨清會勘等語。現在阿桂前往江南。查看臨湖碑石隄工。經由東省著傳諭阿桂。自行酌量。或即順道前往該處。先將曹濟一帶運河。逐加察勘。或於查

辦江省隄工事竣回程時到彼履勘亦無不可。但蘭第錫等此時業已在臨清會齊。阿桂即由直隸順赴該處。先行會同伊等將運河及支幹河渠詳細履勘。是否一律深通。無須興挑。抑間有停淤。尚應酌量疏濬之處。查明確實具奏。所有節次寄蘭第錫等諭旨及奏到各摺鈔寄阿桂閱看。再昨據普吉保奏到帶領官兵援應諸羅。於九月十六日在麥仔藁與賊匪打仗得勝。收復笨港各情形。朕心

稍慰。著將普吉保原摺並所降諭旨一併鈔寄阿桂閱看。尋阿桂等奏本年運河一帶雨澤優霽。曹單支幹各河疏濬深通。微山湖水勢暢達。大資滌刷。淤較少。歷查運河水大之年挑工必少。未便仍照向例大挑。惟南旺塘河及彭口一塘山水出口亦多停淤。必得及時挑挖。切實估計銀三千六百餘兩。較大挑節省銀一萬三千六百餘兩。本年明興勘挑支幹各河俱在運河西岸。水本無源。停淤

不免。然各該河原為疏消田中積水。例應民修業經逐加疏濬。一律深通。得旨諸凡皆要依議。又諭曰。惠齡奏審擬直隸文安縣民人李善修呈控科派一案。辦理尚屬詳細。已批交該部議奏矣。惟詳閱所審各款。內有原控倉書指稱永定河運米。票傳牛車五百餘輛。折錢萬有餘千一款。訊據倉書劉沛澤供上年二月奉文分修隄工。裝運錢米物料陸續撥車用過牛車一百餘輛。每輛俱於工所

發給車戶京錢八百文。向來撥用牛車不多。上年撥至一百餘輛。是以李善修動疑呈控等語。永定河數年以來。安流順軌。何以有分修隄工之事。即間有應行歲修工段。例係官為辦理。動項雇夫。並不絲毫擾累民間。即如豫省漫口工程。一切所用稽秣料物土方數年來動帑數十百萬。從未累及閭閻。永定河不過黏補工程。乃輒稱裝運錢米物料。派撥民間車輛。至一百餘輛之多。而倉書又復藉

端刁搆勒索車戶錢文致滋擾累恐該地方官竟有借修隄為名通同婪索情弊則官帑開銷何處著落著傳諭劉裁即將永定河何以有此項分修隄工如該地方官有藉端派累等事即據實嚴行參奏不得稍有諱飾又原控禮書楊殿元有藉招募樂舞生詐錢數千餘串一款訊據張太等供本年二月奉文招募樂舞生報充者共十六村內有二村認充不到楊殿元索詐村民京錢六十千文等語招募樂舞生雖係奉文辦理但向有定額况一縣所用樂舞生更屬有限止須招募數人有情願充當者報充足數即可完事何至於所屬村莊徧發諭帖悉行招募致書役等招搖勒索派歛錢文擾累地方若此可見該省吏治廢弛已非一日劉裁身任提督漫無稽察著傳旨申飭仍著將該縣招募樂舞生因何如此辦理之處一併據實查奏毋得稍存迴護尋奏該縣承辦永定河隄工有給發

夫價大錢四千八百餘千及糴買衆夫食米大錢均需運送赴工是以雇用牛車有一百餘輛之多至招募樂舞生內有報充之人不諳音律意欲雇人代倩以致書役乘機詐取該縣毫無覺察實屬罪無可逭得旨交惠齡查辦蠲免江蘇清河安東山陽阜寧桃源鹽城甘泉興化高郵泰州東臺江都寶應銅山豐縣沛縣蕭縣碭山邳州宿遷睢寧海州沭陽等二十三州縣并淮安大河揚州鎮江徐州五衛本年水災漕項漕米有差○己未諭軍機大臣等據強都奏緝拏盜犯一摺內稱到任後即飭所屬各營嚴拏靜海縣地方劉權之眷船被劫案內盜犯嗣據都司劉法程等在河西務地方拏獲趙魁解有德二名訊據供稱五月十七日夥同王二李七等在蒲溝地方偷竊糧船衣服等物又於六月十八日夥同馬老等在曹家隄地方行劫眷船銀兩隨飭弁將該犯供出同夥之董亮侯王

三。孫士禘。韓二等。拏獲。經督臣劉。飭縣嚴究。又經山東省拏獲賊犯馬老。關提到案。劉裁現委天津道慶章審訊。其行竊蒲溝糧船衣服之案。業經該犯供認。而於行劫曹家隄。眷船一案。俱狡供不認。趙魁亦頗易前供。尚未審訊得實等語。前此劉權之眷船。在天津地方被盜。行劫。屢經降旨。令該督飭屬嚴拏。今強都及山東地方官。先後拏獲賊犯八名。經劉裁飭委道員審訊。自應將行劫糧船。及眷船二案盜犯。分別嚴究。以成信讞。若承審之員。因盜犯行劫官眷船隻。事關重大。又屢經奉旨嚴緝。未能就獲。即將現獲各犯。併作一案。希圖完結。則斷乎不可。而該犯等。或以行竊糧船。較之行劫官眷船。其罪稍減。狡供翻異。有心避重就輕。亦屬事之所有。此案祇令該道等審訊。恐難定讞。但又不值令該督前往審辦。現在保定並無緊要應辦之事。該督傳諭藩司梁肯堂。即日親往天津。會同該

鎮道等。提集各犯。切實嚴鞫。訊取確供。定擬具奏。務使兩案俱有的實。賊據毋得稍涉含混。將就了事。庚申諭曰。普吉保奏。九月二十二。二十四等日。逆首林爽文。率領夥黨。在元長莊一帶。蜂擁前來。隨親督官兵。奮力殺退。賊衆仍屯踞附近村莊。偵探得實。即分派官兵鄉勇。豫為埋伏。二十五日。賊衆由溪墘厝。到雲厝土庫。東莊等處。前來逼近營壘。普吉保親率官兵。奮勇截殺。鎗礮並施。打死賊匪甚多。游擊海亮。都司馬元勳。從白沙墩。橫衝賊隊。用連環鎗礮。打死賊匪一百餘人。署副將琢靈阿。叅將張朝龍。游擊夏承熙。從無底潭。環攻其背。署同知黃嘉訓。鼓勵鄉勇。從水磨莊。堵禦截殺。自卯至未。賊衆大潰。共約計鎗礮轟斃賊匪數百名。割獲首級七十一顆。耳記一百三十四個。奪獲器械賊旗多件等語。普吉保由鹿仔港進攻。督率弁兵。奮勇殺賊。既已攻復笨港。今復能偵探賊蹤。豫為

埋伏令將弁等從旁衝截賊匪從後環攻賊背前後殺死賊匪數百餘人奪獲器械等件甚多實為奮勇可嘉普吉保已經交部議敘著再賞給蟒袍一件以示獎勵同日又據李化龍奏自鎮臣普吉保帶領官兵起程進剿後即親往各營盤察看地方諄諭將備及義民等協力堵禦因現在賊匪注意諸羅正可乘機進擊以分賊勢隨於九月十八日密令游擊穆騰額帶領官兵由番仔溝進至大哭溪一帶以作疑兵親率游擊裴起鰲署游擊陳士份守備徐大鵬帶領弁兵義民首許伯達等引導由八卦山直抵柴坑仔賊匪蟻聚抗拒即令官兵施放鎗礮賊人敗退焚燬賊寨二十餘間賊人恃衆復行擁至李化龍率領官兵向前截殺鎗礮打死賊匪百餘名割取耳記十三個首級二顆生擒賊匪何華歐倚二名奪獲鳥鎗二桿器械十九件賊旗一桿二十日在中篆地方鎗礮打死賊匪十餘

人二十二日大哭溪賊匪出擾莊民復前往堵殺施放鎗礮打死賊匪約二百餘名割取耳記二十七個首級一顆奪獲賊旗一桿皮牌三面長鎗竹鉞挑刀共三十五件等語李化龍因普吉保帶兵進攻留駐鹿仔港防守竟能探察賊情乘虛進擊奮勇攻剿殺賊多人奪獲器械賊匪望風奔潰李化龍亦屬奮勇可嘉著交部議敘所有此次普吉保李化龍派出隨同打仗殺賊之文武員弁等均為出力並著查明呈報將軍咨部議敘以示嘉獎諭軍機大臣等此時福康安自早得有順風揚帆徑渡前抵鹿仔港正值賊人屢經敗潰之後福康安惟當乘此好機會督率將弁會合各路鼓勇直前於初次打仗時即將賊匪痛加剿戮俾賊人聞風喪膽無難一舉掃擒至普吉保在笨港一帶雖屢敗賊衆但據奏賊匪仍在附近村莊嘯聚該鎮帶兵前進其糧餉運道後路最關緊要仍應加意防

範。又李化龍於柴坑仔中蒙等處乘機進擊以分賊勢。固屬奮勇。但鹿仔港係沿海重地。逼近賊巢。李化龍尤須隨處留心。實力防守。不可但知銳意直前。轉致附近賊匪潛出後路滋擾。此為最要。陣亡千總楊國寶把總曾超羣。外委沈揚芳及兵丁三十三名俱著咨部優卹。又諭據孫士毅奏安南國王失去印信。請於鑄給該嗣孫印篆內加刊補給字樣等語。安南臣服我朝。素為恭順。今既失去

印信。自應補行鑄給。該督所稱西山阮姓與鄭姓讐殺遺失印信。或為阮姓藏匿。將來恐有私用印文假冒混遞之弊。是刊給新印。自當與舊印稍有區別。使粵省官吏遇有與該國交涉事件。驗看印信。可以一目了然。辨別真偽。但所請加刊補給字樣。於體制不合。孫士毅尚未能斟酌周到。惟應查明該國印篆文內如係篆刻安南國王之印字樣。則新鑄印篆內即應刪去之字。若係篆刻安南國王

印字樣。則新鑄印篆即應加刊之字。如此示以區別。既可以杜阮姓假冒之弊。而粵省地方官與該國王遞送咨呈事件。不難立辨真假。且於體制相符。著傳諭孫士毅於該國嗣孫遣使懇請襲封給印時。詳悉諭以天朝因爾國遭遇事故。甫經安輯。若補給新印後。其舊印仍未銷燬。或為匪徒私藏混用。假冒該國名號。呈瀆天朝。與爾國轉為有損無益。今於新給印文與舊印不同。俾管關文武官吏

查驗有據。不致真偽混淆。天朝體恤周至。爾國當凜遵恪守。永承天眷等語。著孫士毅存記。於該國請印時遵照辦理。又諭據孫永清奏八月分糧價單內稱平樂潯州南寧太平柳州慶遠等屬糧價與上月稍增等語。粵西地方本年春夏以來雨水調勻。麥收豐稔。目下又屆秋禾成熟之後。該處糧價自應日就平減。何以轉致昂貴。因思本年廣東收成畧歉。前據孫士毅等奏。委員前赴湖南一帶

採買米石。豫備平糶。因廣西與該省毗連。商販人等。或俱就近向廣西糶買。以致糧價稍增。亦未可定。或因臺灣逆匪滋事。添調該省兵丁。及貴州調赴官兵。俱由該省料理出境。需用人夫口食較多。該處糧價。不免暫加昂貴。尚屬事之所有。倘係奸商等囤積居奇。恐嗣後米價漸就平減。若不豫擡價值。則將來減落後。不能獲利。是以豫為擡高。為將來糶賣地步。此等壟斷之習。最為可惡。不可不嚴

實錄卷五十五

五

加究治。著傳諭孫永清。飭屬嚴查。如有此等奸商囤戶。一經訪出。即從重懲治。一二人。以儆其餘。庶奸商不敢任意居奇。而糧價不致昂貴。將此傳諭孫永清知之。並著將該省糧價。究因何與上月轉增之處。據實查明覆奏。

（辛酉）

上御乾清門聽政。諭曰。李侍堯奏。於泉州等處。挑取新舊兵三千名。派員帶赴鹽水港。有陸路提標兵五百名。於八月十九日。由同安

縣之潯尾過渡。其先到開船者。均已抵岸。有後到之兵丁汪國清等一船。駛至海汊中央。風力過猛。該兵丁等見前隊均已過渡。急於前進。促令揚帆打棧。以致遂倒船覆。淹斃兵丁汪國清等十九名。請照陣亡例減半之半。給予卹賞等語。該兵丁等奉派前赴臺灣。剿捕逆匪。海中猝遇暴風。因急欲前進。以致船覆溺斃。情殊可憫。著加恩即照陣亡例議卹。毋庸減半。以示軫卹。諭軍機大臣曰。李侍

堯奏現在拏獲盜案起數一摺。內稱前兩次奏報拏獲盜犯十四案。共盜犯一百二十七名。之後迄今又獲盜十餘起。共盜犯一百二十五名。并有巡檢章大鏞。出洋接護米船。被盜船打傷兵役之吳通等一案。已經查獲究明。其餘各起。現飭嚴審。又據片稱。守備沈德清等押運軍裝。在銅山營被盜船搶劫。軍裝衣鞋。均有搶失。兵弁亦有受傷。現獲謝蛟等八名。究審等語。此等海洋盜犯。糾約多人。肆

行刦掠。甚至搶刦兵米軍裝。打傷兵役。安知非林爽文黨內。潛出洋面。滋生事端。且前次拏獲盜犯十四案。後旋又獲盜十餘起。共有二百五六十名之多。若照尋常盜案。候部議覆。人犯較衆。既慮稽察難周。或竟有刦搶犯情事。轉為未妥。著李侍堯將現獲各犯。速行審辦。於究訊明確。一面奏聞。一面即行按律正法。俾洋面肅清。官民船隻往來。不致被擾。方為妥協。將此傳諭知之。○又諭據刑部

奏。審訊廣西灌陽縣民鄧燦東。呈控族姪鄧培祿。挾嫌誣賴伊子鄧培芝。毆死鄧樹屏。因將鄧培芝擬絞一案。請將鄧燦東解往廣西。交該撫審擬等語。現據刑部檢查原案。與鄧燦東所供情節。迥不相符。如果鄧燦東所控屬實。則鄧培祿挾嫌枉告。致斃無辜。自應從重究擬。而地方官於此等人命重案。任聽裝捏情節。並不究辦。尤出情理之外。若鄧燦東架詞妄控。亦應按律懲治。此案若仍交該地

方官審辦。恐涉迴護。難成信讞。現在穆精阿前往江西。審訊胥王銓呈控一案。著傳諭該侍郎。於審辦完結後。即就近前赴廣西。將此案犯證卷宗。提集嚴鞫。委員檢驗鄧樹屏屍身。是否因病身死。並究明該地方官有無受賄婪索情弊。秉公嚴審。定擬具奏。毋得顛預了事。所有原告鄧燦東一犯。已交部照例解往該省質訊。並將刑部原摺鈔寄閱看。○又諭曰。常青在府城駐守。雖未能前進。但一切

調度。尚俱妥協。又聞知諸羅鹽水港。兩處被賊滋擾。先後派兵接應。且伊在府城。亦經屢次與賊打仗。是常青雖屬年老。尚能料理軍務。且福康安到鹿仔港後。由北路繞兵進剿。其南路及府城一帶。亦須有大員駐劄督辦。常青在彼日久。於該處情形。較為熟悉。應令其留駐府城。督率勦捕。至恒瑞在鹽水港。被賊攔阻。一籌莫展。轉於摺內將賊匪情形。張大其詞。茫無主見。似此怯懦無能。即留於軍

營亦屬無益。著福康安於鄂輝到後。即傳旨將恒瑞解任。令其自備資斧。來京候旨。其福州將軍員缺。即著鄂輝調補。令其統領恒瑞原帶弁兵。協力勦捕鹽水港一帶賊匪。接應諸羅。至常青所奏賊目許光來。囑令民人探問。擒送莊大田。是否得以免罪一節。常青諭以不但免罪。且可有功。其措詞尚為得當。臺灣賊匪本屬一時烏合。其附從夥黨。一見官兵勢盛。逆首指日就擒。或希圖自謀生路。竟

將賊首賊目擒縛獻出。乃事理之必有。著福康安於進剿時。即行廣為曉諭。使脅從之徒。自相解體。彼此猜疑。則賊匪烏合之衆。可期不攻自散。○賑卹直隸保安。宣化。萬全。懷安。西寧。懷來。蔚州等七州縣。本年旱災貧民。並分別蠲緩額賦。 壬戌。

上御懋勤殿。勾到直隸情實罪犯。停決絞犯三人。餘七十四人。予勾。○諭曰。彭元瑞現在覆看三分四庫全書。卷帙紛繁。著添派劉躍雲。

胡高望幫同辦理。○諭軍機大臣曰。徐嗣曾奏臺灣自用兵以來。車運軍裝夫腳。並給發義勇口糧。在在需用錢文。以致錢價昂貴。恐將來逐漸增昂。於民用官需。均有滯礙。請勅下浙江江蘇撫臣。每省各借錢十餘萬串。解閩等語。閩省勦捕事宜。一切運送軍裝夫價。以及給發口糧。需用錢文較多。以致錢價昂貴。自應從隣省撥濟。以平市價。但江浙兩省。現在錢價是否平減。局銅是否敷用。若因協

撥閩省。以致該二省錢價增昂。局銅不敷。亦多未便。著傳諭李世傑。閩鶚元琅玕。即行妥為籌酌。如該二省照數協撥。而本處錢局銅觔尚能寬裕。足敷鼓鑄流通。市價不致增昂。固屬甚善。自應即各備錢十餘萬串。解閩以備應用。如該二省錢文。實有不能照數協撥之處。或酌量減半撥濟。亦無不可。李世傑。閩鶚元琅玕。宜就江浙兩省現在情形。通盤籌畫。妥酌辦理。所有協撥錢文。即著附搭米船。

一併撥至上海轉運閩省備用。步軍統領衙門奏。擎獲受雇擡運官銀。偷竊元寶四個之吳朝喜等。請交刑部嚴審定擬。得旨。此案吳朝喜等。受雇擡運官銀。膽敢私自偷竊。實屬目無法紀。所有吳朝喜。高老兒。吳老謠。李德。馬黑子。八一兒。王二格。得山。兩子等。及夫頭曹太。李六。俱著交刑部嚴行審究。並查明各犯內。如係內務府食錢糧蘇拉。即著問擬絞罪。趕入本年秋審情實。其餘閑散人。及民人等。夥竊各犯。亦著從重分別發遣。其內務府銀庫庫使等。交總管內務府大臣。分別責處。總管內務府大臣等。向不經心。亦著交內務府察議。嗣後廣儲司。造辦處等庫。應行撥發銀兩。即著內務府蘇拉匠役擡運。圓明園庫撥發銀兩。即著苑戶擡運。不准雇用民夫。以示慎重。以待講學士平恕。陳崇本。洗馬方燁。侍講陳嗣龍。充日講起居注官。○癸亥上詣

奉先殿。壽皇殿行禮。○諭軍機大臣曰。福康安同海蘭察。及巴圖魯侍衛章京等。於十四日。俱由大擔門放洋。不過兩三日。可抵鹿仔港。計到彼後。已及旬餘。自己督率將弁。乘銳進剿。至鹿仔港賊首陳洋。現知普吉保進兵。又思乘虛潛出繞截。甚屬可恨。料此等賊匪。罪惡貫盈。久為天理所不容。此時大兵雲集。四路攻圍。斷不能苟延殘喘。賊匪等肆逆不法。罪不容誅。其逆首林奕文。及莊大田。陳洋。吳領等。必須生擒解京。盡法處治。方足以洩神人之恨。著福康安於統兵進剿時。如逆首等膽敢親出抗拒。被官兵臨陣殲戮。固亦足以伸國法。然究不若按名生致。處以極刑。方可彰憲典。而快衆忿。福康安務須豫為布置。設法籌辦。俾渠魁首惡。悉數生擒。更為妥善。朕心方愜也。是月。兩淮鹽政徵瑞奏。前因甘泉縣境內各莊。同時漫溢。恐泰州各場。竈正係漫水

下游當即星赴查勘。其時淮北三場亦有被淹。據報同時。是以分委運司履勘。得旨。更不成話。汝此任大。不如在長蘆。豈自滿福薄乎。江西南贛鎮總兵王集奏查閱各伍情形。分別勸懲。並巡查各營口。與閩粵汀潮等府屬交界隘口。俱極寧帖。得旨。以實為之。不在空言。欽差協辦大學士陝甘總督辦理將軍事務福康安奏。自到廈門。後患病已痊。惟有勉竭心力。迅速藏功。得旨。好。勉為早奏。大功以受重恩。○四川總督保寧奏。定例種地民番。每戶撥給地三十畝。今新疆屯戶。生齒日繁。請增撥地畝。承墾。較之招募新戶。事半功倍。仍照例升科。得旨。嘉獎。

實錄卷三十一

中本

大清高宗法天隆運至誠先覺體元立極敷文奮武孝慈神聖純皇帝實錄卷之一千二百九十一

實錄卷三十一

四六

大清高宗法天隆運至誠先覺體元立極敷文奮武孝慈神聖純皇帝實錄卷之二千二百九十二

監修總裁官經筵講官太子太傅文淵閣大學士文淵閣領事傅爾丹內大臣稽察欽奉

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領事稽察欽奉 上諭書件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

敕修

乾隆五十二年丁未十一月甲子朔諭現在

勦捕臺灣逆匪事宜總督李侍堯孫士毅於調兵運餉等務辦理迅速甚為妥協殊屬可嘉李侍堯孫士毅俱著加太子太保銜至叅贊提督柴大紀自駐劄諸羅以來屢經奮勇抵禦勦殺賊匪洵為懋著勞績著加太子少保銜以示嘉獎○諭軍機大臣等廣東莊民同心嚮義視賊如仇雖以業經投誠之莊錫舍猶因其曾經從賊不肯與之會合此亦足以見其義憤莊錫舍因粵民不與協力勦賊

益加激勵奮不顧身獨與賊匪打仗以致受傷甚屬出力可嘉著加都司職銜事完送部引見再賞銀二百兩以示獎勵並著曉諭廣東莊義民等以莊錫舍雖經從賊不與一同打仗固屬義舉但現在業已投誠屢次打仗殺賊即與帶兵官弁無異嗣後該義民不必心存歧視祇當共効同仇之義協力勦賊以期共申義忿承受恩賞賊目莊大田因其黨羽漸次解散將家眷搬移潛伏石仔瀨地方其勢已為窮蹙南路村莊民人見大兵雲集賊黨解體指日即就殲擒惟恐官兵一到無從自白致獲罪愆紛紛赴常青處呈請賞給腰牌以為識別可見該處民人已知賊勢窮蹙爭先自為別白率眾具呈而常青給與腰牌將來安分良民俱可辨識該民人等益可安心守業以助官軍聲勢現在南路情形既係如此則北路一帶村莊民人近見福康安統領勁兵前抵鹿仔港自必更歡呼踴躍共

慶更生。福康安於所過地方。其各村莊安分民人。亦當照常青所辦。賞給腰牌。俾令各有識別。安莊服業。自為守禦。既可以安輯衆心。且於官兵進剿後路。更資協助。無慮賊人潛出滋擾。尤為妥善。至臺灣義民甚多。而廣東泉州二處民人。尤為急公。隨同官兵打仗殺賊。屢經出力。自康熙年間。廣東莊義民。勦賊有功。經總督滿保。賞給懷忠効忠等扁額。是以民人等咸知嚮義。踴躍自効。但前次扁額。

祇係總督所給。伊等已如此感激奮勵。今將廣東莊義民。朕皆特賜扁額。用旌義勇。伊等自必倍加鼓舞。奮力行忠。但該處莊居甚多。難以徧行頒賜。著福康安接到扁額後。即遵照鈎摹。擇其大莊羣居處所。普加賞給懸設。並傳旨曉諭。以伊等義勇素著出力可嘉。是以欽頒扁額。賞賜以示優獎。俾該民人等益加奮感。竭力圖効。以堅其嚮義之心。至淡水一帶。現在並無賊擾。即大甲溪逼近。

大里杙賊巢。地方緊要。該處義民等。隨同官兵堵禦防守。頗為出力。即日大兵進剿。該處會合夾攻。正當鼓勵義勇。協力助剿。若此時因伊等口糧過多。輒議裁減。恐義民等質糧不給。或致漸行散去。轉阻其急公効用之心。殊屬失策。徐嗣曾現將銀米添解接濟。並令該處員弁。妥為安撫。酌量支給。使義民等口食充裕。招徠日廣。將來大兵進攻。正可得其協助。甚合機宜。所有各處義民口糧。俱應照

常支給。不可輕議裁減。但此時逆首林爽文在諸羅被官兵殺退。手腿中傷。現在牛稠山逃竄醫治。賊目莊大田。又因黨夥漸散。將家屬移入大武壠。自在石仔瀨潛伏。是賊首賊目等。屢經官兵勦殺。正在奔潰竄匿之時。福康安到鹿仔港後。自必先從大里杙夾攻。將林爽文跟蹤追捕。以期一鼓擒獲。至徐鼎士率領兵民。分路進取。福康安若因該處需兵濟應。不妨於普爾普舒亮二人內。酌派一人。

帶領已圖魯侍衛章京十數人兵二三千。前往會合徐鼎士。併力攻勦。更為得力。又諭曰。周井等犯。在洋面肆行劫掠。膽敢將運送臺灣軍裝物件。搶刦至一百餘簞之多。甚屬可惡。自當查明嚴辦。但該犯等。俱係漳州人。而賊首林爽文。又籍隸漳州。該撫查辦此案。若必將該犯等。是否係屬林爽文賊夥之處。詳加究訊。伊等既不肯自行承認。勢必輾轉追究。牽連波及。恐該處民人。不無心懷疑懼。況此等盜犯。審明後。本應按律斬梟。即使究出實係林爽文夥匪。亦不過正法梟示。罪無可加。著徐嗣曾。止須將該盜犯等。行刦軍裝棉衣之案。審訊明確。就案完結。毋庸輾轉追究。致滋疑擾。乙丑。諭。從前因粘竿處拜唐阿等。時常隨圍。差務亦屬緊要。曾降旨將支食二兩錢糧之拜唐阿。令各該旗遇有本佐領下馬甲缺出。即行酌補。今思各處拜唐阿。在本旗佐領下當差者較少。若馬甲糧缺。為

所占補。則旗人生齒日繁。生計未免拮据。所有上虞等處。食二兩錢糧之拜唐阿。均著加恩。照馬甲例。賞給三兩錢糧。其馬甲原缺。仍歸各該旗佐領下。以示朕軫念旗人一視同仁至意。又諭。本年閩省勦捕逆匪。所有添調各省官兵。經過地方。一切軍需供應。俱經發帑支給。絲毫不以累及閭閻。惟是運送糧餉軍械等務。間亦酌用民力。雖給與口糧腳價。而該處民夫。急公嚮義。無不踴躍從事。實堪嘉尚。自宜特沛渥恩。以示優恤。除漳泉二府。本年被早歉。曾經降旨加恩。令該督等查明緩徵。並臺灣府屬本年。及五十三年。應徵錢糧。概行豁免外。仍著李侍堯等。將福建通省承辦軍務各州縣。所有官兵經過地方。就其差務繁簡。出力輕重。查明應如何酌量加恩。分別蠲緩之處。詳細覈定。迅速奏聞。候朕另降恩旨。又諭曰。總兵梁朝桂。條領岱森保。帶兵前往鹽水港一帶。勦捕賊匪。甚為

奮勇梁朝桂著即賞給奮勇巴圖魯名號並照例賞銀一百兩。岱森保著賞給副都統職銜以示獎勵。○又諭曰邱能成自勦捕逆匪以來節次奮勇殺賊甚為出力屢經擢陞遊擊今因傷身故實堪憫惜著交部加一等以叅將銜照陣亡例議卹至援應諸羅中途被害各員除貴林楊起麟杭富業經降旨賜卹外其守備馬大雄及在西門外打仗傷亡之守備楊彰均著交部議給卹典其餘千總外

委陳邦材陳洪猷等各員並著該將軍等查明咨部照例議卹以示軫惻。○又諭曰田藍玉帶兵前赴諸羅於官兵遺失軍械有心捏飾迨跟隨柴大紀接應蔡攀龍時又復行走遲緩實屬狡詐怠玩僅予革職効力不足示懲田藍玉著革職即在臺灣府城永遠枷號示衆以昭儆戒。○諭軍機大臣曰著諸羅縣陳良驥數月以來多方勸諭殷實之戶捐助糧食得資接濟實為出力伊已推陞知州呈

明告養因病尚未回籍經常青等委令代理縣事今該員仍能奮勉自効甚屬可嘉著以知州銜即補諸羅縣知縣料理一年半令其回養德成額特克什布於賊匪攻犯營盤時往來督戰殺賊甚多德成額現已陞補健銳營前鋒叅領其特克什布著交福康安於軍營遇有應陞之副將缺出即奏明陞用魏大斌前以無能降旨革職今據柴大紀奏伊在山仔頂處帶兵堵禦勦殺賊匪如果實在出

力尚可降補都司以觀後效至福康安遠涉重洋督辦軍務海蘭察率同巴圖魯侍衛章京等奮勇宣勤現在正值隆冬之際朕心深為軫念福康安海蘭察俱著賞給元狐暖冠各一頂柴大紀力捍圍城勞績茂著亦著賞給元狐暖冠一頂以示體恤。○軍機大臣會同刑部議奏審擬通州普濟閘船戶車喜兒等偷竊運送漕米巡役韓連陞宛寧知情容隱復拒捕傷差請將宛寧從重發往伊犁船

戶車喜兒等發往烏魯木齊俱給兵丁為奴得旨此案韓連陞宛寧身充巡役於船戶等偷竊漕米既未先時查拏及被順天府役盤獲該差等復糾眾搶奪米馱拒傷府役希圖掩飾情罪可惡韓連陞雖屬首犯例應擬絞業經身故其宛寧一犯亦係拒捕傷差造意之犯未便任其諉卸死者致令倖免宛寧著改為應絞監候趕入本年朝審情實其原擬發遣烏魯木齊之車喜兒柏太王太楊六李

六薛七俱著改發伊犁給種地兵丁為奴以示懲儆嗣後漕糧抵通時若仍令該管衙門查察恐有瞻徇賄囑情弊著都察院每年奏派滿漢御史各一員前往嚴密抽查如有弊端據實奏奏以侍講學士鐵保充日講起居注官 丙寅

上御懋勤殿勾到朝審情實罪犯停決斬犯二人絞犯二人餘十八人予勾諭臺灣逆匪林爽文糾眾倡亂以來提督柴大紀統兵勦

捕收復諸羅後賊匪屢經攻擾城內義民幫同官兵奮力守禦保護無虞該處民人急公嚮義眾志成城應錫嘉名以旌斯邑著將諸羅縣改為嘉義縣俾閩縣良民倍加奮勵以昭獎勵又諭本日勾到朝審官犯內黃仕簡任承恩二犯同係福建提督於臺灣逆匪林爽文糾眾滋事一案既領兵過臺灣乃彼此遷延觀望貽誤軍機經大學士九卿問擬斬罪本屬按律辦理從來軍紀貴在嚴明而

失律之誅尤難寬貸黃仕簡於上年冬間帶兵前渡臺灣勦捕賊匪其時逆首林爽文不過與一二奸民糾合倡亂若黃仕簡能督率兵弁實力搜捕何難即時撲滅乃到臺灣以後惟知坐守郡城零星派撥巡邏恒怯一籌莫展以致逆匪輾轉糾集日久稽誅黃仕簡從前於黃教一案亦曾經親往查辦何此次竟致束手無能即因染患病症自問不能辦理此事亦應及早奏明候朕另派大員前往

督辦乃一味因循延玩貽誤事機。覈其情罪本應予勾。姑念黃仕簡究係年老抱病一聞逆匪滋事之信。即力疾渡洋。猶知以公事為重。其按兵株守。漫無籌畫。實由老病昏憤。尚非出於有心。是以姑從寬宥。免其勾決。至任承恩。年力正壯。非黃仕簡可比。且伊前往臺灣勦捕逆匪。係自行陳請。尤應倍加奮勉。力圖自効。乃亦安坐鹿仔港。與黃仕簡互相觀望。並不親臨行陣。奮力勦殺。律以逗留之罪。實屬法無可寬。特念任承恩之父任舉。前在金川出兵陣亡。伊兄任承緒。又因在京營供職。救火傷斃。皆屬歿於王事。任承恩又現無子嗣。若即予勾。使捐軀効命之臣。竟至絕嗣。於朕心實有所不忍。是以法外施恩。貸其一死。設使任承恩尚有子姪。必將伊予勾。斷不能稍存末減。但黃仕簡任承恩溺職辜恩。致逆匪負隅猖獗。該處兵民受其戕害者不少。今勦捕事務尚未完竣。皆係二人之罪。茲雖

曲加恩貸。已屬格外從寬。未便即行釋放。黃仕簡任承恩仍著牢固監禁。至朕於軍旅之事。有功必賞。有罪必誅。從不稍存姑息。即如此次在臺灣帶兵之郝壯猷。因賊匪復擾鳳山。棄城不守。潛回郡城。以專閫大員。如此畏葸偷生。若不明正典刑。何以肅戎行而昭法紀。是以不待大學士九卿覈擬。即將伊於軍營正法示衆。以昭炯戒。而現在帶兵出力之員。如柴大紀力捍圍城。不辭勞瘁。兼能激勵兵民。屢次殺賊。連獲勝仗。即特加拔擢。優予恩賚。其貴林楊起麟邱能成諸人。皆因奮勇勦賊。臨陣捐軀。即勅部從優議卹。一律得給世職。以示軫惻。設郝壯猷當賊擾鳳山時。能奮不顧身。授命疆場。亦可與貴林等同邀卹典。是與其死於國法。曷若歿於戎陣。刑賞昭然。惟人自取。今臺灣領兵官員。俱能爭先効用。未必不因郝壯猷覆轍在前。共知儆勵。蓋兵可百年不用。不可一日不備。而信賞必罰。

絲毫難以假借。此後身膺間寄者。當倍加凜惕。遇行軍之際。務須身先士卒。克敵致果。共曉然於功罪所分。視乎勇怯。如能共矢盡誠。著有勞績。必當躬膺茂賞。承受渥恩。若畏怯倖生。必致自蹈重愆。身罹憲典。庶幾人知敵愾。士皆用命。無負朕整飭戎行。諄諄告誡之至意。○丁卯。諭曰。普吉保前由大突溪往笨港勦賊。克復笨港。已降旨交部議敘。茲復督率將弁兵丁奮力勦殺。前後打死賊匪五六百人。奪獲器械甚多。奮勇可嘉。除普吉保業經議敘優賞外。其隨同出力之官弁。並著將軍福康安一併查明咨部。分別議敘。以示獎勵。○又諭。據柴大紀奏。八月內守備楊彰在諸羅西門外堵勦賊匪。連次打仗。該守備施放大礮。連發連中。斃賊甚多。實屬奮勇出力。嗣因中礮傷重。醫治不痊。至十七日身故。又據常青奏。遊擊邱維揚打仗陣亡。各等語。楊彰業經降旨交部議敘。今聞常青柴大紀奏

到情形。該員等奮勇殺賊。臨陣捐軀。均堪嘉憫。遊擊邱維揚著加一等以叅將銜。照陣亡例議卹。守備楊彰著加一等以都司銜。照陣亡例議卹。以示格外軫恤。○諭軍機大臣等。前曾諭令福康安將常青留於府城。委以南路勦賊之事。恒瑞著令解任回京候旨。今常青恒瑞所辦諸務。俱能奮勉。著福康安酌量情形。如伊二人在彼均尚能得力。不妨俱著留於該處。以資協助。至魏大斌已有旨降為都司。以觀後效。今在雲霄層等處連次打仗。殺退賊匪。尚知勉力奮勇。著福康安遇有軍營副將缺出。即將魏大斌奏請補用。俾益加感奮立功自効。○吏部議准。廣西巡撫孫永清奏。定例試用人員。大銜借補小銜。查銜缺大小不齊。不論何項小銜。銜大者概准借補。階級既無所區別。得缺亦未免偏枯。請嗣後首領佐貳。只准於首領佐貳中通融借補。不得再占雜職之缺。其從九品之巡檢吏目等

准其借補典史等語。查首領佐貳等官。自六品至九品而止。亦未便概行借補。應請嗣後各按品級。以定借補之階。除河工仍照舊辦理外。其地方首領佐貳雜職人員。凡從六品至正從九品等官。只准借補從八品而止。正從八品亦至從九品而止。正九品亦至未入流而止。不得再行降格。以示區別。從之。緩徵江蘇泰州廟灣場本年水災折徵銀糧并賑卹板浦中正臨興三場貧民。戊辰福州

將軍恒瑞奏。現在賊勢甚大。各處占據。臣所領兵五千。僅能防守鹽水港等處。若欲暫守已經恢復各地方。與接續後路。即需兵二三萬。欲擣大里杙等處賊巢。亦需兵二三萬。方能集事。諭軍機大臣等。連日據柴大紀普吉保奏報。該二處屢得勝仗。現在訂期會合夾攻。而常青處亦節次奏到。屢經打仗殺賊。雖未進取。而自守實屬有餘。是勦捕事務各路俱大有轉機。何以恒瑞獨為此驚惶無措之

語。自係恒瑞少不更事。怯懦無能。是以遇事張皇。茫無主見。即如所稱諸羅城內糧餉火藥不能接濟。若有疎失。則鹽水港亦難保守。等語。試思柴大紀被賊圍擾。已經數月。城中糧餉火藥早屬不敷。柴大紀激勵兵民。悉力守禦。並能勦殺賊匪。現在方與普吉保約會夾攻。而福康安統領大兵。即目前進。聲勢壯盛。正可乘銳進剿。豈有數月以來。該處縣城俱能保守無虞。而福康安未到十餘日之前。

柴大紀轉不能設法捍衛。竟至委城而去之理。昨因恒瑞連次奏到。各摺尚有料理。是以諭令福康安到彼酌量。如尚能得力。不妨將伊暫留該處効用。今觀恒瑞所奏。惶怯若此。徒亂人意。竟不必留於該處矣。彼雖懇求軍營効力。亦不可聽著。福康安即令其來京候旨。已已。諭軍機大臣等。朕明春臨幸天津。巡視海淀。向來直隸淀河一帶。豫備綵棚戲臺。並設有採蓮船隻等件。徒滋糜費。殊屬無

謂著傳諭劉我此次臨幸天津經過地方於此等無益之費概不必豫備。至天津商人等情殷愛戴於朕臨幸處所向或偶有點綴雖不便概行禁止但不可過事浮靡致多繁費並著穆騰額諭令該商等務宜仰體朕意祇須照常豫備毋得侈為觀美以副朕崇實黜華之至意。又諭據明興奏酌籌賑卹事宜一摺內稱豐鎮等九廳州縣現在倉貯穀石為數無多請將初賑二賑銀米兼放三賑全放折色所奏足見糊塗已於摺內批示矣該省豐鎮等九廳州縣被早成災閭閻口食維艱仰資賑卹自以本色為重即使因本屬倉貯無多不敷放給亦應於初賑時酌散折色維時民間糧食易於糴買小民尚可餬口至二賑三賑時值隆冬米糧更恐昂貴若如該撫所奏於三賑全放折色災黎以銀易米不更艱於糴買耶明興於地方災賑事務不能悉心籌畫辦理妥協乃竟漫不經心若此朕

甚為該撫憂之著傳旨申飭又諭從前平定金川前後派調之兵共有十萬而此次勦捕臺灣賊匪福建本省前後所調滿漢官兵已二萬有餘粵省節次派調官兵又有一萬三四千名加以浙江川黔粵西湖廣等省陸續添調之兵又不下萬四千合之臺灣原有額設兵萬餘統計已幾及六萬兵力實為厚集況金川係土司地方番衆久經生聚且其地勢險隘碉卡林立而官兵深入攻勦直擣巢穴展拓疆宇隸我版圖彼時不過需兵十萬即克奏膚功今臺灣本屬內地逆匪林爽文等不過編戶細民糾衆倡亂一時蟻聚況泉州廣東義民皆屬急公効義較之平定金川難易奚啻倍蓰勦賊制勝之道全在主持之一心如能立志堅定胸有成算則運籌決勝自當所向無前將士等亦俱勇氣百倍若將兵之人先不免心存猶豫中無把握即使增益多兵亦難望其勇往得力福康安當

堅持定見。庚午諭旨浙江黃巖鎮總兵弓斯發因商民黃崑山船隻在洋被盜一案已照部議降調。所有黃巖鎮總兵員缺著提督陳大用暫行兼署。候朕另行簡放。又諭據喀寧阿等奏考試八旗各處滿洲教習人等進呈試卷內所繕風俗字樣俱繕安科禮此雖照舊定成語但初定時已失字意矣蓋久行不易者謂之科禮隨時成習者謂之風俗理應繕作格掄尼塔親除現將進呈試卷改正外著交繕書房將清文鑑亦照依改正宣示各處遵行從前德通所繕清語內阿岱所不曉者甚多阿岱善於清語何至不曉究係德通固執漢文拘泥成語不能會意以致繕成漢文語氣阿岱始不能明晰曾經降旨以繕清必順滿文會意方可令人易曉若含滿文語氣因循漢文繕譯則竟至失却滿文本義著將此再通行各處嗣後一切繕清必遵朕屢次訓旨遵照滿文本義繕譯斷不可拘

泥漢文再今日進呈試卷逐一閱視立意措辭大類相同恐有不肖之徒濫圖僥倖互相代倩情弊著嚴飭嗣後派出之考試大臣御史等務須嚴行監試倘經察出弊竇一併從重治罪。諭軍機大臣等據琅玕奏審辦黃崑山在洋被盜一案將糾夥強劫殺傷兵丁之郭雨葛繼法周車郭尚四犯審明先行正法其郭亮一犯因供內尚有釣船盜犯未獲又無姓名恐粵省有容查應訊之處將郭亮暫行監禁俟粵省覆審知會再行正法等語所辦過於求詳轉為失當此等海洋盜犯膽敢糾集多人肆行強劫並劫去軍械將兵丁殺傷拋海兇殘不法已極自係該犯等聞臺灣逆匪滋事乘間在洋面劫掠若查拏緊急或竟投往林爽文入其夥黨助逆肆惡均屬事之所有該撫既將該犯等在洋行劫情節究訊明確有贓有證且現值勦捕逆匪之際即應將該犯等概行正法一面據實具奏乃

因郭亮一犯恐粵省尚有應訊之處監禁候質徒致咨查往返有需時日轉使兇徒得稽顯戮倘該犯自知罪重或有刳牢反獄情事更屬不成事體著傳諭琅玕將郭亮一犯即行正法梟示毋庸再候粵省咨覆至此案盜犯在粵省拏獲共二十八名前已諭令孫士毅審明後一面正法一面奏聞何以尚未據該督將審訊辦理之處具奏此案人犯較多應即迅速辦結著再傳諭孫士毅將拏獲各犯速行訊明正法毋致日久稽誅別生事端所有琅玕奏到各犯供單並著鈔寄孫士毅一併查覈質訊歸案辦理○辛未諭軍機大臣曰福康安海蘭察等遠涉重洋備嘗辛苦而普爾普舒亮及巴圖魯侍衛章京等皆生長北方未歷風濤之險今因乘舟不慣偶有患病覽奏甚為軫念即日風色順利自當安穩渡洋伊等此時勤勞出力雖不免風濤驚險指日奏績歲功朕必酬庸格外受恩之日

正長當倍加奮勉鼓勇直前以期迅速集事共膺懋賞以內閣學士鄒奕孝管幹珍充文淵閣直閣事旌表守正捐軀江西龍泉縣民康周尚女康氏廣東樂昌縣民沈廷現女沈氏壬申諭曰柴大紀奏接到常青札稱昨已有旨交柴大紀不必拘泥守城存亡之見設遇緊急即帶兵殺出縣城再圖進取等因惟思諸羅地居臺灣南北之中其縣城四面堆土種竹作圍本難為守前此克復後環營開溝並堆矮牆安設礮位營盤甚屬堅固若一旦棄之而去則城池營盤大礮均為賊匪所據恐賊勢益張鹽水港笨港南路之兵均難駐守且城廂內外住居百姓及各莊避難入城者共有四萬餘人至今協力守禦並捐助軍糈急公嚮義實不忍將此數萬生靈盡付逆賊毒手現在恒瑞駐鹽水港普吉保駐元長莊距諸羅俱不過三四十里三方鼎峙聲勢壯盛惟有竭力保守縣城以待援

兵齊集併力進剿。擒拿逆首等語。所奏忠肝義膽披覽之下。為之墮淚。前因新改嘉義之諸羅。屢次被賊滋擾。柴大紀數月以來。激勵官兵義民。悉力守禦。保護城池。但該處賊匪。雖屢經柴大紀勦殺。仍四處屯聚。心生窺伺。百計攻擾。而常青等先後派援之兵。未能即時齊到縣城。惟恐柴大紀激於忠憤。堅守城存。與存城亡與亡之義。固守弗去。是以降旨令柴大紀酌量情形。如力有難支。不妨率領官兵整隊而出。並因該處義民幫同柴大紀守城殺賊。甚為出力。若柴大紀帶兵出城。此等義民必致受賊戕害。朕心更為不忍。復諭令柴大紀。如縣城萬難守禦。必須出城另圖進取之時。務將城內義民及其家屬妥為捍衛。先行送出。俾義民不致失所。經常青等將此旨齎送柴大紀閱看。而柴大紀以縣城一切守禦事宜。久經布置周密。且因縣城內外居民甚多。不忍將數萬生靈委之於賊。立意

堅守。以待援應。是其保護合縣民人。與朕軫念義民多方愛護之意。適相脗合。所謂我君臣各盡其義也。柴大紀力捍圍城。且能乘間殺賊。已屬奮勇可嘉。今接奉前旨。若即全師而出。亦係遵旨而行。未為不可。而柴大紀被圍日久。心志益堅。勉勵兵民。忍飢固守。惟知以國事民生為重。古之名將。何以加之。柴大紀在臺灣勦捕賊匪。勞績最著。即守城一節。其功甚大。本欲俟大功告竣後。優加封賞。今伊如此繫念民生。忠良激發。為國家出力。尤堪嘉獎。柴大紀著即封為一等義勇伯。世襲罔替。並著浙江巡撫琅玕賞給伊家屬銀一萬兩。用示朕軫念勲勞。錫爵酬庸之至意。至柴大紀忠勇奮發。兵民當益加感動。仰蒙上天嘉佑。縣城自必保護無虞。現在福康安統領大兵迅抵鹿仔港。聲威壯盛。士氣百倍。柴大紀惟當更加勉力。痛勦賊匪。共奏膚功。永承格外恩眷。又諭嘉義縣城被賊攻圍。已

閱半載而民人等共知大義幫同官兵奮力把守久而益堅實堪嘉尚除節經降旨將臺灣府屬本年及五十三年應徵錢糧豁免著再加恩將嘉義縣五十四年應徵錢糧再行豁免以示朕優獎忠義有加無已至意又諭嘉義縣隨營守禦兵丁同心協力奮勇打仗固守城池亦應一體加恩賞賚除已降旨將打仗傷亡之官兵義民等分別給與恩卹外所有現在守城打仗出力兵丁著各賞給

兩月錢糧以示獎勵○諭軍機大臣等本日已延三奏報前藏達賴喇嘛遣使過境日期一摺內稱夷使字樣甚屬錯謬國家中外一家況衛藏久隸版圖非若俄羅斯之尚在羈縻猶以外夷目之者可比自應以來使堪布書寫為是乃一任庸劣幕友混行填寫夷使字樣率爾具奏已延三於此等陳奏事件全不留心寓目何至糊塗若此著傳旨嚴行申飭○癸酉封閉獨石口廳屬槽碾溝煤窑七

座從直隸總督劉綎請也○旌表守正被戕湖北黃安縣民王風煥妻孟氏○甲戌遣官祭

先醫之神○諭軍機大臣等都察院奏安徽太湖縣孀婦胡氏費氏呈控監生李盛廷等串通縣役科派錢文伊夫詹國楚出名具控受刑身死一案該縣監生李盛廷等串通縣役藉大差為名科派村民錢文詹國楚等出名控告經該管知府臧榮青江恂審擬將就定案將李盛廷趙浩江毓革該犯等托故外出遷延不結情節殊屬可惡而宿松懷寧二縣會審時是否將原告詹國楚苦刑斃命之處亦須徹底根究阿桂現在江省查勘湖隄工程此案即著阿桂就近提集案內犯證秉公嚴審定擬具奏並著傳諭書麟將宿松懷寧二縣知縣解任並將此案前後卷宗人犯帶至清江浦交阿桂審辦至前任知府江恂業經病故其臧榮青一員現任湖南岳常澧

道著傳諭浦霖即將該道解任遴派妥員押解至清江浦交阿桂歸案審訊並飭委員沿途小心護解毋至稍有疎虞除將原告交部解淮外將此由六百里各諭令知之○又諭崇武澳至鹿仔港海道徑直不過半日可達今福康安已得順風連帆穩渡二十九日定可前抵該處臺灣賊匪本係么膺烏合今見福康安統領如許勁將強兵聲威壯盛自必聞風膽落正可乘銳長驅奮力進剿而普吉

保一路自亦倍加振作此時惟應先令普吉保星速帶兵直抵縣城而福康安即以大兵接踵進剿與崇大紀等併力勦捕以收擄穴擒渠之績更可不須豫籌添調官兵矣現在南路賊匪雖已撤動但府城現存兵力既屬無多而府城倉庫衙署戶口自較嘉義縣數倍尤不可委之而去自應令常青在彼駐劄委以守城之事至福康安與海蘭察得風穩渡諸凡吉祥如意特賜福康安海蘭察玉如

意各一柄並各賞大小荷包以志慶慰鄂輝普爾普舒亮俱遠涉重洋勤勞出力著各賞大小荷包並賞奶餅一匣另奶餅一匣著分賞隨同出力之渡洋官弁等用示獎勵○是日起

上以冬至祀

天於

國丘齋戒三日○乙亥停回人春季採玉諭向例每年葉爾羌和闐春秋二季採玉輸納該

處回人按季跟隨大臣無甚閒暇俱各奮勉既應酌量施恩以紓其力而此時節次採運之玉亦足充用嗣後每年春季停止採納惟秋季仍令採玉解運自明年起即著為令以示朕惠愛回人之意○又諭據李侍堯奏閩省委員王履吉解送糧餉在洋遭風沉溺船隻案內尚有第六號米船一隻載米九百石遇礁擊碎淹斃兵丁一名水手五名米石盡行沉失又另起委員何中尊解運臺米船內

有鄭聖華一船載米八百五十石。將進鹿耳門。遭風沉失米二百餘包。又閩縣船戶李生財載運軍米赴廈門。遭風覆船。米盡沉失。淹斃兵丁水手七名。又船戶曾長璩運赴鹿仔港軍米一千石。在洋遭風船碎。惟尋獲該船水手二名。餘人不知下落。米船並無蹤影等語。此等解運軍餉米船。於外洋陡遇颶風。人力難施。以致船隻沉溺。淹斃數人。情殊可憫。所有沉失米石。著免其賠補。外其前後溺斃之兵丁水手人等。均著該督查明。照陣亡例議卹。以示體恤。○諭軍機大臣等。前因恒瑞抵鹽水港後。被賊梗阻。府城亦在圍中。而柴大紀處望援甚切。是以降旨督令福康安速往救援。進剿賊巢。原就彼時情事而言。今柴大紀處兵民一心堅守。可無他慮。而恒瑞處已有續到官兵。可以約會普吉保合兵前進。是該處情形與前不同。李侍堯接閱各官稟報。見軍營各路已有轉機。惟恐常青接到前

旨。稍有宣露。轉致府城人心搖動。擬將諭旨節錄發寄。並札會常青。福康安兩處。深合機要。殊得大臣之體。李侍堯著賞戴雙眼花翎。以示優眷。大武壠地方與內山逼近。今賊匪等將家口先行搬移。自係聞大兵即日前進。匪黨勢漸窮蹙。豫為竄入內山之計。不可不設法堵禦。絕其逃竄之路。福康安到鹿仔港後。自即親統大兵。由普吉保一路直抵縣城。接應柴大紀。其大武壠一帶。最關緊要。福康安或派令鄂輝帶兵前往搜捕。或抵縣城後。帶兵有人。即令柴大紀前赴大武壠搜捕。方可將賊匪家屬悉數拿獲。不使逆黨竄入內山。搜捕致稽時日。○丙子。聖祖仁皇帝忌辰。遣官祭景陵。上詣南郊齋宮齋宿。丁丑冬至祀天於

園丘。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。○戊寅諭曰。御史李陽斌奏。吏部議處降調有級紀不敷抵銷人員。其有情節較重。不准捐復者。請於議處時。嚴為酌定。不致先後兩歧。一摺。內所稱毛振翮。蔣基培。報捐一准一不准。似屬上下其手。不知二案該部俱經議駁。朕閱其案情。毛振翮係

山西高平縣知縣。因紳士捐修鼓樓。並不詳請候示。其事尚屬因公。是以降旨。仍准其捐復。至山東東平州知州蔣基培。於所屬捕役拖斃無辜。事關人命。是以即照部議。不准捐復。是此二案。吏部皆係一體議駁。具奏而准與否。皆出自朕定。並非部臣辦理兩歧。所能高下其手也。況現在綱紀肅清。內外庶政。亦斷無敢有意存軒輊之理。乃該御史率行援引入奏。已屬無謂。至所稱嗣後捐復人員。其情節較重。無級可抵者。應照舊酌覈請旨。其有加級紀錄。而不敷抵銷者。應嚴為酌定等語。是此後被議各員。凡有加級紀錄。不敷抵銷者。皆得援以為詞。廣其捐復之路。是語從嚴而意從寬。非澄敘官方。覈實辦理之道。此乃取巧。或受人指使。然朕亦不深究耳。但該御史既有此奏。除兼管吏部之員。應行迴避外。著今日進見之嵇璜。王杰。福長。安。董誥。彭元瑞。胡季堂。金簡。會同詳查例案。悉心妥議。

具奏○又諭據書麟奏貴州亮寨土司龍世勲之父龍紹儉主使龍世勲挾嫌誣告知府王勲勒索土司林秉乾等銀兩一案實屬虛誣將龍紹儉按律擬軍同妻史氏子龍世俊等遷徙安慶省城安插乾隆四十五年龍紹儉在配病故伊子龍世俊等呈請扶柩回籍經前臬司呂爾昌批飭不准龍世俊等攜眷私行回籍龍世偉乘間脫逃該地保因龍世俊等私行回籍時失於查報隨捏稟龍世俊五名先後病故該縣劉璿據稟詳報請將前任懷寧縣知縣張繼昂及現任懷寧縣知縣劉璿交部議處並咨明貴州巡撫將龍世偉龍世佐一併提解前來安徽仍發該縣安插等語所辦殊屬不成事體貴州土司本為管理苗民而設因其誣告知府按律擬軍該土司及伊家口俱隨同遷徙安插尚屬安分畏法該土司到配後因病身故伊子呈請扶柩回籍本不應准乃並不奏聞請旨已屬不合

而於伊子龍世俊私行回籍後該縣又率據地保捏稟詳報尤非尋常疎脫可比該撫書麟又僅請將該縣張繼昂劉璿交部議處殊屬失當書麟著該部議處其前任懷寧縣知縣張繼昂現任知縣劉璿俱著革職發往軍臺効力捏報之地保發往伊犁給兵丁為奴其失察之上司亦著交部分別察議○諭軍機大臣等據畢沅奏原任戶部主事孔繼汾於違例營葬案內自行議罰銀五萬兩解交豫工充用已陸續完收銀四萬二千兩外尚有未交銀八千兩現在孔繼汾並伊子孔廣森雖經先後病故其未完銀兩仍嚴飭該家屬如數湊繳等語孔繼汾以營葬獲咎究屬伊家務尚無別項情節其議罰之銀已據交完四萬餘兩今孔繼汾及伊子俱經病故所有未完銀八千兩著加恩寬免毋庸追繳將此傳諭畢沅並諭長麟知之○又諭本日據蘭第錫奏將睢州下沉十三堡壩工及圍築

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十二

實錄卷之一千二百九十二

主

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十三

此修總纂官經筵講官太子太傅文淵閣大學士文淵閣領閣事領侍衛內大臣稽察奏

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣履桂

總纂官經筵講官太子太傅文學士文淵閣領閣事稽察奏

世襲副都統軍功加十九級隨帶加二級又加二級臣著諾內大臣戶部尚書鑲藍旗滿洲都統軍功紀錄五次

尋常紀錄十四次臣德璉經筵講官太子少保工部尚書紀錄六次臣曹振鏞等奉

敕修

乾隆五十二年丁未十一月己卯月食

上幸瀛臺。諭。昨據李世傑。閔鶚元等奏。動撥

錢文。委員附米船解閩。本日據琅玕奏。動撥

寶浙局錢文。委員運往上海。附撥米船解閩

應用。又何裕城奏。湖南頭起官兵。於十一月初一日入境前進。各摺俱屬妥協。前因江浙

兩廣四川湖廣江西貴州各督撫。辦運解閩

米石。及料理官兵過境各事宜。均為妥速。業

經降旨交部議敘。該督撫等身任封圻。於軍

需要務。俱能奮勉急公。實心任事。殊屬可嘉。

即日大功告竣。自當再降恩旨。予以甄敘。該督撫等。務須倍加感奮。遇有地方公事。益當實力妥辦。以副委任。而承優眷。○諭軍機大臣等。據普吉保所奏。附近賊莊民人。挈眷來歸者。紛紛不已。足見從賊者日少。黨羽渙散。普吉保遵旨傳諭。不許官兵鄉勇滋擾。所辦甚是。其所稱廓清賊黨。會合夾攻之處。當勉力為之。勿為空言。南路賊匪。經常青連次剿殺。得有勝仗。而普吉保劄營處所。距縣城不過五里。恒瑞又已將虎仔港收復。是各路聲勢漸已聯絡。縣城自更當固守無虞。即日大兵雲集。四路攻剿。惟在福康安督率將領。帶同熟悉之人。留心辨認。不可令正犯首惡。得以漏網。方為萬全。○庚辰諭。昨經朕於明與錯行銀米兼放。申飭一事。旋據覆奏。於初賑二賑銀米兼放。三賑全放折色之處。曲為迴護。又未將初賑時業經散放銀米錯誤緣由。據實陳奏。又降旨申飭矣。今據鄭源璣奏稱。

大同懷仁天鎮三縣。今夏被旱成災。已於十月二十二日。馳赴該處。將初次應賑戶口。查明散給銀糧等語。是該處被災州縣。現在初賑。業經銀米兼放。明與接奉前旨。自應將業經誤行散放銀米。難以收回之處。據實覆奏。乃該撫前奏。尚稱初賑二賑時。值隆冬民間買穀維艱。三賑在領過兩賑銀米之後。自必稍可敷衍。為此巧詞支飾。試思初賑時。民間甫經秋收。自當畧有糧食。可以糶買。應放給折色。至二賑三賑。為時較久。若放給折色。小民將於何處糶買米糧。以資接濟耶。明與似此糊塗。尚敢於朕前文過飾。非此等伎倆。豈能逃朕洞鑒乎。明與著再行傳旨申飭。仍交部議處。至鄭源璣摺內。稱各州縣被災六分戶口。明春尚可支持。其七八九分戶口。收成更歉。請加恩展賑等語。該省州縣內。既有被災較重處所。自應查明酌量展賑。應俟明與覆奏到日。屆期另降恩旨。至將來展賑時。為

期更遠。小民買食尤艱。自應本折兼放。又不可仍行拘泥。全行折給。以致災黎不能得受實惠。○又諭。從前嚴飭禁止各省兵民製造上官衣傘陋習。曾降漢字諭旨。令各省駐防將軍。副都統。照例年終繕清具奏。其所繕造給服傘。還音字樣。殊覺費解。當依清語改正。著通行曉諭。嗣後遇有此等字樣。俱用清語書寫。勿就漢字還音。○又諭。刑部覈擬孔衍江之妾孔胡氏。因姦謀死正妻孔孫氏一本。將孔胡氏按律凌遲處死。孔二牛擬斬立決。已照議准行矣。此案孔胡氏。因姦謀死正妻孔孫氏。按律問擬凌遲處死。孔二牛。照姦夫同謀起意。擬斬立決。固屬情真罪當。但孔胡氏並非謀死伊夫孔衍江。而本內所引律例。係照妻妾因姦同謀殺死親夫律。援引未為允協。自應即將奴僕謀殺家長律。比照引用。據部稱此等姦謀正妻致死之案。律內向無專條。現在刑部修纂則例。著即將此一條擬

議增入。○又諭。曰。給事中劉謹之。在軍機章京上行走二十餘年。奉職勤慎。茲患病身故。伊妻湯氏。因夫亡殉節。殊屬可憫。劉謹之著加恩賞給鴻臚寺卿銜。並賞銀一百兩。治理喪事。湯氏著該部照例旌表。以示軫恤。○又諭。曰。虔禮寶現在丁憂。所有廣西布政使員缺。著英善署理。俟服闋後。再行實授。○諭軍機大臣等。前據孫永清奏請陞見。業經准行。因該省有調撥官兵。及照料兵過境事宜。曾諭令該撫俟本省及黔兵過境完竣。將撫篆交新任藩司虔禮寶護理。再行起程來京。此時虔禮寶自己前抵粵西新任。但該藩司現在丁憂。即應離任。其員缺甫經簡放。有人到彼尚需時日。若孫永清於虔禮寶到任後。即行起程。該省巡撫印務。乏人護理。著傳諭孫永清。應俟新藩司到任後一兩月。再行來京。如業已起程。著該撫於何處接奉此旨。即由何處速回本任。○辛巳。

上幸瀛臺。諭軍機大臣曰。福康安於二十八日在崇武澳放洋。今於二十九日。即抵鹿仔港。以數百里洋面。一晝夜間。揚帆穩渡。所帶兵船百餘號。同時到港。實仰荷

天神默佑。為成功佳兆。福康安統領如許勁將強兵。四路會合。聲勢百倍。自當乘銳深入。惟日夕盼望捷音。更為殷切。又諭曰。李永祺前在金川軍營。曾經辦理糧餉。是以專派該司前赴臺灣。經管軍需各事宜。且係臬司大

員。非府縣可比。遇有運送軍裝器械火藥等項。自應隨時妥速給價。擔當起運。又官兵酌借銀兩。製造衣褲。俱係該司分內應辦之事。何必錙銖較量。為報銷時豫留站腳地步。朕於行軍要務。從不靳惜費用。將來大功告竣。軍需報銷時。設有實在當用。而格於成例。不准開銷之項。經部覈駁時。朕自當酌量寬免。即如從前平定金川。所用軍需內。由部覈駁刪減各款。經朕加恩寬免者。至數十百萬之

多。李永祺豈未知之。為此煩瑣之奏耶。著傳旨申飭。兵部議覆。署陝甘總督山西巡撫勒保奏。定例烏魯木齊提屬並巴里坤鎮屬之存營差操兵丁。每歲操演。均以四月。開曠日多。枝藝難臻純熟。請照內地例。每歲八個月。所增火藥鉛觔。照例加倍調辦。至新疆各處。亦應辦理。畫一。應令該督詳查聲覆。從之。旌表守正被戕山東平度州民張永率妻姜氏。壬午。

上御乾清門聽政。○諭軍機大臣等。據姜晟奏布政使陳淮。因伊子陳崇本補授侍講學士。呈請代奏謝恩一摺。陳淮身任藩司。原有奏事之責。今因伊子陞授侍講學士。理應自行具摺謝恩。何必呈請巡撫代奏。似此過於拘泥。何以辦理地方事務耶。陳淮著傳旨申飭。○癸未。諭曰。李侍堯奏審擬海洋盜犯一摺。將為首之陳讀等七犯正法。臬示其餘各犯。因係聽從糾約入夥。照例定擬杖流等語。向

來海洋盜犯。原係不分首從。概行正法。嗣因各犯內有止係接遞財物。並未搜贓。或止行劫一次者。較為情有可原。令得於摺內聲請免死發遣。原指尋常無事時。愚民一時被誘入夥。尚未行劫得財。與首先起意糾黨逞兇者。稍為有間。是以稍從末減。此乃法外施仁之意。現在臺灣逆匪滋事。官兵正在勦捕之時。而不法奸民。輒敢乘此時在洋面糾夥肆行劫掠。甚至傷害官兵。搶奪兵糧軍器。此非尋常海洋行劫盜犯可比。幸而已經拏獲者。按律辦理。設各犯聞拏緊急。或竟投入逆匪夥黨。肆先助惡。亦屬事之所有。不可不嚴加懲創。以戢兇暴。而靖海疆。所有已獲各犯。自應不分首從。概行按律正法。不得仍照尋常海洋盜犯之例。分別定擬。著刑部及沿海省分督撫。於覈擬審辦洋面行劫盜案時。如臺灣勦捕事務尚未完竣。即將案犯無論首從。俱應按律正法。俟臺灣勦捕事竣後。再照舊

例。分別聲請。所有李侍堯審擬海洋盜犯陳讀等一案。即著三法司遵照此旨。覈擬速奏。諭軍機大臣等。據譚尚忠題。參前任祿勸縣知縣檀萃。虧缺廠銅。請旨革審。並將督撫司道等。交部分別議處。該省銅務。甫經大加清理。趕復原限。該廠員等。自應從此年清年款。毋致再有遲逾。乃前任祿勸縣知縣檀萃。管理廠銅。虧缺銅觔至一萬五千餘觔之多。以致又不能按限撥運。若似此積壓遲延。日復一日。必致復誤原限。又須大加整頓。且虧缺至一萬五千餘觔。必非一兩月之事。該管督撫司道等。平日所司何事。不可不嚴行懲治。除交部分別議處嚴議外。所有此項虧缺銅觔。如該參員力不能賠。即著該管之督撫。分賠一分。兩司道府等。分賠一分。歸款。並著該督等。通飭各廠員。務須按限撥運。毋得稍有遲誤。虧缺。致干嚴譴。將此諭令知之。又諭前據奎林奏。請將遣犯于時和。釋回內地。

一摺業經允准。現在于時和有應行質訊事。但于時和與釋放回籍之伊犁遣犯高姓同行。聞其尚在西安逗留。或已回江蘇原籍。著傳諭已延三。及沿途各督撫。飭屬嚴密訪查。如遇該犯等在境。即將于時和高姓一併截留。委員迅速解京。倘于時和已回原籍。高姓並未同行。即著閔鶚元嚴查高姓籍隸何處。一併奏聞。一面將于時和及遣犯高姓拏獲。遵委委員迅速解京。以備審訊。毋致稍有疎虞。甲申。

上幸瀛臺。諭據紀昀奏。罰往熱河看書人員內。朱鈴。呂雲棟。陳本。石鴻翥。四員。至今將滿一月。尚俱未到等語。此等校書各員。前已濫邀優敘。今復查出錯誤。免其降革。僅罰令前赴熱河看書。已屬格外之恩。該員等自應倍加感奮。迅速前往。實力校勘。勉圖稍贖前愆。乃遲延至一月之久。尚未到彼。伊等於此等校書之事。尚似此遷延。設派令前赴軍營。

亦將托故不往耶。所有朱鈴等四員著該部將該員等。因何遲延之處。據實嚴查。分別從重議處。如係無故逗留。即應革職。以為怠玩誤公者戒。乙酉。諭據保寧奏。潼川府知府張松孫。因病懇請回籍調理。所遺員缺。請以龍安府知府賈廷彥調補一摺。已批交該部議奏矣。向來道府告病人員。自雍正年間。改定條例。惟准督撫題請解任調理。至應否回籍。由內閣票擬雙簽請旨。其中有准回籍者。

亦有不准回籍者。所以防規避而杜瞻徇。立法至為詳善。朕臨御以來。俱係遵循辦理。然亦多有令其回籍者。今該督於具題時。即行奏請回籍。則內閣又何必雙簽請旨耶。著通飭各督撫。嗣後遇有道府以上告病人員。祇應循向例。題請解任調理。其准令回籍與否。聽候部議請旨。毋得遽請回籍。以符定制。保寧著飭行。又諭據海祿奏。奎林各款。現在查訊已有證據數款。業經降旨革職。拏解。

來京審訊伊犁地方緊要其將軍員缺著保
寧補授李世傑久任川省熟悉該處地方情
形所有四川總督員缺著李世傑調補李世
傑接奉此旨即馳赴新任毋庸來京陛見保
寧俟李世傑到川接印後即馳驛來京請訓
再赴伊犁將軍之任兩江總督員缺著書麟
補授陳用敷現在已屆服滿所有安徽巡撫
員缺著陳用敷補授○諭軍機大臣等據海
祿奏奎林肆行無忌向屬員罪犯婪贓等
語詢及引見來京之年班主事五靈阿均稱
確實奎林現在由伊犁起程入覲如此負恩
卑鄙不可仍邀恩眷令其瞻覲著由六百里
傳諭勒保即派大員將奎林革職鞫問迅速
押解來京○又諭賊匪因嘉義縣城勢在孤
危百計攻擾普吉保駐兵元長莊為日已久
柴大紀被圍數月兼乏糧食兵丁飢餓自然
不能出城接應伊亦並未前進實係無能其
摺內所稱殺賊情形不過割首級三顆耳記

等五件馬得謂多不過應差打仗敷衍塞責
徒知愧忿亦屬無益且普吉保在元長莊距
縣城不遠正應奮力前進剿殺賊匪乃轉欲
由新埤會合恒瑞豈非繞遠待人而於柴大
紀急望救援竟存膜視耶看來普吉保恒瑞
雖現在帶兵赴援俱難望其奮勇得力此時
福康安已統領大兵由鹿仔港進發自應速
赴縣城援應不可再緩大里杙係賊匪巢穴
福康安派令舒亮帶兵前往與淡水官兵前
後夾攻使賊人首尾不能相顧為牽綴賊勢
之計與朕前旨脗合並擬將賊匪屯聚之地
設法截斷即以賊之計攻賊使賊人無所施
其狡詐伎倆所辦深合機宜至該處帶兵將
弁不能悉心教練以致兵氣餒怯為賊所輕
而於稟報情形多不確實尤為綠營惡習今
福康安到彼面加訓飭實力整頓并於鹿仔
港另行擇地移營設法防守揀選精壯義民
隨營剿賊一切籌辦均屬妥協自當壁壘一

新士氣百倍。想大兵所到。賊匪望風膽落。指日成擒。剋期集事。計至明歲二月中旬。朕巡幸天津時。福康安應行籌辦事務。自己漸次料理。應將大端面交常青接辦。常青經事較久。於善後諸務。自所優為。崇大紀亦可將該處情形。告之蔡攀龍。令其在彼照應彈壓。與福康安一同起程。約計朕駐蹕天津時。前來瞻觀。雖此次勦捕內地逆匪。與平定回部金川不同。可無須舉行郊勞典禮。但伊等歲功奏績。遠涉宣勤。亦宜加以宴賚。用示獎眷。至臺灣地方。屢有械鬪滋事之案。經此番官兵大辦之後。所有此事起釁根由。及助惡夥匪。著福康安等。於勦捕事竣時。務須嚴切根究。從重懲治。勿令稍留餘孽。故智復萌。庶人知畏法。革面洗心。該處民刁吏黠。積習蒸然一變。而於地方營伍。尤須實力整飭。俾紀律嚴明。有備無患。以期一勞永逸。綏靖海疆。方為妥善。以故四川建昌道屬瓦述曲登長官

司恩德弟阿窩病休。貴州鎮遠府屬印水司土官楊政煥孫光鑑。各襲職。丙戌諭。前於明興錯行銀米兼放一事。降旨申飭。後旋據該撫覆奏。於初賑二賑銀米兼放。三賑全放折色之處。曲為迴護。又未將初賑時業經散給銀米錯誤緣由。據實陳奏。復經降旨申飭。並將明興交部議處矣。今據梁肯堂奏查明宣化府屬災賑一摺。內稱秋間商販流通糧價不昂。可以量用折色。而大賑口糧。照例銀米兼放。倉貯足敷支用等語。是各省辦理災賑。其初賑時。民間甫經秋收。尚有糧食。可以糴買。自可放給折色。至二賑三賑。為時較久。民間米價缺短。自應銀米兼放。方足以資接濟。此係事理之顯而易見者。梁肯堂身為藩司。尚能妥協籌辦。明興曾任巡撫。有年。豈於此等地方緊要事務。反不能見及此耶。乃明興辦理此事。既經錯誤於前。及接奉申飭諭旨。後又不將初賑時業經銀米兼放。難以收

回之處據實陳奏。尚敢於朕前巧詞迴護。文過飾非。既屬糊塗。又復執謬。可見前此降旨。將該撫交部議處。實為罪所應得。明興著再傳旨申飭。所有明興梁肯堂摺俱著發鈔。通諭各督撫。府尹知之。○又諭據舒常等奏。湖南派往閩省進剿官兵。例帶壯健餘丁。內提標及常德澧州洞庭等營協。召募餘丁。俱有短少。節經查催。始據提標及常德營補送。惟澧州營洞庭協尚未具報起程。均屬遲玩。請將營員交部分別議處等語。此次湖南派往閩省出征官兵。該督等料理起程出境。尚為迅速。至隨帶餘丁。召募短少。俱因兵行甚急。三兩日之內。一時未能募足。尚屬有因。現在該督等飭令已到餘丁。加緊趕往。其未到餘丁。催令趕緊補送前進。所有辦理遲延之署提標中軍叅將遊擊恩特赫默。常德營遊擊董天培。澧州營叅將金殿安。洞庭協副將陳大龍。俱著加恩免其交部議處。提督俞金鰲。

亦免其察議。○又諭據蘭第錫等奏。豫省下南河同知衙署。向來建設開封省城。距本管黑堽地方三十餘里。防汛未便。請移駐黑堽等語。河工設立各廳。分段修防。其衙署自應建於要工處所。以便親身督辦。朝夕巡查。現在下南河所轄黑堽地方。埽工最為緊要。該同知以專管之員。遠駐開封。每遇汛期。難於往來照應。自當因時酌移。以資近便。所有下南河廳衙署。著照所請。移建黑堽工次。俾得就近稽查防守。其一切移建事宜。並著照該督等所請行。○諭軍機大臣等。據畢沅奏。睢州漫工。動用錢糧一摺。內稱現在分款詳覈。照例銷六銀三十六萬三千餘兩。賠四銀二十四萬二千餘兩。另行題銷分賠。至例價不敷。加價銀一百二十九萬二千餘兩。於通省地糧內攤徵歸款。請勾作五年徵還。以紓民力等語。此次睢州下汎十三堡堵築漫工。竣事尚為迅速。非從前之屢經墊陷者可比。其

物料夫工動用價值較之節次當有節省且本年該省收成豐稔料價當不至過昂何以動用至六十餘萬兩之多至例價不敷即需加增亦何至於正項之外加至兩倍著畢沅查明據實覆奏至所稱動用例價銀兩應行銷六賠四自當照例覈辦其例價不敷加價銀一百二十九萬二千餘兩若於一年之內在通省地糧內全數攤徵固恐民力不無拮据但黃河水性遷徙靡常難保將來竟無要工該省歷年歲料幫價尚有積欠未完若此次加價銀兩又勾作五年攤徵倘數年內復遇有要工其加價銀兩又需分年徵納則年復一年此等墊發之項愈積愈多未免懸宕著傳諭畢沅所有此次加價銀兩或分作三四年於通省地糧內攤徵况該省本年收成豐稔或民力不至拮据是否可行著畢沅酌量覈辦倘現在情形實有難以如此辦理之處亦著據實覆奏不必拘泥遵旨也尋奏豫

省入秋以來雨澤稍多輓運物料人夫工作事半費倍以致例價不敷定議加價委係覈實動用並無絲毫糜費至攤徵銀兩查開封歸德衛輝三府屬今年係屬歉收應請分作四年餘俱三年徵完以清墊款得旨如所議行又諭昨據海祿奏奎林各款現在查訊其中證據確實者已有數款業經降旨將奎林革職解京審訊其伊犁將軍員缺將保寧補授以李世傑調補四川總督書麟陞補兩江總督並令李世傑即赴四川新任保寧俟李世傑到任後再來陞見但現在此旨尚未發鈔著先行傳諭李世傑接到此旨毋庸來京請訓即行起程伊赴四川新任著即順道帶印面交書麟接受再行赴任書麟於接印後即著前赴新任又諭伊犁將軍員缺緊要著保寧補授李世傑調補四川總督尚未明頒諭旨著先行傳諭保寧李世傑一入川省保寧即往迎交代來京請訓再赴新任

丁亥諭軍機大臣等。直隸文安隄工。朕於丁亥庚寅癸巳等年。曾經親臨閱視。明春巡幸天津。蹕路是否經過。該處隄岸工程。近年以來。是否穩固。有無被水之處。著劉綬詳悉查明覆奏。所有丁亥等年御製詩三首。並著鈔寄閱看。尋奏。該處隄工。疊經修培。現在穩固。報聞。欽差協辦大學士陟甘總督辦理將軍事務福康。著護軍統領叅贊海蘭察。咸都將軍鄂輝。奏帶領巴圖魯侍衛等。至八卦

山一帶躡緝。見山梁賊人設卡豎旗。迎殺大潰。擒拏得勝等語。諭軍機大臣等。此次海蘭察所帶巴圖魯侍衛止二十餘人。即能直抵賊人設卡處所。殺死賊匪。擒拏活口。士氣人心。為之一振。洵為事機順利。極好吉兆。柴大紀力捍圍城。城中糧食。大約久已缺乏。今花生地瓜等物。又俱用盡。兵民至以油糲充饑。亦恐不敷接續。而恒瑞。普吉保。兩路又未能即時前進。是柴大紀望援急迫。福康安自應

即由元長莊。笨港一帶。統兵速進。勦殺沿途賊匪。徑達縣城。至普吉保自鹿仔港進兵後。業經收復笨港。進至元長莊。又經移營。距縣不過五里。若能身先士卒。奮力勦殺。直抵縣城。朕必深為嘉許。施恩格外。且為普吉保計。即因賊勢鴟張。難以輕動。與其株守中途。進退失據。孰若力戰入城。即至勢有難支。與柴大紀協同固守受困。猶覺有丈夫氣概。今似此遷延。現在福康安大兵已到。即普吉保福命淺薄之處。至恒瑞自駐兵鹽水港後。為日已久。所帶官兵。比普吉保為多。乃並無寸進。亦未打仗得勝。是恒瑞之咎。已視普吉保為重。且現據柴大紀奏接總兵梁朝桂咨稱。凡事皆由恒瑞主持。事之能行與否。亦不敢自專等語。是梁朝桂亦知柴大紀處望援甚切。急應前進。而語意之間。似不免恒瑞有掣肘之處。看來恒瑞竟係按兵不舉。或因不能親自往救柴大紀。而梁朝桂稟請赴援。竟至有

心阻止。著福康安即確切查明。據實嚴叅。不得稍有徇隱。○戶部議准。漕運總督毓奇疏稱。長淮三。四。兩幫輪兌。徐屬漕糧之年。向係領支名本實折行月糧石。近年糧價日昂。不敷購買。請改支本色二千石。於合肥懷遠定遠。餘剩月糧內。照數分撥從之。○廣東巡撫圖薩布疏報。廣州肇慶羅定三府州屬開墾額外水田二十五頃二畝有奇。○以故奉恩輔國公盛昌子慶裕襲爵。奉恩將軍恒林子榮善襲職。○戊子。

上諭

壽康宮行禮。○幸瀛臺。○諭軍機大臣等。據阿桂等奏。查勘隄工一摺。內稱高堰等廳。臨湖碑石工程。因本年湖水盛漲。連過西北風暴。多被撞損。俱係擇要修補。實無影射浮冒情弊。至三溝開迤下添建西隄一事。李世傑等之意。原為此兩年連值盛漲。攬護東隄起見。但盛漲非常有之事。且湖水蓄高。亦足為慮。

應將創建西隄之處。竟行停止等語。高堰等處隄工。既經阿桂勘明。俱係擇要修補。自應照李世傑等原奏。即行派員分段承辦。限於明春桃汛以前。一律報竣。以資抵禦。至三溝開迤下添建西隄一事。前據李世傑等奏到。朕即以該處從前本無隄岸。凡遇水漲。年分民田廬舍。亦俱保護無虞。此項隄工。似可無庸添建。當經降旨令阿桂詳悉查勘。今據阿桂勘明具奏。以該處若添建西隄。橫加攔截。

盛漲時。必至湖水蓄高。口愈窄。則力愈猛。西隄一有疎虞。東隄亦復難保。恐潰決尚不止此等語。是添建西隄。實屬無庸辦理之事。看來竟係李奉翰輕信屬員之言。遽議添建。為藉端冒銷地步。此等情節。不能逃朕洞鑒也。再昨據海祿奏。奎林各款。已有旨諭知阿桂。現在傳詢伊犁換班來京之官員等。海祿所奏各款。其得受銀兩等事。係暗中過付。自不使該處官員聞知。而溺佛縱酒。及酷刑等。

事已據各官員僉稱屬實。奎林似此情性乖張。豈可復膺伊犁將軍重任。業已降旨革職。拏問其伊犁將軍即以保寧補放矣。但奎林與阿桂同在金川一處有年。今如此行為實出意料之外。將來如果質訊得實。朕亦不能以其曾經出力。稍存寬縱。阿桂意以為何如。據實奏聞。勿得稍存迴護。○又諭前因伊犁釋回之遣犯于時和並一同回籍之遣犯高姓。現有應行質訊事件。已降旨令沿途各督撫截拏。并令閱鶚元於該犯等原籍查拏解京矣。于時和等釋回之後。聞其於九月內尚在西安。或此時仍在該省。及在中途逗留。俱未可定。著再行傳諭已延三。及沿途各督撫飭屬嚴密訪察。如遇該犯到境。即行截留。委員迅速解京。倘于時和已回江蘇。即著閱鶚元於該犯原籍查拏。並根究高姓一犯蹤跡。一併拏獲。遞委委員迅速解京。以備審訊。毋得遲延。又諭據柴大紀奏。縣城斷糧已久。

花生地。瓜俱盡。現取油杓舂米。與蕉根同煮作食。兵民藉以充腹。是縣城兵民口食竟似乏絕。前據徐嗣曾奏。諸羅脅從之賊貪得錢文。私將米糧賣給百姓。而近縣莊民懼賊不敢明助。聞用袋裝米埋於空曠處。遺字與營中。令其自行往取。今李侍堯又奏。莊民貪利。乘夜運米入諸羅城。糶賣米價較前月稍減。若果如此。則縣城米糧似尚有接濟。未必如柴大紀所奏。竟至匱乏。而柴大紀所稱將油杓作食。或過甚其詞。亦未可定。然朕但憐其固守。並不以此怪彼也。著福康安到彼密行留心察訪。柴大紀力捍圍城。已經數月。激勵兵民竭力固守。實為勤苦出力。即使李侍堯。徐嗣曾所奏屬實。亦不過零星販助。為數自屬有限。兵民豈能果腹。不必因柴大紀所言過甚。稍露端倪。使之疑懼。持朕向來辦事不肯顛預。欲求明白近理。是以諭福康安查奏明晰。以釋疑耳。福康安一面統兵援應。縣

城一面即將鹿仔港後路所存米糧隨同大兵之後接續運送入城俾城中軍勢既振兵民口食有資或竟資糧於賊則更美善並著李侍堯將內地糧米迅速陸續運送鹿仔港軍營俾得源源接濟不致缺誤○己丑諭據保泰奏拏獲盜馬賊犯審訊明確請將首犯薩木坦立絞從犯旺扎勒擬絞入於明年秋審緩決案內等語所奏謬甚喀爾喀等俱係舊屬原與內扎薩克一體但旺扎勒係盜扎哈沁之馬不得仍照喀爾喀等互相盜馬之例辦理如有偷盜土爾扈特等部落馬匹牲畜或至俄羅斯界內盜馬亦豈可拘泥內扎薩克之例辦理耶旺扎勒雖係從犯不至立絞亦當擬絞入於明年秋審情實著飭保泰遵行其該旗署理盟長事務之副盟長索諾穆多爾濟遇有此等竊盜即能上緊拏獲正犯尚屬奮勉著加恩於該處存貯緞匹內賞給大緞一匹以示鼓勵○閩浙總督李侍堯

奏遵查閩省各府縣及海口俱係崇祀天妃廟而廈門海口尤昭靈應自宜量加修葺恭請
御書扁額以昭
聖敬而迓
神庥得旨覽
御書福建興化府
天后宮扁曰翊靈綏佑廈門
天后宮扁曰恬瀾昭貺○旌表守正被戕甘肅華蘭縣民良國運妻梁氏庚寅
上幸瀛臺○諭軍機大臣等前據李世傑李泰翰奏請於三溝開墾下添建西隄一事朕即以該處從前本無隄岸凡遇水漲年分民田廬舍亦俱保護無虞且一經添建隄工每年即須有歲修等事尤易啟工員冒濫支銷之漸似可無庸添建是以特諭阿桂前往查勘今據阿桂勘明具奏亦以該處若添建西隄橫加攔截盛漲時必致湖水蓄高口愈窄則

力愈猛。西隄一有疎虞。東隄亦復難保。恐潰決尚不止。此應將創建西隄之處。竟行停止等語。可見添築西隄。實屬無庸辦理之事。看來竟係李奉翰輕聽屬員之言。率行陳奏。為屬員冒銷地步。從來辦理河工事務。雖情形難以懸揣。但事理之當否。自有一定。原屬顯而易見。今李世傑等所請建隄之處。一面臨湖。一面係屬運河。若於該處建隄。是在水中施工。豈能經久穩固。即如高家堰海塘等處。興修工段。皆係就該處隄岸施工。建築自可久資捍衛。今於水中輕議建隄。豈非有名無實。況該處向無隄岸。日久相安。並未聞有創議添築者。李世傑等乃欲為此無益之舉。殊屬非是。俟李奉翰到京日。再行詢問外。至李世傑歷任督撫有年。於此等事務。豈竟不能見及。亦隨同率奏。殊屬疎忽。前因李世傑在四川總督任內。辦理地方事務。尚能妥協。是以調任兩江。乃伊自到任後。並未見實力整頓。遇事每有錯誤。前於查辦硝磺一事。既輕聽人言。巧詞支飾。又曾奏江南各屬虧空。於一二年內可盡行補足。今皆完否。亦未行奏聞。今於添建隄工。又不權衡事理。被工員慫恿。率為此奏。是其辦事。竟不如前。現因川省地方。亦屬緊要。李世傑在彼有年。諳悉該處情形。是以將伊調往。以期駕輕就熟。該省番地新疆。及西藏各事宜。最關緊要。務須悉心經理。妥協以副委任。況李世傑受恩深重。年逾七旬。正應及時勉力。自効。倘以四川省分視兩江較簡。今將伊調任。遂心存懈怠。不肯實心任事。於地方諸務。又如在兩江之因循錯誤。朕必重治其罪。至書麟現已擢用兩江總督。地方河務。皆伊專責。尤應隨事實心辦理。效法伊叔祖高斌。及伊父高晉。以期不墜家聲。承受恩眷。不可稍存自滿。又復遇事顛預。方為不負任使。然李世傑李奉翰。非竟不諳河務之人。乃創議於湖中添築長隄。或係

伊等強作解事。欲藉此為名。以便將來懇請南巡。親臨閱視。此則所見尤謬。從前康熙年間。該省督撫曾欲於高家壩內添築一隄。以為重門保障。奏請

聖祖臨視。

駕幸江南。閱看議建之隄。辦理錯謬。即降旨駁飭。并將該督撫等治罪。今伊等不可踵其故轍。復為此舉。况朕臨御以來。業經六巡江浙。省方問俗於民生吏治。俱已洞晰無遺。自可

無庸復行親蒞。該督等尤宜仰體朕意。不必妄存臆度之見。以為取巧地步也。將此傳諭李世傑書麟。并諭阿桂知之。○辛卯。諭軍機大臣等。據劉義奏。伊犁釋回之遣犯于時和。已於十一月二十六日。在保定府盤獲。當即委員解京。並訊據于時和供稱。前在陝西省城。遇見遣犯高三。亦從伊犁回來。高三係常州府人。要往山東濟寧州搭糧船回南等語。遣犯高三。係現應審訊之犯。既據于時和供

該犯由山東附搭糧船。回至原籍常州之語。著傳諭書麟。飛飭濟寧一帶地方嚴密查拏。並著毓奇。於回空各幫內。逐一挨查。有無高三搭船回南。即速嚴拏。務獲解京。如高三業已回籍。著再傳諭閔鶚元。即飭常州府屬嚴行查緝。一經訪獲。呈即派委妥員。迅速解京。歸案審辦。該督撫等務須嚴飭該解員沿途小心管押。毋致稍有疎虞。○壬辰。

上幸瀛臺。○諭據孫士毅奏。接據碣石鎮總兵

唐述先呈報。

壬辰

本年十一月初四日。有閩省兵船一隻。被風飄泊來粵。訊係福建水師提標撥兵赴臺灣剿匪。於十月二十五日。在洋遭風。兵丁黃國生一名。落水身死。翁知禮鄭連生二名。被舵打傷。其軍裝器械俱無損失。業經委員護送赴閩等語。兵丁赴臺灣剿匪。在洋遭風。落水身死。並被舵打傷。殊堪憫惻。所有淹斃兵丁黃國生一名。著照陣亡例議卹。其被舵打傷翁知禮鄭連生二名。亦著照例

賞給。又諭曰。孫士毅等奏。據洋商潘文嚴等呈稱。現在臺灣。勦捕逆匪。粵省招募新兵。巡防海口。商船往來。藉此兵威。得免驚擾。該商等情。願捐銀三十萬兩。以充軍需。又據鹽商李念德等呈稱。粵省運鹽。多經洋面。今添兵巡防。鹽務益增嚴密。願備餉銀二十萬兩。用展蟻忱。各等語。該洋商鹽商等。請捐餉銀。係因添兵巡防海口。與伊等生計有益起見。自應俯准所請。以遂其報効之誠。但各商等於地方公務踴躍捐輸。尚屬急公。並著該督等查明。咨送吏部。照例議敘。以示獎勵。諭軍機大臣等。直隸永定河隄工。朕於庚午。乙亥年間。曾經親臨閱視。明春巡幸天津。亦當順道經臨。但該處隄岸工程。逐年以來。是否穩固之處。著劉戡詳悉查明具奏。並將該處隄工情形。開具畧節。繪圖呈覽。所有庚午。乙亥御製詩。並著鈔寄閱看。尋奏。永定河工。上自石景山。下至沙家淀。歷年遵例修防。連慶

安瀾。隄工實為穩固。謹繪圖貼說。以進報聞。癸巳。戶部等部議。覆湖北巡撫姜晟奏。稱定例。尾欠額徵南糧。照地丁錢糧例題叅。查南糧關係兵食。未便照一年限滿例辦理。請立限三月。應如所請。行令各該督撫。如有次年奏銷。尚未交倉掣收。即照湖北奏定例。分別議處。載入律例。從之。旌表守正被戕湖南澁浦縣民某人妻瞿氏。是月。直隸總督劉戡奏。保定省城得雪情形。得旨。欣慰覽之。京師覺欠些。亦自佳。又奏。初三日得雪四寸。後二十四日。又得雪三寸。得旨。京師亦如之。慶慰之餘。益深敬謹。兩江總督李世傑奏。會同撫臣閔鶚元。將川省米石。分為九運。委員管押。由上海赴閩。並同浙江撫臣琅玕。督屬幫雇船隻。不致有誤。得旨。好。爾等皆勉力可嘉。又奏。恭謝調補四川總督。恩得旨。汝此任。不滿朕意處頗多。改之慎之。福建學政陸錫熊。奏歲試各府州縣情形。得旨。學政之

事自汝優為四庫全書之誤汝不能辭其責
即代人受過亦汝未查出之咎也

實錄卷之百三

高

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十三

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十四

監修總裁官經筵講官太子太傅文淵閣大學士文淵閣領閣事稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十二年丁未十二月甲午朔

上 詣

大高殿行禮○幸瀛臺○乙未諭據吏部奏降
調祭酒韋謙恒係由議敘陞授之員若以五
品京堂降補未免尚優請降等以六品中允
等官補用一摺已依議行矣此等辦書人員
從前倖邀優敘今查出錯誤分別降調自屬
咎所應得但職分較大者降調後尚得降補
而職分較小之翰詹等官一經降調無官可
補遂至廢棄終身未足以昭平允所有此案

辦書錯誤降調之翰林等官內。主燕緒准其捐復員外郎。吳裕德。許煥。彭元琬。准其捐復中書。仍准辦書處行走。俾得及時自効。以示棄瑕甄錄至意。○又諭。本日召見彭元瑞。據奏。近來科場。有傳卷聯號。及彼此換卷。謄錄對讀。私改文字等弊。鄉會兩試。關係掄才大典。理應肅清弊竇。遵拔真才。經朕屢頒諭旨。加意整飭。近年以來。雖風聞科場諸弊。未能盡絕。而作奸犯科者。尚未見有敗露之案。但自明歲戊申以後。鄉會兩試。正科恩科。連年疊舉。若科場條例。日久玩生。致不肖之徒。翫法舞弊。夤緣鑽刺。僥倖弋獲。使白腹者。濫竊科名。而懷才者。無由登進。非朕旁求俊乂。鑑拔真才之意。不可不嚴申禁例。豫絕弊端。著交大學士九卿。將彭元瑞所奏各弊。及此外尚有何項弊竇。應如何杜漸防微。設法釐剔之處。悉心妥議。具奏。務使功令申嚴。弊端禁絕。以副朕覈實取才之至意。○諭軍機大臣

等。據巴延三奏。特叅衰老有病之漢陰通判鄧瑛。勒令休致一摺。措詞殊為失當。鄧瑛係因衰老患病。不能辦理地方事務。此外並無別項劣蹟。通判又非正印官。已延三祇須奏明。將該員勒令休致。此等丞倖微員。亦不值用。特叅字樣。該撫於地方公務。不能實力整頓。而於此等事件。輒小題大做。欲以見其風厲。殊屬無謂。巴延三著傳旨申飭。○丙申。上幸瀛臺。○諭。戶部議駁徵瑞奏。請將淮南引鹽。戊申綱額課分。作十年帶完。並將丁未綱奏銷。展至次年五月造報一摺。所駁甚是。兩淮引鹽課項。例應按年奏報。以清年款。從前全德在兩淮鹽政任內。曾請將乙巳綱奏銷展限半年。原因湖廣江西等省。偶被偏災。引鹽行銷。不無壅滯。其事尚屬有因。是以加恩允准。且所請展限。不過半年。不久可復歸原限。至近年以來。兩淮及附近行銷之引鹽。湖廣江西等省。雨澤調勻。收成豐稔。並非災歉

滯銷者可比。徵瑞何得藉口。歷年有未銷積引。復請提引。展限至十年之久。徵瑞前在長蘆鹽政任內。辦事尚屬細緻認真。是以將伊調任兩淮。乃徵瑞自到任後。辦理諸務。漸不如前。春間於查辦硝磺一案。並不親身速往。一味養尊處優。意存自滿。今於奏請提引展限一事。又復有意沽名。為取悅商人之舉。豈可復勝兩淮繁劇之任。現據李奉翰奏。淮關監督福海業經病故。所有淮關監督。即著徵瑞調補。其兩淮鹽政。仍著全德去。全德著速即來京。至徵瑞所奏。歷年有未銷積引。其應如何籌酌調劑之處。俟全德到京請訓時。再行交令到任妥辦。○又諭。據蘭第錫等奏。回空漕船。俱於十一月中旬。陸續催過濟寧南下。其在後之台州等九幫。在陽穀東阿等處地方。因連日北風時作。冰雪凍阻。不能前進。請俟明年正月開壩時。儘數催行。一面飛咨浙江撫臣。各備撥船趕兌漕糧。沿途迎受。仍

可無誤新漕等語。浙省台州九幫回空漕船。既經凍阻。不能如期趲赴水次。受兌新漕。若令將明歲應兌漕糧。由浙省用撥船趕兌。迎赴沿途裝載。挽運仍不免往返之勞。前此因臺灣逆匪滋事。閩省米糧短缺。曾諭令江浙湖廣江西四川等省。撥運米石百餘萬。現今源源運到。該省糧石已為充裕。此時大功將次告竣。固無需再行接濟軍糈。但交春後。即屆青黃不接之時。自不妨寬為籌備。所有浙省台州九幫。明年應兌漕糧。竟無庸撥船運送來京。著琅玕將此項新漕。於徵收齊全後。即由海道運往閩省。交李侍堯徐嗣曾收貯。遇應行平糶時。即可動用。即日臺灣逆匪蕩平。該處產米。自可照舊運入內地。復得此項漕糧接濟。閩省儲積充盈。軍民口食所需。倍當寬裕。更為一舉兩得。該部遵諭速行。○諭軍機大臣等。據舒常等覆奏。察看臧榮青堪勝道員一摺。臧榮青現因安徽太湖縣民人

指告該地方官藉差派累刑斃人命一案已降旨將臧榮青解任解赴清江交阿桂質訊如果屬實該員自有應得之罪倘訊屬虛誣再留原任於舒常等所奏兩不相涉也將此諭令知之丁酉刑部議請定私竊農田蓄水之例查民田藉水源為養凡私築溝塘蓄水灌田原以備不時之需被人竊取較竊財物尤為切膚各省辦理此等竊水起釁毆斃人命之案向係照闖殺本罪定擬並未明立專條請嗣後凡竊鄰塘蓄水以灌己田者按照所灌田禾畝數照侵占他人田一畝以下例每五畝加一等罪有拒捕者依罪人拒捕科斷有被應捕之人追捕殺傷者依擅殺傷罪人問擬載入律例從之○豁除江蘇上海縣建塘占廢地三頃二十八畝有奇額賦○戊戌諭前經定擬公主門上官員額數固倫公主門上八員和碩公主門上六員但思公主門上出入前引隨行在在需人不敷輪派

著加恩固倫公主添給護軍校等官各四員和碩公主添給護軍校等官各二員○諭軍機大臣等據書麟奏接奉諭旨陞補兩江總督但查總督統轄三省事務繁重自揣材力斷難勝任懇恩另行簡員補放等語已於摺內批示矣書麟在巡撫中資格本淺因兩江總督一時不得其人其叔祖伊父俱久任江南書麟自簡任安徽巡撫以來辦理地方災賑幫辦河務俱極奮勉是以將伊擢用而李世傑前任四川總督有年於該處地方較為熟悉是以仍調四川總督以資駕輕就熟之益書麟現在清江即著阿桂諭知書麟伊向來辦事頗屬謹飭有餘現今擢授兩江總督管轄三省兼理河務責任綦重尤宜經理妥協實力整頓書麟不可惟知斤斤自守務須擴充見識開展才具庶地方事務料理裕如以期不隕家聲副朕委任之意將此傳諭阿桂并諭書麟知之○又諭據阿桂奏秉公覈

議奎林一摺。海祿所叅奎林各款。以奎林酒醉肆行。尚屬事之所有。至受賄入己一節。稍有疑似。奎林果係婪贓入己。海祿業經將奎林叅劾。豈有不乘勢刻查。以實其前奏。今許久未見續叅。看來自屬疑似。但奎林究屬性躁。醉後肆行。毀棄佛像。并索取罪人銀兩。修工並未具奏。此即伊之罪也。伊犁係新疆總匯。且通外藩部落。凡蒙古部落敬重佛法。如此性情。豈可復任將軍。倘奎林尚無婪贓入己等弊。當從寬以家法示懲。作為藍翎侍衛。令其効力贖罪。並非尊重佛教。將伊辦理過甚也。著傳諭阿桂知之。欽此。

孝惠章皇后忌辰遣官祭

孝東陵。諭舊制坤寧宮每日祀神祭肉。理應潔淨熟暖。給散秩大臣及侍衛等分食。乃近來該首領太監等。每將整塊好肉。私行偷用。以冷肉及瘦瘠殘剩皮骨。分給充數。以致散秩大臣侍衛等。進內食肉者漸少。

滿洲舊制。祭祀敬

神祭肉。晚間背燈者。例交膳房散給各處。其早間所供者。例不准出殿門。原承不留神惠之意。乃風俗不古。散秩大臣侍衛等。或竟不以此為榮。反以為辱。固屬非是。但太監等私藏好肉。以平常之肉給食。尤不可不嚴行查禁。嗣後祀

神祭肉。著派總管太監劉成專管。每日喫肉之時。仍著派御前侍衛一員。乾清門侍衛二員。同喫肉之侍衛等。進宮一體分食。並徧加查看。如有仍前弊端。即據實具奏。務將總管太監。全行治罪。外其派出專管之總管太監。劉成。加倍治罪。如劉成遇有疾病等事。即著該總管太監等。奏請另派。仍著總管內務府大臣。於宮廷內外。隨時稽查。倘有私行偷出售賣者。即行嚴拏究辦。再膳房辦給大臣阿哥師傳侍衛等項官飯。近來亦多偷減。平常有名無實。並著該管大臣一體查察。毋得仍前

草率偷減。倘經查出。一併從重治罪。○舉行本年八旗軍政。卓異官九十三員。罷軟官二員。年老官十六員。有疾官十五員。才力不及官二員。分別議叙處分如例。○庚子。諭。喀刺沁扎薩克多羅杜陵郡王。著滿珠巴咱爾承襲。並賞戴三眼花翎。在御前行走。○諭軍機大臣等。據徵瑞奏。請陞見一摺。前已有旨。將徵瑞調任淮關監督。該處現在正值米豆船隻絡繹販運之際。需人經理。徵瑞此時且不

必來京。著將鹽政印務。交運使倉聖裔暫行護理。即前赴淮關新任。將該關應辦事宜。料理妥協。後再行來京。陞見。○辛丑。

上幸瀛臺。○壬寅。諭。嗣後滿漢科道應陞缺出。該部開列具題。及帶領引見時。著將各科道有無條奏。其所奏事件。部議或准或駁。並奉特旨允准。或當經駁飭之處。均於各科道名下。及綠頭戳上註明。以便較其優劣。著為令。○諭軍機大臣曰。穆騰額奏。明春巡幸天津。

時。豫備御舟。及阿哥坐船。開單進呈。一摺。明春巡幸天津。阿哥等並不隨往。何必豫備船隻。著傳諭該鹽政。祇須將御舟等項船隻。照例妥為豫備。所有阿哥等應坐船隻。均毋庸備辦。○賑卹甘肅皋蘭金縣。河州。狄道。靖遠。沙泥州。判。安定。會寧。八州廳縣。本年被旱災民。○癸卯。諭。據都爾嘉特成額等。照例年終彙奏各該管處。並無私造烏鎗。亦無隱匿一摺。所繕造字。竟訛為鑄。如係鎔鑄。礮子。應用鑄字。若烏鎗。只可用造字。何以用鑄字。都爾嘉特成額。身為管轄兵丁之將軍。副都統。不但。不曉滿文。且兵器如何造作。全然不知。都爾嘉特成額。著飭行。○甲辰。諭。曰。寧夏將軍積福。年力衰邁。著留京。所遺員缺。著旺沁班巴爾補授。達明阿。調補寧夏副都統。所遺鑲黃旗蒙古副都統員缺。著富昌補授。令其協同鄂勒哲特穆爾額爾克巴。拜辦理事務。○諭軍機大臣等。據工部奏。覈覆李奉翰等題。

報黃運兩河各處漫工堵築。用過工料錢糧。內司家莊等處漫工。例外多用銀七萬七千二十一兩零。並未豫行奏明。率援照該省從前張家馬路之案。於冊內聲明開報。殊屬不合。請著落該督等。及承辦各員名下。將例外多用銀兩。照數賠繳。並稱豫省節年辦理漫工。有例外需用。并加價等項銀兩。俱經阿桂等先行奏明辦理。請嗣後各項工程所用料物價值。如有必須逾例加用之處。務須先行專摺奏明。以杜浮冒等語。前此豫省堵築漫口。原因工程較大。需用物料甚多。為期緊急。且因該省連歲荒歉。經阿桂等據實奏明。於例價外復有加價。是以格外加恩准行。而所加之價。比照例價多至數倍。他省原不援以為例。此次南河司家莊等工。本非若豫省堵築漫口大工可比。即漫口工程水勢湍迅。需用物料緊急。較之尋常歲修搶修。似未免稍有加增。亦當定有限制。今該部以豫省所用

例外加價。係豫行專摺奏明。而司家莊等工並未將應行加價之處。先行陳奏。不准報銷。雖若慎重錢糧起見。但將來該省如遇此等工程。若因此奏。輒援豫省之例。豫行奏明。亦以藉口物料昂貴。請於例外加價。該部於豫省既辦有成例。則於南河工程。勢不能不准其報銷。是以此次司家莊等工。例外加價銀兩。雖令其照數賠繳。而將來轉得援照豫省之例。多加價值。豫行奏明。以為加倍浮銷地步。是名為嚴之實。所以寬之。況此案自乾隆十八年以來。成案可循。似非創見。該部所奏殊覺止知其一。未知其二。著將工部原摺發交阿桂閱看。即將所駁情節。詳細查明。有無浮冒等弊。據實具奏。再行交部覈辦。如查無弊端。嗣後南河如有堵築工程。所用物料。設有加價。總當以歷年辦過成案。覈定數目為準。不得再有加增。以杜浮冒。亦屬可行。將此諭令知之。○又諭。據明興奏。收獲鹽池數目

及配運事宜一摺。內稱河東大小鹽池。今歲春間。開工治畦。起至秋後。停工止。共收刮鹽二千一百六十六引。不敷鹽三千三十三名五十二引。查明實係五六七等月。陰雨較多所致。請照例在於積年存餘陳鹽內撥補等語。晉省鹽務。向來所產。固不如別省之旺盛。但前經農起。實力整頓。歷年收獲鹽觔。有盈無絀。何以明興到任後。本年收刮鹽觔。即致短少。至三千餘名之多。幸而農起辦理妥協。積年收獲豐盈。存餘陳鹽。尚有一萬三百餘名。足敷撥補。設使皆如該署撫所辦。則此項鹽觔。日形短缺。遞年積壓。伊於何底。可見明興實屬無能已極。著傳旨嚴行申飭。嗣後務須實力妥辦。俾鹽務日有起色。不致短缺。方為妥善。若再仍前怠玩。藉口年歲歉收。以為委卸地步。朕必重治其罪。恐明興不能當其咎也。又諭吏部議覆山東巡撫長麟奏。才不勝任之兗州府知府李載陽。應令送部引

見。或以府佐改補。或勒令休致。恭候欽定。並請將原保之書麟。照例降級抵銷。一摺。已依議行矣。督撫大吏保舉屬員。自應擇其才具出衆者。照例保奏。以備簡擢。若察其才具不過中平。將來陞用後。不能勝任。即不應遽行保奏。乃書麟於本年保舉道府如錢金殿。臧榮青二員。經朕召見時。看其才具均屬中平。又昨據貴州省奏請。勒令休致知府王惟一。係安徽同知任內推陞。由該撫出具考語。咨部陞用。今李載陽一員。又係書麟因其挈獲盜犯。保奏送部引見。以致陞後才不勝任。經長麟據實參奏。可見該撫於保舉屬員。竟不留心。或無知人之明。或有瞻徇之處。著傳旨嚴行申飭。至書麟現已擢用兩江總督。統轄三省。更非巡撫可比。務須實力整飭。遇有保薦人員。尤宜秉公察看。開擴識見。毋使庸才得以濫竽。方不負朕委任。若仍前濫行保奏。使才不勝任之員。倖邀陞用。以致貽誤地方。

則是書麟自取罪戾。一經查出。恐不能當其咎也。又諭。向來各省布政使。於年終將銀號有無侵挪情弊。具奏一次。此事原因從前直隸省究出銀鋪何彪年。承領傾換銀兩。私行挪用。是以傳諭各藩司留心防範。於年底奏聞。以專責成。今各省俱經奏到。而直隸轉未奏及。此等雖屬印板文字。但係該藩司分內應辦之事。何以遲延若此。將此傳諭知之。又諭曰。李世傑等奏。據發往伊犁充當苦

差之叅革知府施光輅。呈請捐罰銀一萬兩贖罪。自備資斧。前赴閩省効力一摺。所奏不可行。施光輅前在知府任內。督辦運閩米石。關係軍糈。乃任意耽延。非尋常疎玩可比。豈可准其捐贖。現在李世傑已由安徽前赴四川新任。著傳諭閩省。即派員押令施光輅即日前往伊犁。毋得任其逗留。以示懲儆。○又諭。本日據孫永清奏到二摺一單。裝貯一封。朕次第披閱。其第一摺係請將知州陳章

陞署百色同知。第二摺係照例奏明動支耗羨銀兩。又一件。則係陳章叅罰清單。敘次參差。殊屬淆混。該撫所奏陞署烟瘴原缺。自應將叅罰清單。附入一封。方合體式。何以又將動支耗羨之摺。攪入其中。前後舛錯。若此。孫永清向在軍機司員上行走。豈於此陳奏事件。亦不諳體制耶。孫永清著傳諭申飭。已。

上御乾清門聽政。○諭。據尚安奏。宜禾奇台二縣內。偏被霜災。請將各戶應徵本年糧食。及借籽種等項。緩徵等語。著加恩將宜禾奇台二縣內被災各戶。應徵本年正耗草折糧石。並所借籽種口糧。帶徵糧石。及房馬價銀等項。一併緩至明年秋後徵收。其借給被災四分以上戶民接濟口糧。著分年帶徵還項。以紓民力。尚安務須實心經理。以副朕加惠災黎至意。該部即遵諭行。○又諭。戶部議駁毓奇奏。台州等幫守凍漕船。每船請借銀五十

兩之處。因此項新漕。明歲徵收齊全後。即由海道運往閩省。該幫無受兌之糧。毋庸趕緊南下。一切費用節省。是以議駁。因屬照例辦理。第念該幫守凍北河。回次尚需時日。且明歲既經停運。月糧減半支給。丁力恐不無拮据。著加恩每船借給銀二十兩。以示體卹。○大學士九卿議覆順天府尹吳省欽奏。定例軍流子弟入籍考試。並未立有年限。請嗣後除配所生子。准作軍籍。其生於本籍者。發配隨行。十年後入籍考試。應如所奏。併請嗣後如已生親子。又立有繼子者。止准親子隨配。只有繼子者。准其生有親子後。繼子歸還。該督撫備案稽查。以杜跨考之弊。從之。○予出師臺灣陣亡原任浙江溫州鎮總兵賁林贈卹如例。入祀昭忠祠。○丙午諭據閩鄂元奏本年揚關由開徵收稅課。比較上三屆共短少盈餘銀六萬五千六百八十餘兩。請著落管關之員。分別賠補等語。揚關由開係地方

官管理。並無別樣差使。此項盈餘比較不敷。自應著落分賠。以清帑課。但念該關由豫東二省歛收之後。商販無多。又兼上年湖河漫溢。貨船稀少。以致盈餘短絀。若令全行賠補。為數較多。所有揚關由開共短少盈餘銀六萬五千六百八十餘兩。著該管道員各按經徵月日分賠一半。其餘一半著加恩免其賠繳。○兩廣總督孫士毅奏。數日以來。於各海口探聞福康安殺散賊匪之後。分兵前進。直勦大里杙。現在賊眾驚惶。勢已解散。諭軍機大臣等。孫士毅所奏情形。係得商販傳聞。自屬確實。想福康安奏到之摺。竟因風阻滯。未能速達。看來福康安於抵縣城後。會兵進剿。聲勢壯盛。賊匪自必紛紛潰散。返顧巢穴。而舒亮又與徐鼎士於大甲一路進兵夾攻。大里杙之背。此時賊勢窮蹙。自必聚集一處。希圖保護巢穴。今大兵四面環攻。正可聚而殲擒。惟大里杙係屬賊巢。聞賊人負隅恃險。竭

力防護。築有城堡。剗挖溝濠。圍以荊竹。以為抵死抗拒之計。此時福康安統兵進攻。若能即時摧破。無須用礮轟擊。固屬甚善。倘察看情形。該處亦與金川之勒烏圍。噶喇依相仿。官兵攻擣。或需時日。不若用礮轟摧。更為得力。或將軍營所帶小礮。施放攻打。可期一舉摧破賊巢。迅速集事。目下已屆年節。正迎禧集社之時。福康安等。務須倍加奮勉。剋期蒞事。丁未諭曰。長麟奏訪聞鉅野汶上等處。

有巨窩糾竊之事。隨密委壽張縣知縣王穀等。會同遊擊王文雄等。前往查拏。旋即緝獲巨窩捐職運判田玉堂並夥賊王位三等十一名。又於包家莊等處。拏獲積窩包五并賊犯包四等十五名。分別問擬絞決。發遣一摺。已交三法司覈擬速奏矣。長麟到山東巡撫之任未久。即訪得鉅野汶上等處有窩棍包庇肆竊擾害地方。密委妥幹員弁。實力查拏。即將田玉堂包五等。拘拏到案。訊出歷年疊

竊多案。獲犯三十六名。足見該撫於地方緝捕事務。實心整頓。戢匪安良。殊屬認真。長麟著交部議敘。所有拏獲竊匪之地方文武員弁。著一併交部議敘。至明興前在山東巡撫任內有年。於地方此等巨窩積棍肆竊累疊之案。不能嚴飭所屬。隨時實力查拏。所司何事。可見諸事廢弛。無能已極。著嚴行申飭。併交部議處。仍令該撫將此等案犯何以不能訪拏之處。明白回奏。○又諭曰。福康安等奏

十一月初六日帶兵援赴嘉義縣。初七日行抵元長莊。又於普吉保所帶官兵內。挑新舊兵丁義民。分為五隊。福康安與海蘭察鄂輝普爾普穆克登阿。普吉保額勒登保。及巴圖魯侍衛章京等。分隊帶領。凡遇賊莊。即行勦洗。互為援應。初八日黎明。行抵崙仔頂地方。賊匪多人。潛於竹園內。施放鎗礮。一齊擁出。我兵屹立不動。鎗箭齊發。福康安海蘭察等帶同巴圖魯侍衛。衝入賊中。賊匪抵敵不住。

退入竹林。兩傍竹園蔗田內。及崙仔尾等處。各莊賊匪。或數百人。或千餘人。前來抗拒。福康安豫為布置。調令鄂輝。穆克登阿。帶領屯練降番。扼住右首東莊溪橋。普爾普侍衛春寧。叅將吳宗茂等。帶兵堵剿左首各莊賊衆。並遣義民分頭焚砍竹園蔗田。及各處草寮。當將崙仔頂莊。崙仔尾莊打通。一面令海蘭察。帶巴圖魯侍衛總兵普吉保。及奮勇官兵。長驅先進。福康安將各處賊莊。盡力攻剿。無不克捷。進至牛稠山地方。賊匪阻溪自固。在山梁屯扎。見官兵將至。四面圍裹。不下萬餘。海蘭察帶同巴圖魯侍衛官兵。直越溪河。衝過賊隊。我兵無不一以當百。搶上山梁。賊匪紛紛逃竄。即於酉刻入城。現在督率官兵。由斗六門進攻大里杙。賊巢擒拏賊匪首目等語。逆匪林爽文。糾集賊黨。滋擾嘉義縣城。攻圍數月。經常青屢次派兵往援。俱被賊匪阻截。柴大紀在城內。率領官兵義民。悉力保護。

若援兵再遲十日。縣城即難固守。福康安海蘭察能督率將弁官兵。鼓勇直進。並不俟貴州。湖南續調兵丁到齊。即將現有兵民分為五隊。派鄂輝等分隊帶領。沿途剿殺賊匪。俱能奮勇直進。不避險阻。越過溪河。將各處村莊屯聚之賊匪。痛加殲殺。直抵縣城。數月之圍。應手而解。城內數萬生靈。均獲更生之慶。並將賊人存貯糧米。運入縣城。軍糈民食。益資充裕。此皆福康安等調度有方。振作士氣。用能克敵致果。迅奏捷音。自應優加寵錫。福康安海蘭察俱係侯爵。著晉封公爵。各賞紅寶石帽頂。四團龍補褂。以示優異。其鄂輝舒亮普爾普等。及巴圖魯侍衛章京。並在事出力之鎮將弁員等。俱能率領兵民。鼓勇奏績。著查明咨部。一併從優議敘。諭軍機大臣等。據劉戡景奏報。銷已未完一摺。所有橋道河道城工。凡有關動用錢糧報銷各案。分開四單。其未經請銷者。統計共有七十五案。此

等報銷案件。原應隨時造報。迅速完案。方不至積壓遲延。直隸本年報銷案件。尚未造報者。至七十餘案之多。劉莪辦理地方。諸事廢弛。於此可見。又據奏十一月分糧價單內。於開寫各屬糧價數目之後。僅聲敘比較上月稍增稍減字樣。而於現在之價值。究竟或貴或賤。及價中價平之處。並不詳悉註明。實屬疎漏。該督於陳奏糧價單。亦未諳悉體例。耶劉莪著傳旨申飭。所有報銷未完案件。並著

該督嚴飭屬員。上緊趕辦。造報完案。毋得再有遲逾。致干咎戾。○又諭。現在審訊燕起。及與鄂斯瑞質對。除俯首認罪外。據稱伊母與弟鄂布拉三。鄂布拉塔。齊里克齊並家口多人。現在飢寒乞食。必至妄行搶奪。情愿寫書求色呼庫勒部落之比綽瑪克持書往喚來降。以贖重罪等語。但思燕起業已就擒。其餘已無能為。惟慮鄂布拉三等窘迫時。或肆行搶擄。衆布魯特等。平日既不加防範。臨時又

必須官兵追捕。邊防究屬不靖。且薩木薩克根株既未盡除。不免又有結夥滋事等患。不若將燕起等書。送鄂布拉三等。或并可乘便與薩木薩克。一同來降。亦未可定。是以將燕起暫行監禁。所有燕起鄂斯瑞書二封。寄交明亮塔琦等。並諭塔琦。將此書與色提巴爾第閱看後。令其出名照樣再寫一封。並前二封。即作塔琦等意。同交色呼庫勒之比綽瑪克持往。一面奏聞。一面辦理。以免遷延時日。

鄂布拉三見色提巴爾第之信。自必深信不疑。並將辦理如何情形。著迅速具奏。○又諭。曰。福康安等摺內。稱聞林爽文現遁往大埔林。或云至斗六門。與賊目李七會合等語。逆首林爽文。糾衆肆擾。狡詐百出。今見官軍勢盛。跟蹤追捕。自必急思逃竄。若林爽文回顧巢穴。逃入大里杙賊莊。則官兵四面環攻。正可盡數殲擒。其事轉易辦理。惟當防其竄入內山一路。至斗六門距海甚近。在在道路可

通若林爽文窮迫之際。或由海道潛逸。官兵追捕。不無稍需時日。福康安等務須留心防範。於進攻時。先將通海道路。豫行堵截。船隻皆令其遠岸。勿使乘間逃逸。總期將林爽文莊大田等。設法生擒。解京盡法處治。方快朕意耳。再前據李侍堯奏。賊目李七有歸順之意。又私賣糧米。接濟嘉義兵民。今林爽文欲逃往伊處。李七若能乘逆首窮蹙之時。設法擒獻。即係有功之人。不但可以免罪。必當格外加恩。賞給官職。倘不及時省悟。立功自贖。將來擒獲林爽文後。必至一同受戮。悔將無及。如此示以利害。密為開導。李七或竟將賊首擒獻。更為美事。但是否即係招諭之李七。著福康安訪查確實。並將如何辦理之處。即行具奏。再前因恒瑞。普吉保二人俱在中途觀望。節經降旨。令福康安查明參奏。總未據福康安奏及。今看伊二人情節。普吉保自鹿仔港進兵以後。雖未能直抵縣城。但究能收

復笨港。進抵元長莊。又自該處移營。距縣城不遠。特因兵力未敷。尚非有心延玩。而恒瑞率領多兵。駐劄鹽水港。一味株守。並無寸進。現在福康安已攻透賊圍。直達縣城。恒瑞不過乘勢帶兵到縣。因人成事。並非自能奮勇前進。是恒瑞之罪。較普吉保為重。著福康安秉公查覈。據實具奏。並將於恒瑞到後。隨同打仗。能否自知罪戾。奮勇出力。抑仍係隨眾出力。應遵前旨。令其回京之處。一併秉公據實具奏。福康安不可因係親戚。稍為瞻徇。○戊申。上御太和殿視朝。文武陞轉各官謝恩。○諭。據李侍堯等奏。臺灣府屬各廳縣本年應徵兵穀。及耗羨莊租雜稅等項。請分作四年帶徵等語。臺灣自勦捕逆匪以來。節經降旨。將乾隆五十二。三。兩年錢糧。並嘉義縣五十四年錢糧。全行蠲免矣。今此項應徵兵穀。及耗羨租稅。固應照例徵收。以備供支。但念該處經

賊匪滋擾後被難歸莊之民未遑耕種生理艱難若仍分年帶徵民力不無拮据所有臺灣各屬本年應徵兵穀十九萬九百餘石及耗羨莊租雜稅銀六萬九千餘兩粟一千八百餘石俱著加恩全行寬免以副朕惠愛被難邊黎有加無已至意該部即遵諭行○諭軍機大臣等據李世傑奏現因伊妻身故次子李華封例應丁憂回籍所有任所家務乏人料理請將胞姪現在湖南試用知縣李華

黼帶赴四川幫辦家務等語已於摺內批示矣○前據李侍堯奏漳州府知府李華國病故即係李世傑長子今伊妻又經身故自是該督命運偃蹇以致連喪妻子但李世傑現已年老雖遭此家庭多故亦不可過於傷悼著傳諭該督惟當保養精神勉辦地方事務為國家出力以副委任所有伊胞姪李華黼著照所請准其帶赴任所幫辦家務俟伊子李華封到川時再行給咨赴楚俾得專心辦公

以示體恤欽差協辦大學士陝甘總督辦理將軍事務福康安護軍統領叅贊海蘭察福州將軍恒瑞成都將軍鄂輝奏自諸羅圍解時賊匪逃入內山潛匿隨令海蘭察等沿山搜查賊匪遁入斗六門據守大兵進攻山徑難出惟有探明路徑方可長驅直入至恒瑞前次不敢輕進者恐鹽水港海口有失所關匪細自克復鹿仔草後招集義民五十餘莊以清後路原擬勦撫兼施連營前進無如

過於持重轉涉遲延尚非有心畏葸又蔡攀龍在諸羅西門外扎營並無自諸羅殺出之事臣面加詢問據稱因係損失多兵賊圍仍不能解惟有據實陳明懇請革職但觀其人尚奮勉可否酌留海壇鎮總兵原任查諸羅被圍數月終未失陷者實由衆民一心奮勇又畧得餉銀接濟方能保守與昔日希波軍營被圍絕餉景象迥不相同柴大紀人本詭詐甚染綠營習氣不可倚任是以仍使伊屯

駐諸羅將來事竣入都自難逃

聖明洞鑒。諭軍機大臣等。本日福康安奏稱賊匪經官兵屢次殲戮。窮蹙奔逃。若由海道竄逸。官兵乘船追捕。轉不免稍需時日。如果逃入內山。該處俱係生番居住。若番衆等畏其逼處。竟將賊首擒獻。固屬甚善。即或容其潛匿。不肯獻出。亦可趁官兵全盛之勢。直入內山。分兵搜捕。即將逆生番一併剿戮。亦非難事。福康安等務須迅速搜捕。將賊首設法生擒。勿令久匿稽誅為要。又據奏恒瑞帶兵援應途中。觀望各情節。以恒瑞過於持重。致涉遲延。總由不諳機宜。辦理不能得手。所論甚公。至蔡攀龍前此應援入城。雖未能帶兵出城。剿殺賊目。但伊屢次與賊打仗。奮勇出力。業已加恩擢用提督。其過尚可寬免。至所遺失兵丁。是否實係陣亡。抑係逃散。從賊之處。必當嚴切查究。若隨征兵丁。不顧主將臨陣逃散。此而不加以懲創。將來何以用兵。此

內從賊之兵。其罪更甚於從賊之民。福康安於查辦時。尤當嚴加區別。從重辦理。不可稍存姑息之見。又諭據福康安奏稱查明柴大紀。蔡攀龍各情節。請將普吉保調任臺灣鎮總兵等語。所奏固是。但柴大紀究能保守嘉義。數月間屢經剿殺賊匪。曾經加恩封為伯爵。賞戴雙眼花翎。即蔡攀龍亦因從前李侍堯稱其領兵攻解嘉義縣之圍。曾經授為提督。賞給巴圖魯名號。今當進兵之際。遽將

實錄卷一百四十五

三

伊二人更調。殊覺未便。著暫留令其駐守。彈壓官兵。并傳諭李侍堯。俟擒渠魁後。伊等任內。果有卑陋情弊。再行查明補參治罪。至從前降旨大功告竣。留蔡攀龍幫同常青辦理善後事宜。今閱福康安所奏。蔡攀龍既屬無能。彼時著即遣回。普吉保尚屬幹練。即著留彼處。隨同常青辦理善後事宜。吏部議准。阿克蘇辦事大臣福崧奏。阿克蘇地當孔道。又兼管賽里木城事務殷繁。請照和闐例。添

設經制筆帖式一員。公務實有裨益。從之。○
以故輔國將軍弘寧子永麻襲職。

實錄卷五十四

五

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十四

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十五

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事務處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次查慶桂
總裁官經筵講官太子太傅文華殿大學士文淵閣領閣事稽察欽奉 上諭事務處管理刑部主事孫
世襲騎都尉軍功加十九級隨帶加二級又加二級尋常加二級軍功紀錄五次
尋常紀錄十四次臣等謹將纂修官太子太保工部尚書紀錄六次臣等謹將纂修
纂修

纂修

乾隆五十二年丁未十二月己酉諭朕明春

實錄卷五十五

一

巡幸天津閱視河工擇於二月十八日啟鑾
所有應行事宜著各衙門照例豫備○又諭
曰臺灣賊匪滋擾嘉義縣城時普吉保恒瑞
先後帶兵前往援應俱未能奮勇殺散賊匪
直抵縣城均難辭咎但普吉保由鹿仔港進
兵收復笨港移駐元長莊並經屢次打仗殺
賊尚能自知奮勉所有臺灣鎮總兵員缺即
著普吉保調補以觀後效其所遺汀州鎮總
兵員缺著福康安於軍營出力副將各員內

揀選一員。奏明候朕簡放。至恒瑞在鹽水港一味株守。毫無寸進。實屬無能。難勝將軍之任。著即來京候旨。至福州將軍員缺。前曾有旨。欲將鄂輝調補。因現在保寧。已補授伊犁將軍。李世傑仍調補四川總督。該省地方緊要。且毗連西藏。統轄番夷。俱有應辦事件。李世傑係屬漢人。且年已老。恐辦理公務。精神不能周到。鄂輝在川有年。於該處事宜。較為熟諳。將來臺灣事竣後。應令仍回成都將軍原任。以資駕輕就熟。至常青勦捕臺灣逆匪。雖未能督率將弁。尅期奏績。但自駐守郡城以來。賊匪屢經攻擾。伊已年老。尚能臨陣殺賊。將郡城保護無虞。并節次派撥弁兵。援應嘉義。調度尚屬有方。雖不宜復任總督。但伊從前曾任福州將軍。熟悉該處情形。且以閩浙總督調補該處將軍。呼應較靈。於辦理一切善後事宜。更為得力。所有福州將軍員缺。即著常青補授。將來大功告成後。即留於臺

灣帶同普吉保辦理善後事宜。其湖廣總督員缺。即著舒常補授。所有工部尚書員缺。著福長安補授。又諭曰。廣州將軍存泰年已七十六歲。令其來京聽候另用。所遺員缺。著圖桑阿補授。涼州副都統員缺。著奇臣補授。諭軍機大臣曰。孫士毅自辦理調兵運餉諸務以來。俱能不分畛域。實心經理。甚屬可嘉。俟大功告竣後。賞給世職。著先賞戴雙眼花翎。以示優眷。至昨據福康安奏。崇大紀。崇攀龍。守城打仗情形。多不確實一節。朕因此事反復思之。竟至徹夜不能成寐。向來綠營將弁。冒功誑報。積習原所不免。但以天下之大。地方事務。在在需人任使。遇有軍務。勢不能祇仗滿洲官兵。竟置綠營於不用。此次臺灣逆匪滋事以來。該處領兵將弁。雖未能俱振作。有為。然就現在將領而論。崇大紀。崇攀龍二人。尚能奮勇出力。崇大紀駐守縣城。已經半載。經賊百計攻圍。時時窺伺。崇大紀能

督率兵民力為捍衛卒能保護無虞雖伊節次奏報斬獲首級奪取器械等事或間有虛詞詭報此亦綠營積習情事所有但伊困守圍城不辭勞瘁亦當畧其短而取其長柴犬紀設果如福康安所云詭譎取巧則當縣城被圍緊急之時朕曾降旨諭令柴大紀如力不能支不妨帶兵出城另圖進取柴大紀何難委城而出以為脫身之計即縣為賊所據百姓為賊所得亦得藉口遵旨而行朕亦難

治以棄城不守之罪乃柴大紀於奉到前旨後堅持定見竭力固守不忍將城內數萬生靈委之於賊是柴大紀尚知以國事為重朕閱其奏摺為之墮淚豈福康安目擊情形尚不心存憫惻轉事苛求不能以朕之心為心乎即如柴大紀前奏賊匪攻城時用大板木車中藏鎗礮分路攻犯被官兵礮擊碎枋車一節若果是虛詞現在福康安奏到進抵縣城追殺賊匪奪獲攻城大車二輛又於興化

店地方賊匪經官兵追趕大礮為鎗偏地遺棄俱為我兵所得等語可見柴大紀前奏賊匪大車架礮攻城之處實有其事並非虛詞之一證又柴大紀所奏縣城糧食匱乏地爪花生俱盡以油粃充食之語雖縣城被圍時義民等尚有捐助糧米零星接濟兵民未必遽至盡食油粃但當情形緊急之時各路援兵並未即時前進柴大紀目覩縣城糧食兼盡至以日食油粃為詞希冀援兵速到而普

吉保恒瑞兩路尚復觀望不進若再實有糧米則兩路之救援更緩此時縣城之存亡尚未可知又安怪柴大紀之遇甚其詞耶今幸福康安等統兵速進縣城圍解甫獲更生此等措語未實之處朕尚加之寬宥寧福康安不為之原諒耶至蔡攀龍現據福康安到彼查詢於援應柴大紀時進城後仍被賊截斷後路損失多兵未能破解賊圍亦並無自城內殺出打通道路之事但蔡攀龍屢次打仗

殺賊。曾經常青等保奏。頗為奮勇。伊帶兵赴援時。沿途遇賊接仗。督兵力戰。究能前抵縣城。協同固守。是蔡攀龍在領兵將弁中。尚為奮勉。朕已加恩擢授提督。福康安此時。亦可無庸過加責備。即云臺灣逆匪等。糾眾倡亂。由於地方文武。平日貪索擾累。以致激成事端。朕非不知。但該處百姓。休養生聚有年。即使地方官貪黷。敏怨。亦可據實上控。豈可公然叛逆。况官吏騷擾地方。剝削百姓。自係文職為多。至武職所轄。不過營伍兵丁。並不經管地方事務。縱使從中婪索。然較之地方文職所得。不過十之一二。豈得以此歸咎。蔡大紀。蔡攀龍二人。此次破賊解圍。官兵會合攻剿。固屬福康安。海蘭察督率巴圖魯侍衛章京等。奮勇力戰之功。該處綠營將弁。俱屬怯懦無用。但就該處帶兵之員而論。其中勇怯不齊。亦應絜長較短。有所區別。豈可一概抹殺。即將來平定後。馬能止留滿洲巴圖魯百

餘人駐守。將綠營將弁。概行撤回之理。看來柴大紀。蔡攀龍未免因俱係提督大員。且屢經恩旨褒嘉。或稍涉自滿。在福康安前。禮節或有不謹。致為福康安所憎。遂爾直揭其短。乎。况柴大紀。蔡攀龍俱現任提督。水陸將弁兵丁。皆所統轄。福康安即有不滿。伊二人之處。然其功究不可泯。亦應外示優容。若遽加之聲色。則所屬將弁兵丁。見統轄大員。全無顏面。未免心存輕視。竟至呼應不靈。從而解體。於事大有關係。即使伊二人實有綠營習氣。不可信任。福康安何妨俟大功告成。至京時。密為面奏。亦不為遲。何必於此時。遽以此形之奏牘耶。朕於柴大紀。蔡攀龍二人。並非先有成見。不過念其守城打仗。勤苦出力。曲加軫念。福康安非他人可比。尤需仰體朕心。畧短取長。方得公忠體國之道。况柴大紀已加恩封以伯爵。蔡攀龍業經超陞提督。福康安所奏各情形。並無確據。又豈可轉沒其功。

遽加以無名之罪。取總之柴大紀。蔡攀龍。功過自有定論。福康安此時總以坦懷相待。不稍露詞色。為是。封閉四川。西陽州大興。洪發。二硃鉛。厥從。總督保寧請也。以故三等男宗珠。克子舒敏。襲爵。予故奉恩輔國公博爾忠鄂祭葬如例。庚戌諭福建臺灣府孤懸海外。遠隔重洋。地方遼濶。民情刁悍。無藉奸徒。往往借端滋事。皆由地方官吏任意侵婪。累民斂怨。而督撫遇有臺灣道府廳縣缺出。又以該處地土豐饒。不問屬員能勝任與否。每用其私人。率請調補。俾得侵漁肥橐。所調各員。不以涉險為虞。轉以調美缺為喜。到任後利其津益。貪黷無厭。而於地方案件。惟知將就完結。希圖了事。以致奸民無所畏憚。始而作奸犯科。互相械鬪。甚至倡立會名。糾眾不法。遂爾釀成巨案。總因歷任督撫。闕冗廢弛。地方官吏竟不可問。從前歷任督撫。業經身故者。今不復追治其罪。此外如富勒

渾。富綱。雅德等。亦姑免其深究。但經此次大加懲創之後。海疆重地。不可不力為整頓。以期綏靖地方。向來三年一次出派巡臺御史。滿漢各一員。前往巡視。該御史職分較小。且由京派往。不能備悉該處情形。易為地方官欺朦。不過虛應故事。仍屬有名無實。嗣後著照四川巡查。促浸儻拉之例。令該督撫及水師陸路兩提督。每年輪值一人。前往臺灣。嚴行稽查。該處道府廳縣。本皆督撫所屬。其賢否自易知悉。如有執法營私。擾累小民之事。即可就近查明。據實奏。至營伍弁兵。係由內地換班。派往防守。為水陸兩提督素所管轄。其操防一切。孰勤孰惰。及有無擾累生事之處。尤易隨時查察。既足以資彈壓。又可以整飭吏治。戎行於海疆。實為有裨。再臺灣道府。向有缺出。俱由該督奏請調補。易啟夤緣瞻徇之弊。嗣後該處道府缺出。俱著請旨簡放。倘該督撫提督等。於奉有此旨後。仍前玩

弛並不實力整頓。又復虛應故事。或致地方有滋事之案。惟該督撫提督是問。至海洋雖風信靡常。而該督撫等前往巡視。原不必拘定時日。祇須視何月分風信平穩之時。配船前渡。亦不至於涉險也。所有請派巡查臺灣御史之例。竟行停止。著為令。又諭據李侍堯奏閩省本年溢額鹽課。及認辦額外課銀。請分年帶徵等語。福建自臺灣勦捕逆匪以來。辦理軍需。運送米餉。差務殷繁。行銷口岸。挽運維艱。以致鹽引滯銷。商力不無拮据。自係實在情形。所有該商等應完溢課銀七萬六千九百餘兩。及認辦額外課銀一萬二千四百餘兩。著加恩分作三年帶徵。以紓商力。又諭前經降旨直隸解到旗租銀兩。足數普賞八旗兵丁一月錢糧。即行普賞一次。現在直隸解到旗租。已足數賞資之用。著加恩普賞八旗兵丁一月錢糧。俾八旗兵丁生計益臻充裕。以示春祺錫慶。有加無已至意。該

部即遵諭行。又諭曰。韓鐸前任工部侍郎。且曾任河道總督。於工程事務。較為熟諳。茲因服闋來京。即著補授工部右侍郎。朱珪現出學差。所有禮部右侍郎員缺。即著劉躍雲署理。又諭。現在臺灣勦捕逆匪。大功指日告竣。一切善後事宜。需用較多。自當寬為豫備。以資接濟。著戶部於附近隣省。內再酌撥銀二百萬兩。令該督撫派員迅速解往閩省。交該督等存貯備用。○諭軍機大臣等。據畢沅奏該省提鎮等第考語一摺。內將考語及等第兩單。附入一封。殊覺混淆。向來各省提鎮。其能否整飭營伍之處。自應於年終秉公出具考語。開列清單。密為陳奏。至各省總兵。每屆五年分別等第之處。祇須咨部存案。以便覈辦。若既將該提鎮考語。列為一單。而又將其等第開單。附摺一併具奏。未免一事兩歧。著傳諭各省督撫。嗣後每年提鎮考語。仍照例於年終密行陳奏外。如屆五年。應行分

別等第之期。即將各該總兵等第。咨明該部存案。毋庸同附一摺。以致牽混也。雲南巡撫譚尚忠疏報。昆明縣首墾地二十頃三十二畝有奇。以原任寧夏將軍積福為正白旗蒙古都統。以故三等公西銘子志福一等男文成堂叔祖富僧阿。各襲爵。辛亥諭據徐嗣曾奏。閩海關本年徵收稅銀。比較上年。短少至九萬一千九百餘兩。常青恒瑞。俱身在軍營。未便照向例分任攤賠。懇將本年

應賠銀兩。統在徐嗣曾名下養廉內坐扣歸款等語。本年臺灣逆匪滋事。前後派調官兵。陸續配渡。並節次運送軍餉。商販船隻較稀。以致稅額短少。其事尚屬有因。所有本年閩海關徵收稅銀。短少九萬一千九百餘兩。著加恩寬免。舉行本年軍政。巡捕營卓異官三員。年老官二員。直隸卓異官三員。年老官二員。山東卓異官三員。罷軟官一員。有疾官二員。才力不及官一員。江南卓異官七員。有

疾官二員。才力不及官三員。江西卓異官四員。年老官二員。有疾官一員。廣西卓異官五員。罷軟官二員。年老官二員。湖南卓異官七員。有疾官一員。湖北卓異官四員。年老官一員。有疾官二員。四川卓異官六員。年老官三員。才力不及官一員。雲南卓異官五員。年老官三員。有疾官一員。才力不及官一員。貴州卓異官六員。罷軟官一員。年老官一員。才力不及官一員。分別議叙處分如例。山東巡

撫覺羅長麟疏報。膠州收并靈山衛開墾田四十九頃三十畝有奇。壬子諭軍機大臣等步軍統領衙門奏。山東東平州民人孟捍廷。呈控該州多收漕糧及料派車輛。歷控該省藩臬各衙門。不為審辦一案。查此案該地方官吏。如果有浮收米石折錢派累之事。既經該處民人歷次呈控。無難審訊得實。亦不值專派大臣前往查辦。現在孟捍廷所控呈詞內。有長巡撫坐照惡查情弊之語。是長麟

尚屬留心民事。因何不向該撫呈控。此案著即交該撫就近秉公嚴審。如所控屬實。則官吏浮收派累。有干法紀。承審之員。不為審辦。自不可不切實根究。查明嚴叅。以肅吏治。想長麟自不致迎護屬員。倘所控或有不實。該撫亦當據實辦理。不可因該處百姓有稱頌該撫之語。意存徇袒也。將此諭令知之。○舉行本年各駐防軍政。盛京卓異官五員。罷軟官三員。年老官一員。有疾官二員。才力不及官二員。西安卓異官一員。罷軟官一員。年老官一員。江寧卓異官三員。有疾官一員。杭州卓異官二員。罷軟官二員。荊州卓異官三員。寧夏卓異官一員。廣州卓異官一員。年老官四員。成都卓異官二員。綏遠城卓異官二員。有疾官一員。察哈爾卓異官二員。罷軟官二員。有疾官四員。才力不及官二員。熱河卓異官一員。密雲卓異官二員。涼州卓異官一員。有疾官一員。青州卓異官一員。年老官一員。

才力不及官一員。山海關卓異官一員。罷軟官二員。年老官一員。乍浦卓異官一員。烏魯木齊卓異官三員。黑龍江不謹官一員。罷軟官一員。有疾官一員。吉林罷軟官三員。年老官二員。才力不及官四員。分別議敘處分如例。旌表守正捐軀廣東海豐縣民莊保雅妻曾氏。癸丑。緩徵甘肅隆德靜寧張掖。河州隴西伏羌。平番。平涼。鎮原。崇信。王子莊州同等十一州廳縣。本年霜雹災地額賦。○甲寅。上幸瀛臺。浩齊特多羅郡王敏珠爾多爾濟等二十一人。喀爾喀多羅貝勒齊默特多爾濟等七人。青海扎薩克台吉吹忠扎布等二人。厄魯特台吉瑚勒哈齊等四人。革布什咱安撫司諾爾布。湛都爾等二十二。人。琉球國正使翁秉儀等四人。於西苑門外瞻覲。○諭據海寧查奏。延慶州倉儲虧短一摺。內稱從前所虧倉庫各款二萬四千兩。現在查明均

已抵補有項。此外所缺倉豆一千七十五石。照例覈算計銀五百三十七兩五錢。業據叅革知州紀聞歌供認支用無存。請將紀聞歌從重發往伊犁充當苦差。所虧豆價著落該管知府王衍緒名下追出。並請將劉我梁肯堂及該管道府。歷任藩司道府交部分別議處等語。紀聞歌於倉貯豆石虧缺至一千七十五石之多。現經海寧訊據紀聞歌供稱。所有虧短緣由。從前曾經詳過上司。乃該督劉我及藩司梁肯堂並不即時查辦具奏。任其懸宕。至今尚未彌補足額。劉我梁肯堂在直隸總督藩司任內有年。於所屬倉儲虧缺置之不辦。實屬廢弛。所有紀聞歌虧缺豆價除著落該管知府王衍緒追繳外。劉我梁肯堂仍著各加十倍罰出。並著交部嚴加議處。其該管道府及歷任該管上司俱著交部一併嚴加議處。餘俱著照海寧所奏辦理。諭軍機大臣等。向來年班回子伯克入覲俱係十

二月二十日到京。二十一日同外藩一體瞻覲。本年回子伯克等至今未到。已節次差員迎探。據報本日丑刻尚未行抵良鄉等語。此等回子伯克年例入覲新經議令地方官派員妥為照料。該督豈未聞知。其過保定時計算日期若係遲延。該督自當一面查叅具奏。一面令其加緊趲行。乃竟未據奏報。殊屬漫不經心。著傳諭該督嚴查。或因原派照料之官員沿途行走遲滯。抑係直隸派出官員未能照料安速。夫馬不齊以致遲誤之處。著該督據實查叅。毋得稍存迴護。○乙卯。上幸寧壽宮。御景祺閣。賜王公大臣及蒙古王公等食。諭近來四川奏到摺內凡遇番夷人名譯寫多不成語。皆由地方官不諳西番語音。保寧雖係蒙古。自任總督後未免亦仗幕友辦事。於番語人名全不留意。以致譯寫訛錯。竟不成話。現在李世傑復調任四川。係屬漢人。該省官員內無通曉番語之人。恐更

易於訛錯。貴州糧道索諾木扎木楚係蒙古人員。由理藩院司員出身。較為諳習。著調補四川松茂道。其貴州糧道員缺。即著現任松茂道王鳳儀調補。諭軍機大臣等。四川總督衙門筆帖式兩缺。皆由唐古忒學生出身人員調補。現在常德一員。即係由唐古忒學生出身。何以譯寫人名。每多訛錯。自因該員不諳文義。又不留心所致。或係該督不令其與聞。今特將該處本年入覲土司土目等名

字譯寫漢字發往著傳諭該督等。嗣後遇有繕寫番夷人名。即仿照此式譯寫。毋致再有訛錯。以符體制。而使觀覽。並諭鄂輝知之。又諭據保寧等奏。拏獲郭羅克搶掠拒捕番犯。審明定擬一摺。內稱。訊據賊犯色賴。蚌借供稱。除同行竊掠各番。俱已供明外。其受傷逃散夥賊。不知何往。至同時竊掠。約共百十人。並不知部落姓名等語。此案郭羅克番人肆行搶掠。現據獲犯供出同夥百有十人之

多。乃獲犯到案。及捕殺傷斃者。不過數人。其餘各番尚未就獲。不足以示懲儆。除色賴。蚌借二犯。自應即行正法傳首外。至李世傑。此時諒已抵任。著傳諭該督。及成德嚴飭該土司實力查拏。務將逸犯拏獲多名。迅速報解。從重辦理。俾番衆共知儆畏。並著傳諭鄂輝。於臺灣勦捕事竣回任後。務須嚴行督飭。上緊緝捕。毋使逃匪得以日久稽誅。方為妥善。再保寧等奏。據郭羅克土司土目等稟稱。該番等性好偷掠。青海在卡座以外。實難管束。求吩咐阿哩克等。不得過卡游牧牲畜。免致生事。保寧已咨明普福。轉飭阿哩克等約束等語。該處番人。性好偷掠。該土司等稟請勿令阿哩克人。出卡外牧放牲畜。其言雖係諉卸。尚近情理。除另降清字諭旨。傳知普福外。將此各諭令知之。又諭據保寧等奏。郭羅克土司等稟稱。番民窮困。見卡座之外。有牧放馬匹。遂肆行搶掠。請飭阿哩克等。令其約

束所屬。毋令於卡外牧放馬匹等語。此雖係
諉卸之辭。尚近情理。著傳諭普福。嗣後令其
約束所屬。毋得任意出卡。並飭該處郡王納
罕達爾濟等一體遵行。如有違例。一經搶掠
不但。不為辦理。并將被掠之人治罪。普福當
隨時留心查辦。又諭。此次年班朝覲之回
子伯克到京遲延。現在詢之帶領回子伯克
之副將恒通。衆將祥保據稱。行至潼關地方。
值河水凍結。繞道四日。改由孟津渡河。由河
南一路行走。又不知回子伯克等。應於十二
月二十日到齊。二十一日帶領瞻覲。以致遲
緩。前在潼關時。曾將改道孟津緣由。稟報勒
保。已延三等語。此次年班回子伯克等在潼
關地方。值河水凍阻。繞道行走。既經該副將
等稟報勒保。已延三。何以該督撫俱未具奏。
即該副將等。不知年例回子伯克等。應於十
二月二十日到齊。豈該督等亦未之知。並不
飭令上緊趲行。勒保。已延三。何以漫不經心。

若此。除交部察議外。著傳諭勒保。已延三。即
將該副將等。是否曾經報明。及該督等因何
不行具奏。飭令趲行之處。據實回奏。丙辰
上御撫辰殿大幄次。賜蒙古王公等宴。諭斗
六門為南北要隘。久經賊匪屯占。福康安統
領官兵。將中林大埔尾。大埔林各莊。同日攻
潰。乘勝直趨。連夜前進。勦殺賊匪。將斗六門
收復。官兵奮勇力戰。不避鎗礮。甚屬可嘉。現
據李侍堯奏。聞官兵已破大里。找賊巢。賊匪
逃入內山。生番等稟稱。欲將逆首林興文擒
獲。獻出等語。想福康安等奏報之摺。自己在
途。即日捷音可到。俟大功告竣。再行另降諭
旨。外福康安。海蘭察。恒瑞。普吉保。素國璜。著
先行交部議叙。至普爾普。現已打通府城。道
路仍回北路。協同進勦。亦屬出力。普爾普著
交部議叙。所有福康安等奏到格外出力之
侍衛章京。及鎮將官弁等。除賞給巴圖魯名
號。及陞等賞翎各員外。其餘在事出力之侍

衛章京鎮將官弁等俱著查明一併咨部議叙。又諭據福康安等奏請將攻取中林至斗六門首先奮勉人等分別施恩等語。此次官兵攻取斗六門等處連夜追賊全行攻克實屬可嘉其出力人等已另降漢字諭旨交部議叙外所有出衆格外奮勉人等著加恩照福康安等所請總兵穆克登阿著賞給芬圖哩巴圖魯名號二等侍衛春寧著賞給斐揚阿巴圖魯名號三等侍衛賽英阿著賞給額爾克巴圖魯名號克星額著賞給額騰依巴圖魯名號薩克丹布著賞給伯起圖巴圖魯名號護軍叅領萬坦著賞給喀勒春巴圖魯名號前鋒叅領賽沖阿著賞給斐靈額巴圖魯名號前鋒侍衛延進保著賞給哲布鏗額巴圖魯名號佐領阿穆勒塔著賞給能登額巴圖魯名號叅將吳宗茂著賞給果勇巴圖魯名號張朝龍著賞給誠勇巴圖魯名號番子守脩阿忠著賞給扎克布巴圖魯名號

千總色瑪禮勇忠著賞給托贊巴圖魯名號仍照例各賞銀一百兩二等侍衛額勒登保蒙襲保保斌三等侍衛萬齊齋色靈額哲克藍翎侍衛武庫捫格登保阿哈保委前鋒叅領德楞泰委護軍叅領富靈保前鋒校薩隆保著各陞一級德楞泰等遇有本營缺出坐補騎都尉納丹保守備諾托保貢楚克扎布防禦清安常春副將納蘇圖遊擊海亮張緯都司額勒亨額張占魁年永守備馬大雄張志驪湯萬年王德俊李之銘土守備斯丹巴嘉爾穆阿吉土千總根登泰番子千總嘉噶爾朋番子委守備安堵爾俱著賞戴花翎親軍永明等三十三名俱著賞戴藍翎黑龍江前鋒托倫保等五名著賞給額外驍騎校親軍吉勒彰阿等二名著賞給額外親軍校遇有本營缺出坐補以示鼓勵。諭軍機大臣等據琅玕奏本年浙省回空船隻除台州等九幫凍阻外其餘各幫尚在江南邵宿運河

恐到浙須在來年正月擬設法隨到隨免趨辦開行務令趕緊過淮設或鎮江出口已在江廣幫船之後屆期或描檔前進或奏請截卸天津以期來歲回空迅速等語浙省幫船今歲回空到次稍遲明春受兌後自應趕緊督催以期於四月下旬依次過淮設或鎮江出口時江廣幫船已從長江直下行走在前自當設法籌辦庶回空不致遲誤著傳諭毓奇劉涓於該幫船出鎮江口時察看情形如能描檔前進迅速北上抵通交卸固屬甚善倘竟為江廣幫船積壓在前難以趨行或應酌量截卸天津之處該督等務須先事籌畫據實奏明屆期再降諭旨將此先行傳諭毓奇等並諭琅玕知之尋毓奇劉涓奏查浙江回空幫船臣毓奇委員親押漫越江廣各幫星速南下臣劉涓親身過江督率員弁星夜籌催年內均可渡竣約計正月歸次二月兌竣按程計日仍可緊跟江南尾幫來淮毋庸

豫籌北倉截卸得旨嘉獎吏部奏請定大計藩臬考語咨部例向來大計年分藩臬考語皆係專摺具奏現在各省總兵等第清單遵旨止須咨部備查無庸專奏所有大計藩臬考語應行文各該督撫照武職軍政之例一併咨部從之命編修戴心亨提督湖北學政丁巳諭此次福康安等統領將弁勦捕臺灣逆匪奮勇打仗所向克捷將賊匪屯占要隘各處先後收復屢著勞績其隨同打仗兵丁奮勇力戰不避鎗礮踴躍爭先甚屬出力自應一體加恩賞賚除湖南貴州二省派往兵丁現已配渡尚未前抵該處外其四川屯練降番及廣西等兵隨同將領前抵諸羅殺散賊匪及攻克斗六門等處均能打仗出力自應一體加恩用獎勞勩著福康安查明此次隨同打仗兵丁其實在出力者每名賞給一月錢糧其出力稍次者每名賞給半月錢糧以昭鼓勵諭軍機大臣曰恒瑞自

駐劄鹽水港。坐擁多兵。株守不進。並未援應。榮大紀轉以賊多兵少。率請添調數萬大兵。是其畏蕙無能。實無可解。免是以屢經降旨。嚴飭並將伊革去將軍。今福康安查參具奏。今閱福康安等奏到之摺。不但將伊參劾。且摺內聲叙伊帶兵打仗之處。頗似露其奮勉。此時福康安等統領大兵。乘銳深入。豈少恒瑞一人。且恒瑞若再不一同前進。豈復尚有人心。倘恒瑞果能奮勉。則當福康安未到之先。帶兵赴援。何以並不見其鼓勇寸進。今祇係因人成事。即有斬獲。亦何足為功。乃福康安於恒瑞。頗留地步。看來福康安於榮大紀等過事吹求。而於恒瑞又不免因係親戚。曲為瞻徇。何以服衆心而示公正耶。至臺灣現在勦捕事宜。即日告竣。所有該處地方官。平日廢弛擾累。釀成事端之處。亦應確切查辦。即如永福在臺灣府協同防守。雖有微勞。但以道員在彼數年。該管地方。致有逆匪肆

擾。伊本不能辭咎。其防守府城。原屬伊分內之事。且賊匪攻擾時。有常青在府城督率兵民。竭力堵剿。永福不過隨同守禦。伊身係滿洲。於賊匪滋擾之時。豈有不幫同常青禦賊。而轉委城於賊之理。即云逆匪滋事。由於府縣激成。而府縣等皆係永福所屬。平日何以漫無管束。以致釀成巨案。永福在臺灣道任內。有無貪黷劣蹟。著李侍堯確切查訪。據實具奏。不得姑息。即從前被賊戕害各員。如孫景燧、董啟璵、劉亨基、長庚、湯大奎等。雖俱為賊所害。但其平日居官。實在有何貪縱不職劣蹟。以致激變之處。亦應仍將其款蹟。逐加查究。孫景燧等皆係永福屬員。其在任劣蹟。永福自無不知。安有任其激成事端。置之不問之理。李侍堯當嚴加查訪。據實參奏。大學士九卿奏。酌議鄉會試科場條例事宜。一。鄉會試二場。向例分經中式。查士子束髮授書。原應五經全讀。請於戊申科鄉試為始。先

將五經輪流分試。然後各出一題。成五義論。題刪生員歲試。俟五科後。該學政亦輪流間出。童生仍用四書文。二經文。刪一積匪窩藏。鎗手。每與牆外巡緝兵役。及圍中號軍等勾通作弊。請交步軍統領會同順天府選派番役嚴密查拏。一號舍外棘牆內。巡吏巷道地僻最易藏奸。請用牆垣截斷。禁止人役往來。牆外官員巡察。以資防範。一圍中號戲。應令知貢舉監臨督率提調監試等官。將號戲通行攬攪。眼同外簾各員。分手戳印。不得假手吏胥。致滋買囑連號之弊。一試卷例有空白。以備臨期換給。誠恐舉子賄囑書吏。將印卷偷賣私行戳用。關會連號生。彼此混入號舍。應將豫備空白例停止。一奸徒假充跟役。指引舉子。聯絡舞弊。請嗣後稽察龍門大臣。各按照品級。攜帶跟役。一品四。二品三。三品二。並給發腰牌。以昭嚴密。一舉子按牌聽點。每有舞弊之徒。希圖換卷。彼此托故遲延。以便

同時補點。請嗣後臨點不到者。仍應隨時稟點。違則扶出一。鄉會謄錄。向有賄囑謄寫工楷。而未經賄託者。試卷潦草。竟至難於披閱。請責成知貢舉監臨。飭令謄錄所官嚴查。並請嗣後墨卷。自行點勾。對讀官詳加校正。一試卷彌封。向用千字文戳印。紅號行之既久。保無內外簾豫先開會。請嗣後將戳印攪亂。庶彌封較為慎重。一墨卷添註塗改。定例不得過百字。但制義字易數十。庸劣即可改觀。請於文尾詩末。旁寫添註塗改若干字。二三場如之。違則貼出。並請二場謄真後。默寫頭場詩文。聽試官臨時酌定。填榜時比較取中。一首場題紙限用未蓋且夫今夫等字。刻於四書每題下。選用詩韻數十字。刻詩題下。其添註塗改。及默寫首場。亦即刻於每場題紙後。與題目同時給發。一會試知貢舉。鄉試監臨。向係禮部漢侍郎。及府尹輪充。既可豫擬。易滋吏胥揣摩之弊。請嗣後該部將由

科甲出身之滿漢侍郎及三品卿以上通行開列庶關防益慎。又議覆順天府尹吳省欽奏請嚴俊秀貢監應試京闈之例。查俊秀貢監較恩拔歲副等加捐者文理既遜錄送纂難近見該監錄科時散坐聚談竟或代倩完卷即無不得入闈者請嗣後如由俊秀附生武生加捐者不論小京官與旗民卷俱應奏派大臣一該堂官一二秉公彙考御史會同編號嚴查至前三科中式北闈之蘇揚廣東山西俊秀應令禮部咨查原籍俟下科會試前十日齊集奏派親信大臣覆試紕繆者罰科規避者永停考試等語查附生加捐貢監與廩增事同一例應照舊辦理至俊秀等項捐納貢監人數較多俱應一體從嚴請於七月二十九三十等日秉公彙考三日內揭榜其前三科中式北闈者試以一藝一詩分別磨勘諭曰大學士九卿議奏科場條例嚴申功令豫絕弊端各款所議俱屬詳悉周妥

已依議行矣。但鄉會試二場改用五經請自戊申鄉試為始用易經出題以後按照鄉會科分將五經依次輪試一周再於鄉會試二場五經並試一節雖極為允當士子束髮授書原應五經全讀向來止就本經按額取中應試各生祇知專治一經揣摩誦習而他經並不旁通博涉非敦崇實學之道今改用五經既可令士子潛心經學又可以杜絕場內關節弊端而衡文取中復不至限於經額致佳卷被遺自應於分年輪試畢後即以五經出題並試惟所請明歲戊申鄉試先用易經出題之處周易理蘊深奧猝難通曉並恐邊省未必人人誦習明歲鄉闈為期較近若遽以易經命題考試其向非專經者或致不諳經旨難於取中因思士子以詩經為本經者多所有明歲戊申鄉試著先用詩經出題次年會試著用書經俟下次鄉試再用易經以後按照鄉會科分輪用禮記春秋庶士子得

以漸次兼通。講求精熟。不致臨時草率應試。又首場四書文。向來限用夫蓋今夫。且夫等字。此等字樣。主試者應於臨期酌量顛倒。限令遵行。毋庸按年排定。即三藝承題全用夫字。或全用蓋字。起講全用今夫。或全用且夫。俱無不可。至設科取士。原為旁求俊乂。掄拔真材。以備國家任使。應試諸生。由科甲出身者。大而內居卿貳。外任督撫。小而翰詹科道。分任羣職。即州縣等官。亦無不有身膺民社之責。該生等積學應試。為登進初階。自當束身圭璧。以端其本。乃不安義命之徒。往往希圖僥倖。舞弊作奸。愈出愈巧。以致人言藉藉。不得不大為之坊。嚴申例禁。竟至與穿窬宵小。一律防閑。覺大學士九卿所議各條。朕深愧無德化之感。士子也。此後應試諸生。務須經明行修。爭自濯磨。以端實學。而期仕進。其膺衡文之任者。亦應精白乃心。秉公鑑拔。以副朕作人雅化。○戊午。

孝莊文皇后忌辰。遣官祭昭西陵。上詣慈寧宮。壽康宮行禮。○諭軍機大臣曰。德成自浙江差竣回京。偶詢及柴大紀平日居官聲名如何。據奏風聞柴大紀自復任臺灣總兵以後。縱恣自大。且居官貪黷。較之地方文職尤甚。並將臺灣所轄守兵。私令渡回內地貿易牟利。駐守之兵。所存無幾。上年逆匪林爽文等滋事不法。其始不過會匪黨夥。聽從附和。人數無多。因存城之兵無幾。不能即時搜捕。賊匪糾眾肆擾。距府城止三十餘里。而柴大紀尚不思前往堵禦。經永福催令出城。始與打仗。又因兵少敗衄。以致賊匪益肆猖獗。不可復制等語。若如所奏。是柴大紀在總兵任內。貪縱不職。飭法牟利。於賊匪起事之初。任意玩視。使賊匪得以鴟張蔓延日久。竟由柴大紀

貪縱廢弛。釀激事變。其平日劣蹟。已屬確有。可據。浙江既有風聞。福建自更有議論。福康安到彼後。於柴大紀種種劣蹟。自必有所見聞。即應訪查明確。將其實在款蹟。據實奏。乃僅稱沾染綠營習氣。狡詐難信。而於柴大紀平日如何侵貪激變之處。並未逐款指出。祇含糊具奏。豈欲待朕自為揣度耶。試思柴大紀守城有功之人。若止憑含糊無據之詞。豈能將伊治以無名之罪。今朕於召見德成。無意中偶然詢及。始悉此等情節。而德成於朕詢問時。初猶以柴大紀屢次邀恩懋賞。未肯遽行陳奏。經朕再四開導。始一一具奏。福康安受朕深恩。非他人可比。乃於柴大紀平日罪狀。並未列款入告。福康安豈德成之末若耶。著傳旨嚴行申飭。並著將柴大紀實在款蹟。詳悉查明。即詢之永福等。果否實有前項執法營私之處。即行據實奏。至李侍堯自調任閩省。駐劄廈門。於柴大紀平日居官

聲名狼籍。及廢弛玩誤之處。豈無屬員稟報。來往傳聞。乃李侍堯見柴大紀。經朕屢加恩獎。輒思容隱不言。殊不知朕於臣下功罪。從不肯絲毫假借。即如李侍堯從前歷任總督。素能辦事。受朕恩眷最優。後因在雲貴陝甘任內。兩次獲咎。即將伊按例治罪。今於辦理臺灣軍務。頗能奮勉。仍疊次加恩。即李侍堯所身受者而言。已可共證。今李侍堯於柴大紀有心瞻顧。徇隱實屬辜恩負良。即日大功竣。本欲給還原襲伯爵。以示優獎。今伊似此心存欺隱。豈可再膺懋賞。給還伯爵耶。朕臨御以來。勵精圖治。五十二年。如一日。如福康安、李侍堯。此等存心行事。或在朕九旬百齡之時。妄思朦混。或可。今清明在躬。無遠勿矚。即歸政以前。猶日孜孜。不敢寧息。豈肯於一切政事。稍涉含糊。即諸臣中小有過失。朕非不曲加寬假。至於用人行政。以及關係地方吏治軍國之事。則是非曲直。從來覈實辦

理賞功罰罪權衡至當。安能任臣下之類項了事耶。所有德成指出柴大紀各款。及此外有何別項劣蹟。並著福康安、李侍堯各行嚴查密訪。據實參奏。毋得再有瞻徇。致干重咎。○又諭。前經降旨。加封柴大紀伯爵。並賞給銀一萬兩。令琅玕於浙江庫項內支銀五千兩。給伊家屬。並諭令李侍堯於閩省藩庫內撥銀五千兩。解送柴大紀處。給予使用。現在另降諭旨。訪查柴大紀激變殃民之事。所有前項銀兩。未便徑行賞給。著傳諭李侍堯琅玕接奉此旨。將前項銀兩暫停給發。另候旨辦理。○已未

上御乾清宮。召土爾扈特固山貝子沙喇扣肯入覲。○諭曰。虔禮寶奏甄別教職千總查辦烏鎗估修船隻。及官員並無換帖宴會製造萬民衣傘等事各摺。已於摺內批示。此等尋常年終彙奏事件。例應巡撫於年終具奏。孫永清即因來京陛見。亦當將此等應辦之事。

辦畢具奏。後再行起程。或以彙奏尚未屆期。俟到京後自行陳奏。亦無不可。有何迫不及待之處。而輒交暫護撫篆之藩司陳奏耶。看來竟不免心存觀望。於親管之布政使。即如此周旋。則一切吏治必廢弛不可問。孫永清著交部嚴察議奏。○又諭曰。江蘭奏伊父江正大遣家丁攜銀二萬兩來豫採買黑豆二萬石。交江南總督兌收。聽候運閩等語。現在勦捕臺灣逆匪大功。即日告竣。江正大以黑豆為軍營飼馬要需。出貲採買運閩。以充軍用。尚屬急公。江正大著交部議敘。○又諭曰。雅德現已緣事拏解來京。其所遺員缺。著調博興前往喀什噶爾協同明亮辦事。博興員缺。著調格綢額前往和闐辦事。格綢額員缺。著賞給盛住道員職銜。前往塔爾巴哈台。在領隊大臣上行走。○諭軍機大臣曰。柴大紀前任臺灣總兵時。廢弛營伍。縱令兵丁渡海貿易。是以有林爽文等跳梁滋事。雅德在閩

多年乃柴大紀如此悖謬豈竟毫無見聞。竟屬喪盡天良。著傳諭明亮接奉此旨。即將雅德鎖拏。派委幹員。妥為照料。解京治罪。并著先訊大概。迅速奏聞。又諭現在福康安已攻克斗六門。並有攻破大里杙賊巢之信。逆首林爽文定可即日就擒。其南路賊匪。聞北路官軍屢次克捷。自必聞風膽落。且經常青曉諭各莊民人。如遇賊黨入莊。即行拏解。並蹤跡莊大田藏匿處所。共相擒獻。給予重賞。

當此賊首潰竄之時。其餘黨羽日就解散。或其夥匪自謀生路。竟將莊大田縛獻。亦未可定。且逆首林爽文之次。即係莊大田。均為渠魁首惡。即日福康安拏獲林爽文後。斷無將莊大田竟置不辦之理。自應乘屢勝兵威。於北路賊匪搜剿淨盡之後。前往南路。與常青會合一處。併力勦捕。務將賊目莊大田及黨夥各要犯悉數拏獲。方可謂之嚴事。其洋面一帶。仍著常青嚴飭將弁。實力巡緝。截其逃

竄之路。勿令賊人得以奔竄入海。本日令軍機大臣提訊任承恩。據供曾聞柴大紀操守平常。聲名狼籍。並不管束兵丁。任其游蕩。上年十一月。柴大紀巡閱各營。本應由彰化至淡水等處查閱。因聞林爽文滋事。並不前往查辦。轉回至府城。後來林爽文攻擾府城時。聞柴大紀尚在城內。經永福催令打仗。始帶兵出城。在城外十餘里地方駐劄等語。與昨日德成所奏大畧相同。似無虛假。柴大紀種

種劣蹟。德成在浙江尚有風聞。而任承恩於四十九年到提督任時。亦已聞其聲名狼籍。廢弛營伍。可見人言藉藉。已非一日。乃福康安李侍堯含糊徇隱。即治罪亦所應得。今經朕嚴行訓飭。福康安李侍堯務將德成指出柴大紀各款。及任承恩所供各情節。並此外尚有何方蹟一併據實查奏。候朕裁酌。○是日起。

上以歲暮禘祭

太廟齋戒三日。庚申諭據福康安等奏官兵自斗六門前進攻克水沙連大里杙等處請將出衆奮勉人等分別施恩等語此次官兵實屬奮勇出力即照福康安等所請索倫佐領阿穆爾塔著授為一等侍衛事竣留京當差副將張芝元著暫賞給總兵職銜交福康安酌量指缺題補翼長六十七著賞給副都統職銜總兵袁國璜著賞給伯起巴圖魯名號三等侍衛博綽諾克著賞給能登巴圖魯名號特勒登額著賞給珠埒埜額巴圖魯名號巴顏泰著賞給揚桑阿巴圖魯名號定什鼐著賞給瑚棟阿巴圖魯名號翁果爾海著賞給額騰額巴圖魯名號藍翎侍衛察罕著賞給努斯洪額巴圖魯名號前鋒侍衛西津泰著賞給法爾沙台巴圖魯名號吉林佐領五德著賞給噶爾薩巴圖魯名號黑龍江馬甲棍德著賞給吉爾崆額巴圖魯名號仍照

例各賞銀一百兩藍翎侍衛德色姜護軍叅領扎拉芬護軍校七十九著各陞一級扎拉芬七十九遇有本營缺出坐補黑龍江佐領富永著賞給協領職銜土守備日布木著賞給遊擊職銜拜唐阿華聘親軍碩多爾海德勒什臺爾根保著作為藍翎侍衛護軍校毅德保巴哈托克托豁驍騎校全亮著授為委署章京遇有本營缺出坐補藍翎長雅林保德森保濟蘭泰司轡瑪爾瑚善親軍倭和雅爾哈善墨爾渾保巴津保色列布克賽保前鋒色布騰護軍扎勒杭阿申齊保著授為護軍校遇有本營缺出坐補叅將李芳園遊擊穆騰額上虞備用處拜唐阿雲騎尉富蘭守備丁世偉張玉楷土守備班第爾結安朋土千總任彥著賞戴花翎拜唐阿訥新保司轡富克精阿親軍喀圖吉林驍騎校扎克丹保委官和善領催德林保黑龍江前鋒克什保彰果保馬甲伊薩布千總馬登雲方德貴黃

彩。鄧應祥。把總馬中貴。羅邦翰。外委張續。張朝鳳。范模。倪福林。主都司薩爾結。番子千總僧薩蒙旺。著賞戴藍翎。黑龍江壯丁森伯。鼎著作為本處領催。圖布慎。著作為本處馬甲。以示鼓勵。○又諭。現在臺灣勦捕事宜。剋日歲功。所有一切善後事宜。俱須大員籌辦。徐嗣曾。現在省城。並無要務。即湖南官兵。計期已可料理過省。而廈門泉州一帶。有李侍堯在彼駐劄。足資經理。徐嗣曾。計此時已前赴

臺灣。著將撫卹難民。估計城工。清查叛產。搜拿賊屬等事。悉心籌辦。務期妥協。所有巡撫印務。著伍拉納暫行護理。○又諭。盛京將軍公永瑋。應任辦事。尚屬妥協。今聞溘逝。殊堪軫惜。除加恩賞給陀羅被外。並遣御前侍衛前往賜奠。仍著該部查照弘晌之例。奏請給予卹典。○又諭。曰。盛京將軍公永瑋病故。所遺員缺。著永鐸補授。永鐸現署伊犁將軍事務。俟保寧抵伊犁時。將應行事件交代畢。再行

來京請訓赴任。永鐸未到任之前。著慶桂於差務畢後。來京請訓。前往署理。永鐸所遺烏魯木齊都統員缺。著尚安補授。并賞戴花翎。尚安所遺喀喇沙爾辦事大臣員缺。著德勒格楞貴調補。喀什噶爾地方。有明亮博興。二人亦足辦事。老格即授為英吉沙爾領隊大臣。穆和蘭著暫署喀喇沙爾事務。俟德勒格楞貴到任交代畢。穆和蘭再回吐魯番。○又諭。曰。西安將軍長清病故。所遺員缺。著興肇

調補。前經降旨。以廣州將軍存泰年老。令其來京候旨。所遺員缺。著圖桑阿補授。今聞存泰年雖老。而力尚未衰。著仍留廣州將軍之任。俟明歲年終來京陛見時。再行酌量降旨。所有荊州將軍員缺。即著圖桑阿調補。○諭軍機大臣等。生番頑犢性成。貪利而無信。福康安當大兵攻克賊巢。聲勢百倍。逆首窮竄之際。正當趁此兵威。及鋒而用。即勒兵直壓生番地界。諭以禍福。則生番等震懾兵威。貪

得獎賞。自必將林爽文即時獻出。實為此事緊要機宜。從來用兵之道。惟以威勝。歷觀前史禦賊之道。無不全資兵力。即至講和修好。納降。亦必陳師壓壘。使敵人懾懼畏伏。然後盟約可堅。採縱自我。今祇差人曉諭生番。懸立重賞。則生番等惟利是視。設林爽文窮竄該處。將所掠財帛。廣為賄結。較懸賞之數更多。生番更利其重賄。或竟將林爽文私行藏匿。不肯擒獻。福康安豈將委之不辦。且現據福康安所奏。招集社番。止有屋鰲等十六社。其水沙連二十四社外。尚有無數社番。若皆購線往招。設生番等私將林爽文放逸。而以逃往他社藉口。此數十番社中互相推卸。既不能不予以重賞。又仍不能藉生番之力。擒獲賊首。有何裨益。豈有官兵在彼久住。經年累歲。候其縛獻之理。且似此輾轉稽延。倘林爽文暗中勾結。復從內山潛行煽惑。別滋事端。豈不更費兵力。生番等受其賄賂。捏稱已

死。亦將信其誑詐。遽為完事乎。前曾有旨。諭令福康安等於勦捕完竣。善後事宜。交常青等接辦。福康安、海蘭察等明春趕赴天津。加以宴賞。今首逆林爽文尚在潛匿。搜捕不免多需時日。計明年巡幸天津時。福康安等斷不能趕赴行在。竟毋庸遵照前旨。急於前來。如將逆首林爽文等獲。即令海蘭察先行押帶進京。福康安於擒獲賊首。廓清北路後。仍當統領官兵。馳赴南路。會合常青。將賊目莊大田及黨夥各要犯。悉數擒拿。掃除餘孽。收復鳳山。將一切善後事宜。酌定章程。再行起程回京。亦未為遲。至柴大紀。如祇係小有侵漁。私圖肥橐。此等劣蹟。臺灣文武官吏。皆所不免。朕於他人尚不加深究。況柴大紀係有功之人。今柴大紀廢弛營伍。甚至私令兵丁渡回內地貿易牟利。以致存營兵少。而於賊匪起事之初。柴大紀正值巡閱各營。並不即時前往查辦。轉回至府城。及賊匪距城三十

餘里尚不思帶兵出城勦捕。此三事是柴大紀最重之案。是賊匪日漸猖獗。蔓延滋擾。竟由柴大紀釀成。則雖有守城之功。而其激變之罪。斷難輕貸。將伊按例正法。亦所應得。即將來覈辦時。念其不肯出城一節。尚堪憐憫。亦祇可如黃仕簡。任承恩。貸其一死。而於朝審勾到時。仍應綁赴市曹。以示懲儆。斷不能置之不辦。顛預了事。福康安李侍堯。如查明柴大紀款蹟屬實。即嚴行叅奏。拏問治罪。○又

諭曰。徐嗣曾本係漢員。由科甲出身。朕因辦理地方事務。尚能循分妥協。是以擢用巡撫。朕平日信任委用。原非若福康安李侍堯可比。但以柴大紀如此款蹟昭然。在浙江既有聲聞。福建自更有物議。徐嗣曾豈毫無聞見。著該撫即將柴大紀各款蹟。詳細查明確實。並此外有無別項劣蹟。一併據實叅奏。該撫已往之咎。朕已不加深究。今經特旨詢問。若再有徇隱之處。則是自取重戾。恐不能再邀曲貸。○又諭曰。柴大紀

種種款蹟。德成自浙江回京。傳聞既有確據。琅玕身膺巡撫。於柴大紀鄉評輿論。豈竟毫無風聞。且該撫身係覺羅。尤非他人可比。閱浙本屬毗連。聲息相通。一有外邊議論。即當據實奏聞。方為不負任使。何以竟未奏及。著琅玕將因何不奏之處。明白回奏。○辛酉。以歲暮禋祭。遣官祭太廟中殿。

後殿。○是日。戊申年立春。順天府進土牛春山寶座。○壬戌。禘祭。

太廟

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵 遣官祭

孝賢皇后陵

端慧皇太子園寢 遣官祭

太歲之神 朝鮮國使臣俞彥鎬等六人於

午門瞻覲

上御重華宮賜杜爾伯特和碩親王車凌烏巴

什浩齊特多羅郡王敏珠爾多爾濟喀爾喀

多羅貝勒齊默特多爾濟土爾扈特固山貝

子沙喇扣肯青海扎薩克台吉吹忠扎布厄

魯特台吉瑚勒齊年班回部阿哥木伯克

多羅善並革布什咱安撫司諾爾布港都爾

等茶果賞賚有差 諭軍機大臣等賊目陳

洋向助林爽文為逆固屬黨惡不法今到營

投誠若能將賊首林爽文擒獻尚可寬以一

綫免其死罪陳洋與林爽文同惡相濟必知

林爽文逃竄蹤跡今既請限擒獻自必易於

拏獲正當加以撫諭令其急思自効至陳洋

向與吳領同在斗六門虎仔坑一帶幫助逆

首保護巢穴屢出滋擾今吳領尚未有下落

福康安務須嚴訪蹤跡將吳領一併拏獲不

可令其漏網 癸亥

上御保和殿筵宴朝正外藩左翼科爾沁和碩

親王恭格喇布坦多羅郡王鄂勒哲特穆爾

額爾克巴拜喇什端羅布多羅貝勒古穆扎

布輔國公納遜巴圖諾觀達喇公品級一等

台吉拉旺和碩額駙敏珠爾多爾濟雅喇木

丕勒一等台吉敏珠爾多爾濟琳沁多爾濟

巴林親王品級多羅郡王巴圖固山貝子德

勒克一等台吉賽尚阿奈曼多羅郡王拉旺

喇布坦一等台吉巴勒楚克喀喇沁多羅郡

王滿珠巴咱爾固山貝子丹巴多爾濟輔國

公拉扎布和碩額駙永庫爾忠索諾木巴勒

丹一等塔布囊品級二等塔布囊格勒克薩

木魯布多羅額駙扎密揚多布丹固山額駙

扎特納吉爾第土默特多羅貝勒索諾木巴

勒珠爾固山貝子色布騰喇什敦漢固山貝子桑濟扎勒德威多爾濟鎮國公納木扎勒多爾濟多羅額駙巴勒丹二等台吉巴勒珠爾喇布坦濟克濟扎布固山額駙扎爾瓦翁牛特多羅額駙班珠爾右翼科爾沁和碩親王旺扎勒多爾濟喀爾喀和碩親王固倫額駙拉旺多爾濟多羅郡王三丕勒多爾濟多羅貝勒齊默特多爾濟輔國公沙克都爾扎布公品級扎薩克一等台吉貢桑班巴爾一等台吉烏爾占扎布杜爾伯特和碩親王車凌烏巴什敦漢多羅郡王齊默特魯瓦蘇尼特多羅郡王車凌衮布多羅貝勒恭桑扎勒浩齊特多羅郡王敏珠爾多爾濟回部郡王品級多羅貝勒哈第爾輔國公額色尹翁牛特多羅貝勒濟克濟扎布烏珠穆沁多羅貝勒旺楚克輔國公瑪哈布爾尼雅阿巴哈納爾多羅貝勒瑪哈巴拉固山貝子達克丹朋素克巴林固山貝子多爾濟喇布坦阿巴噶

固山貝子朋楚克土爾扈特固山貝子沙喇扣肯喀什噶爾三品阿奇木伯克固山貝子鄂斯瑞烏喇特輔國公恭格喇布坦喀喇沁輔國公溫都爾瑚鄂爾多斯輔國公丹津多爾濟郭爾羅斯扎薩克一等台吉阿喇布坦青海扎薩克一等台吉吹忠扎布衮楚克厄魯特三等台吉瑚勒哈齊及年班回部阿奇木伯克多羅善等十二人革布什咱安撫司諾爾布湛都爾等二十二人朝鮮國正使俞彥鎬等六人琉球國正使翁秉儀等四人及領侍衛內大臣等召左翼科爾沁和碩親王恭格喇布坦多羅郡王鄂勒哲特穆爾額爾克巴拜喇什端羅布巴林親王品級多羅郡王巴圖固山貝子德勒克奈曼多羅郡王拉旺喇布坦喀喇沁多羅郡王滿珠巴咱爾土默特多羅貝勒索諾木巴勒珠爾敦漢固山貝子桑濟扎勒右翼科爾沁和碩親王旺扎勒多爾濟杜爾伯特和碩親王車凌烏巴什

教漢多羅郡王齊默特魯瓦蘇尼特多羅郡王車凌衮布喀爾喀多羅郡王三丕勒多爾濟翁牛特多羅貝勒濟克濟扎布阿巴哈納爾固山貝子達克丹朋素克土爾扈特固山貝子沙喇扣肯喀什噶爾三品阿奇木伯克固山貝子鄂斯瑞等至

御座前賜酒成禮○是月山西巡撫明興奏謝

賞福字恩得旨一省之福若論汝一人則不宜賜矣 安徽巡撫書麟奏謝陞任兩江總

督學李吉奎

李

督恩得旨一切勉為之擴充識見為要○浙

江提督兼署黃巖鎮總兵陳大用奏擊獲在

洋行劫夥盜委員解省並護送經過黃巖所

轄洋汛之川省解閩米船現在查看巡洋弁

兵後歲暮暫回本任委叅將謝士超就近署

理彈壓得旨實力稽查此正要緊時慎之○

是年追予出師臺灣陣亡叅將楊起麟一員

遊擊邱能成等二員都司杭富一員三等侍

衛福克精額一員守備楊彰等二員祭墓贈

卹如例入祀昭忠祠○旌表孝子安徽等省

汪肇正等七名順孫雲南雷謙一名孝女江

蘇宋氏一口守節合例八旗閑散宗室寧得

保妻汪佳氏等四口護軍覺羅興平妻羅氏

等五口滿洲護軍校嘎雅妻鈕祜祿氏等九

十一口蒙古前鋒七星保妻李氏等三十口

漢軍馬甲朱家泰妻王氏等二十二口內務

府披甲得福妻張氏等五口奉天等省駐防

步甲潭色妻張氏等一百八口直隸等省民

高沛妻陳氏等四百九十五口夫亡殉節八

旗滿洲宗室兆福女伊昌阿妻一口江蘇等

省民胡世貴妻閻氏等十二口未婚守志直

隸等省民董文柱聘妻杜氏等十四口壽民

婦直隸等省民魏懷樸等二十一各口各給

銀建坊如例○一產三男直隸等省民麻佳

彥等七家○會計天下民穀數各省通共大

小男婦二萬九千二百四十二萬九千一十

八名口各省通共存倉米穀三千七百五十

五萬六千九百七十八石五斗四升五合零

實錄卷一百二十五

高宗

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十五

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十六

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事務處管理
吏部理藩院事務正副總辦滿洲都統世襲騎都尉軍功加七級隨帶加一級奉常加二級軍功紀錄一次臣慶桂
總裁官總纂官太子太傅文華殿大學士文淵閣領閣事稽察欽奉 上諭事務處管理刑部戶部工部事務
世襲騎都尉軍功加十九級隨帶加二級又加二級 著錄內大臣戶部尚書錢謙益滿洲都統軍功紀錄五次
奉常紀錄十四次臣德瑛總纂官太子少保工部尚書紀錄六次臣曹振鏞等奉

數修

乾隆五十三年戊申春正月甲子朔

上詣

奉先殿行禮○詣

堂子行禮○御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜皇子皇孫皇曾孫諸

王等宴○丙寅

上詣

雍和宮行禮。○諭上年河南歸德府屬各州縣因黃水漫溢田畝被淹節經降旨令該撫實力撫卹分別賑濟毋使一夫失所第念今春正賑已畢青黃不接之時民力不無拮据著再加恩將商邱寧陵睢州永城鹿邑柘城等六州縣被災十分極次貧民並九分極次加賑兩個月其被災九分次貧及七八分極次貧民加賑一個月以資接濟至被災五六分及勘不成災地方仍著該撫察看情形酌量分別辦理該撫務須督飭所屬實心經理俾災黎均霑愷澤以副朕加惠閭閻有加靡已至意該部即遵諭行。○又諭上年安徽省亳州蒙城等各州縣因黃水漫溢田畝被淹節經降旨令該督撫等實力撫卹分別蠲賑毋使一夫失所第念今春正賑已畢青黃不接之時小民生計維艱著再加恩將亳州蒙城懷遠鳳陽靈璧宿州五河泗州盱眙天長等十州縣被災九分十分貧民無論極次概行

加賑一個月以資接濟其衛所饑口及貧生兵屬並著照正賑之例一體辦理至被災五六七八分貧民及勘不成災之區仍著該督撫察看情形或借給口糧籽種或減價平糶分別酌辦該督撫務須督飭所屬實心經理俾災黎均霑愷澤以副朕惠愛閭閻用普春祺至意該部即遵諭行。○又諭上年甘肅皋蘭金縣等州縣被旱成災節經降旨令該督實力撫卹分別賑濟毋使一夫失所第念今春正賑已畢青黃不接之時民食不無拮据著再加恩將皋蘭金縣金安等三縣被災貧民概行加賑一個月至狄道河州靖遠會寧沙泥州判等五處酌借口糧籽種以資接濟其各災區未完新舊正借錢糧著照該督原題概緩徵收仍著察看被災各屬情形如有缺種乏食之戶分別辦理該督務須飭屬實心經理俾災民均霑實惠以副朕軫念窮黎有加靡已至意該部即遵諭行。○福建巡撫

徐嗣曾奏前因省會緊要。遵旨駐省城督辦一切。茲准將軍福康安咨業已攻克賊巢。擒渠在即。撫卹難民。籌估城工。需員經理。省垣現俱寧謐。請將巡撫印務交藩司伍拉納護理。臣馳赴漳州。與督臣李侍堯面商內地各事宜。後即將庫貯巡視臺灣印帶赴臺郡。會同福康安等悉心籌畫。得旨好。一切勉為之。○丁卯諭上年陝西省華州華陰潼關三屬秋禾被水成災。節經降旨。令該撫實力撫卹。分別賑濟。毋使一夫失所。第念今春正賑已畢。青黃不接之時。小民生計維艱。口食恐不無拮据。著再加恩。將華州華陰潼關三屬被災七八分之極次貧民。普行加賑一個月。其被災六分及勘不成災之咸寧長安咸陽興平大荔等五縣。著該撫察看情形。酌借籽種口糧。以資接濟。該撫務督飭所屬實心經理。俾小民均霑渥澤。以副朕軫念窮簷普惠春祺至意。該部即遵諭行。○又諭上年臺灣辦理軍務。漳泉等府屬應付浙粵滿漢官兵及四

川湖南貴州各兵兼之糧餉軍裝鉛藥等項。絡繹過境。差務甚繁。資用民力之處最多。茲屆春祺普錫之時。大功即日告竣。自宜特沛殊恩。以示優恤。所有泉州府之晉江南安惠安同安漳州府之龍溪漳浦海澄詔安等八縣本年應徵錢糧著加恩蠲免十分之三。其浦城崇安建陽建安甌寧南平古田閩縣侯官福清莆田仙遊等十二縣應徵錢糧著蠲免十分之二。至福鼎霞浦福安寧德羅源連江光澤等七縣所有應徵錢糧著緩至五十四年麥熟後徵收。俾小民均霑渥澤。以副朕惠愛黎元有加無已至意。該部即遵諭行。○又諭現在臺灣府廳縣應行改建城垣。德成於工程事務。素為熟諳。著即馳驛速赴臺灣。會同徐嗣曾將該處應辦城工悉心估勘。○又諭阿奇木伯克貝子鄂斯瑪感恩奮勉。宣力多年。方資倚任。今來京陛見。甫經數日。聞其卧病。即命御前侍衛帶同御醫前往診視。今聞溘逝。朕心深為惻惻。著派豐紳濟倫前往

奠醊仍加恩賞銀五百兩以資辦理喪事○又諭曰吐魯番郡王伊斯堪達爾前入覲時朕觀其材具尚堪造就今散秩大臣鄂斯瑞病故所遺喀什噶爾三品阿奇木伯克之缺即著伊斯堪達爾補授前往喀什噶爾隨同明亮博興辦理事務伊斯堪達爾之兄色普拉弟丕爾敦等俱現在吐魯番著色普拉辦理游牧事務吐魯番大臣更當善為照料伊斯堪達爾著賞銀一百兩以為遷徙家口之需即於吐魯番官銀內撥給伊斯堪達爾雖係郡王在乾清門行走但初赴喀什噶爾阿奇木伯克任明亮博興諸事務須指示令照鄂斯瑞任內事宜辦理○諭軍機大臣等前據李侍堯奏聞得賊目陳泮懇請定限於十二月初八日以前將林爽文獻出日內盼望福康安奏報擒獲逆首之信正深懸注今據孫士毅詢問進口船戶有十二月初十日前行擒首逆林爽文之語此信得自洋面往來商客自屬確實計福康安奏報之摺自己在途

不過日內即可奏到實信至摺內稱賊匪攻擾諸羅時元長莊等處營盤見賊勢利害不敢帶兵前進自屬輿情公論又稱福康安一到即親身統兵痛剿賊匪殺進諸羅福康安進縣城時見百姓跪迎在馬上為之墮淚自係該處百姓被圍日久慶得更生福康安目擊情形為之憫惻真是乃心國家之良臣與朕同心至元長莊等處營盤見賊勢利害不敢輕進自係恒瑞普吉保二人畏葸觀望其咎均難解免著福康安將恒瑞普吉保二人罪狀分別輕重據實具奏○戊辰享太廟遣莊親王永瑞恭代行禮○遣官祭太歲之神○諭據浦霖奏善化縣民廖啟家現年百歲曾元繞膝請旨旌表等語廖啟家壽屆期頤慶延五世洵屬昇平人瑞特賜御書扁額並親製詩章以示寵榮所有應行加恩賞賚及建坊旌表之處仍著該部察例辦理○御製詩曰累洽民間多衍祥早聞兩報古和張速

茲廖氏朋三壽同彼元孫盡一堂民慶允為國之慶世昌敢曰化斯昌危明憂盛有成語保泰惟深惕不遑○

御書扁曰期頤衍慶○是日起

上以祈穀於

上帝齋戒三日○己巳諭曰穆騰額奏據蘆東商人王得宜等呈稱現在大兵進剿臺灣逆匪即日已就蕩平海口安恬無虞驚擾慶成寧謐率土同情長蘆商人願輸銀三十五萬兩山東商

人願輸銀一十五萬兩共銀五十萬兩少抒報効等語該商等因聞臺灣賊匪蕩平同深歡慶請捐銀兩出自惻誠自應俯如所請以遂其報効之忱至該商等踴躍捐輸尚屬急公並著該鹽政查明咨送吏部照例議敘以示獎勵○又諭曰哈密吐魯番三部皆國家世僕其餘各城回人雖經朕平定新疆時歸降但効力幾三十年奮勉急公是以分別施恩賞給王貝勒貝子公台吉等封爵乾隆四十八年曾令理藩院查

明伊等封爵或定為世襲罔替或定為出缺後降等承襲雖係照例辦理但伊等來歸年久共感朕恩各勤職業如哈密郡王品級貝勒額爾德錫爾之始祖額貝都拉歸誠以來已歷數世額爾德錫爾之祖玉素布在軍營勤勞懋著貝子鄂斯瑞之父鄂對在軍營奮勉封授貝勒品級後因罪削爵旋以鄂斯瑞抒誠効力復封貝子色提巴爾第先在軍營奮勉又在阿奇木伯克任內數年留心辦事公伊巴喇伊木一等台

吉鄂囉木咱卜二等台吉巴巴阿布勒丕爾敦三等台吉阿卜都呢咱爾帕爾薩等所得封爵或因軍前効力封授或因伊祖父功績賞給若照原議於出缺後降等承襲日久遞降殊非朕撫恤回衆之意著加恩將額爾德錫爾色提巴爾第鄂斯瑞伊巴喇伊木鄂囉木咱卜巴巴阿布勒丕爾敦阿卜都呢咱爾帕爾薩等十人現襲之王貝子公台吉等封爵出缺時不必降等俱著世襲罔替以示朕優恤回部世僕之至意

○又諭前次瞻觀來京之庫車四品伊什罕伯克阿克伯克在途病故所遺員缺例將本處應陞之伯克等揀選奏補此次著明亮陽春保等暫停揀補俟鄂斯瑞之子邁哈默特鄂三到庫車時即將伊補放令其隨同該處大臣等學習事務○諭軍機大臣等據李奉翰奏清江浦正越二閘年久塌卸請酌量補修一摺內稱該閘因連年河湖異漲閘牆漸就塌卸阿桂前赴邵伯一帶看工時亦曾見該閘塌

卸情形現在李奉翰親往勘驗應就其塌卸處所拆卸修補共估需銀二千一百餘兩等語清江正越二閘既因年久塌卸牆石且據稱阿桂於赴邵伯勘工時曾經目睹自應修補完整以利漕運但前據李奉翰奏請添建邵伯隄工一事朕意該處向無隄工民由廬舍並未被淹何以忽議添建因令阿桂就近查勘嗣據阿桂勘明此項隄工實可無庸辦理是李奉翰前奏竟係輕信屬員之言以為

藉端冒銷地步今因邵伯隄工既經停止建築復又請修清江二閘工員等或借此工程希圖沾潤在所不免現在李奉翰業已來京陛見止有書麟在彼書麟係該省總督兼管河工務須督同承辦之員實心查勘覈實估計興工辦理於重運未到之前趕修完整總期帑不虛糜工歸實用毋任工員稍有浮冒方為妥善○庚午

世祖章皇帝忌辰遣官祭

孝陵○

上詣

南郊齋宮齋宿○諭上年直隸宣化府屬各州縣雨澤愆期田禾被旱成災節經降旨令該督分別賑濟毋使一夫失所第念今春正賑已畢青黃不接之時民食不無拮据著再加恩將保案宣化萬全懷安西寧懷來蔚州等七州縣成災七分以上之極次貧民概行加賑一個月並將本年應徵地糧暨節年應徵

新舊錢糧倉穀緩至本年秋後徵收以紓民
加其被災六分以下及勘不成災地畝仍著
該督察看情形酌借口糧籽種以資接濟該
督務須督飭所屬實力經理俾災黎均霑愷
澤以副朕敷惠畿甸用普春祺至意該部即
遵諭行○又諭上年山西省大同府屬各廳
州縣被旱成災節經降旨令該撫實力撫恤
分別賑濟毋使一夫失所第念今春正賑已
畢青黃不接之時民食不無拮据著再加恩

將豐鎮廳渾源州應州大同天鎮懷仁山陰
陽高廣靈等九廳州縣被災七八九分之極
次貧民再行加賑一個月其被災六分及勘
不成災村莊並被霜較早收成稍歉之左雲
右玉二縣貧民酌借一月口糧以資接濟該
撫務須督飭所屬實心經理俾災黎均霑愷
澤以副朕惠愛閭閻用普春祺至意該部即
遵諭行○辛未祈穀於

上帝

上親詣行禮○諭軍機大臣等據明興奏報山
西境內河清獻瑞一摺內稱接據永寧州等
十三州縣稟報黃河自十二月初七八日漸
次澄清至二十八九日時屆二旬河水徹底
澄清可鑑共計一千三百餘里等語此不足
為誇美已於摺內批示矣國家景運光昌太
和翔洽惟在年穀順成豐綏屢告五風十雨
普被和甘乃為昇平瑞應至歷代史策侈陳
符瑞大率出於傳會鋪張無關實政即如麟
遊鳳翥固為僅見嘉祥然亦必須來遊極澤
翔集殿庭得之目睹方足傳為盛事若不過
騰章入告並無指據亦祇屬粉飾虛詞不足
為信至河水澄清雖亦間有之事但似此侈
陳祥瑞誇示休徵殊屬無謂况上年黃河於
睢州十三堡地方隄工漫溢淹浸田廬甫經
堵築完竣若以河清為獻瑞之驗又何若安
流順軌竟無漫溢之更為嘉瑞耶且河水澄
清如以為地方大吏德政所致則明興歷任

地方毫無整頓。試令伊自思。前在山東。何無嘉應。今署晉撫。又行何德政。而能致此祥瑞耶。封疆大臣。惟應實心任事。承流宣化。使吏治民生。共臻上理。方為稱職。倘因此等事。屬僅見。臚陳祥應。即宣布史館。予以褒嘉。而遇有災祲。即加之督責。勢必至身任封圻者。藉端粉飾。爭相效習。以博虛名。而於地方水旱偏災。或恐干譴。竟至諱匿不報。於政體民生。大有關係。現在晉省既有河清之事。則下游各省。自必由漸澄清。該地方官不奏則已。倘亦有似此具奏者。再將此意明降諭旨。以示朕敬。

天勤政。以實不以文。至意。將此先諭明興知之。不必稱揚其事也。○壬申。

上御紫光閣。賜蒙古王貝勒貝子公台吉及回部阿奇木伯克等並金川土司。朝鮮國琉球國使臣等宴。○諭軍機大臣等。連日以來。盼望擒獲逆首之信。甚為焦切。茲接到奏報。祇

係拏獲林爽文父母家屬。未足為快。且摺內稱林爽文家屬。潛匿水裏番社。福康安等遣義民社丁。令其擒獻。曾繕摺具奏之處。此摺亦尚未遞到。而本日摺內。亦未詳細聲敘。殊未明晰。此等逆首親屬。均係罪不容誅。今業經擒獲。自應解京辦理。但林爽文罪惡貫盈。性同梟獍。既不尊君親上。豈復顧其父母家屬。現雖將伊全家拏獲。而林爽文尚未就擒。自仍在各番社潛藏。希圖奔竄。他處林爽文

係首惡渠魁。若不生擒。解京盡法處治。何以彰憲典而快人心。福康安在大里杪。水沙連等處駐劄。惟招致番社。懸示重賞。令其擒拏。實屬過於持重。況現在所帶巴圖魯等及官兵內之四川屯練。貴州等省兵丁。最為驍健。於登山履險。更屬趨捷。如林爽文逃入內山。生番等竟敢將伊潛匿。何難勒兵直入內山。分路搜捕。生番等見官兵已入番境。益加震懾。豈有不爭先擒獻之理。且據福康安奏南

路藤豆茅港尾等處俱有賊匪數千攻擾又大武壠有賊匪千餘搭寮居住是郡城道路雖已開通而該處賊匪尚在窺伺滋擾實屬可恨可惡此等賊匪必係莊大田夥黨現在常青在府城駐守兵力不多未必能肅清南路福康安等既經攻克賊巢正當乘勝深入速將林爽文剋期拏獲即移兵南路搜捕莊大田殲除逆黨自成破竹之勢若似此曠日持久安知非林爽文潛匿不出思欲於北路

牽綴官兵仍令其夥黨在南路肆擾即現在番社等擒拏林爽文家屬或亦係藉此搪塞以為緩兵之計仍私將林爽文放逸令其潛行逃竄設林爽文又從內山逃往南路與莊大田會合狼狽為奸復行煽聚更復成何事體耶至漳泉廣東民人前原有酌令分莊居住之旨既而思之其事似屬難行其禁止攜眷一節亦因舊有成例是以詢及但臺灣地方戶口甚繁即內地民人不准其攜眷前往

而民人到彼後即在臺灣另置家室亦難禁止此等事祇須於勦捕完竣後將是否可行之處歸入善後酌量妥辦今林爽文尚未就擒何暇辦理及此至現在臺灣官兵為數甚多足資搜勦堵截之用又何須該處義民幫助聲勢福康安等功在垂成轉心存懈弛試令福康安等自思受朕如此重恩乃並不出力自効豈以朕有賞而無罰耶○又諭本日福康安遞到六百里加緊夾板一副外有紅旗一面及拆閱奏摺祇係拏獲林爽文之父母家屬尚未將首逆擒獲此次臺灣逆匪滋事不過么膺烏合之衆易於撲滅即日林爽文就獲亦不值用紅旗奏報況現在首逆尚未拏獲沿途驛站何得混行編寫紅旗隨同軍報馳遞實非尋常錯誤可比著沿途各督撫於所管驛站逐一查明即將該處地方官及驛站員弁嚴行查叅治罪再福康安尚有十二月初七日拜發一摺至今尚未奏到自

係沿途驛站馳遞耽誤並著各該督撫一併查明覆奏尋兩江總督書麟奏本年正月初六日由京口驛接遞拏獲逆首家屬奏摺續到紅旗並無摺匣同遞當經飭查旋准浙撫知會係桐廬縣混發傳旗富陽縣率行轉遞現在查奏叅處至福康安十二月初七日拜發之摺係正月初六日遞到浙境初八日由宿遷遞交山東尚無遲誤其是否在洋風阻現飭閩省查覆下部知之○癸酉

上詰

大高殿行禮○詰

安佑宮行禮○幸圓明園○諭軍機大臣等前據李侍堯奏賊目陳泮前來投誠並將妻子為質自限十二月初八日以前擒拏林爽文來獻今福康安奏到之摺係十二月十三日拜發而陳泮並未將林爽文擒獲獻出是陳泮自請勒限之語不過信口混供並不能立功自贖即應將該賊目拏解來京究辦此等

賊人頭目當逆首潰敗奔竄之時惟知偷生逃死保全軀命豈能顧其家屬即如林爽文之父母妻弟俱經拏獲而林爽文仍復潛匿不出可見此等逆匪性同梟獍豈尚有所繫戀自行投到希圖保其父母家屬身命之理是陳泮雖將其家屬留營為質亦不過故為掩飾自圖逃竄之計福康安豈可深信即聽其入山躡探置之不問設陳泮逃入內山尋獲林爽文轉狼狽為奸告以軍營實情同行

逃竄則既不能擒拏逆首適以助其羽翼豈不大錯况頻兵不前曠日持久則生番等見官兵聲勢伎倆不過如此又何所畏憚轉恐為其所輕豈肯將首逆林爽文即時擒拏獻出乎但福康安不可因奉有飭諭心懷畏懼轉致中無把握福康安係朕股肱心膂之臣今膺此重寄本應一力擔當確有定見方為不負任使若既不能辦理妥速而因有申飭之旨更致遇事游移則其不是更大至柴大

紀貪劣各款並非無據。福康安等訪查得實。即應列款嚴叅。不必因此時尚在用兵。稍為容隱。現在勦捕事務。雖尚未竣。豈辦一柴大紀。即慮其去而從賊乎。福康安等惟應據實叅奏。朕即不肯沒其守城微勞。亦自另有裁奪也。○甲戌。諭據福康安奏。拏獲偷渡人犯一摺。內稱。據總兵李化龍稟報。都司陳邦光等在鹿仔港附近之番仔垵海口。拏獲謝胡船一隻。並無執照。內載康節等男婦一十九

名。口內孫兩。陳昌李福三名。頭上皆有傷痕。謝牛一名。供認曾經從賊。又總兵陸廷柱稟稱。汎弁在鹿耳門外。拏獲李淡。無執照。船一隻。共載張桃等男婦二百四十餘名。口訊係自內地偷渡臺灣。遇風飄到鹿耳門等語。此事甚屬可疑。臺灣地土膏腴。素稱沃壤。向來內地民人。或私渡謀食。亦所不免。但現在臺灣逆匪滋事。該處民人。遭其擾累。生計維艱。尚或因無地可耕。紛紛遷避。若內地民人。前赴

該處。則不惟口食無資。且恐身罹殘害。是此時斷不應有此偷渡臺灣之事。自必係鹿仔港等處沿海賊匪夥黨。現經官兵勦捕。勢已窮蹙。思欲偷生逃死。或將入內地潛匿。或將由海道遠颺。因詭稱內地民人。私載船隻。以爲免脫之計。不可不嚴行究辦。福康安現在該處搜捕逆首。所有此等偷渡各犯。務須嚴行訊鞫。根究得實。從重定擬。仍一面分派弁兵。在鹿仔港鹿耳門。沿海各口岸。嚴密稽查。毋使賊匪夥黨。私自竄逸。並著李侍堯查明此等私渡船隻。係從何處口岸逸出。即將該地方官及防守各員。弁一併查明。叅奏。○諭軍機大臣等。福康安奏到之摺。係初七日拜發。在前日奏到十三日所發奏摺之前。該處賊匪阻溪自固。壘砌石牆。安設賊卡。聚至萬人。非一朝一夕所能為。福康安於攻破大里代賊巢後。若即統領大兵。乘勝追殺。則賊匪紛紛逃竄。救死不暇。豈尚能收合夥黨。聚集

萬人從容壘砌石牆設卡拒守。即使攻破大里杙後。或有堵拏餘匪。撫輯彈壓事宜。亦祇應於將領中酌留數人。帶領弁兵在彼。儘足以資料理。福康安即當親統大兵。乘勝深入。搜捕賊匪。即或逆首逸入內山。生番等懾於軍威。亦必即時擒獻。乃官兵於十一月二十五日。攻破賊巢。直至十二月初四日。始由平林仔發兵前進。計期已閱十日。使賊匪得以乘暇收合餘黨。於集集埔豫為佈置。臨溪設卡。壘堵塞路。據險死守。幸而衆兵奮勇出力。攀援直上。將集集埔內賊營。全行勦洗。而首逆林爽文。又經乘間逃竄。此皆福康安等辦理遲緩。與賊以暇。若早至生番隘口。則並可不需此戰。或竟將林爽文即時擒獲。乃失此機會。實屬可惜。至從賊匪徒。雖經遵示投出。現在自不得不從寬貸其一死。但究非良善之人。將來總未便仍留該處。應於辦理善後事宜時。酌量分別遷徙他省內地安插。方為

妥善。○乙亥諭曰。恒瑞自臺灣帶兵赴援。觀望遷延。種種玩誤。又妄行奏請添兵。張大賊勢。若治以搖惑軍心之罪。即應按軍法立斬。豈福康安曾經屢次出兵。而於行軍紀律。尚未之知。幸而朕於勦捕事宜。先機籌畫。早命福康安前往督辦。恒瑞奏請添兵時。福康安已將次到彼。人心鎮定。不至為恒瑞妄誕之詞。遽有搖動。若彼時福康安尚未奉命前往。則臺灣祇有常青一人。其將領兵民等。見恒瑞係參贊大員。如此張皇失措。奏請添兵。必為其浮言所惑。心懷疑懼。阻其銳氣。不但臺灣全郡俱至動搖。即福建內地。亦皆人心惶惑。尚復成何事體。恒瑞妄言惑聽。本應即在軍前正法。前次朕所以稍從寬辦。不即將伊請兵奏摺發鈐治罪者。以彼時官軍勦賊。尚未得手。正值人心惶遽之時。若遽將恒瑞怯懦張皇之奏。宣播中外。既慮傳聞駭聽。衆恐外間無識之徒。以將軍參贊等勦捕賊匪。奏

請添兵。朕轉靳而不與。妄生議論。是以未即宣示。止降旨福康安。即令恒瑞回京。令勦捕事務。業已將次完竣。即是不須添六七萬大兵之明驗。恒瑞前此妄言之罪。自應覈辦。試問之福康安。現在豈待恒瑞請添之兵到彼。始能解圍破賊。攻克賊巢耶。恒瑞前次所奏。非妄言惑聽。而何。朕因念恒瑞年輕無識。且係宗室。姑援議親之條。不即寘以重典。僅令回京候旨。已屬格外施恩。乃福康安節次奏到之摺。曲為庇護。將恒瑞聯寫銜名。又屢於摺內聲敘恒瑞帶兵打仗。試思伊為滿洲大臣。衆皆打仗。伊不打仗。逃往何處乎。且屢經令福康安。向恒瑞逐款嚴詰。妄請添兵。搖惑軍心。是其首罪。乃福康安並不問此一條。轉為之多方開脫。且稱其打仗奮勉。仍請留於軍營。該處帶兵。如鄂輝、舒亮、普爾普等之遠勝恒瑞者。正復不少。豈必須恒瑞一人。其意不過遇有帶兵打仗。即可將恒瑞鋪敘功績。

冀朕加恩錄用。又前因保寧在四川將軍總督之任。足資倚任。而福建將軍在目前為要缺。是以將鄂輝調任福州。以資鎮馭。嗣因保寧補放伊犁將軍。川省現無熟悉番情之人。故仍將鄂輝調回成都。而以常青仍為福建將軍。福康安具奏時。尚未知保寧調任伊犁之信。何以欲將鄂輝仍留成都。福康安不過因恒瑞本係福州將軍。希冀仍留恒瑞原任之意。福康安自問。常青不如恒瑞之為將軍耶。此等處。豈能逃朕洞鑒。福康安由垂髫養經朕多年訓誨。至於成人。今甫經委任。畀以軍旅重寄。即現在勦捕賊匪。攻克賊巢。皆朕指授方畧。再三訓示。將士等踴躍用命。始能所向克捷。今甫經解圍得勝。朕即優加獎賞。福康安自當倍加感奮。迅速擒拏賊首。剋日蕞功。以期承受恩眷。乃竟敢藉此微勞。袒護親戚。此等伎倆。豈能於朕前嘗試耶。本應從重治罪。因念其現在帶兵勦賊。業經攻克。

巢穴拏獲逆犯家屬姑從寬免其深究著傳旨嚴行申飭福康安惟當益知愧懼力改前非若能將林爽文莊大田生擒解京尚可將功補過仰承恩眷至恒瑞仍著福康安遵照前旨革去職銜伊係宗室不忍拏問令其自備資斧速行來京交部治罪至輕亦當發往伊犁効力贖罪以示懲儆是福康安愛之實所以害之也朕辦理庶政於臣下功罪賞罰嚴明惟視其人之自取而於軍旅重務有功即賞有罪必罰予奪昭然是以人思奮勵用能平定西陲大小金川拓土開疆大功屢告即此臺灣逆匪雖係叢爾一隅皆經朕宵旰焦勞先幾決策未嘗以老而怠而昏而於諸臣功罪尤無一毫假借內外大臣皆當明喻朕意○諭軍機大臣曰林爽文莊大田等罪惡貫盈為渠魁首惡非若大名案内之段文經可比段文經不過一無藉奸民即使竄匿稽誅不至慮其復行滋事然日久不獲已屬

不成事體況林爽文肆行不逞罪大惡極今以如許重兵前往勦捕必應設法生擒解京極刑處治豈可容其漏網遽得謂之完事乎若此時不行速獲或至逆首逃往他處將來大兵徹後復潛出煽聚更復成何事體總之福康安等若已將林爽文拏獲於上元前後奏到即係伊福分自可承受恩眷倘此數日內竟無擒渠報到朕即因伊等打仗奮勉不深究遲滯之罪伊等自思亦何顏仰邀懋賞耶計此旨接到之前福康安等自己在彼設法擒拏斷不至俟此旨到日始行上緊搜捕但朕宵旰屢懸倍深焦切不得不諄諄告誡福康安等務須益知愧奮勉圖奏績○以署鑲黃旗漢軍副都統阿克棟阿為西安副都統○丁丑

上御奉三無私殿賜皇子皇孫皇曾孫諸王等宴○諭據琅玕奏兩浙商人何永和等呈稱臺灣逆匪剋日勦除商等志切同仇共深歡

忤兩浙接壤閩省海濱寧靜引鹽得以暢銷願捐銀四十萬兩以為賞卹兵丁之用等語該商等以浙閩境壤毗連逆匪蕩平引鹽得以暢銷念切輸將自應俯准所請以遂其報効之忱所有商捐銀四十萬兩即准其解閩備用至該商等踴躍捐輸殊屬急公著該撫查明咨部照例分別議敘以示獎勵○諭軍機大臣等據孫士毅奏密陳該省提鎮及兩司道府賢否既出具考語分別繕單隨摺具

奏又因屆五年分別總兵等次之期復將各鎮等第開單一同具奏批覽之下殊覺繁複前因各省督撫亦有似此者已令軍機大臣另定章程除每年密奏提鎮兩司道府等賢否仍照向例出具考語開單隨摺具奏外其大計軍政提鎮藩臬考語及五年總兵等第止須咨部存案由部彙奏該督撫等毋庸再行開單隨摺陳奏並通行各省遵照想孫士毅拜摺時尚未接到此後應即照新定章程

辦理以免清混除將孫士毅所奏總兵等第單發交該部外將此諭令知之○又諭前次福康安自十一月二十五日攻破賊巢連至十二月初四日始由平林仔發兵前進使賊匪得以乘暇收合羽黨於集集埔豫為佈置據險抵拒已屬辦理遲緩迨官兵攻克集集埔後於十三日在水裏社拏獲逆首家屬福康安等若能及早帶兵直往小半天一帶搜捕則賊匪窮蹙奔逃救死不暇豈能收集黨

夥二千餘人於山頭豎柵壘牆搭藁拒守且官兵進攻山梁時賊匪投石放鎗抵死抗拒彼時林爽文自必尚在該處潛匿若福康安等於賊匪未經佈置之先即已統兵前至該處林爽文豈能據險抵禦屢次使之乘間逃逸乃福康安等又不即時前進延至十八日始帶兵分路攻勦距拏獲逆首家屬時中間又隔五日使賊匪得豫為扼險死守之計是福康安不但有失機宜且使賊匪得以乘暇

設備又須帶領官兵到處攻剿。即福康安自為計。豈非舍易而就難耶。再披閱圖內。現於山外各路口。安設營盤不下二十餘處。計每處派兵四五百名。已不下萬餘。似此於無甚緊要處。零星分派。置之無用之地。豈不又如從前恒瑞。普吉保於鹽水港。笨港一帶。分兵零星堵禦。致兵力以分。而見單乎。況福康安在東埔納駐劄。距逆首逃竄之埔裏社尚遠。何不前至舒亮駐劄之歸仔社。劄營。且現在

分兵堵截。自應酌留一二通內地隘口。毋庸設兵。使林爽文見此數處無兵防堵。或由該處仍逸入內地。不難四路圍截。立就擒獲。今將各隘口。悉行設兵堵截。是轉恐其入山不深。驅之使入。豈不失計。福康安此時。應將圖內硃筆點出各隘口。酌量將官兵撤去。合兵一二萬。福康安竟當親自統領。直入埔裏社內山。躡探林爽文潛匿處所。跟蹤追捕。即該處生番語言不通。與禽獸無異。今林爽文潛

匿內山。亦難與生番通語聯絡。其所帶夥匪。僅止一二千人。尚可四處竄逸。不畏生番。豈福康安帶領大兵數萬。轉慮生番野性難馴。有所畏怯乎。若生番等震懾兵威。將林爽文擒獻。固屬甚善。設使冥頑助逆。即趁此兵力。亦無難將生番等痛加殲戮。總之林爽文逃匿何處。福康安即帶兵向該處跟蹤追剿。以期必獲。此皆福康安節次辦理遲緩。自貽伊戚。其跋涉勞苦。皆所自取。福康安務奮力速

進。生擒逆首。以副委任。○戊寅。

上詣

安佑宮行禮。○御正大光明殿。賜朝正外藩等宴。召科爾沁和碩親王恭格喇布坦。旺扎勒多爾濟。多羅郡王鄂勒哲特穆爾額爾克巴拜。郡王喇什噶勒當。巴林親王品級多羅郡王巴圖固山貝子和碩額駙德勒克喀喇沁多羅郡王滿珠巴咱爾。土默特多羅貝勒索諾木。巴勒珠爾。教漢多羅郡王齊默特魯瓦

固山貝子桑濟扎勒杜爾伯特和碩親王車
凌烏巴什奈曼多羅郡王拉旺喇布坦蘇尼
特多羅郡王車凌衮布喀爾喀多羅郡王三
丕勒多爾濟翁牛特多羅貝勒濟克濟扎布
烏珠穆沁多羅貝勒旺楚克阿巴哈納爾固
山貝子達克丹朋素克土爾扈特固山貝子
錫喇扣肯王隴哈什四品阿哥木伯克多羅
善賽哩木四品伊沙噶伯克貝克濟阿克蘇
五品噶匝納齊伯克尼咱爾默特羊布什咱
安撫司諾爾布湛都爾色塘宣撫司吹忠扎
布穆壘安撫司桑結扎布鄂克什安撫司丹
怎嘉木錯土舍雅滿塔爾等至御座前賜酒
成禮○順天府行鄉飲酒禮

大清高宗法天隆運至誠先覺體元立極敷文
奮武孝慈神聖純皇帝實錄卷之二百九十六

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十七

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務五品頂戴滿洲副都統世襲騎都尉軍功加七級隨帶加一級尋常加二級軍功紀錄一次臣廣柱

總裁官經筵講官太子太傅文華殿大學士文淵閣領事稽察欽奉 上諭事件處管理刑部主事庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲副都統軍功紀錄六次

尋常紀錄四次臣德瑛經筵講官太子少保工部尚書紀錄六次臣曹振鏞等奉

欽修

乾隆五十三年戊申正月己卯

上御正大光明殿賜大學士尚書等宴○諭軍
機大臣曰虔禮寶奏到委署知府及撥解地
丁銀兩各摺已照例交部矣惟所奏十一月
分糧價單內稱桂林太平思恩泗城鎮安等
府屬糧價俱與上月稍減等語是該處米價
漸就平減民食自必稍為寬裕及閱覆奏嚴
查奸商囤戶摺內又稱粵西民間素鮮蓋藏
本年晚收又因得雨稍遲收成僅止七分米
價未能大減等語前後自相矛盾該省既因

收成歉薄粵東商販又絡繹赴粵西糴買以
致米價未能平減何以糧價單內又有與上
月稍減之語所奏殊未明晰著傳諭孫永清
即行確查該處糧價實在增減數目民食是
否拮据或須借給籽種酌予接濟之處據實
具奏候朕酌量加恩不得稍有諱飾致令向
隅○又諭前次派令福康安赴臺灣辦理勦
捕逆匪事務福康安奉命時即不免有畏難
之見中途屢次奏請添兵經朕再四降旨詳

悉開導彼時朕深慮福康安未必能迅速蕙
功已諭令奎林星馳赴京原欲令其前往臺
灣幫同帶兵勦捕並令阿桂赴閩駐劄廈門
調度一切以資策應及至福康安帶兵渡洋
由鹿仔港進兵數日之間即能直抵嘉義縣
城殺賊解圍打通道路並即攻克斗六門直
抵大里杙摧破賊巢痛殲匪衆屢奏捷音朕
初不料其辦理如此迅速為之喜出望外是
以不次加恩以示優獎乃福康安屢與賊人

以暇致失事機。今林爽文業經竄入內山。僅將其家屬拏獲。豈得為之藏事。又焉有官兵始終曠日持久。在彼等候搜捕之理。且生番等頑犢性成。直與禽獸無異。祇可懾以兵威。不可徒事招致。與之講解。況各社生番不下數萬。豈能一一感化。一一賞賚。搜捕機宜。全貴迅速。不獨擒拏逆首為然。即如尋常追捕。亦須趁勢及早擒拏。若稍涉延緩。往往乘間遠颺。卒至漏網。上年直隸大名案內首犯段文經。亦因該督等不即查拏。以致該犯遠遁。至今未獲。而林爽文一犯。更非段文經可比。今窮蹙之際。尚敢率領夥黨二千餘人。竄入內山。設不即時拏獲。或復行糾合南路賊匪。煽聚滋擾。或繞出大兵之後。仍在大里杙截掠軍糧。皆不可知。爾等亦曾思及此否。至常青本日所奏。不過敷衍塞責。常青在府城駐兵日久。並不能督率將弁。將南路賊匪痛加剿殺。廓清道路。竟至一籌莫展。實屬無能。常

青者傳旨嚴行申飭。又昨據福康安奏。臺灣二字。似應另易嘉名等語。所奏殊可不必。前次將諸羅縣改名嘉義。原因該處義民幫同官兵守城殺賊。咸知大義。甚堪嘉尚。是以特改縣名。用示旌異。至臺灣地方。自聖祖平定後。設立府縣。即以臺灣命名。沿用至今。其土語與字音。偶有訛用之處。亦無甚關係。況並未之前聞。自不當輕議更改。即此時另改他名。而臺灣二字沿習已久。人亦必仍稱舊名。是即更改亦屬無謂。此皆捨正務而留心於無用之地矣。著傳諭福康安。於辦理善後章程內。祇須將該處改建城垣。添設水砦。弁兵一切應辦事宜。悉心籌酌。妥協務期一勞永逸。其更改地名一節。毋庸提及。亦不必形之言語也。○庚辰。諭軍機大臣等。據勒保奏。密陳兩司道府賢否一摺。開單進呈。並另摺開具陝省藩臬考語具奏。前因各省督撫具奏提鎮兩司道府考語。開單繁複。已令

軍機大臣酌定章程。除將提鎮兩司道府考語於年終照例密陳。隨摺開單具奏外。其大計及軍政考語。祇須咨部存覈。毋庸另單陳奏。以免淆混。想勒保具奏時。尚未接到。此後務照新定章程辦理。毋得重複開單。致多牽混。○又諭曰。徐嗣曾奏。長樂縣監犯池唐佐等五名。同時脫逃。該縣陳德馨。因辦差赴省。經該縣典史會同營員。先後捕獲。池唐佐。何厚厚。林來順。三犯。尚有林灼灼。張順尊。二名。未獲。請將該縣陳德馨革職。勒限協緝。典史王若恭。革職。拿問。該管各上司。交部議處等語。此等監禁重犯。自應嚴密看守。乃管獄有獄各官。並不小心防範。越獄至五名之多。玩縱已極。況現在正值臺灣勦捕逆匪之時。其餘匪竄入內地者。一經盤獲。俱應收禁審辦。各處監獄。尤須加倍慎重。若亦似此疎玩。致匪犯得以乘間脫逃。更復成何事體。不可不嚴示懲儆。所有玩視監獄之典史王若恭。著

革職。拿問。長樂縣知縣陳德馨。亦著革職。拿問。署福州府知府田尹衡。兼攝福糧通判李振文。著交部嚴加議處。該撫徐嗣曾。署按察使戚蓼生。督糧道凌廣赤。亦著交部議處。其未獲林灼灼。張順尊。二犯。著該護撫嚴飭地方官。實力查拏。務獲。毋使免脫漏網。所有禁卒人等。有無賄縱情弊。並著該護撫從嚴究辦。定擬具奏。○又諭曰。福康安前此具奏。柴大紀。為人狡詐。不可深信。一摺。於柴大紀如

何貪劣。如何誤事。如何懼賊。不進兵實跡。並未列款。參劾。經節次降旨飭諭。茲據軍機大臣奏。福康安有寄伊等公信一件。內稱。柴大紀守禦縣城。並非伊之力量。福康安到縣城時。面見柴大紀。形貌並非勞瘁。馬匹亦皆臃壯。城中糧食。並未斷絕。其接奉諭旨。不肯帶兵出城一節。亦係義民等不肯將伊放出。伊亦畏賊不敢出城。守諸羅一事。朕不忍以為柴大紀之罪。至於其他聲名狼籍。縱兵激變。

不肯帶兵勦賊。柴大紀既有此等情節。福康安於具摺時。何不逐款指出。據實參奏。即或因縣城甫經解圍。未便即將柴大紀參劾。亦應將以上各情節。隨摺寄知軍機大臣。令其代陳。朕亦得以悉其原委。可無須再三飭諭。乃福康安既未於摺內列款糾參。又不早寄知軍機大臣代奏。試思柴大紀在縣城被圍日久。其奏到接奉諭旨。不肯帶兵出城一摺。披閱之下。朕為之墮淚。即在朝諸臣。凡有人心者。亦無不以柴大紀竭力守城。稱其義勇。是即柴大紀小有過失。亦當錄其大功。而宥其微眚。豈能據福康安所奏柴大紀為人狡詐。不可深信一語。遽治以無名之罪。若因此籠統虛詞。即將有功之人。加以罪譴。又何以服衆心。而示天下耶。此事福康安具奏含糊。固難辭咎。而李侍堯心存容隱。其咎較之福康安為尤重。前聞李侍堯之諭。尚未覆奏。想亦難為措詞耳。本日常青所奏。總不過敷衍。

塞責。殊屬無謂。前因其初至郡城。調度一切。尚為妥協。且伊已年老。尚能親自帶兵打仗。是以賞戴雙眼花翎。以示獎勵。今半載以來。株守郡城。毫無出力。念其尚無大過。與恒瑞之搖惑人心者有間。伊於閩省情形。尚為熟悉。業經補用福州將軍。伊自當照將軍職分。戴用單眼花翎。○辛巳。諭軍機大臣曰。福康安等自攻克小半天後。該處距埔裏社不遠。各路分派之兵。當早已會集。合力搜捕逆首。林爽文。自必早就擒獲。日內亦應有奏報。擒渠信息。何以尚未見奏。到總之逆首林爽文。若於此數日內。奏報擒獲。方為妥協。設再遲延日久。恐逆首輾轉潛匿。搜捕較為費力。此時福康安既已派兵在內山各隘口。分路堵截。其內山東面大洋。並無口岸。自無慮其逃竄。而北路又有熟番等。幫同官兵堵截。亦難竄逸。惟向南路山徑毗連。或林爽文竟從此路逃竄。與莊大田聚合一處。該處俱屬內

地不難分派官兵悉力勦捕將賊目賊首一併擒獲福康安惟當倍加奮勉探明逆首逃往何路跟蹤追捕立就擒縛毋令乘間遠逸若首惡渠魁稽誅漏網竟至全無下落尚復成何事體耶朕為此事日夜焦勞著再傳諭福康安務遵節次諭旨直入內山將林爽文迅速拿獲毋得再事遲緩○壬午諭曰全德奏據兩淮商人江廣達等呈稱臺灣逆匪梗化現在大兵進剿剋日蕩平商等志切同仇

心懷報稱情願公捐銀二百萬兩以備犒賞等語該商等因臺灣賊匪蕩平同深歡慶合詞抒悃輸納情殷自應俯如所請以遂其報効之忱至該商等踴躍捐輸殊屬急公著該鹽政查明咨部照例分別議敘以示獎勵○甲申諭軍機大臣曰福康安自十一月二十五日攻克大里代後遲至十二月初四日始由平林仔發兵及攻克集集埔在水裏社擒獲林爽文父母家屬又復延至十八日始攻

勦小半天輾轉稽遲此必係福康安到彼聽信恒瑞之言以生番素稱頑梗獷悍異常若官兵輕進必致擾動生番別滋事端是以徐徐進兵隘口惟事招致懸立重賞冀生番等自行擒獻殊不知此等生番可以威懾而不可徒以利誘況各社生番豈能一一賞賚其未經得賞者又安能望其出力為官兵擒拏逆首耶計小半天地方相距林爽文竄匿之埔裏社埔尾至遲不過三日路程官兵即可

到彼若將逆首擒獲自必具摺馳奏計本月十七八日即當奏到今已閱七日尚未據奏到擒渠之信又屬無望畏事之人稱內山係生番地界不種五穀該處生番俱係打牲覓食林爽文帶領夥匪數千即在彼潛匿無從得食但自林爽文竄入內山以後於福康安前此發摺時已閱二十餘日逆首等並未因人衆乏食盡皆餓斃又豈可徒在隘口堵截林爽文一日不獲即官兵一日不徹經年累

月與賊相持。雖駐兵日久。經費亦屬小事。但臺灣地方。一交三月。氣候即已炎熱。所調官兵內。如屯練貴州及別省兵丁。素來不耐濕熱。若至彼時。尚在該處駐劄。必致易生疾病。其氣更餒。或林爽文聞知官兵不習水土。多有疾病。竟乘間潛出滋擾。或攔截官兵運送糧餉火藥之路。或將官兵前往府城道路中間攔截。關係甚重。皆不可不慮。況南路莊大田。現在糾眾肆擾。常青祇辦自守。不能望其帶兵勦捕。設林爽文又在北路逞其狡猾伎倆。牽掣大軍。更復成何事體耶。朕意福康安此時與其在彼駐守。未能直入內山。將逆首即時擒獲。豈可老師糜餉。不為改弦易轍之計。約計此旨到日。已屬二月中旬。如福康安已早將逆首擒獲。帶兵前往南路搜捕莊大田。固屬甚善。倘福康安接奉此旨時。尚未生擒逆首。不可不急思變計。竟當趁氣候尚未炎熱之時。將各隘口官兵撤回。逕趨南路。將

賊目莊大田等擒獲。收復鳳山。肅清道路。其北路一帶。轉不妨示賊以隙。使林爽文聞知大兵業已撤去。或自內山逸出。希冀逃往他處。自尋生路。則逆首竄入內地。轉可易於搜剿。彼時福康安於廓清南路後。復移兵北向。四面截擊。攔其入山之路。自無難將逆首一鼓成擒。即使大兵撤後。難保林爽文不逃入內地。復行煽惑。但此亦不足為慮。前此林爽文在北路及嘉義滋擾。各處村莊民人。原俱被其煽誘迫脅。而大兵一到。無不立時殲除。解散紛紛奔潰。況林爽文當逃竄之餘。豈能復行糾結。即使潛相勾引。該處民人已知官兵聲勢。豈肯一一聽從。縱有聽糾入夥者。亦斷不能如前此之多。官兵再行搜剿。自必如摧枯拉朽。易於撲滅。反可淨盡根株。此事理之顯然者。福康安如尚未擒獲逆首。竟當遵旨而行。不必心存疑慮。倘更有何善計。較此為勝者。亦不妨速行。總期大功剋日告成。原不

必拘執也○丙戌

孝聖憲皇后忌辰遣官祭

泰東陵○

上詣

恩慕寺

恩佑寺行禮○諭曰柴大紀往嘉義縣勦捕賊匪縣城被賊圍困數月始終保守無虞是以特沛殊恩用昭懋賞嗣據福康安奏其為人狡詐不可深信朕尚以柴大紀有守城之功

未便以無據空言加之罪譴昨德成查勘海塘回京據奏風聞柴大紀自復任臺灣總兵貪縱營私廢弛營務並令兵丁私回內地貿易激變貽誤玩視賊匪種種釀成巨案朕以德成自浙回京距閩不遠所聞必非無因隨降旨令福康安李侍堯琅玕各行查實具奏旋據琅玕奏風聞柴大紀私令守兵渡回內地貿易每月勒繳銀錢又駐守嘉義縣時係畏賊不出並非實心守城本日又據李侍堯

奏臺灣戍兵多有賣放私回以致缺額其留營當差之兵亦聽其在外營生開賭窩娼販賣私鹽鎮將等令其每月繳錢經年並不操演經李侍堯咨查始據柴大紀開報現在戍兵實止共有七千五百名此外則以傷亡散失無可查覈為辭觀之不勝駭異又稱前歲賊匪滋擾府城時柴大紀恒怯不敢出城經永福等面加誚讓始帶兵出城等語用兵之道當賞罰嚴明此次賊匪滋事竟由柴大紀

平日廢弛貪黷積漸釀成豈可以守城微勞置之不問況柴大紀先在府城既畏賊不敢出戰又移駐嘉義縣時保護無虞全係兵民之力即所奏糧餉斷絕各情節亦多不實而其貪劣各款現經查有確據此而不嚴加查辦何以肅軍政而儆官邪柴大紀著革職拿問交福康安逐一嚴審明確定擬具奏其福建水師提督員缺著蔡攀龍補授所遺員缺著梁朝桂補授至常青在閩年久擢用總督

亦有年餘。柴大紀平日骫法侵漁廢弛營務。常青豈無所聞。且據李侍堯奏。於常青前往臺灣時。曾以該處戍兵缺少。札知常青。是常青渡洋時。李侍堯亦必將柴大紀各款蹟。一併向常青述及。常青既抵臺灣。見聞更確。況與永福楊廷理朝夕相見。斷無不將柴大紀各款。向永福等詢問。永福亦斷無不詳悉告知。常青之理。乃常青竟無一字奏及。殊屬昧良辜恩。有心徇隱。常青亦著革職。即交與福康安。一併嚴審據實具奏。其福州將軍員缺。著魁麟補授。魁麟資格本淺。念其係尚書查弼納曾孫。且人尚明白。是以加恩擢用。現在臺灣勦捕事宜。雖即日完竣。而善後各事。正需人經理。魁麟即由驛星速前往臺灣。隨同福康安學習辦理一切事務。所有四川建昌鎮總兵員缺。著張芝元補授。○諭軍機大臣曰。柴大紀貪縱營私各款。節經諭令福康安李侍堯詳悉查明。據實參奏。朕即向軍機大

臣言及。以李侍堯在閩浙總督任內。已將一載。於柴大紀貪劣各款。自必早有見聞。此次奉旨飭查。李侍堯祇可諉為未經查訪確實。及軍務緊急之時。未便將柴大紀參奏。以文其從前。不即參奏之過。今據李侍堯奏到之摺。果不出朕所料。李侍堯受朕厚恩。不意其扶同徇隱。竟至於此。福康安於具奏之初。雖未將柴大紀實在款蹟。據實指參。而朕因福康安既有此奏。始向德成查詢。是柴大紀貪劣各款。得以逐細究出。尚由福康安發其端。至李侍堯調任閩浙。已及一載。且駐劄廈門。常接臺灣地方官稟報。較之隣省傳聞。更為確切。既據稱到閩時。即風聞戍兵多有賣放私回之事。何以不即據實查參。此何等事。而可從緩辦乎。至其縱令兵丁在外營生。甚至開賭窩娼。販賣私鹽。更出情理之外。而柴大紀所報現存戍兵。止有七十餘名。此外藉稱傷亡失散。委無可查。更不成話。此等情節。李

侍堯即因彼時軍務緊急。柴大紀正在守城。未能遽行參辦。亦應將其在任款蹟密摺奏聞。俾朕得早知情偽。則當其防守嘉義時。朕即憐其出力。亦不致破格加恩。屢膺懋賞。今柴大紀既疊荷殊恩。其貪劣款蹟。始節次敗露。是臺灣逆匪滋事。竟由柴大紀平日貪縱廢弛營務牟利。釀成如此重案。朕因此宵旰焦勞。籌辦軍務。經年尚未戡事。而各省派調官兵。接濟糧餉。所費不貲。且地方百姓受賊戕害。擾累者。更不可勝計。設非朕留心詢訪。節次降旨。令將柴大紀款蹟查參。李侍堯必致始終緘默不言。是此等貪污釀變之人。不但幸免重戾。且冒受渥恩。李侍堯瞻徇容隱之罪。尚復何辭。又柴大紀經楊廷理誚讓。始帶兵出城。李侍堯既知柴大紀有如此恇怯畏賊情事。何難即向永福楊廷理確切札詢。並將其在任各款。一一訪查得實。而摺內尚稱其在鹽埕橋打仗。及克復諸羅縣城。最為

出力。前此所聞。又似難以盡信。為之含混支吾。以掩飾其從前不及早參奏之非。豈能逃朕洞鑒乎。又據稱。柴大紀固守待援。不肯捨士民而出。實心服其為人等語。前據福康安札知軍機大臣。以柴大紀守禦縣城。並非伊之力。量城中糧食。並非斷絕。其不肯出城一節。亦係義民等不肯將伊放出。伊亦畏賊不敢出城等語。是此次李侍堯所奏。又有訛滯。更不得藉稱。柴大紀有守城微勞。竟置之不辦也。著福康安。即傳永福楊廷理二人。面加詢問。逐一根究。並著將柴大紀貪劣各款。據實嚴參。候朕另降諭旨。○又諭。前此臺灣賊匪。攻擾嘉義時。經常青派令魏大斌。田藍玉。蔡攀龍。先後帶兵前往援應。中途遇賊攔截。隨征兵丁。多有損失。又貴林。楊起麟。由鹽水港。鹿仔草。前赴嘉義。遇賊被害。所帶兵丁。俱為賊匪衝散。又郝壯猷。在鳳山失事。駐守兵丁。亦俱潰散。後又有陸續投出者。已節次諭

令福康安常青李侍堯查明具奏此等兵丁奉派隨征及防守縣城一遇賊匪攻擾即紛紛散失綠營恒怯積習最為可惡此內除自行投出外其餘散失兵丁未必盡係被賊戕害或臨陣脫逃潛匿不出甚至投入賊黨助賊抗拒官兵皆所必有自應嚴切查明分別覈辦計此旨到日勦捕事務自當早已完竣著福康安等即將前此屢次散失兵丁除陸續投出外實在陣亡者若干名查明確數交地方官上緊緝拏其從賊之兵情罪更重於從賊之民拏獲時尤應從嚴辦理至福康安攻克小半天一摺係十二月十九日拜發距今已逾一月如尚未有擒獲賊首信息則是生番等狡獪性成始終不肯將林爽文獻出福康安徒事招賞殊屬無益昨已有旨令福康安等將各隘口之兵撤回前赴南路將賊匪搜勦淨盡再移兵向北擒拏逆首計節次調派各省駐防綠營官兵並屯練降番及臺

灣額兵約有六萬即其中有傷亡損失者存兵尚不下四五萬足敷勦捕之用即直進內山亦何所慮福康安擇其精銳帶往南路隨營勦賊其鹿仔港鹽水港鹿仔草各要隘處所亦著派二三千兵分投駐守其餘傷病殘廢之兵若概留該處既不能得力且須給與口食並轉需人看守殊屬無益著福康安等細加酌量將此等無用之兵先行送回內地既可以挑去冗兵又可節減繁費此旨到日已屬二月中旬該處氣候已漸炎熱官兵在彼難以久駐福康安等務須悉心籌畫設法趕辦毋又致師老力疲臨常青等之轍○丁亥以湖廣督標中軍副將劉乘龍為廣東高廉鎮總兵○戊子諭曰富綱諱尚忠等奏到藩臬考語一摺已批交該部矣至其會同聯銜具奏之處辦理殊屬非是各省道府等官員缺較多朕難一一悉其賢否每屆年終及大計年分各督撫自應秉公確覈會同出具

考語。至藩臬係屬大員。其人之操守才具。雖久在朕意念之中。然該督撫出具考語。自當各出已見。分別填註。單銜具奏。朕披覽之下。即可因各督撫所奏之摺。見其意見若何。鑒別是否公當。即如前次粵省孫士毅圖薩布陳奏臬司考語。互有不同。朕方以伊等各據所見。不肯扶同為是。若督撫等於藩臬大員。填註考語時。竟彼此開會。聯銜具奏。是竟係視為具文。奉行故事。不過扶同出具上等考

語。則督撫藩臬聯為一氣。亦何事不可為。亦何必為此具文之奏耶。富綱譚尚忠著傳旨申飭。嗣後各省督撫於道府大計卓異。自當公同具奏。其密奏考語。務宜各行所見。分別填註。自行陳奏。其大計之年。亦著將藩臬考語各行咨部。不得彼此開會。致啟扶同徇庇之弊。將此通諭知之。○諭軍機大臣等。據李侍堯奏浦城縣革兵徐元基代遞公文夾入匿名揭帖。捏控中營守備葉永茂私扣兵餉

一案。審係挾嫌陷害。將徐元基擬絞監候等語。所辦失之輕縱。兵丁投遞公文。膽敢私夾匿名揭帖。告言人罪。即在尋常無事時。已屬大干法紀。非尋常匿名揭帖之案可比。況現值勦捕臺灣逆匪之際。軍報往來尤關緊要。乃徐元基竟敢私拆公文。抽匿件數。換入匿名揭帖。誣陷本官。情節甚屬可惡。且徐元基本因點解不到。被外委余朝高責處。徐元基隨赴守備葉永茂。捏控外委欠錢不還。經該

守備究出挾嫌妄控情節。革退名糧。是徐元基本係有罪之人。乃膽敢懷挾私嫌。復將守備葉永茂架詞誣控。更為刁詐可惡。李侍堯既經審出實情。僅照依尋常投隱匿姓名文書告言人罪本律。問擬絞候。不足蔽辜。除將此案交刑部另行改擬外。李侍堯辦理失之輕縱。著傳旨嚴行申飭。○閩浙總督李侍堯奏據廈門同知劉嘉會稟稱。有船戶林允瑞於十一日行抵廈門。據稱於正月初五日。在

後壠媽祖廟。親見官兵將林爽文押解。裝在木籠。問知官兵從內山拿獲等語。臣查此信。既經該船戶目擊。必非妄傳。諭軍機大臣曰。林允瑞自後壠開駕。所供有拿獲林爽文之處。又係得諸目覩。自必確實。前因福康安等攻破賊巢。後林爽文逃入內山。屢經降旨嚴飭。福康安等接奉諭旨。心懷愧懼。必將前次所賞寶石帽頂四圍龍褂。敬謹收貯。不敢穿戴。今首逆業經擒獲。雖為時未免稍遲。而辦理尚屬妥善。所有朕恩賞之頂戴。自當接受。福康安等於拿獲林爽文後。諒已遵照前旨。帶兵前赴南路。擒捕莊大田。收復鳳山。莊大田與林爽文同惡相濟之犯。林爽文雖已就獲。莊大田亦須生擒解京審辦。方足以伸國憲而快人心。況林爽文已經就獲。莊大田之勢更孤。自易於擒捕。即使該犯逃入內山。亦無難帶兵直入搜拏。並勒令生番等擒獻。想福康安斷不肯因拿獲林爽文。遽以為完事。

捨之而回。若再能生擒莊大田。收復鳳山。朕必另有恩獎。且此事亦必擒獲莊大田。南北兩路賊匪。全行廓清。方為藏事。福康安等務宜奮勉辦理。至海口一帶。已有旨交常青專司堵截。前據常青奏。訪聞莊大田在南仔坑地方潛匿。派副將丁朝雄帶兵駐劄東港。會同廣東泉州等莊義民。就近搜捕。並相機前進。恢復鳳山等語。現在福康安親統大兵往南。若莊大田逃竄入山。福康安即可帶兵直入搜捕。無虞免脫。惟防其由海道竄逸。最為緊要。關鍵。常青昨於徇隱。柴大紀。散法。營私。種種不法。實屬辜恩昧良。已降旨革職候訊。但此時常青帶兵駐守府城。伊本無能。該處兵丁又屬無多。朕意不如將丁朝雄所帶之兵。撤回於各海口要隘。分投巡防。勿任潛逸。較為嚴密。若莊大田及緊要賊犯竄入內山。尚可不再加常青之罪。倘竟由海道遠颺。稽誅。則常青自問。當得何罪。亦不必復思來京。

見朕。常青接奉此旨。惟當倍加奮勉。以期立功自贖。至林爽文於初五日已押解在途。何以迄今尚未據福康安奏到。想又為風所阻。不日即當遞至。除俟福康安奏到。再明降諭旨外。其林爽文是否係官兵直入內山擒獲。抑係生番等遵諭縛獻。諒福康安摺內。自必明晰聲敘。但現在尚未奏到。無由知悉。並著福康安查明據實具奏。○又諭。前因福康安於攻克大里杙賊巢後。不即帶兵搜捕逆首。

致林爽文日久未獲。又於覆奏恒瑞一事。瞻徇親戚。曲為袒護。節經降旨嚴飭。並諭令福康安於勒捕事竣後。務將臺灣一切善後事宜。全行辦竣。即在臺灣多住一二年。亦所應得。原因福康安於搜捕逆首。既失之遲緩。又復有心袒護恒瑞。是以令其久住臺灣示罰。今據李侍堯奏。林爽文已被拿獲。是福康安辦理此事。雖少稽時日。但逆首林爽文業已就獲。大功即日完竣。福康安籌辦一切。尚為

妥協。著於南路賊匪掃除淨盡。拿獲莊大田後。即將臺灣逆匪滋事根由。及釀成此案之文武官員。並官兵散失數目。一一詳悉嚴行查辦。並將善後各事宜。悉心籌畫辦理。如內外山地界。從前設立土牛。未為周密。應重加勘定。務令界限分明。勿使日久偷越。以致滋生事端。又如改建城垣。添設官兵等事。從前該處舊有城垣。俱係用荊竹等項編植。原以荊竹等物。雖不若磚石工程堅固。足資防守。

但失之易。復之亦易。即如康熙年間。有奸民朱一貫滋事。臺灣全郡被陷。七日之內。即經收復。亦因該處舊無磚石城垣。賊人難以據守。故能剋日奏功。雍正年間。吳福生滋亂時。曾奉有無須改建磚石城垣。

諭旨。亦即易失易復之意。此次逆匪林爽文等起事之初。雖因各縣舊無城垣。得以猝為占據。但現在福康安等統兵勒捕。賊人望風奔潰。攻克賊巢。勢如破竹。未始不因該處無城。

垣之固。故賊人難以守禦。目今勦捕事務。不日完竣。但臺灣遠隔重洋。又係五方雜處。游民聚集之地。難保其百年無事。自應深思遠慮。計出萬全。著福康安將改建城垣一事。詳悉籌酌。朕意臺灣郡城。為根本之地。自應改建磚石城垣。與該處安平鎮向有城垣。互相聯絡。以資捍禦。至嘉義一縣。朕因該處民人。隨同官兵竭力守城。錫以新名。用示嘉獎。該處城垣。亦應一律或磚或石改建。務令堅固。此外如彰化鳳山等縣。及現在應行添設官弁駐劄處所。不妨仍用刺桐竹木等類栽植。惟聞各該處舊有城圍。多係依傍山麓。未能據扼形勢。現在雖令德成前往勘辦。但德成僅諳工程做法。相度形勢。非其所能。著福康安。務須詳細履勘。或移建高阜。或因舊基跨山圍築。即舊城難以移動。亦須擇附近山頂形勝之處。設立磚石卡座。添設弁兵。以資控制。總期占據要地。勿令有失形勢。使四外得

以俯瞰城中。方為妥善。福康安將應辦諸要務。立定章程。即可交徐嗣曾等在彼接辦。福康安約於朕萬壽前。趕至熱河瞻覲。亦不為遲。至海蘭察帶領巴圖魯侍衛章京等。及應徵各兵。一俟勦賊完竣。即可令其陸續先回。勿須守候也。○以江西布政使李承鄴雲南布政使王昶對調。○己丑諭。據保寧春成都縣民劉萬迎。現年一百一歲。五世同堂。曾元繞膝。請旨旌表等語。劉萬迎壽逾期頤。慶延五世。洵屬昇平人瑞。特賜御書扁額。並親製詩章。以示寵榮。所有應行加恩賞賚。及建坊旌表之處。仍著該部察例具題。○御製詩曰。由來素性不言祥。人瑞難教秘弗張。却是今春閱兩奏。幸他西蜀再同堂。深惟滋殖萬民樂。虔冀綏豐百物昌。更值得兒靖海嶠。曰欣曰敬並無遑。○御書扁曰。期頤衍慶。○又諭。據李侍堯奏。拏獲漳浦縣匪徒糾夥焚搶首犯張媽求等。審明

辦理一摺。已交該部彙議速奏矣。至此案據李侍堯訊據各犯供。原訂於十二月十二日夜。齊赴漳浦縣城外。商定舉事。乘勢搶劫倉庫。復糾夥內應。詎初三四等日。有夥匪張從。張轄等。強搶扈頭地方民人陳富等家牛猪等物。經事主喊稱報官。該犯張轄。即聲言槍取牛猪。算甚麼事。將來縣城內倉庫也俱是我們的。事主驚駭。報知營汛。知會該縣羅澤坤。會同遊擊許騰蛟。王萬春。岳新泰。帶兵截拏。署提督常泰。汀漳龍道伊轍布。亦即星馳前往督捕。即將該犯等拏獲等語。該犯等糾集匪徒。乘臺灣逆匪滋事之時。豫謀竊發。搶劫倉庫。並冒稱林爽文夥黨。恐嚇居民。不法已極。常泰等一經事主稟報。即帶兵前往截拏。當將案內首夥各犯。即時拏獲。辦理尚為迅速。不但伊等失察疎防之咎。可以寬免。並應均予甄敘。用昭獎勵。常泰。伊轍布。許騰蛟。王萬春。岳新泰。羅澤坤。俱著交部議敘。至事

主陳富。林才。陳祿三名。一聞賊匪聲言。即行稟報。該地方官得以帶兵迅即擒拏。亦屬可嘉。並著李侍堯酌量賞給頂帶銀兩。以示獎勵。○諭軍機大臣等。現在逆首林爽文。已經生擒。其餘夥黨餘孽。自易殲除。臺灣勦捕事宜。剋日可以完竣。但該處一交三月。氣候即已炎熱。所有各省派調兵丁。難於在彼久駐。將來福康安辦理善後事宜。固須酌留官兵數千。以資彈壓。此外兵丁為數甚多。留於該處。亦屬無用。自應陸續撤回。令其各歸本處。著福康安於南北兩路。一律肅清。大功告成後。除臺灣應留額兵外。應將素耐炎熱之貴州。湖南二省兵丁內。擇其強壯得力者。挑擇數千。留彼彈壓。其餘如屯練兵。最不耐炎熱。及傷殘病廢者。俱應先撤回。次則各省駐防滿兵及浙江。兩廣。福建。綠營兵丁。俱應次第令其渡回內地。各歸原伍。庶隨征出力兵丁。既不至久留受熱。以致不習水土。染患疾病。

而福康安辦理善後有兵數千亦儘足敷用
○調任四川總督保寧奏金川屯務經前任
將軍參贊等丈出地十一萬七千六百六十
畝節年屯員廣為招徠穡事日興荒土盡闢
除原丈地已墾外多墾地一萬八千九百七
十五畝仍照例每戶給三十畝併限六年升
科查各屯官役喇嘛人等及歲修橋梁等項
需糧九百餘石俟升科後統計新舊地畝併
漢牛一屯每年共應徵糧一千二十一石零
各項供支自可有盈無絀報聞○禮部題朝

鮮國王李祘遣使表賀

萬壽冬至元旦三大節及進歲貢方物琉球國
王尚穆遣使表貢方物均賞賚筵宴如例○
庚寅江蘇巡撫閔鶚元奏江蘇兩藩司所屬
額貯常平倉穀節年因災協濟及碾運軍糈
等項計動缺倉穀三十餘萬石急應動項採
買查上年江省收成尚稔請於司庫正項內
照每石六錢定價動撥買補臣仍率同道府

等查察如有延宕抑勒等弊即行參處報聞
○士辰

上還宮○癸巳諭本日步軍統領衙門奏拿獲
烏鎗護軍伯靈等私行租房拉弓因酒醉褻
鬧用刀將塔郎阿戳斃一摺已交該部審擬
辦理矣八旗兵丁私約多人租廟內閒房拉
弓殊屬非是即如善撲營限於不得已各租
一處演習者皆由本營大臣特派翼長教習
人等分教約束尚不至於生事八旗兵丁私
立拉弓處所如係各該旗大臣等派員管束
亦尚可行若此等私立弓房顯係不肖之徒
彼此借以聚賭飲酒妄行不端而設不但於
演習技藝實無裨益反致易生事端將此通
行八旗嗣後各該旗人等借拉弓之名租廟
內閒房永行禁止如果為習學技藝而設必
由各該旗派出叅佐領驍騎校等專令輪班
嚴管演習技藝斷不可仍前各立私所著交
八旗都統等不時嚴查仍令步軍統領衙門

嚴行查拏。○又諭賊匪起事之初。柴大紀於巡察彰化時。若一聞信息。即親自帶兵勦捕。無難即時撲滅。乃托稱派兵。回至郡城。及聞彰化失陷。柴大紀仍觀望遲徊。並不速往援救。直至數日。始帶兵起程。復於離城三里地方。即行駐劄。致賊匪得以輾轉蔓延。日肆鴟張。是柴大紀不但平日貪縱營私。廢弛營伍。而且怯懦遷延。釀成巨案。現經朕面詢押解臺灣逆匪到京之侍衛額勒登保。據稱逆匪

攻擾嘉義時。俱係義民等出力守禦。並非柴大紀之功。其不肯帶兵出城一節。亦係義民等不肯將伊放出。柴大紀亦畏賊不敢出城等語。額勒登保係在臺灣帶兵之員。所言更屬確實。則柴大紀前奏不忍將數萬生靈盡委賊手。仍忍飢固守待援之語。竟屬捏詞巧詐。全不足信。守城亦非其功。柴大紀既貪縱釀變於前。又復巧詐欺罔於後。種種劣蹟。難以枚舉。此而不加以懲治。又何以肅軍紀而

整官方。朕辦理庶務。從不豫存適莫之見。而信賞必罰。乃用人行行政大柄。況現值用兵之際。賞功罰罪。尤貴嚴明。如柴大紀前奏不肯帶兵出城一節。朕以其勤苦出力。甚有良心。覽其奏摺之言。自屬實情。初不為逆詐億不信之見。而其種種捏飾之處。彼時亦尚未有人摘發。朕焉肯泯其勞績。不加之恩賞乎。所謂君子可欺以其方者此也。迨柴大紀貪劣各款蹟。節次敗露。經李侍堯等逐款查明。俱

已確鑿有據。是以即將柴大紀革職拿問。至常青在閩浙總督任。已及年餘。且渡臺灣後。身為將軍。近在府城。豈無聞見。乃於柴大紀劣蹟。並無一字奏及。實屬辜恩。特將常青交福康安審訊。又李侍堯原欲俟歲功之日。給還伊原襲伯爵。乃此事經朕節次降旨詢問。李侍堯知難隱飾。始行具摺陳奏。似此有心徇隱。更為辜負重恩。李侍堯不應出此也。前已晉加宮銜。賞戴雙眼花翎。已為僥倖。豈可

復膺懋賞。並著交部嚴加議處。琅玕並不自行陳奏。及降旨詢問。始將風聞柴大紀各款具奏。亦難辭咎。著一併交部分別嚴加議處。朕於臣下功罪輕重。惟視其人之自取。初不稍存成見。雖不逆詐。不億不信。實已先覺。其李侍堯續行參奏柴大紀各款。並著交福康安一併嚴審定擬具奏。○是月。閩浙總督李侍堯奏。閩省各營兵節次派赴臺灣。本營不敷差防。隨經陸續召募。共新兵二萬名。今首逆就擒。軍務剋期告戢。征兵即可歸伍。如將新兵全汰。似覺過驟。然俟出一缺。方補一兵。又未免需時過久。仍屬多糜糧餉。現在通飭各營。如有額兵缺出。無庸另募。即以新兵撥補其所募較少之營分。遇有缺出。即於所募較多之附近營內移撥。其不願赴別營就伍者。准其辭退。又上年調派隨征兵內。傷亡散失。約數千名。所帶餘丁甚少。本不敷頂補。請於新兵內酌留五千名抵補。如補額無需此

數。亦即遞行減退。得旨。周到妥協。又奏查閩省及各省調赴臺灣征兵。不下四萬有餘。今軍務剋期告戢。酌留彈壓之外。自應分起撤回。查前鹿仔港現存船三百餘號。足敷配載。惟鹿耳門僅留船七十隻。應再撥六十號前往候渡。得旨。妥當之極。○四川總督李世傑提督成德奏。郭羅克番人搶掠拒捕一案。除將已獲之色賴蚌借二犯遵旨即行正法。傳首外。其未獲百餘人。現諭各土司土目等速行擒獻。並添派熟悉夷務之守備等一體嚴拏。務獲得旨。如此等事。總應以嚴為主。不可姑息示弱。○雲貴總督富綱奏。普洱鎮總兵朱射斗將屆三年俸滿。例應更替。但普洱為臨邊要鎮。控馭撫綏。責任綦重。現在滇黔副將復無合例陞調之員。請將朱射斗再留三年。其本年應行陞見之處。仍俟秋間遴員暫署。即令星馳入覲。下部知之。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十七

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十八

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務總理事務
吏部總理事務兵部總理事務禮部總理事務刑部總理事務工部總理事務戶部總理事務
總辦官經筵講官太子太傅文淵閣大學士文淵閣領閣事稽察欽奉 上諭事務總理事務
世襲騎都尉軍功加九級隨帶加二級又加二級軍功加六級戶部尚書鑲藍旗滿洲都統軍功加九級
奉常紀錄十四次臣德齡經筵講官太子少保工部尚書紀錄六次臣曹振鏞等奉

教修

乾隆五十三年戊申二月甲午朔

上御重華宮召大學士及內廷翰林等茶宴以

平定臺灣聯句○遣官祭

先醫之神○遣官祭黑龍潭

昭靈沛澤龍王之神玉泉山

惠濟慈佑龍王之神○諭曰宗室人等束用

黃帶示尊重也覺羅人等當束紅帶前已節

經降旨禁止僭用今見覺羅人等帶色又漸

似黃竟無所分別此斷不可著交宗人府八

旗通行嚴禁覺羅等嗣後務遵原定顏色不

可僭越濫用。如再查出。務將其人從重治罪。
○欽差協辦大學士陝甘總督辦理將軍事務公福康安領侍衛內大臣叅贊公海蘭察成都將軍叅贊鄂輝奏。賊首逃入內山。經臣等節次分派官兵堵截要隘。於正月初一日。拏獲假扮林爽文之賴達。據供。林爽文自獅子頭社痛勦後。即從打鐵嶺一帶山溝內藏匿。當派官兵等由蝦骨社合歡社追捕。直至炭窰地方。查炭窰與南港仔山口相通。出山即係海岸。恐其潛向海口逃逸。復派各營官兵。由後壠至中港。又自竹塹至桃仔園沿山密佈。臣等亦各分隘口四面圍截。又恐逆首驚懼自戕。不能生獲。因揀巴圖魯侍衛二十員。貴州廣東屯練兵數百名。扮作民人。同淡水義民差役及社丁通事等分投搜緝。旋於初四日。在老衢崎地方將逆首林爽文賊目陳傳何有志林琴吳萬宗賴其龍等一同擒獲。現在搜查餘匪。並令出山各兵休息數日。

即行統率大兵肅清南路。至縣丞洪智。臨賊拘禁。自刎兩次。均被賊目將刀奪去。手上現有傷痕。但身係職官。究屬偷生。無恥。應請即行正法。諭曰。福康安等自鹿仔港進兵。後督率將弁奮勇攻勦。連次克捷。前於嘉義縣破賊解圍。業經降旨將福康安海蘭察晉封公爵。賞給紅寶石頂四團龍褂。以示優獎。今逆首林爽文經福康安等設法生擒。辦理周妥。實屬可嘉。特親解御用佩囊二個。分賜福康安海蘭察用。昭恩眷。所有在事出力之將弁等。並著福康安查明咨部議敘。其隨征兵丁並著福康安分別獎賞。至辦理此事。朕先事運籌決機。發策自逆匪滋事以來。大學士阿桂留京辦事。續又差往河工。及江南勘河。本未承辦書諭。大學士和珅始終承旨書諭。於一切清漢事件。鉅細無遺。懋著勤勞。自應特加優賞。和珅本係一等男爵。著照從前大學士張廷玉之例。晉封為三等伯。大學士阿桂

王杰尚書福長安董誥夙興夜寐一體宣勤俱著交部議敘其滿漢軍機章京並著軍機大臣查明實在出力者交部分別議敘至此次辦理軍務孫士毅以鄰省總督一聞逆匪滋事之信即親赴潮州駐劄節次調派兵丁撥運軍餉火藥鉛丸等項源源接濟迅速周妥甚為出力孫士毅業經錫予宮銜並賞戴雙眼花翎仍著照從前大學士蔣廷錫之例賞給輕車都尉世職以示嘉獎李侍堯自調任閩浙總督後於照料過兵及運送糧餉等事亦尚妥速本欲俟歲功之日將伊原襲伯爵給還但李侍堯前抵閩省已及一年於柴大紀在總兵任內亂法營私廢弛營伍種種貪劣款蹟自己早有見聞乃竟緘默不言並不及早據實參奏經朕節次降旨詢問李侍堯始行具摺陳奏明係有心徇隱豈可再膺懋賞且伊業經賞戴雙眼花翎晉加宮銜毋庸復行給還伯爵仍著交部照例議敘至柴

大紀前因其固守嘉義不肯出城一節念其勤苦出力是以特封為義勇伯今據福康安李侍堯等先後遵旨查奏柴大紀在總兵任內貪劣各款俱已確實並守城亦非其功其前奏忍飢固守之處竟係義民等不肯放出伊轉捏詞欺飾已明降諭旨革職拿問交福康安逐款審明治罪矣至兵部承辦軍報之員外郎盛保在良鄉縣駐守迎候馳遞尚為奮勉本日擒渠捷報即係該員親自齎遞著

加恩賞戴花翎並在京捷報處各員俱著交部議敘又此次軍報往來直隸山東江蘇浙江福建沿途各驛站馳遞並無貽誤所有沿途督撫辦理一切軍需均屬出力及驛站遞送文報之文武員弁並著查明交部分別議敘其驛站兵丁亦著酌量給賞○諭軍機大臣曰福康安等統率大兵分駐各隘口嚴密堵截搜拏使首逆無從逃竄復恐林爽文見官兵勢盛驚懼自戕隨派巴圖魯侍衛及貴

州廣東屯練兵丁改裝易服同差役社丁通事等分投搜緝將逆首生獲辦理妥協用心周到甚屬可嘉至林爽文逃匿後固須多派兵民分投搜捕而當其搜獲之時必有最為出力首先下手之人其人應優加獎賞著福康安將林爽文究係何人首先擒獲查明名數據實具奏候朕另降恩旨至洪智身為職官被賊拘禁不能捐軀盡節固屬罪有應得但念該犯曾兩次自刎為賊匪劉懷清將刀奪去手有奪刀傷痕可據與醜顏從賊偷生者有間著加恩恕其一死發往伊犁充當苦差又前奏賊目陳泮投出後將其家屬扣留仍令伊入山勒限擒獻林爽文係被官兵搜獲而陳泮作何下落未據奏及該犯既不能將林爽文擒獻自未便因其曾行投出稍從末減此外尚有吳頌等亦係有名頭目均難寬縱並著福康安迅速按名查拏解京審辦毋令遠颺漏網○又諭據臺灣解到匪犯劉

懷清林茂等供劉懷清在大里杙隨同林爽文之偽軍師董喜辦事一切聽其調度衆人稱為董仙林茂係董喜糾同入夥又據供賊人頭目林水素為林爽文信用諸事皆其主謀現封提督將來欲封作宗人府伊二人俱隨林爽文逃入內山等語董喜為賊匪軍師林水亦係林爽文信用偽封提督雖非莊大田之著名者可比但係助惡為首之犯未便任其潛逃漏網現在首逆林爽文已經拏獲董喜林水二人係隨同逃竄之人如業經就獲自己隨同解京倘尚未拏獲著福康安務將該二犯嚴密搜查務獲若臺灣查無蹤蹟計該犯等非逃入福建內地潛匿即由海道竄入粵省並著李侍堯孫士毅一體飭屬嚴拏以期必獲解京審辦毋任其免脫稽誅再此等黨惡要犯如本日解到之蔣楚劉懷清林茂何從龍四犯及供出之董喜林水俱係為賊主謀並得受偽職罪惡甚重其家屬俱

應緣坐著福康安李侍堯等即行遵照查明辦理將來拏獲各犯有似此情節重大者俱著照此查辦再柴大紀蔡攀龍二人前據福康安奏於抵嘉義縣殺賊解圍後即留柴大紀蔡攀龍在縣城防守伊二人俱受厚恩如果思出力自効自應懇求福康安隨同帶兵打仗乃本日詢問押解匪犯到京之侍衛額勒登保據稱柴大紀蔡攀龍二人並未懇求一同帶兵前往剿賊似此醜顏安處全不思奮勉出力並懇求虛詞而無之伊等畏懼懦怯全無人心已可概見又蔡攀龍經福康安派令招致李七乃蔡攀龍並未設法招致可見坐辦之事尚不認真安望其能隨營打仗奮勇殺賊著福康安即傳旨詢問蔡攀龍令其自行據實明白回奏至柴大紀於福康安自嘉義進兵時並未懇請前往一節亦著福康安一併嚴切訊問據實覆奏○乙未上御乾清門聽政○遣官祭

關帝廟○遣官祭昭忠祠○諭曰吏部奏上年福建省甄別教職數之額缺數目不及百之二三請將該督撫學政照例議處但念該督撫均有承辦兵差及料理軍餉等事此次無暇甄別教職未能照例覈辦尚屬有因李侍堯徐嗣曾著從寬免其交部至學政陸錫熊考覈教職是其專職軍務又非其承辦乃甄別不及百之二三咎實難辭陸錫熊著交部議處○又諭曰黃仕簡任承恩上年朝審勾到並經格外加恩免其一死現在大功已屆藏事所有黃仕簡任承恩二犯俱著加恩釋放但伊二人身獲重愆經朕曲加矜宥全其軀命若仍醜顏安居輦轂之地有何面目對人俱著勒回原籍閉戶靜居思過○又諭此次臺灣逆匪滋事刦縣戕官肆行不法至一年之久福康安等帶兵渡洋旬月之間即將賊匪肅加殲戮擣穴擒渠各村莊得以安堵如舊該處地隔重洋五方雜處風俗素稱

刁悍經此一番懲創。若不明示武威。恐民人等事過即忘。不足令其怵目。敝心常思安分畏法。將來事竣後。如福康安、海蘭察及鄂輝、普爾普、舒亮之勇畧最著者。應於臺灣郡城。及嘉義兩處。共建生祠。塑立像貌。俾該處民人望而生惕。日久不忘。○諭軍機大臣等。前因黃仕簡帶兵渡洋。並不奮勇勦賊。惟安坐郡城。因循株守。以致逆匪蔓延日久。曾經諭令李侍堯等。將來事竣時。所有多延時日。糜

費軍需銀兩。應於黃仕簡名下。責令分賠。以示懲儆。李侍堯何以尚未覆奏。現在逆首林爽、文業已生擒。勦捕事務。即日蕺功。黃仕簡釋放回籍。既邀格外寬宥。而臺灣逆匪滋事年餘。一切軍餉費用不貲。皆黃仕簡因循貽誤所致。若復令坐擁豐饒。無以示懲。著李侍堯於黃仕簡名下。罰令繳出銀二十萬兩。以備賠補軍需之用。至昨據福康安奏。訊據林爽、文之父林勸供稱。伊祖父墳墓係在義塚。

地內埋塋。並無木版。難以辨認等語。該犯祖墓雖埋塋義塚。自可查訪而知。著李侍堯於林爽、文本籍漳州一帶嚴密查訪。不可稍涉紛擾。致伊支族驚疑。更不可因匪犯捏飾。竟置之不辦。徒事顛預也。○命兵部尚書彭元瑞在紫禁城內騎馬。○以署正藍旗蒙古副都統保成為內閣學士兼禮部侍郎。○是日起。

上以祭

社稷壇。齋戒三日。○丙申。命刑部尚書喀寧阿、胡李堂在紫禁城內騎馬。○丁酉。祭先師孔子。遣協辦大學士劉墉行禮。○諭曰。柴大紀既貪縱釀變於前。復狡詐欺罔於後。其前此接奉諭旨。不肯出城一節。自係因郝壯猷前在鳳山棄城逃回。即於軍營正法。柴大紀心懷畏懼。恐罹重辟。是以不敢輕離該處。設非朕嚴申軍紀於鳳山失事時。即將郝壯猷按律辦理。則柴大紀深染綠營習氣。怯

懦畏蒞未必不為郝壯猷之續今既查明種
種劣蹟自應徹底嚴辦昨已明降諭旨將伊
革職拏問交福康安嚴行定擬具奏矣朕於
臣下功罪惟視其人之自取一秉大公至正
而於用兵之際有功即賞有罪即罰尤務嚴
明從不絲毫假借至辦理軍務宵旰焦勞從
前平定準部回部大小金川無不炳燭幾先
豫操成算此次林爽文等糾眾滋事雖係么
臂草竊亦並不心存忽視一本敬

天凝命之意孜孜勿懈是以仰邀

昊眷剋期奏績逆首生擒即如恒瑞妄請添兵
數萬一摺設不斷以乾綱如宋明庸主遇事
輒令廷臣聚議眾論紛紛迄無定見徵調紛
煩緩不濟急寧不如金世宗所云南朝集議
既成北兵已可渡河之語其何以握勝算而
奏鴻捷耶著將前後辦理緣由通諭中外知
之○命鎮國公晉昌在散秩大臣上行走○
戊戌祭

大社

大稷

上親詣行禮○諭此次福康安等統率官兵前
往臺灣剿捕賊匪未及兩月即將首逆林爽
文生擒解京大功指日告竣固由福康安等
調度有方所向克捷而將弁兵丁等隨同剿
捕亦俱爭先効命用能掃逆擒渠爰速集事
殊屬可嘉前已有旨令福康安查明咨部議
敘本日據福康安奏請將出力之侍衛章京

將弁等分別賞給已圖魯名號加陞職銜翎
頂均照所請行其餘將領等仍著福康安查
明咨部一併議敘兵丁等優加賞賚以示朕
獎勵戎行至意○又諭向來官兵巡洋遇風
淹斃俱照陣亡例議卹今都司朱化英千總
陳汝志及隨行兵丁等調赴臺灣征剿逆匪
渡洋遇風以致淹斃多人尤堪憫惻著交部
俱照陣亡例從優議卹其扶板得生之外委
顧大成胡天祥以及兵丁等並著福康安照

落水得生之例。從優給賞以示軫卹。○諭軍機大臣等。據富綱等奏。拏獲越獄盜犯一摺。內稱永北廳越獄盜犯五名。現已全獲。先行馳奏。仰慰聖懷等語。措詞殊覺失當。此等尋常盜犯。越獄後。於限內全行拏獲。乃係地方官分內之事。何足為異。即如臺灣林爽文。糾眾滋事。現經官兵拏獲。然亦不過無藉奸民。尚不足以言慰。若拏獲此等尋常案犯。即稱仰慰朕懷。則朕懷將不勝其慰矣。該督等何不權事體輕重。若此富綱或不諳文義。諱尚忠係科甲出身。何以於陳奏之摺。亦復如此漫不經心。一任庸劣幕友。率行聲敘。不值一噓。富綱諱尚忠。俱著傳旨申飭。○又諭。前因李世傑李奉翰等奏。請於三溝開下。添建西隄。朕以該督等本意。蓋在欲請南巡。曾諭令伊等據實覆奏。茲據李世傑覆奏。去年與李奉翰商建西隄之際。竊冀此工若荷恩旨。准行將來工竣告成。恭請聖駕臨工。閱視亦藉

此少釋江南士庶望幸之誠等語。果不出朕所料。朕臨御以來。業經六巡江浙。省方問俗。於民生吏治。俱已洞晰無遺。自可無庸再行親蒞。但臣庶望幸情殷。欲於工段告成。冀朕親臨閱視。亦屬伊等奉上之誠。本無大過。何必隱諱。李世傑經朕詢問。即據實奏明。尚有良心。而李奉翰前到京陛見時。曾將此事詢及伊。於望朕臨幸之處。竟不敢明認。足見其器識淺小。心地糊塗。李奉翰著傳旨申飭。並著將李世傑摺鈔寄閱。看。並諭李世傑知之。○又諭。前據福康安奏。分派巴圖魯及義民屯練等。改裝易服。於老衢崎地方。搜獲林爽文。但究係何人首先擒獲。未據奏及。想係軍務匆遽。無暇詳及。又林爽文之二弟林躍興。已於竹塹山坑內搜獲。林躍興是何人所獲。自應加以獎賞。即詳查具奏。嘉義縣及淡水等處義民。隨同官兵打仗殺賊。並購線偵探擒捕匪犯。實屬奮勉。著福康安。即向各義民

等詳加詢問。如伊等情願頂帶榮身。不欲出仕者。各聽其便。其情願出仕者。著福康安量其才具。分別文武。咨送吏兵二部。帶領引見。候朕酌量補用。實缺以示鼓勵。又前因溫州鎮總兵缺出。曾諭令福康安。於帶兵出力之副將徐鼎士。格綢額二員內。比較何人最為出力。即奏請陞補。茲據奏徐鼎士另案得有降調處分。未便遽陞總兵。請仍留閩省。以副將補用。並請賞戴花翎。自應如所請行。其溫

州鎮總兵一缺。格綢額是否堪以勝任。即據實覆奏。以便降旨。又劉懷清一犯。現經解到。審訊。其為林爽文主謀一節。皆諉之董喜林水二犯。供詞狡展。現仍令軍機大臣嚴行刑訊。後即行正法外。其供出之林水。及現在究出之陳梅等。已據奏拏獲。均俟解到。逐一嚴審。至董喜一犯。據林爽文供。帶病跟到集集埔。已經身死。所供恐不足信。又劉陞一犯。亦係起意糾眾之人在內。山衝散。不知下落。該

犯既起意糾眾。亦未便任其漏網。著福康案查明董喜是否實因病斃。劉陞曾否續獲。毋任免脫。又大武壠係南路賊匪巢穴。自應先行摧破。使賊無所依據。現在大兵四路密佈。莊大田等自不難立就生擒。惟該犯見林爽文係在內山生番地方。被官兵拏獲。自不敢復逃至內山潛匿。惟防其由各路海口竄逸。則洋面廣闊。官兵乘船追捕。恐擒獲有需時日。前經屢諭常青。令於各海口要隘嚴密巡

防。著福康安再嚴飭各海口弁兵。梭織防守。並轉諭徐嗣曾普吉保等。不時督率巡察。如莊大田等由海道竄逸。則惟伊等是問。恐不能當此重咎也。福康安於擒獲莊大田後。即令海蘭察帶領巴圖魯侍衛等。先行內渡。其應徹各兵。即行陸續撤回。福康安俟料理善後一切事宜大局已定。亦即先行起程。其零星未獲無關緊要逸犯。即交徐嗣曾普吉保等在彼督率查拏。再此次福康安分派鎮將

在大武壠附近一帶堵剿。已將蔡攀龍派入而柴大紀則從未派令帶兵。可見蔡攀龍在彼較為出力。而柴大紀竟係懦弱狡詐無用。為福康安所深憎。是以不加派委。柴大紀究竟如何貪縱營私。廢弛不職。並著據實覆奏。前因林爽文糾眾肆擾。勢正猖獗。是以欲將伊祖墳刨挖。以洩眾忿。今首犯林爽文業就生擒。其父母兄弟妻子。合家俱被拏獲。即其三弟林勇。現在逃往南路。將來大兵搜捕。莊大田自無難一併拏獲。是林爽文業罹族誅。其祖墳亦不值再行查辦。且據供係葬在義塚內。難以辨認。若因此概行刨挖。未免波及無辜。或致眾心惶惑。著傳諭李侍堯。如林爽文祖墳查明確實。自應刨挖。若查無確據。亦可無須辦理。至臺灣奸民倡立天地會。起自何人。林爽文匿不吐供。該犯係屬首逆。應解京盡法處治。此時福康安自不便加以刑訊。閱其供詞內。稱常聽得說漳泉兩府設有天

地會。邀集多人立誓結盟等語。漳泉兩處民人素不相睦。林爽文原籍漳州。其黨羽亦多係漳州人。而義民鄉勇等籍隸泉州者居多。林爽文自係欲借此扳陷。以洩其忿。看來天地會名色。竟係漳州匪犯所倡。與泉州無涉。俟林爽文解到時。嚴行刑鞫。自無從狡展。臺灣剿捕事務。剋日完竣。該處一交三月。氣候即已炎熱。各省派調官兵。難以在彼久駐。節經諭令福康安。於辦理善後事宜時。祇須留兵數千。以資彈壓。其餘官兵。應行陸續撤回。令其各歸本處。現在福康安統兵前往南路。自可即日蒞功。著遵照前旨。俟大功告成後。除臺灣應留額兵外。應將耐炎熱之貴州。湖南二省兵丁。酌挑數千。留彼彈壓。其餘次第渡回內地。各歸營伍。將來大兵凱旋渡洋。不但福康安海蘭察及領兵大員等。不可冒險輕渡。即撤未弁兵。亦不可輕易涉險。總須俟風色順利。再行開駕。即稍遲時日。亦屬無礙。

總期全臻穩順。己亥以舉行仲春經筵。遣官告祭。

奉先殿

傳心殿

上御文華殿。講官暨侍班之大學士九卿詹事等。行二跪六叩禮。分班入殿內序立。直講官四人出就講案。前行一跪三叩禮。復位直講官惠齡。謝墮進講。大學安而后能慮。慮而后能得二句講畢。

上宣御論曰。朱子解此以為靜就心說。安就身說。夫靜就心說是矣。安就身說。予以為就意說。非就身說也。夫不云欲正其心者。先誠其意乎。蓋靜在心而動在意。由靜而動。則心正而意誠。意誠則安也。由是而慮。則知致而物格。內外交養。本末兼施。胥止至善之道也。是故正心誠意為聖經之關鍵。心靜不可見。意動有所施。施出於誠。則修身齊家治國。皆由是而推。而明明德於天下矣。其所得不已多。

乎。講官暨侍班官跪聆畢。興直講官德明。劉躍雲進講。書經明作有功。惇大成裕二句。講畢。

上宣御論曰。周公訓成王此二語。不惟為政之方。抑亦修身之要也。蓋明作乃施為之末。惇大則涵養之本。施為而不出於明。作則涉暗而終怠矣。涵養而不出於惇。大則近逸而寡為矣。為學為政。內聖外王。胥不外乎此。至於有功成。裕固其自致之效。而非豫期於其間也。是則周公之意。豈徒訓王以用其舊臣乎。講官暨侍班官跪聆畢。大學士公阿桂。大學士嵇璜奏曰。

皇上聰明時久。容保無疆。秉

生知之質。而有感即通。裕率作之原。而省成彌慎。洵所謂從容中道。廣大宜民者矣。臣等幸侍

講筵。親承

聖訓。曷勝悅服之至。奏畢。諸臣出就拜位。行二

跪六叩禮禮成

上御文淵閣賜茶還宮復賜宴於文華殿東廡之本仁殿○

上幸圓明園○諭軍機大臣等朕閱藍鼎元所撰平臺紀畧朱一貴糾眾肆擾經官兵各路追捕朱一貴逃入民家鄉民等設法擒拏解赴施世驤軍前朱一貴昂然而立妄自稱孤藍廷珍命捶其足始與其黨皆跪伏罪請死今福康安將逆首林爽文生擒當縛至軍前

之時其語言動作如何情狀曾否跪伏乞死及其黨夥一同請罪抑尚不知畏罪懼刑肆無忌憚如朱一貴情形著福康安詳細覆奏○庚子諭曰劉綏奏請將鉅鹿縣令沈長春陞署大興縣令一摺已批交該部議奏矣大興係京畿首邑屬順天府尹所轄該督既揀員陞署自應會同該府尹聯銜具奏方為允協因飭查吏部舊例向來由直隸所屬各府人員陞調至順天府屬者本係督臣主稿會

同順天府尹聯銜題奏嗣經袁守侗條奏順天府屬人員陞調直隸各屬者會同府尹題奏而直隸各屬陞調至順天府屬者則由督臣單銜題奏劉綏此次揀員陞署大興縣雖係循照此例辦理但向來順天府屬各廳州縣大率趨承總督而於府尹雖名為上司未免心存歧視且府尹本非總督屬官其體統與巡撫相等並經朕特派尚書侍郎兼攝若遇該府尹所轄題陞調補之事該督竟不關會則府尹竟成虛設於事理究屬未協嗣後順天府所屬各廳州縣遇有陞調隔屬及由隔屬陞調順天府所屬者俱著該督會商府尹聯銜具奏以符體制○諭軍機大臣等據何裕城奏拏獲行竊鞘銀賊犯徐長傑訊係上年十一月內在閩省浦城縣領送鞘銀在水柘街地方十數里外行走落後將鞘背負山內用石打開見有元寶二十個不能全帶將十個挖坑埋藏其餘十個攜帶潛回經東

鄉縣知縣范宗裕訪拏現在提犯嚴審起獲銀兩並委員赴閩省浦城縣地方創取埋銀務期全獲等語所辦好該縣范宗裕甚屬留心已著送部引見矣此項鞘銀現據起出元寶上有隨州潛江棗陽縣等字樣係湖北解閩餉鞘既在閩省地方被竊該處地方官自必早經詳報何以未據該督撫奏及李侍堯駐劄廈門料理渡兵各事宜並親赴漳州查拏匪犯實無暇辦理及此至徐嗣曾何以亦

未經奏聞著該撫將因何不行具奏之處據實覆奏茲徐嗣曾現已前赴臺灣幫辦善後諸務所有此項失去餉鞘著交伍拉納委員前赴浦城縣照該犯所供地方將埋藏銀兩務即查獲並查明有無同行夥竊之犯及該縣曾否稟報有無諱竊私賠之處一併據實具奏再據福建藩司萬鍾傑奏該省百姓聞知浙省台州九幫漕米截留運閩接濟感頌皇仁歡呼載道等語此項截留漕米前曾諭

令李侍堯以各省節次運閩米石已屬充裕且現在將次撤兵需船甚多恐無船載運米石守候無期如該省現在已可無須再行接濟即當飛咨停止將此項米石於明年隨幫漕運帶通其川楚未經起運各米如亦可無需全運俱不妨酌量截留李侍堯接奉前旨自己與閩鄂元琅玕等札商籌辦今萬鍾傑既有此奏該省是否尚須米石接濟抑或竟可無需運往之處著再傳諭該督遵照前旨

秉公會同酌商辦理即行據實覆奏將此傳諭李侍堯徐嗣曾伍拉納並諭何裕城知之○辛丑諭前據福康安奏調赴臺灣協剿之貴州古州鎮標都司朱化英等帶領兵丁配船渡洋被風吹回擊碎船隻淹斃都司朱化英千總陳汝志並兵丁六十名已降旨將員弁兵丁俱照陣亡例從優議卹第念黔省官兵向來打仗甚為得力今調赴臺灣協剿遭風淹斃官兵共六十餘名之多實堪憫惻除

官弁交部優卹外。此內兵丁原籍名糧以養家口。茲雖得邀優賞。而糧缺業經空出。其家內養贍無資。生計不免拮据。著再加恩。交該督撫即查明被淹兵丁。係馬步戰守何項額缺。即照其原缺將伊子孫挑補。如無子嗣者。即於弟姪內揀選挑補。若係餘丁。亦即挑補守兵。俾資養贍。○以河南按察使景安為河南布政使。○豁山西代州乾隆五十年水災壓坍地一百七十四頃四十畝有奇額賦。○

壬寅。諭前據海祿奏奎林任性乖張。毀棄神像。辱罵職官。非刑致斃罪人。及聽情得受遣犯高姓銀二千兩。縱令回籍。又於哈薩克市易羊隻。採買布匹。濫受餘價銀三千兩各款。朕以奎林受恩深重。身為將軍大員。乃肆意妄行。甚至聽情受賄。侵蝕價銀。殊堪駭異。而海祿所奏各款。詢之伊犁回京人員。已有數款指實。遂深惡奎林。曾面諭軍機大臣等。若審明奎林贓款屬實。必將奎林即行正法。

斷不肯因其係

孝賢皇后之姪。稍為寬宥。因降旨將奎林革職。拏問。並諭令永鐸、海祿等訪查奎林有無別項款蹟。續行奏。嗣據永鐸奏。奎林為人倨傲嗜酒。性情躁急。實所不免。其原奏內毀棄神像及將罪犯斷折手足。拋入河內。並用重枷致斃等款。奎林曾有是事。俱尚為整飭地方。懲治兇惡起見。至於得受遣犯贓銀。侵用布匹。餘價銀兩。及穢言罵詈職官。實無其事。並據該處領隊大臣等。僉稱奎林平日並無向各營索取銀物之事。惟海祿曾向厄魯特總管。私行換馬一百餘匹。而海祿續奏奎林之摺。於原奏款蹟。語涉含糊。挽回已屬自相矛盾。現在奎林業經解到。海祿率領干證各員。亦已來京。特命諸皇子、軍機大臣。會同刑部。將各款逐一研訊。並令海祿與奎林當面質對。據奎林供認。毀棄神像。致死有罪。遣犯等款屬實。其罰出高姓銀兩。及將布匹

買換羊隻餘價俱屬留存公用修補城署添買馬匹等項皆有經手官員冊案可憑質之干證各員確鑿有據即詢之海祿亦不能指出奎林絲毫入己款項其為挾嫌誣捏情節顯然茲經軍機大臣會同該部定擬具奏將奎林照擅殺罪人律問擬滿杖海祿照誣告人死罪未決律問擬杖流固屬按律辦理但海祿係原叅之人今所擬罪名較奎林為重恐外間無識之徒以朕於奎林因係

孝賢皇后之姪有所偏倚而承審之大臣又多與奎林熟識且不無心存迎合將奎林曲為寬縱而於海祿有意從嚴或致妄生議論自應將奎林海祿二人一律定擬以示平允因念伊二人俱曾帶兵出力尚屬有用之才不忍令其終於廢棄但奎林乖張任性豈可復任將軍海祿如此居心亦不可復膺叅贊之任除奎林業經革職外海祿著革職免其杖流俱罰令在上虞備用處拜唐阿上効力

行走以贖前愆而觀後效伊等當差如果勤勉出力將來尚可加恩酌量棄瑕錄用或令隨團約束兵丁可資得力奎林海祿二人當倍加感愧痛改前非無負朕格外矜全至意○癸卯諭曰和碩莊親王永璘為朕姪輩備位親藩兼在內廷行走多年小心謹慎夙夜在公派管宗人府及都統事務辦理均屬妥協克勤厥職前以患病請假即遣御醫診視並屢派御前侍衛豐紳濟倫前往看視諭令

安心靜養以冀速痊茲聞薨逝深為軫惻著派皇十七子前往奠醊並令皇孫綿志綿懃穿孝前已賞給經被著再加恩賞內庫銀三千兩經理喪事所有一切喪儀及飾終典禮各該衙門察例具奏○閩浙總督李侍堯奏臺灣解到匪犯內有陳駐等十三名訊係被賊脅從均無助逆抗拒官兵情事例應給駐防滿兵為奴但福州距該犯等本籍太近應請改發江寧諭軍機大臣等江寧與閩省亦

係一水可通之地。各海岸俱有船隻來往。易於逃回原籍。此等人犯。竟發往吉林。黑龍江兩處。給兵丁為奴。以防其竄逸滋事。○調四川按察使陳奉茲為河南按察使。以安徽廬鳳道和寧為四川按察使。○甲辰。

孝康章皇后忌辰遣官祭

孝陵。○諭駐劄西北兩路新疆辦事將軍大臣。向係三年更換。但新疆地方最為緊要。駐劄大臣到任後。相度情形。一切機宜。甫能熟諳。

若遽易生手。殊與事體無益。第久留彼處。不令攜帶家眷。未免心存內顧。嗣後除伊犁將軍。叅贊大臣。領隊大臣。烏里雅蘇台將軍。叅贊大臣。俱聽其攜眷前往外。其塔爾巴哈台。喀什噶爾。科布多等處。叅贊大臣。葉爾羌。阿克蘇。庫楞等處。辦事大臣。有願攜眷口者。一體聽其帶往。又烏魯木齊都統。副都統。俱係額缺。舊例原准攜帶。至塔爾巴哈台。喀什噶爾。葉爾羌三處。協同辦事大臣。及烏什。庫車。

和闐。英吉沙爾。喀喇沙爾。喀密等處。駐劄辦事大臣。俱不必攜帶眷屬。三年期滿時。仍行奏請更換。所有應行賞給攜眷路費之處。著軍機大臣。量加覈減。議奏。尋奏。向例外省將軍。副都統。協領等官。由京赴任者。均由戶兵二部。撥給車馬口糧。今新疆大臣。內恩准攜眷。請照舊例酌減。將軍。給車七輛。馬四十匹。口糧三十分。副都統。車六輛。馬三十匹。口糧二十分。三品官。車五輛。馬二十匹。口糧十五分。其四品以下官。照此遞減。從之。○諭軍機大臣等。官兵在牛莊地方。與賊匪打仗。射死賊目。項上掛有定南將軍。蘇魁偽印一顆。射賊者。係屬何人。著查明具奏。官兵一抵南路。即屢得勝仗。賊匪紛紛逃竄。其莊民賊目等。又情願為官兵偵探賊蹤。縛獻莊大田。以贖其罪。實屬極好機會。而沿山沿海一帶。又屢經福康安派兵分路堵截。諒莊大田罪惡貫盈。斷不能復行免脫。或此時已將該賊日生。

擒捷報業經在途。不日自可遞到。至南路地方。內山與海岸相近。既須多兵堵截。且官兵日增。聲勢更為壯盛。所有此次湖南官兵。自應仍赴軍營。俟擒獲莊大田。再行撤回。亦不為遲。況湖南兵丁。性能耐熱。將來撤兵時。即可暫留該處。以資彈壓。○調鑲紅旗蒙古都統福長。安為正紅旗滿洲都統。以正黃旗護軍統領舒亮。為鑲紅旗蒙古都統。署正紅旗護軍統領愛興阿。為正黃旗護軍統領。○乙

己。禮部議准。前任山東巡撫明興。學政趙佑奏稱。肥城縣屬西北七十里之有莊有氏。查係先賢有子後裔。其七十二代嫡孫有守業。請令承襲五經博士。以奉祠祀。至沂河有子林墓。與有莊舊建祠廟。均應修葺。從之。○調鑲白旗蒙古副都統吉慶。為鑲黃旗滿洲副都統。以內閣學士保成。為鑲白旗蒙古副都統。○旌表守正被戕吉林披甲西清阿妻林氏。○丙午春分朝。

日於東郊。遣肅親王永錫恭代行禮。○諭據明興奏。徐溝縣知縣林琅奉因縣民程瑀等開設斗行。聽信牛建奎。王敦教唆。希圖壟斷。私將在城集場。於四關輪流移設。經該縣查禁。程瑀等抗不遵依。又赴院司呈控。當經批飭該府查明。將程瑀等問擬杖責。枷示。該縣奉文差傳程瑀等。當堂發落。乃牛建奎。王敦挺身抗拒。頂撞咆哮。該縣將牛建奎等。均重責四十板。牛建奎。王敦先後身故。請將林琅

奉革職。審訊等語。此案牛建奎。王敦。如果教唆程瑀。移設集場。壟斷牟利。經該縣查禁。既抗不遵依。轉赴院司呈控。及經該府查明。按律科罪。該縣林琅奉。奉文發落。牛建奎等。又復頂撞抗官。林琅奉。板責懲治。係屬以法決罰。尚非任性酷刑者。可比。不過予以降調。亦足蔽辜。若將該縣革職治罪。轉足以長刁風。若林琅奉。別因勒索不遂。挾嫌重責。以致連斃二命。則其罪竟應問擬抵償。不止於革審

而已。且咆哮挺撞之態亦不一。不可不審究得實。以成信讞。明興人本平庸。而所奏又未明晰。此事料非該撫所能辦理。著派侍郎海寧帶同刑部員外郎王士縈馳驛前往。提集案內有名人犯。及林琅奉秉公嚴審。定擬具奏。尋海寧奏查徐溝縣斗牙程瑀以爭集壘控經太原府審擬枷杖。交縣發落。緣林琅奉欲追究主唆。遂將王敦牛建奎傳訊杖責。先後殞命。迨榆次縣知縣英貴相驗。即據倉書早役等捏供二人挺撞咆哮等情詳報。經臣覆訊屬虛。王敦牛建奎均非奉文發落之犯。又俱年逾六十。輒遭杖斃。林琅奉雖訊無挾嫌勒索等情。應照非法毆打致死杖一百流三千里律革職。發往伊犁充當苦差。其率詳之英貴請交部嚴議。至該縣清源市集開設中街實屬狹隘。並應改設察院街。現交撫臣查辦得旨覽。○諭軍機大臣等據閔鶚元奏請陞見一摺。內稱侯督臣書麟回任。請將巡

撫印務移交書麟兼理。隨即星馳進京等語。書麟於本日甫經到京。計其回抵江省。當在三月初旬。彼時正屆辦理秋審之際。書麟係初任總督。兩江事務繁劇。一切詳讞獄情。該撫自當會同辦理。閔鶚元可無庸亟於來京。應俟秋審事竣後。再行交篆起程。前赴熱河。陞見亦不為遲也。○又諭據長麟奏報雨雪情形一摺。內稱濟南等府各屬地方。自正月初八九及二月初一等日。各得雨雪二三寸至四五寸等語。所奏殊未明晰。各省奏報雨雪情形。自應將得雨得雪之處。明白聲敘。若渾言雨雪。則落雪即為雨雪。如雨雪霏霏。相彼雨雪。皆是。且天氣先暖後寒。則雨在雪前。田塍或有存積。若先寒後暖。則雨在雪後。自即時融化。豈能積有分寸。朕屢念民依。凡遇督撫奏報雨雪情形。俱有詩章誌慰。今長麟所奏。統以雨雪為辭。殊欠明晰。難供吟咏。該撫係進士出身。何以於文理含混若此。著將

所奏各屬是否實係得雨得雪之處詳晰查明據實具奏○御史永清邱文愷奏臣等奉命抽查通州漕務現行知倉場侍郎侯漕船到日即行前往辦理惟抵通後沿途緝捕偷漏等弊應用之役原由倉場酌派但以本處之人查本處之弊仍不免串通朦混請勅順天府添撥幹役十二名隨臣分領督辦得旨所奏是順天府尹吳省欽現在並無應辦緊要事件著即帶領員役不時前往會同該御史抽查○丁未

上詣

安佑官行禮○以貴州威寧鎮總兵許世亨為浙江提督○戊申大學士等議准准關監督徵瑞奏稱清江地方為南北往來要區每年重運糧艘及河工料物均雇民船撥運守候需時致商販未能流通請官造撥船三百隻估需工價銀五萬兩應於准關庫貯盈餘項下給發交督臣按數成造仍由監督養廉內

分年扣還其撥船應需水腳仍照雇船例價給發從之○御史馮應榴奏本年駕幸淀津各省士子進獻詩冊恭應召試惟查考試之地既非殿廷貢院難保無傳遞代倩等弊且各省士子雜湊設有頂替監考官無從辨認並恐有豫購重卷臨期探題倩代乘機傳換請勅下順天學政先將召試士子確加詳覈其需用試卷按照人數慎密鈐印毋許吏胥私行多備並令監考官嚴禁隨從人等出入

併照科場新例不准換卷至取入一等試卷於拆閱彌封後請交軍機大臣會同監看本生覈對文理筆跡如與原卷不符即扣除究治得旨所奏是依議行○旌表守正捐軀山東鄆城縣民王興邦妻杜氏湖北巴東縣民薛大綱妻廖氏

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十八

實錄卷之一千二百九十八

庚

大清高宗法天隆運至誠先覺體元立極敷文
奮武孝慈神聖純皇帝實錄卷之一千二百九十九

監修總裁官總纂修官太子太傅文淵閣大學士文淵閣領閣事領銜內大臣楊森欽奉 上諭事件管理
吏部理藩院等衙門正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣等謹
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣等謹將內大臣戶部尚書總纂修滿洲副都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十三年戊申二月己酉諭據舒亮奏

押解賊匪內有賊黨賴大因病已經正法由
六百里馳奏等語昨據伊奏到將夥賊林饒
已經正法之處即將伊飭行矣此賴大亦屬
無關緊要之賊黨乃又由六百里馳奏殊屬
不曉事體近因念其奮勉始補授都統伊竟
如此糊塗都統之事若皆如此辦理必致不
妥舒亮著再行申飭外其鑲紅旗蒙古都統
員缺著明亮補授舒亮仍著留正黃旗護軍
統領愛星阿著坐補正紅旗護軍統領○庚

戊諭曰。納延泰前因管理鑲藍旗蒙古都統事務。辦理不善。於伊故後。追治其罪。將官爵盡行革去。但念納延泰宣力多年。今伊子惠齡又能出力。著加恩將納延泰原有官爵悉予開復。○工部議准。湖南巡撫浦霖奏稱。湖南原貯硫磺。除本省節年支用。並現撥閩省外。存貯無多。請將湘鄉縣產磺煤礦。動項開採。其煤聽民買用。磺則官為收買。俟酌量收積。足敷數年之用。仍行封閉。從之。○以廣西

鎮安協副將七格。為貴州威寧鎮總兵。○辛亥。

上自圓明園啟鑾。巡幸天津。○諭朕此次巡幸天津。閱視河工。所有經過地方。及天津閩府所屬。本年應徵錢糧。著蠲免十分之三。○又諭。此次巡幸天津。閱視河工。曾經諭令該督祇須於舊有行館。略事掃除。毋得踵事增華。致滋繁費。但念前次癸巳歲。巡蹕經臨。迄今十有餘載。淀河行宮瀕水。易於傾圮。修葺黏

補。不無需費。前次巡幸五臺。曾經賞給直隸省銀九萬三千兩。留為地方公用。今著即於此項銀內。撥銀八萬兩。加恩賞給。以示體恤。○舉行乾隆五十二年奉天直隸江蘇安徽江西浙江湖北湖南山東河南陝西甘肅四川廣東雲南貴州併江南河東河員大計。不謹官二十一員。浮躁官十一員。罷軟官十八員。才力不及官三十五員。年老官九十四員。有疾官三十四員。分別處分如例。○蠲河南

商邱寧陵睢州柘城鹿邑永城等六州縣。乾隆五十二年水災。地畝額賦有差。蠲剩銀併予緩徵。○予故盛京將軍內大臣奉恩輔國公永璋祭葬如例。諡恪勤。○是日。駐蹕黃新莊行宮。○壬子。諭長蘆鹽務。商本素非饒裕。節經加恩調劑。以紓商力。今翠華臨蒞。各商等情殷摯。踴躍歡忭。具見惓忱。宜特沛恩膏。以普春澤。所有乾隆四十八九兩年未完五限四限緩徵正餘課銀。六十七萬八千五

百餘兩。著再加恩。於前限滿後。再展限三年。帶徵。俾商力益臻充裕。以示朕行慶施惠。有加無已至意。該部即遵諭行。○諭軍機大臣等。此次福康安等帶領官兵。勦捕逆匪。由鹿仔港一帶進兵。解圍攻破賊巢。擒獲賊首。經過各緊要地方。賊匪據險抵抗。經官兵奮勇攻撲。所向克捷。此等處山川形勢。自必極為險要。著福康安即將此路一帶險峻要隘處。所如平林仔。小半天。集集埔。斗六門。水裏社。

水沙連。大里杙。及逆首林爽文被擒之老衢崎等處地形山勢。詳細繪圖呈覽。以誌戰功。即日擒獲莊大田。其南路險要地方。亦照此辦理。再四川屯練降番。屢經調派。此次隨同官兵征勦。更為出力。現已有旨。令軍機大臣酌議。將川省額設土外委四十名。照從前金川之例。每名每年加給銀二兩。其屯練兵丁。即將此次隨征之一千五百名。作為定額。令該督等。按每名每月給銀五錢。其餘一千五

百名。俟有缺出。以次拔補。並將此次隨征之降番五百名。作為新屯練。每名每月給銀五錢。其餘番丁。亦以次挑補。俱作為定例。俾出力兵丁。得以永邀恩賞。著傳諭鄂輝。即將現在加恩之處。傳集該屯練降番。明白宣示。咸使聞知。俾益加感激。踴躍思奮。並著李世傑。成德。於川省土弁降番。一體曉諭。知悉。以示鼓勵。○兩江總督書麟奏。安徽藩庫原存社倉息穀價銀。經前撫臣奏准。留為各屬農田

水利工程之用。十餘年來。節次開銷。存貯漸少。工程歲所常有。仍應豫為籌備。請將現存銀十萬兩。撥給典商等。以一分行息。俟十年後。掣回原本。仍以息銀給商營運。並請嗣後工程。如係借項。即用掣回本款。係動項。應於息銀內放給。得旨。如所議行。○以江蘇按察使康基田。為江寧布政使。○是日。駐蹕涿州行宮。○癸丑。諭上年府化府屬雨澤愆期。偶被偏災。其民欠未完及緩徵帶徵銀糧。若令

新舊同徵民力未免拮据所有該府屬五十年五十一分民欠未完及緩徵銀二千二百二十八兩零糧八千二百五十二石零並著加恩一體蠲免以廣朕軫念災黎行慶施惠有加無已至意該部即遵諭行○又諭曰託克託著革退乾清門侍衛止留公爵隨同閒散回子王公等當差○諭軍機大臣等隨征屯練降番屢次打仗或有陣亡者尤堪憫恤著福康安鄂輝傳集該番眾等俟回川後

於軍機大臣議准二千額數之外再將陣亡人等子弟各賞給一兩錢糧一分以示格外體恤若伊等家屬先有聞知未免哀悼俟將來徵兵後再行傳諭李世傑等遵照辦理○是日駐蹕紫泉行宮○甲寅諭朕此次巡幸天津經由水程所有隨從官員等需用船隻節經大加覈減且為期亦不過數日但水手等不無稍需守候著加恩於水手日給常價銀五分外每名酌增給銀三分以示體恤○

諭軍機大臣等據毓奇奏接准琅玕咨會台州等幫守凍漕船應籌催歸次仍於本年起運但逐細籌畫實有趕辦不及之勢請分作兩年灑帶等語此次台州等幫凍阻船隻前據琅玕奏接准李侍堯札知暫行緩運請仍令台州等幫趲歸水次併力趕兌於四月內開行至遲五月底亦可過淮北上等語朕意即以琅玕所奏止為浙省漕運起見當即諭令應俟李侍堯酌量情形再行定奪矣此項

漕米如閩省現在軍務雖已將次告竣臺灣米石恐不能即時內渡或平糶賑恤尚需接濟自應仍行撥往應用若閩省既可無需則此項漕米即當停止運往遵照前旨於明年隨幫灑帶運通即因米數較多不能於下年全數帶交亦不妨分作兩年灑帶今若如琅玕所議仍令守凍之船趕回水次於本年起運則現在各省重運正當銜尾北上之時倘令其停讓轉致重船壅阻且台州等幫即趕

緊回次裝運開行已較往年遲至數月計其到通卸運回空勢必又至凍阻自不若分年隨幫灑帶較為省便毓奇在漕言漕通盤籌畫比琅玕之拘泥尚佳然總須俟李侍堯等會商酌定覆奏到時再遵前旨妥協辦理可也將此各傳諭知之○閩浙總督李侍堯奏臺灣用過軍需銀米為數繁多經手各員並未將照何例支銷之處分晰造報且地隔重洋文檄更形遲滯撫臣徐嗣曾現抵鹿仔港

應令督同臬司李永祺就近覈辦其內地供支一切糧餉及夫船運腳等項臣亦嚴飭總局道府等上緊查報得旨自應如此汝仍應總理其事也○是日駐蹕趙北口行宮○乙卯江西巡撫何裕城奏江西各營兵需用操演黑鉛每屆三年委員赴湖南彙買一次茲准湖南貴州撫臣咨覆產鉛不旺均難採辦惟查湖北漢口鎮現積有商販黑鉛但向赴楚南買運每百觔共銀四兩四錢五分有奇

今漢鎮商鉛時價實需五兩七錢零雖運腳較減每百觔仍多銀一兩四錢八分按照江西應用鉛觔計每年應增銀二百餘兩臣以時地情形不同未便拘泥往例現於估撥公費項內動支委員前往買備三年額鉛俟湖南貴州礦產旺盛或商價稍平即請減價改辦報聞○是日駐蹕泰保莊行宮○丙辰遣官祭賢良祠○賜扈從王公大臣及直隸總督鹽政官員等食○諭朕此次巡幸天津所

有淀河一帶行宮十餘年來未經臨蒞各該處瀕臨水次易於滲圯業經加恩賞給銀八萬兩以為修葺之費今蹕路經臨見各處行宮點綴修飾未免踵事增華過於繁費前此賞給銀兩恐尚不敷著再加恩賞給銀四萬兩交長蘆鹽政於應解內務府項下即行撥給以示格外體恤○理藩院奏昭烏達官倉穀石已移貯該旗等公倉請將原建倉房拆變諭此倉設立已久該旗等出派官兵看守

多年然亦不免微變。且此項穀石官無動用之處。著加恩將倉房並所貯穀賞給昭烏達部落四旗聽其自行辦理。○是日駐蹕左格莊行宮。○丁巳遣官祭

歷代帝王廟。○諭曰琅玕奏據臬司歸景照稟稱。聞溫州一帶洋面上年十二月內有解閩官錢被劫。地方官諱匿不報之事。隨詢之在黃巖一帶洋面查拏匪犯之都司劉大勳。其事俱屬確實。請將署玉環同知張心鏡。叅

將張全得革職。該管之護鎮道府現在嚴查另行叅奏。琅玕歸景照並請交部嚴加議處等語。該地方官接護糧餉遇有被盜劫掠之事諱匿不報。在平日無事之時已屬有干功令。况現在勦捕臺灣逆匪解運糧餉等項尤關緊要。乃該廳營道同諱匿督護之叅將張全得復先後捏報錢米全行出境無虞。並將被劫官錢私行賠補。不即詳報追捕希圖將就了事以致劫盜遠颺實屬玩縱已極。張心

鏡張全得俱著革職拏問。其該管之護鎮道府並著解任交琅玕嚴行審訊如何知情徇隱及別項情弊據實嚴行叅奏至琅玕身為巡撫於屬員有此等諱盜重案未能覺察自難辭咎著交部嚴加議處。臬司歸景照固有失察之咎。但此案究係由該臬司訪聞稟辦歸景照著從寬交部察議。○諭軍機大臣等據尚安奏商民員永春被土爾扈特搶劫馬匹銀物一案。新疆地方商民往來貿易甚多

今有此被劫之案。賊數月未獲著交尚安嚴飭所屬上緊設法緝拏務獲以靖地方。又據清字摺奏發往烏魯木齊之趙三陳在魁張文達三犯乘間脫逃現經拏獲正法等語。此等遣犯在烏魯木齊本地脫逃雖經查拏正法。但此外發遣伊犁及各處之犯在配脫逃者甚多俱係經由烏魯木齊地方何以未據奏報拏獲並著尚安嚴飭地方文武務須隨時查察實力緝拏毋任日久遠颺漏網再

據尚安奏。查明烏魯木齊所屬修建倉廩原估浮多。及查驗草率之翰圖等。各員請旨交部議處。此項修建倉廩。經尚安派員查勘。覈減至二萬二千四百餘兩之多。其原估官員任意浮多。自必豫為侵冒地步。並著查明承辦此項倉工各員。如有浮冒侵肥等弊。據實嚴行叅奏。至鎮迪道翰圖。係年滿應調內地之員。將來仍應以道員補用。但現在尚安所奏疎防商民被刦一案。翰圖既係兼管之員。而修建倉廩。又係翰圖原估。看來翰圖於辦理地方事件。不但不認真。必將有侵冒操守不清之處。著即查明該員平日居官如何。如難勝道員之任。有無別項劣蹟。亦即據實叅奏。○是日駐蹕臺頭行宮。○戊午諭曰。御史龔駿文奏。此次天津恭獻詩賦士子。有由三分四庫書總校賞給舉人者。又有兩侍郎。一巡撫兩藩司親子。及京堂翰詹科道子弟。遇鄉試之年。例入官卷者。應逐一查明。嚴加防

範。以杜替倩等語。朕向來省方觀民。清蹕所臨。士子迎鑾獻賦。舉行召試。量才錄取。分別賞給中書舉人。原以振拔單寒。為苦志力學者勸。若此等士子。內其父兄已登仕籍。均得邀恩以官卷入場應試。則自有出身之途。又何必於巡幸時。進獻詩賦。冀圖錄取。侵占寒畯之路。至由三分四庫書總校議敘。賞給舉人者。伊等以讐校微勞。得廁舉科。已為僥倖。若又應召試。復思倖獲。尤屬不知止足。豈朕嘉惠寒素。勸勵績學之意。所有此次進獻詩賦士子。內而京堂。外而督撫藩臬。以及翰詹科道子弟。並校書議敘。賞給舉人。及由俊秀報捐貢監生者。竟著毋庸考試。嗣後巡幸各省。設有召試之典。即以此為例。○是日駐蹕揚芬港行宮。○己未孝昭仁皇后忌辰。遣官祭景陵。○諭。前因京察記名。應用道府人員。將次用完。曾經降旨。令各省督撫豫行保舉。以備

簡用。內直隸山東河南三省有大名府糾衆滋事。及伊陽縣拒捕戕官兩案。首犯查拿未獲。浙江一省。各府州縣倉庫虧空。俱有應得處分。且於黃梅款蹟扶同朦混。以上四省。俱不准其保舉。今念從前各案。閱時已久。其現任府廳各官。俱已更換者多。且上次京察記名。及各省保舉人員。均已陸續簡用。所有直隸山東河南浙江四省。著准其各保舉堪勝道員者二員。堪勝知府者三員。俱著各該督

撫秉公揀選。據實具奏。勿得濫等。並出具切實考語。即送部引見。候朕酌量簡用。○諭軍機大臣等。據伍拉納奏。接准孫永清來咨。內開。據涇州府貴縣知縣張毓德稟稱。遞到福建同安縣流犯呂辰一名。查驗疤痕箕斗。與解文未符。訊出係同安人郭大。在龍溪縣地方。受賄頂替轉解一摺。著將署龍溪縣知縣甯淑昌革職。解交刑部治罪。甯淑昌於呂辰過境時。並不驗明疤痕箕斗。率行僉差接遞。

以致該犯中途賄囑頂替。非尋常疎縱可比。該部覈擬時。自應將該員發往烏魯木齊。即從輕亦當發往軍臺効力贖罪。以示懲儆。至呂辰既經免死減流。乃敢於中途賄囑郭大頂替。轉解到配。甚屬可惡。應即於該犯原擬絞罪。即予立決。方足以示懲創。即頂替之犯。亦當擬絞監候。將此傳諭知之。○是日駐蹕王家場水營。○庚申。欽差協辦大學士陝甘總督辦理將軍事務公福康安。領侍衛內大

臣叅贊公海蘭察。成都將軍叅贊鄂輝奏。臣等進剿南路賊匪。自南漳大穆降。水底蔡等處。節次射死賊目陳建平。曾大達。及不知姓名騎馬賊目十餘人。生擒藍九榮等十九人。均已正法。隨探知莊大田等。俱在柴城。欲往蚊率社。經番衆抵禦退回。臣等於本月初五日。即由風港進兵。直抵瑯嶠。因恐攻撲過急。賊目或致自戕。匪夥乘間竄逸。當派穆克登阿等。及山猪毛等處義民。分撥六隊。自山梁

挨次排下。直抵海岸。烏什哈達所帶水師兵丁。適值順風。連檣齊至。四面合圍。自辰至午。殺賊二千餘名。將莊大田。及有名頭目莊大莖。許光來等。四十餘名。全數擒獲。併搜獲莊大田之母莊黃氏一口。現在派員解京審辦。仍令官兵等。分投搜查遺孽。再此次義民首曾中立等。招集生番。聽候調遣。攻勦極為出力。內有鄭其仁。因引導官兵先進。遇賊陣亡。臣已傳知該家屬。給銀收殮。查鄭其仁。係恩

賞守備職銜。並令以實缺補用之員。請照守備例議卹。諭曰。賊目莊大田等。於逆首林爽文就擒之後。尚敢竄匿山林。抵死抗拒。經官兵四路攻圍。勢窮力蹙。或竟情急自戕。及投海斃命。俱屬事之所有。今乃負隅死守。被官兵義民。層層圍逼。將賊目莊大田。及有名頭目。悉數擒獲。此皆由

上天眷佑。將士用命。而福康安等。調度有方。佈置周密。是以南北兩路。賊首賊目。悉就俘擒。

臺灣全郡平定。實堪嘉獎。特親解本日手帶漢玉搬指一個。小荷包一個。賜福康安。又親佩小荷包一個。賜海蘭察。以示優眷。福康安海蘭察鄂輝。俱著交部從優議敘。所有許世亨。梁朝桂。穆克登。阿表。國璜。及在事出力之大小將弁等。著福康安查明咨部。從優議敘。其隨征兵丁。並著福康安查明。一併分別獎賞。至此次勦捕逆匪。該處義民等。隨同官兵打仗出力。現在擒獲賊目莊大田。義民首等帶領各莊民人。分隊堵截。尤屬可嘉。此內義民首曾中立。前因屢次奮勇。已賞給同知職銜。今又招集生番。聽候調遣。著福康安即將曾中立。酌量補以實缺。其餘義民劉繩祖。鄭天球。張元。鄭藍。應舉等。並著福康安查明。如何加恩。或補以實缺。或加賞職銜之處。分別具奏。以示獎勵。至前在下埤頭一帶。勦賊之義民首鄭其仁。遇賊陣亡。鄭其仁前已賞給守備職銜。著交部加一等照都司職銜議卹。

該義民家屬。並著福康安從優賞給養贍。○又諭鄂輝。普爾普。此次均屬奮勉。著加恩賞戴雙眼花翎。○諭軍機大臣等。此次官兵義民分投搜捕。將賊目莊大田擒獲。其首先擒拏者。究屬何人。著福康安查明據實具奏。現在大兵告竣。臺灣地方。一交三月。氣候即已炎熱。屯練兵丁。素不耐熱。計此旨到時。已屬三月下旬。即應早行撤回。著傳諭鄂輝。即令原帶屯練之總兵將官。率領屯練等。先行內渡。取道回川。鄂輝亦即由驛來京。陞見。其已圖魯侍衛章京等。即令海蘭察。普爾普等。仍分起帶領回京。至此外應徵各兵。著福康安遵照節降諭旨。次第令其渡回內地。各歸營伍。此時臺灣全郡平定。其餘零星逆匪。陸續搜查。計三月內。自可全竣。但應辦善後事宜。最為緊要。常青現已革職。毋庸交辦。著福康安與徐嗣曾悉心籌酌。將改建城垣。清釐地畝。添設官弁等事。妥為經理。務期一勞永

逸。綏靖海疆。且不必急於來京瞻覲。務將善後一切事宜。料理妥協。於八月萬壽節前。到熱河瞻覲。亦不為遲。且福康安此次凱旋內渡。非如前此進剿時。關係緊急。不得不冒險。進行者可比。亦應候風色平穩。方可渡洋。勿冒險輕涉。並內渡之各省將弁兵丁。均不可令其冒險。以副朕體恤眷念至意。○御史龔驂文奏。前因大臣子弟及總校等有力之家。恭應召試。易占孤寒之路。奏請另編一束。已奉旨。停其考試。今續查有軍機司員汪日章。張師誠之親兄親子。並此外有無期親服屬者。應請勅下一體查辦。得旨。所奏甚公。交軍機大臣查明辦理。○是日。駐蹕柳墅行宮。至乙丑。皆如之。○辛酉。清明節。遣官祭永陵。福陵。昭陵。昭西陵。

孝陵

孝東陵

景陵

泰陵

泰東陵

上命

皇十五子顯琿祭

孝賢皇后陵○遣官祭

端慧皇太子園寢○賜扈從王公大臣并直

隸官員等食○諭朕此次巡幸天津閱視河
工業於啟鑒日降旨將經過地方及天津闔
府屬本年應徵錢糧蠲免十分之三茲翠華
臨蒞小民扶老攜幼夾道歡迎愛戴之忱倍
切朕心深為喜悅著再加恩將天津府屬即
年尾欠未完之緩徵帶徵銀五萬七百三十
兩零屯穀六千一百七十餘石豆四百三十
石零普行蠲免俾海濱部屋益慶盈寧共安
樂利以示省方施惠之意該部即遵諭行○

諭軍機大臣等據陳用敷奏盤查藩司庫項
無虧及動項修理監獄各摺業經批覽並交
該部覈辦矣外省藩庫存貯銀兩原以備地
方一切經費及災賑動撥並隣省協濟之用
自應寬為儲備今安徽藩庫實存正項耗羨
雜項等銀共存七十五萬餘兩為數未免過
少遂面詢書麟據稱俟地丁徵齊即可得百
餘萬兩恐他省庫貯銀兩亦有多寡不齊之
處現已交戶部將各省藩庫內實存銀數各
有若干查明另行酌辦外至各省地方遇有
應行動用官項之事其勢實難稍緩者固當
動帑興修不可惜費若酌量情形可從緩辦
亦當量為節省即如此等修理監獄及衙署
倉廩等事各省每屆應修時即奏請動項而
部中亦即照例議准覈銷其實此等工程未
必俱係急需修理必不可稍緩者著傳諭各
省督撫凡遇有動項應修工程務須嚴飭屬
員切實勘驗如係可以緩辦即不妨酌量從

緩此亦節省浮費。留備緩急之一法。總期慎重錢糧。俾儲積充盈。以備地方隨時公用。更為寬裕。○又諭。現在臺灣全郡平定。大功告成。一切善後事宜。最關緊要。李侍堯現駐廈門。照料撤回官兵內渡。及覈辦軍需各款。項事務繁多。自未能前渡臺灣。會同籌辦。昨已有旨。令福康安同徐嗣曾悉心籌酌。將改建城垣。清釐地界。添設官弁等事。妥協經理。徐嗣曾係福康安奏請幫辦之人。且係本地巡撫一切事宜。有福康安在彼。會同商辦。自能斟酌妥善。一勞永逸。至李侍堯係該省總督。如有應行會辦之處。原可彼此札商。熟籌妥辦。再臺灣逆匪滋事一案。前因柴大紀在總兵任內。飭法營私廢弛。激變。福康安並未將其種種劣款。指出參奏。李侍堯常青亦並未據實直陳。是以將福康安嚴飭。李侍堯交部嚴加議處。常青即予罷斥。並將前任督臣富勒渾雅德革職。拏問。俟解到時。並按律治罪。

至徐嗣曾身任巡撫。臺灣營伍。雖非所轄。但伊在閩年久。於柴大紀縱令兵丁私回內地貿易牟利。及廢弛營伍。不加訓練。種種釀變貽誤之處。平日豈無聞見。乃竟視同膜外。緘默不言。將來自有應得之咎。並著徐嗣曾明白回奏。又臺灣道永福。在府城率領兵民。協同防守。雖有微勞。但該處地方官。平日貪黷斂怨。釀成事端。皆係永福所屬。已不得為無罪。且柴大紀近在同城。種種貪劣不職。如永

福曾經揭報督撫。而督撫置之不辦。應令據實指出。自當專治督撫以徇隱之罪。若永福並未揭報。則不得因其有守城微勞。稍為寬貸。倘伊平日亦有營私之處。則更不必言矣。著福康安即向永福切實詢問。據實覆奏。務使功罪兩不相掩。以昭平允。至楊廷璽原係同知。各州縣非其專管。於此案尚無大過。且伊在府城。帶領義民等。悉力守禦。一得官兵打仗殺賊信息。即隨時稟報。李侍堯尚為迅

速著福康安查明楊廷理。如才具尚屬可用。即據實保奏。候朕酌量加恩錄用。○豁雲南沉溺銅六萬三百三十觔有奇。○壬戌。

上御閱武樓閱兵。○諭。此次辦差文武官員任內所有降級罰俸住俸之案。俱著開復。其無此等案件者。各加一級。○又諭曰。柴大紀在任兩年之內。已婪索金銀五六萬之多。且因臺灣逆匪滋事。豫行寄信家中。囑伊子先行防備。現據琅玕在其屋後地平之下。起出金

錠銀兩。可見柴大紀居心狡詐。任意貪黷。若非私令兵丁渡回內地貿易牟利。並勒索所屬剝削兵民。焉能擁有厚貲。是柴大紀亂法營私。貪婪激變。種種款蹟。已確鑿可據。柴大紀業經革職拏問。應俟解到後。交部照律定擬。明正其罪。向來朕辦理庶務。一秉大公。至正賞功罰罪。尤務嚴明。從無成見。如柴大紀在嘉義縣時。被圍緊急。曾諭令不妨保護義民。全師而出。柴大紀覆奏。不忍將數萬生靈

委之賊手。仍督率兵民。忍饑固守。朕以其甚有良心。覽奏為之墮淚。是以即加封伯爵。賞給銀兩。而其種種貪劣捏飾之處。彼時尚未有人摘發。所謂君子可欺以其方者此也。迨柴大紀在任各劣蹟。節次敗露。前經福康安奏其為人狡詐不可信。福康安方抵該處。自未知其實在劣款。必因人言藉藉。故為此奏。後因德成覆命。朕詢出前情節。經諭飭查詢。始據李侍堯遵旨逐款查明屬實。陸續奏

因即降旨。將柴大紀革職拏問。可見朕於臣下功罪。惟視其人之自取。有功即賞。有過即罰。從不稍存適莫之見。此天下後世所可共喻者。是以得邀

上天眷佑。五十三年以來。屢集大勲。開疆拓土。未必不由此敬

天勤民之念。有以啟之也。○閩浙總督李侍堯奏。臺灣軍興以來。撥運浙江。江西。江蘇。湖北。湖南。四川等省米石。嗣因台州等九幫漕米

凍阻復奉旨就近運閩備撥。今軍務業經告竣。無須多為籌備。除台州等幫漕米現已飛咨停運。其各省撥運米。除陸續運臺及內地供支口糧。需米四十八萬餘石。又臺澎及福州等五府。每年應放兵米。因臺屬疊蒙蠲免。無項可支。應需米十五萬三千一百石零。又五十三四兩年班兵眷米。及凱旋內渡沿途口糧。共需米三萬四千六百餘石。又漳泉二府。應需酌撥平糶米三十萬石。以上共需米九十七萬石。覈之各省運到米數。已一百三十九萬石。實屬有贏無絀。即再需濟糶。亦不致周章。所有湖南未經運到米七萬五千石。現咨明何裕城。照數截留。四川未經運到米二十四萬石。亦已飛咨書麟。閩鶚元截留江蘇。諭軍機大臣等。各省撥運米石。原以接濟軍糈。今臺灣全郡平定。大功告成。各省業經運到閩境之米。既足敷應用。其未經運到者。自可毋庸再行撥運。所有浙江台州等九幫

及湖南第二三四起。川省第二三四五起米石。俱著停止起運。此內川省應行截留米石。現在面詢書麟。據稱該省倉儲充足。無須買補。是此項米石。亦可毋庸截留江蘇。著同浙江湖南二省停運米石。一體分年隨幫灑帶運通。如米數較多。不能於下年全數帶交。即分作二三年陸續灑帶。亦無不可。該督撫必須飭屬加意收貯。勿致霉變。方為妥善。○是月浙江巡撫覺羅琅玕奏。據兩浙商人呈稱。臺匪尅日剿除。曾經奏准捐銀。以資賞兵之用。今復派員赴臺。建築城工。請再公捐銀三十萬兩。為添補城工之用。下部知之。○閩浙總督李侍堯奏。前因閩省添募新兵二萬。陸續添造烏鎗一萬六千桿。今新兵業已議裁。此項多餘烏鎗。存貯徒滋鏽壞。查上年浙粵兩省。調赴臺灣官兵一萬三千餘名。節次打仗後。器械必多損失。請通融撥給。各兵歸營。毋庸動項另製。其原造工價。仍咨明兩省。照

數扣移歸款得旨所思周到好。○福建陸路提督梁朝桂奏謝陞任恩得旨福建營伍亟當整頓一切勉之。

大清高宗法天隆運至誠先覺體元立極敷文奮武孝慈神聖純皇帝實錄卷之一千二百九十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三百

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
吏部理藩院事務直隸總督前據世襲騎都尉軍功加七級隨帶加二級軍功紀錄一次臣
總纂官經筵講官太子太傅文華殿大學士文淵閣領閣事稽察欽奉 上諭事件處管理
世襲騎都尉軍功加九級隨帶加二級又加二級直隸總督前據世襲騎都尉軍功紀錄五次
臣等謹將十四次臣德麟經筵講官太子少保工部尚書紀錄六次臣曹振鏞等奉

敕修

乾隆五十三年戊申三月癸亥朔祭

先農之神遣怡親王永琅行禮○賜長蘆山東商人食○諭此次巡幸天津直隸及各省士子迎鑾獻賦因令分別考試所有考取一等之舉人陳煜著賞給內閣中書與考取候補人員照例挨次補用貢生王蘇王芑孫生員吳鎔著賞給舉人准其一體會試其考取二等之劉寶梧黃掌綸叢之鐘邵士鐸俱著各賞緞一匹○又諭朕鑒輅時巡經過畿南一帶龐眉皓首夾道歡迎足徵盛世耆年之

瑞所有沿途及天津老民老婦俱著加恩賞
賚用普春祺○又諭此次辦差兵丁著賞給
一月錢糧○又諭此次臺灣勦捕逆匪該處
義民隨同官兵打仗殺賊甚為出力業經降
旨將廣東泉州等莊賞給褒忠旌義里名用
示獎勵至漳州民人雖與賊匪籍貫相同但
其中隨同官兵打仗殺賊者亦復不少若不
一體加恩轉似於伊等有所歧視不足以示
勸勵所有漳州民人各莊著賞給思義村俾
該民人等咸知顧名思義勉為國家良善守
法奉公以副朕一視同仁至意○諭軍機大
臣曰柴大紀前在嘉義縣防守未經帶兵出
城一節經福康安等查明防守嘉義縣俱係
義民之力其未經出城亦係義民不肯將伊
放出伊亦畏賊不肯帶兵出城柴大紀前次
所奏全不足信是柴大紀恒怯無用又復狡
展欺飾並守城亦無寸功足錄矣且此案逆
匪滋事由伊釀成激變是其罪較之黃仕簡

任承恩之僅止因循貽誤者為尤甚著福康
安將此一節向柴大紀嚴加審訊即行定擬
迅速據實具奏○又諭臺灣戍守兵丁將來
自仍應分班輪換此等兵丁籍隸漳泉者居
多若分撥營汛時漳泉兩處莊民即以同籍
之兵派往防守則伊等鄉貫熟習自必聯為
一氣即間有作奸犯科者兵丁等未必肯舉
發自應令籍隸泉州之兵在漳州民人莊村
附近一帶防守其籍隸漳州之兵即以防守
泉州各莊庶彼此互相糾察可以防微杜漸
而他府之兵與之互相錯處不動聲色於撫
綏防範俱有裨益著將此密行傳諭福康安
與徐嗣曾妥定章程熟籌辦理○予故和碩
莊親王永璫祭葬如例謚曰愼○甲子諭軍
機大臣等據伍拉納孫永清先後奏查出福
建同安縣流犯呂辰在中途賄囑頂替一案
已降旨將疎縱之知縣甯淑昌革職治罪並
諭令伍拉納等將呂辰一犯迅速拿獲訊究

矣。本日又據伍拉納由驛覆奏被竊鞘銀賊犯徐長俚一摺。內稱上年十一月內浦城縣被竊鞘銀一案。於本年二月內接准何裕城來咨。隨查此案並未經地方官詳報。詰訊解員黃陂縣縣丞熊泗供認領解餉銀五萬兩。押至浦城縣地方被竊鞘銀一千兩。畏懼處分。商同該縣知縣李景觀賠補。已於本月十二日會同督臣參奏等語。鞘銀被竊該地方官竟敢私行賠補。諱匿不報。殊為可惡。既據該督等具摺參奏。但此摺尚未奏到。想係差弁齎遞以致遲滯。著傳諭李侍堯伍拉納即將該員等拿問。嚴行究訊。如何商同諱匿賠補。並提集同行擡夫及押解接護官弁兵役人等一併詳悉審究。務得實情。即行迅速具奏。再前據琅玕奏浙江解閩官錢在溫州一帶洋面被劫。諱匿不報一案。已降旨將同知等官革審。並諭令李侍堯如委員尚在閩省。即將此案情節嚴查究辦。現在曾否審明。李

侍堯一併詳查迅速具奏。毋任稍有隱飾。○又諭曰。孫永清奏據貴縣知縣張毓德稟稱該縣遞到福建同安縣流犯呂辰。查驗箕斗未符。訊係同安縣監內更夫郭大。在龍溪縣地方受賄頂替。但是否在途雇倩。抑係在監即行頂替之處。尚係一面之詞。應將郭大一犯解回閩省。飭拏呂辰及管押差役質審辦理等語。此案前據伍拉納奏到。業經降旨將甯淑昌革職。解交刑部治罪。並令將查出之貴縣知縣張毓德送部引見矣。呂辰既經免死減流。膽敢賄囑頂替。甚為不法。現據孫永清將頂替之郭大一犯解回閩省。飭拏正犯呂辰到案質審。著傳諭伍拉納即飭屬嚴拏務將呂辰速獲。並審明該犯等如何賄囑頂替及原解之兵役等受賄故縱情由。逐一嚴審定擬具奏。○乙丑。賜扈從王公大臣侍衛等食。○諭前因臺灣勦捕逆匪需用軍糧。應行寬為籌備。又福建漳泉二郡上年偶因缺

雨糧價較昂。節次諭令浙江、江蘇、四川、江西、湖廣各省撥運米石以資接濟。經各督撫派員督辦沿途接護運送到閩。甚為妥速。業經降旨將各該督撫交部議敘。現在逆首林爽、文莊、大田生獲。臺灣全郡平定。大功告成。各省運到米石足敷應用。其未經運到之米無須再行運往。亦已諭令各該督撫即行截留。分年隨帶運通。至各省承辦運米之員一經派委俱知以公事為重。恪守功令。上緊趕運。

源源相繼。軍糈民食並資充裕。今仰荷

上蒼眷佑。南北兩路賊氛盡掃。魁渠首惡悉就生擒。深愜朕意。所有各省承運米石之文武員弁俱著該督撫查明咨部議敘。其護送之兵丁等俱著酌量加賞。再此次軍報往來馳遞無誤。其各省驛站文武員弁亦已有旨交部議敘。至現在逆首林爽交解赴行在沿途管押護送甚為迅速。所有各省派出押解逆犯及沿途接護之文武員弁並著交部議敘。

其護送兵丁人等均著查明分別酌賞。朕賞罰一秉至公。雖微末弁兵稍知出力亦不肯沒其微勞。內外大小臣工惟當倍加感奮。益矢慎勤。旌表守正捐軀山東嘉祥縣民王常亮妻蘇氏。○丙寅。

上自天津迴鑾。○定巡察臺灣例。諭臺灣孤懸海外。遠隔重洋。民情刁悍。奸徒易於滋事。向來祇派御史前往巡視。職分較小。且不能備悉該處情形。殊屬有名無實。著將請派巡臺

御史之例停止。令該督撫及水師陸路兩提督每年輪值一人前渡臺灣。嚴行稽察。如地方文武或有執法營私。擾害兵民之事。即可就近查明據實奏。福州將軍亦係該省大員。自應一體輪派。至海洋風信靡常。前已降旨令該督撫等祇須視風信平穩時配船前往。不必拘定時日。但遠渡重洋究係涉險。如該將軍督撫提督內有年逾七十者著免其前往以示體恤。○諭軍機大臣等。前諭令阿

桂訊問富勒渾在總督任時。於柴大紀貪贖營私種種劣蹟。何以置之不辦。據富勒渾供稱。在總督任時。曾節次密札臺灣道府。令其時時查訪。倘有廢弛營伍等事。即密行飛稟查辦。若通同狗隱。別經發覺。必將不行稟報之道府。一併嚴參。俱有案可查。該道府等俱可詢問等語。柴大紀任意侵貪。該道府等近在同城。豈無聞見。自當據實稟報。何以並未有人舉發。著福康安即將富勒渾前此札據。吊查閱看。並詢問該道府等。如果富勒渾所供屬實。則柴大紀種種劣蹟。竟係道府等通同狗隱。即使該處地方官接到密札。後富勒渾旋經調任。亦應將柴大紀款蹟。稟明接任之雅德、常青等。乃始終並無揭報。除孫景燧已被賊戕害。永福在臺灣最久。身係滿洲。又任道員。於此事實難辭咎。著福康安即查明該道有無揭報。及如何通同狗隱之處。據實嚴行參奏。再臺灣應辦善後事宜。已節次諭

令福康安會同徐嗣曾熟籌妥辦。今思此次搜捕逆匪。該處熟番尚為得力。將來臺灣換班兵丁前已有旨。諭令酌留一半。即在臺灣募補。毋庸更換。今此等熟番向化已久。馴熟可用。或即照四川屯練楚省苗民之例。酌量挑選。即於應在臺灣募補兵數內。將此項熟番參半充補。既可防範地方。又足以示妥輯。而出力社番得有錢糧。於生計益資饒裕。似為兩有裨益。著福康安等將是否可以如此辦理之處。即行詳細商妥。據實具奏。如不可行。亦不可拘泥遵旨。又昨訊據林爽文有夥犯董喜帶病跟伊逃至集集埔地方。因官兵追殺不能相顧。各自逃竄。董喜實在身死與否。並未親見等供。前經福康安訊據林爽文供稱董喜業經病故。當即以所供不足深信。諭令福康安查明覆奏。今嚴訊林爽文並未親見董喜身死。是林爽文前在軍營所供。自係護庇黨惡。並未確實。著再傳諭福康安將

董喜一犯嚴切查究下落務得確據毋任倖逃漏網○浙閩總督李侍堯奏臺灣被害各員遵旨詳加區別彰化縣知縣俞峻到任未及兩月被難實屬因公理番同知長庚當賊攻彰化時手刃數賊當即被害鳳山縣知縣湯大奎雇募鄉勇守城因眾寡不敵即行自刎其子湯荀業同時被戕署理番同知王雋因解餉過臺派往鳳山支放遇賊被害此四員居官素無劣蹟其抗節死事情形似堪憫

惻應請議卹至臺灣府知府孫景燧臺防同知劉亨基原任臺灣縣知縣程峻署諸羅縣事原任臺防同知董啟埏署諸羅縣唐鑑聲名俱屬狼籍其貪黷斂怨被害實由自取應毋庸給予卹典諭前因臺灣逆匪滋事時被賊戕害各員內或有平日居官廉謹實能抗節捐生亦有在任貪黷廢弛殃民斂怨遇賊猝被戕害者若概行給予卹典不足以彰瘁而儆官邪因諭令李侍堯查明被害各員

平日居官及死事情節據實具奏再行分別覈辦今據李侍堯所奏甚屬公當地方官有守土牧民之責如果居官勤慎廉隅自矢及事起倉猝能以身殉是其在任並無劣蹟而死事實屬因公自應加恩議卹以示旌獎若其平日貪污肆行剝削以致眾怨沸騰激而生變此等劣員設其身尚在必當明正典刑豈可因其被賊戕害俾得濫邀卹典所有此次臺灣被賊戕害各員除居官貪黷之孫景

燧劉亨基程峻董啟埏唐鑑五員不准議卹其俞峻長庚湯大奎王雋均著交部照例議卹○是日駐蹕興福寺大營○丁卯諭本日雨澤霑濡道路泥濘拉緯河兵行走尚屬便捷又水手等十七名赴水拖淤衣服淋濕均著各賞銀鏹一兩○是日駐蹕寶稼營大營○戊辰諭閩省地方文武員弁辦理軍需解運糧餉火藥照料兵丁配渡等事尚俱妥速並無貽誤現在大功告成除該督撫已邀甄

叙外。其在事出力之文武員弁。著李侍堯詳晰查明。分別等第。咨部議敘。○諭軍機大臣等。本日有湖北荊門州民人蔡士仁。在道傍叩關。當即令軍機大臣訊問。據供。該州徵收漕米。書役舞弊。不收本色。要收折色。上年該處米糧甚賤。每斗賣制錢一百文。交納時要交八百文。又多出田單卡票。索詐常規錢文。四十二年。四十六年。歷經州民赴院。司道府衙門具控。積弊如故。蔡士仁曾於五十一年赴府控告。被書役等朦混。聳稟前任知州。訊息詳銷等供。地方官徵收糧米。自應按例收納。何得任意折收。例外苛索。現據蔡士仁供。節經州民赴院。司道府衙門控告有案。何以並未查辦。如果蔡士仁所供屬實。則該州官吏苛徵舞弊。各上司通同徇隱。不可不嚴查究辦。但以一州之事。蔡士仁一人挺身控告。恐有賄囑唆訟情事。亦當據實質訊。以儆刁健。現在穆精阿。自廣西審案。業經完竣。起程

此案即著該侍郎順道前赴荊門州。會同舒常。姜晟。吊集案卷。提齊犯證。秉公查審具奏。所有軍機大臣審訊奏片。及蔡士仁原呈。並呈出卡票。田單。著一併發往。將此由六百里各諭令知之。○是日。駐蹕桐柏村行宮。○已諭據孫永清奏。拿獲越獄監犯。審明辦理。一摺。內稱。梁美煥係在外接贓行劫。夥盜膽敢越獄脫逃。審明後。即恭請王命正法。至竊犯何柏。本罪僅止杖笞。應照新例。原擬軍流以下。無論原犯罪名。擬絞監候等語。所辦殊屬過當。越獄監犯。固應嚴辦示儆。但其中情罪亦有不同。如羈禁囚犯。膽敢反獄。刦執持器械。拒傷禁卒。或裏應外合。糾夥同逃。似此不逞之徒。兇狡藐法。即屬亂民。一經拿獲。其為首者。自應立正刑誅。為從之犯。即問擬死罪。亦當聽候部議。或入於情實。辦理以儆兇悍。若監禁之犯。畏死倖生。希圖免脫。或刦挖壁洞。扒越圍牆。祇係僥倖苟免性命。與公

然逞兇殺傷禁卒糾夥衝出者有間此等越獄之犯自不得與反獄刦獄者一律科罪若因其同係在獄脫逃不為區別則越獄者既概寘以重典而於情節強橫反獄刦獄者其罪無可復加未足以昭平允自應將為首者問擬情實為從者酌予擬緩方無畸重畸輕之弊今據孫永清所奏梁美煥一犯係在獄撬脫木柵穴牆鑽出者非反獄刦獄可比該撫於拏獲時即問擬斬決亦應奏明俟接到部覆再行處決乃即請王命正法辦理實失之太過若各督撫於此等案犯因有恭請王命之例即立予重辟亦非慎重人命之道必有橫議今之督撫皆好殺有權者況執法用刑各有輕重緩急如現在閩省辦理漳浦焚搶匪徒該督李侍堯於拏獲審明後將案內要犯一面正法一面奏聞原因臺灣正在勦捕逆匪之際而漳浦匪徒輒思乘間竊發並冒稱林爽文夥黨恐嚇居民以為內外響應

之計此而不速正典刑何以消亂萌而戢奸宄又如從前粵省菱塘沙灣一案皆係海洋巨盜積年糾夥肆刦一經拏獲到案亦自當決不待時立寘重典今此等越獄人犯與倡亂奸民強刦大盜情罪有間又有何迫不及待而遽請王命即行正法前此刑部所定之例於在監脫逃人犯祇有越獄之條而於越獄人犯與反獄刦獄者並未分晰條例本未為周到著該部即將越獄人與反獄刦獄應如何酌覈情罪分別定擬之處悉心妥議具奏所有孫永清摺內所奏何柏一犯即照現定之例覈擬朕辦理庶務一秉大中至正而於明罰勅法務得其平應嚴應寬從不稍存成見惟隨時隨事準酌情罪輕重以期權衡悉當將此通諭知之○諭軍機大臣等前因福康安攻克大里杙賊巢後不即帶兵直入番境搜捕僅懸立重賞令生番將逆首擒獻辦理未免失之遲緩恐逆首得以乘間遠颺

不得不加以策勵。今賊首林爽文已生擒解京。並將南路肅清。賊目莊大田一併生獲。該處生番等幫助官軍分路搜緝。不料其竟能如此出力。現在臺灣全郡賊氛掃蕩無遺。籌辦一切均屬周密詳妥。深慰朕懷。實堪嘉許。辦理亦未為遲。至從前請將恒瑞仍留軍營効力一節。彼時福康安因未奉到節次諭旨。故爾冒昧陳奏。今既飭令立即回京。亦毋庸置議。福康安現係有功之人。一切過失皆可不問。且其功大而過小。豈有轉加有功之人以罪之理。此時軍務業經告嚴。計德成早已渡洋前抵臺灣。所有應行改建城垣。福康安自己會同相度形勢。詳悉妥辦。此外如清釐地界。添設官弁各事宜。福康安惟應與徐嗣曾等悉心籌畫。酌定章程。以期一勞永逸。即有一二無關緊要零星逸犯。亦可交徐嗣曾普吉保二人在彼督拏。自不難全行緝獲。刻下新任福州將軍魁麟已可渡海前抵臺灣。

現在大功已竣。福康安酌留楚黔官兵一二千。在彼彈壓。將善後諸務大局料理妥協。即可帶兵起程回京。惟向來四月間海洋風信靡常。不無涉險之處。福康安此時凱旋回京。尤宜慎重。不得冒險前進。竟不妨於五六月間俟風信順利再行內渡。方為穩妥。即途次亦不必過於趑趄。於八月萬壽前赴熱河瞻覲。亦不為遲也。再莊大田供內有黃天養莊樹二犯。現未拏獲。著福康安李侍堯即於內外各處嚴緝務獲。毋任漏網。又據莊大田供林爽文曾差陳天送到南路糾合夥黨。有莊大田族弟莊大莖聽從入夥等語。現訊之林爽文據供並不知有陳天送其人。所供恐不足信。著福康安即查明陳天送下落。務將該犯拏獲。毋任免脫。○是日駐蹕南苑南衙門行宮。庚午吏部等部議准稽查寶坻等處駐防正藍旗護軍統領宗室崇尚咨稱保定府滄州三處向由部選筆帖式各一員應照

獨石口例徹回。又山海關副都統宗室琳寧咨稱永平府主田縣三河縣冷口喜峯口羅文峪六處部選筆帖式均請裁汰由各該處之前鋒領催馬甲內考選報部給與空銜頂帶仍依原食餉銀支給其原設筆帖式銀米應裁至六年期滿其由馬甲委署者准與前鋒領催等俱以應陞驍騎校之缺一體選用從之○兵部議准河東河道總督蘭第錫奏稱河南河北兩岸向各設巡船二隻山東曹單三縣設巡船一隻每船派兵十名遊巡查黃河水勢猛悍船易損壞且河道長一千二百餘里非五巡船所能周遍自派巡以來從未緝獲一匪救濟一船而營兵派巡即不能專心差操虛糜糧餉請將各巡船裁汰令沿河地方官各按疆界差役稽查其前派兵仍令各營收伍差操從之○豁貴州沉溺鉛二萬五千一百五十觔○是日駐蹕舊衙門行宮翼日如之○辛未

上詣 永慕寺行禮○諭據尚安奏拿獲伊犁逃犯陳有秀已經正法等語伊犁各處逃犯皆由烏魯木齊所屬之地經過若果認真嚴加緝捕斷無不獲之理朕前次節經降旨訓示今據昌吉縣知縣依常阿拿獲伊犁逃犯陳有秀尚屬黽勉嗣後烏魯木齊所屬地方如有拿獲此等逃犯者將兵丁番役人等酌量加賞外該管官員亦著交部議敘以示鼓勵○又諭曰噶布倫扎薩克伊什旺對病故其扎薩克員缺本非世襲但據達賴喇嘛呈稱伊什旺對之子熱布丹旺布人尚明白且其祖父宣力多年著加恩賞給扎薩克名號○壬申諭山西大同府屬豐鎮等九廳州縣上年被旱成災朔平府屬之左雲右玉二縣因被霜較早收成歉薄業經加恩賑卹蠲緩並於新正復降恩旨展賑酌借口糧以資接濟現據明興奏加賑銀米及借給口糧已陸續散放

完竣。但念該處土瘠民貧。自上年被災歉收之後。民情不無拮据。現距麥收尚早。小民輸將。仍未免竭蹶。著加恩。將大同府屬之豐鎮等九廳州縣。及朔平府屬之左雲右玉二縣。所有乾隆五十三年應徵新糧。俱緩至本年秋收後開徵。以示朕軫念邊地災黎。有加無已至意。該部即遵諭行。○大學士等奏臺灣解到賊匪。除何有志、林澆等業經因病先行正法。其逆首林爽、文糾、眾倡亂。戕官攻城。復

編造年號。私封偽職。賊目陳傳從賊。戕官受封偽職。與官兵義民打仗多次。均應按律凌遲處死。梟示。至何有志、陳傳等家屬。例應緣坐。應令該督撫嚴查辦理。得旨。林爽、文陳傳著即凌遲處死。梟示。餘依議。○是日。駐蹕圓河行宮。翼日如之。○癸酉。

孝賢皇后忌辰。遣官祭

陵寢。○諭軍機大臣等。此次勦捕臺灣逆匪。軍書籌筆。宵旰焦勞。一切緊要機宜。朕思慮所

及。隨事指示。福康安等稟承方畧。擘畫周妥。仰賴

上蒼眷佑。於三月之間。生擒二逆首。全郡賊氛掃蕩。無遺。現在大功告成。所有辦理此事。顛末。曾親製紀事語二篇。及平定臺灣功臣像贊序一篇。備述用兵機要。及賞功罰罪諸大端。而一本於敬

天勤民。孜孜不怠之一心。宜勒之貞珉。以昭彰庠。著將御製文三篇。用清漢字書寫。發交福

康安、李侍堯於臺灣府城及廈門二處。建碑碣三座。照依尺丈。慎選石工。妥為鐫刻。俾巖疆海徼咸喻朕勤政愛民。明慎用兵之意。○御製勦滅臺灣逆賊生擒林爽、文紀事語曰。平伊犁。定回部。收金川。是三事。皆關大政。各有崇文勒太學。誅王倫。翦蘇四十三。洗田五。是三事。雖屬武功。然以內地懷慙。弗飾其說。至於今之勦滅臺灣逆賊。生擒林爽、文。則有不

感

天恩蒙厚貺次之三。予實資衆臣之力。得有所成。若茲臺灣逆賊之煽亂。乃卒然而起。兵出於不得已。而又不料其成功若是之易也。蓋自康熙二十二年。平定臺灣之後。歷雍正逮今。乾隆戊申。百餘年之間。率鮮卅歲寧靜無事。而其甚者。惟朱一貴及茲林爽文。朱一貴已據府城。僭年號。林爽文雖未據府城。然亦僭年號矣。朱一貴雖據府城。藍廷珍率兵七日復之。不一年。遂平定全郡。林爽文雖未據府城。亦將一年。始獲首渠。平定全郡。則以領兵之人有賢否之殊。故曰事在人為。不可不慎也。林爽文始事之際。一總兵率千餘兵。滅之而有餘。及其蔓延猖獗。全郡騷動。不得不發勁兵。命重臣。則予遲速論所云。未能速而失於遲。予之過也。然而果遲乎。則何以成功。蓋遲則任事之外臣。而速在籌策之予心。故始雖遲。而終能成。以速。非誇言也。蓋紀其實。

而已。若黃仕簡。任承恩。初遲矣。而予於去年正月。即命李侍堯速往代。常青為總督。辦軍儲。常青往代黃仕簡。藍元枚往代任承恩。司勦賊之事。而郡城與仕簡弗致失於賊手。是幸也。是未遲也。既而常青祇能守郡城。藍元枚忽以病亡。是又遲矣。而

天啟予衷。於六月。即自甘省召福康安來熱河。授之方畧。八月初。即命福康安海蘭察率百巴圖魯及各省精兵近萬。往救諸羅。是又未遲也。福康安等至。大擔門。開舟阻風。風畧定。而啟行。又以風遮。至崇武澳。不能進。是又遲矣。然而候風之際。後調之兵畢至。風平浪靜。一日千里。齊至鹿仔港。是仍未遲也。夫遲之在人。而

天地神明護佑。每以遲而成速。視若危而獲安。有如昔年開感論所云者。予何修而得此於天地神明之錫祉哉。如是而不益深敬畏。勤政愛民。明慎用兵。則予為無良心者矣。予何敢

抑又何忍乎。夫用兵豈易言哉。必也凜天命。屏己私。見先幾。懷永圖。方寸之間。日日如在三軍前。而又戒掣肘。念衆勞。且予老矣。老而精神尚健。不肯圖逸。以遺難於子孫。臣庶藉以屢成大勲。此非

天地神明之佑乎。亦豈非弗失良心得蒙

天鑒乎。福康安等解圍殲賊。以及生擒賊渠。諸功績已見聯句之詩之序。茲不贅言。獨申予之不得已用武。又深懼用武之意如是。以戒

後世。占驗家以正月朔旦值剝蝕。為兵戈之象。遠者固無考。自漢至明。屢逢其事。然亦有驗有弗驗。若昨丙午。可謂有驗矣。以予論之。千歲日至。可坐而致。剝蝕亦可竿而定也。既定矣。其適逢與不逢。原在依稀恍惚之間。且亦乏計。豫使之必無也。若使之無。是為詐也。不惟不能避災。或且召災。故史載宋仁宗朝第二次康定元年。春正月朔。當日食。司天楊惟德請移閏於庚辰歲。則日食在正月之晦。

帝曰。閏所以正天時而授民事。其可曲避乎。不許。夫日食必當在朔。可知。古稱月晦日食者。多移閏曲避之術耳。至於不得已而用兵。惟在見幾而作。先事以圖。遲不失於應。幾速不失於不達。惟敬與明。秉公無私。信賞必罰。用兵之道。其庶幾乎。夫行此數端。甚不易矣。知不易而慎用兵。又其本乎。凡軍旅事。必當有方畧之書。書成。即以此語冠首篇。亦不更為之序矣。

御製福康安奏報生擒莊大田紀事語曰。昨生擒林爽文。則剿滅逆賊事。可稱藏大端。茲生擒莊大田。則肅清臺灣事。方稱臻盡善。二逆狼狽為奸。得一而不得。二餘孽尚存。慮其萌芽。且彼既聞首禍被獲。則所以謀自全而倖逃生。入山固易。追赴海則難捕矣。是以先事周防。屢申飭諭。茲福康安盡心畫策。凡港口可以入海者。無不移舟設卡。因聞莊大田帶同匪衆。俱在柴城。初二日。欲往蚊率社。經番

衆極力抵禦。復行退回。初五日黎明。官兵由風港發兵。越箐穿林。遂有賊匪突出拒敵。我兵迎擊。海蘭察率領巴圖魯侍衛奮勇齊攻。殺賊三百餘。生擒一百餘。追至柴城。賊愈衆多。然恐攻撲過急。莊大田或臨陣被殺。或乘間竄逸。轉不能悉數。成擒。福康安分兵數隊。以徐合攻。自山梁佈陣抵海岸。適烏什哈達所率水師得順風。連檣齊至。沿海進圍。水陸合剿。自辰直至午刻。殺賊二千餘。羣賊奔潰。投水屍浮海如雁。驚而獨莊大田伏匿山溝。以至生擒。是豈人力哉。

天也。二逆以么膺小民。敢興大亂。殺害生靈。無慮數萬。使獲一而逃一。未為全美。斯皆生致闕下。正國法而快人心。反側潛消。循良樂業。福康安。海蘭察等。畫謀奮勇。不負任使。固不待言。然非天佑我師。俾獲萬全。豈易致此耶。更查康熙六十年四月。朱一貴於臺灣起事。提督施世驤

總兵藍廷珍。於五月由澎湖進兵。至六月收復臺灣府城。計閱七日。於閏六月始擒獲朱一貴。計閱一月餘。至雍正元年四月。而餘黨悉剿盡。自朱一貴起事。至臺灣全郡平定。始末閱兩年。茲林爽文。於五十一年十一月起事。其黃仕簡等前後誤事。經一年。福康安等於上年十一月。由鹿仔港始進兵。其間解諸羅縣之圍。克斗六門。攻破大里杙賊巢。至本年正月。獲林爽文。計閱四十二日。繼獲莊大田。計閱三十二日。自林爽文起事。至臺灣全郡平定。始末共閱一年三月。是較之藍廷珍等成功。更為迅速矣。夫逆賊入內山。生番非我臣僕。性情不同。言語不通。其遵我軍令與否。未可知也。福康安示之以兵威。使知畏。給之以賞項。使知懷。其經畫周密。賢於施世驤。藍廷珍遠甚。又得海蘭察率百巴圖魯。攻堅陷銳。遂得前後生獲二囚。且李侍堯悉心董理。軍儲毋誤。行陣使不以李侍堯易常。青之

總督則軍儲必誤不以福康安易常青之將軍則成功必遲茲盡美盡善以成功於三月之間則

上天之所以啟佑藐躬俾以望八之年而獲三捷之速則予所以深感

昊慈豈言語之所能形容也哉自斯以後所願洗兵韜甲與民休息保泰持盈日慎一日以待歸政之年庶不遠矣雖然仔肩未卸必不敢以娛老自怠所為猶日孜孜仍初志耳○

御製平定臺灣功臣像贊序曰近著勦滅臺灣

逆賊生擒林爽文紀事語以為伊犁回部金川三大事各有專文王倫蘇四十三田五次三事不足薙其功若茲林爽文之勦滅介於六者間雖弗稱其大而亦不為小矣故其次三訖未紀勲圖像而茲福康安海蘭察等渡海搜山竟成偉勲靖海疆吁亦勞矣不可湮其功而弗識故於紫光閣紀勲圖像一如向三大事之為然究以一區海濱數月底績故

減其百者為五十而朕親製贊五十者為二十餘命文臣擬撰一如上次之式夫用兵豈易事哉昔漢光武有云每一發兵頭鬚為白況予古稀望八之年鬚鬢早半白而拓土開疆過光武遠甚更有何冀而為佳兵之舉誠以海疆民命不得不發師安靖所為乃應兵非佳兵也然亦因應兵非佳兵幸邀

天助順而成功速此予所以感謝鴻臚不可以言語形容而又不能已於言者也

昔人有言滿洲兵至萬橫行天下無敵今朕所發巴圖魯侍衛章京等纔百人已足以當數千人之勇綠營兵雖多怯而無用茲精選屯練及貴州廣東湖廣兵得近萬人統而用之遂以掃巢穴縛逆首是綠營果無用哉亦在率而行之者為之埋根倡首有以鼓勵之耳若福康安未渡海以前臺灣綠營已共有四萬餘兵何以不能成功則以無率而行之者豈不然哉且臺灣一歲三收蔗薯更富朕

若微有量田加賦之意。以致民變。

天必罪之。不能如是成功速也。後世子孫當知此意。毋信浮論富國之言。愛民薄斂。明慎用兵。庶其恒承。

天眷耳。近日以宮商三百。逐章饜飫其義。竟如幼年書室學詩之時。但彼時自知讀其章句。而今則究其義味。因思采薇出車諸章。乃上之勞下。其義正。斯為正雅。祈父北山諸什。乃下之怨上。其義變。斯為變雅。夫上勞下。可也。

下怨上。不可也。何則。下之怨上。固在下者不知忠義。然亦必在上者有以致之。斯則大不可也。我滿洲舊風。以不得捐軀國事。死於牖下為恥。其抱忠知義。較祈父北山之怨上為何如是。則綠營之多。恒怯思家。伊古有之。無足多怪矣。然為上者。不可不存采薇出車之意。更不可不知祈父北山之苦。如其一概不知。而但欲開疆擴土。是誠佳兵驕武之為。望其有成。豈非北轅而適越乎。故因為功臣圖。

贊而申其說如此。以戒奕葉子孫。並戒萬世。

之用兵者。○甲戌。諭軍機大臣等。臺灣熟番協同官軍。搜剿賊匪。俱屬急公奮勉。而生番等自逆首窮蹙逃竄之後。經福康安明白曉諭。各社生番。咸知順逆。幫同官兵義民。分路堵截賊匪。林爽文莊大田。無處逃匿。現在二逆首俱已先後就擒。所有打仗出力之熟番等。著賞給効順匾額。交福康安仿照各村莊義民之例。於所居番社一體頒賞。以示旌獎。

至生番等。雖與內地語言不通。亦不能辨識文字。但伊等素性好利。如內地布匹鹽茶等物。皆所嗜好。著福康安查明幫同搜捕逸犯之生番等。就其所好內地物件。酌量從優賞給。俾伊等益加感激。蒸蒸日上。○豁雲南沉溺銅十三萬九千九百觔有奇。○是日駐蹕新衙門行宮。○乙亥。

上迴圓明園。○祭。

先蠶之神。遣妃行禮。○諭軍機大臣等。前因。

臺灣勦捕賊匪。官軍節次打仗。據該提鎮等奏報。不知存亡者甚多。屢經降旨。交福康安等嚴查。此項兵丁。作何下落。尚未據查明具奏。兵丁等奉派出征。如果臨陣捐軀。或為賊所害。事後查明。不特應行賞卹。並當將其子弟等挑補兵缺。俾資養贍。如遇敵潰散。除投回軍營。仍復隨同官兵打仗者。免其查究。外。若其事定後。始行逃回。查無從賊情節。尚可貸其一死。倘竟甘心從賊。甚至助賊打仗。今見賊匪平定。私行逃回。或被拏獲。即當立行正法。雖其子孫等。亦不准挑補兵缺。以示懲儆。從來用兵之道。貴在賞罰嚴明。現在大功雖已告竣。但兵可百年不用。不可一日無備。此事如福康安業已查明。即遵照前旨。分別嚴辦。若因人數衆多。福康安回京以前。不及查奏。即著交與李侍堯。徐嗣曾。各在內外逐一嚴查辦理。毋得稍事姑息。○丙子。諭。上年八月。王公大臣。及直省將軍。督撫。大吏等。以

乾隆五十五年。朕八旬萬壽。籲請舉行慶典。朕因王公內外大臣等。身際昌期。久承渥澤。臚歡祝嘏。出自積誠。且朕自臨御以來。親理萬幾。孜孜不倦。五十餘年。如一日。茲仰荷上蒼眷佑。

列聖垂庥。膺受純熙。錫光萬慶。躬躋上壽。五世一堂。實古所未有。允宜光昭盛軌。以答

景貺。若却而不行。轉覺矯情。是以特俞所請。並恐王公內外大臣等。過事鋪張。業經諄切諭

令。祇照

聖母皇太后六旬七旬八旬

萬壽慶典之例。備辦。毋得稍有加增。現在王公內外大臣等。因朕俯允所請。踴躍歡忭。亟欲抒誠。其應備儀文。典禮甚鉅。若不專派大臣董理其事。恐承辦之員。未喻朕意。仍不免踵事增華。致滋繁費。非所以體朕嘉與諸臣効誠獻悃之心也。所有五十五年萬壽慶典各事宜。著派阿桂。和珅。劉墉。福長。安。胡季堂。金

簡李綬伊齡阿總辦以期經理得宜用光鉅典○又諭據富綱等奏拏獲改遣脫逃賊犯帥應祥審明後即恭請王命正法等語已批該部知道矣前因孫永清奏拏獲越獄脫逃之梁美煥即行正法該犯罪止越獄與反獄刦獄者不同自應奏明再辦該撫遽請王命正法恐無識之徒私議督撫有權擅殺曾降旨訓諭今富綱等所奏係拏獲新疆改發脫逃例應即行正法之犯自應照例即辦但外省督撫每多拘泥非失之太過即失之不及或接奉前旨誤會朕意又將應請王命正法之犯不即辦理等候批回部覆以致要犯稽誅或生別故又屬非是著傳諭各督撫嗣後於拏獲人犯務須斟酌情罪輕重如係例應恭請王命者仍照例辦理總期寬嚴得宜毋得遇事拘執以致節外生枝思慮所及不惜煩言將此再行通諭知之○丁丑陝西巡撫覺羅巴延三奏潼關廳常平倉節年動缺穀

一萬五千四百餘石屢催買補但該處產糧無多現在修城工匠需食浩繁若責令一時足額恐妨民食查潼關協營兵馬節奉裁移該廳額徵屯糧供支歲有餘剩現計存米麥豆三折合京斗穀二萬三千石有奇紅腐堪虞請即將此項撥補常平原額並嗣後每逢兵丁借支及間需估撥均請由支剩兵糧項下動給得旨自屬應行

大清高宗法天隆運至誠先覺體元立極敷文奮武孝慈神聖純皇帝實錄卷之一千三百

大清高宗法天隆運至誠先覺體元立極敷文奮武孝慈神聖純皇帝實錄卷之一千三百一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄一次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十三年戊申三月戊寅諭軍機大臣

等據福康安委員解到從賊匪犯內蕭晤天供上年五月內被賊目水沙連監軍林舊等去入夥等語林舊為林爽文招集匪徒黨逆助惡亦係緊要賊目未據拏獲具奏著福康安即將該犯迅速查拏務獲毋任漏網稽誅至各犯家屬均例應緣坐現據賴應供稱伊父賴箋母張氏妻林氏子賴際會俱在平和縣內地居住著李侍堯嚴飭該地方官查拏辦理其林順石南林良胡真各犯家屬雖據

供稱在臺灣地方被兵衝散究難憑信並令福康安李侍堯於內外地方飭查務得各該犯等家屬實在下落按名查拏照例辦理○已卯諭軍機大臣等據蘇凌阿等奏東省上年漕船於三月十八日過津關四月初三日抵壩起卸本年東省船隻目下尚未報過津關現已飛咨東省加緊催趲等語本年運河一帶水勢尚為充裕何以東省幫船現在尚未報過津關較之上年抵津日期轉覺遲滯且該省幫船行走遲緩則各省續進幫船必致有擁擠之虞著傳諭毓奇蘭第錫長麟即查明東省幫船因何遲緩緣由據實具奏並著該巡漕御史和琳親督押運各員及沿河文武官弁上緊催趲行走務令迅速挽過津關及早抵壩以便如期起卸毋得再有延緩○又諭前因臺灣逆匪滋事不法奸民等輒敢乘機在洋面行劫不可不嚴加懲創曾降旨將沿海省分洋面行劫盜案人犯無論首

從俱按律正法俟勦捕事竣再照舊例辦理後又將情有可原之犯其事在降旨以前者從寬改為應斬監候俟滿三年再行發遣今閩省海洋劫盜各案不一而足可見該處民風奸悍非一時所能悔改現在大功雖已告竣除其餘沿海各省仍照舊聲請外所有福建海洋盜案未便遽照例辦理著傳諭李侍堯嗣後於拏獲海洋盜案仍照新例分別嚴辦俟五年之後盜風漸戢再行奏明照舊例

聲請○閩浙總督李侍堯奏運送軍米船隻前後遭風失水者共十七號內蔡球琳等六船有搶撈米石並淹斃水手自屬可信其曾長益等船船米俱失而船戶水手並未據報淹斃恐有盜賣捏飾情事現移知撫臣就近提訊又外委蔡永勝從九品官正邦二員於轉遞軍報畏怯風濤逗留灣泊以至舛誤現咨部斥革枷號示懲諭運送軍米如並未遭風捏報沉失自應查明治罪但海洋風汛不

常船隻破溺在所不免且船戶等運送軍米事屬因公今遭風沉破並有一船淹斃水手十七名殊堪憫惻著傳諭李侍堯等即將淹斃人口照漕船失風淹斃之例賞卹其餘送遞文報等船如有因風淹斃者亦照此賞給以示軫卹至蔡永勝等因畏怯灣泊舛延軍報怠玩已極非發遣不足以蔽辜俟枷號滿日即發往伊犁烏魯木齊等處充當苦差○庚辰

上詣

安佑宮行禮○諭軍機大臣等前據琅玕等奏温州一帶洋面上年十二月內有解閩官錢被劫地方官諱匿不報之事已降旨將玉環同知張心鏡叅將張全得革職拏問並將該管之護鎮道府解任質審並令將此案盜犯嚴拏務獲嗣據閩鶚元奏查明此項官錢係江省運米船隻附搭被劫復經批詢曾否獲犯一二俱未據該督撫等覆奏此等洋面行

刦盜犯自應嚴密查拏。速期就獲。著再傳諭李侍堯琅玕。即嚴飭文武員弁。於閩浙兩省洋面及沿海地方。上緊查緝。務獲並著閩鶚元。於所屬地方。一體飭屬查拏。毋任遠颺漏網。○刑部等部奏。江蘇巡撫閔鶚元。審擬寶山縣徐二姐與陳七通姦。勒死婢女素娟。滅口一案。徐二姐依故殺白契所買之人。照故殺雇工律擬絞監候。陳七訊不知情。合依軍民相姦律。枷杖發落。均應如所擬。得旨。徐二姐與陳七通姦。恐婢女素娟說破。起意致死。滅口主婢之分已絕。且素娟年止十二。徐二姐乘伊睡熟。用繩收勒斃命。實為淫兇可惡。徐二姐著改為絞決。嗣後遇有姦淫起釁。任意兇殘婢女。年在十五以下者。俱著照此辦理。○豁雲南沉溺銅五萬六千一百觔有奇。辛巳。

上御勤政殿聽政。○諭。昨因各省士子在天津進獻詩冊。經軍機大臣挑選詞義穩妥者呈

覽。朕偶加展閱。內有安徽附監生葉棟所進詩冊。係集御製詩文。體格頗新。本欲加以獎賞。因祇係詞章末技。若遽加恩獎。恐外間士子因此或競尚浮華。不務實學。是以遲而未發。隨命將葉棟應試原卷查取進呈。則該生所作之賦。已有失押韻。腳膚泛之句。而詩內砌湊春夏秋冬二聯。全與題無涉。至用霜葉紅火雲烘等語句。更不值一噓。可見其所進獻詩冊。必係他人代倩。斷非出於葉棟之手。殊屬可鄙。士子讀書講學。原應湛深經術。坐言起行。方為敦本崇實之道。至文詞本屬游藝末節。然亦須根柢經訓。有裨身心。方為載道之文。若徒以藻績為工。即素號專家。已非真儒所尚。至並此不能甚。或臨時剽竊。假手捉力。更為士林所深恥。近日士風浮靡。即呈進詩文。僅屬末藝。尚不免丐求贗筆。未能出自心裁。而遇有考試。輒百計鑽營。甘心骯法。總由不務實學。惟事弋獲虛名。遂至作奸犯

科罔顧廉恥思之實增愧恨夫國家養士百餘年教澤涵濡不為不久士子等習尚不端何竟卑鄙至此推求其故或因朕幾餘游藝不廢詩文臨御以來初二三四集風行海宇裒集日多承學之士妄意朕雅尚詞華遂不思務本力學為立身行己根基此則甚非朕崇實黜華之意也且朕所作詩文皆關政教大而考鏡得失小而厘念民依無不歸於紀實御製集俱在試隨手披閱有一連十數首內專屬尋常流覽吟弄風月浮泛之詞而於政治民生毫無關涉者乎是朕所好者載道之文非世俗徒尚虛車之文若朕所製各集俱不過詞章能事則朕早將御製四集詩文概行廢而不存矣且士先器識而後文藝國家設科取士上以實求下以實應況制舉為士子進身之階其得邀科目者或備職郎曹或出司民社其大者則簡任大員論思獻納皆由是起若始進先已不端則後此見之措

施必無足取乃士子等身列衣冠而一切干營舞弊之事愈出愈巧無所不至上年經大學士九卿等議定科舉防弊各條已屬纖悉具備當經訓諭士子等當各知羞愧近日馮應榴龔駉文先後請嚴名試之例又降旨允行錢澧條奏科場事宜臚列關節各字樣本日吳省欽復奏請申嚴殿試朝考及散館太考各摺俱係確有所見士子皆讀書明理之人乃習於下流無恥僥倖考官等俱通籍清華仰邀簡用非惟不能掄拔真才乃曖昧營私罔知儆畏即倖逃憲典亦必為天理所不容今伊等平日舞弊伎倆俱已紛紛破露自不得不大為之防但杜弊之法繁設科條幾至士子等於穿窬而考官行同窩劫每閱諸臣條奏之摺不獨為伊等愧而朕之不能感化亦且引以為愧試思國家旁求俊乂之典致下儆於防閑宵小之條伊等清夜捫心即不自愧寧不為國家取士大典稍存顏面耶

嗣後各士子及試官等務宜激發愧恥各知勉勵砥行立名一洗純盜虛聲通同舞弊陋習庶不負朕振飭士風諄諄訓誨至意將此通諭知之○諭軍機大臣等前據畢沅奏歸德彰德南陽汝寧陳州汝州光州等屬於二月內得雨一二寸至三四寸不等其餘各屬尚未普霑等語又據長麟奏登州萊州沂州兗州濟寧州等府州屬得雨已足其德州平原禹城歷城等處尚未得透雨現設壇祈禱等語已俱於摺內批令將曾否得有透雨之處迅速覆奏矣本日據舒常奏經過豫境之信陽確山遂平等州縣二麥菁蔥等語看來豫省大河以南春雨尚優惟河北各州縣未經得有透雨東省濟寧以南春雨尚屬透足迨北地方未能一律普霑現在將屆立夏正二麥長發大田播種之時未據該撫等續奏得雨朕心深為厪念著傳諭畢沅長麟各將所屬缺雨地方曾否得有膏霽於二麥

有無妨碍及大田能否播種並如何設壇祈禱之處迅速據實覆奏勿稍諱飾○又諭前據福康安奏派員先赴嘉義縣將柴大紀拏解至臺灣府看守福康安由南路回郡即親行審問目下南路賊匪自己搜查淨盡計此時福康安早回至郡城所有柴大紀如何散法營私之處何以尚未據查奏又永福係滿洲道員近在同城於柴大紀貪劣各款若未經揭報即係通同徇隱況知府孫景燧同知劉亨基等種種貪黷歛怨釀成事端該府廳縣皆係永福屬員平日漫無覺察已不得為無罪如永福竟有通同分肥之處其罪竟不可逭曾屢諭福康安查明嚴叅迄今未遽奏到前有旨令福康安辦完善後事宜於五六月間風信平穩之時起程內渡回京福康安自應趁此時將特交各案會同徐嗣曾逐一秉公嚴查據實速奏完結回京豈有無故拖延在彼守候之理著再傳諭福康安務宜迅

速查審具奏。以完此案。○以太僕寺卿吉夢熊為通政使。○補行山西河南漕標河東河標乾隆五十二年軍政卓異官十六員。議叙如例。○署陝甘總督勒保疏報狄道州乾隆四十七年至五十一年開墾成熟地十六頃六十畝。○壬午諭軍機大臣等據金德奏淮南綱鹽積年遞壓一時未能運竣請將丁未綱未行綱引內提出六十萬道分作五年帶運並另片奏淮北商鹽亦須調劑俟確覈情形再行具奏等語已批該部議奏矣商人辦運引鹽例應年清年款況兩淮鹽課為數尤多若積年遞壓伊於何底該處鹽引向在漢口分銷如果楚省官員實力緝私何至官鹽積滯此皆由地方官吏平日巡緝不力以致川省私販充斥而商人等在彼一切運費又復繁重獲利無多不能源源轉運是以綱鹽積壓至一百餘萬之多舒常兩任湖廣鹽務是其專管從前不能實力查察已難辭咎今

復任總督若再不認真實力幫同整頓致仍有壅滯必將該督從重治罪姜晟到任已將一年亦有緝私之責並著該撫一體嚴飭所屬核織巡查仍時加察訪如有奉行不力仍前弊混者即據實參奏至川省與湖廣接壤雖楚省向有數府例食川鹽者自不能禁其販運但亦應嚴清境界止令於食川鹽州縣地方販售豈容任意侵銷著傳諭李世傑幫同嚴查除應食川鹽州縣仍聽其運往外其餘一概嚴行禁止庶商販無從夾帶官鹽自可暢銷以期積引疏通新綱速運年清年款方為妥善○又諭淮商辦運引鹽例應年清年款乃未銷綱引竟至一百餘萬之多此皆楚省地方官巡緝不力私販充斥而口岸費用又復繁重商人未能源源轉運所致現已傳諭該督撫等實力整頓至楚省官吏雖非鹽政所轄但此項鹽引積年遞壓地方官於緝私等事不能實力奉行已非一日即使鹽

務衙門呼應不靈亦應及早奏聞設法調劑。或據實叅辦乃竟任其積壓因循觀望殊屬延玩。所有歷任鹽政者軍機大臣查明按其任年月分別議罪以示懲儆。○癸未諭現任福康安前抵鹿仔港未及三月即已屢破賊巢擒獲首逆南北兩路全境蕩平所有官兵止係屯練及點楚官兵數千何嘗需用多兵設如恒瑞所言必須添兵六七萬合之臺灣原有之兵則至十餘萬矣不獨各省徵發遠近騷擾且行走配渡需時目下尚不能全數到彼幸而朕洞燭幾先即令福康安海蘭察帶同巴圖魯侍衛等前往於恒瑞奏到時又以其言不可信諭令福康安堅持定見速由鹿仔港前進今得尅期歲功設非朕令福康安海蘭察前往即准其添調十餘萬大兵交常青恒瑞二人統率則伊等在彼守候日事因循仍前零星調撥不特嘉義縣城早為所陷即郡城亦不可守尚復成何事體昨詢

據委解逆犯來京之都司張爾魁稱賊匪攻圍嘉義縣城勢已危急若福康安遲到三日縣城必不能守是該處城池得以無恙者皆賴朕燭炳幾先命福康安等速往之效前因柴大紀駐守嘉義將及半載並據奏忍饑待援不忍出城朕嘉其忠義逾格加恩封以伯爵並賞銀一萬兩倘非福康安早到嘉義縣城已失柴大紀為賊所害既可以藉口沒於王事罪狀或不至於敗露豈不使貪縱營私激成事端之人非惟倖逃重戾轉得叨冒厚恩茲幸福康安星往救應嘉義縣城得以無虞而柴大紀之捏詞守城貪黷各劣蹟不旋踵而破露可見朕恩不能濫受執法昧良之人亦必不為天理所容終致敗露而恒瑞從前之妄請多兵幾至惑眾誤事者不可不治其罪矣福康安於袒護恒瑞一節固有應得之咎若非成此大功亦豈能將伊寬恕茲因其功大過小是以錄其功而宥其過福康安

嗣後惟當倍加儆省。益矢公慎。勉副朕教誨成全之意。至福康安此次前往督辦勦捕事宜。遵照節次指示。調度有方。用心周密。真能不負任使。朕心深為嘉許。海蘭察屢次督兵進剿。甚為奮勇可嘉。又將莊大田家屬及逆犯莊大華、林勇全數擒獲。而籌辦一切事宜。均能井井有條。福康安、海蘭察前已晉封公爵。賞給寶石帽頂、四團龍褂、四開氣袍。著再各賞用紫韁。但福康安係將軍。發縱指使。皆其調度。福康安著加賞金黃腰帶。並賞給福康安、海蘭察金黃辦珊瑚朝珠各一盤。用示優異。和珅承旨書諭於一切清漢事件。始終鉅細無遺。勤勞懋著。前已晉封伯爵。著一體賞用紫韁。以昭嘉勵。○又諭曰：山猪毛義民急公慕義一載以來。隨同官兵勦殺賊匪。始終不懈。實屬勇往可嘉。業經頒給御書扁額。特加旌異。並諭令將各義民等分別獎賞矣。所有管理義民之教授羅前蔭著加恩賞給

同知職銜。曾中立業已賞給同知職銜。仍著賞戴花翎。並加恩給予義勇巴圖魯名號。俱著送部引見。劉繩祖、黃袞、涂超、秀周敦紀著賞戴藍翎。用示優獎。黃真、邦著賞給順勇巴圖魯名號。一併送部引見。張元懋、王得祿並著加恩賞戴花翎。其曾中、黃真、邦仍照加賞巴圖魯名號之例。各賞銀一百兩。以示獎勵。○又諭：此次臺灣勦捕逆匪。調各省兵丁前往協助。均屬奮勉出力。現在逆首就擒。臺灣全郡平定。因念該兵丁等遠渡重洋。究為涉險除福建本省及廣東、浙江二省兵丁。隣近海疆。渡洋素所經習。毋庸另行加恩外。其湖南、貴州、廣西、四川屯練兵丁。俱應酌加恩賞。如該四省兵丁現已撤回。著李侍堯於該兵丁內渡時。每名各賞給銀二兩。如此旨到時。回兵已離閩境。各歸原省。即著李侍堯咨各該省督撫。按名賞給。又廣東兵一千名。既暫行留駐臺灣。且前次隨征勦捕。均極奮勉。

出力並著福康安徐嗣曾一體按名各賞給銀二兩○又諭此次押送逆首林爽文及賊眷賊目之各員弁沿途俱能小心管押行走迅速且在臺灣打仗殺賊均屬奮勉所有解員馬龍李芳園張爾魁加恩以應陞之缺陞用仍俱著各賞緞二匹叅領扎拉芬亦著賞緞二匹護軍校神奇保守備丁世偉鄧應相德恩及千總領催俱著各賞緞一匹其護解兵丁並著各該省督撫查明各賞給一月錢糧以示獎勵○諭軍機大臣等前據琅玕奏查抄柴大紀家產詢據該犯家屬供出柴大紀在臺灣任內前後所得出息共有五六萬金若僅止如鄭名邦所供得受兩外委贓賄不過番銀二百餘圓為數無幾焉能如此之多此外賣官鬻爵婪得多贓必更有大於此者不可不徹底根究現在應行提訊人證內微末員弁即行照例咨革外如續有查出翫法營私之文武各員即一面解任嚴訊一面

具摺叅奏毋任稍有隱飾此案並著徐嗣曾會同審辦徐嗣曾係本省巡撫又與柴大紀係屬同鄉柴大紀種種貪劣款蹟更無難查訪得實也至臺灣額兵節據該提鎮等嚴緝詳查昨又有旨諭李侍堯徐嗣曾各在內外逐一嚴查辦理為時已久何以尚未查有頭緒如查各該兵丁等遺失後有從賊情節今見賊匪平定始行逃回者一經拏獲應遵照前旨立行正法其子弟亦不准挑兵食糧以示懲儆或竟係該處營制廢弛柴大紀營私舞弊作為虛糧冒餉輒以傷亡遺失為辭希圖淹飾尤不可不切實根究入案辦理以彰其罪至臺灣營制尚須酌量添增改設前已有旨令將一半換防一半酌募本地義民社番充補既可以鼓勵義勇而內地兵丁仍有一半在彼防戍分班輪換其家屬皆在內地又可以互相牽制於事似屬兩有裨益自應仍遵前旨辦理惟是內地兵丁渡洋防守若

無恒產。恐所得錢糧不敷資給。仍不免借端擾累營私貿易等事。或將入官叛產酌量撥給作為幫貼。遇換班時仍著前後交代收取。餘息以資貼補當差。似為妥協。並著福康安等一併詳悉妥議。再逆匪夥黨陳泮吳欽二犯俱係有名頭目。前已有旨。令福康安等嚴密查拏。是否業經拏獲。又現據林勸等供出林爽文之族長林石亦尚無下落。並著福康安嚴拏務獲。至福康安奏莊大田之次子莊

天畏雖訊據獲犯供稱已被生番殺死。但所言恐不足憑信。仍應一體嚴拏。毋任漏網。又據福康安奏查勘鳳山縣城地勢低窪。既不足以資控制。自應察看情勢酌量移建。此外如嘉義彰化淡水等處舊設竹城是否亦應酌量遷移。或另應添建磚石城垣之處俱應乘此番振頓之時逐加履勘。籌畫萬全。著福康安會同徐嗣曾悉心妥辦。其餘一切善後事宜頭緒紛繁均須福康安在臺灣一手經

理。福康安總須逐一辦理完竣。再行起程。即在彼多駐數月亦屬無妨。總期於事有益。一勞永逸。方為不負任使也。○又諭臺灣值逆匪滋擾之後村莊被燬小民失業自應妥為賑恤。但被難民人全藉口糧接濟。如果該處存留米石不敷辦賑。此時無論折給三兩。即再加一倍折給六兩。小民雖有銀兩無米可買。亦將何以得食。且前據李侍堯奏臺灣軍務告竣。合計本省撥運之米除應行籌備應

用外尚多米四十二萬石。其各省未經運到閩境米石均已咨明截留等語。據所奏情形而論。是各省協撥米石儘足敷閩省軍糧民食之用。即臺灣應需辦賑口糧亦可由內地運往。何以徐嗣曾又稱臺灣存米所剩無多。辦理賑務又須折給銀兩殊不可解。且現據福康安奏沿途查閱南路一帶被賊滋擾地方田畝多有荒蕪。其東港以南禾苗暢茂。粵莊亦已栽插。現在雨暘時若可冀豐收。是臺

灣地方其已經播種之處正復不少且該處
地土膏腴一歲兩熟現在賊匪早經平定被
難民人已陸續歸莊即未經墾種者亦已照
常耕種可望有收此時辦理賑務即照向例
二兩折給足敷糶買又何必遽議加增向來
臺灣官吏侵漁成習遇事即思浮冒以圖肥
橐今經大加懲創之後無可藉端又欲借折
賑為辭多增價值預為冒銷地步福康安等
不可不嚴行查察毋任官吏捏詞浮冒墮其

術中如有此等情弊即行指名嚴參辦理○
甲申諭軍機大臣等前據畢沅長麟先後奏
報該二省得有雨澤尚未普霑現俱設壇祈
禱而京畿一帶望澤頗同茲京城於二十日
得叨

天佑已沛甘膏甚為優渥透足且濃陰密佈雲
勢頗廣想遠近自必一律普霑其直隸山東
河南各屬同時得有澍雨尚未據該督撫奏
到朕心深為廕注著傳諭劉綰長麟畢沅即

將各該省近日雨澤及二麥曾否長發大田
能否播種之處迅速據實覆奏○又諭曰烏
爾圖納遜等奏察哈爾鑲紅旗舊厄魯特騎
都尉羅卜藏拉布坦於三月初一夜間自
本旗游牧地方逃走等語羅卜藏拉布坦係
騎都尉乃無故潛逃恐有別項情節計其逃
逸後或潛藏該處或就近在直屬山西潛匿
俱未可定著傳諭劉綰明興飭屬嚴拏務獲
解京審辦毋任遠颺○又諭據富綱等奏續

獲自緬甸脫回廣東民人遯籍安插一摺內
稱訊據黃春鳳彭奕捷供稱於五十年十二
月內前赴暹羅打仗即被裹往阿瓦於五十
一年七月初七日起身同回因係在鄉傭趁
不知緬匪情形現將黃春鳳彭奕捷解回廣
東安插等語所訊供詞殊未明晰黃春鳳彭
奕捷被緬甸裹往阿瓦在彼幾及兩年於緬
甸情形自必有所聞見即云傭趁度日不能
知彼處底細至其風俗人情及年歲豐歉是

否易換國長。政治如何並與何處打仗勝負情形。豈有總不知之理。乃富綱等並未詳晰訊問。現已將黃春鳳等遞回原籍。計前此自緬甸脫回民人。遞回廣東原籍者甚多。著傳諭孫士毅查明從前業經解到之犯。即將緬甸近日一切情形。先行逐一詳訊具奏。嗣後此項民人續經解到。亦即行訊問具奏。毋任稍有隱匿。尋奏緬甸脫回民人五十餘名。臣現將安插近地之劉文才等傳訊據供。緬甸民情膽小畏事。風俗尚屬樸實。惟男女錯雜。罔識廉恥。該處地廣人稀。米糧甚賤。豐收之日居多。又聞十年內國主已換三次。現在國主強橫好兵。人心抱怨。常與暹羅打仗。每被殺敗。又恐天朝進兵。暹羅或乘虛而入。已備具貢物象隻。意欲遣人進貢。籲請開闢貿易。楊重英尚在阿瓦城等語。至此次脫回之黃春鳳彭奕捷二名。已知會撫臣侯遞到時。即就近提訊報聞。○賑卹兩淮板浦中正。臨興

徐濟堯瀆興莊等六場。乾隆五十二年水災。電戶蠲災地額賦有差。蠲剩銀併予緩徵。○乙酉諭朕於五月十九日起鑾巡幸避暑山莊。立秋後巡幸木蘭。所有應行出派豫備之處。著各該處照例辦理。○又諭鄉會試為掄才大典。士子讀書明理。惟應奮志積學。各安義命。以端始進。考官等仰邀簡用。尤應公慎自矢。杜絕干營。為國家選拔真才。方為不負任使。近日士子趨向不端。每遇考試。輒百計鑽營。賁緣關節。其舞弊伎倆。愈出愈巧。而考官等聽受請託。曖昧營私。甘心翫法。無所不至。節經降旨訓飭。不啻至再至三。前錢澧條奏科場事宜一摺。請將順天鄉試。毋庸分別南北中四會試。亦毋庸分別省分。概憑文藝取中。以防查認關節之弊。昨又據吳省欽條奏殿試朝考散館大考俱請給發內府圖書。交監試王大臣將試卷逐加鈐記。以防抽換試卷之弊。已批交原議大臣一併議奏。因思

科場條例於一切防弊之法本為詳備上年復經大學士九卿等申嚴例禁設法防閑纖悉具備其杜弊之方幾至等於穿窬窩劫稍有入心者亦應激發愧恥爭相砥礪一洗從前卑鄙錮習今錢澧奏請鄉會試不必分別南北中興及省分中式一節固為剔除關節積弊起見但國家取士博採旁求於甄錄文藝之中原寓廣收人才之意且各省文風高下互有不齊若如錢澧所奏勢必至江浙大省取中人數居其大半而邊遠小省或竟至一名不中殊非就地取才之意錢澧係雲南人所奏尚無別故若伊籍隸江浙等省則跡涉阿私必至有干吏議矣又如吳省欽奏請頒發內府圖章鈐記試卷一節意在防範抽換但內府所貯寶章乃御用之件即係尋常閒散圖篆亦不值於試卷紛紛鈐用已有旨令監試大臣逐卷畫押以作標記矣夫繁設科條以杜弊竇不如嚴飭法紀以絕弊源士

子及試官等俱身列衣冠乃通同舞弊罔顧廉恥今防弊諸法亦已無微不至在知愧知奮者自必痛改前非若不肖之徒冥頑無恥即多其條目日事防閑而防弊之法有盡舞弊之術無窮或仍思行險徼幸希冀苟免此不在增設條例而在嚴示創懲也士子與試官勾通關節國初年間有問擬腰斬者立法至為嚴峻其後賄賣生童如俞鴻圖喀爾欽及科場交通關節之蔡時田曹詠祖等節次破案無不立時伏法覆轍具在可為炯戒朕意節經整頓之後場屋諸弊自必漸次廓清乃近日鄉會試種種弊端復又漸作諸臣所奏防弊之條層見疊出閱之實深愧歉士子等涵濡教澤百有餘年不為不久今作奸犯科之徒蕩檢踰閑罔知儆畏朕既道之以德尤不得不齊之以刑嗣後鄉會試榜發後朕當特派親信大臣於城內乾清宮圓明園正大光明殿覆試如有文理不通筆跡不對較

取中原卷大相懸絕者。即立行斥革。嚴究倘有賄賣關節等弊。即將該生及主考官官立正典刑。如究出係鎗情傳遞者。亦分別從重治罪。決不稍貸。至各省學政。俱有衡文取士之責。近日風氣波靡。亦皆因生童應試時。即不能端本所致。著通行嚴飭各學政。俾各加猛省。如有行私舞弊。賄賣生童者。一經敗露。朕惟執法從事。刑茲無赦。並交各該督撫嚴行查訪。如有前項情弊。立即據實嚴奏究辦。

倘有心徇隱。或別經發覺。必將該督撫一併問擬重辟。決不姑寬。勿謂朕言之不早也。所有錢漕吳省欵條奏。除謄錄對讀入場。不准先給筆硯等物。及試卷添用蒙紙。停止恩賞飯桌。仍照所請行外。餘俱著毋庸重議。徒滋繁瑣。將此通諭知之。○又諭本日據劉戡奏保定會城及安肅涿州等處。各得雨一二寸不等。俱未能霑透等語。現在京城雖得澍雨。而近畿一帶。雨澤較稀。今保定所屬及涿州

等處。得雨亦不過一二寸。未為深透。因念京城米麥全藉各處商販源源運赴接濟。糴售今京城雖獲甘膏。而畿南各屬。雨澤稍缺。恐商販米石運京較少。市價不免日漸昂貴。自仍應平糴。俾小民口食益資充裕。所有上年平糴餘存米三萬四千石。即著原派監糴大臣照舊章程平糴。並著戶部查明各倉現存麥石除酌留敷用外。其餘儘數發出。交監糴大臣一併出糴。仍隨時實力稽查。不使奸商

囤積壟斷。務期市價平減。民食有資。以副朕惠鮮懷保至意。○諭軍機大臣等。據李侍堯奏查訊玉環洋面解閩餉錢被劫一案。訊據委員通判李龍湛遊擊童陞供稱。於二月初七日晚。在玉環三盤洋面。遇盜數十人。上船劫去搭解制錢二千九百三十串。當即報明營汛。並玉環廳據同知張心鏡踏勘屬實。情愿照數賠補。李龍湛等糊塗聽從。未經開報。請將李龍湛童陞革職等語。此案前

據琅玕奏。已降旨將玉環同知張心鏡及通同諱匿督護之叅將張全得革職拏問矣。運閩錢文接濟軍餉關係緊要。該委員等不能小心管解。以致在洋被劫。及報明地方官張心鏡輒敢囑令匿報。私行賠補。希圖朦混了事。而該委員亦即隱忍聽從。非尋常諱盜可比。將來定擬時。張心鏡張全得竟應發往伊犁。其隱忍聽從之李龍湛童陞亦應發往烏魯木齊。除諭知刑部堂官外。將此諭令李

侍堯琅玕知之。至此項被劫錢文。雖現經李侍堯奏據該地方文武稟報。拏獲盜犯王恩長等三名。起獲錢文九十餘千。現在提犯審訊。但究出同夥各盜。尚未就獲。並著李侍堯等嚴飭所屬。上緊實力查拏。務須按名弋獲。從重辦理。審明後。即按律先請王命正法。不可拘泥昨降諭旨。聽候部覆。致要犯稽誅稍有疎縱。○大學士等議准。順天學政金士松奏稱向來一切考試。四書詩題。同時並出。致

僥倖之徒。得以傳遞代倩。臣現考八旗生童將四書二藝及詩題分作三次遞出。閱卷時如三藝中有工拙迥殊者。概屏不錄。仍請通行各學臣一體照辦。從之。○吏部議准。湖廣總督舒常奏。稱湖北應山縣向列為專衝簡缺。查該縣與豫省信陽州交界。經管四驛。差使繁多。且民情好訟。應改為衝繁難要缺。在外揀補。至恩施縣糧賦稍減。近年案亦簡少。應改為繁難中缺。歸部銓選。從之。○丁亥。諭

軍機大臣等。前據全德奏。淮南綱引積壓。淮北亦須調劑。自有私販充斥。以致官引滯銷。已有旨傳諭舒常等實力嚴緝矣。昨因伊齡阿久任兩淮。向其詢問積弊。據稱淮南私鹽。惟在鹽政督飭。留心稽察。淮北私鹽。向由督臣派員巡緝。恐日久因循。必須地方州縣隨時緝拏治罪。庶私銷可以斂跡。又各商配運時。滾總乏人。往往不能及早行運銷售。最為積弊。其鹽船運到漢口時。各店商亦不無藉

口緝私等事。私議出費。應嚴飭總商等酌量調劑。並寄字漢口商人。不得任意糜費。致虧成本等語。伊齡阿在兩淮年久。其所稱鹽務弊竇。自屬實在情形。但尚恐不能詳盡。全德係現任鹽政。惟在其隨時籌辦設法調劑。著傳諭全德。即將伊齡阿指出各條及此外尚有應行查辦。可以杜絕私販減省費用之處。即悉心籌酌。妥協辦理。以期綱引暢銷。釐務日有起色。至兩江總督本有節制鹽務之責。

且於州縣各官。呼應較靈。並著書麟幫同嚴飭各屬。實力查拏。如有奉行不力者。即參奏治罪。以除積弊。至兩淮鹽餉。向在漢口銷售者居多。此次鹽引積壓。即由楚省節年以來。私販充斥。地方官任意勒索。不肯認真查緝。所致舒常久任湖廣。固有應得之咎。即姜晟到任。業將一年。亦不應任其因循廢弛。嗣後務須潔已率屬。實心整頓。協力妥辦。於緝私節費等事。痛加磨濯。實力查察。若既廢弛於

前。又復玩誤。於後將來引鹽仍有滯銷。必將該督撫等。一併從重治罪。所有伊齡阿奏片。並著鈔寄閱看。○戊子。戶部議准前任四川總督保寧奏稱。新疆五屯兵民襍處。生齒日繁。現據茶商等請。由懋功廳增給腹引一千張。於灌縣採配茶餉。運至各屯售銷。應徵課銀三百七十餘兩。以乾隆五十二年為始。照例徵收。並於二道橋達園二處。各設書巡二名。分卡盤查。從之。○禮部侍郎藍應元因病

乞休。允之。○已丑。諭軍機大臣等。昨據劉戡奏。豫省漕船。因衛河水淺阻滯。現派員前往大名。元城等處。設法籌辦等語。本日又據畢沅奏。直隸山東一帶。天氣乾燥。河流淺澁。德左等八幫。現尚在直東交界境內。已派員馳往會同該二省各地方官。上緊催趲等語。此項漕船。係裝載豫省糧石。其行走遲滯。係因衛河水淺所致。原與山東無涉。即經由直隸地方。亦不過兩縣。劉戡不及早籌辦。直至接

准蘭第錫知會始派員前往已屬遲緩畢沅係本省巡撫不能豫為設法辦理而轉以直東二省河流淺澁為詞尤不免意存推諉畢沅著交部議處劉戡之過較輕著交部察議其押運遲誤暨不能實力催趲之地方官並著該督撫查明輕重分別叅處仍督飭所屬迅速趲運以期押幫前進勿再延誤干咎至畢沅摺內稱衛河來源不旺應將上流多為啟導並將旁流堵閉以濟運行等語衛河之

水不但通濟漕運兼資灌溉民田現在京通各倉存貯豆麥尚有贏餘平糶非必專待本年運到豆麥以為接濟即使該省漕船抵通稍遲亦無妨礙况昨據長麟奏先令東省漕船越次先行俟豫省漕船到境即攬幫行走本日毓奇亦奏稱計算時日南糧船隻不致有擁擠阻壓之虞何必專以濟運為急若如畢沅所奏將旁流一併堵閉該省目下尚未據奏得有透雨河北民田將何以灌溉是漕

運稍遲尚非刻不容緩之事若民田失水必至有妨種植關係尤重畢沅所辦殊屬錯誤著傳諭該撫止須於衛河上流多方疏濬其旁流處所向資灌田之用者斷不可堵閉以副朕軫念農田至意○又諭據永鐸奏為奴遣犯魏玉凱因伊主博郭洛克管束甚嚴心懷怨恨將伊主一家五命殺死以圖洩忿訊據該犯供稱原籍直隸南宮縣祇有一子名喚楊二現年二十五歲並無產業已將該犯

實錄卷一百三

高

按律凌遲梟示等語魏玉凱係誣告良民李存仁為王倫逆黨發往伊犁給厄魯特為奴之犯膽敢逞兇洩忿將伊主一家五命殺死致令絕嗣兇惡已極按律俱應如數擬抵雖據該犯供稱祇有一子居住原籍所供恐不足信著傳諭劉戡即將該犯之子楊二嚴拏務獲照例定擬並查明該犯所供楊二之外是否尚有隱匿一併查拏除將年已及歲者照例辦理外其子孫內有年未及歲者即解

京加以官刑以供外圍掃除之役俾兇惡之徒不得復留餘孽以示除惡務盡仍寓法外施仁之意。又諭據孫士毅等奏拏獲搶劫盜犯究出結會匪徒一摺內稱據蒼梧縣孟照稟報訪聞該縣地方有匪徒聚會蹤跡旋據縣民李南茹等具報被賊搶劫現獲搶犯陳興遠等十一名訊係西寧縣民仇德廣起意與高明縣民梁季舟商量糾人結拜弟兄以牙籤會為名各人打造一副並各佩銀圓

書一個為記希圖賣給牙籤圖書斂錢使用嗣有蒼梧縣李繼久與陳興遠邀合會匪搶奪李南茹牛隻賣錢分用復至嚴思任家搶奪銀錢並將嚴思任工人黎勝昌割去右耳現據供出會匪除已獲陳興遠等十一名尚有未獲首夥二十名現在飭屬嚴拏務獲等語仇德廣陳興遠等膽敢糾約多人結拜弟兄設立牙籤會名目甚至疊次越境搶奪行兇實屬目無法紀該督撫據該縣稟報即飭

屬拏獲多人悉心根究所辦尚好雖訊明該犯等尚非閩省天地會內夥匪但始則設立會名希冀誑錢分用甚至持械搶人牛隻劫奪錢文亦不可不防其漸著傳諭孫永清即將拏獲各犯按律定擬具奏仍飭屬多派幹役將未獲之首夥各犯即行嚴拏務獲毋致遠颺漏網並著傳諭圖薩布一體飭屬訪拏勿使一名免脫其訪聞稟報之署蒼梧縣知縣孟照於地方事務尚屬留心案定後著給

咨送部引見○吏部議奏前准直隸督臣以鉅鹿縣知縣沈長春調補大興縣嗣據順天府尹吳省欽奏准以沈長春係該府尹典試浙省取中舉人誼屬師生應令仍回原任查定例鄉會考試官取中之人毋庸迴避同考官及受業師生均應迴避如考官業師在下屬取中及受業之人為督撫司道應令官小者迴避如考官業師為督撫司道其屬員有係伊取中受業者祇令咨部存案但鄉會考

試官與同考官均係閱文取中其情誼並無差別考官業師身任大僚從前取中受業之人在伊下屬亦難保無瞻顧徇情等事請嗣後除京官一切考覈糾叅均由各堂官公同定議辦理毋庸另議外凡外任官員鄉會試考官同考官及業師為督撫司道等官均令官小者迴避凡應迴避總督者俱於隣省改掣其迴避撫司及統轄全省之道員者俱令於總督兼轄之隣省改調如無總督兼轄省分即於隣省改掣其迴避分巡數府之道員及知府以下等官者令該督撫即於本省內酌量調補從之○庚寅諭刑部奏山西太原縣祁閏月子強姦雇主賈伯衡繼母賈梁氏未成一案該撫原擬將祁閏月子照強姦未成例加等發黑龍江為奴未為允協請改依雇工姦家長妻女強姦斬立決一摺已依議將祁閏月子即行處斬矣強姦家長妻女定例應行斬決原以名分攸關何得拘已成

未成之例此案祁閏月子既受雇與賈伯衡家傭工素有名分膽敢圖姦雇主賈伯衡繼母並用刀恐嚇逞淫犯分不法已極自應立寘重典乃明興僅將該犯問擬發遣殊屬輕縱而明祿係由刑部司員出身非不諳律例者可比尤不應錯誤至此明興明祿俱著傳旨嚴行申飭仍著將因何錯擬之處各行明白回奏尋明興奏前據明祿審擬祁閏月子一案僅擬發近邊充軍經臣駁飭另擬旋據詳覆以雇工強姦主母未成並無作何治罪明文因輯注內載有強姦家長妻女未成應比照親屬強姦未成擬軍之語仍請照情重軍流例加等改發黑龍江為奴臣未能詳究律例斟酌重輕遂據司招問擬咨部應請旨嚴加議處又明祿奏并懇交部嚴議均報聞調鑲黃旗蒙古副都統富昌為密雲副都統鑲藍旗漢軍副都統海寧為鑲黃旗蒙古副都統辛卯諭據和珅等奏此次巡幸天

津沿途各省督撫鹽政織造等呈進緞綉皮張荷包帽緯等項除沿途頒賞隨圍王大臣並直隸辦差大臣官員人等外其賞用餘剩物件請留備賞需用等語向來巡幸各省督撫等俱各呈進土物以備賞需今閱和坤等所開清單此次賞用餘剩物件留存甚多儘足備一二次巡幸頒賞之用五十五年春朕瞻禮

岱宗展謁

闕里沿途應頒賞賜即以此次餘剩物件帶往頒給尚屬寬餘該督撫等若再備路貢呈進不但徒滋糜費且久經存貯亦屬無用所有五十五年東巡各該督撫等著遵旨毋庸呈進路貢並交奏事處不准接收○吏部議准江南河道總督李奉翰疏稱前准部咨原設六塘水利同知改為邳北同知移駐邳州原設邳睢同知改為睢南同知應請換給分管邳睢北岸河務同知分管睢靈南岸河務

同知關防均照舊定為河工要缺在外揀選其原設邳睢同知歲支俸廉役食等項俱歸睢南廳支領至新設邳北同知應將裁汰六塘同知原設俸薪照數撥給又各廳舊有歲給經費銀二千兩均因工段較多費用難減應令照舊支領從之○調正白旗漢軍副都統台費英阿為鑲藍旗蒙古副都統以署正紅旗漢軍副都統徐績為正白旗漢軍副都統○壬辰諭戶部議駁兩淮鹽政全德請將

丁未綱未行綱引提出六十萬道分年帶運帶徵一摺固屬照例辦理但念該處綱引積壓過多占有新綱運行地步若照例徵納商力不無拮据著加恩照該鹽政所奏准將淮南丁未綱未行綱引內提出六十萬道分作五年帶運所有正雜錢糧亦准其分作五年帶徵以疏積壓而紓商力○諭軍機大臣等據單沅覆奏各屬得雨情形一摺內稱大河以南歸德南陽等四府州屬得雨已為周渥

開封府及陝、汝二州雖未透足亦足以資接濟。惟河北各屬得雨之處不過寸餘。若再經旬不獲優霑恐麥收不無減薄等語。看來豫省大河以南各府州得有雨澤雖未能一律深透尚足以資播種。至河北各屬待澤甚殷朕心甚為廕念。近日曾否續得甘膏。二麥有無妨碍著該撫即行據實具奏。又據另片奏稱豫省通州天津糧船因衛河淺阻尚未前抵臨清已飭令雇備船隻多多分運並委彰

德府知府李舟馳往催趲等語。該省河北各屬現在雨澤短缺彰德即係河北地方該府正應在彼率屬虔誠祈禱並察看情形如有應辦之事即行辦理方是。今畢沅轉派令李舟馳往館陶一帶催趲漕船可謂不權輕重著該撫即另行派員接替至豫省漕船運載麥豆現在京通各倉存貯正多並不藉該省運到接濟即微有灑帶亦屬無幾其漕船抵通原非急務不妨隨在攬幫行走或竟俟南

糧運竣再行跟幫前進况該省派運船隻係通州天津二幫漕船縱使抵通稍遲亦不必慮及回空阻滯有誤歸次受兌之期即在江廣幫船之後行走亦無妨碍將來大雨時行豈尚慮衛河淺阻且漕船遲滯不在此時畢沅本應豫為設法辦理乃既未能先事豫籌而轉以衛河水淺為詞實不免意存推諉已明降諭旨將該撫交部議處今因漕船行走遲緩又派李舟前往催趲轉使缺雨地方遇

有應辦之事乏人經理豈不先其所緩而後其所急耶○禮部議覆安徽布政使陳步瀛奏稱定例江南鄉試如有安徽籍貫人員現任江寧司道及首府首縣者其子弟親族不准入場至籍隸江蘇人員現任安徽司道以上等官者未經議及查江南場務係江寧安徽兩藩司輪辦同考官十八員安徽省州縣居半設以本省上司之子弟親戚為屬員呈薦難免物議請嗣後將此等人員子弟親戚概

不准應江南鄉試又安徽省知府直隸州內有籍隸江蘇之人如所屬開送簾員其子弟親戚亦應令其迴避均應如所請惟是原籍安徽之現任江寧府州者事同一例均宜一體迴避以免兩歧再查陝甘鄉試與江寧安徽無異其司道以上等官子弟親族亦應倣照辦理至現任陝甘之知府直隸州內籍隸兩省人員甚少且內外簾官亦無須多人應令監臨巡撫查明籍隸兩省者即毋庸調取

該府州所屬之州縣入簾從之○兩江總督書麟江南河道總督李奉翰奏外河廳清口順黃壩上下黃河南岸原存木龍五架自上年睢州十三堡黃水漫溢後各架木龍均乾攔河灘攔扣鬆朽迨黃水復趨故道木龍外俱有沙淤挑溜未能得力應將從前頭二兩架木龍移上六十丈紮第一架離下九十丈紮第二架均照原長三十丈又離下九十丈紮第三架又下八十丈紮第四架均改長四

十丈再將第五架改紮五十丈現飭該廳將將淤沙木植盡力起出併酌添木料趕緊督辦報聞是月直隸總督劉峩奏上年宣化等屬被旱成災糧價較昂現在官為減糶若僅照歉收例每石減銀一錢仍形拮据請將宣化等七州縣並張家口獨石口及災邑毗連之延慶赤城龍門等三州縣一體查明市價如在一兩六錢以上者每石減一錢五分一兩八九錢以上者每石減二錢併令零星

糶賣以濟災黎得旨自應如此該部知道○兩廣總督孫士毅廣東巡撫圖薩布奏赴臺勦匪之粵東滿漢兵丁共一萬三千五百名現在分起內渡軍械稍有損壞即須補給除烏鎗一項已准閩浙督臣知會現敷撥用此外排刀腰刀等項必須另製查從前收繳民間烏鎗尚有未經改鑄又各命盜案內兇器均係熟鐵不須煅煉費工較為銛利已飭通省各衙門逐一查繳照數改造並飭知粵西

一體照辦得旨諸凡妥協知道了。○又孫士毅奏臣自駐劄潮州以軍務奏報改由江西之筠門嶺一路行走較廣州更近奏准添設腰站今臺匪蕩平軍臺現無緊要文報應請照舊裁撤報聞。○烏魯木齊都統尚安奏迪化舊城西南門外陡因雪水融化衝塌民房五百餘間臣親往查勘除飭令地方官弁分頭疏消其被衝貧民例應分別賑沒無存者每間賞銀一兩浸泡傾圮者每間賞銀五錢但口外素無蓄積民力拮据已於鎮迪道庫貯房稅項下照每屋一間均賞銀一兩並令及早修蓋報聞。又奏烏魯木齊所屬迪化昌吉阜康綏來宜禾奇台等六州縣濟木薩呼圖壁兩處節年徵收糧及前捐監存貯糧共計八十八萬八千餘石每年供支新糧敷應有餘倉貯陳積恐致霉變但一時全行糶易秋後買補較難請分三年出糶將每年春季所糶銀即令該州縣秋後買還倘有延宕照

虧空例叅處得旨如所議行

大清高宗法天隆運至誠先覺體元立極敷文奮武孝慈神聖純皇帝實錄卷之一千三百一

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務內閣典籍廳都察院經筵講官加七級隨帶加一級尋常加一級軍功紀錄一次臣慶桂

總纂官經筵講官太子太傅文淵閣大學士文淵閣領閣事務稽察欽奉 上諭事件處管理刑部戶部工部事務

世襲騎都尉功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆五十三年戊申夏四月癸巳朔享

太廟遣和郡王綿脩恭代行禮○諭據巡漕御史和琳奏督催漕船一摺內稱德正首幫於三月二十三日行過德州浮橋其餘四幫俱在沿河停泊詢據該管糧道等稱因有搭運歷年緩漕米石雇募民船有需時日又衛河水勢淺澀必須節節起剝是以耽延並查詢河南漕船尚有七幫未入東境現飭該州衛各員盡力挑挖各處雇船起剝亦可不致甚誤將來德正幫船過完即令在後漕船插幫

前進不必拘泥成例跟接行走並請令河南山東巡撫查明該管糧道交部議處等語所辦甚好前據劉戡奏豫省漕船行走遲滯業經降旨令東省漕船越次先行其豫省漕船即隨在插幫行走或竟俟南糧過竣再行跟幫前進亦無妨礙今該御史所奏適與前降諭旨相合甚為得當自應如此辦理前因豫省漕船阻滯係因衛河水淺所致與山東無涉是以祇將畢沅劉戡交部分別議處今閱和琳所奏情形東省幫船既有帶徵採買米石為數較多長麟自應及早籌畫並將衛河淺澀處所上緊撈挖毓奇亦應多雇撥船豫備起撥庶不致臨事周章乃均未先事豫籌以致淺阻遲誤是毓奇長麟均難辭咎著一併交部議處其未能及早籌辦之該管糧道並著河南山東巡撫據實查明交部議處所有管河各員亦著查取職名送部一併分別議處 諭軍機大臣等據孫士毅奏稱查辦

會匪一案初次饒平海陽等縣盤獲之許阿協尤揚等犯訊據供係閩省民人勾引入會但將手指作勢可免沿途搶奪等語此等奸徒若不及早搜拏盡法懲治則日聚日多不知儆畏必致日後又復滋生事端現在逆匪蕩平兵威丕振正應趁此時竭力查拏務淨根株亦不慮人心驚疑庶可期奸徒斂迹地方永臻寧謐著交李侍堯孫士毅督飭所屬迅速實力嚴拏勿留餘孽至孫士毅所奏各

口岸盤獲閩省形跡可疑船隻二十餘起此內保無逆犯夥黨即實係偷越海洋者亦應按律治罪並著孫士毅嚴查究辦勿致疎縱

甲午諭曰孫士毅奏據南澳碇石海門各營汛及饒平惠來等縣稟報臺灣凱旋官兵內渡由閩省廈門蚶江海門收口因風漂泊到境者計粵東乍浦兩處駐防及福建官兵已有八九起即飭令地方官料理分別出境歸伍等語前因各省兵丁派往臺灣勦捕逆

匪迅速重洋究為涉險曾降旨令將湖廣貴州廣西四川四省兵丁於內渡時每名各賞給銀二兩又留駐臺灣之廣東兵一千名亦經一體賞給至廣東浙江及福建本省兵丁因其隣近海疆渡洋素所經習是以未經另行加恩今孫士毅所奏凱旋官兵多有漂入粵境此項兵丁由閩省內渡因遇風漂入他省境界即素習海洋究屬遭險亦堪憐憫所有臺灣內渡漂入粵境官兵著孫士毅查明

無論何省官兵如前降諭旨內未經賞給者即著每名賞給銀二兩如已離粵境各回原籍即著孫士毅行知各該督撫按名賞給嗣後如有凱旋官兵因風漂入他省查明未經得賞者俱照此賞給以示朕格外軫恤之意

刑部議奏遵旨更定反獄刦獄越獄等罪例一糾衆行刦獄囚及罪囚由監內結夥反獄等案如有持械拒殺官弁者不論原犯罪名輕重將首從各犯均照謀反大逆律凌遲

處死子十六歲以上者擬斬立決未及歲者同妻妾俱給功臣家為奴其下手幫拒有傷之犯擬斬梟示隨同餘犯擬斬立決若拒傷官弁及殺死役卒者為首並豫謀助毆之夥犯俱擬斬決梟示止傷役卒者為首並幫毆有傷之夥犯俱擬斬決隨同助勢者雖未傷人亦擬斬候秋審入於情實若刳獄反獄並未傷人將起意首犯擬斬立決為從擬斬監後秋審亦入情實一罪囚在獄糾夥三人以

上潛行脫逃者除斬絞立決應即正法外其原犯斬絞監候人犯無論首夥俱改為立決原犯軍流律應加等者俱改為擬絞監候秋審時為首入於情實為從入於緩決原犯徒罪律應加等者為首改擬絞監候秋審入於緩決為從發給伊犁兵丁為奴原犯杖笞律應加等者為首發給伊犁兵丁為奴為從實發烟瘴充軍若僅止一二人乘間脫逃並無豫謀糾夥情事除斬絞立決仍即正法外原

犯斬絞監候應入情實者無論首從俱改為立決應入緩決者俱改入情實原犯軍流律應加等者為首改擬絞監候入於緩決為從發給伊犁兵丁為奴原犯徒罪律應加等者為首發給伊犁兵丁為奴為從實發烟瘴充軍原犯杖笞律應加等者為首實發烟瘴充軍為從改擬滿流再嗣後各省遇有刳獄反獄等案審明實係首惡情罪重大決不待時者該督撫一面具奏一面將該犯即行正法

其餘為從及越獄人犯按律定擬統俟部覆後再行處決得旨是依議以西安駐防協領和星額為廣州副都統

上還宮 是日起
上以常霄祀

天於

園丘齋戒三日 丙申宗人府進呈新修

玉牒

上詣乾清宮東暖閣恭閱行禮送

皇史宬尊藏。賜總裁以下等官銀緞有差。○諭朕此次駐蹕熱河。巡幸木蘭。著怡親王、質郡王、大學士公阿桂、大學士嵇璜、留京辦事。所有吏兵二部應行引見官員。文職知縣以上。武職守備以上。於未啟鑾進木蘭之前。著該部每月派堂官一員。輪流帶赴熱河引見。其文員內佐雜等官。武員內八旗護軍校、驍騎校及外省送到之補放水手、驍騎校。並年滿千總等官弁。仍著王大臣照例驗放。至八月以後。月選州縣等官。照新例俟迴鑾後。歸於九月分一併引見。其各省督撫提鎮等奏摺。著齋摺人前赴行在投遞。進哨後。著兵部派員駐劄哨門。接遞各省奏摺。封送行在。候朕批示發回。仍於哨門交付齋摺人祇領。該部即通諭知之。○諭軍機大臣等。據和琳等奏。德正幫船行入直隸吳橋縣王泉莊地方。復行淺阻。專差馳入直境。確探實因水小淺澀。直境未嘗撈挖。幫船不能前進等語。前據劉

戕奏。豫省漕船在衛河淺阻。行走遲緩。因所經直隸地方。不過大名、元城兩縣。是劉戕之過。較畢沅尚輕。是以祇將該督交部察議。今山東德正幫船。甫入直隸境。即至淺阻。可見直省竟未挑挖。前船不能行走。後船必至頂阻。且水緩沙停。設東省已挑之河道。又因此淤墊。尚復成何事體。天津鎮總兵及該管道員等。所司何事。劉戕亦並未及早督飭。豫籌妥辦。殊屬玩延。俱著傳旨嚴行申飭。並著該督接奉此旨。即馳赴吳橋地方。親率所屬。上緊撈挖。務俾漕船通行。無阻。其不豫行督催挖淺之該管鎮道府縣等。有應查叅者。亦即據實叅奏。丁酉。

上詣
南郊齋宮齋宿。諭軍機大臣等。據明興奏。接奉諭旨。查拏察哈爾騎都尉羅卜藏喇布坦一摺。其摺首輒用緝拏逃官字樣。由驛遞奏。殊屬過當。察哈爾係游牧地方。此等旗員。或

因窮苦無奈或被索債急迫潛避不出該督撫等接奉諭旨後祇須飭屬留心查訪何必張大其詞況並未經拏獲不過以一奏塞責仍屬毫無實際明興著傳旨申飭此事昨據劉戕覆奏現在遵旨一體嚴緝但外省積習於緝捕事件往往託諸空言何嘗實力躡緝著傳諭劉戕惟當督飭所屬隨時留心察訪務得羅卜藏刺布坦下落不得如明興之徒事鋪張也將此各傳諭知之○戊戌常寧祀

天於

園丘

上親詣行禮○辛酉明園○大學士九卿議覆御史施朝幹奏申嚴學政考取拔貢事宜除禁止本省紳士入幕閱卷及鄉宦故舊往來援引等弊均係定例仍通飭各該學政實力奉行外查提調教職向因承辦試務隨時進見易於滋弊應如所奏嗣後遇有應稟事宜俱令公同當堂面議不准一人私謁違者聽

學政叅處仍令各該督撫隨時稽察如陽奉陰違者將該學政叅處從之○已亥諭據大學士九卿等議覆御史施朝幹條奏申嚴學政考取拔貢事宜一摺已依議行矣至摺內稱令各該督撫隨時稽察如陽奉陰違即將該學政叅處等語學政按考各屬地方俱係督撫所轄如果該學政有考試不公賄賣生童等事各督撫耳目甚近自無難訪查得實前經降旨通諭各督撫令將學政中之貪污

者據實指叅但外省習氣往往存官官相護之見督撫等即明知學政聲名狼籍仍不肯據實叅奏若非瞻顧情面扶同徇隱必係各督撫等在任別有貪劣款蹟恐被學政訐發其私遂爾意存顧忌不敢列入彈章二者必居一於此方今綱紀肅清督撫等俱受朕厚恩簡畀封圻重任自應潔已奉公以為直省官員表率何至尚有敗檢營私之處慮人指摘惟是督撫中公正自持者固不乏人或竟

有操守平常轉被學政挾持其短遂不得不聯為一氣互相彌縫或惟知瞻徇私情周顧公義於各省吏治學校甚有關係嗣後各督撫惟當益勵廉隅正己率屬設過學政有貪污實蹟即應指名糾叅若仍遇事徇隱緘默不言或別經發覺除將該學政按例治罪外必將該督撫一例從重問擬決不姑貸並令督撫於年終將學政等有無劣蹟陳奏一次若至別處發覺則此不舉之督撫當得何罪

著自審非朕不教也將此再行通諭知之○又諭曰李侍堯等奏拏獲海洋盜犯蕭梅等五名審明正法一摺已批交該部矣前因臺灣逆匪滋事不法奸民等輒敢乘機糾夥在洋面行劫不可不嚴加懲創曾降旨將沿海省分洋面行劫盜案人犯無論首從俱按律正法俟勦捕事竣再照舊辦理後又將情有可原之犯其事在降旨以前者從寬改為斬監候俟滿三年後再行發遣今閩省海洋劫

盜之案不一而足民風奸悍非一時所能悔改現在大功雖已告竣除其餘沿海各省仍照舊聲請外所有福建省海洋盜案未便遽照舊例辦理如有拏獲洋盜仍照新例無論首從俱按律正法俟兩三年之後如果盜風漸戢再行奏明照舊例聲請以示懲儆而靖海疆庚子諭直隸順德廣平大名三府屬近年屢因偏災收成歉薄所有應徵地丁等項銀兩節經降旨緩徵以紓民力今春雨澤

又缺少二麥恐致歉收現在正屆開徵之期若將該府屬錢糧新舊並徵民力不無拮据著再加恩將順德廣平大名三府屬歷年因災緩徵帶徵地丁及借出各項未完銀兩緩至秋成後分年帶徵俾閭閻生計寬裕以副朕軫念民依有加無已至意該部即遵諭行又諭據長麟奏本年東省歷城等五十四州縣雨澤愆期麥收失望請將新舊錢糧緩至本年秋後徵收以紓民力等語該省歷城

等州縣雨澤稀少農田播種二麥難望有收
今歲佈植較廣徒糜工本民力不無拮据著
照所請濟南府屬之歷城新城淄川長山長
清禹城德州平原臨邑德平齊河章邱鄒平
齊東陵縣濟陽泰安府屬之東平東阿肥城
平陰武定府屬之惠民青城利津濱州蒲臺
陽信海豐霑化樂陵商河東昌府屬之堂邑
茌平館陶冠縣恩縣聊城博平清平莘縣高
唐曹州府屬之范縣觀城朝城兗州府屬之
陽穀壽張青州府屬之樂安博興臨淄臨朐
高苑臨清州暨所屬之夏津武城邱縣五十
四州縣及坐落衛所新舊錢糧著加恩一併
緩至本年秋成後徵收其舊欠內原係分年
帶徵者仍按所分年限辦理以副朕廑念民
依至意該部即遵諭行○諭軍機大臣曰孫
永清奏報雨水糧價情形一摺內稱桂林省
城仲春以來得雨優渥高下田畝俱已乘時
翻犁播種二麥漸次結實並據平樂等十一

府州屬稟報雨水二麥情形均與省城大概
相同及閱該撫開報糧價又稱桂林梧州南
寧太平四府屬較上月稍增轉瞬即屬青黃
不接當酌量借糶倉穀等語所奏殊未明晰
粵西桂林等處既據該撫奏稱雨水調勻大
田業經播種二麥俱已結實是該省春膏極
為霑足麥田可卜豐收何以復有糧價稍增
之處况粵西向來年歲多屬豐稔從無報災
之案廣東尚藉其資糶乃該撫上年即奏請
採買楚米以資接濟自因該省民倉不能充
裕是以借資鄰省但粵西收成素非歉薄或
係該處奸商囤積居奇以致民間糧食昂貴
否則農民游惰者多不能盡力畝畝此皆地
方大吏應行整飭之事著傳諭孫士毅孫永
清確切查明粵西桂林等屬因何糧價較上
月稍增是否商販囤積抑係該省近年來農
政漸弛所致即行據實具奏毋得稍有迴護
尋奏粵西上年收成止有七分積貯本少現

在東省雜運者多。正值青黃不接。米價稍增。實由於此。至奸商囤積。游惰拋荒。均係地方要務。惟有認真查辦。不敢稍涉迴護。得旨。以實為之。○又諭九江鳳陽兩關。雖係巡道兼管。向來皆由朕特放。與鹽政關差無異。督撫等即不應擅行派委。況江西糧鹽二道。近在同城。儘可兼署。臬篆海紹係內務府人員。從前本未經外任。刑名又非所習。何裕城何必專委該道署理臬司。而又派員為之護理關篆。徒多此一番交代。於地方稅務兩無裨益。若果其才具堪勝。陳臬朕自己早行簡用。不待該撫保奏。豈何裕城因海紹係管關之員。欲令署理臬司。希圖結納。殊不可解。即此可見該撫不曉事體。何裕城著傳旨申飭。仍著即將海紹撤回本任。其臬司印篆。另委道員接署。至廬鳳道與九江道同係管關之員。將來安省遇有臬司缺出。該督撫亦不得委令署理。○辛丑。諭京師於三月二十日得雨後。

至今半月有餘。未經續得透雨。現在大田播種之際。朕心望澤甚殷。因思清理庶獄。或可感召甘膏。著刑部堂官查明徒罪以下各案。犯情節較輕者。分別減等發落。其因事牽涉。拘繫候質者。亦速行訊明省釋。至尋常案件。並著即行完結。毋得稽延留滯。該部即遵諭行。○諭軍機大臣等。上年豫省麥收豐稔。歸德陳州各府屬麥價每石止需七八百文。不啻東省迤南各府。二麥亦屬豐收。各該處民戶自必尚有蓋藏。現在豫省河北及東省泰安以北州縣。雖盼澤甚殷。而大河迤南暨充沂登萊各府屬。據該撫等奏業經得有透雨。二麥仍可收。是各該處不但麥價不致昂貴。並當有贏餘出糶。茲缺雨各屬糧價既昂。在小民自不能親赴別屬糶食。其豐收州縣殷實之戶。亦未必肯將多餘麥石自行運往糶賣。接濟若酌動官項。派員於糧賤之處採買運至缺雨之處減價平糶。以本省之有餘。

濟本省之不足。豈不兩有裨益。畢沅長麟亦思及此乎。何以未曾奏及。著傳諭該撫等。即速遵照妥辦。並將如何酌辦。可得若干。石即敷接濟。及現在曾否得雨情形。迅速覆奏。以慰廑注。○又諭據毓奇奏籌濟衛河水勢一摺。所奏具見留心。上年劉秉恬奏請將江廣新造撥船三百隻。留於山東等處安設。以備起剝。當經詢問長麟。據奏德州一帶間段古淺。臨時可以雇用民船。請將撥船仍歸直隸

安設等語。江廣撥船。東省或無須三百隻之多。若酌留一百隻。則今年水淺。即可應用起剝。漕船何至遲阻。而衛河水弱。畢沅於本省漕船。又未豫為籌備。是此事之誤。皆在長麟。畢沅二人。現據毓奇奏。將南旺馬踏諸湖。暢放北注。以汶水之有餘。濟衛河之不足。所想甚中。目前之急務。著傳諭蘭第錫長麟。作速照辦。以期運河水勢增益。並酌量情形。分築草壩截蓄。務俾迅速前進。至毓奇現在發盤

南糧。不能分身親赴德州一帶。管幹珍三次巡漕。於催趲事宜。頗為熟諳。已派令由驛即日起程。所有山東河南各幫船。著專交管幹珍會同和琳等。在彼實力籌催。其未入東省船隻。仍著毓奇督飭跟幫前進。毋使稍有阻壓。○吏部議覆。湖廣總督舒常等奏。請將甄別大挑舉人列入一等次等之員。通融兼補專簡缺。查大挑舉人。自應照原定等第補用。除專簡之員。不得補一字缺。一字之員。不得

補兩字缺外。請嗣後遇有一字缺出。俟一字之員用完。方准將兩字之員補用。專簡缺出。俟專簡之員用完。方准將兩字一字之員。統較到省先後。挨次補用。同日到省。按照科分同科。同日到省。按照中式名次。從之。○倉場侍郎蘇凌阿。劉秉恬。巡漕御史寶岱奏。准吳省欽咨會。各開撥船載米袋口。改令向內。臣等親為試驗。搬運需時。並通盤籌畫。事屬難行。請照舊辦理。得旨。此事。前據吳省欽等具

奏朕以其為防弊起見。隨降旨依議。今據蘇凌阿等親為試驗。並通盤籌畫。若將袋口向內安放。搬運較遲。自係實在情形。吳省欽係讀書之人。一時未能籌計及此。故有前奏。既經查明有難行之處。著即仍照舊日章程辦理。朕於一切無務。辦理惟期其是。從不稍存成見也。以齊齊哈爾協領巴哩木達為齊齊哈爾副都統。壬寅諭。昨因直隸順德廣平大名三府屬。近年以來。收成歉薄。現在又

復缺雨。業經降旨。將節年因災緩徵帶徵地丁各項未完銀兩。緩至秋成後分年帶徵。以紓民力矣。第念該三府屬。屢遇偏災。現屆開徵之期。雨澤尚未能霑足。麥收難期豐稔。雖舊欠業予緩徵。而輸納新糧。民力仍不無拮据。著再加恩。將本年應徵地丁錢糧一併緩至秋成後徵收。至河南省彰德懷慶衛輝三府。本年春雨亦未能霑透。現雖據畢沅奏。河北彰德等三府屬。於三月二十八九日。又得

雨一次。內懷慶府屬所得雨澤較之衛輝彰德二屬。霑被稍優。但亦不過二三四寸。尚不如京城前月得雨之霑足。恐仍不足以資播種。所有該三府屬應徵新舊錢糧。俱著緩至秋收後分別徵收。俾閭閻生計益臻寬裕。以副朕軫念民依有加無已之至意。該部即遵諭行。又諭。據尚安奏。發遣烏魯木齊巴里坤古城等處給滿洲兵丁為奴之厄魯特。土爾扈特布魯特。同子等犯。請改發烟瘴地方

等語。所奏尚是。烏魯木齊等處。即係蒙古地方。去伊犁回子各城。及土爾扈特游牧處。均不甚遠。厄魯特土爾扈特布魯特。同子等犯罪。若發往該處。滿兵為奴。不特易於逃逸。亦且無以示儆。著照所請。解交陝甘總督。擬定地方。改發烟瘴。嗣後均照此辦理。○癸卯。上幸靜宜園駐蹕。至丁未。皆如之。○旌表守正被戕直隸深州民韓靈妻信氏。○甲辰。諭。前因浙江温州黃巖福建海壇汀州各鎮總兵

缺出曾經降旨。令福康安於軍營打仗出力。副將人員酌量奏請補放。今據福康安奏。副將格綢額。謝廷選。丁朝雄。隨營打仗。及收復海口。防守要隘。均各出力。俱堪勝專閫之任。此外軍營副將內。並無堪勝總兵之人等語。謝廷選著補授浙江溫州鎮總兵。格綢額補授福建汀州鎮總兵。丁朝雄補授福建海壇鎮總兵。以示鼓勵。其浙江黃巖鎮總兵員缺著王柄署理。俟服闋之日再行實授。○又諭

據琅玕奏。副都統職銜黑龍江總管特爾敦。輟行抵桐廬縣。染患傷寒病症。醫治不效。在舟次病故等語。特爾敦輟派往臺灣勦捕逆匪。尚屬出力。業經加恩賞給副都統職銜。今自閩回京。於途次病故。殊屬可憫。著加恩賞銀二百兩。以示軫恤。○諭軍機大臣等。據舒常等覆奏。查辦楚岸鹽務情形一摺。內稱。川鹽來路。總由宜昌府屬巴東歸州一帶界卡外。買食川鹽。近因查出國私梟犯。當即申明

例。禁出示曉諭。現札宜昌鎮會同該府。多派兵役偵緝。並委幹員不時訪察等語。前因兩淮鹽引多在漢口分銷。商人等在彼一切匪費日漸繁重。而川省私販充斥。該督等平日並不飭屬認真巡緝。是以降旨。令舒常等實力整頓。具查緝私鹽。固屬該督等分內應辦之事。但該商等引鹽積滯。總由在楚行銷。浮費繁重。地方道府州縣。往往藉口為商緝私。任意勒索。而督撫等沿習陋規。收受商人公

費。恐亦在所不免。即如舒常等前此奏歸州因私一案。據劉鼐供出。有向來派出巡緝委官。俱量送盤費。伊與委員。勵世求等。因同鄉舊識。送銀一百五十兩等語。可見該省鹽務繁費。實有其事。而商人等出費日重。成本愈虧。以致獲利無多。不能源源轉運。該督等接奉前旨。自應將向來相沿浮費。嚴查飭禁。實力整頓。俾商人可以節省繁費。行銷暢達。方於鹽務有裨。今乃僅以申明禁例。派委緝

私為辭敷行塞責。止係有名無實。而於該省浮費繁重之處。並未據實查明立法嚴辦。試思川省私鹽。即有越界銷售者。亦不過在川楚隣近一帶。私行銷售。馬能越至武昌。豈派員查緝。即可謂之實心整頓。出示嚴禁。止屬具文。若僅巡緝川私。而武昌一帶。淮商私販。仍照常充斥。楚岸離務。又馬能有起色。乃舒常等竟以此等空言搪塞。並不認真查辦。實屬昧良文過大不是矣。舒常姜晟俱著傳旨

嚴行申飭。仍著將該省相沿繁費。如何立法查辦。嚴行裁革之處。據實具奏。毋得再涉顛預致干咎戾。○乙巳。復宗人府等衙門帶領引見例。諭向來宗人府國子監等衙門。遇有引見之人。俱係由本衙門自行帶領。上年宗人府因有覺羅教習進士惲鵬。期滿帶領引見。並不查明向例。率行請用主事。經吏部查出錯誤。參奏。並請嗣後將各項期滿教習。俱咨送吏部查例辦理。帶領引見。毋庸本衙門

自行帶領。固為防弊起見。但念該衙門雖有兼管王大臣其餘堂官。職分較小而習練日久。將來即可備卿貳之選。若遇有應行引見人員。俱歸吏部帶領。則該堂官等無由隨時瞻對。非朕取才鑒別之意。嗣後宗人府內務府國子監景山咸安宮等學。應行引見教習。仍著該堂官自行帶領。惟將應以何項請用之處。先期向吏部查覈。候部查覆到日。再行遵照辦理。倘有不合定例。辦理錯誤者。即著

吏部據實參奏。又欽天監衙門應行引見人員。向隨吏部帶領。此後亦著該堂官自行帶領。並一體先期向吏部查覈。如此既可以杜絕弊端。而該衙門等堂官隨時接覲。亦可觀其材器量加鑒別。以備任使。○又諭此次勦捕臺灣逆匪。所有派出帶兵之巴圖魯侍衛等。打仗殺賊甚為奮勉。雖止係內地奸民滋事。非從前平定準噶爾回部金川可比。但數旬之間。生擒南北兩路逆首。臺灣全郡蕩平。

辦理甚為迅速除軍營出力人員業經降旨
加恩分別陞用外今特爾敦輟雖已賞給副
都統職銜但在途病故殊堪憫惜其已圖魯
侍衛等著福康安詳悉查明如有似此實在
出力勞績懋著者據實具奏候朕降旨交部
查明伊等所得功牌酌量議給世職以示鼓
勵勤勞有加無已至意○丙午

上御演武廳閱健銳營操○諭此次勦捕臺灣
逆匪大功迅速完竣其帶兵出力之巴圖魯

侍衛等昨已降旨交福康安查明勞績懋著
者奏明交部查照功牌酌給世職此內鄂輝
舒亮普爾普三人俱係大員奮勉出力朕所
素知即著軍機大臣會同該部查明鄂輝等
三人節次打仗勞績查照應得功牌酌量議
給世職以示酬庸延賞至意○欽差協辦大
學士陝甘總督辦理將軍事務公福康安奏
拏獲傳授林爽文入天地會之嚴烟一犯據
供天地會名目聞起自川省朱鼎元及李姓

人不知名字兩家留下一個洪字暗號呼為
洪二房在廣東傳會者是萬和尚俗名涂喜
又有趙明德陳丕陳彪三人從廣東到福建
漳州詔安縣雲霄地方在張姓綽號破臉狗
家居住於四十一年到平和縣勸令入會等
語除札會李侍堯孫士毅嚴密查拏外查臺
灣天地會名目起自內地輾轉相傳又有一
種游手匪徒名為羅漢脚附從搶竊南北兩
路莊民義民中多有曾經入會者若於人心

甫定之後復行追究易滋疑懼惟有密查首
先傳會之人以杜其流並責成地方官嗣後
凡有拜盟結會即非天地會名目必嚴懲示
警諭軍機大臣曰會匪結盟滋事自應確查
嚴禁臺灣現當人心甫定之時且據福康安
奏義民中即有曾經入會者若再追究從前
紛紛查辦實未免易滋疑懼至所供萬和尚
趙明德等犯為粵閩二省首先傳教之犯必
當嚴拏務獲但內地輾轉根查又恐啟告訐

訛詐之端。李侍堯孫士毅。惟當不動聲色。飭屬密訪嚴查。以期就獲。不必過甚。致有株連。然亦不得視為尋常緝捕具文。致要犯潛蹤漏網。至福康安現在所辦臺灣善後事宜。頭緒繁多。若諸務完竣。能於七月間內渡。即應起程。於萬壽前赴熱河瞻覲。如一時未能辦竣。聞海洋風信九月內向俱停止開渡。福康安不妨在彼多駐幾時。萬不可冒險開行。即過九月。俟風色順利。再行起程。亦未為遲。○

丁未諭臺灣逆匪滋事。其始不過無藉匪徒。邀集夥黨。倡立會名。尚無聚眾謀逆之事。前年閩省辦理楊光勲械鬪奪犯一案。該省文武各員。如果將該犯等倡會起釁緣由。徹底究辦。並將案內黨夥悉數查拏。則會匪根株早已淨絕。何至任其日久復相煽聚。乃當日承辦各員。惟思將就完結。並未將逃逸匪犯實力緝拏。而於該犯等設立添弟會名目。朕彼時即意其為將天地二字改為添弟。存化

大為小之見。今查出果然。是其姑息養奸。以致匪犯等潛滋萌孽。復起事端。勦捕經年。方克藏事該處地方文武。養癰貽患。其罪實無可辭。節經諭令福康安等確查逆匪滋事根由。據實具奏。茲據福康安等查奏。從前辦理楊光勲一案時。署彰化令劉亨基以楊光勲業被拏獲。希圖即邀議叙。又以逃逸匪犯。係諸羅之人。心存袒護。不復嚴行查緝。致逸犯等逃至大里杙藏匿。而柴大紀、永福會審此

案。率據屬員詳報完結。並不從嚴究辦。亦未將劉亨基等參辦。及李永祺赴臺灣審辦時。僅提出餘犯覆審一過。亦祇就案完案。未經嚴切根究。其將天地會名目改為添弟會一節。詢之永福。雖據稱原案文票俱係添弟字樣。並非擅改。但以監司大員。辦理要案。顛頑完結。又柴大紀貪縱營私。永福近在同城。又有奏事之責。並不參奏。亦未據實揭報。該省督撫該道於堵禦賊匪。固為出力。但覈其貽

誤地方之罪。究屬功不掩過。請將永福革職。送交刑部治罪。臬司李永祺於覆審時。不即嚴切根究。殊屬徇縱。請一併革職。留於臺灣効力贖罪。該撫徐嗣曾平時漫無覺察。並請交部嚴加議處等語。此案地方官貽誤釀變。各緣由。已據福康安等查覈明確。除柴大紀業經革職。交福康安審明定擬治罪。劉亨基唐鑑董啟埏。俞峻各員。俱被賊戕害。先據李侍堯查明該員在任聲名。分別辦理外。永福

著革職。拏交刑部治罪。該員如有子嗣。亦著解交刑部一併治罪。李永祺著革職。留於臺灣。交與該撫徐嗣曾委令辦理城工報銷等事。効力贖罪。徐嗣曾係該省巡撫。咎實難辭。並著交部嚴加議處。所有福建按察使員缺。著伊轍布補授。臺灣道員缺。著王右弼補授。諭軍機大臣等。據蘭第錫等奏南糧幫船行走情形一摺。內稱南糧各船。已入臺莊者十三幫。已過濟寧者七幫。衛河上游。據報長

水五寸。自係西北一帶得雨之故。可期續得甘霖。水勢益加增長等語。衛河水長。自因上游河北彰德懷慶衛輝所屬業經得有雨澤。故能水勢加增。但何以尚未據畢沅奏報。著傳諭該撫。即查明彰德懷慶衛輝三府屬於何日得有雨澤。及分寸若干。農田是否霑足之處。據實迅速具奏。○轉禮部右侍郎朱珪為左侍郎。實授劉躍雲為禮部右侍郎。○以大理寺少卿李臺為太僕寺卿。○以編修翟槐為雲南鄉試正考官。戶部主事張德懋為副考官。檢討德生為貴州鄉試正考官。禮部主事李奕疇為副考官。○陞任安徽巡撫書麟疏報阜陽縣墾復荒地七十四頃五十六畝。有奇。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二

子集本字書一

主

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三

監修總裁官經筵講官太子太傅文淵閣大學士文淵閣領侍衛內大臣稽察欽奉
上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領侍衛內大臣稽察欽奉
上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

數修

乾隆五十三年戊申四月戊申

上還圓明園○諭京城自三月二十日得有透
雨後迄今將及一月近日雖經陸續得雨前
後計算不過三四寸未得優霑深透現屆大
田播種之時民間情殷望澤朕心甚切焦勞
著該部查明向例敬謹設壇祈禱以期普被
甘膏○又諭據福康安等奏凱旋官兵分起
渡洋內福州駐防一起官兵在鹿仔港更換
大船候風放洋有領催蘇楞額等乘坐哨船
已至港口未上大船陡起風暴漂至大洋正

在危險忽有異鳥飛集船頭。船戶等謂得神佑。必可無虞。漂流兩日夜。幸不覆溺。適於黑水洋遇見他船。兵丁等獲救。過船。軍裝搬運甫竟。見原坐哨船下有數丈大魚浮出水面。原船登時沉沒等語。此次派往臺灣勦捕官兵及運送錢糧鉛藥等項。渡洋多獲平穩。前此福康安自崇武澳放洋。前抵鹿仔港。千里洋面一晝夜即已過達。皆仰賴

天后助順。靈應垂庥。實深欽感。節經降旨。交

李侍堯等修葺

天后廟宇。并親書聯額二分於廈門。興化。兩

處懸掛。以昭

靈貺。茲福康安等奏福州駐防官兵內渡船隻。在港口被風遇危。獲安。疊徵靈異。覽奏為之額手。現在兵船陸續內渡者尚多。據福康安等奏。海洋三四月間。風力平和。四月前儘可全數撤竣。仰荷

靈祐。默佑官兵安穩。遄歸。允宜增益鴻稱。褒

崇封號著於

天后舊有封號上。加增顯神贊順四字。用答神庥。而隆妥侑。并再書匾額一面。交福康安等於沿海口岫廟宇。應懸處所。敬謹懸掛。至此項被漂船隻。雖遇救援無虞。但因公冒險。殊堪憐念。著照前次凱旋兵丁漂泊粵境之例。每名賞給銀二兩。以示格外體卹。○

御書匾曰佑濟昭靈。○改四川梁黃大定。白雞

白鹿勒折。虎落多押竹。昔日壩八寨熟苗。編

入茂州八里民戶管轄。從前任四川總督保

寧請也。○己酉

孝端文皇后忌辰。遣官祭

昭陵。諭前因臺灣被賊戕害各員內。有平日居官尚稱廉謹。亦有在任貪聲素著者。節經諭令福康安。李侍堯。查訪明確。奏明分別辦理。嗣據李侍堯查明。孫景燧。劉亨基。程峻。董啟垠。唐鑑。數員。雖在任久。暫不同聲。名俱屬狼籍。是以降旨。將各該員家產查抄入官。以

備抵補軍需之用。茲據孫士毅等查奏唐鑑家本貧苦。委署諸羅縣事。為時未久。即寄回銀二千數百兩之多。若非在任時肆意貪婪。何從得此多貲。況昨據福康安奏到。亦稱董啟埏。劉亨基。唐鑑。聲名平常。與李侍堯所查均屬符合。可見此次臺灣逆匪滋事。不但由於營伍廢弛。竟係該府廳知縣等侵貪斂怨。以致釀成巨案。地方官吏。如果素無劣蹟。猝被賊害。尚當予之卹典。是以長庚。俞峻。各員。據福康安等奏其居官尚好。皆即交部優卹。若唐鑑等。賊私累。執法釀變。此而因其被賊戕害。遂爾不懲其貪。則伊等家屬。仍得坐擁豐饒。無以示儆。將來接任各員。必仍相率效尤。復萌貪縱故智。不久而又別滋事端。非所以儆官邪而靖海疆也。今當此徹底查辦之後。該地方官務當各矢清慎。砥礪廉隅。時時循思天理。凜遵國法。倘不知儆畏。惟事貪黷。則唐鑑等。即其前車之鑑。○諭軍機大臣

等據富綱奏報春深微汎一摺。內稱杉木籠千崖三臺山等處。微汎後。照例酌留弁兵。分布巡防。必得大員統領。仍令龍陵協副將蘇爾相管領巡查。毋庸更換等語。緬地水土惡劣。內地官兵向不服習。且數年來相安無事。固不值又事更張。亦不可竟存大意。漫不經心。但杉木籠等處邊關。最為緊要。蘇爾相雖在緬甸多年。於邊防情形。較為熟悉。究恐日久生懈。現在雖已微汎。著傳諭富綱。務宜時刻留心查察。不可有意生釁。亦不可稍存大意。以致貽誤邊防。其內地民人偷出外夷者。最應嚴查。或似臺灣地方文武。日久因循。釀成巨案。恐該督不能當其咎也。○又諭昨海蘭察到京。據奏福康安李侍堯二人俱會抱恙。數日仍力疾辦事。旋即痊愈等語。沿海地方水土氣候。與內地不同。福康安在彼不能服習。李侍堯又已年老。伊二人俱偶經抱恙。雖已痊愈。朕心深為廕念。現今大功告成。不

過善後事宜。著傳諭福康安、李侍堯，務須加意調攝，不可過於勞瘁。其尋常細事，毋庸力疾辦理，或致精力就乏。於要務轉不能周到。惟當隨時善自調護，以副朕體恤委任之意。

○欽差協辦大學士陝甘總督辦理將軍事務公福康安奏遵旨查明首先拏獲林爽文之人緣義民首高振，在老衢崎地方，蹣跚逆犯蹤跡，即告知侍衛翁果爾海圖拏，並親獲林躍興一犯，業經奏賞藍翎，並給千總職銜。得旨：高振探明逆首蹤跡，首先下手拏獲，又拏獲賊目林躍興一名，實為出力可嘉。著福康安將義民首高振，同前此會中立黃奠邦等一併給咨送部引見。○庚戌諭向來山東河營汛弁有俸滿保送分別營衛陞用之例，而北河額設千總向無此例，未免偏枯。嗣後北河額設千總已屆俸滿，如果有防汛實心奮勉出力者，著照山東河營汛弁之例，照例分別等第送部帶領引見。○諭軍機大臣等

昨因直隸順德大名廣平三府屬及豫省河北三府雨澤短缺，已降旨詢問劉戡、畢沅。該二省短雨處所，曾否得霑霽雨。近日京城雖屢有微雨飄灑，但雲氣濃厚，自北而南，近畿及豫省河北一帶，是否一律得有雨澤。朕心深為廕注。著該督等將會否得雨深透，農田有無妨礙之處，即行迅速據實覆奏。再，近據畢沅奏大河以南各屬節次雨澤優霽，麥秋可望有收，而山東省昨亦據長麟奏兗州府屬之嶧縣臺莊地方麥石充盈，市集雲轆。是豫省河北及東省泰安以北州縣雖尚在盼澤而大河迤南暨兗沂登萊各府屬俱經得有透雨，二麥自必豐稔。該處價值定屬平減。現在京城得雨尚未深透，而春寒日長，麥收無望。將來市價不免昂貴，不可不多方籌備，以資接濟。著傳諭畢沅、長麟除河南省所有麥石約計足敷接濟河北三府屬山東省麥石足敷接濟泰安以北各府屬外，該撫等各

於該省酌量情形。如麥石實在充裕。價值及運京之費。每石約二三兩。可以辦理。即動項各採買數萬石。或插幫行走。或附於漕船之後。陸續運京。即抵京稍遲。亦屬無妨。著該撫等將是否可以如此辦理之處。迅速據實覆奏。又諭據長麟奏濟南、東昌各屬。十二日各得雨一二寸不等。因晴久土乾。未能播種。若日內甘霖大沛。尚可趕種秋禾。現飭屬誠求等語。濟南各屬係缺雨地方。今得雨未透。仍未能播種。長麟身為巡撫。自應躬親誠求。何得以飭屬了事。且一切綢繆之計。若何。亦未據奏及。著傳諭該撫。即速親自率屬虔誠祈禱。並將缺雨各處。會否續需甘霖。及秋禾能否趕種。倘有成災處所。如何豫行籌辦之處。迅速據實覆奏。勿得稍存諱飾。○又諭據劉戡長麟奏德州境內程家莊等處。間段古淺均須起撥。現雇民船分設五站輪番起撥。至南糧出閘後。裝載尤重。請調楊村官撥船

四百五十隻押赴德州。照東省現辦章程。按站分設。以備起撥等語。亦祇可如所奏辦理。看此情形。東省撥船竟不可少。著傳諭浦霖。何裕城等。於江西、湖南。即先動項各造撥船一百隻。務於冬底春初。派員送到東省。以期應用。所有撥船工料價值及運送之費。俱罰令長麟按數賠繳。其撥船解到後。應如何分交沿河州縣收管。暨酌給經費之處。並著長麟按照直省原定章程。妥議具奏。○漕運總督毓奇奏。楊村至通州一帶。古淺處多。請增設二汛。加募淺夫二百名。添備刮板十副。令原設游巡千總督管。舊有通濟庫紅撥銀二千餘兩。停給旗丁。作為此項經費。下部議行。○蠲免江蘇、清河、安東、山陽、阜寧、鹽城、甘泉、興化、泰州、寶應、銅山、豐縣、沛縣、蕭縣、邳州、宿遷、睢寧、海州、沭陽、十八州縣。淮安、大河、揚州、徐州、鎮江、五衛。乾隆五十二年水災。額賦有差。其勘不成災之桃源、高郵、東臺、江都、礪山

五州縣並予緩徵。○辛亥諭曰阿桂等議覆尚安奏烏魯木齊所屬酌減新增地糧一摺。請將從前清丈餘地增額徵糧如何定議緣由。令永鐸會同尚安詳議覆奏到日再行覈議。固屬覈實辦理。第念烏魯木齊所屬地方遠在邊陲。惟在廣為招墾。耕種地畝。日闢日廣。則交納糧石。自可日漸加增。若新增餘地不准量為酌減。一律按則徵糧。小民不能得有贏餘。或至裹足不前。憚於承種。則新疆地畝轉致閒曠。亦非所以軫恤邊黎之意。且永鐸係原辦之人。今若令其再行會議。恐不免心存迴護。所有尚安奏烏魯木齊前次查丈多墾餘地應徵新糧。著照所請准減一半。毋庸再行會議。俾民戶易於交納。以示朕加惠邊黎至意。○諭軍機大臣等據劉綎奏報得雨情形一摺。內稱順天等府屬之薊州等州縣於四月十一二等日各得雨自一二寸至五六寸不等。查近京各屬并永平一帶。今春

雨水尚屬頻霑。茲又得此滋培。二麥可冀有收等語。本年直省各屬雨澤短少。且春間氣候寒冷。為日較長。麥田難資長發。現在又未得透雨。二麥恐難望有收。看來該督所奏。竟未免有諱飾之意。直省宣化及正定順德廣平各府屬前已節降諭旨。將應徵新舊錢糧分別緩徵。但現在麥秋失望。恐市集糧價日漸昂貴。該督自應察看情形。或應出借倉穀。或減價平糶。以濟民食。何以並未思及。著劉綎即將缺雨各屬現在如何酌籌接濟之處。即行據實覆奏。○壬子諭據李世傑等奏四川屯守備阿忠布木於本年二月十三日因病身故等語。阿忠布木曾在軍營帶兵打仗出力。此次剿捕臺灣逆匪。調派屯練兵丁時。該屯弁因年老未能親往。派令伊子斯丹巴拉爾結帶兵前往打仗殺賊。甚為奮勉出力。特諭令李世傑等賞給阿忠布木緞匹荷包。以昭優獎。今該屯弁因病身故。殊堪憫惻。伊

次子斯丹巴。三子拉爾結。自臺灣凱旋。徹回將次回川。所有伊長子阿結。現在京藍翎侍衛上行走。即著賞給驛馬。回寨治喪。並著李世傑。於川省藩庫內。賞給銀壹百兩。以示軫恤。所有阿忠布木別思滿屯守備一缺。即著照伊從前所請。令伊第三子拉爾結承襲。○諭軍機大臣等。本日召見巡查歸化城差竣回京之員外郎福泰。據稱山西大同一帶。上年因旱歉收。本年又復缺雨。至四月初間。尚未得有雨澤。地土乾燥。不能播種。民人口食無資。賣鬻子女者甚多。並有逃往口外覓食者。口外地方。因就食者多。糧價昂貴等語。山西大同一帶。地土瘠薄。上年被旱成災。今歲又復缺雨。現據福泰奏稱。四月間尚未能播種。是麥收已屬無望。而該處民人。竟至有賣鬻子女。並往口外覓食者。明興何以並未奏及。前因大同各屬。上年收成歉薄。業經降旨展賑。酌借口糧。並將本年應徵新糧。緩至秋

後開徵。但加賑銀米。及借給口糧。計二月內。早經散放完竣。今該處似此乾旱。民情拮据。明興自早應酌籌接濟。或將倉穀減價出糶。或酌動官項。派員於所屬就近地方。糧賤之處。採買運至大同一帶。減價平糶。庶小民口食有資。何以並未想及。竟坐視其流離失所。耶。著傳諭明興。即親往大同。將各屬被災情形。及應如何賑恤撫綏。並出口民人。究有若干之處。迅速據實覆奏。毋令地方。擱延。以為諱飾。致干咎戾。○癸丑。上詣黑龍潭祈雨。○諭據劉莪奏。順天等府屬四十九州縣。本年春夏以來。雨澤短缺。麥收歉薄。大田亦多未佈種。小民生計。不無竭蹶。等語。本年順天等府屬。春膏稍缺。入夏後雨澤。又未能一律普霑。二麥難望有收。大田亦多未種。若將新舊錢糧。同時並徵。民力未免拮据。所有順天府屬之大城。文安。保定。武清。寶坻。薊州。保定府屬之清苑。唐縣。博野。望都。

完縣祁州東鹿河間府屬之河間任邱獻縣
交河阜城景州東光吳橋寧津肅寧故城天津府屬之靜海青縣南皮滄州鹽山慶雲正定府屬之正定井陘新樂行唐晉州無極藁城冀州併所屬之南宮新河棗強趙州併所屬之隆平寧晉深州併所屬之武強饒陽定州併所屬之曲陽等四十九州縣並宣化府屬之延慶赤城龍門三州縣應徵節年新舊錢糧倉穀旗租及萬全等州縣上年因災賞借之口糧俱著加恩一體緩至秋成後再行徵收如並無節欠糧租者准其將本年新糧一體緩徵俾民間生計益資寬裕以副朕軫念民依有加無已至意該督即遵諭行○諭軍機大臣等京師自三月二十日得有霽雨以後迄今未經續霽甘膏農民望澤甚殷本日朕親詣黑龍潭虔誠祈禱見道旁畦麥一律青蔥看來二麥尚可收此乃農民汲井灌田勤加戡溉隨時滋長因思直省地方小

民耕田力作自當於阡陌之旁多浚井泉既可以資汲飲而遇缺雨時又可藉霑灌溉兼通地脉實為一舉兩得著劉綬於該省所屬地方派員分往履勘酌量情形勸令農民於田畝之外廣為開鑿俾泉源深濬井食不窮未始非滋培疏通之一法除就近傳知順天府尹外將此諭令知之○又諭據畢沅奏河北現在情形並豫買麥石一摺內稱河北衛輝懷慶彰德三府屬得雨未能霑足已飭河北道察看情形將倉穀分別糶借今接奉諭旨擬於附近水次動項採買十萬石暫為存貯現在河北一帶麥收牽算可得五分有餘如該處需糧接濟再行運往減價平糶倘即日獲霽優霽無須協濟即以此項麥石留為撥補缺額倉穀等語前因京城得雨尚未深透春寒日長麥收無望恐將來市價不免昂貴曾經降旨令該撫酌量情形除所有麥石足敷接濟河北三府屬外如麥石實在充裕

即採買數萬石陸續運京以資接濟此旨該撫自尚未接到京師現在雖未得雨麥收失望但上年尚有平糶存倉之麥四萬餘石先經降旨早已平糶計可糶至七月此外尚有河南本年額運麥四萬六千石將來運到自可源源接濟不慮市價增昂所有豫省現在採買麥十萬石著畢沅察看情形如河北續獲甘霖無須協濟或即留本省撥補缺額倉穀如尚有多餘麥石再行運京備用俱無不可不必拘泥前旨辦理再山東省前亦有旨令將本省麥石足數泰安以北各府接濟外一體採買麥數萬石運京但前因東省充沂登萊各府麥收較稔已令該撫先行採買運至缺雨處所減價平糶經長麟覆奏業已遵照辦理今思東省迤南各屬麥收雖屬豐稔民間自有蓋藏但該省亦係歉收之後今歲泰安以北雨水短缺現在採買本省麥石接濟缺雨處所恐該省麥石已未必能有贏餘

若因有續降之旨復行採買運京或致糧賤之處因採買過多市價轉致加增於民食仍屬無益況京師現存及續運麥石足數平糶接濟之需並著傳諭長麟詳加察看如本省之有餘止足敷接濟本省之不足則採買運京本非急需之事亦不必拘泥前旨辦理也

○甲寅

上御勤政殿聽政○諭據宗人府奏永瑋所遺公爵照例降襲作為未入八分公請將應襲人員帶領引見此係照例辦理但永瑋在將軍任內多年一切事務詎勉出力著加恩令伊子綿佐再襲奉恩輔國公一次以示朕體卹宗室至意○又諭曰鄂爾多斯游牧過來飢旱相仍傷損畜產屬下人等生計未免拮据著加恩即照什當巴拜色旺喇什所請均准借給王貝子俸銀十年以資畜牧各將屬下人等約束撫養勿令妄費○補行山西省乾隆五十二年大計卓異官十員才力不及

官三員浮躁官一員。年老官九員。有疾官三員。分別議叙處分如例。○乙卯諭曰。綽克托現已年老。精神漸覺衰頹。戶部事務繁劇。恐照應未能周到。吏部司分較少。且綽克托在吏部年久。尚為熟諳。福康安到京後。仍回陝甘總督之任。吏部尚書之員。著綽克托署理。不必辦理戶部事務。至戶部現有和坤管理。其尚書侍郎內有董誥。諸穆親。蔣賜棨。汪承需。不為乏人。嗣後每遇朕啓鑒巡幸時。和坤

董誥。皆當扈蹕前往。戶部尚書乏人。則著金簡兼署。○予臺灣陣亡義民首守備銜鄭其仁。雲騎尉世職。卹賞如例。○丙辰諭軍機大臣等。據畢沅長麟各奏。報豫省彰德。衛輝。懷慶三府屬。於四月十一二日得雨一二寸。東省濟南等屬。亦得雨一二寸。尚未霑足。現在率屬齋心籲禱。各等語。京師自本月二十三日。起大沛甘霖。二十四日辰刻。尚未停止。連宵達旦。計入土已有尺餘。極為深透。現在雲

氣濃厚。看來勢甚廣遠。想缺雨一帶大名順德廣平宣化等府。自必一律普霑。而豫東距京亦近。河北各府屬。及東省濟南等處。亦必得有透雨。二麥尚不致失望。大田自可乘時種植。著劉綬畢沅長麟。即速查明據實覆奏。至京師現在已得透雨。二麥收成。竟可過半。且大田播種翻犁。得此甘膏。極為得力。麥石價值。自必日就平減。所有豫東二省採買麥石。著畢沅長麟。察看情形。竟可停止買辦。毋

庸多費周章也。將此各諭令知之。○又諭曰。福康安審辦柴大紀貪縱營私各款。許久尚未據將全案定擬具奏。必係為臺灣原額兵數短少一款。非徹底詳查。難以得其實在。是以未能即時定案。即如從前鳳山。嘉義等處潰散敗逃兵丁。固有臨陣死事者。而其間或本係空名。或為賊人銜失。懼罪潛逃。甚至去而從賊者。均難保其必無。今大功雖已告成。正當切實詳查。不可顯預了事。福康安在彼

務悉心訪察。將此項兵丁下落。根究明確。雖未能一一得其實數。而大致不致混淆。或竟係柴大紀虛額冒餉。其罪更不可恕。必使水落石出。方足以勵戎行而成信讞。又賊目林泮等口供內。有官兵從前查拏會匪時。將伊等房屋燒燬。因而糾約林爽文戕官謀逆之語。官兵查拏匪犯。自當堂堂正正。果有拒捕傷差等事。不妨督率官兵嚴密查拏。即有殺傷。亦無不可。若如臺灣員弁查拏會匪時。動輒燒人房屋。是官兵已行同竊盜。不但有乖體制。轉令賊匪得以藉口。著福康安嚴切曉諭該處文武官弁。俾曉然知官兵自有紀律。深以前事為戒。方為妥善。至福康安前奏。令義民等盡將兵器繳銷。改鑄農器。嗣後不得私造私藏。如此不動聲色。自遏亂萌。深合機宜。但恐福康安內渡之後。該處地方官日久廢弛。又蹈從前因循積習。並著福康安嚴諭地方文武。遵照妥辦。並令此後往臺灣巡查

之大臣。一年申奏一次。實力奉行。久而弗懈。○丁巳。諭據博清額奏。由臺灣撤回兵丁。行至澎湖。陡遇暴風。正紅旗漢軍官兵所坐船隻損壞。遺失軍器數件。請將驍騎校黃鐸陳奇翰交部嚴加議處。並自請察議等語。前此廣州駐防兵丁於臺灣成功。回程渡海。陡遇暴風。損壞船隻。前後未能相顧。僅失軍器。官兵不致傷損仰賴

上蒼恩佑。官兵不但無罪。尚堪憐憫。據孫士毅

奏到。朕俱加恩賞給銀兩。今博清額復有此奏。殊屬非是。博清額若故為此奏。候朕降旨。則其心存取巧。如以遺失軍器拘泥成例奏請。亦甚不曉事體。著嚴行申飭。外。博清額及驍騎校黃鐸陳奇翰俱著無庸議處。所失軍器免其追賠。○兩淮鹽政全德奏。回空糧船最易夾帶私鹽。現咨漕臣毓奇豫飭各幫。無許私帶。並咨行各關。務於回空經過時。一體嚴查。又淮安揚州設有搜鹽廳二處。淮安由

督臣漕臣派員搜查。揚州由督臣鹽政派員搜查。均飭凜遵查緝。其江寧各口岸。亦有滯銷之處。已會同書麟嚴飭文武各員設法緝私。如疎懈即指名參處。再准北鹽務亦應調劑。現訪有經營殷實者。會同督臣派員領運。並將鹽河淺滯處所疏通。目下揚州各商聞風踴躍。辦運大有起色。諭軍機大臣曰。回空糧船夾帶私鹽。定例原應嚴禁。即鹽梟等往來私販。經過地方及各關口。俱有稽查之責。

若果平時彼此留心。各能嚴加防範。何至有如許弊端。致私鹽充斥。官引不能暢銷。地方文武鹽政呼應不靈。而漕船非其所管。亦難於稽查周密。現既查有此等積弊。皆係該督等從前廢弛所致。况沿江沿河要隘處所。俱有巡役。原為緝私而設。聞商人等向有幫費。是既得其津貼。尤不應不代為查緝。至漕船往來雖其攜帶貨物。已屬加恩體恤。乃從中影射販私。該總漕不能查出。已難辭咎。倘更

知而故縱。甚至從中分肥。尤屬不成事體。今姑不究其既往。著傳諭書麟。毓奇嗣後務宜嚴飭所屬實力搜查。務將夾帶透漏各弊。防禁肅清。無致官鹽再有稽滯。至兩淮鹽引。在湖廣地方銷售最多。近因川省侵銷。浮費滋重。商人不能獲利。以致引鹽積壓。屢經降旨嚴飭矣。地方官吏緝私是其分內。乃以此藉口。向商人需索。已大干法紀。而又不為之認真查緝。私販捫心寧不知愧。現經全德奏明。

將各項浮費悉行裁減。著再傳諭舒常。晏慕務宜潔己率屬。實心整頓。協力妥辦。若再因循廢弛。仍蹈陋習。或陽奉陰違。私存匣費之名。累商滯引。一經發覺。恐該督等不能當此重咎也。至全德奏調劑淮北鹽務。亦祇可如所奏辦理。惟所稱揚州現在辦運各商大有起色之語。恐是虛詞。兩淮鹽務廢弛已久。茲甫經查辦。豈能即有起色。著傳諭全德於緝私節費等事。總宜時刻留心查察。實力妥辦。

不得僅以空言塞責也。○緩徵湖南武陵縣乾隆五十二年水災額賦。○福建巡撫徐嗣曾疏報侯官、霞浦、漳平、龍溪四縣首墾田四頃六十五畝有奇。○戊午諭軍機大臣等：刑部覈覆湖北沔陽州民何文郁等盜掘墳棺，致李陳氏赴京控告一案，並請將日久未結之府州縣查取職名議處。已依議行矣。湖北民風刁健，告訐之案不一而足，及發交覆審又不速為秉公訊斷，以致奸民益復恃刁逞暴。雖屢經飭催，總不能依限完結。其餘諸事亦多延緩。該省吏治廢弛已極，現在仍未見有起色。著傳諭舒常、姜晟、務宜實力整飭，大加振作，以祛閹冗而懲刁詐。如有仍前因循玩愒者，則惟伊二人是問，恐不能當其咎也。○刑部等衙門議駁盛京刑部侍郎榮柱奏稱：錫伯七十五與圖仰阿族妹王趙氏通姦，將圖仰阿毆傷身死，請依律擬絞監候。王趙氏擬杖等語。查七十五因圖仰阿窺破姦情，

黃夜糾人尋釁，乘圖仰阿已臥石毆三傷致死，非挾嫌豫謀，即臨時故殺，科以鬪毆殺人，之條殊未允協。應令該侍郎再行詳細研鞫，按律妥擬得旨。部駁是。依議。此案著交署將軍慶桂會同該侍郎覆審定擬具奏。盛京刑部侍郎僅止一員，若部駁事件仍交原審之人辦理，必有迴護。比後盛京審辦事件有經部駁者，該部即奏交盛京將軍或別部侍郎內特派一員會同覆審。○旌表守正被戕河

南南陽縣民陳銳妻張氏。○己未諭曰：喀爾喀車臣汗車布登扎布在途病故，殊堪憫惻，著加恩賞銀三百兩，所有奠醊事宜交該部察例辦理。○諭軍機大臣等：向來福建省械鬪之案不一而足，該督撫等並不認真查辦，先存化大為小之見，顛預完結，甚至案內夥黨私自議出一人抵罪，其實在正兇轉致漏網，地方官不敢過問，且一案化作數案，冀圖將就了事，以致奸民無所畏懼，肆行不逞，曠

成巨案。總由械鬪積漸所致。此種風氣。漳泉居多。而臺灣尤甚。現經大加懲創之後。不可不實力整頓。著李侍堯務須乘此兵威震懾之時。嚴行查辦。淨絕根株。如遇有械鬪之事。必當嚴切根究。盡法懲治。其地方官如有諱飾掩匿者。即嚴參治罪。務使相沿惡習。盡行革除。奸徒斂跡。以戢奸宄。而安良善。海疆永期綏靖。倘此後尚有械鬪之案。並不實力嚴辦。仍前化大為小。別經發覺。惟該督是問。恐

不能當其咎也。將此傳諭知之。○又諭據明興覆奏。大同一帶情形一摺。據稱大同各屬土性寒涼。若於四月內得有透雨。不致有誤種期。現已飛飭雁平道。先往該處確勘。將實在無力貧民。再行酌借口糧籽種等語。看來明興竟不免有諱飾之意。此則不可。大同一帶雖據稱土性寒冷。節候較遲。若四月得雨。尚可播種。但該處地土瘠薄。展賑銀糧。早經放竣。如有實在無力貧民。自應早為籌辦。京

師現在已得透雨。連宵達旦。極為優渥。雨勢自西北而來。想大同一帶。或亦同時得有渥澤。著明興即行察看情形。或應趁此得雨之後。酌借口糧籽種。俾得乘時耕作。不致秋收失望。其實在無業貧民。有應撫恤者。仍當照例綏輯。該署撫於辦理秋審完竣。即應親往查勘。妥協辦理。勿使一夫失所。毋得再為諱飾。致干咎戾。○庚申諭據宜興奏。盛京五部主事請扣留七缺。作為題缺。將郎中員外郎

京察一等者。調補京城六部等語。所奏雖覺近理。而亦有所難行。如以盛京生齒日繁。該處文員。陞途不無壅滯。現今京城旗下世僕滋生。更為蕃眾。若將盛京官員調補。則京員陞途。豈不亦虞壅滯乎。況京城各部院官員。京察每部皆有堂官六七員。公同考覈。始列一等。盛京每部止侍郎一人。取舍惟其所專。保無有徇私情弊。此雖定例。究屬未能詳密。嗣後盛京官員京察時。令將軍副都統暨五

部侍郎會同東公遴選擬定等第前奏倘有可行之處亦應調劑辦理著交大學士九卿酌議具奏尋奏盛京禮兵二部事本簡少刑部向有題缺主事一員均無庸調劑外惟戶工二部政務稍繁酌量准予主事各一題缺該堂官於滿洲筆帖式內揀選正陪咨送吏部帶領引見補用仍試俸五年註冊所請京察一等人員調補之處與定例不符未便准行報聞○又諭據永鐸奏照料哈薩克來使

之委署護軍叅領經文協領德明並馬甲哈郎阿等五人由內地買子女十人帶往已將馬甲哈郎阿等重懲革退請將經文德明交部議處等語伊犁官員來京引見若買內地游食貧民帶回使用尚可經文等係照料哈薩克來使於內地沿途置買子女豈不為外藩所笑且照料使臣行走理應簡便置買人口勢必耽延時日多需車輛馬甲哈郎阿等著照永鐸所奏辦理至經文德明不必另行交

部俱著革職回京不許挑補馬甲再經文等於寧夏山西陝西直隸等省買人帶往該督撫何以竟未查出著將經過直隸山西陝西甘肅督撫等俱嚴行申飭○諭軍機大臣等據舒常等覆奏嚴禁漢口商人匣費并自請交部嚴加議處一摺淮南在楚行鹽私行出費地方官相沿需潤固屬事所不免但日漸加增甚至借端剝削任意婪索以致商人繁費愈重成本有虧不能接濟轉運引鹽壅滯

而督撫等故為不知日復一日鹺務焉能得有起色自不可不實力嚴辦今雖據舒常等奏稱現在立法節費並飭承緝文武各員秋毫無染一律肅除但恐為日稍久又復視為相沿陋規仍前婪取殊屬有名無實著該督等嗣後務先正己率屬隨時查察上下力為整頓俾商力漸紓疏銷暢速勿致日久玩生又踵前弊仍著將如何禁絕浮費之處於年終彙奏一次倘有陽奉陰違藉詞婪索者一

經發覺恐不能再邀寬貸也將此諭令知之。刑部議覆閩浙總督李侍堯奏稱查辦臺灣逆匪家屬請將賴應之父賴箋莊大田大功堂兄莊樹照大逆緣坐律擬斬立決莊樹妻林氏賴箋妻林氏與年未及歲之子賴際會發功臣家為奴均應如所擬辦理得旨固屬照例辦理但此案林爽文糾眾不法實為罪魁惡首前次林爽文之父林勸一犯拏獲奏到時朕以罪人不孥本不欲因其子之惡而戮及其父嗣該犯解到後經大學士九卿等審訊以林勸曾與林爽文商畫計策並派人守卡抗拒官兵實為助逆不法且係兇逆首犯之父奏請按例緣坐即行正法是以照擬辦理今賴箋係賴應之父伊子賴應祇受林爽文偽封不過從犯莊樹係莊大田大功堂兄亦非例應緣坐嫡屬若俱照緣坐之律問擬立斬究覺有所不忍賴箋莊樹俱著改為應斬監候交刑部牢固監禁以示法外施

仁之意餘依議。直隸總督劉我疏報澤州昌黎樂亭唐縣懷安豐寧六州縣墾地六十頃七十九畝有奇。辛酉諭昨據永鐸奏照料哈薩克來使之委署護軍參領經文協領德明等在直隸山西陝西寧夏等處共買子女十人請將經文等交部議處等語。已將經文等革職並將失察之沿途督撫嚴行申飭矣。地方遇有災祲無業貧民賣鬻子女原屬閭閻有之事從前田文境在河南巡撫任時曾禁止民人不准出境其意不過為諱災起見此等貧民既因災歟口食無資不得已將其子女出賣地方官果撫恤得宜無此等事則善矣若概行禁止則災黎貧乏不能自存又無以養贍其子女必致歸於餓斃豈軫恤災黎之道自不若聽其賣鬻則貧民既可得有身價藉以存活而其子女有人養育亦不至有凍餒之患豈非一舉兩得又何必強為禁止耶但民人子女或就近賣與地方民戶

及過往客商。固所不禁。即各省赴京引見官員。沿途價買攜帶。亦尚屬可行。至如由新疆押解人犯。及照料回子護送哈薩克使人。並押送官物之官員人等。俱係由驛站行走。理宜簡便。若沿途買帶子女。則揀擇看視。說合講價。即不免等候需時。而買定後沿途攜帶。又須多用車輛夫馬。必致擾累驛站。貽誤差使。且此等買帶子女之人。未必盡係自行買用。或為人代買。或復行販賣。更易滋別項情弊。而帶領來使之入。尤為外藩所笑。不可不嚴行查禁。嗣後著各該督撫等。遇有災浸地方。貧民賣鬻子女者。除本地民戶。過往客商。及並非馳驛官負。各聽其便。毋庸禁止外。其有派委差使由驛行走之人。俱應禁止。民人不得私行售賣。並隨時查察此等官員。如有違禁私買攜帶者。即行嚴參治罪。將此通諭各督撫等。並諭伊犁將軍。及新疆辦事大臣。一體嚴察。勿得仍前因循。致干咎戾。○又諭

戶工二部議奏。龍江西新二關徵收盈餘。比較上三層短少銀四萬六千一百餘兩。著落該監督照數賠補。並請交部議處等語。因屬照例辦理。第念上年淮揚等處。因歲歉之後。民力未紓。竹木襍貨。銷售為艱。以致船隻障礙到關稀少。盈餘短絀。尚屬有因。所有此次西新關短少戶稅盈餘銀一萬八百餘兩。龍江關短少工稅盈餘銀三萬五千三百餘兩。令該監督成善。共賠補銀一萬兩。其餘銀三萬六千一百餘兩。俱著加恩寬免。並從寬免其議處。○諭軍機大臣等。據長麟奏。從前缺雨各州縣。均於二十三、四、五日。各得雨三、四、五寸至深透不等等語。閱其所開單內。如東昌、曹州、青州等府屬。僅有得雨三寸者。東昌等府屬。雖入春以來。間得雨澤。現在山東省接續得有甘霖。或東昌等府屬。亦可一律霑被。乘時趕種。但此次得雨僅止三寸之各州縣。究恐未能霑足。著傳諭長麟。察看情形。不

可以得雨釋意。如有應行調劑之處。即行酌籌妥辦。不可因該處業經得雨。稍存大意。○軍機大臣等議奏。革職總督富勒渾雅德。於已革總兵柴大紀。執法營私。已故知府孫景燧。侵貪釀變。毫無見聞。且於地方立會盜劫重案。不能及早查拏。致釀巨案。均應擬絞。監候秋後處決。從之。○是月。直隸總督劉綎奏。報保定省城得雨情形。得旨。此實深沐天恩。益深欽感。四月甘霖。十年不一遇者。又奏

現在缺雨之宣化府屬七州縣。張家口。獨石口二廳。及延慶赤城。龍門三州縣。糧價稍昂。請格外減價出糶。通省各府州所屬。亦照例平糶。得旨。自應如此。該部知道。○欽差協辦大學士陝甘總督辦理將軍事務公福康。奏福建巡撫徐嗣曾奏。臺灣向無馬兵。擬於巴圖魯侍衛及各官繳回馬匹內。酌留一百匹。交鎮臣發給馬乾。試養一年。俟督撫巡查之便。查驗具奏。在戍兵內抽撥。改設鎮標馬兵。

一百名北路協標馬兵一百名。所需馬匹。由內地各營抽調。換班時。留交接戍兵丁。下部知之。又奏。臺郡塘汛墩臺。修葺本未齊全。旋值逆匪滋事。焚燬殆盡。現將戍兵挑齊。分撥各營。暫令支架帳房。搭蓋草蓆。即行借款。按照兵數。一律興修。仍著落乾隆三十八年以後。歷任鎮道府廳縣。分別久暫。追賠歸款。報聞。山西學政鄭際唐奏。考畢歲試情形。得旨。實力為之。以正士習為要。○廣東高州鎮總兵劉秉龍奏。赴任謝恩。得旨。綠營習氣。率尚虛詐。以實整飭。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四

監修總裁官經筵講官太子太傅文淵閣大學士文淵閣領閣事領侍內大臣稽察欽奉
吏部總辦院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次
世襲騎都尉軍功加十九級隨帶加二級又加二級尋常內大臣戶部尚書領侍內大臣稽察欽奉吏部總辦院事務正黃旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆五十三年戊申五月壬戌朔日食○諭

軍機大臣曰李侍堯奏拿獲偷竊餉鞘夫役
吳欽林發審明後恭請王命即行絞決等語
所辦甚是前經降旨通諭各督撫以外省審
辦案件如實係情罪重大應決不待時者自
應照例恭請王命正法其尋常問擬斬絞之
犯即例應立決亦應俟接到部覆再行處決
以重人命又恐各督撫不權輕重過於拘泥
遇情罪重大之犯亦等候部覆辦理以致要
犯稽誅復經降旨申諭並以閩省近年來海

洋刦盜頻聞。屢經諭令該省。拏獲洋盜。無分首從。概行從重問擬。俟二三年後。該省盜風漸熄。仍照舊例。分別申請。以期辟以止辟。今閩省拏獲竊餉夫役吳欽。林發一案。照例祇應問擬絞候。該督以事關軍餉。且現值凱旋。兵差絡繹。若照例辦理。無以示懲。即請王命。將該二犯絞決。並不拘泥。為是。將此諭令知之。○癸亥。諭。此次調赴臺灣。勦賊各官兵。內四川湖南貴州等省。俱經歷數省。遠涉重洋。

曾降旨。每名賞給銀二兩。其廣東兵丁。因其本係海疆。又屬鄰省。是以未經賞給。茲詢據派往帶兵事竣。回京之大臣侍衛章京。僉稱廣東兵丁。打仗殺賊。較廣西福建最為奮勉。自當一體獎賞。用昭鼓勵。所有此次廣東派赴臺灣之官兵。著該督撫查明。除漂泊各兵。已經得賞外。其餘出征兵丁。每名各給銀二兩。以示朕獎勵戎行。有加無已之至意。○諭軍機大臣等。前因東省撥船。竟不可少。已諭

令湖南江西兩省。造撥船二百隻。送至東省安設應用。本日據巡漕御史和琳奏。衛河古淺之處較多。其自臨清以至德州。水程四百餘里。撥船二百隻。不敷應用。從前造送直隸撥船。每隻裝米三百石。喫水三尺餘寸。仍不能適行。此次新造撥船。請較定制。節減寬長。以二百隻工料。勻造三百隻。每船可裝二百石以外。緯挽既覺輕便。工價有減。無增等語。所奏甚好。撥船為遇淺起剝而設。期於迅速。

適行。原以輕便為貴。且據和琳奏。節減寬長。以二百隻之費。改造三百隻。工價仍屬相仿。是費不增而應用寬裕。自應如所奏辦理。著傳諭何裕城。浦霖。即照從前所辦撥船大尺酌量收小。勻造一面。估計具奏。一面即動項辦理。每省各造一百五十隻。於冬底春初。送至東省安設。其工料一切。仍遵前旨。著落長麟賠繳。○欽差協辦大學士陝甘總督辦理將軍事務公福康安。工部侍郎德成。福建巡

撫徐嗣曾奏臺灣改建城垣用磚既難拉運用石尤易絀墊請築土城高一丈八尺為率除南北東三面照依舊基外惟西面一帶濱海應收進一百五十餘丈共添建城樓八座西門券臺一座卡房十六座兵房八座至鳳山縣城逼近龜山之麓地勢低窪請移於十五里埤頭街地方仍用簕竹圍插其舊城基址與彰化縣西八卦山均應添設石卡一座駐兵防守得旨諸凡皆妥知道了○甲子

孝誠仁皇后忌辰遣官祭

景陵○四川總督李世傑奏川省屯練土外委四十名蒙恩各賞銀二兩查有新設者十名亦同派赴臺灣請一體賞給從之○乙丑諭軍機大臣曰長麟奏到東省續得雨澤情形一摺內稱從前望雨之厯城等五十四州縣於四月二十三、四等日甘雨優霑大田均得播種二十五、六日陰雨復作竟日大霑通省雨澤實已周遍普渥等語覽奏欣慰此次東

省續得透雨遠近均霑極為優渥其麥收分數現據長麟奏登萊兗沂等處麥收可望十分及九分有餘其濟南等屬甫經得雨之處亦已一體翻犁趕種看來東省雨水應時農田可期豐稔至直隸順德廣平大名宣化各屬前據劉裁奏四月二十三、四、五等日所得雨澤惟宣化一府可稱深透順德府得雨三寸以上至大名廣平二屬得雨三四寸至五六寸者僅止六縣其餘各州縣均止一二寸是直省順德廣平大名各屬得雨之處多寡不等尚未能一律深透又豫省河北一帶前據畢沅奏彰德懷慶衛輝各府屬於四月二十二、三等日得雨一次有八、土三、四寸者有僅止一二寸者看來河北地方雨澤亦未霑足著傳諭劉裁畢沅查明從前缺雨各屬此次續得雨澤大田可以乘時播種者或酌量借給籽種俾得上緊一律趕種至得雨未透處所如已成偏災即據實奏明量加撫卹不

可因各屬俱霑雨澤其缺雨處所無多遂不
妥為經理致令向隅仍將各該處現在民情
是否不致拮据大田可望有收之處確切查
明迅速具奏勿得稍存諱飾以慰厯注○又
諭山西大同府屬據明興沐特恩先後奏報
於四月二十二三等日普得透雨等語大同
為上年被旱之區本年春間又復缺雨茲雖
普被甘霖大田可以乘時播種但麥收恐已
歉薄糧價或不免昂貴其一切借種補種之
事尤應趕緊辦理著傳諭明興察看情形若
有應行借給口糧籽種者即一面奏聞一面
借給務使貧民口食有資趁此得雨之後乘
時播種以期有秋至該撫前奏俟秋審辦完
親赴大同各屬覆加查勘現在該處業得透
雨且經明興飭令道府前往按處確勘該撫
接奉此旨如尚未起程即可不必再往惟當
飭令該地方官妥協辦理如已起程到彼後
即親率所屬詳晰勘明實心妥辦據實具奏

以副朕勿使一夫失所至意○又諭據陳用
敷奏查繳應禁各書請予展限一摺稱抵任
後各屬先後繳到通紀編年等書三十種計
一百零七本可見歷年呈繳尚未淨盡再請
予限一年俾得率屬廣為咨訪等語此等應
禁各書節經降旨令各督撫廣為查繳並寬
予限期俾得逐細訪查不使稍有遺留今據
陳用敷奏伊到任後各屬呈繳各書已有三
十餘種安徽尚非大省應禁之書歷年猶未
能收繳淨盡江蘇江西浙江省分較大素稱
人文之藪民間書籍繁多何以近年總未據
該撫等續行查繳豈該三省於應繳之書業
已搜查淨盡抑該督撫於此等事件視為無
關緊要並不飭屬認真查辦耶著傳諭書麟
閔鶚元何裕城琅玕等各嚴飭所屬悉心查
察如應禁各書該省尚有存留之本即行解
京銷燬務宜實力查辦俾搜查淨盡毋得久
而生懈視為具文○丙寅戶部議覆山東巡

撫覺羅長麟奏。安設東省撥船事宜。江廣二省新造撥船二百隻。應分為五站。每站安設四十隻。分發附近之德州。恩縣。武城。夏津。臨清。五州縣收管。其添造一百隻。作何安設之處。令該撫酌量地方。妥辦報部。糧道駐劄德州。所有稽查彈壓。及船戶支領工食等事。應責成該道管理。如遇押運北上。即交德州帶管。南糧起剥時。應每船添雇水手三名。平時止設船戶一名。每二船水手一名。給與腰牌。添註姓名。年貌籍貫。取具地鄰甘結。造冊報部。並責令地方州縣。領運千總。各將添雇水手及剥運米數。分詳藩司糧道。隨時查覈。撥船應照直隸例。編列字號。註明山東官撥船字樣。按各營分。添派武弁稽查。船戶水手。應每日給工食銀八分。計每年需銀二萬五百二十兩。又大修小修。計需銀一千八百兩。請將山東長蘆商人原捐未解銀二十五萬兩。撥商營運。內將十九萬兩。息銀

作為工食大小修等用。其餘作本生息。為嗣後一切經費。修費應較直隸酌減。以十五兩為額。遇大修之年。令糧道估計辦理。據實報銷。如應行小修之年。次年已屆折造。即應停給。舊例每剥米一芑斗。給錢一文。應令船戶自行收領。以為油艚繩纜之用。仍令該撫飭分管州縣。於漕艘未到之先。修整齊全。糧道查驗。取具印結送部。承管各州縣。嚴飭船戶。實心經管。設有拐逃情事。著落出結之地。鄰鄉賠力。不能完者。該管官賠造。仍行議處。倘遇風水擊壞。勘明取結興修。從之。○丁卯。兩江總督書麟奏。峯山四閘引河淤墊。水勢散漫。睢寧靈璧二縣。屢被淹浸。請借支江寧藩庫閒款銀兩。督民挑浚。分作三年歸款。得旨。如所議行。○蠲免河南商邱寧陵睢州。柘城鹿邑。永城六州縣。乾隆五十二年水災額賦有差。○戊辰。開採直隸豐寧縣四道溝後官山煤窯。從總督劉綎請也。○己巳。諭

據長麟奏江蘇布政使奇豐額眷屬船隻行至臺莊丁廟地方有賊數人撥開艙門進船行竊經家人喊捕當即逃逸失去小箱一隻內貯銀三百兩并金簪腰刀等物請將嶧縣知縣沈則文叅將劉世勳千總曹統標一併革職等語沈則文劉世勳曹統標俱著革職上年直隸靜海縣地方甫有學政劉權之眷船被盜之案今奇豐額眷屬船隻又在山東臺莊地方被竊此等俱係官船而賊犯等公然上船盜竊可見內河地方盜賊肆行不一而足該地方官因係官船被劫不能隱匿是以據實稟報此外民人及商賈往來船隻遭其擾累者恐復不少而地方官平日諱匿不報自非一案何以戰奸究而安良善此案除已經盤獲賊犯二名外其餘逃逸各犯該撫務須嚴行究訊按名查拏毋任遠颺漏網並著沿河之督撫督飭地方文武上緊查拏以安行旅再有似此並將督撫治罪○兩廣總

督孫士毅廣西巡撫孫永清奏據左江道湯雄業稟稱探聞安南國先因鄭姓作亂廣南夷兵阮姓用兵恢復留夷目供靖在黎京輔佐嗣孫黎維祁阮姓自詡其功索封護國將軍兼攝王府之職供靖不允其請被阮姓殺死嗣孫畏懼出奔處北地方夷民起兵截殺等語查該國請封請印至今未到自緣內訌耽延現密飭該鎮道選派漢土官兵在於關隘卡柵豫防夷匪竄入邊境報聞○命編修吳省蘭提督湖北學政○辛未諭軍機大臣等京師自三月得雨後未經續霽甘霖農民望澤孔殷四月二十一日朕親詣黑龍潭祈禱二十三四等日仰邀昊貺渥被醴膏為十餘年來所未有之事本月初四日據勒保奏報甘省亦已普得透雨朕心深為欣慰因成詩一章福康安係陝甘總督伊現今雖在臺灣而於甘省雨水情形自必時刻在念著將勒保摺並御製詩章一併

鈔寄閱看。想福康安閱之。亦當同深慶幸也。○御製詩曰。舊臘新正。渥雪霏霏。夏初春末。好霖兼。河東西總。澍膏潤。禾早晚希。秋熟占。充裕市。鄺糧價減。蓋藏村舍。土風恬。諭馳海表。知詳悉。北顧應同喜氣添。○江西巡撫何裕城疏。報南昌豐城奉新萍鄉廣豐鄱陽大庾南康八縣乾隆五十二年開墾田地塘共十三頃九十一畝有奇。○壬申。諭據穆和蘭奏。特參吐魯番佐領關係現患目疾。呈請告假調理。隨委協領那哩驗看。該佐領二目蒙翳。不能視物。且年已衰老。難望痊愈。請旨將該佐領革職等語。關係因患目疾。告假調理。穆和蘭既委員驗看。止係年老有疾。並無別項劣蹟。應行參劾之處。祇須照例勒令休致。設其有出兵出力者。尚有賞給全俸半俸之分。何致參處耶。乃於摺內用特參字樣。此係穆和蘭不諳事理輕重。套用外省陋習。殊屬非是。著傳旨申飭。嗣後各該處將軍參贊等。如遇所

屬人員。有貽誤地方公事。舞弊犯科者。自應據實參奏。若僅係年力衰邁。患病不能供職者。照例勒令休致。不得仍用特參字樣。即各省將軍督撫等。於文武各屬內。有似此年老患病之員。亦當一體辦理。毋得率用特參字樣。欲見其辦事認真。以致措詞失當也。將此通諭中外知之。○蠲免直隸保安宣化萬全懷安西寧懷來蔚州七州縣。乾隆五十二年水災民田旗地額賦有差。○癸酉。禮部議准雲南學政汪如洋奏。稱本年錄遺。請暫用詩經文侯五經輪試。畢照舊仍用策問。其已酉鄉試。係用易經之年。科試先儘易經。壬子鄉試。係用春秋之年。科試先儘春秋。將已酉會試應用之書經。於庚戌歲試補試。庚戌會試應用之禮記。於癸丑歲試補試。從之。○甲戌。上御勤政殿聽政。○遣官祭關帝廟。○諭據翁方綱奏。向來考試經解詩賦。於每棚之始。另為一場。原無責成。廩保之

例。今於考試經解詩賦一場時。先點童生。逐名識認。然後再點生員。仍於場內隔別坐號。不使生童連在一處。並擇其經解詩賦之可觀者。加覆試一次。以防弊混等語。所辦尚屬細緻。士子平日讀書。經解詩賦。本應肄習。學政等親加考試。亦足以覘其根柢之淺深。但向來因此等考試。不比正場。未免防範稍疎。易滋弊混。今翁方綱於考試經解詩賦時。令生童分點入場。責成廩保識認。其錄取者。加

以覆試。辦理較為周密。各省學政。於考試經解詩賦。均應一體留心。照此辦理。庶可選拔真才。俾士子共敦實學。將此通諭各省學政知之。○乙亥。諭。詢問此次由臺灣回京大臣官員。俱言廣東綠營兵丁。打仗尚好。廣州滿兵好處。並未言及其不及綠營兵丁。自屬顯然。各省駐防滿兵。平日操練武藝。自當精銳。以作綠營表率。若於打仗處所。尤當奮勇向前。鼓勵綠營兵丁。今廣州滿兵。反不及該省

綠營兵丁。實屬可恥。將軍存泰。副都統博清。額著嚴加申飭。嗣後當實心訓誨駐防兵丁。操練期於精銳。再不可顛預從事。仍著通諭滿兵駐防各省將軍。副都統等。各將該管兵丁。妥為訓練。○諭。軍機大臣等。據圖薩布等奏。拏獲洋盜陳亞烏等一案。於審明後。即將該首犯陳亞烏。恭請王命正法。所辦是其首。先緝獲之典史張士煜。已批令送部引見矣。前因外省審辦案件。如係尋常。問擬斬絞之

犯。應俟接到部覆。再行處決。不得因有恭請王命之例。率行辦理。又恐各督撫不權輕重。過於拘泥。遇有情罪重大之犯。亦等候部覆。以致要犯稽誅。復經降旨申諭。現在臺灣軍務甫經告竣。而閩粵兩省。海洋劫掠頻聞。此等盜犯。尤不可不從嚴辦理。以示懲儆。今該撫等。訊明陳亞烏一犯。糾夥在洋連劫三次。情節較重。即請王命。立行正法。並不拘泥。所辦甚為得當。將此諭令知之。○以副都統銜

健銳營委署翼長烏什哈達為吉林副都統

丙子

上詣

大高殿行禮○還宮○諭軍機大臣等京城於本日寅刻復得霽雨現在綿密未止雲氣皆往西南一帶甚為濃厚直隸順德廣平大名三府及河北彰德衛輝懷慶等府屬俱在京城西南此次雨澤或者一律均霑著傳諭劉綦畢沅即查明各該府屬日內曾否得有透

雨及大田栽插情形迅速覆奏以慰厯注○以右庶子圖敏為四川鄉試正考官刑部主事胡鈞璜為副考官右庶子茅元銘為廣東鄉試正考官司業納麟寶為副考官翰林院侍讀學士平恕為廣西鄉試正考官編修溫汝适為副考官內閣侍讀張姚成為福建鄉試正考官編修蔣攸銛為副考官檢討蔡共武為湖南鄉試正考官刑部主事潘奕藻為副考官○是日起

上以夏至祭

地於

方澤齋戒三日

大清高宗法天隆運至誠先覺體元立極敷文奮武孝慈神聖純皇帝實錄卷之一千三百四

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百五

監修總裁官總纂官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務兵部黃旗滿洲都統世襲騎都尉軍功加七級隨帶加一級尋常加二級軍功紀錄一次臣廣柱

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級尋常加二級軍功紀錄三次

尋常紀錄十四次臣德麟經筵講官太子少保工部尚書紀錄六次臣曹振鏞等奉

敕修

乾隆五十三年戊申五月丁丑諭曰福建臺

灣道王右弼已經降調該處地隔重洋現在
軍務告竣地方正資整頓所有員缺未便久
懸即著與泉永道萬鍾傑調補並賞給按察
使銜臺灣道向來本係調缺該省督撫及各
官因該處出息肥饒視為利藪往往夤緣徇
情不以渡洋為苦轉以得調美缺為喜以致
吏治廢弛釀成巨案今經大加懲創之後一
切弊端悉心釐剔而調往之員仍須遠涉重
洋不得不加之體恤是以格外賞給該道按

察使銜俾有奏事之責遇有地方應辦事件

即可與該鎮具摺陳奏以資彈壓該道務須

倍加奮勉實心整頓以期綏靖海疆將來任

滿如果稱職自當加恩陞用若該道不知感

激仍以臺灣為美缺復蹈故轍則前車之鑒

不遠恐不能當其咎也萬鍾傑前因閩省臬

司渡臺即以該道署理藩司今臬司已放伊

轍布所有藩司事務著李侍堯即委伊轍布

署理萬鍾傑於接奉諭旨後即迅速渡臺前

往任事所遺興泉永道員缺著胡世銓補授

○又諭前因四川屯練降番派往臺灣勦捕

賊匪甚為出力已將額設土外委加給銀兩

而償拉促浸兩處土弁未經賞給此次該土

弁等帶領降番隨同官兵征勦均屬奮勇所

有償拉促浸額設土守備六員土千總九員

土把總十六員土外委四十六員俱著照屯

練土弁之例分別賞給錢糧以示獎勵○又

諭據福康安等奏查明無著潰兵嚴行究辦

一摺內稱潰兵陳選得等三十三名俱係衝散後在義民村莊藏匿尚無從賊情事請貸其一死仍發往伊犁充當苦差等語此等潰兵雖據訊明因道路梗塞不能投出尚無從賊情節但該兵等派出隨征於遇賊打仗時即紛紛潰散不顧主將衝散後又不即時投出轉在村莊藏匿雖與曾經從賊者情罪有間但僅發往伊犁充當苦差不足示懲著改發伊犁給兵丁為奴以昭炯戒又諭據福

康安等奏臺灣地方賭博成風屢經示禁查拏近訪聞民人許班家內約同許高等夜間私賭經派委巡查之都司額爾亨額等改裝往拏許班喊同孫嚴拒捕兇毆並用菜刀割傷額爾亨額手指當將許班一犯綁赴市曹即行正法孫嚴重枷示衆期滿發新疆給種地兵丁為奴其餘在場人犯枷號示衆等語臺灣地方民俗刁悍奸徒聚賭成風一切作奸犯科即從此起自不可不嚴行查辦現在

甫經蕩平逆匪之後將軍等帶領官兵尚在該處駐劄乃無藉棍徒公然聚賭經委員前往查拏膽敢拒捕傷官實屬藐法已極若非立寘重典何以儆兇頑而懲惡習今福康安於審明後即將許班一犯綁赴市曹即行正法所辦甚為得當至孫嚴係幫同拒捕非止在場賭博者可比僅擬發遣新疆不足示儆著福康安於接奉此旨後將孫嚴一犯即於該處絞決示衆其餘在場人犯審明後俱著發往新疆給種地兵丁為奴俾積玩奸徒咸知儆畏賭風斂戢以期綏靖地方該處鎮道向有奏事之例將來福康安起身後務須諄囑該鎮道等時刻留心查拏如有似此等案件俱著照此一面辦理一面具奏毋得仍事因循致滋玩縱欽差協辦大學士陝甘總督辦理將軍事務公福康安福建巡撫徐嗣曾奏成兵就地招募若先儘義民挑補恐其未諳軍紀不能得力且令漳泉之人占額大

半殊屬非宜前奉諭旨令將漳泉兵丁調駐各村互相稽察毋論無業游民若羅漢脚之類充補營丁勢必逃伍滋事其有眷屬身家者又不願離鄉遠駐種種未便莫若照依戍兵額缺於內地征兵內詳加挑選令其頂補分派異籍各莊防守再熟番向化日久請仿屯田之例挑募壯丁設立屯弁管束將集集埔水沙連等處荒廢埔地分撥耕種即可無庸給餉諭軍機大臣曰前因臺灣戍守兵丁向內地各營分撥前往遠涉海洋紛紛更調且義民出力者甚多是以諭令福康安等於辦理善後時察看情形或酌留一半即在臺灣募補以歸簡便原係朕厯念海疆思慮所及即行隨時指示並非謂必當如此辦理今據福康安等體察輿情若先儘義民挑補既恐未諳軍紀不能得力又恐招募漳泉之人太多請於內地征兵內詳加挑選照依戍兵額缺令其頂補自屬實在情形原不妨據實

奏明毋庸拘泥前旨辦理其熟番既可招募並請將集集埔等處空餘田地撥給番民自行耕種仿照屯田之例將壯健熟番挑作屯丁設立屯弁管束之處自應如此辦理至臺灣無藉游民不安本分武斷一方名為羅漢脚此等惡習最為可惡與四川咽喉匪犯無異現經大加懲創之後不可不實力查拏隨時嚴辦務使奸徒斂跡盡絕根株不復有此項名目方為妥善此事福康安起程後交李侍堯等嚴飭該處鎮道及地方文武官弁認真查察隨犯嚴懲以期海疆永靖毋得日久玩生致干咎戾又奏從前在水底蘆等處勒殺賊匪起衆奮勉行走之納丹保等請補賞巴圖魯號得旨三等侍衛騎都尉納丹保著賞給德濟巴圖魯號三等侍衛德色著賞給華延巴圖魯號仍照例每人賞銀一百兩又奏添設移駐文員營汛事宜一鳳山縣城現擬改建埤頭街請以下淡水巡檢移駐

舊城將阿里港縣丞移駐下淡水北路斗六門請添設縣丞一員歸嘉義縣管轄將原設巡檢移駐大武壠並請嗣後調任臺灣各該廳縣均照道府例改為五年俸滿以專責成一彰化縣城請添兵一百八十六名並於八卦山新立卡座處添設外委一員兵四十名大里杙添設外委一員兵五十名水沙連添設千總一員兵一百名在集集埔駐劄欽頂添設外委一員兵五十名內分十名在虎仔坑設塘巡哨牛罵頭添設額外外委一員兵二十名大甲溪添設外委一員兵二十五名歸蓬山汛把總兼管八里岔添設外委一員兵三十名石門添設外委一員兵三十名嘉義縣城請添兵一百二十三名改設都司一員管轄將原設守備一員添設外委一員兵一百三十名移駐斗六門並於大武壠之外霄間莊添設千總一員兵一百名內分兵二十名添設外委一員在本縣莊防守元長莊

添設外委一員兵二十名大埔林添設外委一員兵十五名西螺添設外委一員兵二十名大排竹添設外委一員兵二十名蘇荳莊添設外委一員兵三十名茂功莊添設外委一員兵二十八名鹿仔草添兵十名三坎店添兵二十名圓山汛添兵四十五名鳳山縣改建新城將弁均應移駐請添兵三十八名將鳳彈汛內撥兵一百一十六名添設千總一員在舊城龜山卡座駐守又撥兵一百名添五十名與原設守備一員把總一員在水底藁駐守並於番薯藁添設額外外委一員兵二十名再安平協水師駐兵稍多請以左營內遊擊一員千總二員把總二員外委三員額外外委三員兵三百七名戰船九隻移駐鹿仔港將原設守備一員把總一員兵一百一十五名戰船二隻移駐笨港原設笨港把總一員兵七十五名戰船二隻移駐新店海口並於右營內撥兵三十五名添駐東港

況至此項新添兵丁共一千二百名與舊設
七千八百八名均於征兵內挑補指定營分
派歸原營官管轄換防年限仍以調到臺灣
之日扣算其陣傷亡失所出內地營缺咨明
李侍堯於上年新募及換回兵內挑補將傷
殘病廢者酌減以符定額下軍機大臣議行
戊寅諭本日召見新放福建興泉永道胡
世銓據奏伊親母現年七十九歲是該員按
例應予終養但胡世銓於初次召見時經朕

詢其出身家世及地方吏治伊奏對之語歷
歷在前該員若果因親老恐邀簡用即應據
實陳明乃並未一語奏及昨臺灣道缺出朕
以該員係久任繁缺是以將伊補放並令軍
機大臣將近日臺灣地方情形亟須實力整
頓之處傳旨訓諭臺灣遠隔重洋胡世銓既
有老親即不敢面奏亦當將不便迎養之情
懇請軍機大臣代奏方合正理試思胡世銓
如果以實情陳請代奏軍機大臣豈敢不據

情入告乃彼時亦並無一字提及可見該員
本意以為若能陞任江南道員即可遂其親
老就養之私即臺灣遠隔重洋而該處素稱
美缺得邀陞擢又不免意存貪戀二者必居
一於此是以並不將親老之處據實聲明及
朕再思臺灣甫經初定恐不悉風土人情改
命興泉永道萬鍾傑而以彼補放興泉永道
乃胡世銓之意見閩省甫經辦理軍務之後
缺分平常而且僻處海疆始於召見時將親

老奏明冀圖留於本省以道員補用未免顯
有規避之見矣若果如此現在臺灣正當大
加懲創整飭吏治之時而胡世銓猶視為美
缺其居心竟屬狡詐本應即將該員撤回勒
令終養但胡世銓親老之處並未豫行陳明
若於補放有缺後因其面奏之語即准終養
轉遂其規避之術胡世銓著即赴興泉永道
新任俟滿三年後著該督撫奏明即令其回
籍終養○諭軍機大臣等據福康安等奏籌

酌臺灣換防兵丁一摺。內稱挑留戍兵。照內地營分歸整安設。如臺灣三營並城守兩營。即以督撫標。福州協陸路提標等兵丁留補。其餘南北汛地。查明附近村莊。居住何處民人。以漳泉及他府兵丁。易地駐守。並妥定章程。留交普吉保。嗣後換防。照此密辦等語。向來臺灣換班戍兵。籍隸漳泉兩處之人居多。此次逆匪滋事。亦由漳泉民人不和。以致林爽文乘間滋擾。而防守戍兵。俱因係屬同鄉。互相徇隱。此次從賊者。漳州民人雖多。但其中泉州民人亦非盡屬義民。亦有隨賊黨抗拒官兵者。現在臺灣換班兵丁。若僅在督撫標及福州協陸路提標等營兵丁內挑補。是督撫兩標充伍食糧者。當係福州民人。而陸路提督駐劄泉州。其兵丁自多係籍隸本地者。調往臺灣。仍係漳泉之人居多。恐將來日久未免勾結滋弊。若竟將漳泉兵丁。概置不調。又恐轉致猜疑。更屬不成事體。不若於福

建通省內。如興化。延平。建寧。邵武等處各營內酌量均勻派撥。而漳泉兩處兵丁。亦攤入其中。使該兵丁等。知挑補換防。無分畛域。自必不生疑怯。此係該督分內應為之事。務須行所無事。或告以離別家室。遠涉重洋。未便獨令漳泉兵丁向隅。自當均勻調撥。以歸平允之言。使之知是體恤。不生猜畏。如此不動聲色。潛移默化。庶於撫綏防範。兩有裨益。方為妥善。並令記此旨。歷任總督永遠留心。

又諭川省向有無藉棍徒。糾夥搶劫。名為嘔嚕。歷經降旨嚴拏究辦。該省奏摺。率寫嘔匪字樣。但嘔字音聲與國字相近。嗣後遇有此等案件。俱著改為嘔嚕匪犯。除交軍機大臣存記遵辦外。將此諭令李世傑知之。○己卯夏至祭地於方澤上親詣行禮。○辛圓明園。○庚辰

上以秋獮木蘭自圓明園啟鑒。諭此次巡幸木蘭駐蹕熱河所有沿途經過地方本年應徵地丁錢糧著加恩蠲免十分之三。諭軍機大臣曰王普奏酌借兵丁銀兩數目一摺已批交該部議奏矣。至豫省河北一帶缺雨處所曾否已經得沛甘霖現尚未據畢沅奏報朕心深為廕念。王普身為總兵有奏事之責且河北是其所轄該處現在得有雨澤若干及是否霑足之處該鎮自應留心訪查隨時據實奏報以慰廕注。乃本日奏到之摺僅係兵丁酌借銀兩一事而曾否續得透雨竟無一語提及伊豈不知朕於該處雨澤情形時刻繫念耶。王普著傳旨申飭。又諭據舒常姜晟奏湖北省自乾隆四十五年起至五十一二年止積壓未辦案件共六百餘件除現在勒限趕辦已完五百四十餘案外尚有五十餘案未經完結請將歷任遲誤各員分別議處等語從前特成額在湖北總督任內

數年一切事件並不留心於照例應辦之事亦不上緊辦理積壓至六百餘件之多特成額在任所司何事前經特成額獲罪朕尚加恩開以自新之路發往烏什辦事今據舒常等所奏可知伊在總督任內坐擁厚祿止求安逸全不辦事喪盡天良所有舒常等奏摺鈔寄閱看著將從前何以如此任意遲延之處據實明白回奏。是日駐蹕南石槽行宮。辛巳諭據永鐸等奏察哈爾兵丁察汗口

於買牲處所將哈薩克巴斯伯克推跌致死當將察汗口絞決外請將該管官員分別革職議處等語所辦甚是哈薩克巴斯伯克係外藩之人非內地民人可比如此辦理不但令伊衆心服兵丁等亦知所畏懼著交保寧等嗣後遇有此等事件均照此妥協辦理其哈薩克等倘有將內地民人戕傷致命者亦照此例治罪。是日駐蹕密雲縣行宮。○壬午諭本日由密雲至要亭途次天雨泥濘所

有墊道兵夫未免濡濕著加恩每名賞銀一兩以示體卹諭軍機大臣等礮礮採自山中如果開採時毫無透漏則該省民人製造花爆以及打取牲畜配用火藥又從何而來即此次賊人鎗礮內所用火藥不少豈盡由搶奪所得可見開採礮山雖派員駐劄仍不能保無透漏此事惟在該督撫等平日嚴加查察總期先於軍火無虧即或民間鋪戶之所需不能悉行禁絕亦當防其太甚至臺灣地方向產礮礮前據逆犯林爽文供稱將牆上年久石灰煎熬成硝在北路生番山裏私換礮礮配作火藥等語生番山裏既產礮礮則奸民不但可以向其私換或幫同偷採亦未可定現據福康安奏將臺灣民間私用鳥鎗繳回銷燬改鑄農器而私換礮礮及偷採之弊尤應嚴切查禁著傳諭福康安務飭該地方官嚴密稽查勿任仍前疎縱並著李侍堯徐嗣曾各於內外時刻留心查察不得日

久生懈滋弊生事○是日駐蹕要亭行宮○癸未諭曰常青於柴大紀貪黷不法一案徇隱不奏前曾降旨將伊革職交福康安審訊經福康安奏明審訊錄供令伊來京交部治罪固屬咎由自取但念常青由將軍簡用總督在任未久即值臺灣逆匪滋事非富勒渾雅德歷任年久因循貽誤諱飾袒庇者可比其到臺灣後於柴大紀種種劣蹟固易訪查但彼時正值辦理軍務匆迫其不即查叅亦屬可原且伊年逾七旬帶兵駐守郡城保護無虞其功過尚可相抵常青著加恩免其交刑部治罪俟到京後候朕酌量加恩另降諭旨朕辦理庶務一秉至公罪之輕重固視其人之自取而於功過相抵之處亦必斟酌其平不肯稍有畸輕畸重即編戶小民尚不使一夫冤抑何況封疆大吏轉不為之經意乎富勒渾雅德亦當漸服并自知悔懼也將此通諭知之○諭軍機大臣等適詢自閩回京

大臣官員據稱當林爽文攻擾臺灣時漳泉人欲為內應此必係伊同教一黨現已將林爽文莊大田生擒賊衆盡行殲滅不特臺灣安堵即漳泉匪徒當亦膽裂今固難於追究然不暗為防範苟且因循久之有如林爽文者出則又多一事矣但地方官每多捏飾遇有此等匪徒始則容隱及至發覺又不能奮勉任事必須該管上司不動聲色實心查辦庶可剷除淨盡李侍堯事務練達意見周詳

著密行傳諭該督悉心防範逐漸剷除方為妥善又諭據勒保奏派撥更換屯防官兵一摺內稱應需配帶軍裝器械如數配帶限十月內趕抵屯所以資明春耕作等語此等屯兵既係趕赴屯所耕作何以又需攜帶軍裝器械況向來既有配帶之例則從前派往各兵內自必先已帶往換回時正當將所帶軍裝器械即留於該處以備換班官兵之用方為省便若此項軍裝器械每次派換之兵

帶往並不帶回則各該處所存豈不日積日多堆貯無用而各營內轉須按數補製徒為開銷地步甚非覈實之道前此派往之兵所帶者仍復帶回而續派更換之兵又須另行帶往豈不徒糜運脚二者必居一於此殊不可解且新疆屯田之兵原為耕種派往農具在所需用軍械並無所用之歷來配帶又係何故種種不實著傳諭勒保即將屯防官兵因何需帶軍裝器械並從前帶往者是否仍

行帶回及現在緣何又需配帶之處詳晰查明據實覆奏復令軍機大臣詢之由新疆回京司員據稱軍裝器械向係兵丁自行帶往班滿復各行帶回從前辦理因循相沿本未留心兵丁換班時自應將屯所現有之軍裝器械交代備用何必隨人更換若係該兵丁等自行備帶則既屬累兵如係官為運送又徒多糜費此事雖小但歷任總督不能查明更改究為疎忽著傳諭勒保遵照另行妥辦

以省往返之勞。福康安係陝甘總督。將來回任後。似此等事件。亦應一體留心。覈實辦理。勿任因仍。擾累。將此各傳諭知之。○是日。駐蹕兩間房行宮。○甲申。

孝恭仁皇后忌辰。遣官祭。

景陵。○諭軍機大臣等。各省地方官。建立生祠。非建道干。譽即倚勢力賄求。最為陋習。必應飭禁。此次特令建立。建勲諸臣之生祠。乃因臺灣地隔重洋。民風剽悍。逆匪等糾眾滋事。

肆行不法。福康安等帶兵前往勦捕。未及三月。即已擒渠戴事。該處民人。經此一番懲創。暫知欽戰。第恐日久復忘。是以許在彼建立福康安等生祠。明示武威。使之怵目。儆心。望而生惕。此為綏靖海隅。因地制宜起見。但福康安辦理善後各事宜完竣。即須回京。且伊亦無自辦生祠之理。自應該督等承辦。何以未據李侍堯徐嗣曾奏及。著再傳諭該督等。止須遵照前旨。於臺灣郡城嘉義縣兩處。建

立生祠。至此次帶兵大臣內。惟福康安海蘭察鄂輝普爾普舒亮功績較著。職分亦大。應行入祠。祠內設立木牌。書寫伊五人官階。其餘各員威望俱輕。未便一體列入。徐嗣曾現在臺灣。此事即交與該撫妥辦。從前該省耿藩肆逆時。范承謨効忠殉節。曾飭建祠宇。非同創設。該撫可仿照辦理。○閩浙總督李侍堯奏。拏獲張破臉狗。供有廣東大埔縣人趙明德陳丕。陳棟。至福建詔安縣雲霄地方。勸令入會。現已飛咨兩廣督臣孫士毅查緝。得旨。天地會竟係起自廣東。傳至福建。張破臉狗供出之趙明德等三犯。為首先在閩傳教之人。著孫士毅即速飭屬嚴密查拏。按名務獲。勿任免脫漏網。○是日。駐蹕常山峪行宮。○乙酉。諭軍機大臣等。連日途次。雨澤頻霑。雲氣皆自西北而來。似應係山西大同一帶地方。昨據劉綎。劉允桂先後奏報。宣化等處。皆已得雨。深透大同。與宣化接壤毗連。亦必

已得有醴膏何以尚未據明興泰及該處為上年被旱之區。本年春間又復雨水缺少。雖四月下旬業經普得透雨。但現屆大田長發之時。正資渥澤。涵濡。著傳諭明興。即將大同一帶。近日曾否續得透雨。大田曾否播種齊全。並長發情形若何。迅速查明。據實覆奏。以慰廑念。尋奏大同於四月下旬得雨。催令趕種。本月十四五等日。續沛甘霖。一律種齊。長發得旨欣慰覽之。是日。駐蹕喀喇河屯行宮。

丙戌

上詣熱河

文廟行禮。是日。駐蹕避暑山莊。至八月乙巳。皆如之。戊子。諭據巴圖等奏。卓哩克圖郡王喇特納錫第控告該盟長車凌衮布一案。審明全屬虛誣。分別定擬等語。內外蒙古等僕屬供給該扎薩克物件。本屬分所應當。即扎薩克當差生計。亦賴各該僕屬供給。尚無不可。倘該盟長等妄行徵斂。任意勒索。亦

有應得之罪。今據巴圖等奏。車凌衮布並未勒索貪婪。喇特納錫第又係姻親。竟以毫無證據之事。率行妄控。殊屬非是。喇特納錫第著革去扎薩克。將花翎馬褂紫韁。全行褫去。以示懲戒。諭軍機大臣等。據陳用敷奏。徽州府屬祁門縣蛟水漲溢。南北東三門城垣。俱被衝塌。縣監倉廩亦多塌浸。並間有淹斃居民。及衝倒房屋之處。又休寧黟縣亦因上游蛟水下注。致被淹浸等語。徽州府屬祁門

各縣因蛟水陡發。居民猝不及防。以致衝倒房屋淹斃人口。情殊可憫。現在陳用敷已親往該處督率各員查勘辦理。著傳諭該撫。即詳悉查明。所有應行撫卹者。照例分別妥辦。毋使災民失所。其城垣監獄等處。實係被衝者。亦即確切估修。仍將查辦情形。據實覆奏。尋奏祁邑水災最重。當將被浸倉穀曬乾。擇極貧民人計口儘放。其未經領穀及休寧等邑貧民。折銀各散一月口糧。塌屋給與葺費。

無力挑復田畝者。酌借籽種。其城垣衙署倉監營房應行修建之處。逐一確估。分別辦理。報聞。已丑諭軍機大臣等。詢據舒常奏稱。兩淮鹽引向在湖廣行銷。每年正額七十八萬餘道。商人按引捐輸。以備應酬之用。名為匠費。近因漢口店商經理不善。任意開銷。以少報多。浮費日重。商人等不能獲利。配運不前。此次積壓之由。亦因該商等不能按額運到楚省所致。又兩淮向有融銷之例。以別省

口岸應銷之引。運至楚省行銷。商人等恃有通融。遂至正額不能運足等語。湖廣匠費陋習相沿。已非一日。乃不肖官吏。因可從中沾潤。遂至視為利藪。該管道員既向店商浮開取用。而店商等開與本商時。又復虛增銀數。以肥囊橐。層層剝削。以致商人等虧折成本。配運不前。近年鹽引積壓。即由於此。但湖廣鹽道本屬鹽政專轄。如果該鹽道經理不善。該鹽政原可具摺參奏。另請簡放。即或楚省

督撫竟有從中沾潤情事。該鹽政斷無不知之理。亦何妨據實參奏。乃歷來鹽政從無奏及此事者。外省官官相護惡習。牢不可破。屢經降旨嚴飭。現據舒常奏稱。該省匠費已全行禁革。是商人等不復有虧累情弊。已無可藉口。著傳諭全德。嗣後務飭該商等將應銷楚岸引鹽。每年依數運到。年清年款。其匠費一項。經此次禁革之後。若該省官員尚有陽奉陰違。藉端需索浮開者。亦即查明嚴參。毋得仍前瞻徇。累商缺配。積壓綱引。致干重戾。至融銷一節。如果楚省口岸暢銷。原定正額不敷售賣。固不妨以他省之引運至漢口接濟民食。乃楚省正額尚未能全數運到。轉先銷他省應行之引。以致正引積壓。向來辦理殊未妥協。此後融銷之鹽。應俟楚岸正額銷竣後。始准其銷售。如正額引鹽未經運到。即將融銷之鹽抵作正額。庶該商等不致因引可通融。借端缺配。並著傳諭全德。即遵照飭

辦。仍將從前楚省匪費名目。該鹽政因何未經查叅。緣何一任商人先儘融銷。有無弊竇之處。據實查明覆奏。○旌表守正捐軀山東蘭山縣民周臘月妻張氏。○庚寅。諭據福康安徐嗣曾奏審訊散法營私之革職總兵柴大紀及有心徇隱之道員永福分別定擬。並請將得受陋規及逢迎饋送之文武員弁。分別革職治罪各摺。已交軍機大臣會同大學士九卿法司叢議具奏矣。臺灣地隔重洋。文武各員自應各矢潔清。力圖整頓。乃不肖員弁竟敢需索陋規。廢弛營伍。甚至縱令兵丁等包賭窩娼。從中染指。以致釀成巨案。此而不嚴加懲創。何以儆官邪而靖海疆。至柴大紀身係臺灣總兵。於每次出巡時。不但令各營伍備辦供給。且折收夫價銀兩。賊私壘。國家設給養廉。於大員特加豐厚。原以備伊等因公之用。若巡閱營伍時。仍須該管弁兵代辦夫馬飲食一切。則內地之督撫學政提

鎮。於出巡按試時。途次夫馬等項。亦必令地方官代為置辦。又安用優給養廉為耶。嗣後督撫提鎮及學政等。凡遇巡查出考。途次所需夫馬等項。均著自行備用。毋得令經過各員代辦。並令文武互相糾察。如有仍前需索擾累者。即各行據實叅奏。從重治罪。如或徇隱不奏。別經發覺。朕亦必將徇隱之員。一併治罪。決不姑貸。勿謂朕不教不誡也。將此通諭知之。○又諭曰。已延三奏。據署興安府知

府之同知嵇光。拏獲包捐監生偽造印信之王念修。定擬斬候一摺。已批交該部議奏。並令將署知府嵇光送部引見矣。從前甘肅報捐監生。因王亶望通同屬員舞弊營私。致多事棍徒乘機代攬。遂有包捐情弊。今皆係在部報捐貢監。豈得復有代為包辦名目。貢監為士子進身之階。必得身家清白。方准廁列衣冠。該生等如有志向上。自應親身赴部。呈明履歷。候批准報捐。方為正理。若該生等因

道遠盤費不貲不能親身到部即可毋庸報捐國家帑藏充盈又豈藉伊等些微捐項為耶嗣後如有在部具呈請捐貢監者該部應驗明年貌實係親身赴部身家清白之人始准報捐若本人並未赴部倩人代捐者概行飭禁以杜匪徒誑騙包攬情弊其有在部具呈報捐職銜者亦著照此辦理著為令○諭軍機大臣曰徐嗣曾係本省巡撫在任有年武職營伍尚可委之總督而文職內有收受陋規營私貪黷等弊即應隨時查訪據實參奏非如福康安係特旨簡派發往臺灣專辦勦捕逆匪者可比總督李侍堯到任未久隨駐劄廈門料理一切軍務未暇查辦及此魁麟亦係新任將軍徐嗣曾皆非其比乃徐嗣曾竟若忘其自為巡撫置身局外耶其於楊廷理收受陋規之事平日既漫無覺察不行查叅經福康安徽底查奏又復覲顏一同列銜而摺內竟無一語引咎之處殊不可解著徐

嗣曾將因何不早行參奏及會銜具奏又不引咎之處明白回奏○欽差協辦大學士陝甘總督辦理將軍事務公福康安奏熟番募補屯丁事宜一全郡熟番九十三社約可挑壯丁四千名請分為大屯四處每屯安設四百人小屯八處每屯安設三百人作為額缺即令在本社防守戶小之社或數村歸併或附入大社其立屯之地應酌量地勢按照番社多寡與營汛官兵聲息聯絡一屯弁照四川屯練之例南北兩路額設屯千總二員統領番衆屯把總四員分管各屯每屯設屯外委一員即在番社頭目內擇其曾經出力及素所信服者由總兵揀選充補詳明督撫給與劄付報部存案一番界內山現有未墾及入官埔地八千八百餘甲請將屯丁每名撥給二甲外委每員三甲把總每員五甲千總每員十甲自行墾種免其納賦一埔地民番界址混淆現在丈出已墾一萬一千二百

甲內民買番地。業經抽有番租。請照同安縣下沙科則。按畝納銀。免其輸粟。其集集埔虎仔坑三鄉。瑯嶠等處。民人私墾尤多。亦准一例升科。自此次清查後。立石定界。永禁偷越。一屯丁習用器械。應呈報總兵。逐加印烙。於每年巡查時。點驗一次。番民既挑補兵丁。應將一切徭役。概免承應。下軍機大臣議行。○是月。浙江巡撫覺羅琅玕奏。本年三月間。海塘東自尖山汎起。至廿里亭止。新漲陰沙

一段。計長三千五百餘丈。隄根極資保護。得旨。是好機會。可望南坍北漲矣。又奏。遂安淳安西安。開化四縣。因山水陡發。田廬被淹。現已賑卹口糧房費。又借籽種。督令及時補種。得旨。善為撫卹。俾受實惠。勉之。○欽差協辦大學士陝甘總督辦理將軍事務公福康安。福建巡撫徐嗣曾奏。臺灣難民內。有斃獨殘疾及極貧者。查明大口共十四萬一千九百六十八口。小口共八萬六千九百七十二口。

展賑一月。口糧並給銀。苦蓋草蓆共九萬八千五十間。得旨。覽奏俱悉。所全活難民不少矣。又奏南北兩路。投出餘匪甚多。除陳泮一犯。仍解京審辦外。酌將出力者。解赴內地安插。餘俱發遣他省。下部知之。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百五

大清高宗法天隆運至誠先覺體元立極敷文奮武孝慈神聖純皇帝實錄卷之一千三百六

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事務處總辦

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次謹校

總裁官經筵講官太子太傅文華殿大學士文淵閣領事稽察欽奉 上諭事務處管理刑部戶部二庫事務

世襲騎都尉軍功加十九級隨帶加二級又加二級尋常加二級軍功紀錄五次臣等謹纂

尋常紀錄十四次臣等謹纂

數修

乾隆五十三年戊申六月壬辰朔諭軍機大

臣等向來南糧抵通有准賣餘米之例但上年聞旗丁等有藉端影射短交偷賣等弊亦不可不留心查禁著傳諭綿恩即多派番役人等不時嚴密稽查毋許旗丁等因有准賣餘米之例藉端短交偷賣官米如果查有影射情弊立即嚴拏從重辦理 四川總督李世傑疏報營山蒲江二縣補首墾地三十八畝有奇○以故雲南廣通縣回澄關土官楊怡子廷柱襲職○旌表守正捐軀河南通許

縣武生王鶴齡妻劉氏○癸巳諭據德保等奏閱看貢監考試卷共五百零八卷擬取八十一卷等語此次考職貢監比上屆四百七十六卷雖多三十餘人而上屆僅取六十八卷覈計每七卷內取中一卷若照此額數錄取止應取七十二名何以多取九卷殊屬有心干譽此皆德保選悞無能一味沽名市惠以致較前溢額考職係三年一舉似此每次加增其將何所底止耶除現在已取之八

十一卷免其裁汰外嗣後不得援以為例德保李綬吉夢熊並著交部察議○又諭據長麟奏拏獲嶧縣地方偷盜布政使奇豐額眷屬船隻之首夥各犯嚴審定擬一摺已批交軍機大臣會同行在法司覈擬速奏矣又據另摺奏嚴訊獲犯李三即李四據供上年六月曾糾約拉緯為生之王振江等在直隸靜海縣行劫學政劉權之眷屬船隻旋據委員等將王振江拏獲解省審訊並分咨查辦等

語前因內河地方盜賊等膽敢公然偷刦行旅並官員之船遭其擾累者不少曾降旨令沿河督撫嚴飭地方文武員弁上緊緝拏以安行旅茲據東省將兩案盜犯盤獲訊據各該犯供稱向在運河上拉緯有時在船上順便偷竊等語東省所辦尚屬認真沿河緯夫最易滋事當白晝人多之際即受雇拉緯一過黃夜無人時即乘機攫竊甚至如李三等之糾集眾匪搶刦官員之船肆行無忌甚為

可惡經朕降旨嚴緝東省即拏獲多人可見沿河員弁平時既不嚴密稽查迨有盜賊之案又不認真緝捕以致竊刦頻聞著再傳諭該督撫務嚴飭各員弁多派兵役於沿河一帶梭織巡查所有緯夫人等並嚴加管束毋許仍前滋事以輯奸徒而靖地方至李三即李四等屢行盜刦官員之船情節重大此等人犯一經審明即應正法若因其有應行質訊之處暫行監禁轉致要犯稽誅況該犯等

自知罪在不赦往往供出別案希冀行查待質得以苟延時日或致別滋事端更屬不成事體其情有可原之楊五各犯該撫雖屬照例辦理但沿河地方緯夫衆多若將該犯等僅擬外遣轉無以示懲即覈其情罪不至於死亦應於犯事處所永遠枷號俾往來人等觸目警心共知畏懼方為妥協著軍機大臣等遵照另行覈擬速奏至嶧縣知縣沈則文前經革職留緝今既將案犯拏獲並究出靜

海縣盜案尚為奮勉著即予開復仍令該撫出具考語送部引見其原任天津鎮總兵托賓泰天津道玉成於所屬盜犯日久未能拏獲即留於該處協緝亦不能得力托賓泰玉成均著革職令其各回本旗當差不與錢糧現任天津鎮總兵強都天津道慶章雖劉權之眷船被刦一案非伊二人任內之事但到任接緝已久不能迅速獲犯轉被鄰省拏獲究屬督緝不力強都慶章俱著交部議處○

又諭本日長麟奏拏獲盜竊學政劉權之布政使奇豐額眷屬船隻各犯審訊定擬二摺摺內均有官船字樣措辭殊為失當各省銅鉛鹽漕等船及織造採辦送京物件等項載運官物船隻始可謂之官船其官員暨眷口雇坐之船止應稱為官員之船何得輒稱官船似此任意繕寫設無識之徒見而妄議官船在途竟被盜賊搶竊尚復成何事體此由該撫具奏時未經留心檢點所致已用硃筆

代為改正著傳諭各督撫此後凡遇官員乘坐之船概毋許復稱官船字樣祇可稱官員之船方今承平日久綱紀肅清百姓尚知畏法從無剽竊官物之事而刑部律例內於偷竊官物者向未立有專條恐愚民無知日久罹於法網即官員有管轄民人之責其船內裝載物件亦必較齊民為優如被盜竊時僅與平民一例辦理亦不足以示區別嗣後除盜竊民人之物者仍照舊分別定擬外若盜

竊官員財物者應較民人量加區別至於盜竊官物者更應從重辦理其如何分別盜竊之首從及在官並官員民人三等輕重定擬之處著刑部另行悉心妥議酌定條款具奏又諭據富綱等奏上年威遠廳解審搶奪滿貫案內發回絞候人犯那木帕一名脫逃當將僉差長解官同知書圖添差護解官知縣涂煥革職留於地方協緝現屆限滿未獲請交部治罪等語那木帕係搶奪滿貫應擬

絞候之犯該員等前因僉差不慎以致在途脫逃及革職留緝已及一年僅拏獲在逃之夥犯扎敦利等而於那木帕仍未能依限拏獲若因一年限滿即將書圖涂煥交部照例治罪是正犯尚未弋獲而該員等轉得脫身事外尚不足以示懲自應仍留該處協緝俟正犯拏獲後再行聲明請旨著交部遵照妥議具奏尋奏監禁凌遲斬絞立決重犯越獄脫逃者將原叅有獄管獄官改為協緝十年

其解審中途脫逃者。將長解護解官。俱改為協緝五年。限滿不獲。審係解役受賄故縱。協緝各官發往軍臺効力。如係偶致疎縱。協緝各官擬杖一百。徒三年。從之。○甲午。諭軍機大臣等。從前平定伊犁。回部大小金川。皆於太學立碑。以示武功。臺灣不過亂民聚眾。海島一隅。雖不值刊碑太學。而此次辦理迅速。首夥生擒。亦不可無紀實之作。朕現在駐蹕熱河。欲將此次平定臺灣事蹟。御製碑文。於

熱河

文廟大成門廡內。嵌石刻。俾振武數文。盛軌永昭。上塞侯碑文。製就。當一併發與福康安等在臺灣廈門等處。配建碑亭勒石。所有前次發去之紀事文二篇。著福康安等暫緩鐫刻。俟此次御製碑文發往後。一同敬謹摹勒。庶規模大尺。咸歸畫一。足以壯觀瞻而垂久遠。○又諭據畢沅奏訪獲八卦會內學習震卦教之周明韓大儒等犯。現在徹底究辦。

等語。所辦尚好。周明等學習邪教。係大名縣車網集人劉彥傳授。又經該撫究出教師二人。一名劉通。係山東曹縣桃源村人。一名劉臣。係直隸開州文柳集人。看來八卦會匪。總在直省大名一帶及東省之朝城館陶單縣冠縣豫省之歸德等處聚集。段文經劉勤至今未獲。安知不仍在邪教黨羽家內藏匿。著傳諭畢沅。即將現獲之周明等犯。切實根究。一得段文經等蹤跡。即一面奏聞。一面飛速

查拏。其大名館陶歸德等處。仍著該督撫等嚴飭所屬一體留心購線。躡緝。不可日久生懈。所有周明供出之劉彥劉通各犯。並著劉我長麟飭屬嚴拏。務獲迅速辦理。○軍機大臣議奏淮南綱鹽積壓至一百三十六萬一千餘引。請將歷任鹽政。按照在任年分。罰繳養廉。得旨。淮南綱引積年遞壓至一百餘萬之多。歷任鹽政因循貽誤。僅按各任年分。每年罰繳養廉。則積壓多者所罰轉少。不足以

昭平允自應按照各任內積壓綱引數目每十萬引以上者罰繳養廉一年庶可以懲既往而警將來至各運使護理鹽政雖為日無多但運使本任即有專辦鹽課之責亦應一體示罰所有歷任運使任內積壓綱引著軍機大臣行知全德查明所壓數目俟覆到日亦按照每十萬引以上者罰繳養廉一年以示懲儆○乙未諭軍機大臣等昨因畢沅奏拏獲震卦邪教人犯周明等究出該犯學習

邪教時傳自直隸大名縣人劉彥是大名一帶竟為邪教之藪恐段文經劉勤仍在同教家內藏匿當傳諭劉我等飭屬嚴緝本日據劉我奏接准畢沅咨會已委臬司富尼善馳往密拏並根究段文經實在蹤跡等語外省惡習於緝捕人犯日久未獲雖得線索又恐獲犯到案究出在彼地方容留藏匿致干處分往往心存迴護不肯認真根緝龍舜琴係特調大名道段文經等聚眾戕官非其任內

之事但該道到任已將兩年既未能拏獲要犯而於傳授邪教之劉彥等又未經查出該道久於外任或不免沾染猾吏習氣懼得處分存化大為小之見希圖消弭亦未可定富尼善由熱河道陞任臬司此案本與伊無涉且伊係特簡之員無所用其迴護著傳諭該臬司即將劉彥等按名拏獲嚴究段文經等實在下落迅速緝拏並於大名一帶多派幹役密行躡緝或可得有線索跟蹤捕獲俾要

犯不至日久稽誅而餘黨不至復留萌孽將此諭令知之○丙申諭曰富綱奏接據順天府全保等稟四月二十日有緬甸孟頤遣大頭目業渺瑞洞細哈覺控委盧撒亞三名恭齋金葉表文及金塔寶石馴象等項齋至江邊懇求進貢并稱老官屯一路山高瘴大象隻難行故從木邦前來等情查孟頤差遣頭目具表納款雖情詞恭順誠懇但緬性多疑此來虛實不可不詳慎辦理隨差副將定住

馳往察看經該協將譯出表文及驗明貢物錄報前來似屬可信。現飛飭該副將會同順寧府等點驗明白。先行帶至順寧地方安頓。臣即日親赴該處料理一切。俟奉到諭旨。即派大員伴送進京。又據另片奏稱。因該頭目等此次未帶楊重英同來。向其根究。現經該頭目等遣人回國。能否即行送出楊重英。尚難遽信。等語。富綱此奏。竟不曉事。用心於無用之地。緬甸僻在荒服。我國家帑藏豐盈。威稜遠播。朕之所以停止進剿者。並非因兵力不足。特以該處水土惡劣。地多瘴癘。派往官兵等往往染病身歿。出征將士若臨陣退縮。不肯効命。自當重治其罪。乃因不耐烟瘴。染病且有身故者。殊堪憫惻。朕之罷兵。以此。又值該國畏懼懇求。朕體

上天好生之德。遂諭令撤兵。自撤兵後。十餘年來。邊境相安。且惜駁與伊子贅角牙。相繼作孽。自外生成。俱已身遭夷滅。孟隕本在緬寺。

為僧前此之事。與伊無涉。今因該國無主。眾頭目等推舉掌管國事。差遣頭目齎表納款。閱其表文。情辭甚為恭順。誠懇。此係好事。將來該頭目等到時。朕方欲重加賞賚。富綱接據稟報。自應一面具奏。一面即遣員護送來京。乃始則疑其狡詐。派員前往察看虛實。已屬過慮。繼復以無關緊要之楊重英。向其根究。尤屬糊塗。不曉事體。楊重英不過監司職分。並非大員。況伊至緬甸。亦係用兵時為之

裹去。與叛而逃往者不同。臨陣對敵。彼此裹掠。人口事所常有。從前征剿緬甸之時。兵弁被裹者亦復不少。豈能一一向其根究。索取耶。總之督撫等養尊處優。胸無主見。遇事畏葸。不前。而見恭敬可欺。負者。即又傲睨自大。多方刁蹬。設緬夷等因該督向其盤詰。心生疑畏。豈不負其向化之誠。試思緬夷若果倔強不服。以富綱之才。豈能使之畏威懷德。遽可平定安集耶。朕前已屢經訓飭。富綱何

仍不曉事。若此著傳旨嚴行申飭。並著傳諭該督接奉此旨。即一面遴派妥員護送該頭目等迅速前來。行在呈進表物。如能於萬壽以前趕到熱河固好。若計算日期。八月初旬前後不能趕到。即於出哨前趕到熱河祇候。維時蒙古諸王公皆扈蹕山莊。俾遠國貢使同入筵宴瞻覲。尤為盛事。其所進象隻。若沿途累重難行。不妨另委妥員按程護送至京。以免遲滯。惟須飭令派出之員帶同大頭目等親齎表文貢物。趲緊行走。如期趕赴。勿誤為要。至根究楊重英一節。富綱所辦實屬大錯。並著該督即傳知該頭目等。以此事係伊辦理錯誤。前已具摺奏聞。今大皇帝旨到。將伊嚴行申飭。所有該國懇請進貢業經具奏。荷蒙大皇帝加恩允准。即令該頭目等起程進京。如此旨到時。其續派回國之小頭目。已經帶同楊重英到滇。即另委妥員解京。如此旨到日。楊重英尚無送出之信。並著該督傳

知該頭目等。令其遣一小頭目速回該國。告知該國長。以楊重英職分甚小。又係無足重輕之人。從前不過被伊國裹去者。此次送出與否。均無關緊要。況楊重英在該國居住多年。亦無顏再回。竟不必復行送出之語。剴切曉諭使之不生疑畏。方為妥善。仍一面先送該頭目等速來。行在不必等候此信。將此傳諭知之。○丁酉諭曰。福康安等奏清查臺灣積弊酌籌善後事宜一摺。已令大學士九卿議奏矣。內稱向來臺灣各營自總兵至守備衙門皆有兵丁聽候差遣。分為旗牌伴當。內丁管班四項名目。各有目兵管領。總兵署內多至三百人。副將以至守備依次遞減。至少亦有三十餘人。請嗣後將四項名目全行禁革。各署內酌留該班兵丁輪流親自上班等語。額設兵丁原以備差操防守之用。乃臺灣鎮將各署內竟設有旗牌伴當等四項名目。管領額兵總兵署內至有三百餘人之多。以

致各該兵丁分班輪值其餘俱在外自謀生理甚至有掛名在內貼錢包差代班差操等弊實屬不成事體不可不嚴加禁革披閱之下殊為駭異但臺灣既有此等情弊恐別省提鎮將弁各署亦有似此者著各省督撫即行詳悉嚴查毋許各提鎮將弁設立旗牌等名目私令所轄兵丁在署差用設或署中需人差遣原不妨酌留數人聽用如有仍前設立名目任意役使兵丁至如許之多者即將

該提鎮將弁嚴叅治罪務令額兵一體照常操演毋許藉端曠伍致滋他弊至臺灣鎮道各員恃有重洋間阻督撫耳目難周無不通同徇隱尤為惡習前已降旨令將軍督撫提督大員分年巡察第恐日久因循不能認真整飭嗣後該將軍等於每年輪往查察即將鎮將及道府廳縣各員通行查覈出具考語具奏其備弁佐雜各員應行考察咨部者亦一體留心查覈一面報部一面據實具奏務

宜實力整頓秉公辦理毋使稍有徇隱袒庇情事倘在臺各員有貪縱殃民款蹟別經發覺即將未經叅劾之人從重治罪再臺灣遠在海外如遇有緊要案件該處道員雖原准與總兵會銜具奏但鎮道本不相統轄若必待會銜易啟扶同瞻徇之弊且海洋風信靡常往來商辦動稽時日亦多未便前將萬鍾傑補放臺灣道時特令加按察使銜原欲令該員遇有應奏事宜得以自行陳奏嗣後凡

遇有補放臺灣道員者俱著加按察使銜俾得自行奏事該道膺茲重任倍當激發天良盡心辦理實力整頓方為不負任使○又諭據福康安等查奏臺灣地方各官平日官聲及被害情形分別請旨一摺內除孫景燧劉亨基董啟璥唐鑑程峻等聲名狼籍玩縱廢弛業經降旨停給卹典其聲名尚好並無劣蹟之長唐湯大奎王雋三員亦早經降旨交部議卹外所有縣丞周大綸陳聖傳教諭葉

夢苓訓導陳龍池巡檢渠永澤張芝馨典史馮啟宗鍾燕超史謙平時尚皆循分供職及賊匪滋事又能以身殉難殊堪憫惻俱著交部照例議卹以示獎勵又據福康安等另摺奏稱淡水廳幕友壽同春年已七十餘歲當同知程峻被害時招集義民恢復整城擒獲賊目四名深入賊莊及被擒後百方勸誘以罵賊不屈為賊支解又監生李喬基當林爽文倡亂時首先倡義捐貲招募民番分撥義勇協守海口殺賊甚多迨被擒迫降不屈磔死又劉亨基之女滿姑當劉亨基被害時奔投屋後水池痛罵賊匪被遭殺害等語壽同春李喬基俱著賞給知縣職銜並著該督撫等查明伊二人子嗣內可以造就者送部引見候朕酌量加恩劉亨基之女滿姑雖伊父居官玩縱以致釀成事端而其女抗節捐軀亦不忍令其淹沒著交該部照例旌表並入該處烈女祠以昭褒獎忠節不遺微末之意

又諭臺灣軍營出力人員歷經降旨令福康安查明交部議叙茲據奏軍營出力之侍衛章京官員將弁等現經秉公查覈分別等第造冊咨部其應行議卹之官弁兵丁等亦一併造冊送部等語著該部即照福康安咨到各冊詳加覈對除業經給予議叙卹典者毋庸再行議給外其餘俱著照福康安冊內所開照例議叙議卹又據福康安另片奏稱賊匪滋擾嘉義時教諭江浩巡檢吳元典史李爾和等俱各遇賊守禦身受重傷等語江浩吳元李爾和亦著該部一體照例議叙以示獎勵○諭軍機大臣等昨因富綱奏緬甸遣使齎表進貢納款一摺另片奏稱該頭目等遣人回國未稔能否送出楊重英等語朕反覆思之該督此奏實屬錯誤該國長既已悔罪投誠齎表納款此係好事何所用其猜疑而楊重英又何足重輕乃復向其根究設該國長見該督因其未經送出差人回國索

取心懷疑畏殊覺阻其向化之心富綱飭令該頭目等遣人回國目下諒早已起程如此旨到時該國已將楊重英送出亦屬好事若尚無送出之信即著該督遵照昨降諭旨剴切傳知使該國長不致心生疑畏方為妥善至此次緬甸遣來之大頭目雖止有三名而此外小頭目及跟役人等亦尚有百餘人該督不可以大頭目係緊要之人伴送來京其餘人等即留於滇省該國遣來之人計其留看行李一半其來者一半亦不過五十餘名沿途派員護送有何不可使之同赴行在瞻仰中國富庶伊等回國轉相傳述必更畏威懷德益足以堅其効順之誠至貢使等若能於萬壽前到來固好但思順寧距熱河已及萬里即以每日一百五十里覈算行走亦須七十餘日八月初間必不能趕到況沿途過於催趲設大小頭目中有一不耐勞頓致形疲乏者亦非體恤懷柔之道著傳諭該督飭令

伴送之員妥為照料竟於九月初旬趕到熱河維時蒙古諸王公皆扈蹕山莊使之同入筵宴瞻覲尤為盛事或即令其趕進木蘭俾觀秋獮鉅典共知天朝騎射嫺熟益仰武威亦無不可將此諭令知之欽差協辦大學士陝甘總督辦理將軍事務公福康安奏入官叛產遵旨撥給戍兵但戍兵有操防之責往返更替不能自行耕種應將查出地畝交地方官經理收租會同營員散給請每名先借銀二兩撥產後徵收歸款得旨如所議行該部知道又奏內山生番咸知慕義因遣熟悉番情之人前往曉諭酌令頭目數人於秋涼後撫臣派員帶領入京瞻覲得旨好知道了又奏臣於五月初九日由鹿耳門登舟途經黑水洋風浪大作幸船檣安穩行途甚速十四日已抵廈門其巴圖魯侍衛及隨征官員亦俱陸續登岸得旨海洋風信靡常五月間向已多風福康安此次凱旋內渡雖遇風

浪即獲安穩。行程順速。其餘已圖魯侍衛人等俱陸續登岸。朕心甚為欣慰。著賞給玉如意大小荷包。以示優眷。○戊戌。諭軍機大臣等。據浦霖奏。激浦縣因五月十七八兩日連得大雨。縣治城垣久圯。因非衝途。列入緩修。是以水勢直注入城。衙署倉廩監獄俱被淹浸。現即起程馳赴該處督率勘辦等語。激浦縣治被淹。雖因城垣傾圯。尚未興修。不足抵禦水勢。但該縣衙署地處稍高。尚浸水大餘。可見此次淹浸。究由地勢卑下之故。該處城垣既經久圯。此次復被水衝。基址亦必不能仍舊。自須另行修建。將來修建時。何不相度一高阜之處。遷移建立。俾資捍衛。永免水患。豈不妥善。浦霖業經親赴該處。著傳諭該撫。即詳悉履勘。是否有處可以遷移。繪圖具奏。其被淹居民田廬。並著逐一查勘。加意撫卹。勿致災黎失所。尋奏。勘得激浦縣治濱臨激江。下連辰河。依山面水。形勢迫窄。因連日大

雨。山水驟發。田廬多被淹浸。詢之鄉民等云。此百餘年未有之事。該縣城垣久圯。向籍居民捍衛。無庸遽議興修。至被水災。民除淹斃人口。倒塌房屋業已分別撫卹外。請將應完錢糧。緩至次年秋後徵收。得旨。如所議行。○錢糧。免安徽鳳陽潁州泗州宿州四府州衛。乾隆五十二年水災額賦有差。○庚子。諭軍機大臣等。據長麟奏。山東省自乾隆三十五年。起至四十五年止。民借未完常平倉穀。及南米社穀。共有十九萬餘石。皆由從前承借各州縣。並不按限催納。年久人亡戶改。其中實欠在民固多。亦難保無書役社長人等影射侵漁情弊。現在徹底清釐。所有四十五年未完各穀。分別著落承借之州縣書役等賠繳。四十六年以後未完各穀。仍分別緩徵帶徵等語。各省倉穀春借秋還。例有定限。且四十五年以前。東省歲慶屢豐。所有出借穀石。尤應按限徵還。年清年款。乃未完民欠倉穀。竟

不下二十萬石之多。此皆明興在任時。因循貽誤。並不實力查催。一任官吏等懸宕所致。今長麟到任甫及年餘。即設法清釐。分別追賠。辦理井井有條。俾倉儲皆歸有著。明興從前所辦何事。著將長麟奏摺鈔寄閱看。明興前在東省。諸事廢弛。以致積欠纍纍。其咎已無可辭。今不即治其罪。且因勒保前往甘肅。又令其署理山西巡撫。晉省倉庫。從未聞有絲毫虧缺。若明興暫署。又將完全省分。致令

如東省之到處虧欠。則是罪上加罪。斷難再邀寬宥。恐該撫不能當此重戾也。將此諭令知之。○以廣東黃岡協副將張朝龍為閩粵南澳鎮總兵。○辛丑諭。據毓奇奏豫省起運漕船。因衛河水淺。起撥稽滯。所有行月糧石交補正供外。不能再有餘米交倉。請將豫省十幫。到通應交三升八合餘米。緩至下運。分作兩年帶交。並東省漕船稽遲亦久。請飭交倉場侍郎查明。如有疲累之幫。將應交餘米。

一體緩納。以紓丁力等語。各省漕船到通後。例有餘米交倉。近年以來。屢經該督奏請緩交。因其為恤丁起見。是以准行。但此等旗丁既屬疲乏。即使准其將餘米分年帶徵。而年復一年。自必更形拮据。豈能按限交納。除前此緩交餘米。仍令按年帶交外。至此次河南漕船行走遲滯。皆因河水淺阻。守候耽延。而該管各官於簽丁時。既未能慎加遴選。及開兌後。又不能督飭催趲。以致稽遲時日。丁力

疲乏。不能交納。所有本年兌運豫省米石各幫。船應交餘米。竟免其交納。著落總漕巡撫糧道及府州縣衛等賠交。其東省各幫。有無似此疲丁不能交納餘米。應行寬免著賠之處。並著倉場侍郎就近查明。照此辦理。據實具奏。尋奏東省糧艘雖遇河道淺阻。旗丁不至疲累。應無庸免交餘米。報聞。○壬寅諭。近年各省漕船。丁力多有疲乏。自由發派時不能慎加選擇所致。此項衛丁雖俱係總漕及

糧道衙門管轄但總漕統轄七省漕務駐劄淮安辦理簽盤事宜每年不過於尾幫押運北上其所轄各省相離遙遠於一切簽丁等事既鞭長莫及而各省糧道雖屬總漕兼轄歷年以來從未見有總漕特參糧道之事各處運丁竟由糧道於該州縣衛隨意簽派不能加意遴選以致各幫丁力多形疲乏殊非慎重漕運之道嗣後江以南各省運丁竟當專交總漕會同地方官慎選簽派江以北各省運丁即交該督撫慎選簽派以專責成不得仍前將疲乏之丁湊數充補至各省糧道每年押運抵淮後不過於各糧道中輪派一員押幫前進漕艘為數較多一人耳目難周照料難期妥協亦宜何省糧船即令該糧道押送抵通於轉運更為有益其如何酌定章程著大學士九卿會同該部妥議具奏尋奏山東河南江南浙江四省應令該糧道一體押運抵通惟江西湖南湖北三省程途較遠

兼係尾幫往返需時恐誤新漕兌運應令該糧道押抵臨清交山東糧道就近催趲從之諭軍機大臣等據姜晟奏宜昌府屬之長陽縣於五月二十一二等日大雨如注山水陡發平地水高八九尺至丈餘不等城牆倒塌縣監倉穀亦俱衝汕浸濕并有坍塌衙署民房及淹斃人口之處現飭藩司陳淮前往勘辦等語湖北長陽縣因驟雨水發宣洩不及以致漫溢城牆衝汕官民房屋并損傷人口情殊可憫自應亟為撫卹該撫業經派委藩司親往查勘著傳諭該撫即飭令詳悉查明有應行撫卹之處照例分別妥辦毋使災民失所其城牆衙署監獄倉廩實係被衝者亦即確勘酌修勿任牽冒又諭據管幹珍和琳奏運河閘內水勢足資浮送有柯藩駐劄臺莊催趲不致貽誤現在臨清至德州按站起剝必須來往督催是以和琳仍在臨清一帶會同管幹珍上下分投率同各員弁將

已經出閘各幫船酌量撥運並添緯飛趨北
行等語運河閘內水勢既足資浮送且有柯
藩在彼催趨現在臨清以北河道尚有淺阻
和琳自應舍南而北會同管幹珍於臨清德
州一帶往來督催所奏甚是至臨清以北長
河專恃衛河源頭水旺方資浮送而衛河每
年又賴漳水發生會注濟運現經管幹珍等
親往查看衛河止係涓涓細流漳河流更細
澀本年豫省河北一帶未得透雨衛河水勢
自不免微弱至清漳發源山西平定州之樂
平縣濁漳發源潞安府之長子縣前據明興
先後奏報通省續得雨澤若平定潞安所屬
普被甘霖則漳流自當旺盛何以管幹珍等
親往查看漳流較之衛河更形細澀是明興
前奏恐有諱飾更不足信抑係泉源堵塞及
中途或有旁洩所致目下漕船聯檣北上該
處河道尤關緊要畢沅現在彰德距衛輝甚
近著即親赴衛河發源處所大加疏濬其漳

河旁流有應堵閘者即飭令堵閉以期漳衛
全行北注其漳河發源處所著明興即速親
赴該處詳晰查看多方疏導勿任淤墊旁洩
使下游多一分之水即軍丁受一分之益不
可復行迴護諱飾自取咎戾至此次糧船淺
阻總在臨清至天津一帶河道綿長共九百
餘里恐管幹珍和琳二人尚有照料不到之
處著傳諭劉我即起程馳赴天津一帶酌量
水勢或多調撥船輪番起運或添雇緯夫迅
速挽行方為妥善至管幹珍等奏汶水自五
月中旬後亦形消落僅足浮送閘內船隻不
能濟衛河之不足等語汶水向來兼資南北
茲既形消落無怪臨清以北河道益覺淺澀
其病蓋在於此日內已入初伏大雨時行熱
河初八初九兩日連得霪雨雲氣寬廣畿南
豫東一帶自必一律普霑但恐各泉渠或有
淤塞雨後不能即時下達著蘭第錫長麟即
飭管河各員分投搜查多方導引使泉流盡

歸閩河。俾資接濟為要。各督撫等務宜實力妥辦。俾幫船暢行。如期抵通。以期無誤。正供將此各傳諭知之。○以刑部員外郎王士綦為江蘇按察使。○旌表守正捐軀山東費縣民商文妻陳氏。德平縣民王深妻劉氏。○癸卯諭軍機大臣等。前因臺灣兵丁籍隸漳泉者居多。令於分班輪換時。將漳泉兵丁分駐防守。以便彼此互相糾察。而他府之兵。與之錯處。於撫綏防範。俱有裨益。嗣據福康安奏已於挑補班兵時。通盤佈置。令漳泉及他府兵丁易地駐守。並妥定章程。交普吉保照此密辦。又據福康安等奏。新添戍兵一千二百名。於內地督提二標。及福寧。海壇。汀州。金門。建寧五鎮標。酌量抽撥。將來臺灣之兵。籍隸漳泉者較前漸少。自更易於查察。但恐日久廢弛。不能遵照妥辦。著責成每年前往巡查之將軍督撫提督等。實力稽查。勿任漳泉之兵。仍在原籍各村莊一帶。防守聚處。弊混滋

事。欽差協辦大學士陝甘總督辦理將軍事務。公福康安奏。軍營存剩火藥鉛彈。現建火藥局酌留應用。餘俱運回內地。至閩省需用礮船。經李侍堯查明上杭縣郭車鄉礮產。儘足敷用。已將淡水礮山封閉。得旨。所辦均為妥協。即照所奏辦理。其礮船一項。既查明上杭縣地方所產已敷各營軍火之用。則臺灣淡水礮山。自不必復行開採。現經福康安等嚴行封禁。但恐該處仍有私行偷採。及官吏等庇縱透漏情事。並責成巡查之將軍督撫等一體嚴查。如有似此情弊。即行叅奏治罪。○甲辰諭曰。福康安奏。此次帶兵已圖魯侍衛章京內。覈其勞績。有博斌。阿木勒塔等八員。打仗殺賊。尤為出力。又特爾敦。勒。屢經出兵打仗。此次帶兵勦賊。最為得力。於回京途次患病身故。均請懇恩賞給世職等語。博斌等隨福康安勦捕逆匪。俱能奮勇出力。或於北路堵截擒殺匪衆。或於南路搜拏首逆。

各著勞績。甚屬可嘉。博斌。阿木勒塔。哲克翁。果爾海。德楞額。薩克丹。布塞凌額。西津泰。持爾敦。轍俱著加恩。交該部查覈伊等所得功牌。酌予世職。又官兵直抵瑯嶠時。烏什哈達。帶領水師兵丁。順風連檣而至。四面合圍。水陸並進。俾莊大田得以即時擒獲。亦屬勇往可嘉。且前在雲南打仗時。甚為奮勉。烏什哈達亦著一併交部查照功牌。議給世職。○諭軍機大臣等。滿兵於一切攻戰。理應奮勉。以

為綠營表率。從前出師。滿兵尚能出力。此次福州滿兵。自到臺灣。不過逐隊行走。毫無奮勉。殊屬可恥。此皆外省安逸年久。該將軍副都統等。平日又不能盡心訓練。置技藝於不問之故。著傳諭奎林。伊到任時。悉心教養兵丁。務使技藝精熟。不可仍前疎懈。○又諭。據畢沅奏。彰德衛輝等處。於六月初七日。雷電交作。大霈甘霖。入夜雨勢益加綿密。連宵達旦。初八日又復優施。霑被俱已盈尺。現在處

處溝澮皆盈。附近之湯陰。淇縣。汲縣等屬。均一律深透。刻下雨尚未止等語。覽奏以手加額。深為欣慰。直隸順德。廣平。大名等府屬。前因未得透雨。朕心懸注。屢經降旨詢問。豫省彰德一帶。與該三府境壤毗連。河北既經得有透雨。且現在雲氣濃厚。雨尚未止。順廣大三府屬。自當一律普被醲膏。何以尚未據劉

我奏到。著傳諭劉我。即查明京南各府屬。現在得有雨澤。曾否一律霑足。及田禾能否補種之處。迅速覆奏。以慰廑念。尋奏。本月初八九等日。大名。元城。曲周。肥鄉。成安五縣。各得雨六寸。清豐。廣平。雞澤三縣。各得雨七寸。開州。南樂。東明三州縣。各得雨五寸。入土深透。晚穀晚豆。黍稷等項。儘可趕種。再順天。遼南之保定。河間。天津。正定。順德五府。冀州。趙州。深州。易州。定州五州所屬地方。暨大名府屬之長垣縣。廣平府屬之永年等五州縣。先後得雨透足。布種齊全。嗣因晴久。正望接濟。此

次一體普霑。實於秋禾有益。得旨以手加額。欣慰覽之。又諭曰。鄭源璣奏沿途地方情形。摺內據稱。入晉省境後。所過平定州。盂縣。樂平。以至省城。二麥漸次收穫。大田禾稼。甚為長茂。詢之鄉農。自四月下旬。雨水霑足。抵省後。知省城暨各州所屬地方。均於五月十二三四五及十七等日。續得雨澤。甚為霑渥。二十一日。省城復得雨五寸有餘。各屬報得雨者。復有三十七州縣等語。昨據管幹珍等奏。漳河水流細澀。清漳發源平定州之樂平縣。濁漳發源潞安府之長子縣。該省既經前後普被甘霖。甚為霑足。則漳流自當水勢加長。較前旺盛。何以據奏。漳流仍前細弱。殊不可解。或漳河泉源堵塞。及中途或有旁洩所致。業經降旨。令明興即速前往。詳悉查勘。著再傳諭該署撫。到彼後。務宜將漳河發源。查勘明晰。如有壅塞之事。即多方疏導。挑濬。勿任淤墊。其或有旁洩處所。亦即上緊堵塞。俾

漳河暢行無滯。灌注下游。糧艘得迅速通行。早能抵通。受兌方為妥協。仍著將漳流因何微弱之處。據實覆奏。尋奏。濁漳發源於長子縣西南。發鳩山南。流納傘蓋水。堯水二道。東經縣南。納諸山之入。長治縣李村。有沁州發源之西。漳河一道來會。歷屯留襄垣。潞城。黎城。入河南涉縣境。合清漳下流。歸衛。清漳發源於樂平縣西南。少山。歷和順。遼州。黎城。至河南涉縣境。與濁漳會。查二水發源之處。本屬涓涓細流。且地處萬山之中。勢若建瓴。下流易洩。現遇時雨。似覺稍旺。究不能常年貫注。居民亦無從分流。蓄實無旁洩之處。惟一路山徑迂迴逼仄。每逢水長之際。勢挾沙石俱下。已飭令地方官設法搬運。俾令暢行。得旨。悉心實力為之。○又諭。據畢沅奏。先後拏獲彰德邪教案內人犯五十餘名。現在嚴行審訊。並分咨直東二省查拏等語。此案周明等犯。學習邪教。轉相傳授。雖據供認單

縣劉洪分支與段文經教名相同支派各別實未與段文經認識但該犯等俱係傳習八卦教雖震離名目不同而其所傳之教則一况又同為山東劉洪教內遺孽段文經劉勤至今未獲必係在伊等黨羽家內藏匿希圖竄跡稽誅畢沅務將拏獲各犯隔別研訊反覆開導切實根究並密委幹員赴各犯家內嚴搜細訪務得段文經實在下落飛速查拏使要犯不至日久漏網方為妥善再案內訊

出傳教首犯自應從嚴究擬奏明辦理外其餘各犯凡既經入教者即不可留於內地此等案犯竟當分發回城如烏什葉爾羌阿克蘇等處回子為奴回子另是一教使該犯等到彼不至再行煽惑此亦除淨根株之一法○以國子監祭酒鄒炳泰為浙江鄉試正考官鴻臚寺少卿莫瞻菴為副考官大理寺卿趙佑為江西鄉試正考官吏部主事祥慶為副考官編修余集為湖北鄉試正考官編修

戴均元為副考官○乙巳湖南學政錢澧奏澈浦縣童生冒考徭籍者甚多應亟為清查已飭辰州府嚴督該縣按照學冊細查新籍生員除病故不論外其現在應試及告給衣頂者必實居徭地確有戶族田廬可憑取具徭頭徭總甘結日後子孫方准以新籍應試其餘概令改歸民籍得旨所辦頗合知道了○丙午諭曰書麟奏與武衛快丁彭鶴年因伊兄彭大年不諳運務又係家貧每年貼費

銀兩俱彭鶴年代為交完另簽李國文頂運旋因李國文疲乏上元縣知縣張五典移傳彭鶴年出運彭鶴年因捐納布政司經歷分發浙江現已請咨赴補抗不投到該縣添差將彭鶴年拏獲解案嚴怒呵斥因彭鶴年剖辨即行杖責以致彭鶴年具控請將張五典革職彭鶴年交部議處等語所辦殊屬過當彭鶴年雖捐納經歷究本係衛丁避運捐官之人若該縣因簽丁出運有藉端勒索情事

則不止於革職。尚應按律治罪。如無別項情弊。止因該員藉詞赴任。抗延不到。遂加責處。尚屬因公起見。即曰該員任性。辦理過當。其咎亦不過應交部察議。若即予以革職。則將來各運丁等。聞風長智。輾轉效尤。易啟藉端抗延之弊。亦不可不防。其漸張五典。著毋庸革職。但交部察議。予以罰俸足矣。其差傳不到之彭鶴年。却當交部議處。○諭軍機大臣等。據書麟奏江寧書局續收違礙書籍。解京分別辦理一摺。內有古今小品一部。係閩省漳州人陳天定所選。其序文及書內所列諸人姓氏。俱有違礙。應行抽燬。此時自不值復行追究。除俟解到呈覽。再交該館分別辦理外。陳天定籍隸漳州。恐該省尚有從前刷印之本。及版片存留。著傳諭李侍堯等。務宜飭屬實力查辦。其有似此者。亦當不致騷擾。搜繳淨盡。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百六

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百七

並修總纂官德慶官太子太傅文淵閣大學士文淵閣領閣事領侍衛內大臣特穆爾額

史部理藩院事務正黃旗滿洲副都統世襲時都尉加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領閣事稽察錄奏上諭事件處管理刑部戶部庫事務

世襲時都尉加十九級隨帶加二級又加二級尋常加二級戶部尚書鍾麟漢滿洲副都統軍功紀錄五次

尋常紀錄十四次臣德慶經筵講官太子少保工部尚書紀錄五次臣曹振鏞等奉

欽修

乾隆五十三年戊申六月丁未諭軍機大臣

等從前川省咽喉匪犯經大加懲治始行安
靜畏法彼時查辦咽喉時並未聞該處有天
地會名目然既有此供且指出係朱姓李姓
所傳未可因年分久遠且無實在下落遂置
之不問自應一體嚴密查辦以絕根株但川
省自咽喉畏法後地方久經寧謐著李世傑
查辦此案不動聲色飭屬密加查訪如有蹤
跡即行嚴拏務獲究辦但不可遍貼告示及
派胥役人等到處搜訪俾胥役得藉端需索

良民驚擾不安以致別生事端則是欲淨根
株而又滋萌孽也李世傑係曉事之人自能
善體朕意嚴密留心○又諭前據福康安等

獲嚴烟後訊據供出張姓綽號破臉狗並自

粵至閩傳會之趙明德等飛咨閩粵二省查

拏嗣據李侍堯將張破臉狗拏獲供有廣東

大埔縣人趙明德陳丕陳棟三人亦飛咨孫

士毅嚴密查緝奸民藉端煽惑聚眾結盟原

應徹底究辦但地方各官如果平日實力查

辦何至邪教蔓延外省惡習往往無事之時

即因循玩誤姑息養奸及一經查究即又奉

行不善輒遍貼告示多派胥役到處搜查借

端滋擾臺灣賊匪甫經平定內地及鄰省一

帶民情寧謐若復因查拏會匪或致滋擾生

事更屬不成事體李侍堯孫士毅俱係曉事

之人須不動聲色嚴密查拏先將首先傳會

之人如趙明德陳丕陳棟陳彪涂喜者拏獲

審明從重辦理其餘有犯必懲以期淨絕根

株方為妥善。斷不可遇事苛求。跡涉張皇。令胥役藉詞擾累。別滋事端。○蠲免陝西華州華陰潼關三州廳縣乾隆五十二年水災額賦有差。並緩徵蠲剩銀糧倉穀籽種。○戊申諭。本日召見德成。據奏。

天后神廟。向來祇係地方私祭。從未春秋官為致祭等語。從來有功德於民。能禦大災能捍大患者。俱列祀典。沿海處所。勅建天后神廟。屢著靈應。而福建湄州。係

神原籍。現在臺灣大功告成。官兵凱旋。來往過行安穩。仰荷

神庥。疊昭

靈貺。允宜特著明禋。用彰崇報。著翰林院擬祭文發往。嗣後該督撫。於

天后本籍祠宇。春秋二季。敬謹蠲潔。讀文致祭。以隆祀事。而答嘉庥。仍交該部載入祀典。○又諭。據德成奏。帶赴臺灣勘估城工之工部員外郎沈濬。於事竣渡海後。因病身故等

語。該員係奏派隨往臺灣。辦估城工之員。事竣回程。中途病故。事屬因公。著加恩賞給銀一百兩。以示體卹。○諭軍機大臣等。據畢沅奏。續又緝獲邪教人犯三十二名。現在嚴行根究。反覆開導。冀得段文經的實蹤跡。並將供出同教各犯。開出姓名住址。咨會各該省一體查拏等語。邪教蔓延。最為風俗人心之害。多獲一人。即少一傳習邪教之人。自應盡數查拏。以冀搜除淨盡。但查緝匪犯。固屬緊要。而胥役等。或至藉端滋事。騷擾地方。尤屬不成事體。該撫務須不動聲色。飭屬密為躡訪。於搜求餘孽之中。仍寓緝緝地方之意。方為妥善。○廣西巡撫孫永清奏。據太平府知府陸有仁等稟報。安南國被阮姓攻破黎城。嗣孫黎維祁出奔。夷官阮輝宿黎炯等保護王母王子等。避兵博山社。被寇兵追殺。逃至河邊。求救入隘。經巡隘員弁向其盤問。遠望隔河有百餘人。似係前來追趕。及見對隘現

有兵勇不敢過河。隨即退去該夷官等。即同男婦過河查點老幼共六十二名口。當即收入隘內撥房棲止等語。臣現以巡閱關隘直抵龍州查詢實在情形。另行具奏。諭軍機大臣曰。上年據孫士毅等奏該國土豪構亂。國印遺失。曾諭令俟檄詢明確再行補給。今該國嗣孫母妻眷屬竟被寇追殺。求救內投。尤不可不詢明妥辦。孫永清從未經歷軍務。恐於此事不能得有主見。孫士毅前曾隨赴軍

營。此次駐劄潮州。調度一切亦皆妥協。現在大兵業已撤竣。不過查拏會匪。並無必須該督在彼查辦之事。況本日據孫士毅奏張破臉狗供出之趙明德等犯並未名就獲。已諭令李侍堯派員將張破臉狗一犯押解粵省。交與圖薩布質訊。就近緝拏趙明德等三犯自無難得其實在下落。孫士毅接奉此旨。即馳赴廣西龍州辦理安南國求救內投之事。朕思安南若本係阮姓所有。後被黎姓

占奪。今阮姓復攻破黎城。是不過恢復舊業。尚易於辦理。或竟可從而安撫。若本非阮姓所有。則黎氏傳國日久。且臣服天朝。最為恭順。今猝被強臣篡奪。其夷官帶同該嗣孫眷屬前來籲救。若竟置之不理。殊非字小存亡之道。況黎城攻破後。阮姓所占。若不過一二處地方。則他處尚為黎姓所有。雖黎維祁懦弱無能。其支姓尚可徐圖恢復。若阮姓攻破黎城後。竟將安南地方全行占踞。或黎姓子

孫俱被其戕害。又當另為設法訪查。除現交軍機大臣詳查安南立國原委具奏外。著傳諭該督一抵龍州。即將現在指出各情形。詳細訪詢明確。並將應作何妥辦之處。就近熟籌。俟覆奏到日。再行斟酌分別辦理。至孫永清現已親赴龍州。所有該國現在投到之男婦老幼人等。係避難來投。且有黎維祁母妻眷屬在內。俱應妥為安插。並優給廩膳。勿使失所。但此六十餘名口。除黎維祁眷屬外。其

餘均屬何人。黎維祁究竟現在何處。未據詢明。明晰具奏。且黎姓在安南年久。今被阮姓攻奪。其臣下忠於黎姓者。自不止阮輝宿黎炯二人。阮輝宿等雖已前來籲投。而該國中豈無一二心懷故主。思滅阮存黎。可以資其力量。相機設法辦理者。並著孫永清。即密向阮輝宿等。詢明確實。不必俟孫士毅到彼。先將查詢各情形。迅速詳晰覆奏。○己酉。諭臺灣甫經平定。一切撫綏善後事宜。正資整飭。普吉保帶兵打仗。雖尚為奮勉。恐於海疆要缺。究屬人地未宜。因思奎林。前在伊犁所處人犯。本係有罪之人。其獲咎尚非貪贓玩法。難於原宥者可比。且伊曾經委任。久歷戎行人。亦體面。臺灣正當需人鎮撫。整飭之際。不妨棄瑕錄用。所有臺灣總兵員缺。著加恩將奎林補授。並著駢驛前往。奎林當倍加感激。朕恩。力圖報効。普吉保。即著留於福建。遇有相當總兵缺出。再行補授。○諭軍機大臣等。

據明興奏。訪獲學習震卦教之壺關縣民郭俊郭信等。隨派員密赴各犯家內搜查。並無經卷不法字跡。訊據該犯等供稱。係從河南人裴錫富傳習等語。山西與河南境壤毗連。此等邪教。自由豫省傳習而至。細閱各該犯所習歌訣。尚無違礙不法字樣。大約其始皆以教人行好。消災求福為詞。希圖賺騙錢文。而愚民無知。遂被其誑惑。但傳之日久。人數漸多。即不能無藉端滋事之處。自當隨時查辦。以淨根株。雖覈其情節。尚非罪在不赦。然亦不可復留於內地。前因畢沅奏。拏獲震卦教犯裴錫富。韓大儒等八十餘名。諭令於審明後。凡入其教者。皆應分發烏什。喀什噶爾。葉爾羌等處。給回城回子為奴。交駐劄各大臣嚴行管束。回子另是一教。自無虞該犯等到彼煽惑。而內地多去一習教之人。即邪教又少一人。且使民人等。知入其教者。即當給回子為奴。必羣知畏懼。不敢復行傳習。亦默

化潛移之一法。所有現獲之郭俊等。即著照此辦理。仍著該撫轉飭所屬實力訪查。認真妥辦。以絕餘孽。但不得縱令胥役人等藉端擾累。庚戌諭軍機大臣曰。兩廣總督孫士毅奏。接據左江鎮道稟報。安南國嗣孫挈眷內投。現給予檄諭。酌量辦理。並即日由潮馳赴龍州。察看情形。具奏等語。此事前據孫永清奏到。朕即恐該撫辦理不得主見。當即降旨。令孫士毅速往查辦。今該督不待諭旨。即

起程前往。如此能知輕重得體。方無愧封疆大臣。實屬可嘉之至。前因孫永清摺內。未將嗣孫黎維祁作何下落。及投到之六十餘名。俱係何人。曾諭令查詢明確。即行奏聞。今據孫士毅奏到。始知黎維祁亦已同來。但黎維祁既親自挈眷內投。而其呈內。又何以復令夷官阮輝宿等出名。且土酋阮岳等。攻破黎城後。因黎維祁奔逃。復領兵追殺。若該國竟全為阮姓所占。則黎維祁所帶眷屬。不過六

十餘人。何以又能途次無虞。直達內地。黎維祁現既來至龍州。著傳諭孫士毅。到彼後。不妨親向黎維祁面加詢問。以該國阮姓作亂。究因何起。黎伊被難內投。豈祇希圖保全母子性命。將土宇竟讓與阮姓。抑係伊暫投內地。逃避而該國臣下內。尚有能為之滅賊恢復。仍迎伊母子回國者。看其主見若何。如黎維祁亦不能知詳細。或向同來之阮輝宿等詳加詢問。務得該國確實情形。方可應機籌

辦。朕意此次該國嗣孫窘迫內投。呈內雖無請兵語句。但其鎮目等。果能糾集兵民。掃除兇逆。迎還嗣孫。固屬甚善。若阮姓僅占黎城一帶地方。而他處尚為黎姓所有。其鎮目等雖不能殄滅阮姓。事定後仍可迎還嗣孫。另為佈置安頓。是黎姓國祚不至斷絕。亦不值興師代為大辦。若阮姓攻破黎城後。竟將安南地方盡行占踞。或黎姓子孫俱被其戕害。是該嗣孫將來竟無國可歸。安南臣服本朝。

最為恭順。茲被強臣篡奪。款關籲投。若竟置之不理。殊非字小存亡之道。自當厚集兵力。聲罪致討矣。屆期朕自有定奪。著再傳諭孫士毅。務遵前降諭旨。詳加確詢。就近熟籌。迅速據實具奏。統俟該督覆奏到日。再行指示。分別辦理。再目下黎維祁眷屬人等。務宜妥為安插。即多費廩給。亦不可靳惜。其關口地方。該督已調兵一千。協同分佈。但為數究屬無多。恐對河匪衆。見官兵人少。不能望而生

惕。不妨於附近營分。再調二三千名。分佈關隘。以壯聲援。提督三德久歷戎行。即令其在彼統率。妥為彈壓稽查。毋任滋事。至孫士毅一接稟報。即起程速往。恰與朕旨相合。而其所擬檄文。亦甚得體。朕嘉許之外。更無可諭。著賞給御用大荷包一對。小荷包二對。以示優獎。又諭曰。察哈爾部落。鰥寡孤獨人等。向係無項養贍。著傳諭保寧。查明有項可動。即照滿洲索倫之例辦理。否則動正項銀兩。

生息。酌量散給。毋俾失所。以副朕一體矜恤。滿洲蒙古至意。○蠲免山西大同。豐鎮。陽高。天鎮。懷仁。山陰。廣靈。應州。渾源。九州廳縣。乾隆五十二年旱災額賦有差。並緩徵蠲剩銀糧。○以故四川馬喇司土官阿衡子際昌。煖帶密土官嶺峻秀子金玉。各襲職。○辛亥。諭前據永慶奏。派往臺灣協勦之杭州乍浦駐防滿兵。回至建寧地方。內有瑯圖靈阿等五名。欲雇轎乘坐。恐中途擡夫脫逃。不能行走。

遂私自坐船。至青龍灘地方。遭風打壞船隻。淹斃人口等語。滿漢兵丁。遇有征調勦捕之事。於車輛可通處所。尚可准其更替合坐。以省足力。若遇山路崎嶇。車輛不能前進。祇應將軍裝行李一切。雇人擡送。本人即當步行。正可藉此習勞。其或一水之便。船隻可通。亦必須所調之兵。普律下船。方可准其乘坐。若途中私約數人。各自下船。已屬非是。何得復思雇轎乘坐。如兵丁可以乘轎坐兜。則所調

之兵一千。即須豫備擡夫二千名。況駐防兵丁出征。向俱帶有跟役。設跟役等亦用轎兜。所需擡夫又當再加一倍。且滿兵既可用轎兜。則綠營及屯練各兵又安能禁其不一體乘用。兵貴習勞。以不能登山之兵。尚望其衝險。長驅破賊。有是理乎。此次臺灣勦捕賊匪。檄調各省之兵。不下一萬。豈不竟需雇夫十萬。以為應付過兵之用。有是理乎。從前西北兩路。以及大小金川用兵時。從未聞有此事。

此必該省地方官違例應付。以為將來開銷地步。亦未必如數豫備。不過以備有轎夫一項。事後即可借此多為冒銷之計耳。內地用兵。口糧鹽菜。以及運送糧餉火藥等項。定有軍需則例。而兵丁沿途行走。於水陸地方。如何給與舟車。及舟車不通之處。除兵丁本身令其行走外。其擡運軍裝行李等項。每兵幾名。准給人夫幾名。未經列入。此次閩省違例應付。未必不因例無明文。遂思從中浮冒。現

在大功雖已告蒞。但兵可百年不用。不可一日無備。著戶兵二部。即詳悉妥議具奏。添入行兵事例。並著傳諭各省督撫。嗣後凡有兵差過境。毋許豫備小轎及兜子等項。倘有仍前豫備乘坐者。即將該兵丁等從重嚴懲。其應付之地方官。及領兵之將弁。一併嚴加議處。決不寬貸。將此通諭知之。○諭軍機大臣等。此次派往臺灣之杭州乍浦滿兵。打仗不甚奮勇。即福州廣州滿兵。亦殊庸劣。不過隨

衆行走。深可痛恨。昨杭州滿兵內。先有一人逃亡。及撤回本省時。瑚圖靈阿等又私自坐船。致被淹溺。尤屬不堪。大抵外省滿兵。皆由各該處晏安日久。沾染習氣。既不能及京師健銳火器二營勁旅。乃並不如綠營兵丁。豈不玷滿洲本色乎。除福州將軍恒瑞。業經治罪外。其福州副都統鄂岳。廣州將軍存泰。副都統博清額。杭州將軍寶琳。副都統書楞額。原任乍浦副都統。今任江寧將軍永慶。均著

交部嚴加議處。並著傳諭各省將軍。及副都統等。將駐防兵丁。盡心訓練。務使技藝精熟。倘仍因循廢弛。任聽兵丁等。耽於逸樂。必將各該將軍副都統。從重治罪。斷不輕宥。○又諭據穆騰額奏。上年隨正額領過餘引五萬道。已據各商請領將完。現在正值趕運之時。自應先期豫備。理合循照舊例。再請餘引十萬道。存貯運庫。聽各商陸續領運等語。近來長蘆鹽務。調劑稍有起色。上年所發五萬道餘引。既經各商陸續領銷。將次完竣。若再先期豫備。該商等隨時領運。俾鹽引多為銷售。於國課民食。自屬兩有裨益。但必須正引銷完後。再銷餘引。方為妥善。若正引未完。即令各商領銷餘引。仍屬有名無實。又若兩淮欠引之弊。實矣。著傳諭穆騰額。即行詳悉查明。此次請發餘引。是否係應銷正項引鹽。將次完竣。不致稍有積壓之處。據實覆奏。尋奏長蘆運鹽情形。與兩淮微有不同。茲乾隆五十

二年正額疏銷全完。餘引亦請領將竣。現因澍雨應時。引地河道深通。循例請領餘引十萬道。俾各商隨時領運。如有未盡之引。仍照例繳部查銷。不致積壓。報聞。○又諭據畢沅覆奏。河北一帶。普得透雨。漳衛各河水勢漲發。糧艘足資浮送。一摺。覽奏欣慰。惟摺內稱。衛水發源於輝縣蘇門山。本不甚旺。全賴大雨時行。山水匯注。衛河水勢始能充裕等語。漳衛二河。俱賴以濟運。但該河向無開壩。可以攔蓄。若必待大雨時行。水勢始能充裕。則雨過之後。流洩無餘。每年春季。勢必常形淺澁。不可不慮。畢沅務宜留心籌辦。或能於長水時。量為收蓄。待春季水弱。再開放接濟。抑或另行設法豫籌。俾明春重運經行。免致又虞淺澁。有備無患。方為妥善。○戶部等部議。奏准海宿三關。期滿盈餘銀兩。比較乾隆四十六年徵收之數。尚少銀十萬七千六百四十六兩零。請著落該監督。各按經徵月日。照

數賠補得旨。固屬照例辦理。但念各該關所收盈餘數目。比較四十六年。雖少收十萬七千六百餘兩。而較之上年。已多收九萬三千六百餘兩。所有此次准海宿三關。比較四十六年盈餘短少。應賠銀十萬七千六百餘兩。著落該監督等。各按月日賠補銀一萬兩。餘俱加恩寬免。○補行陝西。甘肅二省。乾隆五十二年軍政。卓異官十一員。年老官五員。有疾官一員。才力不及官四員。分別議敘處分如例。○壬子諭軍機大臣等。昨據德成奏。閩省械鬪之風尤熾。雖內地到處皆有。不特臺灣為然。而械鬪之案。往往糾集匪眾。先議出抵償之人。許於事後代為養贍家口。並設牌供獻。以致貧民貪利。雖死不顧。而奸徒恃有代抵。遂赴各村莊肆免攢毆。傷斃多命。甚至放火搶劫。無所不為。及經到官。即有私相議抵之人。出頭承認。既非主謀。又非正兇。不過按數抵償。地方官因見人眾。於鬪毆之始。固

不敢過問。迨至斃命。又以有人認償。即將就完結。不加深究。致奸民罔知忌憚。日甚一日。應嚴加懲創。禁止等語。械鬪之風。雖由閩省民情剽悍。但究係地方官辦理不善所致。若果地方官聽訟公明。遇有鼠牙細故。即立予剖斷。何致小民逞兇。私相爭鬪。即或有桀驁不馴之輩。鬪毆斃命。亦無難立究正犯。按律定擬。何得任其私相議抵。乃該省地方官。向來因循玩愒。於百姓訟案。並不代為秉公速審。致小民無從訴其曲直。積忿私鬪。而案情畧大。該地方官又思迴護處分。化大為小。遂致奸徒無所懲創。罔知法紀。亟應趁此兵威之後。遇案嚴辦。庶械鬪之風。可期漸息。若復稍事姑息。則刁風日長。雖法令亦無從禁止。勢必又生事端。尚復成何事體。閩省係海疆內地。與臺灣均屬緊要。著傳諭李侍堯。務宜不時查察。實力整頓。如再有械鬪之案。務飭究出主謀正兇。並頂兇之犯。一併盡法處治。

其地方官員有仍前掩匿諱飾者立即從嚴
叅究並於奎林行抵泉州時詳細告知令其
到彼加意妥辦俾械鬪之風永行斷絕方為
妥善○癸丑改雲南猛野磨鋪二井鹽課歸
他郎通判徵解從巡撫譚尚忠請也○予故
西安將軍長清祭墓如例諡莊毅○旌表守
正捐軀河南寶豐縣民褚是來妻楊氏○甲
寅遣官祭

火神廟○大學士九卿議覆欽差協辦大學
士陝甘總督辦理將軍事務公福康安福建
巡撫徐嗣曾奏清查臺灣積弊酌籌善後事
宜除禁革私役額兵輪查出奏考語道員專
摺陳事以上三條均已奉旨施行外○水陸
各營應照操演鎗礮之期將備逐名點驗分
別等第開報鎮臣親自校覈其分防各汛亦
令如期操演隨時抽驗統於年終將名單彙
送總督衙門查覈仍留檔冊一分俟將軍督
提親巡時照冊查驗兵丁技藝嫺熟奏請交

部議敘捏報者叅究○水師將弁應親自出
洋巡哨將出汛回汛日期報明督提各衙門
稽覈有擒獲盜匪者記功陞用若僅在內港
往來空文申報即行嚴究○每年總兵巡查
各營北自淡水石門南至鳳山水底寮母論
衝僻汎地應一律操練兵丁點驗屯番所有
供應夫價盡行裁革隨帶弁兵酌給路費在
本省公費項下支銷事畢將營伍地方情形
彙奏一次○兵丁除操演日期點驗外應令
鎮將各官派員逐日稽查有擅離兵房者革
伍枷號半年遞回原籍在外貿易者照空歇
軍役例治罪倘敢仍前包庇娼賭照窩頓娼
妓例治罪其分駐地方即飭汛弁稽查○換
防戍兵調集廈門時應令水師由陸路提督
陸路由水師提督互相點驗必須年力壯健
方准配渡○鹿耳門沿海一帶口岸應將向
有礮臺數十處照舊安置並於新建城垣之
地酌量添設礮位○臺灣械鬪相尋往往釀

成巨案。應從嚴定擬。其起意糾約及殺人之犯。照光棍例擬斬立決。傷人者從重問擬。發遣仍遵照前旨。與盜案一體立限兩年。俟限滿後人知畏法。再行聲請照舊。再搶案聚至十人以上。與雖不滿十人。而持械逞強者。為首照糧船水手搶奪例治罪。為從發給新疆種地兵丁為奴。其數在三人以下。審有恃強情形。與雖未逞強。而數在三人以上者。照回民搶奪例。發極邊烟瘴充軍。亦俟兩年後再行聲請照舊。地方文武員弁。遇有械鬪搶案。不即緝拏者。照諱盜例革職。如有明知故縱。及代為開脫。增減改捏等情。照故出人罪例治罪。失察者降一級調用。一隻身遠渡。與挈眷同來之內地民人。應由地方官查明給照。移咨臺灣入籍。按戶編甲。其無業游民犯事。即罪在笞杖以下。亦押令回籍。地方口岸各員。失察偷渡者。無論人數多寡。降二級調用。隻身民人降一級調用。拏獲而不舉報。仍照

例革職。有能拏獲內地逃犯者。每一名紀錄一次。攜帶眷屬者。每一起加一級。別經發覺。將失察進口員弁降二級調用。失察藏匿者降一級調用。一屯丁需習器械。民間菜刀農器。仍准製用外。所有弓箭腰刀。撻刀。半截刀。鏢鎗。長矛。與一切旗幟。應概行禁止。毋許私造私藏。臺灣賭風最盛。應令文武員弁實力稽查。即跌錢壓寶之類。亦從重枷責。押遞原籍。不服拘拏者。照拒捕例治罪。弁兵得錢包庇者。計贓以枉法論。不知情者。革伍枷責。並令每月出具切實甘結。呈報總兵查覈。再胥役亦有庇賭之事。令兵役互相糾察。呈報鎮道從重究辦。地方官故縱者。降二級調用。失察者降一級留任。淡水八里坌。距五虎門水程約六七百里。港道寬濶。可容大船載運。應開設口岸。以便商民。如有藉端需索者。將失察地方官降二級調用。兼轄官降一級調用。新擬開設八里坌海口。與淡水之八

尺門。中港。後壠。大安二港。彰化之海豐。三林。水裏三港。嘉義之笨港。蚊港。虎尾。八掌。猴樹。鹽水。含西五港。鳳山之東港。竹仔。打鼓二港。通海各口岸。責成該管員弁。實力稽防。偷渡。再此等船隻。多由內地小港偷越出洋。應令內地沿海地方。一體訪拏。臺郡地方。遼闊。應照內地。每三十里設立一鋪。通衝要路。一律修整。統以一丈五尺為率。並於淡水。灣裏。虎尾。大突。大甲等溪。各設船二隻。傳送公文。渡載行旅。諭曰。前因臺灣地方。經柴大紀等貪縱廢弛之後。百弊叢生。特諭令福康安於勦捕完竣後。將善後各事宜。詳細妥議具奏。嗣據福康安等議定。共十六條。立法固已周密。若該處文武員弁。果能實力奉行。原可永遠無弊。但有治人無治法。恐日久復視為具文。或竟陽奉陰違。則雖多立科條。仍屬空言無益。茲經大學士九卿照覆施行。在臺灣文武各員。務當敬謹遵循。力除積習。以飭營伍。

而靖海疆。至閩省民風刁悍。盜劫頻聞。是以降旨。凡遇該省海洋盜案。應俟兩年後盜風稍戢。再照舊例分別聲請。今據大學士等奏。以臺灣械鬪相尋。往往釀成巨案。嗣後亦應從嚴定擬。與盜案一體立限兩年。俟限滿後。人知畏法。再請照舊等語。但閩省盜劫之案。不一而足。昨據德成春福建內地以及臺灣。械鬪之風尤熾。已有旨令李侍堯當過案嚴辦。是此等習不畏死之徒。恐尚非一二年即能悛革。所有閩省海洋盜案。並械鬪之案。俱著照新例嚴辦。俟三年之後。如果人知畏法。該督撫等再行奏聞。照舊辦理。以期辟以止辟。餘俱照大學士等所議行。昨因臺灣總兵員缺緊要。恐普吉保不能勝任。奎林久歷戎行。曾任將軍。威名素著。人亦體面。已降旨將伊補放。朕之所以簡用奎林者。原令其前往實力整頓。俾該處營務吏治。均有起色。奎林行抵泉州。李侍堯可即將應辦諸務。及大學

士等。現在議覆各條。詳晰轉傳該總兵。令其到彼恪遵妥辦。毋負委任。至前降諭旨。令於督撫將軍內。每年輪派一員。前往臺灣巡查。亦恐該鎮道等。扶同徇隱。故智復萌。有將軍督撫等前往。層層稽察。庶共知儆惕。若該處總兵。皆如奎林足資委用。原不必又令督撫等前往。多此一番跋涉。但奎林亦不能久在該處。設有陞調等事。而接任者一時未能得人。難保其不致貽誤。自應仍責成巡查之將

軍督撫。方為周密。乃昨據德成奏。不如但令將軍提督前往。督撫似可不必等語。其意必以將軍提督。與地方無統轄之責。前往臺灣。尚不至有需索供應情事。若督撫前往。則各州縣備辦供頓應酬。及家人胥役需索門包。所費又復不貲。即如從前富勒渾。縱容家人殷士俊李世榮。沿途任意勒索。是其明證。無怪德成之有此奏。朕令該督撫等前往巡查。原為稽查奸弊起見。若該督撫等。復縱令家

人長隨胥吏等藉端需索。是未受其益而先受其害。更不成事體。著傳諭該督撫等。嗣後於前往臺灣巡查時。務宜嚴禁從役等。毋得有得受門包沿途需索等事。如有明知故縱。及漫無覺察者。或經科道參奏。或經朕別有訪聞。即將該督撫加倍治罪。決不寬貸。且不特臺灣為然。即各省督撫。於巡閱營伍查辦災賑時。均當自行雇備夫馬。毋得絲毫擾累地方。朕聞向來各省督撫內。惟李世傑書麟

於出巡時。輕騎減從。尚能不累地方。各該督撫俱受朕重恩。養廉優厚。何不以李世傑書麟為則效。而必踵不肖督撫等之覆轍乎。況督撫之責。在於察吏安民。凡通省之利弊。屬員之賢否。皆所應知。而其出巡時。所帶家人長隨。為數無多。何難隨時稽察管束。若幾名家人長隨。尚不能查察。又安望其剔除弊竇。管轄如許之官吏耶。且不特督撫為然。即大臣官員等奉差出外。除應得廩給驛馬之外。

亦不應格外需索。擾累地方。嗣後凡屬奉差外出。及督撫出巡者。俱應輕騎減從。並嚴加約束。毋任有違例騷擾之事。若有縱令勒索。毫無覺察者。一經訪聞。叅奏。即一併從重治罪。斷不為之寬宥也。將此通諭知之。○乙卯。御製平定臺灣告成熱河

文廟碑文曰。昨記平定臺灣生擒二兇之事。亦既舉平伊犁。定回部。收金川為三大事。專文勒太學。其次三為誅王倫。翦蘇四十三。洗田五。以在內地。懷慚弗葬其事。而平定臺灣。介其間。固弗稱勒太學。然較之內地之次三。則以孤懸海外。事經一年。命重臣。發勁兵。三月之間。擒二兇。定全郡。斯事體大。訖不可以不紀。因思熱河

文廟。雖承德府學耶。而余每至山莊。必先展拜廟貌。秋仲丁祭。常遣大學士行禮。則亦天子之庠序矣。且予去歲籌臺灣之事。日於斯。天佑予衷。命福康安。海蘭察率百巴圖魯以行。

及簡精兵近萬。亦發於斯。而諸臣涉重洋。冒艱險。屢戰屢勝。不數月而生擒二兇。且無一人受傷者。是非上蒼默佑。

海神助順。曷克臻斯。則予感謝之誠。兢業之凜。亦實有不能已於言者。籌於斯。發於斯。臻於斯。

文廟咫尺我

先師所以鑒而呵護者。亦必在於斯。記所謂受成告成。正合於斯地也。則平定臺灣。告成熱河

文廟所為禮以義起。非創實因。且予更有深幸於衷。而滋懼於懷者。予以古稀望八之歲。五十三年之間。舉武功者凡八。七胥善成。其一惟征緬之事。以其地卑濕瘴癘。我軍染病者多。因其謝罪求罷兵。遂以振旅。是此事究未成也。近據雲南總督富綱奏報。緬甸謝罪稱臣奉貢之事。命送其使至熱河。將以賜宴。

施惠是則此事又以善成於斯矣。夫奉
天治民百王誰不為天子。而予以涼薄。仰賴
祖宗德施受。

天地恩眷獨厚。近八旬之天子。藏八事之武功。
於古誠希。示後有述。使一事尚留闕欠。予之
懷慚終不釋也。自今以後。益惟虔摯持盈。與
民休息。敢更懷佳兵之念哉。夫

天地。天子之父母也。子於父母之恩。不可言報。
中心感激。弗知所云已耳。繫之辭曰。瀛壖外
郡。閩嶠南區。厥名臺灣。古不入圖。神禹所畧。
章亥所無。本非扼要。棄之海隅。朱明之世。始
聞中國。紅毛初據。鄭氏旋得。恃其險遠。難窮
兵力。每為閩患。訖無寧息。

皇祖一怒。遂荒南東。郡之縣之。闢我提封。一年
三熟。蔗薯收豐。漸興學校。頗晉生童。始之畏
途。今之樂土。大吏忽之。恣其貪取。既嬉其文。
復怙其武。匪今伊昔。叛亂屢覩。向辛丑年。昨
丙午歲。一貴爽文。其亂為最。水陸提督。發兵

於外。奈相觀望。賊益張大。

天啟予衷。更遣重臣。百巴圖魯。勇皆絕倫。川湖
黔粵。精兵萬人。水陸並進。至海之濱。至海之
濱。崇武畧。駐後兵到。齊。恬波徑渡。一日千里。
以遲為速。百舟齊至。

神佑之故。馳救諸羅。羣賊蜂擁。列陣以待。不
值賈勇。如虎搏兔。索角隴種。頃刻解圍。義民
歡動。斗六之門。為賊鎖鑰。大里之杙。更其巢
落。長驅掃蕩。如風捲箨。夜攜眷屬。內山逃託。
生番化外。然亦人類。怵之以威。養之以惠。彼
知畏懷。賊竄無地。遂以成擒。爽文首繫。狼狽
為奸。留一弗可。自北而南。居上臨下。海口遮
羅山。塗關鎮。遂縛大田。畧無遺者。二人同心。
其利斷金。曰福康安。智超謀深。曰海蘭察。勇
敢獨任。三月成功。勲揚古今。既靖妖孽。當安
民庶。善後事宜。康安並付。定十六條。諸弊祛
故。永奠海疆。光我王度。凡八武成。蒙佑自
天。雖今耄耄。敢弛惕乾。如曰七德。實無一焉。惟

是敬勤廟以永年。諭據管幹珍和琳奏。臨清關外運河全賴漳衛二水會汶北注。而浮運通漕尤藉漳水之力。向有

漳河神廟。建於運河北岸。居民等祈雨祈晴。隨禱立應。今因關外水弱。虔詣廟中祈求雨澤。數日內霽。雨油雲水勢陡長四尺餘寸。軍民商賈無不踴躍歡騰。稟請代奏加錫封號。等語。漳水來源遠在晉省。去運河千有餘里。今管幹珍等虔禱數日。水頭立見長發。不啻

應願而償。若非

神靈賜佑。曷克臻此。允宜增益。鴻稱褒崇。封號以隆。妥值而答。

神庥著於

漳河神舊有封號上。加利運二字。並御書扁額對聯發去。敬謹懸掛。永昭

靈貺。

御書扁曰。增流昭貺。勅諭霍罕伯克那爾巴圖曰。近據喀什噶爾參贊大臣奏稱。前爾所

屬布魯特等。搶掠喀爾提金部落牲畜。內查出駝八十隻。羊一千隻。如數交出等語。那爾巴圖辦理誠妥。甚屬可嘉。今特加恩賜爾織金蟒緞一端。大緞二端。漳絨一端。大荷包一對。小荷包四個。齋到爾其祇領。再薩木薩克現在霍占伯克呼達雅爾處棲止。屢搶商人。是伊罪惡滿盈。自速其禍。爾欲興兵往擒。如能獲獻朕當加恩。況自爾祖額爾德尼伯克以來。世受朕恩。極為恭順。爾當倍加奮勉。以

承渥眷。丙辰。諭軍機大臣等。據毓奇等奏。江西尾幫於六月十七日全數渡黃。比較上年早二十日等語。覽奏欣慰。昨據蘇凌阿等奏。前後進幫船酌定以九月初一為準。其在初一以後過天津關者。即不便再令原船北上。臨時酌量濟撥截貯。以便就近回空等語。所奏頗露為難之意。今年南糧渡黃較之上年既早二十日。而所運之米又較上年共少十七萬三千餘石。現在南北運河水勢充裕。

足資浮送昨又據管幹珍等奏東省漕船久已抵通其豫省糧船陸續著令在頭二進南糧內插幫行走等語是各省糧船已可銜尾前進無難尅期抵通該侍郎等自當隨到隨收俾軍船迅速回空受免何必豫籌截撥自留地步著傳諭蘇凌阿等務當上緊辦理此次重運渡黃既較上年早二十日則回空船隻亦當比上年早二十日歸次若更能趕早南下尤為妥善不可藉詞延緩有誤回空致

書奏李士奇

書

干咎戾也 又諭據富尼善奏大名磁州等處先後拏獲邪教人犯三十名內除劉彥已在河南病故尚有二十九名晝夜隔別嚴訊總未供出段文經實在蹤跡現在帶犯進省解候督臣再行嚴切根究定擬等語此等匪徒雖究無另有悖逆不法經卷字蹟但傳習邪教展轉蔓延自宜嚴拏辦理以期務絕根株除現在拏獲各犯著劉我即速審明仍遵前旨分別發遣回疆具奏外至段文經實在

下落雖現在所獲各犯未據供出而段文經係此案巨魁斷不可任其漏網倖逃顯戮著傳諭劉我長麟畢沅務當嚴飭各屬隨時留心購線訪緝斷不可視同海捕具文日久生懈富尼善係特旨派出辦理此案之人尤宜認真查訪設法緝拏毋任正犯得逃法網以內閣學士胡高望為江南鄉試正考官編修謝振定為副考官侍講學士吳璥為陝甘鄉試正考官檢討張翮為副考官 丁巳諭

書奏李士奇

書

軍機大臣等前因孫士毅奏黎維祁親自挈眷內投清單內首開黎維祁之名黎維祁係安南國嗣孫雖尚未受封但伊係應嗣封之人即與國王無異乃挈眷來投竟似該國土宇已盡為阮岳篡奪恐另需設法籌辦茲據孫士毅查明該嗣孫並未同來其國中從賊者尚不過牧馬諒山等處而黎城西園及迤北等處俱不肯降賊且據該夷目稱阮岳一味獷悍並無法令嗣孫若能乘隙而動阮匪

即可一舉成擒。其情詞激昂。能知大義。是該國境土。既未盡歸賊匪。人心又戴舊足恃。尚可徐圖恢復。辦理尚易。著傳諭孫士毅。至彼即令該夷目等。回國告知黎維祁。以安南臣服天朝。最為恭順。伊祖黎維禡病逝。長子早故。伊例應承襲。前因其備文聲請補給印篆。並未遣官告哀。於體制不合。地方大吏據例復行檄詢。若該國再遣使懇請。即當准其勅封給印。今伊被賊攻逐。究係不能振作所致。

現在該國境土。未被賊占者尚多。而臣民中亦復向戴黎氏。該嗣孫當趁此招集義兵。力圖恢復。使伊祖宗相延之祚。不至伊身而滅。其母妻隨從人等。俱已妥為安插。該嗣孫不必以此為念。俟伊恢復故土。國內稍寧。即可遣迎歸國。至阮氏恃強篡奪。為法所不容。目下天朝已派調大兵。在廣西豫備。若使賊勢仍前猖獗。負固不服。甚敢將該嗣孫傷害。其各鎮目等。亦甘心從逆。坐視不救。天朝即當

派員統率大兵。四路會剿。將阮岳及黨羽人等。全數擒誅。明正其罪。如此先行剴切告知。並檄諭各鎮目等。庶可以壯黎氏之心。而寒賊匪之膽。於聲援之道。亦屬有益。計此時孫士毅早可抵龍州。其隨來之阮輝宿等。據稱情願回國。找尋嗣孫。如孫士毅到彼。該夷使已起程回國。則應將此交付其來人發往。如尚未起程。該督可即將該國情形。面向該夷使等詳細詢問。並將朕指示之處。面行傳知。

令該夷使等回國。告知黎維祁。更為妥協。至阮岳等。恃其兇勢。若竟敢來內地。剽奪該嗣孫眷屬。則正可就而截擊。悉數擒捕。使該國人眾。知天朝已派兵助其勦賊。更為好事。三德久歷。戎行著該提督。即統率兵眾。於關隘河岸處所。遵照奮勉。妥辦。再各關隘兵丁。前已有旨。令孫士毅再調二三千名前往。茲該督雖已經密調二千兵豫備。若尚有應行飭調之處。該督亦不妨就近酌調。分頭布設。並

飭令整齊行伍建豎旌旗方足以壯聲勢而寒賊膽將此各諭令知之○又諭據李世傑奏審擬殺死四命之兇犯符興禎請旨即行正法一摺已交軍機大臣會同行在法司覈擬速奏矣四川向多咽喉匪犯聚衆行兇自大加懲創之後近年漸覺斂戢今符興禎輒毆殺三命又故殺一命雖非謀殺但其情形兇暴可見該省匪徒尚未盡行悛革恐不久又萌故智李世傑於審明後自應一面奏聞一面將該犯正法使兇徒共知懲惕何必拘泥請旨又致往返需時倘因此而有監斃等事豈不使要犯倖逃顯戮著傳諭李世傑嗣後遇有此等兇斃多命之案務當速辦示懲並剴切曉諭該省民人等不可逞兇斃命應共知安分畏法使咽喉等兇匪永行斷絕根株方為妥善○戊午諭據復興奏賽因諾顏和碩親王車登扎布旗分蒙古賽因察克扎木顏圖財殺害民人玉木春一案審明後將

賽因察克扎木顏立決梟首示衆請將車登扎布交部嚴加議處出首之本旗丹津賞給布匹等語蒙古賽因察克扎木顏等見民人玉木春皮物即起意誘飲至醉用棍石亂打以小刀扎死兇惡已極復興等審明即行斬梟示衆所辦尚是至該扎薩克等若並未查出未曾拏獲兇犯自應交部議處今賽因察克等由車登扎布見丹津出首當即拏獲解審若仍交部議將來遇有此等事件伊等自必畏懼巧為遮飾暗消車登扎布著從寬免其議處嗣後各扎薩克等屬人如有行竊殺人案件自行查出者著照此辦理首告之丹津著賞給細布十匹以示鼓勵○己未長蘆鹽政穆騰額疏報石碑場墾復窰地二十三頃七十二畝有奇○山東巡撫覺羅長麟疏報高密縣墾地八頃三十二畝有奇○旌表守正捐軀直隸冀州民劉俊德妻張氏○庚申諭據伍拉納奏上年辦理軍糧需用船隻

較多派令巡檢江大復封雇並令主簿談汝霖會同辦理詎江大復得受番銀私將已封之船賣放一百三十餘號經談汝霖稟府查辦並經該督等訪聞將江大復咨部斥革究審嗣據刑部咨會令該護撫提犯研訊茲審明江大復得贓屬實依律擬絞請旨即行正法巡書家丁擬杖一百流三千里船戶擬杖七十等語江大復雖不過一微末佐雜但維時正值辦理軍務之際兵糧最為緊要乃江

大復膽敢以待運各船得贓賣放情罪實為重大李侍堯伍拉納一經究出自當立時奏聞即行按律從重速辦俾眾知儆惕乃僅照尋常案件咨部斥革究擬殊屬未當李侍堯伍拉納俱著飭行刑部於接准該督咨會時亦當將此事一面奏明一面飭交該督等速行究辦乃僅咨行該護撫提犯研訊辦理亦屬非是至江大復於承辦待運軍需船隻私行賣放實出情理之外著依該護撫所擬江

大復即行處絞餘並照所擬完結其主簿談汝霖於江大復私放船隻不但無分肥情事且能據實稟明尚屬體面著該督撫即出具考語給咨送部引見○戶部奏捐納貢監請將廩增附武生京外現任官員子弟及獨子親老年幼有疾丁憂守制者准其差人或轉浼至親赴部具呈報捐得旨現任官員丁憂者尚應回籍守制其報捐俊秀既係服制不滿有何迫不及待而必欲差人報捐該部一併列入應准條內未為妥協嗣後丁憂人等俱不准其報捐俟服滿後仍令本人親身赴部具呈始可准行餘依議○是月欽差內閣學士管幹珍巡漕御史和琳奏衛汶二河水長漕艘行走暢順江廣各幫起撥亦屬無幾請將直省官撥船暫留一百隻其餘三百五十隻押赴直省交收以備楊村通州撥運報聞河南巡撫畢沅奏懷慶府關聖帝君素昭靈應迎至衛輝府城叩禱旬

御書扁曰沛霖孚佑

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百七

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉
上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

救修

乾隆五十三年戊申秋七月辛酉朔享

寶錄卷一百三十八

太廟遣豫親王裕豐恭代行禮。○諭曰。孫士毅孫永清先後奏到。接據太平府知府陸有仁稟稱。有安南國牧馬鎮夷官阮輝宿帶同男婦老幼數十人。至龍州斗與隘地方對河求救。詢據該夷官口稱。該國被土酋阮姓攻破黎城。嗣孫黎維祁出奔。伊與夷官黎伺等。保護王母王子等。避兵博山社。被寇追殺。逃至河邊。無計可脫。求救入隘。經守隘弁兵向其詢問。遙望隔河有百餘人。似係前來追趕。及

見河北現有兵勇不敢過河。隨即退去。該夷官等即同男婦過河查點老幼共六十二名。口即收入隘內撥房棲止。經陸有仁面向夷官阮輝宿等。遂加詳詢。因該國土酋阮岳恃強構兵。攻占黎城。其黎城西南及迤北各府俱不肯從賊。嗣孫先已避赴山南等處。調兵征討。現無消息。阮岳一味獷悍。該國人心戴舊。若嗣孫乘隙而動。阮岳即可一舉成擒。阮輝宿等護送王母王子避難內投。仍情愿回

國找尋嗣孫。俟勦平阮岳後再迎嗣孫之眷屬歸國等語。安南臣服本朝。最為恭順。該國王黎維禱病逝。長子早故。黎維祁例應承襲。前因該國遺失印篆。僅備文申請補給。並未遣官告哀。於體制不合。經該督撫等奏聞。已據例復行檄詢。原俟該國再遣使懇請。即准其補給敕封。今據孫士毅等奏黎城地方竟被阮岳占據。黎維祁赴山南等處調兵。尚無消息。而伊母及子幾被賊搶劫。踉蹌內投。自

當妥為撫卹。加意防護。現在該國眷屬以及隨從人等業經地方官撥房安頓。孫士毅孫永清已先後馳赴龍州。著傳諭該督等務宜就近親加照料。優給廩餼。俾無失所。並傳知該嗣孫之母。以該國雖被阮岳攻破黎城。嗣孫出奔。伊等懼被賊辱沒。率眾內投。現既來至內地。各關隘均有重兵防守。斷無虞賊匪闖入內地傷害伊等。督撫已將此事奏聞大皇帝。隨奉旨安南臣事天朝。素為恭順。著該督撫妥為安頓保護。優給廩餼。該嗣孫之母等可暫在龍州居住。不必過於憂念。現在該國境土並未盡歸賊匪。且人心戴舊。足恃內地各關隘。又已檄調重兵。助其聲援。伊子黎維祁。趁此招集義兵。無難滅賊恢復。俟其國內稍寧。即可迎伊等回國等語。向該嗣孫之母詳細傳旨告知。使其安心居住內地。將來護送歸國。以副柔遠。字小至意。至該國眷屬被追內投時。勢在窘迫。若地方各官辦理拘

泥不即收入隘內必至被賊戕害今該府陸有仁一聞對河夷官等率衆求救即令移入隘內並派兵防護俾該國眷屬人等不致為賊刦留戕害又面向該夷使等詢得詳細情形稟明該督撫等具奏實為能事可嘉陸有仁已陞擢道員著該督撫於事竣後給咨該員送部引見仍著先行交部議敘將此通諭知之○又諭據興兆奏伊接任後同副都統敦倫泰等察驗各兵技藝軍械馬匹餉銀一切均須籌議等語各省將軍大臣理宜實心任事若有相沿陋例必須變更者固宜辦理若因循抵任輒將舊有章程驟議紛更以為見長地步未幾遂又因循怠忽此等惡習朕甚惡之即如興兆前任荊州又何嘗善為整頓加意訓練以伊辦事而論尚不如長清今乃初至西安即為此奏不過欲顯前任未周之處以見己之留心耳至敦倫泰從前與長清相處最久興兆此奏若以為必宜更張

則敦倫泰前此所司何事今又會同具奏殊屬可笑興兆敦倫泰俱著傳旨申飭並曉諭各省將軍副都統等嗣後必須實心任事毋蹈沽名見長之咎○壬戌予大學士雙俸雙米而大學士之兼管部務者則照尚書例俸米俱屬雙支其不兼部務之大學士每年俸米比尚書轉少殊未允協嗣後大學士之不兼部務者亦著加恩給予雙俸雙米以符體制○諭軍機大臣等據富綱奏六月初十行抵順寧察看緬甸來目等情形極為誠敬並據耿馬土司稟報聽聞緬甸已將楊重英送出富綱恐在彼坐守或致該頭目等重視居奇又生更變查大理亦係必經之路較順寧程站亦無紆折現將來目人等並象隻什物先行帶赴大理妥為安置恭候諭旨遵行又另片奏來目內業渺瑞洞一名患瘧今

回耿馬居住調理等語。實屬糊塗已極。緬甸此次差人進貢情詞極為恭順。係屬好事。況經派委副將等員驗詢已屬確實。尚復何所疑慮。乃富綱前接稟報時即以無關緊要之楊重英向其根究索取已屬不曉事體。今據耿馬土司探聞該國將楊重英與原留雲南兵丁四名廣東客民七名送出而富綱又慮該頭目等重視居奇。將其來人並貢物象隻帶赴大理候旨遵行。用心太過。總不著要。試思楊重英為何物。富綱遽以為寶。欲待其送出。始將貢目人等一同護送來京。若係富綱被緬甸裹去送出。或須如此辦理。然亦當將貢目人等先行送京。其續行送出之人何妨隨後派員護送。斷無等齊起程之理。現在業渺瑞洞等染患瘧疾。未必不因在彼久耽時日所致。富綱何不曉事之輕重緩急。至於此極。真乃下愚不移。可恨可笑。著再傳旨嚴行申飭。將此由六百里加緊傳諭知之。仍將接

奉前旨。於何日派員護送貢使人等起程之處。據實明白回奏。○又諭曰。楊重英從前係被緬甸裹去。原與叛逃者不同。今經緬甸送出。伊係無罪之人。將來送到時不必加以鎖鍊。並著富綱向其傳知。以伊前被緬甸裹去。聞其到阿瓦後。總在寺廟寄居。並無娶妻生子之事。從前蘇武被匈奴羈拘。即在匈奴娶妻生子。及其歸漢。仍用為典屬國。如楊重英果無其事。是尚比蘇武為勝。即或亦經娶妻生子。不過與蘇武相等。亦無大過。雖伊回京後。自無顏復望如蘇武之得邀錄用。然亦不至治罪。該督傳知後。即令楊重英將有無在緬甸娶妻生子之事。自行據實說出。並派員帶同在後起程回京。諭令沿途安心行走。不必疑懼。○刑部奏遵旨議官員奉差出使赴任赴省。及迎送眷屬陸路有住宿公館舟行有旗號官銜其服物被竊。自與齊民有異。向照尋常竊盜律辦理。殊無區別。請嗣後俱加

尋常竊盜一等分別首從治罪至一百二十兩以上擬絞秋審列入情實若現係職官寓居民房或租賃寺觀店鋪賊匪無從辨識者不照此例又盜倉庫錢糧舊例三百兩以上絞候新例為首一百兩以上絞候前後參差或恐引用錯謬應刪舊文併入新例再竊盜漕糧向有入已數滿六百石者擬絞之例亦請照盜倉庫例一百石以上擬絞其一百石以下亦仿照一百兩以下律辦理從之○湖

北巡撫姜晟覆奏長陽縣被水據藩司陳淮勘稟水已涸退計共被災男婦一萬五千餘名口塌房八千二百餘間已提荊州道府庫銀五千兩倉穀三百餘石散給口糧修費民情安帖報聞○廣西巡撫孫永清疏報乾隆五十二年鎮安府小鎮安通判天保奉議三屬共墾旱田四頃三十畝有奇水田六十畝有奇水田埤一百三十埤有奇○癸亥工部奏本年戊申鄉試應修順天貢院經該府尹

奏需銀一千九百八十二兩零茲派員外郎海棟主事樊士鑑查勘覈減銀三十一兩零請令該府尹遵辦得旨此項工程共需銀一千九百八十餘兩之多該堂官自應親往查勘乃僅派員外一員主事一員勘估酌減該司員等經歷未久未必即能諳悉工程且或將所勘之工畧為酌減一二十兩竟與承辦之員有通同囑託情事亦未可定所有此項應修各工著派德成前往再行確實勘估嗣

後凡在一千兩以上者俱著奏請特派大員親往查勘○甲子諭福州將軍魁麟著改名魁倫○又諭據長麟奏查勘膠州壽光二處被水情形摺內稱膠州被水農民益藏漂失迨至禾稼登場尚需時日雖已給與一月口糧恐不足以資接濟請於存倉穀內再行借給一月口糧壽光無力農民亦照膠州辦理章程再行加借一月口糧等語膠州因河水漲發淹浸田廬雖據該撫查明現在地畝全

行涸出。每畝借給籽種。並已補種蕎麥。可望秋收。但該處民人猝被偏災。蓋藏漂失。前次所給口糧既不足以資接濟。自應再行酌給。但於秋成後。仍需徵收歸款。恐被災貧民無力清還。未免拮据。所有此次膠州加借一月口糧。竟著加恩賞給。其壽光一處。亦經該撫委令藩司查明。即照膠州章程辦理。並再行加借一月口糧。亦即加恩賞給。以示朕軫卹災黎有加無已至意。該部即遵諭行。○又諭曰。圖桑阿。陳淮奏。六月二十日。荆江夏汎。漲隨督同地方文武員弁。將護城各隄。築搶修。各城門下閘堵閉。分段照料。詎酉刻隄塍潰決。江水直逼城下。衝開西北兩門。滿漢兩城文武衙署。兵民房屋。以及倉庫監獄。俱被淹沒。兵民多赴城上及屋頂樹上逃生。其奔走不及者。多被淹斃。經陳淮令隨身家丁。紮筏渡赴沙市。招募船隻。圖桑阿亦動項雇船。分救滿漢兩城人口。赴城上搭棚棲止。

現酌動府倉南米散給撫卹。其駐防綠營兵丁。俱照例借給一月口糧。監犯現查獲三十名。其餘五十名。是否淹斃。或私逃。上緊查究。又隨陳淮辦事之州同婁業耀。被衝無蹤。至二十三日。水勢稍平。陳淮現在荊州。親身督查。俟辦有頭緒。方可回省等語。荊州江水汎漲。潰決隄塍。致滿漢兩城俱被淹浸。兵民四散逃避。其奔走不及者。即被淹斃。情狀聞之。惕然惻然。幸而陳淮因往長陽查災回省。適至荊州。伊係藩司。呼應較靈。得招募船隻。分救兩城人口。並酌動府倉散借兵民得資接濟。該司此時。自應在彼親身督查。此次荊州被淹情形甚重。姜晟一得陳淮稟報。自己起程前往。舒常目下亦當回任。並著馳赴該處。會同詳細查辦。著加意撫卹。一面奏聞。一面動給。勿使兵民失所。但該處隄塍興修未久。荊州前曾被水。其淹浸情形。並未聞如此之重。此次滿漢兩城均被淹浸。雖係大江夏

汎泛漲。究由隄塍不固。被水潰決所致。除交軍機大臣詳查具奏外。著傳諭舒常等。即將所決隄工。係何年何人承修。因何工程不固。以致潰決之處。查明據實奏。至州同婁業耀。隨同陳淮辦事。派在西門督夫閉閘。致被衝無蹤。該員係因公淹斃。殊堪憫惻。著該督等。即咨部照陣亡例議卹。其駐防及地方官各員內。如有淹斃者。亦屬可憫。並著該督等會同該將軍查明一併咨部。量予優卹。至監犯現無下落者。固應上緊查明分別覈辦。其現已查獲之三十八名。如係當時救出。另行監禁。自應仍照本案辦理。如係被水得生。自行投到者。尚為守法。即應照其本罪。量予減等。再緬甸貢使。現赴熱河瞻觀。荊州為必經之路。此次被淹情形較重。城垣廬舍多有坍塌。恐不足以壯觀瞻。著傳諭該督等。務將隄塍各工。上緊興修。如能於該貢使過境之前。一律興修完整。並將各兵民妥為安頓。固屬

甚善。如實趕辦不及。或令繞道行走。亦可。該督等務遵照妥辦具奏。將此由六百里加緊傳諭舒常姜晟。並諭令圖桑阿。陳淮知之。仍著該督等將何日起程前往。及現在查辦情形。各行迅速覆奏。以慰廑念。○乙丑。諭軍機大臣等。昨據圖桑阿。陳淮奏。荊江夏汎漲。潰決隄塍。將府城及滿城全行淹浸。已有旨令舒常姜晟速赴該處詳細查辦矣。此次荊州被淹情形較重。所傷人口必多。朕披閱奏摺。為之惕然惻然。該督撫到彼後。務宜詳悉查明。加意撫卹。一面奏聞。一面動給俾資接濟。不可諱飾。致兵民稍有失所。至水所淹浸。既在城郭地方。或於田禾尚可無妨。並著該督等逐加履勘。如亦有被淹損傷之處。即一併妥為撫卹。據實具奏。再閱圖桑阿等摺內。稱隄塍潰決時。衝開西北兩門。水遂入城等語。以所奏情形而論。隄應在江之南。而府城又應在隄之南。乃輿圖並一統志圖內。荊州

府城又繪在江之北與所奏情形不符並著該督等即將荆江在府城何方相距遠近若干隄塍在何處潰決詳細繪圖貼說呈覽將此由六百里諭令知之仍著將如何妥籌撫卹情形迅速據實覆奏以慰厯注○兵部議覆河東河道總督蘭第錫奏稱黃河北岸曹考廳原設都司上北河廳原設協辦守備自乾隆五十二年水勢更變上北河廳所屬等壩大溜逼近時須搶護必須職分較大人員統率照料其曹考所屬河勢平緩協備儘可料理請將上北河廳改為都司曹考廳改為協辦守備現任都司裴尚有守備馬福壽隨缺調補均堪勝任其守備銓記由藩司頒發都司關防咨禮部鑄給均應如所請從之○丙寅諭軍機大臣等據劉戡奏北運河自楊村以至通州俱係逆流每遇水弱之時在在古淺因定有起六存四之例現在未經抵壩之米尚有二百七十餘萬石以每日起米三

萬石覈算須九月底甫能起完今年河水甚為平順與往歲情形不同似無庸拘泥舊例多為起撥祇須起四存六即催令迅速北上免致耽延時日等語本年漕船渡黃較之上年既早十二日而裝運米石較之上年又共少十七萬餘石自可及早抵壩迅速回空但上年江廣各幫曾在北倉起卸今年河水平順與往歲情形不同無庸截撥即或楊村一帶帶有古淺處所起四存六亦可無虞淺阻不當復拘舊例以致稽遲時日又至九月底回空不免耽延守凍也劉戡所想甚是著交蘇凌阿等即將此次糧艘運抵楊村時是否可照劉戡所奏辦理並南糧各幫全數抵壩起卸能否較早無誤回空之處迅速妥議具奏○丁卯諭軍機大臣等前據圖桑阿陳淮奏荆江泛漲府城被水衝淹已屢諭令舒常等親往查勘妥為撫卹矣其摺內稱酉刻隄塍潰決江水直逼城下遽將西北兩門衝開等

語前次荊州被水時。水勢亦曾至城下。當將城門關閉。用土固塞。城內並未衝入。此次水淹府城。若係衝塌城垣而入。尚可諉為人力難施。今水逼城下。衝開西北兩門。自由城門並未固土。辦理不善所致。至隄塍各工。尤為禦水而設。本日據軍機大臣查奏。四十四六年。荊州兩次被水。俱曾借項興修。隄塍用銀七萬餘兩。及四萬兩不等。分年於各業戶名下徵還。該處隄工。因例歸民修。向無保固。督撫等既不慎重。揀派妥員辦理。而承辦之員。又以此項工程。係動用民力。並不認真修築。外省官辦工程。尚有草率浮冒情弊。何況民修之工。官員等從中偷減浮開。尤屬事之所有。以致隄塍不能鞏固。屢被衝決。而此次被淹情形尤重。著傳諭該督等。務遵前旨。即將現衝隄工。係何員承修。查明嚴叅著賠。以示懲儆。至該處被淹兵民情狀可憫。該督務當遵照節次諭旨。詳悉查明。加意撫卹。所有

此次撫卹被災戶口。以及修理隄工城垣。倉廩監獄。並兵民房屋。除官員衙署。可以分年借廉修補外。其餘共需銀若干之處。並著該督等。即通盤約計。大概先行具奏。若錢糧不敷。又可速撥。該督等務當親加履勘。切實估計。不得一任屬員藉端浮冒。豫為侵冒地步。也將此由六百里加緊諭令知之。仍將查辦情形。迅速覆奏。以慰廑注。○戊辰諭。向來漢大臣官員。有射中布靶三箭者。朕每格外賞戴花翎。以示鼓勵。是以前日張若淳曾中二箭。因不合式。未賞。本日汪承霈前來熱河。帶領引見。詢及伊從前射靶時。止中二箭。即賞戴花翎。前日張若淳亦中二箭。未經賞給。汪承霈係協辦大學士。尚書汪由敦之子。今張若淳亦係大學士張廷玉之子。且肯留心習射。尚屬奮勉。著加恩一體賞戴花翎。以示朕眷念舊臣之意。○諭軍機大臣等。據富綱奏。接奉諭旨。遵即委員伴送緬甸貢使人等於

六月二十一日。由大理起程。前往熱河瞻覲。等語。大理距熱河萬里。該貢使等於九月初間趕至熱河。沿途自須上緊趲行。方不誤展覲之期。但六月二十一日至九月初間。尚有七十餘日。以每日一百五十里計算。行走尚屬從容。倘或催趲太急。致該貢使等過為勞頓。途中有染患疾病等事。殊非體卹遠人之道。著傳諭沿途各督撫務宜揀派妥員。加意照料護送。俾該貢使等趕緊趲行。勿使過於疲乏。仍於九月初間。前抵行在。方為妥善。○又諭緬甸抒誠納款。極為好事。現在該頭目業渺瑞洞。既因患瘧。回至耿馬調理。此外大頭目。止有細哈覺控。委盧撒亞二人。目今尚在末伏。若復因途次趲行。或致受熱疲乏。成何事體。皆由富綱不知事之緩急。輕重糊塗。拘泥所致。著再傳旨嚴行申飭。至該國頭目從役人等。來者不下百人。續曾有旨。諭令富綱酌留一半。在耿馬照料。其餘一半。不妨令

其同赴熱河瞻覲。茲富綱已委員將貢使並小頭目跟役共二十八名護送起程。其餘人等送赴耿馬。回緬人數已為不少。不可因續接諭旨。又將已經送回人等復行追回。致該國人等徒勞往返跋涉也。將此由六百里傳諭知之。○以編修甘立猷為河南鄉試正考官。禮部員外郎李長森為副考官。修撰茹綦為山東鄉試正考官。編修吳鼎雲為副考官。編修周兆基為山西鄉試正考官。洗馬方燾為副考官。○調浙江提督許世亨為廣西提督。○河南巡撫畢沅疏報蘭陽縣乾隆四十八年開墾老河身內水涸地一項六十畝有奇。○旌表守正捐軀河南扶溝縣民趙安妻田氏。○己巳。諭前據圖桑阿陳淮等奏荆江夏汛泛漲潰決隄。將府城及滿城淹浸衝沒人口。朕覽奏為之惕然惻然。隨降旨令該督撫等即速馳赴該處。詳悉查明。加意妥卹。嗣據舒常奏得信後。即與撫臣會商。豫飭附

近各縣動穀碾米聽候撥運接濟復提取庫局錢銀以備應用伊即由水路起程親往查勘本日復據奏到日夜加緊趕往會同將軍等迅速妥辦等語前因舒常陞見回任後未經奏有回任日期是以諭令姜晟即速前往履勘妥辦今舒常既已前赴該處省城亦不可無大員彈壓且賑卹需用接濟米穀餅麵錢銀等項俱須由省城撥運姜晟自當在省籌備一切豫為佈置即可毋庸前往舒常到彼後務宜逐加履勘詳悉查明加意妥為撫卹一面奏聞一面即行散給俾資接濟毋致失所不可稍存諱飾至此次荊州被災情形較重附近村莊亦不無淹浸處所而長陽一縣前此亦經被水現在蒲圻漢川蘄水羅田黃梅鶴峯等州縣復據姜晟奏或因山水陡發或因湖河漫溢低窪田地間有被淹等語各處被水雖輕重不等同係災民自宜一體查明設法疏消妥為撫卹其有應行酌予賑

緩之處即據實奏明分別辦理不可因荊州府城被災較重皆專注意辦理而於別州縣被水處所未免心存忽視以致災民或有失所向隅之嘆舒常姜晟等務當一體詳加妥辦以仰體朕軫念災黎一視同仁之意又諭本年三四月間因諸臣條奏科場弊竇曾令大學士九卿議奏並降旨通行飭諭矣彼時據阿桂奏外間傳有謝墉抽身便討吳玉綸倒口即吞之語朕即以阿桂若僅奏謝墉聲譽不好伊二人前在吏部時原有齟齬而吳玉綸則並無芥蒂則其言似非無據即他臣雖未有明言其輿論平常而伊二人之在學差任內不孚衆情之處聞知者亦復不少學政為掄才所關既聞有舞弊營私情事安可置之不辦隨降旨令李侍堯閱鶚元各將謝墉吳玉綸在任聲名究竟如何之處就近訪查據實具奏前據閱鶚元奏謝墉初任江蘇學政聲名實屬平常其復任時尚知悔過

頗為謹飭。而李侍堯則稱吳玉綸在學政任內聲名狼籍。至今閩省士子猶懷忿恨。上年因吳玉綸條奏科場該省之人無不傳為笑柄。以吳玉綸即係作弊之人如何亦說防弊。但事隔年久實無憑據等語。適吳玉綸在熱河扈從隨面加詢問。據稱因伊曾條奏西監應行補捐一事。是以為眾所怨。昨謝墉帶領引見來至熱河亦面加詢問。據奏伊因考試過嚴未免取怨於人。及詰以因何有抽身倒口之語。伊二人則皆奏係寄園寄所寄小說所載陳言。想係怨之者因而附會等語。辦理科場本當嚴密。如果恪遵成法自矢潔清。士心正當翕服。即或有被遺之人為之散播謠言。亦何至憎茲多口。至吳玉綸條奏捐監係四十六年之事。而其簡放福建學政已在四十八年以後。相隔甚久。尤為兩不相涉。若云出自寄園寄所寄。則古今書籍所載陳言甚多。何以不取而附會他人。獨於謝墉吳玉綸

二人曲加附會不謀而合。但此事既經閱鄂元李侍堯就近查奏。並非無因。即將伊二人革職交刑部審訊治罪。亦不為過。姑念阿桂所奏究係傳聞。且無人不知。而李侍堯等亦因事隔年久查無確據。朕從來不為己甚。何必遽興大獄。但伊二人俱係大員。經朕特簡學政。乃聲名致此平常。朕甚愧焉。謝墉吳玉綸何以復勝卿貳之任。均著降調為內閣學士。其職不過專司批本。並無應辦緊要之件。伊二人學問尚可是以特予從寬降補。此皆朕格外矜全。伊二人務當痛自愧悔。勉為湔濯。如再不知悔改。必加倍重治其罪。其吏部侍郎員缺著朱珪調補。禮部侍郎員缺著鄒奕孝補授。兵部侍郎員缺著趙鏊補授。工部侍郎員缺著管幹珍補授。朱珪現在出差。所有一切吏部侍郎事務並著管幹珍兼署。至各省學政如有關節賄賣等情。督撫近在同省。斷無不知之理。前已有旨交該督撫等嚴行查

訪具奏。或言學政舞弊營私。本省督撫知而不舉。必係督撫自己廉隅不謹。恐為所訐。若該督撫等竟敢與學政通同一氣。作奸犯科。尚復何事不可為。然督撫等俱受朕深恩。特加委任。或不肖如王亶望、陳輝祖、郝碩、國泰者。職私纍纍。於學政弊竇。自不敢舉發。而王亶望等俱已先後敗露。立寘重典。亦不藉學政之叅奏也。但外省官官相護。惡習牢不可破。今屢經降旨通飭。各該督撫等務宜實力查察。如學政等有仍前情弊。立即嚴叅究辦。倘有心狗隱。必將該督撫一併從重治罪。決不姑貸。至士子等應試時。原不能無所去取。其取中者。自必感激無言。而被遺者。不免心存缺望。悠悠之口。固不足憑。但考官學政等果能秉公錄取。毫無弊竇。公論具在。斷不至如謝墉等之眾口一詞。貽譏謗。嗣後各該學政亦當益矢冰兢。公平校閱。勿滋物議。務拔真材。以副朕訓誨成全之至意。將此通諭。

知之。○又諭曰：楊重英之子楊長靈現在刑部監禁。今查明楊重英並無從順緬甸情事。是楊重英係屬無罪之人。伊子楊長靈著即行釋放。○又諭曰：蔡攀龍著來京引見。再降諭旨。所有福建水師提督員缺著哈當阿調補。其陝西固原提督員缺著王燾暫行署理。候朕另行簡放。○庚午。孝懿仁皇后忌辰。遣官祭景陵。○諭軍機大臣等：現在安南雖被阮姓攻占黎城。而嗣孫下落尚無確信。若據聲言進討。不免太早。止宜飭令附近之左江、高廉並雲南開化、臨元二鎮。以安南有事。恐賊匪乘間闖入關隘。豫備截拏為詞。各在本境整飭兵馬器械。朝夕操練。以壯其聲勢。俾該國人眾聞內地派兵豫備。或黎維祁借此聲援。糾集兵民。徐圖恢復。此亦一辦法。但仍宜不動聲色。妥為佈置。不可稍涉張皇。至該國高平、諒山等處。因與內地附近阮岳恐天朝進討。

先誘令從逆。著傳諭孫士毅。可即作為已意。檄諭各該鎮目等。以阮岳恃強篡奪。該鎮目等俱係黎氏舊臣。又與天朝接壤。理應幫同嗣孫勦賊。何得甘心附逆。黎氏臣事天朝最久。今該國臣下。膽敢肆行竊據。天朝已派重兵。豫備興師問罪。該鎮目等距內地尤近。倘能改邪歸正。擁戴舊主。不但可以轉禍為福。必邀大皇帝厚賞。若不速知悔歸正。將來大兵進討。必首就誅夷。決不寬貸。如此剴切諭知。庶可以斷賊匪之咽喉。而壯黎氏之聲援。自有裨益。○又諭安南被阮岳攻占黎城。黎維祁現赴山南等處糾集兵民恢復。但恐該國匪犯有逸入內地關隘情事。太平。廉州。開化等府屬。與安南接壤。俱屬毗連。各該關隘處所。即應嚴為防範。著富綱即飭令陳大綬孫起蛟於開化臨元二處。與安南相接隘口。多派弁兵。備齊器械。分為布置。以壯聲勢。並著嚴密防堵。如該國賊匪敢有闖入邊境

之事。該鎮等即率領弁兵四路截殺。其或有潛行逸入者。亦即盡數擒拏。勿使得有一人縱逸。○辛未諭。前據圖桑阿陳淮奏。荊州江水泛漲。隄塍潰決。以致府城及滿城均被淹浸。覽之惕然惻然。已屢有旨諭令舒常等迅速前往詳晰查明。妥加撫卹矣。看來荊州被淹情形甚重。本日又據圖桑阿奏。該處城垣。四十四六兩年曾兩次被淹。城垣亦不堅固。此次被淹更重等語。荊州城垣既兩被水淹。此次因衝開西北兩門。水直入城。城內水深一丈餘尺。雖漸次消落。而城垣經此一番淹浸。基址必至鬆動閃矧。勢須另行修建。朕意該處城垣既屢被水淹。自因江水頂衝之故。而城內水至丈餘。其地勢亦必低下可知。但該處為古來重鎮。近乃屢被淹浸。殊非捍衛久安之道。或江路有所遷移乎。茲既另須修建。何必與水爭地。莫若擇一地勢較高及非頂衝之處。酌量移建。庶可以一勞永逸。若該

府民人安土重遷。或難改徙。不妨將城垣衙署酌移高阜處。所收小改建。亦無不可。至該處城工既需另建。而衙署倉廩監獄以及駐防官兵房屋一切。亦被水淹。均須查明分別修建。其被災人口。尤應亟行撫卹。需項浩繁。該省藩庫所存銀兩。必不敷用。著於戶部庫內。動撥銀二百萬兩。並派戶部司員二人。每人管解銀一百萬兩。徑送荊州應用。並著沿途各該督撫。速備人夫車馱。直隸著派梁肯堂。河南著派景安。湖北著派李天培。並各派出道府營員一體護送。以期迅速解到。至此次荊州城垣。可否改建。及尚可因舊。朕不能懸度。及一切撫卹事宜。所關甚鉅。恐舒常。姜晟等見識未能周到。阿桂歷經委任。自能善體朕意。德成於工程。亦為諳習。著派令由驛前往勘辦。所有城工應否改建。及如何籌辦。毋致再被水淹之處。著交阿桂會同舒常定議具奏。改與不改。阿桂定之。其料估城垣倉

廩及駐防官兵房間等項工程。著交德成覈實估計具奏。阿桂德成接奉諭旨。即日迅速起程前往。不必前赴行在請訓。其詳悉俟朕細思續有指示辦理之處。即行由驛陸續寄知。阿桂等到彼。當詳細籌勘。妥協辦理。不必泥於遵旨。以副朕軫念兵民保障久遠至意。其留京事務著綽克托代辦。○又諭荊州被水駐防兵丁。衝斃多人。房屋器具皆被淹浸。殊為可憫。著將借給伊等銀兩俱施恩免其繳還。其淹斃馬一千二百餘匹。不必買補。且現在亦無拴養之地。著交烏爾圖納遜等照數於牧羣內擇其肥健者。於明年秋涼咨付。並令圖桑阿等派兵接護分給。免其繳價。仍著阿桂查看被災情形。如尚有應行賞卹之處。即一面奏聞。一面辦理。以副朕軫念兵丁有加無已至意。○諭軍機大臣曰。蘭第錫畢沅奏伏汛安瀾。工程平穩。一摺。覽奏以手加額。已於摺內批示。惟所稱商邱以東虞城曹

單各汎舊河身內。每次長水均較上游積多二三尺。並有出槽串溝之處。此或河身內有淤淺處。所以致不能暢達。著蘭第錫畢沅。即將該處實在情形。繪圖貼說呈覽。至現在雖已立秋。伏暑大雨漸少。而秋汎方長。尤應倍加敬慎。朕亦同矢此心。著該督等務飭道廳員弁協力齊心。嚴密防守。俾工程益臻鞏固。不得因伏汎已過。稍有疎懈。將此傳諭知之。尋奏商邱各汎自十堡新河尾以西。灘面尚低。每長水四五尺。即致出槽漫灘。是以積長較少。商邱以東老河身兩岸陡聳。水勢收束。易於擁高。是以積長多於上游。又六月間啟放毛城鋪峯山閘。虞城一帶掣溜迅速。河底衝刷益深。去路通暢。可無於淺之患。得旨覽奏稍慰。又批。益當勉力慎守。○又諭荊州隄塍修理未久。如果工程堅實。何至屢被水衝。已有旨交舒常等查明嚴叅。恐該督意存迴護。或任令地方官捏稟。以所修隄塍已被衝

潰。無從查考為詞。希圖朦混。朕思隄塍道路綿亘。即被衝處。亦必有基址可驗。德成於查工一事。尚屬認真明白。著阿桂會同該侍郎。逐一親加驗勘。如有工程草率。及偷減情弊。即分別嚴叅著賠。又荊州為關聖帝君鎮守之地。該處必有廟宇崇奉。今城內水深丈餘。恐廟貌亦不免浸損。如將來城垣應須移建。自當將舊有棟宇。移在新城建蓋。若城垣實難移建。務須將原有廟宇。重行修整。俾輪奐一新。以壯觀瞻。而崇虔祀。○旌表守正捐軀河南唐縣民羅天才妻李氏。○壬申。諭軍機大臣等。據毓奇等奏。七月初六日。已將南漕三進尾幫。全數催進東省等語。今年南漕尾幫渡黃。既較上年早十二日。其入東境日期。又較早十二日。即將來卸運回空。自應亦比上年較早。蘇凌阿等前因東省漕船有脫幫斷續之事。即行奏聞飭催。現在各幫重運源源而來。伊等必又以米數較

多收却不及為詞。本年南漕渡黃入東俱早。而運河水勢充足。一路過行無阻。各省重運。竟當全行抵通。不必再行截留北倉。即或因米數較多。在通倉廩一時受兌不及。計時已屆白露。雨水甚少。秋高氣爽。竟不妨擇地暫為露囤。俾各幫漕糧及早兌卸。回空船隻得以早抵水次。方不誤新漕兌運。蘇凌阿、劉東恬等務宜上緊妥為辦理。不得又以此次漕糧較多。一時受兌不及為詞。希冀諉卸。如不

能趕緊妥辦。起卸停延。致幫船候兌需時。不得及早趕回水次。或途中復有守凍等事。惟該侍郎等是問。蘇凌阿、劉東恬恐不能當其咎也。將此傳諭知之。○癸酉。諭前據書麟、李奉翰奏黃河水勢。於五月內陸續增長。淮水來源亦復旺盛。足以抵禦黃流。暢達東注。現時屈伏汎。各工平穩等語。覽奏深為欣慰。續又據蘭第錫、畢沅奏南北兩岸各工。於六月內長水自五六尺至八九尺不等。皆於一二

日後旋即消落。舊有險工。俱各搶護平穩。現在伏汎安瀾。工程鞏固。尤為以手加額。目下雖甫交秋令。暑雨漸少。而秋汎方長。尤應倍加敬慎。朕與河工諸臣當共矢此心。但本年河流順軌。運道深通。自賴神明助佑之力。向來四漕雖各有專祀。而工所黃淮河神。每歲春秋未經官為致祭。典甚闕焉。自宜特重明禋。以昭靈貺。所有江南及河東等處工次。建立

黃河神廟。並江南清黃文匯地方所建

淮河神廟。俱著於每年春秋二季。官為致祭。交該部載入祀典。並著翰林院撰擬祭文。發往於致祭日。敬謹宣讀。以崇功德。而報神庥。○甲戌。諭曰。德成現在出差。所有查估貢院工程。著改派伊齡阿。○諭軍機大臣等。據阿桂奏前往荊州查勘。應否改建城垣。摺內稱向熟諳該處情形之人。留心訪問。聞得荊州府治對岸一帶。向有洩水之路。八處近惟虎

渡一處。現在尚可洩水。其餘七處俱久在湮廢。江水分洩之路既少。又沙市對岸有地名窖金洲。向來祇係南岸小灘。近來沙勢增長。日加寬濶。江流為其所逼。漸次北趨。所謂南漲北坍。以致府城瀕江隄岸多被衝塌。屢致淹浸。其故或由於此等語。荊州為古來重鎮。城猶是城。江猶是江。何以從古俱未聞有被淹之事。而本朝百餘年來。亦未聞此事。乃十年之間。四十四。六。及本年。三被淹浸。而此次江水竟至衝入城內。朕即疑必因江流或有遷徙。密邇城垣。頂衝受惠所致。今據阿桂查詢。荊州對岸洩水之路。竟有七處湮廢。而窖金洲小灘。近復沙勢增長。寬濶。以致江流漸次北趨。府城瀕江隄岸。多被衝塌淹浸。觀現在被水情形。則阿桂所言。竟是該處受病有由。已非一朝一夕之故。而地方官之漫不經心。已可概見。現在阿桂到彼。尚需時日。著傳諭舒常到彼。先將荊州對岸一帶。親加履勘。

是否實係該處洩水之路。漸就淤塞。窖金洲沙勢增長。逼江北趨。即行查明。據實具圖。貼說覆奏。不得因失查於前。又復迴護於後。阿桂到後。亦即行詳悉查明覆奏。又據阿桂奏。荊州城垣。一切佈置規模。由來已久。不便輕議更張。即當察看地勢。或於府城瀕江處所。築建雞嘴石壩之類。逼溜南趨。將窖金洲沙。漸次衝刷等語。所見甚是。荊州城垣。若需移建。則衙署倉廩監獄等項。概須搬移。所費不貲。況該處素稱富庶。民人世居其地。亦不免安土重遷。朕意若府城可以無需移建。即當於瀕江處所。酌建石壩。逼溜南趨。再將從前洩水故道。擇其疏洩得力。易於修復者。即為挑浚。並將窖金洲上。挑挖引河。俾府城不受水頂衝。自可長期鞏固。阿桂歷經委任。諸悉形勢。務與舒常酌籌盡善。因利乘便。妥為辦理。總期一勞永逸。方為妥善。將此由六百里各傳諭知之。○又諭。安南臣民人等。與內地

赤子無異。况阮輝宿等護送嗣孫之眷屬。避難內投。復情願回國。找尋嗣孫通信。該督即應一面奏聞。一面派員帶同分赴雲南廣東二路。指引出口。乃不致誤事。何必尚待奏聞。孫士毅係曉事之人。不應辦理拘泥。若此。如此時該陪臣等由雲南廣東回國。所需口糧。夫馬等項。內地沿途有地方官為之備辦。其出口後。必無所仰給。著每人賞銀一百兩。俾資接濟。再該國眷屬現在龍州安插。將來該國迎回時。必須告知此次遣回人等。於伊三人內。遣一二人前來。始准其迎回。若該陪臣等先已起程。不及告知。亦當傳知留侍之人。令其細思該國有何記認。以便將來作為符驗。否則恐阮岳等暗遣黨羽冒充使臣。將該國眷屬誑回。戕害不可不慮。此係朕代為籌畫萬全。孫士毅可將此二節。親向該陪臣等詳細傳知。以此事皆出自大皇帝恩典。為爾國籌及無微不至。使之倍加感激。思奮也。

○豁除四川灌縣大灣桂花坪聯陞塘水衝石壓地八千八百畝有奇額賦。○旌表守正捐軀河南濟源縣民王本妻趙氏。○乙亥中元節遣官祭

永陵
福陵
昭陵
昭西陵
孝陵

孝東陵
景陵
泰陵
泰東陵○遣官祭
孝賢皇后陵

端慧皇太子園寢○刑部奏。向例滿流之犯。脫逃改發附近充軍。係由配所計程迴避。原籍相近之地。並經奏明。軍犯由附近近邊脫逃者。照此辦理。今據江西撫臣何裕城咨稱。

萬年縣拏獲逃回軍犯竊盜方潤。原發河南陝州。旋因逃獲。改發甘肅涼州。茲又逃獲。應改發山西蒲州。臣等查五軍道里表。涼州應發之近邊。除西北抵邊不足里數。其東南所至之蒲州等處。皆與該犯原籍相近。名為加重。其實轉輕。請嗣後凡遇此等難遵定表者。即加一等改發。如近邊則以邊遠計。邊遠則以極邊計。總以距原籍四千里為限。方潤一犯。即此照辦。報聞。○湖廣總督舒常覆奏。緬甸貢使入覲。荊州積水既多。寓館被淹。亦無宿處。現聞雲貴摺差。多由常德長沙武昌一路。出應山縣。入河南境。不過畧遲數日。請改由此路行走。得旨。是。

平定李士才

三十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三百八

實錄李士才

三十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三百九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉上諭事件處管理

吏部理藩院事務稽察滿洲都統世襲騎都尉軍功加七級隨帶加級尋常加二級軍功紀敘一次臣等謹將

總裁官經筵講官太子太傅文華殿大學士文淵閣領閣事稽察欽奉上諭事件處管理刑部戶部庫事務

世襲騎都尉軍功加九級隨帶加二級又加二級尋常加二級軍功紀敘五次臣等謹將

尋常紀敘十四次臣等謹將經筵講官太子少保工部尚書紀敘六次臣曹振鏞等奉

敕修

乾隆五十三年戊申七月丙子諭軍機大臣

實錄卷一千三百九

等前據已延三奏刑部議駁神木縣路榮治毆傷賊匪溫如良致死一案因溫如良有假充差役串詐情事復敢鎖打良民以致路榮治回毆斃命是以將路榮治擬流該撫所奏尚得情理之平本日經軍機大臣將刑部原題查奏向來此等部駁之本內閣均票三簽朕覽其部駁允當者即用部駁甚是之簽若在兩可則用依議簽此案部本上時朕以該撫自必將辦理緣由據實具奏是以僅用依

議之簽發下看來此案溫如良本係賊匪又

有假差串詐情事而路榮治本係無罪之人

因被打回毆致斃已延三原辦尚為允協著

即傳諭刑部堂官即行改正減流具奏其已

延三所請處分竟可寬免朕於辦理庶獄惟

期其是從不稍存成見該堂官等尤不應迴

護原駁也○丁丑

上御卷阿勝境賜平定臺灣凱旋將軍福康安

參贊海蘭察等並扈從王公大臣御前乾清

實錄卷一千三百九

門侍衛等宴○諭曰李侍堯自調任閩浙總督辦理軍需諸皆妥協本欲俟大功告竣後仍將伊原襲伯爵賞還嗣因其於崇大紀種種營私舞弊不據實參奏咎實難辭是以未經給與第念該督係在事後赴任於崇大紀未經覺察尚屬可原且駐劄泉州廈門承辦軍需及調度一切始終無誤李侍堯著加恩仍賞還原襲伯爵至李奉堯承襲以來並無過失今既將伯爵給還伊兄李奉堯並著賞

給提督銜。此係朕宥過賞功恩施格外。李侍堯等宜倍加感激奮勉。以副委任。○諭軍機大臣等。臺灣生番前據福康安奏於秋涼後令其起程渡洋來京瞻覲。因思此次該義民人等隨同打仗殊為奮勉。其中如曾中、辛黃、莫邦等已賞給同知都司等銜。並令送部引見酌量補用。著傳諭李侍堯等即令應行引見之義民與生番等俱於秋涼後一同起程。並計算日期務於十二月十五以前到京。以

實錄卷三〇九

便同年班衆部共入筵宴。俾伊等仰荷寵錫觀光。倍加感奮。○以四川松潘鎮總兵穆克登阿、建昌鎮總兵張芝元對調。○戊寅諭臺灣兵丁遠涉重洋費用較多。向例係支本身錢糧。其原籍恐不敷養贍。應如何加恩。又海口兵丁所得掛驗番錢亦應官為經理。其巡查兵丁俱當輪流出派著軍機大臣妥議具奏。○又諭據舒常奏馳抵荊州查明被水情形一摺。並據繪圖呈覽。詳閱圖內沿江隄工

漫潰至二十餘處。各寬十餘丈。至數十丈不等。是此次荊州被淹較重。竟由隄塍不固所致。該處隄工於四十四、四十六兩年被水後均曾借項興修。如果工程鞏固何致屢被潰決。外官習氣不堪。官工尚且思肥。已況此項工程例係民修。向無保固承辦之員。並不認真妥辦。草率從事。甚或侵漁入己。均屬事所必有。屢經降旨交阿桂等查明嚴叅。著阿桂到後即會同舒常等詳細查明。以十年為限。所有現決之隄工如在十年以內興修者。承修之員俱當從重治罪。仍著落賠補。其監修之該管道府及藩司督撫等亦著一併查叅。分別議罪。著賠嗣後並著定限保固十年。如在限內衝潰者。即照此嚴行叅處。以示懲儆。此次荊州被淹既因隄工不固之故。則該處城垣自以不移為是。著德成到彼後詳細察勘。堅實重修。以垂久遠。其衙署倉監等項並著阿桂、德成等會同確勘。分別動借。以次興

修。至該處隄。膝為全郡保障。所關甚重。從前因係民修。以致地方官辦理不善。任意剋減。屢被衝淹。況該處人民。現在被災較重。朕心方為惻然。亦不忍再令其自行修理。所有此次應修各隄。工竟著動項興修。官為辦理。並著阿桂德成。妥為估計。務期加高培厚。認真修築。俾崇墉屹立。永資抵禦。其將來每歲修理。需費無多。再照例辦理。以示體卹。又據舒常圖桑阿等奏。坍塌兵房。請借銀修復。分年扣還一摺。此次荊州被淹。尤重。所有該兵丁修復房屋各費。朕亦不忍復令其扣還。前已有旨。竟全行賞給。並著阿桂等到彼後。即遵前旨。會同查明。妥辦。仍酌量撫卹。俾無失所。至城廂內外。淹斃大小男婦人口。經舒常等查明。共有一千三百六十餘名。此等民人。因躲避不及。倉猝淹斃。實堪憐憫。皆當賜卹。其餘各災戶。現在城上搭棚居住者。尚有一萬餘人。雖據舒常奏。連日天氣晴明。兼之撈獲

各倉濕米。散給餬口。人心安帖。覽奏為之稍慰。但各災戶被淹之後。房屋坍倒。棲止無所。而田禾被水淹浸。亦恐多有損傷。著舒常等即先行詳悉查明。加意撫卹。似此重災。祇當期於無遺。不必復言無濫。該督等宜善體朕意。妥協辦理也。又據姜晟奏。接准督臣咨會。續調銀二萬兩。錢四千串。解赴荊州應用。已飭照數解往等語。荊州現有修建隄城垣各工。及撫卹兵民之用。需費浩繁。慮該省藩庫所存。不敷動用。早發戶部銀二百萬兩。派員迅速解往。並著阿桂等到彼通盤約算。如尚不敷用。即據實奏聞。以便再行撥解應用。至楚省今年被淹處所較多。前據姜晟奏。長陽蒲圻等處。皆被水淹。已有旨諭令一體查明。妥辦。今日又據該撫奏。漢陽武昌兩城。俱因江水過高。城中積水。無從流瀉。低窪之處。間致淹溢。省城貢院。尤為低下。湖水漬入。號舍等語。現屆賓興大典。所有淹漬號舍。著該

撫卹上緊設法疏消。其被淹各處雖有輕重不等。但同係災民。皆當一例撫卹。不可因荊州府城被災較重。皆注意在彼。而於被水之別州縣未免心存歧視。致有失所向隅之處。姜晟現在省城籌備一切。並著該撫一體詳加妥辦。以副朕軫念災黎一視同仁有加無己之至意。○諭軍機大臣等。據何裕城奏江西浮梁鄱陽二縣為安徽省祁門等縣下游。於五月初七八等日。祁門之水。下注奮迅。幸所過溪河兩岸皆山。兼有高塢。逕達鄱湖。不致泛溢。於田廬並無妨礙等語。本年安徽湖廣二省水勢較大。間有泛濫之患。江西浮梁鄱陽二縣。因與祁門接壤。致被水衝。雖其地不過一隅。然該撫亦不可心存大意。如於民田廬舍。稍有淹損之處。即當查明撫卹。毋稍諱飾。至所奏祁門人口隨流而下者。業經該撫設法撈獲除屍。棺名令掩埋外。其活口暫為養贍。現已咨明陳用敷令其親屬前來認領。

等語。自當如此辦理。將此傳諭何裕城。並諭陳用敷知之。○又諭據勒保等奏。拏獲邪教人犯。搜出悖逆經卷。摺內稱有鳳翔縣民章茂。稟首有寶雞縣民雷得。本自稱神仙。設立悄悄會。名目誘人出錢入會等情。隨即知會已延三。密飭司道等帶同明幹員弁。前赴鳳翔寶雞扶風汧陽隴州岐山等屬逐一查拏。首夥雷得。本李如璽侯榮侯受廷等。起出數珠經卷。經內語句均有悖逆。并究出傳鈔經卷之馬本李李文王喜譚四。胡迎瑞及出錢入會之蘇孝儒等。男婦大小三百餘名口等語。所辦甚好。雷得本妄立悄悄會名目。倡言煽惑。令馬本鈔錄數珠等經。分給李文譚四等。以念經避難為詞。哄人出錢入會。輾轉招引男婦至有三百餘名之多。勒保等督飭司道幹員將該犯等立行拏獲。尚為認真著傳諭勒保等即將該犯等嚴切根究。審明後即一面正法。一面奏聞。不得輾轉稽延。致令免脫。

再另行傳教之楊忠呂良棟二犯曾否拏獲之處未據該署督等於摺內聲明並著詳悉查明如尚未拏獲及此外是否尚有未經緝獲之犯並著一併嚴拏務獲歸案辦理以期淨絕根株勿使遺孽得有漏網○河南巡撫畢沅奏河北彰德懷慶衛輝三府先因未得透雨遵旨採買河南麥十萬石協濟計共運過四萬餘石設厰平糶旋於六月初旬得雨深透私糶爭先糧價大平應將官糶停止其未運之麥查歸德各屬連年賑濟倉儲尚缺請即以此項撥補得旨知道了○已卯諭向來各省副將人員該督撫等於年終出具考語祇係照例辦理其名列一等者不過供職勤慎未必皆實係人材出衆堪勝總兵之員現在記名應用總兵人員不敷簡用著各總督及兼提督銜之巡撫即於節次保列一等之副將內詳悉秉公察覈擇其材具優長訓練有方實勝專閫之任者各省保舉數人

出具考語具奏候朕酌量簡用○又諭據舒常奏荊州沿江隄工漫潰至二十餘處各寬十餘丈至數十丈不等此事前據圖桑阿陳淮奏隄工潰決後江水衝開西北兩門而入朕意該處西北兩門被衝大江自應在府城之北及查閱輿圖及一統志圖大江則皆繪在府城之南昨據舒常所進之圖又與輿圖所繪南北方向相同江既在南則城內被淹時水勢自應由南門而入何以此次又繞至北門殊不可解此皆從前承修隄塍各員見該工例應民修任意草率偷減侵肥入己該管上司復不以事為事以致工程不固一經江水漲發不足抵禦在在潰決江水建瓴而下將並非頂衝處所亦被衝淹况閱圖內隄工潰決共有二十餘處自係迤西之隄先行潰決是以水勢由西南繞至西北遂至衝開北門入城以致成大災無疑昨福建臺灣文武員弁因循玩愒肆意貪婪竟致釀成逆案

不得不徹底究辦。湖北吏治亦屬廢弛已極。活埋冒賑之案相繼敗露。其辦理鹽務軌敢私立匪費名目大小官員。染指肥橐。累商滯課。今於承修隄工又復一任劣員肥己。誤工屢被衝潰。而此次江水竟至淹入城內。被災甚重。前據圖桑阿查奏滿城淹斃者共四百餘名。昨又據舒常查奏府城大小男婦淹斃者一千三百餘名。外省官員於災傷向有諱飾。茲報出者已有一千三百餘名之多。則其諱匿不報者必尚不止此數。想來不下萬餘。此等災戶流離顛沛傷斃多口可憫可憐。皆由隄工不固以致罹此重災。若不將承辦及該管之員從重治罪。又復何以示懲儆而慰輿情。除交軍機大臣將十年以內歷任湖北督撫藩司及荊州道府詳細查明具奏外。並著阿桂到彼後即將十年以內之承修隄工官員暨該管各上司一體詳查嚴叅分別從重治罪。仍著賠補用昭懲創。至沿江隄塍為

百姓保護田廬而設。固應動用民力。此次因被淹較重。朕不忍仍令被災之民按例修理。業降旨動用帑項官為堅實修築。永資保障。俟將來每歲修理需費無多。再照例辦理。但該處民人甚眾。若竟歸民修。不復官為經理。則百姓等誰肯首先出貲踴躍從事。即如井田之制宜古者未必宜今。若此時而沿襲井田。即雨我公田遂及我私之句。亦徒成虛語。是將來修理隄塍各費派之於民。而仍當官為經理。第不肖官吏於官工尚思侵剋肥己。矧此項工程例歸民修。並無保固官員等不特於需費之外可以藉端加倍灑派入其囊橐。而且草率從事偷減侵漁均屬事所必有。其該管上司又因係民修之工遂爾漫無查察。殊非慎重隄防保護民命之道。自應定立章程於應修時派委大員確加勘估。借項興修。俟報部覈准後再按畝攤徵歸款。並定以保固年限。如在限內有潰決之事。即嚴叅治

罪著賠。庶工程可期永固。而官員亦不敢有侵蝕情事。方為妥善。除此次應修之隄。交阿桂德威妥為估計。動項官辦外。其將來民修隄工。作何稽察保固之處。著阿桂到彼後。即會同舒常悉心妥議具奏。再舒常所進之圖。未甚明晰。閱之不能了然。著該督即將此項隄。先由何處衝決。江水又因何繞至北門。其被淹各處所。係何地方。另行展寬圖幅。詳細繪圖貼說呈覽。尋奏荊州隄決。先自城西四十里萬城隄之中方城潰塌。并及遙下之上下漁埠。及玉路口等處。致由西門衝湧入城。此地距大北門止二里餘。城北有土崗。較高。水流至此迴溜湍急。遂將大北門塌塌。并小北門東門相繼衝瀉。報聞。○諭軍機大臣等。我朝肇基定鼎以來。關帝屢著靈應。業經迭晉封號。備極尊崇。據福康安奏臺灣賊匪滋事以來。府城東門城樓上。

開帝賜佑著靈。是以大軍一到。即得迅速藏功。安穩配渡等語。著傳諭李侍堯徐嗣曾等於改建城垣時。將該處舊有廟宇。重加修建。不可換塑聖像。但須將殿宇式廓輪奐一新。以壯觀瞻。而隆妥侑。仍候朕親書扁額發往。敬謹懸掛。用答靈貺。○

御書扁曰。神威翊應。○以陝西河州鎮總兵王景為固原提督。江南壽春鎮總兵觀成。為浙江提督。降福建水師提督蔡攀龍。為江南狼山鎮總兵。調浙江黃巖鎮總兵王柄。為江南壽春鎮總兵。以巡捕中營副將路超吉。為陝西河州鎮總兵。江西九江協副將劉文敏。為浙江黃巖鎮總兵。○庚辰。諭。昨福建臺灣文武員弁。因循玩愒。肆意貪婪。釀成逆案。不得不徹底究辦。因富勒渾雅德。久任該處督撫。皆係伊二人之罪。即經拏交刑部治罪。茲湖北官員。雖無釀變情事。而其廢弛貽誤。竟與相等。此而不行嚴辦。其何以懲貪玩而慰輿

情。特成額擢用湖廣總督。在任三年之久。首為廢弛。所有活埋冒賑各案。俱係伊任內之事。乃於該管隄工。又復毫無覺察。其罪竟不減於富勒渾雅德。似此負恩溺職。豈可復令駐劄回疆。仍帶翎頂管束人眾。特成額著革職。拏交刑部治罪。所有烏什事務。著侍郎明興前往接管。此旨。即著明興帶往。俟其行抵烏什。親向特成額宣諭。後將伊拏問。即派委妥員。迅速解京。交刑部治罪。務於冬至前趕到。勒保現署陝甘總督。回任尚需時日。所有山西巡撫事務。著梁肯堂暫行前往署理。梁肯堂現派令護送戶部解往荊州銀兩。所有頭起之一百萬兩。已於十九日起程。本日據畢沅奏。請於河南徵存地丁銀內撥出一百萬兩。就近解往。俾速資接濟等語。已准其就近撥解。其戶部二起銀兩。尚未起程。即毋庸解往。以省運費。梁肯堂俟頭起銀兩解送出境後。即由彼速赴山西署事。梁肯堂未到之

前山西巡撫印務。暫交鄭源璣護理。直隸布政使印務。著富尼善署理。其按察使印務。著該督揀選妥協道員。奏明署理。朕本欲舒常來京供職。因其曾任湖廣總督。上年李侍堯調任閩浙。一時乏人。以舒常人尚小心。是以差往署理。續行實授。今該省似此種種廢弛。貽誤舒常。並未據實陳奏。咎無可辭。豈可復膺封疆之任。舒常即著解任。留於荊州工次。効力自贖。李封曾任該省巡撫。並不能實力整頓。相沿玩誤。伊亦無顏在京供職。並著前往荊州。管工効力自贖。其行在刑部印鑰。著福康安帶管。現在荊州隄塍城垣各工。已命阿桂德成前往勘辦。阿桂等將大局勘定估明後。即交與舒常。李封在彼監修。俟各工及災賑等務完竣。另降諭旨。其十年以內之承修官員。並該管各上司。仍著阿桂遵照前旨。詳細查明。分別嚴叅。從重治罪。並著賠補。用昭懲創。所有湖廣總督員缺。著畢沅補授。目

下河南並無緊要應辦之事畢沅接奉此旨不必來行在請訓即速往荊州辦理撫卹各事其河南巡撫員缺著伍拉納補授徐嗣曾現在臺灣承辦城工諸事其巡撫事務係伍拉納護理伍拉納俟徐嗣曾回至內地後再赴河南新任伍拉納未到之前河南巡撫事務著惠齡速行前往署理惠齡現在出差距豫省不遠伊係朕素知之人不必再來請訓即著就近馳往河南署事李侍堯雖到湖廣

正署將及一年履任未久亦難辭咎但念伊到湖廣任後即將活埋人命一案據實查叅隨即調任閩浙於地方諸事不及整頓未暇查出且伊到福建後即在泉州廈門辦理軍需一切始終無誤功過實足相抵著加恩免其治罪姜晟到任未久將來查明亦可從寬此係朕格外矜原李侍堯姜晟當倍加感激奮勉自効毋負委任朕臨御五十餘年敬天勤民孜孜不倦於臣下功過輕重惟視其人

之自取固不肯為已甚亦必去其太甚貪玩從不稍寬而權衡務歸至當所有臺灣及荊州兩事地方官懈弛玩愒誤公殃民至於此極朕不能早行查察弭於未然朕方引以為愧今相踵敗露安可再事姑息不為從嚴辦理以儆將來為此明白宣諭大小臣工嗣後務當益知儆凜倍矢清勤以副朕整飭官方諄諄教誡至意將此通諭知之○諭軍機大臣等據陳用敷奏雨水早稻情形摺內稱懷

寧桐城宿松望江貴池東流銅陵當塗蕪湖繁昌無為和州等州縣沿江低處洲田因江水漲發間有漫溢又潛山太湖青陽建德蘆江舒城巢縣鳳陽靈璧懷遠泗州盱眙五河含山全椒建平平等州縣亦因湖淮水長低窪田地稍有漫淹現在逼近江湖地畝尚有積水等語該省休寧祁門黟縣等處本年五月內被水衝壓田畝受淹節經降旨令該撫等加意妥為撫卹茲懷寧桐城等州縣雖係一

隅偏災。但現屆立秋水尚未消。已難再行補種。亦應加意撫卹。著傳諭陳用敷。即將被水田畝。詳悉查明。其有應行撫卹者。即妥為分別撫卹。毋致貧民失所。斷不可因係屬偏災。稍存諱飾。以期仰副朕軫念災黎至意。○刑部議奏。江西龍南縣民鄺細祥殺死一家非死罪三人。應凌遲處死。其幼子鄺善書。倒應附近充軍。查絕人後嗣之人。其子轉得娶妻生子。殊未允協。請將鄺善書解交刑部監禁。俟年十歲時閹割。并行知各督撫。嗣後凡遇此等案件。俱照此辦理從之。○以福建按察使伊轍布為布政使。○開採福建上杭縣郭車鄉大巖背山磺礦。從總督李侍堯請也。○封閉奉天府遼陽州黃旗溝煤窑。從將軍慶桂請也。○旌表守正捐軀直隸鉅鹿縣民王六妻田氏。○卒已。諭據李侍堯奏福寧鎮總兵何俊呈稱。據護理連江營遊擊守備柴必魁稟報。巡查東岱堡礮臺。原安大礮六位。現

存五位。又浦口寨地方。原安大礮四位。現存三位。俱各遺失一位。請將護理連江營遊擊事守備柴必魁革職嚴訊。福寧鎮總兵何俊交部嚴加議處等語。此事大奇。海口地方。安放礮位。原為防禦要隘。而設。關係極為緊要。乃該處將弁等。並未留心管守。以致遺失。且此等大礮。又非海洋盜賊所能竊取。使用乃於何時失去之處。詢之該弁兵等。俱稱不知。是該處汛地。平時竟無弁兵看守。營伍廢弛。至此尚可問耶。此案必須徹底究訊。從嚴辦理。以肅營政。而重海疆。守備柴必魁。雖經自行報出。但護理遊擊。已及半載。失礮汛地。距伊駐劄之所。僅數十里。豈無見聞。自係派委兼管東岱堡守備後。勢難隱諱。始行據實呈報。著即將該守備革職拏問。提同該管汛地。已革之署守備千總許明陞。並署千總林為邦。及看守礮位兵丁。嚴行審訊。定擬具奏。總兵何俊。於該管地方。兩處遺失礮位。如果平日

管轄嚴肅。何至疎玩若此。僅予嚴議。不足蔽辜。福寧鎮總兵何俊著革去總兵降補守備。仍留閩省効力。至該二汛既有遺失礮位之事。其通省各標營應貯礮位。是否照數無缺。並著李侍堯通飭嚴查。再行據實具奏。該部知道。○又諭曰。柴大紀在臺灣總兵任內。任意廢弛營伍。縱容兵丁等在外貿易。并婪索夫價。及海口船隻陋規。生日節禮。得銀拔補外委等款。賊私累萬盈千。迨賊匪竊發。並不即時帶兵親往撲滅。復託詞回城調兵。遷延時日。以致釀成賊勢。及收復嘉義縣城時。又不併力追剿。與賊以暇。致賊人復得占據斗六門。大里杙等處。修築抵禦種種貽誤軍機。經福康安等定擬斬決。解京辦理。朕以柴大紀情罪重大。本應立正典刑。其在嘉義奏稱不忍以十數萬生靈。委之賊手。情願固守之處。雖查係義民不肯放出。皆屬誑詞。朕究念其尚有守城微勞。欲俟解到覆訊後。加恩從

寬末減。改為監候。茲據福建委員將柴大紀解到。命軍機大臣會同大學士九卿覆訊。柴大紀復思狡展。翻供抵賴。並供稱德成前在臺灣連日審訊義民誘令如將柴大紀賊罪指出。必有重賞。如不實說。即行治罪等語。朕命將節次申飭福康安諭旨。令其閱看。並經朕親行廷訊。始俯首無詞。而於認罪之下。仍思狡飾。柴大紀一案。朕專交福康安徐嗣曾審辦。德成不過係派往勘估該處城工。並無審事之責。與伊何涉。妄行攀指。柴大紀之意。不過因此事係由德成前在浙省有所風聞。到京因朕問。據實奏明。所聞後始行查辦。遂心懷忿恨。欲乘機將德成扳陷。伊或可希冀脫罪。奸巧之極。甚屬可惡。柴大紀竟係天奪其魄。自行取死。豈可復從寬典。柴大紀著照所擬即行處斬。以為辜恩昧良狡詐退縮者戒。○又諭。昨因近年湖北吏治廢弛。已極。荆州現復有潰決隄塍淹斃多命之事。不可不

嚴行辦理已明降諭旨將特成額革職拿問舒常李封管工自贖其承修及該管各官員交阿桂查明嚴叅分別從重治罪著賠因念姜晟到任未久俟查明後尚可從寬但姜晟擢用湖北巡撫已將年餘於該省官員似此種種玩誤並未據實陳奏即如運費一事昨舒常前來行在陛見朕面加詢問亦據奏實有其事兩淮鹽引在楚省行銷地方各官其職專在緝私督銷乃竟敢藉端向商人勒索層層剝削以致商力疲乏配運不前積壓課引姜晟若無染指情事何不據實查叅乃到任一年並未奏及茲於該管隄工復有漫淹之事雖因履任未久從寬免治其罪豈可復膺封疆之任享豐厚養廉乎姜晟著即來京舒常與李封同係該省督撫舒常業經解任李封亦著解任前往荊州管工自効其刑部左侍郎員缺即著姜晟補授姜晟接奉此旨即速起程來京供職務於朝審以前趕到其

湖北巡撫員缺著惠齡補授惠齡接奉此旨即著速赴湖北任事所有湖北巡撫印篆著姜晟親帶於途次迎交惠齡接收畢沅昨已補放湖廣總督其未到之先湖廣總督印務仍著舒常暫行署理俟畢沅到後再行交代朕因該地方官員因循玩愒誤公殃民至於已極不得不嚴加懲創畢沅惠齡受朕深恩擢用督撫伊二人到彼後隄工及撫卹各事宜皆有阿桂等在彼經理惟地方一切事務必須實力整頓一洗從前積習俾吏治日有起色如嗣後該省尚有仍前玩誤及再有染指運費等項情弊則是伊二人不能承受朕恩自蹈咎戾勉之慎之至河南巡撫員缺昨本令惠齡前往署理今惠齡已補放湖北巡撫應即速赴新任所有河南巡撫印務即著梁肯堂前往署理梁肯堂現護送戶部解往荊州銀兩俟頭起銀兩出境後梁肯堂即由彼速往河南署事其未到之先即著景安暫

行護理以便畢沅速赴湖廣新任勒保現署陝甘總督回任尚需時日所有山西巡撫印務著海寧前往署理海寧未到以前仍著鄭源璣護理○又諭福建按察使員缺著萬鍾傑補授萬鍾傑現在臺灣該處甫經平定一切善後事宜正須人料理著仍留臺灣道員之任將地方諸務與奎林實力整頓其按察使印務著李侍堯等揀選妥協道員奏請署理俟二三年後萬鍾傑在彼辦理諸務大有起色該督等再行酌量請旨候朕簡放臺灣道員有人再令萬鍾傑赴臬司之任○又諭據正藍旗滿洲都統奏請將原任奇台縣知縣楊桑阿應追車價修倉銀二千四百餘兩於其子孫錢糧減半坐扣等語此項銀兩均係由部覈減尚非楊桑阿侵蝕入己之項且楊桑阿已經正法查抄其坐扣錢糧之處著加恩寬免令該上司分賠完款嗣後如係贓款入己者著落其子孫賠繳若僅不入己而

又非此等覈減可比者則但著落其子完繳與伊孫無涉仍令各該上司分賠著為例令八旗一體遵照○諭軍機大臣等據浦霖奏華容縣地方於六月十九至二十二等日連日陰雨又值荆河襄河二水並發陡長二丈二尺有餘各隄垸同時漫溢田禾皆被浸損其衙署倉庫監獄並未淹及亦無損傷人口現在設法疏消等語湖北江水泛漲荊州被淹華容縣正當荆江下游該處因荆襄之水同時並發又值洞庭湖水盈滿之候宣洩不及以致隄垸被淹田禾浸損著傳諭浦霖急須設法疏消趕緊補種以冀有秋其被水居民應行量加撫卹並酌借工本籽種之處俱應勘明加意妥為撫卹毋得因一隅偏災致被水貧民稍有失所○轉吏部右侍郎瑪興阿為吏部左侍郎以內閣學士保成為吏部右侍郎○壬午諭軍機大臣曰舒常奏此次荊州江水驟漲陡高兩丈有餘隄塍漫溢荆

江水面本高於城。是以水勢形同建瓴。地方文武各員。趕緊保護。詎風狂浪湧。各隄聯翩潰決。等語。此奏多有不實。已於摺內批示。本年荆襄二江。同時並漲。水固異常。但隄塍原為禦水而設。若果工程鞏固。何致一經風浪。鼓盪潰決。至二十餘處之多。足見隄工不堪。即如淮揚兩郡。全藉高家堰以為保障。乃淮揚各城。並未聞有被淹之事。足見隄堰堅固。原可無事。若如舒常所奏。風狂浪湧。各隄遂聯翩潰決。則設隄何用。且設城又不當在此矣。此必該地方官。因係民修。向無保固。草率偷減。並不認真修築所致。舒常何尚為屬員地步乎。昨已降旨。將伊解任。令在荊州管工自効。並不為屈實有先兆矣。又據奏此次潰隄二十一口。係在萬城隄之中方城玉路口等處。其四十四。四十六。兩年所修之沙市。觀音塔。古月隄等處。俱皆穩固。等語。沙市等處隄工。既皆穩固。而現在潰決之方城玉路口

等處隄工。又是何年何人所修。舒常何以並不奏明。况沿江隄塍。為全部保障。所關甚重。向於每年秋後。用民力自修。僅責成縣丞督率趕辦。外省正印各官。於承辦官工。尚思肥己。矧縣丞職分甚微。派令管工。必更有分肥剋減情事。而又無大員查勘。無怪工程之不鞏固。從前所定。本非善策。舒常不過一謹慎小心之人。原非長才。今見該處遭此重災。益無主見。現已派阿桂等馳往勘辦。並令將此次應修之工。動項官為辦理。雖據舒常奏。荊郡濱江之處。地勢卑窪。江面高於內地。一經漫溢。勢同建瓴。等語。若誠如此。則又當別論。但荊州為古來重鎮。城猶是城。江猶是江城。垣自以不移為是。况江水澄清。非如黃河之挾沙而行。易於淤墊者可比。一經消退。城內仍可安處。第城垣既不移改。則隄工倍為著重。著傳諭阿桂到彼後。務遵前旨。妥為估計。加高培厚。堅實修築。俾資捍禦。再閱舒常摺

內稱沿江隄塍每年民間自行估土修築等語。是該處隄塍皆係土工。土性鬆浮。易被衝刷。現在既需重修。何不將迤南遮護府城一帶隄工酌量改建。石工石性既比土性堅固。而荊州距山不遠。採運亦易。若屬可行。即或需費較多。朕為全郡民生起見。斷不稍有靳惜。自當即為改建石工。以為一勞永逸之計。其是否可辦之處。並著阿桂及畢沅確勘妥籌。定議具奏。又據舒常奏荊州撫卹災民並修理各項工程。約估銀十九萬六千餘兩等語。舒常所奏係約估之數。其修隄費用。未據列入。前慮該省藩庫所存銀兩。或有不敷。早經發銀二百萬兩解往。似可敷用。阿桂歷經委任。自能將工程及撫卹各事督飭各該地方官妥協辦理。俾兵民不致失所。而工程足垂久遠。若該地方官等因見發往帑項寬餘。復思從中染指。則是太無良心矣。一經查出。伊等自思當得何罪耶。又據舒常另片奏稱。

將軍副都統衙署均有坍塌。懇請借廉修理。分年歸款等語。將軍都統同僚大員皆有廉俸。所有衙署自應准其借廉修理。分年扣繳。將此由六百里傳諭阿桂畢沅知之。仍著將現決隄塍係何年何人所修。遵照前旨將承修之員及該管上司詳細查明。分別嚴叅治罪。著賠以示懲儆。○又諭。據舒常奏荊州府所屬公安縣地方。自六月二十日至二十五日陰雨稍多。江湖並漲。城鄉隄塍潰決。田禾廬舍多被水淹。衙署監倉坍塌。無幾人口並無損傷。倉貯米穀搶至高阜。現將居民搬移高處。散給錢米。照例撫卹。又據片稱監利縣濱臨江湖。勢更低下。亦被淹浸。現在派員查勘辦理等語。著傳諭畢沅等。即將公安被水居民應行量加撫卹。散給口糧之處。加意妥為辦理。其監利地方查明被災情形。亦著一體撫卹。並將該處積水早行設法疏通。毋得因荊州府城被災最重。專於一處辦理。以致

他處被水貧民稍有失所並諭舒常等知之○以福建督標中軍副將希當阿為福建福寧鎮總兵○癸未諭據保寧等奏稱布魯特畢班壁特伊母今年一百六歲尚屬壯健感激天恩誠心恭祝萬壽令伊稟知等語布魯特畢班壁特之母現年一百六歲精神矍鑠西域遠徼共沐昇平上瑞朕心深為欣慰著賜恩賞給大緞二匹貂皮六張伊子前來具稟禮儀恭順亦屬可嘉並著賞給藍翎以示朕優獎高年無間內外至意○又諭據保寧等奏教福年已七十兼又抱病所辦回子事務恐致廢弛查有原任副都統果星阿自到伊犁交辦事務頗能奮勉請將回子事務交果星阿管理著照所請行并令教福自備資斧回京○軍機大臣奏遵旨議臺灣兵丁家屬養贍查向例內地兵丁渡海出防其原籍家屬每月給米一斗銀五錢為數較少恐其不敷養贍請照新疆防兵例准支行糧坐糧

二項以示體卹至臺灣戍兵向由內地撥換前奉諭令留缺一半本處募補旋經福康安奏該地甫平新募之兵難資防禦請仍於內地撥派臣等查臺灣向有無籍游民名羅漢脚既無恆產又無約束最易滋事若趁此兵威大創酌挑入伍責成該將弁管轄訓練既省調撥又免加餉再海口查船得受掛驗番銀據福康安奏鹿耳門係安平協中左右三營弁兵輪派鹿仔港係安平協左營管理新開之八里岔係交淡水營管理但未明立章程恐有偏枯向隅之處又臺灣道所轄船廠因該處不產大木故由內地運往若應修船少運往木多該道可以就便變售但不予以限制或恐藉端多帶以肥私橐又臺灣府所管鹽埕除每年銷售定額外若能設法多銷亦許該府津貼辦公之用但不酌定數目或恐隱匿入己應請將募兵并掛驗番銀及木植鹽務一併交該督撫提鎮議奏得旨依議

臺灣現定各章程已極周密。但有治人無治法。惟在該督撫等實力查察。以除積習。如該督撫等不認真整頓。留心稽查。致地方文武員弁陽奉陰違。仍前滋弊。一經發覺。惟該督撫是問。○調正白旗蒙古副都統永琨為鑲藍旗滿洲副都統。以內閣學士扎郎阿為正白旗蒙古副都統。○以故喀爾喀車臣汗車布登扎布子齊旺多爾濟阿巴噶扎薩克多羅郡王衮布扎布子嘛呢巴達拉各襲爵。○

甲申諭昨據浦霖奏審擬私造逆書之未陽縣生員賀世盛一犯。照大逆律凌遲處死。家屬緣坐。並將搜獲之黨國策鈔本呈閱。一摺。隨批交大學士九卿會同法司覈擬速奏。本日據大學士等照擬具奏請旨。閱摺內有指出該犯所稱捐路終為財動。有妨正途。及拒諫等語。朕臨御五十三年。普免天下地丁三次。蠲免漕糧兩次。一遇水旱偏災。無不立予蠲賑。兼之浙省建築海塘。及豫省豁免攤徵。

銀兩。凡所以藏富於民。為捍禦閭閻計者。總計不下億萬。萬從不稍存靳惜。前此豫工暨川運兩次開捐。原因維時河務工程緊要。軍需用度浩繁。府庫所存不敷撥給。且康熙雍正年間。曾因公准捐有案。廷臣有以是為請者。是以照例暫開。為一時權宜之計。然不久而即行停止。亦因納貨授官。本非善政。并恐雜沓。因此並進仕路壅塞。捐例祇可行之於暫。而不可行之於久。特命停止。自停止以來。

已十有餘年之久。五十一年督臣李世傑書麟李奉翰等。以江南黃運兩河漫決多處。撫卹堵築諸務。需費較多。合詞奏懇開捐。朕當以此事斷不可行。明降諭旨訓飭。天下人共知者。甘肅捐監之例。亦因地方官等包攬折收。藉端滋弊。永行停止。朕如果為聚財起見。則兩次所捐。不敵一次普免之數。亦人所共知者。安有陳奏停捐。拒而不納之事。賀世盛身列膠庠。據供嘗閱邸報。豈五十一年朕訓。

飭李世傑等之旨。伊獨未之見耶。乃輒敢因科名未遂。心懷忿懣。遂私自著書怨望。大學士等擬以凌遲緣坐。實屬按律辦理。此等狂悖之人。若竟從寬典。俾安坐圜牆。勢必更肆狂吠。又如曾靜之罪。大惡極。寸磔不足蔽辜。反足以累及伊家屬。第念該犯究因失志。場屋貧苦。無聊撫拾傳聞。私自鈔寫。借以抒其抑鬱。與顯肆悖逆者。尚屬有間。賀世盛著從寬改為斬決。至伊子賀家瑞。見伊父所鈔之書。中多違礙。屢次跪勸燒燬。尚為知理守法。乃該犯執意不從。終致敗露。是此等無知妄作之徒。不但自蹈法網。且又不顧伊子弟。因其緣坐。俱陷大辟。而在朕心轉覺不忍。且其餘子姪孫子。據該撫查明。俱在鄉務農。不通文理。其未經舉首。亦屬可原。所有賀世盛名下應行緣坐之犯。俱著加恩。免其緣坐。概予省釋。並著該撫即將此旨給與該犯閱看。後再行正法。俾知孽由自作。而朕於法外施

仁。不因該犯語涉違悖。罪及其子。若孫。該犯亦當俯首就戮。死而無怨也。又諭據舒常奏。荊州府城猝被水淹。監犯不帶刑具。遂皆隨水漂散。查係該犯日間開放。柙鑰以致被水。後是逃是斃。無從稽考。現在先後查獲四十四名。又有自行投到者四名。尚有未獲四十名。請將署江陵縣典史徐桐革職拿問。署江陵縣知縣屈振甲革職。該管知府俞大猷。荆宜施道沈世燾。交部嚴加議處。並請與巡撫姜晟。臬司李天培。一併交部分別議處等語。各省府州縣設立監獄。在監人犯。均應照例日夜加上柙鎖。方免疎虞。乃該處應管各員。平日擅將獄囚刑具鬆放。以致被水漂散。無從稽查。非尋常疎縱者可比。舒常等身任督撫。疎慢至此。早行降旨。將伊等離任。實不為屈。足見天理昭彰。難逃朕之洞鑒。所有署江陵縣典史徐桐。著革職拿問。署江陵縣知縣屈振甲。著革職。交與阿桂等提同該員及

刑禁人等嚴審有無賄縱別情另行定擬具奏。荊州府知府俞大猷。荊宜施道沈世燾。交部嚴加議處。臬司李天培。及舒常姜嚴俱著交部分別議處。其自行投到之絞犯黃悅林。譚青虎。楊廣輝。軍犯彭添明等四犯。尚知守法。著照直隸段文經案內之權曾霽好等犯減等發落。○諭軍機大臣等。本日據舒常奏荊州府城猝被水淹。監犯不帶刑具。遂皆隨水漂散。查係各犯日間開放。袒露至晚始上

刑具等語。已降旨將該管各員分別革職議罪矣。因思刑部監獄。羈禁各案罪犯。向來該堂官等未曾留心防範。如大員中富勒渾雅德等。犯罪繫獄。情罪重大。皆知王法。雖疎刑具。必不敢別滋事端。即軍流人犯。罪不至死。亦無虞有疏脫之處。或私疎放尚可。朕非不知此外定擬斬絞兇犯。不可不嚴加羈禁。如有在監酗酒鬪毆情事。即係刑具鬆放所致。部監重地。防範自應嚴密。著傳諭刑部堂官

嚴飭管獄司員。將各犯照例稽查。刑具加意防範。該堂官等仍不時留心查察。毋得漫不經心。致有疎虞。舒常摺著抄寄閱看。當以此為前車之鑒也。○又諭曰。阮岳逐主亂。常差人進貢。斷無即准其納款之理。此必阮岳自知篡竊。恐天朝致討。故先以此為嘗試。若令不曉事體之督撫在彼收則。懼失國體。不收又慮生事端。豈不至進退無據。今孫士毅一接稟報。即親赴鎮南關。督令該協站立關牆

大聲呵斥。並諭以天朝已調大兵分路進討。令該夷官歸諭阮岳。迅速悔罪自新。迎還故主。詞嚴義正。足使阮岳聞之膽落。孫士毅所辦實屬可嘉。著賞上用蟒袍料一件。以示優獎。又據奏該國舊文淵州夷目阮廷沛。攜帶印篆。挈同眷屬八人。攀越山嶺。求至內地。口稱要見國母。已准令挈同家屬過山。安插土司地面。並令阮廷沛前赴南寧。面見嗣孫之母等語。如此方是阮岳所遣之人。即係新文

淵州黃廷球。今阮廷沛係文淵州夷目。自因不甘奪職。挾印而來。並非詐僞。若揮之使去。凡繫心黎氏者。咸知內地不肯收留。必至去而從賊。今孫士毅即將該夷目安插內地。令見嗣孫之母。使該國人衆知天朝加恩黎氏。凡有心懷故國者。無不一體收納。更足以堅其內向之誠。而祛其從逆之志。現在安南地方。尚未全歸阮岳。其未經從賊之各路文武。不下二百餘員。兵民亦有數萬。尚可資其力量。徐圖恢復。朕意此時止宜於附近之左江。高廉並雲南開化。臨元二鎮。各在本境整飭兵馬器械。操練巡防。聲言進討。以壯其聲援。如本鎮兵丁為數尚少。不妨一面奏聞。一面於附近營分酌量添調。至孫士毅奏請簡望隆威重之大臣帶領巴圖魯來粵外夷聞信。愈可震動。收效更捷等語。此又可稍待。安南現在情形。看來尚可。不煩我兵力。若由京遽派大臣帶領巴圖魯等前往。與用兵何異。況

孫士毅如果不能辦理此事。朕亦即揀員更換。今孫士毅籌畫一切。諸合機宜。是此事該督儘能妥辦。目下又不至用兵。何必差人前往。致駭聽聞。若阮岳始終玩抗。或竟全踞安南。將黎氏子孫戕害。不得不申天討。屆期朕自有定奪。○又諭據徐嗣曾奏。澎湖副將潘韜等稟報。有新派換班兵丁康飛倖等。因監生江清洲所開油店。與營房風水有礙。糾約兵丁將油房拆毀。該副將督同將弁前往拏獲康飛倖等四名。發千總吳得生。陳元成審訊。復有兵丁王添生。蘇光彩等進署阻鬧。扯破吳得生衣服。將康飛倖拉出現。已將康飛倖拏獲。並獲楊凜生等十名。嚴訊究辦。旋據提督蔡攀龍親赴澎湖督同該處員弁等查出起意拆屋之王攀隴。糾衆搶犯之王添生及附和各兵共十二名。委員押解到郡。當經該撫督同司道等嚴行鞠審。訊得確情。將王攀隴王添生二犯即請王命正法。傳首梟示。

其康飛倭等犯分別斬絞請旨正法等語已批交軍機大臣會同行在法司覈擬速奏矣澎湖為臺灣扼要重地當此甫加懲創之後該犯等復敢糾眾擾民逞兇搶犯實為藐法已極自應按名迅速嚴辦以儆刁悍而飭戎行該撫即將為首之王攀隴王添生二犯處斬梟示辦理甚是但隨同附和之犯其情節較重應行斬絞者亦當一面即行正法一面奏聞又何必拘泥成例請旨辦理耶嗣後該撫遇有此等要犯務即遵照速辦勿復似此拘泥遲延臺灣民情兇悍積習未悛朕恐晉吉保在彼不能彈壓已早經降旨令奎林前往更代奎林到彼後該撫務將一切應辦事宜及該處實在情形詳悉告知奎林務須實力整頓將該處兵丁嚴行管束俾各知所敬畏一洗從前廢弛藐玩積習方為不負委任○軍機大臣議覆署陝甘總督勒保奏稱新疆屯防各兵經乾隆二十七年督臣楊應琚

奏准每屆換班令各處駐劄大臣查驗舊兵軍械如尚堪適用及在外堪修補者即留交新兵之用其損壞不能修補者豫咨內地令新兵配帶添換即令舊兵將損壞之件帶回兩免腳費請仍照舊辦理查各兵定例五年一換弓箭等項演用數載不無缺損是以酌定此例若帶往者不復帶回令該處日積日多徒歸無用或帶往者全行帶回而更換者又須全行帶往又滋繁擾誠如諭旨二者均未妥善應如所請照舊辦理從之○乙酉上御卷阿勝境賜扈從王公大臣及蒙古王貝勒貝子公台吉等食至戊子皆如之○丙戌諭曰李侍堯奏雲霄營分防外委許奕炘因向兵丁等閒談以張媽求案內逸犯現奉飭拏若藉查訪為由或可得錢添補衣帽鞍馬適兵丁張淋素知村民林潭家道尚殷慫恿前往查拏該外委即帶同張淋并兵丁林楚等前赴林潭家內喝查逸犯並進屋搜查軌

指挑稻鐵。又稱係應禁器械。須連人解究。張淋遂從中說合。林潭許送洋錢四圓。許奕炘嫌少。即令鎖拏。林潭跑出喊救。當有村民林井等。聞聲趨勸。各自散回。林潭被詐不甘。聲言要赴上司衙門控告。許奕炘心懷畏懼。遂以林潭私藏逸犯。查拏拒捕等情。捏稟。經該管遊擊。查出該外委索詐擾累緣由。通稟解審屬實。將許奕炘照誣告人死罪未決律擬。再從重發往伊犁充當苦差。兵丁張淋林楚。改發伊犁給官兵為奴等語。李侍堯辦理此案。失之寬縱。漳州府屬民情刁悍。上年因匪徒械鬪。聚眾滋事。甫經大加創懲之後。百姓稍知斂跡畏法。許奕炘身當外委。乃輒敢以查訪逸犯為名。擅赴村民家內搜拏。訛詐錢文。殊屬目無法紀。設因此而別滋事端。成何事體。李侍堯僅將該犯擬發伊犁。不足蔽辜。自應即行定擬絞罪。立予縲首。方足以整營伍而靖地方。著傳諭李侍堯。即派員將該

外委許奕炘。綁赴犯事處所。傳集民人看視正法。並諭以弁兵等藉端索詐。擾累閭閻。今已奉旨將該弁正法。若民人等不知安分守法。聚眾逞兇。即照此嚴辦。如此詳細曉諭。庶弁兵百姓等。皆知有犯必懲。羣懷畏懼。不致滋生事端。其兵丁張淋。林楚。膽敢迎合汛官。隨同索擾。自應從重定擬。除將該二犯即發往伊犁給官兵為奴外。至林潭因被許奕炘帶兵赴伊家搜索。復聲言鎖拏。跑出喊救。經該村民林井等趨勸散回。弁兵等憑空訛索。該村民等。如果心懷不服。亦當就近赴府縣呈控。倘該府縣有袒庇情事。亦准其赴督撫衙門控告。何得私相聚勸。安知非見許奕炘入室搜人。遂思乘機搶犯毆差。李侍堯並不將此種情節。嚴切根究。詳晰聲敘。亦屬疎漏。李侍堯著傳旨申飭。並著該督覆加提訊。如林井等止於勸解。尚可免議。若有拒捕奪犯情事。自當治以應得之罪。即或未經別有滋

事情弊。究非安分。亦當予以杖責。俾知懲儆。○又諭。現在荊州被水甚重。皆由隄工不固所致。因該處隄工。向係民修。並不報部覈銷。是以一面諭令阿桂等辦理。一面令軍機大臣。查各省凡係民修各工。向俱是否報部。茲據查奏。各省修浚隄河等工。有借項里民自行經理。並不造冊送部者。有借項官為經理。工竣造冊送部備案者。亦有借項造冊具題覈銷者。是各省民修之工。並非全行報部覈銷。章程本不畫一。立法未為妥善。修浚隄河等工。原為保護田廬。疏消積水起見。向係民間修理者。原不便遽動官項。且各處隄工甚多。豈能一一官為修理。但因係民修之工。竟不立定章程。報部覈估。僅令官為經理。則外省官員。於官工尚思侵剋。肥己矧工程例歸民修者。並無保固查銷。不肖官吏等。不特於需費之外。可以藉端加倍灑派。入其囊橐。而且草率從事。偷減侵漁。均屬事所必有。該管

上司。又因向係民修。遂爾漫無覺察。工程豈能永資鞏固。幸而各處隄工。尚安穩無事。是以從未覺察。現在荊州護城隄。潰決至二十餘處之多。即其明證。豈可不嚴定章程。令其一併報銷保固。嗣後民修各工。除些小之工。無關緊要者。仍任民間自行辦理外。如係緊要處所工程。在五百兩以上者。俱著一體報部查覈。予以保固限期。興修後。再行酌令百姓出貲歸款。各工既有查覈。承修各員。自必有所顧忌。不敢任意從中侵剋。且有保固限期。亦自不敢草率辦理。庶工程可期久固。而閭閻不致有被淹受害情事。此正係朕為保護民生。節省民費起見。各督撫務宜仰體朕意。遇有民修之工。妥為辦理。嚴加查覈報部。如有仍前任令屬員從中剋扣。草率從事之處。經朕訪聞。或經科道奏。百姓告發。不特將承辦各員。從嚴辦理。必將該督撫一併從重治罪。著為令。○諭湖北江陵縣潭子湖築

隄挖廢地。三頃四十畝有奇。減隄內挖殘地。四十畝有奇額賦。○豁貴州委員遵義縣知縣黃朝棟。沉鉛十八萬二千觔有奇。○丁亥。諭軍機大臣曰。蘇凌阿等奏。蘆州衛三幫軍船七十五隻。七月二十日。在寶稼營地方。猝遇風暴。吹斷繩纜。刮折桅樯。黑夜互相撞激。沉船二隻。經通水道前往查勘。內傷裂損輕。尚堪駕駛者九隻。全行撞壞。不堪駕駛者六十四隻。當飭兵役上緊將沉溺米石幫同搶撈上岸。曬晾。現確查該幫有無短缺米石藉端掩飾情事。再分別借給銀兩。俾及時修脩。並令通水道就近督催。以期迅速完整。回空南下等語。十九日夜間。熱河風雨亦大。寶稼營距京不遠。幫船遇風。自非捏飾。但該處乃屬內河地方。何至碰壞漕艘七十餘隻之多。究係該幫丁等不能小心防範所致。現經蘇凌阿等派員往查。應俟該侍郎等查明後。照例分別辦理。其撈起米石尚好者。雖經曬晾。

究恐不能久貯。或即於秋季應放俸餉內先行搭放。著傳諭蘇凌阿等。即行酌量妥辦。至應修船隻。並當飭令該道等上緊督修。俾及早南下。毋誤回空為要。○又諭。據慶麟等奏。巴勒布廓爾喀屬下頭目蘇爾巴爾達布等。西向沮木郎部落擄掠。復東向我邊入寇。現在前後藏俱各嚴備等語。巴勒布地方距後藏甚近。今蘇爾巴爾達布等跳梁起釁。若向聶拉木濟龍宗喀等處滋擾。此係衛藏所屬地方。理應派兵堵禦。第班禪額爾德尼年齒尚幼。而仲巴呼圖克圖亦係出家之人。難免震驚。著雅滿泰。即酌帶綠旗兵暨達木額魯特兵前赴扎什倫布。將班禪額爾德尼加意撫慰。與仲巴呼圖克圖等商議。所有後藏與巴勒布接壤之處。俱宜力為守禦。其前藏地方。亦著慶麟等嚴加防範。再雅滿泰抵彼後。若聶拉木濟龍宗喀。一有挫失。即先將班禪額爾德尼遷移前藏。方為妥協。倘更需川兵。

著一面咨行調取一面奏聞此時慶麟等惟應豫籌萬全善加防守有何信息即速奏聞○又諭已勒布地方迤東與衛藏聶拉木濟龍宗喀三處接壤若已勒布搶奪沮木郎部落復敢東向後藏邊界滋擾則不得不用兵堵截擒拏現已降旨令雅滿泰速往後藏駐劄相機妥辦恐該處兵力不敷已諭令慶麟雅滿泰一面奏聞一面知照李世傑等調用李世傑成德接奉此旨可即於四川各標營

並明正裏塘巴塘德爾格爾番兵內就近豫調兵三四千名不動聲色妥為備辦一接慶麟雅滿泰知會即速前往應用鄂輝張芝元已令其即日起程回任俱著馳驛兼程行走如竟有需內地兵力接濟之處即交鄂輝帶領張芝元等久經行陣者統率前往豫備勦除堵禦○戶部議覆兩淮鹽政全德奏稱湖廣江西銷賣商鹽照舊例停止定價請交兩江總督等會籌議奏得旨阿桂現在派往湖

北辦理隄工撫卹事宜所有酌定鹽價是否可以停止之處著阿桂就近會同書麟畢沅何裕城惠齡全德秉公籌辦妥議具奏○戊子諭軍機大臣等據慶麟等奏濟龍聶拉木二處已被已勒布搶占惟宗喀尚在固守衛藏兵力不敷堵截已飛咨川省調撥駐防綠營官兵應用等語所辦甚是川省距前藏較近想朕昨降諭旨到時該督等自早已接准慶麟咨會著再傳諭李世傑成德即於該省

駐防滿兵內添派五百名仍遵昨旨於綠營及番兵內就近酌調共三四十名建昌鎮總兵穆克登阿帶領凱旋官兵回川此時自己早到即著成德與穆克登阿帶領各兵迅速赴藏幫同堵剿昨已有旨令鄂輝馳驛迅回川省著再傳諭該將軍星夜遄赴成都如到時堵剿諸務尚未完竣即著速赴前藏接辦成德此時著帶印前往俟鄂輝到彼再換回在省彈壓如鄂輝察看現調各兵不敷堵剿

不妨據實奏聞。再帶二三千名前往應用。以期迅速。○已丑。諭軍機大臣等。裏塘。巴塘。德爾格爾等處番兵。久未檄調。現派赴藏防堵。恐伊等不知出兵。大有便利。未能踴躍從事。上年屯練降番。派往臺灣協勦。節次得賞頗多。此張芝元所深知者。而該總兵於裏塘番情。尤為熟悉。著傳諭該總兵。趨行前往。面向該番兵等傳知。爾等奉派赴藏協勦。現在既可得鹽菜口糧等項。將來事竣後。復可仰邀優賞。番兵等知有利益。自必爭先効命。該總兵即可帶往應用也。○又諭裏塘。巴塘。德爾格爾等處番衆。向來善放夾壩。今將該處番衆調派前往。不特現在可資其力。將來糧餉運往。亦可免被夾壩情事。但明正之兵。易於調撥。裏塘。巴塘。德爾格爾番衆。久未徵調。非屯練降番可比。張芝元熟悉該處情形。除已另降諭旨。令其迅速回川。明白曉諭外。並著李世傑。成德。先於調撥時。亦一體遵照。

明切曉示。○又諭。據劉戡奏。廬州三幫。在寶稼營地方遭風一摺。此事昨據蘇凌阿等奏到。據稱現責成通水道就近確查。並督催上緊修船回空等語。已有旨。諭令俟查明後。分別辦理。其漂溺米石。自當照例賠補。此等畧大事務。蘇凌阿。劉秉恬等。一接稟報。即應於伊二人內酌擬一人。親往駐彼查辦。何得僅責成通水道了事。即劉戡距彼不遠。亦何未親往。著傳諭該督等。接奉此旨。即速前往會同確勘。詳細查明其所失米石。並修船各費。俱當分別照例辦理。仍飭令上緊修船南下。無誤回空為要。○又諭。據舒常奏。荊州此次江水漲發。因萬城隄潰決。以致郡城被淹。與窖金洲無涉等語。可見荊州此次被淹。尤重總由隄塍不固所致。因閱所進圖內。郡城江面迤西有沙洲一道。距現決隄工不遠。或江水至此為其所逼。以致潰決。亦未可定。但該洲長二里。寬一里。勢不能全行剷除。或於洲

尾酌量開挑引溜南趨。或酌建挑水壩挑溜往南。俾隄工不至著重。即如江南陶莊自開挑引河後。引溜北趨。清口得免倒灌。此阿桂之所稔知者。著傳諭阿桂。到彼後即詳細履勘。將龍洲一帶江水至此是否為其所逼。及是否可以設法辦理之處。即行妥籌具奏。本日據舒常奏請將萬城隄通行加高培厚。再於龍尾洲玉路口二處加築挑水磯頭。逼溜南趨。似可無虞水患等語。是否可行之處。著

交阿桂履勘一併詳查議奏。○又諭據毓奇和琳奏三進尾幫已於七月二十四日全數催過濟寧。現在汶衛河水充盈行走更可迅速等語。本年開河水勢充裕間有停淤處所。又經該督等督率撈挖俾得通順。進行現已全數趨過濟寧。所辦甚好。較之上年八月初八日尾幫始得過濟為期已早半月。且汶衛兩河足資浮送。是糧艘源源北上。無難尅期抵通。該侍郎等務當隨到隨收。俾軍船迅速。

回空受兌。勿得辦理遲延。有誤回空。致干咎戾也。將此傳諭蘇凌阿等。並諭毓奇和琳知悉。○是月暫署湖廣總督舒常覆奏荊州前番水災潰隄不多。城根水僅三四尺。是以圍土城門得免衝入。此次藩司陳淮等督率地方文武多集人夫剗土。並趕買棉襖舊絮堵塞。詎風狂浪疾。各隄聯翩潰決。水頭高出一丈餘尺。瞬將西北兩門衝開。并衝塌城牆三處。一湧而入。實屬人力難施。得旨水固異常。

隄亦不堪至此。尚為屬員地步乎。罷汝總督不為屈實有先兆矣。○湖南巡撫浦霖奏遵旨改造撥船。酌定船身長五丈三尺。前寬七尺三寸。中一丈一寸。後七尺四寸。共八艙。每艙深二尺八寸。每隻估需工料銀一百五十兩。八錢三分四釐。已先趕造樣船一隻。臣親驗得裝米二百二十石。喫水一尺九寸。於運河淺阻之處。允堪通行。無滯。報聞。○署福建水師提督王柄奏報早稻收成豐稔。地方

寧謚得旨。勉以實力。毋為虛言。洋盜最要。曾獲幾起。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百九

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十

監修總纂官經筵講官太子太傅文淵閣大學士文淵閣領侍衛內大臣稽察欽奉
吏部理藩院事務滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總纂官經筵講官太子太傅文淵閣大學士文淵閣領侍衛內大臣稽察欽奉 上諭事件處吏部戶部庫書稽
世襲騎都尉軍功加十九級隨帶加二級又加二級臣董誥內大臣戶部尚書領侍衛內大臣軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆五十三年戊申八月庚寅朔諭四川現

有辦理軍需事務著派戶部郎中良柱刑部
郎中阿精阿兵部員外郎色穆懇工部員外
郎玉保吏部主事文需並丁憂回旗知府扎
克桑阿遇昌麟喜俱迅速馳驛前往四川交
與該督李世傑等差遣委用○諭軍機大臣
曰李世傑等奏接准慶麟等咨會業於屯練
降番內挑撥一千二百名合之駐防綠營共
三千名並經分起起程自應令其迅速前往
朕又思明正番衆尚易於調撥至巴塘裏塘

德爾格爾三處慣放夾壩。又久未撤調。究恐其滋事。倘該督等現調各兵。西藏尚不敷堵剿。又有續行咨調之處。仍宜於駐防綠營及屯練降番內。按數挑撥。若屯練降番不敷撥用。寧可於駐防旗兵及綠營續撥。不必用已塘裏塘番衆矣。至官兵過境。內地有州縣應付。而自打箭爐出口。距藏尚不下五千里。道路遙遠。況已勒布夷衆。若見現調官兵聲勢壯盛。畏懼逃竄。原不值與師追捕。倘竟敢抗拒侵犯。又不得不厚集兵力。堵禦剿除。所有口外應備各事宜。在在需員。經理著傳諭李世傑。即先派明幹道府數員。前往打箭爐口外分段管理。妥為籌辦。用利軍行。且恐口外一帶郭羅克窮番。有搶劫情事。所有辦送糧餉。並當多派弁兵。沿途護送。毋稍疎虞。再西藏距川省既遠。所需銀兩火藥等項。自須由內地撥往。其口糧草束。若概由內地解送。豈不需費浩繁。亦從無是理。自應在藏內糧臺

就近採買。從前曾辦有成案。除交軍機大臣查奏外。並著李世傑即詳細查明。將如何籌備。方為妥協之處。酌議速奏。以期有備無患。○內務府衙門奏。乾清宮等處滲漏。請照例分別賠修。得旨。此項工程。其在上年粘修。本年即行滲漏者。固應著落營造之員賠補。但承辦工程。如果妥為經理。何致逾年遠有滲漏之處。即兩三年亦可無須修補。此次滲漏處所。至一百十八處之多。自係辦理不善所致。著總管工程大臣。即行查明。應修各工程。其在三年以上者。始准交中一路修理。其三年以內者。俱著賠修。嗣後俱照此辦理。○戶部議准。署江西布政使按察使額勒春奏。稱江西衛弁。共二十六員。每員歲給養廉一百兩。在次者按月由司支領。其出運之十三員。向係先期總領四季一遇事故。勢須咨追原籍。致勞案牘。查衛弁春去冬回。原無須四季全領。請嗣後將春夏秋三季養廉。令糧道領

帶途次。按月支放。遇有事故。扣繳歸款。如糧道回任。即交總運文員支給。其冬季令本升在司支領俸薪亦一體照辦。從之。○辛卯。上御卷阿勝境。賜扈從王公大臣及蒙古王貝勒貝子公台吉等食。至丙申。皆如之。○遣官祭

關帝廟。○諭軍機大臣等。據何裕城奏。江西省南昌。饒州。南康。九江等府屬。因雨水過多。沿江傍湖低窪田地。間被淹浸。現確加察勘。分別被災輕重。動項撫卹。務俾均霑實惠。又德興縣山水陡發。衝失房屋。並淹斃人口。若俟歸案彙辦。不免沆離失所。已飛飭該府齎帶銀項。馳往照例撫卹。妥為安頓等語。南昌等屬。因雨水過多。致低窪處所。間有被淹。目下節過處暑。補種不及。自應詳細查明。分別辦理。至德興縣因山水陡發。衝失房屋。並淹斃人口。亟當速行賑給。何裕城飭令該府帶銀馳往撫卹安頓。所辦尚是。著傳諭該撫即

董率所屬。加意撫綏。務使貧民均霑實惠。不可因係一隅偏災。稍有疎忽。致令失所。○戶部等部奏。遵旨增議。擡運征兵軍裝各事宜。一。駐防向騎本身官馬。如遇疲乏。無馬更換。每二名并跟役。共給車一輛。如路不通車。每車改給馬騾五匹頭。如路不通騎。不給騎馬。令兵丁步行將馱馬。每匹折給夫二名背運。一。綠營外委馬兵。向騎本身官馬。如疲乏無馬更換。每三名給車一輛。如不通車。每車改給馬騾四匹頭。如不通騎。令外委等步行。其外委跟役。應得馱馬。每名折給夫二名。其兵丁每百名給夫八十名。除例帶餘丁三十名。外。給夫五十名背運。一步守各兵。每四名給車一輛。如不通車。每車改給馬騾四匹頭。如不通騎。令兵丁步行。其步兵每百名給夫六十名。除例帶餘丁二十名外。給夫四十名。其守兵例無餘丁。每百名給夫五十名背運。從之。○壬辰。遣官祭黑龍潭。

昭靈沛澤龍王之神玉泉山

惠濟慈佑龍王之神○諭吉林等處副都統內有本處人為本處副都統者理應更調吉林副都統烏什哈達著與齊齊哈爾副都統已哩木達對調熊岳副都統索喜著與黑龍江副都統額勒登保對調伯都訥副都統烏雅勒達著與墨爾根城副都統僧保對調○諭軍機大臣等前據福康安奏拏獲首先至臺灣傳天地會之嚴烟供稱此會是朱姓李

姓傳自四川因年分久遠不能指實川省是何縣分該犯係從廣東人陳彪傳教伊四十八年到臺灣時陳彪尚在漳州等語並經解至熱河交軍機大臣覆訊供詞亦屬相符即經諭令該督撫等飭屬嚴密緝拏嗣據孫士毅奏粵省查無陳彪下落而李侍堯續獲張破臉狗一犯訊據供稱有廣東大埔縣人趙明德陳丕陳棟三人曾到該犯家內勸令入會至陳彪實不知其人或即係陳棟等語復

降旨交孫士毅飭屬緝拏亦未據將趙明德等按名緝獲本日又據李世傑覆奏四川省到處訪查實無天地會之名現飭將歷年所造戶口清冊覆查有無朱鼎元其人等語嚴烟所供天地會來歷並傳教人犯鑿鑿有據且前後訊供如一必非無因粵東與閩省毗連况嚴烟與張破臉狗所供學習天地會時皆得自廣東人所傳張破臉狗計此時已早解至粵更無難就近確切根究至朱姓雖年

分久遠該省既有戶口清冊亦可調取確查著傳諭李世傑圖薩布即嚴密訪查如有嚴烟等供出各犯踪跡即速躡獲究辦仍隨時密為留心為之以實不可以現查無獲遂迴護前非不肯認真緝獲致要犯遠颺漏網其陳彪各犯俱曾至閩省傳教或目下仍在閩省藏匿亦未可定並著傳諭李侍堯再飭屬一體嚴緝亦不可因前此查無該犯等下落遂存迴護○又諭昨因西藏現有堵勒巴勒

布賊衆之事該處距打箭鑪尚不下五千餘里道路寬遠糧草等項輸送維艱連日以來朕為此事正切厯懷本日又據慶麟等奏前藏地方因聞有已勒布聚衆滋擾商販至者已覺稀少該處所存糧食尚不足供藏內現有兵丁五百名之用等語藏內所存糧食就現有兵丁五百名已不敷用茲又由內地添調官兵三千名前往該兵丁等遠赴西藏協勦其所帶口糧想止敷途次口食之用必不能寬餘攜帶若到彼處皆於藏內取給豈不立虞缺乏倘由內地發往不特需用浩繁且恐緩不濟急所關匪輕朕意或於口外一帶就近採辦青稞糴粳食等項或較市價量為增給俾商販民番等知有利益自必爭相踴躍希圖售賣得利可資源源接濟著再傳諭李世傑即設法籌備斷不可使官兵等有缺食之虞○又諭據慶麟奏廓爾喀賊勢尚非精銳惟西藏番衆素性懦弱戴綱等起

身延緩至聶拉木濟隴二處被賊搶掠今賊匪有前進之信所調內地之兵離藏較遠接濟糧餉倍為緊要著慶麟雅滿泰通行曉諭前後藏附近村莊今征勒廓爾喀賊人原為救濟爾等絲毫並無擾累惟需用兵糧甚多必須向爾採買爾等有積貯糧麪糴粳食物速行售賣勿得妄生疑懼慶麟等即動用庫帑按照時價稍增多方鼓勵小民圖利自必爭先出售再已勒布前來滋擾路途遙遠我兵堵禦防守更當籌畫萬全可與班第達等商酌慎密辦理再聞喀喇烏蘇現有二十九部落番兵漢仗尚好平日慣於獵圍調用自可得力慶麟雅滿泰當速行酌調數千名用資堵勦如果奮勇出力朕必照例練降番之例加倍施恩再指內稱羅布理一路亦有賊兵慶麟至彼訪問實信如羅布理一路賊匪果向薩喀前進即善為保護班禪額爾德尼同抵前藏勿致稍有驚恐○癸巳遣官祭昭

忠祠○諭軍機大臣等。據畢沅奏中州地方。政務殷繁。現在兼有辦理科場等事。雖署撫臣梁肯堂。即日到豫。而景安辦事最為諳習。現將一切章程。及應辦事宜。詳細告知。似應令景安暫緩陞見。俟冬月政務稍閒。再行進京等語。所奏甚是。景安在豫年餘。諸事自較為熟悉。梁肯堂甫經署理該處撫篆。究係生手。景安自應暫緩起程。幫同署撫臣梁肯堂認真籌辦一切。及邪教案犯各事宜。竟俟

冬月事閒。酌量可以起身之日。再行來京陞見。亦不為遲。○又諭曰。成德等帶兵遠赴西藏。協剿不特所帶口糧。諒止敷途次日食之用。即火藥鉛彈等項。恐亦不能多為攜帶。勢須在後陸續運送。以資接濟。維時大兵已過。解送之人無多。設窮番等竟於中途有搶劫情事。更屬不成事體。朕意尚須派一大員帶兵三四百名。於口外適中之地。駐劄彈壓稽查。方為妥協。著傳諭李世傑。即飛札與成德

商酌。或於成德穆克登阿二人內酌留一人。或於帶兵之副將內酌派一員在彼駐劄。倘伊等因現需帶兵赴藏協剿。未便留駐。即著李世傑於內地各營副將參將內。揀派一員帶兵三四百名。星赴口外適中之地。駐劄往來查察。並令聲言在後尚有大批前進。使窮番聞風畏懼。不敢出放夾壩。所送糧餉火藥等項。不致疎虞。此為最要。再已勒布不過公庸小醜。一經大批堵剿。自不致久肆鴟張。設

該夷衆等恃其獷悍。竟敢侵犯至藏。達賴喇嘛。班禪額爾德尼。俱係大喇嘛。不便仍往前藏。致被驚擾。自應照雍正年間。移至泰寧地方居住。該處舊有廟宇。惟當將達賴喇嘛班禪額爾德尼住房。量為糊飾潔淨。備其棲止。以資安禪。○又諭。昨因慶麟等奏到。籌辦接濟軍餉。已諭慶麟等鼓舞西番人等。令其踴躍出售矣。因思已勒布賊寇無多。雖搶占濟龍等處。去前藏尚屬甚遠。豈能突來侵犯。即

不曉事之商人或恐賊來擄掠躲避不前。斷無不願官為採買之理。此非慶麟豫留地步。即係畏難推諉。現據李世傑奏。打箭鑪至藏九十餘站。運糧必分二百站行走。不能迅速。該處所有綠營兵五百。達木之蒙古兵五百。并四川發往兵一千。共二千餘兵。所需糧餉。仍著慶麟等從本處採買。但西番人素性愚蒙。若不明白曉諭。不免疑懼觀望。今特明降諭旨。譯寫番字。寄交慶麟。通行曉諭。一面即動支庫帑。比平日採買之價。畧加增益。庶小人慕利。自必踴躍前來。紛紛出售矣。再達賴喇嘛商上存糧亦必不少。慶麟等即同班第達商酌。與商上管事之尚卓特巴等妥議。將所用糧石。先行估價給銀。俟事竣再行買補。即班禪額爾德尼商上亦有存糧。著與仲巴呼圖克圖及該處尚卓特巴等妥議。諭將商上現有之糧。接濟兵食。俾得奮勇攻賊。及早擊退。即班禪額爾德尼亦無須移駐前藏。倘

吝惜不肯發出一時未能藏事。將來所存糧餉。徒供賊人擄掠。何若支給兵丁。照數給價。慶麟雅滿泰當速遵諭旨妥為辦理。諭唐古忒人衆曰。達賴喇嘛。班禪額爾德尼數世居藏。廣興黃教。受朕深恩。歷有年所。即西藏黃黑番衆。安居樂業。亦已久矣。今因巴勒布等侵犯藏界。搶掠聶拉木。濟龍二處。爾黃黑番衆理宜竭力支持。勦退賊匪。第念爾等習於便安。久不知有兵戎之事。忽遇此舉。勢必張皇無措。朕甚憫之。今特調內地官兵赴藏討賊。無非保護爾等莫安衛藏之意。爾等更當懽欣鼓舞。多聚糧食。以期兵食充足。剋日藏事但爾等皆識見。愚蒙或藉此圖利。囤積居奇。或聞信惶惑。不敢出售。均未可定。茲特曉諭爾等。若有收藏米麪糈粃及可作行糧之牛羊等物。概行發出。售賣用濟兵餉。不惟爾等可沾厚利。大兵不虞乏食。成功迅速。豈不甚善。且巴勒布賊衆。雖經搶掠聶拉木。濟

龍二處與前藏相去甚遠。又何恐懼之有。爾等若將所存糧食藏匿不售。官兵運餉不繼。不能保護爾等。惟有將達賴喇嘛班禪額爾德尼移駐泰寧地方。賊衆如何肆虐於汝。亦祇置若罔聞。彼時爾等豈惟不能獲利。且致受害無窮。悔無及矣。尚其熟思利害。激發天良。勉從事。功成之日。朕將施厚恩於爾等焉。○又諭曰。慶麟雖未歷練。人尚明白。雅滿泰前在喀喇沙爾駐劄。辦事亦知勤奮。今為

已勒布賊衆無端侵藏。搶掠聶拉木濟龍等處。伊等調兵豫備一切。雖尚不致債事。但究未經歷行陣。朕甚廑念。今特繕寫檄文曉諭。禍福譯出番字發去。檄諭已勒布部落。廓爾喀等曰。前經駐劄邊境之第巴等報稱。爾屬下首領蘇爾巴爾達布整軍前抵我境。將聶拉木濟龍兩處搶掠。此兩處雖邊外。爾之區原係藏中舊屬。非爾之地。從前五輩達賴喇嘛時。爾等侵奪濟龍。經達賴喇嘛發兵奪

回今爾整頓兵旅。諒係與他部起釁。不意滋擾藏界。猶欲向宗喀前來殊出情理之外。爾已勒布部落不過邊隅小部。理宜守法安居。以享昇平之福。乃如此妄行蠢動。大聖皇帝雖至仁至慈體

上帝好生之德。似此狡焉思逞之徒。亦斷不容稍為輕赦。必發大兵殲戮。剿除前者如大小金川滋擾。經大聖皇帝特發勁旅全境蕩平。即如藏中前被準噶爾侵奪時。大聖皇帝不

惟恢復藏地。且將準噶爾闔屬及回部諸城全行勦滅。今歲復生擒臺灣賊首。土宇廓清。我大國兵威爾豈茫無聞見耶。今爾或一時昏昧。若及早引罪退兵。獻還兩處。大聖皇帝仁慈洞燭。不加深究。或可曲邀寬宥。誠為爾等之福。倘不深思利害。一意肆行。不知悛止。本都統已備兵數萬。統領前進。并續調數十萬兵。一經舉動。大兵全至。爾部落可須臾盡滅。彼時即恐懼哀懇。徹兵勢亦不能中止。豈

惟將聶拉木濟龍等處全行收復必將爾圖部亦如兩金川準噶爾臺灣之盡行蕩除不遺餘孽方足以昭天討茲念數十年來爾部尚屬寧靜且往來貿易者絡繹不絕與爾等大有利益今無故跳梁起釁自非爾之本意必係屬下匪徒就中取利唆使妄行本都統不教而殺心有不忍是以明白宣示諭爾撤文爾接閱此書須往復熟籌速行退兵將聶拉木濟龍等處全行獻出否則大兵一發爾等靡有孑遺追悔莫及尚其詳審利害毋自貽伊戚也著傳諭慶麟雅滿泰接到檄文後即鈐用印信與班第達等商酌選派能員速交巴勒布夷目並將巴勒布接奉檄文作何舉動有何言語及現在如何調兵堵禦戴綱等詳報何信班禪額爾德尼曾否移駐前藏一併迅速馳奏○又諭緬甸貢使前來行在瞻覲計其程期不能於萬壽前趕到亦不必令其趕進哨內該貢使等入直隸境時可以

從容行走著傳諭該督於貢使到境照料前行不必過於催迫祇須扣定程期於九月初五六前抵熱河於迴蹕前一日初七令委員帶領迎至中關卡倫門外接駕○又諭據蘇凌阿等奏現在楊村起撥之船因軍船連檣北上蜂擁而來不敷起撥之用查有天津衛運銅船等船一百隻現無銅鉛可運又查通州後到豫省糧船數幫雇用民船却糧回空亦可就近雇令起運等語前因衛河水淺惟慮糧船不能抵通今水勢充裕糧船銜尾而來該侍郎等又慮船隻擁塞排擠撥船不敷應用現在天津既有備運銅鉛等船可以雇用以沿途民船亦屬便於雇載亦只可如所奏辦理著傳諭該侍郎等即就近妥辦務俾糧石迅速抵通起卸毋誤回空為要並諭劉我知之○又諭曰阮輝宿等既欲回國尋覓嗣孫幫同恢復其志甚屬可嘉孫士毅自應即日令伊等起程將天朝現在派員統率大

兵四路助勦之旨及曉示安南各鎮目檄諭令該陪臣帶同安南廣為傳播於聲援之道自屬有益孫士毅有何顧忌不即將陪臣等速遣豈尚慮及朕未必准行欲俟接奉諭旨後再行遣發耶至據奏恩諭伊等之處恐語言稍多或有遺忘現在多寫數分令伊等同國之人各帶一分又現據粵東挑備之兵已有四千名將來如粵西兵力不敷威揚之用即請旨檄調以冀早行歲功等語籌算俱屬妥協即應如此辦理至粵西現有辦理科場事宜孫永清自應回省料理一切但現在邊隘分駐大兵黎民眷屬安插安南所有需用糧餉及一切口糧等項自宜源源接濟此係孫永清專責務宜早為儲備妥協辦理○甲午諭軍機大臣等昨寄慶麟發交廓爾喀檄文內尚有未到之處如雍正年間已勒布之葉稜雅木布庫庫木等兩次遣使抒誠納貢嘉其恭順誠信恩賞便蕃今之廓爾喀者乃

惟木布之呢爾巴也當伊侵擾三部之時即應興師問罪特以三部本屬微弱且究係外番之事故未深究廓爾喀理宜安分靜守何得復行侵擾衛藏濟隴等處地方雖小乃係天朝疆界一經蠢動天討必加今若畏罪投誠將濟隴等處恭順奉回大聖皇帝備極仁慈尚可諒加寬宥若仍昏憤無知逞其煙臂必致大興勁旅殲戮無遺爾等若倚恃路遠尤為冒昧試思伊犁等處回城道路如何險遠天朝俱經勦滅爾等跳梁小丑更何難一舉殲擒維時非特不能保其部落且不能稍延殘喘可將此譯寫速寄慶麟等一併添入檄諭內交與已勒布如何登答即速奏聞○補行乾隆五十二年廣西大計卓異官七員才力不及官二員不謹官一員罷軟官一員有疾官二員年老官三員分別議敘處分如例○乙未順天鄉試以兵部侍郎伊齡阿戶部侍郎汪承霈為監臨官禮部尚書德保為

正考官禮部侍郎鄒奕孝工部侍郎管幹珍為副考官。丙申諭據浦霖奏查勘澧州安鄉武陵華容等州縣被水情形摺內稱澧州武陵龍陽三州縣被水尚輕惟華容安鄉二縣情形較重現在查明並無淹斃人口衝坍房屋且民間先將家貲搬移高阜日用有資可無庸動項撫卹其被水尚未涸出之田現在設法疏消並查明無力貧民酌借籽種工本等語。華容安鄉二縣被水田畝現既未全行涸出著浦霖即飛飭該地方官相度形勢設法疏消並著查明實在無力貧民借給籽種口糧以資工作。前淑浦等縣有被水淹浸田畝之事曾降旨將該縣應徵本年下半年錢糧暫行緩徵今華容安鄉事同一例並著加恩將該二縣被水各垸本年應徵下半年錢糧一體緩徵至次年後徵收以紓民力。至澧州地處安鄉上游離湖稍遠武陵龍陽二縣隄身並未衝潰雖俱被災較輕並著該

撫詳悉查明如有成災處所亦即妥為賑卹不可稍有諱飾以副朕軫念災黎有加無已至意。○諭軍機大臣等前據舒常將荊州被水情形繪圖呈覽因閱圖內郡城迤西江面有龍尾洲一道距現決隄工不遠恐江水至此為所壅逼以致潰決亦未可定已有旨將原圖發交阿桂令其到彼詳細履勘設法辦理本日據阿桂奏途次遇見荊州佐領德楞阿等詢據稱該處沙洲日益增漲江水漸逼北岸隄根隄外沙灘都被衝刷是以屢有漫潰等語該佐領所稱或即係前旨詢問阿桂之處同日又據舒常繪圖呈覽閱圖內此次江水漫溢時首將萬城隄衝決該隄適處龍尾洲上游自因江水至此為沙洲所遏不能迅速東注以致壅高衝決著再傳諭阿桂到彼後即遵前旨親加確勘並詳查案卷熟籌妥辦並將查勘各情形迅速覆奏以慰廑念。○予隨征臺灣侍衛塞凌額西津泰特爾敦

轍雲騎尉世職如例○丁酉祭

先師孔子遣協辦大學士劉墉行禮○諭軍

機大臣等前據毓奇奏南糧全數渡黃即親

隨尾幫催督北上等語本年糧船自六月初

旬普得透雨後河水充裕行走迅速過濟日

期雖較之往年較早半月但回空船隻抵次

受兌愈早愈妙催趲亦關緊要著傳諭毓奇

俟尾幫抵通後該督可即由彼督押回空南

下不必前赴行在瞻覲致有耽擱也○以廣

西梧州協副將王林為石江鎮總兵○戊戌

太宗文皇帝忌辰遣官祭

昭陵○諭軍機大臣曰毓奇等奏南河漕糧向

於衛輝受兌上年改至五陵試兌雖已避去

老鸛嘴等處險溜地方但自五陵以至楚旺

一百三十餘里之內仍有古淺不免轉撥之

煩請改至楚旺受兌可免遲滯等語豫省漕

糧在衛輝受兌由來已久從前並未聞有遲

誤況豫省距通州不遠若果遵冬兌冬開之

制原不致有所耽遲該省漕糧上年改由五

陵兌運既經避去險溜且距直省境界較近

何以出境轉比往年遲緩自由該省兌交漕

糧時並不遵冬兌冬開之制致有貽誤原不

係水次之遠近今既據該督等以五陵迤北

尚有古淺處所復請改由楚旺其移建倉廩

一切費用於各州縣養廉內攤扣此摺若發

交部議不免查覈需時是以即照所請行但

本年豫省漕運稽遲未將貽誤各員從嚴議

處迥屬格外恩施今水次又准改至楚旺較

從前近至四百餘里兌運便捷嗣後更無可

藉口梁肯堂甫署巡撫該省前此貽誤漕運

之處與伊無涉正可大加整頓所有移建倉

廩各費俱係扣廉辦理著傳諭該署撫務督

同糧道等妥速經理勿任州縣藉端擾累俾

符冬兌冬開定制設再有玩誤必將該署撫

與糧道等一併從重治罪決不再貸並諭毓

奇知之○已亥諭據譚尚忠奏雲南石屏州

舉人賽璵。係雍正己酉科鄉試中式。曾任四川知縣。現年九十二歲。本年又屆舉行己酉科鄉試之期。請重赴鹿鳴筵宴等語。賽璵係前己酉科中式舉人。今重赴己酉科鹿鳴筵宴。洵屬儒林盛事。允宜特沛殊恩。用彰昇平人瑞。賽璵著加恩賞給進士。並著俟年屆百歲時。該省督撫再行奏聞。候朕另降恩旨。以示壽世作人。加惠耆齡至意。○諭軍機大臣等。已勒布在後藏邊界聚眾滋擾。搶奪彝拉

木。濟隴二處地方。後其宗喀一處尚在固守。距後藏甚遠。看來慶麟等辦理此事。不免失之張皇。內地官兵似可不至續需調撥。前派出之滿漢兵丁。並屯練降番共三千名。已據李世傑奏。先將綠營兵一千名。今成德帶往。其餘二千名。暫緩出口。著傳諭鄂輝於抵成都後。若尚未得西藏勦捕完竣之信。即於此二千名內。酌帶五百名。或一千。速往藏內接辦。換回成德。在省彈壓。如鄂輝馳抵成都。

或於途次已得西藏勦捕將完。及賊匪業經逃竄之信。不特豫備之兵二千名。應行飭令回伍。即鄂輝亦不必前往。徒滋跋涉也。○又諭曰。徐嗣曾奏。拏獲股頭匪犯。審明分別正法一摺。已批該部知道矣。至另片稱。逆犯大半係羅漢脚匪類。流寓在臺。現按照籍貫。密咨內地。查其財產親屬。務期毋稍疎縱等語。此等逆犯財產。其在臺灣地方者。自應詳晰查明。盡數入官。以備撥給戍兵之需。至各

犯在內地所置田產。不必概行入官。所有此項內地叛產。著於各該犯族眾。均勻分賞。以格外恩施。而杜爭競。並諭伊等。此係特旨加恩。嗣後倍當安分守法。勉為良善。並著李侍堯接奉此旨。先於漳泉一帶。通行曉諭。使知感激。又徐嗣曾另摺奏。請革職開缺。此可不必。前因臺灣吏治廢弛。徐嗣曾於屬員收受陋規。不能及早覺察。又不自請處分。是以降旨飭詢。但徐嗣曾於辦理善後各事宜。及

清查叛產。查緝犯屬等事。尚能周到。伊所請革職開缺之處。著加恩寬免。徐嗣曾益當倍加感激。諸事悉心經理。實力整頓。以期無負朕於全委任至意。將此諭令知之。○庚子。太祖高皇帝忌辰。遣官祭。

福陵。○諭據畢沅奏。豫省蘭陽。儀封。睢州。寧陵。商邱。五廳州縣。並考城。改歸睢州等處。臨河新灘。有地無收。請將應納糧銀一萬九千餘兩。於通省攤徵。其節年帶徵未完錢糧正雜。

銀六萬五千餘兩。仍於各攤戶名下。分作六年徵還。歸款等語。此項新灘地畝。因被河水淹浸。積成淤泥。難以耕種。自係實在情形。既經查明。各該處有地無收。不能交納糧銀。何必徒事催科。有名無實。況灘地應納糧銀。與他處無涉。今議令通省攤徵。不足以示公允。我朝賦役均平。正供維則。從前康熙雍正年間。蠲賑頻聞。從無加賦之事。朕臨御以來。三次普免天下錢糧。間有水旱偏災。尤必加意。

撫綏。不使一夫失所。且豫省額徵糧銀三百三十餘萬兩。其灘地應納糧銀僅一萬九千餘兩。為數無多。更不值總總過計。所有豫省臨河之蘭陽。儀封。睢州。寧陵。商邱。五廳州縣。並考城。改歸睢州。灘地應完糧銀。俱著即行寬免。其節年未完銀六萬五千餘兩。亦概予豁免。以示格外軫恤。朕辦理庶政。從不肯違道干譽。而於關係閭閻生計之事。必曲加體卹。損上益下。以惠黎元。小民等諒所共知。共

見。今灘地糧銀既免。其輸納將來灘地加高。耕作可施之時。各該地方官。自應查明照例徵收。毋任私墾。小民等具有天良。經朕此次加恩。亦必踴躍輸將。不致有心隱匿也。將此通諭知之。○諭軍機大臣曰。明亮奏到各摺。並未令伊斯堪達爾列銜。伊斯堪達爾係朕世僕。且係郡王職分較大。著傳諭明亮嗣後喀什噶爾一切事件。俱著一體列銜。仍飭新疆各處辦事大臣。凡遇貝子以上俱當稍加。

優待以符體制。○辛丑。

上御卷阿勝境。賜扈從王公大臣及蒙古王貝勒貝子公台吉等宴。至甲辰。皆如之。○諭軍機大臣等。據舒常奏。查明荊州隄工各潰口。節年督修。查驗各員一摺。所開職名。祇係知縣縣丞微職。殊屬不成事體。荊州隄工。雖係民修。但關係全城保障。既經官為經理。即應遴委大員督辦興修。何以僅委之知縣佐雜等官。而督撫司道以及本府。都不過而問之。是何政體。可見從前辦理隄工。承辦之員。全不以為事。且該處同城有道府大員。何以並不就近督查。而督撫等亦竟置之不問。是其玩視要工。一任屬員草率完事。侵冒其間。以致隄工在在潰決。歷任督撫藩司及該管道府。其咎均無可辭。著傳諭阿桂。畢沅。即遵照前旨。據實查明奏。○又諭安南廠丁為數甚衆。若為賊所煽惑。恐致賊勢益張。今孫士毅等。檄諭該廠頭人。許以恩賞。並免其廠稅。

今出力勦賊。亦一辦法。至江朝英所稱安南連年荒旱。米價昂貴。恐勦賊時糧食不接。粵西地方。向係產米之區。孫士毅等。於附近倉穀酌量濟給。亦無不可。但此項糧石。止須運至邊界各隘口地方。令廠民等前來領取。若該廠丁等。果能助力殺賊。迎回嗣孫。不煩內地兵力。自屬甚善。該廠丁等。因感念黎氏舊德。不肯從逆。現復諭令幫同勦賊。正資其力。所有從前偷越之事。亦可不必追問。○以鑲黃旗滿洲副都統

覺羅吉慶為內閣學士。兼禮部侍郎。○壬寅。

萬壽節遣官祭

太廟後殿。○遣官祭

福陵

昭陵

昭西陵

孝陵

孝東陵

景陵。

泰陵

泰東陵○遣官祭

孝賢皇后陵○遣官祭

顯佑宮

東嶽廟

城隍廟○

上御澹泊敬誠殿扈從王公大臣官員及蒙古王貝勒貝子公台吉等行慶賀禮○諭據伊齡阿等奏。去年新定科場條例內有填寫添

註塗改字數一條。此次查收頭場試卷填寫多不合式。應貼者幾及過半等語。科場條例填寫添註塗改字數。原以防謄錄對讀代改文字之弊。上年經大學士九卿等議定後。即已頒行直省。今歲鄉試屆期。該監臨等又復豫行曉諭。各士子自無不周知。入場時理應恪遵新例。照式填寫。乃錯誤者紛紛。幾及過半。本應概予貼出。姑念定例之初。或遠鄉僻壤士子未能通行知悉。又或因風簷寸晷。精

神恍惚。以致錯誤。此等寒畯。祇以未諳新例。尚無大弊。且應貼之卷。未免過多。此次除別項違式試卷。仍照例貼出外。所有添註塗改填寫錯誤之卷。著加恩免其貼出。仍准發騰。此係朕軫念士子。格外從寬。若明春會試及下屆鄉場。則此例頒行已久。倘仍有似此錯誤者。必當按例概行貼出。不能再為寬免也。將此通諭知之。○癸卯。諭軍機大臣等。據慶麟奏。行抵後藏。保護班禪額爾德尼。並查看

唐古忒等情形。及噶布倫戴綑等所報各信。看來已勒布並非強橫。慶麟雅滿泰若素嫻軍旅。一聞已勒布侵擾之信。自應處以鎮靜。密為防範。今戴綑將結等。甫至脅噶爾。即殺賊首一名。賊眾三名。奪回搶去牲畜。並稱所調唐古忒兵。足資抵禦。可見賊匪並無能為。但藏內唐古忒等。懦怯無能。當已勒布賊眾侵擾時。慶麟即當激勵伊等。奮勇勦殺。斷不可畏懼退避。今慶麟奏。仲巴呼圖克圖告稱。

前代達賴喇嘛書內。遇有軍旅之事。免派札什倫布各兵等語。甚屬可笑。設非藏地用兵。札什倫布所屬。自可不行徵調。今已勒布搶掠濟隴等處。係後藏邊界。相逼已近。札什倫布豈能自保耶。慶麟未能即加斥責於彼。已屬錯謬。乃止諭伊等靜守。尤足增其畏蒞之心。著申飭慶麟務遵節次所降諭旨。曉諭唐古忒人衆。令其拆奮勒殺迅速藏事。○又諭據慶麟雅滿泰奏報。派兵赴藏堵剿已勒布殺賊數名。並奪獲牲畜數十等語。已勒布被官兵以寡擊衆。勒殺退敗。看來賊衆無能。亦無大志。不值大辦。著傳諭鄂輝李世傑即將續派官兵五百名。停止前往。至成德前經帶兵一千。前赴西藏計此時不過甫至打箭鑪行走未遠。並著傳諭成德沿途留心探聽。並與慶麟等迅速酌商。如所帶官兵已離藏不遠。或乘已勒布勒敗之時。帶兵奮力追剿。將擒去聶拉木濟隴三處地方。全行收復。俾賊

人喪膽。不敢復犯邊界。一勞永逸。固屬甚善。若官兵行走距藏尚遙。約計到時。已勒布早經遠遁。則所帶官兵一千名。竟可無庸前往。致滋煩費。至內地辦理軍需等項。此時亦可無庸多為籌備。並著李世傑探明確信。彼此相商酌量辦理。若該處事已完竣。即可停止備辦。以節虛糜。○又諭據保定城守尉武寧阿奏本年二月內。有駐防馬甲伊里布呈控閑散霍純武。同馬甲富爾津布。乘伊里布該班時。潛赴伊家圖姦其妻。其妻不從。霍純武持刀恐嚇伊里布之妻。奪刀致傷右手。被喊而逸。並未成姦。當將該二犯交理事廳辦理。詎七月二十二日。霍純武之妹登牆詈罵該管官員。因何袒護伊里布之妻。將伊兄圖禁不放。現將伊妹拘拏看守。請將地方官嚴審從重治罪等語。此案係二月內之事。何以至今尚未審結。除就近飭交劉戡查明。係在何處遲延。降旨分別議處外。並令將霍純武富

爾津布及霍純武之妹。即委妥員解送刑部嚴審定擬矣。霍純武富爾津布俱係滿洲。乃敢乘伊里布該班時勾約前往希圖輪姦伊妻。霍純武復敢用刀恐嚇致本婦奪刀傷手。按律應擬絞候。其富爾津布一犯如亦有執持光器情事。自應一律擬絞。即使無逞兇情事。亦未便照例擬流。應從重發遣伊犁為奴。並削去旗檔以示懲儆。至霍純武之妹年逾三十。尚未遣嫁。今見伊兄犯姦被禁。情急逞刁。詈罵本管官長。恐其中或有亂倫曖昧情事。朕意不出於此。果有則另當從重定擬。如果無此等情節。亦當治以應得之罪。著傳諭刑部堂官。於解到後。即令誠實穩婆驗明是否處女。從此根究。無難得其實情。該堂官等於此案不可分漢官不辨之說。務宜詳細究驗。審訊明確。再行分別定擬。不使疎縱。以成信讞。○甲辰原任湖廣總督舒常奏。臣委荆宜施道沈世燾往看監利石首二縣水災。據

監利濱江之孫張王等月隄普漫。除南鄉無水。其東北西三鄉。惟五十七垸未淹。餘皆瀰漫。房屋人口俱有坍塌。傷先已撫卹一月。口糧至東鄉地勢最低。水浸隄身間有酥銹。石首沿江隄工穩固。因上游公安縣東壁隄潰。口波及該縣四鄉。俱被淹浸。房屋衝倒。尚未損傷人口。亦先撫卹一月。口糧現俱安貼得旨。加意撫卹災民。毋致失所。

實錄卷千五百十

聖

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十一
監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部經筵講官正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書領侍衛內大臣都統等功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆五十三年戊申八月乙巳諭據琅玕叅
奏東陽縣知縣謝昕因縣屬糧冊殘缺民間
買賣田產每多弊混具詳藩司請設局推收
經藩司飭駁批府嚴禁該府張思振復照縣
詳轉稟又經藩司嚴行批駁該縣謝昕輒敢
擅行私立戶管田冊令各糧戶填明田數送
縣用印每畝索錢二三四文不等現據生
員胡含英等控告查起已用印冊七十八本
無印白冊二千七百四十七本計收過錢七
十餘千請將東陽縣知縣謝昕革職嚴審金

華府知府張思振解任究審等語謝昕著革
職張思振著解任交與該撫提同案內人證
一併嚴審定擬具奏至此案經該縣詳請藩
司辦理該司批駁後復經該府照縣詳轉稟
該司顧學潮明知事屬紛擾即應將該府縣
據實糾叅或詳請該撫嚴行叅辦乃僅以批
飭了事殊屬非是各省藩司原有奏事之責
乃外省習氣遇事多有模稜各藩司所陳奏
事件大半不過雨水情形及銀號無弊照常
交代之摺而於關係地方要務不肯專摺入
奏近日藩司中惟梁肯堂辦事尚屬認真是
以加恩令其署理河南巡撫顧學潮係由道
員特用藩司何以於此等劣員擾累地方之
事竟不詳請該撫辦理又不據實叅奏殊負
委任顧學潮著交部嚴加議處至各省藩臬
大員即遇督撫執法營私亦得專摺入告非
欲伊等掣督撫之肘蓋國家設立兩司大員
令其具摺奏事原欲兼聽並觀以期民隱上

達。若遇事輒緘默不言。又安用藩臬大員。並令伊等奏事為耶。嗣後各省藩臬等惟當交矢精白。勿仍蹈隨同附和積習。致干咎戾也。將此通諭知之。○又諭御史和琳。本年。在臨清德州一帶。催趲漕船。並籌辦疏濬起撥諸事。尚為妥協。東省運河。現據毓奇奏。回空後。須勘估挑挖。和琳熟悉該處情形。所有明年巡視東漕事務。仍著和琳去。○又諭曰。舒常業經解任。著暫留翎頂。俟監修各工完竣。回京。再降諭旨。李天培係該省臬司。監獄是其專管。平時不能督飭稽查。固有應得之咎。但念該司駐劄省城。距荊州較遠。李天培著改為革職留任。姜晟已補授刑部侍郎。亦著從寬改為革職留任。至荊宜施道沈世燾。荊州府知府俞大猷。近在同城。於所屬監犯。不能先事管束。任聽屬員擅鬆刑具。非尋常失察可比。且該處隄工潰決。亦由該道府於每歲修理時。並不親加查驗。一任承辦官員草率。

侵漁所致。沈世燾著照部議降三級調用。俞大猷著革職。皆留工所効力贖罪。以示懲儆。○諭軍機大臣等。據毓奇奏。本年東省各處山水疊長。其勢甚大。汶泗諸河之水。挾帶泥沙。實非往年可比。大泛口十字河及分水口等處。淤沙較厚。若不認真挑挖。恐明春重運進閘。難免淺涸。請於回空後。勘估挑挖等語。東省運河。本年因山水長發。大泛口等處。不免流沙淤墊。自當豫行勘辦。以備明春重運經行。著傳諭蘭第錫。長麟。即於回空過竣後。逐細察勘。確切估計。認真實力挑挖。俾河道一律深通。來春重運。進行不致稍有阻滯。方為妥善。並諭毓奇。和琳。知之。○丙午。上自避暑山莊啟鑾。幸木蘭。○是日。駐蹕中關行宮。○丁未。諭軍機大臣曰。書麟奏。兩江地方雨水充足。禾苗長發。情形一摺。所稱江蘇安徽各屬雨澤處處霑足。稻秫現在刈穫。中晚二禾已有業經收割等語。摺內僅籠統聲

欽照例彙奏而於江蘇安徽江西三省收成實在分數未經分晰敘明現屆秋禾收穫之時著傳諭閩鄂元陳用敷何裕城即將各該處現在收成實有幾分其雨水稍多地方乾涸後補種晚禾是否可以一律有收之處據實查明速奏以慰厯注○又諭前因慶麟等奏巴勒布聚眾滋擾將附藏交界之濟龍聶拉木二處地方搶占恐藏內兵力不敷是以諭令李世傑於四川內地滿漢官兵及番兵共調三千名豫備前往協勦又恐屯練降番距打箭鑪較遠並令就近於明正巴塘裏塘德爾格爾各番兵內酌量檄調旋據李世傑奏藏內防禦之兵已有一千二百名加以唐古忒兵丁已不為少且慶麟等究未得賊實信似毋庸遽行多調將所派綠營兵一千名先令成德帶往其餘滿漢屯兵共二千請暫緩出口等語朕方以該督尚有主見所奏為是今該督因接奉初降諭旨又復紛紛派調

殊不知彼時朕乃初得慶麟等奏巴勒布搶占聶拉木濟龍之信尚未悉賊匪實在情形李世傑駐劄成都先得藏內信息既有請將二千兵丁暫緩出口之奏即不應復令起程況已調屯練降番一千二百名又何必更派明正巴塘裏塘德爾格爾之兵此舉泥於遵旨未免失之張皇無定見矣明正巴塘裏塘各番兵一時既未必遽能調齊而張芝元到川亦尚需時日著傳諭李世傑接奉此旨如續派各番兵或尚未起程或起程而行走不遠可即飛檄停止如早經起程離藏不遠又不可拘泥撤回使番兵徒勞跋涉更屬不成事體該督總當就近探聽藏內信息酌量情形如該處勦捕業經完竣不特續派番兵不必前往即佛智穆克登阿帶往之滿漢官兵皆可停止前進如該處勦捕事宜未經完竣尚須內地兵力協勦而各兵丁行走又已將抵藏則不如聽其到彼將賊眾痛加殲戮俾

知畏懼不敢再犯邊界以期一勞永逸李世傑務當權其緩急輕重妥協籌辦不可仍前拘泥以致漫無定見跡涉張皇也○兵部議准塔爾巴哈台叅贊大臣永保咨稱該處於乾隆四十八年設立差操兵丁每歲共操六個月今烏魯木齊巴里坤等處均照內地例操演八個月期於技藝純熟請將塔爾巴哈台兵丁亦照例改為八個月從之○是日駐蹕波羅河屯行宮○戊申祭

大禱

大稷遣克勤郡王雅朗阿恭代行禮○諭據和琳奏山東運河定例一年小挑一年大挑小挑准銷銀二千八百餘兩大挑准銷銀一萬七千二百餘兩但挑工之多寡似當視受淤之厚薄情形以為準其大挑之年若淤沙本薄乃准用銀一萬七千餘兩是徒滋官員浮冒地步其小挑之年若受淤本厚乃限定用銀二千八百餘兩勢不免遷就草率請不必

拘定大小挑工原案總以二年用銀不得出一萬六千兩之數比舊例原定大小挑工共用銀二萬兩實減去銀四千餘兩似於慎重錢糧利導漕運兩有裨益等語東省運河募夫興挑原為該河承受山水不免淤墊恐阻漕運而設如果水勢充裕衝刷深通並無停淤又何必拘按年大小修之例動項興挑徒滋浮冒如山泉匯注停淤甚厚自當實力挑挖免致漕運耽延從前所定間年大小挑之例本未允協該御史奏請視受淤之厚薄分挑工之多寡所見亦是惟比較原定銀二萬兩酌減以一萬六千兩為率之數斤斤計較尚未為周到嗣後東省運河竟不必復拘大小挑之例惟當責成河東總河山東巡撫巡漕御史於每年回空將次過竣時確加履勘若河道並無停淤即無庸挑挖以節糜費若河道果有受淤或積淤甚厚即當確加估計據實奏聞認真辦理亦不必拘於銀數或該

督撫因地方河道官員。是其所屬。意存瞻徇。任令從中浮估偷減。以為侵漁地步。抑或因循玩誤。於應挑之工。而不奏明挑濬。巡漕御史係特派之員。俱無所用。其迴護自當據實。奏奏倘該御史知而不舉。隨同隱飾。或誤漕運。或任冒銷。一經查出。即將該御史一併從嚴議處。如此覈實辦理。互相稽察。自可杜浮冒。而利運行。所有本年東省運河應挑各工。前已准毓奇所請。於回空後。勘明興挑。和琳現留巡視東漕之任。其應行挑濬事務。即著該御史會同確勘。具奏督飭認真挑辦。嗣後並以為例。○又諭。前因臺灣賊匪勦捕完竣。但該處民情剽悍。雖經此一番懲創。恐事過即忘。不足令其怵目。儆心。常思安分。特令於臺灣建立福康安海蘭察等生祠。俾民人望而生惕。昨據徐嗣曾奏。臺灣應建生祠。擬於御碑亭後附建。建蓋因思福康安海蘭察等帶兵渡臺。勦賊固屬有功。而李侍堯在泉州

廈門一帶。辦理軍需。始終無誤。徐嗣曾前赴臺灣幫辦善後一切。亦為妥協。且督撫為守土大員。若不得與帶兵之將軍參贊等。同沐褒功之典。亦恐該處民人。意存輕視。李侍堯徐嗣曾著准其一體列入。俟生祠建竣後。所有設立木牌。福康安自當居中。其左則海蘭察。右則李侍堯。左次普爾普。右次鄂輝。左再次徐嗣曾。右再次舒亮。並將御製功臣生祠誌事詩一首。繕寫清漢字。發往一并刊泐。碑旁以示朕優獎勤勞至意。○御製詩曰。三月成功速。且奇紀勲合。與建生祠。垂斯琬琰。忠明著。消彼荏苒。符志默移。臺地期恒樂民業。臺灣不復動王師。曰為日毀。似殊致崇實。斥虛政在茲。○諭軍機大臣曰。勒保等奏遵旨查辦實。鷄縣民雷得本。設立悄悄會。誘眾歛錢。並續獲餘黨楊忠。呂良棟。歸案究審。一摺。此等案犯。雖祇係設立會名。誑騙鄉愚。希圖歛集錢文。尚無別項情節。亦應速

行審辦定擬完結以淨根株至摺內稱訊據楊忠供上年因見雷得本私立悄悄會名歛錢不少隨欲另立一會誘衆出錢是楊忠雷得本從前原係一教繼復分立教名乃摺內聲敘楊忠之子家內起出合同四張一節又稱楊忠與雷得本俱係一教楊忠既能傳寫合同雷得本自必亦能傳授訊據雷得本供因不能寫字是以未曾傳授等語又似該犯等係屬同教敘摺殊不明晰雷得本楊忠同係誘衆騙錢但其所傳習邪教究竟是一是二必應徹底研究並著勒保已延三詳悉查訊分晰具奏將此傳諭知之○是日駐蹕張三營行宮○已酉諭今日路途泥濘著賞給校尉披甲人等一月錢糧○是日駐蹕阿貴圖大營○庚戌遣官祭賢良祠○貴州巡撫李慶芬疏報乾隆五十二年黃平麻哈普安涓潭變安車節天柱七州縣共墾田一百四十畝有奇○是日

上以木蘭內雨水較大橋梁未成停止行圍迴蹕駐張三營行宮至甲寅皆如之○辛亥諭昨日渡河扈駕之索特納木多爾濟著加恩賞戴三眼花翎賽尚阿授為公品級拉旺賞戴雙眼花翎琳沁多爾濟授為公品級○諭軍機大臣等據李世傑奏接奉諭旨令將明正裏塘巴塘德爾格爾所調之兵停止但裏塘巴塘各土司近年尚屬安靜不難調集今若復行停止恐番性多疑轉生疑慮懇將此項番兵仍行調用等語所辦甚是又據慶麟奏後藏脅噶爾地方被巴勒布賊衆萬餘圍擾現催調藏兵尚未到齊等語是該處正資內地兵力協剿李世傑接奉前旨並不拘泥停止仍請調往辦理所見甚屬可嘉所有前調之滿漢兵丁及屯練降番三千名又續調明正各番兵一千名想當星速前往矣成德先已帶兵啟程著傳諭該提督務即趕赴後藏幫同堵剿佛智穆克登阿亦當帶兵迅速

行走以資接濟鄂輝更應晝夜兼程以便馳抵川省即行星赴後藏帶兵勦捕前有旨令鄂輝抵藏後即換回成德在成都彈壓一切但軍營領兵大員多一人自多一人之力成德久經軍旅著即留於彼處幫同鄂輝帶兵協勦毋庸復回成都其提督印務朕當另派人署理至口糧等項察木多以東既經李世傑派員妥為經理不至缺乏其察木多以西至藏內地方祇可仿照乾隆六年之例就近於納囊採買諒可無誤軍糈也所有辦理暨行走各情形及成德所帶頭起官兵於何時可以抵藏之處仍各迅速覆奏以慰廑念○補行乾隆五十二年直隸軍政卓異官九員年老官一員有疾官二員才力不及官二員分別議敘處分如例○壬子秋分夕月於西郊遣怡親王永琅行禮○

世宗憲皇帝忌辰遣官祭

泰陵○諭曰成德現在帶兵前赴西藏協勦所

有四川提督印務著觀成馳驛速行前往署理○諭軍機大臣等本日據成德奏屯兵遣用較為得力所帶一千名官兵內已減留漢兵二百名調派屯練二百名前進所辦更好如屯練降番尚可多帶或派出之裏塘巴塘各番兵可以就近帶往不妨儘數多帶備用自更得力該提督於八月十一日已抵茹提計此時業距藏不遠著再傳諭成德惟當趨緊進行星速赴藏巴勒布人眾雖據慶麟等奏約有萬餘但脅噶爾僅有喇嘛黑人等三百名尚能固守可見賊匪之無能為但緣營兵丁勦賊亦不能堅定惟在成德善為策勵調度即屯練降番及明正各番兵等亦當加之鼓舞方資其力且該番兵等素性敬佛成德可即向其宣諭以藏內為達賴喇嘛班禪額爾德尼駐錫之地今巴勒布賊眾滋擾達賴喇嘛班禪額爾德尼俱不能寧居爾等素奉佛教正當趁此出力殺退賊眾可以護

法安禪功德尤大造福更甚將來事竣後大皇帝又必優加獎賞爾等更可仰邀恩典等語如此剴切曉諭各番兵既思護持佛法又知有優賞利益自無不踴躍歡欣爭先效命如鄂輝未到之先成德即能迅奏膚功朕自當優加恩獎該提督務宜奮勉妥辦以副委任承受朕恩鄂輝張芝元途次亦當星夜兼程行走以便迅速到彼再帶續調之兵迅往會同成德勦賊以冀剋期蕆事其口糧等項

昨據李世傑奏已派員妥為豫備本日據成德奏於附近明正土司之控薩白利瑪克舒霍耳伯浪古緯俟霍耳東果爾瓦述德爾格忒等土司令其幫同接替應付各土司素皈正教聞知官兵赴藏防衛無不遵從又革布什咱土司亦告懇幫應其察木多以西令官兵自行裹負就近覓食等語所辦皆好甚為妥協控薩白利各土司既可接替應付而革布什咱土司並願告懇幫應著李世傑即傳

知該土司以爾等素奉佛教今官兵前赴西藏係為防衛達賴喇嘛班禪額爾德尼各土司幫同接替應付糧運並有告懇幫應者殊為恭順急公可嘉將來勦賊完竣後大皇帝自必特加恩賞俾各土司倍加踴躍輸將東臺一帶挽運自更裕如也○又諭據李世傑奏巴勒布既滋擾後藏連界地方該處緩急情形難以懸揣固不可多糜兵力致費周章似亦須量予增加裨得迅速蕆事請將前調

之第二起滿漢官兵及屯練降番共二千名仍接續進發俾壯聲威等語該督能相機妥辦並不拘泥遵旨所見甚是實屬可嘉惟所稱前調之明正裏塘各番兵一千名令其仍前豫備聽候調遣之處現在藏內正資內地兵力協勦所有續派之番兵一千名竟當即速前往何必復行聽候以致遲延乎又據奏西藏道途險遠挽運維艱前接慶麟等咨會當即查明該處郡王波羅鼎之時曾經就近

買米例案。咨覆查辦等語。藏內就近採買。從前既有成案可遵。乃慶麟等未經更事。一經煩難。便手忙脚亂。實屬錯誤。除嚴飭慶麟等速行採買供應外。但李世傑仍當竭力妥辦。不可倚恃伊二人。以致或有缺乏。現據該督奏已撥米一萬二千三百石。趕運打箭鑪並挨站。趕運直抵西藏。足敷兵食之用。所辦可謂盡心。且郭羅克距西藏尚遠。又經李世傑派兵護送。無虞搶掠。所辦甚是。又據奏轉運米石軍火。在在需銀。請先於備貯軍需項下動用。事竣另行歸款等語。此項銀兩既為備貯軍需而設。自當即行動用。俟事竣另籌歸款。○又諭曰。李鴻章奏接准慶麟等籌辦接濟內地兵丁糧石。即將從前郡王波羅鼎就近在本處採買之案。查出咨行等語。慶麟雅滿泰尚未更事。一聞巴勒布信息。即茫然不知所措。從前接濟內地兵糧均由本地採買。乃慶麟不但以內地派往之兵艱於支應。即

該處現有之兵亦無口糧。可買具奏。顯係並未檢查舊案。畏難退縮。豫留地步。慶麟雅滿泰身係蒙古世僕。竟如此張皇失措。反不如李世傑以漢大臣尚能靜鎮處事。妥協辦理。是何意見。著嚴加飭行。令其速查舊案。商同班第達。遵照諭旨。開導各屯莊。第巴僧俗人等。俾知出糧售賣。可期獲利。倘吝惜不行。出賣難保無虞。且內地派往之兵實因保護達賴喇嘛。班禪額爾德尼及安撫衆唐古忒人等。伊等即當感奮。如此通行曉諭。自能寬為備辦。斷不可仍前畏難推諉從事。○又諭現因巴勒布賊匪滋擾後藏邊界。四川省派調滿漢官兵及屯番各兵前往協剿。軍需最關緊要。著傳諭巴延三海寧。即於該省藩庫存貯銀兩內就近各通融動撥銀五十萬兩。派委委員速行解赴四川。以備應用。如該二省剩存銀兩不敷公用。亦即速行奏聞。以便另籌撥款。○又諭現在梁肯堂署理河南巡撫

直隸事務殷繁亟需熟手幫辦。因思福建軍務完竣內地並無緊要應辦事件。著伍拉納即將巡撫印篆交李侍堯兼署。迅速前赴河南巡撫新任梁肯堂交印後即可趕回直隸幫同劉戡辦理一切。伍拉納到任後將應辦之事畧為料理再將印篆交與藩司景安護理。前來陛見請訓亦不為遲。將此各諭令知之。○安徽巡撫陳用敷布政使陳步瀛奏慶廬州等九屬被水。臣等親往確勘。望江銅陵蕪湖繁昌無為和州較重。懷寧桐城宿松東流貴池當塗廬江次之。潛山太湖青陽建德泗州盱眙五河又次之。房屋間有坍塌人口並未傷損。惟秋後積水尚深已種未種之地皆成一隅偏災。除已緩徵并給修費外請俱酌量輕重照例予賑。其勘不成災之巢縣鳳陽靈璧宿州懷遠鳳臺壽州定遠霍邱亳州蒙城含山十二處雖涸復尚速民力未免拮据亦請緩徵。又五月猝被蛟水之初門點

縣休寧三縣有沙壓甚重不能及時挑復補種者亦請分別緩徵給賑得旨覽奏稍慰雖一隅偏災按例妥辦毋致失所亦不另發旨矣。○癸丑諭軍機大臣等川省現有應辦軍需事務李世傑駐劄成都距藏較遠於籌辦一切究恐鞭長莫及省城現無應辦要務又有藩臬在省足資照料朕意打箭鑪為兵丁糧餉出口之處且地當適中該督何不移往駐劄該處距藏稍近消息易通可以就近調度而內地亦無難兼顧且使口外人眾知有總督在彼威勢較大更足以壯聲援而資策應將此由六百里加緊傳諭知之。○又諭巴勒布賊匪滋擾後藏成德鄂輝先後帶兵赴勒鄂輝著授為將軍成德著授為叅贊大臣協力妥辦以期迅速肅事。○又諭曰慶麟奏已勒布賊搶占宗喀復圍脅噶爾之寨又有賊來普窮結營唐古忒兵撤回在春對地方慶麟照料班禪額爾德尼由扎什倫布北山

蒙古地方揚巴津一路行赴前藏雖是遵旨辦理但唐古忒兵甚屬懦弱賊至並不奮力剿殺即星散逃避慶麟宜嚴行懲責令其奮勉守禦乃輕聽所報謂賊可疑是先示伊等以懦弱矣又據稱賊掠宗喀之後由巴桂塘一路往脅噶爾會齊是賊並非據守宗喀唐古忒兵理宜仍往宗喀躡賊之後雖不能一舉殲擒亦可力圖克復並分圍困脅噶爾之賊勢慶麟何反將懦弱之語引導戴綱等耶慶麟祖班第素稱能事何以生此無用之孫甚為愧之再慶麟照料班禪額爾德尼到前藏後即當遣回扎什倫布前藏有雅滿泰諸務儘可辦理何用慶麟在彼明係慶麟藉端徑回前藏將後藏委一無用之仲巴呼圖克圖遂謂與已無涉倘扎什倫布又被賊人占據朕必將慶麟從重治罪斷不輕恕成德不久即至後藏辦理用兵殺賊事宜慶麟雅滿泰不可妄為掣肘慶麟著在後藏保守雅滿

泰著駐前藏接應軍糧若有貽誤惟二人是問○甲寅諭陝西提督學政著邱庭澂去現在該省文闈將次揭曉尚有錄送武闈等事著即速赴任不必前來行在請訓○諭軍機大臣等據李世傑等奏續獲郭羅克搶掠夷匪審明辦理一摺內稱上中下三土司畏懼王法隨同差弁於郭羅克各處寨落竭力探訪都已周徧現在再無一人可以擒獻願出具甘結並嚴禁手下番人永遠不到阿里克地方滋事所有派往官兵已行撤回等語上中下寨落郭羅克業經官兵督飭土司搜拏其已回者現俱就獲此外逸匪據土司等出結實未潛回此不過遮飾之詞但所有派往官兵雖毋庸在彼久駐惟仍當嚴飭該土司留心擒獻並派員不時前往探訪飭查一有逸犯逃回立即掩捕從重辦理朕意明春仍派兵前往責以半年之中豈無逸賊逃回實力查拏一番則土司等知懼或復獲數賊亦

未可知。將此隨報便傳諭知之。○又諭。據成德奏。明正巴塘裏塘俱在口外。現在承辦應付烏拉德爾格爾。在打箭鑪西南。亦派令幫應烏拉。俟順道經過時。各該土司及掌事頭人前來謁見。面加明切曉示調撥。俾知共相踴躍。俟其派定番兵。即催令速行等語。所見甚是。現在宗喀雖已被巴勒布搶占。而脅噶爾地方僅有喇嘛黑人三四百名。在彼看守。所有卡寨碉樓。並未被賊攻破。可見賊匪之無能。沉後藏地方。為班禪額爾德尼駐錫之地。其扎什倫布碉樓。比之脅噶爾。自必更加十倍堅固。諒可固守無虞。雖據成德奏。口外至藏程途遙遠。兵丁俱係步行。約計九月底可以抵藏。著再傳諭該提督務當晝夜趲行。愈速愈妙。計成德到藏之時。該處必尚不至失事。況賊又無能。一經官兵痛加殲戮。自必望風畏竄。但不可以賊既竄回。即為完結。亦當將賊匪所搶濟龍。聶拉木。宗喀三處地方。

全行收復。並使賊知所畏懼。不敢再犯邊界。方可歲事。成德務宜勉為一切。以副委任。仍著鄂輝加緊行走。以期迅速。到川帶兵前往。○乙卯。諭。本日由張三營啟蹕。回至波羅河屯。繞道山梁。適遇陰雨。所有平墊山道之兵。夫著每名賞銀一兩。以示體恤。○又諭。哨內雨水較大。橋梁俱被衝塌。熱河副都統恒山保。並不據實陳奏。殊不曉事。恒山保著革去花翎黃馬褂。與密雲副都統富昌對調。○戶部議覆。長蘆鹽政穆騰額奏稱。長蘆行鹽各口岸。俱用錢文。而商人則用銀交課。從前銀一兩需錢八九百文。迨乾隆五十一年。需錢一千文。商衆已苦賠折。上年奏銷。竟需錢一千一百餘文。又因錢賤物貴。運腳等費。成本倍增。較之五十一年。每引虧銀五六錢。通計長蘆行鹽處所。每年約虧七八十萬。年復一年。靡所底止。請將直隸山東河南行運引票。於現行鹽價外。每觔加制錢二文。以補用錢。

易銀之不足應如所請從之○是日駐蹕波羅河屯行宮翼日如之○丙辰諭軍機大臣等本日據阿桂等奏察看荆州城垣隄工情形一摺內稱荆州郡城四面平原別無高阜未便輕議遷徙此次被水較重固由隄塍不固而川江異漲一時宣洩不及以致壅高漫溢其受病之由詢之土人等多以害金洲漲沙逼溜為言因思瀕江郡治固藉隄防為保障但江流奔放一瀉千里若下游扼塞關欄則浩瀚之勢不能宣洩暢遂自必至上壅為患詢訪輿情察看形勢其故總因下游之害金洲漲阻等語下游扼塞則上流自然衝決病源在此自當急為治理前經舒常奏郡城江面迤西有龍尾洲一道當即以該洲距現決隄工不遠恐江水至此為其所逼北趨已諭令阿桂詳悉履勘妥籌辦理今據奏下游之害金洲漲沙梗阻是以上游壅決為害自應速行勘辦去其病源況荆州四處平原既

無高阜之區而移建城垣所費不貲且恐小民安土重遷自不便復言移建今隄工已大加修築豈可復留此洲壅遏水勢致貽後患舒常前奏此次被水與害金洲無涉之處伊固何能計及此也著傳諭阿桂即再親加履勘並遍加訪詢或於該洲之上開挑引河或將洲尾酌量剷挖以暢水勢速行繪圖貼說奏來但害金洲亘漲日久不知其上有無百姓居住小民貪利罔知後患即如黃河外灘及西湖淀河等處淤出之地小民無不偷占開墾與水爭地但害金洲既於江流有礙事關全郡保障未便因有民居因噎廢食置之不辦阿桂等宜諭令遷移設法抽挑以期江流暢達不至仍前壅遏為害方為妥善又畢沅奏郡城被害雖重水退尚速現在有力之家鳩工築室其貧乏之戶俱經給予修費四鄉涸出地畝農民尚可補種收穀等語覽奏稍慰目下已屆深秋所有應辦賑濟事宜速

即照例給予母侍朕旨。又據阿桂奏現在荊州滿城駐防官兵一切撫恤等事。約需銀十四萬餘兩等語。阿桂所奏十四萬之數。僅止撫恤滿城官兵所用。而此外尚有賑恤災黎及一切要工需費。自必更多。但朕為民生起見。即多費帑金。亦所不靳。前已撥銀二百萬兩解楚備用。倘尚有不敷。著傳諭阿桂。畢沅不妨再行據實具奏。另請籌撥。阿桂。歷經委任。自能仰體朕懷。妥協督辦。一切畢沅新任

湖廣總督地方。是其專責。更當董率所屬。遴委委員。於各屬成災處所。分投確勘。實力賑卹。俾災黎均霑實惠。毋使貪吏飽壑。方為不負任使。將此由六百里加緊各諭令知之。○又諭曰。黎維初親赴山南招集義兵。乃至為賊所逼。僅有跟隨數人。入山藏匿。看來竟是一無能為之人。難望其振作恢復。現在阮岳阮惠因見孫士毅所發檄文。畏懼遁逃。潘啟德本係阮惠心腹。一接檄文。即知去逆效順。

經孫士毅諭令糾約七州人馬及嚴民人等。速即遣進。自無難直達黎城。該嗣孫現在處東地方。孫士毅已購募土人前往探聽。如處東鎮目接到孫士毅密札。已撥兵護送該嗣孫起程歸國。孫士毅俟得有該嗣孫送來符驗。自當酌量情形。再料理眷屬出關。至阮惠等因見該督檄諭。懼天朝致討。震驚遠竄。若內地竟無舉動。賊匪知該督檄文內所稱調備大兵。不過虛張聲勢。必益無畏懼。故智復萌。竟圖篡奪。孫士毅所請先期調兵豫備之處。自當如此辦理。但如果用兵進討時。孫士毅係兩廣總督。關係甚重。且內地應辦之事甚多。斷不可親領前往。該省提督許世亨總兵張朝龍。李化龍。均係經歷行陣之人。阮阮黨偽鎮帶兵過文淵州。經州民黃僚達等率眾邀截。殺傷賊眾甚多。又七泉州社目阮仲科等亦願帶夷人七百名。隨同剿賊。看此情形。阮岳等亦無須多兵勦辦。止須令許世亨

並總兵一二員帶兵數千名前進孫士毅再備數千在關隘駐劄聲言續發諒阮賊等斷不敢恃其頑獷負隅抗拒○又諭滇省蒙哨一路與安南接壤該處夷目等或為阮姓所用將要害地方潛行占據亦未可定自應一面檄諭各夷目等一面派兵駐劄邊境遙為粵省幫助聲勢富綱當率領勇往曉事鎮將酌帶官兵往彼駐劄聲言現在會同粵省兩路進兵一俟粵省大兵進發即剋期會同協

剿俾夷目等聞風震懾知天朝大兵雲集務欲復立黎氏自必仍思戴舊則阮姓之勢愈孤不難迅速蕺事○丁巳諭此次木蘭修補橋路喀喇沁郡王滿珠巴咱爾公品級頭等塔布囊瑪哈巴拉率屬奮勉滿珠巴咱爾著加恩賞給親王品級並賞用黃轡瑪哈巴拉授為輔國公並賞戴雙眼花翎喀爾喀公噶爾瑪公品級甘珠爾扎布頭等台吉敏珠爾多爾濟二等台吉班珠爾遜都布亦屬奮勉

噶爾瑪著賞給黃馬褂花翎甘珠爾扎布賞戴花翎敏珠爾多爾濟賞給公品級班珠爾遜都布賞給黃馬褂○又諭據長麟奏鄉試三場完竣一摺內稱於點進謄錄時逐加搜檢搜出書手一名張訪攜帶類書刻本一冊顯係勾通士子買囑作弊現飭交臬司嚴審務得確情另行辦理並於三場搜獲夾帶策畧士子二名按例斥革枷號示衆等語所辦好鄉試為賓興大典理宜肅清弊竇以期遴

拔真才科場條例節年新增防弊各條至為詳備乃近日監臨等辦理闡務未能實力稽查及至三場事竣率以並無弊竇循例具奏最為外省結習此次東省鄉試長麟於入闈時即將謄錄書手搜出攜帶書籍飭交臬司究辦並於三場搜獲夾帶策畧士子按例懲治辦理甚屬認真著通諭各省巡撫嗣後監臨場務於一切弊端務宜悉心釐剔以副額俊掄才至意不得視為具文空言塞責致干

啓庭○是日駐蹕中關行宮○戊午

上駐蹕避暑山莊至九月庚午皆如之○是月

河東河道總督蘭第錫署河南巡撫梁肯堂
奏豫省

黃河神廟在北岸者二一曰嘉應觀在武陽
縣二鋪營一曰惠安觀在蘭陽縣板廠在南
岸者二一曰佑寧觀在中牟縣楊橋一曰慶
順祠在睢州朱家寨謹照春秋上戊致祭
龍神例令管河河北二道開歸懷三府敬謹

致祭報聞○貴州巡撫李慶茶奏黔省福集
蓮花二廠歲供京楚兩運白鉛六百餘萬觔
每年所產有一百餘萬觔缺額自乾隆四十
五年始俱以舊存餘鉛湊撥日形支絀查廠
產不旺之故實緣開採已久礮峒日深且挖
取時遇山泉常需雇工淘水工費更增而福
集廠每鉛百觔價一兩四錢蓮花廠價一兩
五錢又每百觔抽課二十觔計鑪丁得數每
百觔僅獲工本一兩一二錢自難踴躍赴採

請照滇省加增銅價例每百觔加價三錢即
於解運京鉛節省水腳銀六萬餘兩內撥補
養廉等項外支給得旨如所請行該部知道

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十一

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉上諭事件處管理

吏部理藩院事務正黃旗滿洲都統世襲騎都尉功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉上諭事件處管理刑部戶部三庫事務

世襲騎都尉軍功加一級九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十三年戊申九月己未朔諭據阿桂

等奏查勘荊州被水情形一摺內稱荊州水患詢之該處官員兵民人等咸以害金洲侵占江面漲沙逼溜為言且言之不自今日始經阿桂等親往履勘屬實並查有本地蕭姓民人於雍正年間至乾隆二十七年陸續契買洲地種植蘆葦每年納課因貪得利息逐漸培植每遇洲沙漲出蘆葦即環洲而生阻遏江流洲面漸濶江面即愈就窄狹是以上流壅高所在潰決等語害金洲漲沙逐年增

長侵占江面逼溜北趨以致郡城屢有潰決之事其受病之源實由於此該處官員兵民人等衆口一詞且其說相傳已久該督撫等經四十四四十六年兩次被水之後仍不留心查察置若罔聞直同聾瞶所司何事又蕭姓置買洲地種植蘆葦牟利肥家已非一日此項洲地原因沙漲而成何得謂之祖業必係爾時蕭姓賄求地方官薄認輕租所得耳現在荊州被水數萬生靈咸受其害情節甚

屬可惡現飭令阿桂等將蕭姓家產查抄並
交刑部按律治罪至該督撫等平日於此等
關係民生之事何以竟置不問除特成額諸
事聞茸廢弛業經查抄家產現已降旨將伊
革職拏問外至舒常才具本屬中平因其小
心謹慎且係大學士舒赫德之子是以屢加
拔擢用至總督乃伊兩任楚省並不實心任
事感激圖報於荊州害金洲漲沙逼溜共見
共聞之事尚不加意體訪隨時籌辦致郡城

被水成災。為數十年所未睹。實屬辜負任使。舒常著革去翎頂。仍留工所効力贖罪。李封係曾經獲罪之人。經朕棄瑕錄用。簡擢巡撫。乃在任時。並不加倍感奮。於地方要務。視同膜外。其咎甚重。李封前經降旨將伊解任。亦著革去頂戴。留工効力贖罪。至姜晟到楚。已及一年。於地方利病。豈得諉為不知。亦著革去頂戴。姑念其平日辦理刑名。尚為熟習。仍著加恩署理刑部侍郎事務。所有此次荊州

隄工。加高培厚各土方。及府縣漂失倉米。並著阿桂等查明。歷任督撫藩司。及該管道府等。分別著落賠補。以示懲儆。至荊州害金洲漲沙逼溜。由來已久。該處蕭姓民人。種植蘆葦。起自雍正年間。不特彼時在任督撫。難以查考。即乾隆四十年以前。歷任各督撫。事隔多年。亦難悉行查辦。前經降旨令阿桂查明。以十年為限。非於十年以來。督撫等有所偏重。即如楚省。匪費日漸加增。而近年督撫等

所得尤厚。前舒常來京。朕見經朕面加詢問。伊亦不敢不據實承認。舒常係小心拘謹之人。是以經朕詢問。不敢欺飾。但伊尚不能不從中染指。則此外各督撫。不問可知。是此案即將近年之督撫等。從重懲辦。於伊等亦無所委屈。朕辦理庶務。一秉至公。固不肯以事經年久。令後人獨任其咎。而於輕重權衡。務求平允。即令伊等捫心自問。亦當無可置喙也。將此通諭知之。○又諭各省民田蘆舍。百

姓等守其世業。或一姓相傳。先疇是服。或甲姓之業。售與乙姓。皆在所不禁。今害金洲因沙漲而成。何得謂蕭姓之祖業。此必係奸民見江中漲出洲地。墾種可以獲利。藉升科為名。納租認種。其交官者。不過數十分之一。而地方官吏。亦必得其利賄。其餘盡飽奸民之慾壑。一經具呈。地方官因受其賄。求遂周顧利害。代為朦混。具詳督撫等。亦漫不加察。率准題達。任令據為己業。牟利肥家。而奸民因

報官有案又貪利不已逐漸培植以致蘆葦環洲而生阻遏江流衝決隄塹城郭以致數萬生靈咸受其害造孽甚深情節實為可惡現將蕭姓查抄治罪實為不枉但小民惟利是圖止期益己不顧損人亦不特蕭姓為然即如黃河之外灘以及西湖淀河山東江南湖陂等處百姓私占耕種者甚多屢經曉諭飭禁而奸民貪圖利息地方官吏又思從中分肥並不實力查禁任令開墾居住與水爭地或藉口升科輸納少許一經潰決不特附近居民咸遭淹浸而修築撫綏糜帑倍蓰於國計民生均無利而有害著傳諭各督撫嗣後凡瀕臨江海河湖處所沙漲地畝除實在無關利病者無庸查辦外如有似害金洲之阻遏水道致為隄工地方之害者斷不准其任意開墾妄報升科如該處民人冒請認種以致釀成水患即照蕭姓之例嚴治其罪並將代為詳題之地方官一併從重治罪決不

姑貸○諭軍機大臣曰阿桂所奏害金洲適處荊州郡治下游江心此時即於洲上挑挖引河不得迎溜河頭恐江水平漫入河仍慮淤閉必須建築石壩挑溜向南激注沙洲方可相機辦理等語建壩挑溜所想甚好自應即速妥辦但朕意何不於洲之上首西北處所先挑成河口使其迎受江水因勢利導將來石壩築成挑溜南趨江水必更直注洲頭或可冀衝刷成河豈不省便已於園內用硃筆標誌發去著阿桂等即確勘妥商將是否可以如此辦理之處據實具奏又據奏現決各隄塹補完缺口後再按被淹痕跡最高處所加高培厚堅實礮築足資保障似毋庸改建石工等語前因郡城迤西一帶隄工頂衝著重迤南遮護府城一帶亦關緊要恐土性鬆浮不能堅實因諭令阿桂酌量情形用石修築今既據阿桂奏江水深至數丈難以措手且土隄加高培厚足資保障則亦毋庸改

建石工。但阿桂等現因擬添石壩築成尚需時日。而玉路口迤東一帶正對害金洲。掃成大灣。隄根搜刷傾缺。雖現經阿桂派員於該處載石沉船護住掃灣。此亦不得已之一法。將來應否將該處隄子及附近挑水壩隄工酌量用石改建之處。並著阿桂覆加察勘。悉心籌酌。總期於隄工有益。不在惜費。永杜後患。或石或土。亦不必泥於遵旨也。所有蕭姓民人侵占洲地。著交阿桂等查明究竟起自雍正何年。彼時縣府道司及該督撫係屬何人。並乾隆二十七年該處地方官及該督撫又係何人。其是否從他處轉售一併詳悉查明。據實具奏。並著傳知該處附近居民以蕭姓貪圖洲地利息。廣植蘆葦壅遏江流。致郡城被淹。該處百姓咸受其害。是以將蕭姓查產入官。照例治罪。並無絲毫委屈。此即為富不仁之炯戒。嗣後小民等毋得效尤爭利。復蹈罪愆。庶該處民人知所懲儆。將此由五百

里傳諭知之。○庚申諭。湖北荊州害金洲地方。漲沙逼溜。蕭姓民人貪圖洲地利息。種植蘆葦壅遏江流。致郡城被災甚重。該省督撫平日於此等關係民生要務。置若罔聞。視同膜外。業經降旨將該督撫等分別拏問。罷斥示儆。至陳淮係現任藩司。於地方利病並不留心體訪。豫行籌辦。咎無可辭。本應同舒常等一併革任。第念該藩司前因馳赴長陽查勘水勢。及回至荊州適值該郡被水。該藩司即督同文武各員上緊扎筏。雇覓船隻。分救被淹人口。並辦理一切撫恤事宜。尚屬認真。不辭勞瘁。除該郡隄工應賠銀兩。俟阿桂等查奏著落分賠外。陳淮著加恩仍留藩司之任。免其革去頂戴。從寬改為革職留任。八年無過方准開復。○又諭。刑部議覆李侍堯查辦臺灣海口得受陋規文武各員。將上淡水同知都司並鹿仔港未設口岸以前之同知守備等員。問擬絞候。其餘得受陋規各員俱

問擬新疆一摺。此案上淡水及鹿仔港。未設口岸。以前例禁商民出入。乃該管文武各員。並不嚴行查禁。輒敢收受船戶陋規。較之通商口岸。得受規銀者。情節較重。該部議覆。照得受枉法贓例。問擬絞候。因屬按例辦理。但鹿仔港自乾隆四十九年以後。業經開設口岸。而上淡水亦經福康安奏准。許令商民船隻出口。是該二處現係通商之路。其從前該管文武得受陋規。尚屬積習相沿。與枉法贓賊者。稍覺有間。所有此案得受海口陋規文職段玠。李本楠等十七員。武職卓其祥。長明等二十八員。俱著從寬一併發往新疆充當苦差。其所得銀兩。俱著按數追繳。○諭軍機大臣等。本日成德奏八月十六日。行抵裏塘。該土司前來謁見。並據稟稱。裏塘所屬番民。為數不多。於承辦烏拉之外。不能復撥土兵。裏塘一處。如此則其餘巴塘。明正。德爾格爾。情形恐亦相同。著傳諭李世傑。成德。如各等

處所派之兵。有愿赴藏協勦者。仍聽其隨同前往。外其有不愿者。即毋庸勉強。設西藏堵勦賊匪。前調之兵。尚不敷用。不妨仍於內地滿漢官兵。及屯練降番內。續行調用。○欽差大學士公阿。祥湖廣總督畢沅。覆奏查龍尾州在荊州府城迤西。與龍洲天鵝等洲相連。上接百里洲。綿亘二百餘里。雖不能保護隄。而洲南江面甚寬。水流通暢。於隄工並無妨碍。前佐領德楞阿所稱。確係指害金洲而言。非龍尾洲。應無庸挑挖建壩。報聞。○辛酉。諭軍機大臣等。據李侍堯等奏。審擬諱竊餉。鞘之湖北委員知縣李景觀。縣丞熊泗。千總葉永茂。請一併發往新疆効力贖罪等語。已批交該部議奏矣。檢閱該督等奏到供單。熊泗供。年已七十一歲。上年臺灣勦捕賊匪。各省解運餉鞘。關係緊要。該縣丞年逾七十。即不應委令管解。致有貽誤。本日姜晟前抵行在。因降旨傳詢。據姜晟稱。例係藩司詳委。該

縣丞年歲履歷實不能記憶等語。軍需要件。楚省丞倅中。豈少年力精壯。堪以委用者。何以轉派年老之員。令其管解。舒常於此等事。何竟全不留心。該省吏治廢弛。即此可見。至該縣丞既由藩司詳委。則該員年歲履歷。藩司陳准。斷無不知之理。何以率行派委。著傳諭阿桂。即向舒常陳准。面加詢問。令其各行明白。登答據實覆奏。○壬戌

上御卷阿勝境。緬甸國使臣細哈覺。掣委盧撒

亞。及小頭目便機位南等四人入覲。並同扈從王公大臣。蒙古王貝勒貝子公台吉等。賜食。翌日如之。○諭曰。暹羅緬甸向來構兵不睦。暹羅業經受封。而緬甸現亦投誠。內附俱係屬國。嗣後該二國應彼此修好。同受天朝恩眷。不得仍前構兵。除緬使回國時已行傳知外。俟暹羅貢使到日。一併傳知。令其回國告知該國王。敬謹遵朕○癸亥。敕諭緬甸國王孟順曰。朕惟輸誠納貢。災賑修職。貢之儀

舍服招攜。王制重懷柔之典。念荒徼克循舊服。則朝廷宜沛新綸。爾緬甸國長孟順。本為支子。暫托釋門。因兄姪梗化而戕殘。為國人擇親而擁戴。前愆力改。來享情殷。既遣使以將虔。復陳詞之維繫。具昭忱悃。良可褒嘉。是用降勅獎諭。賜國長孟國長之妻。佛像文綺珍玩器皿等物。國長尚其敬受。益矢恪恭。朕復念爾國長當家庭構亂之餘。甫掌國事。為土宇救寧之計。移建城垣。正宜永戢兵端。修和隣好。俾爾人庶咸遂樂生。副朕眷懷。長承寵錫。故茲敕諭。○諭軍機大臣等。據陳用敷覆奏。安徽通省收成分數。約共七分有餘。一摺。又據稱。八月內雨水調勻。未經被水。及災屬涸復補種之處。晚禾雜糧。均極暢茂。等語。各省秋收分數。自應統早晚禾及雜糧。一併牽算。約計今據該撫奏。晚禾雜糧。均極暢茂。是補種之處。尚未收成。何以先定有通省約收分數。殊未明晰。著該撫即將各該處補種

晚禾雜糧等項是否未經列入此次所奏約收分數之內。再確加查覈該省收成。通計究有幾分。據實迅速覆奏。勿稍牽混。將此傳諭知之。○又諭據劉裁奏。八月二十七日亥刻通州東關運河下。販麥客民耿德甫船內起火。延燒紹興前幫空船二隻。嘉興幫重運船二隻。又官撥船三隻。共燒燬米一千五百八十餘石。尚有漕船一隻。碰沉入水。現在搶撈濕米。耿德甫麥船二隻。均已燒燬。看船雇工萬順並無下落等語。所奏殊未明晰。運河客船失火。延燒重空漕船及撥船多隻。該客船耿德甫。彼時畢竟何往。亦斷無祇令一人看船之理。至雇工萬順何以並無下落。安知非雇工萬順另有放火延燒。希圖滅蹟情節。慮獲重罪。畏懼逃脫。祇須將該雇工拏獲究訊。則失火根由。無難得實。除就近諭知劉裁務。即飭屬將雇工萬順嚴拏。務獲詳悉研究外。著傳諭蘇凌阿。劉秉恬。一體上緊緝拏。並查

明是夜耿德甫因何他往。現在曾否到案。該客船失火延燒。是否另有別情。一併據實具奏。再劉裁摺內稱。所燬撥船三隻。係動項在江楚等省置造。今被客民耿德甫船內失火。延燒。應責成該犯。即在直省照式賠造。以供撥運等語。所辦甚是。至此次延燒漕船米石。應如何著落補交賠造之處。並著該倉場侍郎。一併確查妥議具奏。○又諭據蘇凌阿等奏。撥船三隻。勒令耿德甫繳價製造。因應如此辦理。惟所奏燒燬軍船米石。責令各丁分別賠造之處。殊未允協。旗丁等如果自不小心。以致船隻米石被燒。自當着落賠補。今紹興嘉興幫船。因商船失火延燒。與該旗丁無涉。即或以火起時。該旗丁不及早駛開。致被延燒。不能辭咎。亦止當酌令賠補一半。其餘一半。竟應令耿德甫一併賠繳。方足示懲。著傳諭該倉場侍郎。即遵照辦理。至耿德甫係大名縣人。除就近傳知劉裁飭查該犯原籍

財產。是否足資抵補。勿任隱飾外。亦著蘇凌阿等。即向該犯面加研訊。令其將財產據實供出。以備賠抵。毋使絲毫隱匿。尋奏遵詢。耿德甫。據稱在大名販麥一千石。裝船三隻。到通州。巨順堆房卸賣。即於通州買船二隻。雇楊文斗。萬順看守。尚未覓定水手舵工。仍住巨順號。是夜楊文斗已寢。聞聲出看。尚見萬順在船。迨船順流而下。萬順遂無蹤跡。臣等已行知各該地方官。一併嚴緝。又據稱。一切賠項。現有麥價可交。如有不敷。天津尚有貨價。求押取清款。臣等查撥船三隻。應賠償七百三兩零。軍船米石。奉旨令其賠還半價。計一千四十餘兩。耿德甫。現有本利銀數有盈無絀。即飭通永道追繳報聞。○甲子。諭本年奉天省秋審人犯。原擬緩決。經刑部改入情實各起。朕詳加披閱。內除劉小胖一犯。刑部因其指姦無據。又係謀殺。是以改擬情實。但劉小胖年僅十五。小於死者十七歲。楊振設

計留宿。且威嚇成姦。該犯氣忿殺死。是榮柱定劉小胖緩決。尚屬有因。至李萬一一起。係金奴疊扎一死一傷。又黑龍江王柱兒一起。係遭犯在逃。復夥竊牲畜。此等逞兇戕命。怙惡不悛之犯。斷無可以從緩之理。乃該省於辦理秋審時。率將該二犯定以緩決。殊屬輕縱。恒秀於刑名素未諳習。而榮柱之父德福。久任刑部。榮柱又由刑部司員出身。非不諳律例者可比。數年以來。總未見其實心任事。秋獻大典。定擬錯謬。若此。榮柱著交部察議。恒秀著傳旨申飭。○又諭。納木扎勒之扎薩克貝子。著伊子車凌多爾濟承襲。車凌多爾濟未及歲以前。其印信交伊祖朋蘇克代辦。并善為管教。車凌多爾濟學習辦事。○乙丑。諭據和林奏。直隸運河向多古淺處。所前在德州一帶。催趲豫東船隻時。曾至直境目擊該處運河淤淺之處甚多。若不亟加認真勘辦。恐來歲漕運一入直境。不免稽遲。仍不能

依限抵壩等語。直省運河。天津以北向多古淺處。所其天津以南。不當有淤淺之處。此必係地方官。不實力挑挖。任令淤墊所致。本年春間。豫東漕艘。在衛河遲阻。未將該地方官等從嚴議處。迺屬格外恩施。六月以後。幸賴透雨頻霑。河水充裕。得藉浮送。今回空陸續南下。自應趁此挑挖。一律深通。若該地方官。仍漫不經心。草率從事。明歲重運。經由直境。再有耽遲。則惟劉莪是問。除就近傳知該督。

認真辦理。及時挑濬外。至天津巡漕。現有稽查挑工之責。亟需派員前往。所有巡視漕差。著該衙門。於回鑾次日。即行帶領引見。以便簡派迅速前往。至目下回空南下。毓奇一人。恐不及照料。即著和琳。馳赴沿河一帶。會同分投催趨。俾及早歸次。以符冬兌。冬開定制。○諭軍機大臣等。據海紹奏。九江郡夏秋以來。大雨時行。川楚水發。附近街衢。四圍皆有積水。現在漸次消落。沿江傍湖。被淹田禾。報

明撫臣。飭委藩司。親勘妥辦等語。前據何裕城奏。九江府屬。及沿途一帶。飭委署藩司。額勒春前往確勘。分別被災輕重。動項撫恤。何裕城。仍抽查確數等語。此時該撫自己抽查完竣。該處被災。究有幾分。作何撫恤。著再傳諭何裕城。務宜督率妥辦。俾災黎均霑實惠。不可因係一隅偏災。稍存忽視。仍將通省收成。牽算約有幾分之處。一併查明。據實覆奏。尋奏南昌等縣被災。臣已抽查完竣。折給撫恤口糧。分別加賑。並予葺費。至通省收成。牽算約八分有餘。其被災田地。止屬偏隅。實與全局無礙。報聞。○又諭據魁倫奏。福州駐防陣亡之缺。應通行挑補等語。滿洲兵丁在臺沒於王事。自應將伊等子嗣。坐補甲缺。其有年未及歲。與無嗣孀寡。宜以甲缺。作養育兵二。俾資養贍。魁倫何未見及此。著即遵旨妥辦。至所稱裁馬六十匹。將草乾賞給陣亡家屬之處。著照所請行。並通諭廣州杭州等

處將軍。如有陣亡之家。俱照此辦理。至鄂岳素不實心訓練兵丁。乃與魁倫聯銜具奏。恬不為怪。實屬可恥。著傳旨申飭。○吏部議覆四川總督李世傑奏。稱重慶府涪州。係部選中缺。近年開墾山多。遊人竄跡。民情又最健訟。非選員所能勝任。應改為衝繁難要缺。在外揀調。雅州府天全州。係升調要缺。現在民番安靜。政務無多。應改為繁難中缺。歸部銓選。均應如所請。從之。○以故廣西恩恩府安

定司土巡檢潘允福子清淇。襲職。○丙寅上御依清曠。勾到秋審官犯。服制及雲南貴州情實罪犯。停決。官犯二人。服制斬犯四十五人。絞犯一人。雲南絞犯九人。貴州斬犯一人。絞犯八人。餘五十九人予勾。○諭據徐嗣曾奏。懲治臺地棍徒。並拏獲糾夥殺命匪犯。及設館殃民之蠹役。挾嫌捏害之義民。割用印冊。冒支錢糧之征兵。分別從嚴定擬。各摺已交軍機大臣會同行在法司覈擬。速奏矣。臺

灣為五方雜處之區。民情刁悍。從前地方文武。因循廢弛。遇事姑息。以致奸民無所忌憚。釀成逆案。今當賊匪甫經蕩平之後。正當趁此兵威。隨時嚴辦。使匪徒斂跡。盡絕根株。徐嗣曾於拏獲棍徒。凡犯該死罪者。俱立寔典。刑所有陳光侯。潘波二犯。不復拘泥成例。分別謀故。概從立決。其殃民之蠹役。舞弊之征兵。特符範法之義民。俱分別嚴行定擬。辦理不謂徐嗣曾竟能如此明敏決斷。實屬可嘉

之至。徐嗣曾前於柴大紀。毆法營私。不行參奏一案。咎無可辭。是以將伊革職。從寬留任。該撫自抵臺灣後。幫辦善後諸務。尚為妥協。今於地方棍徒蠹役等。復能力加整頓。俾海疆刁悍之風。漸知悛革。殊為不負任使。徐嗣曾著交部議敘。以示朕賞功罰罪。各不相掩。至意。至府縣差役。膽敢私設班館。擅設刑杖。拶指等件。勾黨盤踞。肆惡殃民。其情節實屬可惡。徐嗣曾將為首各犯。定擬斬決。所辦甚

是。但此等蠹役。自因地方官平日倚為耳目。不肖者縱其貪婪。昏憤者受其蒙蔽。以致該役等有恃無恐。擾害良善。於吏治民生大有關係。臺灣既查有此弊。恐各省亦在所不免。著傳諭各督撫。務嚴飭問刑衙門。將班房等項名目。永行禁革。以除奸蠹而絕弊端。如有任令差役等設立班館。私置刑具各情事。一經發覺。不特將縱容之地方官從重治罪。並將失察之上司一併嚴加議處。決不姑貸。仍著年終奏聞。有無此弊。又義民等因幫同守城勦賊。特予獎賞。伊等身邀頂戴。正應倍知安分。乃挾嫌捏害。圖陷多人。是義民又為蠹民矣。豈可因其前有微勞。稍從末減。徐嗣曾請將誣告之義民謝恭。即行正法。其不行阻止之黃武等。概行責懲。辦理實屬允當。又據會同普吉保奏。兵丁鄭振宿娼。怙惡連斃二命。審明後。已恭請王命。將該犯即行正法。一摺。所辦甚是。其請將遊擊陳大恩等交部議

處。並自請交部之處。兵丁係屬營員管束。茲鄭振有宿娼斃命情事。該管員弁平日不能約束查察。自應分別斥革。議處至文職於失察土娼固有應得處分。而戍兵非其所轄。且徐嗣曾一經稟報。即審明嚴辦。其所請交部之處。並著寬免。○丁卯。上御萬樹園大幄次。賜扈從王公大臣。蒙古王貝勒貝子公台吉及緬甸國使臣等宴。○諭曰。已忠著帶領扎薩克喇嘛格勒克納穆喀前往後藏。有應辦事件。著各賞銀二百兩。其帶往之筆帖式慶德永福等著各賞銀五十兩。均令一體馳驛。○諭軍機大臣曰。李世傑奏。接據糧員魯華祝稟稱。慶麟已將班禪額爾德尼接赴前藏。恐該處正資大兵接應。已飛咨鄂輝酌帶兵將。趕日出口等語。所辦似是。然細閱之。總不明晰。滿漢屯土各兵。既經李世傑撤回本處。則鄂輝所帶者。又係何兵。是否止係前駐鑪城之滿兵五百名。抑係所

徹之兵。又復全行帶往。該督既已錯辦於前。則此次摺內。自當逐一詳細聲叙。庶朕閱之。可以一目了然。乃復含混其詞。致朕數千里外。為之繫念。李世傑在成都得信自早。雖據稱尚未接准慶麟等咨會。而糧員等業已稟報班禪額爾德尼接至前藏。是該處正須兵力協剿。李世傑正當就所報情形。隨時籌辦。何以尚不催令各兵迅速前進。著傳諭李世傑。即將續派之滿漢屯土各兵。速令前往。成

德於八月十七日。已過裏塘。著即加緊前進。愈速愈妙。鄂輝佛智張芝元亦著帶兵兼程速赴西藏。會同剿賊。以冀赴期。藏事總之朕所降諭旨。係就伊等奏到之摺。揆度情形。逕為指示。及經伊等接奉時。前後機宜。又或互異。該督等正當按照彼處現在情形。隨機妥辦。原不必稍存拘泥。方為善體朕懷也。○又諭曰。孫士毅奏本年四月初八日。接據提塘謝廷揚稟報。總督衙門三月初六日拜發題

本三箱。檢查隨單內短少吏部戶部兵部兵科鑲藍旗公文五角。隨將原辦經承高植垣及值日小書高維幹交廣州府嚴究。訊據該經承等堅供。實無遺漏抽匿情事。現將高植垣高維幹委員押赴刑部衙門。傳喚駐京提塘謝廷揚確訊實情。並查明遺失公文另繕補咨等語。此項隨本咨文。既據該經承堅供。實係封貯入箱。妄無抽匿情弊。何以該提塘接到時。只有咨文隨單五件。並無公文。若非

該經承遺漏抽匿。不肯承認。即係該提塘接到後。自行遺失。藉詞抵賴。現經孫士毅將該經承等押解刑部。與該提塘質訊。無難審問得實。著傳諭留京王大臣會同刑部。先將提塘謝廷揚。即刻傳喚到案。示以孫士毅奏摺。並訊以前項咨文。現據該省審明。並無遺漏抽匿情弊。今該提塘將因何遺失緣由。據實供吐。不必俟該經承等解到。致有串供情事。如該提塘堅不承認。則俟高植垣高維幹二

人解到時再令其當面對質務得確情研審定擬不得任其互相推諉率行完結除將原摺批交該部外將此諭令知之○又諭牧馬土司將偽官阮遠猷等擒獲自應准其解送內地以絕伊等觀望之心孫士毅一接稟報即令派兵解送進隘並用言撫慰從優賞給諭令糾約各處土官滅阮扶黎而阮文爵朱文奏係偽官之弟與僕去留原無足重輕且阮遠猷朱廷理畏死倖生自必囑令阮文爵等速取嗣孫回信進關更可得黎維祁實在存亡下落該督所辦悉合機宜實屬可嘉之至著再賞給御用大荷包一對小荷包二對以昭優獎至牧馬土司閉阮律等將偽官阮遠猷等擒獲解獻尚屬恭順著再加賞緞二匹並著孫士毅即傳知該土司等以爾等擒獻偽官業經該督代為奏聞大皇帝以爾等實心効順深加嘉獎特賞給緞二匹使該土司等倍加感激出力幫同剿賊再聞朱廷理

供稱阮惠讓出黎城帶一萬多兵退至富春他心裏還不肯捨却黎城意存觀望仍留下七八千兵分守黎城及各要隘地方打聽天朝進兵便一併撤回保護舊巢倘大兵不進且令防守各處險要以作後圖等語看此情形現在內地官兵若不及時前進不特阮惠妄思窺伺即安南各鎮目亦未必不恐阮酋銜恨各相觀望而黎維祁又係無能之人逃往山中藏匿不能力圖恢復是此時粵西官兵竟以速進為是著孫士毅即察看情形遵照前旨派令許世亨等帶兵數千名前往孫士毅仍帶兵在關隘駐劄作為策應毋庸輕進只須將黎城收復並得嗣孫黎維祁下落即可將該國眷屬派兵護送歸國就該督節次奏報情形而論安南之事似可無須多兵但既經許世亨帶兵前往自當使首惡速就擒獲永絕根株方為一勞永逸之計○戊辰諭據恒秀等奏打牲處索倫田禾被鴉兒河

水泛溢淹浸生計維艱請借穀接濟等語著照所請將齊齊哈爾墨爾根兩處倉穀撥一萬石借給於明年錢糧內分限減半坐扣買補○諭軍機大臣等據琅玕奏本年浙江鄉試遵奉新例並不豫備空白試卷其有呈請換卷者一概不准並將新定規條寫定式樣實貼各號俾士子一目了然不致佳文被斥等語所辦甚好諒琅玕不敢為此虛言即各省奏到科場摺內亦並未據奏及不諳新例致多犯貼之卷科場條例上年經大學士九卿議定後即通行頒發今外省士子尚能遵照式樣不致被斥京師為首善之區何以伊齡阿等前奏此次順天鄉試違式應貼者竟有過半之多此非該侍郎等所頒條式不明即係意存沽名使士子等以此次得邀免貼皆係伊二人具奏之力二者必居一於此著傳諭伊齡阿等即將本年順天鄉試之卷因何多有違式犯貼之處據實明白回奏○豁

江蘇上海縣築塘占廢地漕項銀米○已已上御依清曠勾到四川情實罪犯停決斬犯十二人絞犯十五人餘七十六人予勾○諭御史祝德麟奏國子監考試惟劉墉鄒炳泰二人諸生不敢向其饋送營求此外各堂官則來者不拒去者不追雖不能一無沾染尚不至駭人聽聞獨司業黃壽齡猥鄙性成外間竟傳有非錢不取之說本年考到時苞苴滿戶甚至寒畯空囊慮其攢抑率皆典質稱貸士怨沸騰等語覽之不勝駭異本年辦理科場因諸臣紛紛條奏屢經降旨通行嚴飭並頒發科條以期諸弊肅清國子監考到錄科分別去取正所以杜絕入場僥倖之端即與科場無異該堂官自應公慎遴選倍矢潔清乃祝德麟叅奏黃壽齡竟有非錢不取士怨沸騰之事殊出情理之外如所叅屬實黃壽齡所得贓銀無論滿數與否均當立寘典刑黃壽齡著即先行摘去頂戴解任交刑部看

守並派福康安董誥即日起身回京東公密辦但祝德麟所奏係屬傳聞並未經奏出黃壽齡得賄實在證據事關科場舞弊罪名出入甚重亦未便以風聞入告之言坐人死罪致啟將來告訐之端並著福康安等即傳該御史到案面加詢問令其將黃壽齡考到時曾向何人婪索銀兩所聞非錢不取之說係何人向該御史告知再拘齊犯證逐一確切嚴審定擬具奏以成信讞如該御史不能指出證據即當律以誣告反坐之罪至其餘國子監堂官除鄒炳泰納麟寶出差外尚有劉墉吉善在京何以將考到之事專交黃壽齡辦理任令從中肆意婪索劉墉吉善竟同龔賸並著福康安等於審明後一併查辦○又諭據劉紹錦奏本年各省鄉試以詩經命題次年會試例應輪用書經第如禹貢洪範周誥殷盤或義蘊閎深或棼牙詰屈倘一時不能熟讀通暢勢必勦襲雷同草率了事請明

春己酉會場仍以詩經出題又新例停止豫備空白試卷被貼者多請嗣後此項空白試卷仍照舊豫備等語科場條例上年經大學士九卿等議定章程五經分年輪試今歲鄉試屆期本應用易經出題朕因周易理蘊深奧恐邊省士子未必人人誦習特命今歲鄉試先用詩經出題次年會試用書經出題已屬體恤備至今劉紹錦復恐士子等中式後未能即通曉書經義旨請明歲會試仍用詩經出題所奏實屬沽名釣譽書經乃士子等束髮時即應誦讀之經豈有業經應試猶未曾誦習之理若云詰屈棼牙難於成誦則朕至今年屆八旬尚不至遺忘豈士子等讀書應試冀取科名既經中式於書經理解轉不能記憶乎至空白試卷停止豫備原為防閑弊竇起見且士子應試原應諳習規條何至干犯貼例需用空白試卷更換若伊等不知小心致有污損錯誤即係自誤功名被貼亦

不為枉乃劉紹錦意存邀譽率為此奏殊屬非是國家甫經定例奉行伊始即紛紛妄議更張尤為明季惡習斷無此政體劉紹錦何易視朕為諸事不理之庸主乎著革職交刑部議罪○又諭曰惠齡奏湖北沔陽黃岡二州縣被水地畝涸出無幾節候已遲不能補種等語荊州上游各屬被水貧民前經降旨分別撫恤其下游漢陽等縣亦經借給口糧小民口食有資自可無虞失所今沔陽黃岡二州縣因積水未消田畝未經涸出難以補種著借給一月口糧以資接濟該督撫務須督飭該地方官查明實在被水戶口按名給發毋任假手胥役稍滋剋扣其餘成災處所應行給賑者並著該督撫照例具題實力撫恤以副朕軫念災黎有加無已至意○又諭本日蘭第錫四百里報至朕以為或係河工有緊要事件及加披閱乃係奏報沿河地方得雨情形且閱摺內有聖德感召甘霖應時

之語殊屬不誠本年巡幸木蘭因連值陰雨以致秋獵大典不能舉行朕方引以為愧即或豫省沿河一帶近日雨澤稍短現獲優霑亦止須照常奏報何得輒用驛遞並以膚泛不誠之語漫為頌揚是該督此奏非以為頌乃徒增朕愧耳各省雨暘無刻不關朕念但天下至大安能悉臻時若即偶有旱澇不齊之處亦止飭令地方官妥協辦理從不因偏災而遽加守土者之罪其有雨水調勻收成豐稔者亦惟倍加敬感並不因此將地方大吏輒予褒嘉即如此次荊州被淹較重朕亦因該省吏治廢弛日久於民生利病平日漠不關心以荊州隄工乃全郡保障僅令佐雜微員董率民修道府等近在同城並不親加查察任令草率偷減工程不固而害金洲漲沙逼溜為共見共聞之事又皆置之不問是以不得不從嚴懲處以肅官方而儆將來原非因荊州被有水災遂歸咎於該督撫等而

加之譴責也。蓋以兩賜嘉地方官或申飭則地方官必致諱災。朕不為也。督撫等俱受朕深恩。簡擢重任。豈尚不知朕懷然如蘭第錫之似此虛詞稱頌者殊亦不少。並著通諭各督撫嗣後凡屬奏報兩水地方事件。務期以實。不得輒用頌揚虛詞填砌入告。以副朕崇實黜華至意。○庚午。諭前據伊齡阿等奏。本年順天鄉試諸生中年居八十以上者康士雍、張洪振二名。三場俱已完卷等語。現在榜發俱未中式。但念該生等年臻耄耋。猶能踴躍觀光。精神不懈。允為藝林盛事。康士雍、張洪振俱著加恩賞給舉人。准其一體會試。俾償讀書夙志。用昭壽世作人至意。○又諭前據綿恩奏清豐縣應試生員趙璣呈明五世同堂。伊祖生員趙峯現年八十四歲等語。趙峯身列膠庠。年臻耄耋。其子孫五世同居。允為昇平盛瑞。趙峯著加恩賞給舉人。准其一體會試。以示嘉惠耆齡至意。○又諭甯內銜

斃驍騎校筆帖式等多人。著加恩賞給銀兩。並查明驍騎校之子著賞領催筆帖式之子著賞拜唐阿。其餘皆著賞護軍馬甲。如有銜去得回者仍著減半賞給銀兩。以示體恤。○諭軍機大臣等。據李世傑奏接到慶林等咨會。即遵照續降諭旨。飛咨鄂輝帶領各兵迅速前進。所辦始覺漸有頭緒。至所稱前後兩次撥米一萬石轉運鑪城陸續運赴口外足支官兵沿途口食。仍分飭各臺員就近採買稞麥糶粳等項不致缺誤。所辦好。又據另片奏。明正巴塘裏塘為大兵必經之所。現在該土司應付烏拉蠻夫一切均資其力。將該處之兵暫緩撥調。其德爾格爾地不當銜部落亦大。附近各土司亦當有可酌量派調者。現咨明鄂輝酌量情形量加調撥等語。所辦甚是。現在派調各處官兵俱已陸續進發。軍威壯盛。巴勒布賊衆本屬無能。自不敢復行抗拒。鄂輝等統兵勦捕。馳抵該處。雖不必掃穴

犁庭盡殲其醜。但不可止將賊衆勒散。逃遁。俾脅噶爾之圖一解。即云完事。必須將前此被賊搶占之濟龍。聶拉木。宗喀等處地方全行收復。並勒令該處頭人將該處與後藏貿易明定地界。嚴立章程。令其出具甘結。不敢復行越界滋事。惟當趁此兵威。使之畏懼。懾服。以期一勞永逸。方為妥善。又諭曰。慶林等奏。已勒布起釁。因聶拉木等處第巴妄增稅課所致。國家設立駐藏大臣。原為辦理地方事務。彼處第巴等濫行增稅。慶麟雅滿泰平日豈無見聞。即五月中已勒布給噶布倫等書信一事。維時噶布倫等雖未稟明。伊二人竟形同木偶乎。若即據實奏聞。則刻下大兵早至。何致遲誤。且噶布倫等早經得信。未即具報。至聶拉木濟龍被劫。不能隱匿。始行報明。是雖噶布倫等之罪。而慶麟雅滿泰亦至此方為查詢。其平時所司何事。已勒布既因增益稅課。致起兵端。如果實有其事。當將

擅自增稅之第巴等。押解來京。若致伊等先行潛逃。慶麟雅滿泰恐不能當此重譴。至從前第穆呼圖克圖私自調停辦理時。並未稟知駐藏大臣。今屆掣肘之時。始行舉出。懇求殊屬可笑。慶麟雅滿泰並無一語理責其非。實為無用。再發交廓爾喀檄諭。立言尤當得體。今慶麟等書稿中。竟稱廓爾喀為王。是果朕所封之王乎。其餘措詞錯謬之處。不可枚舉。此事朕為達賴喇嘛。班禪額爾德尼。及藏

內人衆。特發內地之兵。唐古忒等理應感激。急籌兵丁糧餉。乃噶布倫等竟以不能辦理為詞。慶麟雅滿泰又不能剴切曉示。令其感悟。況兵丁並非專需米石。凡麥。麩。牛羊等物。俱可作為口糧。近派後藏之兵。仲巴呼圖克圖。即援引前輩達賴喇嘛書內。有免派扎什倫布之語。互相推諉。是辜負朕憐憫伊等之意。著慶麟雅滿泰。即以大義明切曉示。嚴催辦理。再四川官兵赴藏沿路口糧。俱由李世

清 實 錄 乾隆五十三年九月上

傑處承辦慶麟雅滿泰何至今始將摺稿咨行且寄信李世傑自當以漢字書寫便於觀覽乃復給以清字慶麟雅滿泰種種錯誤之處著嚴行申飭倘仍蹈前轍朕必重治其罪並將此旨發交已忠閱看即將聶拉木等處增稅第已查明並唐古忒兵將來如何訓練之處俱留心酌議奏聞○又諭廠民等因接到孫士毅劄諭並聞恩准給予口糧俱踴躍歡欣情願前驅殺賊該督慮廠衆散漫無人

統領而阮輝宿等畏蒞不敢出關俱係無能為之人即驅令前往亦屬無用隨訪有幕友林際清在廠年久為羣情所服囑其統領殺賊可謂盡心料理林際清一接通判陳松之信即力任其事現經該督給予印劄著即賞給知縣職銜如將來果能成事並即以實缺補用林際清久在該廠一切仗其主持今又賞給知縣職銜該廠衆等見天朝因伊出力特加恩給予頂戴自必聽其調度呼應更靈

於勦賊倍為得力至現在廠民既跟隨林際清踴躍前驅而潘啟德統率七州人馬又經孫士毅諭令接續前進朕意此時內地似不得不稍進官兵以壯聲勢蓋潘啟德及廠民等皆因聞天朝聲罪致討是以羣起響應若仍按兵不動專用伊等之力必至復生觀望著再傳諭孫士毅即酌察情形遵照前旨派令許世亨等帶兵三千名前往如此時潘啟德等先已收復黎城並得有黎維祁下落許

世亨等即可護送安南眷屬一同歸國如黎城尚未收復黎維祁亦無下落許世亨等當帶兵先往其眷屬人等俟將來事定再護送回國現有潘啟德與廠民等為之前驅而該國保樂州官民又復紛紛具稟招集鄉勇將從賊地方偽官以次攻勦大兵一到勢如拉朽摧枯趁此兵威自可為一勞永逸之計○
辛未

上御依清曠勾到廣西廣東情實罪犯停決廣

西斬犯二人絞犯三人廣東斬犯八人絞犯十人餘八十人予勾○自避暑山莊迴鑾○諭軍機大臣等昨閱江蘇省秋審黃冊內原擬緩決經刑部改入情實者二起一係挑夫戴有田為馬益挑送麥石因天晚欲尋住宿馬益不允致相詈罵鬪毆戴有田既毆傷馬益合撲倒地又用扁擔毆傷其冀門殞命一條水手陸順學見米販劉大鉉及船戶朱朝階俱各上岸輒起意行竊偷銀二百八十餘兩之多此等逞兇戕斃孤客並本船水手行竊客銀逾貫為害行旅之犯斷無從緩之理刑部改擬情實均屬情真罪當聞鶚元由刑部司員出身非不諳律例者可比何以於秋審大典定擬輕縱錯謬若此聞鶚元著傳旨申飭○以故廣西恩府定羅司土巡檢徐尚文弟能文襲職○旌表守正捐軀湖北咸豐縣民劉益姪女劉氏○是日駐蹕喀喇河屯行宮○壬申

上御行殿勾到福建奉天情實罪犯停決福建斬犯八人絞犯十五人奉天斬犯三人絞犯八人餘七十一人予勾○諭曰阿桂等奏荊州城守綠營兵丁因該處被水共查有三百二十六名所居屋宇多被衝沒一切家具衣物亦多漂失情形未免拮据懇恩每名借給銀四兩仍於應得餉銀內分三年扣還歸款等語此次荊州府城被水較重所有該處滿洲駐防兵丁業經降旨加恩酌賞銀兩以資接濟今阿桂等既查明綠營兵丁房屋多有淹浸自應一體加恩賞恤所有此項被水之綠營兵丁三百二十六名俱著每名賞給銀四兩毋庸扣還歸款俾各安輯寧居用示朕一視同仁至意○又諭據梁肯堂奏衛輝懷慶二府屬本年雨澤稍愆收成未免歉薄等語豫省本年衛輝懷慶二府地方因雨澤短少收成歉薄現屆開徵之期若令新舊錢糧同時並徵民力未免拮据著將衛輝府屬之

洪縣滑縣延津濟縣封邱考成六縣並懷慶府屬之原武修武陽武三縣帶徵舊欠漕糧遞展一年所有緩徵舊欠錢糧并民欠倉穀籽種等項均緩至五十四年麥熟後徵收至衛輝府屬之汲縣新鄉輝縣獲嘉四縣著將本年地丁并緩徵帶徵舊欠錢糧倉穀等項均緩至五十四年麥熟後徵收其本年漕糧著自五十四年起分作兩年帶徵舊欠漕糧亦著加恩遞展一年徵解以示朕軫恤民艱

有加無已至意該部即遵諭行○諭軍機大臣曰阿桂等奏估計補還缺口加培隄塍及建築壩工等款一摺並繪圖呈覽閱圖內所繪大江距現缺萬城等隄尚遠且有下百里洲為之間隔其附近隄根處所惟有沙河一道但該河甚小未必能衝決隄根而此次荊州被淹何以又由萬城隄首先衝決是否江水盛漲時漫過下百里洲竟與沙河連成一片抑係沙河上游即係承受江水大江水發

建瓴而下致由此衝決隄塍摺內未據詳細聲叙著阿桂等即逐一叙明另繪一圖詳加貼說據實覆奏又據另片奏稱荊州洩水故道現惟虎渡一溪承受江流南達洞庭等語向止聞洞庭之水歸江達海並未聞該湖有可分洩江水之處若果江可歸湖則夏秋之間湖水本屬漲盛何以復能容納江水且其間所隔州縣城郭地方甚多又何以能越過不致淹浸仍復歸江此語尚不甚解並著阿

桂等一併詳晰繪圖貼說呈覽至摺內稱觀音寺殘缺石磯現因水深不能得底無從估計俟冬令水落時畢沅即派委大員查看明確再行奏明與修等語荊州隄塍因向係民修僅委令微員監辦道府等並不親往驗勘而督撫等更不以事為事漫無稽察以致偷減草率工程不固釀成大災現在動帑修築務期十分鞏固永資保障何必派員查看畢沅即當親往詳勘並查所做之工是否堅固

及軍民等加恩撫卹之後能否安輯復舊各情形據實奏聞其迤下南岸工程畢沅亦應親加確勘再行次第估修不得僅以派員了事致令仍前弊混也尋奏荊州隄自勝臺至玉路口一帶總名萬城隄此次係由萬城隄之中方城首先漫決距江甚近暴漲本湧又遇隄逼束以致漫過各洲與沙河連成一片衝決城垣至本年湖水雖亦盛漲而江水較湖水尚高是以湖水容納江水又虎渡灣兩岸俱有支隄分洩江流均未漫溢為害報聞○又諭據留京王大臣等奏訊據廣東駐京提塘陳奉乾供稱謝廷揚係廣東開元縣人於五十年挑補提塘至本年八月期滿即於是月初十日與我交代告假二十六日起身回籍聞得他從河南及湖北樊城一路取道回去等語駐京提塘於督撫咨報在京各衙門公文俱應逐件分投不得稍有疎失乃謝廷揚遺失公文至五件之多若非該省

書吏遺失即係該提塘漏匿自應向謝廷揚嚴切跟究今謝廷揚既由河南湖北一路回籍著傳諭沿途各督撫即飭地方官嚴密截拏於何處拏獲即於該處遴委妥幹員弁小心管解送交刑部收審勿任遠颺○是日駐蹕常山峪行宮○癸酉諭曰福康安等奏御史祝德麟奏司業黃壽齡於考到時非錢不取以致士怨沸騰一案當傳祝德麟到案傳旨詢問該御史始猶含糊其詞惟言得自風聞及反覆開導始據稱有伊妻舅監生李翱李廷瑚考到時各送黃壽齡贄儀四兩又編修祝堃說有同鄉貢監生陳承曾楊朝佐資斧缺乏現在考到尚須設措贄儀之語及詰以原叅內因何有非錢不取之說該御史惟自認措詞過當覈其所言情節游移必有不實不盡之處現既據祝德麟指有餽送之人並訊據黃壽齡供於考後得受監生徐予嘉贄儀顯因人証未齊藉詞抵賴請旨將黃

壽齡革職等問一面傳詢祝德麟並提監生楊朝佐等三面質對務使盡情供吐從重定擬等語黃壽齡著革職等問至祝德麟身為言官既聞有考試營求之弊即當列款叅奏且此事業經朕特派大臣審辦並傳旨向其詢問該御史更應和盤托出毫無徇隱乃既叅劾於前又復游移於後其意不過以據實說出致黃壽齡陷於重罪必銜恨該御史是以僅舉出楊朝佐等四人希冀將就完結黃

壽齡量從末減可圖見好於黃壽齡不知黃壽齡既被其叅劾即使祝德麟此時為之徇隱尚能望其不怨恨該御史而轉心懷感激乎方今綱紀肅清朕乾綱獨攬政刑必折衷至當從不肯稍事顛顛若祝德麟所叅黃壽齡劣蹟果能據實指出朕必嘉其公正若謂得自風聞試思朕何如主焉有因御史捕風捉影之談而遽肯入人以死罪之理設該御史告人謀為不軌亦即將所告之人實諸重

典乎明季臺諫挾私攻訐最為劣習而其中尚有一二始終不撓之人若如祝德麟之進退無據又為明季劣習中之尤者此即如從前彭啟豐受史奕昂詈罵顧唾面自甘不肯實言欲以長者自居其見識實屬可鄙況祝德麟前奏黃壽齡考到非錢不取苞苴滿戶物議叢起言之鑿鑿必非無據今乃稱止知有楊朝佐等四人先後已屬自相矛盾本日舒文前來行在接駕朕於召見時無意之中

向其面加詢問據奏伊家延有舉人訓課亦稱黃壽齡聲名狼藉等語考到與舉人無涉所言自屬公論而舒文與祝德麟黃壽齡俱不認識經朕面加詢問即奏及此事尤非無因事關科場舞弊豈可不徹底根究乃祝德麟於傳旨詢問時尚復游移不吐殊為可惡祝德麟亦著解任交與福康安等傳集祝璽並提齊人証覆加嚴鞫務得實情秉公定擬具奏○又諭昨禮部奏緬甸貢使到京時在

西城會同四譯館居住。應照例咨取章京二員。驍騎校四員。兵二十名。以資彈壓巡防等語。從前定例。咨取官兵在該館看守。自因外藩陪臣來京朝貢。未習天朝體制。其跟隨人衆。或恐外出滋事。是以派令官員兵丁。於該館為之照應稽查。然實有名無實之事耳。今緬甸貢使來京。本有道員遊擊等官護送。即其在館居住時。儘可令護送之員。妥為照料。何必多派官員兵丁。住宿該館。巡查彈壓。徒為沿習具文耶。此外如安南琉球暹羅南掌蘇祿等國。按期入貢。俱有伴送之員。亦不藉官兵等查察。若朝鮮奉朔朝正。每歲使臣來京者。絡繹不絕。竟與世臣無異。該國入貢。向不由盛京派員護送。其使臣人等。頻至京師。亦久習朝廷體制。更無須另派官兵為之守視。嗣後會同四譯館咨取官兵。虛應故事之處。著永行停止。以示朕綏輯遠柔遐邇一體至意。○諭軍機大臣等。據李世傑奏現在成

德等既行程日遠。將次抵藏。鄂輝即帶後起官兵迅速進行。該督復移駐鑪城。聲勢相聯。辦理始為妥協。至糧石等項。業經李世傑派員運往。亦俱陸續出口。並經譯諭各土司分撥轉輸。用資接濟。所辦皆好。至抵藏以後。所需口糧。就地採辦糶粃等物。原係用價採買。並非令其供應。想該處亦所樂從。辦理自為便易。計目下成德將次到彼。鄂輝復督催大兵繼進。軍威壯盛。諒已勒布賊衆無能。難一舉蕩事。著各將行抵該處日期。及勦賊情形。隨時迅速馳奏。○又諭曰。毓奇奏應兌豫糧之臨清前後兩幫空船。本年應輪居大修之期。即晝夜趲造。不能趕立冬以前全行妥竣。必致貽誤兌運。請於直省官撥船內。賞派二百隻。令各丁雇募等語。豫省漕船例應在南糧之前到通卸交。及早回空。方不悞冬兌。冬開定制。今臨清前後兩幫船隻。內有六十餘隻。輪居大造之年。不能如期修竣。赴豫受

兌不可不早為籌辦著於直省官撥船派給二百隻押交該糧道令其分給各丁領雇俾得豫省漕糧及早受兌不致再有遲誤除就近傳知劉義外將此傳諭蘇凌阿等並諭毓奇知之○蜀安徽宿州鳳陽鳳陽衛靈璧懷遠亳州蒙城泗州泗州衛盱眙天長五河長淮衛無為廬江定遠鳳臺滁州全椒和州含山二十一州縣衛乾隆五十二年水災額賦有差○豁陝西長安縣唐家村中席村師家道口水衝廠地五頃五十畝有奇額賦○豁雲南委員署琅鹽井提舉叅革通判林大本沉銅六萬七百五十觔有奇祿勸縣叅革知縣檀萃沉銅六萬五千八百觔有奇○豁在洋遭風廣東香山協兵丁林光國屈信佳漂溺船隻軍械銀兩○是日駐蹕兩間房行宮

實錄卷一百三十三

聖旨

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十二

實錄卷一百三十三

辛

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履柱

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事務

世襲騎都尉軍功加十九級隨帶加二級又加二級臣堂裕內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

欽

乾隆五十三年戊申九月甲戌諭前因諸臣

條奏科場弊竇者紛紛特降旨嚴定覆試之
例其時軍機大臣擬寫諭旨鄉會試榜後特
派親信大臣嚴行覆試措語本未明晰朕亦
未經看出今歲順天鄉試榜發屆期應照新
例舉行覆試第思各省鄉試中式人數衆多
順天取中各生尚不難調集覆試若各直省
道里殷遙省分甚多安能簡派如許大員於
榜發後徧行覆試嗣後鄉試榜後覆試一節
著不必行至明歲會試各省舉子雲集京師

除未經中式者聽其各回本籍外其中式舉
子著於會榜揭曉之後未經殿試之前該部
奏請揀派大臣將中式舉子嚴行覆試屆期
除實有事故者豫行報明該部外倘有心懷
規避托故不到者即將該舉子立行斥革如
覆試之卷較取中原卷懸殊必即從嚴究辦
一惟該主考官是問至明歲舉行覆試後
亦不必著為常例著該部每屆會試榜發將
應否覆試之處奏請定奪候朕臨時降旨士
子等尚其勉務實學凜遵功令以副朕剔弊
掄才至意諭軍機大臣等據慶麟雅滿泰
節次奏報所辦皆不合機宜惟雅滿泰現往
後藏保護扎什倫布指示噶布倫戴綢等用
心防守尚屬稍為曉事班禪額爾德尼業已
遷赴前藏彼處人衆自必益滋疑懼慶麟何
見不及此乃借護送班禪額爾德尼之名遂
其畏葸退避之計豈復尚有人心再據奏噶
布倫等祇辦出糶麥四千餘石足支三千兵

丁四月口糧其從前採買舊案係由聶拉木地方糴取今該處業被賊占實難辦理等語尤屬無理藏地甚廣豈止聶拉木一處為產米之區况兵丁口糧一切糶粃麵食等物俱可應用此明係噶布倫等藉辭推諉慶麟等信以為實並不以理窮詰實為無能可鄙著慶麟雅滿泰再嚴行訓諭噶布倫等現由內地派兵專為保護合藏人衆特以路隔五千餘里糧運維艱是以轉向爾等商辦且照時價發給並非無故索取爾等稍有人心即當奮勉供支乃現辦麥四千餘石僅敷三千兵丁四月口糧此事若於四月內完竣固屬甚善萬一不能速竣兵丁等豈能枵腹勤賊惟有將達賴喇嘛班禪額爾德尼移居泰寧爾等後悔何及且爾等如此負恩大皇帝不特不加憐憫必且從重治罪將此嚴切曉諭伊等自必翻然改悔將存貯米糧盡數出糶以備官買雅滿泰行抵後藏亦應於班禪額爾

德尼商上及附近各鄉村再為豫備數千石尤覺妥善又據奏賊匪以牛測水深淺計欲渡河是巴勒布賊並無竄回之意著傳諭鄂輝成德等愈宜加緊進行現在巴忠已自京起程亦宜星速赴藏與成德等會同商議悉心辦理以慰廛注○是日駐蹕要亭行宮○乙亥

上御行殿勾到陝西浙江情實罪犯停決陝西斬犯九人絞犯十三人浙江絞犯五人餘八十八人予勾○諭曰福康安等奏覆訊祝德麟據稱在署內聞御史曹錫寶論及黃壽齡聲名不好因無實據難以辦理彼時王念孫亦聞此言隨傳曹錫寶王念孫隔別詢問俱稱係祝德麟在署內先自說起並非曹錫寶告知彼此各執一詞又調取本年黃壽齡考到各卷詳加閱看有監生沈惟賞沅等二卷字畫生疎文理荒率轉得錄取而監生田文洛王俊二卷稍勝於彼反致擯棄將原卷封

固進呈請將曹錫寶王念孫解任並飛摺沈惟賞沅到案質審等語國子監考到非錄科可比錄科不取即不能入闈而考到一次不取下次仍得再考本係重複具文無關緊要之事將來審明後原可將此例停止即生監等於考取後托名師生餽送贄儀土物亦屬相沿陋習鄙瑣不成事體但祝德麟既經叅劾則傳旨詢問時即應列款指出即或所奏未能盡實亦當一人獨任其咎又何必紛紛牽引況國家設立臺諫許其奏事體制已優自應各顧顏面今祝德麟始則以一奏見其風厲繼復援引同官以卸其所言之不實而曹錫寶王念孫又惟恐株累嘵嘵剖辯言官習氣至此朕閱之徒增煩懣轉鄙薄伊等之為人矣現據福康安等奏請將祝德麟曹錫寶王念孫一併解任質審但祝德麟因係原叅之人既經傳旨詢問並不將黃壽齡婪索之處確切指出轉一味游移含混是以降旨

將伊解任質審至曹錫寶王念孫平日既私相議論及傳至公所又不敢承認此等進退失據之流毫無主見轉不值將伊等解任辦理且此案不過相沿陋規亦不值牽引多人更興大獄也至閱所進卷內已取之二卷較不取之二卷字畫轉劣文內疵類亦多顧去取倒置是外間所傳黃壽齡非錢不取之說竟屬有因現經福康安等查摺沈惟賞沅二人到案一經質審自無難得實著福康安等即訊取確供嚴審定擬具奏○又諭曰阿桂等奏提訊墾種窖金洲沙地蕭逢盛供稱伊祖父於雍正七年起至乾隆二十七年止陸續向本處民人契買種植蘆葦等語此明係狡飾之詞各省民田廬舍俱有管業之人其輾轉典賣始得謂之契買今江中漲出沙洲自係官地不論何處民人何得據為己業蕭姓又何得向其契買如蕭姓契買屬實則雍正七年及乾隆二十七年以前有此沙地者

又係何人著傳諭阿桂等即逐一查明據實覆奏毋任狡展又據畢沅奏地方災賑情形一摺所奏尚未詳晰荊州被水之後兵民蕩析離居朕心為之惻然節經降旨令該督撫等妥為撫恤今江水久已消落該處廬地畝曾否全行涸出旗民人等經撫恤之後能否安輯復舊朕軫念災區無時或釋並著畢沅等再行詳悉查明據實具奏以慰厘注○又諭唐古忒等雖素性懦怯今若依附勁旅

振作其氣亦可轉弱為強鄂輝等前往脅喝爾必由前藏經過著傳諭慶麟等豫派一能事噶布倫作為嚮導並挑選唐古忒兵數百名俟鄂輝成德一到即令會合前往亦可得加慶麟等務即妥速豫備不可令成德等稍有掣肘○是日駐蹕密雲縣行宮○丙子諭曰福康安等奏審明御史祝德麟奏革職司業黃壽齡考到得受銀兩一案請將黃壽齡祝德麟分別治罪革職一摺此事若果關

係科場朕必徹底根究按律嚴辦斷不肯稍事姑容今國子監考到非錄科可比錄科不取即不能入闈應試至於考到此次不取下次仍准其再考況考取之後仍由欽派大臣及祭酒等覆行錄科始准入闈文理荒劣者亦無從冒濫是考到一事係重複具文於士子本無關輕重其考後餽送贊儀亦屬託名師生相沿陋習與用財營求者不同在潔清自愛者顧惜體面自不肯收受其見小猥鄙之流即來者不拒而黃壽齡貪鄙尤甚以致輿論不協此事若果於科場去取有涉必將黃壽齡立寘重典今據福康安等審明考到一事既無闕入場去取而所得贊儀自一兩至四兩不等聚少成多纔共得銀六十餘兩實係相沿陋規於錄取後餽送收受雖其猥瑣齷齪有玷官箴固難留司業之任尚不至於治罪黃壽齡業經革職其所擬杖責之處著加恩寬免至祝德麟身為御史既經具摺

叅劾當福康安等傳旨詢問時。自當列款指出。乃始則以一奏博建白之名。冀圖轉科。繼則游移含混。並牽引多人。以卸其言之不實。似此進退無據。豈堪復膺臺諫之職。本應照議革職。第念祝德麟本有言責。而黃壽齡收受贊儀。致被叅劾。尚不為無因。祝德麟著從寬降三級。以部員補用。曹錫寶主念孫皆係言官。既聞黃壽齡聲名不好。即應自行具摺。叅劾。乃於署內私相談論。及傳至公所詢問。又復曉曉剖辯。互相推諉。不顧顏面。本應照議交部。第念其究得自傳聞。未有確據。曹錫寶主念孫俱著從寬降二級留任。劉墉係總理國子監事務。古善身係祭酒。於考到一事。自應公同辦理。何以專交黃壽齡一人考校。致滋物議。咎實難辭。劉墉古善俱著交部議處。其生監人等所送贊儀。為數甚微。訊無營求情弊。且於揭曉之後。多已出京回籍。並著加恩免其提究。餘著照所議行。朕辦理庶務。

凡有闕弊實者。無不加以意釐剔。而沿習陋例。並非作奸犯科者。亦不肯稍事苛求。此即不為已甚。去已甚之意也。將此通諭知之。又諭前因直隸山東河南等省緝拏段文經日久未獲。曾降旨將直隸山東二省督撫藩臬應得養廉俱不准支給。畢沅因曾派員緝獲徐克展。准其支給養廉一半。第念段文經一犯各省承緝已閱二年之久。除明興現派往烏什辦事外。劉綬係本省總督。於首犯尚未緝獲。雖不能辭咎。但伊每歲應得養廉久經停支。未免辦公竭蹶。至畢沅現陞湖廣總督。已離豫省。此後劉綬畢沅所有應得養廉俱著加恩准其支給。俾資辦公之用。藩臬內除江蘭業經丁憂。穆克登業經病故外。其直隸布政使梁肯堂山東布政使繆其吉前任直隸按察使熱河道托倫布著一體全行支給養廉。該督等尚其益矢恪勤。實心任事。以副朕格外體恤至意。○又諭曰。福康安上年命

往臺灣督辦軍務其應得陝甘總督養廉曾諭令在福建就近支領今據稱在福建時僅支過一半等語福康安現在京供職尚未即赴陝甘總督之任所有未經支領一半養廉著即在部庫內照數支給以資費用○欽差大學士公阿桂湖廣總督畢沅覆奏窖金洲沙漲逼溜北趨恐開挖引河江水平漾無勢仍至淤閉請於對岸楊林洲靠隄先築土壩即靠土壩接築雞嘴石壩逐步前進約計一

百四十餘丈激溜向南俟洲壩盡擊剝蝕刷成兜灣方乘勢酌挑引河較為得力又黑窖廠一處應用碎石裹頭過其北來水勢可期溜緩沙積不再往裏搜刷又玉路口迤東掃灣之處飭員載石沉水亦可漸次掛淤保護隄根俱無庸改建石工得旨覽奏俱悉又批亦祇可如此○是日駐蹕南石槽行宮○丁

上詣

安佑宮行禮○幸圓明園○諭軍機大臣等據慶麟奏哈喇烏蘇三十九部落番兵先調取一千名妥協豫備等語兵力增多愈可示威著傳諭慶麟若此項番兵已經到藏即交與成德一同帶往不必停止如尚未到藏亦無庸督催不可稍有拘泥又巴勒布起釁緣由因第巴等私加稅課而起此雖係達賴喇嘛之事慶麟等寧得諉為不知已忠到彼後辦理善後事宜若查明第巴等加稅屬實著即

指名參奏並將嗣後如何均平抽稅之處悉心妥議永為定例○戊寅諭前據王公大臣及直省將軍督撫大吏等以乾隆五十五年朕八旬萬壽額請舉行慶典已俞所請其應備儀文典禮恐不免踵事增華致滋繁費因專派大臣董理其事現經阿桂等酌籌經費奏定章程王公大臣及將軍督撫等分別銀數於廉俸內坐扣備辦亦已准行以遂其効誠抒悃之心第念各督撫等獻忱祝嘏既將

五十五年分養廉扣辦其餘剩廉俸尚須留為辦公之用若是年該督撫等仍照每年之例備進萬壽貢物未免稍形竭蹶況所進物件內如寶座屏風各宮殿皆有陳設不便更換即佛像亦屬過多無處供奉亦無另建廟宇之理其五十五年萬壽貢品不但各督撫等俱不准其呈進即王公大臣等亦無庸備進至各該省是年應進土貢內除橘子荔枝石花魚哈密瓜等物仍照舊呈進以備薦新之用其餘土物概行停止以示朕體恤臣工至意○又諭科場條例上年經大學士九卿議定奏准五經分年輪試今歲鄉試先用詩經出題次年會試用書經出題又空白試卷停止豫備均為防閑弊竇起見今劉紹錦於甫定章程即妄逞臆見輒議更張夫書以道政事士子等有志讀書童年即已成誦豈有業經應試轉未熟習之理況會試非鄉試可比明經即所以從政斷無中式舉人尚不能

講解經義又非若周易之義蘊深奧春秋經旨間有冷僻禮記文詞繁富者可比何須仍以詩經出題又停止豫備空白試卷原以杜換卷中另生情弊若如劉紹錦所奏照舊准其更換則違式諸生均毋庸貼出又何必多設條規耶邀譽沽名莫此為甚劉紹錦即照刑部所擬發往伊犁本不為枉但此等冒昧無識之徒亦不值深究劉紹錦已經革職著勒令回籍不准出境並著交與該督撫留心查察如劉紹錦尚不知安分守法即據實嚴叅必當從重治罪決不寬貸○又諭曰閔鶚元奏覆江蘇各屬收成分數摺內稱徐州府屬蕭縣碭山豐縣沛縣淮安府屬安東清河桃源海州江寧府屬江寧上元句容江浦六合等十三州縣被水田地退涸較遲請將新舊錢糧漕米緩至明年秋成後徵收其山陽鹽城阜寧等三縣舊欠錢糧亦請緩至明年秋成後徵收等語江蘇淮北一帶瀕臨河湖

及江寧府屬沿江地方因本年雨水較多間被淹浸小民完納官糧未免拮据所有蕭縣碭山豐縣沛縣安東清河桃源海州江寧上元句容江浦六合等州縣新舊錢糧漕米俱著緩至明年秋成後徵收其山陽鹽城阜寧等縣舊欠錢糧亦著緩至明年秋成後徵收以抒民力該部即遵諭行○諭軍機大臣曰成德奏帶兵已至乍丫巴塘一摺內稱此時暫令官兵按站行走沿途留心探聽若賊衆勦敗即帶兵奮力追勦若賊衆早經遠遁自無庸前往等語所辦非是昨慶麟奏到噶布倫扎什端多克帶領唐古忒兵丁到脅噶爾進勦賊匪漸漸散去各情形朕思唐古忒兵丁本非精壯何以一到脅噶爾賊匪即紛紛逃竄且殺賊不過二十餘人亦不足令其喪膽自係賊匪聞知內地大兵將到震懾先聲豫為奔竄之計鄂輝成德正應會合兵力趕緊行走乘勝追殺若此時接准慶麟咨會遽

行停止前往萬一賊匪去而復來又須紛紛徵調成何事體現據慶麟奏稱賊匪散去後或繞道前往薩喀亦未可定若果繞至薩喀地方滋擾鄂輝成德即可帶兵親往該處將屯聚賊衆痛加殲戮務使懾伏軍威永遠不敢侵占方可諭傳該頭目到營勘明定界設誓立限倘或賊匪自脅噶爾敗逃後實已出境遠竄則搶去之聶拉木濟龍宗喀等處已無賊人蹤跡收復雖易究不能大加勦殺不足令其畏懼著傳諭鄂輝成德於收復聶拉木等處之後仍即統率大兵前往巴勒布界內將其附邊地方攻克一二處聲言尚有數萬官兵陸續前來剋期大舉或賊匪畏伏請降或傳令該頭目來營將天朝兵力強盛無敵不催斷難始終抗拒各情形嚴切曉諭並令誠心立誓勘定界址安設鄂博以期一勞永逸綏靖邊圉斷不可因有賊匪敗逃信息進兵稍緩又致遲誤事機也○又諭巴勒布

賊匪已陸續由膏噶爾撤回至墨爾木地方現在鄂輝成德等帶兵將到大加剿戮賊匪自必懾服投誠即可定界藏事似不必張大辦理但唐古忒兵徒有其名平日並不操演又不防守邊境皆係分散居住賊匪猝來侵犯徵調不能齊集且因未操之兵不諳戰陣以致聶拉木等處被賊搶占已忠辦理善後事宜時務將前後藏各派兵若干名分駐防守並平素如何操防如何飭令第巴等管束之處俱著酌定章程妥議具奏至此項兵丁應得口糧前藏由達賴喇嘛商內支給後藏由班禪額爾德尼商內支給其駐藏辦事大臣每歲輪派一人前往接壤之處巡查操演照內地查閱營伍之例一體辦理○又諭曰蘇凌阿奏辦理北倉截卸漕糧完竣軍船掃數回空一摺據稱江西各幫已截卸漕糧四十五萬八千餘石各履俱已貯滿餘剩永建饒州安福三幫應起米十一萬八千餘石即

將現在到倉官撥船五百餘隻儘數撥運通州俾該軍船等即日回空南下既省進出奔運浮費又免露囤風雨之虞等語所辦甚好覽奏為之欣慰已於摺內批示但前因毓奇奏應兌豫糧之臨清前後兩幫空船本年應屆大修請於直省官撥船內賞派二百隻令各丁等領雇以期無誤兌運業經降旨准行今思直省撥船正在需運多糧若遽將二百隻分派豫省應用恐該侍郎等於一切挽運

事宜不無竭蹶昨據何裕城奏到承造東省運漕撥船一百五十隻業經一律辦竣其船內所需器具並駕船之舵工水手亦已置雇齊全現在派員督押於八月二十五日開行解赴山東接收等語因思東省新造撥船現尚無須應用或即將此項船隻撥派豫省領雇受兌其直隸撥船即可無須派往似覺兩為便易其可否如此通融酌撥之處著蘇凌阿等會同劉綬長麟熟籌妥商據實具奏將

此各傳諭知之○又諭曰陳名炳係阮賊所遣攻奪諒山之人今見沿途所挂檄文心生悔懼情願歸順嗣孫並請添募義兵與潘啟德會同恢復其言自出於真誠可不必加之疑慮此是極好機會看來此時內地官兵竟有不得不動之勢著傳諭孫士毅即遵照前旨派令許世亨等帶三千名前往督率潘啟德等以次攻勦該督之意不值勞動大兵固為正辦然亦不可存將就完事之見又前據孫士毅奏欲親自統率大兵出關進勦已經降旨諭令該督不可親統前往現在尚駐劄關內該督務當遵照前旨止須令許世亨統率弁兵進勦該督或於關外作進勦之勢許世亨係曾經行陣之人勦捕事宜自所諳習惟當號令嚴明約束兵衆不可因係前往安南為彼勦賊遂稍存居功見好之念致有欺凌該處臣民及勒索情事若能妥協辦理將來事竣後朕必加之優賞否則必當重治其

罪孫士毅當告之許世亨並明白開示派出將弁兵衆務各安靜守法不可滋事○欽差大學士公阿桂工部侍郎德成湖廣總督畢沅奏荊州隄工內中方城上漁埠中獨楊漫潰共七處應外越補築接還舊隄玉路口一處擬做柴壩於壩內補築上方城洪家灣及萬城三處舊隄擬各築順水壩以挑水勢餘缺口十四處俱補還舊址復行培高此外楊林洲黑窯廠所需碎石及未經過水舊隄應行加高培厚並沙市鎮等處加築土堰通共估銀十八萬九千五百三十八兩零請即動項飭該地方官購料雇夫次第興工限明年三月報竣並遵旨令舒常李封等實力監修永資保障得旨如所議行該部知道○己卯諭據長麟奏本年東省鄉試諸生中年屆耄耋奮志觀光多至五十餘人俱三場完畢未經中式就中擇其年屆八十以上入學年分較早者李發枝李可士李承宗王兆隆王克

昌五名。文理俱無疵謬等語。該生等或齒近期頤。或遊庠年久。猶能踴躍棘闈。爭先恐後。洵為熙世瑞徵。藝林盛事。李發枝李可士李承宗主兆隆王克昌俱著加恩賞給舉人。准其一體會試。俾償皓首窮經夙願。用昭壽世作人至意。○諭軍機大臣曰。鄂輝奏籌辦進兵事宜一摺。所辦俱好。一切具有成見。至所奏德爾格爾乍丫察木多三處酌派一千名。先經譯諭飭備等語。此則可以不必成德帶

往官兵。已有一千二百名。鄂輝帶往滿漢屯土官兵。又有二千餘名。足資勦捕之用。現據慶麟奏。賊匪紛紛散去。自係聞知內地大兵將到。震懾先聲。豫為奔竄之計。鄂輝等惟當率領現派弁兵。乘勝追殺。況現在兵數不為不多。其德爾格爾等處番兵一千名。即可不必派往。又據李世傑奏續辦米一萬石。先撥五千石。轉運鹽城等語。藏內採買稞麥四千六百餘石。各兵糧餉。已敷給發。已勒布不過

么。磨小醜。現已紛紛逃散。豈有閱四月之久。尚不能竣事之理。況該處道路險遠。輸送維艱。若多為運往存貯。無用。亦未免徒滋糜費。著傳諭李世傑。如此項米石。尚未起運。即飭令停止。如已經起運。即留貯打箭鑪倉。以作各臺每年支食之用。亦無不可。總宜酌量情形。妥協辦理。○大學士嵇璜等議。覆漕運總督毓奇奏。稱奉旨將僉丁事宜。分為江以南。交總漕衙門。江以北。交各該督撫。查江北惟

直隸山東其餘安徽浙江湖北湖南江西五省。皆在江南。而江蘇統轄江之南北。有江南軍戶住江北者。亦有江北軍戶住江南者。是同幫同衛之丁。在江北則歸督撫。在江南又歸總漕。責成未能畫一。請將湖南湖北江西直隸等省。交各督撫。江蘇安徽浙江等省。交總漕辦理。應如所請。至所稱山東距淮安尚近。亦歸總漕之處。查山東與直隸均係江北省分。應遵原旨。仍令該撫專辦。從之。○庚辰

諭據阿桂等奏查抄荊州府蕭姓民人家產請將勒休都司蕭夢鼎一併革職解部治罪一摺各省民田蘆舍俱有管業之人始准其輟轉售賣今江心漲出沙洲自係官地無論何姓皆不得據為己業若云蕭姓所墾洲地買自王齊葉張楊五姓則此五姓民人又因何敢私占官地必係奸民見江中漲有沙洲認種可以獲利遂藉詞升科呈請開墾而地方官受其賄賂因而准行既據蕭逢盛供係伊祖父於雍正七年起至乾隆二十七年止陸續買自王齊葉張楊五姓雖雍正年間閱時既久而契冊可以調查密金洲乃係官地該五姓民人因何准其私相售賣抑係此五姓從前又向何姓轉買實在起自何時亦無難逐一清查著阿桂畢沅務將此項洲地係何姓始行私占開墾何時地方官得其賄賂准令私占之處再行詳細確查據實具奏至前令阿桂等將蕭姓家產查抄者原因密金

洲適處江心逼束溜勢而蕭姓一味漁利於洲上多種蘆葦以致滋蔓環生沙洲不能刷動日漲日寬逼溜北趨衝決隄塍淹斃數萬生靈皆伊一家貪利貽此鉅害此而尚令坐擁富厚何以示懲儆而慰輿情現據阿桂等將伊家產查封具奏但此項查出財產不可照例入官著阿桂等即分別估變留於該處以抵工賑之用使為富不仁者知所儆戒○又諭廣東潮州鎮總兵員缺緊要著孫士毅於廣東廣西兩省總兵內揀選一員調補所遺員缺著李侍堯於福建量簡中平缺分總兵內奏調一員其所遺員缺即著普吉保補授○又諭據正黃旗滿洲都統奏擬正承襲佐領珠隆阿年十三歲照例進呈綠頭牌已准其承襲矣珠隆阿年已十三非孩提可比應帶領引見嗣後凡遇襲職自十二歲以上者俱帶領引見著為例○諭軍機大臣等據畢沅等奏緬甸貢使入覲護送回程事宜亟

應妥為豫備。擬於樊城多備寬大船隻。派委文武大員護送。並飭從優應付。一面咨會梁肯堂浦霖一體飭屬照辦等語。緬甸效順遠來輸誠納貢。到京後加以宴賚。略示從優。原係朕嘉惠遠人恩施格外。但該貢使究係屬國陪臣。經過地方。祇須照例寬為供應。派員護送。不必過涉張皇。前聞緬甸貢使來京。沿途供支煩費。該貢使未免心生輕易。今在京半月有餘。已就約束。乃畢沅又以回程未便草率。擬在樊城多備大船。派委文武大員護送。地方官惟知優加應付。船隻一切任其取用。轉使該貢使等無所節限。有忽視地方官之心。實非天朝體制。況嗣後該國貢使常通。每次皆須例外供應。伊於何底。畢沅係曉事尚然如此。其餘各省自必相率效尤。更屬不成事體。著傳諭畢沅等及經過各省督撫。於緬甸貢使過境時。止須飭屬照例妥辦。不使缺乏。毋庸踵事增華。以示限制。○禮部議覆

廣東學政闕槐奏稱新例童試仍用四書文二篇。將經文裁去。查童生入學。便應科舉。在有志者講求根柢。自仍研悉經義。其甘小就者。必以考無經文。因循荒廢。且科舉於五經輪試後。即以五經兼試。若不及早研摩。恐臨時剽竊之弊。請於取進童生覆試。加經文一篇。通曉者入學。背謬者扣除。其出題之法。首詩。次書。又次易禮春秋。迨輪試畢。照生員歲試例。不拘何經出題。至府州縣考覆試。亦一律增入。均應如所請。從之。○封閉四川宜賓縣濫壩等處鐵礦。從總督李世傑請也。○辛巳。諭軍機大臣等。前據慶麟奏。巴勒布賊匪漸漸散去。或繞道前往薩喀。亦未可定。等語。已降旨催令鄂輝成德會齊兵力。迅往追剿矣。但恐賊匪聞風。全行逃匿。而附近邊界又無地方可取。我兵無所斬獲。既未便徵兵空還。又未便深入窮追。莫若先遣第巴中能事者。或副我將弁一二人。前往宣諭該處頭

目傳令來營誠心設誓再行勘定界址俾賊匪不敢侵占以期一勞永逸鄂輝等惟當酌量情形相機妥辦○豁浙江仁和縣捐置義塚上虞縣水衝地共五頃四十畝有奇額賦

○壬午遣官祭

歷代帝王廟○遣官祭

都城隍之神○諭軍機大臣曰阿揚阿等奏分發江西吏目卞世淦自縊起有冤單一紙因分發廣東從九品卞世鏡借張存毅銀兩

無還詎卞世淦代借呂姓銀兩言明赴滄州當舖取銀償還卞世鏡出京後寄信鋪夥言與卞世淦並無交手事件不令給銀以致卞世淦負屈輕生應行提卞世鏡到案確訊等語卞世鏡既因在京借欠無償託卞世淦那借歸還許令赴滄州取償又何出京後復寄信鋪夥不令給銀是否卞世鏡設法詎借於前復有心脫賴於後以致卞世淦自縊身死不可不徹底根究卞世鏡現在分發廣東著

傳諭圖薩布即派委委員將卞世鏡解送刑部以便同案内犯證嚴行質訊務得實情並飭令委員沿途小心管押毋致卞世鏡有情急自戕情事○癸未諭據慶麟奏藏內辦出稞麥四千六百餘石又撥出牛一千一百頭羊一萬隻達賴喇嘛不敢領價情願作為兵丁口糧等語朕鑒達賴喇嘛誠意肫懇深為嘉悅此次派出內地兵丁原以護衛達賴喇嘛班禪額爾德尼及矜恤唐古忒僧俗番衆但自內地至藏遠隔數千里糧運維艱藏內地廣糧充兵丁所需口糧理宜本地採買今達賴喇嘛所辦糧食牛羊情願作為兵丁供應不領價值甚屬可嘉然此項糧石牛羊原係達賴喇嘛商內豫備衆喇嘛等養贍所需若不支給價值朕心實有不忍著將官兵支給若干之處仍行照數給價俟事竣買補足額以備養贍喇嘛之用第該處唐古忒兵丁亦必需用口糧朕意即於此項撥出糧石內

酌量稍加賞賚。現在達賴喇嘛不免遇事焦勞。而班禪額爾德尼尤屬年幼。已特派侍郎巴忠帶同扎薩克喇嘛格勒克納穆喀前往慰視。巴忠至彼。想勸賊事已完竣。著仍派慶麟護送班禪額爾德尼回至扎什倫布。以安居止。○諭軍機大臣等。巴勒布賊匪起事之初。慶麟等稍知事體。善為辦理。亦不至如此張皇。即如口糧一事。並不先事通融酌辦。轉據噶布倫等推諉之詞。含糊入告。及朕代為籌畫。將達賴喇嘛班禪額爾德尼商上及各村莊所貯糧石。官為採買。并牛羊亦可作為口糧之處。詳悉指示。方得畧有頭緒。但彼時因賊匪未回。陸續添派兵丁。不可不豫為籌備。今賊匪已由脅噶爾漸次撤回。我兵到時。不過定界等事。無需四月之久。即可撤兵。計從前辦出口糧。已足敷用。慶麟乃復固執。勒令辦出牲畜。又不支給成德所帶兵丁轉另給錢糧。令其自行買食。留此項為續進大兵

之需。任意妄奏。不料其糊塗。一至於此。除嚴加申飭外。著傳諭慶麟。將現在辦出四千餘石稞麥。無庸全行發價。內地派往兵丁各有裹帶口糧。行抵彼處時。設有不足。再於此內支給。成德等帶兵無多。此四千餘石口糧。已為裕如。可將續辦牛羊全行給回。再昨據普福奏查閱西寧所屬卡座嚴加防守等語。現在賊匪遁退。藏內諒無大事。西寧地方若係向例設卡防守。仍應照常辦理。如因巴勒布滋事。始行豫備。即令各回游牧。毋致紛紜滋擾。仍曉諭庫庫諾爾各蒙古王公等。令其安堵如初。○又諭據慶麟奏。巴勒布賊匪自脅噶爾敗逃之後。又退一站。已至第哩朗古地方等語。即現在情形而論。賊匪愈遁愈遠。看來不復前至後藏地方滋擾。竟可無需多兵進剿。鄂輝成德佛智惟當統率現在帶往官兵。加緊行走。趕上賊匪。將在後之賊痛行剿殺。若賊匪去遠。再遣第巴中能事者或副我

將弁一二人前往宣諭該處頭目傳令來營誠心設誓勘定界址賊匪震懾兵威知有界限不敢復致滋擾方可期永遠無事若巴勒布頭目不敢來營或即在前後藏現作買賣巴勒布貿易頭人內擇一的當者派往亦可其續行派往之兵未及趕上鄂輝等隨同前進者著李世傑竟行停止撤回原處至李世傑前因其駐劄成都距藏較遠於籌辦一切軍營事宜恐鞭長莫及曾諭令該督前駐打箭鑪就近調度今賊匪紛紛逃散愈遁愈遠已毋庸大辦總督統轄全省應辦事務較多李世傑竟當回至省城辦事毋庸在打箭鑪駐劄○又諭據李侍堯奏現患瘡疾未痊精神難以兼顧伍拉納即須前赴河南新任所有巡撫任內審題稿案及大計奏銷軍政武圍等事實難兼辦現將審案暫委藩司伊轍布代審並請簡員來閩署理撫篆等語李侍堯染患瘡疾所有巡撫任內事件較多自難

兼辦一切徐嗣曾於臺灣諸事亦俱辦有條理其軍需報銷等項即有未經辦竣者亦可將稿案帶至內地次第覈銷毋庸久駐該處著傳諭該撫接奉此旨後即料理起程內渡接管巡撫印務將大計奏銷及盤查等事逐一辦理徐嗣曾未經內渡以前所有巡撫印務著暫交伊轍布護理其司道印篆並著李侍堯揀員奏聞遞署至李侍堯所患瘡疾想即日就可痊愈現在諸事俱有人接辦該督更可安心調攝冀得速痊以慰廑注也將此各諭令知之並將目今瘡已全愈否速行奏聞○甲申

上詣
大高殿

壽皇殿行禮○還宮○諭軍機大臣等閱雅滿泰奏到各摺甚屬糊塗伊既至後藏理應明示仲巴呼圖克圖等現由內地派兵程途遙遠需用口糧斷無由內地運送之理藏內現

有存糧。自可寬為豫備。况係照價發給。毫無擾累。如此明白宣諭。伊等斷無不踴躍從事。乃並不將此詳悉曉諭。轉嚴行交辦。使仲巴呼圖克圖等不知憐憫伊等之心。反若於賊匪搶奪之外。更增一番騷擾。尚復成何事體。至唐古忒人等。懦怯性成。自應多方鼓勵。俾知奮勇。今賊匪已由脅噶爾撤退。朕尚慮其漸次遠竄。不能痛加殲戮。乃雅滿泰轉以賊匪設計埋伏等詞。致伊等更增疑懼。尤屬可笑。著傳諭已忠於到藏後。一一宣示仲巴呼圖克圖。並傳集後藏之噶布倫戴綱第巴等。將雅滿泰降旨嚴行申飭。○湖廣總督畢沅奏。楚北被水之區。共三十六處。江陵為最。其次公安監利。石首漢川。黃梅五屬。又其次松滋枝江漢陽沔陽黃岡。長陽廣濟。江夏八屬。其餘二十餘處。皆不成災。臣與惠齡將成災者確查分數。按月散賑。即不成災者。亦酌予緩徵量借籽種。得旨覽奏稍慰。○乙酉

孝慈高皇后忌辰遣官祭

福陵。○諭曰。何裕城奏。南昌等八縣被水地畝。秋成失望。本年應徵漕糧。不能依期完納等語。南昌等縣被水成災。業經降旨撫賑兼施。農民自可不至失所。但本年尚有應徵漕糧。若令依期完納。民力仍未免拮据。所有南昌新建進賢鄱陽餘干德興建昌都昌八縣被災各戶。本年應徵漕糧。著加恩緩至來年秋熟後。一併徵收。以示朕軫念災區有加無已至意。該部即遵諭行。○又諭據何裕城伍拉納浦霖奏。此次應試年老各生。江西省年屆八十以上者一人。福建省年屆八十以上者三人。湖南省年屆九十以上者一人。俱三場完竣。未經中式等語。該生等年臻耄耋。踴躍觀光。精神矍鑠。允為藝林盛事。所有江西生員鄧岳福建生員王奕年陳友仁李紹瀨湖南生員李洪福俱著加恩賞給舉人。准其一體會試。以示朕壽世作人嘉會耆齡至意。○

又諭原任道員楊重英前在緬甸羈留二十載。念其獨居緬寺並未娶妻生子。尚知顧惜名節。較之漢時蘇武奉使外域。即在彼娶婦生子者。差勝現在緬甸款關投誠。奉表納貢。業將楊重英送出。伊本係無罪之人。在途因病身故。殊堪憫惻。著加恩賞給道員職銜。以示軫卹。其子楊長靈。早經加恩釋放。著俟營厝事畢。交該旗帶領引見。候朕另降諭旨。

○諭軍機大臣等。前因巴勒布賊匪退至第

哩朗古地方。愈遁愈遠。竟無須多兵進剿。已降旨諭知鄂輝等。令將現帶官兵率領前往。其續行派往之兵。竟行停止。今鄂輝籌辦情形。尚與前旨相合。惟所稱頭起滿兵內挑選二百名前進。其實亦可不必。但既經帶領先行。自應迅抵後藏。併力追剿。本日午刻。又據慶麟等奏。賊匪約有千餘人。繞至薩喀地方。陸續渡河等語。前因賊匪在脅噶爾退敗。正慮其紛紛遠竄。我兵不便深入。未能大加剿

殺。今賊匪復由薩喀渡河。轉可因其前來。痛加殲戮。若成德行走稍遲。大兵抵彼時。或賊又遠去。既不能多有斬獲。使賊畏懼。警服又不值儘力窮追。深入其境。設徹兵後。賊復伺間侵擾。又須調派征剿。殊非一勞永逸之計。成德務宜加緊行走。愈速愈妙。鄂輝亦宜趲程進發。趁賊匪未退之先。趕抵薩喀迎截。堵殺。使之望風膽落。將所搶濟籠等處地方。全行收復。再傳令該處頭目。來營設誓。勘定界址。永遠不敢復行越境滋事。以靖邊隅。至賊匪究屬無能。成德所帶之兵。已有一千餘名。鄂輝等現又帶兵一千數百名。接續前進。儘數剿捕之用。其續行派往之兵。仍當停止。鄂輝等不可因聞有賊匪之信。又復紛紛檄調。過涉張皇。若已調兵啟行。又不必泥於遵旨。撤回。仍將於何日。馳抵該處。剿殺賊匪情形。迅速覆奏。以慰廑注。○丙戌。諭本年江南豫省河工。自夏秋以來。黃運湖河水勢漲盛。各

工搶護平穩現在霜降已過秋汛安瀾該督等督率在工人員防汛護工均屬奮勉書麟李奉翰蘭第錫陞任巡撫畢沅俱著交部議敘其在工出力文武各員並著該督等查明咨部照例議叙○諭軍機大臣等本年江南豫省河工夏秋以來湖河漲盛節據該督等奏各工水勢隨長隨消隄工俱歸鞏固現在節候已逾霜降秋汛安瀾此皆仰賴河神靈佑各工得臻平穩允宜酬答鴻庥用

昭妥侑著傳諭該督等於各該處

河神廟敬謹拈香致祭以答神貺○又諭昨據戶工二部管理錢法衙門具奏寶泉寶源二局自乾隆四十九年查辦鐵砂銅觔後陸續挑出不堪鼓鑄低銅共一百四十餘萬觔等語特命軍機大臣帶同滇省道員賀長庚眼同煎鑄並詢據該監督等稱向例每確用銅鉛錫共二十七觔鑄錢四十枝每枝錢四十四文共應得錢一串七百六十文今將挑

出低銅照例配用寶泉局僅鑄得整錢一百五十四文寶源局僅鑄得整錢二百四十文就兩局現在情形而論其未成錢文之低銅幾至十之八九何至折耗如許之多因思京中鑪頭匠役鼓鑄錢文從中舞弊勢所不免即監督等亦恐未能盡燭其情偽但戶工二局自五十年後挑出低銅積至一百四十餘萬之多若遽行着落賠補在鑪頭匠役等必以為銅色低潮而辦銅之員又以為弊在鑄

局且委員運到銅觔如果不堪鼓鑄原准隨時駁回勢必彼此互相推諉不足以折服其心著傳諭富綱譚尚忠即派委經理廠務錢局之道府二員帶領本省熟習鑄錢匠役四名馳驛來京赴戶工二局眼同鼓鑄如所鑄錢文較本局多至幾倍是京中鑪頭等鑄錢積慣舞弊即當重治其罪若該省匠役所鑄錢數亦與京中相仿則是該省銅色本低歷來辦銅之員不能辭咎而運銅至京交收時

該侍郎監督等並不驗明是否足色濫行收兌亦有應得之咎自當著落分別賠補以示懲儆而昭平允其道府帶銅匠即著速奏將此由五百里諭令知之尋奏臣等即遴選熟悉厥務迤東道恩慶永昌府知府宣世濤二員帶鑄匠四名并添帶煎匠二名剋日馳驛起程得旨知道了此一試兩處之弊皆明白矣○是日起

上以孟冬享

太廟齋戒三日（丁亥）

孝敬憲皇后忌辰遣官祭

泰陵○諭步軍統領衙門奏據原任員外郎楊樞中書李瀚呈稱山東鹽運使指伊等故父之名令其承辦南路鹽引無力承充求免認辦等語此案前經長麟穆騰額具奏山東行運南引每多竭蹶請將當商李岱源楊伯儒接辦原係就該處情形通融籌辦是以部覆上時暫予准行並非令紛紛派累致啟僉商

弊端今既據楊樞李瀚呈稱伊等之父物故後家道零落不能承充事關運課行銷是否係實在情形必須徹底查辦如楊樞李瀚家道豐盈有心推諉自應仍令充當治以捏飾之罪倘楊樞等實係無力行銷亦未便令其領運致誤引課而滋僉商流弊著派伊齡阿帶同楊樞由驛前往山東就近傳集李瀚會同長麟穆騰額秉公查辦具奏○諭軍機大臣曰李世傑奏維州協副將那蘇圖所領屯練五百名前經鄂輝奏明暫留鑪城相機減微現准慶麟咨送摺稿內稱列子地方有賊千餘人接續過河來近薩喀賊既渡河而來自必尚需兵力已飭該副將將所帶屯練即於打箭鑪駐劄一俟得有實信如果無庸前往再行遣回較為妥協等語所辦甚是正與朕旨相合其糧石一切此時自未便一律轉輸致滋糜費該督就近隨時探聽審度情形如有需用之處再加緊運供無虞缺乏辦理

輕重得宜既不致稍涉張皇亦不致臨時貽誤諸凡妥當之極從前慶麟等不將該處情形咨會內地以致該督不得確信難於豫籌妥備今慶麟等已將摺稿隨時咨送川省距彼較近該督係能事之人早得信息自更可相機妥辦以副委任也○戶部議覆兩江總督書麟江南河道總督李奉翰漕運總督毓奇奏稱淮關捐造撥船各事宜一船身長四丈五尺寬九尺二寸板厚一寸三分并一切料物工價每隻共需銀一百六十六兩零船三百隻銀五萬兩委裏河外河同知淮安府軍捕通判每員造一百隻完竣查驗毋得偷減草率一某廳承造之船即以某字編號自一號至一百號并書船戶姓名其船戶召募誠實者各給腰牌交河廳與清河縣分管起撥時頭工水手令船戶雇覓每隻以三名為率一頭工一水手二并船戶各日給工食銀七分每船月需銀八兩四錢運料時出自運

員撥漕時出自旗丁俱免議動錢糧惟油艙零費每船每年需銀六兩共一千八百兩又每船小修銀十五兩大修銀三十兩按五年攤算每年需銀二千七百兩通計共四千五百兩請照東省之例在司庫借撥銀五萬兩交兩淮商人一分生息每年可得銀六千兩除用贖銀一千五百兩存河道庫內遇有風損即動此項官辦再借司庫銀四萬兩一併交商營運十年可得銀四萬八千兩即將本銀九萬兩歸款而以息銀四萬八千兩作本生息永資經費一該船應飭承管廳員督率船戶小心撐駕些小滲漏隨時粘補如有逃拐情事令船戶出結地隣賠繳如無力完交令該管官代賠一逢運漕之時如需裝料應仍雇用民船請嗣後祇准將裝五百石以內之船照民價雇用其五百石以上載貨船隻均不得雇用即飭淮揚等道並廳員等稽查毋使胥役仍前混行封固索詐以裕商稅均

應如所請從之○戊子諭曰海寧泰山西大同朔平三府屬上年被旱成災收成歉薄今歲雖獲有收若將新舊錢糧並出借穀石一併催徵民力恐有未逮等語大同朔平二府上年被旱成災收成歉薄屢加賑卹蠲緩兼施並酌借口糧籽種以資耕作本年秋禾成熟本應一律徵收但念該處甫當災歉之餘其新舊錢糧及所借穀石為數較多若同時輸將民力恐不免拮据所有大同朔平二府屬豐鎮左雲右玉等十一廳州縣新舊應徵並出借籽種共銀十九萬三千四百七十餘兩穀豆二十一萬二千二百餘石俱著加恩分作兩年徵收以紓民力又各廳州縣尚有應行買補平糶穀六萬六千七百四十餘石亦著分作兩年買補俾民間易於完納蓋藏益資寬裕該部即遵諭行○是月欽差大學士公阿桂工部侍郎德成湖廣總督畢沅奏荊州滿城營房應新蓋一千五百三十四間

添料補蓋者一千五百三十一間量加粘補者三千五十七間補築院牆者一千六百七十間並補砌門樓三千八百九十六座又築牆湊長二萬三千三百七十六丈共估銀十二萬二千九百八十二兩零又辦事公所並演武廳步營堆撥房一百七十五間內新蓋補料砌牆揭瓦並院牆湊長共估銀四千九百五十三兩零均請動項官修至協領等各衙署應建蓋粘補者計一千十五間共估銀三萬九百七十三兩零雖俱經邀恩賞俸一年而被衝之重輕不一扣還之多寡不齊請將協領應扣之三千兩即於該十員中攤扣佐領應扣之一萬一千兩即於該四十六員中攤扣防禦驍騎校俱照此辦理惟筆帖式每年得俸二十一兩尚不及披甲錢糧該三員衙署共需費四百六十二兩零請照兵丁恩賞免其扣還其將軍副都統衙署業奉旨借項興修地方文武衙署亦先予借項於廉

俸扣還。又倉廩監獄已據革職。知府俞大猷知縣屈振甲呈請賠修。均毋庸估計。得旨。如所議行。又奏荊州旗民疊蒙賞賑。兼施房屋漸次修理。現俱寧輯安居。元氣可復。至應修城垣。查明衝坍無存。並閃姓應補砌者四十七段。惟小北門迤東西門迤南兩處。坍入護城河內。根基不固。擬向裏收築。餘仍照舊址。又城身臨近護城河者。應包砌磚石泊岸九段。又西門水洞衝刷寬深。擬改為水津門外。用開板并門臺門樓。應補砌九座。共估銀二十萬。由臣德成詳覈。開具做法清冊。移交臣畢沅照辦。報聞。○福建巡撫徐嗣曾奏。臺灣內山各社生番。於八月上旬到郡。共計頭目四名。番目二十六名。通事四名。社丁八名。委在臺辦事福州同知楊紹裘帶同義民首曾中立、黃奠邦、張維光、葉培英、王松護送。於八月二十八日自鹿耳門登舟。候風約十二月望前可以抵京。報聞。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十三

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十四

監修總裁官經筵講官太子太傅文淵閣大學士文淵閣領閣事領侍衛內大臣侍衛處管理

吏部理藩院事務正黃旗滿洲都統世襲騎都尉軍功加七級隨帶加一級尋常加級軍功紀錄次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十三年戊申冬十月己丑朔享

太廟。

上親詣行禮遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。○頒乾隆五十四年時憲

書。○順天府行鄉飲酒禮。○諭曰劉綦奏宣

化府屬蔚州北門子等九十九村。西寧縣石

寶莊四十村懷安縣西陽河等十五村。於八

月初旬雨中帶雹。田禾間有折損。未能一律

成熟等語。蔚州。西寧懷安。三州縣所屬村莊

田禾被雹受傷。雖係一邑中之一隅。不至成

災。但念該處上年甫經受旱。今秋又復被雹。

收成歉薄。若將新舊錢糧一例催徵。民力恐

未免拮据。所有該三州縣被雹之一百五十

四村莊。應徵新舊錢糧倉穀。俱著緩至次年

麥熟後徵收。以紓民力。仍著該督酌量情形。

借給口糧籽種。俾資接濟。該部遵諭即行。○

庚寅。

上御乾清門聽政。○諭軍機大臣曰。阿桂等奏

賞給綠營兵丁銀兩一摺。內稱兵丁等偶因猝被水災。房屋漂失。荷蒙格外體卹。懇求叩謝天恩等語。荊州此次被淹較重。兵民等蕩析離居。朕心為之惻然。惕然。特發給帑金。命阿桂前往。會同該督等詳悉查勘。加意撫綏。目下積水早已消涸。兵丁等經撫恤之後。即或元氣不能遽行全復。而一切居住房屋。自必逐漸修建。此時約有幾分光景。阿桂等亦當查明詳晰奏聞。及閱本日奏到各摺。俱係尋常覆奏。及代為謝恩之件。而於兵丁居住及生計情形。竟未敘及。豈不知朕軫念災區。無時或釋耶。著傳諭阿桂。即將荊州現在兵民房屋修建約有幾分。及輿情是否安輯之處。據實奏聞。以慰廑注。本日鑲藍旗將荊州送到之驍騎校觀布等。帶領引見。當令軍機大臣詢問一切。並著將原片發交阿桂閱看。至另摺奏詢據舒常。陳淮稱解員熊泗官冊履歷內開年五十六歲。與該員在閩省所供

年七十一歲之處不符。或係因諱竊餉鞘之案發覺。私自增添。希圖擬罪。名得以援例收贖等語。官冊履歷年歲止有以多報少。從無以少報多之事。即人之年貌亦係早衰者多。老健者少。一見無難立辨。若云熊泗希圖收贖。私增年歲。李侍堯等又何德於熊泗。而豫為之地步乎。即熊泗實年七十餘歲。在楚居官。恐以衰老勒休。隱瞞年歲。容或不免。然亦不過隱瞞四五歲。斷不能添至十六歲之多。且陳淮亦未見其人。即按冊派往也。所謂錯中錯。詐中詐矣。必係陳淮於派委時。並未親加驗看。僅照官冊點派。此等餉鞘要件。理應遴選強幹之員護解。方無貽誤。況軍餉尤關緊要。而楚省佐雜甚多。豈無年力富強可派之人。乃陳淮既不能慎派於前。又復支飾於後。其伎倆能於朕前弄巧耶。再近日屢據慶麟等奏報。後藏脅噶爾之圖已解。巴勒布賊衆退遁二站。後又有千餘名。由列子陸續

渡河。前至薩喀等語。看來賊衆無能。若竟退歸巢穴。轉難深入窮追。今乘其自來。正俟待我兵至。藏痛加殲戮。使之畏懼。乞降永靖邊隅。著將慶麟等近奏之摺。並所降諭旨。一併鈔寄阿桂閱看。將此由四百里傳諭知之。○以大理寺少卿蔣曰綸為光祿寺卿。○辛卯。諭軍機大臣等。前因阮惠等雖已讓出黎城。而嗣孫尚無消息。恐我兵撤回。阮惠等復乘虛攻搶。并將黎氏子孫全行戕害。反貽後患。諭令許世亨帶兵數千。直至黎城。督飭該國人衆。將首惡設法擒獲。以期一勞永逸。今據孫士毅奏。安南各廠現有起兵。隨同嗣孫第三弟黎維祇。來至諒山。會同潘啟德進剿之信。黎維祇現已出山。第該嗣孫潛匿已將一年。毫無展布。現雖糾聚該國義民。意圖恢復。其成敗尚未可知。孫士毅以各關隘官兵。與其駐劄本境。暗為黎氏糜費錢糧。並須內地兵力護送。嗣孫眷屬出境。不如建豎旗鼓。出

關進討。擣穴擒渠。所見甚正。孫士毅既胸有成竹。力肩鉅任。自請出關進剿。則此事竟交與該督一手承辦。庶呼應更靈。歲功自速。該處現有潘啟德等糾集人衆。立圖恢復。而陳名炳係攻打諒山之人。又已畏威投順。現又據富綱奏。都章保勝兩處土目均集兵聚糧。協同剿賊。可見該國人心尚思黎氏。今見總督親自督兵進剿。聲勢壯盛。自必更踴躍前驅。協同官兵直抵黎城。辦理更易集事。惟計日盼望。捷音速至耳。○又諭前經屢降諭旨。指示雅滿泰辦理口糧。原為豫備添兵之用。現在賊已陸續退去。無須調遣多兵。前藏辦出之糧。已數四月之用。雅滿泰豈無見聞。即此項糧石尚且不能用完。後藏更何須此許多糧畜。且後藏與薩喀相近。賊匪由脅噶爾撤退。復由列子前至薩喀。現在賊勢如何。該第巴等能否抵拒。理應詳悉奏聞。乃摺內並未聲敘。轉將添辦糧餉。及交給廓爾喀檄諭

煩瑣敎入抑何糊塗至此再仲巴呼圖克圖所稱不領價值亦因聞達賴喇嘛之言不得不照樣呈請然達賴喇嘛所辦糧石支用若干仍降旨照數給價仲巴呼圖克圖所辦糧畜豈有轉不給價之理總之內地兵丁赴藏如攜帶口糧用罄先儘前藏所辦之糧按日給發仍須節省倘前藏糧石又復漸次用完再將後藏此項存糧陸續接濟支用多少照數給價此時尚不必盡數採買雅滿泰何俱

未經見及著傳旨嚴行申飭並寄知鄂輝等於到藏時再向仲巴呼圖克圖等明白曉諭此事原為保護爾等即備辦兵丁糧餉仍係官給價值並非勒派辦理庶伊等無知之人不致稍有疑慮○壬辰

上御懋勤殿勾到湖廣情實罪犯停決斬犯十六人絞犯十三人餘八十二人予勾○諭據慶桂等奏奉天所屬等處自六月至七月霽雨屢降廣寧等七城被水成災五六分不等

應行賑濟豁免之處容另行查明辦理等語本年雨水過多奉天所屬廣寧等七城地方被災殊堪憫恤自應妥為接濟無致失所著交慶桂等查明被災人數應行酌借口糧蠲賑各事宜照例即行辦理但黑龍江偶被水災早經具奏何以慶桂等遲延至今始行查明具奏其應行賑濟之事尚未即辦理仍稱另行請旨更屬拘泥慶桂等著飭行○諭軍機大臣曰惠齡奏報襄河一帶水勢隄隘各

情形一摺內稱天門潛江二縣夏間被水田地先經查明俱已涸出補種秋糧現在天門縣被衝田地禾稻已經收割惟潛江一縣帶淹之感林黃景等垸秋後水涸甫經補種糧今復被水淹衝當即飛飭臬司李天培馳往督率地方官填築潰口酌量撫卹等語此次襄河水長雖已在寒露之後現在節過霜降水勢消退自必甚速第潛江一縣夏間曾經被水甫經補種秋糧又值襄河水漲復被

淹浸情殊可憫。著傳諭阿桂。畢沅於荊州事。畧定後。順道前赴潛江。會同詳悉查勘。該處積水是否業已疏通。其應如何酌加撫卹之處。一面奏聞。一面妥為辦理。以副朕軫念災區至意。又據畢沅等奏。安襄鄖道蕭應植。陡發風痰。請解任調理等語。蕭應植詳報患病。適當襄河水漲之際。該處一切查勘撫綏。正需人料理。恐蕭應植或係有心規避。藉詞捏飾。亦未可定。並著阿桂查明該員患病是否屬實。倘係藉病推諉。不准遽行回籍。應責令該員協同查勘被水各處。將應辦各事宜全行完竣。再准回籍。將此傳諭阿桂。畢沅。並諭惠齡知之。尋阿桂奏。潛江縣被水。隨漲隨消。惟補種莠麥。糧間復被淹。計成災不過一隅中之一隅。現在畢沅已赴該處查辦。又畢沅奏。蕭應植陡發風痰。詳請解任。係在襄河水漲以前。實無規避捏飾情事。均報聞。○又諭。征勦巴勒布賊番一事。川省距藏寫遠。派

給官兵口糧。勢不能多為裹帶。且從前藏內用兵時。於該處就近採買。具有成案。慶麟等於此事。初起時。並不仿照辦理。竟思將辦糧一事。諉諸內地。及經降旨訓飭。又不將給價採買之處。善為曉諭。惟知催令速辦。類於紛紛搜括。似此次派兵前往。非愛之而轉以累之。殊屬不曉事體。試思番衆等。如果知大兵赴藏。係為保護伊等起見。所有儲蓄。即應及早供輸。何待慶麟等分派。乃直至此時始行認辦。可見其貪利見小。並非出於情願。巴勒布不過么厖小醜。現已紛紛遠遁。大兵一到。即可剋期蕆事。豈有數月之久。尚不能完竣之理。現在官兵前往。既各有裹帶口糧。而前藏辦出稞麥。業可供三千官兵四月之用。昨據雅滿泰奏。於後藏辦糧一千二百石。計亦足數月餘。以賊匪情形而論。不特雅滿泰續備口糧。可以無需支發。即前藏所備稞麥。尚屬寬裕。鄂輝成德到彼後。務將勦殺賊匪各

事宜妥協速辦。雖不可將就了事。致徹兵後復生事端。然亦須通盤籌畫。總期於四五月之內。回至打箭鑪。不可因藏內現備糧石寬裕。多耽時日。以致唐古忒人等。供應日久。糧食告乏。漸至市價增昂。或生怨望。所聞甚要。鄂輝等均係特加委任之人。不可不善體此意。再現在赴藏之屯練降番等。俱係曾往臺灣勦賊之人。該屯番等由川省赴閩。所過州縣皆係內地各州縣等。因其勦賊出力。沿途寬為應付。如折給夫價等事。自所不免。而督撫等又以其遠涉隨征。量加犒賞。亦屬事之所有。計每人所得不下百金。此次赴藏。一出打箭鑪。俱係窮苦番地。於口糧之外。並無例外得項。該屯番等因赴臺灣獲利。而此次不能一律另有贏餘。或不肯出力。甚至藉端擾索。亦未可定。著傳諭鄂輝成德等。務當嚴行約束。恩威並用。勿任滋事。並著鄂輝張芝元向其明白曉諭。以上年前赴臺灣勦賊所經

俱係內地。不特屯番等各沾餘潤。即如鄂輝張芝元帶兵之員。得項亦較寬餘。現在前往西藏。所經多係番地。番衆貧苦。安能有例外供支。該屯番等惟當恪遵條約。仍前奮勇殺賊。迅速藏事。皇上自有重賞。不可因此未獲餘潤。稍生懈怠。至慶麟等於辦糧一事。雖節經嚴飭。並令善為曉諭。但恐慶麟等俱不曉事體之人。未能宣達朕意。已忠到彼後。務即向該處噶布倫及喇嘛唐古忒人等。剴切傳知。以慶麟等經理不善。業經降旨嚴飭。現又諭令帶兵大員。嚴約兵衆。勿許滋事。並趕緊辦竣。以免伊等多費供給。其所辦糧石。目下雖已豫備。將來大兵遄徵。已用之糧。照數給價。餘剩之糧。仍行給還。使知朕愛護伊等。曲加體恤。不肯稍有苦累之意。自必益懷感激。恭順。方為妥善。○癸巳。上御太和殿視朝。文武陞轉各官謝恩。○諭據全德奏。兩淮商人呈稱。本年楚省荊州被水。

隄塍衝漫該處為行銷淮鹽網地轉運所資情關休戚情願公捐銀一百萬兩稍助工賑之需請於運庫解部項下先行借支自來年已酉網起分五年帶納歸款等語荊州萬城隄潰決被淹早經發帑賑卹修築隄工城垣以資保障茲據該商等具呈懇請捐輸情詞懇切著照所請准其於運庫借支分年帶完歸款並著加恩交該鹽政查明捐輸各商送部照例議敘湖北為淮商銷鹽之地向有臣費陋例為數不貲今已清查嚴禁地方官吏不敢復行擾累商人等鹽引暢銷永免需索每年所省浮費較之此次公捐之數不啻倍蓰是以俯如所請至長蘆山東河東廣東浙江等處非兩淮可比若因淮商現在捐輸之舉紛紛籲請轉非朕體卹各商之意著傳知各該鹽政俱毋庸代為陳奏○甲午諭軍機大臣等前因惠齡奏襄河水漲潛江一帶又復被水淹衝當即降旨令阿桂等於荊州事

畧定後順道前往會同查勘今據阿桂奏荊州城工隄工查辦俱已完竣於九月二十七日啟程進京約計阿桂接奉前旨時業已在途如離潛江已遠該處查勘撫卹事宜有臬司李天培在彼辦理阿桂畢沅即可不必繞道前往若距潛江不過數站自應仍遵前旨會同畢沅馳抵該處查勘積水是否業已疏消其應如何酌加撫卹之處妥協辦理阿桂係歷經委任之人畢沅又係該省總督會同勘辦自覺更為周妥至阿桂等奏荊州修建關帝廟工程自應敬謹整理其廟內應用扁額對聯著畢沅查明殿宇寬窄將扁對尺寸開明具奏候朕親書發往摹勒懸掛將御筆即存貯供奉該處毋庸繳進將此各諭令知之○又諭福建水師提督員缺緊要前蔡攀龍在臺灣帶兵時曾諭令王柄暫行署理嗣因蔡攀龍難勝水師提督之任已另簡哈當阿補授將蔡攀龍降補狼山鎮總兵復將王

柄調壽春鎮總兵哈當阿未經到閩以前水師提督印務自仍係王柄署理第念此缺最為緊要王柄素日亦非熟習水師之員現在該鎮署理提篆是否勝任著李侍堯留心查察即行覆奏至閩省近年海洋盜風甚熾劫掠頻聞李侍堯到任後雖屢次拏獲多案嚴辦示懲但數月以來未據李侍堯奏報續有拏獲之案該省近日盜風是否漸戢並著李侍堯飭屬隨時留心查緝多拏匪犯務期洋面肅清勿因日久生懈為要至李侍堯前因左肩染患瘡疾奏明不能兼署撫篆業經諭令徐嗣曾即速內渡該撫未到以前令伊轍布暫行護理俾李侍堯得安心調攝嗣據李侍堯奏瘡疾業已出膿迄今已及旬月曾否療治平復調理復元朕心深為廕念並著將近日瘡疾情形若何據實具奏以慰廕注將此由六百里諭令知之即速回奏○又諭據鄂輝奏接准成德咨送慶麟摺稿內稱薩喀

地方現有賊人千餘是後藏尚未竣事現仍統領官兵加緊造行所辦尚是又據奏口外自裏塘以至西藏原有安設卡隘番兵查緝夾壩但路長兵少巡哨難周已面諭各土司再加派土兵來往稽查俟軍務完竣仍即裁減等語巴勒布賊番近已紛紛竄遁現雖又有千餘名渡河前至薩喀聞信數日又無聲息看來賊衆究屬無能不值大辦或鄂輝未到以前成德先已抵彼殲退賊衆收復地方亦未可定則鄂輝到彼不過設誓立界等事不特加派之土兵應早行裁減即鄂輝等帶往之滿漢屯番各兵亦毋庸在彼久駐蓋大兵駐藏日久既慮唐古忒人衆或致滋擾而內地源源輸運所費亦多彼此均有不便著再傳諭鄂輝等務遵前旨趕緊速辦祇須俟賊衆敗退所搶地方全行收復即可將派往官兵酌留數百名在彼彈壓其餘盡交穆克登阿張芝元先行分帶撤回成德或在彼幫

同鄂輝已忠辦理善後事宜或亦帶兵先回內地俱無不可至各土司添派土兵既為防守卡隘而設自應一體賞給錢糧俾得日食有資惟所奏俟軍務完竣再行裁減之處可以不必止須酌量情形俟大兵有撤退之信即可先行停撤又此項土兵據奏因糧餉軍火經行防護宜嚴是以加倍添辦查緝夾壩但賊衆無能斷無久延時日之理前後藏現貯口糧足敷五月之用其內地糧石更可無須續行運往徒滋勞費即軍火一項若與賊打仗持久自須隨時接濟今賊已退遁渡河者不過千餘無難勦辦所有各兵丁隨身裹帶火藥鉛彈等項儘數應用則口外一帶又何有糧餉軍火經行之處此項土兵現在應否尚須添設並著鄂輝李世傑悉心查酌據實具奏○乙未諭軍機大臣等巴勒布在後藏邊界滋擾兩月有餘今經喇嘛等前往講論遽行撤回自必因聞大兵將到心懷畏懼

遂借講和為名乘機逃遁將來大兵撤回安知不復潛出侵擾著傳諭鄂輝成德迅速趕赴後藏務遵前旨嚴行勦辦再定疆界以靖邊隅至賊衆無能現已紛紛退遁無須多兵勦捕鄂輝成德等親自帶往之兵出口已遠者自應仍聽帶往以壯聲威所有續調之兵出口未遠及在打箭鑪駐劄者概應撤回著鄂輝李世傑即酌量情形遵照辦理其鄂輝昨奏口外沿途安設卡隘之土兵更可無用竟當全撤著李世傑即一面裁撤一面知會鄂輝等查照至糧餉一項藏內採買儘數支用現在內地未運出口之糧石概可毋庸運送以節糜費又慶麟奏藏內駐防官兵明春即屆換防之期請於此次成德所帶綠營兵內照數酌留等語所奏尚屬可行現距明春不遠著即於成德帶往之綠營各兵內如數扣存存存彼防守以省往返之煩○又諭巴勒布賊匪無故侵犯藏界今據慶麟雅滿奏泰

薩嘉呼圖克圖等私自遣人說和。賊等即行退回。此事未可憑信。斷不可因此草率完事。慶麟一味畏怯。聞賊匪散去。欣喜過望。紛紛撤兵。實為非是。雅滿泰奏伊等私自說和。不足為憑。總俟賊匪悔罪投誠。再行妥辦等語。尚為近理。想鄂輝稍有主見。斷不似慶麟之一聞賊退。即思將就了局。不復前進。著傳諭鄂輝。成德伊等先後帶兵到藏。若賊衆仍在。通拉薩喀等處。務即儘力勦殺。收復聶拉木等處地方。再辦設誓定界等事。若賊衆已回部落。道路遙遠。亦可不必深抵賊巢。但於邊外扎營。張大聲勢。遵照前次屢降諭旨。妥協辦理。再行撤兵。至薩嘉呼圖克圖等遣人議和。其意雖未始不善。然亦應請示於達賴喇嘛。班禪額爾德尼會同遣人前往。藏內有達賴喇嘛。即第穆呼圖克圖。職分較大。尚不應私自出名。與外夷部落交接。況仲巴呼圖克圖。係班禪額爾德尼屬下之人。何得任意自

專若此。若在藏衆喇嘛均可與外夷部落私相往來。尚復成何事體。耶即和息一事。亦必須倚仗兵威。使賊震怖。方可永遠寧謐。如以心存懦怯。輒往議和。轉為賊人所輕。安能保其不復滋事。此次薩嘉呼圖克圖等究竟如何遣使立說之處。慶麟等摺內亦未聲敘。明晰。已忠到藏時。可即向仲巴呼圖克圖詳細問明。據實具奏。再合藏無知之輩。聞有議和一節。亦必共相喜悅。謂可無煩內地兵丁征勦伊等糧米亦可節省。已忠到彼。並當諭以薩嘉呼圖克圖等雖遣人兩處說和。斷不能久安長治。大皇帝特為保護爾等。不惜內地兵力。為一勞永逸之計。今爾等願草率完事。若賊匪續來侵犯。豈不更費周章。且內地兵丁已有旨令將軍大人等嚴行管束。斷不致稍有肆擾。即所用米糧。仍係照價發給。爾等更何所用其畏怯。將此明白曉示。務使該番衆等共知大義。勿存見小苟安之心。方為有

濟至慶麟摺內稱戴綱已載等拏獲賊匪二名。現已解送前藏。但巴勒布因何動兵之處。未據該戴綱等詢明。甚屬糊塗。著鄂輝等於賊匪解到時。即將巴勒布起釁緣由。明白審訊。遇便奏聞。○丙申。

上御懋勤殿。勾到江西安徽情實罪犯。停決江西斬犯十一人。絞犯九人。安徽斬犯八人。絞犯八人。餘五十二人。予勾。諭軍機大臣等。本年安徽徽州。安慶太平等府屬各州縣。田禾被水。致成偏災。江西省南昌。饒州。九江等府屬。秋禾被淹。成災。浙江省遂安。淳安。開化。西安等四縣。因江水陡長。猝被水災。又湖北省荊州。隄勝潰決。並武昌。江夏。潛江等三十六州縣。江河泛漲。田地房屋。多被淹浸。湖南省澱浦。華容等州縣。被水成災。節經降旨。分別賑濟。令該督撫等實力撫卹。毋使一夫失所。第念各該處被災地方。秋成失望。於明春青黃不接之時。民力恐不無拮据。是否應需。

展賑蠲緩。並此外勘不成災地畝。應否量予加恩。分別酌借口糧籽種之處。著傳諭陳用敷。何裕城。琅玕。畢沅。惠齡。浦霖。即行體察情形。據實覆奏。候朕於新正酌量加恩降旨。○丁酉。諭軍機大臣等。前因梁肯堂署理河南巡撫。直隸藩司現無熟手。是以諭令伍拉納速赴新任。將應辦之事。畧為料理。再來京陛見。昨據該撫奏於九月十二日自閩起程。直隸現無緊要應辦之事。梁肯堂尚可在豫署篆。著傳諭伍拉納接奉此旨。即先行來京陛見。以便詢問閩省諸務。豫省距京不遠。該撫俟陛見後。再赴新任。亦不為遲。以江西袁州協副將哈芬布為貴州鎮遠鎮總兵。戊戌。諭軍機大臣曰。鄂輝奏接准慶麟咨會。即將挑帶之兵。暫在巴塘停息。鄂輝仍酌帶弁兵一百餘名。兼程前進等語。所辦雖是。但此事昨據成德奏到。以仲巴呼圖克圖與薩嘉呼圖克圖。並不先行稟知。即私自差人議和。

其中有無別情。難以懸定。俟抵藏後。訊明賊情。嚴行酌辦。所奏頗有主見。乃本日鄂輝摺內。於講和一事。竟未提及。看來該將軍亦未免有將就完事之意。此則不可。已勒布賊衆擅敢侵犯藏界。業經內地派兵前往。若不示以兵威。任令紅帽喇嘛等私與議和。因而完結。則置達賴喇嘛班禪於何地。且賊衆無所畏懼。將來大兵全撤。設復潛來滋擾。勢必又煩紛紛徵調。成何事體。在慶麟等怯懦無能。方以賊衆說和。徹退為幸。而鄂輝等係特派之人。斷不可存此將就之見。朕非樂於用兵。不卹士卒。希圖多有斬獲。但賊既侵犯天朝邊界。若不加之懲創。何以安番衆而靖邊圉。此朕不得已之苦心。屢經降旨訓諭。鄂輝等豈尚不能仰體耶。現在賊衆雖已全撤。鄂輝等帶兵馳赴該處。若尚能趕上。將賊匪痛加殲戮。固屬甚善。倘賊去已遠。不值為窮追之計。亦應遵前旨。將已勒布附近邊界地方。奪

取一二處。使之震懾。乞降。再傳喚該頭目來營。令其設誓。定界方能藏事。況藏內採辦糧石。本可供三千官兵。四月口糧。今後起各兵已經全撤。而鄂輝等所帶之兵。又在已塘留駐。是鄂輝成德前後帶往之兵。合計不過一千數百名。不及一半。該處糧石已極充裕。鄂輝等即在邊界留駐。旬月亦無不可。總之此事既經發兵勘辦。務使賊匪畏懼。欽跡庶可一勞永逸。鄂輝等不可不遵照妥辦也。再已勒布在後藏滋擾。將近三月。薩嘉呼圖克圖等既可與之講和。何不及早辦理。乃直至此時始遣人前往。自必因官兵將到。借此聲勢。以為懾服之計。若果如此。尚不至於失體。倘竟有異詞。講解之處。則其不是尤大。並著巴忠到彼後。密行查訪。該喇嘛如何說。和情形先行據實具奏。又諭戶部奏浙江省乾隆五十二年額解桐油芽茶並顏料庫飯銀三百六十兩零。又附解部庫贖銀一千一百

二十兩零先據浙江巡撫咨報由布政使詳委歸安縣丞鄭俊業管解於五十二年九月初一日起程旋據經過江南許墅淮安宿遷各關呈報已於十月十一日內過關北上至今經年未見解到經戶部屢次行催經過地方各督撫迄今未據咨覆等語浙江額解桐油芽茶及顏料庫飯食部庫贖銀兩雖為數無多但係解京官物該縣丞鄭俊業自上年九月起程已於十月十一日經過許墅宿遷等關何以至今尚未解到即該委員途次或有事故及船隻失風等事各該地方官亦應隨時詳報安有委員運解官物一年之久尚未到京而沿途地方竟無下落各該督撫總不咨覆戶部之理計該委員行過宿遷關以北係經由江南山東直隸地方著傳諭劉戡書麟長麟閔鶚元即飭屬嚴查該委員鄭俊業是否在中途逗留有無別項事故並該地方官何以不行詳報之處即據實查叅

具奏至沿途經過地方各督撫屢經戶部咨催即應迅速查明該委員在何處延擱並因何滯遲緣由隨時具奏何以接到戶部四次咨文總未咨覆竟似付之不答並著各該督撫一併據實覆奏尋直隸總督劉戡奏遵查浙江委員鄭俊業並未來直是以戶部咨查未經咨覆兩江總督書麟奏據徐州府詳稱鄭俊業於乾隆五十二年十一月十五日行抵邳州該州縣督役逐程護送出境至山東嶧縣地方取有回照是該委員經過江南並無事故均報聞山東巡撫長麟奏各省解送官物向例由臨清關報明咨部浙江委員鄭俊業經戶部節次催查該關總以尚未過關詳報查該委員係山東濟寧州人隨飭該州赴該委員家確查訊據伊子鄭寶林供鄭俊業於上年九月裝船自浙江起運十一月行至嶧縣因天寒河凍雇車起旱又以缺乏盤費私行回家後因患病耽延至本年四月起

程到京寓居石頭街觀音寺運解官物尚在寺內存放查該委員私越小路繞道還家經過地方暨原籍知州漫無覺察均應查處臣未專咨覆部請一併交部議處至鄭俊業現在都中請就近飭交刑部拘查得旨覽又批何未即奏已就獲矣○又諭巴勒布無故侵擾藏地特調內地兵丁嚴行勒辦近聞薩嘉呼圖克圖與仲巴呼圖克圖私相約會遣人往賊營議和所辦甚屬錯謬況薩嘉呼圖克圖係紅帽喇嘛唐古忒等不達事理或因此議和一節心懷感激漸至信奉紅教侵奪黃教之權關係頗為緊要已有旨諭知巴忠於到藏後明白宣示今思西寧所屬蒙古人等亦係素奉黃教自應一體曉諭著將昨降諭旨鈔寄普福閱看即行遍為宣示伊等議論如何之處並著奏聞○已亥

上幸圓明園○諭昨頒賞直省督撫御筆仿李迪雞雛待飼圖墨刻各一分蓋因朕軫念民

依勤求撫字即雛哺之微寓牧民之旨是以特加摹勒普行頒賜非徒以幾餘游藝留情於繪事詩章僅令各督撫珍藏寶玩已也實欲督撫等體朕惠愛黎元之心時時以保赤為念遇有災賑事務實心經理勿忘小民嗷嗷待哺之情庶幾視民如子克稱父母斯民之責凡身膺民牧者並宜咸喻斯旨承宣德意方為仰副朕懷著各督撫於接奉後觸目警心勿僅視為尋常詩畫並照式多為摹刻遍及藩臬道府各州縣等俾咸知留心民瘼勉奏循良以期無負朕教誨勲拳至意將此通諭知之○又諭據慶麟奏照料班禪額爾德尼回至前藏接奉申飭諭旨稱伊已與雅滿泰商定仍赴扎什倫布地方後又接奉著雅滿泰前往後藏之旨雅滿泰即前往扎什倫布地方去訖今成德到彼令雅滿泰至前藏慶麟速往扎什倫布地方去等語慶麟竟屬病狂從前伊託辭照料班禪額爾德尼來

至前藏竟將後藏棄擲於一庸懦之仲已呼圖克圖矣。扎什倫布地方何可無大臣在彼。倘若班禪額爾德尼去後衆心散亂。扎什倫布地方被賊占據。更屬不成事體。曾經申飭慶麟慶麟並不認罪。膽敢在朕前詐稱伊曾言定仍欲前往扎什倫布地方等語。竟不成話。似此糊塗。尚敢在朕前取巧具奏。豈能逃朕洞鑒。慶麟著革去公爵。賞給頭等侍衛。仍留在彼協同雅滿泰辦事。効力贖罪。慶麟之世襲公爵著交該旗或揀選班第子嗣。或已祿之別子承襲。慶麟之子不必承襲。諭軍機大臣等。安南臣事天朝最稱恭順。向屆朝貢請封之期。俱係遣陪臣來京。將來該嗣孫黎維祁復國受封。自必照常請封。第思該國自阮惠等稱兵逐主。攻陷黎城。眷屬內投嗣孫奔避。國祚幾不可保。朕以其臣服年久。不忍見黎氏滅亡。特命該督傳檄安南。擒拏阮惠。並令孫士毅帶兵督同進剿。該國鎮目及

廠民義勇等聞內地聲罪致討。皆思滅阮扶黎。紛紛響應。大兵一到。即可全行恢復。是安南之得延宗祀危而獲安。全仗天朝兵力為主持。將來事定。請封非尋常朝貢可比。不必遣陪臣自應親身入朝。瞻覲行禮。以展其感戴。惓忱。至黎維祁被阮惠攻逼。即遠竄入山。及聞大兵進剿之信。尚不能憑仗聲威激勵義勇。而呈報該督文內。又有推固予奪。惟上所命之語。其識見闇弱。多慮遲疑之處。即此已可概見。若該嗣孫不甚踴躍。該督亦不必相強。致令生疑。或即令曾孫黎維詮前來瞻覲。倘黎維詮年歲幼小。不能遠行。即於該嗣孫兄弟內。如黎維祇者。遣令入京朝貢。亦無不可。庚子諭據譚尚忠奏琅璽井學歲貢袁晃年八十四歲。三場完竣。未經中式等語。袁晃年逾八旬。精神矍鑠。踴躍觀光。實為儒林嘉瑞。袁晃著加恩賞給舉人。准其一體會試。以示朕壽世作人嘉惠耆齡至意。

又諭曰古州鎮總兵馬詔蛟昨奏到秋收分數本日又奏請陞見兩日之內連遞二摺馬詔蛟自係專差一人齎遞故令差弁分日呈遞殊屬有心取巧前柴大紀曾有兩摺分日呈遞之事朕以其居心狡詐曾經明降諭旨由臺灣調回內地嗣緣勦捕生番仍令回任該鎮豈未閱過邸鈔乃復蹈柴大紀之故轍耶馬詔蛟著交部議處並嚴行申飭本年亦不准陞見著於明年十月內瞻覲 又諭曰

徐嗣曾奏據護臺灣道楊廷理稟報在嘉義平埔山邊將黃天養拏獲發交局員錢受椿審訊該員再四盤詰根究出莊天畏蹤跡即親帶丁役馳赴內山將莊天畏拏獲供係正月內逃入內山復經莊潭蕭然二犯引帶容留送至黃天養山麓內藏匿被獲請將窩留之莊潭蕭然擬斬立決莊天畏黃天養解京審辦等語莊天畏係莊大田之子被土兵勦散遁入內山前據福康安具奏訊問拏獲匪

犯雖供稱業被生番殺死所供究不足信仍應交該地方文武通行嚴緝以淨根株其黃天養一犯係為莊大田管種田畝之犯亦應一併飭拏務獲今徐嗣曾督飭各屬嚴密查拏楊廷理錢受椿俱能認真緝捕根究蹤跡將要犯按名拏獲實屬可嘉徐嗣曾楊廷理錢受椿均著交部從優議敘其莊天畏黃天養二犯即著該撫派委妥員小心解京審辦莊潭蕭然膽敢容留逆屬即與黨惡無異應

如該撫所擬即行處斬以示懲創 又諭據徐嗣曾奏柴大紀所奏正法及戮屍各犯內有許懷等三十五名本係誤拏經知縣陳良翼審屬良民據保釋放柴大紀以正法匪犯名數具奏在先逼迫該縣通報以符奏案茲因清查叛產犯屬查出許懷等至今尚在隨將許懷等覆加研訊委無從賊情事實之原保人等亦俱供證相符除已故之賴天足等十一名外已將許懷等二十四名概行省釋

前任知縣陳良翼扶同柴大紀混行通報依律擬斬監候等語。柴大紀自到諸羅後，恒怯畏蒞，每次奏報禦賊情形，妄稱俘馘多名，以掩其株守不前之罪。即義民兵丁緝獲匪犯，亦俱稱臨陣生擒，飾詞入告，種種詐妄不實。賣官婪索，已出情理之外。茲復查出許懷等三十五名，被兵民誤拏，尚在羈禁候訊。柴大紀先已開單具奏，混開正法七名，戮屍七名。及該縣陳良翼訊明實係良民，柴大紀必欲迴護原奏，按名正法，爭執再三。復令該縣扶同捏報，始准釋放。是柴大紀妄奏冒功，朦混迴護，幾令無辜良民數十人陷於重辟。情節尤為可惡。柴大紀已於前案正法，覈其所犯貪詐之罪，必須將伊子一併懲治。方蔽厥辜。從前甘省冒賑案內，因王亶望等贓私狼籍，拖累多人，釀成巨案，罪浮於法。是以查明伊等之子，發往伊犁。今柴大紀貽誤軍機，失陷地方，又復挾詐欺罔，拖累無辜，尤非王亶望

之止於貪婪玩法者可比。著將柴大紀之子查明發往伊犁，給與兵丁為奴，以示懲儆。餘著該部覈擬具奏。○諭軍機大臣曰：徐嗣曾奏現在臺灣尚有應辦事件，擬俟明年夏間奏請內渡，於萬壽節前趨赴陞見等語。前因李侍堯染患瘡疾，曾諭令該撫即行內渡，接管巡撫印務。今臺灣諸事業經辦有條，理即有未經辦竣者，想奎林不日即可到彼該撫自可面為交代，令其接手辦理。現在內地應辦事件，亦屬緊要，自當速回本任，不可再稽時日。至來京瞻覲，不妨稍緩，何必以此為要。耶將此諭令知之。又諭據孫士毅奏自悔奏請檄調官兵為日已遲，看來此遲未必非所以為速。邊關附近地方秋間雨水過多，道路不免阻滯。若早檄調官兵出關守候，亦不能進征。現屆十月中旬，該處晴霽日久，正可趁此時帶領官兵趨緊前進，實屬事機湊合。此即上年福康安統兵勦捕臺灣逆匪在大

擔門守風月餘。及至續調官兵齊集。由崇武澳放洋。一日直抵鹿仔港。成功迅速之明徵也。現在孫士毅檄調官兵。自己陸續到齊。即日會同許世亨統領出關。矧盼捷音速至。勉奏膚功。以期承受恩眷。又據秦風聞阮惠傳語。偽官吳初等。俟大兵出關。彼即親帶賊兵前赴黎城。協同抗拒等語。此必係阮惠聞大兵將至。恐吳初等畏怯。中懷反側。故為此語以安其心。賊人彼此相欺之言。全不足信。若果阮惠竟敢前至黎城抗拒。正可迎截擒拏。一舉全獲。我兵更為省力。轉屬極好機會也。至所請諭知暹羅國王。趁天兵進勦安南之時。就近占取廣南一節。初閱之似屬可行。及細思之。此為下策。從來撫馭外域之道。惟仗天朝威重。綏靖戢服。全不藉外域兵力。攸助。況暹羅本與阮惠等。彼此相攻。今若令其發兵占取廣南。將來安南事定後。自必將廣南一路。給與暹羅。現在以黎氏本國之人為亂。

尚至遷播流離。憑仗天朝兵力。始能復國。若暹羅復取廣南。與安南接壤。以一國兼併一國之力。更較阮惠倍蓰。設將來復行攻擾安南。勢益難支。又將如何辦理。且暹羅國王鄭華。仰邀封號。已屬格外恩施。亦不值令其無故益土。況天朝統馭中外。遐邇一體。廣南舊係占城地方。該國全境。為阮惠所得。止有一邑。為占城子姓居住。與其令暹羅坐獲廣南。何若即以占城舊地。還之占城。更為名正言順。該國當式微之際。得復國土。感戴天朝。則興滅繼絕之義。更為一舉兩得。俟安南事定後。孫士毅再當查明廣南地方。是否舊隸黎姓。抑係新為阮惠所得。據實奏聞。或給安南。或給占城之處。再行請旨酌量辦理。又據奏孫士毅帶兵出關後。請於巡撫藩司內。欽派一人在邊境督率辦理等語。孫永清在粵有年。熟悉該處情形。即著該撫於武關完竣後。前赴邊關。照料一切。其省城事務。暫交藩司。

英善料理。至安南嗣孫黎維祁現雖差人送信。但據阮時傑等稱該嗣孫現在藏匿春蘭社民人家內。跟隨只有三人。看來黎維祁竟係一無能為之人。將來孫士毅帶兵出關直抵黎城。與其俟該嗣孫籲請封號。莫若於攻克黎城後。即將黎維祁傳旨勅封國王。俾得及早復國。除現交內閣撰擬勅文。並令禮部鑄印。續行發往外。著孫士毅於抵黎城後。傳旨諭知該嗣孫。以天朝統領大兵。為該國力圖恢復。現在黎城已克。該嗣孫自應懇請封號。但念該國遭兵燹之後。若循例具奏請封。正須遣使納貢。該國瘡痍甫復。實難備辦。若即於此時冊封復國。既可省齎表納貢之勞。且定例天使冊封。其銜級較小。不如以天朝總督帶兵收復國都。即頒賜封號。聲威更重。尤足以鎮服人心。招徠離叛。如此詳悉曉諭。曲加體恤。該嗣孫自必益加感激。永思効順。至該國舊傳印信。被阮惠掠去。現已改鑄新

印。即將來尋獲舊印。不祥之物。亦不便行用。著即呈繳。送京銷燬。○又諭據雅滿泰奏薩喀一路與賊打仗情形。唐古忒兵尚能出力。現在成德帶兵已至前藏。雅滿泰趕回商議一切進兵事宜。亦稍能曉事。總之賊匪如因薩嘉呼圖克圖等議和。早經速遁。辦理較難。今列子等處尚有賊匪未退。我兵正可乘機攻勦。著傳諭鄂輝成德速往薩喀等處遵奉節次諭旨。痛加殲戮。俾賊衆膽寒。然後再辨定界等事。再從前聶拉木濟龍宗喀等處第巴並未拒賊。以致被擄。是以諭將三處第巴查明革退。脅噶爾第巴及唐古忒兵丁尚能竭力守禦。曾分別賞給銀緞。以示獎勵。今薩喀一路亦能打仗殺賊。並生擒賊匪一名。雖當賊已退敗之時。究屬奮勉。亦當加之鼓勵。著鄂輝成德查明此次打仗出力之人。仍照前例賞給俾益。踴躍從事。並將現在辦理情形迅速具奏。○辛丑諭據琅玕奏本年浙江

鄉試諸生中。年逾八十以上之貢生徐愛蓮。陳兆燠。附生劉方振。王震安。鄔宗望。宋佳玉等六名。俱三場完竣。未經中式等語。徐愛蓮等。年逾八旬。精神矍鑠。踴躍觀光。洵為藝林嘉瑞。徐愛蓮。陳兆燠。劉方振。王震安。鄔宗望。宋佳玉。俱著加恩賞給舉人一體會試。俾皓首窮經。得償夙願。用昭壽世。作人至意。○又諭健銳營安插金川番子等。於諸凡差使勤慎。在軍營亦甚奮勉。額設驍騎校一員。恐不

敷約束。著加恩添設防禦一員。驍騎校一員。分管番衆。以示獎勵。今日健銳營帶領引見擬正之賞戴藍翎領催彤錫。曾在金川軍營出力。即著補授防禦。擬陪之賞戴藍翎領催葉什木德爾濟。著補放驍騎校。新添驍騎校一缺。領催阿噶爾甲。在臺灣軍營實屬奮勉。著即補放。以示鼓勵。○諭軍機大臣等。前因巴勒布賊匪滋擾藏界。派兵進剿。動撥山西陝西銀各五十萬兩。復於楚省工賑餘銀。改

撥五十萬兩。一併解交川省。以備軍需。今賊匪業經敗退。大兵一到。剋日蕝功。續調之兵。昨已降旨停止。糧餉軍火等項。藏內儲備。及官兵隨帶者。亦已寬然有餘。俱毋庸內地續行運送。前撥軍需銀兩。為數較多。自屬有盈無絀。著傳諭李世傑。即將此項官兵赴藏。至將來凱旋時。撤回內地。約計應用軍需銀若干。分晰查明。據實覆奏。○又諭前據孫永清奏。分撥附近太平之潯州。梧州。柳州。三府屬

碾動倉穀三萬石。輓運寧明。太平。龍州一帶。分起交貯。以資隨時給放。並接孫士毅咨會。豫備賞給廠丁米三四萬石。接續運往。但前此內地檄調之兵。僅止四千。亦未據奏明出關。後如何料理。現在孫士毅續調廣東兵五千。又添調粵西兵一千。以八千名直擣黎城。二千名駐劄諒山。合之原調之兵。共有一萬。增至一倍有餘。現在該督帶領出關。即日進發。聲勢壯盛。自無難剋期蕝事。第兵行餉隨。

雖節據孫士毅與孫永清酌商俟該撫辦理武闡外場事竣即可赴邊關照料糧運各事宜其內地應辦糧餉自己寬為籌備但計大兵出關後需用糧食若就地採買則關外安南地方節年荒歉今歲秋間雨水過多收成自薄且廠民等尚須內地接濟糧食恐該處無可採辦至官軍裹帶糧食諒必無多若出關後直抵黎城內將阮惠一鼓成擒固屬甚善倘稍需時日裹帶之糧自必不敷而該處又難採買糧石自須從內地設法運往其如何運送及沿途安臺設站等事該督等曾否籌及何以未據奏明著傳諭孫士毅孫永清即將大兵出關後糧運一切事宜作何籌辦之處迅速具奏又諭據慶麟等奏薩嘉呼圖克圖等所遣喇嘛將賊匪遵議和息之信寄回即商同達賴喇嘛班第達令堪布第巴等前往立約所辦甚屬糊塗巴勒布本係無能小醜所以從前第穆呼圖克圖時曾以私

和完事慶麟雅滿泰等如果稍知事體當賊眾滋擾之初即將利害禍福嚴行曉諭使賊即行遠竄原不必與師大辦祇因慶麟雅滿泰俱未歷練毫無主見而達賴喇嘛等又一聞賊匪侵擾即至張皇無措以致輕調內地之兵今內地業經發兵前往理宜靜待兵至將賊匪痛加殲戮使其畏懼求和方可藏事乃因薩嘉呼圖克圖等私議和息即共深懼慶遣人惟恐不速殊屬非是前閱雅滿泰不准私和之奏朕方為其稍知大體今一抵前藏即與慶麟等扶同入奏可見伊等皆欲草草完事以圖塞責且達賴喇嘛遣堪布第巴等與賊講和究竟作何措詞或以婉言相勸或以大義訓飭奏內並未提及至所獲賊匪二名是否已解至前藏亦未據奏聞何至疎忽若此本日據巴忠奏稱薩嘉呼圖克圖或因藏內喇嘛懦弱先令巴勒布滋擾復欲以講和市恩斷不可受其籠絡仍當進兵嚴辦

等語所奏甚為合理朕早經洞鑒及此已屢降諭旨訓示況巴勒布賊匪一得薩嘉呼圖克圖之言即願遵照和息者自係聞知內地大兵將至正在畏懼退遁之時講和一節自所樂從但不大加懲創終非久長之計且薩嘉呼圖克圖紅教喇嘛恃此議和之功必思侵奪黃教之權而唐古忒人等愚昧無識私相感激漸至興起紅教所關尤為緊要今達賴喇嘛及合藏人等惟知苟且偷安獨不思

永遠寧謐之道乎且即欲講和亦當傳喚賊人頭目來營設誓今反聽從伊等之約遣人前往似此倒行逆施尚復成何事體著巴忠到彼將慶麟雅滿泰嚴行申飭外並傳集達賴喇嘛班第達噶布倫等將此旨明切宣諭此時鄂輝成德諒已先後抵藏務即速往薩喀遵照屢降諭旨乘賊匪未經全退痛加殲戮倘賊以講和為言該將軍等即示以侵犯天朝邊界為天討所必加我等奉命領兵惟

實錄卷千一百四

雷

知勦洗等語嚴切曉諭務使賊人恐懼乞命恭順求降然後再辦善後事宜或達賴喇嘛亦主和議以不必戰爭為請鄂輝等亦將利害所在剴切開導使知遠大之圖勿徂目前小利至合藏之人無不急思息事樂於議和者必因慮內地兵丁至彼或有擾累鄂輝成德更須約束兵丁申嚴禁令毋許私取藏地一物方為妥協再慶麟等奏事竣後聶拉木濟龍等處必須酌添唐古忒兵丁防守等語此等地方從前未始不設兵駐防特因平時並未操演以致一聞賊至即皆望風退避著傳諭巴忠將聶拉木濟龍宗喀三處第巴全行革退並派員解送至京倘達賴喇嘛向其乞恩亦無庸代為陳請至薩嘉呼圖克圖或有微露居功之意巴忠即以伊等私自遣人並不稟知大臣之非據理責之令其折服仍俟軍務告竣將一切應辦事宜會同鄂輝成德悉心籌畫以期衛藏寧帖永無後患○壬

寅諭曰。孫士毅奏廣西右江鎮總兵蒼保烟瘴俸滿。例應撤回內地。該鎮現在辦理邊防。請俟軍務完竣。再行撤回等語。蒼保著照該督所請。留辦邊防。俟軍務完竣。再行撤回。該部知道。諭軍機大臣曰。勒保奏此次年班伯克並土爾扈特和碩特等入覲來京。派委總兵副將沿途照料等語。年班伯克等來京入覲。沿途護送人員。最易滋生弊竇。前次該處護送來京之侍衛。曾有夾帶私玉之事。侍

衛等官既可不顧顏面。

聖

總兵副將豈盡可信。其無弊。惟視其人之自愛與否。並在該督查察嚴明。自可共知。畏懼著傳諭勒保嚴飭該總兵副將。加意小心。勿蹈前轍。即跟役人等尤易滋弊。更當嚴密防範。至該伯克跟隨回衆。入關時亦保無夾帶私玉等事。並著該署督一體飭屬密為留心查察。毋致滋擾。方為妥善。又諭前因孫士毅奏安南阮惠情形。似母需多兵勦捕。是以諭令許世亨帶兵三

千名前往。以壯聲勢。續據該督奏各關隘官兵與其駐劄本境。暗為黎氏糜費錢糧。並須內地兵力護送。嗣孫眷屬出境。不如建豎旗鼓。出關進討。擣穴擒渠。並自請於十月下旬帶兵一萬名出關督辦。所見甚正。當經降旨允准。想該督尚未接奉前旨。故有此奏。現在已屆十月中旬。孫士毅所調之兵。諒已陸續到齊。而該督節次所奏。皆合機宜。指日統率大兵出關進討。惟盼捷音之速。至孫士毅盈

當奮勉。受速藏功。以期仰承渥眷。至阮廷枚

情願會合附近土目等糾集兵衆攻取宣光

興化。不特可分賊勢。更足與粵西遙為聲援。富綱給與印諭鼓勵。並將黃文桐咨緝之處停銷。所辦皆是。但雲南廣西均與安南接壤。前令該二省於各關隘多派兵弁。以壯該國聲勢。今粵西一路既經孫士毅帶領大兵前進。而雲南一路若僅令該土目等自行出力。勦賊恐伊等見內地按兵不動。無所倚仗。又

不免如潘啟德等之心生觀望。是此時雲南一路亦不可不畧為前進。但富綱於辦理軍務不及烏大經之熟悉。該督止須於邊關一帶彈壓稽查。辦送糧餉。一得該國信息。隨時具奏。其進剿一事。著派烏大經帶兵三千名出關前進。並鼓勵土目人等齊心剿賊。若能長驅直入。與孫士毅一路會合。固屬甚善。倘道路遼遠。不能會合。亦足為犄角牽掣之勢。使首尾不暇相顧。成擒較易。烏大經當檄諭阮惠等。以孫總督現統大兵進剿。務在擒渠。一經拏獲。萬無生理。若能投至本提督軍前。束身歸命。尚可代為奏請貸其一綫。孫士毅此時惟當專意進討。倍加嚴厲。使阮惠等勢窮力蹙。別無生路可尋。庶接得烏大經檄諭。自必遵照來歸。更屬易於辦理。○又諭巴勒布賊番。無故侵擾後藏。前據慶麟等奏。由該處第巴等私扣稅課起釁。從前藏內補放噶布倫戴綱第巴等缺。及一切地方事務。皆由

達賴喇嘛噶布倫等辦理。欽差大臣全不留心經管。惟知崇奉達賴喇嘛。班禪額爾德尼。即第巴等有守土之職。其優劣亦概置不論。現在達賴喇嘛係一老誠之人。於辦事未能周妥。此後凡補放噶布倫戴綱第巴及交界地方加兵防守。訓練巡查等事。皆須由駐藏大臣經理。雅滿泰慶麟庸懦無能。即此次巴勒布一事。所辦俱多錯謬。將來巴忠回京後。該處不可無辦事之人。因思舒濂現為伊犁叅贊大臣。協辦將軍事務。彼處尚無緊要事件。舒濂雖係滿洲。不諳蒙古語。然在軍機處行走多年。尚能通曉藏事。今將舒濂調至藏內辦事。庶有裨益。其伊犁叅贊大臣員缺。候朕另行簡放。著傳諭舒濂接奉此旨。即迅速起程赴藏。並將此數日所降諭旨。鈔寄舒濂沿途閱看。俾悉該處現在情形。以便到藏後。遵循妥辦。至舒濂行抵四川巴忠已將自藏回京。如途次相遇。即細詢一切事宜。尤為有

益將來藏內諸事務須悉心管理凡屬下辦事人等以及綠營弁兵稽查管束不可不嚴亦不可任意苛刻以致人心離貳再雅滿泰慶麟糊塗雖屬相等雅滿泰尚未敢稍涉虛偽慶麟既不前赴後藏復敢巧詞飾奏前已降旨革去公爵賞給頭等侍衛猶不足以蔽辜舒濂至藏即著掌管欽差大臣關防令雅滿泰協辦事務仍傳旨慶麟在藍翎侍衛章京上行走以贖前愆舒濂惟當仰體朕意酌

實錄卷一千三百四

聖

一

定章程以期寬嚴適中永遠無弊使該處噶布倫第巴等不致仍前任意妄為方為不負任使○癸卯諭文淵文源等閣藏弄四庫全書上年派六阿哥八阿哥劉墉彭元瑞督同詳校官重加校正惟留空未補各函或因繕寫未竟或因算辦未完尚未歸函插架亟應予限嚴催毋任延緩所有武英殿國史館方畧館三通館繙書房承辦各種書籍著派八阿哥彭元瑞金簡會同該管總裁督飭纂修

謄錄等上緊趕辦其四庫館應辦各書現在該館已徹即交武英殿辦理應用繕書之費在於議敘謄錄等罰交項下按數支用惟各館分投趕辦稽察為難並著軍機大臣定立限期隨時查覈以期迅速完竣○又諭曰舒濂現今調藏所遺伊犁叅贊員缺理宜另放但此際不得人恒瑞先在臺灣獲罪雖冒奏添兵究竟為公事起見尚可寬宥著加恩賞給恒瑞副都統職銜作為伊犁叅贊幫同保

實錄卷一千三百四

聖

一

寧辦事○調吉林將軍都爾嘉為盛京將軍黑龍江將軍恒秀為吉林將軍以綏遠城將軍嵩椿西安將軍興兆對調以山海關副都統琳寧為黑龍江將軍以藍翎侍衛海祿為山海關副都統旌表守正捐軀山東鄒平縣民李昆子妹李氏

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十四

實錄卷一千三百十四

聖

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十五

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官經筵講官太子太傅文華殿大學士文淵閣領閣事務稽察欽奉 上諭事件處管理刑部戶部主事等

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十三年戊申十月甲辰

上還宮○乙巳諭塔爾巴哈台乃邊遠之地邊
卡外皆屬哈薩克等游牧務得通曉夷情經
練新疆事務之領隊大臣庶於一切巡查有
益盛任由文職歷經外任恐尚不能相宜庫
爾喀喇烏蘇本屬事簡著通福保調補塔爾
巴哈台領隊大臣所遺員缺著盛任調補○
大學士等議准欽差大學士公阿桂湖廣總
督畢沅條奏荊州臨江隄塍各事宜一歲修
萬城隄責成大員經理每年秋汛後令荊州

水利同知會同江陵縣將應修處所勘估造冊送荊州府並荊宜施道覆勘後移咨藩司借項興修於次年攤徵歸款如銀數在五百兩以下仍令民修該道府妥查督辦每年奏銷後令藩司親往查勘督撫於春汛前復輪往查看一歲修隄塍定限保固十年限內衝潰即將承修人員叅處仍將補築夫工等銀著追一隄面隄身應照現定丈尺加高培厚一歲修工程募雇人夫令該同知親身督辦該道府隨時密查如假手家丁書役叅究一萬城大隄估需銀五百兩以上先於司庫借給應令該督豫籌報部仍將次年攤徵歸款細數送部查覈一萬城隄工向係民修今工在五百兩以上准借項官辦仍應攤徵歸款恐地方官吏加派滋弊應令公舉誠練紳耆三四人專司銀錢冊檔一新築石磯隨時修補責成該道府同知按年查勘冊蠶即行報修並將窖金洲萌長蘆根創盡不許民人居

住一每隄五百丈設隄長圩甲各四名立卡住宿如有權洞蟻穴報明補修汛漲時多備守水器具協同民人防護該道府親往巡查水利官防護不力糾叅一隄上民房令該府縣出示概行遷居其沙市稠密處所民房俟傾倒時報地方官察勘無礙隄面處所蓋造隄外龍尾等洲民築土堰有礙漲水流行應概創毀一隄工自逍遙湖至玉路口令江陵縣縣丞管自玉路口至黃家場令沙市巡檢管自黃家場至拖茅埠令郝穴巡檢管遇防汛等事就近督辦一荊州同知向係選缺今將萬城大隄責成專管請改調缺在外揀題並將衙署移建隄所均應如所請從之○以告退奉恩將軍成翰子彬宴襲職○丙午諭據李奉翰奏清口惠濟祠天后神廟歲時報祭未著祀典請一體頒發祭文於春秋二季致祭等語前因派往臺灣官兵渡洋穩順仰庇

神麻特於

天后封號上加顯神贊順四字。並令在涓州本藉祠宇。春秋致祭。以彰靈感。今清口惠濟祠供奉。

天后神像。屢著顯應。本年河流順軌。運道深通。自應一體特著明禋。以光祀典。著交翰林院撰擬祭文發往。於春秋二季。令地方官虔誠致祭。並著李奉翰將新加封號四字。敬謹增入。

神牌。俾河工永慶安瀾。益昭靈貺。諭軍機大臣曰。成德奏九月二十二日抵藏。將喇嘛私自與巴勒布講和一事。細詢慶麟等。並與達賴喇嘛詳加講論。隨會同商酌。將差去之堪布喇嘛等趕回。不必前往。現在天氣晴暖。即酌籌進剿等語。與朕節次諭旨相合。所見甚正。可嘉之至。巴勒布賊匪膽敢侵犯後藏邊界。若聞大兵將到。即聞風遠竄。轉不能痛加殲戮。使之畏懼。今因喇嘛等私自差

人講和。賊衆在邊境聽候。成德到彼。即將差

往講和之人徹回。賊匪無從得信。自必在彼等候觀望。成德統率大兵。乘其不備。正可奮力勦撲。多有斬獲。此亦似遲而實速之極。好機會。計鄂輝此時亦已抵藏。該將軍等務當益加勉力妥辦。以副委任。至薩嘉呼圖克圖等。私自差人說和。慶麟等接到喇嘛呈報。並不嚴行駁飭。即同公班第達。告知達賴喇嘛。差人前往。糊塗已極。豈待伊二人之自言。今

成德抵藏後。將達賴喇嘛所差之人趕回。此係成德之意。與伊二人何涉。乃覲顏附銜具奏。並稱慶麟隨先馳往後藏。將派撥防守事務。妥為料理。尤屬無味之極。現在鄂輝。成德已先後抵藏。所有勦捕及一切事務。著專交鄂輝。成德辦理。俟已忠到彼。再會同商辦。毋許雅滿泰。慶麟二人攬越其事。如雅滿泰。慶麟。以此事不令伊二人辦理。遂思從中掣肘。恐不能當此重戾也。又成德摺內稱據公班

第達稱。後藏一帶天寒甚早。恐後雪大封山。官兵不能前進等語。前因公班第達在藏辦事日久。於該處情形。自較熟悉。是以諭令慶麟等。諸事與之商酌。今閱其告知成德之語。竟係一怯懦無能之人。不過以雪大為詞。阻止官兵進剿。希圖說和。將就完事。所言全不足信。試思如此。將就完事。賊若再來。又如何辦。著傳諭鄂輝等。嗣後一切須堅持主見。妥辦。不必再向班第達會商也。至雅滿泰等。前奏拏獲賊匪二名。係八月二十八日之事。乃遲至九月二十五日。成德發摺時。尚未解到。前藏可見雅滿泰慶麟全不以事為事。於拏獲匪犯。竟聽該處第巴等任意耽延。並不催令速解。訊問情形。具奏實屬怠緩。已極。雅滿泰慶麟二無用物。著傳旨嚴行申飭。並著成德。即傳該第巴。面加嚴飭。並將拏獲解到之犯。隔別研訊。確供具奏。如有緊要情節。即一面具奏。一面將該二犯。派委妥員。嚴行分別

管解。並於藏內遴選諳曉巴勒布語之通事一名。一併妥速送京。以備訊問。再薩嘉呼圖克圖等。差人私下與賊眾說和時。究竟如何措詞。是否以大兵將到。聲勢恐嚇。賊眾因而畏懼聽從。抑竟有異詞。說合之處。及此次達賴喇嘛所遣往之堪布等。雖已趕回。但差往用何言辭說和。並著已忠到彼。後務遵前旨。會同鄂輝成德。詳查據實具奏。此時成德早已帶兵馳赴聶拉木等處。而鄂輝亦指日可到。諒巴勒布公庸小醜。一經官兵會剿。無難剋期蕲事。惟佇盼捷音之速至耳。並著賞給成德小荷包一個。將此由六百里加緊各傳諭知之。予湖北江水淹斃署沔陽州州同婁業耀。佐領巴林布。防禦雙保。賞卹如例。丁未諭。前據孫士毅奏。安南國因土酋阮岳等搆亂。該國王黎維禘將舊傳印信遺失。嗣因黎維禘病故。嗣孫黎維祁避居在外。未有確信。是以尚未冊封補給。現據查奏黎維祁

在該國良才縣地方招集義兵以圖恢復並有旨令孫士毅由廣西一路親統大兵直抵黎城烏大經帶領弁兵由雲南蒙自一路進剿夾攻官兵一到自當將阮惠黨羽剋日擒獲安南臣事本朝最為恭順將來事定後即當冊封黎維祁為安南國王所有該國補給印信及冊封勅文著該衙門豫行撰擬鑄造俟孫士毅等奏報捷音到日即行發往其該國舊印即使將來尋獲但業因內訌遺失即

屬該國不祥之物應令送部查銷又諭據圖薩布奏本年廣東鄉試諸生中年躋九十之羅舜臣吳相江鳳鳴陳鳳翔三場完竣未經中式又據李慶棠奏本年貴州鄉試諸生內有游鑑乾朱錦雲胡之寧年登八十三場完竣俱未中式等語該生等皓首窮經精神矍鑠踴躍觀光洵為藝林嘉瑞羅舜臣吳相江鳳鳴陳鳳翔游鑑乾朱錦雲胡之寧俱著加恩賞給舉人一體會試用昭壽世作人至

意又諭曰嵩椿節次所罰公俸事件俱係私罪其將軍都統職任內所罰之俸尚屬因公今又將伊調補西安將軍著加恩將嵩椿所罰二十三年職任俸概行寬免諭軍機大臣曰鄂輝奏接准成德咨會知聶拉木等處尚須勦捕隨咨行佛智穆克登阿帶兵進進又副將哈豐阿所帶漢兵三百名亦令管領前往等語同日又據李世傑奏賊番聞風破膽官兵自可無庸進發已飛咨鄂輝審度

情形就近撤回等語此項後起官兵鄂輝既檄令前進而李世傑又令就近撤回所奏互異豈不使官兵等無所適從疲於奔走計後起兵丁出口未遠李世傑駐劄打箭鑪相距較近此事竟著交該督察看情形如各官兵接到鄂輝檄調之信已經前往竟聽其進發以壯軍威亦無不可若各官兵因接到李世傑停止之信已經轉回該督即令其各歸營伍雖續得有鄂輝檄調之信亦不必復令前

進徒滋勞費。鄂輝成德所帶官兵共有二千餘名。而賊匪又已紛紛退遁。所有德爾格爾。豫備土兵。亦可不必調用矣。至此事因該處喇嘛噶布倫。唐古忒人等。識見庸鄙。不諳大體。而慶麟等。又怯懦無用。種種乖謬。思之實增煩懣。已勒布侵犯後藏邊界。該處喇嘛。如果能與之以理講解。從前曾辦有成案。慶麟等。即應早為妥辦。或慶麟等不敢擅專。亦何妨將仿照籌辦緣由。據實奏聞。乃於此事初起時。並不詳加斟酌。輒一面具奏。一面檄調內地官兵前往。及大兵將到。又任令喇嘛等私自說和。試思天朝大兵。不遠數千里赴藏。剿賊。若因喇嘛等與賊說和。徒手而回。豈不師出無名。且大兵撤後。設賊匪又乘間滋擾。仍須紛紛檄調。不但官兵跋涉為勞。兼使賊番等無所畏懼。愈滋其輕忽之心。况大兵既往。因講和議撤。則將來喇嘛等亦覺進退操縱。可以專主。尚復何事不可為。而駐藏大臣

幾為虛設矣。總之此事內地派往官兵。朕原為保護達賴喇嘛班禪及愛惠衆唐古忒等起見。乃慶麟等辦理不善。於糧運一節。始則諉諸內地。繼則勸令該處趕緊備辦。又不將給予價值之處。明白宣示。以致喇嘛噶布倫等。見小畏難。竟似慮內地官兵前往。需其供給。不免擾累。意存將就完事。不欲官兵進剿。昨成德奏。班第達以早寒雪大。難以進討。為詞。已可概見。殊失朕始終保全愛護衛藏之至意。著已忠到彼後。會同鄂輝等。將慶麟等節次辦理錯誤。及朕派兵赴藏。為保護伊等緣由。向喇嘛唐古忒等。明白開示。俾咸喻朕意。倍加感激。方為妥善。再藏內人衆。素性多疑。昨有旨以班第達怯懦。無能。諭令鄂輝等。諸事不必與之商酌。但伊見內地派往大臣。置之不理。又未免心生疑慮。著再傳諭鄂輝等。於籌辦一切。惟須內持定見。不為浮言所惑。仍不妨與之講論。俾免猜疑。想該將軍等

自能仰體朕懷妥協辦理也。戊申諭據勒保奏甘肅各屬秋禾分數通計收成八分有餘。內惟平涼等八州縣間有被雹被旱之處。又平羅一縣瀕河地畝間被水漲淹浸。委員查勘俱不成災。惟收成未免歉薄等語。平涼等州縣本年夏秋以來間被雹旱漫水。雖不致成災。但田禾未免受傷。收成稍為歉薄。民力不無拮据。著加恩將平涼華亭武威平番古浪皋蘭金縣狄道平羅九州縣本年應徵

正借銀糧及舊欠銀糧草束俱緩至來歲徵收。俾從容完納。以紓民力。仍著該署督於今年明春察看情形。如有缺籽乏食者酌量借給接濟。以示朕惠愛邊黎格外體卹至意。該部遵諭速行。又諭本年湖北荊州等屬被災較重。現據畢沅等查明災分輕重情形。分晰具奏。所有荊州漢陽宜昌武昌安陸各府所屬州縣成災至九分十分者著將乾隆五十三年應徵錢糧加恩蠲免。其成災六七八

分者著交該部查照該督等原奏於應行緩徵定限分年帶徵之外再酌為遞緩寬限一季帶徵。以示格外體恤。餘著該部妥議具奏。諭軍機大臣等據劉湄奏查勘南運河水勢一摺。內稱現在水勢與春夏迥異。滄州以北河流深通向無古淺。即滄州以南經今夏挑挖之後漳水漲發又值秋霖甚足。至今長河中泓水深七八尺。至丈餘不等。現今水勢深廣人力難施。俟消落後即剋期興工等語。

前因直隸運河古淺處所甚多曾諭令該督認真挑辦。今劉湄又稱水勢深廣現在不能興工。若此時於水中撈挖轉為工員藉端冒銷地步殊難稽覈。是否俟水退時仍須辦理。抑係業已深通毋庸挑濬。俟明春水淺之時再行認真挑濬以利漕運之處著傳諭劉湄即查勘情形逐段測量悉心籌酌具奏。尋奏南運河地處下游今夏漳水漲發雨水充足淤沙本無停阻俟明春逐段測探水尚足用。

自可緩挑。倘消落出有橫淺。無論新舊。即趕緊挑濬。現在水勢既充。應請緩挑。得旨。覽又批。此是奉旨。非請。若請乃出於己意。所到肯用心乎。又諭。據畢沅奏。勘定各屬災分輕重。應行辦理各事宜一摺。已明降諭旨。分別加恩。並交該部詳悉議奏矣。惟摺內稱。應賑各州縣。初賑銀兩。按數於十月內一律散給。以後按分加賑。所有五十三年錢糧。照伊災分循例蠲免。分年帶徵等語。各屬被災地方。錢糧應緩徵者。例須帶徵。該督摺內既稱循例蠲免。何以復稱分年帶徵。所奏殊未明晰。著傳諭畢沅。將此一節詳細查明。分晰具奏。又另片奏。稱荊州窖金洲。係蕭姓買自王齊葉張楊五姓。該五姓並非江陵縣人。俱籍隸石首。已飭提究訊等語。窖金洲。係江陵縣地面。以本縣人而買本縣之地。尚屬近理。該五姓既籍隸石首。豈有非本處人而占隔縣江中漲沙之理。前因蕭姓私占洲地。種植蘆葦。

又復每年培植。逐漸加增。以致漲沙日長。壅遏江流。為數萬生靈之害。若非趁此時亟為剷去。勢必愈占愈增。必致全城俱難保固。蕭姓牟利。釀災情節可惡。是以將其財產查抄。為該郡工賑之用。並交部治罪。以示炯戒。至所稱買自王齊葉張楊五姓之處。自係蕭姓因獲罪甚重。藉詞扳引異籍之人。以為卸罪地步。即其呈出契紙等項。亦恐係假捏。難以憑信。畢沅係曉事之人。何以被其所愚。該督祇須再向蕭姓嚴切根究。務期確實。不得任其展轉牽連。徒滋拖累。此中弊竇已久。該督務宜悉心詳查。勿為蕭姓狡飾之詞所惑。以轉致波及無辜也。將此由五百里諭令知之。仍即據實覆奏。軍機大臣議覆。四川總督李世傑奏。稱酌定運藏糧石腳價。每米一石。用牛馬一隻。每站給銀一錢六分。每二隻給夫一名。每名每站照臺費舊例折給口糧一分。計每米一石。自鑪直運至藏。需銀二十六

兩八錢零查所定運腳較節年辦過例案大為減省。又稱運送餉鞘軍火裝械等差。每牛馬一頭需夫一名照料。較之照例設站亦屬節省。均應如該督所奏。惟查藏內既有慶麟等所辦糧食。且官兵赴藏。各有裹帶口糧。其藏事撤回。是否將藏內餘米量為裹帶。此項米石是否豫備接濟沿途不敷之用。抑或因察木多等處採買不敷。必須內地接濟之處。原摺均未詳晰聲明。請交該督查明覆奏。得旨依議。已勒布賊匪易於勦辦。目下即可竣事。且藏內備辦糧石充裕。原毋庸須內地多運米石接濟。所有運送出口米四千餘石。自係豫備沿途支食之用。但官兵赴藏。各有裹帶口糧。自應覈計裹帶糧食若干。足敷幾日支食。足至何處。若自打箭爐裹帶之糧。是計日到藏之數。則藏地已有慶麟等所辦之糧。足敷三千兵四月之用。又何用自打箭爐運至藏乎。且此項米石。是否運至察木多及已塘

裏塘等處存貯。抑係自鑪直運至藏。該督摺內均未聲敘明晰。著交該督再逐一查明。迅速覆奏。尋奏前後藏所備糧食充盈。即官兵撤回時。餘剩之糧。儘敷裹帶。無庸內地運供。所有運送出口米四千餘石。本係豫備官兵沿途裹帶之用。內惟察木多距藏尚遠。中有拉里一臺。酌撥米數百石。俾資接濟。餘俱分貯裏塘。已塘察木多三處。以備官兵往返按站供支。並未運交西藏。前摺所稱自鑪直運西藏。係合計運價而言。並非實有運藏之米。報聞。以貴州餘慶縣屬九品土官楊昭子報廷襲職。已酉。上御乾清門聽政。諭前據戶部奏。浙江省乾隆五十二年額解桐油茅茶並顏料庫飯銀及附解部庫贖銀兩共一千四百八十餘兩。先據浙江巡撫咨報。由布政使詳委歸安縣縣丞鄭俊業管解。於五十二年九月起程。十一月過宿遷關。至今未見解到。經戶部四

次行催經過沿途各督撫亦未據隨時具覆等語。當經降旨諭令直隸山東督撫查明委員在何處遲延據實覆奏。本日又據戶部奏該解員現經巡捕營會同該城拏獲。訊據供稱於四月內到京所解銀兩已在途次花消。桐油亦經賣用。現惟有芽茶五十餘簍寄存長新店李姓店內。請將鄭俊業革職交刑部嚴審等語。鄭俊業管解官物銀兩乃敢中途將桐油售賣。連所解銀兩盡行花用。殊出情理之外。鄭俊業著革職交軍機大臣會同刑部嚴審定擬具奏。至各省解送官物銀兩過境經過沿途地方自應留心查催。隨時具報。今鄭俊業於上年十一月過江南宿遷關入山東直隸境。該處地方官並不查催。具報經戶部屢次行查。又復置之不答。現據戶部查訊該委員於四月到京。其銀兩在途次花消。該督撫及地方官均有失察之咎。且該委員係在京城拏獲。自必由直省經過。朕因戶部

具奏。因憶及劉我昨曾覆奏鄭俊業至今仍未來直。實無在境逗留情事。復取閱之。果然。若昨日尚未過直隸。豈今日即飛至京師乎。是該督一切不留心。竟同輩贖。其咎尤重。劉我著交部嚴加議處。但山東省亦因距京稍遠。幸而鄭俊業迅速就獲。否則該撫亦未必不似劉我以該委員並無在境逗留之語覆奏也。長麟著交部議處。其沿途失察之直隸山東地方官並著該督撫查明參奏。交部議處。至此項油茶並庫飯等銀及公文等項。浙江省於上年九月委員起解。遲至一年有餘。尚未見委員回浙銷差。何以竟漫無查察。即使平日忽畧遺忘。迨經戶部行查。亦當提醒立即查辦。乃戶部行文四次。而該撫與藩司仍置若罔聞。可見該省地方諸務廢弛已極。琅玕係該省巡撫。事務較多。或一時未及查到。然已難辭咎。而顧學潮由直省道員。經朕特簡。超擢浙江藩司。並不認真奮勉。且鄭俊

業即係伊所詳委。迺於該委員逗留不回。全無查覈。又不稟請巡撫。咨覆戶部。尤非尋常疎忽可比。琅玕顧學潮著交部分別嚴加議處。○庚戌

上御懋勤殿。勾到江蘇河南情實罪犯。停決江蘇斬犯十一人。絞犯七人。河南斬犯六人。絞犯十四人。餘七十四人。予勾。○諭軍機大臣曰。黎維祁係無能之人。全仗內地大兵代為恢復。若不趁此兵力。將阮惠等悉數擒擒。倘

大兵撤回。復乘虛搆亂。黎維祁斷難抵禦。勢必至將該嗣孫及送回眷屬。一併戕害。豈不虛此一番進剿。且將來又須另辦。倍覺費手。殊非一勞永逸之計。自須全行拏獲。方可藏事。即日孫士毅統率大兵出關。夷情俱已響應。該督復申明紀律。不許兵丁擅入該國民居。妄取一草一木。致夷地無知。不以為德。而反以為怨。所見正大。深合朕意。軍行所莅。該國臣民。必倍加感激。効力前驅。即所親匿者。

此時雖尚助逆。然此等勢利之徒。大兵一到。自無不紛紛乞降。亦可無虞梗阻。孫士毅等。惟當奮勉。妥辦。濤穴擒渠。迅奏膚功。仰承渥眷。○戶部議覆兩淮鹽政全德奏。稱本年題奏。送楚鹽舫。抵作正額案內。聲明江西及江南所屬安慶池州太平等岸額引。向來聽其以網融網。隨到隨售。部議以引鹽各有疆界。何以他省鹽引。運至楚省越界銷售。今臣查覆。緣湖廣為暢銷地面。向於每網之首。查覈

前網暢滯情形。畧為裒益分派。以期無壅無缺。至兩地通融。若俟滯銷已有成數。始令改運。已在一網將完之後。是以向來本岸之引。過半。即給與融引運楚。其間商力不齊。或有正引未到。而融引已到。並非有意先融後正等語。應令該鹽政嗣後遇正鹽未到。即將已到之融鹽。抵作正額。以清年限。而杜影射。至該鹽政又稱各處行鹽。向有定額。緣江西安徽等處滯岸。未能杜絕。隣私。有妨官運。應如

所請飭交各該督撫鹽政嚴飭所屬文武員弁實力緝私以期官引疏銷從之旌表守正捐軀山西樂平縣民王存柱妻梁氏辛亥諭向來文淵閣藏度四庫全書設有領閣提舉直閣校理檢閱等官原未詳立規條以專責成所有司事收發一切不免彼此推諉是以內閣翰林院內務府奉宸苑各衙門經理即曝曬書籍插架歸函竟未能順敘殊非慎重秘書之道因思文淵閣提舉閣事一員

係由總管內務府大臣兼充其司員以及看守掃除之人皆其所轄呼應較靈即著交提舉閣事一人專為管理其領閣直閣校理檢閱等官俱作為兼充虛銜不必辦理本閣事務至各書裝貯匣頁用木並非紙襪之物本可無虞蟲蛀且卷帙浩繁非一時所能翻閱而多人抽看曝曬易至損污入匣時復未能詳整安貯其弊更甚於蠹嗣後止須慎為珍藏竟可毋庸曝曬其地面一切亦無須奉宸

苑經理庶專司有人而藏書倍為完善至編輯四庫全書原以嘉惠士林俾資博覽但文淵文源文津三閣儲藏俱係禁禦重地現在排函列架珍萃琳琅自不便任人出入繕閱且各書底本原俱存貯翰林院以備查覈嗣後詞館諸臣及士子等有願睹中秘書者俱可赴翰林院白之所司將底本檢出鈔閱院署非禁地可比既便於披覽於體制亦昭慎重壬子諭軍機大臣等湖南鎮筵鎮總兵

尹德禧前因辦鳳凰廳苗民滋事一案尚為出力曾降旨賞戴花翎復經帶領湖南官兵前赴臺灣協同勦捕逆匪現在該省官兵早已各歸營伍該總兵自五十年陞見後雖距今尚未滿三年但尹德禧係曾有微勞加恩之人與各總兵不同著即來京陛見所有鎮筵鎮總兵印務著畢沅委員接署以便令該鎮即行起程將此傳諭尹德禧並諭畢沅知之○癸丑諭軍機大臣等本年緬甸欽關納

款遣使齎表進貢因思四十一年曾將該處
擺夷老段等十一名發往吉林黑龍江今該
國既悔罪輸忱其前次發遣之人自應給回
仍降諭旨令該將軍等查明擺夷等下落茲
據查明除病故外尚存有則列波浦波些孟
五拉喀者朵六人伴送到京已勅部交滇省
引見人員之便帶送前往著傳諭富綱譚尚
忠侯擺夷等到滇時即派員轉送出關令其
歸國以示懷柔綏戢至意○甲寅大學士等
議覆福建巡撫徐嗣曾奏查出柴大紀誤拏
良民許懷等作為匪犯妄奏正法戮屍經前
任嘉義縣知縣陳良翼審係良民釋放柴大
紀逼迫該縣扶同捏報陳良翼依律擬斬監
候許懷等請概行釋放得旨陳良翼於已經
保釋之民人仍作為正法戮屍之匪犯扶同
柴大紀混行通報罪固難辭但此案皆由柴
大紀妄拏捏奏玩視民命當軍務緊要之際
尚敢迴護冒功枉陷無辜全不慮人心渙失

實屬罪不容誅若非陳良翼虛心研鞠痛切
剖陳幾致無罪良民駢首就戮是陳良翼之
扶同通報係為保全多命起見因而從中婉
轉雖該員於查辦柴大紀劣蹟時不即據實
稟報直至辦理緣坐始行呈明不值再加錄
用其罪究屬可原所有陳良翼問擬斬候之
處著加恩寬免並即釋放回籍餘依議○乙
卯諭曰李侍堯現患瘡疾又增口瘡痢症未
就痊愈正資調理該督本年原奏請來京陛
見其總督印務亦需人接署著福康安即行
馳驛前往署理閩浙總督俾李侍堯得以安
心調攝若該督瘡疾漸次平復則俟福康安
到閩接印後再行來京陛見倘精力難以支
持徐嗣曾尚未內渡福康安未到之先所有
總督印務著魁倫暫行兼署○又諭曰琅玕
奏本年浙江被水各縣惟遂安一縣地畝涸
出稍遜收成未免歉薄等語前因浙省淳安
等縣夏間偶被山水業經加恩撫卹借給籽

種及修理房屋等費。小民自可不致失所。今淳安、西安、開化三縣俱已補種雜糧。一律有收。惟遂安一縣被水稍重。收成歉薄。若將應徵漕糧銀米一體徵收。民力仍不免拮据。所有遂安縣本年應徵地丁漕項錢糧銀米著加恩緩至次年麥熟後徵收。俾紓民力。以示朕軫念災區有加無已至意。該部即遵諭行。又諭曰：李侍堯現患瘡疾。著伊子侍衛毓秀即由驛前往省視。○調雲南鶴麗鎮總兵竇瓚為昭通鎮總兵。以湖南衡州協副將馬天麒為鶴麗鎮總兵。旌表守正被戕河南鄧州民錢四妻趙氏。○丙辰上御懋勤殿。勾到山東情實罪犯。停決斬犯二十九人。絞犯十六人。餘五十四人予勾。○諭從前曾令尚書都統等各保舉堪勝副都統人員。帶領引見。候朕酌用。今簡放副都統乏人。著交尚書都統等將堪勝副都統人員擇其賢能者保舉。毋得瞻徇。並著軍機大臣彙

總帶領引見。候朕酌量錄用。諭軍機大臣曰：孫士毅籌畫一切諸屬妥協。且該國民心感舊。黎維祁所到之處均肯出力保護。則大兵所向自必紛紛內應。無難剋期蕞事。至國王印篆朕早經降旨與其俟該嗣孫籲請封號。莫若於攻克黎城後即將黎維祁傳旨勅封。俾得及早復國。且定例天使冊封其銜級較小。今孫士毅以總督帶兵收復黎城。頒旨賜封尤足鎮服人心。該督想尚未接奉前旨。故有此奏。現已飭各該衙門即速鑄印撰擬冊文發往。該督接到後即可遵照妥辦。冊文曰：朕維撫馭中外綏靖遐邇。義莫大於治亂。持危道莫隆於興滅。繼絕其有夙共朝命。久列世封。遘家國之多艱。屬臣民之不靖。則必去其蠱賊。拯厥顛隳。俾還鐘簴之觀。以肅屏藩之制。爾安南國嗣孫黎維祁化沐災厄。序承冢嗣。當爾祖奄逝之日。正阮逆構亂之時。肇釁蕭牆。失守符印。孑身播越。闔室遷移。棄

彼故都依於上國。溯百五十年之職貢。能不念其祖宗。披一十六道之輿圖。原非利其土地。且柔遠人。所以大無外。討亂賊。所以儆不虔。是用輯爾室家。克完居處。勵爾臣庶。共復仇讐。特勅大吏。以濯征爰董王師。而迅勦先聲。所讐巨慝。奚逃。內難斯寧。羣情更附。釋其瑣尾。流離之困。加以生死肉骨之恩。舊服式循。新綸允賁。茲封爾為安南國王。錫之新印。王其慎修綱紀。祇奉威靈。戢和民人。保守疆土。勿怠荒而廢事。勿懷安以敗名。庶荷天朝再造之仁。益迓國祚重延之福。欽哉。毋替朕命。○丁巳諭曰。畢沅等奏湖北被水各屬內。江陵等縣民屯田地被水成災。嗣因襄河漲發。潛江一縣亦被淹浸。各該州縣應完漕項銀米。分應依限輸納。但察其情形。未免拮据等語。湖北被災各屬。其本年及舊欠錢糧業經分別蠲緩停徵。茲屆應完漕項之期。若即令依限輸納。民力究未免拮据。所有成災較

重之江陵。公安石首監利漢陽沔陽黃岡廣濟黃梅潛江十州縣。本年應徵漕糧正耗米石水脚隨漕銀兩。均緩作兩年帶徵。成災較輕之松滋江夏二縣。本年應徵漕糧正耗米石水脚隨漕銀兩。亦緩作一年帶徵。統加恩俟下年帶徵五十年災緩銀米全完之後。再行遞年帶徵。其各衛所屯田分坐災地。應徵各項運費銀兩。亦著一併緩至下年帶徵。俾得從容輸納。益資寬裕。以示朕加惠災黎。有加無已至意。該部即遵諭行。○又諭福建按察使員缺。前經降旨將萬鍾傑補授。因臺灣地方緊要。是以將該員仍留臺灣道任。其按察使員缺。交該督奏派道員署理。但臺灣甫經平定。一切正資熟手經理。計該員回至內地。尚須二三年之久。而福建刑名事務亦關緊要。若不特行簡署。不足以專責成。所有福建按察使員缺。著王慶長署理。○又諭今年荊州駐防滿洲兵丁內。被水淹斃多人。朕甚

惻然雖經賞給官兵俸餉。但被淹男女之子。嗣如無著落。反致有失生計。著加恩將伊等子嗣內有業經成丁。可以挑取差使者。交該將軍大臣等。即將淹斃人等所遺甲缺抵補。養其戶口。如淹斃人等內並無子嗣。或年未及歲。即照朕前所降旨。福州廣州杭州駐防兵丁之例。一分甲缺分作二分養育兵缺。以便養贍。被水亡故人等年未及歲之孤子孀婦。以示朕矜恤。世僕之至意。戊午

上詣

奉先殿

壽皇殿行禮。諭軍機大臣曰。雅滿泰慶麟等數日並無奏報。甚切厯思。從前屢次所降諭旨。伊等接奉後。自應一一覆奏。且薩喀地方戴綑已載等。生擒賊匪。解送前藏之處。具奏已逾半月。此時想早經解到。亦當將因何起事緣由。審明奏聞。況薩嘉呼圖克圖等所差和息喇嘛。如何立言之處。前經垂詢。亦並未

據奏。及雅滿泰等係駐藏辦事大臣。今既不能辦事。豈於應行陳奏事件。亦漠不關心。若此。耶雅滿泰慶麟著傳旨嚴行申飭。仍將從前接奉諭旨。陸續迅速覆奏。再成德已馳抵後藏。旬日以來。何以未見奏到一摺。此時鄂輝亦已將次到藏。著將到彼後如何勦賊情形。及辦理一切之處。星速奏聞。以慰厯注。是月兩廣總督孫士毅奏。風聞阮賊欲親來抗拒我師。此信果真。當即與提鎮諸臣四路攔截。設法擒拏。倘畏懼兵力。為據險護巢之計。請首先克復黎城。以收人望。次則剪除助逆鎮目。廓清道路。激勵將士。直搗賊巢。得旨。諸凡皆妥。佇俟捷音。又批。所辦皆合機宜。勉為之奏。內又稱。此次進兵。原應黎維祁供應軍糧。但安南官民。蓋藏俱經賊匪搜括。淨盡。勢難供應。現在關外夷人紛紛籲請賞給口糧。隨同進剿。臣以大兵為安南討賊。糜費已多。豈宜復以內地倉儲供其游食。然不畧

為安撫。又慮夷情渙散。轉為賊匪所用。擬嗣後遇有投順夷人。指令攻打從逆地方。如能攻破。即將偽官貯糧。任其食用。又批此慮是事已如此。不可惜費。○雲貴總督富綱奏。安南首逆阮惠。逃奔舊巢。粵西大兵進剿。將來窮蹙無歸。勢必叩關乞命。聞該匪避匿富春地方。係在黎城之南。現在大兵由諒山高平一帶進剿。則東止已為官兵阻截。查該國西北與南掌接壤。南掌與滇省普洱府土境相通。已密諭普洱鎮道沿邊察探。如該逆由彼投來。務須妥為招納。並飭沿邊鎮將實力巡查。得肯好知道了。在汝所能。不過如此。勿得貪功。別生枝葉。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十五

大清高宗法天隆運至誠先覺體元立極敷文奮武考慈神聖純皇帝實錄卷之一千三百十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務兵部稽察都察院掌印給事中七級隨帶加二級尋常加二級年功紀錄一次臣慶桂

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少傅工部尚書紀錄五次臣曹振鏞等奉

敬修

乾隆五十三年戊申十一月己未朔諭據浦

霖奏湖南華容岳州衛武陵龍陽澧州等屬

因六月下旬荆水下注又值湖水倒漾被淹

田畝水退稍遲收成祇五分有餘等語該省

武陵龍陽及澧州三州縣被水雖較華容安

鄉為輕但收成止五分有餘若照例徵收民

力恐不能寬裕華容安鄉二縣前已降旨緩

徵著加恩將武陵龍陽澧州三州縣下半年

錢糧照例一併緩徵其華容岳州衛武陵龍

陽四屬帶徵五十年被旱緩徵錢糧及借給

籽種口糧未完銀穀又武陵縣五十一年

被水緩徵未完錢糧俱緩至次年秋成後再

行徵收以紓民力該部即遵諭行○又諭本

日吏部帶領押運抵通之江西同知衛謀通

判周載蘭引見已著回任矣此等押運之員

自應於漕運抵通完竣即行送部引見

仍令該員押送回空今漕船業已回空南下

始令運員赴部該員等引見後再行啟程則

回空漕船早出東境即迅速起身已不及趕

赴雖該幫尚有運弁押送但伊等押運是其

專責似此給咨遲延豈不耽誤嗣後凡有押

運官員應送部引見者倉場侍郎等務於該

員兌運事竣即行給咨送部毋得延緩蘇凌

阿劉秉恬辦理遲誤著飭行○又諭昨由兵

部帶領引見直隸大名副將富銳乃兆德之

子世家子弟久歷外任恐染綠營習氣加恩

將伊留京署理鑲紅旗蒙古副都統德勒格

楞貴之缺○豁除江蘇六合縣乾隆五十二

年分。江占民衛田一十九頃四十二畝有奇額賦。○庚申諭軍機大臣等。已勒布賊寇情形。旬餘未見奏報。盼望頗切。今聞雅滿泰所奏。祇將節次接奉諭旨。往復絮聒。而於賊寇情形。終未提及。況據奏現在所用麥麵牛羊等項。俱由達賴喇嘛班禪額爾德尼備辦。並非官為採買。尤屬糊塗。從前屢降諭旨。交伊等動項採買。斷不可稍有抑勒。明白開示。至再至三。今既由達賴喇嘛班禪額爾德尼商內辦出。自應一面動支。一面按數給價。乃雅滿泰尚稱非由官買。是真欲勒取耶。朕特派官兵前往。原係拯救生靈。冀安衛藏。豈可因接濟軍糧。轉使惠愛之心。反成擾累之事。況成德諒已馳抵後藏。其如何勒賊之處。雅滿泰豈無聞見。亦無一語奏及。即噶爾丹西勒圖薩穆迪巴克什。所寄書信。交與噶布倫等之後。伊等議論如何。或深感激。或生畏懼。設伊等並無言語。亦應察其情狀若何。據實具

奏。乃於此等處。全無理會。雅滿泰真形同木偶矣。著再嚴行申飭。此時成德自己到彼。仍著將賊匪情形。及如何勒辦之處。迅速奏聞。○旌表守正捐軀河南伊陽縣民楊添保妻張氏。山東朝城縣民邵中秋妻茲氏。辛酉蠲緩安徽望江懷寧桐城宿松銅陵東流貴池蕪湖繁昌當塗無為和州潛山太湖青陽建德廬江巢縣泗州盱眙五河壽州鳳陽懷遠定遠靈璧鳳臺霍邱亳州蒙城。舍山並安慶建陽泗州長淮鳳陽等衛三十六州縣衛。本年被水災民額賦有差。壬戌上御懋勤殿。勾到山西情實罪犯。停決斬犯十人。絞犯十六人。餘五十六人予勾。○諭軍機大臣議駁魁倫等具奏。將裁馬六十匹。所空草料折銀。及裁汰馬甲四十缺。所空錢糧。以養贍孤寡。餘充公項一事。存泰等具奏。將所出馬甲六十八缺抵補外。餘三十一缺。暫停挑補。以養贍錢糧短少。家口衆多者。徹出養

育兵缺。以養贍空缺家口一事所駁甚是。昨福州廣州杭州滿洲兵丁內有出兵臺灣陣亡者。實屬可憫。伊等戶口孤寡。恐失生計。特加恩將臺灣兵陣亡馬甲缺與其挑補在家逸居之人。不如分馬甲一缺作養育兵二缺。令養贍伊等孤寡。此皆朕念滿洲世僕微有勞績。即加憫恤之意。並非裁汰兵缺馬匹。以省錢糧也。方今承平日久。生齒日繁。雖不能無故增加滿洲等錢糧。豈有裁汰兵缺之理。

況今歲荊州被災。一切賑濟。朕即動用二百萬兩。且從前二三次蠲免普天下錢糧。不啻數千餘萬兩。於彼皆不曾稍有愛惜。況此數兩兵丁錢糧。朕豈肯復為節省乎。今魁倫存泰等如此辦理錯謬。實未曉朕意。著傳旨申飭。其養贍荊州水災淹斃兵丁之孤寡。亦如是降旨矣。恐圖桑阿等誤會朕旨。亦未可定。著交圖桑阿等。惟體朕憫恤旗僕以期於事有益。酌量辦理。將此仍曉諭滿兵駐防各處。

知之。刑部議覆四川總督李世傑疏稱。馮龔氏毆夫馮青身死。依律擬斬立決。其子馮克應審不知情。未及往救。請免置議。應如該督所題完結。得旨。刑部題覆四川省馮龔氏毆傷伊夫馮青身死。將馮龔氏問擬斬決。一本馮龔氏著即處斬。至此案馮青之子馮克應。於伊母馮龔氏在途毆傷馮青殞命時。因取火轉回瞥見。當即哭喊。龔氏嚇勿聲張。令其一同潛逃。該部以馮克應業經該督審明。

不知父母爭毆。是以未及往救。請免置議。人之於父母。原有容隱之例。但父之於母。尊親雖屬相等。然父為子綱。夫為妻綱。禮經有母出與廟絕之文。是人子之於其父母。恩同而分。則有間。設為人子者。遇有其父毆母至死之事。自當隱忍不言。原可免其科罪。若其父被母毆死。即迫於母命。當時未敢聲張。至經官審訊時。自應據實訴出。方為處人倫之變。而不失其正。此等綱常大義。雖鄉僻虫氓。

未能通曉。但準情斷獄。不可不示以等差。折衷至當。此案馮克應於伊父被伊母毆死。到案時。如即行供出實情。自可免議。倘並未供明前項案情。皆係審訊馮龔氏而得。馮克應即不得為無罪。亦應酌加薄罰。以示人道大倫。該督原題及部議。皆於此處未經聲敘。明晰著刑部遵旨行文駁飭。令該督將馮克應到案曾否即行供出之處。訊明覆到。再行覈辦。旌表守正捐軀河南新鄉縣民韓朝相。

妻宋氏。癸亥諭據惠齡奏辦理武闈事宜摺內稱。連場較閱。將各武生照例考試。馬箭。地球。及步箭。弓刀石等技。將弓馬熟嫻。技勇可觀。年力強壯者。挑取記註。其餘生疎軟弱者。一概汰去。仍出示曉諭。將該生等或因騎射或因技勇未能入選之處。於各名下詳細註明。使該生等各知汰去之故。等語。所辦可嘉。已於摺內批示。向來武闈較閱。率多循例辦理。未能實心甄別。是以順天武鄉試及武

會試。特派皇子大臣監同閱看。以昭慎重。至各省舉行武闈。係巡撫專司其事。往往於技勇弓馬並不認真考校。無所激勸。今惠齡將各生技藝可觀者。密為挑取。仍將未能入選之人。於名下註明。出示使被汰之故。曉然共知。令各生等自知愧勉。思奮所辦。殊為妥善。各省巡撫俱當照此辦理。認真校閱。不得草率從事。以副掄才至意。又諭據閩鶚元奏本年應試諸生內。江蘇省湯振王長駕吳霖

王日龔。畢文琳等五名。安徽省王聖際。胡先桂。翟承眷等三名。均年在八十以上。三場完竣。未經中式。又據惠齡奏湖北省應試諸生吳梅舒。繼芬。年皆八十以上。三場完竣。榜發無名。各等語。該生等年逾八旬。精神矍鑠。踴躍觀光。實為儒林嘉瑞。湯振王長駕。吳霖。王日龔。畢文琳。王聖際。胡先桂。翟承眷。吳梅舒。繼芬。均著加恩賞給舉人。准其一體會試。以示朕壽世作人嘉惠耆齡至意。又諭曰。閩

浙總督李侍堯老成歷練宣力有年屢任封圻實心能事昨歲因臺灣逆匪滋事特將伊調任閩浙該督抵福建後即駐劄廈門一帶辦理軍需調度一切無虞缺乏諸凡妥協而於地方事務亦能認真整飭節經降旨晉加官銜復還伯爵以示優獎昨據該督奏染患瘡疾又復下痢即遣伊子由驛前往看視並諭令安心調養以冀速痊用資委任茲聞溘逝深為軫惜所有應得卹典著該部察例具

奏○又諭曰閩浙總督員缺著福康安調補福康安未到之前其總督印務前已有旨著魁倫署理陝甘總督員缺著勒保補授山西巡撫員缺著海寧補授其兵部侍郎員缺著吉慶補授仍兼副都統○諭軍機大臣等據李世傑奏稱該省辦理軍需前撥陝西山西銀一百萬兩儘屬充裕續撥楚省銀五十萬兩可無需用已就近飛行停止等語此項銀兩業據畢沅等彼此札商如所解之銀已入

川境自應解往川省若起程不遠未出楚省又不妨仍留湖北備用以省解送之煩總在該督等酌量妥辦不必拘執又李世傑奏稱派往辦糧之郎中良柱等八員現無應辦事件應否留川補用等語西藏軍務漸次完竣糧運一切均已停止前次派赴川省各員內阿精阿係刑部司員刑名尚為諳習應令回京供職其良柱等七員著李世傑酌量情形如該省現在需人即奏留數員以相當之缺

補用若無需用之處即可遣令回京也○又諭據紀昀奏前赴熱河辦理抽換書匣各事宜一摺內稱從前陸費墀排架時凡係零帙不論朝代門類將數種合為一匣以省配搭之煩遂致紛紜錯亂現經逐種抽出歸還原次並將書匣彼此互換改刻匣面毋庸多為添造等語所辦竟通不料紀昀竟能如此四閣陳設全書一切裝函排架事宜俱係陸費墀一手承辦今經紀昀查出紛紜錯亂之帙

甚多。則陸費墀前次辦理乖謬已可概見。著將紀昀原摺鈔寄琅玕發給費陸墀閱看。令其明白登答。據實覆奏。尋琅玕奏遵旨詢問陸費墀。據稱辦理錯謬無可置喙。所有查出應行換匣換面改裝改刻之處。情願措銀一萬兩自行咨交內務府以充辦書經費。報聞。

○又諭本日據魁倫等奏李侍堯於十月二十三日病故一摺。已降旨將福康安調閩浙總督矣。李侍堯在督撫中素稱能事。伊在閩浙地方事務固可資其整頓。但臺灣係福康安平定。其威望自更重於李侍堯。現在督撫內亦乏堪以勝任閩浙之人。是以將福康安調補。福康安惟當加意整頓。妥協辦理。閩省民風雖稱剽悍。而福康安甫經在彼蕩平賊匪。大加懲創。今調任總督。該省內地民人臺灣番衆自必心存畏懼。其桀驁積習正可默化潛消也。至閩浙總督印務前據李侍堯奏請簡員前往已有旨將魁倫暫令兼署。本日

魁倫等奏將總督關防嚴密收貯。其日行事件伊轍布用巡撫關防暫為代理等語。自因未接前旨故有此奏。魁倫等接奉諭旨後諒必遵照辦理。但魁倫於地方事務未經歷練。著福康安於途次趲程行走。迅速赴閩接印辦事。將此由五百里傳諭知之。○甲子遣官祭

先醫之神。○諭內務府奏請員外郎廷標等循例開復一摺。又議處副關防董濬照向例將降調處分改為罰俸一摺。此例因國初年間內務府人數本少。職事較多。是以定例遇有降調處分俱係改加罰俸。免其調用。今內務府生齒日繁。堪以當差者本不乏人。其議處各員除奉特旨留任外。自應照部院衙門之例。按其情節較重分別實降抵銷。以示公允。嗣後議處內務府官員著查照吏部處分則例辦理。其從前降調改為罰俸之例即行停止。除廷標等五員降調之案業已四年期

滿仍准開復外所有董濬一員即照此例辦理。諭軍機大臣曰成德奏於十月初八日已至後藏擬令慶麟酌帶官兵於薩喀列子一帶往返週查萬一賊匪潛出即可堵殺並於防守扎什倫布聲息相通等語所辦甚是。巴勒布不過么膺小醜成德等未到之先以雅滿泰慶麟怯懦無能在彼防守尚可無事。今成德已赴聶拉木等處勦賊而鄂輝等帶領後起官兵接續前進大兵齊至聲威壯盛

自無難剋期藏事佇候捷音速至賊匪前曾在薩喀列子一帶滋擾該處防守亦關緊要慶麟即應赴彼小心防範不必復請隨同勦賊。又據奏各兵所用麵食糈糈均係達賴喇嘛捐給等語前經降旨諭令鄂輝等於藏內豫備口糧支用一石即給與一石之價想成德尚未接奉前旨故有此奏內地官兵前往衛藏勦捕原為保護達賴喇嘛班禪及唐古忒人衆起見若令捐給口糧則伊等見小必

以為累屢經有旨訓示著傳諭鄂輝等務向達賴喇嘛班禪額爾德尼詳悉曉諭以從前慶麟等辦理不善未將賞給價值之處諭知致令捐給口糧豈不轉致苦累殊非大皇帝軫念唐古忒人等之意業已節次降旨將慶麟等嚴飭並令面為曉示按數給價若達賴喇嘛等以捐辦在先欲於奉旨之後始領價值其未奉旨以前所用者仍懇捐辦亦不可如其所請惟當按用過糧石照彼處時價如

數補給以示朕多方體恤至意又雅滿泰等所奏拏獲活口二名迄今已兩月有餘何尚未據錄供覆奏著再傳諭雅滿泰即向該犯嚴密訊取確供將此次因何滋事情形據實速奏以便朕指示辦理現據成德奏噶布倫戴綱等所報多未確切雅滿泰於此事辦理無能尚可原恕若復與噶布倫等扶同隱匿不將訊出賊匪實情具奏不特昧盡天良將來一經已忠查出恐不能當此重戾也○調

正黃旗蒙古副都統伊齡阿為鑲黃旗蒙古副都統以署正白旗蒙古副都統岱森保為正黃旗蒙古副都統○旌表守正被戕四川名山縣民婦黃徐氏養媳羅氏守正捐軀直隸磁州民霍登子妻王氏○乙丑諭湖北近年以來吏治闕茸地方大吏於鹽務匣費任意染指濫觴已極福建吏治亦復廢弛營伍毫無整頓以致海洋劫盜頻聞釀成林爽文等滋事巨案朕詢訪輿論僉以為湖北之積弊起於陳輝祖福建則起於楊景素伊二人受朕厚恩用至總督乃不思潔已奉公實心任事致通省官吏貪黷懈弛相習成風日甚一日現經朕力為整頓其歷任督撫如舒常李封已經革職特成額富勒渾雅德俱先後拏交刑部治罪而該二省吏治之壞實作俑於陳輝祖楊景素二人使其身尚在必當與特成額等一體治罪今伊二人俱已物故而其在任婪索所得貲財伊子等又得捐納官

職以為進身之階此等昧良負恩之人豈可任其子復登仕版若不從嚴示懲何以儆貪玩而飭紀綱所有陳輝祖之子陳山崐楊景素之子楊煥俱係捐納主事均著革職發往伊犁効力贖罪其餘子如有職銜者俱查明斥革一概不許出仕以為大臣貽誤地方者戒○又諭曰孫永清奏廣西省全州歲貢生唐熙現年八十三歲三場完卷未經中式等語唐熙年逾八旬精神矍鑠猶能踴躍觀光洵為士林嘉瑞著賞給舉人准其一體會試以示朕壽世作人嘉惠耆儒至意○諭軍機大臣曰雅滿泰慶麟辦理糧餉始則委諸內地繼又將給價採買之處不令唐古忒人等知悉竟同勒取朕屢降旨訓飭並令該將軍等隨時支取照數給價昨據成德奏到所給兵丁麵食糈糈仍係達賴喇嘛協濟是以又降諭旨諄切訓示令將用過糧石若干補給價值朕思此項口糧雅滿泰等並未發價或

因尚未接奉前旨。但行兵給餉原有定例。內地派往兵丁。其隨帶之糧。足敷幾日口食。到藏之後。有無贏餘。自藏至聶拉木等處。共有幾站。約計兵丁每名需用口糧若干。該處承辦之員。自應按站計日通盤籌畫。雅滿泰何亦未經奏及。軍需糧餉所關甚鉅。即此項糧食。係達賴喇嘛豫備。亦豈可不加撙節。任聽內地官兵支銷。致有多費。著將雅滿泰慶麟嚴加申飭。仍飭將備辦糧餉。於何日始行動撥。及因何未將按日給發詳悉聲敘之處。明白回奏。鄂輝成德巴忠等務遵前降諭旨。將達賴喇嘛等所備糧石。按數發價。併覈實支給。以歸節省。斷不可稍滋浮費。○丙寅。上御懋勤殿。勾到直隸情實罪犯停決斬犯二人。絞犯十二人。餘八十三人。予勾。○緩甘肅武威古浪平番平涼華亭皋蘭金縣狄道平羅等九州縣。本年被雹災。民應徵額賦。○丁卯。諭潮州鎮總兵員缺。前經降旨令孫士毅

於廣東廣西兩省總兵內揀員調補。茲據該督奏。右江鎮總兵蒼保現在帶兵進剿。其才具強幹。堪以調補等語。著照所請。蒼保准其調補潮州鎮總兵。正可帶廣東兵隨同該督進剿。所有右江鎮總兵員缺。業經補放。有人福建毋庸選員請補。○諭軍機大臣等。湖北荊州被水。現經修築隄工。加高培厚。並改建城垣。永資鞏固。因思向來江河險要之區。多有鑄造鐵牛。安鎮水濱。蓋因蛟龍畏鐵。又牛屬土。土能制水。是以鑄鐵肖形。用示鎮制。此次荊州被災甚重。聞亦係蛟水為患。現在該處新築隄工。著傳諭畢沅。於荊州萬城隄及沙市等處。形勢扼要處。所相度緊要頂衝。酌量鑄置鐵牛。以鎮隄壩。亦豫弭水患之一法。○又諭曰。何裕城奏。到任已滿三年。懇於來年正月賑畢。進京陛見一摺。已准其來京矣。書麟係兩江總督。江西省本其所轄。該督抵任後。尚未到過江西。該省吏治民情。營伍亦

應赴彼查看。此時尚無緊要應辦之事。著傳諭書麟。於何裕城進京陛見之前。即帶印前赴江西。兼署巡撫印務。俟何裕城回任後。書麟再行回至江寧。於明歲防汛事宜。亦不致有誤也。將此傳諭書麟。並諭何裕城知之。○又諭投順夷人。若能使之因糧於敵。固屬甚善。但現在孫士毅領兵深入。惟冀安速藏功。轉不必存靳惜之見。再補給安南國印信。及封黎維初敕文。現據該衙門備辦完竣。著隨報發往。交孫士毅暫為隨營收貯。一俟克復黎城。該督即遵照前旨妥辦。使該國人衆。知黎維初又邀天朝加恩。封立必皆歡欣踴躍。於擣穴擒渠更為得力。調齊齊哈爾副都統烏什哈達。為熊岳副都統。黑龍江副都統索喜。為吉林副都統。○戊辰。諭舒常前因荊州隄工潰決一案。業經革職。所襲雲騎尉世職。至舒常襲次已完。據該旗將原領勅書奏繳。但念伊父舒赫德宣力年久。辦事尚屬勤

慎。不忍將伊父所得世職遽行停襲。著加恩仍留於舒常本身。俟荊州隄工完竣後。再行來京。至李封年已衰老。留於該處工次。亦屬無用。並著加恩。即令回籍。又諭兵部奏職方司郎中邵自昌。經該部咨送堪勝繁缺知府。據該員呈請仍留本部供職等語。各部司員。大率多樂於外任。今邵自昌在部有年。截取知府。經該部堂官保送繁缺。該員懇請留部効用。尚為體面。謹飭之人。若僅准照常留部。不足示勸。邵自昌著加一級。以昭鼓勵。○已巳。上御懋勤殿。勾到朝審情實罪犯。停決官犯絞犯四人。常犯斬犯四人。絞犯七人。餘二十四人。予勾。諭軍機大臣等。前據徐嗣曾奏奎林於八月十八日。自蚶江登舟。至九月十四日。尚無到臺灣信息等語。該撫此摺。係於十月十二日奏到。迄今又將月餘。未據將奎林曾否抵任之處續奏。朕心深為廑念。海洋風

汎靡常即使奎林坐船被風飄至廣東圖薩布自應具奏乃亦未據奏聞究竟奎林此時有無下落是否已抵臺灣著傳諭徐嗣曾即行查明具奏至臺灣一切事宜業經辦有就緒可以交道員等接辦且該處地方甫經懲創儘可放心前已有旨令徐嗣曾即行內渡現在李侍堯病故而福康安雖已起程不日即可抵閩但甫經調任地方事務亦須熟手幫辦徐嗣曾當遵照前旨迅速內渡不必在彼久駐也將此由五百里傳諭知之 庚午諭曰畢沅奏本年監利縣地方因江湖漲漫將東鄉之孫張王公月隄二處普漫該縣隄工本係民辦但今年被災較重請借帑興修事竣按糧攤派分三年徵完等語本年荊州被水各隄工應行加高培厚之處俱經動項修築不惜多費帑金以期便民經久至監利縣隄工固係例應民辦之事第念該處甫遭淹浸雖已優加撫卹民力究不免拮据所有

該縣孫張王公月隄需用土方現據該督估計需銀三萬兩以上此次著加恩照荊州隄工一體動用官項以示朕軫念災區格外體卹至意○又諭曰已延三奏陝省附生張夢熊蔣遇辛年俱八十以上三場完畢未經中式等語張夢熊蔣遇辛年逾大耋踴躍觀光洵為昇平盛事著俱賞給舉人一體會試以示嘉惠耆齡至意○諭軍機大臣曰畢沅奏荊州修築隄工玉路口隄膝已有七分工程楊林洲鷄嘴壩黑窑廠裏頭亦次第築做畢沅親赴該處查看石磯已出江面約長七丈溜勢稍覺南趨將來接長做去似可冀挑溜得力等語荊州一帶隄工總因大河溜勢北趨易於漫潰今楊林洲石磯做出七丈溜勢已挑向南開此是極好機會正當乘此水弱之時趕緊進做得尺則尺該督即督飭在工員弁勉力妥辦並繪圖貼說具奏呈覽至萬城隄上民居雖屬相沿已久但隄工之上蓋

有廬舍且約有萬餘家之多於加高培厚究多妨礙自應諭令遷移居住况官為給與屋價亦可無慮失所現在拆卸讓出將來務宜嚴飭地方官隨時查察勿任再有私占居住之弊將此由四百里傳諭知之 辛未

聖祖仁皇帝忌辰遣官祭

景陵○

上詣

奉先殿

壽皇殿行禮○諭軍機大臣曰徐嗣曾奏拏獲海洋行劫客船之盜犯陳喜等五名審明後即恭請王命正法一摺所辦甚是閩省海洋盜劫頻聞且臺灣甫經懲創之後陳喜等尚敢藐法行劫一經拏獲自應迅速辦理若復拘泥請旨必致要犯有稽顯發茲該撫於審明後即一面正法一面奏聞所辦甚為得當至逸盜王檀等十五犯當於內外各嚴飭文武員弁按名查拏務獲其投海之王寅等四

犯亦即飭查是否淹斃屬實毋任漏網又據奏拏獲偷載私鹽換賣礮舫之林光洪佔各犯俟解到後審明從重定擬一摺并據另片奏稱臺灣緝拏餘匪俱以福康安開單姓名為憑勒限嚴緝此外概不准兵役等混行搜拏以杜藉端訛索許告之弊等語所辦俱是前因李侍堯奏瘡疾甚重曾有旨諭令徐嗣曾即行內渡回省今該撫奏到之摺係十月初二日拜發尚無起程日期計該撫接奉諭

旨再回至省城已在福康安抵任之後臺灣地方關係緊要所有緝拏洋盜及搜捕餘匪並查禁私硝等事必須有大員在彼督辦現雖據徐嗣曾奏詢之鹿港進口船隻皆稱奎林渡洋後因遇風收回九月內在崇武澳守候開駕等語但此言究未確實上年福康安亦在崇武澳守風彼時福康安與李侍堯等俱經先後奏聞今奎林於九月內若果在該處守風不特奎林應自行具奏維時李侍堯

瘡疾尚不至沉重亦當隨時奏報乃總未據奏及可見此信不確朕心深為懸切著傳諭徐嗣曾於接奉此旨後若已內渡亦不必冒險轉回如尚未起程已得有奎林守風確信則當俟奎林到後將應辦一切事宜面為告知交代接辦方可內渡如無續得奎林信息亦不妨候朕另簡總兵到彼交代後再行起程至徐嗣曾節次奏到各摺俱係單銜該處道員乃係巡撫所轄萬鍾傑雖已到任自不便與該撫聯銜奏事至普吉保係總兵大員一切事務皆應幫同巡撫辦理乃總未見其與徐嗣曾聯銜奏事可見其不能振作有為若僅令其在彼專辦一切殊難稱任現在萬鍾傑已抵臺灣該員以臬司辦理臺灣道事有奏事之責將來徐嗣曾內渡後所有應奏事件俱當令鎮道會銜具奏以重責成至魏大斌前因帶兵救援嘉義縣不能殺賊解圍降旨革職後以其隨同打仗尚為出力復加

恩以遊擊補用今於緝捕洋盜能率領兵役上船拏獲尚屬奮勉著傳諭福康安遇有該處叅將缺出即以魏大斌題補以示獎勵將此由六百里各諭令知之 旌表守正捐軀直隸永清縣民馬儒妻岳氏 壬申豁除陝西朝邑縣乾隆五十年分被水衝坍民田一百一十六頃六十八畝並隄占民田二頃二畝有奇富平縣乾隆五十年分被水衝坍民田一項四十七畝有奇額賦 癸酉諭官兵進剿安南賊匪所有一切軍需兵餉需用較繁自應寬為籌備以資接濟現在粵西庫貯銀兩恐不敷用著戶部於附近省分酌撥銀五十萬兩解赴廣西備用 諭軍機大臣等據劉綬奏豫省通州天津德州三幫漕船於十一月初四初七等日已入直隸大名縣境等語豫省漕船節年未能依限兌運衛河又多淤淺以致趨運遲延本年奏聞豫省漕船阻滯貽誤業將承辦之地方官議處示儆茲

豫省通州天津德州三幫漕船於十一月初旬已入直隸境。可符冬免冬開定制。並據該督奏稱。豫將元城大名二縣衛河挑挖深通。實力催趲。所辦尚屬認真。嗣後豫省漕船著傳諭該撫務照本年及早受兌開行。過入直境。俾得上緊趲運。勿致仍前遲誤。有逾定限為要。至豫省漕船入直隸境。向未據專摺具奏。此次漕船一經入境。該督即行奏報。所辦亦是。嗣後每歲豫省漕船入直隸境。俱著該督將到境日期具奏一次。以備查覈。其自直隸入山東境。並著該撫一體催趲。隨時具奏。除就近傳諭伍拉納外。將此傳諭劉義。並諭長麟梁肯堂知之。又諭軍行後路防堵最關緊要。既據富綱奏請帶兵五千名。方足敷用。即著照所請。准其帶兵五千出關。至秦態與烏大經一同帶兵出關。此則不可富綱之意。自因伊與孫士毅同係總督。而富綱又屬滿洲。見孫士毅既帶兵出關。是以有此一奏。

不知富綱才具。若果能承辦此事。料理妥協。則伊係滿洲總督。朕早將此事交與專辦。皆緣富綱平日辦事才具。見知於朕者。不能如孫士毅。是以勦捕安南事宜。專交孫士毅督辦。況行軍之道。事權貴有專屬。烏大經以提督帶兵。可以受孫士毅調度節制。若富綱前往。則同屬總督。未便受孫士毅之節制。而事權不能歸一。必致彼此觀望。各不相下。於軍務大有關係。此事朕惟專交孫士毅一手經理。功成必優加恩賞。若辦理不妥。亦惟孫士毅是問。富綱但當遵照前旨。在邊防一帶彈壓稽查。辦送糧運。一得該國信息。隨時具奏。所有調到兵丁五千名。著交烏大經帶領出關前進。並受孫士毅調度節制。至勦辦安南。自以廣西一路為正兵。其雲南一路為偏師。不過犄角牽掣之勢。烏大經出關後。果能督率土目人等收復安南。宣光興化等處。與廣西之兵會合一路。固屬甚善。否則祇須遙為

聲援以分賊勢亦不必為深入之舉惟聽孫士毅知會以作進止本日據孫永清奏孫士毅於十月二十八日帶兵出關天氣晴明隊伍整肅自屬成功佳兆惟佇盼捷音速至

實錄卷一百六

一

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十六

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十七

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部
世襲騎都尉軍功加九級隨帶加二級又加二級臣重誥內大臣戶部尚書錢謙益滿洲都統軍功紀錄一次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敬修

乾隆五十三年戊申十一月甲戌

上御乾清門聽政諭曰梁肯堂奏豫省通州天津等十幫漕糧於十一月初五日一律兌竣次日即全數開行等語上年豫省漕船兌運遲延業將承辦之地方各官議處示儆本年漕糧經該署撫嚴催各屬趕緊起運迅速開行得副冬兌冬開定制辦理尚為妥協梁肯堂著交部議敘○諭軍機大臣等昨據劉我奏豫省通州等三幫漕船已入直境本日復據梁肯堂奏該省漕船於十一月初五日

全數受兌開行業降旨將該署撫交部議敘矣上年豫東漕船俱因兌運遲緩將承辦之地方各官議處示儆今豫省經該署撫上緊嚴催得符冬兌冬開定制山東距京甚近本年秋成又屬豐稔該省漕糧自亦應及早兌交俾幫船如期開行何以未據長麟具奏著傳諭該撫即將東省漕糧曾否兌交完竣幫船於何日開行之處迅速覆奏勿任仍前延緩○旌表守正捐軀江蘇銅山縣民吳承文妻劉氏○乙亥諭軍機大臣曰毓奇奏回空漕船渡黃捐內稱本年南糧軍船放空南下經山東江南河撫諸臣協力催趲得以趕緊渡黃毓奇復委都司陳文藻赴鎮江江口查催並咨會兩淮鹽政常鎮道派員趕緊查驗不致停延羈阻等語所辦好已於摺內批示本年南漕回空船隻渡黃日期較上兩年早一月有餘若趕緊出江歸次自可趕兌新漕以符冬兌冬開舊制現據毓奇奏派員查催

並知會查鹽查稅處所隨查隨放俾各回空漕船得剋日渡江辦理尚為妥協至另片奏稱直省官撥協運豫漕船隻查豫省兌次已改楚旺地方程途甚近已飛檄糧道務率州縣幫弁趕緊兌竣趲行挽至臨清一帶守凍等語現在天氣融和想各河道尚可不至凍阻漕船自當趁此趕緊挽運若多趲一程將來抵通即早一日何必定於臨清守凍著傳諭蘭第錫長麟和琳務宜督率員弁上緊催行或能趲至德州守凍固屬甚善否則亦當趲行前進得尺則尺不必拘泥定在臨清守凍也○又諭大兵甫經出關外土兵土夫等無不感激思奮願効前驅而沿邊天氣又屬晴明軍行順利天時人事如此可見孫士毅此往必能迅速成功現在該督籌辦一切悉臻妥協嘉獎之餘更無可諭惟盼捷音為急著傳諭該督務當倍加奮勉安速辦理總能於年內遞到捷報更為全美事成之後孫士

毅之功不小自必渥加恩賞以示酬庸又據孫永清奏籌辦軍糧寬綽有餘等語孫士毅既帶兵出關進剿辦理糧餉事務係孫永清專責該撫亦應勉力妥備成功後自然一併加恩○丙子

上詣

雍和宮行禮 諭曰穆和蘭老格歷年已久伊江阿著賞給頭等侍衛副都統銜授為吐魯番領隊大臣前往更換穆和蘭博斌著授為英吉沙爾領隊大臣前往更換老格丁丑諭曰畢沅奏江陵縣南岸及公安縣各漫口應補還隄共需銀一萬九千二百餘兩此項隄工向俱民修但本年被水較重民力不無拮据請借帑興修俟事竣按糧攤徵等語本年荆州應修萬城各隄工因被水較重特降旨官為修築其監利隄工亦加恩動帑興修今江陵公安兩處補還漫口各隄雖向例應歸民辦第念該處甫經漫淹之後民力

恐不免拮据所有該兩縣此次應修各隄銀一萬九千二百餘兩並著加恩一體動用官項此後再照例辦理以示朕軫恤災區有加無已至意 又諭曰格綢額歷年已久李侍政著賞給頭等侍衛副都統銜授為和闐領隊大臣前往更換 綢緩湖北江陵監利公安石首松滋枝江漢川漢陽沔陽黃梅廣濟黃岡長陽江夏武昌咸寧嘉魚蒲圻興國大冶黃陂孝感蘄水羅田蘄州天門荊門當陽雲夢應城宜都潛江東湖歸州巴東鶴峯等三十六州縣本年被水災民額賦有差 旌表守正捐軀河南太康縣民楊忝位妻南氏李慎女李氏 戊寅諭曰鄂岳人本老實不能幫助魁倫辦事令伊來京在散秩大臣上行走鄂岳所遺福州副都統員缺著海祿調補由驛前往 又諭刑部題覆山西省關倉糧因姦致死徐三重喜一案將關倉糧問擬斬決已照發行矣此案係上年十二月初一

日呈報該省於本年九月內始行具題該部覈覆照擬斬決計此案完結距該犯犯事時幾及一年此等因姦斃命問擬重辟應行立決之犯日久稽誅較之問擬監候者轉為遲緩殊屬非是因檢閱本內雖據該省聲明封印公出日期逾限不及一月經該部照例議處罰俸但各省辦理案件往往藉詞延宕扣展限期其尋常之案或因往返駁查聲明展限已屬外省積習至此等按律問擬斬決要

犯案情又屬顯然毫無疑義自應迅速審結具題原不得照尋常案件期限辦理豈可於定限之外復行扣展該省辦理此案甚屬遲延著交該部查明嚴加議處具奏嗣後斬絞立決人犯並著該部比照尋常案犯減半定限即事須駁查至遲亦不得逾半年庶協弼教之義案牘亦得免怠忽積壓○又諭曰伊蘭保達福陽春保布彥達費噶塔布俱歷年已久仍尚阿著授為塔爾巴哈台領隊大臣

前往更換伊蘭保愛興阿著授為葉爾羌協同辦事大臣前往更換達福奎舒著授為庫車辦事大臣前往更換陽春保慶玉碩雲保著授為伊犁領隊大臣前往更換布彥達費噶塔布等俱著賞給頭等侍衛副都統銜已卯諭曰奎林前在烏魯木齊都統任內尚有未完著賠銀兩茲補放總兵應將其廉俸扣繳第念臺灣遠隔重洋奎林到彼一切需用所有伊應得總兵廉俸著加恩准其支領

俾資辦公之用○諭軍機大臣等上年福康安前赴臺灣特賞給右旋白螺帶往是以渡洋迅速風靜波恬咸臻穩順今思閩省總督將軍巡撫提督等每年應輪往臺灣巡查一次來往重洋均資靈祐特將班禪額爾德尼所進右旋白螺發交福康安於督署潔淨處敬謹供奉每年督撫將軍提督等不拘何員赴臺灣時即令帶往渡海俾資護佑俟差竣內渡仍繳回督署供奉至前往巡查大臣亦

不必因有白螺冒險輕涉總視風色順利時再行放洋以期平穩將此諭令知之○是日起

上以冬至祀

天於

園丘齋戒三日○庚辰諭前因五十五年值朕八旬萬壽經辦理慶典大臣議令各督撫等分扣養廉備充經費以遂其効誠獻悃之心因恐該督撫等既於養廉內酌為分扣若仍備進萬壽貢物未免稍形竭蹶業明降諭旨是年各督撫等俱不必呈進萬壽貢品以示體恤此次辦理慶典原因王公大臣等再三籲懇出於至誠不便固却是以俯俞所請特派大臣經理其事勿任踵事增華致滋糜費各督撫等既分扣養廉以充經費已足抒忱祝嘏又何必另備貢品為此繁文縟節乎各督撫等承受恩眷簡任封圻惟當體朕之心以為心其各恪遵諭旨不但是年即明年亦

概毋庸備進萬壽貢品以仰副朕諄諄訓諭至意若督撫等自以養廉豐厚所扣經費無幾又兩年不准備物將虔則其所省之養廉不為不多於心有所不安則前此酌議經費內道府以下俱得遞減分扣此等職分較小之員其所得廉俸不及督撫藩臬之優雖所扣無多究恐不無拮据督撫等如果情切祝釐莫若即將伊等兩年備物之費及藩臬多餘養廉為該省官員酌量代扣大員等多扣幾分則職分較小者即可省幾分自無因此苛派小民之累而有貪贓壞法亦可繩之以法該督撫等誠能如此仰體遵辦更勝於另備貢品朕必深為嘉許也將此再行通諭知之○又諭據恒秀奏官員等並無饋送衣傘立碑之事等語東三省向來並無此等事件而吉林黑龍江亦無地方官員雖盛京所屬有州縣等官尚有府尹管轄嗣後盛京各州縣官有無饋送衣傘立碑著交府尹於年終

照例彙奏其吉林黑龍江同知著該將軍留心查覈果有此等事件即時參奏不必照例年終彙奏○辛巳

上詣

南郊齋宮齋宿諭前定科場條例令各省中式舉人覆試朕念各省人數衆多難以偏行覆試已降旨俟明歲會試發榜後將中式者覆考一次未經中式者聽其各回本籍但前次吳省欽條奏丙午以前三科由俊秀報捐

貢監中式舉人籍隸蘇揚廣東山西者覆試一摺業經大學士九卿議准仍應照舊辦理惟吳省欽所指四處尚未周到著將江蘇安徽江西浙江廣東山西六省三科以前由俊秀報捐貢監生中式舉人者俱於來年會試前在圓明園正大光明殿先行覆試再准入場如遇有事故未能來京應試者著照原議下科補行覆試此六省未經覆試之人不得赴會場考試亦不准赴吏部截取銓選○壬

午冬至祀

天於

園丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○諭軍機大臣等本日閱鄂輝覆奏各摺所辦甚是此時該將軍自己抵藏著即酌帶官兵趕緊行走前抵聶拉木等處會同成德遵照節次所降諭旨酌量情

形相機妥辦至成德前稱遄赴後藏隨即帶兵前進現在已閱二旬其曾否追躡賊匪痛加剿殺並將聶拉木等處收復及作何辦理之處尚未據續有奏報著傳諭成德即將近日辦理情形迅速覆奏以慰厯念○又諭據長麟奏東省漕糧現俱收納齊全陸續運赴水次惟臨清以北德州恩縣等處河水漸已結凍遽行受兌停泊河干似不若暫貯倉儲較為慎重至臨清開內各水次現在築壩興挑一俟工竣鋪水即可開兌現將應行雇備民船勒限雇覓於十月內均抵水次俟開凍時即行受兌開行等語前因豫省漕船經該署撫梁肯堂上緊嚴催得符冬兌冬開定制東省漕糧距京甚近自亦應及早兌交俾幫船如期開行是以降旨詢問茲據長麟奏到情形因河水凍結暫於水次收貯倉廩較為慎重即豫省漕船趕赴東境亦須在沿河一帶守凍自係實在情形向來東省幫船應在

豫省之前行走現在豫省漕船已全出直隸境較往年為速前經降旨諭令上緊遄行得尺則尺不必拘泥定在臨清守凍此時和琳已遵旨親往督催趕緊前進著傳諭長麟務即飭屬將東省漕糧速為交兌以便開凍前行不可仍前再有延緩若能趕在豫省幫船之前因屬甚善否則緊跟豫省幫船行走不必拘定向來幫次總當趕在南糧各幫之前方不致臨時擁擠亦不為遲矣並著和琳一體上緊督催以速漕運○又諭軍行後路最關緊要況現據潘啟德稟稱前經投出之陳名炳在處北地方接偽官吳初之信仍復投回為其所用並帶領賊兵在屯占守夷情反覆實為可恨雖聞所進圖內大兵尚未過處北地方將來兵進時陳名炳所帶賊兵如果近前抗拒正可趁勢剿殺將陳名炳生擒立予梟首若進兵之後陳名炳仍復來降更當加意防範或即誅之惟賊人譎詐多端當防

其在官兵後路侵軼孫士毅務宜隨時留心
不可稍忽至孫士毅現帶各兵除沿途留駐
防守外存營兵祇有千幾百名畧覺單少不
妨俟官兵到齊以全力進剿計粵東官兵不
日可以全到現又降旨催令烏大經帶兵由
開化一路速進會剿若阮惠現在黎城正是
就我樊籠孫士毅與烏大經即可兩路夾攻
以期擒獲首犯尤為省事至阮惠送回內地
把總許昌義等遞稟詭稱黎維祺係已故國

王黎維祺之子以次當立黎維祁不知下落
請接伊母眷回國求天朝罷兵等語並據孫
士毅詢之陪臣黎伺稱維祺為人癡呆明係
阮惠以其易於愚弄假伊出名詎回黎維祁
眷屬希圖戕害孫士毅現向通事痛加呵斥
名正義直足喪賊匪之膽所辦甚好惟許昌
義稱賊人在富良江造有大船旁設多檣並
將二三十舢之礮子誇示等語許昌義係被
風漂至該國經阮惠送回之人其所稱該國

情形不過是阮惠欲令傳說以緩官兵之計
自未便宣揚於衆蓋軍行全在氣盛恐我兵
不察虛實聞而氣餒殊有關係孫士毅何未
慮及此嗣後遇有此等傳說賊匪情形總宜
密之又密不可宣之於衆即有如此員弁亦
宜留於附近切勿任其妄言惑衆至安南內
訐一事孫士毅因該國臣服天朝日久最為
恭順勢難置之不辦乃阮惠以土酋恃強占
奪黎維祁不能自振是以該督奏請帶兵出

關為之勦賊收復閱節次所奏之摺俱一力
肩承志在滅阮扶黎所見甚正但辦理大事
雖不可存畏難將就之見而籌畫亦當歸於
萬全此事若果能擣穴擒渠將阮惠及其黨
羽全數擒獲永靖該國後患固屬全美但恐
阮惠等自知罪在不赦見大兵勢盛逃竄遠
匿搜捕需時而安南又有瘴氣自不值以中
國錢糧兵力久駐炎荒為屬國防戍孫士毅
則當俟收復黎城後遵照諭旨將黎維祁勦

封妥為安頓令其加意自強振作並將要隘處所酌派該國可信有用之士官兵民嚴密防堵並令該鎮目等為之齊心固守禦侮有方孫士毅亦可撤兵回至內地不必在安南久駐總之該督此次帶兵前往能將阮惠等生擒固為上策否則收復黎城俾黎維祁收復其境土不失天朝字小存亡之體足以戴事亦即為中策看來收復黎城尚為易辦而生擒阮惠或不免遠窺負隅在孫士毅既力任於前自不肯復將礙難辦理情形遽行陳奏而朕反覆思維不得不豫為指示予以退步俾臨期有所遵循不至涉險持久想該督係曉事之人倘阮惠無難速獲斷不至拘泥此旨將就了事反致踈縱設實有難辦之處不妨俟收復黎城使黎維祁復國後若果阮惠遠遁難於生擒即據實奏明帶兵回粵惟在該督善體朕意動出萬全○又諭前令烏大經帶兵五千名由馬白一路出口與孫士

毅遙為聲援以分賊勢不必為深入之舉惟聽孫士毅知會以作進止茲據孫士毅奏黎維謹稟內有阮惠留家臣在黎城幫同鎮撫之語恐阮惠已從富春潛赴黎城抗拒亦未可定應與滇省官兵兩路夾攻可期弋獲等語孫士毅現已帶領大兵分路追剿此時烏大經自應帶領滇省官兵迅速由宣光一帶進攻與粵兵兩路夾擊使賊人首尾不能相顧方為妥善著傳諭烏大經即奮勇督率兵丁及土目人等收復宣光興化等處與孫士毅會合以期迅速肅事至烏大經既已帶兵深入道里遙遠所有接濟糧餉遞送文報及彈壓邊關一帶事宜並著富綱遵照前旨妥協辦理○癸未

上詣
壽康宮行禮○諭據徐嗣曾奏查明曾長鑑等運送軍米船隻於上年十月十一日內先後駛到鹿港實因風大浪湧漂出外洋擊破船

隻致糧米全行沉失淹斃水手兵丁並查出遞送公文之林合等四船亦有淹斃水手合之蔡球琳等六船共沉失軍米三千六百七十餘石等語海洋風信不常船隻破溺在所不免且運送軍米本屬因公今既據該撫查明實因猝遇颶風人力難施致遭沉失淹斃多人殊堪憫惻所有各船內淹斃水手兵丁著該撫等查明照例賞卹其沉失軍米三千六百七十餘石俱著全行豁免以示軫恤○

諭軍機大臣等據徐嗣曾奏拏獲刦奪先犯潰逃戍兵審明正法各摺所辦俱是其拏獲私鹽究出弁兵受賄一案已令軍機大臣會同三法司覈擬速奏矣臺灣風俗刁悍此次大兵勦捕逆匪甫經懲創之後尚有販私搶刦戕命等案徐嗣曾一經拏獲即審明按律正法俾先預知所懲儆辦理甚為得當現據徐嗣曾奏將應辦事件料理十數日即遵旨起程內渡計此旨到日徐嗣曾自己渡回內

地因思向來臺灣一切案件有應歸總兵辦理者有應歸道員辦理者事權分隸文武衙門或致日久互相推諉將來徐嗣曾內渡後所有臺灣應辦事件俱著責成奎林萬鍾傑二人會同辦理如有應行具奏者俱著聯銜具奏不得歧分文武彼此諉卸奎林萬鍾傑惟當加意整頓會商妥辦遇有案件從嚴辦理庶奸宄咸知斂跡地方益臻寧謐再徐嗣曾所奏拏獲刦奪一案尚有逸犯陳煥一名

又潰逃戍兵尚有未經拏獲者著該地方官等於內地及外洋一帶嚴飭所屬上緊緝拏勿任遠颺漏網又據徐嗣曾奏私鹽一案摺內稱都司徐機家人林珍得受林宏光賄囑番銀十六圓徐機見衣履新鮮盤詰來由林珍以得受商船飯食銀支吾答應徐機亦不復深究等語海口收用陋規經福康安等查明飭禁嚴定章程何以都司家人林珍尚有得受商船飯食銀之語並著奎林萬鍾傑於

臺灣該督撫於海洋各口岸內外逐加查訪如有似此例外需索之處查明一體禁革嚴行懲辦不可日久生懈至奎林奏於十月十七日已抵臺灣接印任事等語前此奎林在崇武澳守風即應具摺陳奏乃並無一字奏及令朕懸厪月餘奎林不應糊塗至此竟不是人矣朕之所以注念奎林者蓋以海疆重地現在需人經理奎林係派往辦事之人恐有疎失不得不增縈念乃奎林在彼守風月餘竟不見及此何不仰體朕懷一至於此耶若似此糊塗將來於地方事務尙致貽誤恐奎林不能當其咎也奎林著傳旨申飭將此由四百里各諭令知之○甲申諭軍機大臣等據舒濂奏接奉諭旨即於十一月初三日起程赴藏等語前因辦理巴勒布賊寇業將陸續所降訓示雅滿泰慶麟鄂輝成德等諭旨鈔寄舒濂閱看想伊到藏後諸事得所遵循辦理自有頭緒達賴喇嘛係主持黃教之

人藏內番衆及蒙古諸部落莫不尊崇敬奉駐藏辦事大臣亦應稍加優禮固不可過於崇奉俾擅事權亦不可微露輕忽致失衆望著傳諭舒濂務須留心體察處置得宜總之外貌不妨稍示優隆而遇事則斟酌妥辦仍勿稍存遷就巴忠熟悉該處情形晤見時向其詳細詢問自更有益也○裁察哈爾鑲黃正黃正白三旗牛羊牧廠總管從察哈爾都統烏爾圖納遜請也○乙酉諭曰綿課著賞戴花翎現在內廷行走王爵甚少怡親王永琅莊親王綿課均著在內廷行走○又諭本日吏部奏呈請捐復之原任知州陳珏成等四員覈其情節俱不應准一摺所辦甚是已依議行矣降革人員准其捐復原因人才難得其有情節較輕者不忍概令廢棄特予以自新之路復恐行之日久部臣不免從中高下其手是以仍令該部分別准駁開單具奏候朕欽定今陳珏成等四員情節本重該部

俱議以不准捐復所定均屬公當。然此亦由朕辦理庶務無不躬親察覈之故。即如捐復一事。部臣每月彙奏一次。此內雖有經部議駁。而朕閱其情節尚屬可原者。即特降諭旨允准。亦有部臣以可否准捐兩請。而朕覈其情節稍重。仍不准捐。蓋一經披閱。權衡悉出自朕裁准者。不致感激。部臣不准者。亦不致埋怨。部臣如部臣稍有瞻徇情面。而將應駁與不應駁者。顛倒錯置。經朕看出。必將部臣等嚴飭。如此留心綜覈。部臣等自不敢不秉公定議。若如明季批政一切章奏並不親加寓目。則部臣通同舞弊。尚復何事。不可為耶。且准駁之權既歸該部。即恩怨盡出於私門。其科道等官雖有秉公糾覈者。又復置之不答。是以臺諫有所藉口。惟事互相攻訐。漸成黨援。因之國事日非。遂至不可復救。而撥厥由來。總緣人君耽於安逸。不親朝政所致。此朕臨御五十餘年敬

天勤民。惟日孜孜。不敢稍懈。亦深有見乎為君之難。而太阿之不可下移也。茲因吏部彙奏捐復一事。特為明白宣示。將此通諭中外。知之。○諭軍機大臣等。前據富綱懇請與烏大經帶兵出關。業經降旨。令在邊關一帶彈壓稽查。毋庸親身前往。此旨想富綱尚未接到。是以復有此奏。朕思行軍之道。事權貴有專屬。今既將勒捕安南賊匪一事。專交孫士毅經理。若又令富綱帶兵出關。則同係總督職分相等。非若烏大經以提督帶兵。應受孫士毅節制調度者可比。設彼此各不相下。於軍務大有關係。富綱此時斷不宜前去。於何處接奉此旨。即回至接近地。勿照應一切。現在軍營所需口糧。業經該督撥米二萬四千石。分設站夫運送。已敷三月之用。但由馬白至宣光一路。道途遙遠。必需源源接濟。以資軍食。此係富綱應親自督辦之事。若稍有遲誤。缺乏。惟該督是問。至富綱既屢次懇請帶兵

前往恐譚尚忠聞知又欲前赴開化督辦糧餉則省會重地最關緊要督撫俱經遠出地方要務轉致無人料理輕重更屬失宜著傳諭譚尚忠不可因富綱有自請出關之奏遽爾輕離省會致有貽誤並著傳諭烏大經奮勇督率官兵及土目人等將賊匪屯聚之處痛加剿殺廓清道路使大兵長驅徑進仍以慎防後路為要與孫士毅會合夾攻以期一舉蕞事○丙戌刑部等衙門議覆署河南巡

撫梁肯堂奏扶溝縣民陳文彩等謀勒幼孩單香身死移屍圖詐一案請按律分別斬決絞候得旨陳文彩著即處斬至此案陳文彩與陳安商同勒死八歲幼孩單香移屍圖詐錢文詳閱案情陳安將單香按倒在地陳文彩用繩勒死該部將陳文彩照謀死十歲以下幼孩例問擬斬決而陳安則照從而加功問擬絞候固係按律辦理但單香年僅八歲該犯等輒忍於同謀勒斃情殊兇狠前因部

臣辦理謀殺幼孩之案不應僅照尋常案例問擬飭部定例謀死十歲以下幼孩者斬立決原以矜憐幼穉俾免殘知所懲儆至從而加功之犯均係同謀動手自應照常例加重辦理嗣後部中遇有謀殺十歲以下幼孩案件除為首之犯定擬斬決外其從而加功者俱問擬絞決如其未加功仍照舊例此案陳安著即行處絞○貸湖南華容安鄉澧州武陵龍陽等五州縣本年被水災民籽種○丁

亥

上幸瀛臺○諭軍機大臣等前據孫士毅奏帶領大兵於十一月初七日行抵枝林因留防後路兵勢畧單俟再到廣東兵一二十名即分路迅速進剿等語此事該督節次籌辦悉合機宜朕亦無可縈懷計日內廣東各兵早經到齊孫士毅自己厚集兵力督率進剿但恐阮惠見官兵勢盛先已竄匿遠颺為負隅死守之計若必進兵圍逼則困獸猶鬬或難

剋期藏事。自不值以天朝兵力為屬國搜緝。逋逃。耽延時日。孫士毅自當遵照前旨。於收復黎城後。將黎維初勅封。並妥為安頓。即可撤兵回粵。至大兵前往黎城。必由富良江濟渡。此江附近黎城為該國險要之區。前據送回之把總許昌義稱。阮惠於沿江安設多槳船隻。並將二三十觔重之礮子。向其誇示。此雖係賊匪虛張聲勢。以為緩兵之計。原不足信。然富良江既地居險要。阮惠等懼大兵進討。亦必豫為設備。令官兵難以徑渡。朕意富良江面遼濶。阮惠豈能處處安設賊兵。孫士毅統兵到彼時。如賊在對岸迎拒。該督仍當督率將弁。作為奮力攻擊之勢。牽綴賊勢。一面分兵。令許世亨帶領。繞至富良江上游。或下游一帶。乘其不備。設法速渡。使賊人驚官兵。從天而降。其沿江賊屯。自必紛紛潰散。此史冊所載暗渡之計。行之有效者。孫士毅想亦必計及。朕偶念至此。特一併示知。該督自

實錄卷三十七

五

能妥協遵辦。以副委任。○又諭曰。成德自十月初八日行抵後藏。即起程前往脅噶爾。迄今一月有餘。鄂輝此時亦已到藏。於賊衆情形若何。未據續有奏報。朕心懸注甚切。或成德在脅噶爾宗喀等處。雨雪過大。郵報不能速行。雅滿泰現駐前藏。慶麟現駐後藏。訪知該處實在情形。自當迅速奏聞。何近日亦未具奏。著傳諭鄂輝。成德。雅滿泰等。將成德所帶之兵。於何時至脅噶爾。賊匪如何敗竄。我兵如何勦殺。及鄂輝何日抵藏之處。俱著速行具奏。○是月湖廣總督畢沅奏。沙市觀音寺地方。緊臨大江。適當窖金洲尾。兜灣溜勢。內逼寺前。係頂衝迎溜之處。舊有石磯三十。九丈。係旱地。工程用整石砌築。今既沉水底。請於舊址上。拋砌碎石接築。以冀挑溜南趨。洲尾軟沙。刷動。則江流去路自通。至石磯西首掃灣處。所有迴溜老崖漸塌。應添砌碎石。護崖二十八丈。再黑窰廠裏頭。在江勢坐灣

實錄卷三十七

五

地方楊林洲添建礮嘴壩在玉路口迤西南對窖金洲之首現俱用石拋砌得旨覽奏頗合機宜知道了奏內又稱江溜漸次開行窖金洲北面露出嫩沙業已刷成陡礮漸見坍塌現在溜勢歸槽水勢深通俱飭趕緊興工又批此是好機會勉為之○兩廣總督孫士毅奏大兵進勦勢甚踴躍市球富良二江賊人防守甚密設法濟渡黎城不攻自破其大兵已渡之壽昌江現派撥官兵五百名紮營防守臣軍次現距市球江不遠即帶領官兵迅速前進得旨好佇候紅旗報捷之至一切勉為之

實錄卷一百七

三

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十七

實錄卷一百七

三

大清高宗法天隆運至誠先覺體元立極敷文奮武孝慈神聖純皇帝實錄卷之一千三百十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務直隸總督滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉

世襲騎都尉軍功加十九級隨帶加二級又加二級尋常加二級軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

教修

乾隆五十三年戊申十二月戊子朔

上詣

大高殿行禮○諭軍機大臣等據巴忠奏稱行

抵察木多將後起兵丁五百餘名留彼駐守

並將薩嘉呼圖克圖所遣喇嘛二名明白開

導等語所辦甚妥現今鄂輝等已帶官兵二

千餘名前往藏內又有達木厄魯特等番兵

儘數勦捕之用其後起兵五百餘名暫駐察

木多巡查防範亦甚有益著即照巴忠所奏

辦理至駐藏大臣役使該處兵丁雖係相沿

舊習但何至使用一半況該大臣等任意役

使其屬員中再行分占數名該處兵丁尚安

有操演武備之人著傳諭鄂輝成德巴忠等

於辦理善後事宜時悉心覈議將該大臣官

員各衙署中應用兵丁幾名足敷差委之處

定以額數永遠遵行並將該兵丁等使用番

婦之風嚴行禁止○已丑

上御乾清門聽政○諭曰富勒渾雅德前在閩

浙總督任內失察臺灣吏治營伍廢弛及柴

大紀軌法營私各款是以拏交刑部治罪昨

朝審勾到時念臺灣遠隔重洋且富勒渾等

曾經飭查未據該道等稟報其未經參辦尚

有可原業經從寬免勾富勒渾雅德俱著加

恩釋放令其家居閉門思過自知感愧○諭

軍機大臣等據圖薩布奏拏獲天地會匪犯

陳丕訕供究出傳會之僧人提喜籍隸福建

漳浦縣住在高溪鄉觀音亭又同會之陳彪

住在平和縣雲寮鄉趙明德住在漳浦縣雲

霄城北門內倉邊巷已飛咨閩省嚴拏務獲現將陳丕確審定擬等語此案天地會匪前經福康安拏獲嚴烟時即供有傳會之僧人及陳丕陳彪趙明德等犯茲據粵省拏獲陳丕一犯究出僧人提喜陳彪趙明德各犯住址下落均在閩省漳浦平和縣地方務當按名拏獲正法以絕根株計此旨到時福康安自早已抵任著傳諭福康安即督飭所屬按照該犯住址嚴密查拏務獲毋令聞風逃竄所有圖薩布奏到之摺著鈔寄福康安閱看並將年例賞給福康安之福字荷包金銀八寶並油糖一匣鹿尾三個鹿肉野雞一分一併發往○兩廣總督孫士毅奏報進剿安南賊匪情形諭軍機大臣等此次官兵進剿孫士毅分路前進使賊無從掩襲後路又豫派弁兵埋伏殲斃生擒多賊並砍竹紮筏俾大兵直過壽昌江餘賊望風潰散其沿途村莊人等跪迎道左孫士毅不但不受其餽獻且

賞給銀牌明白曉諭夷衆凜遵悅服所辦悉合機宜軍行伊始即能多有斬獲賊匪定當破膽事機順利從此長驅深入直抵黎城如阮惠等尚敢前來抵拒即可就勢生擒解京辦理計此旨到日將屆封篆距新歲不遠為迎祥集福之時著將年例福字一個荷包金銀八寶一分並油糖一匣鹿尾三個鹿肉野雞一分隨報賞給以示優眷○以翰林院侍讀學士鐵保為內閣學士兼禮部侍郎○庚寅上幸瀛臺○諭軍機大臣等日來西藏遞到奏摺稀少或因打箭鑪口外雪大難行該處文報向係烏拉遞送加以冰雪阻滯益難迅速朕盼望甚切著傳諭李世傑務即設法辦理以速郵傳○又諭據塔琦奏和闐領隊大臣錦格報稱格綢額巡察六城收受回子伯克羊馬綢緞又令衆伯克辦交元寶取用阿布都喇瑞銀兩綢緞貨買海龍皮張臣現往和

聞察查等語。實堪駭異。駐劄回城大員。理應潔已奉公。今格綱額種。種向伯克等婪索銀物。甚屬無恥。若果如此。自應重治其罪。今錦格揭報甚是。塔琦即赴和闐亦好。此事業經敗露。著交塔琦務須秉公究訊。如若得實。即行從重治罪。作速奏聞。○辛卯。諭軍機大臣等。據成德奏。行抵費噶爾。探聽賊匪尚在聶拉木宗喀濟龍等處屯占。現分兵兩路進剿。等語。所籌一切皆妥。但成德此奏。係初至該處籌辦情形。尚未與賊打仗。此時鄂輝想已到彼。與成德會合。該將軍等務宜乘賊尚未遠颺。痛加殲戮。俾知畏懼。將所占聶拉木等處地方全行收復。再遵前旨。定立貿易疆界。並取具已勒布甘結。以靖邊隅。惟摺內稱行至拉子地方。查詢該處糶糶。僅有二百餘石。止敷現兵支食。脅噶爾所存糶糶。亦只敷四五日之用。其達賴喇嘛商上辦出口糧四千六百餘石。俱散在各處存積。程途遙遠。不能

隨軍前進等語。軍行糧食。最關緊要。此係駐藏大臣專責。官兵未到之前。早應設法運送。俾兵至糧隨。焉有散在四遠。致令緩不濟急。臨事周章之理。慶麟等竟思官兵抵藏。並不進剿賊匪。惟在前藏將商上糧石坐食。遽爾撤兵。耶總之。勒辦已勒布一事。種種皆係雅滿泰慶麟貽誤。即此次糧運遲延。亦由伊二人玩誤所致。慶麟係懇請前赴後藏之人。乃並不沿途查察。趕緊辦理。其罪尤重。著以藍翎侍衛在章京上効力行走。交與鄂輝已忠等。差遣委用。如再不知愧奮。朕必將伊即在該處正法示眾。雅滿泰著降為頭等侍衛。速赴後藏。專辦糧務。如辦理妥協。尚可以功抵罪。倘再有貽誤。必將雅滿泰一併治罪。仍著鄂輝已忠等。將伊二人傳旨嚴行申飭。並面加訓斥。所有駐藏大臣印信。即著已忠接管。俟舒濂到彼交代後。酌量該處諸務辦竣。可以起身。即行奏明回京。又據成德奏稱。前此

拏獲之賊。在前藏起身時。尚未據解到途間。亦未遇見。是以無從審辦。賊匪等早經拏獲。乃解送遲至數月之久。此固由該處第巴等任意延玩。亦總由滿雅泰慶麟全不以事為事。並不豫行嚴催所致。著傳諭巴忠即查明。此次解送賊匪。是何處第巴所誤。先行斥革。並將解到之賊。迅速錄供覆奏。至鄂輝前奏。於十一月初五日可抵前藏。何以未據將抵藏籌辦情形。續行具奏。現在聶拉木等處。勦賊正需人分路帶兵。鄂輝應趨程前進。與成德商辦一切。迅速藏事。○以署鑲黃旗漢軍副都統巴克坦布為正白旗蒙古副都統。○壬辰。

上幸瀛臺。○諭國史館纂修王公大臣表傳。前經降旨。令總裁等董飭纂修等官。將乾隆四十年以前王公大臣表傳。纂辦進呈。候朕親定。成書頒行。並寫入四庫全書。垂為信史。今該館業已按期編纂。將次告竣。因思四十一年以後。王公大臣事功才品亦多可紀。即其中。有瑕瑜互見。功過不掩之處。亦當並存其實。以示傳信。今該館既遵前旨。將次竣事。自應續行纂辦。著國史館總裁董率編纂各官。將乾隆四十年以後。至五十年所有王公大臣。例得分立表傳者。查據內閣紅本及軍機處檔案。詳悉裒輯。以次進呈。俟再過十年。屆期另降諭旨。○諭軍機大臣等。據畢沅覆奏。楚省本年被水各州縣。應請分別加恩一摺。已照所請。明降諭旨。俟新正頒發矣。第思本年江陵監利兩縣。因隄塍潰決。被淹尤重。更宜格外優卹。該督等原摺。僅請展賑一月。自係荊州被水後。經朕節次加恩。優加賞恤。又現在修築城垣。隄塍。貧民赴工。力作以工代賑。不致覓食維艱。是以不敢寬為籲請。但朕軫恤災區。不少為靳惜。現已加恩。特將該縣展賑兩個月。該督等務宜督飭所屬。妥協辦理。俾小民均沾實惠。以副朕廑念窮簷有加。

無已至意。將此先行傳諭知之。○旌表守正捐軀河南浙川縣民何林妻趙氏。○癸巳。

孝惠章皇后忌辰遣官祭。

孝東陵。○諭據孫士毅奏報軍營大捷一摺。內稱大兵自過壽昌江後。即趕緊前進。市球江賊匪在江岸對面山梁屯紮。為數頗多。守禦甚固。十一月十六日黃昏時。一面排列多礮。隔江攻打。一面令義民陽於右首搭蓋浮橋。作欲渡之象。使賊人專意拒敵。密令總兵張

朝龍帶兵二千名。於左首二十里外陸續暗渡。官兵乘筏搶橋。奮勇直進。而張朝龍等暗渡之兵。已繞至賊營之後。賊匪喪失魂魄。棄寨奔逃。大兵渡過市球江。分路痛加剿殺。江岸及江中積屍幾滿。總在千人以上。復生擒四百二十餘名。俱即正法梟示。其嘉觀一路。經遊擊張純等帶兵進剿。鎗斃紅帽賊目一名。殺賊數十人。生擒十三人。副將慶成守備黎致明在要路設伏。將已經投順復又從賊。

之陳名炳。及偽指揮黎霆偽內衛栗金。一併擒獲等語。此次大兵進剿安南賊匪。孫士毅調度有方。帶兵提鎮將弁等。無不爭先用命。

一到該國境內。屢次克捷。設法渡江。每逢賊匪抗拒。即能痛加剿殺。所向披靡。實屬奮勇可嘉。孫士毅著賞給玉如意一柄。御用漢玉扳指一個。大荷包一對。小荷包二對。許世亨著賞給御用玉扳指一個。大荷包一對。小荷包二對。張朝龍李化龍尚維昇各賞給荷包

二對。除張朝龍李化龍本有花翎外。尚維昇著賞戴花翎。用示獎勵。其出力將弁等。經孫士毅開單奏請加恩。著照所請。副將慶成邢敦行。參將海慶楊興龍。都司劉光國。黑子虎彪。守備張雲俱著賞戴花翎。慶成仍加賞錫朗阿。已圖魯名號。都司陳元燮。珠敦。守備郭升。榮。劉永泰。七十九。千總陳洪順。路世遜。甘雨民。廖飛鴻。馮馬正強。俱著賞戴藍翎。遊擊劉越。准其開復。廠民等。隨同官兵打仗殺賊。驍

探道路均屬出力。厥民李宏旺、林槐、端徐紹富俱著賞給千總頂戴。陳秉鈞、何景昌、魏榮標、馮陶、曾君元俱著賞給把總頂戴。至副將慶成擒獲賊目陳名炳、守備黎致明一同擒拏均屬奮勉。慶成既賞給巴圖魯名號，黎致明亦著賞給堅勇巴圖魯名號。並照例各賞給銀一百兩。遇有應陞缺出俱即行陞用。以示鼓勵。遊擊于宗範因奮勇攻撲中礮陣亡殊為可惜。著加恩照例議卹。又遊擊陳上高千總陳連貴因搶渡受傷較重。著該督先行優賞。上緊調治痊愈。即一面賞戴花翎一面奏聞。其餘受傷陣亡各官兵並著該督查明分別等第咨部賞卹。○諭軍機大臣等據琅玕奏浙省各屬虧缺穀石前經奏明統限五年自五十一年起扣至五十五年買補歸倉。因本年米糧充盈價值亦俱平減請乘時趕緊採買並上年運交閩省軍需米十萬石計動各屬倉穀二十萬石亦可趁此豐稔之時

一併買足等語。所辦好。本年浙省年歲豐稔米價平減各屬未經買補倉穀自應乘此穀賤上緊採買在倉貯既得早為充足以符原額而民間糧石亦得及時售賣不致有穀賤妨農之慮。自屬一舉兩得。因思各省倉儲穀石應行買補者自亦不少。凡有價值平減之處自當照浙省乘時採買以期早實倉貯。但各處收成豐歉情形不一米糧價值不齊又不可拘泥辦理動項多買轉致穀價增昂有妨民食。著傳諭各該督撫留心察訪遵照酌辦務期倉貯民食兩有裨益方為妥善。不可拘泥也。○又諭此次孫士毅帶兵進剿辦理悉合機宜。而本日奏到之摺尤為大快人意。昨因富良江為該國險要之區恐賊在彼屯守官軍難以徑渡諭令密分弁兵於江之上下游暗渡。茲據孫士毅奏一面排列多礮隔江攻打一面暗令備弁在沿江一帶密躍地竄探至左邊二十里之外派總兵張朝龍帶

兵二千名。於夜半用竹筏。及農家小船暗渡。等語。正與昨降諭旨適合。實在可嘉。又陳名炳。前曾進關。親向孫士毅乞降。願効前驅。經孫士毅曉諭獎賞。遣回。乃陳名炳因接賊黨吳初寄信。復行從賊。並率領賊眾抗拒官兵。情節可惡。今孫士毅派令副將慶成守備黎致明帶兵潛赴要路。攔截勦殺。將陳名炳暨偽官黎霆。果全一併拏獲。並令潘啓德。隨同看視行刑。實屬大快之事。此皆由孫士毅調度有方。故能所向如志。而事機順遂。即此可卜迅速成功。此次大兵勦辦安南賊匪。為天朝字小存亡體統攸關。且該國道路險峻。又有數重大江阻隔。孫士毅力肩重任。親率官軍致討。據該督奏。現距黎城不及百里。若能將阮惠等設法生擒。解京辦理。厥功甚鉅。阿桂。平定金川。生致索諾木等。福康安。勦捕台灣賊匪。生擒林爽文等。歲功完善。俱特沛殊恩。晉封公爵。賞給紅寶石頂。四團龍褂。黃帶。

紫韁。及四開襖袍。以昭寵異。孫士毅能生致阮惠等。則其功與阿桂。福康安相埒。朕必當照阿桂等之例。一體格外加恩。俟紅旗捷音一到。即降恩綸。該督務當倍加奮勉。迅奏膚功。仰膺懋賞。又據奏。大兵抵富良江後。倘因江面較寬。難以著力。必須滇省速即進兵。以分賊勢等語。所慮亦是。前因孫士毅奏阮惠似已潛赴黎城。正是來就樊籠。擒獲較為省功。已有旨催令烏大經。迅速進兵夾攻。著再傳諭烏大經。速行前進。與孫士毅會合夾攻。以期剋期蕞事。此一節。並諭富綱。烏大經知之。又據奏。帶兵將備及廠民義勇人等。奮勉勦賊。請量為鼓勵等語。此等軍營出力人員。無有不即加恩之理。已照所請。明降諭旨。至該督奏稱。已圖魯名號。係出自特恩。不敢擅行籲請等語。業已就該督所奏勦賊情形。摺內。擇其打仗最為奮勉。拏獲陳名炳之副將慶成。守備黎致明二員。降旨賞給已圖魯名。

號遇有應陞之缺奏請陞補其有似此奮勇出衆者該督不妨據實奏明候朕賞給巴圖魯名號以示獎勵用兵之道全在賞罰嚴明方足以昭激勵除現照該督所請分別賞戴花翎藍翎及給予職銜外著將花翎藍翎各十枝發去交與孫士毅遇有打仗出力將弁即酌量一面賞給一面奏聞俾將士等益知鼓勵奮勇殺賊更可迅速成功○又諭昨因成德奏巴勒布賊匪尚在聶拉木濟隴宗喀等處屯踞現分兵兩路進剿業經諭令鄂輝趙程前進與成德會商妥辦茲據鄂輝奏報馳抵西藏籌辦各情形俱能井井有條計此時自己會同成德協力進剿當乘賊匪屯聚之時痛加剿殺俾知畏懼懾伏勿令聞風遠竄鄂輝等務遵朕節降諭旨善為辦理若賊匪被官兵剿殺紛紛逃散固不值窮兵追剿但當此大兵雲集若事機可乘可以長驅直入鄂輝等竟能犁庭掃穴永靖邊隅朕自當

格外優獎然亦不得因有此旨遽爾貪功冒險前進惟當察看情形熟籌妥辦想鄂輝等自能善體朕意籌畫萬全也至前此生擒賊匪二名雅滿泰於該犯解到時因訊供游移未及具奏足見雅滿泰之無能而於採辦糧石並不及早設法運至軍前其遲誤之咎尚何待言昨已將雅滿泰降為頭等侍衛所有駐藏大臣印信諭令交巴忠接管巴忠於接印後務將藏內應辦諸務及籌運糧餉各事宜悉心妥辦不可如雅滿泰之玩忽以致再有貽誤○又諭據鄂輝等奏審訊生擒賊匪二名內一名倫住係去年隨從紅帽喇嘛前赴巴勒布因暫行監禁俟事竣後確訪有無紅帽喇嘛在彼生事另行具奏等語紅帽喇嘛雖與黃教迥別但藏地甚多況既聞係前代班禪之弟即孫仲巴呼圖克圖之弟伊赴巴勒布亦不過因朝塔起見此事若加究辦恐致失仲巴呼圖克圖及後藏人心不惟於

事無益。且伊等必與前藏達賴喇嘛噶布倫等相讎。所關甚鉅。著傳諭巴忠舒濂。暫且不必深究。俟事定之日。潛令仲巴呼圖克圖作伊兄弟相念。札寄喚回。俾居舊地。舒濂仍行留心偵察。至已勒布起事之端。若因不用伊等新錢。尚得謂番夷惟利是圖。不遂其私。遂相仇怨。如以售與惡鹽。兼增稅賦。則是由噶布倫戴綱等專利所致。著傳諭鄂輝成德巴忠等查明已勒布起釁。如因增稅售鹽等事。

屬實。即遵照前降諭旨。妥協辦理具奏。○甲午。諭軍機大臣等。昨據孫士毅奏報。自過壽昌江後。趕緊前進。至市球江。賊匪守禦甚固。官兵設法由二十里外乘筏暗渡。繞至賊營之後。與大兵前後夾攻。斬獲甚多。其嘉觀一路官兵。亦經得有勝仗。並將已順復叛之陳名炳擒獲。正法。現距黎城百里。一過富良江。即可將黎城收復。所辦實屬大快人意。此次孫士毅帶兵進剿安南阮匪。一切調度有方。

屢次克捷。事機亦極順利。可望尅期蕆事。著將昨降諭旨及孫士毅奏到各摺。一併鈔寄福康安閱看。福康安聞之。亦必深為欣慶也。將此諭令知之。並賞給奶餅一匣。隨旨發往。

○又諭。前據孫士毅奏。接到黎維謹及安南官民人等稟稱。黎維謹為安南已故國王黎維禔之子。以次當立。現在權監國事。並以黎維祁不知下落。請接伊母眷回國。求天朝罷兵。經孫士毅詢之陪臣黎佃。稱黎維謹實係

黎維禔第四子。為人癡呆。已經投順阮惠。阮惠以其易於愚弄。假之出名等語。此顯係阮惠施其誘詐伎倆。託言將安南仍歸黎氏。希冀天朝不加征討。孫士毅即向投稟之通事痛加呵斥。所辦甚是。但黎維謹既係黎維禔之子。阮惠又復假令監國。為時已久。想該國無識反側之人。見黎維謹係黎氏親支。因而從順者。諒必不免。孫士毅當面向該嗣孫詢問。如以黎維謹賦性癡愚。易於約束。或該嗣

孫尚有一二可信舊臣則不妨仍交與黎維祁令其嚴為收管如該嗣孫不能約束孫士毅則當諭以黎維祁曾為阮惠擁立留於該國究恐未安但伊本癡呆其監國由於賊黨誘逼尚無大罪當帶回內地另為安插並不加之誅戮如此向該嗣孫明白宣諭令其倍加感激安心整頓國事更為周到著傳諭孫士毅於收復黎城後即酌量情形遵照辦理若黎維祁以黎維祁係屬尊行難於管束莫若將伊帶回內地或在滇粵二省安插自較妥協本日又據富綱奏由馬白出口過賭咒河至安南都竜地界等語富綱不可同住烏大經速應前進屢降諭旨甚明昨據孫士毅奏到大捷情形官兵現距黎城不及百里是大功已屆垂成一俟紅旗報捷即當特沛恩綸酬庸懋賞若富綱此時亦帶兵前往希冀分功更屬無謂朕亦不肯當垂成之際而遽分事權致令大功不能速成孫士毅惟當倍

加奮勉迅奏膚功以副委任計孫士毅昨日奏到之摺係十一月十八日拜發相距百里之黎城自己早到轉瞬新正時盼紅旗捷報之速至耳著隨報賞給孫士毅許世亨奶餅共一匣以示優眷又另發往四匣交與孫士毅於鎮將弁兵內擇其打仗勇往出眾者分行賞給俾共霑恩澤益加鼓勵○乙未上幸瀛臺○丙申諭曰孫士毅奏十一月十九日黎明統兵前抵富良江在江心打仗五六次殺賊百餘人生擒十七人賊眾膽落不敢前進乘昏黑中賊匪不能辨兵數多少遂將船筏儘數配載令提督許世亨等督率官兵二百餘人於二十日五鼓直衝彼岸賊人初猶放礮抵禦及我兵到岸賊即逃竄我兵痛加勦殺生擒四十六人奪獲船隻渡兵過江分路追殺賊人傷死無算復生擒一百八十七人又追趕賊船十餘隻用鎗礮火毬圍燒沉入江心賊匪數百人無一得脫起獲偽印

三顆黎氏宗族及百姓人等俱出城跪迎。黎城不攻自潰。孫士毅及許世亨入城安撫。該嗣孫黎維祁於是日二鼓趕赴軍營。經孫士毅傳旨令其襲封國王。並將伊母及眷屬人等一面知會孫永清。照料出關送回該國等語。覽奏嘉悅之。此次大兵進剿安南。孫士毅自從統兵出關過壽昌江後。趕緊前進。將市球江屯割賊匪殲戮數千人。乘勢迅抵富良江。直衝對岸賊匪紛紛逃潰。追殺生擒甚衆。立將黎城克復。傳旨令該嗣孫黎維祁襲封國王。辦理甚為妥速。阮惠等逐主亂常。竊據黎都。一經大兵聲討。望風奔竄。該國當殘破之餘。得天朝為之興復。俾黎氏國祚重延。並不利其寸土於字小存亡之道。仁至義盡。實史冊所僅見。孫士毅力肩重任。調度有方。不及一月。即已迅奏膚功。克副委任。著加恩晉封為一等謀勇公。並著賞戴紅寶石帽頂。以示優眷。俟擒獲阮惠等。紅旗捷報到。

日再當續降恩旨。格外優異。許世亨隨同帶兵剿賊。奮勇可嘉。著封為一等子爵。用昭懋賞。張統著賞給銳勇巴圖魯名號。照例賞銀一百兩。即起陞副將。其在事出力鎮將文武員弁。著孫士毅查明等第。分別咨部從優議敘。至此次各路官兵俱屬勇往。並著賞給一月錢糧。其較重尤為出力者。著孫士毅查明賞給兩月錢糧。以示獎勵。其辦理糧運妥速。又能搜獲賊匪及私窖銀米之道員宋文型。知府顧葵、陳玉麟俱著賞戴花翎。一併議敘。至孫永清駐劄邊界。籌辦接濟糧運。亦屬妥速。著交部議敘。所有孫士毅奏到各摺俱著發鈐。並通諭中外知之。○又諭據保寧等奏稱塔爾巴哈台守卡侍衛達杭阿之家人虎兒將伊家主搭推倒地。將頭額角連毆兩三拳一案。經永保審斷發遣伊犁。應改定將虎兒立決。示懲等語。所辦是。凡家下人等不服家主使令。或酗酒生事者。即應發遣。且虎

兒膽敢將伊家主達杭阿。撻倒毆打。情殊可惡。若不重加懲治。不足以爲新疆惡劣家奴示戒。今永保只將虎兒定以發遣。給厄魯特爲奴。甚屬姑息。永保久經外任。豈果不曉此例。永保著加申飭。外虎兒。即著照保寧等所請。斬決示衆。○諭軍機大臣。曰。孫士毅奏官兵連日乘勝勦殺。現已渡過富良江。克復黎城一摺。所辦可嘉之至。不能筆宣。據稱十九日黎明。抵富良江。先覓農船。竹片載官兵百餘人。與賊在江心打仗五六次。痛殺賊衆。並奪取賊船一隻。因船筏先爲賊搶占。而沿江竹木。又被賊砍盡。不能徑渡。因於昏夜之中。將覓獲船筏。及搶得賊船一隻。儘數配載。祇數二百餘人。渡江之用。即令許世亨。張朝龍。尚維昇等。督率官兵三百餘人。於二十日五鼓。直衝彼岸等語。此係從前西路用兵時。阿里衮救援舒赫德之策。孫士毅向在軍機處行走。素所知悉。今用之甚爲得當。此次官兵

殺賊奮勉。可快之至。而孫士毅籌辦一切。悉合機宜。更堪嘉獎。又據奏官兵勦賊喫緊時。不令官兵割取耳級。致誤追殺。是以殲賊甚多等語。所辦更是。不料孫士毅以讀書之人。竟能具此識見。朕覽之以手加額。慶國家得一全材。好大臣。較之平定安南。尤爲快意。此次孫士毅帶兵出關。未及一月。即能痛殲賊匪。收復黎城。實爲迅速。且賊匪經此一番殲戮之後。魂魄俱喪。再行整師前進。勢如摧枯拉朽。是辦理安南一事。大局已定。成功業過大半。自無難剋期蕆功。現已明降諭旨。將孫士毅先行晉封公爵。並賞給紅寶石頂一俟紅旗奏到。再加賞四團龍褂及黃帶紫韁四開襖袍。以昭懋賞。此事雖由孫士毅調度一切。而許世亨帶兵進剿。亦屬奮勉。已一併賞給于爵矣。至黎維祁於大兵將到之時。尚不敢前赴軍營。直至收復黎城。夜間方來見孫士毅。看此光景。竟係一委靡不振無能之人。

全仗孫士毅為之主持安頓。計發往勅印。此時自己接到。黎維祁襲封之後。又得天朝勅印。崇封自足以資鎮撫。而孫士毅現籌諸務。皆能周妥。所有安設糧臺。及添調官兵等事。著傳諭孫永清。圖薩布。即照孫士毅所奏。妥速辦理。並傳諭烏大經。即速沿途探聽。自都竜帶兵徑赴廣南一帶會剿。富綱仍遵昨旨。於都竜一帶駐劄。遙為聲援。不可拘泥前進。孫士毅辦理此事。力肩重任。不避艱險。斷無慮其半途而廢。致滋疎縱。但用兵固不可稍存畏怯。然知進而不知退。亦非大將計出萬全之道。現在黎城已經收復。復傳旨將該嗣孫勒封國王。於天朝字小存亡。體統已得。茲阮惠畏懼逃竄。若仍在安南境內潛匿。自不難於設法圍擒。以絕後患。倘竟潛逃入海。或竄匿附近他國。又不值以內地錢糧兵。為屬國搜緝。遁逃深入窮追。久耽時日。此事在他人。朕方加之策勵。而孫士毅向來遇事勇

往。為朕素知。又不得不豫為指示。俾臨期有所遵循也。又據奏黎維祁襲封後。請即赴京。師謝恩等語。如阮惠等業已擒獲。該國王無內顧之憂。即令其將國事畧為安頓。俟五十五年。親自赴闕謝恩。恭祝萬壽。若阮惠尚在潛逃。則黎維祁振作自強。以禦外侮。不可輕離遠涉。止須令伊子或親弟一人。代為赴京謝恩。此事就孫士毅奏到情形而論。歲功全局。已有八分。明歲新正。重華宮聯句。已將此事命題。特一併諭知。該督自必同深慶忭。計期迅奏膚功。仰受渥眷。○以陝西延榆綏道恩明。為甘肅按察使。○戊戌諭前經降旨。直隸解到旗租銀兩。足敷普賞八旗兵丁一月錢糧。即行普賞一次。現在直隸解到租銀。雖不足敷賞資之用。但念該兵丁等。寒冬歲暮。生計維艱。著於節年積存項下。撥補足數。加恩普賞八旗兵丁一月錢糧。俾生計益臻充裕。以示春祺錫慶。有加無已至意。該部即遵

諭行。○諭軍機大臣等據達福奏格綑額到和闐後有筆帖式代伊向阿奇木伯克邁瑪第敏索借普爾錢文。經綿格詢出格綑額佯為不知。僅將錢文退還。並未究辦。臣即告知塔琦。塔琦往巡和闐。錦格亦曾面告。亦未究辦。請將此事交明亮查辦等語。此事大奇。前據塔琦奏到格綑額婪索伯克等銀物一案。朕即降旨交塔琦審明定擬具奏矣。今覽達福所奏。是格綑額所為。塔琦早有所聞。竟爾置之不辦。若至和闐又復瞻徇。不肯徹底根究。亦未可定。明亮現辦薩木薩克之事。不便前往。著交福崧速赴和闐。將格綑額所為。務須徹底根究。秉公定議具奏。此時塔琦若能逐一究明。據實辦理。即行寄知福崧。令其回任。但達福人本糊塗。無能。今覽其所奏。尚不致於荒唐。著將原摺及朕所降諭旨鈔寄福崧閱看。令其認真查辦。不可稍有偏袒。審明後亦著迅速具奏。○又諭據巴忠參奏慶麟

占據唐古忒等處地方。挖河乘船遊玩。並造園舍亭臺。令兵丁等演戲各款。前因慶麟雅滿泰辦理已勒布一事。錯雜無序。而慶麟復敢於朕前飾詞巧奏。已將慶麟革去公爵。降為藍翎侍衛。尚未知伊如此妄為。今閱巴忠此奏。是治伊之罪。不啻上天示意於朕躬。實為可畏。但所奏各款。內如止於挖河造園演戲等項。不過年輕任性。猶不至關係緊要。倘有姦宿番女并濫行貪刻之事。尤當從重辦理。著傳諭巴忠抵藏時。嚴加審訊。若慶麟祇係年少習氣。縱意遊觀。即在該處枷號示眾。倘此外復有貪淫劣蹟。即當奏明正法。巴忠務即審訊明確。據實奏聞。再已勒布滋擾一案。皆因慶麟雅滿泰種種辦理不善。以致貽誤至此。昨據成德奏伊等辦理糧務。又復遲延怠玩。是以令慶麟在章京上効力行。走雅滿泰亦降為頭等侍衛。發往後藏辦理糧餉。令巴忠於舒濂未到以前。

接管駐藏大臣印務。今已忠所奏。通與朕旨相合。現在雅滿泰亦當審問。已忠且不必往鄂輝成德處。幫辦勦捕事宜。著即駐劄前藏。秉公辦理一切。○又諭據已忠奏慶麟摺內。有已勒布於去歲呈請納貢。該大臣等未經具奏等語。此事雖未知真假。如果屬實。大兵至彼。或伊等又求進貢。亦未可定。鄂輝成德。至彼時。不妨詢問該頭目。倘果有情願納貢之事。即為允准所請。此事更易完結。著傳諭鄂輝等妥為留心辦理。○又諭據已忠奏慶麟各款。已降旨令其審明辦理。但思駐藏大臣等所住之房。係從前珠爾默特納木扎勒所蓋。原有園亭。并闢多栽樹木。引水入內。後因入官。作為該大臣衙門。歷任駐藏大臣。俱畧為修葺。慶麟年輕。或更加以粉飾。尚無關係。即買松石等物。如係發銀交唐古忒轉買。亦屬事之所有。著再傳諭已忠慶麟。若止此數款。尚可毋庸深究。即將伊辦理已勒

布一案。種多錯謬。及遲誤糧米等事。定罪完結。倘審有姦宿番女及肆意貪刻各情弊。再行從重定擬具奏。至駐藏大臣二人。從前原係同住一處。自珠爾默特納木扎勒起事後。將伊房屋入官。始分兩處居住。若令照舊同住一處。則彼此商辦事宜。以及稽查情弊。耳目較近。自更有益。著鄂輝成德已忠等於辦理善後事宜時。將駐藏大臣等。仍令一同居住之處。一併入議奏聞。○已亥諭據惠齡奏湖北藩司衙門失火。燒燬科房七間。門房一間。文卷均多被焚。請將布政使陳淮交部議處等語。陳淮現在荊州辦理工賑事務。其疎防處分。尚可從寬。陳淮著免其交部。其書吏人等有無別項情弊。著該撫嚴行訊明。究擬完結。○諭軍機大臣等。從前駐藏大臣所居。聞係三層樓房。樓高牆固。即偶有意外之事。易於防守。而該大臣等同居一處。彼此商辦事務。自有裨益。已令鄂輝等於辦理善後事

宜時。妥議具奏矣。至兵丁作為優人一節。尤大不可。駐藏兵丁特為防守地方。平日自當演習武藝。倘有不肖兵丁私學唱戲者。大臣等尚宜嚴禁。豈可反令改作優伶。此不過該大臣等不理政事。徒借此消遣煩悶耳。試思駐藏不過三年。便當撤回。何悶之有。即或間居無事。令兵丁等學習騎射。演試鎗礮。不惟可以消遣。並可操練兵丁。何念不到此。而徒以游戲為事耶。嗣後該處除商民唱戲。毋庸禁止外。倘該大臣等仍有聽兵丁演戲者。朕必從重辦理。又六月內。因慶麟服滿。演劇一款。尤為不堪陋習。况慶麟於六月服滿。而令兵丁演習。係在伊服滿之前。豈復尚有人心者乎。再噶布倫索諾木旺扎勒辱罵達賴喇嘛。並向已勒布商頭哈瑚奇索物件。以後已勒布起事。索諾木旺扎勒畏懼服毒身死一款。倘索諾木旺扎勒果有向商頭苛求情事。以致結仇起釁。現雖其人已死。而其子亦斷

不可錄用。此事務當徹底清查。且索諾木旺扎勒如何辱罵達賴喇嘛。如何向已勒布商頭索取物件。必有聞見之人。即伊服毒而死。亦是否確有證據。一經查察。無難悉得實情。此案俱係已忠叅奏。已忠不可以虛為實。欲踐前言。亦不可有意消弭。復圖見好。現在審訊此事。亦無甚緊要。鄂輝成德竣事後。必回前藏。俟伊等到時。會同已忠秉公逐一查辦。不可稍有瞻顧。爾等若不據實具奏。經舒濂至彼查出。恐不能當其罪也。○予故多羅恒郡王永皓祭葬如例。謚曰敬。○庚子諭熱河滿洲官兵。自駐防以來。歷年已久。生齒日繁。而此數年一切官差。均各勤勉。著加恩嗣後伊等每季應得半分米折銀。每石著照一兩四錢折給。○諭軍機大臣等。昨因琅玕奏浙省歲時豐稔。穀價平減。請不拘年限。乘時採買。以補倉儲等語。所辦甚是。已降旨通諭各督撫。酌量情形。仿照辦理。本日據浦霖奏湖

南中米價自一兩一錢四分至一兩四錢八分。甚屬平賤。民間穡事屢豐之後。蓋藏本屬充盈。現通行出示曉諭。一切概從節儉。以期家給人足等語。湖南省屢歲豐收。米價一律平減。若不豫為調劑。恐有穀賤傷農之慮。朕意若該省倉儲正須買補。為數較多。自應先儘本省採買。若本省倉儲本屬足數。或採買無多。可以接濟隣省。則湖北安徽江西三省本年被水之區。收成不免歉薄。而該三省又皆地居湖南下游。一水可通。腳價亦不至多費。著傳諭畢沅書麟浦霖等。即彼此通盤札商。如湖南米石充裕。可敷就近何省採買之用。即酌量數目。先咨會浦霖查照。再派員赴湖南採辦運回。則各省倉儲既可乘時補足。而湖南亦不至有穀賤之患。自為一舉兩得。若湖南僅敷本省買補。而江西湖北安徽無須採買接濟。則又當據實奏明停止。此事惟在各督撫等體察情形。隨宜妥辦。不必固有

此旨。稍存遷就也。○又諭本年安南黎維祁母妻等內投時。被賊兵追逼。在斗與隘對河喊救。該管官員並不拘泥。即將該眷屬等收入隘內。免致賊兵戕害。所辦尚屬可嘉。已有旨將該管之知府陸有仁通判陳松於事竣後送部引見矣。第念該眷屬喊救時。自必先有守隘兵丁聽聞。再行稟報。該管官員。若彼時該兵丁等見賊兵追逼。因非內地之事。驟匿入隘。付之不理。則該眷屬等不免為賊所

戕。今該管官員已准送部引見。其兵丁等亦不可不加以獎賞。著傳諭孫永清。即就近查明。係何兵丁稟報。酌量賞賚。其該管營員如果認真出力。亦一體送部引見。以示獎勵。○以廣州將軍存泰。署正黃旗漢軍都統。鑲黃旗護軍統領善德。為廣州將軍。調正黃旗護軍統領舒亮。為鑲黃旗護軍統領。正紅旗護軍統領愛興阿。為正黃旗護軍統領。以正紅旗蒙古副都統台斐英阿。為正紅旗護軍統

領○辛丑諭據塔琦等奏稱葉爾羌阿奇木伯克貝子職銜色提巴爾第病故等語色提巴爾第感激朕恩一切奮勉昨據塔琦等奏伊患病朕即賞藥調理冀其速痊茲聞溘逝深為悼惜著加恩賞銀五百兩料理喪事所賞銀兩即在該處庫項內動撥給與所出貝子職銜公爵即著伊長子邁默特阿布都拉承襲葉爾羌阿奇木伯克員缺緊要著伊斯堪達爾調補其喀什噶勒阿奇木伯克員缺著邁默特阿布都拉補授○諭軍機大臣等安南內訌一事阮惠等攻破黎城其地方全為所占黎維祁已無寸土眷屬顛沛流離故關籲救天朝將伊母妻收留安頓孫士毅親率大兵出關致討屢次克捷未及一月即將黎城收復仍立黎維祁為國王於宇小存亡之道實為盡善盡美超越千古即此已足歲事徹兵是以孫士毅奏到時即明降諭旨將伊晉封公爵並賞給紅寶石帽頂以示酬庸

但前據該督奏稱俟籌辦臺站事宜就緒即領兵前赴廣南進搆賊巢等語計該督拜摺距今又已兩旬想此時早已帶兵前進若事機大順竟能迅擣賊巢將阮惠等速行擒獲該督自不肯因有此旨於功屆垂成之際轉滋疎縱致貽後患若此旨到時阮惠已經避匿海洋或竄入他國自不值將天朝兵力久駐炎荒為之搜緝遁逃耽延時日孫士毅即應遵照前旨妥為安頓傳諭該國王振作自強並派該國有能為可恃之人督率土兵等實力防守以禦外侮孫士毅即可徹兵回粵倘黎維祁不能自立仍復委靡廢弛過三五年後又生外患則是該國王自貽伊戚斷無屢煩天朝兵力再為恢復之理至孫士毅酌定徹兵時應豫行飛咨烏大經以便滇粵兩路同時並徹勿致彼此參差粵省徹兵而滇省尚復深入此為最要其未經徹兵之先烏大經一路不妨遵照前旨設法離間檄諭招

致明歲新正重華宮聯句已將戡定安南命題著即錄寄孫士毅閱看該督係曉事之人於進退緩急機宜自能酌籌妥善迅速奏報竣事同迂新禧也○調正紅旗漢軍副都統穆精阿為鑲紅旗滿洲副都統以署鑲紅旗蒙古副都統富銳為正紅旗漢軍副都統○予故閩浙總督李侍堯祭葬如例謚恭毅○士寅

上御太和殿視朝文武陞轉各官謝恩○諭刑

部覈題四川省孔張氏推跌前妻之子孔文元落河身死一案將孔張氏照繼母毆殺前妻之子其夫現無子嗣律擬絞監候已依議行矣謀殺幼孩之案若在他入即當立置重辟因有繼母名分是以定例止擬絞候將來辦理秋審時若將該犯子勾則孔張氏係孔文元繼母乃為其子抵償於名分究有關礙然一經免勾數年後仍得照例減等收贖與其夫完聚生子安享家產是使兇悍之婦竟

得遂其謀占之私亦不足示懲儆而全幼穉著交刑部堂官查明凡有此等繼母毆殺前妻幼子者雖經免勾之後仍永遠監禁遇赦不赦聽其夫另行婚娶所有孔張氏一案即照此辦理著為例○諭軍機大臣等前因進剿安南官兵打仗得勝降旨普賞一月錢糧並令孫士毅查明出力者加賞一月錢糧以示鼓勵本日召見廣東右翼鎮總兵趙邦詔據奏此次調派粵兵內其自臺灣剿賊回營又復告請前赴安南者甚多等語該兵丁出征臺灣回營未久一聞調兵進剿安南不憚遠涉踴躍請行甚屬急公可嘉著傳諭孫士毅即查明前曾出師臺灣兵丁今復自請前赴安南者於原賞錢糧外再加恩各賞一月錢糧

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十八

實錄卷一千三百十八

三十九

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百十九

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄次臣慶桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級軍功內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十三年戊申十二月癸卯諭軍機大

臣等前屢經降旨諭知富綱不必親往止須
令烏大經帶兵前進為孫士毅聲援昨據
孫士毅奏粵西一路官兵屢次克捷於十一
月二十日收復黎城敕封黎維祁為國王是
此事大局已定昨又有旨諭知孫士毅如賊
匪遠颺即應照會烏大經以便同時撤兵富
綱等自因未接屢降諭旨又未得收復黎城
信息故有此奏現在大功指日告竣富綱豈
可復存貪功之見冒險前進且雲南一路兵

數本屬無多。道路又復險遠。萬一孤軍深入。賊人繞至後路。侵軼滋擾。不但富綱。烏大經。俱係大員。關係甚重。即微末員弁。亦不宜稍有疎失。若富綱貪功涉險。或致損傷威重。則非惟無功而轉有罪矣。著傳諭烏大經。於途次務加小心防範。並探聽孫士毅信息。以為進止。斷不可稍涉冒昧。富綱如已回至都。則已。如尚未轉回。不拘何處。接奉此旨。即行停止。前進。揀擇寬廠。扼要處。所帶兵屯駐。為

烏大經聲援。並稽查糧臺後路。以防賊人抄截。○以革退一等公慶麟弟官惠。故一等子常安弟永住。三等子積福子福祿各襲爵。○甲辰諭。正白旗滿洲部統將綏遠城達沖阿所遺騎都尉員缺。承襲。緣達沖阿係軍政年老疎懶。參革之員。按吏派揀選正陪。將達沖阿之子擬以列名奏請承襲。凡世管佐領襲替世職人員。因罪參革者。襲替時其子孫不應列入。仍於出缺之長房支派內。統行揀選。

擬正。其餘支派。及出缺之支派內。統行揀選。擬陪列名。雖係相沿成例。因當初並未明晰其罪之輕重。故入旗大臣。於世管佐領襲替世職事件。均遵照此例辦理。若不較其罪之輕重。概不與以承襲。則全無分別。於情理未協。嗣後凡係因私罪特行參革者。承襲佐領世職。仍依舊例出缺之子孫。不與承襲外。其八法參革人員內。若祇因年老有疾等項。以及因公墾誤參革者。尚非私罪可比。若概著

伊等子孫承襲。又至漫無區別。將此交八旗都統。嗣後將軍政因年老有疾等項。以及因公墾誤參革人員。世管佐領襲替世職事件。若係伊祖父承襲三四次者。仍給參革人員之子擬正。若起初並非由伊祖父連次承襲。由別支派襲替者。出缺之子只與列名。今達沖阿所遺騎都尉員缺。係伊一支連襲四輩。即著伊子馬甲德成承襲。將此著為例。永遠遵照辦理。○諭軍機大臣。曰。成德於十一月

初六日至第哩朗古督兵蹕路前進。至今已逾一月。並未續有奏報。必因該處雪大封山。致多阻滯。但我兵既不能進。取賊匪又聞風遠遁。即傳令伊等頭目來營。辦理定界等事。亦恐為冰雪所阻。不能前來。藏內辦出糧餉。祇足供四月之需。倘俟積雪融化。始能辦理完竣。必遲至明年二三月間。前藏米糧既難接續。而雅滿泰所奏後藏豫備米麩牲畜。是否足敷接濟。亦當先期酌覈。以期有備無患。且藏內除現存糧食外。未識更能採買若干。若因屢經採買。價值倍昂。或唐古忒人衆糊塗。不如保護伊等之意。反以騷擾為嫌。亦未可定。已忠現在管理駐藏印務。自應酌量情形。豫為妥協辦理。著傳諭鄂輝成德已忠等將第哩朗古等處之雪。每年何時融化。此事何時始能完結。現在前後藏辦出米糧牲畜。能否敷用之處。悉心查覈具奏。若除現在存糧外。不能再行採買。內地距藏窩遠。又斷難

設法運送。或暫為徵兵。或另募良策。總期於事有濟。鄂輝成德已忠等務須熟商妥議。斷不可使大兵久駐於藏。滋擾唐古忒番衆。亦不可因此苟且了事。致賊匪不知所懲。朕因此甚切焦思。著速行覆奏。以慰廑注。○以故一等公扎蘭泰子英俊。二等伯徹靈達史子伊昌阿。二等子富勒赫子珠爾嵩阿。各襲爵。○乙巳。

上御乾清門聽政。○諭軍機大臣等。據保寧奏。

伊犁惠寧城烏鎗內筒細準頭平常者八百餘桿。請由京城照數賞給。著照所請。賞發八百桿。給兵丁操演。該處無用之鎗。棄之可惜。並諭保寧能得匠役。即鎔化仍打烏鎗。或鑄礮備用。如不得匠役。即造為農器。不可棄置。○戶部議覆江蘇巡撫閔鶚元奏。揚關由閔徵收盈餘銀兩。較前屆短少。請著落正署人員賠補。得旨。戶部議覆閔鶚元奏。揚關由閔一年期滿。徵收盈餘。比較再上三屆短少銀

三萬二千五百四十餘兩。請著落正署之員。各按經徵月日。照數賠補等語。固屬覈實辦理。第念該關比較再上三屆盈餘。雖有短絀。而比較上三屆所收。尚屬有盈無絀。所有此次揚關由閘短少盈餘銀三萬二千五百四十餘兩。著管關各員。按照經徵月日。分賠一半。其餘一半。著加恩免其賠繳。○丙午。諭皇子皇孫等俱戴紅絨結頂帽。載錫係朕元孫。亦應戴紅絨結頂帽。朕仰承

天庥。臨御五十餘年。現屆八旬。子孫繁衍。五世一堂。洵古來罕有。嗣後曾孫元孫阿哥等俱著戴用紅絨結頂帽。如載錫得子。係朕六代奉字輩來孫。亦著一體戴用。俟分封後。再行量職戴頂。著為令。○諭軍機大臣等。朕前此即慮攻復黎城後。阮惠等畏罪遠颺。不值以天朝兵力。久駐炎荒。為屬國搜緝通逃。耽延時日。屢經降旨。諭知孫士毅。臨期酌量辦理。孫士毅拜發此摺時。自尚未接奉前旨。今據

該督奏。黎城距廣南賊巢。尚有二千餘里。而黎維祁又屬無能。於造船雇夫之事。堅覆不能趕辦。孫士毅續調之兵。以及糧餉等項。尚未出關。俟兵餉齊集。再由黎城起程進剿。已屆春雨時行之際。安南地方。向多瘴癘。倘內地官兵不服水土。致生疾病。尤為不值。此次安南內訌。阮惠等攻破黎城。黎維祁已無寸土。眷屬顛沛流離。敕關額救。天朝將伊母妻等。妥為安頓。孫士毅親率大兵出關。屢次克捷。未及一月。即收復黎城。勅封黎維祁為國王。並送回眷屬。於字小存亡之體。已為盡善盡美。不特書之史冊。足以超越千古。即外藩屬國聞之。亦當同深感畏。是以孫士毅奏到時。即明降諭旨。將伊晉封公爵。並賞戴紅寶石帽頂。以示酬庸。明歲新正。重華宮聯句。即以戡定安南命題。原因此事辦理至斯。已足徹兵定局。若此時必欲窮追深入。而賊巢險遠。萬一稍有阻滯。一時不能迅速擒渠。轉致

欲罷不能。辦理大事之人。必須通盤籌畫。計出萬全。不可知進而不知退。孫士毅當遵前旨酌量情形。或畧進兵。巡其邊界。代黎維祁劃定疆域。設立卡汛。妥為安頓。諭令該國王振作自強。並派該國有能為可恃之人。率領土兵人等嚴密防守。以禦外侮。孫士毅即趁巡查邊界之便。徹兵回粵。不可遽由黎城撤回。致賊知我虛實。其滇省一路。仍一面知照富綱。烏大經。以便同時並進。至現在孫士毅固不必統兵深入。但據奏該國從賊地方。接到檄文。多已紛紛投出。而阮岳。阮惠。弟兄又不相能。若孫士毅竟駐劄黎城。不為進取之勢。恐賊匪窺探官兵不復進討。未免觀望遷延。朕意目下孫士毅宜畧為前進。烏大經亦帶兵赴廣南一路。遙為粵西聲援。仍探聽孫士毅信息。以為進止。再孫士毅所奏詳詢該國臣民。俱稱阮岳甚恨伊弟阮惠。與大兵節次打仗。均係阮惠所為等語。此語係得自黎

維祁。抑係得自該國臣民等。並著孫士毅遇便覆奏。○戶部議覆閩海關徵收盈餘銀兩。較前屆短少。請著落管關各員賠補。得旨。戶部議覆閩海關一年期滿。徵收盈餘。比較上兩屆短少銀五萬三千七百二十餘兩。請著落管關各員。按經徵月日。照數賠補等語。因屬照例辦理。第念上年冬間。商船裝載赴臺糧餉。今春又復配載凱旋官兵。兼之臺郡所產貨物較少。以致客稅無多。盈餘短絀。尚屬有因。所有此次閩海關短少盈餘銀五萬三千七百二十餘兩。著魁倫。徐嗣曾。伍拉納。各按經徵月日。賠補一半。其餘一半。著加恩寬免。○補行廣東省乾隆五十二年軍政卓異官五員。龍乾官三員。年老官三員。分別議敘處分如例。○丁未諭。據畢沅等奏。查勘廣濟黃梅二縣隄工。向係民修。今請暫行借帑興修。俟事竣分年攤徵歸款等語。本年湖北荊州被水地方。所有萬成及監利等處隄工。俱

經發帑官為修築。今廣濟等縣隄。雖係例應民修之工。但念該處被災之後。民力未免拮据。此次廣濟黃梅二縣隄工。估需銀共二萬八千一百餘兩。均著加恩動用官項修築。俟將來再行照舊辦理。以示朕加惠災區一視同仁至意。又另片奏廣濟縣所屬之武穴鎮漫口一處。業經修築。詢係該處監生張植鵬率眾興修等語。張植鵬首先集事。捐資修復。尚屬急公。著賞給縣丞職銜。以示鼓勵。○

諭軍機大臣等。此次進剿巴勒布賊匪。道路遼遠。糧運最關緊要。若由內地運往。難資接濟。因令於西藏地方。就近購辦糧石。以供大兵口食。此係朕特降諭旨。籌辦軍糧。方能充裕。今該督奏分飭西藏糧員趕運。務使糧隨兵轉等語。所奏不明。且似有影射居功之意。然此尚係小事。至大兵自西藏凱旋沿途均需糧石。所有口外各臺站。著傳諭李世傑豫為籌畫。務使途中存糧充裕。克敷凱旋官兵

支用。毋使稍有缺乏。○又諭。前已屢經諭知孫士毅。如阮惠遠颺。勦捕需時。不值以內地兵力久駐炎荒。為屬國搜緝遁逃之計。昨據孫士毅奏。廣南道路險遠。大兵難以遠行。深入情形。又有旨諭。令孫士毅止須畧為前進。如阮惠畏懼不出。乞降具結。認罪求赦。亦足歲事。即可乘巡查邊卡之便。徹兵回粵。著傳諭孫永清。隨時留心探聽。一得孫士毅徹兵信息。亦當將內地續調兵丁。及雇備人夫採

買馬匹等項。一併即行停止。○戊申。

上幸瀛臺。○土爾扈特郡王車凌德勒克。和闐所屬玉隴哈什四品阿奇木伯克莫羅穆努斯朝鮮國正使李在協。副使魚錫寔。暹羅國正使怕史滑里遜通亞排那赤突。副使哪噶汶悉呢噴。噠無安。臺灣屋鰲總社番頭目華萬哇。哨阿里山總社番頭目阿巴哩。大武壠總社番頭目樂吧。給傀儡山總社番頭目加六賽等。於西華門外瞻覲。命隨至瀛臺賜食。

○諭軍機大臣曰。劉永福奏已未完結各案摺內。稱辦理橋道尚未造冊請銷者七案。修葺城工有奉部駁及尚未報銷者二案。動用錢糧有奉部駁及尚未報銷者三十二案。河道工程尚未報銷者一案等語。外省辦理案件。自應上緊趕辦。依限完結。今直隸本年未結各案。竟有四十餘件之多。足見疎忽。現在梁肯堂業經回任。著傳諭劉永福。即督率梁肯堂嚴飭各屬。將未經報銷各件。速行上緊催辦。務於限內完結。毋得再有延宕。○又諭。昨據孫士毅奏。廣南道路險遠。大兵難以遽行深入。已降旨令孫士毅祇須畧為前進。設法招致。萬一阮匪畏懼。出具印結。認罪乞降。亦足蔽事。並諭知孫永清探聽孫士毅徵兵信息。再將應辦人夫馬匹等項。即行停止。今聞孫永清奏到軍營糧臺需夫至十餘萬名之多。本省再難添備。必須廣東協濟。看此情形。黎城至廣南。程途遙遠。竟有礙難辦理之勢。

似不必再於各處紛紛徵調。致滋勞費。著傳諭孫士毅接到此旨時。如已自黎城起程進兵。即酌量巡查邊界。趕使徵兵。倘因人夫糧餉未齊。尚未前進。該督當諭令該國王振作自強。並妥為安頓。嚴設邊防。亦即徵兵回粵。並一面知會滇省一路官兵。同時並進。所有廣東協濟人夫之處。著孫永清圖薩布覓可毋庸辦理。○又諭。據雅滿泰奏。請將索諾木旺扎勒所遺扎薩克一等台吉。令伊長子索諾木旺堆承襲等語。昨據已忠參奏。索諾木旺扎勒曾向已勒布商頭哈瑚苛索物件。以致已勒布懷恨興兵。此事如果屬實。使伊身尚在。即應治罪。豈可復令伊子承襲台吉。即或已忠此奏。雅滿泰尚未聞知。但伊駐藏多年。於索諾木旺扎勒如何滋事興戎之處。豈亦毫無聞見。況現當有事之時。凡遇陳奏事件。自應將成德所帶之兵。曾否由第哩朗古覓道前進。并賊勢作何動靜。詳晰奏聞。乃於

此等要事。轉無一語提及。惟滿泰何綱塗至。此若傳旨嚴行申飭。所有扎薩克一等台吉。且俟已忠至彼查明已勒布之事。是否由索諾木旺扎勒釀成。再行定奪。現鄂輝成德。帶兵已至何處。賊匪情形若何。著即迅速奏聞。

○已酉。

上御寧壽宮景祺閣。賜王貝勒貝子公大臣蒙

古王貝勒貝子公額駙台吉等食。○諭安南

內訌一事。阮惠等攻破黎城。其地方全為所

占。黎維祁已無寸土。眷屬顛沛流離。岌關顛

救。經巡撫孫永清奏聞。朕以安南臣服本朝。

百有餘年。最為恭順。特諭令將伊母妻妾為

安頓。優加餽粟。衣履勿稍失所。並命總督孫

士毅星赴廣西。就近籌辦。節據該督奏。檄諭

該國各鎮目厥民等。去逆効順。齊心勦賊。已

紛紛來投。該督復力肩重任。自請帶兵前往。

朕以所見甚正。允從所請。並令滇省亦進兵

會剿。孫士毅於十一月二十八日會同提督

許世亨統率大軍出關致討。阮匪令賊目等

在壽昌市球富良等江岸。安設賊屯。希圖攔

阻。經官兵奮勇勦殺。屢次克捷。將已降復叛

之賊目陳名炳等生擒正法。於江之僻處。設

立暗渡。使賊驚官兵從天而降。聞風膽落。與

朕諭旨指示之處。適相符合。辦理深得機宜。

是以官兵出關。未及一月。即能將黎城收復。

仍立黎維祁為國王。另給勅印。並將該眷屬

等護送回國。於字小存亡之體。已為盡善盡

美。即此原已可嚴事徵兵。因於孫士毅奏到

時。即明降諭旨。將伊晉封公爵。賞給紅寶石

帽頂。以示酬庸。現在阮惠等逃往廣南藏匿。

據孫士毅奏。黎城距廣南約有二十餘里。俟

籌辦臺站事宜就緒。即領兵前往進剿。賊巢

等語。朕思此事黎維祁被阮匪攻逐。國祚幾

絕。經天朝為之恢復。恩逾再造。今黎維祁業

已重邀封立。舉家完聚。阮惠等雖潛竄未獲。

究為屬國之逋逃。且阮匪現逃之所。係在占

城故地原非安南境土。是該國地方。亦經全行收復。自無煩天朝兵力。久駐炎荒。為之搜緝叛臣。防護外侮之理。昨據孫永清奏。自黎城至廣南。應設臺站七十餘處。約用夫十萬餘名等語。但思該國地方僻小。又多瘴癘。一交春令。陰雨潮濕。不特內地兵夫易染疾病。且雇夫至十萬餘名之多。又加以官兵不下二萬。雖糧餉一切。皆由內地辨運。並不絲毫取給該國。孫士毅復能嚴束弁兵。毋許滋擾。第究恐兵夫人衆。查察難周。若在彼久稽。吏民等難免心生疑駭。轉非體恤新造小邦之道。我國家幅幘廣濶。亘古未有。朕臨御五十餘年。平定伊犁。回部。兩金川等處。拓地不下二萬餘里。武功赫奕。計區區廣南賊巢。豈能負固抗拒。然此事辦理之始。原為安南臣服已久。猝被土酋占奪。不得不加征討。為之繼滅存亡。初非利其境土。亦並無好大喜功。窮兵黷武之見。今安南大局已定。阮惠等畏罪

遠颺。不過苟延殘喘。又何必深入窮追。耽延時日。致大兵在彼久駐。於該國反多有不便。自應作速撤回。以示體恤。孫士毅接奉此旨時。若未經起程。前赴廣南。即著妥為安頓。撤兵回粵。如已起程。即代為巡設邊防。令其嚴安汛卡。順道撤回。其雲南一路。亦著孫士毅諮會富綱。烏大經。同時並撤。所有朕此次辦理安南與減繼絕及軫念夷民一視同仁至意。著通諭中外知之。○諭軍機大臣等。據塔琦奏。接奉明亮寄到達福泰奏。格額借用邁瑪第敏普爾錢文一案。從前伊未行奏。等語。格額身為領隊大臣。向所屬伯克借用錢文。甚屬卑鄙。塔琦既向錦格詢出。自應查辦。乃塔琦惟恐邁瑪第敏妄生疑懼。又恐長回衆揭告之風。並未查究。竟不成話。從前新疆領隊大臣內。有卑鄙見小。經將軍奏贊等密奏撤回者。特因並無實據。若諄諄向所屬回衆厄魯特等輾轉詢問。恐長伊等誣告

之習。非欲息其婪索實事也。塔琦業將格綢額借用邁瑪第敏錢文一案詢明並未奏。顯係迴護。尚欲向朕前巧辯耶。著嚴行申飭。此案朕已派福崧前往審辦。此時諒已到彼。塔琦若將此案審訊明確。尚可稍從末減。倘仍不肯據實訊究。有意瞻徇。經福崧查出。恐不能任其咎也。將此傳諭福崧知之。○庚戌上御撫辰殿大恆次。賜蒙古王貝勒貝子會額駙。台吉及土爾扈特郡王。回部伯克。朝鮮國

暹羅國使臣。臺灣生番等宴。○諭軍機大臣。曰。鄂輝奏查看後藏情形一摺。所辦皆是。惟摺內稱成德由第哩朗古進取。為前途通拉山大雪所阻。現在覓道進攻。尚未得收復原界之信。前據成德奏。因雪大封山。躡路前往。其摺係十二月初九日奏到。迄今已閱旬餘。其曾否覓道進攻。及收復聶拉木濟龍等處。總未據續行奏報。或成德聞鄂輝將次到彼。或俟鄂輝到後。會同具奏。亦未可定。總之此

事以疾速成功為要。若官兵在彼久駐。一切糧餉等項。藏內究恐不敷採買。著傳諭鄂輝。務須酌量情形。遵照節次所降諭旨。速為辦理。毋庸在彼久駐。前因慶麟等辦理糧運遲延。已降旨將慶麟降為藍翎侍衛。在章京上効力行。走雅滿泰降為頭等侍衛。速赴後藏專辦糧務。以專責成。所有大兵未徹之前。一切糧運。雅滿泰務當妥協辦理。以贖前愆。○又諭宣光興化兩處。俱為阮惠所占。今經土

目黃文桐。麻允敏等。帶領土兵前往。即將宣光收復。而興化。靈冠。亦俱震懼。潛逃。賊匪似此無能。則兩路大兵。會同夾攻。直搗賊巢。想亦易於辦理。所難者自黎城至廣南。計程二千餘里。道路又復險峻。糧運維艱。恐一時不能源源接濟。況添設運糧站夫。至十萬名之多。既須挽運兵糧。又須帶運人夫口糧。所費不貲。實屬不值。是以節經寄信。并明降諭旨。令孫士毅作速徹兵。但孫士毅徹兵時。應親

面剴切告知黎維祁。以此次安南內訌。該嗣孫已無寸土。不能自行恢復。經天朝發兵致討。兵馬錢糧。諸多勞費。方能代為收復。仍封該嗣孫為國王。重延世祚。舉家完聚。此後該國王宜振作自強。防禦外侮。以冀永承恩眷。即使黎維祁還懷無能。而其臣下左右。豈無一二可恃有能為之人。亦當諭令同心協力。相佐為理。即此次官兵代為收復各地方。該國王俱應遣派親信強幹之人。前往接管撫綏。勿令大兵撤後。仍復為賊所占。倘將來該國君臣。不能交相勉勵。仍前萎靡廢弛。又生他患。豈有復煩天朝兵力。為之戡定之理。孫士毅將此剴切諭曉。並妥為安頓。即可撤兵回粵。並即知會滇省。以便同時並徹。前因宣光興化為賊所占。是以孫士毅收復黎城之信。仍由內地馳遞。未能迅速。今宣光興化業經收復。滇粵兩路聲息可通。將來孫士毅如有知照烏大經之處。自可由安南境內取道。

直達。庶彼此得信較早。辦理自更為妥捷。

壬子。

孝莊文皇后忌辰。遣官祭

昭西陵。

上詣

慈寧宮。

壽康宮行禮。○癸丑。諭曰。巴忠奏。此次七練兵

丁赴藏。徒步越嶺。裹負口糧。不辭勞瘁。請每人再賞銀三兩。以備禦冬衣履等語。七練等

每遇調遣。最為出力。此次衝寒赴藏。口外道

路崎嶇。該兵丁等徒步遠行。甚為奮勉。尤屬

可嘉。著加恩每人各賞銀五兩。以示鼓勵。

○又諭。前因巴勒布賊番侵擾藏界。據慶麟雅

滿奏。奏報藏內唐古忒懦怯性成。未諳軍旅

特派內地將軍大臣帶兵前往。此皆朕矜恤

達賴喇嘛。班禪額爾德尼。暨唐古忒等番衆

故不憚勞師遠涉。以期綏靖邊隅。但道路遙

遠。糧運維艱。從前西藏用兵。即在該處採買

支應。乃慶麟雅滿泰愚昧無知。不思豫為備辦。並未將發價採買之處。遍行曉諭。以致噶布倫等。畏難推諉。將拯救伊等之舉。轉似涉於騷擾。幸朕洞燭先幾。豫料慶麟雅滿泰不能辦理此事。早派已忠前往。相度機宜。宣播德意。今已忠到藏。即向達賴喇嘛。班禪額爾德尼。暨唐古忒番眾。將朕愛憐伊等。代為籌畫萬全。欲令永享敕寧之意。明白宣示。伊等始俱歡忭踴躍。并將慶麟雅滿泰等平日任意妄為之處。一一查出具奏。如修飾衙署兵丁演戲等事。已屬不合。而去歲廓爾喀頭目呈請願進表納款。慶麟等誤聽噶布倫等之言。以其呈詞傲慢。駁回未奏。尤屬乖謬。外夷等願通職貢。邊疆大吏理宜據情入告。其可否准行。候朕降旨。即文詞果有倨傲。亦當奏明定奪。小則訓飭。大則征剿。俱無不可。乃慶麟等竟敢駁回不奏。其意祇因平素噶布倫等。尚已勒布苛派勒索。積怨已久。恐其到京

呈訴。故爾有心欺隱。即此一事。其罪已應正法。姑念慶麟年少無知。被索諾木旺扎勒蒙蔽所致。慶麟著革職。在該處枷號三年。以示懲儆。雅滿泰雖到藏日淺。並未將索諾木旺扎勒查參。亦屬非是。著一併革職。摘去花翎。在筆帖式上行走。至索諾木旺扎勒。酗酒縱惡。勒取高頭物件。此次巴勒布侵藏之事。即伊激成。使其身尚在。自當從重治罪。今伊業已病故。姑勿深究。但所遺扎薩克台吉。豈可仍令伊子承襲。所有索諾木旺堆承襲之處。著即行停止。駐藏大臣印務。前已將舒濂調補。著派普福前往協同辦理。所遺西寧辦事大臣員缺。著奎舒速往接辦。普福俟奎舒到後。即行馳驛赴藏。不必前來請訓。巴忠俟舒濂普福俱抵西藏後。再行來京。現在大兵雲集。將巴勒布賊匪。悉行驅逐殲除。而慶麟雅滿泰亦各分別治罪示罰。自此衛藏寧臨。庶幾可以永享太平。著將此通諭中外。俾咸知

朕意○諭軍機大臣等據巴忠奏到藏後即將訪聞慶麟各款審訊明晰並查辦諸事各摺俱屬妥協除將朕辦理藏務始末及慶麟雅滿泰分別治罪之處明降諭旨外著傳諭巴忠將慶麟藏內所有物件一併查抄以昭儆戒現在前藏之人巴忠毋庸久駐後藏著仍遵前旨即回前藏辦事從前留保任在藏辦理一切事宜雖屬周詳謹慎然未將索諾木旺扎勒等專恣不法查出具奏妥辦今留保住年已七十有餘如再令遠赴該處朕心實有不甘是以雅滿泰之缺已將普福調任巴忠俟舒濂普福先後到藏將一切事務交代明白再行回京亦未為遲至班禪額爾德尼情願暫駐前藏傳習經典可即照所請俟明年六月內再送回扎什倫布現在前後藏紅教喇嘛甚多自不便嚴行禁止但煽聚日久若致黃教漸入紅教則大不可並著密為查察務使兩教畫然不相紊雜方為妥善舒

濂普福到時亦著一體留心稽察毋稍疎懈○是日起
上以歲暮禱祭
太廟齋戒三日○甲寅諭昨據巴忠奏去歲巴勒布頭人情願進表納貢慶麟等因其呈詞傲慢並未奏聞已將慶麟雅滿泰等分別治罪矣今思巴勒布部落本非所屬且向未加以擾害伊既傾心內附欲求進貢何至有傲慢之語此不過因第巴噶布倫等平時妄肆侵漁或於呈內畧為申訴而噶布倫等遂以傲慢為詞希圖掩飾慶麟等隨其衍中竟爾駁回未奏夫使呈訴屬實自應將貪污之噶布倫等嚴加究辦方足以服其心向來外夷內附懇請納貢之事亦所時有邊疆大臣從未有匿不上聞者即各直省遇有訐告大臣事件一經奏聞朕必詳加究察不肯稍涉顛預况以外番向化納款而因控告噶布倫等微嫌遂致隱匿不奏有是理乎此事甚關緊

要。若不徹底查辦。將來相率効尤。尚復成何事體。但巴忠摺內。尚未將巴勒布呈詞如何。倨傲之處。詳晰聲敘。著傳諭鄂輝。成德。巴忠等。即行悉心查訪。務得其實。此項呈詞。經噶布倫譯出。慶麟自己見過。可即向伊詢問。諭以在彼初號。尚屬從寬。此事若再不實言。倘從他人詢出。朕心將伊從重治罪。再巴勒布商頭哈瑚。現尚囚禁藏內。或向彼查詢。亦可探得實情。且鄂輝成德等。不妨將巴勒布賊目喚至。詢其起釁緣由。並告以爾等去年懇請納貢。因該大臣等未奏業經治罪。爾等所遞呈內。究係作何言語。此時若原呈尚在。可即送閱。以便代為奏聞。如有屈抑之處。即當秉公究辦。似此剴切曉諭。伊等自必畢露。愧怍朕所以必欲窮究底裏者。蓋以欺隱之習。不可不防其漸。朕臨御五十餘年。無日不以勤政為念。今雖年近八旬。而惟日孜孜。周或稍懈。於大小臣工功過。一秉大公。至正從不

稍存假借。此眾所共知者。鄂輝成德等。務須仰體朕意。迅速查明。據實覆奏。○諭軍機大臣等。前據孫士毅孫永清奏。黎城至廣南二千餘里。道路險遠。糧運維艱。須安臺五十餘站。雇夫至十餘萬之多。看所奏情形。竟須另辦。已有旨傳諭孫士毅。即酌量作速徵兵。今富綱奏由雲南出口。至黎城已有四十站。若復安站直至廣南。又須增五十三臺。不但滇省官員。不敷差委。須向黔省調取。而雇用人夫。想亦不下十餘萬名之多。如此紛紛徵調。勞費更屬不貲。况粵西尚因人夫難雇。請令粵東幫同雇募。又安能更為滇省代運。現在該國境土。已全為收復。阮惠等畏罪逃回。占城舊地藏匿。計區區賊巢。豈能負固抗拒。我國家威稜遠播。伊黎回部。兩金川等處。俱以次蕩平。若將平定伊黎等一少半兵力。移至廣南。亦無難直搗賊巢。但黎氏近年以來。構亂多故。而黎維祁又復懦怯。無能優柔廢弛。

左右亦無可恃之人。安南雖屬彈丸僻壤。然立國已久。亦未必不關氣運。今其國事如此看來。

天心已有厭棄黎氏之象。此時即將阮惠等擒獲。而黎維祁不能振作自強。安知三五年後。不又有如阮惠其人者復出。豈有屢煩天朝。兵力為之戡定之理。即使不令黎維祁主持國事。而伊子若弟內。又未必有勝於黎維祁之人。朕從來辦理庶務。無不順。

天而行。今

天厭黎氏。而朕欲扶之。非所以仰體

天心。撫馭屬國之道。朕不為也。況黎維祁業經復國。安南大局已定。又何必因屬國遁逃未獲。將天朝錢糧兵馬。徒滋勞費。久駐炎荒。是進勦廣南一事。現在非不能辦。揆之天時地理。人事。實有不值計。此旨到時。烏大經早已抵黎城。與孫士毅會合。孫士毅素性奮勉。固無慮其畏難中止。於功屆垂成之際。反滋疎

縱然伊係曉事之人。亦不至冒昧嘗試。知進而不知退。此事就朕意主於徹兵者。已居大半。若再傳諭孫士毅通盤籌畫。如該督亦以為應徹。即遵照前旨。代黎維祁妥為安頓。即可乘勢撤回。毋致交春陰雨。道路難行。致士卒染患疾病。多有未便。但粵省兵丁。孫士毅可以由巡查安南邊卡之便。順道撤回。其滇省兵丁。現亦前抵黎城。若仍由宣光興化撤回。該處既非內地。又距廣南不遠。沿途未免多增一番防範。廣西雲南本有接壤處所。滇省兵丁。似可亦從粵西進口。再由內地回滇。亦不至多為紆折。如孫士毅與烏大經酌定。滇兵撤回時。應從粵省行走。即一面跟隨粵省兵丁。同時並徹。一面知照富綱。以便將安邊都壘等處防守之兵。就近撤回滇省。不必因宣光興化已經收復。未便棄而弗守。將孤軍在彼久駐。或致稍有疎虞。若孫士毅與烏大經酌滇省官兵。仍可由宣光興化一路

徹回較為便捷亦無不可總在該督籌畫萬全何處妥便即於何處行走不必因有此旨稍為拘泥○乙卯以歲暮禘祭遣官祭

太廟中殿

後殿○諭軍機大臣曰阮惠既經遠竄安南境上除大兵攻克之處北太原宣光興化外其餘如海陽山南山西安廣各道俱經傳檄收復區區廣南一隅豈能始終負固况我國家德威遠布無攻不克若以大兵直搗賊巢原無難殲擒首惡但現在賊人所據之處本係占城故地其黎氏境上業經收復已足完局且現在敵糧既無可因設臺運送計用夫十五六萬名較之官兵轉多數倍微調紛繁尤非政體朕思黎氏立國已久氣運漸衰近年以來構亂頻仍黎維祁怯懦無能而其左右又無可倚恃之人看此情形或天心已有厭棄黎氏之意設將來黎氏又有播越內投之事亦不過將伊等妥為安頓如從

前黃公瓚故事亦斷不必又如此次發兵致詰再為收復是進剿廣南一事此時斷不值辦竟當遵照近日所降諭旨凱旋為是亦不必在彼留駐經月徒稽時日再據孫士毅奏

阮惠萬一聞雲南大兵又進或思投至烏大經軍前乞降等語看來未必此時阮惠如果已向烏大經處投到乞降固屬甚善或此旨到時尚無投出信息孫士毅亦不必等候即趁勢作為巡卡安防將兵撤回並知會富綱

烏大經將滇省官兵同時並撤所有續調之廣東兵三千名已據孫士毅飛咨停止其粵西添雇人夫亦著即速停其雇備以省煩費

○丙辰禘祭

太廟

上親詣行禮○遣官祭

永陵

福陵

昭陵

昭西陵。

孝陵。

孝東陵。

景陵。

泰陵。

泰東陵。○遣官祭。

孝賢皇后陵。

端慧皇太子園寢。○遣官祭。

太歲之神。○

上御重華宮。賜土爾扈特郡王。○部伯克臺灣。

生番等宴。並賞賚有差。○諭軍機大臣曰。魁。

倫奏。查拏天地會匪犯一摺。內稱據漳浦縣。

報稱於該縣高溪地方拏獲僧人行義。供伊。

師父提喜即係父親。因乳名洪排行第二。故。

多稱為洪二和尚。已於十四年身故。其趙。

明德一犯亦稱係漳浦縣人。現已飛飭漳州。

道府查拏務獲等語。此案前據孫士毅奏。訪。

拏會匪。即有洪二和尚傳教之語。嗣據圖薩。

布奏。拏獲陳玉一犯。究出洪二和尚。現在漳。

浦縣地方居住。是洪二和尚實為此案要犯。

雖據伊子行義供稱洪二和尚業已身故。所。

言殊不足信。福康安此時已經抵任。著即將。

行義一犯嚴切根究。洪二和尚實在下落。是。

否身故。並將趙明德一犯一併飭屬嚴拏務。

獲。訊究起會根由。毋任狡飾。將此諭令知之。

○又諭曰。已忠奏。於初六日起程。先赴魯噶。

爾等語。該處現有鄂輝成德相機辦理。諒勒。

賊尚易完事。已忠接奉此旨。著即回前藏。仍。

毋庸在彼久駐。至已勒布去年所遞之呈。前。

已有旨。令伊等向哈瑚詢問。今已忠既赴後。

藏。著傳諭佛智。即就近傳訊哈瑚。如原呈尚。

在伊處。可令藏內能識番字之人。即行譯出。

繕錄進呈。倘業經送回。亦將呈內情詞。一一。

詢明。速行由驛具奏。○丁巳。

上御保和殿。筵宴朝正外藩。左翼科爾沁和碩。

親王恭格喇布坦。旺扎勒多爾濟多羅郡王。

鄂勒哲特穆爾額爾克已拜喇什噶勒當輔
國公哈達錫達什哩公品級一等台吉拉旺
琳沁多爾濟一等台吉敏珠爾多爾濟巴林
親王品級多羅郡王巴圖固山貝子和碩額
駙德勒克公品級一等台吉索特納木多爾
濟和碩額駙布彥圖喀喇沁親王品級多羅
郡王滿珠巴咱爾固山貝子丹巴多爾濟和
碩額駙索諾木巴勒丹端岳特多爾濟奈曼
多羅郡王拉旺喇布坦土默特多羅貝勒索
諾木巴勒珠爾翁牛特多羅貝勒濟克濟扎
布鎮國公達瓦什哩二等台吉三濟扎布已
顏巴圖爾哈斯巴圖爾教漢固山貝子桑濟
扎勒德威多爾濟鎮國公那木扎勒多爾濟
和碩額駙密岳特多爾濟扎魯特鎮國公色
稜扎布郭爾羅斯輔國公恭格喇布坦右翼
喀爾喀和碩親王固倫額駙拉旺多爾濟扎
薩克圖汗齊旺巴勒齊多羅貝勒阿裕爾固
山貝子東岳特輔國公車布登多爾濟拉素

嚨多爾濟扎薩克一等台吉貢楚克瑪克蘇
爾扎布巴勒桑敏珠爾達什琳沁齊素嚨多
爾濟瑪哈巴達僧格喇布坦阿拉善和碩親
王旺沁班巴爾浩齊特多羅郡王齊蘇嚨多
爾濟土爾扈特多羅郡王車凌德勒克多羅
貝勒旺扎勒車凌茂明安多羅貝勒丹丕勒
阿巴哈納爾固山貝子達克丹朋素克鄂爾
多斯固山貝子布延泰和碩特固山貝子布
延楚克四等台吉納旺楚勒提木青海固山
貝子齊默特丹巴厄魯特固山貝子貢楚克
那二等台吉烏勒木濟綽羅斯固山貝子富
爾納四等台吉舍穆烏喇特鎮國公車布登
棟囉布向子輔國公額色尹託克託伊巴喇
伊木茂明安扎薩克一等台吉薩木坦扎木
素及朝鮮國正使李在協副使魚錫定暹羅
國正使帕史滑里遜通亞排那赤突副使郎
喝汶悉呢噶啞無突臺灣屋鰲總社番頭目
華篤哇哨阿里山總社番頭目阿吧哩天武

壠總社番頭目樂吧紆傀儡山總社番頭目
加六賽及領侍衛內大臣等召左翼科爾沁
和碩親王恭格喇布楞旺扎勒多爾濟多羅
郡王喇什噶勒當巴林親王品級多羅郡王
巴圖喀喇沁親王品級多羅郡王滿珠巴咱
爾奈曼多羅郡王拉旺喇布楞土默特多羅
貝勒索諾木巴勒珠爾敦漢固山貝子桑濟
扎勒德威多爾濟右翼阿拉善和碩親王旺
沁班巴爾土爾扈特多羅郡王車凌德勒克
多羅貝勒旺扎勒車凌阿巴哈納爾固山貝
子達克丹朋素克鄂爾多斯固山貝子布延
泰喀爾喀固山貝子東岳特和碩特固山貝
子布延楚克青海固山貝子齊默特丹巴厄
魯特固山貝子貢楚克邦至
御座前賜酒成禮○是月直隸總督劉秉奏上
年參革延慶州知州紀聞歌虧缺存倉米穀
黑豆二萬餘石前經奏明於今年秋後買補
查該州境山路崎嶇商販稀少本年秋收雖

有九分而上年宣化一帶均係被旱災區該
州與災地毗連民間鮮有蓄藏若將前項米
穀全數採買市價增昂且妨民食請先照依
市價採買一萬石餘俟明秋買補得旨如議
行○陝甘總督勒保奏甘省回民自乾隆四
十六年兩年大加懲創之後倍加懾服復經
各屬設立回民義學延師督課臣於查閱各
提鎮營伍時經過回民衆多之處俱各安靜
畏法並飭鄉約塾師實力稽查化導莫不感
激愧懼得旨以實為之弗久而懈也在不動
聲色徐徐化導回豈非民乎○是年追予臺
灣出師陣亡之同知王雋等二員知縣湯大
奎等二員縣丞周大倫一員典史馮啟宗一
員副將赫生額一員遊擊耿世文等七員都
司王宗武一員守備郝輝龍等七員千總蘇
明耀等二十五員把總郭得等七十三員外
委陳威等二員馬甲二格等五名披甲富尼
揚阿等三名祭葬卹賞如例俱入祀昭忠祠

旌表孝子直隸等省郝德潤等四名孝女
 浙江等省王大姑等三口守節合例八旗滿
 洲宗室恒賓妻那拉氏等九十口蒙古科靈
 阿妻色爾圖咸氏等三十口漢軍范樹琪妻
 常氏等二十口盛京駐防于寬妻陳氏等一
 百十七口直隸等省張閱妻齊氏等三百五
 十九口夫亡殉節直隸等省王廷琦妻劉氏
 等十七口未婚守志江蘇等省金仕仁聘妻
 龍氏等十五口百歲壽民婦直隸等省岳壯
 玉等十名口各給銀建坊如例○一產三男
 直隸等省黃世達等十家○會計天下民穀
 數各省通共大小男婦二萬九千四百八十
 五萬二千八十九名口各省通共存倉米穀
 四千二百四十九萬四千一百九十四石五
 斗二升四合一勺

大清高宗法天隆運至誠先覺體元立極敷文
 奮武孝慈神聖純皇帝實錄卷之一千三百十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務高宗純皇帝實錄卷之一千三百二十一

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世宗憲皇帝實錄卷之一千三百二十

皇帝紀錄十四次臣德瑛經筵講官太子少保工部尚書欽天監六次臣曹振鏞等奉

敕修

乾隆五十四年己酉春正月戊午朔

上詣

奉先殿行禮○詣

堂子行禮○御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜皇子皇孫皇曾孫諸

王等宴○諭上年湖北江陵等州縣夏秋被

水成災節經降旨撫賑分別蠲緩帶徵小民

自可不至失所第念今春正賑已畢青黃不接之時民食恐不無拮据而江陵監利兩縣因堤塍潰決被淹尤重更宜格外優卹著再加恩將江陵縣成災八九十分軍民不分極次及監利縣成災八分極貧軍民於正賑之外再加賑兩個月其公安漢川黃梅三縣成災八分極貧軍民並各加賑一個月俾資接濟又公安等四縣內成災七分極次貧八分次貧暨成災六七分之石首漢陽沔陽黃岡廣濟長陽六州縣成災五六分之潛江縣極次貧各軍民並成災五分及勘不成災各屬仍著該督撫察看情形或酌借籽種口糧或減價平糶分別酌辦該督撫等務須督飭所屬實心經理俾災黎均霑渥澤以副朕軫念窮簷普惠春祺至意該部即遵諭行已未諭朕於元旦臨御太和殿受賀見東邊第三四班內有越至甬道上行禮者本日據鴻臚寺堂官奏請將排班之引贊官阿爾精阿交

部議處。並自請交部。而糾儀之御史百慶范。表參奏摺內。則稱係蒙古台吉等行禮錯誤。請勅交理藩院查明議處等語。朝賀大典。鴻臚寺設有引贊官員。御史復有糾儀之責。理應敬謹排定。以肅朝班。乃行禮各官。竟有越上甬道者。該管官員。所司何事。而御史百慶等。尚復覩顏諉之。蒙古台吉等。以卸其不能查察之咎。尤屬非是。百慶范。東阿爾精阿。俱著革職。尚書德保。係管理鴻臚寺大臣。咎實難辭。著革去翎頂。其餘鴻臚寺堂官。都察院堂官。均著交部嚴加議處。內務府奏太和殿後門檻。油飾碰損。值月員外郎文瑞。管領常愷。各罰俸二年。值年內務府大臣金簡。舒文。各罰俸一年。並令將前三殿修飾完整。不准開銷。得旨。太和殿係朕臨御朝正之所。該管大臣官員。理宜修飾嚴整。以肅觀瞻。且朕每年御殿。不過數次。殿後門檻。平時無人出入。油飾何至碰損。該值年大臣。及該管官員。

並不隨時查看。豫行修理。實非尋常玩忽可比。若僅議以罰俸。不足示懲。值月員外郎文瑞。內管領常愷。俱著革職。金簡。舒文。俱著交內務府嚴加議處。庚申。諭曰。徐嗣曾此次前赴臺灣。整頓地方。懲治奸匪。俱能認真嚴辦。盡心經理。甚屬出力。可嘉。雖該撫於逆匪滋事。及臺灣從前吏治廢弛之處。失於覺察。咎有難辭。但究係歷任督撫積玩所致。非徐嗣曾一人之過。現在臺灣地方寧謐。徐嗣曾已內渡回任。著加恩賞戴花翎。該撫惟當益加勤勉。將地方應辦事宜。悉心妥辦。以副恩眷。○諭軍機大臣曰。福康安奏於上年十二月十二日。行抵福州省城。並內地臺灣一體寧謐情形一摺。覽奏欣悅。其摺內稱奎林。萬鍾傑。雖能公同實力辦事。福康安仍時刻留心察訪。如有見聞。即札令妥辦。不敢以現在臺灣民情寧謐。稍存玩忽。莅省之後。一切地方營伍。事事均宜整頓。而倉庫報銷二者尤

屬目前要務。容悉心查覈等語。所辦俱好。福康安在臺灣。勤平賊匪未久。聲威正著。茲復任該省總督。其善良者。自必倍深感服。即不肖之徒。亦必心生畏懼。改悔斂跡。閩省民風。素雖剽悍。有福康安在彼。默化潛移。較之李侍堯自為更勝。現在徐嗣曾亦已內渡。該撫此次在臺灣整頓一切。實屬出力可嘉。已明降諭。賞戴花翎。伊二人務宜同心協力。倍加奮勉。將應辦事宜。次第經理。以期妥協。永

平定二十二年

上

靖海疆。至福康安等奏閩省農田。因冬季久晴。二麥尚未栽插。齊全地。爪雜糧。亦覺待澤。現在率屬祈禱。如一得甘霽。渥雪。其已種之麥。尚可收。如於旬日不得雨雪。當飭屬開倉平糶。不令市價騰昂等語。所辦甚是。目下曾否得有雨雪。麥田能否補種齊全。著福康安等查明據實速奏。以慰廑念。如雨雪稍遲。尚須開倉平糶。以資接濟。自當飭屬妥辦。毋致市價稍有騰昂。將此由五百里傳諭知之。

平定二十二年

上

現屆新年錫慶之時。著隨報賞給福康安。徐嗣曾大荷包各一對。小荷包各二對。以示優眷。又諭。據成德奏。率領官兵自第哩朗古。覓取小路進發。收復宗喀濟龍。即取道克復。聶拉木等語。所辦甚是。現在鄂輝已領兵將到。而巴忠又訪聞賊衆力窮。不耐寒冷。大兵一到。定可即日成功。鄂輝成德。巴忠著每人賞給大荷包一對。小荷包二對。以示優獎。伊等倍當奮勉出力。以期速為竣事。至藏內用過糧石。務即給還價值。以後隨時支用。即如數陸續給價。斷不可稍有遲延。致伊等又滋疑慮。再巴勒布商頭哈瑚。前因形跡可疑。拏獲監禁。如果有潛通信息之事。置之不辦。不足示懲。著鄂輝等於事竣後。明諭哈瑚。此事本應將爾即行正法。姑念外番無知。大皇帝格外從寬。不加深究。將爾送至內地安插。一面即行派員護解至京。其紅帽薩嘉呼圖克圖。於巴勒布之事。先行構釁。後復議和。自不

免有侵奪黃教之意。但紅教相沿已久。傳習亦衆。未便遽行更張。著傳諭已忠。祇須密為留心。防範藏衆。漸歸紅教。不可稍露聲色。俾各相安無事。○辛酉。諭上年江西饒州九江等府屬。秋禾被淹成災。節經降旨。令該撫實力撫卹。分別賑濟。毋致一夫失所。第念今春正賑已畢。青黃不接之時。民食恐不無拮据。著再加恩。將鄱陽餘干。德興。星子。都昌。德化。德安。瑞昌。湖口。彭澤。十縣中之被災九分十分極貧災民。加賑兩個月。其九分十分災次貧。八分災極貧。及南昌。新建。進賢。建昌。四縣中之八分災極貧。均加賑一個月。以資接濟。至成災五六七分。及勘不成災地方。並著該撫察看情形。酌借口糧籽種。該撫務督飭所屬。實心經理。俾災黎均霑愷澤。以副朕惠愛閭閻。普錫春祺至意。該部即遵諭行。又諭據福崧奏。接准保寧等行令。悉心稽查大黃一事。查出阿克蘇地方原存並新到安集延

回子喇哈默特等九人。所販之大黃七千零八十八觔。商民馬成孝等五人。所販之大黃八百七十餘觔。將安集延回子之大黃二十分內給回一分。其餘入官等語。大黃乃俄羅斯必需藥物。恰克圖地方。禁止貿易。以後伊犁喀什噶爾等處新疆地方。與布魯特。安集延地方接壤。由彼處即可通俄羅斯。如不行禁止。勢必由彼處販與俄羅斯。前已勅諭新疆地方。將大黃嚴行禁止矣。昨據明亮等查出大黃一千餘觔。今福崧查出大黃七千餘觔。此皆奸商希圖重利。特從內地販出。售與安集延回子。轉售俄羅斯等地方。若不諭令嚴行禁止。則俄羅斯等仍舊可得大黃。與不禁止。恰克圖貿易何異。此等安集延回子商民。均係犯禁。所有現在查出之大黃。著不必計算。安集延回子商民。給回分數。俱行入官。若仍在彼存貯。倘有稽查不周。必致私售別處。著俱令順便陸續解。至內地。將安集延回子

等令福崧斟酌治罪。逐回內地。以示炯戒。外其商民俱解至勒保處。嚴加治罪。從前喀什噶爾地方查出商民著交與尚安亦行解送勒保處。一併治罪。此項大黃藥物。皆從內地販去者。而哈密吐魯番喀喇沙爾庫車烏魯木齊等處。均未經查出。皆屬疎忽。自應議處。明亮等既首先查出。著加恩寬免。其餘經過地方失察之各城大臣等。俱著交部議處。福崧係獲罪之人。經朕施恩。令伊前往阿克蘇辦事。因何亦慮不及此。著嚴行申飭。仍一併交部議處。○兩廣總督孫士毅奏安南國王黎維祁感激

皇上再造鴻恩。情願親身叩謝。臣以該國初定黎維祁未便即行。令於五十五年春間。叩祝萬壽。先令其子弟來京瞻覲。又土目黃文桐現已一心歸順。臣專弁持札前赴宣光一路。與烏大經商酌辦理。諭軍機大臣等。前經有旨以安南新造。祇須令其親子弟來京謝恩。

俟朕八旬萬壽屆期。再令黎維祁親來瞻覲。今孫士毅所奏。與朕相同。所辦甚好。至富綱等前已奏稱黃文桐業將宣光等處收復。聽候該國王派員前往接管。孫士毅自不必復生疑慮。況現已奏凱班師。更可毋庸計較。著傳諭孫士毅。即遵照節次所降諭旨。振旅徹回。並一面知會烏大經將所帶官兵。同時並徹。毋致稽延時日。○又諭曰。成德奏訪察仲巴呼圖克圖等遣人議和。當以大兵威嚇。並無異詞。求解等語。朕思伊等議和。即無異詞求解。但賊已屢次敗北。薩嘉呼圖克圖等探知內地大兵將至。陽托議和之名。實以送信與賊。俾得及早躲避。已屬顯然。設不遣人前赴賊營。賊匪無從得信。大兵一至。定可痛加勦戮。使之喪膽。完事豈不更易。著巴忠等將此存記。俟事竣之日。面諭薩嘉呼圖克圖及仲巴呼圖克圖爾等。遣人與巴勒布議和。雖托詞以大兵恐嚇。其實借此送信。使該番等

聞風遠道。今事已完竣。姑不深究。爾等務當感激大皇帝寬宥鴻慈。嗣後凡事俱聽命而行。不可仍前任意。致干咎戾。伊等如何登答。並著據實奏聞。壬戌享。

太廟遣肅親王永錫恭代行禮。遣官祭

太歲之神。

上御紫光閣。賜蒙古王貝勒貝子公額駙台吉。回部郡王伯克朝鮮暹羅國使臣臺灣生番等宴。召大學士內廷翰林等茶宴。以戡定

安南復封黎維祁為國王。功成聯句。癸亥。

上詣

雍和宮行禮。諭曰。惠齡奏江夏縣民吳國瑞年一百二歲。孫曾繞膝。請旨旌表等語。吳國瑞壽逾百齡。精神矍鑠。洵為昇平人瑞。特賜御製詩章。所有應得賞賚。及建坊旌表之處。著該部照例具題。

御製詩曰。新正奏疏達金門。率用休徵稱吉言。江夏民登一百二。歲時壽冠眾黎元。康強身

尚行他郡。期艾歲方返故園。統膝孫曾繞四世。勝伊五世見元孫。甲子。

世祖章皇帝忌辰遣官祭

孝陵。諭軍機大臣等。昨據徐嗣曾奏。十一月

初五日。由鹿耳門登舟放洋。已於十二月十一日到省。等語。徐嗣曾前曾奏請。陞見彼時。因李侍堯患病。內地應辦事宜。關係緊要。曾諭令其速行內渡回任。不必急於來京瞻覲。此時福康安業經到任。閩省應辦事宜。有福

康安在彼料理。徐嗣曾近由臺灣內渡。於該處情形。自為熟悉。著傳諭該撫。將撫篆交福康安兼署。即行來京陞見。以便朕面詢一切。

丙寅。

上詣

大高殿行禮。諭軍機大臣等。據奎林等奏。等獲私越挖礦之紀品王義等犯案擬一案。已批交該部覈擬。速奏矣。臺灣淡水地方土產硫磺。向禁民人私採。乾隆五十二年七月內

守備羅禮璋查出私礦四百觔。犯俱逃逸。未獲。今經石門汛弁兵拏獲各犯。究出紀品等在大屯山後夥同煎挖礦土各情節。是內地奸匪偷渡挖礦之事。從前原未能禁絕。今礦山地方雖已據福康安奏明封禁。並於石門要路添設汛兵防守。但該處山場寬廣。汛兵稽察未周。日久或致疎縱。不可不嚴行巡查。防範著傳諭福康安即嚴飭淡水地方文武督率弁兵於近山近海地方嚴密稽查。並著奎林等不時查察。勿任日久疎懈。致有私藏販買之事。以期綏靖地方。是日立春順天府進土牛春山寶座。丁卯諭曰。固倫十公主下嫁喜慶禮儀著於今冬舉行。所有一切應辦事宜著交各衙門查例具奏。又諭據長麟奏商河縣武生白可任八世同居。懇請旌表等語。白可任家門雍穆。子姓蕃昌。累世同居。共敦親誼。允宜加恩褒獎。以為民俗儀型。著賞給御書扁額。所有應行旌表之處該

部察例具題。

御書扁曰。義睦傳家。戊辰。

上以祈穀於

上帝。是日起齋戒三日。己巳。諭軍機大臣等。

據富綱覆奏。現在安邊籌辦接濟糧運事宜。

俟辦有就緒。遵即回至都。及沿邊一帶駐

劄。遙為烏大經聲援等語。粵西派赴安南勦

賊大兵業經屢降諭旨。令孫士毅作速撤回。

其滇省兵丁撤回時。並著孫士毅酌量或由

粵西行走。或仍由宣光原路回滇。本日據烏

大經奏。於上年十二月二十一日。行抵宣光。

料理一二日。即起程前赴黎城等語。計目下

該提督早與孫士毅相見。其如何議撤之處。

自己熟商妥協。即日撤兵。是滇省官兵毋庸

更赴廣南會勦。都。亦無須駐兵聲援。

此時富綱在邊境既無應辦之事。著傳諭該

督即可回至內地辦理地方事件。不必在都

童久駐也。將此由五百里傳諭知之。駐藏

大臣巴忠奏遵旨至扎什倫布。將三處第巴逐加研訊。惟聶拉木第巴桑幹私增稅課。致釀事端。應照唐古忒例。應斬之犯。深透刺字。發往烟瘴桑蓋囚種地方。其濟龍宗喀第巴賊至不能堵禦。擬解至前藏枷號一個月。滿日重責。再發唐古忒近邊地方充當苦差。諭軍機大臣等。據巴忠奏審明聶拉木第巴桑幹私添稅課。以致激起事端。甚屬可惡。其濟龍宗喀第巴雖無情弊。而賊至潰逃。各失所守。俱當嚴行治罪。著即照巴忠所擬分別辦理。以昭炯戒。巴勒布人衆在藏往來貿易。由來已久。一切稅務自有成規。第巴等何得濫行增額。且巴勒布於去歲呈請進表納貢。即因添稅一事。噶布倫等平日受第巴賄賂。恐該番等赴京控告。有心袒護。妄以表文傲慢為詞。寢而不奏。此事若置之不辦。將來復何所底止。著傳諭鄂輝成德巴忠傳集唐古忒人等。明白曉諭。使知該第巴等罪在不赦。故

爾加以嚴懲。朕辦理庶務。一秉大公。即邊遠之區。功罪惟視其人之自取也。鄂輝等現已在第哩朗古會合進兵。此旨到時。恐該處天氣融和。冰雪已化。著即遵照節次諭旨妥為辦理。以冀迅速藏功。庚午。

上詣

南郊齋宮齋宿。○諭軍機大臣等。昨巴忠奏行抵扎什倫布。即向脅噶爾前進。想此時業與鄂輝成德先後晤見。伊三人會同妥商藏事。

自屬更易。但我兵撤回之後。尚恐賊匪乘間竊發。著傳諭鄂輝成德於巴勒布頭目喚到時。告以爾等係邊外小番。何膽敢侵擾天朝藏界。如果不用爾等新錢。必係所鑄之錢。銀色低潮。故藏內人不願使用。試思爾等常在藏內交易。設唐古忒等將醜惡貨物。高擡價值。或於銀內鎔化銅鉛。轉相售給。爾等亦豈甘承受。至加增稅項一事。爾等亦可遣人告知噶布倫。令其查明究辦。何遽妄自興兵。想

因索諾木旺扎勒平日向貿易人等苛求勒索已非一日。聶拉木第巴桑幹又復加稅不止。爾等欲奉表進貢藉以呈訴天朝又被噶布倫等謊言阻止。不上聞。爾等負屈含冤。末由解釋以致激起爭端。此事大皇帝洞鑒隱微。索諾木旺扎勒雖係身故。其台吉職銜不准伊子承襲。桑幹亦已照例擬斬。先行刺字發往烟瘴。並將駐藏二大臣革職治罪。大皇帝天下一體。並不以爾等僻處外番視同膜外。有善必獎。有惡必懲。何所偏倚於其間。今我等帶兵至此。本應痛加勦戮。姑念爾等究係微外番夷。不曉大體。暫為寬恕。若再似此妄為。斷無輕縱之理。必將爾全境蕩平。不留遺孽。後悔何及。如此剴切宣諭。方足堅其感戴畏服之忱。再達賴喇嘛係出家長厚之人。今聞慶麟雅滿泰等治罪。或欲代為懇求。向鄂輝等言及。亦未可定。如有此事。即告以伊二人在彼辦事。種種失宜。是以降旨治罪。

實錄卷三十三

十七

實錄卷三十三

十八

此正大皇帝仁愛達賴喇嘛及整飭衛藏之至意。今達賴喇嘛欲為伊二人邀恩懇請代為陳奏。我等若不據情入告。則亦同慶麟雅滿泰之糊塗設或奏而不准。則又與達賴喇嘛面攸關。此事正難懸定。伊復作何言語之處。並著遇便奏聞。○辛未祈穀於上帝。
上親詣行禮。○辛圓明園。○御奉三無私殿賜皇子皇孫皇曾孫皇元孫諸王等宴。○御山高水長。賜王公大臣蒙古王貝勒貝子公額駙台吉回部郡王伯克朝鮮暹羅國使臣臺灣生番等食。至癸酉皆如之。○壬申。
上詣
安佑宮行禮。○御正大光明殿賜朝正外藩等宴。召左翼科爾沁和碩親王恭格喇布坦旺扎勒多爾濟巴林親王品級多羅郡王巴圖喀喇沁親王品級多羅郡王滿珠巴咱爾右翼阿拉善和碩親王旺沁班巴爾科爾沁多

羅郡王喇什噶勒當奈曼多羅郡王拉旺喇
布坦土爾扈特多羅郡王車凌德勒克多羅
貝勒旺扎勒車凌土默特固山貝子索諾木
巴勒珠爾敦漢固山貝子桑濟扎勒德威多
爾濟阿巴噶固山貝子達克丹朋楚克鄂爾
多斯固山貝子布延泰喀爾喀固山貝子東
岳特和碩特固山貝子布延楚克至御座前
賜酒成禮。○江西巡撫何裕城遵旨覆奏江
西省常平倉穀從前碾運閩米所缺糧額均
已陸續買補。惟進賢餘干建昌三縣偶值偏
災。應俟次年秋熟再行採買足額。至湖南長
沙衡州二府米價與江西省不甚相懸。應請
毋庸前赴湖南採買。得旨自應如此。徒費言
矣。○順天府行鄉飲酒禮。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務黃旗滿洲都統世襲騎都尉軍功七級隨帶加一級年卅加二級軍功紀錄一次臣奏

總裁官經筵講官太子太傅文華殿大學士文淵閣領閣事稽察欽奉

世襲騎都尉軍功加十九級隨帶加二級又加二級臣董誥內大臣戶部尚書兼藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆五十四年己酉正月癸酉

上御正大光明殿賜大學士尚書等宴○諭曰禮部尚書德保因元旦朝賀官員行禮越上甬道未能先事督飭是以革去翎頂但念其宣力年久茲聞溘逝著加恩賞還翎頂其禮部尚書員缺著常青補授至禮部侍郎有襄理科場及學政各事宜鐵保學問較之達椿為優著補授禮部侍郎其內閣學士兼禮部侍郎員缺即著達椿調補○又諭曰孫士毅奏大兵搶渡富良江時水師參將許廷進及

都司富桑阿盧文魁千總王成傑把總張振祥五員或則搶奪過江或則在岸殺賊實屬奮勇向前又副將德克精額遊擊王檀防守後路不避瘴癘督率弁兵往來嚴密搜查署廣東羅定州嚴守田廣西佐雜高廷樞王方維隨在軍營代辦一切緊要事件均能加倍奮勉土田州岑宜棟帶領土兵赴高平牧馬一路進剿以分賊勢將該國太原一路全行肅清尚屬出力以上文武共十員土知州一員可否分別賞戴花翎等語著照所請德克精額許廷進王檀嚴守田岑宜棟俱著賞戴花翎富桑阿盧文魁王成傑張振祥高廷樞王方維俱著賞戴藍翎嚴守田高廷樞並先賞給陞銜頂戴俟軍務完竣該督出具考語給咨送部引見又奏官兵在市球江與賊匪打仗時有副將慶成家人麻圖見慶成奮勇殺賊其時鎗礮如雨麻圖恐傷及慶成直前迎敵為礮子所中洞穿胸背而出日來漸能

起坐飲食。可否量加恩賞等語。麻圖並著照臺灣軍營普爾普家人馬畝什之例。作為另戶。仍賞給護軍藍翎長。以示獎勵。又據孫士毅奏。懇辭公爵。及紅寶石帽頂。并許世亨奏。懇辭子爵等摺。此次孫士毅。許世亨。帶兵出關。能遵照朕節次指示。奮勇殺賊。未及一月。即收復黎城。仍立黎維祁為國王。並送回眷屬。於字小存亡之體。已為盡善盡美。即屬孫士毅。許世亨之功。是以於奏到時。即加恩將孫士毅。晉封公爵。賞給紅寶石帽頂。許世亨賞封子爵。該督尚奏。請俟安設糧臺。諸務就緒。即帶兵直搗賊巢。朕以黎城距廣南道路險遠。需用人夫衆多。恐於安南新造小邦。轉多未便。是以諭令撤兵。由於朕旨。並非孫士毅。許世亨之畏難中止。其收復黎城。辦理妥速。自不可不加恩賞。以示酬庸。朕於賞功罰罪。務歸至當。從不存畸重畸輕之見。至恩賞稍有冒濫。此事前曾降旨。以孫士毅若能搗

穴擒渠。當照阿桂福康安之例。再格外加恩。特昭寵異。今阮惠既未就擒。是以不復加賞。其公爵與紅寶石帽頂。孫士毅自當承受。不必辭繳。孫士毅既毋庸再辭。所有許世亨奏。辭子爵之處。亦著不必。又孫士毅奏。黎維祁咨請代奏。本年三月。先令伊弟黎維祇赴京。代謝天恩。俟國事稍定。懇於五十五年恩准進京。叩祝萬壽。並瞻仰天顏等語。著孫士毅傳諭該國王。務宜振作自強。力禦外侮。將國事加意整頓。酌量可以放心遠涉。即於五十五年。准其來京恭祝萬壽。以遂其瞻仰感戴之誠。將此通諭中外知之。○諭軍機大臣等。前曾屢降諭旨。以黎維祁復國後。不能振作。有為。即使天朝將阮惠等盡為驅除。將來保無更有阮惠其人者。復出滋亂。豈能屢煩天朝兵力。為屬國搜緝逋逃。且黎維祁懦弱無用。左右又無一二有能為之人。為之輔佐。或是

天厭黎氏。朕辦理庶務。惟知順

天而行。是以諭令孫士毅將黎維祁妥為安頓。即行撤兵回省。今據孫士毅奏黎維祁優柔寡斷。勢難久支。而從前為鄭氏輔政用事之人。又希冀鄭氏重興。若輩復得任意操縱。竊取國柄。伺隙而動。看來竟是

天厭其德。果不出朕所料。即此時將阮惠等盡行擒獲。恐亦無用。如此之人。亦何能為護助。祇可聽之。孫士毅現與烏大經會合一處。著

即定期同時撤兵。各回本省。至前已有旨。令伊弟黎維祇先行進京謝恩。黎維祁將國事妥為整飭。於五十五年再行來京瞻觀。此旨孫士毅現在自當接奉。但相距尚有年餘。如屆期該國已經寧謐。不慮外侮侵凌。自當進京祝嘏。以遂其瞻就之忱。但黎維祁如此無用。國事難期整頓。將來能來與否。此時亦難豫定也。○以原任廣州將軍存泰為鑲黃旗漢軍都統。○甲戌。勅諭暹羅國王鄭華曰。朕

惟自古帝王。功隆丕冒。典重懷柔。凡航海梯山。重譯而至者。無不悉歸涵宥。咸被恩膏。爾暹羅國王鄭華遠處海隅。因受封藩職。遣使帕使滑里遜通亞排那。亦突等恭齎方物謝恩入貢。具昭忱悃。良可褒嘉。朕復念爾與緬甸境壤毗連。從前懜駁贅角。牙相繼為暴。侵陵爾國。興師構怨。匪爾之由。今緬甸孟頽新掌國事。悔罪抒誠。籲求內附。已於該使臣回國時。諭令孟頽與爾國睦隣修好。毋尋干戈。爾國亦宜盡釋前嫌。永消兵釁。彼此和好。以期息事寧人。同作藩封。共承恩眷。茲特賜國王綵幣等物。尚其祇受嘉命。倍篤忠忱。仰副眷懷。長膺寵錫。欽哉。○諭軍機大臣曰。福康安等奏拏獲天地會內匪犯陳彪。及首先傳會僧人提喜之子行義。嚴行訊究。據行義供父提喜即洪二和尚。在觀音寺為僧。行義本名鄭繼。後為僧改名行義。伊父在日。曾教過三指訣。原為誑騙銀錢。並無別故。亦未傳與

別人。陳彪則堅供實不知洪二和尚傳自何人。必有不實不盡之處。且所供提喜已無其人。及並未糾入入會之處。更為狡展。現在徹底嚴究等語。天地會匪。膽敢到處傳教。盡惑愚民。必當設法嚴拏究辦。以期淨盡根株。前據圖薩布奏。拏獲陳彪。究出洪二和尚住址。係在閩省。飛咨查拏。旋據魁倫奏。拏獲僧人行義。供稱。伊父提喜即洪二和尚。業經病故。如果病故。其子豈不知葬地。因所供未盡確實。曾諭令福康安等嚴行查究。務得確情。今據奏提喜已無其人。且並未糾入入會。斷無此理。天地會節經查明。起於洪二和尚。今據行義供認。伊父提喜即洪二和尚。是提喜為此案傳教正犯。已無疑義。若指出其葬地。即可完事矣。從前嚴烟所供。起自川省。顯係狡展。著傳諭福康安。務向行義設法嚴刑究訊。伊父所傳之人。除趙明德外。尚有何人。逐一供吐。按名查拏務獲。其提喜一犯。是否尚在。

即或實係病故。亦須得有確據。不可因行義有業已病故之供。遂爾不行深究。以致要犯得以漏網。再逆犯董喜之兄董平。雖堅供董喜從七歲出繼。即到臺灣。總無音信。如今不知去向等語。現在福康安將董平確切嚴訊。所辦是。務將董喜實在下落究出。查拏務獲。即實係在集集埔身死。亦當有確實證據。方足憑信也。將此由四百里各傳諭知之。○以內閣學士扎勒翰充經筵講官。○蠲免福建淡水、臺灣、鳳山、嘉義、彰化五廳縣。乾隆五十三年。額徵穀粟。並嘉義縣。乾隆五十四年。額徵穀粟。○乙亥。上御山高水長。賜王公大臣蒙古王貝勒貝子公額駙台吉等食。翼日如之。○諭軍機大臣等。據巴忠奏。於十二月十九日。已抵齊噶爾。訪得巴勒布賊匪。因不耐寒冷。大半病斃。賊事無難。且接續口糧。甚為充裕。朕覽奏為之稍慰。鄂輝、成德已從第哩朗古小路潛進。此。

時賊匪力窮。大兵到彼。痛加殲戮。諒聶拉木等處。定可不日收復。綏定邊陲。鄂輝成德於事完之後。即會同已忠將一切善後事宜。悉心妥議。立定章程。一面先將兵弁撤回。毋致在彼久駐。現在有何信息之處。仍著速行奏聞。安徽巡撫陳用敷。遵旨覆奏。上年安省被水各屬。均係一隅偏災。民食無虞。缺乏各州縣中米價。自一兩二錢五分至二兩不等。臣已飛札湖南撫臣確查。如湖南水次糧價。比安省稍減。不致多費運腳。臣即酌提銀兩。派員赴運。如湖南穀石僅敷本省之用。或與安省糧價不相上下。即毋庸往返購運。仍責成該管府州。就各地方情形。勒限買補。得旨。是知道了。丙子。調山西大同鎮總兵沐特恩為甘肅西寧鎮總兵。以提督職銜彭廷棟署山西大同鎮總兵。丁丑。諭軍機大臣等。大兵進勦安南。屢次克捷。已將黎城收復。勅封黎維祁為國王。烏大經所帶滇省官兵亦

由宣光一帶。前赴黎城。與孫士毅會合。安南境土全行收復。於天朝字小存亡之體。已極完善。即可撤兵。歲事屢經降旨。諭知孫士毅。令其酌量情形。迅速撤回。茲閱烏大經摺內。有孫士毅尚須移營前進。察看情形之語。或因烏大經處設法招致阮惠等。孫士毅故作欲進之勢。冀其震懾兵威。自行投出。但自黎城以南。道路險遠。糧運維艱。所有派撥內地糧石。及續調官兵。業經孫士毅奏明停止。近日該督所奏之摺。亦未籌及糧運。今若移營前進。待阮惠等投出。未免稽遲時日。所需糧石。又恐難資接濟。著傳諭孫士毅。即當計算現存糧石。足敷官兵口食。及撤兵時沿途支給之用。不致稍有短缺。方為妥善。若此旨未到之前。阮惠果有投出之信。固好。不然。孫士毅仍當遵照節次諭旨。迅速撤兵。並知會烏大經。亦即撤回。不可因有招致投降之策。將大兵久駐該國。致軍糧或有缺乏。命禮部

尚書常青在議政處行走。○轉禮部右侍郎德明為左侍郎。授鐵保為右侍郎。○戊寅諭臺灣出力義民首等俱經覈其勞績分別補用官職。曾中立由文舉人出身業已補放同知黃奠邦由武舉出身前經福康安奏以守備補用。固屬照例辦理。但黃奠邦在嘉義縣守城禦賊五月有餘與曾中立在南路堵禦賊匪同為出力而黃奠邦更為勤苦自應一體加恩用昭激勸。本日兵部將黃奠邦帶領引見朕觀其人尚明白試以文義頗能諳曉著如恩改授同知該員原籍係屬廣東雖居住臺灣已久究非福建內地可比著即發往福建交與福康安等以內地同知酌量補用以示朕獎勵勤勞逾格施恩一視同仁至意。○戶部工部奏前因滇省銅色低潮難供鼓鑄請勅該省督撫揀派道府大員帶同鑪匠來京煎試今雲南委員迤東道恩慶永昌府知府宣世濤等帶匠來京得旨著派阿桂和

琿王杰福長安董誥彭元瑞每日輪流二人前往錢局督率該監督及滇省委員等眼同煎試畢再行分別辦理。○戶部議准湖廣總督畢沅湖北巡撫惠齡奏稱各省屯丁定例四年編審一次但向來止稽查戶口未及田產恐仍有漏匿情弊嗣後編審之時應將各丁田地房產一併查明於各丁戶口之下造冊存案如四年內家道稍有缺乏即可隨時另僉接運仍責令糧道同該管道道府督率衛所等官實力查察倘徇情捏飾即照僉選不實例降二級調用並將該管上司照失於覺察例分別議處應如所請從之。○己卯諭軍機大臣等據明亮等奏稱伊犁解到安集延回子沙哈林達爾等至喀什噶爾將伊等所帶俄羅斯貨物封錮明白曉諭逐出卡外等語自恰克圖停止貿易以來因大黃為俄羅斯必需之物屢經嚴禁乃商人等冀圖厚利知新疆伊犁喀什噶爾等處與哈薩克布魯

特安集延較近。此等之人常在俄羅斯地方貿易往來。將大黃帶往新疆轉售與俄羅斯。不惟可得重利。且將俄羅斯之布勒噶爾。噶登綢等物換來。又賣與伊犁。喀什噶爾等處。所關緊要。已經降旨禁止。並據明亮。福崧各查出商民回子私販大黃數千觔。亦降旨令其從重治罪矣。前此據蘊端多爾濟奏風聞恰克圖自停止貿易以來。俄羅斯等因不得稅銀。伊等屬下增派差務等語。看此情形。俄羅斯等既不能得必需之大黃。且稅銀短少。即增添屬下差使。亦於伊等無益。情急勢迫。自不得不恭順天朝。請開貿易。但不行嚴禁密察。俄羅斯等仍得大黃。則與不停貿易何異。著傳諭伊犁塔爾巴哈台喀什噶爾葉爾羌等處。通俄羅斯邊界之將軍大臣等。飭各卡座嚴行搜查。斷不得將大黃透漏與哈薩克布魯特。安集延人等。并不得將俄羅斯所出貨物帶回。至烏里雅蘇臺科布多庫倫地

方俱與哈薩克俄羅斯接壤。將軍大臣等駐劄之地。雖易於稽察。各卡人等。惟利是圖。潛以大黃與俄羅斯易物。亦未可定。著傳諭復興保泰。蘊端多爾濟務須嚴飭各卡遵行。外仍留心稽查。果有貪利違禁者。一經發覺。即從重治罪。以示懲儆。并傳諭直隸陝甘總督山西巡撫。實力嚴飭張家口等處。不得將大黃令其出口。並飭烏爾圖納遜一體嚴查。○庚辰。

孝聖憲皇后忌辰遣官祭

泰東陵。○辛巳。諭軍機大臣等。現在恰克圖閉關。不准與俄羅斯貿易。而大黃一種。尤為俄羅斯必需之物。昨因新疆一帶。有可通俄羅斯處所。恐致透漏。已傳諭各該處駐劄大臣。嚴密查禁。毋許有私販大黃。違禁透漏之事。現據明亮。福崧奏各在喀什噶爾阿克蘇等處。查出私販大黃。竟有數千餘觔之多。是奸商惟利是圖。而俄羅斯仍得收買禁物。則斷

與不斷等耳。究屬有名無實。是以降旨分別從重治罪。並令實力查禁矣。因思西洋等處與俄羅斯境壤毗連。常通交易。恐奸商等見新疆業經嚴禁。難以偷越。又思從廣東海道將大黃私販出洋。偷賣與俄羅斯。希圖厚利。亦未可定。孫士毅目下尚未回省。著傳諭圖薩布。與佛寧務嚴飭各關口。實力稽查。不特內地奸商。毋許有私販大黃出洋之事。即在澳門貿易洋行。亦不得任其透漏夾帶。將此由四百里傳諭圖薩布。佛寧並諭令孫士毅知之。○壬午。諭軍機大臣等。據鄂輝等奏從通拉山後。可通宗喀小路進攻。現在已到公達山根。即日前抵宗喀。並以次收復濟龍。聶拉木地方等語。已勒布賊衆力窮。無畏大兵勒戮。豈能肆其螳臂。此事自易完結。又據奏已勒布等起釁。根由實由唐古忒等揀擇銀錢加增稅額。并於售賣鹽觔內攪和沙土。種種積怨。及遣人講論。又復置若罔聞。已勒布

心懷不平。無可雪憤。以致興兵。果不出朕之所料。此事皆由噶布倫索諾木旺扎勒及第巴桑幹二人起釁。鄂輝等將宗喀濟龍聶拉木收復後。即傳喚該頭目到營。遵照前降諭旨。明白曉諭。務使感畏交深。永遠不敢侵犯邊界。誠心立誓。方可撤兵。至現在曾否與賊打仗。及將各地方全行克復之處。並著迅速奏聞。○兩廣總督孫士毅奏黎城收復後。其迤南一帶。仍與賊境毗連。本年正月初二日。據黎維祁告知。該國王所派防守官兵。俱被賊人趕逐。聲言欲報仇洩恨。臣等隨派官兵前進剿殺。連敗賊兵。詎黎維祁聞阮惠親至。心膽俱裂。手抱幼孩。隨同伊母逃過富良江。衆情慌亂。國民紛紛逃竄。臣與提督許世亨復督率官兵。決一血戰。無如賊衆甚多。將大兵四面密圍。臣與提督許世亨不復見面。臣奪圍而出。前至浮橋。令總兵李化龍過江。占住北岸。詎李化龍行至橋心。失足落水。臣令

副將慶成等回頭施放鳥鎗。帶兵徐徐由浮橋撤至北岸。回至市球江駐劄。一面令人趕赴諒山南關一帶。訪查黎維祁母子。暫令進關存活。臣膺茲重任。不能及早蔽功。此次復被賊匪截擾。請革職從重治罪。以為調度乖方者戒。諭軍機大臣等。朕前以黎維祁翼懷無能。毫無振作。看來竟是

天厭黎氏。不能護助。而安南民情。又反復難信。早經節降諭旨。令孫士毅作速撤兵。若孫士毅接奉前旨。即遵照撤回。計此時官兵早已進關。今阮惠復敢前來截擾。究由孫士毅希冀阮惠等悔罪投出。以臻全美。畧就時日所致。現在已交春令。該國向多陰雨瘴氣。即欲整兵大舉。亦非其時。況廣東廣西續調兵夫。皆已停止。若又紛紛檄調。不但緩不濟急。而且未免驚駭聽聞。總以完師撤回。善全國體為要。孫士毅為軍營總統之人。萬不可稍為冒險。該督奪圍而出。所見甚是。其次則許世

亨係提督大員。並關緊要。現無信息。深為屢念。伊二人務宜加意慎重。率領官兵。妥速進關。現據孫永清奏。黎維祁已於正月初七日投進關內。暫送南寧安頓。從來行軍之際。原不能一往順利。即如新疆西路。及兩金川等處。亦皆小有挫折。旋即成功。此次孫士毅帶兵前赴安南勦賊。成功太易。今有此波折。安知非阮惠自取夷滅。此時必須孫士毅許世亨帶領大兵。完全而出。無損國體。將來辦與不辦。操縱在我。自可徐為酌定。至孫士毅奏請革職治罪之處。此事係出自意外。非該督冒昧之罪。何出此言。該督惟當倍加鎮定。料理撤師事宜。不必心忙意亂。此為最要。料阮惠等亦不敢竟至天朝邊界。但關隘一帶。亦須安頓兵力。以壯聲勢。而資接應。現據孫永清奏調兵一千餘名前往。合之原有防兵。共三千名。俾資添撥等語。著傳諭孫永清再加酌量。如續調兵丁。尚不敷派撥。即於附近各

營一面再為抽調。一面奏聞。至粵西官兵。現已撤出。則雲南一路。亦應由宣光安邊等處。迅速撤回。滇省各營兵額較多。若富綱。烏大經。現帶各兵。不敷撥用。亦不妨再為酌調。於沿邊一帶安設。於聲勢益加壯盛。四川總督李世傑。奏遵旨查辦川省倉穀。於五十二年秋間。碾運閩米。後業已照數採買還倉。並五十三年成都華陽兩縣平糶穀石。俱勒限本年二月內買補完竣。現在川省大有頻書商販流通。所有市集穀價。既不昂貴。亦不過賤。商農兩得其平。得旨。此非所論於川省者也。○癸未諭曰。孫士毅奏正月初二日。黎維祁到營稟稱。聞阮惠有糾眾前來。搶奪黎城之信。孫士毅與許世亨等分兵前進。初三日即遇見賊眾。連次奮力勦殺。賊匪敗退。詎黎維祁聞阮賊親至。即攜眷潛逃。以致該國百姓慌張逃竄。賊勢散而復聚。孫士毅因黎維祁業經先逃。黎城難以久駐。應行撤兵。即帶

兵先至市球江。搶占北岸。以待大兵之徵。總兵李化龍行至橋心。失足落水淹斃。浮橋隨斷。提督許世亨總兵張朝龍尚維昇參將楊興龍王宣英林遊擊明柱在市球江以南追殺賊眾。未及過橋。現無信息。自係身歿。現查點入關兵丁已有三千數百名。餘尚陸續前來。其未出官兵俟確查續奏。黎維祁與伊母並伊子俱投到鎮南關內。送至南寧安頓。並據富綱。烏大經奏滇省官兵已前後全行撤出。各等語。此事前據孫士毅奏安南國內因土酋阮惠等稱兵。搆亂黎維祁為其所逐。藏匿民間。竟無尺土之階。眷屬顛沛流離。欲闕額救。朕因安南臣服天朝。百有餘年。最為恭順。乃猝被強臣篡奪。其母妻親來控訴。若竟置之不辦。殊非天朝字小存亡之道。是以即令將伊眷屬收留安頓。並令總督孫士毅馳赴廣西。就近籌辦。節據孫士毅奏。檄諭安南各鎮目及廠民人等。無不聞風響應。願効前

驅該督復力肩重任。自請統兵出關。朕以所見甚正。是以降旨允行。該督與提督許世亨出關後。屢奏克捷。痛殲賊衆。未及一月。即能收復黎城。仍封黎維祁為國王。成功實為安速。朕以孫士毅辦理此事。為天朝字小存亡。體統所關。厥功甚鉅。且漢大臣中有此全才。能為國家帶兵宣力者。自應特沛殊恩。俾得共膺異數。用昭獎勵。是以於奏到時。即降旨將孫士毅晉封公爵。並賞給紅寶石帽頂。許世亨亦晉封子爵。以示酬庸。復念安南向有瘴癘。且兵夫人數衆多。若在彼久駐。轉於新造小邦。多有不便。況安南雖叢爾一隅。然黎氏立國已久。其興廢亦未必不關乎氣數。黎維祁似此異悞。無能毫無振作。看來或者天厭黎氏。不如護佑。朕從來辦事。無不順天而行。是以節經降旨。諭令孫士毅作速撤兵。該督若遵照前旨。迅即撤回。計此時早已進關。乃在彼耽延一月有餘。致賊衆乘間復發。

蓋由孫士毅希冀阮惠等投出。或被旁人縛送。未免意存貪功。因有此意外之變。朕與孫士毅均不能辭咎。況阮惠既經逃回。復率衆前至黎城滋擾。必非旦夕所能糾集。且其中亦未必盡係賊黨。自係附近黎城反側之徒。見賊匪潛至。從而附和。遂至蟻聚蜂屯。孫士毅在彼。何不留心偵察。豫為布置。乃待賊至始行迎堵。橋座又復中斷。致損官兵。究係孫士毅成功後。不無自滿之心。稍存大意。有此挫折。但覈其情節。與有心貽誤者不同。或因貪功自滿。致亡提鎮大員。不特難膺懋賞。即令其仍留兩廣總督之任。威望已損。亦不足彈壓海疆。且轉非保全該督之道。朕於臣工功過。無不權衡悉當。其收復黎城之際。辦理安速。即沛恩綸。雖該督具摺力辭。亦未允准。今該督既有此失。未便尚邀恩賚。仍任封圻。所有孫士毅前封公爵。及所賞紅寶石帽頂。俱著撤回。並著來京另用。兩廣總督員缺。已

另降旨將福康安調補。福康安接奉此旨。即著星馳前赴鎮南關任事。福康安未到任之先。仍著孫士毅暫行署篆。在鎮南關駐劄。俟福康安到彼交代。再起程來京。至許世亨子爵。雖與孫士毅同時並賞。但該提督業經身歿。究為可憫。且徵兵事宜。應聽孫士毅調度。與許世亨無涉。其子爵著加恩准令伊子承襲。總兵尚維昇。張朝龍。叅將楊興龍。王宣。英林。遊擊明桂。因橋斷不能過江。殺賊陣亡。俱著從優議卹。總兵李化龍。雖因失足落水淹斃。實屬歿於王事。亦著照陣亡例議卹。其未出各官兵。著該督查明。另行咨部。照例分別賞卹。至此事皆由孫士毅貪功久駐。不能遵朕諭旨。作速撤回。以致變生意外。提鎮大員。亦因橋梁斷壞。不能撤出。遂至身殞。但阮惠以安南土酋。逐主亂常。經天兵致討。屢次敗逃之後。尚敢糾眾潛擾。傷及官兵。實屬罪大惡極。現交春令。該處係瘴癘之區。未便即行

深入問罪。著沿邊各督撫將各營兵弁及時操演。務使餉足兵精。聽候調遣。以備聲罪致討。將此通諭知之。○又諭曰。孫士毅現著來京。另候簡用。福康安著調補兩廣總督。伍拉納於上年甫經陞任巡撫。雖資格尚淺。但在閩年久。於該處情形。較為熟悉。閩浙總督員缺。即著伍拉納補授。梁肯堂著補授河南巡撫。其直隸布政使員缺。著秦承恩調補。王懿德著補授陝西布政使。所遺雲南按察使員缺。著賀長庚補授。○又諭廣西提督員缺。著海祿補授。廣西左江鎮總兵員缺。著普吉保補授。廣東左翼鎮總兵員缺。著魏大斌補授。閩粵南澳鎮總兵員缺。著陸廷柱補授。魏大斌。陸廷柱。係在臺灣獲咎之員。著仍帶革職留任。俟八年無過。方准開復。伊二人此次加恩錄用。務宜倍加感激奮勉。以贖前愆。○諭軍機大臣等。此次阮惠復來滋擾。黎維祁聞信先逃。該國民心慌亂。勢甚鴟張。官兵致被

攔截提鎮將弁多有損失本係事起倉猝衆寡不敵尚非孫士毅調度乖方所致今將伊公爵及寶石帽頂徹回已足示懲原可仍留總督之任但朕為孫士毅思之身為統兵大員不能豫籌防範又不能遵旨及早撤回官兵以致變生意外提鎮大員多有陣亡威望大損若復畀以封圻必致呼應不靈是以降旨將福康安調補兩廣總督令孫士毅來京另候簡用將來到京後即以尚書補用孫士毅素稱能事在尚書中尚係出色之員仍可仰承恩眷朕因孫士毅本係文臣未經軍旅從前收復黎城辦理妥速曾著勞績今雖帶兵退回朕不但治以失律之罪轉為憐惜且孫士毅係總統之人非鎮將可比設或稍有疎虞國體攸關更屬難於辦理該國道路險阻如阮惠在富良江市球江等處據險抗拒邀我歸路孫士毅豈能突圍而出幸而阮惠無能官兵雖有挫失尚不致全被攔截此

皆

上蒼默佑朕方深為欽感該督亦當感激天恩不可因事機不順稍涉怨尤惟當倍加鎮靜駐劄鎮南關一帶將撤兵事宜及巡防邊隘等事辦理周妥俟福康安到彼詳悉告知再行交代來京若孫士毅此時業已自鎮南關起程回粵仍著於接奉此旨後回至該處照料一切斷不可心忙意亂於應辦要務轉不能悉心經理負朕格外矜全之意再孫士毅奏查點撤回官兵已有三千數百名餘俱陸續而來等語隨往黎城官兵共有八千七百餘名除業已進關各兵外其餘陸續到者又有若干名著即詳查據實覆奏所有新頒安南國勅印是否黎維祁攜帶入關抑或復行遺失之處並著查明覆奏至副將慶成係五福之孫隨在軍營於該處情形自所諳悉今已隨孫士毅撤回著該副將馳驛迅速來京以便將一切情形面加詢問○又諭現因

孫士毅奏。阮惠復糾衆前至黎城。滋擾提督許世亨力戰陣亡。已降旨令孫士毅來京。將福康安調補兩廣總督矣。此次安南內訌。朕因孫士毅力肩重任。自請帶兵出關致討。是以允行。該督出關後。屢次克捷。未及一月。即收復黎城。朕以安南人情反覆。而黎維祁又巽懦無能。節次降旨。諭令作速撤兵。乃孫士毅意存貪功。不即遵照撤回。在彼久駐。故有此意外之變。阮惠不過安南一土目。方今國家全盛。若厚集兵力。四路會剿。亦無難直搗巢穴。但該國向多瘴癘。與緬甸相同。得其地不足守。得其民不足臣。何必以中國兵馬錢糧。糜費於炎荒無用之地。是進剿阮惠一事。此時非不能辦。揆之天時地利人事。俱不值辦。孫士毅現經挫失。威望已損。不便仍任總督。福康安新經平定臺灣賊匪。聲威已著。今將伊簡用兩廣總督。前赴鎮南駐劄。不特阮惠聞知。以孫士毅因失事解任。又另派久歷

戎行之重臣前往。自必為大舉進剿之計。心懷震懾。即內地一帶人民。見福康安到彼。足資倚仗。人心亦可鎮定。福康安抵鎮南關後。若阮惠等聞風畏懼。到關服罪乞降。福康安當大加呵斥。不可遽行允准。使其誠心畏罪輸服。額請再三。方可相機辦理。以完此局。○禮部題。朝鮮國王李祘遣使表賀。

萬壽冬至元旦三大節。及進歲貢方物。又暹羅國王鄭華遣使奉表謝恩。並進方物。賞賚筵宴如例。○甲申。諭曰。直隸宣化鎮總兵著希當阿調補。以便迎養。所遺福建建寧鎮總兵員缺。即著劉允桂調補。○諭軍機大臣等。此時阮惠等自知傷損官兵。獲罪甚大。懼天朝大舉進剿。自必差人至關悔罪乞降。福康安、孫士毅俱係封疆大臣。仍宜示以嚴厲。若差人再四籲懇。情詞恭順。俟奏到時。朕自當相機而行。方今國家全盛。阮惠以安南土目。若集兵會剿。原不難為搗穴擒渠之計。但該處

向多瘡痍。即使收入版圖。照新疆之例。又須分派多員駐劄。而該處貢賦所入。必不敷經費。況安南民情反復。勝國以前。郡縣其地者。不久仍生變故。歷有前車之鑒。朕再四思維。實不值大辦。莫若量寬一綫。俾其畏罪輸誠。不勞兵力。而可以歲事之為愈。福康安等不可不知此意也。現在沿關一帶。正須大員帶兵彈壓。孫士毅萬不可輕離該處。若已起程。仍即速回駐劄。候福康安到彼交代。再行來京。至此次阮惠乘撤兵之時。前來滋擾。自係孫士毅不能慎密。豫露撤兵信息。將士思歸。軍紀未能整肅。以致阮惠聞而生心。伺隙侵擾。從來受降如受敵。總須時刻留心。即撤兵亦應如臨戰陣。倍加慎重。乃孫士毅疎於防範。以致變生意外。實屬不能辭咎。現經朕格外矜全。福康安未到之前。孫士毅尤當小心妥辦一切。不可心忙意亂。措置稍有失宜也。

○又諭曰。黎維祁本係無能之人。屢經擢越。

失守藩封。今已勒封為國王。又復棄國逃遁。律以內地官常。亦應斥革治罪。將來即欲懇請贍觀。亦不值准其來京。祇可等諸編氓。予以衣食之貲。俾足存活。且南寧距邊關甚近。恐日久又有夷人往來。與黎維祁潛通信息。或致滋生事端。不若將黎維祁及其母子從人等。移至桂林省城安插。該撫就近約束照料。較為妥協。著傳諭孫士毅。孫永清。即於省城內查撥空閒官房一處。給與黎維祁挈眷居住。並酌量給與口糧安頓。以資養贍。

○又諭福建建寧鎮總兵希當阿。親老無子。是以降旨令其與直隸宣化鎮總兵劉允桂對調。俾得就近迎養。以示體恤。劉允桂才具中平。福寧鎮雖非要缺。亦係海疆專門之任。該員能否勝任之處。著傳諭伍拉納到任後。留心察看。如果才具可期勝任。自可毋庸更換。倘於福寧一缺。有不能勝任之處。即據實具奏。候朕另行簡用。毋得稍有瞻徇。以正黃旗。

滿洲叅領台斐音為山海關副都統○乙酉上還宮○諭軍機大臣曰張朝龍等殺賊身死係得自家人兵丁等告知而許世亨尚維昇被阮惠截斷之後據孫士毅奏尚無信息該提鎮究竟作何下落是否實係陣亡此時自己得有確信其餘帶兵各員又曾否全出所有兵丁除已進關之三千數百名外續至者又有若干岑宜棟所帶土兵二千名亦曾否全出著孫士毅即行詳細查明據實覆奏其滇省官兵現在是否已全數入關亦著富綱烏大經迅速具奏再孫士毅出關時帶有廠民人眾同往此等廠民曾否同出抑係去而從賊又宣光一路有土目黃文桐等跟同官兵進剿烏大經撤兵之後該土目等現在何處此時既已撤兵該土目及廠民等來投與否原可置之不論但朕欲知該處情形是以詢及並著孫士毅富綱等各行查明迅速據實覆奏○直隸布政使梁肯堂奏接收藩庫

錢糧清楚情形得旨已用汝為河南巡撫矣毋自滿足餘無多諭○是日起

上以祭

社稷壇齋戒三日○丙戌

御製書安南始末事記曰春日齋居敬觀

皇祖御書心經張照等跋錄

御製戒之在得之諭憬然有悟因憶安南始末事為之記曰我

皇祖戒之在得之訓孫臣因建堂於避暑山莊

其義其事已見之前後之記矣昨歲夏居山莊因有緬甸歸順之事不無為之喜無何而有孫士毅復黎城封黎王之奏則又不無為之喜夫喜者懼之對也懼則若有所失喜則無所更慮若有所失心不敢放無所更慮心或放乎緬甸歸順無過宴資山莊事則已矣安南之事雖云復其城封其王而其兇首未擒弗屑費中國之力為藩國掃蕩擒渠因降旨班師使孫士毅速遵旨班師即逆兇復擾

黎城則固外藩之事。變亂無常。亦不屑每問之。乃孫士毅駐彼逾月。以待或有所擒獻。而又未曾謹設防。以致逆兇席捲而來。我師倉卒與戰。遂有所失。而提鎮三臣。同以致命。幸而孫士毅全師以歸。尚不致有傷國體。然而赫濯威重。實不無少損焉。夫興滅繼絕。弗利其土地臣民。此非欲得也。然而得其名。與得其實同之。安南之事。予果無得名之意乎。喜而忘懼。謂之能戒可乎。故予不咎孫士毅之貪功。久駐失防。致損威重。而自咎予之未能體

皇祖訓戒之在茲。書以誌過。抑亦慎守此志於永久。弗替云爾。○諭軍機大臣曰。已延三奏。恩明補授甘肅按察使。新授延榆綏道楊壽楠。遠在江蘇。尚無來陝之信。委員署理道篆等語。楊壽楠於上年冬間。補放延榆綏道。何以至今尚未到陝。著傳諭閩鶚元。飭該員迅速起程。即赴新任。勿再延緩。將此並諭已延

三知之。○河東河道總督蘭第錫。山東巡撫長麟。巡漕御史和琳。奏運河挑工完竣。並酌定二月初一日。拆除汶壩。以利輓運。得旨覽奏俱悉。今年運務似佳矣。○丁亥。諭曰。孫士毅奏接奉撤兵諭旨。自恨不能仰體速撤。知進而不知退。遭此損失。求重治其罪。現查點入關官兵。已有五千數百名。聞尚有從他處回至內地者。至軍營未出各員。除前次陳報外。又查有副將邢敦行。遊擊張純。王檀。張會元。劉越。都司鄧永亮。守備黎致明。七員陣亡。又有臺員。知縣袁天達。府經歷張誠。二員似已遇害。其餘文員。俱已進關等語。此事朕屢經早降諭旨。令孫士毅於克復黎城後。即酌量情形。撤回入關。不可知進而不知退。並以安南地方雖小。但黎氏立國已久。其興廢未必不關乎氣運。該國近來構亂頻仍。黎維祁復怯懦無能。看來或因

天厭黎氏。朕辦理庶務。無不順

天而行。是以復諭令孫士毅作速撤兵。今因官兵在黎城耽延稍久。有此挫失。可見朕先幾所動。事變即相應而來。是此事之失。究由於知進而不知退。我君臣俱不能不引以為過。但朕先經籌及。屢次諭令孫士毅作速撤兵。若該督遵照速撤。早已入關。乃於克復黎城後。復在彼耽延一月有餘。希冀阮惠悔罪投出。或被賊黨縛獻。又不豫為偵察。以致賊匪乘間糾眾滋擾。傷及官兵。是孫士毅不無貪功自滿。即難辭咎。朕因其實非有心貽誤。不忍遽加嚴譴。然亦不得不治以應得之罪。是以將所封公爵。及紅寶石帽頂撤回。仍令來京。另候簡用。此時閩隘一帶。正須大員帶兵彈壓。孫士毅在鎮南關駐劄。並續調粵東官兵三千名前往。聽候派撥。所辦甚是。現據孫士毅奏請從重治罪。恐伊以待罪之人。不敢戴用翎頂。先自摘去。殊有關係。福康安到彼尚需時日。目下該處一切事宜。正資孫士毅

督率調度。若無翎頂。不特觀瞻有礙。呼應不靈。且伊回京後。尚可以尚書補用。品級相等。但伊既有此失。若復戴所賞雙眼花翎。於心亦難自安。孫士毅著仍留總督頂戴。並著戴單眼花翎。在鎮南關辦事。俟福康安抵彼交代後。聽候諭旨。再行起程來京。至未出鎮將各員。前已有旨分別議卹。所有此次查出之陣亡副將邢敦行。遊擊張純。王檀。張會元。劉越。都司鄧永亮。守備黎致明。並被害之臺員知縣袁天達。府經歷張誠。均著一併交部從優議卹。其餘未出各官兵。仍著該督遵照前旨。確查咨部。分別賞卹。將此再行通諭知之。○諭軍機大臣曰。阮惠等屯聚諒山。自係懼我官兵進剿。不敢遽回廣南。但閩隘一帶。與安南境界毗連。內地民人。見屯聚附近處所。不無驚疑。孫士毅現調粵兵三千。到鎮南駐劄防守。以壯聲威。所辦尚是。至撤回各兵。現據奏進鎮南關者。已有五千數百名。聞尚有

從他處回至內地者等語。現在陸續進關。及從他道退回者。又有若干。著即查明據實覆奏。此等兵丁。皆係不得已退回。入關後毋庸再治其罪。土目滿啟德前次勾引附阮抗拒不從。且跟隨官兵進剿。殊為出力可嘉。現在曾否同官兵一體入關。此外似滿啟德之出力者。尚有何人。又黎氏舊臣。如阮輝宿。阮廷枚。黎何等。現在何處。曾否一併隨同入關。並著查明具奏。前曾有旨諭令福康安迅速馳赴鎮南關駐劄。福康安抵關後。務宜遵照前降諭旨。妥協辦理。不必急於回粵東。總俟冬令酌量情形。再定行止。孫士毅前亦有旨令其幫同福康安將應辦事宜。酌籌妥協。後再行來京。福康安到彼後。如無需孫士毅幫同辦理。自當即令其進京。否則將伊多留數月。亦無不可。孫士毅於該處情形。較為熟悉。且即欲將伊補用尚書。現在亦無員缺。不妨在彼多住數月。俟諸事妥畢後。再行來京。亦未

為遲。○又諭據汪新奏李慶棠現已病故。所有貴州巡撫員缺。已降旨將郭世勳補授矣。該撫甫經來京。陛見。毋須再行請訓。接奉此旨。即行速赴新任。將此諭令知之。○以湖南布政使郭世勳為貴州巡撫。山東按察使馮光熊為湖南布政使。○是月。江蘇布政使奇豐額奏查明通省錢糧完欠情形。得旨覽。○此年豐穀熟。應速完者。○江南狼山鎮總兵蔡攀龍奏報到任日期。得旨實力為之。汝係有過者。可不勉乎。○福建巡撫徐嗣曾奏報內渡回任日期。得旨汝此次有何可說嘉悅之外。惟知勉耳。○陞任閩浙總督河南巡撫覺羅伍拉納奏乾隆五十三年分豫省發遣新疆並新疆改發內地及接遞別省遣犯共二百十七名。並無脫逃。惟本省應緝歷年逃遣。並外省應緝逃犯二十五名未獲。現飭屬嚴密偵拏。得旨實力督緝務獲。○河南巡撫梁肯堂奏謝陞任恩。得旨有何可諭。但戒汝

莫自滿而已。

實錄卷之百五

堯

大清高宗法天隆運至誠先覺體元立極數文
奮武孝慈神聖純皇帝實錄卷之一千三百二十一

大清高宗法天隆運至誠先覺體元立極數文
奮武孝慈神聖純皇帝實錄卷之一千三百二十二

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理

吏部理藩院事務內閣滿洲部總理事務衙門軍機處加一級內閣加二級軍功紀錄一次直隸巡

撫總督經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務

世宗憲御軍功加一級隨帶加三級又加二級直隸巡撫內大臣戶部尚書兼理滿洲部總軍功紀錄五次

尋常欽十四次直隸巡撫經筵講官太子太傅工部尚書經筵講官次臣曹振鏞等奉

敕修

乾隆五十四年己酉二月戊子朔祭

實錄卷之百五

大社

大禮

上親詣行禮 諭曰畢沅奏楊林洲磯嘴塌原

估十五丈已如數挑砌害金洲做沙削去三

百四十餘丈黑窪廠裏頭原估長五丈今已

做出七丈對面沙灘亦經削去一百二十餘

丈溜勢愈覺南趨仍日見潰塌畢沅現親赴

該處相度形勢苟可向前進占總當極力做

出俾溜勢日挑日遠以期淨沙盡去剝動害

金洲老土礪等語。並據繪圖呈覽。所辨是但閱圖內所繪黑窩廠裏頭取勢太直。若復往南進做。不特恐致著重。且江水至此。已成入袖。兼慮激回。波衝北隄。不能復向南挑。朕意應順向東南。不妨畧長。以次進做。因勢利導。溜勢自全。往南開。則害金洲土礪。可期逐漸刷盡。已於圖內用硃筆標誌。若發交畢沅。即覆加履勘。酌量妥辦。並將應否如此辦理之處。據實覆奏。至楊林洲磯嘴壩。現做出十五丈。黑窩廠裏頭。現做出七丈。害金洲淤沙。已刷去數百丈不等。可見荊州隄工。屢次潰決。而上年被淹尤重。總由害金洲之上。種植蘆葦。以致淤淺。日漲日寬。逼溜北趨。隄塍因而衝決。舒常平日在彼。既不能豫行查察。迨降旨詢問。尚稱此次荊州被淹。與害金洲無涉。實難辭咎。而蕭姓民人。惟圖肥己。不顧占礙地方水利。釀成大災。淹斃多命。將伊治罪。尤屬情真罪當。毫無屈抑也。將此通諭知之。

又諭前據海寧在京面奏。山西按察使明祿年老多病。著來京交部帶領引見。候朕另行酌用。所有山西按察使員缺。著蔣兆奎補授。諭軍機大臣等。據琅玕奏。參革府經歷原署鳳陽縣事沈寧仁。有應賠民欠耗羨銀八百四十六兩零。又有查災辦賑公費運腳。並接收川米腳費各項。共覈減銀一萬五千六百七十三兩零。原籍財產已盡。無可追將未完銀兩。於安省本業各上司名下攤賠。該員沈寧仁。比照工程覈減數。在一千兩以上。例問擬杖徒等語。沈寧仁以經歷徵員署理縣篆。任內經手錢糧。何至覈減銀一萬五千餘兩之多。若非該參員藉事開銷。即係該上司濫行給發。並且分肥。今既查明沈寧仁原籍實無家產。力不能完。自應著落安徽本案各上司分攤歸款。但沈寧仁於所領錢糧。長支濫用。又復任意拖欠。逾限不完。該撫僅照例擬以杖徒完結。不足蔽辜。除交部另行政

擬罪名外著傳諭琅玕再行查明沈寧仁在籍有無隱匿寄頓並著陳用乾詳查從前給發時有無情弊一併據實覆奏以山東濟東泰武臨道甘定進為山東按察使庚寅諭曰福康安奏建寧鎮總兵鄭國卿現在患病尚未痊愈恐致貽誤戎行請以原品休致等語鄭國卿既經患病著照該督所請准以原品休致但念該員前曾出師金川等處屢著勞績且熟悉營伍如果病痊後精力尚堪効用情願來京陛見即著來京候朕酌量錄用所有福建建寧鎮總兵員缺著顏鳴漢補授又諭今年京察屆期吏部開列在京各部院三品以上大臣奏請甄別一本向來大學士例不開列第念大學士阿桂等或襄贊綸扉或兼統部務均能懋著勤勞敬公稱職宜加優敘以昭恩眷阿桂嵇璜和坤王杰俱著交部議敘尚書董誥彭元瑞胡季堂福長安金蘭侍郎伊齡阿穆精阿德成巴忠夙夜

宣勤均能稱職宜加優獎俱著交部議敘其內閣學士謝墉吳玉綸盛京刑部侍郎榮桂聲名平常均著交部議處理藩院侍郎福祿年力就衰難以供職著予原品休致餘著照舊供職又諭今年京察屆期吏部將各省督撫開列名單進呈請旨甄別協辦大學士總督福康安總督劉我書麟李世傑畢沅河道總督蘭第錫巡撫閻鶚元徐嗣曾長麟宣力封疆克稱厥職俱著交部議敘餘著照舊供職諭軍機大臣等據福康安奏閩省總兵多已入都陛見海壇鎮總兵丁朝雄應令暫緩起程俟常泰等回閩再行赴閩嚴州協副將張孝勲前經雅德保列一等部覆行令引見但副將保舉引見即可擢放總兵張孝勲為人辦事尚未深知必須暫留本任察看另行送部等語總兵副將俱係武職大員整飭營伍彈壓海疆最關緊要今閩省各鎮業經先後來京陛見新放南澳鎮總兵陸廷柱

尚未到任。自應令丁朝雄暫緩起程。以重營伍。著傳諭伍拉納。俟常泰等陸續回閩。該總兵可以起身之時。再飭令來京陛見。至副將張孝勲。雖係保列一等之員。例應引見。既據福康安奏。其為人辦事尚未深知。並著伍拉納於到任後。留心察看。若果營伍整飭堪膺保薦。再行給咨送部。將此傳諭伍拉納。並福康安知之。又諭昨有旨。諭令福康安抵鎮南關後。務宜遵照節降諭旨。妥協辦理。不必急於回至粵東。福康安接奉諭旨。自己迅速馳赴鎮南。該處一切調度彈壓。均關緊要。當在彼多為留駐。俟諸務完畢。再具摺奏聞。奉旨允准。後方可回至粵東。至孫士毅在總督中。素為出色。即此次挫折。亦由命運使然。朕念其非有心貽誤。不特不加嚴譴。且深為矜憫。憐惜。但既有此失。亦不能不治以應得之罪。是以令其來京。仍欲用為尚書。所有兩省地方事件。孫士毅平素在彼辦理。尚屬

認真妥協。惟經此損失之後。或恐心忙意亂。照料不能周到。福康安抵鎮南關後。於兩省事件。並當加意整頓。目下京中並無懸缺。而孫士毅於該處情形。較為熟悉。著福康安與孫士毅面行商酌。如無需孫士毅幫辦。即令其來京供職。如有需幫辦之處。不妨令其多住數月。俟諸務安畢後。再行來京。尚不為遲。○原任兩廣總督孫士毅。廣西巡撫孫永清。奏正月二十二日。有諒山夷目。遣通事齎送表文前來。據稱阮惠情願投誠。納貢。恐天朝不准。是以先令通事齎表送香。臣等以阮惠不將內地官兵。先行送出。遽請奉表稱藩。明係借此嘗試。當將表文擲還。仍行嚴守關隘。諭軍機大臣曰。阮惠以安南土酋。想斷不敢侵犯天朝邊界。但既借此以為嘗試。若僅將其表文擲還。恐尚不足使之震懼。畏懾。以堅其悔罪投誠之念。計福康安接奉前旨。自己迅速起程。星赴鎮南關接辦一切。福康安

久歷戎行。又甫經平定臺灣賊匪。聲威已著。著福康安即檄諭阮惠。以前任兩廣孫總督本屬文臣。未嫻軍旅。是以帶兵出關。不察虛實。誤聽爾處人言。以阮惠黨羽盡向巢穴。駐劄黎城。並不留心偵探防範。以致墮爾奸計。大皇帝因孫總督辦理不善。令其解任回京。兩廣總督員缺。將本部堂補授。本部堂歷經出師金川等處。並平定回匪。簡任陝甘總督。前年臺灣賊匪滋事。本部堂奉命渡海勦捕。立將賊首賊目全數生擒。剋期蕙事。爾等僻處海隅。於本部堂出師金川等處。或未聞知。至臺灣與安南海道可通。豈本部堂平定臺灣賊匪。爾等亦無所聞。阮惠與從前黎氏構釁稱兵。自因黎氏勢難並立。鑿觸相爭。天朝尚可不加深究。迨孫總督帶兵出關。爾等尚敢糾衆抗拒。復潛出滋擾。傷我官兵。並提鎮大員。亦有傷損。是竟得罪天朝。在所難赦。今阮惠自知罪大。差人啟關悔罪乞降。並不將

未出官兵。先行送出。且傷我官兵。罪已難恕。至提鎮大員。被爾戕害。其罪更重。若不將下手戕害提鎮之人。縛獻軍前。正法示衆。豈能赦宥阮惠。如必欲乞降。須將官兵先行送出。並將戕害提鎮之人。縛獻如此。本部堂或可代為奏聞。懇求大皇帝恩寬一綫。茲阮惠止係差人進表。並不將未出官兵。及傷損提鎮之人。及早送還。獻出。明係借此嘗試。本部堂久膺軍旅。非係孫總督文人。不知軍旅者可比。今奉命前來。惟知聲罪致討。若阮惠不急思悔改。尚敢仍前差人嘗試。本部堂奏知大皇帝。惟有統率大兵。四路會剿。為掃穴擒渠之舉。天戈所指。洗蕩無遺。莫貽後悔等語。向其嚴切檄諭。使阮惠見天朝不肯准其歸順。震懾聲威。復行敬謹。差人送還官兵。再四哀求。維時福康安再遵前旨。相機請旨辦理。再送出各官兵內。除兵丁及千把以下各弁。仍令其食糧當差外。其守備以上各員。如不

過因大兵已徹被賊截留不能復出尚可令其照舊供職惟不准予以陞擢已足示儆若截留在彼見阮惠時或有畏懼卑屈情事則當立予褫革著福康安於送出時遵照查明分別辦理至孫士毅經此挫折後於阮惠差人乞降一事尚能將其表文擲還且措詞正大得體看來尚有主見不至心忙意亂孫士毅在粵年久熟悉該處情形竟當留於該處與福康安商同妥辦俟可以起程時再行來京亦未為遲福康安亦當遵照前旨駐劄鎮南關俟諸務完畢後奏明請旨前赴粵東辛卯以舉行仲春經筵遣官告祭奉先殿

傳心殿

上御文華殿講官暨侍班之大學士九卿詹事等行二跪六叩禮分班入殿內序立直講官四人出就講案前行一跪三叩禮復位直講官德明劉躍雲進講論語子在齊聞韶三月

不知肉味曰不圖為樂之至於斯也一節講畢

上宣御論曰咸池六英有其名而無其樂非無樂也無其言故不傳其樂耳若夫舜之韶則自垂千古何以故舜之言垂千古則樂亦垂千古夫子在齊偶聞之耳必曰在齊始有韶夫子聞之之後而韶遂絕是豈知樂者哉司馬遷增之以學之二字朱子亦隨而注之則胥未知樂且未知夫子矣蓋言志永言依永和聲舜固自言其韶矣然此數語徒舉其用而未紀其實則又繼之以初天之命之歌皋陶謠言賡載君臣交儆是非韶乎是非夫子所以感其誠而歎其極不知肉味者以此乎且夫子天縱之聖何學而不能而必於韶也學之以三月而後能乎蓋三月為一季第言其久耳而朱子且申之以九十一日知味之說反覆論辨不已吁其去之益遠矣然予以為夫子不圖為樂之語亦有二義焉至於斯

者至其極也。樂之感人為最深而亦有善不善之殊。非樂之罪也。在於用之者之人耳。樂之善者至其極則惟時惟幾。君明臣良。世有不治。民有不被。其澤者乎。樂之不善者至其極則紂之北里之歌。靡靡之舞。唐明皇之霓裳羽衣。世有下亂。民有不遭其荼毒者乎。此夫子垂訓後世之深意。所以有放鄭聲之言也。而注書家總未言及之。予故表而出之。講官暨侍班官跪聆畢。興直講官扎勒翰謝墀進講。論語子謂韶盡美矣。又盡善也。謂武盡美矣。未盡善也。一節講畢。

上宣御論曰。不圖為樂之義已具前篇。茲更以夫子之論舜武。以申夫子之間韶。庶乎其有合於聖人之言樂乎。夫樂者何。律聲言志而已。無志則無言。無言則無聲。無聲必無律。依與承則行乎其間而不具體者也。是則樂之本在乎志。知在乎志。則知舜之盡美善。而武之未盡善矣。何必費辭。蓋舜性之者也。武反

之者也。舜之初命時幾。何如其盡美盡善武之度德。度義亦盡美矣。謂盡善可乎。若以聲容節奏論舜武之樂。則武去夫子之時已遠。而舜更遠矣。其聲容節奏必有所失。且徒究聲律而舍志與言。非知樂者。故予謂韶樂至今存。以舜賡歌之言證之。然則武之未盡善將何以證之。曰雅之下武。頌之皆定。是其盡美者也。至其未盡善者。則夫子反魯定三百之時。或者有所刪乎。予故申其說如此。而要以舍志與言。無宮商而泥謂有聲無詩者。定乎其非知樂者矣。講官暨侍班官跪聆畢。大學士公阿桂。大學士嵇璜奏曰。

皇上折中孔義。深契虞韶。綜觀感於典謨。來儀本時幾之勅。彰志言於聲律。善美探性反之原。洵所云以經解經。惟聖知聖者矣。臣等幸侍講筵。親承

聖訓。不勝欽服。奏畢。諸臣出就拜位。行二跪六

叩禮禮成

上御文淵閣賜茶還宮復賜宴於文華殿東廡之本仁殿○遣官祭昭忠祠○諭曰福祿所出理藩院侍郎員缺著普福補授普福現在駐藏其未來京以前著佛住來京署理佛住所遺察哈爾副都統員缺著觀明補授○壬辰遣官祭黑龍潭

昭靈沛澤龍王之神玉泉山

惠濟慈佑龍王之神○諭軍機大臣等據羅英笈奏請陞見一摺內稱沿海一帶劫盜稍為斂戢洋面較前寧帖懇請來京陞見等語前因金門鎮所轄洋面盜劫頻聞是以將該鎮羅英笈革去頂帶勒限嚴緝旋經羅英笈親身出洋拏獲多盜頗為奮勉即加恩賞還頂戴是該鎮於巡洋緝盜之事尚屬留心現在洋面雖較前寧帖究恐不能淨盡著伍拉納傳諭羅英笈仍前督率弁兵上緊緝拏毋稍疎懈俟九十月間酌量可來之時再令該

鎮起程來京陞見並著該督於該鎮起程時遴委熟悉巡哨認真緝匪之員署理金門鎮篆以重海疆將此傳諭伍拉納並諭令羅英笈知之○又諭據閩鄂元奏拏獲海洋行劫之盜犯駁上麻子等斬梟一摺已批交三法司覈擬速奏並准其將同知李程蓮等送部引見矣江蘇沿海地方節據該撫等奏拏獲盜犯審明辦理頗為認真然劫案未經賊露者尚多該督撫不可以現獲多犯遂存疎懈仍應督飭各屬實力偵緝查拏以期奸宄肅跡綏靖地方陳杰駐劄松江距海洋較近緝盜尤其專責並當嚴飭弁兵於沿海一帶梭織巡查毋得視為具文致滋疎縱將此各傳諭知之○又諭直隸靜海縣行劫劉權之眷船一案前據劉戡奏除拏獲正盜李三等四犯外尚有逸盜王五張七楊柱兇劉四段五李二王二等七犯未經拏獲又山東省嶧縣行劫奇豐額眷船一案前據長麟奏除已經

拏獲首盜司以謹等十一犯外尚有逸盜陶中興司二司三劉二紅薯王二黑虎五犯未經拏獲又天津行竊糧船一案並前據劉裁奏稱除拏獲首犯趙魁等五犯外尚有逸賊呂七高二李四劉五王五五犯未獲各等語各案首從正犯雖經拏獲多名但案內夥同行劫之犯亦應按名拏獲照律嚴辦方足示懲著傳諭劉裁長麟即行督率文武幹員將各案逸犯上緊嚴拏務期全數拏獲毋使一名漏網不可因正犯已經就獲其餘逸盜遂視為海捕具文致滋疎縱○癸巳湖廣總督畢沅湖北巡撫惠齡奏遵旨嚴查商人匪費陋規實力禁止得旨為之在人時常留心可也○以故巴林扎薩克固山貝子薩木丕勒多爾濟子多爾濟帕拉木襲爵○甲午

上幸圓明園○遣官祭

先醫之神○乙未諭據陽春保奏葉爾羌回子瑜都克蘇勒坦默特販買土魯番商民老

三大黃六百餘觔行至布古爾地方被獲審明請將大黃入官瑜都克等解赴吐魯番與老三質訊等語大黃乃俄羅斯等必需品從前停止恰克圖貿易後因新疆各處奸商謀利有自內地販赴新疆售賣即由彼處轉賣與俄羅斯此與未停止貿易何異所關甚鉅是以嚴禁近據明亮等陸續查出商販大黃數千餘觔俱已治罪今葉爾羌回子瑜都克等仍由吐魯番販買大黃數百餘觔是商民惟知謀利違禁妄行若不嚴治其罪未足示儆新疆回子等如過他事治罪尚可從輕若販賣大黃者一經拏獲嚴行治罪現在拏獲回子瑜都克等所販大黃著入官遇便解送內地外仍將瑜都克等照從前拏獲尼雅斯和卓等之例一併解交勒保治罪以示儆戒商民老三赴吐魯番販賣大黃數百餘觔情殊可惡著交穆和蘭將老三嚴行審訊併查明現有大黃若干觔及伊所有物件一併

抄沒入官。遇便解內地。商民老三著交勒保。加重治罪。併通諭駐劄新疆將軍大臣等。嗣後嚴行搜查。如有似此者。即照此次加重辦理。穆和蘭係駐劄吐魯番辦事之人。於商民老三販運如許大黃。轉賣與回子瑜都克等情。並未查出。殊屬疎忽。穆和蘭著交部議處。○雲貴總督富綱奏。滇省調赴安南官兵。業已撤回。全數進口。惟隨從提臣烏大經先赴黎城。兵丁千把內。有効力武舉一員。外委一員。兵數十名。擁擠落後。尚未到齊。得旨。或有他故乎。不可掩飾。○調正紅旗蒙古副都統舒文。為鑲黃旗漢軍副都統。以署理藩院左侍郎佛佳。兼正紅旗蒙古副都統。○丙申。諭前據孫士毅奏。提督許世亨等在安南。市球江以南。迎堵賊衆。因橋斷不能過江。殺賊陣亡。業經降旨。將許世亨子爵。令伊子承襲。其餘鎮將。俱交部從優議卹。第念該提鎮等。隨同孫士毅收復黎城。奮勇出力。嗣因撤兵稍

遲。致被賊匪猝至圍擾。許世亨等均能不避鋒鏑。直前衝殺。臨陣捐軀。殊堪憐憫。所有提督許世亨。總兵張朝龍等。以及陣亡各官兵。俱著該部查明。准入昭忠祠。以示旌卹。戎行至意。○諭軍機大臣等。前據琅玕奏。參革原署安徽鳳陽縣事。府經歷沈寧仁名下。應追各項覈減銀一萬五千六百餘兩。原籍財產無可著追。請將未完銀兩。於安徽本案各上司名下攤賠。並將該參員照例問擬杖徒等語。已降旨。令陳用敷詳查辦理矣。本日據軍機大臣查奏。此項銀兩。係四十三年書麟在安徽巡撫任內。該省自行覈減。未及歸還之款。至今尚未分晰咨部。經戶部行令查催在案。沈寧仁以經歷微員。本無經手錢糧之責。及署理縣篆。承辦災賑。並川米運腳等項。竟至覈減至一萬餘兩之多。且此項銀兩。係該省自行覈減。必非有心從刻。其中顯有侵冒情弊。不可不徹底查辦。著傳諭書麟陳用敷

即行詳晰查明沈寧仁從前辦理災賑各項有無藉事有心侵冒之處。即行據實覆奏。○
丁酉祭

先師孔子遣協辦大學士劉墉行禮。○諭軍機大臣曰。勒保奏於正月二十九日起程來京。陛見所有總督印務。遵旨交已延三署理等語。甘肅地方寧謐。近亦無緊要之事。惟前據明亮福崧奏於喀什噶爾阿克蘇等處查出私販大黃數十餘觔之多。新疆一帶與俄羅斯道路可通。現在恰克圖不准與俄羅斯貿易。而大黃一種。尤為俄羅斯必需之物。乃奸商等違例私販。膽敢繞道透漏。不可不嚴密查辦。昨已有旨令明亮等於審明後。將人犯解交勒保。從嚴治罪。起獲大黃一併送至內地。勒保現既來京。不及辦理。著傳諭該督即將此事詳細交代與已延三。令其遵照妥辦。並嚴飭內地各關口一體實力查禁。毋許稍有透漏。將此並諭已延三知之。○又諭曰。

勒保奏正月二十九日起程陛見。約計往還兩月有餘。四月中旬即可回任。於秋審奏銷各事。均可不致遲誤。所有總督印篆。若帶至西安。交與已延三接收。後再行來蘭任事。未免稍需時日。現已咨會已延三將巡撫印篆一面奏交秦承恩接護。一面起程抵蘭任事等語。秦承恩前已有旨調補直隸藩司。但現在勒保來京陛見。已延三接署督篆。其陝西巡撫印務。交秦承恩護理。而直隸布政使印篆。已據劉莪奏令臬司富尼善署理。秦承恩儘可在彼暫行接護撫篆。計勒保回任。不過兩月之事。秦承恩且俟勒保回至西安。再行前往新任。將此由四百里傳諭劉莪。勒保已延三並諭秦承恩知之。○直隸總督劉莪奏沿河行劫盜犯。現在實力嚴拏。得旨以實為之。語果踐行之乎。○旌表守正捐軀江蘇東臺縣民李雄如媳黃氏。○戊戌。

孝康章皇后忌辰。遣官祭。

孝陵。○己亥。諭據保寧等奏。伊犁阿奇木伯克鄂羅木咱卜。率領衆回子伯克等。籲稱回子等自移駐伊犁以來。生齒日繁。請將已成丁能耕種者。俱令耕種。每年多交糧四十石等語。阿奇木伯克鄂羅木咱卜等感激朕恩。情願將已成丁之回子等。令其耕種。每歲於應交糧九萬六千石外。再多交四十石。甚屬可嘉。著保寧等。即將阿奇木伯克及衆伯克等查明。分別定數。於彼處存貯官緞內。揀取賞給。以示獎勵。朕又念回人收糧。每歲不同。嗣後豐收之年。可照伊等所請交納。設遇歉收。仍照原定額數交納。不必加增。以昭體卹。永著為例。○諭曰。格綢額到和闐後。即向衆伯克索取銀錢。收受皮張等物。塔琦並未查出。及塔琦赴和闐巡察地方。問明格綢額向邁瑪第敏借貸錢文屬實。亦下具奏。直至錦格將格綢額索取銀兩收受皮張綢緞等物。揭報後。塔琦始赴和闐。又未直捷辦理。明係迴

護掩飾。若非派福崧前往審辦。此案亦不能水落石出。似此奉旨審訊之案。諸大臣竟敢如此迴護掩飾。朕又將何以用人。塔琦著革職。留在葉爾羌効力贖罪。塔琦所遺員缺。著福崧前往辦理。現在西藏無甚事件。雅滿泰在彼亦屬無用。念伊前在庫車喀喇沙爾辦事。尚無錯誤。著加恩賞給二等侍衛。前往阿克蘇。作為領隊大臣。雅滿泰係曾經獲罪之人。今特格外施恩寬免。賞給二等侍衛。遣往阿克蘇辦事。若不奮勉自贖。朕必加重治罪。○諭軍機大臣等。據福崧奏。審明和闐領隊大臣格綢額索取阿奇木伯克等銀錢。收受皮張綢緞等物一案。定擬具奏前來。除將格綢額等分別治罪之處。另降諭旨外。明亮乃喀什噶爾叅贊大臣。有統轄各回城事務之責。今格綢額在和闐。如此婪索回衆銀物。並未查出。直至錦格揭報。始經敗露。顯係其平日並未留心查察。明亮著嚴行申飭。嗣後將

各城事務。務須留心查察。再不得如此疎忽。
○又諭曰。福崧已調葉爾羌。所出之缺。著雅
滿泰前往。阿克蘇。雅滿泰未到之先。著明興
仍管阿克蘇事務。但明興前在巡撫任內。聲
名甚屬平常。朕並未將伊治罪。令其前往烏
什。今又令其署理阿克蘇事務。在內地督撫
任內。貪黷從事。即屬不可。況烏什。阿克蘇。係
新疆回地。尤當潔已奉公。加意奮勉。明興倘
仍向回衆需索。朕必從重治罪。決不輕貸。格
綢額即前車之鑒也。○軍機大臣等議奏。新
疆領隊大臣格綢額。擅借用阿奇木伯克邁
瑪第敏。普爾錢文銀兩。並收受阿奇木伯克
阿布都喇滿綢緞。及各城進奉馬匹皮張等
物。又購買皮張。短發價值。應照貪婪律。將格
綢額擬以斬決。即在和闐正法示衆。阿奇木
伯克公邁瑪第敏。係辦理和闐回城事務大
員。乃借給格綢額錢文銀兩。應將邁瑪第敏
之阿奇木伯克公爵。一併革退。發往葉爾羌

効力贖罪。署阿奇木伯克阿布都喇滿代織
綢緞。借給銀錢。請即革職。告退守備陳士魁
跟隨格綢額赴和闐索債。應照福崧所請。嚴
拏加重治罪。筆帖式梅泰迎合格綢額代借
錢文。請革職。初號半年。滿日發往葉爾羌。三
年後。再遣回烏嚕木齊。塔琦業經革職。應無
庸議。錦格係同城駐劄之人。漫無覺察。應請
交部議處。達福雖屬失察。究由該員具摺交
明亮轉奏。應無庸議。格綢額所有物件入宮。
其收受衆伯克進奉物件。給原人領回之處。
均應如福崧所奏。得旨。阿奇木伯克公邁瑪
第敏。借給格綢額銀兩甚多。實屬諂媚迎合。
應照此議革退。阿奇木伯克并公爵。但念伊
祖噶岱默特在日。甚屬出力。著施恩邁瑪第
敏。僅革去阿奇木伯克。其公爵仍留與伊本
身。前往葉爾羌効力贖罪。餘依議。○禮部議
准湖南學政錢澧奏。稱茶陵州學。原定進額
二十名。近來應試者少。文風亦屬平常。應將

該州學額改為十五名。其所減五名。歸入長沙府學。合原定學額為二十五名。將來該州文風漸振。即可於府學各額內。量為撥取。以示鼓勵。從之。○吏部帶領三品京堂宗人府府丞寶光彙等十二員引見。得旨。貴人本平常。學問亦平常。著休致。餘著照舊供職。○又帶領王大臣京察驗看之。四品京堂翰林院侍讀學士平恕等四十三員引見。得旨。平恕。陸伯焜。陳崇。李。吳。敬慶。齡。王。懿。修。永。來。鄒。炳。泰。俱准其一等。劉。導。良。成。額。爾。克。圖。著休致。餘依議。○旌表守正捐軀直隸獻縣民張起珍妻劉氏。○庚子。諭軍機大臣等。據閩鷺元等奏。丹徒之江口。至丹徒鎮一帶。蓄水尚淺。漕船行走遲滯。閩鷺元等於二月初一日。馳抵京口。於丹徒鎮之下。築一活壩。岸水灌塘。初三初四初六等日。江潮漸旺。糧船均已陸續過淺。仍嚴飭地方員弁。趕緊催趲等語。鎮江江口一帶。雖稱古淺。上年於糧艘回空

後。即應將淺淤處所。挑挖深通。以濟重運。今該處底水既未充盈。交春以後。江潮又未漲發。閩鷺元等並不能先事豫籌。及至糧艘阻淺難行。臨時始築活壩。蓄水浮送。究屬閩鷺元等所辦遲誤。未能妥協。著傳諭該撫等。此後務須督率所屬。先時籌備。並著項家達往來查察。實力催趲。俾糧艘迅速通行。銜尾前進。如將來此等處所。稍有阻滯。朕亦不能再為曲貸也。○又諭前據蒼保奏。接准孫士毅照會。委令暫署廣西提督印務。當即馳赴鎮南關。派將備弁兵。分駐各隘防守等語。現在廣西提督員缺。前已降旨令海祿補授。並賞給驛馬。令其迅速馳赴新任。著傳諭福康安。於海祿前抵廣西後。如有需蒼保在彼差委之處。不妨令其暫留該處。聽候差遣。如無需蒼保在彼。即令其前赴廣東潮州總兵本任。○又諭據已忠奏。探得鄂輝。成德等。已將宗喀收復。該處人民。妥為安置後。即以次克復

聶拉木濟龍。現在巴勒布頭目。帶領屬下人等迎接。似欲有所稟報等語。已勒布原係在藏往來貿易。久享天朝利益。斷不敢無端抗拒。茲聞大兵一到。即迎接將軍大臣。意欲稟明情節。聽候剖斷。是伊等尚知恭順。必係將平日受屈之處。告知將軍等。懇求代為辦理。著傳諭鄂輝。成德。已忠。如巴勒布頭目果有訴告被欺情節。即明諭以爾等係屬小番。料非無故妄興爭鬭。明係藏內噶布倫第巴等平素苛求勒索。增收稅課。爾等欲抒誠納貢。藉以奏聞大皇帝。又被噶布倫等謊言阻止。因此負屈含冤。不能解釋。致起兵端。大皇帝早已洞鑒隱微。一秉大公處置。噶布倫索諾木旺扎勒業經身故。將伊各台吉職銜停襲。第巴桑幹。發往烟瘴。藏內大臣及其餘噶布倫等。一併革職治罪。想爾等亦已聞知。今深諒爾等起事之由。實因逼迫所致。且大兵到臨。即謹順乞降。是以並不嚴加勦辦。爾等此

後。益當感戴大皇帝鴻恩。安分守職。若再如此妄行。斷難輕恕。將此明白曉諭。俟定價等事完竣。即將官兵撤回。此旨到時。倘已勒布已回本境。鄂輝等即遵照譯寫唐古忒字咨文。速行發往。至第巴索諾木策凌。與賊打仗。奮勉出力。著加恩賞戴花翎。并量與頂戴。俟戴綢缺出。即行補用。所有保護脅噶爾之噶布倫扎什端珠布。第巴尼瑪達爾濟。戴綢將結索諾木喇什。及小第巴等六十三人。唐古忒兵丁二百十四人。雖前已賞給緞銀。若再加一倍賞賚。以示獎勵。○調鑲紅旗蒙古副都統舒濂。為鑲紅旗滿洲副都統。以禮部侍郎鐵保。兼鑲紅旗蒙古副都統。○辛丑。諭軍機大臣等。上年秋間。據孫士毅奏。風聞阮岳煽惑各處廠民。令其尋覓黎維祁。當有送星福山兩廠民人。不肯從賊。經孫士毅檄諭該廠民。江湖英等。令其出力殺賊。並奏稱江湖英等從前俱係偷越出口。地方官例有處分。

俟其事竣再行查參等語。當經降旨。以彼時正資廠民幫同勒贖。從前偷越之事。亦不可不追問。今孫士毅回鎮南關。所有此等廠民。是否隨同退回。抑係去而從阮。抑仍居廠觀望。及現有無陸續投出之處。孫士毅節次奏到摺內。均未提及。福康安到彼後。即應查明迅速覆奏。至粵西與安南接壤。例禁民人偷越。而節年以來。地方官未能嚴密查察。以致偷越出口者甚多。今正當不准阮惠投降。嚴立邊防之際。凡有偷越民人。私往貿易者。俱應一概禁絕。○吏部題。遵旨議敘各省督撫。分別加級抵銷。得旨。福康安。書麟。畢沅。蘭第錫。長麟。俱著加一級。李世傑。閔鶚元。劉義徐嗣曾。俱著將加一級。抵前降一級。餘依議。○京察本年各部院衙門滿漢各員。年老官一員。有疾官八員。才力不及官三員。分別處分。如例。○壬寅。湖廣總督畢沅奏。荊州被衝衙署。若照定例扣借養廉修理。恐有不敷。請酌

借帑項。分年扣還。得旨。如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十二

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十三

監修總裁官總纂修官太子太傅文淵閣大學士文淵閣領閣事領侍衛內大臣稽察欽奉
上諭事件處管理

吏部理藩院事務黃旗滿洲都統世襲騎都尉軍功七級隨帶加一級尋常加二級軍功紀錄一次臣謹誌

總纂官建寧府知府太子太傅文學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加三級又加三級臣等謹將內大臣戶部尚書領侍衛內大臣稽察欽奉
上諭事件處管理刑部戶部三庫事務

奉旨監錄十四次臣等謹將官太子少保工部尚書紀錄六次臣等謹將奉

教修

乾隆五十四年己酉二月癸卯遣官祭

關帝廟 諭本日吏部帶領京察人員引見

工部滿郎中員外保列一等者共有四員而

漢郎中員外竟無一人殊未公允著將該堂

官交部察議 諭軍機大臣等據福康安奏

閩浙二省軍政請再展限一年其兩省軍裝

器械亦須查驗齊全請一併展限題報等語

已交該部准其展限辦理矣福康安到閩後

於該處鎮協營伍留心訪察分別考驗所辦

俱極妥協有福康安在彼一切儘可不勞屢

念但現因安南一事不得不將福康安調任

兩廣其閩浙總督員缺已令伍拉納補授計

此時福康安已早經起程所有本日具奏各

件俱著交與伍拉納遵照妥辦務使戎伍日

漸改觀兵將俱勤訓練而軍儲器械胥歸彙

實將此傳諭福康安並諭伍拉納知之 吏

部帶領京察保送一等之內閣侍讀學士富

崑等二百七十九員引見得旨富崑德昌曹

城方緯俱准其一等雙慶德寧傅森那洪色

布星額張姚成石興阿舒通阿貴保明達文

修武爾喜素德銘多隆武都爾甲富昌廣舒

涂日煥康綸鈞泰瀛宗室玉慶宗室多善宗

室伊冲阿宗室德松宗室崇亮宗室德舒翁

阿絕之鍾宗室臨福宗室佛爾通阿宗室巴

明阿宗室瑞寧和德索明阿溫承恩蔣予蒲

和騰額吉綸福克精阿嵩山託恩東額伊誠

克榮額福敏富喀善柱薩喇善沃克精額依

欽素安盛額圖桑阿李鉉圖桑阿林其宴盛

時杰曹玉樹王學海春貴書德蘇第察先福
朱棟窩陞額圖明阿和靜陳廷慶寶善德亮
觀麟查郎阿博金岱賽尚阿廣順舒輅克誠
覺羅慶安塔明阿保志關明國布亨舒德薩
炳阿素敏泰六十九雙壽西精額繼善五靈
泰穆克登額興昌永昌保福慶尚安方維甸
新柱德成常格舒山濟蘭和芬葛爾炳阿伊
精阿海福富森布德蘊邵自昌那郎阿玉岱
慶格白琳芬車布昌寧永泰福德色成額福
炳德昌麟祥清明明安泰五格瑤瑞阿精阿
音德布韓封余延良徐瀾范鑒金光梯王仕
基崇祿博純薩騰安公義那縉舒進德恒慶
保祥鸞薩冲安武陵岱德寧特通阿伽藍保
五英阿台福繼善永保扎拉豐阿錫倫德泰
恭安覺羅富炎布傳綸岱松齡阿禮布陳學
額噶爾炳阿薩克素福壽保素扎哈福貴凝
圖謙吉恒成福星阿全福台布阿麟扎隆阿
岱清阿策拔多托里常齡金保六十四四達

色福柱富倫泰舒明泰鹿鳴特通額布顏圖
富全寶昌納福阿爾呼達索寧安宗室成惠
史夢琦葛鳴陽邱文愷施朝幹宋榮塔斯哈
舒敏文溥武什杭阿塔清阿察爾海素錦敏
書左周王鍾健張秉愚蘇楞額五寧安善福
愛陞阿高貴覺羅全善扎拉芬扎爾杭阿朝
樂馬廷模李堯棟朱攸嚴福戴均元祁韻士
汪學金赫倫太佟恩德明吉泰慶瑞額宗泰
德光巴彥布本善色布星額愛興阿恒傑永
智沈浩和泰和舜武台澤布金榮伸泰善良
哈豐阿定柱德慶福齡福盛文明栢齡阿許
學歐達慶謝登雋善德觀德富綸達舒祿楊
澤明泰何廷瓚金廣義仙保長琳瑞麟喀爾
炳阿泰費音台倫善慶明昌薩榮安巴尼泰
科布通武姜斌施奕學鮑銀誠存張紹五福
慶俱准其一等加一級○甲辰
上御勤政殿聽政○諭軍機大臣等前據浦霖
奏五十三年分湖南省藩庫實存銀數一摺

朕開單開各款現存銀兩為數無多恐不敷撥用。因命軍機大臣交查戶部。茲據查奏。該省實存留備協餉銀一款五十年分係八十餘萬兩。節年遞減至上年止存銀十七萬九千餘兩。即合之其餘各款現存銀數亦不過四十八萬餘兩。而兵餉養廉等項均須陸續支撥。不可不豫行寬為儲備。著傳諭浦霖即通盤籌畫。將該省藩庫銀兩應否須由鄰省籌撥。抑即於春撥及奏銷時扣留停撥。以省解運之處。詳細查明。據實覆奏。又本日據孫永清奏廣西藩庫實存銀八十萬二千餘兩。內除應付赴閩官兵及勦捕安南阮匪動用銀三十八萬四千餘兩。現存銀不過四十餘萬兩。雖上年已於廣東省撥銀五十萬兩解往備用。但該省現有籌辦安南事宜尤應寬為儲備。著傳諭福康安等公同籌酌。如該省現存銀兩不能寬餘。即據實奏聞。候朕降旨交部撥往。○又諭巴勒布係邊夷小醜。無故

斷不敢滋生事端。今據鄂輝等奏查明起釁情節。果不出朕之所料。伊等此時如已收復聶拉木濟龍地方。即當將朕屢次所降諭旨明白宣諭。巴勒布等知悉。令彼設誓定界。即行撤兵。但此事雖易完結。而藏內諸事究無一定章程。倘日後復有匪徒侵擾。又需再為經理。藏衆亦不得長享安全。從前補放噶布倫戴綱第巴等缺。俱由達賴喇嘛專主駐藏大臣竟不與聞。現在達賴喇嘛樸實無能。不過倚仗一二近侍喇嘛辦理一切。未免輕聽屬下人等情面。不擇賢愚濫行補放。以致噶布倫索諾木旺扎勒第巴桑幹等肆意妄行。釀成邊釁。今新疆回部補放大小伯克俱係駐劄辦事大臣等揀選補放。嗣後藏內遇有噶布倫等出缺。亦當照回部伯克之例。由駐藏大臣揀選請補。較為妥協。並著駐藏大臣等平日先將各噶布倫戴綱第巴或優或劣悉心查察。分別存記。俟缺出擬補時。自更得

有主見。不為屬下人等欺罔。而於偶遇緊要之事。差遣亦可期得力。至駐藏大臣內。或有不公不法情事。每年達賴喇嘛。班禪額爾德尼。遣使呈進丹書。亦可順便將其錯謬之處。據實陳奏。朕即重治其罪。決不寬恕。自平定回部以來。派令大臣等前往駐劄辦事。三十餘年。亦祇有素誠高樸格。綢額三人。任意縱恣。經朕查訊得實。即行正法。並未稍有姑息。衆所共知。嗣後駐藏大臣。必須秉公辦事。斷不可圖利徇私。自貽伊戚。再藏內地廣人稠。界連外番。平素雖有弁兵之名。而於如何操演。如何防守。如何給予口糧之處。向未定有條規。此次巴勒布忽然滋擾。竟至不能抵禦。以致調發內地大兵。此事甚關緊要。嗣後藏內挑取兵丁一二千名。每年應於何時操練。各隘口如何駐防。及邊界地方。如何安設臺站。務須妥協定議。永遠遵行。但唐古忒等。皆以種地牧放為生。宜將藏內各地方氣候寒

煥。及外番部落相離遠近。詳晰查明。酌定何處當設兵駐防。何時可撤回更換。務令該兵丁等生計有益。不誤耕種牧放之期。而又能實力操防。於天時地利。兩無貽誤。方為妥善。再此項兵丁。自須酌給口糧。今所以大加整頓者。特為保護達賴喇嘛。班禪額爾德尼。并全藏地方起見。所需各項。自應在達賴喇嘛。班禪額爾德尼。商內。均勻支給。但伊等商內。是否足敷給發。亦當悉心籌畫辦理。著傳諭巴忠。將朕憐憫閭閻藏人衆。代謀久安長治之策。詳悉曉諭知之。此時舒濂諒已到彼。鄂輝成德。巴忠等。可即與舒濂會同妥議。俾日後遵循妥協。得有主持也。吏部題遵旨甄別三品以上大臣。照例加級。降調革任。得旨阿桂。嵇璜。和珅。王杰。董誥。福長。安。伊齡阿。巴忠。俱著加一級。彭元瑞。穆精阿。胡李堂。金簡德。成。俱著將加一級。抵前降一級。謝墉。學問較優。在尚書房行走多年。著革職從寬留任。吳

王綸聲名更屬平常。著以三品京堂用。榮柱於刑名尚為熟悉。年力未衰。著來京以刑部郎中用。吳玉綸榮柱俱仍帶革職留任。餘依議。○安徽巡撫陳用敷奏准湖南撫臣咨會湖南省米價與安省不甚相懸。應請無庸赴楚採買。報聞。○以內閣學士宗室僧保任為盛京禮部侍郎。少詹事圖敏為詹事。○乙巳諭軍機大臣曰。佛智奏審訊巴勒布商人哈瑚。據稱前年曾將伊頭目所交文書轉呈慶麟等。並有懇請照前遣使入貢。求為代奏之語。此事亦不出朕所料。可見前將慶麟雅滿泰治罪實為咎所應得。外夷輸誠納貢。遣使請安。自應即為陳奏。乃慶麟既不識廓爾喀字。未能譯出。又稱其詞僭妄。自相刺謬。此皆索諾木旺扎勒任意妄行。以致慶麟等為所愚弄。著傳諭鄂輝等遵照前降諭旨。將此事向巴勒布頭目確切訪察。相機辦理外。至索諾木旺扎勒專恣橫行。當與眾噶布倫無涉。

使索諾木旺扎勒尚在。自應重治其罪。今已倖逃顯戮。因將伊子革去噶布倫。併停襲扎薩克台吉。以示懲戒。但恐眾噶布倫等未能深知。妄生疑懼。亦未可定。鄂輝等可將索諾木旺扎勒已故並不責備伊等之處。明白曉諭。令其毋庸疑懼。嗣後祇須勉辦事。毋蹈前轍。至班第達係休致之人。尤無關涉也。再該處補放噶布倫戴綱第巴及操演兵丁防守要隘等事。昨已降旨令鄂輝等妥速酌議。章程具奏。但思從前班第駐藏之時。辦事甚好。原俱定有成規。黃教諸人亦皆從順。今舒濂普福斷不如慶麟等之糊塗廢弛。然諸事徑由大臣專辦。不稍留達賴喇嘛地步。似於達賴喇嘛既失體面。而於全藏觀瞻亦大有關係。著傳諭舒濂普福務將從前班第辦過之事。閱看。率由舊章。若達賴喇嘛所言當理。即可照彼施行。倘揆之於理。未甚妥協。自不可曲意聽從。並將達賴喇嘛所言失當之處。

據實陳奏。即如噶布倫戴綱大第巴。皆有辦事之責。向來出缺。俱將伊子補放。亦屬相沿舊習。今若盡行更改。未免過於偏執。若仍照向例。俱將伊子補用。則又幾似承襲。必致所用非人。於事無裨。嗣後缺出時。總視伊子之賢否。酌定去取。其能辦事者。即予挑補。其不能辦事者。斷勿徇情。至小第巴為數較多。且係分駐各處。路途亦遠。若必盡由大臣等驗放。此輩能否優劣。究難周知。且令伊等跋涉。不免拮据。嗣後小第巴缺出。即責成該管之噶布倫戴綱等。務令各舉賢能充補。想伊等自不敢任情瞻徇。而小第巴等亦可免往返之勞。著鄂輝、成德、巴忠、舒濂、普福將此等事。悉心籌度。會同妥議。並著巴忠於辦理賊匪事竣。由脅噶爾回時。再行嚴訊慶麟。前年已勒布呈請遣使進表。伊豈毫無聞見。乃始終隱匿不奏。究係何心。即錄確供。遇便奏聞。大學士嵇璜等奏。請添派稽查上諭事務大

臣得旨。緯克托年老。不必管理。所有稽查上諭事務。著添派董誥、彭元瑞、金簡。丙午。遣官祭賢良祠。諭此次京察一等加圈人員。著交各該堂官。將各員是否堪勝外任。及應留之處。各出具考語。交吏部照例帶領引見。吏部帶領京察二三等年六十五歲以上之內閣侍讀學士五靈阿等六十七員引見。得旨。五靈阿、韋謙恒、勵守謙、玉麟、賦泰、覺羅拴住、素卜、東阿、景淑、永清、慶安、諾穆、福達琳、曹錫寶、那德、睦騰額、永祿、拔寧阿、得祿、馬昌言、何廷璿、福重、邁蘭、伍正額、哈拉爾岱、巴克崇阿、富森布、舒明、雙全、豐盛阿、和敏、明德察郎阿、岱保住、快亮、宗室素成額、高謙、張烈、富慶、富遜、齊理克圖、董元鏡、杜憲、宋維琦、觀音保、韋馱保、伊明阿、八十九、伏魔保、沈鐙、阿林、積忠額、永清、佛尼勒、黑達色、花良阿、瑚雅善、善福圖、豐額、魏斌、禪布、寶善、烏林布、巴蘭泰、依常阿、伯岱、和德、瑪涵泰。俱准其留任。以

頭等待衛德清阿。為正藍旗蒙古副都統。丁未。諭軍機大臣等。朕明春巡幸山東。啟鑾約在春分之後。彼時已過燈節。踰路所經。毋庸豫備燈綵烟火。以省糜費。著傳諭劉義長。麟。穆騰額。一體遵照。○又諭。巴勒布夷人侵擾藏地一事。皆由噶布倫索諾木旺扎勒肆意妄行。苛取商人物件。第巴桑幹擅增稅課等事起釁。今雖將索諾木旺扎勒之子及桑幹分別懲處。但念達賴喇嘛誠實忠厚。遇事無所主持。一切俱恃左右喇嘛區處。必有狡黠之人。在旁任用。是以索諾木旺扎勒藉得交通恣橫。此輩互相交結。若不投之遠方。久之仍不免滋生弊端。已忠熟悉該處情形。自伊到彼以來。有無此等情節。自不難一望而知。著傳諭已忠。將達賴喇嘛屬下親信喇嘛內。密加查察。如向日並無與索諾木旺扎勒交通之事。則已。若有其人。已忠亦不必明言。即向達賴喇嘛告稱。此人學問甚好。意欲與

伊同赴京城。在

雍和宮居住。倘達賴喇嘛靳而不與。或稱西寧果莽等。係口外地方。何不令往彼處住持。教訓該寺喇嘛。亦一善事。已忠務以婉言勸導。總須將此等喇嘛攜帶同行。俾絕後患。方為妥協。可否如此辦理。仍著已忠揣度情形。據實具奏。並著舒濂。普福等一體留心。○戊申。諭山東登州鎮總兵馬如麟。年力就衰。前在軍營。亦無甚出力之處。著以原品休致。所遺員缺。著朱泰德調補。其所遺正定鎮總兵員缺。著蘇寧阿補授。○旌表守正捐軀山東莒州民孟喜祿妻夏氏。○已酉。諭軍機大臣等。東三省耕種度日者多。貧人無力置辦牛具。恐田畝多有荒蕪不治。黑龍江既有借支牛具銀兩。吉林亦動銀數萬兩。借給兵丁。置辦牛具。似屬可行。但實係置辦牛具方可。否則所借銀兩。入手浪費。借時雖若有益。將來陸續坐扣。於生計未免拮据。此項銀兩。必食餉

有地之人不能置辦牛具者方准借給至盛京地方如亦需借給應用銀若干著傳諭都爾嘉查明據實具奏俟奏到時再降諭旨○又諭據巴忠奏鄂輝等辦理一切事宜大約三月內便可徹兵口糧足敷支用無庸另籌採買等語所辦甚好此次用兵原為一經懲創使巴勒布不敢再有侵犯永保衛藏之意但藏內人性愚鄙所有賞給糧價自須傳喚供運鄉民面行曉諭發領方不致有侵漁之弊舒濂此時諒已到藏普福亦不久可至伊等務須親身督辦斷不可交噶布倫第巴等轉給以致從中剋扣俾有向隅巴忠由習噶爾回藏一切應辦事宜俱明白告知舒濂普福交代停妥仍即趕至聶拉木一帶會同鄂輝等與巴勒布頭目議定界址並將前此發往諭旨詳晰宣示令其俯首帖服然後將藏內操演兵丁防守要隘及補放噶布倫第巴等事一一酌定章程并於紅教相沿不致混

入黃教之處密為加意防範巴忠務俟諸事俱臻完善再行回京○又諭曰慶麟抵藏後任意修飾房屋諸事廢弛又將巴勒布呈進表文聽信索諾木旺扎勒之言隱匿不奏是以前降諭旨將慶麟在彼枷號三年但枷號慶麟之意特為駐藏大臣官員示儆非以垂戒唐古忒人也打箭鑪為入藏通衢大臣官員俱由該處經過觸目警心足昭炯戒著將慶麟解赴打箭鑪枷號三年不必在藏辦理○兵部奏增設現行則例一豫行保舉人員有降留事故不准一體掣補一綠營陞任官員業經奉旨後遇親喪者概令前赴新任不必退回原任一呈改水師人員到班應扣之缺不歸下月即照例分發試驗一衛守備向無題缺應將衛千總題補名目改為拔置先用一旗員補放綠營緣事降調應用千總把總者即令在旗當差毋庸分別內用外用一十二月分陞選各員題覆應開之缺俱俟開

印題本奉旨後。歸入二月選用。毋庸先於正月分呈堂開缺。從之。○旌表守正捐軀河南新蔡縣民宋學法妻郭氏。○庚戌。諭兵部議各省副將缺出。由俸深功加。及本省參將內開列補放者。向俱不調取引見。今請將引見已滿三年者。補放後。仍行調取引見。朕思於補放後。方調取引見。則員缺必致久懸。此項人員。原係循資擢用。與一等卓異邊俸參將。曾引見記名者不同。自應調取引見。以昭慎重。但該員等能否勝任。有無年力衰庸。無從深悉。與其補放後。再行調取來京。莫若定以年限。豫行送部引見。則可觀其於副將宜與不宜。其應如何分別年限送部之處。著另行定議具奏。尋議參將引見。應請仿照副將之例。定以近省五年。中省六年。遠省七年。調取引見。遇有副將缺出。奉旨補放後。按其引見已滿三年者。調取引見。其未滿三年者。毋庸再調。從之。○諭軍機大臣等。昨召見山西按

察使蔣兆奎。觀其人尚老練。該員任河東鹽運使有年。於該處鹽務情形。素稱熟悉。新放運使李學錦甫經接辦。究不能如其諳練。蔣兆奎回臬司任後。仍著兼管河東鹽務。以資經理。海寧係兼管該處鹽政。得一熟手幫同辦理。於海寧亦屬有益。將此諭令知之。○又諭粵西官兵。甫經退撤之時。防範自應嚴密。今局已大定。諒阮惠斷不能侵犯天朝邊界。目下馬白等處兵丁。不但不應添調。並前次調駐之兵。亦應徐撤。乃富綱又將督撫標兵四百名留存駐劄。辦理未免張皇。失之怯懦。著傳旨申飭。並著該督速將此項留存兵丁。飭令回伍。其各關隘處所。止須照舊時兵數分布駐劄。令其小心巡防。所有前調協防之兵。亦著酌量情形。陸續減撤。再滇省與緬甸交界之杉木籠等處。向亦駐兵巡守。現在緬甸抒誠納款。沿邊一帶。亦可毋須多兵駐劄。並著富綱酌量情形。奏明減撤。○以江西布

政使王昶署刑部右侍郎。廣東按察使姚榮為江西布政使。旌表守正捐軀江西鄱陽縣監生陳國謨女陳氏。辛亥春分朝日於東郊。遣和碩豫親王裕豐行禮。諭曰：福康安奏羅源營遊擊音德布稟報據濂澳汛外委張文魁報稱：正月初七日夜，有賊匪突入營房，搶去小礮二尊及鳥鎗腰刀等件。張文魁率兵追拏，被賊拒捕毆傷等情。遂派鎮道前往勘驗。並訊出正月初七夜，汛兵在汛者止有章達陞、林則能、陳佳春三名。賊匪入寨時，林則能、陳佳春即在草窠內藏匿。章達陞同張文魁已經睡熟，致搶去礮位。覺查之後，恐干重罪，商同裝點傷痕捏報。其鳥鎗腰刀等項係本來短缺，捏報被搶各情節。福康安隨親往勘查，訪得濂澳汛於上年九月十六日即曾失礮二尊，通報總兵遊擊在案。因尋覓無蹤，私將羅源縣火藥局存貯舊礮二尊運往安設，捏稱尋獲。具報完結。該總兵遊

擊亦未到汛查驗。又緣羅源營守備姚洪聽得虎尾汛失礮二尊，該外委吳國珍恐報出于罪，起意將濂澳汛之礮竊去抵補。隨赴虎尾汛查看屬實，遂彼此商量，即將火藥局舊礮擡往，換回寢事。其虎尾汛失礮至今終無下落。因查上年連江營遺失礮位一案，現究出兵丁等有偷賣與洋盜情事。此案遺失之礮及鳥鎗等物，安知非弁兵等得贓偷賣，必須徹底訊究。請將遊擊音德布、守備姚洪革職嚴審。總兵希當阿就近交軍機大臣訊問等語。殊出情理之外。海疆重地，該管弁兵俱應在汛梭織巡查，所貯礮位軍裝軍械等物皆當隨時查點，小心看守，俾歸實貯，乃濂澳汛額兵五十名，止有三名在汛，已顯有冒糧包差情弊。況賊匪入寨竊礮時，該管兵丁非惟不即追拏，轉在草窠之內藏匿，迨至遺失後復裝點傷痕捏報。其虎尾汛遺失礮位，外委吳國珍懼報出于罪，私向濂澳汛竊去抵

補。而守備姚洪查出後。又商同將火藥局舊礮。擡往換回。捏作尋獲。稟報該鎮將完結。種種狡詐。實為可惡。此而不嚴加懲創。其何以緝奸匪而飭戎行。且上年連江營即有失礮之案。現經福康安究出兵丁等私賣與洋盜情事。則濂澳虎尾二汛所失礮械。安知非弁兵得贓偷賣。尤不可不徹底根究。福康安現調兩廣總督。所有叅奏之遊擊音德布守備姚洪著革職拏問。交與伍拉納會同徐嗣曾提集案犯。嚴審定擬具奏。如有應行斬絞之犯。即著該督等一面奏聞。一面派委大員押赴原汛地方。傳集弁兵觀看正法。俾昭炯戒。總兵希當阿於所轄營汛遺失礮位。並不查驗飭緝。任聽該備弁抵補寢事。亦屬可惡。朕因希當阿之父曾經出力陣亡。是以加恩調宣化鎮總兵。俾其就近養母。今現有此欺飾之罪。著革職解京。交軍機大臣會同刑部審明治罪。足見加恩治罪。朕惟至公。至閩省營

伍玩縱廢弛。至於此極。李侍堯因甫經抵任。即在廈門一帶辦理軍糈。旋即身故。不及整頓。總由富勒渾雅德從前在彼。因循廢弛。漫無查察所致。伊二人前已加恩釋放。今觀營伍玩誤至此。皆彼二人因循玩忽所致。若仍任其在家安居。復何以示儆。富勒渾雅德均著發往伊犁。効力贖罪。並著自備資斧。即於明日起程前往。不准給與驛馬。以為貽誤封疆者戒。○諭軍機大臣等。據福康安奏。閩省沿海營房失礮。捏詞稟報。該管總兵希當阿既經失察於前。又復顛預於後。請革職解京。雷辦一摺。已明降諭旨。將希當阿革職。解交軍機。會同刑部嚴審定擬具奏矣。希當阿前來京陛見時。已降旨調補直隸宣化鎮總兵。該員已到新任。著傳諭劉莪。即派委妥員。將希當阿速行解京。交部審辦。○又諭曰。奎林等奏。審明糾夥強劫銀物砍傷事主之張擺漳等。問擬斬決一案。已批交法司覈擬速奏。

矣。又據福康安等奏，竊獲海洋疊劫巨盜蔡燦等二十八名。現在嚴行審辦，並請將竊獲鄰境巨盜之知縣索琬典史方鈞送部引見等語。沿海地方最易藏匿奸匪，關係緊要，該督等抵任未久，即能督飭文武員弁實力查緝，辦理均屬認真。但閩省漳泉及臺灣地方上年甫經嚴辦，大加懲創，而瀕海一帶尚有此等盜犯，膽敢糾結夥黨，疊次劫掠，實屬恣不畏死。若不嚴加懲治，何以儆兇暴而靖地方。福康安調任兩廣總督，此時自己起程，著傳諭伍拉納、徐嗣曾、奎林等一切務須實力整頓。上緊飭屬嚴拏，嗣後尚有似此行劫不法之犯，一經拏獲，即一面奏聞，一面辦理，不可稍存姑息懈怠之意。所有竊獲盜犯之惠安縣知縣索琬典史方鈞俱著該督等給咨送部引見，以示鼓勵。將此傳諭伍拉納、徐嗣曾、奎林並諭福康安知之。又諭曰：福康安奏查出濂澳及虎尾等汛遺失礮位，將疎玩

狡詐之將弁革職一摺，已明降諭旨。將該將弁等革職嚴審，並將從前廢弛營伍之富勒渾、雅德發往伊犁効力贖罪矣。此案汛弁兵丁等遺失礮位，私相抵補，又復裝點傷痕捏報，實出情理之外，不可不徹底嚴行審辦。現在福康安已節降諭旨，令其迅速前赴粵西，駐劄鎮南關，籌辦安南事宜。福康安接奉諭旨後，自即當速行起程，前往鎮南，妥辦一切。徐嗣曾尚未起程來京，福康安赴粵後，該撫自己將此案逐層根究。前曾有旨諭令伍拉納速赴閩浙新任，著再傳諭伍拉納務須兼程趲行，前抵閩省。徐嗣曾俟該督到後，會同東公研訊，將此案情節逐層詳悉根究，嚴行定擬具奏，以肅軍政而儆官邪。務令水落石出，勿存將就完事之見。又福康安等奏惠安縣竊獲首夥巨盜蔡燦等二十八名，連日研鞫，尚未據逐一供出。又濂澳汛失礮之案，現亦一同審辦。徐嗣曾不敢以已奉諭旨來京

將重案置之不問。俟審訊確實。即迅速起程赴闕等語。前令徐嗣曾來京陛見。因該撫新自臺灣內渡。欲詢悉該處情形。原無緊要事件。福康安調任兩廣時。已有旨令該撫俟秋冬再行來京。今該省既有此等應辦重案。自應在省會同嚴辦。即此案審結後。亦應與伍拉納同在一處。兩三月後。將該省一切應辦事宜。會商妥辦。再行來京瞻覲。亦未為遲。將此由六百里各傳諭知之。○又諭曰。琅玕奏。桐鄉縣知縣王士鑑。因公決責致死挾嫌毆差之糧戶趙文祥。請旨革職一摺。趙文祥抗欠糧米。經差將伊子趙文城稟縣責比。因此懷恨。將尾欠糧銀分櫃重完。經該縣查出傳領。趙文祥抗不領回。計圖挾制控告。又復逞兇。將差役截路毆打。以洩其欠糧受責之嫌。殊屬刁橫。該縣訊明如法決杖。實為罪所應得。趙文祥因杖瘡潰爛殞命。亦非濫刑致斃者可比。若將該令罷斥。轉致長莠民刁詐之

風。王士鑑竟不必革職。著交部照例予以降罰處分。餘著照該撫所擬完結。○以直隸河屯協副將愛星阿為宣化鎮總兵。○以河南糧鹽道張朝綽為廣東按察使。○壬子諭曰。福康安奏。接據圖薩布來信。知安南阮匪復行糾眾滋擾。福康安若俟奉有諭旨始行起程。則行走已緩。心實不安。現已帶印前赴漳泉一帶。順便查閱營伍。俟再接粵省信息。即委員將總督印信齎回。交徐嗣曾接收。即兼程馳赴粵西等語。孫士毅前於黎城退出之後。朕以閩粵境壤毗連。福康安得有信息。必即當奏請前往。早向軍機大臣言及。今福康安果有此奏。不出朕之所料。福康安秉性公忠。能視國事如家事。其才猷識見。又能明敏周到。如此方不愧為休戚相關實心任事之大臣。朕安得不加之優獎。福康安著交部議敘。至富勒渾雅德二人。其年較福康安為長。經朕加恩擢用。歷任督撫。亦久於福康安。乃

其識見。不特不能如福康安之周到。且一味因循玩誤。毫無整頓。前年因案大紀一案。擎交刑部治罪。本應即正典刑。經朕加恩釋放。原屬格外寬宥。現據福康安查奏閩省連江。濂澳等汛。有遺失礮位。並有私將礮位賣與盜船。以及裝傷捏報等事。此皆由富勒渾。雅德。前在閩省。於地方諸務。種種廢弛所致。伊二人貽誤封疆至此。若仍任其得在家安居。朕又將何以用人。昨已降諭旨。將富勒渾。雅德發往伊犁。効力贖罪。并不准給與驛馬。令其自備資斧。即於次日起程前往。以示懲儆。各省督撫。養廉豐厚。平時因循懈玩。全不以事為事。甚或任意妄為者。亦在所不免。祇因命運好。未經發覺。得以安然無事。倘一經敗露。朕必從嚴辦理。不能稍為寬貸。即如富勒渾。雅德二人。雖經釋放於前。今因其在閩種種貽誤廢弛。立即發往伊犁。朕於諸臣功罪。一秉大公。惟視其人之自取。該督撫等受

朕厚恩。皆宜以富勒渾。雅德二人為前車之鑒。此旨著各省督撫。入於交代冊。俾各觸目警心。實力任事。並著將福康安奏摺。發交各省督撫閱看。伊等試思。同任封圻。何以不能如福康安之視國事如家事。庶其各知愧勵。勉副委任。毋負朕諄諄訓誡至意。將此通諭知之。○諭軍機大臣曰。孫士毅於黎城退衛之後。朕即以閩粵境壤毗連。福康安當先得該處信息。必不待朕旨。即奏請前往。屢向軍機大臣。諭及。今據福康安奏到。果與朕意相合。如此方不愧為公忠體國。休戚相關之大臣。覽奏深為嘉慰。安南現有福康安前往。可以稍紓朕繫念督撫中。如福康安者。實難其選。設別需任使。安能多得此足資倚毗之人。朕念人才之難。於福康安不能不益加欣獎。特親解御用小荷包一箇。並將御膳所用奶餅黃糕一匣。隨報賞去。以示優眷。此事前據孫士毅奏到。早有旨命福康安前往。福康安

接奉前旨。自己星赴鎮南關。籌辦一切。方今國家全盛。回城。準噶爾及兩金川等處。俱以次平定。況安南。叢爾一隅。原無難立就蕩平。為掃穴擒渠之舉。但朕思準噶爾。回城。及兩金川。俱逼近邊陲。關係緊要。且地非旱濕。滿洲。索倫。勁旅。可以展其所長。是以不惜勞費。先後底定。歸入版圖。安南則向多瘴癘。水土惡劣。與緬甸相同。又何必以天朝兵馬。錢糧。徒糜費於炎荒之地。況即集兵會剿。竟收其境土。又須添兵防戍。而安南民情反覆。前代郡縣其地者。不久仍生變故。歷有前車之鑒。又安能保一二十年後。不復滋生事端。朕再四思維。實不值大辦。已經有旨諭福康安矣。福康安久歷戎行。且甫經平定臺灣賊匪。聲威已著。有福康安到彼。一切自足資整頓。即阮惠聞知。亦必心生畏懼。總之此時既不值大辦。則莫若量寬一綫。俾早輸誠。不勞兵力。而可以藏事之為愈。昨據孫士毅奏阮惠差

人齎表。情願投誠納貢。孫士毅以其不先將未出官兵送回。擲還表文而去。復有旨諭知福康安。嚴切檄諭阮惠。如必欲乞降。須將官兵先行送出。並將戕害提鎮之人縛獻。可以代為奏聞。節次指示甚明。福康安自必遵照辦理。想阮惠接到檄文。心懷畏懼。必復差人前來哀求。如察其情詞。實在懇切恭敬。可以允准。福康安當諭以阮惠膽敢糾眾抗拒官兵。戕害提鎮大員。其罪甚大。今爾等既已悔罪。懇求本部堂亦不能不據實代奏。俟福康安奏到。自有定奪。詳細指示。俾遵照妥辦。○以領侍衛內大臣海蘭察。為正白旗蒙古都統。○癸丑。

孝昭仁皇后忌辰。遣官祭

景陵。○諭據伊桑阿等奏。查出哈密等處商民。由肅州私販大黃五千餘觔。前赴烏魯木齊等語。看來哈密地方。四五日之間。即有三起商民內。查出大黃五千餘觔。明係奸猾商民。

希圖厚利。運至新疆。由回子布魯特處轉賣。與俄羅斯。不可不嚴行懲儆。著伊桑阿將此三起商民貨物。盡行入官。其係烏魯木齊商民。交尚安審明。拏解勒保處治罪。肅州商民。亦交勒保審辦。伊桑阿前已交部議處。其餘失察各官。著勒保、伊桑阿查明開送議處。再著駐劄各回城大臣。曉諭各處回子云。從前準噶爾侵擾爾等回子。種種虐害。爾等困苦難堪。仰賴皇朝威福。蕩平準噶爾。盡革其舊時苛政。輕徭薄賦。令爾等安居樂業。家給人足。迴勝三十餘年前矣。大黃在回疆。無關緊要。惟俄羅斯需用甚殷。緣彼弗遵從前定制。是以停止恰克圖通商。飭禁販賣大黃。今安集延回子等轉賣與俄羅斯。即應重治違禁之罪。仍恐爾等尚未通曉例禁。是以不即加重定罪。止將大黃入官。從輕發落。嗣後爾等販賣內地別項貨物。頗可獲利。在所不禁。若私賣大黃。一經拏獲。不惟大黃入官。他物一

概抄沒。人犯拏解內地。加倍從重治罪。斷不輕貸。著通行曉諭各回城知之。諭軍機大臣等。本日據伊桑阿奏於哈密地方查出私販大黃五千餘觔。已將各犯解交勒保等審辦等語。已另降清字諭旨。令勒保等審辦。因思各省地方。不特廣東瀕臨洋面。即盛京、江南、閩、浙、直隸、山東等省。俱有沿海口岸。現在粵省雖已經飭禁。而奸商等或又從各該省海道。將大黃私販出洋。偷賣與俄羅斯附近番地。希圖轉售獲利。亦未可定。著傳諭盛京將軍。直隸、江南、閩、浙、山東各督撫。各於沿海口岸。飭屬實力稽查。毋許內地奸商。私將大黃偷賣與番船。夾帶出洋。並著廣東督撫。務宜遵照前旨。嚴行查禁。毋使稍有偷漏。○雲貴總督富綱。提督烏大經。奏安南土目黃文相。現尚駐守宣光。其麻允敏等。俱各回自守。查馬白之外。即係黃文相所駐都竟之地。該土目家在近邊。情殷內顧。或不敢遽爾反覆。

批亦不必問矣。又奏旬日以來有廣西軍營兵弁因迷路誤入滇境臣逐一訊明籍貫營分遣令回粵諭軍機大臣等前此官兵由富良江等處撤回阮惠如果有心攔截則粵西迷失弁兵豈能繞道至滇是阮惠雖至黎城滋擾於官兵尚不敢肆行傷害但不知此項官兵赴滇時係由何路行走所過該處夷情情形若何如尚未遣令回粵著富綱向其詳細詢問令該弁兵等據實說出勿稍隱飾迅速奏聞如已回粵即著福康安孫士毅等詳詢具奏其邊外土目人等從前因力不能敵本多附阮繼見大兵出關始行効順將來有無變更亦可不必問至粵西官兵前據孫士毅等奏進關者已有五千餘名此摺係二月初十日奏到迄今已及兩旬曾否又有續出官兵著福康安孫士毅等即行詳晰查詢據實具奏至粵省迷失官兵阮惠不敢攔截加害得繞至滇省進口看此情形尚知畏懼斷

不能復至邊境滋事所有滇省馬白等關隘止須照舊時應駐兵數安設巡防飭令加意查察其前調協防之兵應遵照昨降諭旨陸續減撤不必安設多兵即粵西鎮南關一帶亦當俟阮惠敬謹差人到關籲懇再行相機籌辦○甲寅諭曰蘭第錫著調補江南河道總督其河東河道總督員缺即著李奉翰調補此時南河總督印務著康基田即速馳往清江署理李奉翰俟康基田接署後即行起程前赴河東新任蘭第錫俟李奉翰馳抵河東交印後即行速赴南河接印任事康基田俟蘭第錫到任後再回江寧本任李奉翰蘭第錫均毋庸來京請訓又諭據穆和蘭奏查獲賣給回人喻部克等大黃之回人拉渾民人劉三審明治罪等語著照所奏行前經降旨查獲販賣大黃者係安集延之人止將大黃入官其人逐出係葉爾羌各城之人拏解內地治罪若係商民將所攜物件盡行入

官從重治罪。誠慮同人愚蠢。向未通曉例禁。遽行嚴懲。或致妄滋猜疑。謂阻其貿易營生。是以不與商民一例禁辦。近復令在彼駐劄辦事大臣明白曉諭。若販賣大黃。再經拏獲。不論何處。同于商民一例嚴行治罪矣。但例禁申嚴。專指大黃。恐奉行不善者。搜查他物。無故勒索。訛誤同人貿易。仍著各處該管大臣酌量籌畫。盡心辦理。諭軍機大臣等。據福康安奏。拏獲偷渡人犯七十七名。口俱經分別究辦。此等偷渡民人。雖因貿易趁食。然防禁稍疎。即滋弊混。與其禁之於既渡之後。不如明設官渡稽覈。給照驗放。使民人等知官渡便於私渡。不待查禁而自歸於官渡。現在詳悉妥議。另行具奏等語。閩省民人赴臺灣覓食。應由海口查驗放行。支港口岸例禁私渡。但閩省地方。諸務廢弛。既不能於沿海地方實力稽查。而官設渡口。又難免兵役等留難勒索。是以申禁雖嚴。而私渡之弊終未

杜絕。今福康安奏請明設官渡。給照驗放。以清私渡之源。所籌均屬妥協。現在福康安已調任兩廣總督。其應如何查禁之處。著伍拉納、徐嗣曾將摺內情形詳加體訪。與水師陸路提督、臺灣鎮道會商妥議。定立章程。即行具奏。至閩省吏治營伍。急玩已極。必須實力整頓稽查。方可稍有起色。即如濂澳汛遺失礮位一案。該處營汛弁兵裝點情節捏詞稟報。經福康安親往勘查。行至山徑險峻之處。舍馬步行前進。始將確切情形查明。並究出上年濂澳汛與虎尾汛移換礮位之事。若富勒渾雅德二人在彼。惟知養尊處優。任聽屬員稟報。顛預了事。斷不能如福康安之親歷訪查。實心辦理。今伍拉納新任總督。地方事件皆其專責。務宜一切皆照福康安所辦。振作精神。與徐嗣曾商酌妥辦。以重海疆。不可因福康安已離閩省。稍存疎懈也。將此傳諭福康安、伍拉納、徐嗣曾並諭哈當阿、梁朝桂

奎林知之。○協辦大學士公兩廣總督福康安奏安南之事。孫士毅鼓勇於前。疎虞於後。臣此時前往。自以養軍威。存國體為要。至阮惠等聞內地四路會勦。勢必窮蹙。款關。臣必不肯輕受其請。俟其畏極感生。然後據情陳奏。斷不敢喜功好大。觸瘴行師。臣奉旨後。已將閩浙總督關防。並鹽政印信。交撫臣署理。兼程赴粵。星夜進行。諭軍機大臣等。所奏大端已得。此事節次所降諭旨甚明。昨據福康安奏請前往。又復詳細諭知。今據福康安奏到。所見亦與朕意相合。前據孫士毅奏阮惠差人齎表。情願投誠納貢。孫士毅以其不先將未出官兵送回。擲還表文而去。昨又據富綱奏廣西軍營迷失弁兵。赴滇投首者。共有五百數十名。此等散失官兵。得以繞至滇省進口。足見阮惠於官兵尚不敢肆行傷害。況復差人前來齎表。看此情形。已知畏懼。斷不敢復至邊境滋事。目下惟須按例嚴防關隘。

飭令加意查察。沿邊一帶。與外夷接壤處所。即尋常無事之時。本應隨時偵探。留心防範。此時亦止宜照常防駐。計日內福康安已可抵鎮南關。福康安威望已著。有伊在彼。不特內地民人。皆得所倚仗。即阮惠聞知。亦必倍生震懾。想阮惠接到福康安檄文。自即差人前來。欽關籲懇。若察其情詞實在懇切恭敬。可以允准。即為據實代奏。候朕詳細指示。○又諭據巴忠奏遵奉諭旨。即由脅噶爾回至前藏。毋庸再行前往等語。巴忠之見。未免拘泥。前因藏內無人。是以降旨令其不必久駐。脅噶爾。今鄂輝等業將宗喀地方收復。帶兵向聶拉木濟龍前進。與巴勒布頭目辦理定界等事。雖鄂輝等亦足資料理。但未諳唐古忒語。僅遣通事傳達。畢竟不能詳盡。且巴忠前與廓爾喀書。識其情性。若在彼會同幫辦。自更有益。著再傳諭巴忠。於接奉此旨後。如鄂輝等已收復聶拉木濟龍。諸事早經完竣。

則已。倘該處尚未歲事，已忠仍應作速前往。商同鄂輝與巴勒布議定疆界，面為宣示朕旨。再仲巴呼圖克圖之弟沙瑪爾巴呼圖克圖，既係紅教，與黃教不能相合。且巴勒布人甚加敬奉，看來雖於黃教無礙，究竟將伊攜回後藏，仍在原寺居住，較為妥協。著向仲巴呼圖克圖反覆開導，令其設法勸回。仍居後藏，設或伊回藏之後，必致振興紅教，於事轉多未便，則即仍留巴勒布，亦無不可。已忠務須深思遠慮，揣度情形，善為區處。○乙卯，諭前因安南土酋阮惠等稱兵構釁，黎維祁猝被逼逐，播遷失國，眷屬顛沛流離，欽關請救。朕念該國臣事天朝，恪恭職貢，百有餘年，今其國內有土酋篡奪之事，遠來控訴，若竟置之不辨，殊非天朝撫綏屬國之道。是以將伊眷屬收留安頓，優給廩餼，即令孫士毅馳赴邊關，相機籌辦。該督到彼，檄諭厥民土目等同心効順，並自請帶兵出關。朕以其所見甚

正，特允所請。大兵一到安南境內，屢次奏捷，未及一月，即將黎城收復，勅封黎維祁為國王，成功甚為妥速。是以特沛殊恩，將孫士毅晉封公爵，並賞給紅寶石帽頂，以昭獎勵。復念阮匪既已敗逃，黎氏已可復國。於天朝字小存亡之體，已臻全美。於未經奏到收復黎城之前，先已降旨諭令孫士毅一俟收復黎城，即行作速撤兵。若該督遵照前旨，迅即撤回，早已全師進關，即大兵撤後，黎維祁翼懦無能，不能守禦，復將黎城失去，甚或被賊匪拘執，亦無妨礙。乃孫士毅並不遵旨撤兵，在彼耽延一月有餘，阮匪糾集黨羽，復來侵擾。黎維祁聞信先逃，孫士毅不能豫為防範，以致變生意外，傷及官兵。朕因其非有心貽誤，轉為矜憫憐惜，尚不治以失律之罪。然其意存自滿，不即撤兵之咎，實所難辭。因將所封公爵及紅寶石帽頂雙眼花翎撤回，仍令來京。另候簡用。今據孫士毅奏稱，頻奉撤兵諭

旨不能豫籌防範。立時退回。以致軍營出事。撫心痛艾。一刻難以自容等語。是此次挫失。由於不能遵旨徹兵所致。孫士毅亦自知其咎。可見此次用兵情形。原不出朕所料。從前大兵出關進討。因事勢之不得不然。及攻克黎城。孫士毅並未遵照訓諭。相機速徹。自不能不引以為罪也。將此再行通諭知之。○原任兩廣總督孫士毅奏。二月初九日。阮惠又遣夷目阮有明、武輝璞二員齎表呈進。臣諭令左江道湯雄業在關前面諭。並將表文拆閱。情詞尚為恭順。惟以官兵尚未全送出。仍令指駁。恭候訓示。遵行。諭軍機大臣等。此次阮惠糾眾潛出滋擾。致官兵損失。並傷及提鎮大員。是竟得罪天朝。在所難赦。方今國家全盛。帑藏充盈。原不難統兵進剿。現在帶兵大員。諳練軍務。久歷戎行者。亦尚有人。帑項現存貯六十餘萬。即費至三十萬。亦斷不稍有新惜。且朕辦理庶務。惟日孜孜。亦非老而

畏事。惟念安南地方。水土惡劣。向多瘴癘。實不欲以天朝兵馬錢糧徒糜費於炎荒無用之地。揆之事理。實不值復行大辦。但阮惠得罪天朝。此時雖遣夷目兩次齎表至關。究難遽允所請。至官兵等既經陸續退出者甚多。其未出官兵。自係前在黎城跟隨許世亨、張朝龍等打仗。勇往深入。以致落後被留。不能復出。其情節尚堪憐憫。將來阮惠等將此項官兵續行送出時。不但不必復治其罪。並著加賞一月錢糧。令其歸伍寧家。以示格外矜恤。該兵丁等既係親隨許世亨等打仗之人。所有許世亨等實在下落。各兵自所深悉。著傳諭福康安等。俟將來各兵送出時。面詢確切情形。再行具奏。又諭據鄂輝等奏。收復宗喀地方後。因連降大雪。官兵暫行守候。現在覓路速進。即行傳喚該頭目來營。大約三月內可以完事。藏內辦出糧餉。足資接濟等語。已勒布頭目前據奏在交界地方聽候官

兵到彼欲行申訴鄂輝等務宜作速前進酌量雪勢稍薄可以行走之處繞至聶拉木濟龍亟為收撫即問明該頭目等起釁情由遵照節次諭旨剴切宣布總在懾服伊等之心使永遠不敢侵犯立定界址即行撤兵勿致久稽時日也○丙辰諭戶部議覆九江關一年期滿徵收盈餘比較上屆短少銀十一萬三千九百餘兩請著落該監督等各按經徵月日照數賠補並請交部照例議處等語因屬照例辦理第念上年江水漲泛船筏障礙過關稀少稅課短絀尚屬有因所有該關此次短少盈餘銀十一萬三千九百餘兩著該監督海紹護理監督恒寧共賠補銀三萬兩其餘銀兩著加恩免其賠補並從寬免其議處○又諭前經大學士九卿議覆順天府尹吳省欽條奏請將江蘇安徽江西浙江廣東山西六省丙午以前三科由俊貢監生中式舉人俱行覆試今據禮部查明此三科應行

覆試者共七十餘名除丁憂事故外現在到部四十五名因派大臣覆加考試內萬應馨等四十三卷文理俱皆清順惟王丕融薛載熙兩卷詩句粗率而四書文尚無大疵朕思舉人覆試必須於揭曉後舉行方可以鑒別優劣其中如有文理紕繆者亦即可調驗原卷互相覈對情弊無難立見若將舊科舉子補行覆試則隔日既久舉業荒疎亦在所難免且此等舉子皆係上數次會試落第之人其文藝平常可知如果所業不進即此次會試仍難入彀是以上年秋間曾明降諭旨將鄉試覆試之例停止惟於會試中式後舉行覆試茲吳省欽條奏於未經會試以前將上三科由俊秀中式者先加考試殊覺多此一舉所有此次覆試之舉人萬應馨等四十三名均著准其會試即王丕融薛載熙二名詩句雖屬麤率亦著免其停科一體准予會試即不得中彼亦無所怨將來會試榜發後再

將榜內各省中式者通行嚴加覆試。倘有文理不通與原卷迴殊及原卷本有疵類者其弊不在內簾即在外簾不難逐一根究從嚴辦理其或有文風平常省分就卷錄取者亦當將該省落卷調齊比較如落卷文理轉比中卷為優是考官衡鑒不公亦應查究至此次覆試不到之舉人除患病等項事故恐有規避者仍著以下三科為限補行覆試外其查係丁憂並非托故不到者概毋庸補行覆試。○又諭兵部奏浙江溫州鎮總兵謝廷選於上年十二月到京因染患風寒延醫調治至今尚未陞見難望速痊員缺未便久懸請旨開缺另行簡放等語謝廷選前在臺灣軍營屢次隨營打仗甚為出力今該員既經患病自應開缺以便令其加意調治除已遣太醫院堂官李德宣前往診視外該員或在京就醫診治或即回籍調養俱聽自行酌量俟病痊後仍著赴闕瞻覲候朕另行簡用所有

浙江溫州鎮總兵員缺著陳莊補授。○又諭土爾扈特一等台吉阿克薩哈勒自投誠以來頗為恭順辦理游牧事務甚屬盡心今聞遠近朕深為憫惻著加恩將阿克薩哈勒之扎薩克一等台吉即令伊子阿咱喇承襲仍賞銀一百兩料理喪事此項銀兩即由塔爾巴哈台庫內動支賞給。諭軍機大臣等據陳用敷奏查原署鳳陽縣事府經歷沈寧仁經辦災賑等款開報墊動縣庫銀二萬六千二百餘兩經前任布政使農起駿減銀一萬五千餘兩現在追繳並未完交必須親提嚴審已飛咨浙江將該參員押解安省以便質究等語沈寧仁以經歷微員本無經手錢糧之責及署理縣篆承辦災賑並川米運腳等項竟致覈減一萬餘兩之多且此項銀兩係該省自行覈減必非有心從刻其中有無侵冒情弊自應徹底嚴查前據琅玕奏該參員原籍財產無可著追照例問擬杖徒尚覺罪

浮於法。將來定案時。交刑部從重治罪。以昭炯戒。此案前經刑部奏令琅玕將沈寧仁解部。先行監禁。俟該省查審明確。再行定擬。但一應卷宗。及原辦經承書吏人等。俱在安省。陳用敷就近審辦。較為切實。沈寧仁自應仍解安省辦理。以成信讞。著傳諭該撫於沈寧仁解到後。即速嚴行訊究。定擬具奏。毋稍延緩。將此傳諭陳用敷。並諭琅玕知之。尋陳用敷覆奏。遵旨審訊沈寧仁承辦災賑。並川米運腳等項。覈減銀數過多。皆由該員才具昏庸。漫無節制。違例濫用。尚非侵冒入己。應照那移庫銀一萬兩以上例。發近邊充軍。從重發往伊犁。充當苦差。其名下未完銀兩。應於厯任上司攤賠。下部議行。○以原任翰林院五經博士東野崇鑄姪緒詢襲職。○丁巳上還宮。以太常寺卿多永武詹事圖敏為內閣學士兼禮部侍郎。○是月。直隸總督劉我奏報省城雨雪情形。得旨。實應慰。更加惕耳。

又奏。遵旨嚴飭守口員弁。毋許私販大黃出境。得旨。以實為之。毋為空言。○閩浙總督覺羅伍拉納奏謝陞任恩。得旨。速赴新任。一切勉之。○福建臺灣鎮總兵奎林奏查閱營伍情形。得旨。此汝所能。勉之。但莫出奇好勝。○廣東巡撫圖薩布奏粵省節年逃遣。除已緝獲外。尚有二百三十九名。造冊備覈。得旨。外省諸事。遲延慎為之。○貴州巡撫郭世勲奏謝陞任恩。得旨。汝有何可諭。一切勉之。毋自足可也。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十三

實錄卷之一千三百二十三

聖元

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十四

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭軍機處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領事稽察欽奉 上諭軍機處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書領滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

敕修

乾隆五十四年己酉三月戊午朔諭軍機大

臣等從前大兵出關土田州岑宜棟率領土
兵隨同進剿尚為出力及被賊圍裹遣人將
印篆送回冒敵前進打仗陣亡殊堪憐憫該
員有子與否著福康安查明具奏再行從優
賞卹其所帶土兵係孫士毅何時調往現在
何處曾否全數入關並著福康安查明具奏
夷官潘啟德拒絕賊黨曾為大兵嚮導今復
挈眷進關其阮庭沛等五人雖不比潘啟德
出力但不肯附從賊黨求為內地民人其情

亦屬可憫。潘啟德當賞以頂戴。酌加錄用。阮庭沛等。均應酌給口糧。妥為安插。毋致失所。其未出各員弁內。如有實係陣亡者。並著福康安確切查明。咨部議卹。至廠民人等。從前偷越出口。本係有罪之人。茲因伊等願効前驅。以免其治罪。而大兵勦賊。廠民等不過隨衆行走。並未見有格外出力之處。此時安南之事。辦與不辦。操縱在我。斷無因廠民有情願勦賊之請。遽爾輕舉妄動。但伊等於官兵出關時。既隨同前往。而此時又不肯聽從阮惠。恐致被其殺害。實亦有所不忍。應妥為辦理。再此次退回入關兵丁。係迫於賊勢衆多。情非得已。此內有打仗受傷之人。自應酌量加賞。昨因在黎城未出官兵。自係隨同許世亨深入。被賊遮留。已經降旨。俟該兵丁等送回時。仍令歸伍差操。再賞給一月錢糧。所有孫士毅奏退回官兵應否仍行加賞之處。並著福康安查驗情形。分別辦理。至孫士毅

於克復黎城後。不即遵照諭旨。迅速撤兵。又復疎於防範。以致變生意外。此過自不能解。惟當益加勉勵。幫同福康安妥協措置。以冀稍贖前愆。○又諭從前索諾木旺扎勒承辦噶布倫事務時。勒取已勒布商人物件。致起爭端。其餘謬戾之處。不一而足。設伊尚在。自當立予正法。今倖逃顯戮。是以降旨不准伊子襲職。以示懲創。乃已忠摺內有暫行停襲之語。竟似日久仍可准令承襲。欲為豫留地步。是何意見。著傳旨申飭。所有索諾木旺扎勒襲職之處。著永行停止。○己未。祭歷代帝王廟。

上親詣行禮。○詣大高殿行禮。○庚申。

上御乾清門聽政。○諭曰。秦承恩著仍留陝西布政使之任。其直隸布政使員缺。著馮光熊調補。所有湖南布政使員缺。即著王懿德調補。再現在甘肅總督藩臬。俱係滿員。應為酌

量更調。所有甘肅按察使員缺。著周樽調補。其所遺陝西按察使員缺。著恩明調補。至陝西潼商道德明。前經降旨。令其與廣東雷瓊道宋銘對調。今據勒保奏稱。德明親老。現在迎養在署。且該員有承辦城工。尚未完竣等語。德明若調廣東。其老親又須同往。跋涉為勞。且該員現有經手事件。未經完竣。德明著仍留潼商道之任。宋銘亦著回雷瓊道原任。毋庸對調。○以翰林院侍讀學士鄭際唐。為內閣學士兼禮部侍郎。○旌表守正捐軀河南項城縣民張興妻楊氏。○辛酉諭。朕此次巡幸盤山。因連日雨雪。恐墊道人夫。未免需湮。初八日。且不啟鑾。俟另定日期。再降諭旨。○又諭。據鑲白旗蒙古都統奏。承襲分設世管佐領一項。將現任承襲原立世管佐領恭楚克達爾之二子。擬定正陪。奏請補放等語。此佐領自初立以來。生齒較繁。是以作為分設佐領。現管分設佐領支派已絕。而別支又

無子嗣。祇有原管佐領恭楚克達爾。現在承襲原立佐領。若將此分設佐領。仍令伊子承襲。斷無一家承襲兩佐領之例。此分設佐領。前已三次補放別姓旗員。毋庸再給恭楚克達爾之子承襲。即作為公中佐領。○壬戌諭。朕此次巡幸盤山。著改期於初十日啟鑾。○又諭。曰。翁方綱奏。江西士子積習。多於歲考。知所儆惕。而科考則漸就懈弛。蓋由報優報劣。皆在歲考之時。而科考於諸生別無查察。稍自怠廢者。輒謂科考無關勸懲。或至日久改轍之弊。現飭各學教官。將所管文武各生。是否專心肄業之處。於科試之年。備造全冊。每名下詳細註明。入於交代冊內。以備稽查。各學報優之生。如彙考不到。及考到而文理荒疎者。將其報優扣除。仍將原報之教官查辦等語。翁方綱之為此奏。不過見其隨事留心。但江西既有此積習。恐各省士風。亦有似此者。學政督飭士子。原應歲科兩試並重。若

因歲試有報優劣之條。而科試竟漫無稽察。則文武各生。其不能自愛者。難保無怠廢。改轍情事。於學校殊有關係。嗣後各省學政。務宜實力整頓士習。不特於歲試當秉公考覈。即科試之年。亦當一律認真辦理。覈實程材。以副朕整飭士風之至意。將此通諭知之。又諭曰。劉戡奏審擬豐寧縣民張全祿。因與親嫂張張氏通姦。被胞兄張全有撞遇。張全祿隨與張張氏商謀。將張全有毆斃。斃命一案。將張全祿與張張氏均依律擬凌遲處死等語。叔嫂通姦。按律即應絞決。今張全祿與嫂張張氏私相姦好。已屬不顧倫紀。且復商同將張全有謀害。淫兇已極。自應速寘極刑。不必更交部議。張全祿張張氏均著即凌遲處死。亂倫蔑紀之事。定例非不綦嚴。而尚有淫惡兇戾之徒。敢蹈法網。民俗之未醇。自由教化之未至。朕披閱之下。不能不引以為愧也。至張全祿童養媳李女。雖於張全祿與張

張氏謀害張全有時。在旁眼見。訊係被張張氏用言嚇禁。是以未敢聲喊。後隨伊叔祖姑張楊氏居住。念及張全有平日恩養。私自啼哭。即將謀害實情。告知張楊氏。遂得破案。是李女尚知顧念恩義。情殊可憫。且此案若非伊向張楊氏告知。幾致兇犯漏網。李女係許與張全祿之子六子為妻。尚未成婚。六子現經外出。雖屬無干。但此案由李女發覺。若仍與六子完配。彼此難以相安。李女著地方官飭令該親族收留安頓。另為擇配。酌給養贍。或即將張全祿名下財產內劃給。俾資存活。又諭據奇臣奏。請於涼州莊浪馬甲裁十五缺。作為四十五分養育兵。養贍孀婦孤獨等語。新移涼州莊浪駐防兵內。並無增添養育兵。其無倚之孀婦孤獨。若不給與養贍。不免失所。著照奇臣所奏。將涼州馬甲內裁減十缺。作為三十分養育兵。於莊浪馬甲內裁減五缺。作為十五分養育兵。以資養贍。直

隸總督劉綎奏順德廣平大名三府並宣化府屬保安等七州縣前因被旱成災一切新舊錢糧分別蠲免帶徵但災歎之後民力未紓請將順德等三府屬五十二三兩年緩徵錢穀宣化府屬五十二年賞借兩月口糧並帶徵糧銀俱緩至本年秋後徵收得旨著照所請行該部知道○癸亥

上耕藉詣

先農壇行禮更服至藉田所

躬耕三推

御觀耕臺命皇六子質郡王永璿皇八子儀郡王永璇豫親王裕豐各五推皇十一子永理皇十五子皇十七子永璘隨耕佈種吏部尚書協辦大學士劉墉戶部尚書董誥禮部右侍郎鄒奕孝兵部尚書彭元瑞刑部尚書胡季堂工部左侍郎韓鐸都察院左副都御史覺羅巴彥學通政使夢吉大理寺卿富炎泰各九推畢順天府府尹率農夫終畝賞賚耆老農夫

如例○諭本日舉行耕藉適值天氣清明一切典禮辦理俱為妥協所有執事之大臣官員人等均著交部議叙順天府係承辦衙門蔣賜棨已經賞戴花翎仍與吳省欽一併交部從優議叙其老民人等向例有應得賞賚此次著加倍賞給此內有八十一歲之老民劉榮著賞給七品頂戴再加兩倍賞賚至隨從之侍衛人等著分別賞給緞匹以示朕行慶施惠至意○以兵部右侍郎伊齡阿戶部右侍郎汪承霈為會試知貢舉大學士王杰為正考官禮部右侍郎鐵保工部右侍郎管幹珍為副考官○甲子諭據畢沅奏續添荆江磯嘴壩工及打築萬城隄工情形各摺內稱黑窑廠碎石裹頭遵照諭旨改為磯嘴壩砌出江面順向東南接做共長十八丈又楊林洲砌出江面二十一丈自兩壩接出後對面窖金洲浮沙已刷去東西長四百七十八丈南北寬六十五六丈江面較前寬濶統計添做碎石工程共需例價銀五萬三千一百餘

兩又萬城隄現在做有九分工程。三月內即可一律告竣。惟楚省築隄並無夯礮一法。土方例價不敷礮工。現在招募岳州人夫酌給礮價不敢稍存惜費之見等語。荊州黑蠻廠等處壩工單沅等遵照指示機宜添築碎石接砌礮頭挑溜甚為得力。現在害金洲沙岸日漸衝刷業已著有明效。單沅等所辦甚屬妥協。即添估多需銀兩亦所不惜。惟期工程鞏固足資挑刷淤沙俾大溜南趨害金洲逐漸刷盡江流復舊最為緊要。至土工經久全恃層土層礮單沅添雇礮工不存惜費之見所辦亦是。又另摺奏荊州滿營兵房現在修理完整者已有十分之七。荊州城內外居民生計漸覺從容市闐俱復舊觀民情均各寧悅等語。覽之極為欣慰。其所奏此次兵房俱係各兵丁領銀自修大小各從其便不能與原估工程相符懇請免其報銷等語。此項兵房上年賞給帑項既經各兵丁領銀自修若

實錄卷一三三四

實錄卷一三三四

五十二

再令報部覈銷轉恐部中書吏從中需索徒滋往返駁查轉非朕惠恤各兵之意。單沅奏請免其報銷足見曉事著照所請竟無庸報銷以省案牘。惟荊州城工照估修築堅固仍報部覈銷以期經久。又諭甘肅省地瘠民貧並陝西延安榆林綏德三府州屬附近甘省地方亦屬磽薄向來該處民欠未完地丁耗羨及籽種口糧等項屢經降旨分別豁免昨勒保來京陛見詢以該省近日情形據稱甘省自四十七年至五十三年民欠地丁正耗並未完籽種口糧折色等銀二十七萬九千餘兩糧二百一萬七千餘石草一千一百一十一萬餘束陝西延安榆林綏德三屬自三十八年至五十三年民欠未完倉穀三十六萬九千餘石等語。甘省等處地方自從前加恩蠲免以後又有年所朕於加惠黎元之事從無遲待即多費帑金亦所不靳。所有甘肅省自四十七年至五十三年民欠未完地丁正耗銀

二十三萬九千三百餘兩。糧八十萬四千六百餘石。草一千一百一十萬餘束。四十九年。至五十三年。未完籽種口糧折色銀四萬五百三十餘兩。糧一百二十一萬三千餘石。俱著加恩豁免。並陝西延榆綏三屬民欠未完常平倉穀三十六萬九千餘石。著該督撫飭屬查明。亦一併加恩蠲免。以示朕惠愛邊氓。有加無已至意。該部即遵諭行。○又諭。朕閱內左門登載尚書房阿哥等師傅入直門單。

實錄卷三十三

三

自三十日至初六日。所有皇子皇孫之師傅。竟全行未到。殊出情理之外。因召見皇十七子。同軍機大臣並劉墉等。面加詢問。如係阿哥等不到書房。以致師傅各自散去。則其咎在阿哥。自當立加懲責。今據皇十七子奏稱。阿哥等每日俱到書房。師傅們往往有不到者。曾經阿哥們面囑其入直。伊等連日仍未進內等語。皇子等年齒俱長。學問已成。或可無須按日督課。至皇孫皇曾孫皇元孫等正

在年幼勤學之時。豈可少有間斷。師傅等俱由朕特派之人。自應各矢勤慎。即或本衙門有應辦之事。亦當以書房為重。況現在師傅內。多係閣學翰林。事務清簡。並無不能兼顧者。何得曠職誤功。懈怠若此。皇子為皇孫輩之父叔行。與師傅等胥有主賓之誼。師傅等如此怠玩。不能訓其子姪。皇子等即當正詞勸諭。如勸之不聽。亦應奏聞。乃竟聽伊等任意曠職。皇子等亦不能無咎。至書房設有總

實錄卷三十三

三

師傅。並不專司訓課。其責專在稽查。與總譜達之與眾諸達等無異。師傅內有怠惰不到者。總師傅自應隨時糾劾。方為無忝厥職。今該師傅等竟相率不到。至七日之久。無一人入書房。其過甚大。而總師傅復置若罔聞。又安用伊等為耶。此而不嚴加懲創。又復何以示儆。嵇璜年已衰邁。王杰兼軍機處行走。情尚可原。著從寬交部議處。劉墉胡高望謝墉吉夢熊茅元銘錢榮錢樾嚴福程昌期秦承

業邵玉清萬承風俱著交部嚴加議處至阿肅達椿身係滿洲且現為內閣學士毫無所事其咎更重均著革職仍各責四十板留在尚書房効力行走以贖前愆而觀後效○諭軍機大臣曰阮惠於官兵不敢肆行戕害收在黎城養贍一經孫士毅駁回表文遵即先行送出尚知畏懼天威但孫士毅甫經挫失之後威望已損計福康安此時已可抵鎮南著福康安檄諭阮惠以此事由於孫士毅文

聖訓卷三十四

十四

臣不諳軍旅以致辦理不善現奉諭旨將孫士毅解任來京兩廣總督員缺將本部堂補授本部堂久歷戎行從前兩金川土司自恃險遠狼狽為奸本部堂曾帶兵往勦將金川全境蕩平索諾木僧格桑倖賊並獻前年林興文等以臺灣地隔重洋聚眾滋事本部堂復帶兵渡海勦捕旬月之間立將林興文等生擒解京盡法懲治爾阮惠雖僻處廣南於金川之事諒亦或有見聞臺灣與廣南海道

可通林興文之事更當知悉爾以安南土酋膽敢抗拒官兵戕害提鎮大員其罪甚重今雖將官兵先行送還尚不足以贖爾之罪可即將戕害提鎮之人縛獻正法爾若不能遵奉獻出本部堂惟有統率大兵分路進討試思天朝何等力量爾試自揣度能逞其螳臂否等語向其嚴切檄諭阮惠接到福康安檄文即將戕害提鎮之人獻出福康安再為具奏候朕降旨遵行如福康安未到之前孫士

聖訓卷三十四

十五

毅已將阮惠表文先行具奏朕即當另行裁奪降旨並詳悉指示俾遵照辦理此檄即當畧停發往以俟後諭可也○又諭據保寧等奏將伊犁官設鋪面事體情形察覈辦理伊犁地處絕徼官兵日用諸物惟藉商賈由內地運往恐奸商於物少之時任意居奇有官設鋪面則兵丁得以賤價購買而所得息銀又可接濟差務添補倒斃馬匹於兵丁生計大有裨益但辦理不善反滋弊端著傳諭保

寧所有管理鋪面事務及遣赴內地購買貨物。務擇曉事之人辦理。毋任弊混。仍不時實力稽查。補行乾隆五十二年福州駐防軍政。有疾官一員。年老官二員。才力不及官一員。分別處分如例。調正紅旗蒙古副都統佛住為鑲黃旗滿洲副都統。以工部掌印給事中評德為正紅旗蒙古副都統。以正黃旗護軍統領愛興阿為直隸馬蘭鎮總兵。乙丑。諭昨因尚書房阿哥等師傅。自二月三十

軍機處手書

十六

至本月初六。七日之久。無一人入書房。殊出情理之外。已降旨將總師傳嵇璜。王杰。交部議處。劉墉。胡高望。交部嚴加議處矣。劉墉係大學士劉統勲之子。朕念伊父宣力年久。特加恩擢用。其在府道任內。頗覺黽勉。及為學政。即不肯認真。逮授湖南巡撫。聲名亦屬平常。因內用尚書。其辦理部務。更復一味模稜。朕曲賜優容。未加譴責。伊自當感激朕恩。亟思愧奮。益矢勤慎。今阿哥師傅等不到書房。至七日之久。劉墉身為總師傳。又非如嵇璜年老。王杰兼軍機處行走者可比。乃竟亦置若罔聞。似此事事辜負溺職。於國家則為不忠。於伊父則為不孝。其過甚大。豈可復邀寬宥。且伊係大員。亦不必再俟部議。劉墉著降為侍郎銜。仍在總師傳上行走。不必復兼南書房。以觀其能愧悔奮勉否。所有吏部尚書員缺。著彭元瑞調補。兵部尚書員缺。著孫士毅補授。孫士毅未到之前。其兵部尚書事務。仍著彭元瑞兼署。至協辦大學士。本條可有可無之缺。現在內外漢大臣內。一時亦不能得人。此時且毋庸補放。至皇子等年齒俱長。學問已成。或可無須按日督課。皇孫皇曾孫。皇元孫等正當年幼勤學之時。豈可少有間斷。師傳等之任意懈弛。皆由總師傳不能稽查督飭所致。嵇璜年力衰邁。王杰兼軍機處南書房行走。既不能隨時查察。即不必復兼此虛名總師傳之職。著改派阿桂。李綬為總

軍機處手書

十七

師傅以專責成。王懿修現實患病。竟毋庸交部。亦不必在尚書房行走。著總師傅等另選人品端方。學問優長之員。帶領引見。候朕簡派。謝墉在學政任內。聲名平常。本係獲咎之人。前京察議處時。經吏部議以革職。念其學問尚優。是以從寬留任。仍令在尚書房効力。伊更當知過感奮。乃亦復偷安。七日不到。更屬有乖職守。謝墉著降為編修。革職留任。不必復在尚書房行走。著在武英殿修書處効力贖罪。其餘各師傅等。統俟部議上時。再降諭旨。○諭軍機大臣曰。已延三奏。前此喀什噶爾等處。拏獲私販大黃人犯。一俟解到。即當審辦。現抵蘭州後。又接哈密大臣咨會。盤獲大黃五千餘觔。將訊出私販商民。解送甘省。現已檄行肅州。將該犯等速行解省嚴辦等語。前已有旨。令將此等解到人犯。嚴加看守。俟勒保陛見回任後。再行審辦。今勒保業已到京。瞻觀初十日。朕啟鑒臨幸盤山。該督

即於送駕後起程。速行回任。所有前後拏獲各案人犯。已延三此時。且不必審辦。俟勒保回任後。再行詳細訊鞫。從重治罪。將此傳諭。已延三知之。○又諭據尚安奏。接准伊桑阿等查出由肅州運販大黃。至烏魯木齊。萬昌號等三處鋪面。並查拏烏魯木齊開鋪民人文移。即將郭相泰等拏獲。解送勒保等語。又據福崧奏。請將安集延回民喀哈默特等七人。重責逐回本地。其喀什噶爾地方回民愛依特。併賽哩木地方回民邁瑪第敏等。各枷號兩個月。重責等語。前因俄羅斯並不遵行兩邊所定舊例。始行禁止恰克圖交易。至大黃乃俄羅斯地方必用要物。從前禁止交易時。俄羅斯不得大黃。頗覺惶恐。今聞新疆地方。屢經從貿易回民。並安集延回民內。搜出私販大黃至數千萬觔。特因奸商明知安集延布魯特哈薩克等常在俄羅斯地方貿易。遂貪利自內地將大黃運至新疆。由安集延

回民。又轉發俄羅斯地方。今恰克圖雖行禁止交易。由新疆仍通大黃。是與未行禁止無異。故俄羅斯不至窘迫。若不從重治罪。無以示懲。著將此等偷販大黃商民等。即照竊盜偷獲財物數目例治罪。併將尚安拏獲商民郭相泰等審辦之處。俱面交勒保外。仍令新疆各處將軍大臣等。嗣後若係安集延回民。即重責逐回本地。交該伯克頭目等嚴行約束。其喀什噶爾。葉爾羌。烏什。阿克蘇等城回

民。皆與內地商民相等。此等地方回民。俱應解送勒保。從重治罪。今即將福崧所奏喀什噶爾地方回民愛依特賽哩木地方回民邁瑪第敏等解送勒保治罪。○以正白旗蒙古副都統扎郎阿為正黃旗護軍統領。○丙寅清明節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。

上命。

皇十五子。祭。

孝賢皇后陵。○遣官祭。

端慧皇太子園寢。○諭行在兵部印鑰。最關緊要。其帶管之人。向俱奏請特派。非若別部院印鑰。照例奏聞。交扈從之各該堂官。自行帶管者可比。此次行在兵部印鑰。仍著和坤帶管。○又諭據德勒格楞貴奏。拏獲偷竊回部之土爾扈特托輝拉賴博勒泰。分別定擬請旨等語。凡偷竊馬匹十匹以上者。罪即應絞。今土爾扈特托輝等偷竊回部馬三十餘匹。理應一面正法。一面奏聞。况新疆法禁尤

宜嚴肅。乃德勒格楞貴具奏請旨。殊屬拘泥不諳事體。土爾扈特托輝拉喇著即行正法。以示懲儆。餘著照所請行。嗣後遇此等案件俱著照此辦理。不必候旨。土爾扈特汗策凌納木扎勒遵即將偷竊馬匹盜犯全行拏獲解送。實屬出力可嘉。業經諭令寄賞大緞二匹。大荷包一對。小荷包四箇。德勒格楞貴接到時著即賞給策凌納木扎勒並將朕欣慰嘉予之意曉諭。令伊嗣後愈加奮勉。○諭軍機大臣等。昨據孫士毅奏阮惠差人將未回官兵先行送出。即日可以到關。已有旨諭令福康安檄知阮惠並恐福康安未到之前。孫士毅先將表文奏到。復諭令將檄諭暫停發往。以俟後諭。今孫士毅於該夷日到關時。令湯雄業諭以孫士毅已奉旨回京。福康安即日可到。俟福康安到彼。再代為懇求轉奏。尚與昨降諭旨相合。至阮惠所進表文措詞恭順。尚知畏懼悔罪。但伊連次乞降相隔未久。

自應示以遲難。以堅其畏罪內附之誠。若孫士毅業已允為轉奏。則摺到時。即應降旨。令孫士毅係令湯雄業諭以俟福康安到彼。再為懇求代奏。是此次回覆該夷目。不過作為湯雄業之意。自行辦理。孫士毅尚未聞知具奏。所辦頗是。即其表文亦係孫士毅拆閱副表。不值特降諭旨。著福康安仍遵照昨旨。檄知阮惠。以爾本安南土酋。乃敢抗拒官兵。戕害提鎮大員。其罪甚大。今雖三次乞降。並將未回官兵送出。尚不足以贖爾之罪。且爾所稱已將抗拒官兵之人正法。此言亦不足信。本部堂不便代為具奏。如爾果誠心歸附。將戕害之人縛獻。本部堂方可代為轉奏。爾若不能遵奉獻出。惟有統率大兵。分路進剿。不將爾等盡數誅夷不止等語。即行向其嚴切檄諭。俟阮惠遵檄呈獻。福康安再允為具奏。屆時酌量情形。再行降旨指示辦理。至送出官兵內。遊擊張會元。歷經出師緬甸金川等。

處打仗受傷。今又因為賊戕傷倒地不能退出。情殊可憫。著福康安於該員傷患平復後給咨送部引見。守備勞顯亦因受傷被留。訊無卑屈情事。著准其回任。其餘送出官兵並著福康安遵照前旨分別辦理。○兵部刑部議准。江南提督陳杰奏稱營員捕獲盜犯。若俟定案後再將供出逸犯偵緝。恐餘匪聞信先行遠颺。請嗣後營弁拏獲盜犯即解交該管地方文員訊明首夥姓名立即移咨嚴緝。又營員承緝盜犯未獲。如有能拏獲隣境盜犯二案准其抵銷本任一案。俟抵銷完後有能多獲隣境一案者給咨送部引見從之。○陝甘總督勒保奏土爾扈特和碩特台吉等每年入覲由寧夏榆林沿邊行走應於萬壽節前趕至熱河十一月內回至嘉峪關其回疆各城伯克應於十二月二十以前至京正月分出京。臣謹酌定限期。土爾扈特和碩特台吉限五月內抵肅州七月初三四等日

出甘境。七月十六七等日出陝境。回疆各伯克限十月二十日以前抵肅州。十一月二十一日以前出甘境。十一月二十九日以前出陝境。如有遲逾嘉峪關以外各在各該處大臣嘉峪關以東陝甘境內各在該省地方官分別議處並請勅下山西直隸一體遵照得旨如所議行。○丁卯。上自圓明園啟鑾幸盤山。○諭朕此次巡幸盤山所有沿途經過地方本年應徵地丁錢糧著蠲免十分之三。○是日駐蹕湯泉行宮。○戊辰。孝賢皇后忌辰遣官祭陵寢。○諭上年奉天所屬廣寧等七城被水成災。曾經降旨交慶桂等查明被災旗民人數應行酌借口糧蠲賑各事宜妥為辦理矣。本日雅朗阿復命詢以該處情形據奏米糧價值尚未平減等語。廣寧等七城上年被有水災現屆青黃不接之時米價較昂民食究恐

不能充裕。著加恩將廣寧、承德、遼陽、開原、海城、鳳凰城、牛莊等七城再行展賑一月。即可接至麥收。口食有資。以示朕軫念陪都有加。無已至意。該部即遵諭行。○諭軍機大臣等。奉天所屬之廣寧等七城上年被災。經慶桂查奏。業已加恩展賑一月矣。至錦州所屬地方。雖詢據慶桂該處上年並未被災。但向來錦州等處所產米糧俱販至永平售賣。今據劉戡奏永平地方因上年盛京販運稀少。市價稍昂。永平商販轉有載米出關之事。可見錦州寧遠一帶戶鮮蓋藏。民食究不能充裕。著傳諭都爾嘉、宜興、奇臣即行體察情形。如果民力拮据。應須賑貸。或酌量接濟之處。即行據實奏聞。勿得稍存諱飾。尋奏錦州、寧遠二處上年雖未成災。而秋收僅止六分有餘。市集糧石稀少。已飭該處地方官將實在貧難戶口不論旗民動支存倉米石借給一月口糧。分作二年帶徵完款。並不拘常例再行

減價平糶。報聞。○又諭據福康安覆奏接奉節次諭旨。摺內稱閩省地方之事大約難於粵省。文武廢弛。亟宜大加懲創。起行時已諄切告知徐嗣曾務須振刷精神。加意整頓等語。閩省人情素稱犷悍。亦由地方官平日因循廢弛。必須實力整頓。方可日有起色。現在福康安已調任兩廣。伍拉納係新任總督。所有地方事件皆其專責。務宜一切振作精神。與徐嗣曾商酌妥辦。以重海疆。伍拉納離該省藩司未久。徐嗣曾在閩有年。一切未能早為整頓。朕今不加深責。已屬格外施恩。若再不實心辦理。稍存疎懈。致有仍前玩誤。恐該督撫不能當其咎也。將此各諭令勉力為之。○又諭曰。王普奏報雨雪情形一摺。將懷慶府屬各縣地方得雨得雪分寸日期詳悉奏明。而衛輝彰德等府聲敘牽混。殊未明晰。昨據劉戡奏直隸順德府屬入春雨雪頗少。因思豫省衛輝彰德二府與順德接壤毗連。順

德雨雪既未普霑。恐衛輝彰德二屬亦未能優足。本日王晉摺內稱懷慶府屬得有雨雪。深遠而於衛輝彰德等府則止。稱於二月十五六七八等日得雨。並未將各該府是否雨澤霑足之處詳悉聲敘。朕心深為厯念。河北各屬近年頗艱雨澤。恐現在尚不無望澤之處。著傳諭梁肯堂即行詳查該處雨水是否業已一律普霑。如尚未能深透。農田難資播種。小民恐或致失所。況現屆青黃不接之時。急宜酌量調劑。該撫務當飭屬詳悉查明。並將如何接濟之處一面辦理。一面據實具奏。毋得稍存諱飾。以副朕軫念民依至意。又諭曰。福康安此摺係二月十九日行抵潮州拜發。計此時自可前抵鎮南關。與孫士毅籌辦一切。安南之事屢經孫士毅奏。阮惠數次啟關乞降。已節降諭旨令福康安酌量妥辦。福康安到彼時自能遵照辦理。但朕於安南一事決計不欲調兵進剿之故。不能不詳悉

諭知。安南叢爾彈丸。以天朝全盛之勢調集大兵分路進剿。何難立就蕩平。前次孫士毅帶兵八千一月之內即能直抵黎城。若命福康安檄調多兵聲罪致討。必能立奏膚功。但阮惠自量螳臂不能抵禦。必仍竄廣南。即使我兵深入窮追直抵廣南。而阮惠或竟遁竄入海。逃至附近安南之暹羅南掌等國。天朝豈有因阮惠一人未獲。又加兵他國之理。況阮惠雖得罪天朝。旋即屢次乞降。頗知畏懼。情詞恭順。亦無干犯怙惡之事。從前緬甸尚置而不辦。阮惠情罪較之緬甸有間。而其水土惡劣。又與緬甸相等。即使將其全境蕩平。郡縣其地。內地之人在彼難以久居。且該處人情反覆。亦難保日久不復滋事。是以節降諭旨。如阮惠誠心歸順。孫士毅現已檄調兵三千名防守關隘。不必再行紛紛徵調。福康安想尚未接到前旨。故有此奏。福康安抵鎮南後祇須遵照前旨嚴行檄諭。阮惠現已震

懾請降福康安又威望素著之人自必更加畏懼俟可以准其降附時即當酌量情形奏聞請旨此係朕就現在情形思慮所及遙為指示如將來情事或有不同之處朕再當隨時訓誨福康安自能遵朕妥辦○直隸總督劉戡奏永平府屬因五十三年奉天秋收稍歉商販稍少糧價較昂請將該府屬七州縣倉糧不拘常例查明市價在一兩六錢以上者每石減銀一錢五分在一兩八九錢以上者每石減銀二錢二兩以上者每石減銀三錢零星糶賣以裕民食得旨如所議行○湖南巡撫浦霖遵旨覆奏湖南省每年徵存銀兩除支應本省經費外約餘剩銀三十萬兩本屬寬裕惟自五十一年至五十三年節次撥解湖北等省二百二十四萬餘兩是以現存銀較少應請於本年春撥及奏銷案內撥出銀十七萬六千七百十九兩歸還原款通融籌備下部知之是日駐蹕三家店行宮

己巳祭

先蠶之神遣妃行禮○諭本日自三家店啟鑾駐蹕大新莊所有經過地方本屬低窪且當春澤霑霑之後該地方官鋪墊道路俱能一律平坦著該督查明本日承辦前段道路之員咨部議敘○諭軍機大臣曰畢沅奏江陵縣被水衝失逃散監犯共八十八名除已獲五十三名先後自行投到五名尚未獲三十名現在飭屬嚴緝陸續又拏獲六名其餘逸犯二十四名仍飭購線認真勒緝等語上年江陵被水衝失監犯八十餘名曾經降旨如有避水得生自行投到者尚為守法應照其本罪減等發落其係當時救出者自應均照本案辦理茲據畢沅奏當時逃散監犯內現在續獲六名該犯等藉災逃逸希圖漏網情節較重著傳諭畢沅即將拏獲之六犯按其本罪量為加重定擬以示懲儆其餘未獲之二十四犯仍嚴飭各屬購線緝拏務獲照

此從重辦理。毋致各犯遠颺漏網。再各犯等係於上年六月內逃散。乃遲至半年有餘。僅鞏獲六名。辦理殊屬遲緩。著畢沅嚴飭所屬將未獲各犯。上緊躡緝。以期速獲。毋得仍前怠玩。致干咎戾。○又諭據伍拉納奏杭州協副將西密揚阿。係近族姪孫。應行迴避一摺。已交部照例調補矣。至閩省地方情形。昨據福康安奏稱。蒞閩後目覩文武廢弛。亟宜大加懲創等語。可見該省吏治營伍。疲玩已久。

平定三言

壹

李侍堯甫經到任。即在廈門一帶。辦理軍務。旋即染患瘡疾身故。不及整頓。情有可原。是該省諸事廢弛。總由富勒渾雅德在彼一味因循。漫無查察所致。伊二人前於另案治罪。秋決時一同綁赴市曹示儆。旋即加恩釋放。復因濂澳汛遺失礮位一案。發往伊犁。令其自備資斧。効力贖罪。今思伍拉納離該省藩司未久。徐嗣曾任閩撫藩有年。一切未能整頓。咎本難辭。祇因歸罪於富勒渾雅德二人。

不復另加深究。並將伍拉納擢用總督徐嗣曾賞戴花翎。該督撫等當如何感激愧懼。振作精神。力除積習。以冀稍贖前愆。將來一二年後。或另派他人赴閩。或仍將福康安調回。若查出閩省地方。尚無起色。則富勒渾雅德二人。即伍拉納徐嗣曾前車之鑒。試令伊等自思。當得何罪。尚不止於陪綁發遣已也。將此再行嚴切傳諭知之。○又諭昨因福康安覆奏接奉諭旨一摺。業將決計不欲調兵進

平定三言

壹

勦之故。詳悉傳諭矣。安南蕞爾彈丸。天朝若調集大兵。分路進勦。原無難立時蕩平。但調集大兵。深入進討。不特勞我師徒。而該國人眾。罹於鋒鏑。中外一體。夷民亦皆赤子。朕心究有所不忍。況從前緬甸。將楊重英等擅留彼處。尚因其水土惡劣。置而不辦。安南水土與緬甸相等。而阮惠畏懼天朝。表文內情詞恭順。且稱已將戕害提鎮之人。查出正法。並將未出官兵。全行送回。其情事與昔日潰駭

迴別。福康安檄諭阮惠。亦須於嚴正之中。開以一線之路。當諭以爾等悔罪求降。如表文內措詞未能妥協。本部堂自當駁回。如情詞懇切。立言恭順。亦必為爾陳奏。候旨遵行。天朝體制。封疆大吏。事無鉅細。從不敢壅於上聞。爾果有此誠心。自可仰邀聖鑒等語。如此明白宣諭。阮惠等不致絕望。必當懇切乞降。俟可以允准時。福康安酌量情形奏聞。候朕再酌量降旨。○湖廣總督畢沅奏。荊州萬城

實錄卷一百三十五

高

隄工緊要。應照河工之例。撥派標營弁兵。協同知縣佐雜。分汛防守。查荊州水師營。設有守備千把。專管水操。並護送銅鉛等差。請令嗣後兼管隄工。其戰守兵二百十三名。移駐隄上。每二里設一卡房。官兵二名防守。守備以下。聽荆宜施道節制。並就近歸荊州城守營叅將兼轄。得旨。如所議行。○是日。駐蹕大新莊行宮。○庚午。諭據保寧等奏。伊犁正黃旗揚通阿佐領下。閑散永福在逃。拏獲。審明

枷號五箇月。期滿。發往南路回城等語。所辦殊屬錯謬。永福係伊犁駐防滿兵。素不守分。懼伊兄管教之嚴。膽敢在逃。十有餘年。情屬可惡。回城亦係新疆地方。將此等不肖之徒。發往回城。亦不免復至逃亡。此等人犯。應即在伊犁永遠枷號。既可示警。併亦不致再逃。著交保寧等。將永福即在伊犁永遠枷號。以示儆戒。○又諭。此次巡幸盤山。所有修墊山道人夫。著加恩賞給銀二百兩。○吏部奏。尚

實錄卷一百三十六

高

書房曠班不到。毫無稽查之總師傅大學士。嵇璜等。照例分別降調。得旨。嵇璜王杰著改為降三級從寬留任。胡高望吉夢熊茅元銘錢榮。錢樾。嚴福。程昌期。秦承業。邵玉清。萬承風。俱著改為革職從寬留任。胡高望等係專司訓課之員。其曠職誤公。非尋常玩誤可比。並著八年無過。方准開復。○是日。駐蹕盤山行宮。至丙子。皆如之。○辛未。倉場侍郎蘇凌阿。劉秉恬。長蘆鹽政蘇楞額。奏山東德州衛

首幫漕船。已於三月十二日抵壩。其後接豫
省通所各幫。已過津關。臣等督率司漕各員。
上緊催趲。俾各挨次銜尾北上。如期交卸得
旨嘉獎。

實錄卷之百十四

奏

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十四

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十五

監修總纂官是謀官太子太傅文淵閣大學士文淵閣領侍衛內大臣稽察欽奉 上諭事件處管理
吏部總理事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣處謹
總纂官是謀官太子太傅文淵閣大學士文淵閣領侍衛內大臣稽察欽奉 上諭事件處管理刑部戶部三庫事務
世襲騎都尉軍功加十九級隨帶加三級又加二級臣等謹將內大臣戶部尚書錢謙益滿洲都統軍功紀錄五次
尋常紀錄十四次臣德瑛是謀官太子少保工部尚書紀錄六次臣曹振鏞等奉
敕修

乾隆五十四年己酉三月癸酉閏浙總督覺

羅伍拉納奏

接奉廷寄。命趕赴閩省新任。查
辦海疆遺失礮位。及洋盜各事宜。自當實力
整頓。不敢存姑息之見。自取咎戾。得旨。向亦
不可謂無罪。此後再不認真。前車具在。○甲
戌。諭。武備院原存官鞍八百四十餘副。為數
太多。嗣後以五百副為定額。其減去鞍三百
四十六副。仍存該衙門留備添補之用。○諭
軍機大臣等。前次阮惠送出官兵五百餘名。
據稱尚有未出二百餘人。即當陸續護送進

關。茲復送出兵夫三十九人。是尚有一百餘人。未經送出。據稱尚須陸續送回。現在曾否又續行送至。著福康安等查明具奏。然此亦非要事。至黎何前此不避險阻。尋覓黎維祁。護送黎城。黎維祁棄印潛逃。黎何復因該國印篆。係天朝頒賜。即欲赴關呈繳。頗知大義。既為賊衆所追。似應畧遣弁兵前往接應。為是。孫士毅素係曉事之人。何以竟不見及此。萬一黎何為賊衆追擎。致被戕害。豈不可惜。

據通事陳正忠稟稱。黎何帶同夷官數人。從後山逃去。日內即可到關。等語。黎何曾否業已齎印入關。抑或尚無實在下落。著即查明具奏。黎何困苦艱難。始終一節。其居心行事。殊為難得。朕欲親見其人。將來入關後。福康安即當派員將黎何護送進京。候朕酌量加恩。並曉諭黎何。令其安心進京。勿致稍生疑畏。至籌辦安南之事。節次所降諭旨。甚明。福康安此時自己前抵鎮南關。如何與孫士毅

酌量妥辦。及阮惠曾否又遣人到關。籲請之處。並著即行覆奏。丙子。諭曰。明亮等奏稱。從安集延回民什仔庫勒等六人。喀什噶爾回民博巴克等七人。處查出大黃四千餘觔。請將安集延回民枷號一個月。喀什噶爾回民枷號兩個月等語。所辦殊屬錯謬。喀什噶爾回民等。受朕恩澤。歷有年所。與內地民人無異。非安集延回民可比。今外部落哈薩克布魯特。安集延等地方回民。採買大黃。特為運至俄羅斯地方。貴價販賣。喀什噶爾等處回民。受朕恩澤。安居樂業。與內地民人無異。乃竟膽敢求得多利。兌換如許大黃。轉販情屬可惡。若亦照安集延回民一體枷號治罪。無以示儆。著交明亮等將安集延回民什仔庫勒。博巴克。朱里拜。丕爾圖。穆喇特。阿瓦斯。默特。厄布色勒。六人。即照明亮等所奏。枷號一個月。杖四十。逐回本地外。將喀什噶爾回民博巴克。遮林。鄂碩爾。邁瑪第敏。他克。他拜。

阿什瑪。邁瑪賴瑪七人。俱解送勒保處。遵朕
屢降諭旨治罪。嗣後如有此等人犯。俱照此
辦理。至從前在喀什噶爾地方。搜獲商民李
貴升。係在新疆為首運販大黃之人。著交勒
保。俟尚安解到時。審明李貴升。即行定擬死
罪。毋致稍為輕縱。○諭軍機大臣等。據刑部
覈擬行劫年班回旗蒙古台吉衣物之盜犯
王大等一案。將王大。蕭福等分別斬梟發遣。
其未獲盜首禿耳子。即拖娃。及夥盜彭大。仍
請飭令直隸總督。山西巡撫。並提督衙門。都
察院。順天府。一體嚴緝務獲。審擬另結等語。
禿耳子。知有年班進京之外藩蒙古。將次回
旗。並探由保安州地方經過。輒敢起意邀人
搶劫。彭大。用石塊擲開駱駝。幫同掀揭蒙古
包。劫搶財物。均屬法無可貸。斷難任其漏網。
除就近諭知劉綏。飭屬嚴密查拏外。並著傳
諭步軍統領。都察院堂官。順天府尹。山西巡
撫。一體選派妥幹員役。購線緝拏。務獲併案

辦理。毋致要犯得以遠颺。○丁丑。

上迴鑾。○諭本日自盤山迴蹕。適需春膏。所有
嶺上修道人夫。著共賞給銀二百兩。其沿途
墊道兵丁。人數較多。著劉綏查明。每名賞給
銀二兩。以示體恤。○諭軍機大臣曰。圖薩布
奏審訊天地會匪陳丕。籍隸福建漳浦縣。三
十二年與張破臉狗同入天地會。俱拜從提
喜和尚為師。後因同鄉人盧茂等破案治罪。
即害怕在家耕種。並無陳彪傳授。亦未到過
臺灣。雖該犯所供與陳彪在閩省所供稍異。
但既與張破臉狗同拜提喜為師。入會多年。
未便因供情稍有未符。輾轉咨查。徒滋延案。
請將陳丕擬絞立決等語。陳丕一犯。雖據供
認拜師入會。但傳自陳彪。及同趙明德等在
張破臉狗家傳會等事。俱未據實供吐。若即
將該犯正法。嗣後拏獲會匪。轉因實證無人。
難於逐細根究。况陳彪及提喜之子行義俱
經閩省拏獲。自應將該犯解赴福建。嚴加審

訊著傳諭圖薩布。即派委妥員兵弁。將陳丕解交閩省。與已獲之陳彪質訊。或能從此究出會內要犯。亦未可定。俟無可質審之處。即在閩省正法。亦可儆衆。將此傳諭圖薩布。並諭伍拉納。徐嗣曾知之。○是日。駐蹕大新莊行宮。○戊寅。諭軍機大臣曰。富綱奏。此項進口兵丁。行走落後。因不識該國路徑。以致未能全數回滇。今馮振先所帶之兵。既由粵西一路退回。或經阮惠送出。均未可定。著富綱查明。未到各兵。開具營分姓名。咨會粵省。著福康安等。於續行進關兵丁內。逐加查覈。如有滇省之兵。即行移送滇省歸伍。並將該兵丁等。是否因迷路由粵西退回。抑係阮惠送出。遇便覆奏。○又諭。據巴忠等奏。鄂輝成德。自宗喀前進。因積雪甚深。不能迅速完事。該處地極沍寒。雪深梗路。以致行走多延時日。原屬無可如何。然此時天氣已屆融和。想積雪亦當消化。何該將軍等久無信息。朕甚為

之焦急。至摺內所稱前後藏七千石口糧。止用過二千餘石。所餘尚為充裕等語。此次口糧。皆在扎什倫布。及脅噶爾一帶存貯。今鄂輝在宗喀。以西地方。為雪所阻。曾否將糧石運至軍營。速行查明覆奏。並將鄂輝等現在曾否前進。迅速奏聞。○是日。駐蹕三家店行宮。○己卯。上還圓明園。○諭上駟院衙門。管理御馬驛。俱係豫備朕巡幸之用。事務殷繁。和坤所管之事較多。恐照應未能周到。而阿彌達目力遲鈍。人又謹飭。不足以資整理。毋庸兼管。上駟院卿事務。所遺員缺。著春寧補授。李質穎年力就衰。著以原品休致。其上駟院卿員缺。著巴寧阿補授。所有三山事務。著福克精額管理。○諭軍機大臣曰。鄂輝等尋覓小路。恢復宗喀。復因該處積雪甚深。阻滯不能前往。萬一軍糧不濟。兵丁等不耐寒冷。不服水土。致多傷損。轉屬於事無益。聶拉木。濟龍二處。

究係偏僻小地。無甚緊要。理宜將兵撤回。朕此旨到時。若雪已融化。鄂輝業經前進。傳喚巴勒布頭目來營。諸事辦妥。固屬甚善。倘積雪未消。我兵既不能前往。巴勒布頭目亦不能前來。鄂輝等不必固執前旨。不敢撤兵。朕反覆思之。此時竟以暫行撤回為是。但撤兵時。須於噶布倫內擇一能事可信者。並揀藏內舊有官兵。及鄂輝等帶有屯練內熟習唐古忒話之人。各派一名。會同前往。巴勒布地方。諭以從前噶布倫索諾木旺扎勒侵漁商人。第巴桑幹私行增稅。及爾等投遞呈詞。又未代為陳奏。大皇帝已一切鑒知。故將索諾木旺扎勒桑幹俱分別懲治。爾等縱有屈抑。亦已伸雪。前因衛藏並未豫備。內地大兵。相離較遠。致爾等搶掠聶拉木。濟龍。宗喀等處。迨奉旨調兵前來。又遇雪阻。實是爾等微倖萬一。今以大兵不宜在此久駐。暫行撤回。爾等若倚恃雪阻。於官兵撤回後。復敢互有侵

犯。我兵追駐藏內。爾等於春夏時滋擾。即行痛加剿戮。若仍俟冬雪之時。藉以抗拒。試思爾等既至藏界。歸途豈獨無雪。我兵當乘勝掩殺。絕其後路。不令一人生還。彼時追悔何及。如此明白指示。令噶布倫等傳知。伊等如何登答。亦令噶布倫轉行稟覆。即可知其誠偽。此事亦不必明言諭旨。即作為將軍大臣之意。一面遣人前往。一面即將官兵撤回。在扎什倫布等候。俟噶布倫等回時。再行徹至前藏。但撤回之後。或巴勒布再有蠢動。亦難保其必無。鄂輝等當與巴忠會議。或於此次所調達木兵內。及伊等帶往應行換班之兵。共揀選一二千名。作為後護。仍留在藏。不時演習。以備不虞。更為周妥。著傳諭鄂輝等。即行熟商定議。迅速奏聞。○庚辰。諭軍機大臣等。安南之事。不值大辦。屢有旨諭福康。安如阮惠。誠心歸順。於天朝體制已得。即可完局。臨時當相機籌辦。候旨遵行。福康安於初三

日已抵梧州。距鎮南關不遠。阮惠業經震懾。三次乞降。福康安又係威望素著之人。賊匪聞福康安到彼。自必更加畏懼。計福康安此時已抵鎮南。惟當遵照節次諭旨。與孫士毅就近籌辦。俟可允准時候。朕降旨遵辦。○以少詹事慶齡為詹事。以光祿寺卿德瑛為太常寺卿。○辛巳。諭軍機大臣等。據富綱奏該省騰越之杉木籠地方。上年冬初派撥分駐巡防兵五百名。現在分起撤回。所有本年留防兵三百名。仍請暫留一季。以便稽查私販等語。杉木籠地方與緬甸接界。是以每年冬初派兵前往分防。今緬甸業已投誠。毋須多兵駐劄。現屆撤回之候。自可照例撤回。至留防兵三百名。原為稽查私販而設。仍應照舊酌留。以資查察。惟聞該國貨物內如棉花等項。為滇省民人需用。似此等物件於內地民人甚屬有益。於例禁之中。不妨稍存通變。但貿易一事。尚未據該國具表懇求。現在私販

自應照舊嚴禁。即將來該國長遣使誠敬來求。俟該督等奏到。候朕臨時酌量降旨遵辦。惟內地奸民往往有偷至緬地者。從前懜駁時。即聞有江西湖廣之人為之主事。現在雖不聞有此等奸民。不可不防其漸。該督等惟應不時留心嚴密稽查。不可因該國已經內附稍存大意也。將此傳諭富綱。譚尚忠知之。○又諭曰。福康安於初三日已過梧州。計此時早抵鎮南關。此事朕再四思維。定計不欲調兵進剿之故。亦已節經詳細諭知福康安等。不知福康安到彼察看情形。與孫士毅面為商酌。將來尚須畧為進兵否。但朕意總以不復進兵之為愈。著再傳諭福康安等。即將近日賊匪光景如何。及將來竟無須進兵。或二人另有所見之處。迅速熟商。據實馳奏。再降諭旨遵行。○協辦大學士公兩廣總督福康安奏。臣行至廣西貴縣地方。接受督篆。一路密察安南動靜。並以情事推之。黎維祁棄

印潛逃。竟係一童駭昏豎。不足憐惜。其國中亦並無愛戴故主者。阮惠既欲號召國人。自必仰藉

天朝聲勢。其畏懼震懾。似非虛假。惟曾抗我顏行。此時未便遽畧跡原心。臣到關後。當於拒絕之中。予以轉旋之路。總須審慎隄防。一有把握。即當馳奏請旨。諭軍機大臣曰。福康安所奏大端已得。祇可如此辦理。福康安於十二日已過南寧。計此時早抵鎮南關。與孫士毅熟商妥辦。俟福康安奏到。再當酌量降旨。至副將慶成因其隨至軍營。是以諭令馳驛來京。以備詢問。今福康安於途次遇見該員。先向詢問。雖據福康安奏。該員所述。與傳聞之言。無甚異同。但何不畧叙數語奏聞。著傳諭福康安。即將抵鎮南關後。作何籌辦。並慶成所述情形。若何之處。遇便奏聞。壬午。諭前因俄羅斯等不守定約。將為匪賊犯。不遵共定章程辦理。是以停止恰克圖貿易。並嚴

禁私販大黃出關。乃近來奸商回民。惟利是趨。不遠萬里。將大黃販至新疆。由哈薩克布魯特安集延等處轉售於俄羅斯。經各處將軍大臣查拏。業已從重治罪。並於沿海口岸。亦嚴飭禁止。此足令俄羅斯窮蹙。但新疆所需牲畜。俱係哈薩克等驅至伊犁等處販賣。安集延人等。又與哈薩克布魯特不同。常在俄羅斯地方貿易行走。俄羅斯等不得大黃。或中懷缺望。誘令伊等不將牲畜帶至伊犁。則亦甚有關係。哈薩克布魯特人尚淳樸。未必即入俄羅斯彀中。但安集延人等狡詐。恐為俄羅斯所惑。不可不留心查察。著通諭伊犁喀什噶爾葉爾羌烏什阿克蘇將軍大臣等。潛行訪察。相機辦理。癸未。諭曰。奎林等所奏審擬各案。於汛兵糾眾械鬪逞兇斃命。及棍徒糾夥強搶穀石兩案。已將該犯陳相徐彩麟等恭請王命正法。而於員弁因搜拏賊匪。兵役乘機肆搶一案。雖將兵丁柯鳴鳳

等問擬斬決。但未即行正法。尚在候旨遵行。所辦殊未允協。臺灣甫經大加懲創之後。該兵丁等。孰敢借搜拏賊匪之名。乘機搶奪。實屬目無法紀。奎林等辦理此案。於審明定擬後。即應將柯鳴鳳等立寘刑誅。再行具摺奏聞。方為正辦。若拘泥成例。候旨遵行。則臺灣遠隔重洋。往返稽遲時日。倘該犯等於監內病斃。轉得倖逃法網。甚或因防範稍懈。以致別滋事端。更屬不成事體。現已將所奏各摺。批交法司。即日速議發往。以便將該犯等速正典刑。並著傳諭奎林等。此後如遇有此等搶劫械鬪等案。即飭屬上緊嚴拏審辦。於審明後。即將該犯一面正法示衆。一面奏聞。俟三年後。該處刁悍之習。日漸斂戢。兵民咸知畏法。然後於命盜等案。再照舊例辦理。將此由五百里傳諭奎林。萬鍾傑。並諭該督撫知之。○諭軍機大臣等。自二月二十九日。鄂輝等遞到奏摺後。迄今又將一月。並未續有奏

報。雖係雪深路險。事難速竣。然此時鄂輝等究係作何辦理。並該處積雪約計何時可以融化。亦當隨時奏聞。巴忠現在前藏。既知官兵為雪所阻。未能前進。自應遣人急往探訪信息。豈亦無風聞之處。朕因此事甚深懸念。宵旰不寧。伊等豈不知之。著傳諭鄂輝成德。現在路徑曾否已通。究竟作何計議。即行奏聞。巴忠。舒濂等得有訪聞確信。亦即迅速馳奏。○以故四川瓊布克魯族土百戶子格桑汪結襲職。○甲申。禮部以會試中額請得旨。這會試。滿洲蒙古。取中三名。漢軍。取中一名。直隸。取中十一名。奉天。取中一名。山東。取中十名。山西。取中六名。河南。取中五名。陝西。取中二名。江南。取中二十七名。浙江。取中七名。江西。取中七名。湖北。取中二名。湖南。取中二名。福建。取中四名。廣東。取中二名。廣西。取中一名。四川。取中二名。貴州。取中二名。雲南。取中一名。○乙酉。諭荊州萬城隍各工。向屬民

修。地方官不能妥為辦理。上年夏間。江水泛漲。漫決多處。因命大學士阿桂等前往詳悉查勘。分別熟籌。具奏朕以該處隄工為全郡保障。特命動帑興修。並指授機宜。令將楊林洲磯嘴壩。儘力進做。逼江溜南趨。其黑窩廠裏頭。直接築砌。逼溜俾隄塍益見鞏固。前據畢沅奏。萬城隄暨石磯各工全行完竣。工程一律堅實。荆郡地形卑下。向受水患。而沙市尤當衝要。今築長隄以遏江流。復設石壩以逼溜勢。嗣後沙市街岸。可冀穩固。無虞等語。覽奏欣慰。此次工程浩大。畢沅能遵照指示機宜。督率在工文武認真辦理。妥速竣工。著交部議敘。其在工之藩司陳淮以及各員弁等。並著畢沅查明實在出力者。分別等第。咨部議敘。又據另摺奏調往之南河遊擊田宏謨。派令總理土石各工。始終勤奮。降革之知府史湛。知縣沈清直。承辦鉅工。亦能出力。又現任浙江同知之孝感縣知縣高為濟。在楚

年久。辦工熟諳。各等語。田宏謨著賞戴花翎。遇應陞處題補。史湛、沈清直著准其捐復原官。交與畢沅等差遣委用。高為濟著留該省接辦城工。遇有同知缺出。奏明補用。○閩浙總督覺羅伍拉納奏。臣抵任後。將關係海疆要案。趕緊審辦。各營軍裝器械。於巡閱之便。抽查倘有殘缺。捏飾立即嚴參。其各營礮位驗過後。俱深鑿字記造冊結報。一切俱照福康安所定章程。與撫臣商酌辦理。得旨。正宜改過勉為。毋憚人怨。毋圖己逸。慎之。○是月直隸正定鎮總兵朱泰德奏。請陞見得旨。纔去。何為此不誠之奏。又批。即赴新任。不必來。○兩江總督書麟奏。查閱江西瑞州等十三營官兵技藝。分別等第。勸懲得旨。仍當實力整飭。持之以久。毋懈。○護浙江巡撫布政使顧學潮奏。遵旨嚴查私販大黃出洋。得旨。以實為之。外省習氣。殊不可信。○湖廣總督畢沅奏。荊州萬城隄。根向來民間歲修。就近取

土築隄致成坑窪有礙隄身請嗣後將窖金
洲一帶洲地概行翻犁挖取蘆根於隄外坑
窪處所遍加種植蘆根盤結日蕃可以外禦
奔流內資捍衛得旨甚是之舉一舉兩得也
○四川總督李世傑奏屯防總理同知及五
屯人員均有經管倉庫錢糧凡遇交代請照
內地州縣定例限兩個月清楚屯員由同知
委員監盤同知由松茂道委員監盤依限出
結通報如有遲逾各予以應得處分得旨自
應如此○四川學政邵洪奏科試已竣嚴拏
鎗替情形得旨如此認真方是○雲貴總督
富綱奏新任貴州鎮遠鎮總兵哈芬布手足
不仁已另委員代辦今其靜心調攝得旨不
可姑息總兵非養病之所也

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十五

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十六

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭軍機處管理

吏部理藩院掌務正黃旗滿洲都統世襲副都統功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領閣事稽察欽奉 上諭軍機處管理刑部戶部三庫事務

世襲副都統軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德馨經筵講官太子少保工部尚書紀錄六次臣曹振鏞等奉

敕修

乾隆五十四年己酉夏四月丁亥朔享

太廟遣睿親王淳穎恭代行禮○諭軍機大臣
等前因清口屢有倒漾之患經朕特命薩載
與督臣高晉親履陶莊測量高下繪圖具奏
朕復詳酌形勢以硃筆點記指示開挖引河
去清口較舊時已遠五里河道從此安流順
軌會清東下五十一年黃水盛漲設非有陶
莊引河幾難免河流倒灌之虞可見該處引
河甚為得力現在已屆春汛何裕城回任後
書麟自己起程回至清江料理防汛事宜蘭

第錫亦早經到任所有陶莊引河現在水勢
情形若何及如何留心宣洩防範可以永遠
得力之處著即熟看情形據實覆奏不得稍
存迴護將此各傳諭知之尋奏臣等前於陶
莊新河對岸之玉皇閣向北開挑引渠歸入
陶莊並於引渠進水下唇築成兜水柴壩將
來大汛時水勢增長相機開放由北岸徑趨
陶莊新河則玉皇廟南岸之順黃壩埽工益
可穩固下游又有木龍一架挑溜直下於河
尾亦為有益均可長遠得力得旨覽奏欣慰
○又諭據巴忠等奏探得廓爾喀特遣小頭
目前至軍營通信此事雖無關緊要但小頭
目既可前來其大頭目寧獨不能行走倘藉
此反覆支吾日久從他路潛遁轉將我兵後
路衝截尤屬不成事體雖巴勒布無能小醜
諒斷不敢出此然不可不豫為之防此旨到
時若鄂輝等諸事辦妥聶拉木濟隴地方業
經歸復巴勒布大頭目亦已來營謝罪乞降

自是好事。倘該頭目仍延挨未到。鄂輝即遵
照前降諭旨。明白曉示。一面遣人前往。一面
即暫行退兵。至扎什倫布駐劄。俟伊等回時。
再將可否全撤。及仍須留駐之處。詳細酌量
辦理。萬一賊匪復來嘗試。即帶兵前往剿殺。
亦屬近便。今已忠已馳往脅噶爾。會同鄂輝
等。悉心酌辦。自更有益。但已忠等尚以訪聞
之信。具摺陳奏。鄂輝成德。何不將現在籌辦
情形。據實奏聞。朕為此日夜懸心。伊等豈不
知仰體耶。著傳諭鄂輝等。接奉此旨。即將如
何遵辦之處。速行由驛覆奏。○戊子
上御勤政殿聽政。○以侍郎銜劉墉翰林院侍
讀學士玉保。光祿寺少卿永來。為內閣學士
兼禮部侍郎。○蠲奉天廣寧鳳凰三城屬乾
隆五十三年水災額賦。仍分別賑卹有差。○
旌表守正捐軀河南淮寧縣民尤國柱孫女
尤氏。新鄭縣民薛和尚妻安氏。○己丑
上還宮。○是日起。

上以常雩祀
天於
園丘齋戒三日。○庚寅。諭曰。阿肅達椿。身係滿
洲。在尚書房行走。亦怠惰。七日不到。予以革
職。因屬咎有應得。但業經責懲。且留在書房
効力。著加恩。達椿補授翰林院侍讀學士。阿
肅補授光祿寺少卿。不必帶革職留任。伊二
人當益加感奮。倍矢勤慎。以贖前愆。其現在
書房中効力行走之茅元銘等。俱有訓課之
責。乃曠職誤功。不到書房七日之久。其咎甚
重。前部議上時。從寬留任。已屬格外恩施。第
念伊等均係翰詹編檢。職分較小。既帶革職
處分。即不能支領俸銀。行走未免拮据。茅元
銘等。俱著加恩。給與半俸。八年之後。再行支
給全俸。其革職處分。著改為四年無過。准予
開復。伊等嗣後。更當感激朕恩。勤慎供職也。
○諭軍機大臣。曰。項家達奏。江浙各幫。自三
月初一日起。截至十八日止。渡江進口。共船

三十二幫計一千六百七十八隻連前通計共船五十七幫二千九百三十六隻查二三兩月揚鎮一帶春雨霑足河水通順幫船無阻等語今年漕運大有起色運河水道深通漕艘暢行無滯自可期及早抵通但運河全賴各湖之水接濟而微山蜀山等湖尤為濟運水櫃現在水勢雖已充裕亦不可不先事豫籌早為設法儲蓄著傳諭李奉翰長麟務宜隨時留心將湖水相機籌蓄勿致稍存大意○軍機大臣議准浙江巡撫覺羅琅玕奏老鹽倉迤西一帶前經發帑築建魚鱗石塘所有料物加貼銀兩奏明加增一倍有餘始敷辦理今東塘應修石工及西塘歲修柴工與魚鱗石塘事例相符請一體加貼至加貼銀兩請於海塘費內賞借銀五十萬兩給商生息每年可得息銀六萬兩以為分貼歲修塘工之用從之○辛卯

上詣

南郊齋宮齋宿○諭旨胡高望吉夢熊亦著加恩給與半俸八年之後再行支給全俸其革職處分並著改為四年無過准予開復○又諭上年大兵進剿安南粵西民夫運送糧餉踴躍趨事甚屬出力急公該省僻在邊隅民貧地瘠前歲以來秋收未能豐稔且臺灣用兵時亦曾調粵兵前往而黔兵赴臺灣又係由粵西經過今復因辦理安南之事供億頻仍民力恐不無拮据自應酌量施恩優加存撫著該督撫即速查明此次官兵經過之處及調往臺灣官兵所過地方奏請酌予蠲緩撫卹俾閭閻共霑惠澤生計有資以副朕體卹邊氓之至意○又諭曰孫永清自駐劄南寧以來於彈壓邊關籌辦糧餉等事調度得宜並無貽誤甚屬出力著加恩賞戴花翎以示優獎○刑部議奏臣部等衙門題覆四川民婦馮龔氏毆傷伊夫馮青致死馮龔氏擬斬伊子馮克應實未知情請免議一案奉諭

駁令四川總督覆訊。今據該督咨稱。馮青被毆身死時。伊子雖不當面。但迫於母命。隱忍不言。到案時。又未能供出實情。遵旨酌加薄罰。照不應重律。杖八十等因。已如所奏。行請嗣後。如有父為母殺。其子到案。猶復隱忍不言。較母為父殺。子為父隱者不同。應照違制律。杖一百。以示區別。報聞。○壬辰常雩祀。

天於

圖丘。

上親詣行禮。○幸圓明園。○癸巳。諭。據知貢舉伊齡阿。汪承霈奏。本年會試舉子內。九十歲以上者四名。八十歲以上者三十一名。七十歲以上者五名。皆三場完竣。未經中式等語。此次各省舉子。年老應試者。多至四十人。龐眉皓首。踴躍觀光。洵為昇平人瑞。除七十歲以上之姜价。項朱。柴杰。三名。業於上次會試後。賞給國子監學正職銜外。所有年屆九十以上之李發枝。羅舜臣。江鳳鳴。李洪福。八十

以上之張夢熊。王震。安康士。雍。吳梅章。宸衛。趙峯。金有光。王聖際。鄒宗望。李承宗。陳兆燧。徐愛蓮。宋佳玉。蔣遇辛。王奕年。翟承眷。湯振。王日。龔畢。文琳。游鑑。乾。張洪振。王長。駕。舒。繼。芬。李。紹。灝。朱。錦。雲。梁。朝。錫。曹。雁。韓。定。佐。李。東。耀。李。鰲。周。璫。俱著賞給翰林院檢討銜。七十歲以上之洪學源。邵利達。俱著賞給國子監學正銜。其九十以上者。各加賞緞三匹。八十以上者。各加賞緞二匹。七十以上者。各加賞緞一匹。並年在七十以上。前經賞銜之姜价等三名。亦著一體賞給。以示朕嘉惠耆儒。仁壽作人之至意。○又諭。曰。李世傑之孫李再瀛。本年會試。未經中式。李世傑係總督中得力之人。李再瀛著加恩。准其一體殿試。○又諭。據鄂輝等奏。巴勒布人等。一聞大兵奄至。俱未敢抗拒。即先行逃歸本處。業將濟龍被搶之地收復。並安撫遷避之唐古忒人等。現復傳喚巴勒布之頭目。俟到來時。曉諭後再

行奏聞等語。鄂輝等此次辦理巴勒布事務。尚屬周詳。鄂輝成德巴忠穆克登阿張芝元均著加恩交部議敘。兵丁著各賞給一月錢糧。○諭軍機大臣曰。畢沅奏荊州郡城水津門外逼近護城河。萬城隍正在城之西面。上年江水漫溢。該處適當頂衝。請停止補建。查西門是佛第地方。設有水溝。為宣洩西南各水之所。於乾隆二十一年被民房阻塞。現已查出舊時溝形。仍飭疏通。儘可宣洩積水等語。所辦好。是佛第一帶水溝。向為宣洩積水之路。乃被居民分占阻塞。現經畢沅查出疏通。但恐日久弛懈。居民又復漸行侵占。不可不永行禁止。著傳諭畢沅。即交地方官立碑嚴禁。並時刻留心查察。毋許附近居民在彼搭蓋房屋。如有仍前占住。以致阻礙水道者。惟該地方官是問。其另摺估修廟宇考棚之處。亦所應辦。已如議行矣。將此傳諭知之。○陝甘總督勒保疏報。乾隆五十三年。烏嚕木

齊所屬蘆草溝所。認墾民人五戶。共地一百五十三畝。又塔西河所。認墾民人十八戶。共地五百四十畝。○甲午。諭貴州鎮遠鎮總兵哈芬布。現患半身不遂病症。一時未能就痊。前經准令陞見。俟到京調理痊癒。另行簡用。貴州鎮遠鎮總兵員缺緊要。未便久懸。著珠隆阿補授。○諭軍機大臣等。此次巴勒布侵擾後藏邊界。總由衛藏距川省內地道路險遠。糧運艱難。調兵赴剿。一時不能速到。以致宗喀濟龍聶拉木三處。均被搶占。現經鄂輝等帶兵前往。番眾畏懼。先行退避。昨據該將軍等奏。巴勒布所占地方。業經全行收復。邊界廓清。其木頭人為雪所阻。俟天氣晴暖。即前來叩見。再宣諭威德。曉以順逆。令其輸誠歸服。永遵王化。即次第撤兵等語。巴勒布原因與唐古忒人眾爭競。故致後藏邊界侵擾。今經鄂輝等向其頭人剴切曉諭。番眾等懷畏天朝威德。從此自不敢再犯邊境。但兵可

百年不用。不可一日無備。而軍行糧隨尤關緊要。四川為產米之鄉。向來糧價最賤。朕嘗閱該督奏報糧價清單。至打箭鑪地方。每米一石。即需銀四五兩不等。自由該處距省已遠。兼之地方險峻。山徑險峻。產米較少。販運維艱。是以價值比內地倍數增昂。況打箭鑪以西。口外地方。其糧價較之打箭鑪自必更須加增。與其待需用之時。臨期輓運。不特緩不濟急。抑且費用不貲。莫若於尋常無事糧價平減之際。交地方官採買儲備。擇其易於運送時。由雅州一帶。陸續運至打箭鑪。及察木多。兩處分貯。倘因口外難運。不妨交便人零星帶運。不拘石數。但能源源運往。即可積少成多。設遇徵調需用。易於就近裹帶。以利進行。而資口食。況打箭鑪察木多等處。糧價本昂。節年運往之糧。出陳易新。所得贏餘。又可供零星運腳之費。既可不致虛糜。而於邊儲更屬有益。著傳諭李世傑。即通盤籌畫。將

川省內地米石價值若干。由雅州運至打箭鑪。需用腳費若干。由打箭鑪運至察木多。需費若干。並將來出陳易新。能否敷運腳之用。及如何酌定章程。妥協辦理之處。詳細查明。悉心確覈。議奏至藏內向來亦無儲備。此次調兵赴勒口。糧一項。慶麟等辦理不善。始則諉諸內地。繼復不將給價之處。曉諭喇嘛。及唐古忒人等。紛紛派辦。幾至該處人衆受累。抱怨。經朕屢次訓飭。為之多方籌畫。並令巴忠傳旨。剴切開導。伊等皆踴躍輸供。得無貽誤。但以官兵所用。取給喇嘛商上。雖寬予價值。究屬不便。嗣後應於藏內附近處所。就地採買青稞糈粃等項。妥為儲蓄。於支放兵糧時。出陳易新。既可以有備無患。亦不至虛朽為虞。自屬妥善。其如何定立章程之處。著傳諭巴忠。舒濂。普福等。會同妥議具奏。至巴勒布之搶占宗喀等處。地方總由藏內番兵素未訓練。且零星徵調。先後不齊。加之

懦怯成俗。一見賊匪。即行退回。不能固守。所致。屢經有旨諭令。已忠等將來應定以章程認真操演。以備巡防。著再傳諭。已忠等。即於籌辦善後事宜時。遵照妥議。並將此二事。告知達賴喇嘛。與噶布倫等。悉心商酌。此係朕為保護衛藏僧番人等起見。想達賴喇嘛等聞知。自無不感戴樂從也。將此由六百里各諭令知之。○又諭曰。阮惠於未出官兵。戒其黨類。不許戕害。俾得陸續進關。看其作為。尚屬恭順。將來再行遣人到關。籲敬情詞誠懇。即可相機歲事。至福康安於受降後。自不便久在鎮南關駐劄。但徑回粵東省城。究恐鞭長莫及。或酌量移駐桂林省城。及南寧。太平等處。料理一切事宜。總俟秋冬間。諸凡妥協。該處已無應辦之事。福康安奏到後。候朕旨令其回任。再行起程。回至粵東省城。至阮國棟。黃益曉。二人。上年隨黎維祁眷屬進口。此次黎維祁逃竄。又復隨同入關。福康安酌令

與黎維祁同在一處安插。並將求進內地之人。就邊地遠近酌量安插之處。所辦甚是。俱宜妥為安頓。使之得所。不可稍有惜費。潘啟德。前經吳初勾引抗拒不從。又隨同官兵進剿。頗知大義。福康安奏請以千總守備等官錄用。所見亦是。其夷目阮廷沛。黃廷球。阮廷璉。三人不肯附賊。挈同家口入關。殊為可憫。亦應以千總補用。安南生員阮賢。既因指引官兵進口。一同入關。亦不妨即令其入於內地儒學。其遊擊張會元。守備勞顯。既查明未經見過阮惠。並無畏懼情事。不必再行治罪。應即令各回本營當差。又據奏。因傷殘廢兵丁。其糧缺。即於該兵子弟內挑補。若並無子弟。當於公費內酌撥養贍。其撤出官兵。尚係出力打仗。應賞一月錢糧等語。所辦俱好。其續調之廣東兵三千名。昨已有旨令其撤回。並著福康安再加酌量。如無需用。即當檄令回營。如尚有須分撥彈壓巡防之處。亦不妨

暫留該處。俟無事時再行歸伍。○乙未。諭東三省以種地為生計者多。但無力貧人。無貲置辦牛具。不免委棄田地。竟致荒蕪。黑龍江既有借給牛具銀兩之例。著賞借盛京銀六萬兩。吉林銀四萬兩。以資兵丁等置立牛具之備。至借給時。該將軍等務須詳查實係有田地。而無力置牛具食餉之人。方准借給。不然。所借銀兩。一經到手。不過隨便花費。得時似雖有益。及至陸續坐扣之際。與伊等生計不無拮据。著交該將軍等妥協辦理。○又諭據伊桑阿等奏。稱查出賣與吐魯番回子瑪爾台爾。爾大黃之民人李浩。解送勒保治罪等語。商民李浩。積蓄五百餘觔大黃。賣給瑪爾台爾。顯係違禁。售與安集延回子等。轉賣與俄羅斯。以圖厚利。著交勒保。俟解到時。遵朕節次所降諭旨。從重治罪。餘如所奏。仍交伊桑阿。此次查拏。後不可即便懈弛。仍令嚴行緝查。於拏獲時。即解送內地。從重治罪。著通

飭新疆各處將軍大臣等。亦令一體查辦。毋得怠忽。○諭軍機大臣曰。土田州本宜棟陣亡與否。尚無實據。前因伊子科場舞弊。曾經治罪。今隨同出力勦賊。若陣亡而不加之恩卹。又復何以示勸。著傳諭福康。安覆加確查。如岑宜棟實係陣亡。即奏請交部。照內地知州例一體優卹。○以詹事慶齡翰林院侍讀學士。達椿侍講學士。彭紹觀編修。文寧充日講起居注官。○丙申。諭前因許世亨。隨同孫士毅。收復黎城。甚為奮勇。因加恩晉封子爵。嗣以該提督殺賊陣亡。其子爵仍令伊子承襲。本日召見陞任副將慶成。詢以安南情形。據稱阮惠糾眾搶奪黎城時。孫士毅與許世亨帶兵前進。見賊匪眾多。在富良等江據險抵拒。孫士毅即思渡江勦殺。意欲捐軀同殉。經許世亨再三攔阻。並告以總督係總統大臣。非鎮將可比。設有疎虞。於國體攸關。未便輕入。遂派慶成護送。並令薛忠。牽挽孫士毅

馬韁退出。即帶領將弁等。大呼直進。奮勇衝殺。旋即陣亡等語。許世亨在軍營連次與賊打仗。奮勇出力。懋著勤勞。當此危急之際。又復能持國體。力勸孫士毅統師入關。設無該提督勸阻。孫士毅不能退出。大體所關。更屬難於辦理。許世亨深知大義。見及於此。實堪嘉憫。許世亨著晉贈為伯。即令伊子承襲。其千總薛忠著福康安查明。以應陞之缺。陞用以示鼓勵。矜惜至意。○諭軍機大臣等。安南一事。現在已定議。不復用兵。毋須多兵駐守。所有廣東兵三千名。業經降旨。即行撤回。自不致久駐瘴鄉。觸熱致病。至孫士毅受濕患病。力疾在彼辦事。前已有旨。諭令回京。以示矜恤。孫士毅接到此旨。即行起程。不必在彼久駐。福康安身體素為強壯。但彼處水土。亦恐不能服習。該處春夏之交。瘴氣尤甚。萬一偶生疾病。更屬不值。著傳諭福康安。自行酌量。或移至南寧。太平地方。或回至桂林省城。

料理一切。庶水土平和。易於調攝。以副朕加恩體恤之意。○又諭曰。浦霖奏查勘各屬隄垸情形。一摺。內稱常德府城。近年以來。每遇朗江水漲。南城以外居民。多被水淹。其對岸之玉皇閣。青草嘴兩處。又因歷年淤積成洲。逼溜直射城根。沙洲已成高阜。占塞水道。查該府舊有石櫃四座。逼溜南趨。原為保衛城隄而設。今年久大半虧損。請於水退時照舊修復等語。各省隄垸。必須豫為修築。遇江水盛漲。下流無壅遏之患。始於隄根無碍。今常德府對岸玉皇閣。青草嘴兩處。淤積成洲。此即與荊州之害金洲無異。自宜亟去。為要。該處舊有石櫃。既經坍塌。即應酌添新料。照舊修復。但此時江水漲發。難以勘估。施工畢。沉係兩省總督。著於深秋水退時。親赴該處。會同浦霖。據實查明。勘估興工。並繪圖具奏。俾江流暢達。不致再有壅碍。方為妥善。將此各傳諭知之。○湖北巡撫惠齡疏報。乾隆五十

三年利川縣開墾成熟額外下則地三十一頃四十畝有奇。○丁酉。

上幸靜宜園駐蹕至辛丑。皆如之。○直隸總督劉綎疏報乾隆五十三年大興宣化豐寧三縣墾地三頃五十畝有奇。陝甘總督勒保疏報乾隆五十三年烏魯木齊所屬之塔西河所認墾民人三十二戶。共地九百六十畝。○戊戌。諭昨覆試新進士文義均屬清順。惟單可虹一名詩句平仄不調。錯誤較多。考不入。

等因。令軍機大臣復加嚴試。所作詩句仍復失粘。且有屬對未工。用字訛舛之處。及調查闡中硃墨原卷。字句平妥。尚係堪以取中之卷。與覆試之詩前後如出兩手。可見單可虹學問本屬平常。會試之卷或有傳遞代倩情弊。或係同號舉子代為潤色。均未可定。本應拏交刑部徹底根究。朕向來不為已甚。姑念此次甫經舉行覆試。單可虹尚係初犯。著即全行斥革。從寬免其究辦。看來會試後必須

嚴行覆試。方可甄拔真才。創懲倖進。是覆試一事。竟不可少。嗣後如有詩文荒謬。與中式原卷迴殊者。即行嚴切審訊。究出舞弊情節。將代倩傳遞之人。俱立寘重典。以示懲儆。斷不能再邀寬宥也。○又諭據劉綎奏保定府屬清苑等三縣及河間府屬均有節年未完緩徵糧銀等語。保定等府屬州縣上年秋收雖尚豐稔。今春雨澤亦屬不缺。而應完緩徵之項為數較多。一時新舊並徵。民力究未免拮据。著加恩將保定府屬之清苑安肅蠡縣三縣河間府屬之河間等十一州縣五十一二兩年未完緩徵地糧旗租俱緩至五十四年秋間開徵。俾民力愈資寬裕。以副朕惠愛黎元有加無已至意。該部即遵諭行。○又諭新進士殿試著在保和殿考試。所有豫備茶水等事。不必護軍校尉人等伺候。即照正大光明殿考試之例。令太監等經管。光祿寺亦毋庸豫備飯食。朝考著即照此辦理。○己亥。

諭曰。刑部議覆。已延三定擬。王東禮致死伊妻王氏一本細覈案情。王秉禮與服弟之妻通姦。因伊妻王氏前往捉姦。將王氏用刀扎死。是該犯逞兇斃命。夫婦恩義已絕。應以凡論。即當照謀殺人造意之律定擬。乃該撫既引此律。復又比照以妻賣姦之夫故殺妻一條。殊屬牽混。況王氏並非賣姦之婦。王東禮亦無縱姦之事。比照援引。尤為失當。已延三於此等案件。未加詳悉覆覈。即據原詳具題。

周樽又不諳習刑名。引律未能允協。俱著傳旨申飭。○賑卹山東膠州壽光三州縣被水災戶。並給修葺房屋銀。○庚子諭曰。定邊左副將軍公復興。內外宣力多年。今在烏里雅蘇台將軍任所。舊疾復作而逝。殊屬可憫。所有應得恤典。著加恩交部查例具奏。○又諭曰。復興所遺正黃旗漢軍都統員缺。著恒瑞補放。授為定邊左副將軍。恒瑞接奉此旨。即速馳驛來京請訓。再赴烏里雅蘇台。恒瑞未

到以前。著慶桂馳驛前往烏里雅蘇台署理將軍事務。慶桂所管兵部尚書事務。著福長安署理。○諭軍機大臣曰。安南夷目阮有暉等。一聞傳喚。即迅速前來。經福康安令湯雄業使之進關接見。詳細詢問。該夷目等語言舉止。十分恭謹。看此情形。阮惠實已誠心畏罪。安南地方險遠。又多瘴癘。不值大辦。自不如俟其再來乞降。相機歲事。現經福康安令湯雄業密諭阮有暉等。告知阮惠親自到關齎表求降。若阮惠遵諭前來。福康安等當面諭以爾係安南土酋。乃敢抗拒官兵。戕害提鎮大員。罪在不赦。本部堂奉命前來。調集大兵分路進剿。本欲將爾地方全行蕩平。抗拒之人盡數誅夷。今因爾自知畏懼。屢次敬關籲懇。且於未回官兵不敢加害。陸續送出。尚屬可原。本部堂仰體大皇帝好生之德。當為奏聞大皇帝。俯准歸誠。不加進討。或可格外施恩。向其剴切面諭。使之束身歸命。詣關懇

請候朕定奪降旨。至黎氏宗族舊臣恐被阮惠戕害。求我內地存活。自未便拒而不納。所有黎維祿等俱應送至桂林省城與黎維祁一同安插。但恐黎氏人數較多。生計拮据。著福康安等飭令地方官酌量撥給房屋養贍。外並加恩再賞給銀二百兩。俾資用度。其潘孟賢等亦應與潘啟德同住一處。潘啟德始終出力忠節可嘉。前據福康安奏請以守備千總錄用。尚覺職分畧小。潘啟德著加恩竟用為都司。伊曾為諒山都督。其才具想屬可用。著福康安再加察看。如潘啟德能勝都司之任。即以實缺奏補。其所得廉俸亦足以養其子弟。如潘啟德係屬夷官。未諳內地營伍。即著賞給都司銜俸。仍再賞銀一百兩。以示優卹。○辛丑諭。此次由成都派出滿洲兵丁內有一百五十二名。由打箭鑪直至魯噶爾。俱係負糧步行。登山越嶺。不辭勞瘁。甚屬可嘉。著加恩每人賞銀三兩。以示鼓勵。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十六

大清高宗法天隆運至誠先覺體元立極敷文

奮武孝慈神聖純皇帝實錄卷之一千三百二十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭處總管

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處總管刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書總管滿洲部院軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

教修

乾隆五十四年己酉四月壬寅

上迴圓明園○諭各省於該部院咨取事件造

冊咨覆不可不定以限期其如何按照道路

遠近分別立限之處著該部酌議具奏尋議

嗣後各省督撫奉部院咨取事件如係專行

咨覆之案俱以接到部文之日為始除道路

遠近按照定例扣算查覆往返程途外統限

二十日內出文咨部如須輾轉行查所屬及

行款過多應行造冊咨覆者限一個月遲延

照例議處從之○癸卯

孝端文皇后忌辰遣官祭

昭陵○諭朕於閏五月初五日啟鑾前往熱河

駐蹕秋間巡幸木蘭著質郡王克勤郡王大

學士公阿桂大學士嵇璜留京辦事所有吏

兵二部應行引見官員文職知縣以上武職

守備以上於未啟鑾進木蘭之前著該部每

月派堂官一員輪流帶赴熱河引見其文員

內佐雜等官武員內八旗護軍校驍騎校及

外省送到之補放水手驍騎校并年滿千總

等官弁仍著王大臣照例驗放至八月以後

月選州縣等官照新例俟回鑾後歸於九月

分一併引見其各省督撫提鎮等奏摺著齋

摺人前赴行在投遞進哨後著兵部派員駐

劄哨門接遞各省奏摺封送行在候朕批示

發回仍於哨門交付齋摺人祇領該部即通

諭知之○又諭曰梁肯堂奏河南息縣鹽務

乏商經理恐民間淡食是以官為撥運乃該

縣陳文衡於兩淮委員汪良增運到鹽勸後

並不設法速銷。轉藉端搜剔。輾轉捺延。其中不無徇利營私情弊。請將陳文衡解任嚴審等語。兩淮鹽引。因湖廣地方官向商人需索陋規。並不認真緝私。以致滯銷壓課。上年甫經整頓清查。河南尚未聞有此等情事。乃息縣知縣陳文衡。竟敢意存需索。勒捐耽延。此而不徹底根究。即是貪婪之漸。勢必至如湖廣大為鹽務之害。梁肯堂奏甚是。但僅請解任。所辦不足蔽辜。陳文衡著即革職。交與該撫提集案內人證。嚴審定擬具奏。○又諭曰。舒常李封。前在湖北督撫任內。因循廢弛。又不能留心保護隄工。以致上年荊州被淹。是以將伊等革職。仍留工所効力。今該處隄工業經完竣。舒常著賞給頭等侍衛。在乾清門行走。李封年力就衰。著賞給按察使銜。即令回籍。○又諭。據永保等奏。稱塔爾巴哈台厄魯特部落佐領和碩齊。呈請休致之處。專摺具奏。既將和碩齊履歷送部。而又奏請賞

給俸祿。甚屬煩瑣。將此通行中外。嗣後若有似此具呈官員。各該管大臣等。將應否賞給俸祿之處。均著咨部照例查辦。○都察院奏。據湖北江陵縣民朱如標。呈控荊江大隄工程草率。應修之郝穴隄。蕭子淵口等處。俱被勢豪占阻。又庫書張翹南等。剋扣賑項。淨收銀米。請交湖廣總督審辦。得旨。此案著派阿桂馳驛前往審辦。至上年荊州隄。膝潰決。府城及滿城。俱經淹浸。被災較重。皆由該處隄工向係民修。地方官不能妥為經理。而害金洲。又逼溜北趨。所致。經朕特派阿桂等前往勘籌。其萬城等隄。俱特發帑金。官為修築。並節次指示。令將雞嘴石壩。儘力接做。挑溜往南。害金洲沙礫。已漸見刷動。兵民人等。亦皆分別賞給銀兩。俾修復廬舍。接濟口糧。不致失所。此皆阿桂在彼會籌督辦之事。此次阿桂到彼。務宜覆加查勘。將所築各隄。工是否堅固如式。足以永資捍衛。大江溜勢。現既南

趨害金洲能否逐漸刷去。不致有礙江流。兵民人等。曾否安頓復元之處。詳悉據實具奏。以副朕軫念災區。無時或釋至意。○甲辰諭。昨召見侍郎鐵保。詢以本年會試闈內閱卷情形。據奏。此次中式各卷內。同考官未經呈薦。經正副考官搜閱落卷。因而取中者甚多。中定之後。始發交同考官補用薦條。殊屬非是。鄉會試設有正副考官。及同考各官。原恐一二人衡鑒未能允當。是以必待覆加甄閱。以昭慎重。且使彼此互相防範。難以舞弊。徇私。既云落卷。則同考官初閱時。自必以其文不佳。或詞句中實有疵類。是以未薦。迨經正副考官搜出後。同考官亦應將其所不薦之故。簽出相商。或疵類尚小。瑕不掩瑜。方可取錄。何得一經正副考官搜出。取中。即為補用薦條。似此隨同阿附。與外省督撫保題。卓薦業經定有其人。始發交兩司補詳者。何異不特相率為偽。甚至通同一氣。徇情作弊。何

不可為。殊非公明甄錄之道。况如此辦理。即設正副考官足矣。又安用同考官為耶。向來同考官閱卷時。於指出疵類處。所僅自登記。不准於卷上批寫。所以正副考官搜出取中後。得以授意同考各官。將其從前批壞之語。掣去。補用薦條。遂爾泯然無迹。此係歷來場中之弊。朕今始知。嗣後應令同考官於閱卷時。即將詩文優劣。所以薦與不薦之故。均在卷內註明。其正副考官於原中。暨搜出取中者。亦應將取中之故。批註卷上。俱交磨勘官秉公覆閱具奏。候朕親定。庶得中者知其公。不中者亦無可怨。蓋人之衡鑒。原不能毫釐無與。然於可上可下之卷。一時不能鑒別。尚屬事之所有。若以佳者為劣。及以劣者為佳。非任意屈抑。即屬有意營私。是非顛倒。一經磨勘。或科道執其卷。以糾參情弊。顯然如弊。在同考官。則應治同考官之罪。如弊在正副考官。則應治正副考官之罪。不得仍前隨意

附和徒滋外間橫議。又據鐵保奏此次取中之第二名即係王杰搜出。第三名即係鐵保搜出。更屬非是同考官共有十八人學問豈盡平庸。其所取之卷又豈盡不如王杰鐵保所搜之卷。乃必以正副考官二人所搜之卷拔置前茅。若曰無弊其誰信之。朕臨御五十餘年。辦理庶務無不兼聽並觀。折衷至當。從不膠執己見。乃王杰鐵保於掄材大典不能虛衷商榷。惟以師心自用。無怪士子等之退有後言也。朕若另派大臣將已中在後各卷通行覆閱。互相比勘。此內同考官薦中之卷恐未必竟無勝於第二第三名者。若有較勝之卷。而列置在後。朕亦無難治王杰鐵保以不公之罪。但此乃立例之始。朕從來不為已甚。是以不加深究。總之落卷不搜。則權在同考官。弊竇易生。自應准正副考官將落卷覆行搜閱。以免遺珠。但搜中之卷亦止准列於五十名以後。不得濫廁前列。所有此次搜中

之第二第三名俱著改列五十名以後。並將此旨恭錄刊刻。懸貼於各直省闈場內外。俾考官等觸目警心。而應試士子等亦得傳觀。咸喻朕掄別真材。鑑空衡平之至意。將此通諭知之。○又諭據兵部奏稱。此次進哨。所有外省輪班學習隨圍之杭州乍浦。荆州三處官兵。可否令其前來之處。請旨施行等語。各處駐防官兵向居外省。於行圍之道不能諳練。相沿日久。遂失滿洲舊風。漸近漢人習氣。嗣後凡遇行圍。自應遵照舊例。令其輪班前來學習行圍。所有此次應隨圍之杭州乍浦。荆州三處官兵。即令其計程。於八月初旬前抵熱河。○兵部議覆察哈爾都統烏爾圖納遜奏稱。軍臺効力廢員。三年期滿完交臺費者。仍由都統具奏其限滿未交。應如該都統所奏。移咨旗籍查明財產。若有力能繳。故意遲延者。發往烏魯木齊永遠充當苦差。實係赤貧不能完繳。再留臺三年。由該都統遣回。

旗籍報部查覈得旨嗣後軍臺効力各員如無力完繳臺費者著於期滿後再留臺五年○乙巳諭軍機大臣等昨因湖北江陵縣民朱如標呈控郝穴等隄工及庫書減賑一案已派阿桂馳驛前往審辦矣此案朱如標所控情節看來雖無甚緊要亦有關係一經阿桂到彼訊究虛實無難立見畢沅身為該省總督係受恩深重之人諒不致有袒庇屬員情事不必意存疑懼俟阿桂到時秉公審訊如有不肖官吏徇庇紳衿應行叅劾者即會同嚴叅究辦毋得稍有迴護致負委任荆州萬城隄業經修築完竣能否堅固如式足資捍衛其接做壩工逼溜南趨害金洲沙礫是否逐漸刷去無礙江流軍民均獲安堵不致失所朕心深為廕念此次命阿桂前往楚省正為此事所關甚重令其到彼覆勘除就近傳知阿桂遵照外著傳諭畢沅屆期先赴荆州於阿桂到日會同悉心查勘並將朱如標

所指郝穴蕭子淵口等處一併詳悉查明據實具奏○軍機大臣議奏革職總兵希當阿於所轄兵丁不能實力稽查致礮位遺失請發往伊犁効力贖罪得旨希當阿於所轄兵丁不能實力稽查以致擅離汛守有遺失礮位之事問擬發遣伊犁固屬罪所應得第念伊父前在西路打仗陣亡伊屢次出兵烏付雲南金川臺灣等處尚能出力伊又現無子嗣無人養贍老母情殊可憫希當阿著革職仍以健銳營護軍用所有發往伊犁効力贖罪之處著加恩寬免○旌表守正捐軀四川眉州民劉泳布妻甯氏○丙午上御勤政殿聽政○諭曰刑部議覆鄭九林因謀砍胞弟誤傷胞叔鄭必清身死將鄭九林定擬凌遲一本所辦殊未允協細覆情節鄭九林以常被伊父打罵俱由偏向伊弟所致起意將伊弟鄭秋莊姪致死於二更時潛赴鄭秋莊姪卧所適值胞叔鄭必清同炕並睡

誤將伊叔砍傷斃命。雖砍死胞叔。服制攸關。自應寘以重典。但鄭九林本欲謀砍伊弟。於黑暗中誤傷伊叔。以致身死。尚與有心謀殺尊長者不同。止應照誤殺胞叔律問擬斬決。若定以凌遲極刑。則實係謀殺胞叔之案。又何以加之罪耶。朕辦理庶獄。酌理準情。務期平允。固不使稍有輕縱。亦不肯失之過當。鄭九林著改為斬決。○以大學士嵇璜和坤吏部尚書彭元瑞左都御史李紱禮部侍郎鄭奕孝刑部侍郎姜晟內閣學士圖敏宗人府府丞寶光竊為殿試讀卷官。○以通政司副使武隆額為光祿寺卿。○旌表守正被戕江蘇安東縣民沈殿玉妻朱氏。○丁未策試天下貢士錢楷等九十八人於保和殿前。制曰朕寅承

天佑撫馭寰區。五十有四年。稽諸往牒。自三代以下所未有。用致海寓小康。尉候廣遠。集家慶於五代。祝豐歲於三登。虔荷

昊蒼眷賚者獨厚。子於父母不敢言報。惟是朝夕乾惕。日慎一日。仰體

仁覆之心。布德於衆兆民。由小康而臻上理。集思廣益。冀於實政有裨。多士通經致用。蔚史適宜。敦習尚以徵材。修濬防以溥利。妙損益以鑒古。講肄有素。其佇予諮詢焉。經旨奧衍。章句其顯也。易備四德者七卦。爻無卦名者五卦。言數者二十七卦。吉居一耳。有六爻皆吉者有五爻皆吉者。是可僕指之。舜典他籍所引。或以為唐書。或以為夏書。言信言性。言誠。言學。何以皆始商書。洪範有考定文。其可從歟。詩三百十一篇。名見禮及左傳者凡幾。十五國風。或謂斟酌序次。或謂以兩相比語。出何氏。春秋最重書。王冠於正月二月三月者。可計也。有闕一時者。有闕二時者。有無月有日者。有有日無事者可詳也。考工記不合周制者何官。中霤投壺。遷廟饗廟。可補儀禮否。夏小正周書時訓。可代月令否。縷晰言之。

將徵所學。史家屬詞。比事出於春秋。互文尤
關考證。班固之書。半資司馬。其或因或改。異
同得失。至為繁蹟。南北史合宋齊梁陳魏北
齊周隋之書。亦有短長。綴譜系。劃時代。何者
為優。新舊唐書。今武英殿始合刻。並存。修者
謂事增而文減。論者或軒昉而輕初。孰為定
論。薛居正五代史。佚之數百年。近始輯成。其
視歐陽修五代史記。孰以事勝。孰以法勝。至
若表羅古今。志補前代。漢末羣牧。錯見國志。
典午載記。間入魏書。其參互論斷。以為定衡
焉。士為四民之倡。朝廷登選。所以備任使。更
以厚風俗也。鄉舉里選之典古矣。九品中正
流弊更甚。以文取士。自唐至今。循之。其中糊
名易書。搜索之禁。分路分額分卷分經之法。
累代史志言之詳矣。然漢世已有私改漆書
文字之譏。八义假手。一聯巡乞。場屋醜之。至
鬱輪袍。綠衣吏而掃地矣。上請之說。通榜之
議。其何取焉。今制四子書以正其僞。五經以

博其趣。八韻以覘其才。五策以徵其實。立法
善矣。士宜何如。端醇淬礪。以副予文治乎。禹
謨六府。箕疇五行。皆先日水。除其害。所以溥
其利。西北之渠。川蜀之堰。自豫以下之隄。沿
江沿海之塘。其大勢也。昔人謂禹貢無隄防
字。然而地徙流合。人衆土闢。若釀若鬻。其何
以鳩民而奠之。若夫陶莊之河。引溜北趨。害
金之洲。排江東注。海塘之築。一勞永逸。要未
嘗非疏濬與隄防並用。朕數十年臨視圖指。
不惜數千萬帑金。以為閭閻計。大都平成矣。
其或隨宜善守。尚有未盡。又偏隅井邑。畝澮
溝洫之利。自田間來者。亦有可指陳歟。說命
以師古攸聞。周文以監代稱。盛重古制也。然
鑒古必取宜。今有可因。有不可泥。古有邊防。
今日無邊防。幅幘廣矣。其誠無邊防乎。古有
馬政。今日無馬政。孳貢蕃矣。其誠無馬政乎。
古辟雍。今亦辟雍。立之郊外。則已迂。古養老。
今亦養老。三老五更。袒割醬饋。則已褻。今韶

樂猶古。無取樂章之沿。今耜田猶古。無取勞酒之殫。古美命官交讓。仿以為京察。自陳則偽也。古取經建講學。責以為成就。君德則誨也。朕久道慎修。思躋淳邃。而酌古準今。屏華崇實。具有微權。其有能知古知今。以會其通者。可推廣陳之歟。凡茲五事者。蘊諸心為經史之實學。施諸政為教養之良規。見諸事為古今之善制。沐浴涵泳。服我作人之化者。端心聲。祛臆說。實著於篇。服將親採焉。○諭從前安南內訌。黎維祁啟關請救。朕念該國恪恭職貢。百有餘年。今既遠來控訴。不得置之不辨。是以特允孫士毅所請。帶兵出關進剿。阮惠望風震懼。遁回廣南。官兵出關以後。未及一月。即將黎城收復。原無難乘勝長驅。窮追深入。但念該處地多瘴癘。兵夫易染疾病。且黎氏近年以來。搆亂多故。黎維祁又復怯懦無能。優柔廢弛。左右亦無可恃之人。安南雖屬彈丸僻壤。而立國已久。興廢亦未必不

關氣數。今其國事如此。看來天心竟有厭棄黎氏之意。朕於孫士毅未奏克復黎城之先。屢經降旨。諭令於收復後。即行作速撤兵。乃孫士毅未能遵旨。撤兵耽延一月有餘。以致阮惠糾眾復來。與黎維祁為難。黎維祁怯懦先逃。官兵始行退出。鎮將武弁間有傷亡。亦因臨陣猝遇。玉石不分。而許世亨等奮勇捐軀。均已從優獎敘。現在本應調集各路大兵。整軍問罪。方今國家全盛。餉足兵精。天戈所指。無不立就蕩平。區區廣南一隅。豈能始終抗拒。特因安南地方水土惡劣。瘴氣甚盛。實不值損我師徒。蓋將弁兵丁等若不爭先用命。猶可治以退怯之罪。今舉而委之瘴鄉。朕心實所不忍。即使集兵會剿。竟將阮惠擒獲。廣南境土收入版圖。又須添設官員兵弁。防守其地。該處水土惡劣。不能久駐。且人情狙詐。反覆無常。前代郡縣其地者。不久即生變故。歷有前車之鑒。難保數十年

後不復滋生事端。將來大軍撤後。若又另立一人主持國事。仍與阮惠無異。豈不徒勞兵力。是此事不值大辦。朕已洞燭先幾。胸有成見。所以黎城奏捷之時。早經降旨。撤兵不待事後始行定計。不復興師進討也。朕臨御五十餘年。辦理庶務。惟日孜孜。並非老而厭兵。畏難息事。即如從前平定準噶爾。回部。金川。及甘肅臺灣逆匪。無不運籌宵旰。指示機宜。仰賴

上蒼嘉佑。鑒朕不得已用兵之心。並非出於好大喜功。故能所向克捷。膚功迅奏。今安南之事。揆之天時地利。斷無勞師遠涉之理。且王者有分土。無分民。亦不忍使該國夷人。頻櫻鋒鏑。是以決計不復用兵。況阮惠已震懾聲威。匝月之間。三次乞降。且將迷失兵夫。供給資送。將來伊若果誠心懇乞赴闕求恩。或可鑒其悔罪。惻愍量加封號。若竟疑懼不敢親來。亦不過赦其前罪。斷不加以封爵。朕之撫

馭外夷。恩威並著。大義昭然。無不仰體

上天好生之德。從未敢稍萌窮兵黷武之見。天下臣民。諒無不共見共聞。特將辦理安南始末緣由。通諭中外。使咸喻朕意焉。○諭軍機大臣等。前因內地大黃一種。為俄羅斯必需之物。恐致透漏。節次傳諭新疆駐劄大臣。嚴密查禁。並諭令瀕臨海口各省。一體實力稽查。毋許奸商私行偷販。本日據伍拉納等覆奏。每年令興泉道官買五百觔。帶交臺灣鎮道。配發各鋪。繳價領售。其琉球貢使回國。購買藥料時。所需大黃。每歲不得逾三五百觔之數。無許官伴人等夾帶等語。所辦甚是。自此沿海關口。查禁森嚴。各省實力奉行。奸商私販之弊。可期杜絕。第思大黃一種。為內地藥餌所必需。若設禁過嚴。以致販運不前。於民間亦有未便。即如臺灣一郡。雖遠在海外。究屬內地。該處向多瘴疫。民間療治常用大黃。是此種藥物。更不可缺。總須飭令員弁等

妥為經理既不使商販暗漏外洋復令民人得資療疾無虞缺乏方不致因噎而廢食也至回部地方與內地氣候不同本可無需大黃之處况安集延與俄羅斯道路可通如運販回地難保無輾轉偷漏情弊著傳諭勒保於嘉峪等處緊要關隘必須嚴行飭禁不准絲毫夾帶方為妥善將此各傳諭知之○又諭昨劉戡奏直隸各州縣應徵旗租自乾隆四十七年至五十一年積欠未完銀兩分別帶徵攤賠一摺已交該部照例覈辦矣因令戶部詳查近年奏銷冊案有無續欠據稱五十一二兩年續欠旗租銀共有二十四萬八千四百餘兩等語此項租銀若果因地方水旱災歉實欠在民自當分別緩帶以紓民力但舊欠未完新欠又至如許之多其中保無有官吏那移藉詞民欠以為侵蝕地步此事不值欽差大臣前往清查劉戡身為總督不可不切實辦理以杜弊端著傳諭該督即留

心密訪有無那移侵蝕情事據實具奏並嚴飭各屬實力催徵依限完繳以清款項毋任地方官飾詞延宕以致積欠久懸釀成虧缺致干咎戾○戊申陝甘總督勒保疏報乾隆五十三年狄道州墾地十六頃六十畝○已酉吏部議准山東巡撫覺羅長麟奏禹城縣路衝事繁值該縣因公出境時同城僅有典史勢難兼顧查有淄川縣縣丞地僻事簡請改歸禹城縣駐劄城外之禹城橋又曹縣之劉家口距縣八十里界連豫省人雜事繁須專員彈壓查有荷澤縣縣丞職司鹽捕事本不繁請移駐劉家口改為曹縣縣丞從之○庚戌上還宮○御養心殿召讀卷官入親閱定進呈十卷甲第○諭去歲盛京所屬地方雨水稍多草豆價值較往年昂貴餵養驛馬未免拮据著於各驛站一年應支馬乾銀內豫行借支半年銀兩以資接濟○又諭據梁肯堂奏

衛輝懷慶歸德等府屬上年被災之後新舊錢糧及民欠等項積累過多加以應完銀穀等項較每年額徵之數多至數倍等語衛輝懷慶二府屬之汲縣等十三縣上年雖已加恩緩徵但新舊錢糧及民欠倉穀籽種等項過多而歸德府屬之商邱等州縣上年麥秋雖屬有收但因屢年水旱頻仍小民元氣未能驟復若一時並徵民力不無拮据所有衛輝府屬上年被旱稍重之汲縣新鄉獲嘉輝縣四縣本年地丁錢糧著緩至五十五年麥熟後開徵其被旱稍輕之淇縣延津濬縣滑縣封邱考城六縣並懷慶府屬之原武修武陽武三縣著緩至本年秋成後開徵其歸德府屬之商邱寧陵睢州三州縣本年應徵新糧著自五十五年起分作兩年帶徵以紓民力該部即遵諭行○又諭據梁肯堂奏河南魯山縣生員傅麟瑞七世同居子孫一百五十餘人懇請旌表等語傅麟瑞一門式好七

世同居子孫衆多共敦嫻睦洵為盛世休徵特製詩章並書扁額以賜所有應行旌表之處著該部照例具題○御製詩曰中州夙號民風古麟瑞今聞實可嘉七世同居如許氏百人共饗勝楊家雍雍敦睦倡鄉里藹藹致祥表近遐敢曰休徵因泰運安民調化敬惟加○御書扁曰敦睦傳家○又諭這所叅鍾應柎著革去舉人吏目沈封忱著革職交與阿桂於經過磁州之便提集案犯會同劉綏東公嚴審定擬具奏○諭軍機大臣等據劉綏奏有磁州舉人鍾應柎於州民劉茂喜與當商王元統互控毆傷圖詐一案從中扛幫詞訟向署吏目沈封忱求情干與多事迨知州集訊之時輒闖入公堂大肆咆哮尤為恃衿藐法至該署吏目沈封忱擅受民詞已屬違例且現據鍾應柎指控該員婪贓各款必非無因請將鍾應柎革去舉人署吏目沈封忱革職

以便確訊定擬等語。已明降諭旨將鍾應拘等革審矣。地方劣衿干與公事藐視官長最為風俗人心之患。漸不可長。而吏目違例擅受任意婪贓尤干功令。俱不可不徹底嚴究。阿桂於二十日自京起程。計此時尚未過磁州。著傳諭阿桂於行抵該州時畧為留住兩三日。先將此案應訊人證就近拘訊。其案內要犯雖經劉戩飭令摘解赴省。如已解到。即著劉戩帶同各犯速至磁州會同阿桂審辦。如尚未解到。即一面飛飭停留。劉戩仍一面趕赴磁州會審。將此案情節秉公研鞠。務得確情。定擬具奏。阿桂俟磁州審案完竣再由彼起程。前赴荊州查辦一切。將此由六百里傳諭阿桂。並諭劉戩知之。○辛亥。上御太和殿傳臚。賜一甲胡長齡。汪廷珍。劉鳳誥。三人進士。及第二甲錢楷等三十三人進士出身。三甲廣善等六十二人。同進士出身。○辛圓明園。○諭軍機大臣等。據黃巖鎮總

兵劉文敏奏。春汛巡洋會哨一摺。內稱前往南洋北洋會哨。至交界地方。緣溫州鎮定海鎮兵船尚未到汛。當經遵先到之例。備文呈報等語。水師會哨洋面例應兩鎮總兵各帶兵船。於交界地方會同巡歷。今劉文敏在南洋巡哨。何以溫州定海兩鎮總兵並未剋期到汛會哨。殊屬疎懈。著傳諭琅玕即行查明溫州定海兩鎮因何遲誤。究於何日始行到汛之處。據實先行覆奏。勿得稍存迴護。並諭伍拉納知之。○壬子。定陞殿時增改糾儀御史例。諭向來遇陞殿行禮。都察院堂官俱在殿上西邊站立。而丹墀下儀仗前分上中下三段。共設糾儀御史六員。不足周覽。管攝今思丹墀上不過王公數人。大學士都察院堂官耳目較近。儘敷糾察。儀文自能整肅。而丹墀下行禮人員較為衆多。自非御史六人所能稽察。周到嗣後著於都察院堂官內輪往二人。在頭層品級山兩旁站立督率。再於

每品正從東西不拘滿漢科道各派一員專司彈壓。科道員數較多。每次止用三十六員。儘為寬裕。於朕未陞殿以前。著在品級山兩旁向上安排分立。屆時留心稽覈。如行禮人員有越班不齊者。既可隨時指示。而於錯誤不遵者。亦無難指名糾劾。更足以昭體制。而肅朝儀。著為令。○又諭前因恰克圖業經閉關。不准與俄羅斯貿易。而大黃藥料尤為俄羅斯必需之物。恐商販私行透漏。節次傳諭新疆駐劄大臣嚴加查禁。並因各省地方。不特廣東瀕臨洋面。即盛京江南閩浙直隸山東等處。俱有沿海口岸。諭令各督撫等飭屬實力稽查。毋許奸商偷販出洋。致轉售與俄羅斯。希圖厚利。復因內地需用大黃療治疾病。不可查辦過當。以致因噎廢食。續經降旨令該督撫等妥協酌辦矣。本日閏正祥等奏據古北口防守尉達孟阿等稟報到關藥車三輛。搜出大黃一百四十九觔。將販賣藥料

之王禮謙。劉克仁。委派弁兵押送刑部嚴審等語。大黃一種。不特內地民人用資療疾。即口外地方。如熱河八溝等處。人烟輻輳。亦與內地無異。若查禁過嚴。致商販裹足不前。於民間亦多未便。此次在古北口盤獲之王禮謙等。所有販運大黃。尚在未定章程。飭禁之前。且為數無多。著即從寬釋放。不必解交刑部。第各省查禁私販。固不可有意從嚴。亦不可漫無稽察。著該督撫等各就地方情形。妥立給票章程。定以限制觔兩。酌議每處需用大黃若干。發給官票。於經過各關隘時。將票呈驗。如無官票。可憑即係私行販運。查拏治罪。飭令地方官妥為經理。毋任不肖吏胥藉端需索。有票者不禁。無票者即係自販。並於通衢僻壤。出示曉諭。以現與俄羅斯不通貿易。是以不准大黃出口。俟將來俄羅斯送出賊犯後。仍可開關通市。則大黃一種。原應照常販運。自無庸給與官票。有累經商。各督撫

一面酌議奏聞。即一面通行出示。不必俟部覆到時。始行辦理。免致往返稽遲。有誤閭閻需用。○又諭盛京事務較繁。職任緊要。都爾嘉情性粗率。曾在軍營。馬上尚好。都爾嘉著調補黑龍江。嵩椿年久。歷練著調補盛京。嵩椿員缺。著恒秀調補。所遺員缺。著琳寧調補。嵩椿接奉此旨。將將軍印務。交割副都統署理。即行來京請訓。後再到盛京任所。嵩椿到後。都爾嘉再前往黑龍江。都爾嘉到時。琳寧即往吉林。更換恒秀。恒秀即行起身。前赴任所。○諭軍機大臣等。前據梁肯堂奏彰德南陽汝寧光州等各府屬。於三月二十日得雨。而開封等府屬。於三月二十七、八等日復經得雨。澤自一二、三寸至五六寸不等。一摺。看來該省自河以南。雨澤雖覺普霑。而四月尚未得有透雨。至河北之彰德、衛輝、懷慶等府。雖報得雨。不過一二寸者居多。未能一律透足。該撫前摺。係本月十八日拜發。迄今將及

旬日。近日曾否續得雨澤。未據該撫奏報。深為廕念。河北等府。前數歲被旱較重。雖上年尚有收穫。但該處究屬積歉之區。全賴今歲收成豐稔。方於民間口食有資。現在田禾正當長發。望澤維殷。著傳諭梁肯堂。即將衛輝等府屬。曾否續經得雨之處。查明先行覆奏。阿桂於磁州審案完竣。前赴荊州。自必經由河北。著將得雨未透之河北各屬。於經過之便。親身周歷。查看該處是否缺雨。田禾能否長發。閭閻生計。較前歲情形究竟若何之處。詳悉查勘。切實覆奏。諒阿桂久侍禁近。必能仰體朕念切民依之意。據實查奏。以慰僅注也。將此各傳諭知之。○步軍統領衙門奏直隸宣化縣鋪戶常懷恒、曹氏呈控該縣知縣王秉正欠銀不還。挾嫌枉斷。請派大臣前往審辦。得旨。此案著派姜晟、駢驛前往審辦。原告常懷恒、曹氏照例解往。○旌表守正捐軀直隸武邑縣民呂存住妻劉氏。○癸丑。諭軍

機大臣等。此次進勦安南。朕於奏報收復黎城時。御製記事文一篇。即以黎氏近代以來。構亂頻仍。或係

天厭其德。是以出師。以定亂。班師以知退。不欲窮兵深入。勞我師徒。此皆朕欽承

天道。洞悉先機。著將御製文鈔寄福康安閱看。安南素稱能文。並可宣示阮惠使之明喻朕意。今阮惠屢欲籲懇降附。已定議不復用兵。然阮惠係安南土酋。敢於傷害提鎮。其罪甚

重。雖由阮惠與黎氏為難。臨陣之際。彼此未能辨識。而許世亨等亦因奮不反顧。深入捐軀。但阮惠抗拒官兵。傷及提鎮之罪。究難解免。今若不親身赴闕。請罪乞恩。豈能遽加封號。此時阮光顯。想已到關。著福康安再向該夷。諭以爾國自相構衅。天朝念黎氏恪共職貢。百有餘年。既已遠來控訴。不得置之不辦。及克復黎城後。封黎維祁為國王。而黎維祁昏懦無能。棄印逃回。難以自立。不值復加

扶植。大皇帝於收復黎城時。即恐黎氏不能振作。御製記事文內。推原立國興廢之故。論及於知止不殆。佳兵不祥。以期不違

天道。仰見大皇帝無事不順

天而行。豈肯於阮惠歸誠之後。羈留不遣。復將無能之黎維祁。送其歸國。現在黎維祁安插桂林省城。原念其止於無能。不便加之誅戮。酌給養贍。不過等於編氓。已為再造之恩。並無復令歸國之意。爾即遣人至黎維祁處看視。亦無不可。總之天朝撫馭外夷。逆則加以征討。順則永受寵榮。如阮惠不能親自赴闕。籲懇。僅遣親屬入關進貢。雖係出於惻怛。亦難邀收納。蓋因阮惠戕害大員。獲罪甚重。即使將通國珍奇。盡數呈獻。亦不能償我提鎮三員報國之忠。豈可遽思贖罪也。○

御製安南記事文曰。安南雖南瀛小邦。耶然亦有民人焉。有社稷焉。且奉本朝正朔。稱外藩者百餘年。其邦遭亂。興滅繼絕。禮亦宜之是

蓋奉

天道也。然彼邦之遭亂，豈無所由？且其據黎城而擅號名者，原非一姓也。則自古至今，主中華而稱正統者，率可知矣。雖乘除有命，而興亡在人，順

天者昌，逆

天者亡。吁！是不大可畏乎？黎城既復，嗣孫重封其陷於阮之土地，以次傳檄而定。二阮窮蹙，竄歸廣南。廣南去黎城又二千餘里，是役也

官軍裹糧以進，設臺站以運，不資安南一草一木。而安南荒亂之餘，亦不能供軍儲也。官軍繞萬餘而臺站運糧之夫，將用至十餘萬。則勞內地矣。因護外小邦，為之掃穴執醜，而勞內地是大不可也。且既已為之興滅繼絕，則彼之竄寇應付彼平之夫，以國家之力抵廣南，執二醜亦優為之。但權其輕重，知止不殆，佳兵不祥。且安南亦一小邦也。黎氏近代以來，鮮有能為自強之君或者

天將厭其德乎？夫

天厭其德之邦，而予助之，則予豈敢出師以定亂班師以知退？或者不違

天道而有合於王者之師乎？是為記。○戶部議准漕運總督毓奇奏請嗣後除僅止清查軍民產業未實者仍照原議實降二級調用外，尚有編造遺漏故縱殷富軍丁竄入民籍並將田產代為隱匿脫漏者，訪查確實即將原查州縣衛所官弁叅奏發往新疆効力贖罪，永不敘用。失察道府一併革職，不准捐復。其營謀脫漏本丁發給黑龍江兵丁為奴，該丁弟兄子孫仍編入軍籍，僉派辦運從之。○甲寅諭戶工二部議覆龍江西新二關一年期滿徵收盈餘戶關比較歷屆俱有贏無絀工關比較五十年短少盈餘銀三萬一千九百餘兩。工部議令該監督照數賠補，固屬覈實辦理。第念上年該處商運木植銷售維艱，竹木牌把到關稀少，盈餘短絀尚屬有因。所有

此次龍江關。短少工稅盈餘銀三萬一千九百餘兩。著該監督成善賠補銀一萬兩。其餘銀二萬一千九百餘兩。著加恩寬免。○以故多羅貝勒永璦子綿溥及病休正紅旗奉恩將軍普正子蘇清阿照例承襲。○乙卯內閣翰林院帶領丁未科散館修撰編修庶吉士引見得旨。此次翰林散館之修撰史致光業經授職。其清書二甲之庶吉士吳烜汪彥博俱著授為編修。三甲之庶吉士翁樹培著授為檢討。漢書二甲之庶吉士王觀秦恩復李傳態初喬齡龍廷槐何必陳士雅俱著授為編修。三甲之庶吉士周維壇潘紹經瑚圖禮尹英圖俱著授為檢討。何道冲王祖武胡鈺馬履泰顧鈺孫星衍鄭敏行柳邁祖范逢恩陳若霖俱著以部屬用。謝恭銘任銜蕙著歸進士原班銓選。○諭軍機大臣曰。閏正祥奏乾隆五十五年恭逢八旬萬壽。提鎮等未獲附襄盛典。懇一體准繳經費等語。三十六年

朕前往熱河及回鑾時。提督王進泰曾於古北口一帶豫備點綴。明年夏間。朕仍往山莊避暑。於七月內回京。閏正祥等止須照三十年之例。在古北口一帶蹕路往還所經處所備辦點綴。已足抒其忱悃。然不可過於糜費。所有請繳經費之處。可以不必將此傳諭知之。○丙辰。豁免直隸宣化萬全懷安西寧四縣乾隆五十三年旱災額賦。○是月浙江巡撫覺羅琅玕奏范公塘一帶舊設石壩十一座。係用碎石以柵欄木櫃裝載排列。難於釘樁。一經大潮衝刷。易於潑損。不若用柴盤頭。可以釘木作椿。根脚牢固。且柴性柔軟。可耐衝激。即間有蛀蟄。亦易修築。現在石壩衝損者。請即改建柴盤頭。餘俟應修時。一律改建。不必再做石壩。得旨。如所議行。○閩浙總督覺羅伍拉納福建巡撫徐嗣曾奏臺灣澎湖各營原額戍守班兵一萬二千一百七十六名。向由內地各營均勻派往。三年輪替。惟

是臺灣一營之兵。每派至內地七八營。至數十營不等。以致弁兵不相認識。稽察為難。此後換防弁兵。請於督撫提鎮協標各營分。整齊歸一。劃撥如某營應派外委千把若干員。某營應派馬步戰守兵若干名。一營仍歸一營。總共挑出。指定前往臺灣某營更替。畫一註冊。無許混淆。分作四起。每起以三個月為期。各按營分歸總撥換。擬將新增戍防經制額外。外委十六員。兵一千二百名。同原額內應派水陸馬步守兵二千三百名。統共弁兵三千五百一十六員名。為第一起。班程糧餉。於本年四月初一日。畫一起往。又派撥內地水陸各營三千五百名。為第二起。班程糧餉。於七月初一日。畫一起往。又派三千五百名。為第三起。班程糧餉。於十月初一日。畫一起往。又派二千八百七十六名。為第四起。班程糧餉。於五十五年正月初一日。畫一起往。各起弁兵。統於一年內全數換竣。仍俟三年屆

滿。換回原營歸伍。得旨如所議行。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十七

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百二十八

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級總帶加一級尋常加二級軍功紀錄一次臣履歷

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主庫事務

世襲副都統軍功加十九級總帶加二級入加二級臣等指內大臣戶部尚書鑲藍旗滿洲都統軍功紀錄五次

尋常紀錄十四次臣德璜經筵講官太子少保二部尚書紀錄六次臣曹振鏞等奉

敕修

乾隆五十四年己酉五月丁巳朔授一甲一

一甲一名

名進士胡長齡為翰林院修撰一甲二名汪

廷珍一甲三名劉鳳誥為翰林院編修○旌

表守正捐軀山東壽張縣民李金聲妻子于氏

○戊午諭西藏自己勒布滋事以來業經太

加懲創但藏內諸務必須一曉事大喇嘛幫

同達賴喇嘛辦理方為有益濟龍呼圖克圖

心地明白熟習經典素為唐古忒等敬信著

賞給畢里克圖名號任以扎薩克之職前往

西藏幫同達賴喇嘛辦理一切俾噶布倫等

諸事得有遵循以副朕乂安全藏至意○軍

機大臣議准四川總督李世傑奏前奉諭於

打箭鑪察木多二處酌貯糧儲惟是口外山

路修阻轉輸米石每石須腳價十五兩有零

所費過當查口外地方稞麥較多秋收時頗

可採買先經飭員就近試買每麥一石價不

過四五兩之間每麥稞一石較麥價約賤二

三錢囊之運米每石十五兩之價實多節省

請於每歲秋收後買足三千石稞麥各半建

倉收貯定價不得過四兩買足時照新疆屯

防例存七易三借與本臺商民僧番秋後每

石加耗一升繳還從之○旌表守正捐軀四

川蒲江縣民劉公郭姪女劉氏○己未

孝誠仁皇后忌辰遣官祭

景陵○諭本日據梁肯堂奏稱開封歸德南陽

河南汝寧陳州六府暨許汝陝光四州於四

月初十十一二三及二十一二十三等日續得

透雨河北之彰德衛輝懷慶三府亦於四月

十一二三及二十一二三等日得雨深透等語。是河南河北各府州屬俱經甘霽優霑朕心少慰。但河北距省稍遠。或該撫前此拜摺時尚未據各屬稟報。而開封為該撫駐劄之所。其歸德等處亦距省不遠。既於四月初旬續得雨澤十八之摺內即當奏明。何以無一字提及。直待朕傳旨詢問始行繕摺具奏耶。朕念切雨暘無時。或釋梁肯堂何不能仰體朕懷。遲延若此。伊前為直隸藩司辦事尚屬認真。豈以擢用巡撫遂爾意存自滿。不以民依為重耶。此次姑恕梁肯堂著飭行。○又諭上年大兵進勦安南。粵西民夫運送糧餉踴躍急公。甚屬出力。且前歲臺灣用兵時曾調粵兵前往。而黔兵赴臺灣時又係由粵西經過。因念該處地瘠民貧。連歲秋收未能豐稔。恐民力不無拮据。曾降旨令該督撫等查明各官兵經過地方酌量蠲緩。茲據福康安等奏此次官兵及上年調赴臺灣各兵經過地

方查其應付多少。請分別蠲緩等語。著照所請。將應付較多之柳州潯州梧州南寧太平五府屬五十四年應徵錢糧概予蠲免。其應付較少之各府州屬所有本年應徵錢糧亦著緩徵半年。俾紓民力。該督撫務督飭所屬妥協辦理。以副朕軫念邊氓至意。該部即遵諭行。○諭軍機大臣等據福康安等奏阮惠親姪阮光顯敬齋表貢進關乞降並籲懇進京入覲等語。此次阮惠遣伊親姪求降進表其情詞迫切實屬出於至誠。已另降勅諭令福康安宣示看來。此事即可完結。阿桂奉使在外自必心存懸注。著將本日福康安等奏到各摺並所降諭旨及阮惠表文一併鈔寄阿桂閱看。○勅諭安南阮光平知悉。據協辦大學士兩廣總督公福康安等奏爾遣親姪阮光顯敬齋表貢抵關乞降等語。將原表呈覽。朕閱爾表內稱爾先有廣南之地。非與黎氏有上下之分。上年曾遣人叩關備陳。與黎

氏構衅緣由邊臣駁書不即遞達嗣官兵出關征勦直抵黎城爾於今年正月至黎城欲向黎維祁詢問籲請大兵之故不料官兵一見爾衆奮勇殺戮爾手下人等猝難束手就縛又值江橋拆斷官兵致有損傷不勝惶懼已屢次遣人叩關請罪並送回未出官兵其戕害提鎮之人業目覩正法本應躬詣闕廷陳情請罪因國內初罹兵革人情惶惑尚未安集謹遣親姪阮光顯隨表入覲並據阮光顯稟稱爾俟國事稍定尚乞親自到京瞻覲等語安南黎氏臣事天朝恪供職貢百有餘年爾在廣南從前並未修朝貢上年黎維祁母妻赴關控訴以爾構亂稱兵占據其國籲請救援此事為天朝字小存亡體統攸繫是以前任督臣孫士毅自請帶兵出關爾雖曾遣人叩關辯訴但守邊之臣向來祇知安南有黎不知有阮駁回原稟亦經奏聞所辦甚正然督臣孫士毅奏克復黎城之後朕即

以黎氏國內多故黎維祁又復怯懦無能看來

天心竟有厭棄黎氏之意朕從來辦理庶務無不順

天而行隨即諭知孫士毅黎城既復當即徵兵乃孫士毅未能遵旨速徵在彼耽延茲爾率衆至黎城欲向黎維祁詢問官兵在彼豈有坐視之理遂爾奮勇相戰爾手下人衆畏死抗拒致傷我官兵在提鎮等職司勸禦其臨陣捐軀俱堪嘉憫已從優議卹將許世亨封以伯爵總兵二人皆予世職並入昭忠祠以示獎勵爾以安南頭目敢於抗拒官兵戕害提鎮大員獲罪甚重是以將福康安調任兩廣總督原令調集各路大兵整軍問罪但念爾屢次遣人叩關請罪是爾尚知畏懼天朝朕憐汝誠心悔罪已往之事不復深究矣但非親身詣闕請罪乞恩僅遣爾姪阮光顯隨表入覲遠思仰邀封號天朝無此體制爾既

未列藩服所有貢物亦未便收納著仍發交領回如爾必欲輸誠納款乾隆五十五年八月屆朕八旬萬壽維時距今又越年餘爾國內亦當安集爾即可稟知督臣親自赴京籲懇以遂瞻雲就日之私再於安南地方代為許世亨等建立祠宇春秋虔祭庶可稍贖前愆屆時朕鑒爾畏感惻忱自必格外加恩或即封以王爵世世子孫可以長守安南彼時再呈進貢物亦即可賞收仍當加之厚賜以示優眷朕臨御五十餘年凡庶邦藩部無不待以誠信黎維祁柔懦無能棄印逃竄若律以天朝擅離職守之條尚當重治其罪今念伊係屬外藩僅止無能尚無違犯今在桂林省城安插斷無乘爾入覲復將黎維祁送回安南之理已諭督臣福康安等轉飭伴送官員同爾姪阮光顯於經過桂林省城之便親行看視黎維祁光景並令爾姪詳悉寄爾知悉爾更可無所用其疑慮茲特賜爾珍珠手

串一掛爾當祇承恩命計程於明年六七月內至京親詣闕廷懇請以冀永承渥眷勉之欽哉特諭○又諭此次阮惠又遣其親姪阮光顯齎表乞降情詞較前倍加恭順自屬出於畏威至誠現已明降勅諭發往福康安等即當令阮光顯遣人敬謹齎回交阮惠閱看俟續得有信息即行奏聞候旨遵行現據福康安等奏已將阮光顯遣回諒山福康安接奉此旨再令阮光顯由諒山起程進京不必太急總於七月二十外行抵熱河彼時蒙古諸王公台吉俱來朝覲俾阮光顯得親車書一統萬國享王之盛且得與諸王公台吉等同邀筵宴之榮自屬更善並即令湯雄業帶同來京仍由桂林經過令阮光顯面晤黎維祁並向阮光顯告以黎維祁將大皇帝重頒印信敢於遺棄本應重治其罪祇因其累代恭順尚無違犯是以僅予安插豈有復令回黎城主國之理阮惠如果於明年萬壽前親

來瞻觀大皇帝必格外加恩或即予以王爵
子孫世守安南當即令阮光顯將此情節詳
悉寄知阮惠俾其更不必心懷疑懼再御製
安南記事文一篇前經鈔寄福康安並令宣
示阮惠使之明喻朕意今阮惠業已誠心畏
服所有御製記事文可以不必宣示福康安
等又奏關前夏瘴盛發孫士毅不必久居於
此宜即回南寧調養數日再行起程等語自
應如此將來孫士毅起身時並當緩程行走
不必急於趨行致有勞頓前曾屢降諭旨令
福康安自行酌量或移至南寧太平地方或
回駐桂林料理一切此旨諒已接奉現在阮
光顯業經到關此事大局已定福康安等亦
即當遵照前旨移駐廣西內地庶水土和平
易於調攝以副朕體恤之意○命內閣侍讀
張姚成提督湖南學政庚申陝甘總督勒
保疏報乾隆五十三年鎮迪道屬迪化州招
墾民人三十七戶共地一千一百十畝昌吉

縣招墾一戶種地三十二畝呼圖壁巡檢招
墾二百三十三戶共地六十九頃九十畝綏
來縣招墾二十一戶共地六百三十畝齊木
薩縣丞招墾二百六十四戶共地七十九頃
二十畝奇臺縣招墾十一戶共地三百三十
畝○辛酉諭軍機大臣曰黎維祁因無能失
國棄印潛逃今姑寬其失守藩封之罪安插
桂林省城酌給養贍比於編氓若聽其仍舊
蓄髮服用該國衣冠與內地民人迥異殊於
體制未協著傳諭該督撫即令黎維祁並伊
隨從人等一體薙髮改用天朝服色將來阮
光顯經過桂林時與黎維祁會晤見其業經
薙髮服色改易斷無回國之理並可令阮光
顯差人回國寄知阮惠俾得釋其疑畏○壬
戌諭軍機大臣等據蘭第錫等奏查勘揚州
鎮江運河工程情形一摺內稱寶應汜光等
湖湖水低於河水七尺餘寸現在酌啟減水
閘洞以洩運河有餘之水等語本年淮揚一

帶運河水勢充裕湖水較低於河水原不妨酌啟減水閘洞以宣洩運河盛漲但思寶應汜光等湖向係減洩洪澤湖盛漲之區今將運河之水分洩入湖是否能資容納且寶應汜光等湖未必另有自行入江之路若往南下游一帶仍須匯歸運河入江則運河盛漲之水仍恐不能宣洩其是否如此情形著傳諭蘭第錫詳悉查明具圖貼說覆奏尋奏寶應一帶實無另有入江之路惟往南下游邵伯湖尾三溝閘以下西岬無隄之處匯歸入運其東岸金灣鳳凰壁虎等閘壩橋孔皆係分洩入江之路得旨覽奏俱悉○癸亥內閣翰林院帶領新進士引見得旨新科進士之一甲三名胡長齡汪廷珍劉鳳誥業經授職錢楷李鈞簡阮元張錦芳施杓周棫楊祖純黃鎔祝孝承顧德慶游光繹那彥成吳灼達林劉鏞之錢開仕張鵬展汪滋畹楊昭尚慶雲張履元俱著改為翰林院庶吉士言朝標

貴徵王育琮伊秉綬董思駟嚴年穀申瑤廣善王正雅林溥彭希鄭李再瀛王寧焯榮麟瞿曾輯裴顯相蕭光浩金樞發曹祝齡俱著分部學習張經邦包敏張位中張炳錢本禮萬應馨金梅華榕端許元淮范鶴年楊克濟敬大科李曉巒趙時盧蔭文李元符丁桐汪兆宏劉斯顯任澤和張秉銳張世昌程卓樑俱著以知縣即用餘著歸班銓選○諭軍機大臣曰全德奏前據兩淮委員汪良增稟稱遵撥押解汝寧鹽觔至息縣行銷該令陳文衡因向索費未給月餘不許開店售賣並聞有庫吏頓姓富囤私鹽之事隨飛檄河南鹽道確查至息縣舊商曹仁集業經身故該令平日有無需索無從傳訊已剴切曉諭各商嗣後如有需索即行密稟不必顧慮等語地方官勒指鹽務即是貪賊之漸該叅令陳文衡於委員解到鹽觔後輒敢故意刁難不許開店售賣則汪良增所稟婪索銀兩及庫吏

因私恣賣之處。自非無因。著傳諭梁肯堂。即提集案內人證。嚴切究訊。務得確情。即行定擬具奏。○甲子。諭曰。全德奏淮、北鹽場向遇黃水盛漲。輒多淤塞。今由六塘河一帶另開新河。從此可永無淤墊。不致仍前遲滯。惟是連年積壓未運者。已有三十餘萬引。若不設法疏通。終不能年清年款。請將已酉一綱免其捆運。其正雜錢糧分年帶銷等語。著照所請。加恩准將已酉一綱提出。免其捆運。其已酉一綱正雜錢糧。自庚戌為始。分作五年帶完。俾免一時併納。以紓商力。○又諭。前因直隸各州縣應徵旗租。舊欠未完。新欠又有二十餘萬之多。其中保無官吏那移情弊。降旨令劉綬留心察訪。據實具奏。茲據該督奏稱。緣佃種旗地之戶。家本貧寒。收成豐稔。尚可按期完納。一遇水旱不齊。動致拖欠不清。而地畝鹽碱拋荒。佃戶逃亡。亦所時有此數年積欠之故。實由於此等語。各州縣應徵旗租。

或因水旱不齊。致有拖欠。自當分別緩帶。以紓民力。而清款項。若果田畝鹽碱拋荒。則其地已不能耕種。租從何出。至佃戶逃亡。如實因地不能種。逃至他所者。即應奏請豁免。如係無力承種。出外營生。亦應另行召墾。何以並不確查妥辦。惟事按年經徵。試思地已拋荒。小民何能交納。若如該督奏請。著落地方官依數賠繳。似此年復一年。伊於何底。各省應徵地丁正項錢糧。如係實欠。在民朕尚加恩豁免。從不令地方官賠繳。焉有因積欠旗租。轉令代為賠納。耶。各州縣給予廉俸。尚動稱不敷辦公。借端侵缺。若復令賠繳旗租。將伊等更得有所藉口。殊屬不成事體。且朕軫念黎元。凡遇旱澇偏災。無不立予蠲賑。雖千百萬帑金。從不稍存靳惜。豈有地畝既荒。尚令小民賠納租銀。更非朕體恤閭閻之意。但地方大吏。從前何以未經奏明。恐各州縣有影射虛捏。延宕侵那等弊。不可不徹底清查。

著派侍郎伊齡阿管幹珍於朕啟鑾後前往查辦。彼時京中無事，伊二人更可以詳細履勘。如查係實在田畝鹽城拋荒及佃戶逃亡，因而拖欠者，即據實奏明，候朕降旨酌予豁免。如查係地方官誑詞捏飾，希圖影射侵蝕者，即當叅奏治罪。此等丈量地畝之事，朕向來不肯輕易派員前往查辦，以免擾累。今直隸各州縣積欠旗租，如果實係田畝鹽城拋荒，佃戶業已逃亡，所有應徵租銀自無從追

著派侍郎伊齡阿

著派侍郎伊齡阿

納。並非地方官微催不力之咎。豈有照劉我所奏，仍令常年賠繳之理。朕此次特派大員前往查辦者，係為愛惜官民起見。朕既不忍累民，又豈肯累官。伊齡阿等務宜秉公辦理，以副朕曲加體恤。覈實清釐至意。○諭軍機大臣曰：全德奏湖廣每季應銷十九萬三千餘引，本年春季僅銷十五萬四百餘引。江西每季應銷六萬二千餘引，今亦僅銷三萬一千餘引。各商因口岸滯銷，已皆減價發賣，而

銷售情形，仍復遲滯。若每季如此，不惟積引不能疏銷，將額引亦不能銷足。現在嚴飭江西、湖北、湖南各鹽道，督飭地方官實力緝私，以杜侵占等語。淮南鹽引積滯不銷，自係各該省督撫不能督飭地方官實力緝私所致。該省大小各員，歷年得受各商陋規銀兩，累萬盈千。上年查辦之後，本應重治其罪。經朕格外寬宥，僅令將陋規永行禁革。該督撫等即當感激朕恩，督飭屬員實力查察嚴緝私販。俾官引得暢銷，無滯庶可稍贖前愆。地方官吏本有緝私之責，若因該省陋規禁革不能從中分潤，遂竟視同膜外，並不認真督率稽查，以致私販充斥，官引不行，又安用督撫為耶。畢沅、惠齡、浦霖何裕城俱著傳旨申飭。仍將此次春季鹽引因何滯銷之處明白回奏。並著嚴查各屬如有因不能分受規例遂敢肆行懈玩，並不拏緝私販，以及仍有藉端勒索商人任意墮銷情弊，即行秉公嚴叅治

罪毋得稍有迴護。倘嗣後該省仍令私販。累致按季應銷引鹽。再有積滯。朕必將該督撫等一併治罪。勿謂言之不豫也。將此由四百里傳諭各督撫。並諭全德知之。○予故定邊左副將軍復興。祭如例。謚勤毅。○旌表守正捐軀直隸東川縣民宋三賢女宋氏。○乙丑諭軍機大臣等。昨吏部奏帶領各官引見摺內有原任甘肅階州直隸州知州顏培天一員。係福康安在陝甘總督任內辦理計典。填注才力不及者。經該部帶領引見。觀其年力正屬富強。人亦明敏。與福康安填注之語適屬相反。已發往直隸。以同知補用。該員原係直隸州知州。各省州牧中有此強壯明白之員。一經該督撫保送引見。朕方當交軍機處記名。簡放知府。何至以才力不及。竟罹叅劾。此事若在富綱。已延三限於才識。察屬未能明當者。朕必以為該督撫所劾未公。即降旨飭詢。福康安平日辦事細緻。於屬員賢否

亦能留心察看。而眼力又不平常。不應錯誤至此。若福康安果於屬員才具。如此不能周察。則伊現管兩省。所轄文武員弁甚多。又安能望其舉錯得當耶。或因顏培天在任辦理地方事件。有未能妥協之處。抑或該管司道與之不睦。因於大計時將伊填注。揭叅福康安。亦未加深究。據詳具題。但該員在任若果有貪酷不法等項劣蹟。早應隨時專摺叅奏。革審。何待大計始行辦理。今既列入計典。應劾人數之內。則該員究係因何過失。致干叅劾。殊不可解。外省上司於所屬中有素不愜意之人。因持叅既無劣蹟。不叅。又難優容。於計典時填劾者。往往有之。如今日引見之顏培天。一望而知非庸愚之人。或將該員列入浮躁。及不謹之條。尚可斷非才力不及之人也。若按例行。則似朕不曾洞鑒。而容督撫任意軒輊矣。即如福康安為朕素所倚毗。或竟有劾其別項款蹟者。朕尚不免疑信參半。必

須究詢明確。若有奏其才具平庸、年力衰邁者，則其言之謬，不待辯而自明。今以年方壯盛之員，觀其光景，有過無不及，而福康安填以才力不及，殊屬擬不於倫。朕向來辦理庶務必期明悉底裏，從不肯稍涉顛預。除交軍機大臣就近傳詢，顏培天外。著傳諭福康安，即將從前填注該員才力不及之處，是否係該管司道與之不睦，故為填注申詳。福康安僅據詳題達抑係因該員辦公另有不妥，或竟有意存滿假偷安，耽於酒色，不理政務，或性情乖張，急於見長，皆可而斷非才力不及之人也。福康安係受恩深重之人，即一時見有未到稍至舛誤，既經朕降旨詢問，自當切實陳明，亦可無所用其疑懼。諒伊必不至意存迴護，以致人才稍有屈抑。務須據實秉公詳晰覆奏。○江西巡撫何裕城疏報乾隆五十二年萬載吉水泰和萬安、安福、南豐、玉山、弋陽、浮梁九縣開墾水田共四頃三十畝，有

奇。○旌表守正捐軀陝西富平縣民張之義妻董氏。丙寅以故奉恩將軍崇厚子嘉瑞襲職。○旌表守正捐軀江蘇豐縣民胡永清母李氏。○戊辰諭軍機大臣等，據伍拉納等奏清釐軍需款項一摺，內稱閩省辦理軍需，惟臺灣南北兩路地方情形與各省不同，而辦理因之迥異，無例可引。至今尚未奏咨，均須先行清釐款項，詳加考覈，與則例相符，始准入銷。若與成例不符，斷難清銷者，應俟報銷全竣之後，分別攤賠等語。閩省動用軍需款項繁多，必須逐細覈查底案，據實報銷。雖南北情形不同，其為軍需則一。況海船裝載糧餉，順風徑渡，尤非山路崎嶇可比。該督等不得以此藉口，致有冒濫。今自臺灣釐事以後，延至一載有餘，該督等並未查明分別奏咨辦理。惟將臺灣情形與內地不同，軍需支給款項多與定例不符之語，先行奏明豫留，冒銷地步，殊屬不合。著傳諭伍拉納、徐嗣曾

務宜各矢天良。秉公確覈。將一應支用款項。據實詳查。迅速辦理。毋任承辦官員。托故遷延。浮開侵冒。以歸確實。如果有侵欺情弊。該督等率據報銷。朕斷不能因此摺先入之言。聽其弊混也。○又諭曰。伍拉納奏據總兵羅英。茂報稱。遊擊徐璋。駕坐兵船出洋。會哨。適遇目兵郭瑞龍等。駕坐小船在洋緝捕。隨帶同前往。於三月十五日至涵頭港。會哨事竣。駕回時。忽值颶風。該遊擊將船暫泊崇武澳。其目兵船隻落後。係在湄州洋面。被風擊碎。沉失軍械。兵丁等扶板得生。并拾獲藤牌等件。隨准提督哈當阿。咨稱。訪查郭瑞龍等船隻。實係在洋被盜。行劫兵丁等。泅水登岸。器械船隻。一併刦去等情。揭報前來。請將護金門鎮右營遊擊徐璋。革職等因。並將金門鎮總兵羅英。茂革職。嚴審等語。遊擊徐璋出洋會哨。既不能緝捕盜匪。迨後兵船被刦。復膽敢担報。遭風情殊狡詐。徐璋著即革職。等因。

至總兵羅英。茂前據李侍堯奏。金門鎮所轄海面。洋盜出沒。刦掠頻聞。是以將該鎮革去頂帶。勒限嚴緝。旋經羅英。茂親身出洋。拏獲多盜。尚知奮勉。復降旨賞還頂帶。已屬格外加恩。該總兵自應倍加出力。於所轄洋面。認真督率緝捕。乃既不親歷會哨。而於該遊擊捏報之處。又復冒昧轉報。殊出情理之外。若非哈當阿嚴行訪查。屬實。則此案必致始終朦混。正盜轉得漏網。此而不嚴加懲治。何以肅營伍。而靖地方。羅英。茂亦著革職。等因。交該督等。提同遊擊徐璋。並在船目兵及已獲盜犯等。嚴審定擬。具奏。此案未獲盜犯。仍嚴飭所屬。實力查拏。務期全數弋獲。毋使一名漏網。○諭據姜晟奏。審擬山西監生常懷恒。控告宣化縣知縣王秉正。賒欠布銀不還一案。將王秉正。問擬杖罪。納贖已批。令該部議奏矣。此案王秉正。雖無因常懷恒。催討布價。挾恨。故出情事。但賒取布張。不即清還。以致

常懷恒藉詞控告。自有應得之罪。外省大小衙門所有需用零星食物。不能不就近取買。至布匹一項。尚非日用飲食之物。可比。若在本境店鋪。任意賒取。必致綢緞貨物。亦一概取之若寄。胥役等乘機滋擾。甚至短發價值。勢所必有。殊非整飭官方之道。嗣後各省府州縣等衙門。除菜蔬油醬食物。准其於本地方照市價平買外。其餘需用布匹綢緞。一切貨物等項。或由本籍攜帶。或在鄰境買用。毋得於管轄地方。濫行賒買。致啟勒索。指價之端。該管上司。仍應隨時稽察。如有仍在本境賒欠等弊。即行嚴叅究治。著為令。○以福建臺灣協副將李芳園。為福建金門鎮總兵。○已已。

上命

皇十五子 祭

關帝廟。○諭據已延三奏。陝西應徵錢糧通完一摺。朕披閱清單。該省五十三年額徵銀

糧草束。均已全完。帶徵緩徵銀糧。亦皆按期完納。惟潼關華州華陰等處。現有未完緩徵銀兩糧石。尚須照例帶徵。陝省近年以來。收成豐稔。小民踴躍輸將。不但額徵正賦全數通完。即分年帶徵銀糧。亦俱陸續交納。殊屬急公可嘉。所有五十二年潼關華州華陰等處未完緩徵銀三千一百六十三兩零。又未完緩徵耗羨銀四百七十四兩零。並潼關緩徵糧一百二十一石零。俱著加恩全行豁免。嗣後年清年款。逋欠全完。小民得免追呼。益可鼓腹含哺。共享盈寧之福。以副朕嘉惠閭閻有加。無已至意。該部即遵諭行。○刑部議奏河南巡撫梁肯堂題。鎮平縣民張文義。因角口微嫌。殺死范守用子范狗等一家三命。并斫傷范造。垂斃。請照例凌遲處死。其子及妻。照例發遣。得旨。張文義著即凌遲處死。向來殺死一家三命以上。案犯將其子嗣俱照例分別辦理。今彼既殺其三子。俱絕嗣。其一

僅存者。生死且未可定。而亦無嗣。此等兇殘之犯。既絕人之嗣。不可復令其有嗣。自當不留遺孽。方足蔽辜。嗣後凡殺死一家三四命以上者。不拘死者之家。是否絕嗣。其兇犯之子。無論年歲大小。俱著送交內務府。一體閹割。以示懲創。所有張文義一案。即著照此辦理。○庚午。諭向來南糧餘米。俱准在通州變賣。以資日用。今南漕現屆抵通。旗丁於交足正供之外。所有多餘米石。情願出售者。仍著

實錄卷一百一十八

上

加恩。准其就近於通州糶賣。在旗丁等既所樂從。而近畿地方糧米益充。於市價民食。均有裨益。該部即遵諭行。○諭軍機大臣等。據毓奇奏。江西各幫漕船。因鄱陽湖以西之鳳凰灘。罐子口等處。二百餘里河道淺澁。未能剋日渡湖。並據設法撥運挖淺。自四月十三日。該處得雨之後。水勢稍長。頭幫已渡湖前進等語。近年以來。山東直隸運河水短。漕船行走多有稽遲。本年直隸山東及淮揚一帶。

水勢深通。足資浮送。幫船銜尾北來。並無阻滯。乃江西各幫。轉因鳳凰灘等處河道節節淺阻。以致起撥耽延。不能徑渡鄱湖。實為從來未有之事。今該處雖經得雨。河水稍長。幫船已渡湖前進。而該督書麟署篆累月。及該撫何裕城。未能先事豫籌。隨時疏濬。辦理不善之咎。實所難辭。書麟何裕城俱著傳旨申飭。嗣後務宜督飭所屬。將江西漕船經過河道。如鳳凰灘罐子口等處。一概挑挖深通。毋

實錄卷一百一十八

下

任仍前阻滯。將此傳諭書麟何裕城。並諭毓奇知之。○以故貴州鎮遠府屬正七品土官楊通明子光燦襲職。○辛未。諭軍機大臣等。畢沅奏。襄陽城迤上老龍隄之卧鐵牛對面。周家嘴係襄江坐灣。新長沙灘一處。將大溜逼向南趨。洲沙多係石子砂礪。未能挑挖。近年以來。河形兜曲。溜勢較急。若不早為抵禦。恐將來對岸新灘日長。漢水益逼而南。必至搜刷隄根。擬於普陀菴至黑龍廟等處。仿照

荊州沙市石磯做法各接做挑溜碎石壩十丈及十餘丈不等俾節節挑溜以護石岸根基等語。害金洲在荊州府城之南洲沙漲濶逼溜北趨以致萬城等隄頂衝受患。今周家嘴在襄陽府城之北若新灘日長漢水益逼而南則該處老龍隄工適處頂衝亦難免搜刷為患。其情形大約與害金洲相仿。漢水流為荊江亦不可不豫為籌辦。况現據畢沅奏估做石壩共需用碎石八九千方工程亦屬有限。易於建築。阿桂現在荊州查辦事件回程必經由襄陽。著傳諭阿桂於回京經過之便即會同畢沅到彼詳悉履勘。如周家嘴洲沙可以設法去淨甚妙。若一時未能挑挖則酌量於迎溜處所建做石壩務期挑溜往北直走江心。俾沙灘不至再長。而老龍隄石岸亦可永保無虞。阿桂屢膺任使到彼會同勘辦自益穩當也。

實錄卷一千三百二十八

三

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十八

實錄卷一千三百二十八

三

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次並護理

總裁官經筵講官太子太傅文淵閣大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級並護理內大臣戶部尚書鑲藍旗滿洲都統軍功紀錄五次

尋常紀錄十四次臣德瑛謹奏官太子少保工部尚書紀錄六次臣曹振鏞等奉

教修

乾隆五十四年己酉五月壬申諭曰伍拉納

等奏晉江縣知縣蘇登萊於地方報竊之案並不認真嚴緝詳報請旨革職協緝等語聞省漳泉等處民情强悍盜竊頻聞雖甫經嚴加整飭積習尚未悛改該處州縣於地方竊案更應上緊緝拏務獲嚴辦乃該縣蘇登萊任意延玩並未緝報不可不嚴加懲儆蘇登萊著革職拏問俟所報一切竊案拏獲完結後再解交刑部治罪以為海疆重地知縣不實力緝捕者戒餘著該部議奏○諭軍機大

臣曰伍拉納等奏奏玩竊匪報之晉江縣知縣蘇登萊請旨革職一摺已明降諭旨將蘇登萊革職拏問俟獲犯後再解交刑部治罪矣聞省文武疲玩種種廢弛即如晉江縣既有竊案該令蘇登萊非惟不知上緊緝拏轉爾玩匿不報於此已可概見自不可不從重辦理大加懲創此總由富勒渾雅德在彼一味因循漫無查察所致伊二人已發往伊犁効力贖罪以示懲儆但徐嗣曾本係該省藩司陞任巡撫伍拉納亦久任該省藩司從前在彼一切未能整頓咎本難辭豈得覲顏竟若置身局外况該省遲延未結之案不下百餘此等事件該督撫常由驛奏事即應附驛速奏何以僅文摺差齎遞殊屬失之遲緩伍拉納徐嗣曾俱著傳旨嚴行申飭該督撫均係獲咎之人經朕格外施恩不究其既往仍加擢用嗣後務當倍加感愧實力整飭以除積習而贖前愆若因現在已辦出數案即可

為站脚地步。而於前此之種種廢弛俱歸罪於富勒渾雅德二人。伊等又復因循玩愒不肯認真辦理。將來粵省無事一二年後。朕仍令福康安前往該省稽查一切。若查出閩省地方尚無起色。甚至仍有如從前文武玩弛之事。則富勒渾雅德即屬伍拉納徐嗣曾前車之鑒。或再加重。皆不可知。恐伊二人不能當此重戾也。又本日據羅英奏疊次拏獲洋盜解交地方官審辦。一摺。羅英奏昨因兵船被盜。捏報遭風。經伍拉納奏。已降旨將該員革職。拏問。伊既任聽屬員飾詞捏報。豈肯轉將實在情形奏出。著將原摺發交伍拉納等閱看。並提集案證。秉公嚴審。一併定擬具奏。○癸酉。諭戶部議覆長蘆鹽政穆騰額奏。東商本年應徵緩帶課銀。懇請展限一摺。該部照例議駁。並聲請可否准其展限帶完。恭候欽定等語。商人輸納引課。自應按限完交。以清款項。不得藉詞延宕。但念該省商課

前因歲歉滯銷。業經分年緩帶。今若將正雜課帑同時新舊並徵。商力仍未免拮据。所有四十八年起至五十二年止。本年應交帶徵課項銀二十萬三千六百三十餘兩。並五十二年應交引課銀一十七萬六千八百五十餘兩。著加恩於五十五年秋後起徵。分限三年帶完。俾商力益資寬裕。以示朕格外軫恤至意。○諭軍機大臣曰。陳用敷奏請展限查繳禁書摺內。據稱現在各屬繳到書籍為數無多。似已蒐羅殆盡。惟續查出之休園省錄等書。飭行未久。恐窮鄉僻壤或未周知。不敢以年限已滿遽停查辦。請展限一年。再加逐細訪查等語。江浙遠邇各書。節經該督撫等查出解京銷燬。並屢行展限。飭令地方官查辦。現雖據奏繳到書籍為數無多。然亦未必竟至蒐羅淨盡。或地方官日久生懈。並不實力訪查。亦未可定。況江蘇省續行查出休園省錄等書。現在查禁未久。僻遠處所或未及

周知呈繳。自應寬為查辦。江浙為人文之藪。書籍繁多。地方官祇須將應繳之書。查銷淨盡。原可毋庸定以限期。著傳諭書麟閣。鶚元陳用敷。何裕。城琅玕等。務宜嚴飭所屬。隨處留心查訪。如有應行查禁各書。即迅速飭繳銷燬。不使稍有留遺。斷不可稍存懈怠。拘泥期限。徒為虛應故事。並著將現在曾否有續行查出之書。即行分晰具奏。○福建巡撫徐嗣曾奏。琉球國番民平良等十六人。乾隆五十三年十月。裝載棉花。至中山王府交納。回至大洋。遭風破船。其十人不知去向。平良等六人得生。經臺灣府委員護送抵省。照例安插撫卹。報聞。○甲戌。

內閣學士。仍留內務府護軍統領。以觀後效。○諭軍機大臣等。步軍統領衙門奏湖南沅陵縣民人李茂才呈控該縣銀匠周岐山等串通櫃書。設立銀匠頭目。多收正耗銀兩等情。一摺。細閱李茂才所控情節。係周岐山等於四十六年起。串通該縣櫃書。設立銀匠頭目。於正賦加耗之外。每兩多索銀一錢九分。李茂才之子李山柏等於五十年在巡撫衙門控告。經浦霖批交辰州府審訊。該府並未審明。即行具詳。又經浦霖另委辰沅道審明。實係周岐山等串通多索。將周岐山責革。發示禁止。該縣並不將告示張貼。周岐山等遂得改名復充。仍照從前多收各省徵收地丁錢糧。正耗俱有定額。豈容巧立名目。設法多收此案。先經李山柏等在巡撫衙門控告。經該撫批府審訊。該府並不審明。即行具詳。顯屬袒庇。迨該撫另委道員審明。周岐山等串通多索屬實。即當徹底根究。將該府縣一併

從嚴叅辦。何得僅將周岐山等責革。並出示禁止。率爾完結。後遂不復問。浦霖不應至此。湖南通省縣分較多。而沅陵距省已遠。浦霖於該縣或不致有心徇縱。此必係袒庇。知府因而意存迴護。將就完案。現據李茂才將所發告示呈出。控告若所控屬實。不特該府縣有應得之罪。即浦霖庇屬不辨。亦難寬宥。此事關係甚大。京中現無可派之人。阿桂在荆州審案。距湖南不遠。著即將李茂才一犯解交阿桂就近提集犯證。前至荆州。詳細秉公研審。務得確情。定擬具奏。如浦霖有袒徇情節。亦即據實叅奏。勿稍迴護。○乙亥

上詣

大高殿

壽皇殿行禮。○以編修馮集梧為雲南鄉試正考官。檢討劉錫五為副考官。戶部員外郎薩彬圖為貴州鄉試正考官。兵部郎中王鋁為副考官。○丙子

上御太和殿視朝。文武陞轉各官謝恩。○辛酉。明園。○諭軍機大臣等。據勒保奏。審明李生貴等向客民宋世烈買大黃一千三百七十餘觔。運至喀什噶爾。將李生貴從重照竊盜贓例。定擬絞候。又回子玉素普在阿克蘇地方私賣大黃二千一百六十觔。共得普兒錢三十四千五百餘文。將玉素普亦照竊盜贓例。定擬絞候。又另案販賣大黃回子邁瑪第敏。俟解到另結等語。細閱摺內聲敘情節。各案頭緒牽混。殊未明晰。不盡其情。任其飾供。並未盡心嚴問。必須確加研究。方足以成信。著傳諭勒保。即將李生貴、玉素普等二案派委妥員解京。毋致脫逃。交軍機大學會同刑部另行質訊。定擬具奏。其未到之邁瑪第敏一案。俟解到蘭州。亦即解京。歸案審辦。至該督另片奏稱。俄羅斯迤北。即係北海。由大洋可通廣東。請勅下沿海廣東各省一體禁止出洋等語。俄羅斯有海道可通。朕已早經

慮及屢次傳諭沿海各該督撫嚴行飭禁。以杜透漏。若待勒保陳奏。始行查辦防範。豈不遲誤耶。將此諭令知之。○丁丑。諭曰。阿桂現在出差。朕啟鑒後所有留京事務。著常青暫行代辦。緯克托現經患病。給假。其吏部事務。亦著常青暫署。戶部印務。著金簡署理。其兵部印鑰。阿桂未回京以前。著阿揚阿暫行帶管。步軍統領印務。著綿恩署理。○諭軍機大臣等。前召見永昌府知府宣世濤。據奏緬甸貢使入覲回國。因天朝恩待優渥。極為感激。並據孟矣面稟。宣世濤該國欲於明年敬遣使臣虔請封號。孟矣前往永昌三載。畧通內地語言。且識數字。所言似非無據等語。宣世濤素在永昌。與孟矣認識。今所聞緬甸乞封之語。得之孟矣面稟。自屬有因。富綱等諒必亦知此事。何以並未奏及。至賀長庚係伴送緬甸貢使之。人。其請封一事。如於來京途次。即有所聞。早應於召見時面為陳奏。若該貢

使回國時始行告知。亦應附摺奏聞。乃本日該臬司奏請。陛見摺內並未一語提及。即該貢使回國如何感激情形。亦未詳悉聲敘。殊屬不曉事體。賀長庚著傳旨申飭。並著傳詢富綱。譚尚忠。是否知有緬甸請封信息。仍詢問賀長庚於伴送貢使時沿途曾否告知。此語即行據實具奏。如果明歲該國遣使到關。籲請封號。自是好事。即一面將其陪臣送京。一面由驛奏聞。不可拘泥飭駁。致阻遠人向化之心也。至賀長庚甫經自京回滇。未及一載。所有奏請陛見之處。竟可不。必。將此傳諭富綱等。並諭賀長庚知之。○戊寅。旌表守正捐軀陝西藍田縣民劉成賓妻賀氏。○己卯。孝恭仁皇后忌辰。遣官祭景陵。○諭軍機大臣等。朕思阮光顯等此次進表乞降之後。既趕回黎城。告知阮惠。該國臣民共生歡幸。一面令阮有暉等齎送謝儀。詞令禮文較前倍加恭謹。看其感激畏服。竟屬

出於至誠。阮光顯所稟阮惠進京瞻觀之處。定非虛語。明年如果阮惠親自來京。即當特降恩綸。加封王爵。優予賞賜。著福康安再行剴切檄諭阮惠。以明年恭遇大皇帝八旬萬壽。果能自行詣闕抒誠。大皇帝必當格外加恩。予以王爵。渥受寵錫。爾之子孫。亦可世守安南。永備藩服。如此明切諭知。自不致更生疑慮。計此時阮光顯應已自黎城回至諒山。候信福康安接奉前旨後。自必諭知該目。即令湯雄業帶同起程。於經過桂林時。與黎維祁相見。並應先期令黎維祁薙髮。改用天朝服色。使阮光顯親見其業經薙髮。服色已改。斷無回國之理。既可釋其疑畏。而該夷目於七月二十外行抵熱河。正值蒙古諸王公台吉俱來朝覲。俾得同邀宴賚之榮。將來回國時。向阮惠一一述及。益可見天朝如此曲賜優容。渥加恩待。阮惠自必堅心欣戴。踴躍來朝。至所奏夷目潘德啟阮廷沛等。業已令其

薙髮。自應如此辦理。但何以又未想到黎維祁令其一併薙髮。朕早經降旨諭及福康安。務當於阮光顯未到桂林之前。先行遵辦。為要。○命大學士和珅吏部尚書彭元瑞教習庶吉士。○辛巳。上還宮。○是日起。上以夏至祭地於方澤。齋戒三日。○壬午。諭曰。伍拉納奏據總兵羅英笈等稟。叅革守備徐璋病故。呈繳委劄前來。當即飛飭興泉永道胡世銓等。詳細確驗。嗣據該道等驗明。徐璋實係生前服毒身死。現將派委看守之署守備李文斌收禁。並將羅英笈摘印看守等語。徐璋前於兵船被劫。捏報遭風。叅革候審。既經派委李文斌看守。何以並不小心防範。任其畏罪自盡。乃羅英笈呈繳劄付時。尚以徐璋病故具報。尤屬疎玩。除總兵羅英笈前已降旨革職。拏問外。

其署右營守備李文斌著即革職拏問交該督等一併嚴審定擬具奏。○諭軍機大臣曰伍拉納奏行抵太平途次接據羅英笈等稟報叅革守備徐璋於四月二十日病故呈繳委劄前來隨飛飭興泉永道胡世銓詳細確驗據該道等驗明徐璋係服毒身死查徐璋前經提臣揭叅後即派委署守備李文斌看守何至任其畏罪自盡現將李文斌收禁並將羅英笈委員看守一面提同案犯迅速嚴究從重辦理等語徐璋前因兵船失盜捏報遭風叅革應審之人既經委員看守等候審訊何以並不小心防範竟任其畏罪服毒身斃豈有此理乃羅英笈呈繳劄付時尚以徐璋病故具報羅英笈前已降旨革職拏問今觀其諸事玩誤至此實屬罪所應得而閩省營伍地方種種廢弛益於此可見屢經諭令該督撫實力整頓著再傳諭伍拉納徐嗣曾務宜遵照節次諭旨隨時留心遇事認真嚴

辦毋得苟且塞責久而生懈至羅英笈如何扶同稟報及李文斌如何看守疎懈有無情弊之處著伍拉納嚴審速奏其案內未獲各盜犯仍飛飭各文武上緊緝獲歸案辦理勿任一名漏網將此由五百里傳諭知之○癸未諭據伍拉納奏接准署浙江提督伊里布咨稱據寧海營叅將愛新泰呈報四月初二日有葉加玉等漁船三隻停泊健跳關口海面忽聞礮聲有盜船七隻趨攏圍劫各用刀斧器械上船將漁船人等拒傷并將船上人網縛擲水殺斃多命經事主葉加玉等赴汛呈報署健跳汛守備姜起榮並不收辦請將姜起榮革職拏問就近交琅玕審擬叅將愛新泰革職留該處緝拏正盜黃巖鎮總兵劉文敏交部嚴加議處等語海洋盜匪最為地方之害營汛各員自當隨時加意巡緝乃平日既不認真緝捕致有兇盜劫殺多命之案及事主赴汛呈報猶不即時轉報追捕實屬

廢弛已極。情殊可惡。署守備姜起榮著卽革職。拏問。交琅玕嚴審定擬具奏。至叅將愛新泰。有管轄洋汛之責。且該叅將係屬旗員。朕用於綠營。原望其整頓一切地方營伍。加意認真查辦。今多有染綠營惡習。亦一味因循。致所轄汛內免盜。刦殺三船。非尋常疎玩可比。雖此案由該叅將呈明。安知非經署提督等飭查。勢難隱匿。始行揭報。愛新泰亦著革職。拏問。總兵劉文敏。於該管洋面有此等刦殺重案。其平時懈於督緝。已可概見。劉文敏著一併革職。拏問。以示懲儆。俱著交與該撫嚴切審訊。有無隱諱。玩縱情弊。即行具奏。其餘疎防文武各員。伍拉納遠在廈門。並著琅玕查明。嚴行叅奏。所有此案首夥各盜。務卽飭屬上緊查拏。毋致一名漏網。○又諭浙江各營。除撫標外。俱聽總督節制。向不歸巡撫管轄。此雖舊例。但浙省距閩省道里遼遠。各標營所管營汛地方。山海交錯。在在均關緊

要。遇有海洋免盜刦殺案件。必待遠赴閩省呈報總督。始行辦理。往返實屬稽遲。而本省巡撫。又以營務非其管轄。明稱不越俎。而實意存推諉。並不督率稽查。於營伍地方均有關係。現據伍拉納奏報。寧海營健跳關口海面洋盜。刦殺多命一案。事主赴汛呈報。守備姜起榮並不立時收辦。玩弛已極。琅玕係該省巡撫。於此等重案。豈無見聞。乃署提督伊里布。咨報伍拉納。該督已自廈門奏到。而琅玕近在閩省。轉未奏及。殊屬非是。除另旨嚴飭外。嗣後浙江各營。均令巡撫就近兼理。一切營務尋常事件。仍與總督會同。秉公商辦。如遇此等緊要事件。卽一面辦理。專摺奏聞。一面再行札會總督。庶營制更有責成。而要案亦不致稽遲矣。○又諭浙江提督觀成。現在署理四川提督事務。到任尚須時日。其浙江提督。現係伊里布署理。但浙江現有海洋盜刦各案。正資提督整飭辦理。伊里布係新

任總兵署理提督。究恐難資整頓。陳杰著調補浙江提督。即行速赴新任。不必來京請訓。所有江南提督員缺。即著觀成調補。觀成現在四川。其未到任以前。著王柄署理。○又諭曰。傳玉曾任將軍。年久。所有內大臣缺。著傳玉補授。仍令署理。正白旗蒙古鑲白旗漢軍旗務。○諭軍機大臣等。據伍拉納奏。准署浙江提督伊里布咨稱。寧海營參將愛新泰呈報。健跳關口海面盜船殺斃多命。經事主葉加玉等呈報。署守備姜起榮並不收辦轉報。請將該署守備革職。等因。就近交琅玕審擬等語。業經明降諭旨。將姜起榮及該管總兵等一併革職。等因。矣。海洋盜匪。最為地方之害。乃營汛各員。既不認真緝捕。已屬懈玩。及事主赴汛呈報。並不立時收辦。尤為藐法。玩弛。琅玕係該省巡撫。且身係覺羅。尤宜倍加奮勉。諸事加意整飭。乃該省沿海一帶。既有此等兇盜劫殺之案。該撫豈無見聞。乃並未

查明具奏。置若罔聞。一任文武各員規避處分。諱匿不報。可見琅玕平日於地方營伍。並不留心整頓。意存諉卸。即如該撫來京陛見時。屢經召見。所奏不過明年慶祝萬壽及豫備貢品等件。俱係無關緊要之事。而於該省如何緝盜安良等事。並未一語奏及。是琅玕僅知留心小節。於地方事務。全不認真辦理。殊負委任。琅玕著傳旨嚴行申飭。此案署守備姜起榮。因何並不立時收辦轉報。及該總兵參將等有無通同諱飾之處。著該撫一併嚴加究訊。據實具奏。並將此案未獲正夥各犯。飭屬嚴緝務獲。毋使一名漏網。將此由六百里發往。傳諭琅玕。仍令速行審擬具奏。並諭伍拉納知之。○調浙江溫州鎮總兵陳莊為黃巖鎮總兵。以金華協副將韓正國為溫州鎮總兵。○甲申夏至祭

地於
方澤。

上親詣行禮。○幸圓明園。○以伊犁將軍保寧頭等侍衛舒常為內大臣。○乙酉。諭據阿桂等奏。審明江陵縣民人朱如標控告黃義遷等。賄阻要工私築洲境。及官吏扣賑加徵各款。俱係捏詞聳聽。挾嫌誣告。請將朱如標發往伊犁。給兵丁為奴等語。朱如標因索詐未遂。膽敢捏詞赴京妄控。希圖陷害。情殊可惡。向來楚省民情刁悍。好訟者甚多。此風斷不可長。朱如標著即在該處枷號三年。滿日再行照擬發遣。以示懲儆。○又諭。據保寧等奏伊犁地處極邊。與外夷接壤。頂戴花翎官員若再多數員。於一切差委。似覺得力。請於伊犁惠遠城滿營官員內。再行揀選四員。惠寧城滿營官員揀選二員。作為委前鋒參領賞戴花翎等語。著照所請行。○諭軍機大臣等。據畢沅等奏。楚岸銷售淮鹽。總以緝私為務。現在嚴飭州縣將弁。四路堵截。並查歷來私販。四川則由夔州入境。陝西則由漢興入境。

業將通省私鹽蹤跡。備悉偵知。選派叅遊大員。分投南北二省。改裝密緝等語。楚省官引滯銷。總由私鹽充斥。地方官不能實力查拏所致。今既將私鹽經由地方及窩匿處所。詳悉訪聞。該督等自應通飭所屬文武各員。於水陸要隘之處。嚴密躡緝。務使私鹽淨盡。官鹽暢銷。以裨釐務。其四川陝西販往楚省私鹽。一由夔州潛至宜昌。一由漢興潛至鄖襄。著李世傑已延三。嚴飭交界地方各官。查禁偷越。以杜私販之源。至湖南之衡州寶慶兩府。亦為私鹽出入之地。並著浦霖一體查拏。毋任疎玩。如此四路堵截。民間無私可買。官引漸次疏通。鹽法自日有起色。惟在該督撫實力奉行。不得徒以空言塞責也。將此各傳諭知之。○是月。兩江總督書麟奏。江西鄱陽湖口一帶。向無淺阻之事。因上年冬雨較少。本年春水又未長發。鳳凰灘罐子口等處。沙積難行。今四月內連得透雨。河水增長。湖南

漕船尾幫即可前進。臣未能先事豫籌。咎實難辭。得旨。汝不宜如此不留心。其中或有別故乎。○江南河道總督蘭第錫奏。桃源北岸徐昇壩以西。大溜上隄。時虞潰決。該處逼近運河。甚有關係。飭令接做埽壩。足資抵禦。又宿虹南岸蔡家樓汛第三堡溜勢汕隄。亦經鑲埽護住。至睢寧境內之峰山四閘。地高過水無多。銅山境內之天然閘。離河太近。閘下地形低窪。開放過久。不免浸灌民田。前河臣高斌奏明。非遇盛漲。不得輕啟。自應遵辦。惟碭山境內之毛城鋪壩。係碎石砌成。石壩外圍築土壩。兩頭用埽裹護。外灘其西壩頭被水衝缺。石壩東邊長有淤嘴。殊礙宣洩。臣等酌將淤嘴挑除順勢。西土壩照舊用料裹護。以資攔禦。得旨。覽奏俱悉。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百二十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子太傅工部尚書紀錄六次臣曹振鏞等奉

敕修

乾隆五十四年己酉閏五月丙戌朔舉行乾

隆五十三三年奉天府屬官員京察有疾官一

員才力不及官二員分別處分如例○吏部

議准安徽巡撫陳用敷奏鳳陽縣屬蚌埠集

坐落淮河南北水陸交衝必須專員稽察查

有鳳陽縣同城主簿僅管鹽務無地方之責

堪以移駐再六安州屬馬頭汛亦係通津商

民繁夥向無專員查有霍山縣千羅巡檢前

因彼處逼近湖北羅田縣之甕門關是以設

立該關現已另設多雲巡檢千羅一缺請裁

移六安州之馬頭汛從之○丁亥諭凡下嫁

外藩固倫公主例支俸銀一千兩如係在京

居住者即照下嫁八旗之例支給從前和敬

固倫公主雖係在京居住而俸銀數匹仍照

外藩之例支領年久未便裁減是以降旨仍

許照舊關支今和孝固倫公主係朕幼女且

在朕前承歡侍養孝謹有加將來下嫁後所

有應支俸祿亦著一體賞給一千兩以昭平

允而示嘉獎○諭軍機大臣等本日據烏大

經奏請來京陛見又據譚尚忠奏稱俟科場

辦理完竣即行起程進京瞻覲等語滇省地

處邊陲最關緊要雖目下地方無事邊隅寧

謐而督撫提督大員究不可輕離該省即同

時奏請陛見亦須留一人在彼一人來京著

傳諭富綱等公同商酌現在譚尚忠尚有承

辦秋審奏銷案件本年文武鄉試又須次第

舉行自應暫緩起程先令烏大經來京陛見

計烏大經自京回滇譚尚忠應辦諸事俱已

完竣即可於十月內武闈事竣後起程進京也。將此各諭令知之。○軍機大臣議覆烏魯木齊都統尚安奏鐵廠之設原以濟屯田農具之用。舊例於遣犯內擇年力精壯者二百名。以一百五十人挖鐵五十名種地。供挖鐵人犯口糧。至一切雜費。於遣犯內酌募有力者。每年捐貲三十兩。以供廠費。定以年限與挖鐵種地各犯一體咨部。分別為民回籍。惟是開廠之初。捐貲人犯約有百餘人。或七八十人。每年除用外。尚有贏餘。至四十八年後。其能捐銀者僅十餘人。或七八人不等。不敷所用。嗣後請不必拘定三十兩之數。或二十兩。或十餘兩。俱准其呈報。並揀派効力廢員一。公明白勤慎者。令專管廠務二年。所有遣犯捐貲不敷。責令該員捐墊。如辦理妥協。年滿時將其出力之處具奏。請旨等語。臣等公酌遣犯捐貲或二十兩。或十餘兩之處。必須酌定章程。以示區別。其三十兩者。仍照向例。

年限外。其二十兩。十餘兩者。量加年限。方為平允。仍交該都統酌議具奏。至所稱於効力廢員中揀派一人管廠二年。後具奏請旨。應如所奏行。從之。○戊子。諭刑部奏德州營叅將圖他布呈報伊姪昆英。自京逃至任所。奏明解部審辦。請將昆英發往黑龍江當差。一摺。昆英係旗人正身。不知自愛。乃因伊叔薩克達布責打。即行逃走。在京城內外。逐日短雇當閑。二年有餘。又復逃至山東。實屬下賤。不顧顏面。昆英著銷去旗檔。發往配所。該犯習於下流。到該處後。即可聽其自便。亦不值復令當差。反得養贍。嗣後刑部遇有此等案件。即照此辦理。○又諭。據奎林等奏。審擬刑逼良民為匪之縣丞史映綵。一摺。內稱。詢明所誣匪犯簡武。李廉二名。實無為匪情事。因被李安喜挾嫌控告。差拏到案。該縣丞因循拖延。發交原差張璉。莊茂管押。簡武等並無銀錢送給。該差因將簡武等用竹棍撐開兩

手繩吊屋樑。連夜疊加拷打。以致簡武等誣認從逆為匪。請將張璉、莊茂發往烏魯木齊給種地。兵丁為奴。在臺灣枷號半年。滿日發遣等語。張璉、莊茂因本官發交管押之人。恣意需索。已屬不法。復敢於嚴禁班館之時。將簡武等濫行疊加吊拷。以致畏刑誣服。拖累良民。情殊可惡。臺灣民刁俗悍。若僅如內地案件照定例辦理。不足以儆刁惡而安善良。張璉、莊茂著交該地方官。在臺灣照樣吊拷一月。然後枷號半年。滿日再行依擬發遣。○諭軍機大臣等。前據勒保奏將私販大黃之李生貴等及私販大黃之回子玉素普審明定擬絞候一摺。因摺內聲叙各案頭緒牽混。業經降旨傳諭勒保即將各犯派員解京交軍機大臣會同刑部另行質訊。定擬具奏。其未解到蘭州之邁瑪第敏一案。亦令解京歸案審辦矣。本日又據勒保奏審明郭相泰圖得重價起意販運至二千七百餘觔。定擬從

重發極邊烟瘴充軍。韓天英、孫邦怡販賣大黃得有價銀。王士元、柴常、李克明聽從夥販。均定擬杖徒等語。辦理仍未明晰。此等私販總以設法牟利。交通外國為其正名。重罪何得心存姑息。謬引內地尋常愚民之例所辦。甚不是矣。所有此案人犯郭相泰等亦著勒保派委妥員解京交軍機大臣會同刑部歸案嚴訊。定擬具奏。將此諭令知之。○己丑四川總督李世傑疏報乾隆五十三年綿州首壩地五十八畝有奇。○庚寅上以秋獵木蘭自圓明園啟鑾。○諭朕此次巡幸木蘭駐蹕熱河所有沿途經過地方本年應徵地丁錢糧著加恩蠲免十分之三。○又諭朕於本日啟鑾適值陰雨由清河至南石槽一帶墊道兵夫甚屬奮勉著該督查明每名各賞銀一兩以示體恤。○是日駐蹕南石槽行宮。○辛卯諭奉天所屬廣寧等七城因上年被水成災節經降旨借給口糧蠲賑兼

施並再展賑一月以資接濟茲據宜興等奏本年春夏之間奉天境內雨水復多低窪田地又多被水等語廣寧等縣現在尚有帶徵銀米若照例催徵旗民未免拮据所有該處分年帶徵銀三百七十三兩三錢九分四釐帶徵米三百九十一石六斗五升八勺俱著加恩蠲免以示朕軫念陪都有加無已至意該部即遵諭行○諭軍機大臣曰浦霖奏自五十年十月到任後因淮鹽抵岸甚少民間鹽價日昂川粵私鹽乘機充斥當經查明私販出沒之所不時派委幹員會同地方各官分路嚴查并移會提鎮選派營員協同巡緝密加體訪地方官及派出委員尚無怠惰惟私鹽查禁雖嚴淮鹽轉運不至楚南額銷之引總未能如數運足民間買食維艱等語所奏竟不成話浦霖身任巡撫五十年抵任後既知該省淮鹽抵岸甚少私鹽充斥即應將官鹽墮銷實在情形據實奏聞候朕及早查

辦乃數年以來並無一語奏及直待降旨詢問始以此奏塞責甚屬不合試思民間鹽價日昂私鹽乘機充斥前後措詞已自矛盾私鹽並不納課又無引額其價較之官鹽甚賤既因官鹽不能抵岸乘機充斥小民必向私販買食鹽價自應平減何以摺內反稱鹽價日昂至淮鹽抵岸既少而該撫復派委員升於私鹽充斥地方處處嚴查禁止是湖南一省官鹽私鹽均無從運售民間勢必有食淡之虞即云五十年以前或有積貯官鹽亦已早經銷盡此數年來該處民人又從何處買食豈浦霖目擊民間食淡而漠不關心竟不奏聞設法查辦乎且私鹽既經嚴禁不使絲毫透漏入境官鹽自必暢銷商人利於速銷輓轡沾潤又何所阻礙而不按季轉運行銷摺內似斯詞語支離不一而足此必因現在禁革厘費湖南脫然事外已屬僥倖乃該省地方官因不能分潤仍不肯實力緝私又恐

官鹽仍復逐年積壓。獲咎。浦霖故為此適詞。東牽西扯。總不明晰。浦霖著傳旨嚴行申飭。並著將官鹽因何墮銷。私鹽既經飭禁。何以淮鹽不行運去。以致鹽價反昂。民間何從售買。不致食淡之處。據實明白回奏。至所稱楚南額銷之引。不能如數運足。並著傳諭全德。查明淮鹽應行運往湖南額銷數目。何以任其短少。並不督催配運。如係湖南地方官因不能分受規例。遂敢懈玩。不實力緝私。及有藉端勒掇。任意墮銷情弊。即據實指參。毋得稍有迴護。並將湖南省運到官鹽。既不能足額。是否因私販充斥。民間不致食淡之處。一併查訪具奏。將此傳諭浦霖。並諭全德知之。尋全德奏。詢據各商僉稱。近接漢口來信。閏五月以來。督撫查緝私鹽甚嚴。鹽引得以暢銷。臣現鼓勵各商。倍加趕運。務使岸鹽充裕。以供楚商販運。得旨。好勉為之。浦霖奏。現在督飭屬員。嚴緝私販。兩月以來。據麻陽湘潭

衡陽等縣報獲私鹽三起。從嚴辦理。并諄飭員弁留心偵拏。以拏獲私鹽之多寡。分別獎勵。冀收實效。並出示曉諭。廣招水販。俾踴躍轉運。以利疏銷。得旨。以實為之母。為一奏了事。又諭據琅玕奏。寧海縣所屬內洋地方。三船同時被劫。殺傷事主。請將疎防不職之知縣張鑄革職一摺。又據奏護溫州鎮李定國出洋會哨。藉稱風大難行。並不親到沙角山洋面把總柯得成。奉委查察通行扶捏。請將李定國革職。飛咨督臣將柯得成擊解來浙。一併嚴審定擬。一摺。浙省水師各鎮。每年定期會哨。責任綦重。乃李定國捏詞規避。有意不前。琅玕即應早行參奏。何以直待朕降旨詢問。始行奏請。革審至海洋盜匪最為地方之害。前據伍拉納奏。葉加玉等漁船三隻在海面被劫。殺斃多命。一案該撫置若罔聞。並未查明具奏。業經傳旨嚴行申飭。今始據琅玕奏到。殊屬遲延。可見該撫於地方事務。

全不認真辦理。又以營伍為總督專轄。遂爾意存推諉。至此二案。皆係顧學潮護理撫篆時之事。此等緊要事件。顧學潮既護撫篆。亦應據實陳奏。乃復存劣幕惡習。因巡撫不久回任。可以交代。即置之不辦。實屬非是。但以琅玕身任封圻。尚不知加意整頓。徒事推卸。則顧學潮之存五日京兆之見。互相推諉。更不足責矣。琅玕顧學潮俱著傳旨嚴行申飭。嗣後該撫等務宜痛改前非。益加奮勉。遇事留心整頓。方為無負任使也。○是日駐蹕密雲縣行宮。○壬辰諭軍機大臣等。昨在密雲途次。有叩閭之四川夔州府太平縣民人馬攀鳳一名。當交軍機大臣審訊。據該犯供現住達州。伊父名馬晏清。平日種地。並訓蒙度日。本年三月初六日。由達州起身。帶同馬攀鳳進京。要獻策論。四月間行至柏鄉縣地方。患病。將所寫策論。叫馬攀鳳來京叩閭。策內所說各條。伊父並未向其說明。即地方官創

造非刑等條。該犯亦不能指出。是何州縣等語。細閱馬晏清所寫策論。語多頌揚。惟指斥地方官吏及親丁幕友虐詐之弊。且有封疆大臣作弊之語。雖無違悖字句。看來此人必屬狡猾之徒。其意以為歸美於上。自不治其越詐之罪。或且可得便宜。而伊平日所怨之官吏等。因此查究。獲咎。又得以洩伊私忿。至該犯所開各條。雖明指州縣人等。而言外隱躍其詞。亦未嘗不議及封疆封疆非督撫而何。李世傑在總督中聲名尚好。自不至有縱容所屬虐詐情事。但州縣人數眾多。妍媸不一。或竟有如該犯所指欺凌暴戾舞弊營私之處。亦未可定。李世傑係該省總督。察吏是其專責。此時惟當秉公查察。不必迴護。但查出後。宜作為訪聞。參奏辦理。不可以馬晏清赴京呈訴。因而辭出。致啟告訐刁風。所有馬晏清獻出策論。暨連枷木籠圖。著照樣鈔錄。繪畫一分。寄與李世傑閱看。該督即一面照

此訪查並一面派員赴該犯原籍家中搜看有無不法字跡一併速行奏聞再該犯現在柏鄉患病已就近傳知劉裁飛飭拏解熱河審訊治罪將此諭令李世傑知之○又諭據徐嗣曾奏報通省連得透雨一摺內稱省城自四月十四五等日得雨之後於五月初五六七等日連獲甘霖各府州屬亦俱先後霑足即前經缺雨之漳泉等郡亦幸得透雨早禾雜糧尚可佈種等語閩省漳泉二府屬於四月初旬望雨甚殷朕亦深為厪念茲據該撫奏報通省均獲優霑漳泉亦已得雨早稻收成尚可不致過歉覽奏欣慰但思漳泉二屬甫經兵差之後今春又復得雨較遲麥收未能豐稔現屆青黃不接之時恐民食不無拮据著傳諭該撫即速察勘情形如有應須調劑接濟之處據實具奏候朕酌量加恩務期閭閻生計有資不致失所以副朕惠愛黎元之至意將此由六百里諭令知之○又諭

據徐嗣曾奏拏獲糾眾械鬪殺傷多命之謝志等各案犯從重定擬一摺已批交軍機大臣會同法司覈擬速奏矣閩省洋面盜劫頻聞地方械鬪成風情殊可惡自當嚴加懲治以儆兇暴而靖海疆又另片稱總兵丁朝雄巡洋至圯澳地方生擒盜犯林翦舵等九名起獲礮位器械與羅源營等處遺失之件多有相符等語前因福康安奏羅源營等處有遺失礮位之事又據伍拉納奏兵船失盜捏報遭風將羅英笈革職拏問並飭嚴緝未獲盜犯今丁朝雄緝獲洋盜起出礮位器械與羅源營等處遺失之件相符自係此案正犯無疑而行劫兵船各盜犯亦可從此根究盡數查拏無使一名漏網其捏報弁兵將來審明後即或不至問擬死罪亦當發遣新疆以示懲儆至該撫摺尾聲明將應辦事件與督臣面商料理即起程陛見等語伍拉納雖任閩省藩司但甫任總督辦理一切恐未能熟

練且沿海一帶或有審辦事件總督公出省城亦不可無大員料理著傳諭徐嗣曾此時竟不必來京陛見在彼與伍拉納悉心商辦加意整頓俟明年秋間再行來京瞻覲未為遲也○是日駐蹕要亭行宮○癸巳諭此次熱河接駕之滿洲兵丁及熱河滿洲兵丁並看守避暑山莊之千總兵丁等俱著賞給一個月錢糧至看守口外南北路行宮之千總兵丁等俱著賞給半個月錢糧○諭軍機大臣曰毓奇奏銅船過境一摺內稱雲南委員張景熠領運戊申年頭起運京銅餉在東湖石首二縣沉溺未獲銅一十四萬一千八百五十兩等語運京銅餉事關鼓鑄沿途自應小心運送毋使稍有沉溺今雲南運解京銅在東湖石首二縣沉溺銅至一十四萬一千餘兩之多豈不可惜湖廣東湖等處並非有名險灘船隻即偶有碰損何至沉溺如許之多且銅餉沉重落水不患漂失即或少有陷

失亦不應全行沉沒多至數萬此必係運員虧缺銅餉捏稱遭風沉溺或係船戶水手偷竇故將船底鑿漏沉溺銅餉臨時既可得撈摸之費而事後又可私赴該處潛取售賣漁利二者必居一於此著傳諭沿途各督撫嚴飭所屬嗣後遇有銅鉛船隻過境運員申報沉溺者務須嚴密查驗毋任稍有捏飾如查係委員船戶等裝點舞弊即據實奏嚴辦以示懲儆所有此項沉溺銅餉即著湖廣總督等飭屬查明是否實在沉溺抑係委員水手船戶捏報之處據實覆奏勿任狡飾尋湖廣總督畢沅等奏查東湖縣之沾山硃灘實係三峽中著名險灘運員張景熠銅船前在該處陡遇暴風將船碰碎沉銅七萬一千兩又於石首縣之藕池地方因迴溜甚急風狂勢猛兩船對碰壞船一隻沉銅七萬一千兩並無盜賣捏報故為鑿漏及事後潛取等弊但打撈尚未及十分之一據稱現因水漲不

能興工。俟水稍退。即飭上緊撈取。得旨。地方官如不實力。即行叅處。今水退。全勝獲否。○又諭。前據毓奇奏。江西各幫漕船。在該省之鳳凰灘等處。水淺耽遲。業經降旨。將書麟。何裕城。申飭。本日又據毓奇奏。湖南幫船。行次湖北漢口地方。各丁以置備蓬纜。並江行遇風為詞。任意逗遛。脫空十日之久。亦已將押運領運各員。交部議處矣。漕運為天庾所關。自應迅速趨行。銜尾前進。以期如限抵通。起卸。無誤回空。况本年運河水勢充裕。豫東江浙各幫。行走順利。抵壩渡黃各日期。視上年較早。三四十日不等。江西湖廣各船。正應跟幫遄行。俾及早南回。趕符冬兌。冬開定制。乃江西湖南幫船。又有淺滯脫幫之事。浙江尾幫。早於四月二十七日。全入東境。湖北幫船。應跟浙江行走。何以並未據報渡黃。是湖北已屬脫幫。而湖南幫船。竟在漢口耽延十日之久。其遲誤為尤甚。江西受兌水次。即在

鄱陽湖左近。而鳳凰灘。罐子湖等處。相距不過數十里。何至頭幫船隻。於四月十三日始渡湖前進。則其在後各幫。尚未離水次。更屬顯然。似此脫空耽延。是今年江浙各船。雖抵壩較早。又多閏月。而江西湖廣之船。恐仍似每年之抵壩遲延。甚至又須截留守凍。豈不前功盡棄。伊誰之咎。該督撫等。既不督催查辦。而毓奇又曲為迴護。並不嚴查叅辦。僅以一奏塞責。俱不可解。此事若仍交該督撫及總漕辦理。未免始終諱飾。現在通州起卸各事。劉秉恬帶領坐糧廳等足資料理。著派蘇凌阿。會同韓鐸。速行迎赴山東江南一帶。實力嚴催。務令湖廣江西漕船。接續前進。毋任再有脫幫遲緩等事。並將該二省各幫船。究竟因何遲滯。其稟報風水淺阻之處。是否有捏飾情弊。即秉公訪查。據實嚴叅。想蘇凌阿等亦無所用其迴護。若因江西相隔遙遠。訪查鳳凰灘淺滯。及距水次遠近之處。一時不

能得實。不妨酌留韓鑠在彼。督催江廣落後各幫船。蘇凌阿曾任江西道員。熟悉該省道路情形。即速赴江西就近嚴查。據實具奏。不可瞻徇。致負委任。將此傳諭知之。○是日駐蹕兩間房行宮。○甲午諭前因吏部帶領引見各官內。有原任甘肅階州直隸州知州顏培。天一員。係福康安在陝甘總督任內辦理計典。填注才力不及者。觀其年力正屬富強。人亦似去得。與福康安填注之語相反。特將該員發往直隸以同知用。並以福康安不應察屬錯誤。若此降旨詢問。令其據實覆奏。茲據奏稱。該員於進見時。詢以地方事件不能登答。其精神甚覺萎靡。細加察訪。竟是嗜酒廢事。彼時原欲專摺劾參。因其年力正屬富強。一經參革。即廢棄終身。是以於大計疏內填注才力不及等語。各省督撫察吏。是其專責。如果所屬中有嗜酒廢事。貽誤地方之員。即應隨時糾察。何待大計始行辦理。況計典

之設。原為激濁揚清。使人知所懲勸。該督撫於填考時。自應加意斟酌。以期舉措得當。豈可因慮屬員廢棄。轉為姑息調停之計。各省督撫於計典作如此者。往往有之。而福康安受恩深重。則不應出此。朕臨御五十餘年。辦理庶務。無論鉅細。靡不躬親。綜覈即如顏培。天。其平日之嗜酒與否。朕何從知悉。其日朕御出入。賢良門閤。射奏事。九卿等無不目所共覩。詢之伊等。亦僉稱顏培天似非才力不及之人。維時朕若將顏培天照例降調。則似朕未經鑒別。九卿等或竊意因該員係福康安所劾。故曲照所請矣。福康安自知錯誤。若止據實陳覆。朕念其屢經出力。未始不可加恩。免議。今乃以顏培天一經參革。必致終身廢棄。為詞不免意存迴護。轉難寬宥。福康安著交部議處。嗣後各督撫等於大計時。宜秉公察覈。確切填注。毋得意為軒輊。進退失當。朕於諸臣功過賞罰。一秉大公。不存畸重畸

輕之見。若各督撫於激揚鉅典。不知慎重辦理。以致舉劾不公。經朕察出。則咎由自取矣。將此明白宣諭中外知之。○又諭據富綱等奏。滇省通海寧州。河陽江川。河西等五州縣。均於五月十四日連次地震。城垣官署。俱有坍塌。並多倒塌民居。傷斃人口之處。該督自省起程前往查辦等語。此次通海等五州縣同時地震。情形較重。小民倉猝被災。殊堪軫憫。富綱現在親往查勘。先行撫卹。所有震倒房屋。傷斃人口。分別借給銀穀。務須督率各屬。確實妥辦。毋令一夫失所。並著照乾隆二十八年江川等處地震之例。加倍賑給。並將通海等五州縣應納五十四年條公等項一體加恩蠲免。以示朕惠卹災黎有加無已之至意。該部即遵諭行。○又諭據畢沅奏。拏獲襄陽縣邪教姚應彩餘黨。現在嚴行追究。一摺。閱該犯傳教咒內。有十門有道一口傳十人共士一子丹十口合同西江月開弓射箭

到長安等語。措詞實屬悖逆。推其傳習煽惑之意。與造反何異。必須嚴行根究。徹底窮追。不可姑息。亦不可波及無辜。著傳諭畢沅。務將此案研得確情。按律定擬。毋任各犯捏飾。以致或有漏網。至十人共士一子丹一語。或其教內為首之犯。另有李姓。亦未可知。並著該督嚴切訊究。一併查明具奏。○是日駐蹕常山峪行宮。○乙未。諭杜爾伯特親王車凌烏巴什。自投誠以來三十餘載。在御前行走多年。甚屬奮勉。今伊舊病復發。遽聞溘逝。朕心深為憫惻。不覺淚下。著加恩賞銀一千兩。料理喪事。即交保泰。由該處銀庫內撥給。仍派御前侍衛惠倫前往賜奠。聞伊妾懷孕兩月。車凌烏巴什在日。實屬出力。將來必能副朕期望之意。得產一男。承襲王爵。永沐朕之深恩也。○旌表守正被戕河南確山縣民張有道妻張氏。○是日駐蹕喀喇河屯行宮。

丙申

上詣熱河

文廟行禮○諭此次隨駕之校尉一百八名內其常隨之二十四人加恩每名各賞一個月錢糧其回京之八十四名每名各賞給一兩重銀銀一個○是日駐蹕避暑山莊至八月戊辰皆如之○戊戌諭曰伍拉納奏新任福寧鎮總兵劉允桂才具中平難勝總兵之任等語劉允桂著送部引見所有福寧鎮總兵員缺著那蘇圖補授○又諭據善德等奏

稱發往廣州賞給兵丁為奴之回犯馬進祿砍死家長又會同思思子殺死二娃子砍傷陳喜順扎傷鳳德即交協領高明章訊明已將馬進祿凌遲思思子斬決等語此等發遣回犯原應正法因免死發往各省此內兇惡者想亦不少平日如有似此者或該家長或該管官員將軍副都統等即應打死何必姑容致將家長砍死殺傷人命始行正法因循日久倘乘隙將該管大臣官員殺傷殊非事

體從前亦曾降旨善德等平日並未留心著將此通行曉諭嗣後各省發遣回犯內如有平日稍露兇惡情形不遵該家長約束者將軍副都統等即立時打死以示儆戒不可再行縱容姑息致傷人命再此回犯馬進祿等係於何年何事發遣之處善德摺內並未聲明而協領高明章如何拏獲及拏獲時曾否拒捕之處亦未聲明况拏獲此等兇惡回犯之官兵亦當酌量勸賞著交善德逐件查明

分別勸賞具奏如再遇此等案件俱著聲明具奏○諭軍機大臣曰蘭第錫奏河隄文汛堡夫與河兵分堡住守查南河隄頂之上每二三里設夫堡一座派夫二名每六七里或八九里設兵堡一座派兵二名兵堡相隔遙遠未能巡查無遺南河兵數頗多儘可均勻抽派請將黃運各隄於每夫堡中間空檔之處設立兵堡一座計每四里派兵二名為數不多而巡防較為周密似於河務得有實濟

等語。黃運各隄道里綿長。在在皆需兵夫防守。今南河隄頂之上。所設兵夫堡房。遠近不一。而河營兵數尚多。可以均勻抽派。自應酌添兵堡。抽撥駐守。以聯聲息。而裨修防。蘭第錫所辦固是。但此事早當如此籌畫。從前尹繼善。張師載。高斌。高晉。吳嗣爵。暨薩載。李奉翰等。俱久管該省河務。何以均未經議及。再蘭第錫前在東河任內。亦曾似此酌辦。或竟不須增設。著傳諭蘭第錫詳悉聲明覆奏。尋

宣統二年三月

五

奏從前南河各任河臣。未經議添兵堡緣隄頂之上。本有兵堡間段分巡。無需再為講求。至近年新生工段較多。與昔日情形稍異。臣在東河。於四十九年奏請大隄之上。每四里設兵堡一座。派兵二名住守。今調南河。因舊有兵堡。未免遼濶。是以仿照東河。整請添設得旨。好。然當得其實用。毋致虛懈。○已亥。諭據琳寧等奏。發往黑龍江為奴之犯馮順。因將伊家主安柱之母妻子。從弟等砍傷。及

宣統二年三月

五

將伊女傷斃。已將馮順審明。即行凌遲等語。似此免決。發往東三省為奴之犯內。有性氣乖張。不服約束。差遣者。該將軍副都統等。即當交該家主。令其打死。今此等人犯傷害家主。必因該將軍副都統等。令其家主嚴行管束。不可致斃其命。故家主懼罹罪戾。不敢致斃。以致伊等縱性。而家主反受其害。著交東三省將軍副都統等。嗣後發往為奴人犯內。有似此性氣乖張。或不服約束。差遣者。任該家主打死。與家主毫無干涉。著通諭遵行。○以三姓副都統那奇泰。為寧古塔副都統。阿勒楚喀副都統額爾伯克。為三姓副都統。正藍旗蒙古副都統德清阿。為阿勒楚喀副都統。○庚子。諭軍機大臣等。據諾穆親等奏。雲南辦運京銅。每年正加八運。計得餘銅十數萬觔。向給解員領售。現在局中銅觔短少。請將此項餘銅。即留局備用等語。近年以來。京城錢價平賤。於民間甚為便益。今若因局中

銅餉稍短。不准售賣餘銅。使奸商聞知。希圖乘機牟利。必至錢價遽昂。况銅餉為器用所必需。而私銷之弊。雖嚴密查禁。尚所難免。茲復將餘銅不准售賣。則民間無處得銅。私銷勢必日多。且委員等向藉售賣餘銅。從中沾潤。以為回任盤費。若俱留局備用。將來委員等必不肯運帶到京。於途次先行賣去。亦無從查察。試思每年即無沉溺。所剩餘銅亦不過十數萬。歷來准令出售。戶工二局鼓鑄錢文。並未聞因此缺卯。今即添此十數萬之銅。官銅亦未必驟臻充裕。諾穆親等此奏。名為調劑局務起見。而未計及滋弊實多。所謂止知其一。不知其二。斷不可行。著將原摺發還。並傳諭該侍郎等。即不動聲色。妥為辦理。當如無其事者然。即局中短銅之說。亦不可稍有聲張。致啟市僧居奇之漸。將此諭令知之。○以上駟院卿春寧為正藍旗蒙古副都統。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十一

監修總裁官建寧太子太傅文淵閣大學士文淵閣領事內大臣傅森等奉 上諭事件處管理

吏部理藩院事務處黃旗滿洲副都統世襲騎都尉副都統加七級隨帶加一級等當加二級等功紀錄一次及度法

總裁官經筵講官太子太傅文華殿大學士文淵閣領事傅森等奉 上諭事件處管理刑部戶部工部事務

世襲騎都尉副都統加七級隨帶加二級又加二級臣董誥內大臣戶部尚書經筵講官滿洲副都統等功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十四年己酉閏五月辛丑兩廣總督

福康安廣西巡撫孫永清奏臣等謹將前賜

阮光平敕書珍珠手串派員齎至鎮南關二

十五日阮光顯等進關跪聞

敕書叩頭不止稱小邦番目親屬今日捧誦

綸音敬感

聖德

天威俯鑒我叔光平殷懇畏悚微忱宥其前罪

復許投誠格外寵以璽書頒以珍物萬分榮

耀今既奉

大皇帝恩旨准令進京即不敢再行出關當令陪介阮有明等恭捧

敕書恩賞並齎檄諭至諒山遣該處鎮目護送

黎城並親自寫信寄知阮光平諄囑速修謝

表並懇請於明年入京瞻覲察其神色實屬

喜出望外此次護送阮光顯等進京臣等遵

旨令湯雄業總司其事但尚須武職大員一

同照料已派廣西新太協副將德克精額前

往鎮南關照應其南寧至鎮南關一帶夷使

在途行走飭左江鎮總兵普吉保往來照料

查察諭軍機大臣等此事福康安辦理妥協

殊屬可嘉覽奏深為欣悅前已有旨令福康

安俟阮光顯起程赴京阮惠謝表送進具奏

後先回廣東到任並料理各事著再傳諭福

康安即遵照前旨赴此無事之時回署看視

計算阮光顯自行在同至桂林之前再赴粵

西照料出關等事此係朕念福康安辦事出

力是以特加體卹也○壬寅諭自上年辦理

安南軍務以來沿途各驛站馳遞文報尚無貽誤現在阮惠屢次籲請乞降並先遣伊姪阮光顯齎表入覲朕鑒其悃忱俯加允准軍事業經告歲所有驛站遞送文報之文武員弁並著照臺灣之例查明咨部議敘其驛站兵丁亦著照臺灣之例酌量給賞○以編修溫汝适為四川鄉試正考官禮部主事劉若琛為副考官刑部郎中金光悌為廣東鄉試正考官工部主事陳學穎為副考官禮部郎中方維甸為廣西鄉試正考官編修崔景儀為副考官翰林院侍讀陳嗣龍為福建鄉試正考官工部主事劉青照為副考官檢討徐鑑為湖南鄉試正考官檢討鄧再馨為副考官○旌表守正被戕山東濰縣民單行可女單氏○癸卯西藏辦事大臣巴忠等奏前奉諭運送西藏米穀事宜川省至西藏道長路險內地之糧斷難運送查相近西藏東路之公布西路之脅噶爾等處亦有產米之區即

扎什倫布一帶糧食亦屬充盈臣前曾與舒濂鄂輝等商酌擬自打箭鑪口外之裏塘巴塘及察木多拉里以至西藏各臺站凡有糧員處所均應就近採買量為購辦自數百石至一二千石不等建倉存貯並酌定出陳易新之法方為有備無患可省遠道輓運之煩報聞○甲辰諭軍機大臣曰勒保奏錢糧完欠數目一摺朕細閱單內所有未完各數皆係本年特旨蠲免之款此項未完銀糧既經蠲免止當於摺內聲明又何必另繕清單牽混開列再甘省每年所徵銀糧為數無多雖按數徵收尚入不敷出須咨各省協撥以供該處經費之用乃經徵各州縣向多虧欠其意以為積累有年即可邀恩豁免在百姓既可寬其輸納而官吏復得藉以侵漁遂至習以為常不肯認真催繳若云甘省地方瘠薄則從前如西涼西夏俱在彼立國又從何取給朕軫念邊氓如果實遇災荒蠲賑從無靳

惜若收成並不歉薄。豈可一任相沿侵缺。徒飽貪墨私橐。況國家經費有常。似此逐年虧欠。惟恃蠲免。亦復何所底止。著傳諭勒保。務宜留心查察。固不必過事催徵。亦不可聽其影射為要。○又諭曰。尚安等奏。迪化州所屬地方。蝻子萌生。率屬撲滅。一摺。所辦甚好。蝻孽孳生。最為田禾之害。今尚安等一聞稟報。即督率兵夫。分途前往。併力趕捕。乘其甫能跳躍之時。迅速撲滅。俾不致傷損禾苗。自應如此辦理。但仍須嚴飭文武員弁。加意查察。一有蝻孽萌動之處。立即上緊撲捕。不使稍有存留。方為妥善。再迪化州所屬。既有蝻子萌生。則鎮西府屬。及吐魯番。庫爾喀。喇烏蘇等處。境地毗連。亦恐或有延及。尚安等務宜一體留心。豫為防察。毋使潛萌。將此諭令知之。○乙巳。諭曰。巡漕御史和琳奏。湖北幫船行走遲延。查因通幫灑帶臬司李天培。梳木一千八百根。至通交納。每幫各六百根。經和

琳親往驗勘。丈量圍圓。三尺六七寸。至二尺四五寸。長五丈有零。至三丈有零。不等。並詢據運弁稟稱。梳木長大。非架木桐蒿可比。若捆縛船旁。開口金門。不能容納。若掛船尾。則上水打閘。甚屬費力等語。此事大奇。殊出情理之外。各省糧船。向來止准丁舵人等攜帶土宜。每船亦止以一百二十石為度。李天培身為臬司。漕務與伊並無關涉。該員有自用木植。理應自行運解。何得派令糧船分帶。冀省腳價。並透漏關稅。以致漕運遲滯。伊以此圖占便宜。即其購買木植時。恐尚不免有短發。勒派情弊。況臬司既敢以私物派累官船。則督撫藩司。勢必紛紛交帶。而道府以下各官。又相率效尤。有礙於漕政者甚大。不可不從重辦理。以儆其餘。且李天培係屢經獲罪之人。經朕加恩。棄瑕錄用。乃不知感激。自愛。復有貪利誤公之事。尤難寬貸。李天培著革職。發往伊犁効力贖罪。其湖北按察使員

缺著成汝舟補授。和琳親往查明。據實參奏。不稍瞻徇。殊屬可嘉。著交部議敘。其派委查出木植之遊擊周龍章。並無諱飾。亦屬可嘉。著交與李奉翰遇有應陞之缺題補。以示鼓勵。至桅木至一千八百根之多。捆縛船旁。無難一望而知。毓奇身為總漕。有簽盤之責。何以並不查參。即項家達係江南巡漕。於各船行進灰口時。亦不得諉為未見。畢沅惠齡近在本省。該臬司有此勒令官船裝載多木之事。因何不行查禁。參奏其咎均無可逭。畢沅毓奇惠齡項家達均著交部嚴加議處。再本年運河水勢充裕。江浙各幫行走迅速。方冀可符冬兌冬開定制。乃江廣各幫復以阻風水淺為詞。脫幫遲滯。現據和琳查明湖北幫船因米石不齊。免開逾限。則江西湖南幫船遲緩。其弊大抵亦由於此。除湖南署糧道張官五已交部嚴加議處外。其湖北江西糧道亦著該督撫查取職名。交部嚴加議處。以示

懲創。○又諭據長麟奏查辦大黃一摺。內稱東省各州縣鋪戶人等有赴濟寧濟南二處採買大黃者。俱令先赴本州縣呈明起票。注明數目。其河南商人轉發山東販賣時。亦先赴懷慶府起票。無票者均即查拏究治等語。大黃藥料為民間療疾所必需。前因不准與俄羅斯交通貿易。恐奸商私行透漏。是以諭令沿海各省督撫飭屬實力稽查。旋經續降諭旨。不可查辦過當。以致因噎廢食。並令各就地方情形。妥立章程。發給官票。以憑查驗。原恐各處海口地方偷販出洋。轉售俄羅斯。希圖厚利。必須嚴加查禁。至內地各州縣本可任其商販流通。若一概請領官票。始准採買行運。恐地方官辦理不善。非特胥吏藉端勒索。擾累商人。而各州縣不肖官員亦難保無從中染指之弊。以致商販裹足。藥材短缺。於民間多有未便。殊非朕惠愛閭閻之意。嗣後大黃一種。止須於各省沿海口岸及直隸

之山海等關口近邊地方嚴行飭禁毋許絲毫透漏即陝甘兩省亦祇當於嘉峪關榆林等處加意查察其內地省分如臺灣瓊州崇明等處地懸海外仍著各該地方官酌定限制給與官票呈驗以防私販偷漏其餘各州縣均聽其照常販運毋庸發給官票以免紛擾而便民用將此通諭知之○諭軍機大臣等本日閱長麟奏山東省五月分糧價單內所開各府屬高粱黃豆價值較上月稍增等語東省本年雨水調勻麥收豐稔糧價自應平減何以高粱黃豆價值轉覺稍增恐係奸牙市儈知將來糧價必定減落趁此大田未經收穫之前故擡市價暗中漁利以備將來平減地步亦未可定不可不留心查察以杜商賈居奇之弊至東省今歲收成既經豐稔恐穀賤傷農亦當豫為籌備昨據梁肯堂奏豫省各屬二麥豐收乘麥多價賤之時酌買麥石抵補倉穀等語所有東省倉穀應行買

補之處著傳諭長麟乘此時糧價平賤即照豫省所辦酌量動項採買以實倉儲並著該撫嚴飭所屬按照時價公平買補毋任短價勒派致滋弊竇○蠲緩江西省南昌新建進賢鄱陽餘干德興萬年皇子都昌建昌德化德安瑞昌湖口彭澤十五縣乾隆五十三年水災額賦○丙午諭昨因江廣糧船脫幫遲延已降旨將毓奇等及糧道交部嚴加議處矣至本年山東河南江南浙江船隻行走迅速較之上年抵通日期俱可早至數十日不等因由運河水勢充裕而沿途挽運亦屬奮勉上年豫東船隻遲誤曾將該管官員等交部議處則此次抵壩較早之省分亦不可不加之獎勵所有山東河南江南浙江糧道及督運押運各員弁著該督撫等查明各部分別議敘其舵丁人等並著酌量加賞以示朕勸懲並用悉歸公當之至意○丁未旌表守正捐軀直隸雄縣民楊寶妻陳氏浙江德清

縣民莫兆益妻宋氏。○戊申。諭軍機大臣曰。浦霖奏。湖南界連川粵。水陸皆通。私鹽出沒之所。地方不一。如衡州府所屬與郴州桂二州接壤。私販多將粵東紅鹽載出。來陽口及常寧縣。招源河口。至潛溪寺等處。煎成白色。另改小包。充作淮鹽販賣。歷經嚴飭道府督率州縣。於扼要地方。時時偵緝等語。楚省官引滯銷。總由私鹽充斥。地方官不能實力查拏所致。今該撫既稱嚴飭所屬於水陸要隘之處。分投躡緝。自應私鹽淨絕。官引暢銷。何以私販尚敢偷越境內。可見該撫不過徒託空言。仍未實力緝私。以致官鹽尚不能暢銷。著傳諭浦霖督率道府各員。明查暗訪。嚴密偵緝。以期私販絕跡。俾淮鹽到岸之引。隨到隨銷。無虞壅積。不可徒事具文。僅以一奏塞責。至楚南與川省接壤。向聞該省私鹽多從四川一路偷漏入境。而粵東產鹽甚少。在本省銷售尚多。不能充裕。又豈能運入楚南。今浦

霖奏稱粵東紅鹽。從來陽河口。常寧等處。改包販賣。自係粵東沿海一帶。必有煎曬私鹽處所。出沒販運。蓋因承辦官鹽。必須按引納課。而私鹽既不納課。又無引額。奸徒私自煎運。在所不免。故粵東官鹽不足。而私鹽有餘。其弊未必不由於此。著傳諭福康安圖薩布。飭屬於沿海一帶。實力訪拏。毋使奸徒私自煎曬。并粵東紅鹽是否從來陽河口載出之處。一併留心查緝。勿任稍有透漏。以杜楚私。而裕粵課。○又諭。前因在密雲途次。有叩閣之四川民人馬攀鳳。呈遞伊父馬晏清所寫策論內。有地方官創造非刑等條。曾降旨令該督按款訪查。並派員搜看該犯家中。有無不法字跡。一併奏聞矣。茲又經軍機大臣將馬攀鳳審訊。於衣服內搜出字跡一本。內開達州太平縣枉死人命數條。俱有年分姓名。是否確實。無難逐一根查。著將搜出之本。鈔寄該督。即按照該犯所開各款情節。詳悉確

查再字本內所開馬波囚禁矮龍一案據馬攀鳳供稱馬波即伊父馬晏清其五十一年該州縣究因何事將該犯囚入矮龍又因何於五十三年釋放此等案件該州縣自必具文申詳該管道府臬司所司何事豈竟毫無見聞著李世傑即嚴行查究一併據實覆奏毋得稍存迴護至馬晏清一犯現尚未經拿獲恐或潛回四川原籍亦未可定除行文直隸并沿途各省查拏外並著李世傑飭屬在本籍地方嚴密根緝一經就獲即派員解赴行在審明辦理將此傳諭知之○吏部議奏旗員現居外任因親老改補京職者請先令掣簽分派各衙門行走仍照例按班銓選未經得缺以前照常給予公費不食俸再查此等人員向因陵寢各缺係五百里以內仍令一同掣補嗣後請以在京各衙門選補所有外任親老改補京職滿洲蒙古漢軍各員併現任

陵寢官親年七十五歲以上者查明照此辦理從之○旌表守正捐軀直隸雄縣民趙世行妻于氏○己酉吏部尚書管理國子監事務彭元瑞等奏八旗官學生請於查學時驗其年幼多熟經書文理通順者給與雙分錢糧遇有甄汰缺出歸併每學以十名為限以昭鼓勵得旨此項官學生額缺每旗於百名內裁去十名添作出色學生膏火以示勸懲固不為多但於其中挑取十人給與雙分錢糧未免過優嗣後如遇甄汰時百名內陸續裁扣十名挑取多熟經書文理明順者二十名將此十名錢糧分為二十分給予既足以昭鼓勵又可以多育人材較為兩有裨益○庚戌諭前據富綱奏雲南通海等五州縣於五月十四日連次地震親往查辦業降旨令該督確實妥辦照乾隆二十八年江川等處地震之例賑給並將應納條公等項一體蠲免矣茲據查明通海等五州縣城垣官署俱有

坍塌。民居並多倒塌。間有傷斃人口之處。共賑銀九千九十餘兩。需穀一萬九千三百五十餘石。各於本處倉存內動支。如有不敷。照例折銀五錢等語。此次通海等處同時地震。情形較重。小民倉猝被災。殊堪軫憫。若僅每石折給五錢。為數尚少。恐不敷買食。著再施恩。加倍折給銀一兩。所有已經散給者。仍即按數補發。該督撫當不時查察。督同所屬。如數補給。毋任官吏從中稍有剋扣侵漁。務使災民均霑實惠。其坍塌房屋。傷斃人口。仍照二十八年之例。妥為撫卹。該督撫其率屬加意稽查。實力辦理。以副朕惠恤災黎有加無已至意。至各州縣及佐雜等衙署坍塌。例給銀兩。不敷修葺。並著准其加倍借給。展限扣還。以示體卹。該部即遵諭速行。○諭軍機大臣曰。劉綬奏。拏獲行劫多案之兇盜李海等。審明定擬一摺。已批交軍機大臣。會同行在法司。覈擬速奏矣。此案盜犯李海等。膽敢糾

約多人。在多倫諾爾地方。肆行劫掠。實屬目無法紀。口外地方。多係蒙古居住。境壤遼濶。非口內可比。此等疊行搶劫之案。在內地已不應有其事。今口外亦似此盜劫頻聞。蒙古人民。皆難安處。更屬不成事體。著傳諭劉綬。務嚴飭該道府等。督率各廳。隨時留心實力嚴緝。務令奸宄斂跡。以靖口外地方。此次首夥各犯。業經拏獲。府道等姑免議處。若將來不知認真督緝。復有此等肆劫之案。朕必將該管道府州縣。一併嚴議。決不寬貸。除就近令軍機大臣。傳知熱河道府外。並著劉綬傳知口北一體遵照。其逸盜孫二。仍著嚴緝。務獲。毋任遠颺漏網。再此等在口外行劫重犯。自應即在犯事地方。正法示眾。方足使人知所儆畏。今因招解到省。留彼監禁。此時自不必再行解回。致有疎脫等事。而劉綬摺內。未將人犯現在何處。聲敘明晰。殊屬疎漏。將此諭令知之。○辛亥。諭軍機大臣等。前因召見

永昌府知府宣世濤據稱緬甸孟養曾經稟稱該國欲於明年敬遣使臣虔請封號當即降旨傳諭富綱等是否知有緬甸請封信息並詢問賀長庚於伴送緬甸貢使時該使曾否於途間告知此語令該督等據實具奏此旨於五月二十一日發往迄今已逾一月尚未據該督等查明覆奏緬甸如果於明歲遣使到關籲請封號自是好事該督等是否知有封號信息從前因何未經具奏及詢問賀長庚該貢使有無告知此事之處即應詳晰奏聞以慰厯注將此由六百里發往著再傳諭富綱等即遵前降諭旨迅速由驛馳奏不必俟宣世濤到滇傳聞致稽時日又此時若有緬使亦即照上年例速行送京不必候旨○予安南陣亡廣西提督贈壯烈伯許世亨謚昭毅廣西左江鎮總兵尚維畧謚直烈閩粵南澳鎮總兵張朝龍謚壯果並祭葬如例入祀昭忠祠○癸丑諭前因和琳奏李天

培私派湖北幫船帶運桅木一千八百根以致漕運遲滯已降旨將李天培革職發往伊犁矣本日又據蘇凌阿等奏訊據湖南三幫弁丁等供稱該省幫船於三月初一二日行抵漢口至二十七八等日始得領到運費又奉本道諭代湖北臬司帶桅木一百五十根遲至四月初三四日方自漢口開行等語李天培身為臬司大員且係屢經獲罪經朕棄瑕錄用之人竟敢牟利誤公派令官船私帶木植至一千八百根之多其負恩作弊已出情理之外乃於湖南各幫船復灑帶桅木一百五十根致該省漕船又羈延八九日似此輾轉灑派貪多無厭罔顧漕運遲延其罪甚大僅予發往伊犁不足蔽辜且伊何由積有多貲購此木植作何使用均應逐一根究李天培著革職拏問交與阿桂會同畢沅惠齡嚴行審訊定擬具奏再據蘇凌阿等奏稱湖廣二省漕船脫幫始因州縣運米稽遲岳州

衛守備發費不早。該湖北調任糧道王均。湖南署糧道張官五。辦理不善。捏報顛預。繼為李天培分帶木植。以致稽遲。時日等語。除張官五業經有旨嚴加議處外。王均亦著一併交部嚴加議處。其運米稽遲之各州縣。並發費不早之衛守備。並著阿桂等查明參奏。○甲寅。予故直隸馬蘭鎮總兵加提督銜李奉堯祭葬如例。謚慎簡。○旌表守正被戕安徽宣城縣民楊武盛妻高氏。○是月。江南河道總督蘭第錫奏。閏五月內。黃河水陸續加長。新舊埽壩。各有平墊。並令鑲辦堅實。現在水漸稍落。至洪澤湖內。自拆展清口各壩後。湖水暢出。江西尾幫。現已過竣。應開中河之鉗口壩。宣引清水。洩入鹽河。並用料盤窰壩頭。以便啟放。惟是現在額設浚柳船。不敷所用。查上年徵瑞捐造撥船三百號。為撥糧運料之用。今糧船過竣。無須起撥。臣分配船兵。分領此項撥船。押赴左營蕩內。並催浚柳各船。

平錄卷三十五

九

運完右營之料。一體轉運左營料物。得旨。諸凡皆妥。欣慰覽之。○雲貴總督富綱。雲南巡撫譚尚忠。奏。前奉旨賞回緬甸獵夷六名。內有內地隴川土司夷人二名。當發該土司領回。其孟五等四名。係阿瓦蠻。暮擺夷。隨交騰越鎮總兵劉之仁。知州屠述濂。令其行知老官屯頭目。遣人到關請領。昨據該鎮州稟稱。老官屯大頭目渺蘊來信云。去歲我國細哈覺控等。到天朝進貢。蒙大皇帝重賞。遣回。回到木邦。遣人先行報信。我國王子不勝感激。及細哈覺控到阿瓦時。王子迎出三站。接進城中。舉國臣民。莫不感激天朝。今又遣回孟五等四人。愈加感悅。已差人稟報王子。俟王子信到。即差人到鐵壁關請領等語。看其如此慎重。將來遣人到關。必別有懇求之事。臣等現委蒙化同知朱錦昌。馳赴騰越。會同該鎮。俟渺蘊差人到關。將孟五

平錄卷三十五

十

等四人令其領回並密飭朱錦昌察看目
情形如彼國有差使請封口氣即作朱錦昌
已意以

大皇帝施恩准令爾國納款內附今復賞還留
人皆因爾國長誠心向化所致明年係

大皇帝八旬萬壽爾國長果虔誠遣使前來督
撫大臣必為代奏

大皇帝亦必格外加恩如此曉諭來人令其歸
告渺蘊轉達該國長俾孟隕聞知益堅向化

之心得旨嘉獎

實錄卷一三五五

主

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十一

實錄卷一三五五

主

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹將

總裁官經筵講官太子太傅文華殿大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級尋常加一級尋常加二級軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將等奉

敕修

乾隆五十四年乙酉六月乙卯朔諭曰保寧

實錄卷之千三百三十二

尚安奏據伊犁烏魯木齊兩處各廢員等二百七十餘員名呈稱恭遇八旬萬壽歡躍難名謹於今年豫慶明年恭祝虔建經壇稍申蟻悃等語所奏殊屬非是新疆各廢員俱係緣事較重之人是以發往該處令其効力自贖非尋常廢員可比從前遇有慶典各直省廢員赴京建立經壇曾加恩擇其情節稍輕者量予錄用並分別賞給頂帶然亦出於特恩非臣下所得陳請保寧等此奏必係為該

廢員等設法邀恩地步試思此等効力之人既不准其赴京祝嘏且獲咎俱重豈在彼建立經壇遂可望施恩釋回耶所奏斷不可行至明年朕八旬萬壽前經俯准王公大臣等之請舉行慶典原因中外臣工籲請祝釐効悃抒忱情詞懇切亦古來稀有之事朕若却而不允轉似類於矯情是以准其各輸經費在京辦理裒茲盛典仍諭令務從節省毋得踵事增華其各直省距京既遠又何必紛紛

實錄卷之千三百三十二

仿辦萬壽亭經壇等項徒滋糜費所有明年萬壽各直省建立萬壽亭經壇之處著概行停止各省且然新疆地方更可不必要也將此通諭知之○諭軍機大臣等據全德奏湖南省官鹽從前原係旺銷今日少一日若非私鹽占費民間於何處買食該省私鹽充斥不問可知但得私鹽之來路一清則官引之行銷自暢等語湖南界連川粵水陸皆通為私鹽出沒之地該撫果能於要隘處所飭屬躡

緝自必私鹽淨絕而官鹽暢銷今全德稱現在漢口存積多鹽而湖南水販寥寥無幾非地方官需索成本有虧即係得受私販餽送以致水販裹足不前二者必出其一是該撫前奏實力查緝私梟斂跡之處不過徒托空言僅以一奏塞責殊不可信除將全德原摺鈔寄該撫閱看外著傳諭浦霖即將近年水販何以不赴漢口轉運並地方官有無需索及得受私販餽送以致官引不能暢銷之處一併詳細查明據實明白回奏毋得稍存隱飾致干戾咎○又諭據阿桂奏審擬湖南沅陵縣民李茂才呈控銀匠串通櫃書多收火耗銀一案係屬虛誣將李茂才定擬改發烏魯木齊並挾嫌唆訟之銀匠張同盛發往伊犁其隨同附和之向正瓏等犯分別杖徒所辦均尚允協該部即可照覆至生員沈攀桂武生張葵身列黷宮乃敢聽從李茂才等指使潤色繕寫違例碑文實屬有乖行止僅予

褫革不足蔽辜阿桂所擬未免失之輕縱著傳諭刑部堂官即將沈攀桂張英二犯一併定擬發遣以示懲儆○丙辰成都將軍鄂輝等奏巴勒布畏罪輸誠遣頭目來營乞降臣等察其意誠隨將唐古忒番兵先行撤動一面宣布恩威設法招致茲據總兵穆克登阿等帶領巴勒布大頭目噶登嘛撒海哈哩烏巴第哇等環跪營門悔罪乞恩稟稱我等遠在邊外本與唐古忒和好常來西藏交易近因西藏人將我等貨物任意加稅并於食鹽內攪入砂土我等實不能堪冒昧侵犯邊地今大兵遠來我等不敢抗拒望風退回今蒙將從前在藏滋事之噶布倫並加稅之第巴等均革退治罪又將辦事駐藏大臣更換莫不感仰

大皇帝公正嚴明額手稱頌臣等隨向宣布威德大兵所向屢著蕩平並將如天好生之心向其一一曉示番衆等叩頭畏服隨令西藏

噶布倫第巴等將減稅售鹽等事說明立定規條。勘明邊界。各設盟誓。并取具該部落永不滋事圖記。番結交噶布倫收存備案。所有漢土官兵當令分起全撤。留換臺藏隨營糧員。俱以次撤回。其前藏濟龍。轟拉木宗。喀魯噶爾等處。俱各慎選總管。給與執照。委牌飭令妥為經理。復諭噶布倫第巴等隨時查察。教養兼行。俾令安分守法。以仰副

皇上愛護唐古忒僧俗番衆之至意。下部知之。

○丁巳諭。每年夏間駐蹕熱河。至秋令進哨。以為柔遠詰戎之舉。典至盛也。但避暑山莊以及南北兩路行宮。地方廣濶。較之瀛臺。三海。圓明園。三山等處相仿。所有京內園庭。皆設大員總轄。又有如巴寧阿。福克精額等。以郎中職銜管理者。熱河地處口外。雖不便特派大臣前來管轄。第以總管二人管理。職分較小。未免不協體制。所有現在熱河總管董椿。佛保。即著照巴寧阿。福克精額之例。賞給

郎中職銜。管理熱河事務。並著賞戴花翎。其苑副四員。本係五品。亦著以原銜改為苑丞。以資協理。○又諭。據書麟等奏。江西袁州幫旗丁李周。姚漢表。軍船二隻。行至黃河大溜。陡遇暴風。掣斷錨纜。船身側轉。浪湧入艙。兼以兩船撞擊。登時散裂。所有糧米。席板。漂淌無存。淹斃副丁姚繡聲等三名。口等語。旗丁李周。姚漢表二船。裝載重運。正入黃河大溜之時。猝遭暴風。人力難施。以致糧石漂沒。淹斃人口。殊為可憫。著加恩將該二船漂淌米石。席竹。松板等件。槩行豁免。其淹斃之副丁姚繡聲等三名。口。照例分別卹賞。至該旗丁等漂散船隻。並著給料成造。以示體卹。該部即遵諭行。○諭軍機大臣曰。梁肯堂奏。審擬息縣令陳文衡。因兩淮委員借撥引鹽到境。留難圖索。情形從重發往伊犁一摺。亦止可如此定擬。已交軍機大臣會同行在刑部議奏矣。摺內所稱汪良增運到官鹽。隔閱一月。

之久。民間仍不致淡食等語。此項官鹽既經日久未售。民食又從何出。非食私鹽而何。雖據供向鄰封官店購買零星售賣。希圖微利。但以數包零星之鹽。何以一月之久。足敷民食所供。究恐尚有不實不盡。著傳諭梁肯堂即將此情節再行嚴切訊究。毋任稍有隱飾。○蠲免安徽安慶徽州池州太平廬州泗州和州等府州屬乾隆五十三年水災額賦。○戊午諭軍機大臣曰。阿桂奏勘明周家嘴砂洲應行添接石壩情形一摺。據稱周家嘴砂灘係大水暴漲之時挾帶砂塊石子。隨波直下。結聚而成。礮礮難以挑挖。請於大隄頂衝處所設法辦理。以冀逼溜敵砂等語。老龍石隄對岸周家嘴砂灘既係礮礮非如窖金洲活沙停積者可比。亦祇可如阿桂所奏於頂衝處所添做石壩。以資護隄刷砂。著即交與該督撫等於秋深水落時遵照妥協辦理。○己未諭據伍拉納奏審擬金門鎮標巡洋兵

船被劫一案。將糾夥行劫之盜犯彭庇等五十五名恭請王命正法梟示。此等洋面盜匪糾集多人肆行搶劫實為不法已極。自當立寘重典。俾匪徒咸知儆畏。但正法至五十五名之多。殊用惻然。該犯等固屬情罪重大。法無可貸。究愧不能道之以德。不得不齊之以刑。因思閩省瀕臨海洋。民人等如果安心守分。即在洋往來貿易。原所不禁。乃近年以來盜劫頻聞。總由富勒渾雅德在閩諸事廢弛。毫無整頓。以致盜風日熾。釀成重案。不一而足。伊二人之罪實難解免。是以朕將伊二人發往伊犁以示創懲。現在閩省督撫即係從前該省撫藩也。朕寬其已往之咎。特加簡擢。務須實心整飭。戢暴安良。方為無負委任。該省民風慄悍。自未便再事姑息。以致水懦民玩。多罹法網。但小民豈皆桀驁難化。該省之盜案疊疊。究由從前地方官廢弛因循所致。不可不明白曉諭。著該督撫等即將富勒渾

等種種貽誤業經治罪及朕此次辦理多犯雖心存不忍不得不辦各緣由詳悉出示諭令該省民人等各守本分勉為善良咸以盜犯彭庇等為炯戒悔過自新痛加湔滌況朕之重治盜犯正所以安靖閭閻稂莠既除爾等可各安生業益當於姻族鄉黨內互相誠勉毋致再蹈刑章共為盛世良民豈非美事如此剴切曉示使窮鄉僻壤胥得周知庶該省民人爭自濯磨去惡從善不致重罹憲典以副朕矜恤成全之至意○諭軍機大臣等此次調往赴藏協勦之屯練降番等俱係曾往臺灣勦賊之人該屯番等由川赴閩沿途州縣折給夫價以及督撫等量加犒賞俱得厚沾餘潤此次赴藏一出打箭鑪俱係窮苦番地於口糧之外並無另有得項雖臺灣之例外多得原不能引以為常但恐屯番等無知因前赴閩省俱獲厚利今不能一律得有贏餘惟令衝寒跋涉耐勞受苦心懷畏懼將

來設再有徵調不能仍前踴躍亦未可知現在巴勒布業經乞降藏事所有調往屯練降番等著傳諭鄂輝成德即酌量賞給並向其明白曉諭以爾等從前赴臺灣曾經打仗出力此次並未打仗且係口外非臺灣可比皇上因念爾等遠赴後藏協勦口外地方又屬貧苦別無得項是以仍加恩賞其進口後再著李世傑酌賞使該屯番等知奉調征勦不以為累而以為樂方為妥善也將此由五百里傳諭知之○調廣州滿洲副都統色克圖為廣州漢軍副都統以正紅旗蒙古副都統評德為廣州滿洲副都統○以福建陸路提督梁朝桂廣西提督海祿對調○庚申諭朕閱國史館所進貳臣傳乙編內薛所蘊張忻二人俱曾順從流賊後始歸降本朝嚴自明則既經投誠後於尚之信謀叛輒復從逆嗣又與尚之信同降此等從賊反覆之人俱於立傳之例大為不協夫人臣策名委質忠於

所事既遇宗社改移。自應抗節捐軀。方無愧在三之義。是以明末殉難諸臣。朕嘉其忠烈。特為賜諡。雖其中有曾經抗我顏行者。亦令一併褒諡。蓋以各為其主。在本朝則為梗化。而在勝國不失為効忠。未忍令其湮沒弗彰。爰為之錫諡表揚。以發幽光而昭激勸。至在前明業經身登仕版。繼復臣事本朝者。伊等能知

天命攸歸。率先投順。且間有功績可紀。不可擯而不錄。第因其大節究屬有虧。因特命第其優劣。另立貳臣傳。分為甲乙二編。於忠厚之中。仍寓激揚之道。所以垂教於萬世者甚大。此內即有歸順之後。又去而從唐桂。福潞各王者。雖其人反側無定。然唐桂各王。究為明之宗支。尚可托辭於繫懷故主。即列入乙編。不至有乖史例。若薛所蘊。張忻嚴。自明諸人。或先經從賊。復降本朝。或已經歸順。又叛從。畧耿尚三。逆進退無據。惟知嗜利偷生。罔顧

大義。不足齒於人類。此外如馮銓。龔鼎孳。金之俊等。其行蹟亦與薛所蘊等相仿。皆顏無恥。為清論所不容。而錢謙益之流。既經臣事本朝。復敢肆行誹謗。其居心行事。尤不可問。非李永芳。洪承疇諸人。歸順後曾著勞績者可比。若為之立傳。其何以勵臣節而示來茲國史。為天下大公。是非筆削。法戒凜然。豈可稍容假借。所有貳臣傳甲乙編內。如馮銓。龔鼎孳。薛所蘊。錢謙益等者。著該館總裁詳細查明。概行奏聞。徹去。不必立傳。若以伊等行為醜穢。一經刪削。其姓名轉不傳於後。得俾免將來之訾議。不妨僅為立表。排列姓名。摘敘事蹟。並將此旨冠於表首。俾天下萬世共知。似此行同狗彘之徒。既不得炳丹青之列。仍不能逃斧鉞之誅。於彰瘡更為有益。該總裁等其悉心校覈。以副朕扶植綱常。折衷公當至意。○以頭等侍衛扎克塔爾。為正紅旗蒙古副都統。○旌表守正捐軀直隸東明

縣民宋黃水妻朱氏。○辛酉諭據蘇凌阿等奏查訊江西幫船遲誤一摺。內稱詢據糧道鄭交泰、總運通判徐觀海及弁兵人等供稱：此次幫船行走遲延，因懇借運費銀兩未能早得。又春間鳳凰灘等處間段淺阻，經署道蔡葵等疏濬起撥，查鳳凰灘距省城僅十餘里。如果因旱水淺，該管官何不先事綢繆，迅速疏撈起撥，而應發銀兩又不及時接濟等語。鳳凰灘等處向來並未聞有淺阻之事，明係因開兌遲延及各船借領運費未能早為給發，托詞在鳳凰灘遲滯。何裕城係該省巡撫書麟署篆累月，且鳳凰灘與省城相距甚近，該督撫於天庾正供並不悉心經理，玩忽貽誤，實難辭咎。書麟何裕城著交部嚴加議處。至該糧道既不先事籌辦，又不早發銀兩，以致拮据遲延，著該督撫查明係蔡葵任內之事，抑係鄭交泰任內之事，速行詳查具奏。一併交部嚴加議處。至通判徐觀海係屬領

運，其咎較輕，著交部議處。○壬戌諭戶部議駁山東省改徵麥石應照原議辦理一摺。已批依議速行矣。昨因長麟奏請改徵麥石，朕意方以該撫因本年二麥收成十分豐稔，恐穀賤傷農，必係多購麥石運京備用。前因該省收成豐稔，曾諭令該省乘此糧價平賤之時，仿照豫省酌量採買以實倉儲，何以未據覆奏。乃轉以麥性不耐久貯，恐京師倉貯存積過多，無須改徵為辭，殊屬無謂。況今歲改徵乃係明年額運，即今歲直省二麥有收，京師無需平糶，所存麥石自有搭放八旗兵丁甲米等項之用。又何必該撫代計及此。為之總總慮耶。將此傳諭知之。○癸亥以江南江北河標左營副將伊楞額為浙江定海鎮總兵。○甲子諭軍機大臣曰：李奉翰等奏伏前河水陡長，各工搶護平穩情形一摺。內稱蘭儀、睢寧等處南北兩岸長水五六尺至八九尺不等，隄工均有早埝蟄陷之處，各廳營

汎搶辦穩固。其銅瓦廂工長水九尺。連底水共二丈二尺。大溜洶湧。埽外水深三丈三尺。至四丈三四尺不等。埽工隨鑲隨墊。勢甚險要。李奉翰等督同該道及備弁兵夫等分段上緊搶鑲。現在一律完固。水勢漸亦消落等語。以手加額。欣慰覽之。此次河水陡長。隄工多有墊陷。該督等督率河員弁兵立時搶護。埽壩得以穩固無虞。此皆仰賴

神貺。默加護佑。化險為平。自應虔誠致祭。以答

靈庥。著將內府辦香一分發交該督等親赴河神廟敬謹拈香。其南河各工前經書麟蘭第錫奏。黃河水勢暴漲。業經搶護平穩。該處河神廟亦當虔誠致祭。著將辦香一分一併發交該督。即親詣拈香。以酬

嘉佑。目下甫屆伏汎。為日方長。著傳諭該督撫均當倍加敬慎。督率在工員弁上下巡查。隨時防護。不可因現在平穩稍涉大意。俟秋

汎一過。安瀾有慶。所有南河東河各督撫及在工員弁均當給予議敘。以示優獎也。將此各先傳諭知之。○吏部議於灑帶李天培本植及江廣漕船遲誤之處。並不據實叅奏之。漕運總督毓奇等分別革職降調。其查明據實叅奏之巡漕御史和琳照例加級得旨。毓奇身為漕運總督。項家達特派巡視南漕。稽查漕運。是其專責。乃於江廣各船開行遲誤。並不豫行檄催。迨至節節脫幫。仍思曲為迴護。不將該管糧道等違開捏報各情弊據實嚴叅。且湖廣通幫因代李天培灑帶梃木以致耽延多日。毓奇有簽盤之責。項家達駐劄瓜儀。此項梃木至一千九百五十根之多。根件又復長大。綑縛繫帶無難一望而知。毓奇項家達寧得諉為未見。輒敢有心徇隱。及傳旨詢問。尚以失於覺察。捏詞巧辯。其獲咎較重。非尋常錯誤可比。況毓奇由巡漕擢任漕運總督八年以來。皆有截留守凍之事。有過

無功。其不實。心經理可知。毓奇項家達均著照部議革職。其漕運總督員缺著管幹珍補授。即速赴運河一帶接印任事。至畢沅惠齡任聽糧道捏報開幫。又不將李天培私帶多木之處叅奏。本應照部議降調。但念畢沅向來尚屬能事。惠齡在外任未久。姑著從寬。改為革職留任。八年無過。再行開復。以觀後效。○乙丑調禮部右侍郎鄒奕孝為工部右侍郎。以宗人府府丞寶光為禮部右侍郎。○丙寅諭曰。畢沅等奏李天培交與湖廣通省幫船灑帶木植一事。據李天培供曾向調任糧道王均護糧道王興謨張官五等告知。該道等雖訊無分肥情事。但袒徇同官。並不勸且又不稟揭任其灑帶以致遲阻漕船。請旨革職拿問。押運各官均請革職。並自請從重治罪等語。王均王興謨張官五俱著革職拿問。交該督等審明。定擬具奏。通判李英譚堯龍俱著革職。畢沅惠齡並著交部嚴察議奏。

○諭軍機大臣等。昨阿桂及畢沅等先後奏到李天培於幫船灑帶木植一千九百五十根內有八百根係福康安托伊購辦等語。不謂福康安竟有此事。福康安為傳恒之子。自幼即供任使。養訓誨受恩有年。前歲平定臺灣。生擒二醜。朕以其著有勞績。恩錫優渥。乃竟有托辦木植一事。實出意料之外。朕賞功罰罪。一秉大公。前此軍功告嚴。既經重予酬庸。則此次交李天培購辦木植亦當從重治罪。本應將所有公爵並四團龍補服寶石頂黃帶等類盡行革除。以示懲創。第念現在阮光顯齎表投誠。進京入覲。明年尚有阮惠親自到京叩祝萬壽之事。若此時遽將福康安公爵降革。并改換章服。非特觀瞻不肅。且使夷眾等見而心疑。甚有關係。將來福康安覆奏到時。朕再酌量加恩降旨。設或無阮惠獻悃歸誠之事。則福康安竟至罪無可逭。朕實引以自愧。而又為福康安幸也。著福康安

將如何交與李天培購買。并是否曾示令其在幫船帶運之處。即速據實覆奏。毋或稍有隱飾。致負朕格外成全之意。至本日據福康安奏。阮惠謝表。俟水勢消退方可齎送到闕等語。計今已逾旬日。想謝表已可遞到桂林。福康安一俟謝表到來。即行迅速奏聞。以慰廑注。將此由六百里加緊諭令知之。○又諭據劉義奏。本年新漕入境。駛行迅速。所需撥船一千五百隻。本數輪轉。緣軍船趨運甚速。又值河水暢流。轉有停泊待撥之事。又台州等幫。照例起六存四。因溜急。船輕未敢前進。請照上屆減撥之例。起四存六。以速漕運等語。所辦甚好。本年河水暢順。各幫行走迅速。連檣而至。目下撥船既有往來不及之勢。自應量為籌計。改為起四存六。俾軍船不致守候稽遲。而撥船更得輪轉接濟。著傳諭劉義。劉秉恬妥為辦理。再昨據劉義奏。永定河水長發。工程搶護穩固。著將內府辦香一分發

交該督親行致祭。敬謹拈香。○廣西巡撫孫永清疏報。乾隆五十三年。鎮安府屬之小鎮安。天保奉議三廳州縣。開墾水旱田五頃二十畝有奇。又水田埜十九埜有奇。○旌表守正捐軀安徽廬江縣民張拔士妻穆氏。○丁卯諭軍機大臣曰。李奉翰等奏河水驟長。北岸工程險要。設法保護平穩一摺。覽奏欣慰。銅瓦廂為北岸最要險工。該督等因河溜趨注。該工甚緊。現屆大汛。不及於對岸開挑。引河必須在該工之後。酌放水戩。使內外水面相平。格隄方能抵禦。隨於閏五月二十九日挑成倒溝。啟放引水。分水不分溜。至六月初三日。灌滿內塘。初四日。大河水勢驟長。因內塘水勢足資抵禦。保護穩固。李奉翰等所辦甚合機宜。而此次長水正在水戩放成之後。得以化險為平。皆賴神明默佑。早有旨將內府辦香送去。該督等即代朕詣

河神廟敬謹拈香叩謝

靈貺目下伏汎未過為日方長該督等仍宜加倍小心督率在工文武慎重保護勿稍大意至所奏搶埽落水淹斃之兵丁二名殊堪憐憫自當厚賞以示軫恤將此諭令知之○戊辰諭曰惠齡奏湖北委員李英汪景蘇接運已故委員周方炯呂日永領運乾隆四十一並四十九兩年鼓鑄滇銅回楚每百觔煎煉實止得淨銅七十觔較部定八三成色折算每百觔計折耗銅十八觔有零應著落原辦及接運之員分股賠補於任所原籍分別咨追等語所奏殊屬不成事體銅觔關係鼓鑄何至四十一年應辦之銅至今始運到楚相隔十餘年之久以致委辦各員相繼病故輾轉更易遲延況委員人等如果有中途盜賣情弊不特應行著賠尚當重治其罪若無盜賣等事則伊等因辦運官銅在外多年中途病故已為可憫復於伊家屬名下追賠殊

非正道且事隔多年該員等離任已久原籍亦未必有力能賠是官項仍至虛懸該撫此摺不過以奏請追賠見其認真辦理及咨追無著將來原籍可以家貲盡絕援例豁免所奏似嚴而實非正辦終於姑息而已該省錢局既屬鹽道管理委員赴滇辦銅守候至十餘年之久因何並不稟催而歷任督撫亦竟置之不問均難辭咎所有此項折耗銅觔業據該撫傳訊接運各員暨原辦之員家屬實無盜賣情事則該員等因奉有遠差中途病故情尚可憫即接運各員現查無弊竇均無庸著賠應即令該省歷任督撫暨該管道員分賠七成至滇省辦銅各官雖因先儘京銅於各省先往採買銅觔不能即時辦給其過較楚省為輕但亦何至遲逾十餘年之久而銅觔又不能照部定成色且滇省各廠俱有道府經管亦難辭咎並應著落滇省承辦銅務廠員及經管之道府分賠三成以示懲儆

而昭平允。至各省錢局所辦銅劬。雖不能如戶工二部錢局之年清年款。但不定以限制。似此累歲經年。稽遲守候。致令承辦之州縣等。於本任事務。轉需紛紛委署。不能親身經理。既非慎重地方之道。並恐滇省官員。與委員有所厚薄。可以意為先後。將後到者徇情早給。而先到者反致守候。亦不可不防其弊。自當按省分之遠近。以到滇之日為始。酌定年限。如有逾限不將銅劬辦給者。即將廠員議處。其銅劬務令照部定成色。不准撓和低潮。倘有不足。准令該委員稟明另換。如此有所責成。庶廠員等不致任意玩延。運員等亦復無可藉口。其如何按照道里。定立限期之處。著軍機大臣會同該部詳悉妥議具奏。○諭軍機大臣曰。劉我奏保定府屬之蠡縣地方。瀕龍河。於初二三日。陡長水九尺餘寸。孟嘗等處村河。於初四五日。先後湧溢。其下游肅寧村莊。間被淹浸。又滹沱河盛漲。并湧靈

壽縣城。以致城外關廟及近城之胡莊等處居民房屋坍塌。一千餘間。壓斃男婦四名。等語。蠡縣水勢漲發。漫口下注。而下游之肅寧地方。亦被浸淹。亟應堵築疏消。上緊勘辦。其靈壽縣水勢。雖已消涸。但坍塌房屋。十有餘間。壓斃人口四名。情形較重。尤須加意撫恤。俾災民不致失所。著傳諭劉我。即飭該道府。分投前赴被災地方。督率工員。多集人夫。將衝決隄埝。趕緊堵築完固。設法疏消積水。其坍塌房屋。損斃人口。照例撫恤。並給予修費。以資苫蓋。所有各邑被水田禾。現在果否全行涸出。收成是否失望。並著逐一查勘。如有應須接濟之處。一面辦理。一面速行奏聞。毋任胥吏從中侵冒。務使小民均霑實惠。○又諭據軍機大臣等議。駁旺沁班巴爾具奏。寧夏滿兵孤寡。請將庫存餘銀支取養贍。已奉旨依議外。但寧夏庫存節年用剩銀五千餘兩。此項銀數年間用完之後。尚需動用正

項如將此生息辦理以每年所得息銀養贍孤寡似屬有益著傳諭勒保壯沁班巴爾等將現在寧夏所存此項銀五千餘兩交商生息以每年所得息銀養贍孤寡之處令伊等熟籌妥議務期長久可行兩有裨益○己已諭兵部議定海鎮總兵陳標於會哨屆期因奏准陞見即行交卸以致署任不及前往擬以降三級調用一本陳標雖經奏准陞見並非迫不及待自應遵例先往會哨俟事竣再行起程乃輒臨期交卸實屬錯謬除會哨之署總兵李定國因風勢不順並未親身出洋業經革職外陳標著照部議降三級調用至外省巡洋該鎮等每多視為具文飾詞捏報洋面重地查察綦嚴向例於每年三九等月兩鎮定期會哨不容稍有懈怠即或訂期之後遇有風阻斷無經旬累月尚不能止息之理自應各報該督撫改展日期必相會面而後返方為無負職守若一遇風信即有意觀

望不前輒以風大難行藉口捏飾直以巡洋為虛應故事殊非慎重海防之道再聞閩省海面每遇九月颶風較多商船俱不敢放洋何以向例第二次會哨日期轉定於是月令其冒險出巡或江南浙江廣東海洋九月內風信大小不一未必盡如閩省亦不可知殊難懸揣著該督撫按照各處洋面風信平順之期另行會商酌定月分不必拘定三九兩月總以颶風不作平穩時訂期會哨庶各該鎮等不得藉詞風阻遲誤而於海疆巡哨更昭慎重俟各督撫酌改月分咨送到部將如何改展日期另定章程悉心妥議具奏○以禮部侍郎寶光為浙江鄉試正考官編修程昌期為副考官大理寺卿趙佑為江西鄉試正考官編修錢樸為副考官修撰史致光為湖北鄉試正考官吏部員外郎恭泰為副考官

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十二

一
增錄卷一千三百三十二

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十三

監修總裁官經筵講官太子太傅文淵閣學士文淵閣領事碩輔內大臣稽察欽奉 上諭事件處管理

吏部總管處事務兵部尚書滿洲部統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加三級又加二級臣董誥內大臣戶部尚書鑲黃旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十四年己酉六月庚午諭曰伍拉納

等奏漳泉二府屬現在雨水調勻晚稻可望

有收但究因早稻得雨較遲收成未免歉薄

等語前因漳泉二府屬春間得雨稍遲曾令

該督等察看情形酌量借糶以資接濟今該

二府屬早稻收成未能豐稔本年尚有應徵

帶緩錢糧若新舊一併催納恐民力仍不無

拮据所有漳泉二府屬應徵五十二年緩徵

錢糧著加恩展至明歲麥熟後帶徵俾閭閻

益藏益資饒裕以副朕軫念民依有加無已

至意。該部即遵諭行。○又諭據都爾嘉奏由撫順解送私入圍場偷打鳥鎗採取木耳之李正元等人犯有馬甲張文通等給與委署領催李存等錢文擅自回家李存等復將犯人李正元李克新疎縱脫逃請將李存等從重治罪等語。此事大奇。委署領催李存等五人解送人犯自應留心護送無使逃逸。乃馬甲張文通賽音圖阿克敦膽敢出具錢文指稱患病回家而委署領催李存馬甲巴彥保膽敢受納錢文致將罪人縱放皆屬可恨。李存已彥保俱著拏送刑部即不致定擬立絞亦應照依吉林烏拉佐領張保擬定絞候俟秋審入於情實其出給錢文之馬甲張文通賽音圖阿克敦即著銷去旗籍發往伊犁若折磨役使委派苦差尚須口糧反於伊等有益。張文通賽音圖阿克敦至伊犁時聽其自便。餘依議。至從前遇有解送人犯曾屢經降旨訓諭務必善為照料毋致脫逃。乃該將軍

副都統並不以此為事屢有疎縱人犯之案。今又給受錢文致生事端更出情理之外都爾嘉成策著嚴行申飭外併著交部議處所有脫逃之李正元李克新著嚴緝務獲將此徧諭東三省知之。○命兵部尚書孫士毅在軍機處行走。○壬申諭據福康安奏圖薩布現在患病醫治未能速效等語。圖薩布著解任回旗調理郭世勲著調補廣東巡撫速赴新任。所遺貴州巡撫員缺著陳步瀛補授其安徽布政使員缺著王德補授。○諭軍機大臣等本日福康安奏廣東巡撫圖薩布現患病症醫治未能速痊請解任回旗調理等語已降旨將郭世勲調補廣東巡撫矣。廣東地方緊要且有洋行鹽務向為腥羶之所因聞郭世勲操守廉潔辦事結實是以將伊調補福康安現在粵西辦理安南事宜郭世勲上年冬間甫經陞見久為朕所檢知之人著傳諭該撫接奉此旨不必來行在請訓即速赴

新任務持素履於地方一切認真妥辦以副委任將此並諭福康安知之○以雲南督標中軍副將定倖為雲南臨元鎮總兵○癸酉諭現在江南河工有堵築疏濬各事宜該處庫項恐不敷用著戶部查明於就近地方撥銀一百萬兩迅速解往交與書麟等以濟工用○諭軍機大臣等據伍拉納等奏黃仕簡應繳認罰軍需銀三十萬兩完繳司庫銀八萬兩未完之數甚多據黃仕簡之孫黃嘉謨將所有田園地租房屋呈請入官估變共估銀二十五萬餘兩現在查追變繳等語黃仕簡因循畏葸貽誤軍務罪有應得因念其年老多病格外施恩從寬免死其罰繳之項自應按數查追但念黃仕簡業經身故所估家產抵變罰項外餘剩無幾且一時亦未能盡行變價徒滋延擱著加恩於應繳罰項內再酌免十五萬兩留為伊家屬養贍之資不必全行抵變以示朕格外加恩至意將此傳諭

伍拉納徐嗣曾知之○又諭據琅玕奏委員帶兵在洋追捕被盜拒捕殺傷一摺內稱閏五月十二日遊擊張殿魁在北洋追拿盜船賊匪即行拒毆被兵丁擒拿二賊餘賊赴水脫逃又在黃巖大陳山追見盜船數隻鎗斃傷倒四賊賊船俱即駛逸又於閏五月二十九日在溫州大門洋追捕盜船六隻拿住一隻內賊匪數十人出而拒捕截傷張殿魁及弁兵數名現在飭查張殿魁受傷是否存亡及死傷弁兵人數並即馳赴溫州黃巖等處查辦等語盜匪在洋糾合多人駕船數隻肆行劫奪經官兵追捕即俱揚帆逃逸及被拿獲膽敢逞兇抗拒殺傷官兵甚屬可惡可見從前巡緝廢弛以致盜匪駛駕多船敢於拒捕傷人不可不迅速嚴拿全數弋獲盡法懲治陳志係新調任提督務須認真辦理將在逃賊犯設法盡數擒獲現在琅玕馳赴溫州黃巖等處該提督即當會同商辦實力查拿

著傳諭琅玕陳杰務將此案盜犯迅即全行就獲一面辦理一面奏聞毋任一名遠颺漏網至遊擊張殿魁追捕賊匪致被戳傷殊為可憫著琅玕等即查該遊擊如係被傷殞命即照陣亡之例給予卹典並查明弁兵死傷人數亦照陣亡例分別卹賞若張殿魁查係未經殞命即著該撫等以應陞之缺奏請陞用其出力弁兵等亦著查明分別給賞以示獎勵○又諭據伍拉納奏臺灣為海外要區將軍與督撫提督例應分年輪往稽查本年先令水師提督哈當阿前往巡查等語臺灣大功甫行告竣經此大加懲創之後該處兵民自必倍加震懾咸知安分守法且有奎林在彼足資彈壓現在福建內洋盜劫頻聞沿海一帶地方較之臺灣更關緊要哈當阿係水師提督董率弁兵緝捕奸究是其專責難以遽離此時哈當阿亦不必前往俟明歲察看內地情形或伍拉納或哈當阿伊二人

屆期再自行商酌一人奏聞前往巡查將此傳諭知之○又諭本日據書麟等奏睢寧南岸周家樓又有漫塌隄工之事現在京中大臣內並無諳習河務者若派令前往亦屬無益阿桂歷在豫省督辦堵築事宜其識見亦較為諳練伊甫由荊州差旋並據奏於途次受暑頭目昏暈尚未全愈但除阿桂亦別無可派之人已有旨傳諭書麟等自行酌量如伊等可以堵辦完竣毋庸特派大臣則如因工程重大必須請派大臣前往即一面奏聞一面札知阿桂以便即由京前往計阿桂此時不過在近京一帶李天培私帶木植一事已查詢明白阿桂前來行在亦無可面諭之處著傳諭阿桂接奉此旨不必再來行在暫留京辦事伊免此一番跋涉又可在京多為歇息氣體自易復元倘書麟等知會到時有需阿桂督辦之處即可就近由京前往其留京事務再交與常青接辦也將此傳諭阿

桂知之。○又諭據書麟等奏黃河自六月初旬以後水勢疊長。大溜洶湧異常。初九夜間狂風驟雨。陣水擁溜高起數尺。睢寧縣南岸周家樓無工處。水漫過隄。搶護不及。致將隄身刷開。口門已寬一百餘丈。水深四丈以外。大河溜勢已有一半分趨入口。現趕護裹頭。并會商集料籌堵及疏濬事宜。書麟、蘭第錫自請治罪。該管睢南同知徐光第請旨革職等語。本年黃河伏汛水勢疊長。實為異漲。又值初九夜間風雨交作。溜勢湧高。以致周家樓無工處所。隄身漫塌。尚非在工員弁疎於防範所致。此時該督等惟當竭力籌堵。並堰盱石工。加意防護。所請治罪及徐光第革職之處均可不必。事定後自有成例。維時再行覈辦。至江南土性堅實。不比豫省沙土鬆活。難於堵築。且據該督等奏溜勢分趨入口。止有一半。即大河溜勢並未全掣。施工或易為力。著傳諭書麟、蘭第錫自行酌量。如該督等

可以堵辦完竣。毋須特派大臣則已。如因工程重大。伊二人未能肩此鉅任。必須請簡大臣前往。阿桂屢經督辦堵築事宜。於河務尚為諳悉。已有旨諭令阿桂在京等候。書麟等即一面奏開一面札知阿桂。以便阿桂即由京起程。速赴工次督辦。以期妥速。歲事再大河溜勢既尚存一半。何不於漫口迤西斜往東北酌建挑水壩一座。逼溜歸入正河口門。豈不易於堵合。已於圖內用硃筆標識。著傳諭書麟、蘭第錫將是否可以如此辦理之處就近會籌。據實具奏。亦著阿桂商酌先行奏聞。俱不必遷就。所有漫口下游被水地方著書麟等妥為撫卹。毋致一夫失所。現已諭令戶部著撥給銀一百萬兩。以濟工用。至守備卓采因塌埽落水淹斃。殊可憐憫。著該督等咨部照陣亡例議卹。將此由六百里傳諭知之。○調貴州按察使陳大宏為安徽按察使。以河南南汝光道萬寧為貴州按察使。○甲

戊諭軍機大臣曰長麟奏沂州府屬之蒙陰縣地方於六月十一十二等日大雨連宵山水驟發沂河水長頂阻宣洩不及浸塌民房四百餘間壓斃男婦十三名口現赴該處查勘分別被水輕重照例妥為撫卹等語東省本年收成豐稔蒙陰一縣猝被水患淹及田廬傷斃人口殊堪憫惻長麟既親往查勘著傳諭該撫務宜詳悉確查善為撫卹其有應行接濟者亦即查明分別辦理毋使一夫失所○以副朕軫念災黎至意○又諭據李世傑奏查明馬晏清條陳各款案一摺細閱清單內查覈濫設非刑一條因川省素多囁匪遇有奸勇鬪狠之人因事到官不免恃強滋事是以酌用連二連三連四等枷至命盜等犯均用木籠以防逃逸等語川省兇惡匪徒固應重加懲治而刑法自有一定之制若輒用連枷木籠等項究屬非刑且既設有此等刑具恐有不肖官員藉以故勘平民恣其婪酷

是馬晏清所控濫刑斃命情事尚不為無因著傳諭該督即行秉公嚴查並飭令各屬將從前所用連枷木籠概行禁止毋致地方官藉端擾累所有馬晏清一犯現在曾否弋獲務即嚴密查拏毋任潛蹤免脫○又諭今日召見寶光鼎詢及各省學政居官如何據稱上江學政徐立綱人品聲名俱甚平常因即詢之軍機大臣等僉稱徐立綱平日未為端士前後在學政任內風聞聲名亦不甚好京師眾口如一等語著傳諭書麟將徐立綱兩任在安徽考試情形有無貪劣實蹟並與提調教職暨士子等有無暗中關通作弊等事據實詳查奏徐立綱係兩任安徽學政與該省地方官及士子等彼此熟識易於滋弊如果有貪黷之事書麟前任安徽巡撫現在又係兩江總督於該學政考試等事自必知之甚悉倘因失察於前遂爾有心迴護含糊覆奏經朕查明得實恐書麟不能當此重咎

也將此由六百里密行傳諭知之。仍即由驛迅速覆奏。○又諭。據巴忠等奏。請將達賴喇嘛兄弟牧仲綏綱等。各賞與經典名號。俟有別廟堪布缺出。即行補放等語。此事不值如此辦理。達賴喇嘛兄弟。近年並未聞有恣意妄行之處。若如此辦理。未免情事張皇。此皆巴忠舒濂等識見短淺。致有此奏。著傳諭舒濂等。嗣後達賴喇嘛兄弟。仍聽其一同居住。舒濂普福等。亦照常看待。祇須密為留心體察。倘伊等有滋事舞弊之處。即行奏聞治罪。如無別故。不得妄事紛更。以示體恤。○又諭。曰。鄂輝等奏。據噶布倫等稟報。沙瑪爾巴呼圖克圖。已到濟甯。現在指示巴勒布頭目與噶布倫等同心辦事等語。伊等所辦。殊屬錯謬。此次沙瑪爾巴呼圖克圖。特由巴勒布前來辦理一切。鄂輝巴忠等。自應在彼等候。俟其來時。與之面晤。將朕節次褒獎諭旨。明白宣諭。使彼益知感奮。方為妥善。乃巴忠竟先

行起程回藏。而鄂輝等亦皆置之不問。祇留噶布倫數人。與伊會晤。實屬錯誤。巴忠係特旨派往之人。尤不應措置失當。若此。著傳旨申飭。並著巴忠於何處接奉此旨。即由該處回至扎什倫布。務須面見沙瑪爾巴呼圖克圖。并告以我未曾在此等候。徑回前藏。實屬錯誤。今蒙大皇帝降旨斥責。特命復來相見。大皇帝以呼圖克圖能知大義。深加褒獎。賞給數珠等物。以示優眷。呼圖克圖益當感激。聖慈。並將朕節次所降諭旨。向其明白宣諭。伊如何登答之處。即著據實奏聞。○乙亥。諭前因本月初四日。京中本報遲誤。經兵部參奏。交直隸總督逐站挨查。於何處耽延。據劉我查覆。係在密雲迤北之沙峪溝。穆家峪。石匣。要亭。至古北口一帶。因山水陡發。耽誤十五刻等因。業交在京吏兵二部。將文武員弁議處。十九日復因本報遲到。亦經兵部參奏。議處矣。本報馳遞耽誤。因山水驟發所致。尚

非有心遲誤可比。嗣後如有實因山水陡發遲逾三日者。將文武各員弁查明議處。以示懲儆。若在一兩日以内者。竟可免議。所有此兩次文武員弁應行議處之處。俱著加恩寬免。○軍機大臣議奏。詢問顧學潮。據稱閩省洋盜現散處各海島。一時難以清查。臣等公同商酌。惟有於漳泉盜匪出沒之所。設法查禁。毋許潛出。則海島內不至日聚日多。向例出口各船。地方官各給照票。日久弊生。嗣後請於給票時。先令查明人數。並取具地鄰甘結。方准給票。俟回船繳照時。倘人數短少。及年貌不符者。若實係病故淹斃。即令同船人據實出結。其有無故不回者。將來盜案內。若有同票人名。即將同船出結人。及原出甘結。又不稟首之地鄰。一併問罪。至船出口時。務令各弁兵按照查驗。如所載之人。多於照上。即將船扣留。查明嚴辦。如守口弁兵不實力稽查。甚或私行賣放。發覺即行治罪。並將該

管官議處。各省沿海地方。俱照此辦理。又聞海島地面。近有搭蓋房屋。窩聚匪徒之事。嗣後請飭令巡哨鎮將。督同弁兵。見有島內房屋。立即燒燬。再現在沿海省分。額設戰船。笨重難行。不利追捕。請飭下該管督撫。令於年滿折造時。照商船式樣改造。以便駕駛。得旨依議。速行。其各海島有無建房居住。及人數多寡。著各該督撫。於歲終具摺奏聞。○命兵部尚書孫士毅。在南書房行走。○丙子。諭曰。福崧著來京另行簡用。所遺員缺。著明興調補。令其在葉爾羌總辦事務。毓奇著賞給頭等侍衛。毋庸給俸。自備資斧。前往烏什辦事。毓奇到烏什交代後。明興再赴葉爾羌。將福崧換回。○兩廣總督公福康。奏廣西巡撫孫永清。奏本月初五日。阮惠遣人恭齋謝表。並貢物到關。當將貢物。令來使齋回。諒山聽候。所有遞到阮惠表文二道。恭呈御覽。其隨表呈進貢物。是否賞收。仰候訓示辦理。諭軍機

大臣等。朕覽阮惠呈進表文。極為恭謹。自係出於感激至誠。而於瞻覲祝釐之處。尤屬懇殷。該國鎮撫民人。全仗天朝封爵。況造邦伊始。諸事未定。尤賴正名定分。明示寵榮。以為綏輯久遠之計。已明降諭。肯將阮惠封為安南國王。並另降勅諭。先為詳晰曉示。所有封爵勅印。俟阮光顯入覲返國時。即令齎回。其呈進貢物。亦應收納送京。候朕另加恩賞。再朕因阮惠進表謝恩。特製詩章。御筆親書。以賜著與賞阮惠勅諭。一併發交福康安。令福康安揀派滿洲能事道府一員。齎送安南。面交阮惠祇領。○諭曰。福康安等奏阮惠即阮光平。因赦其前罪。准令降附。具表謝恩。恭進貢物到關。並以明年為朕八旬萬壽。籲懇進京瞻覲祝釐等語。阮光平自上年孫士毅撤兵之後。自知得罪天朝。深懷悔懼。將迷失官兵。供給資送。屢次差人啟關。懇求內附。至於再三。俱經福康安孫士毅嚴行駁還。嗣

因阮光平復遣伊親姪阮光顯到鎮南關。並懇進京入覲。經福康安等代為具奏。朕念安南雖僻處海隅。然立國已久。其興廢亦必關乎氣運。黎維祁優柔廢弛。是天心已厭棄黎氏。朕從來辦理庶務。無不順天而行。阮光平既已震懾聲威。悔罪投誠。匝月之間。乞降數次。又遣伊姪親齎表文。敬關入覲。尚知畏懼。因命赦其前罪。不加進討。並令福康安派左江道湯雄業護送阮光顯前來。行在瞻覲。今復據福康安等奏。阮光平因朕准令降附。具表謝恩。並求於明年親自到京祝釐展覲。閱其表文。情詞肫切。出於至誠。且據稱已先為陣亡提鎮大臣築壇奠祭。現於國內擇吉立廟。請頒發提鎮官銜諭號。以便遵照奉祀。稍贖前愆等語。實為小心恭順。黎氏已為天心厭棄。而黎維祁又棄印潛逃。自無復令立國之理。王者有分土。無分民。安南雖屬小國。

亦不可無人統率。阮光平以造邦伊始。籲求天朝封爵。以為綏輯民人之計。措詞允為肫實。阮光平著即封為安南國王。所有應行頒給印信勅書等項。著各該衙門照例撰鑄。俟伊姪歸國時。恭捧齎回。至阮光平既封為國王。其所進貢物。即著收留。另行加賞。朕於臨馭外夷。恩威並著。叛則討之。順則撫之。大義昭然。無不仰體。

天心。俾薄海內外。悉歸涵育也。○勅諭安南阮光平知悉。據協辦大學士兩廣總督公福康安奏為爾具表謝恩。展陳覲悃。朕披閱表內詞義。肫懇並請於明年進京入覲祝釐。具見恭謹。所有齎到貢物。已諭令賞收。以遂爾芹曝之獻。安南以黎維祁庸憤無能。

天厭其德。國祚告終。爾現已悔罪投誠。遣親姪阮光顯奉表瞻覲。祈求懇切。不啻再三。朕順天而行。有廢有興。悉歸大公至正。本擬俟明歲親行叩覲時。賞給王爵。茲閱爾表內所稱造

邦伊始。必須仰賴天朝寵榮。錫之封號。方足以資駕馭。自屬實情。用是特降恩綸。封爾為安南國王。俾資鎮撫。並親書御製詩章。賜為爾國世寶。嗣後凡有呈進表詞及本國行文之處。俱准其書寫國王名號。其應行發給印信勅書。現交各衙門撰文鑄篆。俟爾姪阮光顯到京。交與齎回。至天朝提鎮大員臨陣捐軀。爾國內立廟享祀。亦足徵悔懼之忱。所請官銜諡號。亦即勅部隨後頒發。爾其益當小心敬畏。恪守藩封。永承恩眷。特諭。○冊封阮光平為安南國王。冊文曰。朕惟王化遐覃。伐罪因而舍服。俟封恪守。事大所以畏。

天鑒誠悃。於荒陬賁其既往。沛恩膏於屬國。嘉與維新。賁茲寵命之頒。勗以訓行之率。維安南地居炎徼。開十三道之封疆。而黎氏臣事天朝。修百餘年之職貢。每趨王會。舊附方輿。自遭難。以流離。遂式微而控愬。方謂興師復國。宇小堪與圖存。何期棄印委城。積弱仍歸。

失守殆

天心厭其薄德。致世祚訖於終淪。爾阮光平起自西山。界斯南服。向匪君臣之分。寔成婚媾之讐。釁起交訐。情殊負固。抗顏行於倉猝。雖無心而難掩前愆。悔罪疚以滌除。願羊面而自深痛艾。表箋籲切。使先猶子以抒忱。琛獻憬來。躬與明年之祝嘏。自非仰邀封爵。榮藉龍光。曷由下蒞臣氓。妥資鳩集。凡此陳詞以實。胥徵効順。彌虔。況王者無分民。詎在版章其土宇。而生人有司牧。是宜輯寧爾邦家。爰布寵綬。俾憑鎮撫。今封爾為安南國王。錫之新印。於戲。有興有廢。天子唯順。

天而行。無貳無虞。國人咸舉國以聽。王其懋將丹款。肅夫冰兢。固圉以長其子孫。勿使逼滋他族。悉心以勤於夙夜。罔令逸欲有邦。益敬奉夫明威。庶永承乎渥典。欽哉。母替朕命。○御製詩曰。三番耆武匪佳兵。昨歲安南重有征。無奈復黎黎厭德。爰教封阮阮輸誠。守封疆。

勿滋他族。傳子孫恒奉大清。幸沐

天恩。欽久道不違。日監凜持盈。○蠲免湖北江夏漢陽漢川沔陽黃岡黃梅廣濟潛江江陵公峇石首監利松滋枝江長陽等十五州縣暨武昌武左沔陽黃州蘄州荊州荊左荊右襄陽等九衛。乾隆五十三年水災額賦。○旌表守正捐軀四川榮經縣民諸某妻張氏。○丁丑遣官祭

火神廟。○諭曰。琅玕奏審明寧海營參將愛新泰署守備姜起榮等。於洋面盜案。不據實稟報。分別定擬一摺。此案前經伍拉納奏。因海洋盜劫重案。該弁姜起榮。於事主赴汛呈報時。並不收呈。逮捕恐有諱飾情弊。是以將守備姜起榮等。革職拿問。交與琅玕嚴審。若果審有情弊。即如金門鎮羅英茂。聽從捏報。問以重辟。亦屬罪所應得。今既審明。周加貴等。被盜月日。正在守備姜起榮巡洋之時。實緣周加貴等。因守備公出在洋。慮路遠未

經赴報復聽從代書王榮文之言裝敘守備不肯收辦情節赴營縣呈報是姜起榮巡洋屬實且相隔二百餘里並無諱飾其鎮將等係據呈通稟亦無商同裝點情事琅玕審明後止應將代為添捏情節之代書照例治罪並將姜起榮等據實奏請開復何得因前奉有審訊之旨遽將愛新泰姜起榮定以發遣伊犁總兵劉文敏亦擬以軍臺効力所謂一錯百錯從前之所以降旨將姜起榮等革職者原因伍拉納參奏情節甚重不得不從嚴交辦以飭營伍而靖海疆該撫既審訊明確惟當據實平反何得遽行周內發遣不已抑將處以重辟有是理乎因將此摺發交行在九卿及直隸提督閔正祥閱看亦僉稱該撫所定實屬錯謬已極琅玕不應糊塗至此昨因浙省營伍距閩較遠特令琅玕兼轄以期就近整頓若該撫似此任意舛誤不但不能整飭且增一越俎多事之人矣琅玕著交部

嚴加議處仍傳旨嚴行申飭並令其將因何如此錯誤之處明白回奏所有守備姜起榮參將愛新泰總兵劉文敏俱予開復餘著照所擬完結又據另片奏寧海營遊擊張殿魁因追捕盜匪被盜拒捕受傷落水身斃等語張殿魁著照陣亡例議卹其同往各船因何不能救援著琅玕詳細嚴查並將此案兇盜設法嚴緝務期全獲審明定擬勿任一名漏網將此通諭知之○戊寅諭曰梁肯堂奏河南蘭陽縣及儀封改歸考城縣舊河身兩岸老灘沙壓較多小民不能耕種所有升科地畝請分別升免等語老灘地畝既經積年沙壓兼有隄侵柳占小民不能耕作自係實在情形所有蘭陽縣應徵原額并升科銀一千五百九十餘兩考城縣應徵原額并升科銀八千二百九十餘兩俱著加恩豁免以示朕軫念窮簷至意○又諭曰孫士毅所有恩賞官銜世職係辦理赴勦臺灣官兵事宜所得

與勦辦安南一案無涉。且已將伊公爵及紅寶石帽頂撤回。功過已足相抵。其從前宮銜世職。仍著賞留。○諭軍機大臣等。據書麟等奏。睢寧南岸漫溢情形。一摺。內稱。自六月十三日起。大河水勢漸消。漫口兩頭。勢漸平緩。現趕緊盤護。不令再塌。細量口門。計寬二百三十餘丈。大河溜勢。仍有五分有餘。等語。周家樓隄工。既經漫塌。若大河水勢漸消。豈不虞溜勢掣趨入口。此語不通。閱所奏情形。口門掣溜。竟仍是一半。該督等請於上游對岸酌挑引渠。引溜北趨。所辦甚當。其西壩上首修築挑水埽壩之處。前已於所進圖內。用硃筆畫去。該督等擬築埽壩處所。與前硃筆標誌地方。相距若干丈。著該督等查明具奏。並將能否遵照前旨。於西裏頭築壩挑溜之處。覈勘會商。據實奏聞。亦不必稍存遷就。又據奏。湖水正在盛漲。黃水雖挾沙而行。為湖水頂托。不致穿湖流行。淤墊湖身。漫水緊靠湖

之東北隅一帶。循張福引河而出。清口等語。此時漫水。雖由張福口引河而出。不至淤湖。但由周家樓而至洪澤湖。相隔所經之處。是否不至逐次淤高。該督等更應留心設法籌辦。又圖內附近蔡家集隄工。溜勢頂衝。將來亦尚宜留心。至高寶諸湖下游田禾。恐不免淹浸。昨已有旨。令該督等豫行曉諭村民。趁湖水未下之時。將成熟田禾。先行刈穫。著再傳諭該督等。務宜遵照速辦。若能使湖水入江。不致下河受惠。自更妥善。並著將能否如此籌辦。及近日以來。大河溜勢。是否不致又多掣動。何時可以興工堵築。約計何時可以完竣之處。迅速具奏。○又諭曰。伍拉納奏。署定海營參將張殿魁。緝拿洋盜。到大門外洋。遇有賊船六隻。該署參將當即放礮。內有盜船一隻。落後與哨船相遇。各兵隨即施放礮。奈賊多兵少。張參將被賊鎗傷落水身死。外委兵丁等。俱有被殺受傷。現在選委參將

海亮等馳赴浙江温州一帶嚴密擒拏。又飛調水師總兵丁朝雄前赴福寧巡哨堵緝。伍拉納亦親往福寧一帶查勘閩浙交界處所各海口洋面情形等語。此案已據琅玕奏聞。業經降旨令陳杰馳赴温州會同琅玕實力查拏。今伍拉納先派總兵參將等前往温州福寧一帶分投截拏。該督亦即親赴閩浙交界地面會同督捕。伍拉納係閩浙總督。浙江是其管轄。現在閩省無甚要事。自應親身前往該盜匪在洋糾合多人肆行劫奪。經官兵追捕。膽敢逞兇迎拒。並將巡洋緝匪參將大員殺傷落水。不法已極。不可不迅速查拏。全數弋獲。盡法懲治。著傳諭伍拉納會同琅玕陳杰督率兩省官兵分投截捕以期兇盜速行就獲。並密蹤盜匪出沒蹤跡窮究根株肅清洋面方為妥善。至海洋捕盜緝匪全在速追擒拏。近賊船方可放礮。若一見賊船即行放礮則賊匪早已知覺逃逸或先防備以致

盜匪往往不能擒獲。此實水師陋習。是與賊船以速避之信也。最為可惡。今該署參將見有賊船六隻相距尚遠即行放礮。是明使盜匪聞知逃逸。前已有旨令琅玕查明如張殿魁係被傷殞命即照陣亡議卹。現在伍拉納已馳赴該處著確查張殿魁如果遇見盜船先行放礮似此畏怯且有應得之咎。不但不應給予卹典亦不值加以恩賞。如查無畏賊放礮情節仍遵前旨咨部議卹也。將此由四百里傳諭伍拉納並諭陳杰知之。○以吏部員外郎江濬源為陝甘鄉試正考官。兵部員外郎盛惇崇為副考官。內閣學士胡高望為江南鄉試正考官。吏部主事賀賢智為副考官。○改鑄分巡鎮迪糧務兵備道兼管吐魯番庫爾喀喇烏蘇晶河等處事務關防兼用清漢托忒三體字。從陝甘總督勒保請也。○己卯諭軍機大臣等據勒保奏甘肅省五月分米糧時價清單朕詳細批閱內惟秦州哈

密廳兩處各色糧價與上月相同其餘各屬比較上月均有稍增之處該督所奏尚係五月分糧價維時新麥未經刈穫價值或因此稍增亦未可定但該省地處邊陲當此青黃不接之時究恐貧民買食不無拮据著傳諭勒保即體察情形如有應行平糶之處即酌量開糶以期平市價而使民食○辛巳軍機大臣等議覆四川成都將軍郭輝等條奏收復巴勒布侵占藏地設站定界事宜○前藏向駐綠營官兵五百十員名現有駐藏大臣管轄其扎什倫布地方亦應酌撥綠營官兵分駐請於察木多抽撥外委一員兵六十名江卡抽撥兵三十名碩板多抽撥都司一員兵二十名前藏抽撥兵四十名以上四處共抽撥兵一百五十名即令抽撤之都司外委管領移駐後藏再於馬兵內挑拔二人作為軍功外委管束兵丁再後藏既移駐官兵由後藏至前藏一路應分立塘汛十二處以唐

古忒番兵安設每塘挑選附近番兵四五名並交噶布倫等辦給口糧均令駐防後藏都司隨時稽查管束○拉子地方請添設唐古忒番兵二百名并添第巴二名管領按年一次更換至脅噶爾番兵亦不敷防守請於拉子防兵內撥出三十名安置脅噶爾地方其薩喀一處距拉子不遠亦即於防兵內撥出三十名輪赴該處巡哨再宗喀聶拉木濟嘯等處遠在極邊其緊要處所仍須修砌卡碉以資瞭望而嚴防守○西藏官兵以耕牧為生現飭噶布倫等按寨落多寡編定數目前藏添唐古忒兵八百名後藏四百名於每歲九月望後操演至十月底止隨同綠營駐防一體練習至操演鎗箭於綠營內挑取千把弁兵數十名充為教習令其分領番兵逐日操演惟唐古忒兵向無錢糧今定於派出操演日期至散操日止令噶布倫等酌給口糧又達木兵向住達木角地方換班應差令并

歸操演番兵內一體教習。仍照舊令達賴喇嘛月給口糧。又查達賴喇嘛山上舊存大小鐵礮二十餘位。請編定號數。令綠營兵帶領番兵演習施放。請於今歲秋收後查明稞麥時值。動項發交該噶布倫等。在附近各處買米稞麥三千石。交駐藏糧員於扎什倫布城內建倉收貯。俟採買二年後。按年出陳易新。以六千石常貯為額。至拉里察木多巴塘裏塘四處糧臺。皆有糧員。而察木多尤為川藏適中之地。亦請一體儲備。西藏所屬寨落設立第巴管理。缺分甚多。其間美惡不齊。然皆有應辦事件。請令噶布倫等嗣後無論缺分美惡一體補放。務令該第巴親往照料。不許擅差。家丁代理。至差遣堪布囊蘇赴京進貢。并赴打箭鑪辦茶。皆係經行內地。往返需時。請嗣後均由駐藏大臣會同達賴喇嘛及噶布倫等揀選妥人給與護牌。將需用馬夫酌定數目。注明牌內。沿途照給。以杜需索。

駐藏大臣應於二人內按年分為兩次輪赴後藏巡查之便。親加揀演。分別勸懲。至藏衆散居各處。耳目難周。該處設有噶布倫四人管理地方事務。嗣後請於四人內每年輪派一人於春秋農隙時親往稽察。一從前駐藏大臣二員同居一處。自珠爾默特納木扎勒滋事後。房屋入官。始行分駐。查前藏之噶木珠康撒爾住房。即係從前珠爾默特納木扎勒舊居。其地房屋寬敞。足敷駐藏大臣二人分駐。且同居一處。遇有公事即可隨時商辦。西藏貿易外番必須老成謹慎之第巴協同該處頭目專管卡契回民及巴勒布平日悉心撫馭。不許互相欺壓爭競。以便秉公調處。仍責令噶布倫等隨時訪察。倘有第巴頭人及官弁兵役倚勢勒買。苦累外番。即稟駐藏大臣拏究。一向來西藏遇有訟事係歸管理刑法頭人朗仔轄聽斷。俱照夷例分別重輕罰以金銀牛羊。減免完結。恐有高下等

弊。現在告知達賴喇嘛及噶布倫等。凡有關涉漢回外番等事。均令朗什轄呈報揀員會同審理。聶拉木、濟龍、絨峽三處均與巴勒布連界。邇來販運日多。巴勒布馱載貨物來藏貿易者。第巴收稅加至十分之一。易致爭執。以後止准減半收取。並令勒碑界所。長遠遵循。西藏鹽餉於沙土中創出。本不潔淨。應即於挖出時。交該處第巴查驗鹽餉成色。酌中定價。毋許故昂。任意勒買。駐藏大臣衙門向挑官兵應役。均無定額。將備以下。從而效尤。應酌定名數。按期更換。至駐藏大臣差遣官兵赴省製辦賞號之事。有曠操防。應咨明本省總督。飭有司代辦。遇便帶藏。並飭禁兵丁雇役番婦。以肅營伍。西藏噶布倫戴綱第巴等缺。辦理地方。管束兵丁。均關緊要。遇有缺出。應於誠實勤妥之子弟中慎選承充。至第巴營官商卓特巴等不下二三百缺。逐一奏補。未免過繁。應請將大處緊要地

方缺出。調驗補放。其偏遠第巴等缺出。仍令達賴喇嘛自行選擇。理藩院司員並駐藏遊擊。向未議給關防。懇勅部鑄給辦理藏番事務章京關防一顆。駐藏遊擊關防一顆。俾辦事呼應較靈。宗喀濟龍聶拉木等處為巴勒布往來門戶。收稅行鹽等事均關緊要。現在噶布倫等揀派第巴三人分頭安設。又選老成能事戴綱駐劄噶爾地方。統轄宗喀濟龍聶拉木三處。就近稽查。其缺較為繁重。請照阿哩第巴之例。由部發給號紙。以專責成。從前解赴打箭鑪口外兵餉。皆係元寶。迨後祇解碎銀。但自省至藏。萬里崎嶇。倘有碰失。各站易於推卸。況番地買賣交易。均以元寶成色為足。請嗣後仍照舊以元寶起運。西藏向有賞需一項。係蒙皇上軫念達木官兵素無錢糧。將三十九族每年所交例馬銀三百九十餘兩買辦緞布烟茶銀牌。按年獎賞一次。此外並無別款。今既

添設唐古武番兵按期操演經駐藏大臣親查自當照例獎賞請於川省閒款內加給銀五百兩飭辦緞布烟茶銀牌等項備賞一口外至西藏一切事務向歸駐藏大臣管理但裏塘巴塘與川省較近皆有土司管理原非西藏所屬應劃分綜理請自南墩迤西一路凡屬西藏所管之地照舊歸駐藏大臣管理其巴塘迤東土司地方歸川省將軍督提衙門就近管理至江卡乍爾察木多並移駐後藏各營汛臺站統歸駐藏大臣總理其巴塘裏塘安設塘汛官兵就近歸阜和協副將兼轄一打箭鑪出口以至西藏向於文職內派委州縣丞倅武職內揀派遊擊都司守備千總分駐辦理均三年一次更換該文武等官員遠役三年往返將及四載向來期滿並無保題陞轉之途嗣後請令駐藏大臣照金川營屯各員三年期滿出具考語奏明咨送本省將軍督提考察保題仿照邊俸報滿之例

一體陞用其駐防官兵過換班之期亦須選派妥幹以資防守得旨依議速行○禮部議覆陝甘總督勒保疏稱鎮西府及奇台阜康二縣各學生員均敷三十名之數請照例添設廩增各二名六年一貢查五十二三兩年陝省送部歲科考學冊鎮西共二十九名僅少一名應如所請其奇台縣止二十五名阜康縣止二十七名與例不符毋庸議從之○陝西副考官盛惇崇丁母憂以洗馬周興岱為陝西副考官○壬午諭軍機大臣曰浦霖奏伊在楚年久向不聞有地方官向水販需索之事等語水販接買轉售惟利是圖非在官承充家道殷實者可比伊等見前赴漢口販售官鹽途遠價貴不能獲利而私鹽無課價賤易於銷售又可以多為沾潤則官販即私販之人也前據全德奏有近年漢口湖南水販到者寥寥之語水販既不到漢口接買官鹽必係去而販私謀利浦霖何未思及耶

並著浦霖留心嚴查以期私販斂跡官引暢銷不可久而生懈徒以一奏塞責將此傳諭浦霖並諭全德知之○癸未諭曰長麟奏蒙陰縣地方山水驟發沂河宣洩不及浸塌民房四百餘間壓斃男婦十三名口親赴查勘分別照例給銀並將沿河各村被災較重貧民酌予口糧借給籽種令其趕種蕎麥五日之內已種七分有餘等語東省本年收成豐稔而蒙陰一縣猝被水患浸及田廬傷斃人口殊堪憫惻前經降旨令該撫確查撫卹酌量接濟今長麟遵旨將貧民衝塌房屋給銀修葺其被水村莊各散給一月口糧並酌借籽種趕栽蕎麥小民棲止口食有資自不致一夫失所但各村貧民被災較重尚應多為接濟使養贍益資寬裕該撫所請再酌借一月口糧之處竟當賞給以示格外體卹所有應徵新舊錢糧並著緩至來春麥收後再行輸納以副朕軫念災黎有加無已之至意該

部即遵諭行○甲申諭據勒保奏西寧回匪聚眾滋事先經官兵全行殺獲並親往搜捕餘黨審明辦理等語此案蘇代原等膽敢復興邪教糾集多人經官兵前往搜拿復逞兇拒捕不法已極該鎮道等於該犯甫經聚集之時即迅速查拿全行殲獲尚屬可嘉沐特恩蔡廷衡俱著交部議敘所有在事出力員弁並著勒保查明咨部議敘○諭軍機大臣等據勒保奏西寧回匪聚眾滋事經官兵全行殺獲並搜捕餘黨審辦一摺已交軍機大臣會同行在法司覈擬速奏矣又另摺奏查出形迹可疑之回民馬有成等二十四名請將該犯等會同家屬發往雲南廣西等省定地安插等語馬有成等雖名為改歸舊教而行蹤詭秘自非安分之徒自應概行發遣以示懲儆第雲南廣西等省近在內地該處均有回民或在彼又有煽惑亦非所宜已諭令軍機大臣等於覈議時改發黑龍江等處給

索倫為奴。自較為妥協。至該督奏稱甘省回民。從前新教居其大半。自四十六九年。大加懲創之後。改歸舊教者固多。而狡黠之徒。陽奉陰違。亦復不少。難保其不再生事端等語。因思回民舊教。自必多於新教。其飭禁之後。仍行暗習新教者。因查察甚嚴。不敢公然顯露。而舊教中人。見其行事各異。自無不知之理。何不乘此查辦時。曉諭舊教回民。令其將仍習新教之人。逐一指出。即可按名查緝。嚴行辦理。以期永淨根株。但須酌看情形。不動聲色。密為妥辦。毋得稍涉張皇。再蘇代原等各犯。業經傷斃正法。其家屬應行緣坐者。何以該督摺內。未經查明聲敘。著即照例辦理。毋少疎縱。將此諭令知之。○又諭前經刑部以新疆遣犯人數眾多。奏准少發該處。現在刑部定擬發遣各犯。已俱照此辦理矣。但外省審辦案件。有減死一等重犯。以及問擬軍流人犯。情罪較重。不足蔽辜。從重辦理者。

仍多奏請發往新疆伊犁等處。此等兇惡匪徒。同在一處聚集成羣。難保無糾約滋事之患。且年復一年。人數日益眾多。於該處地方。及約束收管。均有未便。嗣後應將問擬發遣各要犯。分往吉林打牲烏拉及黑龍江之索倫達呼爾。琿春等處。俾兇徒不致日聚日多。方為妥協。著交刑部堂官酌定章程具奏。即行文各直省。令其一體遵照。○又諭曰。書麟等奏。睢寧南岸周家樓漫口兩頭裹護已定。大河溜勢。仍有五分。非豫省漫口全行奪溜。者可比。且江南土性堅實。將備弁兵。請於堵築書麟蘭第錫。可以力肩趕辦。似可無須阿桂前往等語。所奏是。該處漫口。既經書麟等通盤覈算。白露前後。即施工進做。兩月內。可以堵合完竣。該督等復力肩其事。自不必再令阿桂前往。昨因韓鏞由江西回京。必經過江南。已令其就近赴工幫辦。著再傳諭書麟蘭第錫。自行酌量。若並可不用韓鏞在彼幫

辦。亦即據實奏聞。令其回京。至該督等前請於西壩上首稍遠處所。擬建挑水壩。挑溜歸入引河。係所應為。茲復遵照硃筆標識地方。斜往東北。建築雞嘴壩一座。有此兩層壩。挑溜當更得力。現距白露不遠。該督等宜勉力趕辦。以期漫口迅速堵竣。早慰朕懷。又據奏此次漫水下注。緣周家樓迤上郭魏二工。曾經漫溢。此一帶隄內地勢淤高。是以周家樓漫溢之初。溜勢頗覺汹涌。嗣漸平緩。皆由內地不甚窪下。所以不致多掣等語。前因該督等奏。漫水為湖水頂托。緊靠湖邊。張福引河而出清口。不致淤及湖身。因思周家樓距張福口尚有一百五十餘里。恐沿途不免淤高。曾諭令該督等設法籌辦。黃流挾沙而行。漫水歸入洪湖。即湖中亦未必全無淤墊。據該督等奏。不至淤及湖身。若果如此。固屬甚好。但水性就下。必使之宣洩有路。方免壅遏為害。今水勢既出歸仁隄而入安河下注。若

漸次澄淤。日高一日。設將來又遇盛漲。南隄以下淤高。不能南行。改為北徙。以致北隄著重。稍有疎虞。關係豈不更重。著傳諭該督等。於漫口堵合後。務詳細履勘。將此次沿途所積之淤。多方撈挖。留出河形。其起出淤沙。或即以培就近民田。於耕種既可得肥腴。而水勢亦有所疏洩。豈不一舉兩得。至湖身倘有受淤之處。亦當設法疏濬。不可迴護。以致將來不能多為容納。其五壩迤下高寶諸湖之水。若能使漸次入江。不至下河受患。則更妥善。該督等當熟商會籌。次第妥辦。不可畏勞惜費也。○又諭據書麟覆奏。安徽學政徐立綱。前在學政任內。聲名實屬狼籍。自復任以來。頗知收斂。然竟謂三年之內。全無劣蹟。臣不能保。現又密加察訪。一得實蹟。即行據實陳奏等語。徐立綱於前次任內。身名既屬狼籍。該省巡撫。何以不即據實奏。彼時巡撫係屬何人。書麟摺內。何以不即聲明具奏。現

在雖據實奏稱尚知收斂並無劣蹟。但此等作奸犯科之事。自然不敢使人聞見。焉知不比初任倍加秘密。以致無從得其端倪。況此等貪劣之員。亦斷不肯改悔。斂戢著書麟設法訪查。務將徐立綱實在有無劣蹟。據實奏聞。毋得稍涉迴護諱飾。代人受過。將此由六百里再行密諭知之。○軍機大臣議覆。山西巡撫海寧。陝西巡撫巴延三。同日奏到酌辦查禁私販大黃事宜。海寧奏大同府沿邊一帶。界連蒙古。與俄羅斯較近之地。所需大黃。各赴內地購買。令其呈明地方官。發給印票。註明勛數。行知經由關口驗票放行。如私行夾帶。及無票之商。即行拿究等語。應如所奏。遵照酌定章程辦理。至巴延三奏。請將內地各省販運大黃。通行編給印票。層層咨報。處處照驗等語。誠恐辦理過當。必致胥吏藉端勒索。種種滋弊。所奏應毋庸議。嗣後大黃一種。自應遵奉諭旨。止須於各省沿海口岸。及

直隸山海等關口近邊地方。嚴密稽查。即陝甘兩省。止須於嘉峪關榆林等處密查。毋許偷越。其內地如臺灣瓊州。崇明等處。地懸海外。仍著各該地方官酌定限制。給票呈驗。以防私販。其餘各府州縣均聽照常販運。毋庸給發官票。以免紛擾。從之。○以光祿寺卿武隆額為奉天府府尹。○豁除江蘇丹徒縣圯江田地三十一頃七十八畝。有奇額賦。○是月欽差侍郎伊齡阿奏直隸省有旗租地方共七十七州縣。拖欠旗租者十一州縣。其鹽城拋荒佃戶逃亡。以致租銀無著者。交河滄州南皮青縣四州縣。惟南皮縣四頃有零荒地。實係隄占水衝。已照例開除外。其餘三處荒田。並非不可耕種之地。良由包攬交租之人。豐年則完課之餘。藉為分潤。一遇歉收。則佃戶以承認有人。拋地他往。包攬之人。即藉口無人頂認。年復一年。致令旗租無著。前經署總督大學士英廉通飭各州縣一體禁革。

以杜逃亡隱射之弊。臣查悉前情。即面飭州縣嗣後如有逃避之戶。務即隨時招認。不得仍前顛預滋弊。再查各屬新舊積欠簿冊。均係實欠在民。尚無隱混侵蝕等弊。其未經查辦之安肅。清苑等十一州縣。及所有拖欠租銀。尚當以次查覈具奏。得旨。俟查清奏到。有旨。○直隸總督劉戡奏。覆靈壽被災等戶。其房屋木料。未經衝失。高阜田禾。亦無妨礙。低窪處間。有受傷。其坍塌房屋之十餘戶。現給修費銀。乏食貧民。現在撫卹。淹斃男婦四名。口給棺殮埋。至蠡縣之孟嘗劉佃。二處衝決之所。現已搶築合龍。田禾被傷者。酌借籽種。俾得補種。并勸義倉米穀。借給口糧。再現因雨水稍多。以致近河之清苑。望都。安州。雄縣。高陽。任邱。河間。景州。獻縣。廣平。靜海。滄州。灤州。定州。趙州。隆平。寧晉。保定。東安。武清等二十州縣。低窪地畝。間被浸淹。現在上緊疏消。并查勘災戶。分別辦理。得旨。不可諱災。詳悉。

查辦。○安徽巡撫陳用敷奏。泗州界連江蘇省睢寧縣。因彼處周家樓一帶。被水漫溢。下注。泗州境之赤山。青陽等堡。田廬間被水淹。現在設法宣洩。若及時消退。尚可補種蕎麥雜糧。并飭布政使陳步瀛。赴勘。查有實在情形。即行奏報。得旨。妥協為之。應賑卹者。即賑卹。毋諱災。

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十三

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十四

監修總纂官經筵講官太子太傅文淵閣學士文淵閣領侍衛內大臣稽察欽奉 上諭事件處等謹

史部理藩院掌書黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部三庫事務

世襲騎都尉軍功加十九級隨帶加三級又加二級尋常加二級軍功紀錄一次臣履歷滿洲都統軍功紀錄五次

尋常紀錄十四次臣德馨經筵講官太子太傅工部尚書紀錄六次臣曹振鏞等奉

教修

乾隆五十四年己酉秋七月乙酉朔享

太廟遣莊親王綿課恭代行禮。諭軍機大臣
等據全德奏詢在揚各商僉稱近接漢口來
信閏五月以來湖南水販來者日多據各水
販稱督撫查緝私鹽甚為嚴緊販鹽到彼可
以速銷。是以上緊前來販運等語。湖南官引
滯銷已久。自係私鹽未淨。如該督撫等果能
飭屬實力緝私。何慮官鹽不行。今自閏五月
以來水販至漢口日漸增多。可見畢沅浦霖
等從前並未嚴飭所屬查禁私鹽。以致水販

裹足不前。私鹽得以充斥。經朕節次降旨飭
查。始行上緊嚴緝。私鹽水販聞風源源而至。
則是私鹽一經禁絕。官引自可暢銷。不致壅
滯。其效立見。著傳諭畢沅浦霖等務須飭屬
時刻留心實力查禁。毋再如從前之玩愒。致
干咎戾也。再全德摺內稱湖南鹽觔既可暢
銷。則漢口益宜儲積充足。現飭各商倍加趕
運。以供各販運買等語。所辦好。自當妥為經
理。俾運岸鹽觔充裕。湖南水販得以源源接

濟。不致稍有短缺。將此傳諭畢沅浦霖。並諭
全德知之。○又諭曰。陳用敷奏。安慶府屬之
懷桐等縣。並寧國池州等五府州屬。及和州
廣德州二屬。六月以來。晴燥日久。農民望澤
頗殷。現在率屬虔禱等語。時居六月。正當遲
禾長發之時。全賴澍雨。頻懇以資芡茂。今寧
國等府州屬。既經望澤。該撫等自應率屬虔
誠祈禱。以冀甘霖早沛。現在是否已得優澤。
於田禾有無妨礙。著傳諭陳用敷。即飭屬查

明據實覆奏以慰厯注。又據該撫另摺奏稱安省之泗州地方界連洪湖。據該州稟報現在黃水下注。由謝家溝等處繞入洪湖。一時不能暢洩。所有泗州之赤山青陽等堡低窪處所田房間被水淹。業經設法宣洩。並飭藩司陳步瀛親赴該州逐一履勘等語。黃水繞入洪湖。一時不能暢洩。以致近湖低地間被水淹。急應設法疏洩。及早涸出。尚可乘時補種。並著傳諭陳用敷於該藩司親勘後查明被淹地畝若干。民房有無坍塌。是否有礙秋收。如有應行賑卹之處。即一面賑卹。一面迅速奏聞。候朕酌量加恩。勿稍諱匿。該撫等務宜加意經理。毋使災黎失所。方為妥協。尋奏寧國池州等府州屬於六月下旬得雨。安慶省城於七月初六七及初十日連得透雨。秋收可期。中稔。至泗州一帶難免偏災。然並未傷損人口。倒塌房屋。惟秋成失望。自應給賑。得旨是。妥為之。○又諭本年春間勒保進京

召見詢以甘省地方回民情形。據稱自四十六九等年大加懲創之後。業經一體悔悟。改歸舊教。並無仍從新教之人等語。昨據該督奏蘇家堡回民蘇代原復興新教聚眾拒捕傷斃兵民不法已極。是該處新教仍未盡絕根株。係其明驗。從前福康安任陝甘總督時。悉心籌辦。回民俱各安分守法。從未聞有糾眾滋事之處。勒保接任以後。如果認真查察。將新教餘孽密訪嚴拏。盡法處治。何至匪徒仍復公然聚眾。念經致有抗拒官兵之事。是其積漸廢弛。不能實力整頓。已可概見。勒保著傳旨申飭。至蘇代原等係在蘇家堡居住。當官兵查拏時。俱退入堡內房上。拋打石子。前此勒保曾經面奏。所有回民山坳內堡房已全行拆毀。今該犯等在蘇家堡居住。以致聚集多人。拋石拒捕。使兵民不能向前。是回匪仍然有築堡聚居。將來即可恃以為據守之地。甚非所宜。嗣後除現在所有堡房未

便遽令拆毀。致有滋擾。外如有隨時坍塌者。即可不必令其補造。可以由漸盡去。該督即飭屬留心辦理。仍須不動聲色。行所無事。固不得稍存疎懈。亦不可過涉張皇。致胥役藉端擾累。將此諭令知之。○又諭曰。陳杰奏。於六月初七日到任。即親往定海。黃巖。各洋面查看情形。督緝盜匪。實力整頓等語。浙江武備廢弛已極。亟宜加意整頓。伍拉納係閩浙總督。兩省營伍。皆其所轄。陳杰係新調該省提督。伊二人務宜同心協力。認真整飭。俾戎行漸有起色。不可復分文武。稍存畛域之見。又據另片奏。健跳洋面盜匪行劫一案。經遊擊董秉玉。拏獲盜犯林飛。王五二名。訊據供稱。同夥盜船共有七隻。盜犯百有餘名。此言不可信。又係綠營化大為小。惡習。署叅將張殿魁探聞大門洋有盜船六隻。在彼停泊。帶兵往捕。見有落後盜船一隻。盜衆即約有百數十人。各執叉刀鎗礮等語。林飛等同夥盜

船有七隻之多。其所供百餘人之處。斷不可信。至大門洋盜船六隻。一隻之內。即有百數十人。則合之其餘五船。豈不竟有七八百人。如此糾衆逞兇。肆行劫掠。若不及早嚴辦。將愈聚愈多。勢必釀成海寇。該督撫提鎮等。詎能當此玩誤之咎。陳杰現親赴各洋面督緝。伍拉納前據奏。即往閩浙交界處所。亦即傳諭該督。竟應親至溫州一帶。會同陳杰。琅玕。督率兩省弁兵。分投截捕。將健跳大門兩案盜犯連行全數弋獲。盡法懲治。勿任一名漏網。務須親赴各海口。留心稽查。多派能事弁兵。密蹤盜匪。出沒蹤跡。窮究根株。肅清洋面。方為妥善。再前因伍拉納奏。署叅將張殿魁帶兵巡至大門外洋時。哨船與盜船相遇。各兵隨即施放鎗礮。恐該員有畏賊放礮情事。已有旨交伍拉納等。就近確查。今聞陳杰所奏。果係張殿魁當先放礮。海洋捕盜緝匪。全在密速追擒。若一見賊船。先行放礮。是與賊

以退避之信甚或知所防備轉得以肆兇抗拒此總由綠營畏葸陋習最為可惡使張殿魁尚在亦當治以應得之罪今念該員已受傷殞命不加追究但伍拉納陳杰等宜嚴加通飭各營將備弁兵嗣後巡緝盜匪務宜迅速追擒不可與賊相距尚遠輒先放鎗斃致賊遠颺復蹈從前怯懦積習將此由五百里傳諭知之仍將如何會同截捕及盜犯曾否全行就獲之處速行覆奏○定滇省廠員給

領銅觔限期軍機大臣會同戶部遵旨議奏各省委員採辦滇銅自起程及運銅回省均有定限惟到滇交價以後至在滇開行以前例無明文請嗣後各省辦銅委員先後到滇者儘先到之員給發同時到者儘遠省之員給發委員一到滇省即將應辦銅觔指定廠所何廠撥銅若干觔應定限若干日統計何年月日可免交委員領運開單咨部存案俟奏報開行時將廠員給領有無逾限於摺內

聲敘戶部逐運查覈如廠員逾限不給照運員在途逾限例議處免給銅觔如有低潮准該委員稟換若因換銅誤限亦應將廠員照例議處若委員並未稟換至本省驗明不足成色即將委員查叅從之○丙戌諭軍機大臣等據德成等奏查勘嘉峪關一帶邊牆情形該處多係浮沙所有此項壞墻垣修補挑挖仍屬不能經久毋庸辦理惟查嘉峪關係西陲門戶為外藩朝賀來往通衢舊有門樓等項局面狹小並有斷朽閃裂之處應請另行修建等語邊牆道里綿長今昔異勢且該處取水既難沙性又復鬆浮旋修旋圯究屬不能經久何必徒滋勞費德成等所奏甚是至嘉峪關為外藩朝賀必經之地該侍郎等因舊有城樓等項規模狹小年久未免斷朽閃裂請另行修築估需工價不過五萬餘兩為數無多著即如所請辦理以昭整肅而壯觀瞻將此諭令知之○漕運總督管幹珍

巡視東漕御史和琳奏。南糧幫船已全出山東境。東省撥船現無需用。查直隸楊村地方必須迅速輪撥。方能剋日抵壩交倉。該省撥船一千五百隻。固足敷用。如再令山東撥船三百隻。造赴楊村幫辦。撥運更速。得旨嘉獎。又批。所想合宜。○丁亥。諭。前因寶光鼎前來行在謝恩。召見詢及各省學政。居官如何。據稱上江學政徐立綱。人品聲名俱甚平常。隨降旨密詢書麟。陳用敷令其將徐立綱兩任在安徽考試情形。有無貪劣實蹟。據實查奏。茲據該督撫先後覆奏。徐立綱前任安徽學政。聲名實屬平常。但無確實劣蹟。自復任以來。考選尚知謹慎等語。各省學政。如果永兢自矢。校閱公平。何至衆口一詞。不孚物議。上年因謝墉。吳玉綸在學政任內。聲名不好。曾將伊二人降調。以示懲儆。徐立綱以編修微員。經朕簡用。學政更當如何感激。益勵潔清。乃竟不知自愛。致有廉隅不謹之處。現在雖

無確據。但似此聲名狼籍。其何以勝校士掄才之任。徐立綱著來京。以司務博士等官降補在武英殿修書處効力行走。其提督安徽學政著吳璥去。○又諭。據琳寧等奏。免死為奴人犯袁文貴。將家長之母砍斃。現已拏獲。凌遲等語。所辦是。此等發遣人犯。皆免死為奴者。交該家長收管。如聽從服役。自不得致之死地。如不服約束。肆行強橫。即行杖斃。於該家長並無不合。著交都爾嘉於伊到黑龍江後。通行曉諭知之。○諭。軍機大臣等。安徽學政徐立綱。現已有旨令其來京。以司務博士降補矣。此時鄉試已將屆期。該省尚有考錄遺才等事。正需趕辦。恐新放學政到任未能迅速。或致辦理不及。陳用敷係本年鄉試監臨。且係科甲出身。著傳諭該撫。於新任學政未到之前。即將錄遺考試各事宜。代為悉心趕辦。毋使掄才大典稍有遲誤。○又諭。據巴忠奏。已勒布王子巴都爾色赫。普年甫十

五從前承襲伊父部長時年止八歲並非新近承襲等語朕詳閱摺內所敘情節瑣屑繁冗皆係無關緊要且並未提及沙瑪爾巴呼圖克圖之事尤為錯謬沙瑪爾巴呼圖克圖由巴勒布前來辦理兩邊事務巴忠理宜候其來見諭朕嘉予之意乃竟棄置而回實屬非是且巴忠係理藩院侍郎熟悉唐古忒言語以其檢知彼處情形故特遣令前往尤非鄂輝成德可比有何迫不及待遽爾先回耶前已有旨令其仍回扎什倫布接見沙瑪爾巴呼圖克圖想巴忠於發摺時尚未接到著再傳諭該侍郎於接奉前旨後即行趕回務與沙瑪爾巴呼圖克圖相見遵旨宣示一切再行來京或沙瑪爾巴呼圖克圖已見其兄仲巴呼圖克圖仍回至巴勒布則巴忠竟在扎什倫布暫為留駐遣人名之使來倘名之而不肯復來則其咎在沙瑪爾巴呼圖克圖倘仍不俟其來相見則其咎即在巴忠更無

可逕況沙瑪爾巴呼圖克圖既係解事之人自無不欣然就見也○軍機大臣等議覆杭州將軍寶琳奏稱乍浦旗兵自乾隆三十三年裁披甲一百名今年久生齒浩繁旗兵不免拮据請於閑散內仍挑補披甲一百名每名月給銀一兩應如所奏從之○戊子諭曰盛住在新疆已及三年著來京另行簡用其庫爾喀喇烏蘇領隊大臣員缺著策拔以頭等侍衛職銜前往更換○諭軍機大臣等據劉秉恬奏雲南委員黃澍領運京銅九十四萬一千九百餘觔行至四川大湖灘大黑石灘暨湖北江陵縣馬家賽地方三次遭風沉溺除撈獲外共計未獲銅二十萬餘觔該員存費留在彼打撈殊非慎重銅運之道請嗣後銅鉛錫船過境遇有沉溺即令道府大員馳往確勘並催令上緊撈獲等語銅觔沉溺至二十餘萬之多雖經該委員留在彼不過有名無實安能盡數撈獲并恐照料不

及或被人潛行盜取。均未可定。且安知非船戶人等串通作弊。尤不可不嚴查確勘。劉秉恬請派大員往驗。所奏尚是。著傳諭李世傑。畢沅等。即派道府一員。前赴大湖灘。馬家賽等處。督率地方官。多雇熟識水性人夫。務將黃澍所報沉溺銅船。速行全數撈獲。嗣後該督撫等。於銅鉛錫船過境。遇有稟報沉溺之事。務須照此辦理。勿任有捏報盜賣等弊。將此并諭劉秉恬知之。○又諭曰。陳莊奏。據報署寧海營參將張殿魁。在大門洋。緝拏盜匪。被盜拒傷身死。即赴該處追捕。並請嚴加議處等語。同日又據陳杰奏。由寧波至溫州。水程遙遠。現值頂風。不能迅往。現由陸路兼程前往。此案盜匪。在洋糾合多人。肆行劫奪。經官兵追捕。膽敢逞兇迎拒。並將參將大員。殺傷落水。不法已極。若不及早嚴辦。將來盜匪愈聚愈多。勢必釀成海寇。尚復成何事體。現在伍拉納。琅玕。陳杰俱已前赴該處。務宜遵

照節降諭旨。督率弁兵。迅速查拏。將盜犯全數弋獲。盡法懲治。此等匪徒。出沒洋面。或一時不能得有蹤跡。但其搶劫貨物。俵分後。必須進口陸續攜至內地銷售。再各回籍養贍家口。其賊據無由消滅。前據陳杰奏。拏獲健跳營一案盜犯林飛。王五二名。供係福建泉州府晉江縣人。琅玕亦奏。稱訪聞洋面盜犯。晉江惠安等縣民人居多。伍拉納係閩浙總督。福建亦其所轄。該督當另派能事員弁。密帶兵役。於泉州一帶各海口。暨盜犯原籍多方躡緝。並飭地方官清查保甲。奸宄從何竄匿。況張殿魁所帶兵丁內。有受傷救回者。各盜犯年貌。該兵丁等自尚能辨識。或即令赴泉州。作為眼目。留心緝拏。但一得賊犯破露。便可根究蹤跡。無難立時捕獲。不可僅於溫州等處查拏。致盜犯潛回本籍藏匿。或更聞風遠颺。就獲轉需時日。至張殿魁以參將捕盜。受傷身死。已屬不成事體。該督撫等俱係

大員更不可冒昧涉險。著傳諭伍拉納、陳杰、琅玕、惟在實力督飭兩省文武員弁分投截捕。自能窮究根株。肅清洋面。原無庸輕於洋面赴險查緝。或致稍有疎虞。更不成事。體其原署叅將張殿魁一見盜船。當先放礮。實為綠營惡習。海洋捕緝盜匪。全在密速追捕。設或因兵少盜多。實在不能拘獲。何妨收回哨船。再行稟報該管鎮將添兵前往趕捕。何得輒先放礮與賊以退避之信。甚至如此。業盜

犯知所防備。得以肆兇抗拒。雖張殿魁已受傷身死。不加追究。該督撫等仍當遵照前旨。通飭各營勿再蹈從前怯懦惡習。再大門洋地方是否係溫州鎮所轄。該鎮有無處分。著將陳莊本日奏到之摺鈔寄伍拉納等閱看。令其一併查明具奏。將此由六百里各諭令知之。仍將如何會商截捕及盜犯曾否就獲之處速行覆奏。○以五品頂帶哈密辦事穆和蘭為光祿寺卿。○己丑諭曰。閱鶚元奏。周

家樓漫水下注。邳州等處田廬致有淹沒。坍塌被水災民現在散給口食以濟貧困。其桃源清河等處。瀕臨洪澤湖村莊間有淹浸。又阜寧縣灘水上漲亦有被淹之處。現在親往查勘等語。黃流漫口下注。民田廬舍間有淹浸。該撫既親往查勘。亟應妥為撫卹。所有睢寧、邳州宿遷桃源被水各村莊無分極次貧民著先行賞給一月口糧以資接濟。並著查明成災輕重按月給賑。其安東清河阜寧等處亦著一併勘明如有成災處所即行分別辦理。該撫務須督率所屬實心經理。俾小民均霑實惠。毋致一夫失所。以副朕軫念災黎至意。該部即遵諭行。○諭軍機大臣曰。畢沅奏今年江水實比常年為盛。較之去歲僅低五尺。係屬汎水極大之年。荊州萬城隍工程完固。均臻平穩等語。荊州上年甫罹水患。萬城各隄工皆係新築。非舊有隄塍可比。況據該督奏。此次江流盛漲為汎水極大之年。早

應親往督率防守。以昭慎重。其道府各官。有在工出力者。亦可就近查明具奏。加之鼓勵。乃畢沅竟安坐省垣。並不親往防汛。不知誰奪其聰明。以至錯謬至此。實屬大奇。此時汛水已過。亦不必去矣。仍飭該管官。妥為修防。毋得稍存大意。今年汛水安瀾。本欲將該督暨道府等。一併交部議叙。茲畢沅既不親身前往。不值再加甄敘。其地方各官內。有實在奮勉者。仍著查明咨部。分別議敘。以示鼓勵。將此諭令知之。○庚寅諭軍機大臣等。本日蘇凌阿韓鐸奏。勘明江西鳳凰灘等處。今春糧艘阻滯緣由一摺。於摺尾聲稱。即起程馳赴行在復命等語。又據韓鐸另摺奏。接奉幫辦堵築睢寧漫口諭旨。即日兼程前往。及閱摺內夾片。奏報途次雨水情形。則仍係蘇凌阿韓鐸雙銜。已各用硃筆點出。該侍郎等在江西查辦事件完竣。回京復命。韓鐸因接奉諭旨。令其至江南幫辦堵築漫口。既已兼程

前赴睢寧。則其覆奏摺內。附陳途次雨水情形。何妨各自單銜具奏。乃仍列入蘇凌阿之銜。殊屬牽混。徒亂人意。蘇凌阿韓鐸著飭行。本年糧船抵通較早。目下正當起卸之時。必須趕緊辦理。俾回空迅速南下。以符冬兌冬開定制。蘇凌阿且不必前來行在。接奉此旨。著即回至通州。與劉秉恬趕辦起卸諸務。俟事竣。再來行在復命。韓鐸仍遵前旨。前往睢寧。與書麟等會商堵築事宜。將此由五百里各諭令知之。○又諭。據僧保住奏。配所脫逃之遣犯王淘氣。蔡和尚二名。被旗民兵役緝獲等語。緝獲人犯兵役人等。必有首先往拏者。自應查明獎賞。今概稱旗民兵役緝獲。為冀免處分起見。殊屬非是。僧保住著傳旨申飭。並傳諭東三省將軍。副都統。嗣後拏獲人犯。務將何人先行拏獲之處。聲明奏請獎賞。毋得似此牽混。○又諭。本日據盛京侍郎僧保住奏。吉林遣犯王淘氣。商同蔡和尚脫逃。

行至寧遠州地方。被査街旗民兵役拏獲等語。遣犯在配脫逃。該管文武衙門。自應各派兵役上緊躡緝。如有拏獲之案。即照例量加議敘。以示鼓勵。今僧保住所奏逃遣王淘氣。及蔡和尚二犯。自必有首先盤獲之人。乃輒稱被査街旗民兵役等羣將該犯拏獲之語。殊屬無謂。豈有該處旗民兵役。同時拘獲二犯之理。因思外省地方文武各官。往往規避處分。遇有査緝逃犯案件。所獲人數。僅止一

二名。亦必敍入兵役協同拏獲字樣。冀免處分。致究係何人緝獲之處。轉不明晰。殊為外省惡習。除僧保住另行降旨申飭外。著傳諭各省督撫。嗣後如有拏獲案犯。或係營兵。或係衙役。務須據實奏明。毋得稍存規避。致蹈牽混陋習。○又諭。熱河自入秋以後。雨水較多。日來陰雨連綿。尚未開霽。現在派回子祈晴。想京師近日。亦必雨水過多。於農田恐無妨礙。著傳諭留京辦事王大臣一體祈晴。

○以編修裴謙為河南鄉試正考官。編修陳萬全為副考官。戶部主事陳廷慶為副考官。編鄉試正考官。戶部主事陳廷慶為副考官。編修秦承業為山西鄉試正考官。庶子李潢為副考官。○辛卯。諭本年永定河水勢盛長。劉我親駐在工。督率保護。隄埝穩固。得慶安瀾。劉我著交部議敘。其在事搶護員弁。並著該督查明咨部。分別議敘。○旌表守正捐軀河南上蔡縣民周道來妻陳氏。○壬辰。諭本日

新授奉天府尹武隆額前來行在謝恩。召見看其精力就衰。實難稱職。武隆額著仍回光祿寺卿本任。其奉天府尹員缺。即著穆和蘭補授。並令即赴新任。不必再來行在請訓。○又諭曰。鄂輝等奏。隨征屯土備弁。請照所得職銜。支給鹽糧。並請將隨營辦理糧務。染瘴病故之降調知府現任成都府通判孫鐫賞給知府原銜等語。川省屯土備弁。屢經出力。此次派往隨征。亦屬奮勉。所有應得鹽糧。著

准其照現在職銜支給。其病故通判孫鵠承辦糧務尚屬出力。亦著照所請。賞給知府原銜以示矜卹。○諭軍機大臣等。據宜興奏。奉天所屬地方。六月內。每三四日遇雨一次。各項禾苗。已陸續秀穗。青蔥彌望。即低窪地畝。偶有被水之處。一經晴霽。漸就消退等語。奉天上年甫被水災。雖經賑借兼施。朕心深為廕念。宜興此摺。係六月二十六日拜發。七月以來。熱河連陰數日。昨始開霽。未知奉天地方雨水若何。其低窪地畝。曾否全行消退。於田禾有無妨礙。是否尚須量加接濟之處。著傳諭高椿。宜興。即詳細查明。據實迅速覆奏。○又諭。據鄂輝等奏。巴勒布王子。復遣大頭人赴營稟稱。情願具表納貢。永歸王化等語。巴勒布王子。已都爾色赫普。於上年即欲呈獻貢物。因駐藏大臣等。隱匿不奏。未及舉行。今復遣頭目。抒誠進貢。恭順可嘉。現交軍機大臣存記。俟其來使呈齎表貢至京時。再行

酌量施恩。予以封爵。並賞給該頭目等職銜。用示鼓勵。著傳諭鄂輝等。俟巴勒布頭目恭齎表文貢品到藏。即派委妥員護送進京。一面先行具奏。○又諭。據鄂輝等奏。巴勒布復遣大頭人前來。呈請進表納貢一摺。內稱。巴勒布王子。名喚喇納。巴都爾。伊叔大頭目。名喚巴都薩野。前據奏到摺內。又稱。伊王子。名巴都爾色赫普。伊頭目。名蘇爾巴爾達布哇。前後所奏。名字各不相同。巴勒布既抒誠納貢。願附外藩之末。將來貢使到京。自應按名賞以品級。即賜伊王子勅書內。亦應填寫姓名。似此稱名互異。何以辦理。此皆因鄂輝等未諳唐古忒語。巴忠又不在彼會同妥辦。遽爾遣歸之故。著傳諭巴忠。於會見沙瑪爾巴呼圖克圖時。務將巴勒布王子。究係何名。伊叔及總理事務大頭目。又何姓氏。一一詳悉詢明具奏。又據鄂輝等奏。沙瑪爾巴呼圖克圖。向穆克登阿。張芝元告稱。巴勒布王子。頭

目尚能聽我言語。但現在雖能約束。若再有接續之人。令在濟甯附近廟宇居住。方有裨益等語。沙瑪爾巴呼圖克圖。能憑誠相告。甚屬可嘉。現在巴勒布人等。雖聽伊指示管教。若無接續之人。於事究屬無益。但摺內未將濟甯附近地方。何廟可以居住。及廟內有無大喇嘛住持之處。詳晰聲敘。此等事件。亦當已忠在彼辦理。而巴忠概置不問。鄂輝等又不能通曉所言。以致糊塗。若此。朕思濟甯既與扎什倫布相近。自應仍在後藏。揀擇一曉事喇嘛。令其赴彼居住。方於衛藏有裨。並著巴忠回至扎什倫布。即會同沙瑪爾巴呼圖克圖。及仲巴呼圖克圖。戴綱堪布等。悉心商酌。選擇妥實喇嘛一名具奏。或問伊等平日有無深知可信之人。公同保舉。并應在濟甯何廟居住之處。速行酌議奏聞。○吏部等部議覆。安徽巡撫陳用敷等疏。稱寧國府屬涇縣之九都十都。與太平縣之盛村曹村等處。

接壤各離縣城。窩處叢山密箐。最易藏奸。查涇縣九都之查村。為涇太兩邑交界。請將涇縣縣丞移於查村駐劄。鑄給涇太分防查村縣丞鈐記。如遇俸滿甄別。仍歸涇縣舉劾。廉俸仍舊。衙署另建。再於查村盛村各添設墩房一處。兵六名。在宣城縣灣沚汛內抽撥。又於徽州營撥右軍外委把總一員。移駐查村。歸寧國營管轄。應如所請。從之。○癸巳。諭軍機大臣曰。劉戡奏直隸今夏雨水稍多。七月初二三等日。又復密雨。竟日。除前奏清苑等二十州縣低窪田畝。間被淹浸外。又據永清祁州等九州縣稟報。河水漲發。漫及低窪道路。田禾亦間被淹浸。現飭該管道府履勘辦理。並妥設濟渡等語。本年夏秋雨水稍多。直省清苑永清等二十九州縣。均因河水漫溢。低窪地畝。先後被淹。現在天氣開霽。復經該督分飭各道府。確切勘辦。設法疏消。但究恐窪地田禾。不免損傷。著傳諭劉戡。務宜督率

所屬詳悉各辦。如有成災處所。即據實奏聞。加意撫卹。俾小民均受實惠。不可稍存諱飾。仍將通省秋收除被淹各州縣外。即速查明。先行統計。究有幾分。迅速具奏。以慰厯念。○軍機大臣等議覆。四川總督李世傑奏。稱川省並無海岸。各商販買大黃。無庸定以限制等語。應如所奏。浙江巡撫覺羅琅玕奏。稱江廣客商販運大黃來浙。並浙商赴川。俱應官為給票等語。查內地州縣定例。毋庸領票。惟乍浦。寧波。溫州。各海口。應飭查每許偷漏。其定海一縣。地處海外。應照臺灣。瓊州。崇明等處。例地方官給與官票。從之。○以太常寺卿孟邵為宗人府府丞。○甲午。

孝懿仁皇后忌辰。遣官祭景陵。○諭。向來北倉截留漕船米石。所有轉運通倉水腳銀兩。俱係坐糧廳墊發。仍於該旗丁名下扣繳歸款。但思此項腳費。如係幫船行走遲延。不能依限赴通交兌。在北倉暫行

留貯者。自應旗丁出資運送。若漕船本可如期抵通。因奉特旨截留北倉。以備撥用者。原與旗丁無涉。即當官為轉運。從前概令旗丁繳費運通。辦理未為允協。嗣後各省糧艘。有趨行未能迅速。抵通遲誤。恐致沿途阻凍。不能及早回空。在北倉截卸。其運通腳費。自當照例扣繳。如係似此特旨截留者。即著動支官項辦理。以示朕體卹旗丁至意。○又諭。據恒秀將寧古塔副都統安臨。審明定擬具奏。各省副都統。如有以親老奏明者。朕皆施恩留京。仍以八旗副都統簡用。安臨之母年老。即應先行奏明。乃懸棧不奏。既以伊母乘轎為名。私行乘轎。又開設賭場。以賤價買商人人。變更屬卑鄙無恥。安臨著照所奏。發往伊犁効力贖罪。○諭軍機大臣等。留京王大臣等奏。京師自入秋以後。陰雨連綿。初四五日兩夜。雨勢更大。初六日漸止。初七八日間。有雲氣往來。恐天色尚未能暢晴。是以即於初

八日飭令回子祈晴並據順天府尹奏從此暢晴於農田收穫尚無妨礙等語京城入秋以來雨水既多何以留京王大臣及該府尹等均未隨時奏聞直待朕降旨詢問始行具奏並於初八日方令回子等祈晴現在天氣雖已開霽而陰雨日久究恐食物未免價昂且貧民房屋亦恐多有坍塌低窪田畝不免淹浸著傳諭留京王大臣等即體察情形如有需平糶接濟之處即一面奏聞一面會同都察院順天府妥協辦理再順天所屬秋收究竟是否不至妨礙統計共有幾分糧價有無增昂之處並著將賜榮吳省欽即行查明據實具奏勿稍諱飾尋留京王大臣及將賜榮吳省欽等奏秋收不至妨礙糧價平減無需平糶接濟報聞○又諭昨據劉我奏清苑等二十九州縣因河水盛長低窪地畝先後被淹業經傳諭該督確勘妥辦毋稍諱飾又奉天上年甫被水災前據宜興奏六月內每

三四日遇雨一次低窪處所間有被水一經晴霽漸就消退等語並經諭令嵩椿宜興查明具奏本年直省夏秋雨稍多目下雖已開霽低窪田禾究恐不免損傷況奉天為上年被災之區尤不可不豫籌接濟將來查明後或有需賑卹之處此時江西各幫想未過津關莫若於該省幫船內酌量截留二三十萬石卸貯北倉不必再運至通州在江西糧艘既可及早起卸回空受兌而奉天及直隸等處倘有需用米石亦可就近分撥接濟劉我現在省城筵宴安南使臣劉秉恬亦在通辦理收兌事宜均不能分身到彼著傳諭蘇凌阿於回途之便即逕赴北倉將截留各事妥為經理如江西各船有已過津關者不必拘泥追回止須儘在後各船米石起卸存貯備用將此由五百里各諭令知之○又諭昨據宜興奏奉天所屬地方六月內雨水稍多低窪地畝間有被水之處業經降旨令嵩椿

等將田禾有無妨礙。查明覆奏矣。穆和蘭新授奉天府尹。現在想已起程。前赴新任。奉天上年甫被水災。雖經賑借兼施。恐民力未臻饒裕。今夏雨過多。低窪地畝復經淹浸。朕心深為厯念。著傳諭穆和蘭。於赴任之便。沿途留心察看。低窪積水。曾否全行消退。不致有礙田禾。現在已諭令劉我等。將江西各幫糧米截留數萬石。存貯北倉。豫備需用。如奉天被災處所。應行接濟。即由海道運往。較為便捷。穆和蘭到彼。即與嵩椿等商酌。先將該處被水地方。逐一查勘。如無需米石接濟。即據實具奏。若有應行賑糴之處。亦即詳悉查明酌量數目。迅速奏聞。以便於北倉貯備米石。照數撥運。俾小民口食有資。不致拮据。穆和蘭曾任道府。於一切辦災事宜。自所諳悉。務須詳加履勘。妥協辦理。毋使一夫失所。將此傳諭穆和蘭。並令嵩椿宜興知之。○又諭。現因奉天與直隸地方。低窪田畝。間有被淹。恐

將來查明賑卹需用米石。已傳諭劉我暨倉場侍郎。於江西各幫內酌量截留米二三十萬石。在北倉存貯備用矣。但劉我與劉秉恬俱不及分身前往。蘇凌阿由江西回京。尚須時日。該處之員。照料督辦。和琳於上月三十日。在德州起身。想現距熱河不遠。著傳諭該御史。於何處接奉此旨。即於何處轉回。速赴天津北倉。辦理截卸諸務。總俟截留事竣。再來行在復命。亦不為遲。此次截留漕米。原為被水地方。將來恐需賑卹。是以豫為籌備。看來直隸被水處所。或可無需動撥。而奉天地方。連年被水。恐賑卹在所必需。現已令新任府尹穆和蘭。順道查勘。酌量應須接濟若干。俟奏明需用時。即由天津海運前往。和琳在北倉辦理此事。亦即訪詢情形。酌量截卸。總期足敷撥用。不必拘定二三十萬石之數。至東省撥船。現在既有北倉截卸之事。或不須復用三百隻之多。天津距東省不遠。並著的

留應用其餘即當飛行停止較之抵通後再令轉回自為便捷也將此由五百里諭令知之○乙未旌表守正捐軀江蘇興化縣民楊永鳳妻王氏○丙申諭前據巡漕御史和琳奏李天培私交湖廣通省幫船灑帶木植一案畢沅惠齡於審辦時屢懷觀望經朕節降嚴旨申飭始據奏稱訊之李天培供上年福康安曾帶信與我以漢口一帶向為木植會集之區囑為代買並令幫辦運送進京我因福康安是舊上司心欲見好自己又可影射多帶若幫辦送京需用腳價甚大莫如交糧船帶運可以減省腳費是我貪圖小利混交灑帶等語並將福康安原書呈出昨又據福康安奏稱上年曾寄信與李天培託其購買木植數百根實無令其派交糧船灑帶之事按奉諭旨戰悚恐懼無地自容懇將公爵紅寶石帽頂雙眼花翎四團龍褂黃帶紫纓全行撤回並將協辦大學士吏部尚書兩廣

總督概行革去從重治罪仍請罰繳總督養廉等語李天培係臬司大員有奏事之責如伊能矯矯自持於福康安囑令購辦時原可不允代辦或竟據實奏朕必嘉其持正不次起擢乃伊既意圖見好允為購辦又因有福康安託辦木植可以藉其聲勢將自用一千餘根之木一併勒交糧船帶運圖占便宜從中獲利並將原書存留豫防敗露後以為避卸之地反覆險詐實為小人之尤是此案固由李天培假託聲勢牟利營私而其實總緣福康安向其託辦所致畢沅等於初交審辦時並不據實陳奏始則稱俟訊有確供再行奏聞巧為嘗試繼僅於供單內帶敘希圖混過而阿桂在荊州已有所聞亦未即時奏聞迨接奉查辦諭旨始在安陽途次密行奏出以福康安曾著微勞求朕不加深究為愛惜人才起見現經朕節降嚴旨詢問據阿桂畢沅俱奏於荊門州審案會晤時即曾談及

此事。是此事阿桂與畢沅。早有見聞。彼時即應奏。方無愧公正大臣之體。乃竟未據入告。伊二人自以此項木植。係福康安交辦。意欲消弭其事。畢沅始終觀望。隱躍其詞。其瞻顧周旋。已屬顯而易見。即阿桂之遲遲始奏。亦未必不因朕嚴旨交查。慮及事難終掩。方補行奏出。在阿桂等欲商消弭之意。不過以福康安為

孝賢皇后之姪。傳恒之子。屢經任使。平定臺

灣賊匪。曾著微勞。誤疑朕欲曲為保全。一經奏出。或至礙難辦理。豈知朕從來綜理庶務。一秉大公。於諸臣功罪。權衡至當。從不稍存畸重畸輕之見。即如傳恒在日。為朕深加倚畀。久承渥眷。偶有過失。並不稍為寬假。福康安平定臺灣。生擒二醜。歲事完善。朕非不嘉獎其功。但伊既獲咎。朕亦豈能置之不問。若因其曾著微勞。遂不加究治。僅將李天培發往伊犁完事。天下之人。不將疑朕於福康安

有所偏徇耶。况福康安既可如此。充其所為。則阿桂。嵇璜。和珅。王杰。俱為大學士。通同一氣。又復何事不可為耶。且即欲保全功臣。亦應俟審訊明確。據實奏聞。候朕裁奪。斷無臣下等可以意欲消弭。通同顛預了事之理。阿桂年逾七旬。日依禁近。為大學士領袖班聯。資望最深。不應有此。即畢沅久任封疆。於漢大臣中。尚為能事之人。亦不當似此進退無據。朕臨御五十餘年。信賞必罰。綱紀嚴明。於

滿漢大臣。從無偏向。臣下功罪。豈能逃朕洞鑒。即如國泰。王亶望。陳輝祖。郝碩等。亂法營私。無不以次敗露。按律嚴辦。福康安雖斷不至如王亶望等之贓私狼籍。然既有此交辦木植之事。即或隱飾一時。日久終歸破露。雖時不特福康安獲戾更重。即阿桂與畢沅。亦不得不治以瞻徇之罪。今幸而朕素懷寅畏。綱紀肅清。雖受恩深重。如福康安者。一有過失。立即查出辦理。不至釀成大案。而朕之大

公至正亦可以共對天下臣民而無愧。是此事及早發覺。得以秉公辦理。悉賴

吳蒼眷佑。朕於此益加感激敬凜。至此案止論

福康安之交辦與否。若福康安本無其事。李

天培雖屬狡詐性成。亦何由假其聲勢。總由

福康安不知避嫌。曾託購辦。是以李天培得

借見好獻勤之舉。以遂其牟利肥橐之私。即

當治福康安以應得之罪。若現無安南抒誠

求覲一事。雖福康安平定臺灣功績懋著。數

其情節尚不至於革去公爵。其所賞紅寶石

帽頂四團龍褂黃帶紫韁俱應革除。斷不能

施恩與留。第念現在阮光顯前赴熱河瞻覲。

阮惠又懇於明年親自來京祝嘏。倘將福康

安所有章服遽行更換。匪特觀瞻不肅。且類

於愛憎無定。所關甚鉅。所有福康安自請徹

回公爵章服等項。及斥革治罪之處。著加恩

免其徹回斥革。但福康安受恩深重。乃不能

加意謹慎。致蹈愆尤。亦不可無以示儆。福康

安著罰總督養廉三年。仍加罰公俸十年。並

帶革職留任。用昭懲創。阿桂畢沅惠齡未即

據實奏出。固有不是。但此事究係福康安之

過。阿桂畢沅等俱不過相因而及。朕亦不加

深究。一概弗問矣。將此通諭知之。○又諭本

日召見新放安徽學政吳璥。因伊係原任總

河吳嗣爵之子。詢及河務情形。奏對甚為諳

悉。人亦明白曉事。以之補放河道。可期得力。

吳璥著補授河南開歸陳許道。其南汝光道

員缺。仍著善泰調補。所有安徽學政著秦潮

去。○又諭曰。全德奏護理江西鹽道南昌府

知府恒寧。造報本年夏季銷鹽清冊。內開四

月下半年。銷鹽一萬八千四百九十三引。提

取省店賣帳覈對。則僅銷鹽九千九十八引。

與該護道冊報迥殊。明係因銷鹽數少。押令

虛報捏飾。業經咨會江西巡撫。另行揀員署

理。並請將該員交部嚴加議處等語。各省鹽

引疏銷。全在鹽道督率稽查。况正當清釐鹽

務之際尤應實力辦理。乃該護道因鹽數少銷。恐致查詰。輒令該鹽店虛報銷數。殊屬捏飾。恒寧著交部嚴加議處。○又諭。今年熱河滿洲兵。射箭甚好。平日當差亦俱奮勉。著普行賞給一月錢糧。厄魯特兵亦著賞給一月錢糧。以示嘉惠旗民之至意。○諭軍機大臣曰。長麟奏覆東省撥船三百隻。現在委員迅催押送楊村。以備起撥。並按照行程。給與路費口糧等語。前據劉綦奏本年新漕入境迅

速。直省撥船有往來不及之勢。是以降旨令將東省撥船。遙赴楊村。幫同撥運。長麟接奉諭旨。委員嚴催。趕緊行走。所辦甚好。現在因奉天地方連年被水。恐賑卹在所必需。不可不豫籌接濟。已諭令劉綦等於江西各幫內酌量截留漕米。卸貯北倉。以備海運。東省撥船既有北倉截卸之事。或不須復用三百隻之多。但此項船隻既已全數開行。如有中途接咨停止前進之船。其船工水手亦應一體

給與路費口糧。以資盤費。著傳諭長麟。即按照行程。如數發給。俾各撥船養贍有資。方為妥善。○又諭曰。奎林等奏審明傷斃事主之盜犯蘇番。黃偉。李耳等。正法。及緝獲挾恨同謀殺人之首犯何涉。處斬。示各摺。向來在臺灣居住之漳泉各村民。素性獷悍。搶劫械鬪之事不一而足。雖經奎林等節次拏獲嚴辦。而本日所奏。又有因搶劫傷斃事主。及同謀殺人之事。可見該處積習。一時尚未能

悛改。著傳諭奎林。萬鍾傑。務須實力整頓。使從前剽悍之風。漸除淨盡。如遇該處民人逞兇械鬪。搶劫等事。即行嚴加處治。有犯必懲。不可稍事姑息。致負委任。○定解審重犯脫逃。例刑部奏越獄人犯。脫逃被獲。原犯應入秋審情實者。改為立決。應入緩決者。改為情實。例有明文。惟解審斬絞人犯。中途脫逃。被獲。向未明立科條。請嗣後此等逃犯。除本犯斬絞立決者。即正法外。其原犯斬絞監候之

犯。即照越獄脫逃人犯之例辦理。從之。○以火倉事伯麟為詹事。丁酉。諭。據劉義奏。原報被水之安州。復於六月二十三。四。等日大雨如注。上游諸河並漲。以致該州堤埝漫溢。被水較重。請先行撫卹。酌量摘賑。又河間保定府屬等八州縣。均有被水較重之處。請一體先行借給口糧。並予以摘賑等語。本年夏秋以來。近畿一帶雨水較多。諸河並漲。民田廬舍間被淹浸。該督既飭屬查勘。亟應妥為撫卹。所有安州被水之六十餘村莊。及河間府屬之河間。任邱。獻縣。阜城。景州。保定府屬之清苑。雄縣。新安等八州縣。無分極次貧民。俱著先行借給口糧。酌量摘賑。以資接濟。並著查明成災輕重。按月給賑。其大名。宣化二府屬。亦有被水地方。并著一併勘明。如有成災處所。即行分別辦理。該督務須督飭所屬實心經理。俾小民均霑實惠。毋致一夫失所。以副朕軫念災黎至意。該部即遵諭行。○諭

軍機大臣等。據管幹珍等奏。江西尾幫。於初八日全過津關。管幹珍先赴楊村。照料查催等語。前因本年夏秋雨稍多。恐奉天低窪地畝被淹。將來查明。或需賑卹米石接濟。諭令蘇凌阿等。於江西漕米內。酌量截卸北倉。如有已過津關者。不必拘泥追回。只須於在後各幫內。儘數卸貯候撥。現在江西尾幫。雖已過津關。但由天津至通。係屬上水。北倉係在津關之北。想此時在後船隻。尚距北倉未遠。再聞該處尚有舊存米石。亦可以備撥。又省一番運送。著傳諭管幹珍。和琳。即與倉場侍郎。公同商酌。通盤計算。止須就江西在後各船。距北倉一二十里以內者。酌留數萬石。合之舊存米石。已共有十萬以外。此原不過豫為籌畫之計。有米十餘萬石。亦足敷用。其距北倉已遠船隻。原無庸又令轉回。徒滋往返。也。管幹珍等務即悉心會商。一面辦理。一面奏聞。○又諭。本日據留京辦事王大臣奏。

本月十一日夜間。細雨瀟瀟約有寸許。十二日辰刻。業已放晴等語。現在熱河濃陰。雲氣自西南而來。恐京城一帶。又復陰雨。朕心深為廑注。著傳諭留京辦事王大臣。日內京城是否復雨。抑或暢晴。於田禾有無妨礙之處。據實覆奏。尋奏。京城於七月十二日放晴後。十四日復雨。即霽。現仍祈晴。田禾並無妨礙。報聞。○又諭。據何裕城奏。報南昌省城。於閏五月六月連得雨澤。並瑞州等十三府州屬。亦各得雨五六次不等。一摺。前據蘇凌阿等奏稱。經過九江府。德化。德安。建昌。新建。南昌縣地方。因晴霽日久。待澤孔殷。現在撫臣何裕城。率同文武員弁。設壇祈禱等語。是該省於五六月間。不免有望澤情形。朕披閱蘇凌阿所奏。恐該處缺雨。深為廑念。該撫既經率屬祈禱。即應早為奏聞。乃此次奏報雨水情形。摺內僅將南昌瑞州等處得有雨澤。及各屬糧價開報。而於望雨祈求一節。竟無一語。

聲敘。豈不知朕念切雨暘。軫恤民依之意耶。著傳諭該撫。即將省城一帶。是否曾經祈禱。始得疊沛甘霖之處。據實奏明。毋得稍有諱飾。尋奏。臣前次奏報。係六月初十日以前。雨水充足情形。自初十日以後。半月不雨。即設壇祈禱。隨於六月二十六。七。八等日。連得澍雨。得旨覽。○旌表守正被戕江西南豐縣民江勝章妻李氏。○戊戌。諭軍機大臣。曰。劉秉恬奏。北倉尚有上年截卸糴米十一萬九千餘石。足備接濟奉天之用。如直隸被水之清苑等州縣。需用米石。通州距各該處較近。即可於通倉內動撥。所有本年江西幫船。似毋庸截卸等語。昨因聞北倉尚有舊存米石。可以備撥。已諭令管幹珍等。止須於與北倉相近之江西在後各船內。酌留數萬石。不必多為截卸矣。今據劉秉恬奏。北倉舊存米石。尚有十一萬餘石。是已足敷備撥奉天之用。而直隸被水各州縣。想來似可無須撥米接濟。

或有需用亦與通州較近自應仍令全漕抵通毋庸截却北倉劉秉恬所奏甚是依議即行著傳諭管幹珍不必再赴北倉俟江西各船全數抵通後即來行在請訓和琳亦即回京供職不必再赴熱河復命蘇凌阿仍遵前旨同至通州與劉秉恬趕辦起卸諸務俟事竣再來復命○已亥中元節遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○諭軍機大臣等據李奉

翰等奏秋汛水勢陡長各工保護平穩一招覽奏欣慰前已有旨諭知該督撫等當加意保護以期秋汛安瀾仰邀甄敘今黃河之水於六月二十四五等日又復陡長臨河壩壩蟄臨之處經李奉翰等督率搶護悉臻穩固現在秋汛未過仍宜益加謹慎悉心保守俟奏報秋汛安瀾摺到即當降旨將李奉翰梁肯堂暨在工出力員弁一併交部議敘至虞城十八堡大溜含灣取直現走中泓天然成河此係極好機會其銅瓦廂格隄暨黑堽工後舊有月隄該督等請加培高厚以為重門保障所見亦是應行辦理著即將該兩處情形詳細繪圖貼說進呈具奏將此傳諭知之尋奏銅瓦廂舊月隄長九百九十丈黑堽工後舊月隄長一千五百七十七丈均須加培高厚現已確估於秋汛後興辦得旨覽奏欣慰○又諭曰陳用敷奏泗州東北附近安河洪澤湖之處低窪地畝間被水淹已飭陞任

藩司陳步瀛親往勘查。其鳳潁各屬低田積水漸次涸復。又據陳步瀛奏。查勘安河附近低地。及盱眙等處漫水。不能驟涸。雜糧補種不及。難免一隅偏災。至鳳陽等州縣。距洪澤湖較遠。積水日漸消退。現在陸續補種雜糧。可冀薄收。各等語。安河等處。因黃河漫溢之水。一時匯注附近低地。間被淹浸。現據陳步瀛查明。積水尚未消涸。補種不及。雖該處本年二麥豐收。小民餬口有資。目前不致缺乏。但既恐成災。自應量為接濟。其鳳陽靈璧宿州等三州縣。現在趕緊補種雜糧。薄收有望。然既經被水。民力究恐不無拮据。陳步瀛已陞授貴州巡撫。著傳諭陳用敷。督飭所屬悉心經理。如有尚需酌量接濟之處。據實奏聞。毋使一夫失所。以副朕軫念民依至意。○諭免江南安慶衛漕船遭風漂沒米七百五十八石有奇。并卹淹斃水手王二如例。○旌表守正捐軀河南武安縣民郭淘氣妻朱氏。

大清高宗法天隆運至誠先覺體元立極敦文奮武孝慈神聖純皇帝實錄卷之一千三百三十四

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十五

盛修總管官經提議官太子太傅文淵閣大學士文淵閣領侍衛內大臣福康安奏 上諭軍機處

吏部理藩院事務黃旗滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經提議官太子太傅文華殿大學士文淵閣領侍衛內大臣福康安奏 上諭軍機處管理刑部戶部庫事務

世襲騎都尉軍功加十九級隨帶加二級又加二級臣重慶內大臣戶部尚書張蔭桓滿洲都統軍功紀錄五次

尋常紀錄十四次臣德瑛經提議官太子少保都察院御史紀錄六次臣曹振鏞等奉

敕修

乾隆五十四年己酉七月庚子諭戶部尚書

都統綽克托老成謹慎宣力有年今春因患病懇請解任特諭令在家安心調理不必開缺並派御醫前往診視以冀就痊茲聞溘逝殊堪憫惜其任內降革罰俸處分概予開復所有應得卹典著該部察例具奏○刑部遵旨議奏新疆遣犯壅積應行酌議請嗣後除原定發遣為奴種地等項及特旨發往並職官犯軍流徒罪情節較重者仍酌請發往外其餘尋常問擬軍流等犯如有情節浮於本

罪者各照所犯軍流本罪以次加等遞發其情重軍流人犯應從重外遣者毋庸改發新疆即分發吉林黑龍江均勻派撥所屬各地方分別為奴當差倘有脫逃視其所犯各照本例懲治再查黑龍江吉林等處例於年終將收到遣犯數目及脫逃已未獲改發名數彙題至新疆止於年終將脫逃已未獲數目彙奏其現在遣犯若干並不聲明應令伊犁烏魯木齊並黑龍江吉林等處各該將軍都統等俱於年終將本年發到遣犯及節年到配遣犯計共若干名詳晰彙奏倘有積犯過多者臣部另行酌辦從之○以故二等輔國將軍永蕃子綿護照例襲職○辛丑諭浙江定海鎮總兵員缺著伊里布調補其衢州鎮總兵員缺即著伊楞額調補○又諭本日原任貴州總兵哈芬布病痊入覲看其人尚誠實伊疾疾尚未大愈難勝總兵之任著在頭等侍衛上行走○諭軍機大臣等本日韓錄

奏於韓莊途次接奉初六日諭旨仍回睢寧
工次等語前因韓鑠由江西回京經過江南
就近赴工幫辦並諭書麟等酌量若可不用
韓鑠在彼幫辦亦即令其回京此旨於六月
三十日發往昨已據韓鑠奏在徐州接奉此
旨在工作閱看情形知該督等能力肩經理無
須在彼幫辦遵旨即由工次起程回京等語
至初六日諭旨係該侍郎前奏途次雨水情
形與蘇凌阿聯銜殊屬牽混徒亂人意是以
傳旨飭行今接奉諭旨乃仍於徐州馳赴該
工殊屬自相矛盾韓鑠著飭行途次接奉此
旨著即回京毋庸赴工幫辦也○又諭前據
全德奏護理江西鹽道南昌府知府恒寧造
報本年夏季銷鹽清冊內開四月下半月銷
鹽一萬八千四百九十三引提取省店賣帳
覈對則僅銷鹽九千九十八引與該護道冊
報迴殊詰之在揚各商係該護道恐鹽數少
銷有干查詰押令多報等語已將虛報捏飾

之護鹽道恒寧交部嚴加議處矣各商銷售
引鹽按引納課若以少報多則虛報之引課
又從何而出今該護道於半月內押令該商
於原銷數目捏報多至一倍將來完納課項
必又令該商照虛報之數按引催徵倘引多
課少豈有該護道自行賠出之理是既捏飾
於前恐不能不苛徵於後在揚各商等或因
此赴訴於該鹽政稟出實情亦未可定著傳
諭何裕城全德各將該護道捏報多銷之處
是否有此情節逐一詢訪據實覆奏○又諭
曰李芳園奏補授金門鎮總兵謝恩一摺內
稱因署黃巖鎮任內在洋督緝未能敬繕奏
摺稟請撫臣據情代奏續奉回札未便代奏
等語該鎮既於閏五月二十日接奉諭旨即
使其時正在洋面波濤之上未能繕摺具奏
俟抵岸後自可具摺謝恩奏請陞見乃轉稟
請撫臣代為奏聞直至駁回未允始自行陳
奏往返稽遲殊屬不諳事體金門為閩海要

區責任綦重似此見識拘泥恐不能勝總兵之任李芳圖著傳旨申飭令其加倍奮勉毋得怠玩因循致干咎戾○又諭據伊楞額奏請陞見一摺本日因伍拉納奏定海鎮所轄地方與黃巖接壤正在會捕洋盜之時必須熟手經理已降旨將伊里布調補定海鎮其衢州鎮員缺即以伊楞額調補衢州雖係陸路但與定海同係浙省且盜賊必須上岸賣贓而該處緝捕洋盜正需多員帶兵分投截擊著傳諭伊楞額即速赴新任如伍拉納等有派令幫同搜緝之處務宜不分疆界奮勉協擊俟盜犯將次辦竣問之伍拉納琅玕於可來時再來陞見未為遲也○又諭曰伍拉納奏浙省督緝洋盜伍拉納駐劄福鼎縣琅玕亦現駐温州郡城相距道里甚近遇有一切應辦事宜無不隨時札商妥為籌辦等語此案盜犯膽敢糾集多人在洋面肆行劫掠拒捕傷官情罪重大若不速擊嚴辦勢必釀

成海寇伍拉納係閩浙總督一聞稟報即應親赴該處與琅玕陳杰會合一處督率緝捕方更得力何以僅在福鼎縣駐劄豈浙省地方非其所轄耶著再傳諭該督務即遵照節降諭旨親赴温州與琅玕陳杰會同實力督緝以期盜犯全數速獲又據奏遊擊董步雲等十一員於張殿魁被戕時不行救援已經革審但水師現乏員署理已札知琅玕如有得力之員不妨暫時留緝等語是亦一法但同日據陳杰奏摺內稱張殿魁等被賊戕害後賊船因無人救應又無人追趕俱皆逃走同時董步雲等十一船往來折戔遠遠駛行並不攏近賊船救護轉以追賊至外洋天黑遇霧不知路徑捏詞稟報請將董步雲等十一人盡行拏問等語著伍拉納即會同琅玕就近詳細查審如董步雲等實因天黑路迷未能救援尚可令戴罪自贖如竟有畏賊退縮復捏詞具稟情弊即竟應照陳杰所奏

盡行拏問。審明治罪。其總兵陳莊於此案有無處分。前已有旨交伍拉納等查明具奏。現復據陳杰一併附參。著該督等即遵前旨。將該鎮應得何罪之處。秉公查奏。再伍拉納琅玕。屢次摺內止奏及遊擊張殿魁被賊戕害。何以本日陳杰奏到夾片內。又稱參將黃標遊擊張殿魁被害。身屍已經撈獲。究竟被害者是否止係張殿魁一員。抑係黃標亦同被害。該督撫等又因何並未奏聞。並著伍拉納琅玕覆行確查。據實具奏。至此案正盜陳三等十五名。已經玉環同知等拏獲。解交琅玕嚴鞫。漳浦縣亦報獲盜犯黃烈等二十名。解交徐嗣曾審辦。可見閩浙地方盜犯衆多。一經認真偵緝。即紛紛就獲。現已降旨將伊里布與伊楞額對調。並令伊楞額速赴新任。幫同緝捕。著傳諭伍拉納琅玕陳杰務宜督同各鎮將分投截拏。將此案盜犯全數擒獲。盡法懲治。勿任遠颺漏網。以清洋面。此為最

要。又本日據李芳園奏謝補授金門鎮恩一摺。內稱因在洋督緝。未能繕摺。稟請撫臣據情代奏等語。總兵有奏事之責。即或在波濤之上。未能繕摺具奏。俟抵岸後。自可具摺謝恩。何必由巡撫代奏。似此識見。拘泥恐難勝總兵之任。除傳旨申飭外。並著伍拉納留心察看。如李芳園實不能勝任。即行具奏。另請簡放。勿任貽誤。將此由六百里各傳諭知之。仍將如何會商截捕及盜犯續獲若干之處。迅速覆奏。○壬寅諭軍機大臣曰。李世傑奏帶徵積欠鹽課羨銀限內全完一摺。聲請將富順縣知縣潘邦和可否量予議敘等語。向來經徵不力。州縣皆例有處分。而認真督催。使應徵錢糧。年清年款。亦係地方官分內應為之事。督撫等或因其辦事急公。止可遇有本省應行陞調缺出。酌量奏請陞調。以示鼓勵。若明降諭旨。將該員議敘。恐各省州縣以徵收全完為可見長。遇事追呼。甚非所以體

恤閭閻之道。昔人有云。撫字心勞。催科政拙。是拙於催科者。尚當膺上考。而督徵全完之員。又豈可特予甄敘。李世傑見不到此。故有此奏。耶將此諭令知之。○調任貴州巡撫郭世勲奏。黔省每年額辦楚鉛二百五十萬觔。運赴湖北漢口。以供各省採買鼓鑄。嗣因漢局鉛多。奏准減半運鉛一百二十五萬觔。查現在漢局餘鉛無幾。請自本年為始。仍照原額撥運鉛二百五十萬觔。再楚鉛既經復額。廠鉛亦應加買。請自五十五年為始。飭令威寧州。於額辦外加買鉛一百萬觔。報聞。○以禮部尚書常青為鑲藍旗漢軍都統。○四川總督李世傑疏報。裁眉縣續墾官荒田地四百九十畝有奇。○癸卯。諭曰。琅玕奏查明大門洋盜船。拒捕傷官一摺。據稱署叅將張殿魁。乘駕小舟。追拏盜匪。手執腰刀。隨勢過船。連殺三盜。復擒拏殺傷十餘犯。因盜匪有四十餘名。拚命拒捕。張殿魁致被殺傷落海身

斃。遊擊董步雲等實因風逆浪大。不見盜船蹤跡。並非有意不行救援。應請仍令照舊供職等語。張殿魁出洋巡哨。遇有盜船。即駕小舟追趕。並持刀過船。連殺三盜。又擒拏殺傷十餘犯。甚屬奮勇出力。因盜匪眾多。致被戕害。殊為可憫。張殿魁著照叅將陣亡例議卹。其餘被害受傷兵丁。著分別賞卹。至董步雲等。當張殿魁被害之時。雖緣風浪甚大。哨船駕駛不前。尚非怯懦可比。但以洋面遇有頂風。不能前往救護。為詞。試思張殿魁雖乘坐小船。輕快。豈獨不為頂風所阻。何以又能駛往追趕盜船。董步雲等究屬救援不力。所有遊擊董步雲千總戴得勝。鄭殿魁。把總張獻麟。王良貴。趙大勇。外委陳學明。何啟高。池以忠。王得龍等。現在仍令其照舊供職。外俱著交部分別嚴加議處。總兵陳莊。於盜船逃至境內。漫無覺察。殊屬疎懈。著一併交部嚴加議處。○諭軍機大臣曰。琅玕奏。審明陳三

等七名實係傷官案內正犯即先行正法梟示其餘林阿匹等九名有因形跡可疑誤拏者有訊明另行竊刦別案者已與陳三三等質訊實於此案無涉現另行分別辦理總期正犯不致漏網餘人毋稍羅織至溫州黃巖兩鎮所轄沿海水師將弁仍派令出洋緝捕在汛巡防以期無誤等語所辦尚為妥協昨據陳杰叅奏遊擊董步雲等於張殿魁被賊戕害時不能趕上救援恐有畏葸捏飾情形請革職拏問該提督係為整飭營伍起見是以降旨交伍拉納琅玕會同查審茲據該撫將張殿魁追捕被害情形詳查具奏是張殿魁甚為勇往而董步雲等亦實無懦弱不前情事已明降諭旨將張殿魁照陣亡例議卹董步雲等照舊供職與陳莊一併交部分別嚴加議處俟部議上時酌量加恩矣至此案陳禮禮柯興奇陳四舵吳進林明灼林灼灼六名係屬首犯現在曾否就獲著傳諭伍拉

納琅玕等務上緊設法緝拏勿任首惡遠竄稽誅其因形跡可疑誤拏暨訊明另行竊刦之犯該督撫仍宜嚴切究訊毋使匪犯狡展漏網又聞陳三三供稱上年十二月間在福建地方上岸搶過高陳二姓該督撫曾奏過否詳報究緝有案否著伍拉納即查明據實具奏○命固倫額駙豐紳殷德在御前行走○甲辰諭軍機大臣等前因直隸入秋雨水稍多曾降旨詢問劉綬約計通省秋收共有幾分據該督覆奏除被水地方外通省秋禾收成約有八分從此天氣晴霽尚可期有增無減俟各屬開報齊全另行奏報等語該督此摺係七月十三日拜發距今又已數日各屬想已陸續報齊著傳諭劉綬即將直隸通省秋成究竟共有幾分之處再行詳細查明據實具奏至豫省距京不遠昨據長麟奏山東秋收約計共九分有餘豫東境壤毗連何以河南約收分數尚未據梁肯堂具奏著傳

諭梁肯堂即速查明奏聞以慰厯注再前在密雲縣地方叩聞之四川民人馬晏清竄匿未獲恐其潛回本省業經軍機處行文沿途各省一體緝拏復經降旨傳諭劉戡嚴飭所屬實心躡緝嗣據李世傑奏查得馬晏清又姓張原籍湖北是該犯或竟竄回楚省亦未可定直隸河南係蜀楚必經之地該督撫接到諭旨咨文自應飭屬嚴密根緝毋致遠颺何以為期已久至今未據緝獲著將李世傑所開年貌鈔寄劉戡梁肯堂閱看令其嚴行緝拏尋劉戡奏直隸通省秋成實有八分至馬晏清一犯尚未緝獲報聞梁肯堂奏河南秋收八分有餘馬晏清現飭屬嚴緝得旨覽○閩浙總督覺羅伍拉納題嘉義縣添設斗六門縣丞應增俸薪役食請照外地縣丞額設之數支給下部議行○予廣東出汛巡緝遭風淹斃千總沈君華賞卹如例○乙巳諭曰翁方綱奏訪聞江西士子有臨場習用新

出小本講章以希捷獲者又坊間每有編輯經書擬題及套語策畧等類於臨場時刊刻發賣現出示嚴行禁止并於建昌一帶刊書之處徧為飭禁等語講章策畧等項竟有刊刻小本不特士子臨場閱看既得弋獲捷徑且易於懷挾尤不可不防其弊翁方綱嚴行飭禁所辦是至江西既有此項小本發賣恐各省亦不免仿照刊刻流傳轉售著各督撫學政一體出示禁止其已經刻印者令其繳出銷燬所有京城坊肆等處並著順天府尹等一併留心查禁以杜僥倖而端士習○吏部議覆直隸總督劉戡奏稱永定河北隄八工武清縣主簿經管隄工三千四百二十丈內三千三百二十八丈均在東安縣地方僅九十二丈屬武清縣境又北隄九工東安縣主簿經管隄工二千一百八丈均係武清縣地方並非東安縣境彼此錯綜管理名實殊屬淆混請將八工改隸東安縣主簿九工改

隸武清縣主簿。並將八工原管武清縣隄九十二丈撥歸九工管理。其俸廉役食衙署毋庸更易。應如所請從之。○丙午諭曰。勒保奏西寧鎮總兵沐特恩於邊疆要地。未能決機應事。實難勝任等語。沐特恩著來京。在頭等侍衛上行走。所有甘肅西寧鎮總兵員缺。著富爾賽補授。○諭軍機大臣等。前因各省督撫有加繳萬壽慶典經費。諭令五十五年八月毋庸備進貢品。嗣又因道府以下官員廉俸無多。恐繳交經費。所剩養廉不敷辦公之用。准令督撫藩臬代為扣繳。不特五十五年。毋庸呈進萬壽貢。即五十四年。亦不必備進。今各督撫等。仍不能仰遵朕旨。復紛紛備辦齎送熱河。姑念其業經遠來。雖尚未屆扣廉之期。准其呈覽。而不賞收者。多於往年。著傳諭各督撫等。明年八月務遵前旨。不必備物抒忱。亦不必齎送前來。徒滋往返。設督撫等不能仰體朕意。仍有似此齎到者。亦必令奏。

事處駁回。斷不接收。至勒保琅玕奏間來京。陛見時。經朕面諭。本年及五十五年。俱毋庸進貢。尤應仰遵朕旨。已諭令奏事處。如該督撫貢品齎到時。不准接收呈覽。即明年八月。亦當照各省督撫一體毋庸備物抒忱。即來亦不准接遞也。將此各諭令知之。○又諭前因浙江温州大門洋地方有盜犯拒捕傷官之案。諭令伍拉納。琅玕。陳杰。前赴該處會同督緝。昨據琅玕奏。拏獲盜犯陳三。三供該犯等共有六船。每船夥黨三四十人。及二三十人不等。向在閩浙一帶洋面行劫。因閩省查拏嚴禁。逃至浙省等語。此等盜犯。往來洋面出沒無蹤。今見浙省督撫提鎮帶兵追捕。或又竄至江南上海崇明一帶乘間剽掠。亦未可定。著傳諭書麟。閔鶚元。即選派明幹員弁分投堵緝。並嚴飭各海口實力盤查。勿任匪徒潛匿稽誅。以清洋面。○又諭前年大名府聚眾戕官案內之段文經。係此案首犯。查緝

多年迄今尚未弋獲。從前徐克展一犯。即係豫省派員在安徽地面拏獲。段文經與徐克展同為教首。直隸地方既經躡緝無蹤。而河南一帶向來從八卦教者。本自不少。安知不在該省潛匿稽誅。此等要犯。豈可任其始終漏網。著傳諭梁肯堂。務須督飭所屬嚴密訪查。設法購線根緝。勿得以為時既久。意存玩忽。視為海捕具文。倘或別經發覺。曾在豫省逗留。恐該撫及地方官俱不能當其咎也。

以陝西巡撫覺羅巴延三為戶部尚書。陝西布政使秦承恩為陝西巡撫。江西按察使額勒春為陝西布政使。丁未以直隸熱河道託倫為江西按察使。○戊申安南國正使阮光顯副使阮有暘武輝璿並行人等入覲。上御卷阿勝境召見。同扈從王公大臣及蒙古王貝勒貝子公額駙台吉等賜宴。並賞賚有差。○諭上年冬間孫士毅收復黎城後。即有旨令其班師。因黎維祁庸懦無能。孫士毅遂

帶兵在彼防守。未回適本年正月初間阮光平前來黎城。與黎維祁理論。大兵尚在秦徽之時。見廣南人衆突至黎城。不得不迎截。打仗阮光平手下人等見官兵奮勇殲戮。情急抵護。又值黑夜。衣服不能辨別。以致誤傷提鎮。朕特命福康安調任兩廣。原欲厚集大兵。以為聲罪致討之舉。福康安未到之先。阮光平自知罪重。懼干天討。將迷失官兵善為收養。陸續送出。並差人攸關三次乞降。經孫士毅駁回。不准福康安抵鎮南關後。阮光平又差人前來懇乞。福康安仍不允准。阮光平本即欲親自赴關陳懇。因國內未能寧謐。不能遽離。遣其親姪阮光顯代為攸關。再四籲懇。福康安始據情具奏。朕念其從前誤傷官兵。實非出於有心。且屢次悔罪。抒誠情詞。迫切。因令福康安免其進討。並派員將阮光顯等護送前來。行在瞻覲。嗣據福康安奏。阮光平因感激朕恩。懇請於明年親自詣闕叩祝萬

壽並以鎮撫國人必藉天朝封號進表納貢具見小心恭謹其措詞亦為誠實得體是以即降恩綸封阮光平為安南國王其貢物亦著賞收從此勅諭該國及守土各官與安南行文俱改稱為安南國王不復以國長相稱本日阮光顯等來至行在適值開宴行賀之期瞻觀行禮後即令其隨同蒙古王公文武大臣後入座觀劇並先賞給阮光平玉觀音玉如意暨金絲緞朝珠等物賞阮光顯磁羅漢玉如意金絲緞銀盒等物其副使人從人亦分別賞以如意緞盒銀兩俟八月初十日大筵宴時仍行厚加賞賚明年阮光平親自前來祝嘏其入座位次當令在宗室舊外藩親王之下一切郡王之上其賞賚更當格外優渥也○

御製再書安南始末事記曰今春書安南始末事記者不在悉自昔安南事之成敗而在識予畫安南事之喜懼大端已見前弗贅茲因

孫士毅陞見熱河而此事亦去歲駐茲所經理也故誌其詳而書之蓋黎維祁之庸昏孫士毅之失算以致阮惠復據安南向固言之詳矣然使孫士毅即早遵旨班師而阮惠亦必復來是不過無傷我官軍之事耳但甫經興滅繼絕之藩國視其仍滅絕而弗救可乎則是師猶無了期也茲黎氏實因天厭其德而自喪其國而阮惠以獲罪王朝震悚悔過求降並請詣闕乞封斯則不勞師而寧衆與封黎氏無異若夫一提二鎮捐軀行陣國家酬庸自有恒典朕且責其於安南立廟崇祀亦足以表國家有勇烈之臣而自古死綏者或鮮其匹矣壯士臨陣非死即傷領兵之臣所弗諱也若孫士毅則總督而為帥臣也設亦如三武臣所為則所繫國家威重者其事體大將不可止所嘉者許世亨左右其間必令督臣全師而歸孫士毅原不欲生還既而納許世亨之正論寧全歸振旅歸闕

請罪是皆以國為重。予嘉憫不已。不啻不以為非而且以為是也。夫予臨御五十四載。經大事屢矣。每以危而復安。視若失而乃得。即予自問。亦不知何以臻此。所謂非人力也。天也。

天之眷予者獨厚。不忍言報。惟恐弗勝。即此納降安南一事。恐後人未識輕重久長之至計。故復敘而書之。○予故戶部尚書綽克托祭葬如例。謚恪勤。○己酉。

上御卷阿勝境。賜扈從王公大臣蒙古王貝勒貝子公額駙台吉及安南國使臣等食。至壬子皆如之。○諭據魁倫等奏審明馬甲巴克親布因換班乘醉扎死領催富賡。請將巴克親布擬斬。趕入本年秋審辦理等語。巴克親布輪應該班。向領催富賡告假。富賡以巴克親布本班未便另行派人代替。係屬為公。非因不睦故意推拒。而巴克親布即將富賡扎死。殘恨已極。明係懷讐故殺。著不必趕入秋

審即由五百里馳驛交魁倫傳集各兵將巴克親布即行正法示眾。仍通行曉諭各省駐防滿洲兵丁。至領催富賡於巴克親布告假時堅意駁阻。尚屬公正。被扎身死可憫。著交魁倫查明富賡如有子嗣。即行挑補錢糧以示矜恤。○諭軍機大臣曰。書麟奏拏獲鄰境海洋盜犯之千總張成。可否量加鼓勵一摺。已批令送部引見矣。此案盜犯業經閔鶚元審明。分別定擬。斬決發遣。具奏經部覆准。張成係拏獲盜首之人。即應隨摺聲請。何以直待接到部覆始行專摺具奏。書麟於此等照例事件。何亦未能明晰。若此。耶著傳諭該督嗣後務宜留心檢點。勿再遲緩牽混。○又諭曰。蘇凌阿等奏。湖南幫船於二十日行至通州南營地方灣泊。夜半時分。陡遭強盜數十人手執兇器。擁入旗丁李九漕船後艙。劈開房門。追逼銀錢。李士俊之子李得榮奔救。被盜打下河中殞命。搶去大錢八千有零等語。

通州距京甚近。輦轂之下。盜犯竟敢聚集多人。行劫漕船。已屬目無法紀。當事主奔救之時。復敢持刃拒傷。致李得榮落河斃命。尤為兇惡已極。不可不嚴加懲治。計劉我此時尚未起程。前赴熱河。著傳諭該督不必急於來至。行在即先馳赴通州一帶。董率地方文武實力嚴緝。通州係順天府所屬地方。蔣賜榮吳省欽亦著前往督緝。並著步軍統領衙門多派番役於通州附近一體幫同分投緝拏。務使此案盜犯迅速全數就獲。審明後一面正法。一面奏聞。不可一名寬宥。亦不可使一名漏網。○鑄給四川峨眉縣分駐太平堡督捕主簿關防。從總督李世傑請也。○以太僕寺卿李臺為太常寺卿。○庚戌諭軍機大臣曰。徐嗣曾奏閩民多係聚族而居。漳泉尤甚。大者數千丁。小者亦百十名。各有宗祠。設立族正。其中桀黠之徒。恃其丁口之衆。祠產之豐。凡結會械鬪。糾搶匪拒捕抗官之案。半

由此起。而猾胥蠹役往往與為勾結。互相包庇。以致族中匪徒犯案。地方官攝捕需時。即如彭厓所居之彭厓鄉。聚匪行劫。均係族人。直至總督親訪道府親拏。始能就獲。即其明證。因博加詢訪。漳泉大族中宗祠族正亦多有讀書明理。安分畏法者。其族中匪徒犯案。地方官竟有不事發票出差。但開指姓名。傳知族正。予以限期。彼即自行縛送到官。不敢藏匿。現酌定章程。徧行曉諭。凡族中舉充族正。如有為匪不法。作奸犯科。族正不行阻止。舉首者。分別治罪。如果教約有方。一歲之中。族內全無命盜械鬪等案。給扁獎勵。三年無犯。及能將滋事匪徒查縛送官者。奏給頂戴等語。設立保甲里長。固屬綏靖閭閻之一法。但聞閩省民人俱係聚族而居。該處械鬪之風。往往此族與彼族挾嫌爭鬭。閩姓之人各行聚眾逞兇。糾殺及傷斃人命。即於本族中公議一二人。許以養贍家室。令其頂兇抵命。

地方官復因族衆難辦。又見有兇手承認。遂爾將就完事。屢致釀成大案。今若匪徒犯案。俱責成族中縛送。此等所舉族正。大半多係紳衿土豪。未必盡屬奉公守法之人。況既族居一處。則滋事者必有伊子弟親黨在內。族正轉得為之包庇。甚而挾嫌妄舉。或將衰病者舉出充數。滋弊實多。況地方官拘拏人犯。反假手於族正。又給以頂戴。豈不開把持官府之漸。行之日久。將來遇有緝兇拏匪之事。必須向族正索取。竟與世襲土司何異。其法於閩省斷非所宜。且此等族正。俱係平民。該省自督撫以下文武員弁。正復不少。遇有民間作奸犯科之事。自應責成該管地方官認真查辦。即或於緝拏兇匪等事。令該處族正舉發。亦止可由該處地方官臨時酌辦。斷無明降諭旨責令專辦。並恩給頂戴之理。若概令族正等自行舉首縛送到官。則設地方官何用。是明假以事權。必至倚仗聲勢。武斷鄉

曲。甚而挾嫌誣首。及頂兇抵命。皆所不免。充其流弊。必至聚衆滋事。更復何事不可為。即如甘省回民。其教首阿渾。即與閩省族正相仿。從前蘇四十三。由五等。即係阿渾聚衆滋事。各省回民甚多。若俱委之阿渾稽查管束。又安用地方官為耶。細思該撫所奏。斷不可行。阿桂從未至閩省。然伊更事日久。能識大體。孫士毅雖未在閩省服官。但伊任廣東督撫日久。閩粵境壤毗連。其風俗大約相仿。孫士毅於地方情形。向能留心體察。著傳諭阿桂。孫士毅即將徐嗣曾所奏舉充族正。是否可行。並另有何辦法。可以經久無弊之處。各抒所見。各行據實具奏。至福康安。平定臺灣。又曾任閩浙總督。於該處習俗民情。自知之尤悉。亦著就所見據實奏聞。統俟阿桂福康安。孫士毅覆奏到日。再交軍機大臣覈議具奏。又諭。本日召見管幹珍。據奏江西漕船開幫遲延。皆由旗丁等應領新漕項下銀兩。

扣抵較多。日見疲累。因守領借項。未能依限開行等語。漕糧為天庾正供。從前立法之始。一切應給正項及軍田運費。俱有一定章程。本為充裕旗丁等足資用度。挽運不致拮据。行之日久。從未聞有疲累難行之事。何以江西漕船。必待領借官項。始行開幫。況此項借給之銀。如本年借銀二百兩。來年即應於所領項下扣還大半。其現年所餘之項。自較上年更少。勢必所借愈多。如此年復一年。輾轉扣抵。各旗丁應領之項。所存無幾。將來不但運費不敷。即船內應用蓬纜等物。亦必無貲置買。疲乏日甚。長此安窮。即云旗丁等應領運費不敷使用。致逾開幫定限。則向來又如何辦理。並無遲誤。設此時竟不准借給。豈該省漕船遂不開行。挽運耶。江西一省如此。他省漕船。若俱藉借項開幫。國家經費有常。似此紛紛效尤。於天庾正供。豈不皆致遲誤。亦復成何事體。從前鳳陽幫船。曾因旗丁貧乏。

官為籌項贖回軍田。俾得租項充裕。以資運費。迄今總無遲誤。今江西幫船如此疲累。必係該旗丁等將衛地軍田。私行典售。租息無出。不能藉以幫貼運費。以致日形竭蹶。該督撫等所司何事。豈遂束手無策。任其坐困耽延。且該省可以動支款項甚多。何至一時未能籌辦。使旗丁等得以藉口。不行及早開幫。此事必須通盤籌畫。設法辦理。俾旗丁等日見起色。不致仍前延誤。方為妥善。現在管幹珍押催回空。到淮尚需時日。著傳諭書麟。何裕城。先行悉心籌酌。妥議章程。俟管幹珍到淮後。再行會同詳議。據實具奏。又諭。昨蘇凌阿等奏。據湖南三幫領運千總邱潤稟稱。旗丁李九漕船。於通州南營地方灣泊。夜半陡遭強盜數十人。手執火器。追逼銀錢。將李士俊之子李得榮。打落河中。殞命。眾船畏不敢救。搶去大錢八千有零等語。已諭令劉綬等前往督緝審辦矣。但蘇凌阿等前奏。僅據

千總稟報一面之詞。其中疑實尚多。湖南三幫既抵通州南營地方。離壩不遠。是該處泊船處所。必當有營汛兵役。且駐劄文武各員。亦復不少。何至盜犯竟敢聚集多人。行兇搶劫。况各幫船同在一處停泊。人數衆多。李九船上既有盜匪擁入。自應共相救護。何至衆船畏怯。不敢赴救。且盜犯有數十人。手持兇器。逼索銀錢。并將李得榮打落河中。其勢甚為兇猛。何以所搶錢文。僅止八千有零。即行竄逸。種種情節。俱屬可疑。抑或即係該幫內水手緯夫人等。因貧無聊。賴就近生心。搶奪以致衆船通同一氣。坐視不救。該千總規避處分。裝點被盜。亦未可定。著傳諭蘇凌阿。劉秉恬。即先行審究訪查。俟劉裁等到時。會同研訊。務得實情。迅速覆奏。毋得稍有狡飾。○又諭。據鄂輝等奏。遵照前奉諭旨。將薩嘉呼圖克圖。及仲巴呼圖克圖遣人與巴勒布通信之處。明白飭諭。伊等俱已悔罪謝恩等語。

鄂輝等現在扎什倫布曉諭薩嘉仲巴。兩喇嘛并辦理一切事宜。乃巴忠逕自先回。殊屬非是。已屢經降旨訓飭。著再傳諭巴忠。伊回至扎什倫布時。計鄂輝等尚在該處逗留。巴忠即當會同商辦諸事。務須遵照節次所降諭旨。妥協辦理。毋庸急於回京也。○兵部奏。旗員休致革退。各處奏報。辦理未能一律。請嗣後各省駐防及東三省。察哈爾。新疆等處。遇有告休革退官員。如三品總管各城城守尉。協領。叅領等。大員。令該管大臣專摺具奏。有應請給俸祿者。造冊送部覈議。毋庸於摺內聲敘。四五六品官員。除應糾叅治罪者。仍隨時題奏外。若僅老病告休。及弓馬平常。供職怠惰。咨止革職官員。均令咨部辦理。其應請給俸祿者。造冊由兵部覈議具題。請旨。其毋庸議給俸祿者。兵部入於半月彙題內存案。毋庸該管大臣題奏。再告休官員。例於具題後。即行開缺。今四品以下告休革退各員。

既令該管大臣咨部辦理。亦應請一面咨部。一面開缺從之。○辛亥諭軍機大臣等。昨因徐嗣曾奏。閩民多係聚族而居。請責成族正。如有為匪不法等事。族正不行阻止。舉首者。分別治罪。如果教約有方。並縛送匪犯者。給以頂戴等語。所奏斷不可行。已有旨令阿桂。福康安。孫士毅。各抒所見。據實具奏矣。地方遇有緝拏兇匪等事。不責成文武員弁認真查辦。而轉令該處族正舉發。又特給以頂戴。

則設地方官何用。況此等所舉族正。皆係紳衿土豪。若明假以事權。必至倚仗聲勢。武斷鄉曲。甚而挾嫌誣首。及頂兇抵命。何不可為。即如本日陳用敷奏。審明南陵縣活埋人命一案。內劉魁一一犯。即係族長。輒起意將總麻服弟劉種活埋斃命。並致劉種之母。因子碰死。可見各處族正。鮮有奉公守法之人。劉魁一。不過經管族務。已有此慘殺之案。設再明降諭旨。責令專辦。給以頂戴。其弊益無所

底止。所有昨降詢問阿桂等諭旨。著鈔寄徐嗣曾閱看。至各省刑名錢穀。雖係巡撫專政。而尋常陞遷調補等事。向仍會銜具奏。徐嗣曾此奏。係為調劑地方起見。非比尋常照例事件。自應與伍拉納彼此商酌。會同奏聞。即因伍拉納現赴溫州督緝洋盜。但伍拉納未赴溫州之前。徐嗣曾曾否將此事與之談及其意見如何。摺內何未經敘及。且此等酌定章程。並非迫不及待之事。亦何必遽行單銜

具奏耶。伍拉納本係閩省藩司。曾為徐嗣曾屬員。今現任總督。位居其上。徐嗣曾或有意存芥蒂。並存輕視之處。遂爾獨抒己見。不與商酌。該撫果如此居心。則大不是矣。督撫大員。皆係朕特加簡任。伍拉納前任藩司。固為徐嗣曾所屬。而此時則現任總督。國家官常自有一定體制。凡辦理公務。均當和衷商酌。且徐嗣曾果能如孫士毅李世傑之辦事。諳練識見。開展則福康安調任後。朕早已將伊

陞用閩浙總督矣。皆因徐嗣曾才具不及孫士毅。李世傑是以另將伍拉納簡擢。此事若福康安在彼。想徐嗣曾斷不敢單銜具奏。是該撫不免有輕視伍拉納之意。徐嗣曾著傳旨申飭。朕此旨。非令徐嗣曾與伍拉納意見參差。正欲使該督撫遇事熟商。益矢寅恭。以期於公事有益。該撫不可不仰體朕意也。至該撫摺內。又稱。附從行劫。並未殺人。拒捕之盜犯。聞拏自首。即行刳次數較多。亦准照擬斬監候三年。再行發遣之例。免其一死。現在盜案內。林春花一名。因父被株拏。自行投到。意欲藉以招徠餘盜。將該犯牢固監禁。未即辦理等語。亦屬非是。閩省民俗剽悍。盜刳頻聞。正應嚴加懲治。以儆奸頑。從前降旨。將情有可原。擬斬減等之夥盜。定為監候三年。再行發遣。已屬法外施仁。若將行刳多次。聞拏自首之盜。亦照此例。概行免死。則盜匪何以示儆。況此等兇徒。膽敢搶刳多案。惡不畏死。

亦斷不肯因查拏緊急。遽行投首。若如該撫所奏。因其自首。即予免死。設黥盜等。皆知可以自首倖免。將來竟可公然行劫。藉有自首之例。又得免死。轉足以長盜風。何以安閭閻而靖海疆。徐嗣曾所奏。責成族正。縛獻匪徒。及盜匪自首減等二條。俱屬錯謬。斷不可行。現已令阿桂、福康安、孫士毅各抒所見。詳覈具奏。俟奏到時。再交軍機大臣覆議。奏聞。候朕降旨遵行。徐嗣曾所見。俱錯。不得以此時業經陳奏。率行辦理。致干咎戾也。將此傳諭徐嗣曾。並諭阿桂、福康安、孫士毅、伍拉納。知之。又諭曰。嵩椿等奏。奉天地方。本年六月內。雨水較多。自二十日以後。旋即晴霽。於田禾並無妨礙。雖低窪之地。間有積水未消。其高阜及平原地畝。現在禾稼均已結實。籽粒甚為飽滿。可卜豐稔等語。覽奏稍慰。奉天地方。今歲收成。既可不至歉薄。看來竟可無須接濟。前諭令劉綬等於北倉舊存米石豫備。

撥運賑濟之處。可以無須運往。省費實多。著傳諭劉綬、蘇凌阿等。所有上年截卸北倉米石。自可毋庸備運。以省煩費。穆和蘭到彼後。只須於地方事務妥為整頓。毋庸辦理撥運米石也。將此並諭嵩椿、宜興穆和蘭知之。○定沉溺銅觔每月奏報例。諭據陳用敷奏報滇省銅船過境日期一摺。內稱雲南安員漆炳文領運五十三年三運一起。京銅七十六萬一千七百九十三觔。在湖北歸州沉溺銅七萬觔等語。運京銅觔事關鼓鑄。沿途自應小心運送。今滇省領運之銅。在湖北歸州地方沉溺至七萬觔之多。殊屬可惜。著傳諭畢沅、惠齡。即飭所屬查明。務期撈獲。並諭沿途各督撫。嗣後遇有銅船過境沉溺若干。撈獲若干。必須每月奏報。以便隨時查驗。庶督撫等實力督率地方官認真查辦。不致視為具文也。○以山東臨清協副將寧泰為江西南昌鎮總兵。○壬子。諭刑部侍郎穆精阿年登

八衰精力未衰。歷經出差審案。及辦理刑名事務。均能勤慎妥協。茲於八月十二日。為伊八十誕辰。著加恩賞給都統銜。並賞戴花翎。屆期仍當照例賞賚。並親書扁額。以賜用示優眷。著臣至意。○又諭據伊江阿奏。每年入覲之土爾扈特回子等。來往所經各城該處大臣。不必特奏等語。所奏是。此等無關緊要事件。專摺具奏。徒勞驛站。著交新疆各處將軍、大臣。嗣後凡值應入覲之土爾扈特和碩特回子等起行時。該管大臣仍照舊例具奏。外其經過各處。第照例加意照看。遇便咨報該部。迨其回歸游牧處所。亦祇咨報該部備覈。不必由驛具奏。○癸丑。諭曰。汪如洋奏各屬科試情形。摺內有東帝二童生錢汝宣。供出高鳳鳴越號求倩等語。東帝二字。自係東文場帝字坐號。然此等字面。不宜編列號房名目。該學政何不檢點。若此。各省考試文場東西坐號。向例以千字文編排。相沿已久。如

京師止用天地黃宇等字。而應避之字。尚不列入外省。恐皆一律編寫。殊失敬謹之道。但坐號有限。而千字文內字面甚多。儘足敷用。豈可將帝皇等字編列。即以天元等字排入坐號。均非所以昭祇敬。嗣後京師貢院。以及各直省考棚。所有天元帝皇等字樣。俱不得概行編列。將此通諭知之。○又諭前因遊擊張殿魁。在大門洋面追拏盜匪。並持刀過船殺賊。致被戕害。尚屬奮勇。曾降旨加恩。照叅將陣亡例議卹。本日據伍拉納查奏。張殿魁在大門洋面。遇見賊船六隻。即令放礮。以致盜船逃遁五隻。其落後一隻。因近山折回。始與張殿魁巡船相遇。以致被盜匪拒捕殺傷。落水。如該遊擊果係將船駛近放礮。何以不能將賊船擊破。反遭戕害等語。海洋捕緝盜匪。全在密速追擒。今張殿魁一見賊船。先行放礮。是與賊以退避之信。轉令知所防備。得以肆兇抗拒。此等緣營惡習。最為可惡。使張殿

魁尚在。必當治以應得之罪。豈可復膺卹典。所有交部將張殿魁照陣亡例議卹之處。著即停止。○諭軍機大臣曰。伍拉納奏。會同設法截捕洋盜一摺。內稱該鎮將道府等。若此時猶不妥為購線。上緊緝捕。稍涉玩弛。一經續獲盜犯。訊出曾在該管境內逗留經過。定當嚴行叅辦等語。地方文武。如果不實力緝捕。任聽盜犯在伊境內逗留藏匿。將來獲犯審明後。自當將玩弛之員查叅示儆。然亦止可該督撫。默存諸心。隨案酌辦。若盜犯尚未就獲。而即明定以章程。則此縣獲盜。審出曾在彼縣容留。彼縣既有處分。而彼縣獲盜。又審出曾在此縣潛匿。此縣亦有處分。外省官官相護惡習。牢不可破。勢必各懷規避。消弭不辦。該督等此奏。名為從嚴。竟是予以不捕盜之方矣。總之盜犯雖在洋面出沒無蹤。而銷變贓物。必須登岸覓售。若果地方官留心購拏。原無難立時破露。其如地方官不肯認

真躡緝而督撫等又不實力督催以致獲犯稽遲此案盜犯膽敢糾集多人拒捕傷官情節重大務須全數擒拏盡法懲治勿使一名漏網該督撫等當董飭文武員弁實心搜緝以清洋面非一奏所能了事慎之著再傳諭伍拉納琅玕陳杰即遵照節降諭旨會同上緊嚴緝並將首犯曾否就獲之處迅速具奏○是月直隸總督劉綎奏肅寧縣近河窪地被淹成災乏食貧民現於義倉內酌動穀二千石每戶借給三斗批竟當賞給又稱被水地畝應查明確數給賑批要協為之俾受實惠又稱清苑等縣間被淹浸現飭屬查勘批不可諱災詳悉查辦○兩江總督書麟覆奏睢寧漫口堵築已有端緒毋須韓鐸前來幫辦得旨覽奏俱悉勉為之○湖南巡撫浦霖奏楚南毗連川粵為私鹽出沒之所飭屬嚴拏於衡陽清泉等縣緝獲三起從重辦理得旨漸有起色亦不問矣但不可又怠○河東

河道總督李奉翰奏東省濟運水櫃如微山蜀山等湖最為緊要今歲各河渠水勢充盈除收入蜀山湖外並將有餘之水串運歸入南旺湖儲蓄酌改芒生涵洞令其下注遞達南陽昭陽等湖匯入微湖以裕濟運之源得旨嘉獎○河東河道總督李奉翰河南巡撫梁肯堂奏節屆白露河水安瀾得旨覽奏稍慰總以敬慎防於事先為要○四川總督李世傑奏馬晏清即馬波達令程宗聖冒為伊子馬攀鳳在雲雲縣叩關獻策并開列太平等州縣枉斃人命各案臣逐一嚴查盡屬子虛該犯馬晏清在逃現飭屬偵緝務獲得旨正犯今獲否似此餘事向誰問乎○貴州巡撫陳步瀛以新授黔撫奏請陞見得旨且赴新任貴州政簡民淳如不自滿加慎汝可稱勝職勉之

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十五

實錄卷一千三百三十五

聖

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣陸琰經筵講官太子少保工部尚書紀錄六次臣曹振鏞等奉

纂修

乾隆五十四年己酉八月甲寅朔諭軍機大

臣曰嵩椿等奏請將截留北倉糧米動撥五
萬石派員運至奉天牛莊海口再雇撥小船
兌收接運將應需賑卹之處及時分撥散給
等語昨據嵩椿等奏奉天自六月二十後旋
即晴霽於田禾並無妨礙雖低窪之地間有
積水未消收成稍薄然通計不過一隅中之
小隅看來竟無須接濟已諭令劉綬等無庸
撥運乃本日嵩椿等復請動撥米五萬石運
往又與昨奏不符何乃自相矛盾該將軍等

自以接奉諭旨。誤疑朕既令截留米石。自係必欲運往。故有此請。豈知朕前降諭旨。原因奉天上年甫被水災。又據宜興奏。今年六月內雨水較多。恐田禾不免損傷。將來勘明賑卹需用米石。為籌畫豫備之計。若不過一隅偏災。即便有需接濟之處。倉米儘可酌撥。或折給銀兩。聽其赴豐稔地方買食。何必復由海運。徒滋勞費。嵩椿宜興。此奏太屬拘泥。糊塗不曉事體。著傳旨申飭。其所請動撥運往

之處。仍遵前旨停止。將此由五百里各諭令知之。○禮部等部議覆。山西學政鄭際唐奏。稱大同府學額進二十名。該府所屬州縣文風平常。遵照原額取進外。再撥府學二十名。未免太優。霍州所屬之靈石縣。人文較盛。舊額十二名。未免稍少。請將大同府學改為十七名。裁額三名。撥歸靈石縣學。作為十五名。武童亦請照文童例裁撥。應如所請。從之。○旌表通嫁捐軀貴州貴筑縣民吳章妻劉氏。

○乙卯諭軍機大臣等。據阿桂、孫士毅覆奏。徐嗣曾請責成族正。舉發族匪。酌給頂戴。及盜匪自首減等二條。其事實不可行兩摺。此事祇可俟福康安奏到。再交軍機大臣酌議。密交伍拉納、徐嗣曾、董飭地方官留心妥辦。若必明定章程。出示曉諭。使各族正聞知。又似地方官有所畏忌。轉足以長其刁風。至孫士毅請遇有械鬪案發。除本犯按律治罪外。將族正財產一體入官。照本犯減等治罪等

語。械鬪案件。族正固不乏明知故縱之人。而其中亦豈無實不知情者。若概行查抄治罪。辦理過當。將族正人人自危。尤恐別滋事端。所有阿桂、孫士毅摺。均著留交軍機大臣存記。覈議。毋庸發鈔。將此先行密諭知之。○四川成都將軍鄂輝。四川提督成德奏。已勒布貢使。已於六月十三日。自該部落起程。查該外番係初次入貢。經行內地。臣成德請親帶領進京。以便長途照料。得旨嘉獎。○丙辰遣

官祭黑龍潭

昭靈沛澤龍王之神玉泉山

惠濟慈佑龍王之神○諭據李世傑奏遵旨酌賞赴藏協勦之屯練降番銀兩一摺內稱請將屯番兵丁及行營外委每名加賞銀二兩額設千把外委每名加賞銀三兩屯備每員加賞銀四兩其行至裏塘察木多之弁兵七百九十四員名係中途轉回毋庸給賞等語此次調往後藏隨征之屯番人等因遠赴

口外地方邊境苦寒別無得項是以特加賞賚其行至裏塘察木多即經撤回之弁兵七百九十四員名雖係中途轉回較之前抵藏地者遠近自屬有間但業已奉調出口行至半途究有跋涉之勞著加恩酌賞一半以示體卹屯番恩膏周沛至意○又諭曰李世傑奏巴塘汛弁李仲管解西藏餉銀十萬兩共計一百鞘至察木多交卸經管臺官員眼同拆兌內有一鞘少銀三封查明共短銀二百

十六兩六錢因在乍了一帶烏拉不齊分起行走前後不能兼顧致被掉竊除將該汛弁李仲照例責革並提訊押解兵丁有無知情同竊等弊究擬咨部外其都司徐南鵬守備李元勛雖據分賠完項但於押解餉銀不能慎選弁兵致中途掉竊請交部議處等語打箭鑪口外地方遼遠山徑叢雜遇有應解多銀原應分開陸續運解並多派弁兵照料護送以防疎失乃以十萬兩之餉銀僅交汛弁李仲管解前後不能兼顧遂致途次被竊實屬不成事體李世傑何竟未計及此嗣後務須酌減銀數多分起數並添派官兵小心護送以昭慎重至此次短少銀二百餘兩雖已據都司徐南鵬守備李元勛分賠完項但該員等於運送餉銀不能豫為防範倍加嚴謹以致中途掉竊僅予議處不足示儆徐南鵬李元勛均著交部嚴加議處○又諭曰李世傑奏四川墊江縣民盧樸先現年一百二歲

瀘州民孫丕權。現年一百歲。均精神強健。樂業安居。請旨旌表等語。盧樸先等俱年屆期頤。康強矍鑠。洵為昇平人瑞。所有應行旌表及賞給銀兩緞匹之處。著該部照例具題。用示優獎。耆年至意。○丁巳秋分夕。

月於西郊。遣和郡王綿循行禮。○青海扎薩克郡王納罕達爾濟等七人。杜爾伯特扎薩克貝子羅布藏薩木坦等三人入覲。

上御卷阿勝境。召見同扈從王公大臣。蒙古王貝勒貝子公額駙台吉。及安南國使臣等賜

食。○祭

先師孔子。遣儀郡王永璇行禮。○諭曰。何裕城奏。寧都州生員曾鏡。現年八十歲。五世同堂。可否給予扁額銀緞等語。曾鏡年臻八秩。五世同堂。實為昇平瑞應。著該撫給予扁額。並賞給緞匹銀兩。以昭錫福。推恩至意。○諭軍機大臣等。前因全德參奏護江西鹽道恒寧虛報捏飾。請旨將恒寧交部議處。嗣又思

各商銷售引鹽。按引納課。若以少報多。則虛報之引課。又從何而出。復降旨。令何裕城全德據實具奏。本日據何裕城奏。調查案卷。並傳詢商店。僉稱商等因恒護道嚴諭。只得將五月上旬銷數。劃補四月下旬。以副定限。隨後又將五月趕銷足數。並非憑空多報。況鹽與引不離。引與課相隨。有一引之鹽。即有一引之課。如果虛報銷鹽九千餘引。按引納課。應解課銀十一萬兩有零。何人代為賠納。所有現報銷數。俱係實銷。商等願甘具結等語。所奏又與全德前奏。迥不相符。總之課隨引出。朕前降諭。旨甚明。今江西春季夏季之課。既俱如額交納。若其中並無苛繳挪移情弊。則恒寧所辦。尚為出力奮勉。全德不通盤查。明遽行參奏。殊屬失之冒昧。若何裕城因見全德參奏。心存迴護。通同弊混。竟將別項庫銀。於事後挪移作抵。或押令該商將虛出之數。按引輸交。並勒出甘結。則該撫之咎更大。

此事關係甚重。現在睢寧漫工堵築事宜大局業經籌定。且有蘭第錫康基田在彼。足資董率辦理。書麟接奉此旨。著即馳赴江西。提齊案卷。並傳集商衆。將此事恒寧究竟有無捏報。是否何裕成為之墊課。袒護抑係全德。前此叅奏。竟有未當之處。秉公詳悉查明。據實具奏。勿稍瞻徇。將此由五百里諭令知之。○又諭前因全德奏護江西鹽道恒寧。因鹽數少銷。恐致查詰。令鹽店虛報銷數。多至一倍。殊屬捏飾取巧。已將恒寧照部議降三級調用矣。本日又據何裕城奏。該護道夏季實銷引數。委與造報相符。並無以少報多。及以多報少之弊等語。與全德所奏情節互異。鹽務係全德專管。其於捏報銷數之處。自必確有見聞。始行叅奏。但引隨課出現據。何裕城查明。該省春季夏季鹽課。均依額交納。此項課銀。又從何而出。若恒寧現報銷數。俱係實銷。並無別項情弊。則全德前此所叅捏報。非

冒昧。即係挾嫌。將恒寧予以降調。未免屈抑。倘何裕城因迴護屬員。曲為開脫。其該商所交引課。或通融挪墊。或別事苛徵。商人係該鹽政所管。其如何弊混之處。該鹽政斷無不知。著將何裕城奏摺鈔寄全德閱看。令其將從前所奏恒寧捏報一節。是否冒昧挾嫌。抑或確有所見。即行據實覆奏。不可迴護。前奏將此由五百里諭令知之。○又諭曰。伍拉納等奏溫州大門洋盜匪拒傷官兵一案。現在督飭文武員弁。並帶同兵丁。柴日茂。作為眼目。赴泉州一帶。及各海汊。分投緝拏。以期迅速。就獲等語。此案節經諭令該督等。上緊緝拏盜犯。務須全數弋獲。盡法懲治。伍拉納等現俱駐劄該處。各鎮將道府等。自必倍加緊密。設法分投於水陸地方。並各犯本籍。跟蹤躡緝。但恐日久懈生。又涉顛預。了事之弊。不可不慎。該督等務宜同心協力。認真督捕。以靖根株。而清洋面。又另片奏總兵丁朝雄等

稟報在於北門洋暨霞浦縣地方緝獲洋盜李孝全等九名。現委員嚴審等語。此等匪犯一經緝獲。即應按律正法。亦無可質訊之處。若將該犯等羈候監禁。必待案內逸犯全行拏到。再行辦理。設使有越獄脫逃情弊。更屬不成事體。著傳諭伍拉納等於該犯等審訊明確時。即一面辦理。一面奏聞。○湖廣總督畢沅奏。向來水販赴漢商買鹽。漢商給與鹽道印票。名曰水程。水販賣鹽後。即將水程赴

該管州縣呈繳。報道查覈。邇來並不隨時呈繳。以致官私不分。臣現今南北二省。將節年水程。盡行查繳清楚。以後俱責令一月一繳。並飭鹽道將水程豫先發交商人。以便水販隨到隨給。不得俟水販買鹽後始發。致令守候得旨。毋始勤終怠可也。○戊午祭

大社。

大稷遣克勤郡王雅朗阿恭代行禮。○

上御卷阿勝境。賜扈從王公大臣蒙古王貝勒

貝子公額駙台吉及青海扎薩克郡王。杜爾伯特扎薩克貝子。安南國使臣等食。至辛酉。皆如之。○諭軍機大臣曰。安南貢使阮光顯等於送駕後。令其回京。所有頒給勅印。仍交禮部齎捧回京。俟該貢使到京後。著留京辦事。王大臣擇日頒發。令該貢使在太和門內丹墀下行禮。祇領阿桂捧印。嵇璜捧勅。并派贊禮郎照例贊禮。俾得瞻仰闕廷。并睹禮儀整肅。該貢使祇領後。只須住二三日。即令委

員伴送回國。不必又候回鑾。○已未遣官祭關帝廟。○諭軍機大臣等。據汪新奏到貴州省六月分糧價清單。內開各屬上中米價。均與上月相等。該省所轄十餘府屬。即使米糧時價俱係中平。然通省境壤遼濶。市價豈無偶有參差之處。乃一律開作相等。毫無軒輊。竟成刻板文章。可見汪新於此等事件。全不留心。一任幕友照樣填寫。未經寓目。殊屬疎忽。汪新著傳旨申飭。○順天鄉試。以兵部左

侍郎伊齡阿戶部右侍郎汪承霈為監臨官。兵部尚書孫士毅為正考官。工部右侍郎鄒奕孝內閣學士圖敏為副考官。○庚申遣官祭昭忠祠。○諭曰福康安奏廣東新寧縣壽民李適本現年一百二歲淳良謹厚孝友可風請旨旌表等語李適本年逾期頤康健矍鑠洵為昇平人瑞所有應行旌表及賞給銀兩緞匹之處著該部照例具題用示優獎者年至意。○調任貴州巡撫郭世勲疏報惠州

府黃平麻哈三州湄潭甕安畢節三縣乾隆五十三年分開墾田土七十畝有奇。○辛酉命刑部左侍郎穆精阿在紫禁城內騎馬。○壬戌

太宗文皇帝忌辰遣官祭

昭陵。○命禮部尚書常青紀昀兵部尚書孫士毅左都御史李綬在紫禁城內騎馬。○癸亥上御萬樹園大幄次賜扈從王公大臣蒙古王貝勒貝子公額駙台吉及青海扎薩克郡王

杜爾伯特扎薩克貝子安南國使臣等宴並賜緞匹有差。○諭曰富綱奏太和縣民趙世望現年一百一歲精神強健孫曾繞膝請旨旌表等語趙世望年逾期頤康強矍鑠洵為昇平人瑞所有應行旌表及賞給緞匹銀兩之處著該部照例具題以昭優獎者年至意。○西藏辦事大臣巴忠奏巴勒布王子名喇納巴都爾其總辦事務係王子之叔名巴都薩野感恩入貢不日抵扎什倫布懇將來使賜以頂戴至帶領進京已由提臣成德奏明但該番等語言成德未能通曉或交臣帶領進京。○諭軍機大臣等據巴忠奏巴勒布齋表進貢頭目不日將抵扎什倫布或聽成德帶領進京抑或交巴忠照料行走請旨遵行等語前降旨令巴忠回至扎什倫布原欲其面見沙瑪爾巴呼圖克圖將節次所降恩旨並賞賚物件詳晰宣示今巴忠馳赴扎什倫布或已會晤沙瑪爾巴呼圖克圖將諸事逐一

辦妥。而巴勒布貢使適至。則竟交巴忠帶領進京。倘沙瑪爾巴呼圖克圖業已轉回。必須遣人傳喚巴忠。尚須在彼守候。則該貢使等即交成德帶來。務於歲底到京。俾得與朝鮮琉球等國貢使一同瞻覲。毋致稍有遲誤。至巴勒布部長。此時尚未給予封爵。若遽將所遣頭目賞給頂戴。轉覺未協。現交軍機處存記。俟該頭目等到京後。再為酌量施恩。又此次隨從各番目內。是否帶有該處樂工。如有此項人等。同來固屬甚善。否則亦不必令其攜帶。並無庸向伊等詢及也。○軍機大臣等會議。兩廣總督福康安奏捕盜章程。並現辦巡緝事宜。一粵東雷廉二府交界海面之澳洲。并迤東之斜陽地方。俱係孤島荒地。無籍貧民。每有前往搭寮居住者。不免與洋盜串通滋事。業飭地方官逐一遞回原籍。草莽概行燒燬。勿使窩留。此外洲島一律清查。嚴禁一沿海漁人。恐為洋盜所誘。當飭編列字號。

每船開造丁口清冊。並令各船連環保結。由地方官按季詳報。一船為盜。即將不行呈首之互保各船連坐。捕盜時。即令兵役帶同作線。如能拏獲一體獎賞。一舟師出海巡哨。向例分上下兩班輪流更換。近因查拏洋盜。節次調派弁兵四路堵截。而現在輪班屆期。難以紛紛更換。請將上班派巡員弁。令其再留一班。以資熟手。一粵東鹽船赴場領運。往返本有定限。近日每逗留不回。恐藉此販私。甚或在洋為匪。已飭鹽運司嚴拏究辦。一粵閩洋面毗連。兩省無籍貧民。以臺灣地方膏腴。往往偷渡。現在實力稽查。一地方無籍棍徒。粵東名為濫仔。業飭屬嚴辦。輕則分別枷杖。重則依兇惡棍徒例。定擬發遣。均應如所奏。一水師戰船捕盜時。駕駛未甚便捷。請照商船式樣改造。查戰船自有定制。未可因捕盜概行議改。臣等酌議。粵東額設外海戰船共一百三十七隻。閩浙江南俱有額設戰船。請

令各省沿海督撫提鎮將各船酌留一半。其餘一半於屆應拆造之年。照外海民船式樣逐漸改造。至粵東閩浙江南內河亦有巡查緝匪之事。其額設櫓槳各船。是否亦須酌改。應聽各該督撫查奏。再官造戰船。應查明是否與民船一律堅固。如承辦之員剋減工料。即當查叅。若原定例價不敷。亦當據實奏明。寧可量減額船數。目將工料歸併津貼從之。

甲子

太祖高皇帝忌辰遣官祭

福陵。倉場侍郎蘇凌阿。劉秉恬奏通惠河及朝陽門外護城河淤積日久。請及時挑濬。再朝陽門外西石道臨河泊岸約六十餘丈。為卸漕要區。向係用土培岸。每當夏雨。多有坍塌。以致淤積河身。請照橋欄東石道一體改砌石岸。諭通惠河及朝陽門外護城河應挑各工。著派金簡韓錄會同倉場侍郎勘估具奏。上緊辦理。其劉綬蘇凌阿等前請挑挖溫

榆河之處亦著一併會同秉公勘辦。○乙丑上御卷阿勝境。賜扈從王公大臣蒙古王貝勒貝子公額駙台吉及青海扎薩克郡王杜爾伯特扎薩克貝子安南國使臣等食。至戊辰皆如之。○諭曰奎林等奏審明笨港守備李文彩得受偷越船隻番銀一案。將李文彩依枉法贓八十兩絞監候。律問擬絞決。其經手收贓之胥吏方陞依說事過錢與正犯同罪至死減一等例。問擬杖流發往伊犁給兵丁為奴等因。一摺所議失之輕縱。臺灣甫經大加懲創。痛革積弊之時。乃守備李文彩於偷越船隻到港復敢得贓縱放。實屬藐法已極。而李文彩得受錢文係方陞說合。是方陞為此案罪魁。李文彩之死皆由該犯慫恿所致。若因其贓未滿數。僅發伊犁。豈足蔽辜。況此而不從重辦理。將該處官吏無所忌憚。勢必日久因循。又釀成柴大紀貪贖之案。殊非整飭官方。綏靖海疆之道。李文彩竟應改為斬

陽四縣因河水陡長其濱臨村莊地畝猝被	致臨河村莊亦被淹浸房舍均有倒塌現委	司道親往查勘籌辦等語永城夏邑臨漳安	之臨漳安陽二縣濱臨漳河因漳水長發以	永城夏邑二縣村莊窪地被淹又彰德府屬	四日黃水陡長溝河不能容納歸德府屬之	具奏○諭軍機大臣曰梁肯堂奏七月二十	等定擬摺著軍機大臣會同行在法司速議	決方陞亦應改為絞決以示懲儆所有奎林
淹浸雖係一隅偏災亦應妥為撫卹著傳諭	梁肯堂即督率所屬先行借給口糧妥為安	頓其有應行賑借蠲緩各事並著詳悉查明	妥協辦理勿使一夫失所以副朕軫念民依	至意○旌表守正被戕四川南充縣民龍世	倫聘妻萬氏○丙寅	萬壽節遣官祭	太廟後殿○遣官祭	福陵

孝賢皇后陵○遣官祭	泰東陵○遣官祭	泰陵	景陵	孝東陵	孝陵	昭西陵	昭陵
顯佑宮	東嶽廟	城隍廟○	上御澹泊敬誠殿扈從王公大臣官員及蒙古	王貝勒貝子公額駙台吉安南國使臣等行	慶賀禮○以通政司副使秦清為太僕寺卿	○丁卯諭明年朕八旬萬壽前經俯允王公	大臣之請舉行慶典在籍大學士蔡新尚書
曹文植自必進京祝嘏第念蔡新年逾八旬	而曹文植之母則年已望九若屆期蔡新精						

神翼樂曹文埴之母亦復體履康強伊二人自當前詣闕廷以伸慶祝之誠倘蔡新精力未能如舊曹文埴之母亦漸形衰老則蔡新高年跋涉既非所宜而曹文埴遠赴京師不能朝夕侍養伊母子亦未免彼此懸戀在蔡新曹文埴俱係大臣心殷葵向必不肯以私情上達因思福建安徽督撫近在同省見聞較切務宜留心體察如蔡新曹文埴有不能遠來之勢該督撫即應力為阻止倘伊二人以朕八旬萬壽未得與在廷臣工共伸慶祝即令在籍望闕行禮均足以展其忱悃也著該督撫將此旨告知蔡新曹文埴以示朕優加體卹至意○又諭曰蔣賜榮等奏湖南三幫糧船在通州南營地方被劫一案經武清縣拏獲夥犯李吉兒等四名首犯孫二亦經東路同知拏獲連日嚴鞫據各供認行竊拒捕不諱等語此案兇犯膽敢於輦轂之下糾竊行強該廳縣等上緊躡捕未及一月即將

首夥各犯緝獲多名尚屬奮勉東路同知汪大鏞武清縣知縣唐汝風均著交部議敘劉莪現在熱河所有已獲各犯未便輟轉解審致稽顯戮即著蔣賜榮等速行嚴審定擬具奏其未獲之犯仍著直隸總督與該府尹飭屬嚴緝務獲毋任遠颺漏網○諭軍機大臣等據畢沅等奏湖北各屬得雨情形摺內稱惟安陸宜昌二府屬有一二州縣得雨未透已飭該道府敬謹誠求並齋心默禱等語楚北各屬前於六月中旬後暑雨少缺茲於七月初旬得雨深透秋田自可資以接濟但安陸宜昌二府屬據奏仍復缺雨朕心深為廕念現在該二府屬曾否續得雨澤是否不致成災該督等務須詳悉查明據實具奏如有成災應行撫卹之處即一面奏聞一面妥為辦理毋得稍存諱飾致災黎或致失所再惠齡奏到六月分糧價單所開價值覽奏頗不明晰昨閱劉莪所奏直隸糧價單開列各項

價值頗覺眉目清明著照鈔一分寄惠齡閱看令其嗣後即仿照此式開列具奏將此各諭令知之○戶部議覆湖廣總督畢沅奏稱湖北漕南二米一兌交旗船轉運通倉一解交荊州各營供支兵食向來將上游各州縣解通漕米與下游各州縣解荊南米互相抵兌各就附近水次解交實為妥便惟查崇陽通城二縣均在省城上游距省六七百里不等其漕米未經一律抵兌請自本年為始將

該二縣應解漕米五千九百八十四石改解荊州抵補南米以下游之蘄州蕪水廣濟興國黃岡武昌等六州縣解荊南米就近兌交旗船劃抵崇陽通城二縣應運漕額所有該二縣起運漕米水腳銀即可節省報解充公其解荊南米腳費亦即在蘄州等六州縣原解荊州水腳銀內撥給至漕糧應給旗丁截貼及南糧耗米修倉等費俱照抵兌舊例辦理應如所奏從之○蠲免安徽懷寧祁門當

塗蕪湖繁昌銅陵無為建德廬江等九州縣乾隆五十三年學田水災額賦○戊辰諭軍機大臣曰陳用敷奏據鳳陽府稟報所屬宿州因碭山縣漫溢黃水下注州境民田被淹水勢由靈璧縣下注洪澤湖該縣亦有被淹之處現飭藩司馳赴該處率屬勘辦等語宿州靈璧前因夏間雨水稍多兼值毛城鋪等處洩黃匯注間有被淹甫經涸出補種今又因上游黃水漫溢被淹農民不無拮据難免

一隅偏災著傳諭該撫即飭藩司督率所屬詳細履勘實力查辦務須無濫無遺俾葑屋貧黎均霑實惠以副朕軫念民依至意○又諭曰全德覆奏各商行鹽定例必須先完課稅然後運鹽到岸恒寧多報銷數尚不至累及商人多完引課但揚商辦鹽遣人運交省店省店賣出一引即須寄回一引之價若報官既可以少作多其寄信揚商又可以多作少恐啟省店影射牽混之弊是以據實叅奏

等語。此事前據何裕城奏引與課隨。恒寧所
多報銷鹽九千餘引。現有課銀十一萬兩有
零。並非虛捏。今又據全德奏課銀係例應先
完。惟鹽未實銷。揚商引價無從歸還。恐省店
借此停捺。那移所言亦似有理。著將全德原
摺鈔寄何裕城閱看。令其將恒寧所多報銷
售鹽數。是否僅完課銀。抑係揚商引價。亦已
一併歸還之處。據實具奏。勿稍迴護。書麟到
江西後。亦著秉公查明奏聞。不可瞻徇。將此
傳諭書麟。何裕城。並諭全德知之。

大清高宗法天隆運至誠先覺體元立極數文
奮武孝慈神聖純皇帝實錄卷之一千三百三十六

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十七

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅大學士弘文館閣學士文淵閣領侍衛內大臣稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級臣等謹將內大臣戶部尚書錄副滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將尋常

敕修

乾隆五十四年己酉八月己巳

奉 上 諭

上自避暑山莊啟鑾幸木蘭。○諭各省學政現
屆應行更換之期。除安徽學政秦潮湖南學
政張姚成俱係本年補放毋庸更換外。順天
學政著劉墉去。江蘇學政著胡高望去。浙江
學政著寶光鼎去。江西學政著趙佑去。福建
學政著劉躍雲去。山東學政著鄒炳泰去。山
西學政著茹業去。河南學政著茅元銘去。陝
西學政著周兆基去。湖北學政著李長森去。
廣東學政著陳桂森去。廣西學政著費振勳

去。四川學政著戴均元去。雲南學政著蕭九
成去。貴州學政著陸湘去。現已啟鑾進哨。以
上各員現出該省試差者。於出闈後即行接
印任事。其在京各員亦著於奉旨後速赴新
任。均不必前來請訓。○又諭前將御題難雜
待飼圖。韓幹試馬圖及太常仙蝶詩等墨刻
分賞內外大臣。近據各督撫陸續奏謝。閱其
奏摺俱用駢體未免意涉鋪張。不知試馬圖
之題朕原因唐太宗以英武定天下不數傳
而至天寶。耽於逸樂。罔念祖宗創業艱難。文
恬武嬉。釀成漁陽之變。倉猝播遷。國勢遂以
不振。朕撫圖增惕。形諸篇什。以為考鏡得失
之林。非如難雜待飼圖之鑒切民依。凡有撫
綏之責者。各應顧名思義。至於仙蝶詩亦因
太常署中實有其物。朕曾目覩。於幾餘吟詠
藉紀事實。適該衙門大臣鐫搨呈進。卷幅太
多。遂以分賞。於民生吏治均無關係。各督撫
祇領後於奏事之便附陳謝悃。數語可畢。何

必紛紛效用駢體鋪張過尚詞華使傳之日久將無識之徒誤疑朕為耽嗜縑素並好神仙幻妄之說此則所關甚大蓋玩物喪志帝王所戒是以宣和鑒賞無採於國是廢弛而天書符瑞等事尤為誕妄不經朕素所鄙笑豈肯以玩好機祥啟導臣工流傳後世耶茲因批覽各督撫奏謝之摺特為明白宣示嗣後凡屬內外大臣務宜益矢懇誠勉襄政治以副朕熙華崇實至意將此旨入於各督撫

交代永識朕意○又諭曰都爾嘉等奏呼倫貝爾副都統職銜總管賡音蘇現在患病等語賡音蘇著即回旗調理俟病愈另行簡用所遺副都統職銜總管員缺著伊蘭保補授伊蘭保著即赴任不必前來請訓○是日駐蹕中關行宮○庚午諭曰劉躍雲實光鼎現在俱出學差禮部漢侍郎乏人著金士松暫行署理○又諭曰李世傑奏據涪州紳士開具前任兵部尚書周煌事實合詞呈請入祀

鄉賢等語已故尚書周煌人品端正學問優長著准其入祀鄉賢祠○諭軍機大臣等據琅玕奏報雨水糧價情形摺內稱浙省各府屬地方於六月內節次得雨普徧即仁和等十三縣於上中二旬未獲優霑亦已於七月初七初十等日連得大雨高下深透均可一律豐收等語該省雨澤既經需足收成可期豐稔則各屬米麥價值自應日就平減乃閱該撫糧價單內有每石比上月較增一二分至四五分不等之處而摺內未據敘及增價緣由殊不可解若年歲果屬豐登市價何以轉臻昂貴該撫所奏未免自相矛盾著傳諭琅玕即將該省糧價因何轉有增加之處查明據實覆奏○封閉甘肅英莪峽普城山鉛廠從總督勒保請也○是日駐蹕波羅河屯行宮○辛未諭據伍拉納等奏浙江溫州鎮界連閩省島嶼錯雜最易藏奸較他鎮更為緊要總兵韓正國人尚明白究係新任查處

州鎮總兵謝斌在任年久。兼熟悉該處情形。請將謝斌與韓正國對調等語。著照所請。謝斌著調補浙江溫州鎮總兵。其處州鎮總兵員缺。即著韓正國調補。○又諭曰。安臨之母乘輜赴伊任所致。輜夫在寧古塔開設賭局。騷擾旗民。將安臨定擬發往伊犁効力贖罪。自屬罪所應得。但安臨究因伊母以致輜夫滋事。凡有盡孝於其父母者。朕從不治罪。即安臨借伊母以為名。亦可免其發遣。况伊母年逾七旬。兼有疾病。安臨著從寬免其發往伊犁。俾家居自思罪戾。奉養伊母。○諭軍機大臣等。據何裕城奏。恒寧因四月分銷鹽數少。飭商將五月銷數劃補。俾嗣後趕緊暢銷。止屬移後作前。並非將無作有等語。所奏情節。朕亦難遽定其曲直。此事以何裕城所奏情形。恒寧不但無過。且能奮勉急公。而全德係該管鹽政。其叅劾恒寧。自因該員辦理有過當之處。衆商未免抱怨。稟知全德。始行具

奏。必非無見。揚商運鹽前赴口岸。銷一引應歸一引之價。若鹽未實銷。則課雖已交。而價仍懸宕。商人何以輓轡轉輸。且四月缺銷之鹽。以五月補足。設五月之鹽。又復缺銷。月復一月。作何劃補。此蓋恒寧因暫護道篆。止期於伊署任數月內。銷數無缺。通融劃補。若該員實任鹽道。未必肯如此辦理。看來恒寧乃意存見長之人。故以移後作前。表其督銷認真。而何裕城則因恒寧為其屬員。又係首府。外省督撫於所屬道府。往往各相袒庇。遂不免為其所愚。此事現令書麟前往查辦。該督到彼後。務宜秉公查奏。以定是非。不可稍有偏向。並將朕此旨指出情節。是否如此。一併確查據實具奏。勿存迴護。將此傳諭書麟。並諭何裕城全德知之。○又諭。據劉義奏。湖南漕船被劫。案內逸犯。續經天津縣知縣金之忠。拏獲孟大一名。沅河縣知縣尹名選。拏獲王二、吳三二名。已飛飭押解順天府。一併

審擬等語。此案各犯閱其情節。原不過竊賊臨時拒捕。尚非刦盜可比。但該犯等膽敢在輦轂之下。糾竊行強。若非從嚴辦理。不足以懲創。將來定擬時。此案首犯自當即在該處正法示衆。即為從夥犯亦俱應擬發黑龍江給索倫等為奴。除就近諭知劉戡外。著傳諭蔣賜榮等於審明此案情節後。即照此定擬。○又諭曰。伍拉納等奏審明續獲大門洋等案盜犯。分別正法一摺。內稱首犯陳禮禮

曾於船上拒傷參將張殿魁等身死。嗣於七月初四日。船至梨洋地方。遭風打翻。陳禮禮等落海。被浪衝溺等語。陳禮禮等逞兇拒捕。傷害官員。實為盜首中最要之犯。現雖據各犯供稱。實因翻船受傷落海。漂溺係一面之詞。不足為據。且屍身並未撈獲。其是否溺斃。殊難憑信。仍須上緊根究。務得確實情節。毋致要犯倖逃。顯戮。又盜首吳進林。明灼。柯興。奇。陳四舵等。現俱逃竄未獲。該犯等在洋面

肆行搶刦。夥衆拒捕。情罪重大。該督等務須督率所屬。迅速嚴緝。就獲後。仍遵照前降諭旨。一面審明正法。一面奏聞。毋使一名遠颺漏網。又另摺奏稱。現在會同提督陳杰。督飭員弁。分投嚴密緝捕。將各逸犯全行弋獲。以靖洋面。斷不敢稍有懈玩等語。各案逸犯。自應盡數查拏。但不可託之空言。一奏了事。至浙省營伍廢弛。洋盜充斥。伍拉納等現任該省督撫。責有攸歸。若再不嚴行搜拏。盡絕根

株。其咎更將誰諉耶。將此諭令知之。○又諭本年安南阮惠遣陪臣阮光顯齋表乞降。所有經過沿途各省。該督撫等俱演劇筵宴。賞賜優厚。又上年緬甸遣頭目孟幹等投誠納款。其經過地方。各督撫亦曾如此優賚。原因遠人初附。以遂其瞻覲願誠。明年阮惠欲親行入覲。即緬甸孟隕亦有遣使請封之信。其經過沿途各省。督撫等雖當照例備辦。一體優待。但所賞禮物。祇須將尋常綢帛等件。照

數備賞。不必過於豐美。踵事增華。且督撫等所賞過於優厚。伊等養廉亦覺多費。除就近傳諭劉綏外。將此諭令各督撫知之。○又諭昨據鄂輝等奏。巴勒布專遣大頭人。巴拉。都爾喀。哇斯。哈哩薩野。二名。並小頭人。散番。二十三名。恭齋表貢。於七月十五日。已抵扎什倫布。現在妥為照料。伴送進京等語。上年緬甸貢使。及本年安南貢使。前抵熱河瞻覲。經過沿途地方。各督撫俱令叩見。演劇筵宴。

並優加犒賞。綢緞等物。已勒布。遠處西陲。從前並未通職貢。且不嫻中國禮儀。非如緬甸安南。近屆南服。久慕華風。者可比。著傳諭各督撫。於該貢使過境時。止須照每年達賴喇嘛班禪所遣。呈遞丹書。克堪布過境之例。妥與居處飲食。或演戲與看。尚可。並計算日期。務令於年前到京瞻覲。不必如緬甸安南貢使。令其叩見。又須犒賞。以省煩費也。○刑部等部議覆。閩浙總督覺羅伍拉納奏。稱查明

臺灣各營饋送柴大紀夫價。得受包差庇賭錢文之把總虞保麟等。分別革職。發往新疆効力贖罪。均應如該督所擬。得旨。把總虞保麟。陳龍。饋送柴大紀夫價。又得受包差庇賭錢文。擬以發往新疆。實屬罪所應得。孫泰元於該管兵丁庇賭得錢。毫無覺察。本亦應照部議革職。第念該弁等。前在臺灣。曾經帶兵出力。虞保麟。陳龍。著改為革職留任。十年無過。方准開復。所得錢文。仍著查明按數追繳。

孫泰元。著改為革職留任。照例開復。○閩浙總督覺羅伍拉納。浙江巡撫覺羅琅玕。遵旨議奏。閩省洋面。九月颶風時發。三月風信靡常。並多海霧。惟四。八。兩月。風色順利。所有海壇。金門。二鎮。向例於三月初。九月初。會哨於涵頭港之期。請改為四月。八月內。訂期會哨。其海壇鎮。於五月十五日。與溫州鎮會哨於鎮下關。金門鎮。於六月十五日。與南澳鎮會哨於銅山大澳。時值南風盛發。無甚颶

颶請仍循舊。浙省洋面。七八月間。每多颶風。九月內。風信尚平。所有黃巖鎮。三月初。九月初。與溫州鎮會哨於沙角山。又黃巖鎮。三月十五。九月十五。與定海鎮會哨於九龍港之期。均請仍舊。再各鎮會哨。向例由總督委弁。赴該處取結備案。恐微員難免瞻徇。請嗣後責成該管之各巡道。於兩鎮會哨時。先期親赴該處。俟兩鎮到齊。覲面取結具報。得旨。此議是。該部如議行。○是日。駐蹕張三營。

行宮。○壬申。

上行圍。○是日。駐蹕阿貴圖大營。○癸酉。上行圍。○諭軍機大臣等。據書麟奏。恒寧將五月初間所銷之引。捏報四月銷數。以為一時見長之計。情節已明。惟此項課銀。是否商人已銷完解。抑係何裕城為之墊課袒護。或押令商人按引輪交。勒令出結。俟到江西。詳查具奏等語。商鹽多銷一引。不特有一引之課。且應歸一引之價。若恒寧所報多銷。或因五

月係屬醬市。向來旺銷。該員以之通融劃補。官課與商價。均歸有著。其咎尚不過移後作前。意存見長討好。若鹽並未銷。是恒寧竟屬捏報。而此項課銀。昨據何裕城奏。業經全行交納。非押令商人墊交。即係何裕城將別項銀兩。為之挪移作抵。希圖始終迴護。該省司道各庫。閒款銀兩甚多。書麟或不及逐一盤查。然亦不可不留心訪詢。務得實情。蓋恒寧如果捏報多銷。將無作有。是該員有心弊混。何裕城近在同省。即應據實參奏。今非惟不能查參。且為之彌縫掩飾。其委令臬司往查。又復扶同袒護。是何裕城與額勒春俱有應得之咎。此事全在書麟到彼後。詳悉查明。方能定奪。該督當遵照節降諭旨。秉公確查。據實具奏。不可稍有瞻徇。○又諭。曰。福康安奏。現派成林恭捧御製詩勅諭。於八月初一日。起程齎赴安南。又另片奏稱。阮光平受封後。修表謝恩。若表文遞至廣東。為期未免太遲。

已札會撫臣孫永清拆閱加封馳奏等語。阮光平接奉勅諭後。具表陳謝。若遽至廣東。再行具奏。未免繞道遲緩。自應逕投廣西。先交孫永清拆閱馳奏。但閱福康安摺內稱。成林按程行走。如關外瘴氣已消。約於八月二十後。方抵黎城。是阮光平於受封後。豫備表文。再擇吉遣人齎送至鎮南關。已在九月下旬。成林到彼後。面見阮光平。宣示一切。自必將該國王如何歡忭。及該國是否寧帖。明年何時即能起身情形。詳晰先行稟知。孫永清可即派妥員。在鎮南關等候。一俟成林稟到。可飛送孫永清處閱看。即成林之稟。係單稟福康安。孫永清即先行拆閱一面。加封具摺。由六百里馳奏。一面再咨會福康安。庶得信較速。早慰厘注。又本日朕行圍。親射鹿二隻。著將鹿肉一分賞給福康安。以示優眷。將此由五百里各諭令知之。○戶部議覆。兩淮鹽政全德奏稱。定例每引加餘息三錢。第各商辦

運。每引需成本十一二兩不等。趕運緊急。多係借本接濟。若僅得餘息三錢。按月覈算。每月不及三釐之息。殊屬不敷。請嗣後如成本甚輕。給以二分之息。重則給以一分之息等語。該鹽政所請增數較多。臣等酌議於原額三錢外。如成本較輕。每引餘息加二釐。重則加一釐。從之。○是日。駐蹕海拉蘇台大營。○甲戌。

上行圍。○諭曰。馮光熊奏。勘得保定府屬之清苑。安州。新安。雄縣。河間。府屬之任邱。河間。獻縣。肅寧。阜城。景州。天津府屬之天津。靜海。滄州。青縣。鹽山。順天府屬之大城。武清。東安。永清等處地畝。被淹成災。自五六七分至八九分不等。緣各災戶距麥收未遠。農民薄有儲蓄。復蒙恩賞口糧。先行撫卹。不至流離急迫。俟清查戶口。分別極次貧民。覈實給賑。摘賑所有續報東光。新城等十五處。統歸秋災案內。分晰查辦等語。本年直隸各府大田。本可

望豐收。乃因夏秋雨水過多。河淀並漲。被滯成災。地方較廣。雖據馮光熊周歷親查。並遵旨酌給口糧。目下民情均各安帖。但現距明歲麥秋尚遠。恐貧黎餬口不繼。朕心深為厯注。著交與劉義督率藩司。確查妥辦。加意撫卹。向來各省辦賑。多有本折兼放者。此次均著給與本色。庶災黎不至覓食維艱。於生計更為有益。第恐直省常平社義各倉。不敷散給。著將北倉上年截存米十一萬九千餘石。

概行賞給。倘尚不敷用。劉義即行奏聞。再於通倉酌撥。該督宜董飭所屬實心經理。仍設法疏消積水。俾及時趕種秋麥。以為明歲接濟。務使閭閻均霑實惠。元氣速紓。以副朕軫念畿輔黎庶有加無已至意。倘該督不能妥協辦理。朕明春巡幸山東。經過直省各州縣。見該處災民尚有菜色。則惟該督是問。○又諭。據畢沅奏。湖北荊州府地廣人稠。訟繁政劇。為楚省難治之區。降調知府張方理到任。

一載以來。盡心整頓。大有起色。且萬城隄壩各工。皆係該員經理。現在江陵監利一帶。秋深水落。即有續辦要工。仰懇准令張方理。加倍捐復。仍留荊州府任。以收駕輕就熟之效。等語。張方理。因前署山東濟南府任內。承審孫家駟控案。不行據實查辦。審理又復稽延。經部議降三級調用。不准抵銷。處分較重。該督等奏請捐復留任。於例本屬不合。姑念該員於荊州府任內。辦理地方事務。尚為得力。

且現有承辦要工。未便遽易生手。張方理著准其加倍捐復原官。仍留荊州府知府之任。但以應行降調之員。遽准留任。恐啟外省夤緣趨避之漸。張方理著仍帶革職留任。四年無過。方准開復。○又諭。據保寧奏。伊犁理事。同知訥清額。不諳外任事務。於新疆情形。毫不知曉。請撤回京城原衙門行走等語。所奏非是。新疆地方。不願前往者甚多。若偽為不能。該大臣等即行具奏。撤回。適足以長其捏。

飾之風。如有似此之人。其員缺應另行派員。將該員仍留該處。限以四年六年更換。方足以示儆。若官員內有不能事者。輒行撤回。豈大臣內辦事不妥協者。亦將撤回耶。況訥清額係新發往之員。自不能曉該處情形。該將軍大臣等。指示訓飭。伊自漸能理會。訥清額如果懶惰平庸。保寧理應參奏。今以不諳地方情形。輒奏請撤回。原衙門行走。殊屬錯謬。保寧著申飭。至伊摺內稱年滿回京人員內。

有指名特行奏請補放者。尤屬非是。由京發往新疆人員。至該處効力三五年。始行回京。如再發往。勞逸殊屬不均。著將保寧所奏之訥清額。仍留該處。如係三年期滿者。限以四年五年期滿者。限以六年。嗣後均著照此辦理。並將新疆所有指名奏請帶往人員。均著發回。其員缺另派員發往更換。○又諭據保寧奏伊犁各營官兵。凡出差過十日以上者。請給予鹽菜口糧等語。年來伊犁官兵。生齒

日衆。各差又俱緊要。若照例出差過一月。方給鹽菜口糧。兵丁未免拮据。著照保寧所請。嗣後伊犁官兵。凡遇差遣過十日以上者。俱給予鹽菜口糧。此項銀兩口糧。著即在彼處房租銀。及倉貯斛口餘糧內支給。○諭軍機大臣等。前因柴大紀種種貪婪不法。釀成滋事鉅案。是以將伊子發往伊犁。給兵丁為奴。以示懲儆。本日據保寧奏。柴大紀長子柴際盛。已經解到。其次子柴際甲。尚未到遣。所等

語。柴際甲。於上年冬間。據琅玕奏。即行發遣。何以直至今年七月。尚未解到伊犁。非起解遲延。即屬沿途逗留所致。所有沿途各督撫。著傳旨申飭。仍即飭屬速解。勿任再有延逾。並將柴際甲。究在何處稽遲之處。查明據實覆奏。○又諭據巴忠奏。八月初旬。已抵前藏。即赴扎什倫布。與沙瑪爾巴呼圖克圖相見等語。已勒布所遣頭目。獻表納貢。於七月十五日。已抵扎什倫布。諒巴忠斷不能攜帶此

項人等同來已忠倘拘泥前奏。逗留數日。俟伊同來。恐年終尚不能到京。著傳諭已忠。即將此項人等。仍交成德帶來。務於十二月二十日內到京。與各外藩貢使一體筵宴。毋致遲誤。○吏部議覆。吉林將軍宗室恒秀咨稱。吉林所屬驛站官。助教各二員。六年任滿陞轉。倉官六員。三年任滿陞轉。遲速未免不均。請照黑龍江倉站等官之例。俱改為四年任滿。應如所請。再查盛京所屬倉官十員。亦係三年報滿陞轉。應一體改為四年之限。載入例冊遵行。從之。○湖廣總督畢沅奏。荊州隄工。著重全在伏汛。與河工相仿。前奏定章程。藩司於每年奏銷後。親往查驗。督撫於每年春汛前。分年輪往查驗。尚未詳備。請自明歲為始。即照河工例。於五月內汛水未發以前。總督親往駐工防守。交白露後旋省。至春汛前。本無應辦之事。奏銷後。已入大汛。既經總督前往。則巡撫與藩司。均有地方事務。請毋

庸重複前往。再查江陵監利沿江一帶隄。應築壩工。擬於九月初前往。詳細勘興。辦得肯欣慰覽之。○是日駐蹕呼魯蘇台大營。○乙亥。上行圍。○命留京王大臣。頒賜封安南國王勅。印於太和殿前。安南使臣阮光顯等。行禮祇領如儀。○旌表守正捐軀直隸通州民智得興妻王氏。○是日駐蹕納爾蘇台達巴漢西大營。翼日如之。○丙子。

世宗憲皇帝忌辰遣官祭

泰陵。○諭軍機大臣曰。全德覆奏。恒寧冊報四月銷數。與省店寄回報帳。兩不相符。將冊帳粘簽進呈。並稱。江西本年春夏按照銷數。應賣銀一百五十四萬餘兩。現尚懸欠七十九萬兩。何裕城摺內所云鹽價十一萬餘兩。或係恒寧於此欠項下通融那墊。且以五月銷數。移入四月。則秋季又可移入夏季。輾轉牽混。何所底止。又今年夏季。多一閏月。按月計

算所銷尚未及額。何得援照三月一季之額。將多出者作為溢銷等語。閱全德所奏。將何裕城摺內罅隙層層指出。俱為有理。是此事不特恒寧捏報弊混情節顯然。即何裕城前奏。竟不免袒護屬員。而臬司額勒春並不據實查出。亦未免徇庇。俱有應得之咎。計此時書麟業抵江西。自己傳集衆商調齊案卷。逐一秉公查辦。著將本日全德奏摺鈔錄一分。並簽出冊帳一併發交該督閱看。令其照全德所奏之處。逐條詳細嚴查。如何裕城額勒春。果有袒庇恒寧情弊。立即據實嚴參。外省督撫於交查事件。每存官官相護之見。想書麟受恩深重。諒不至稍涉瞻徇。自蹈咎戾也。將此由六百里傳諭書麟。仍即速行覆奏。並諭全德知之。○又諭曰。奎林等奏臺灣彰化縣民陳報殺死成兵郭振生一案。因陳報曾借郭振生錢文。郭振生班滿欲回內地。屢次索討不能清還。遂起意用刀很戳殺死郭振

生。將陳報問擬斬決。請勅部議一摺。臺灣甫經懲創之後。該處民人自應倍加安分守法。今陳報負欠不還。已屬理曲。乃因屢次逼討。輒敢用刀很戳。致將郭振生即時斃命。兇頑殘狠。不法已極。奎林等於審明後。即應將該犯一面正法。一面奏聞。何得復拘常例。請旨辦理耶。奎林等何不知事理輕重若此。除將原摺交行在軍機大臣會同法司即日覈議外。奎林等著傳旨申飭。○軍機大臣等議覆雲貴總督富綱奏稱。騰越之杉木籠。干崖。龍陵之三臺山等處。每年冬初輪派兵弁駐防。原為緬甸未經向化而設。今緬甸輸誠。無事輪換防兵。惟往來貨販及奸民偷越邊境。查察仍宜嚴密。現議酌設塘汛。撥兵常駐各事宜。一三臺山係通緬要口。但附近之大關二關等處。向撥兵駐守。毋庸另行設汛。惟杉木籠。干崖係騰越州東西兩路要隘。距騰越鎮之南甸營俱遠。查察難周。今擬於杉木籠設

立專汛撥南甸營千總。外委各一員。帶兵一百五十名駐守。至千崖地勢平行。未便於此設汛。查千崖以內之幕福地方。較為扼要。除該處原設把總一員。兵五十名外。今擬增額。外外委一員。兵七十名。亦於南甸營派撥移駐。再夾象石地方。山勢更險。實為幕福屏障。應於此另設一卡。即在幕福汛內。抽撥額外委一員。帶兵三十名駐劄巡哨。又蓋西地方。亦關緊要。向設弁兵。不敷巡察。今擬於蓋西以外之等榜要口。添設一汛。駐把總一員。兵七十名。於騰越鎮右營內。如數撥出。各汛增設弁兵。均令於本年冬初。攜眷前往分駐。各支本營糧餉。毋庸另給口糧。自南甸營至杉木籠一百五十里。祇設五塘。相離太遠。請添設二台坡。水草壩。章班箐。分水嶺。四塘。每塘安兵十名。并於原設之楊柳河一塘。原兵三名外。添設七名。又自騰越州城至蓋西一路。僅設二塘。每塘安兵三名。道遠兵單。請

添設猛蚌弄光二塘。與舊有之緬箐坡頭二塘。各安兵五名。即於南甸營緬箐汛兩處額兵內。撥往其杉木籠以外之原設蠻龍火燒寨。夾象石以外之原設弄掌遮木蓋達等五塘。應裁一各土司。向撥土目。弩練分駐關隘。與官兵協巡。除本有公田屯種外。每名每日照防兵例。折給口糧銀二分。今防兵口糧。業請停給。則土目弩練。亦應停給口糧。其近邊關隘各土司。本有巡防之責。應令照舊撥駐巡查。向設撫夷二十名。給與外委頂戴。馬兵錢糧。并日給米八合三勺。督率弩手防查關隘。弩手本係土司所屬之人。而以漢人管領。恐有倚恃頂戴。挾制土司之弊。請嗣後令土司於所屬土目內。揀選承充。仍隸騰越鎮州統轄。祇給土外委頂戴。毋庸更給銀米。永昌普洱兩路。額設營馬二百八十八匹。今邊防已撤。自應酌減。查迤西之騰越龍陵。迤南之普洱兩路。距省較遠。每站酌留額馬二

匹共留馬一百八匹。以備遞送緊要文報。餘一百二十匹。應裁一。改設塘汛。移兵常駐。應建千總把總署房各一所。外委署房三所。兵房三百六十一間。軍裝火藥房十二間。各塘官廳二十一間。哨樓七座。烟墩二十一座。照牆七座。界牌十四座。共估需銀一萬四百餘兩。查滇省營制。馬一步九。惟騰越鎮營額兵三千名。設馬兵五百二十三名。與通省營制不符。請裁馬兵二百二十三名。改設步兵二

百二十三名。計每年節省馬乾銀四千一百四十餘兩。即以為建蓋營房之需。三年所省銀儘敷數用。以後更可按年報撥充公。俱應如所奏。塘汛准其酌改。土司派撥土目弩練。應責令造冊送鎮州備覈。并令附近各汛弁按月查報。至撫夷改由土司於所屬舉選。但現在承充撫夷之人。並無過犯。若遽將伊等頂戴錢糧裁革。未免資生無計。應撤回補充各營馬兵。仍留其外委頂戴。裁營馬一百二

十匹。應勒限令各該州縣變價解部。應建房屋需銀實數。再令該督委員勘估具題。移駐各兵遺存房屋。及裁汰塘房。俱令確估變價報部從之。○丁丑

上行圍。是日駐蹕都穆達烏拉岱大營。○戊寅

上行圍。諭本日伊齡阿等由五百里馳遞奏摺。朕意必係科場中有緊要事件。及披閱時。乃係受卷所遺失墨卷二本。此等事祇須將

該書手等一面送交刑部審訊。附本報之便。具摺奏聞。何須單發。致勞驛遞。伊齡阿等何不曉事體。若此。至所奏遺失南四張聽賚二場墨卷。中四李夢金三場墨卷。俱與該生無干。自應傳令補行默寫。一體騰送內簾。其受卷所書手王立。劉萬昌。是否將原卷迷失。抑有別項情弊。著交刑部審明辦理。受卷官習振翎。宋大樽。雖經自行檢舉。究屬疎忽。並著交部照例察議。○又諭。據慶桂等議奏。杜爾

伯特人等請仍分為兩翼等語。著照所奏。車凌烏巴什所遺右翼盟長員缺。著達瓦丕勒補授。副將軍員缺。著喀勒哲鄂羅什瑚補授。其達瓦丕勒所遺副盟長員缺。俟車凌烏巴什繼嗣定時。具奏請旨。○諭軍機大臣等。據秦承恩奏。請來京陛見。秦承恩。前由藩司擢授巡撫。自應准其前來請訓。但新任藩司額勒春尚未到任。撫篆乏人接署。所有陝西巡撫印務。仍著已延三暫行署理。已延三補授戶部尚書。現已起程。著傳諭已延三。於途次接奉此旨後。不拘在於何處。迅速回至西安。接印任事。以便秦承恩交代起程。其武關鄉試事務。亦著交已延三辦理。俟秦承恩陛見回任。已延三即行起程來京供職。○是日駐蹕已顏布爾噶蘇台大營。○已卯上行圍。○諭曰。長麟奏。連衛各河水深溜急。現屆回空南下之時。恐河道綿長。沈啟震一人不能兼顧。復添委員前往幫辦。並令多加緯

夫幫同拉拽。以期迅速等語。本年各省糧船回空較早。該撫恐衛河水溜難逆。以逆流挽運。復添委員妥為照料。幫辦截至八月初十日。出東境者。已有五十幫。所辦甚是。殊屬可嘉。長麟著交部議敘。○諭軍機大臣曰。阮光平明年親自詣闕祝嘏。前據福康安奏。該國王於春間進關。福康安在鎮南關等候。帶同進京。但思廣西距京不遠。若於春間起程。計到京不過六月以內。彼時朕尚駐蹕熱河。阮光平又須前赴山莊瞻觀。明年慶典事宜。俱在京師舉行。而阮光平為安南國王。其境內甫經鳩集。亦未便久離該國。著傳諭福康安。照會阮光平。以大帝萬壽。在八月十三日。伊若進關太早。到京未免多住時日。恐其國內事務繁多。無人照料。不妨畧緩起程。祇須計算日期。總於七月二十以後到京。俾隨同王公大臣及外藩人等。同伸慶祝。瞻仰王會之裔。皇宮闕之壯麗。庶阮光平得親生平所未

見更足以堅其向化之誠也○是日駐蹕巴顏溝大營○庚辰

上行圍○遣官祭賢良祠○諭據玉德奏查明宿州靈璧等處綠碭山黃水漫注該處灘河及南北股二河不能容納以致該州縣田廬俱有被淹雖現在水已漸消而節過秋分未能補種均成一隅偏災請先行借給一月口糧以資接濟再泗州為宿靈諸河之水匯歸洪澤湖要道前次周家樓黃水下注田禾被

淹業已勘報成災今復被碭山黃水漫溢災民歸業需時請一體借給一月口糧等語安徽宿州靈璧泗州等處俱因河水漲溢以致低窪地畝間被淹浸既經該藩司勘明成災自應急為撫卹俾被水窮民得資接濟所有奏請借給一月口糧之處著竟行賞給並著陳用敷率同該藩司督飭所屬實力確查妥辦如有應行蠲緩之處俱即勘明辦理毋致一夫失所以副朕軫念災黎有加無已至意

○諭軍機大臣曰福康安等奏暹羅貢使現已到粵所有年貢令於年底到京其齋進萬壽貢物之使臣令在粵居住俟明年夏間再行委員伴送到京等語暹羅遠道入貢情殷葵向深可嘉獎但該國使臣於明年夏間始起程進京未免在粵多耽時日福康安可向其諭知如該使臣以久住粵東或有稽候即令齋萬壽貢使一併於年底到京俟新正頒詔時同伸叩慶已足以展其祝嘏之忱俾及

早回國如該使臣必欲於明歲詣闕屆期慶祝仰瞻王會之盛亦聽其便祇須扣算日期令於七月二十以外到京方為妥善○是日駐蹕巴漢昂阿大營○辛巳

上行圍○是日駐蹕伊綿峪大營翼日如之○壬午

上行圍○諭軍機大臣曰琅玕奏審明捏報會哨一案將革職署總兵李定國及扶同捏報之把總柯得成擬以發往伊犁分別効力當

差一摺。閱李定國供。因二月二十九日。纔開船駛出小門口。風逆浪大。蓬索俱斷。只得仍回小門停泊。到三十日。風勢更大。恐誤初一日會哨限期。備文差把總張國選。用小船渡至七里汎。復由旱路至沙角山齋投等語。李定國如果實。因二十九。三十。兩日風大難行。不能至沙角山會哨。而所差投文把總。何以獨能用小船。渡至七里汎。所供殊難憑信。雖李定國。柯得成。罪止捏飾。擬發伊犁。已足蔽辜。但李定國何不自用小船徑渡。殊有缺漏。琅玕何以未經訊及。著傳諭該撫。再向李定國等覆訊。明確錄供具奏。尋奏沙角山在小門口之北。相距百餘里。適值風逆難行。七里汎在小門口之南。相距僅七里。從回路行走。係屬順風。再由七里汎至沙角山。須繞道由陸路前進。李定國帶兵巡緝。係乘坐哨船。勢不能用小船。渡至七里汎。復行登岸。報聞。○

癸未

上行圍。○諭戶部議駁長蘆鹽政穆騰額奏。請將五十三年正餘引課分作三年帶完一摺。固屬照例辦理。但本年長蘆一帶雨水較多。以致海潮漫溢。灘坨淹浸。鹽舫折耗。尚屬實在情形。該商等每年應完引課之外。尚有帑利及雜款等項九十餘萬兩。一時併力完繳。未免拮据。所有五十三年正餘引課銀五十三萬五千餘兩。著加恩准其自五十五年奏銷後。為始分限三年帶完。以紓商力。此後不得援以為例。○是日駐蹕安。已究和羅昂阿大營。○是月奉天府府尹穆和蘭覆奏。臣赴奉天新任。沿途查看禾稼。均屬有秋。惟廣寧縣所屬雙台子等二十四屯。承德縣所屬老邊等三十八屯。因雨水稍多。禾稼被淹。人口房屋並無傷損。現會同嵩椿。宜興等妥辦得旨。賑卹之事。妥為之。○江南河道總督蘭第錫。江寧布政使康基田。奏周家樓漫工。趕緊興辦。按日計之。九月中。可以合龍。批。虔謹

為祝禱矣。又稱察看溜勢辦理總期得文進丈批不可務速慎重為之。又稱口門日窄一日步步堅實穩固批是勉為之。又批盼望佳音之至。○閩浙總督覺羅伍拉納。浙江巡撫覺羅琅玕覆奏。張殿魁被盜戕害一案。張殿魁係黃巖鎮標遊擊署寧海營參將。提臣陳杰前次摺內。將黃巖鎮標減寫作黃標。又緊接參將二字之下。竟似此案被害官員。張殿魁外尚有參將黃標。其實止張殿魁一員。並無黃標其人。至陳三三所供。上年十二月間。在福建地方搶刦高陳二姓等案。業經前署督臣徐嗣曾奏明究辦。再溫州鎮總兵陳莊前經調補黃巖鎮。嗣因原任黃巖鎮劉文敏開復。仍回本任。陳莊無任可回。應令其在洋緝捕。另候補用。得旨覽。○河東河道總督李奉翰奏。東省微山湖。因今年雨水旺盛。水勢日加增長。近已長至一丈四尺。臨湖隄堰。未免著重。現在量籌消滅。得旨。仍當多蓄。以備

清

實

錄

乾隆五十四年八月下

明春之用。○河南布政使景安奏。江南碭山縣黃河漫溢。淹及豫省永城夏邑二縣。臣督飭該府縣。加意撫卹。間有江南碭山等縣災民避至豫境者。一體給與口糧。俟水陸道通。再令各回本籍領賑。得旨嘉獎。○四川總督李世傑奏。上年辦理巴勒布軍務。於火竹卡一帶。設阜和協兵一百名。今軍務已竣。應裁。但現在有巴勒布及堪布喇嘛等貢馱。經行須兵防護。請酌留五十名。俟事竣再撤。報聞。

一一三五

大清高宗法天隆運至誠先覺體元立極敷文奮武孝慈神聖純皇帝實錄卷之一千三百三十八

監修總纂官經筵講官太子太傅文淵閣大學士文淵閣領事領銜內大臣稽察欽奉 上諭事件處管理

吏部理藩院掌印給事中黃旗滿洲副都統世襲副都統軍功加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部工部事務

世襲副都統軍功加十九級隨帶加二級又加二級臣董福內大臣戶部尚書鑲黃旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十四年己酉九月甲申朔

上行圍○諭據嵩椿等奏李獲在邦軍處脫逃

發往烏魯木齊人犯德寧在撫順處脫逃人

犯李正元李克新送赴盛京刑部辦理等語

德寧李正元李克新俱係發遣罪犯於押解

時竟敢窺隙逃走情屬可惡若不嚴加治罪

不足以示警戒著交該部將德寧李正元李

克新審明加倍治罪其李獲伊等之官兵甚

屬奮勉著交與嵩椿酌量賞給以示鼓勵○

諭軍機大臣曰畢沅等奏新造糧船既已改

小猶必刊刻喫水尺寸以杜載重之弊至舊船本屬寬大更自便於多裝豈可不限以喫水尺寸應俟回空抵次後逐一量明一併刊刻等語本年湖北糧船因兌米延逾實於三月開行乃該督等代為捏報正月又任令李天培勒帶桅木等候多日兼之船重難行以致脫幫遲誤與新舊船隻未經一律刊刻喫水尺寸何涉畢沅等此奏不過冀掩其種種貽誤之咎况即欲如所奏辦理而新舊無所

區別將來遇有改造時旗丁等貪圖船大可多裝貨物勢必仍照舊船式樣成造豈肯照新船收小拆改是該督等所辦殊多疎漏著傳諭畢沅等所有該省新舊船隻雖已一例刊刻喫水尺寸仍當留心查察於年滿拆造之年務令遵照新定尺寸毋許仍前放太致滋弊混又據惠齡另摺奏七月分閩省普甯渥澤中晚二糧已屆刈獲約秋收均有七八九分不等等語究竟該省秋收通行牽算

共有幾分之處。何以未據奏及。並著該撫即速查明。據實具奏。將此諭令知之。尋惠齡奏。湖北秋收。合計八分有餘。報聞。○是日駐蹕烏蘭哈達南大營。○乙酉。

上行團○豁免貴州運員遭風沉溺鉛六萬二千一百八十四觔。○是日駐蹕伊遜河東大營。○丙戌。

上行團○遣官祭

歷代帝王廟○遣官祭

都城隍之神。○諭曰。李奉翰等奏水落工穩情形一摺。覽奏欣慰。本年河水盛漲。豫省銅瓦廂黑埋及睢州下汛七堡等處。屢次報險。經該督撫董率在工員弁。竭力搶護。得臻平穩。現在已屆霜降。往後水力漸綿。各工益臻鞏固。李奉翰。梁肯堂。著交部議敘。其在工出力各員弁。並著該督撫查明咨部。分別議敘。○軍機大臣等議奏。福建巡撫徐嗣曾奏請責成族正舉發族匪。定以獎罰。及附從行劫。

夥盜自首減等一摺。其事實不可行。節經阿桂。福康安。孫士毅。遵旨奏覆。亦僉稱無此辦法。該撫所奏。應無庸議。從之。○是日駐蹕六道河大營。○丁亥。賜蒙古王貝勒貝子公額駙台吉等食。○鑄給安徽太平縣印信。冠以省名。從巡撫陳用敷請也。○是日駐蹕張三營行宮。○戊子。諭曰。福康安。奏雷瓊鎮總兵葉至剛。於護叅將蕭玉龍。開送兵丁考拔時。輒將食糧年淺之呂豪。易置第一。現訊明。

呂豪之父呂文照。與葉至剛相好。顯屬瞻徇情面。又將弓馬平常之外委楊德容。送考拔把總。並於飭緝洋盜時。妄拏平民。希圖搪塞。均須徹底根究。請將葉至剛。與護叅將蕭玉龍。一併革職。審辦等語。葉至剛。著革職。鞫問。蕭玉龍。亦著革職。交與該督提集案。證嚴審定擬具奏。其雷瓊鎮總兵員缺緊要。著福康安。於廣東水師總兵內。揀選一員調補。所遺員缺。著陳莊補授。○諭軍機大臣曰。李世傑。

等奏續獲郭羅克搶奪番匪審明正法一摺。此案匪犯前已拏獲七名正法。並格斃六名。現又經官兵督同土目等拏獲三名格殺一名。並據該土司頭人等再三哀籲情願嚴禁手下人等嗣後再不敢赴青海地方滋事。亦祇可如此而止。著傳諭李世傑等即將派出官兵撤回。不必在彼久駐。為窮搜之舉。惟須曉諭該土司等。以此次業蒙大皇帝恩典。不復追究。爾土司等應知感激。嗣後務嚴禁屬

下人等不得仍前滋事。若再有似此搶奪之案。必當按名拏獲。不能寬貸。其擒獻匪犯之土目。並酌加獎賞。如此恩威並用。庶幾番各知感惕。自不敢復滋事端。方為妥善。○又諭據巴忠等奏達賴喇嘛班禪額爾德尼因已勒布事竣。特遣堪布等來京謝恩。於閏五月內由藏起身。自川陝一帶內地行走。進京等語。西藏距川省不過數千里。計達賴喇嘛等所遣來使。此時已早過成都。何尚未據李世

傑奏及著傳諭該督。即將堪布等於何時過境。並計算程期。約於何時可以抵京之處。迅速奏聞。尋奏堪布等於六月二十八日始自前藏起身。約十月中旬過成都。十二月初旬抵京。得旨覽。○又諭曰。福康安奏廣東雷瓊鎮總兵員缺緊要。現在閩粵水師副將內實無堪勝總兵之人。請旨簡放等語。已另降諭旨。令該督簡員調補。所遺員缺。將浙江候補水師總兵陳莊補授矣。前據伍拉納奏。保舉

堪勝總兵之馬龍。福蘭泰二員。俱係閩省副將。乃今據福康安稱。閩省並無堪勝總兵之員。福康安於閩省營伍情形。較為熟悉。著傳諭福康安。即將馬龍。福蘭泰。究竟是否能勝任總兵之處。據實具奏。毋稍迴護。○又諭據福崧等奏。阿奇木伯克阿克伯克。懇請明年來京叩祝萬壽。明亮亦奏。伊斯堪達爾。明年來京叩祝。伊等俱係葉爾羌大伯克。彼處事務緊要。不可二人同來。著傳諭明亮。於二人

內酌量地方情形令一人前來○吏部議覆
閩浙總督覺羅伍拉納等奏稱福建漳州府
設有南勝海防同知石碼糧捕通判查南勝
近山石碼臨海水陸形勢迥異名實未免不
符請改為南勝糧捕同知石碼海防通判嗣
後陸路失事開參同知水路失事開參通判
又泉州府馬家港通判所屬之劉五店直達
外洋易滋奸宄請添設巡檢一員移駐查莆
田縣大洋地方民俗淳樸堪以歸併就近之
凌厝巡檢管理所有大洋巡檢請裁移駐劉
五店隸馬家港通判管轄應如所奏從之○
是日駐蹕波羅河屯行宮○己丑諭本日刑
部進呈陝西秋審黃冊內該撫原定緩決經
刑部改入情實者共有六起朕詳加披閱一
係快役雷世興將在街討乞之熊錦妄擊疊
砍致斃一係于文科與無服族弟口角將于
文法並伊父于紅德用刀扎戮一死一傷一
係黃位講圖財強搶陳氏致令自盡一係流

犯王老兒在配刃斃許登樞一係王玉淳以
並不干己之事聽從王有奇糾約將馮斌攢
毆斃命一係葉咏紅與杜氏通姦因張有道
亦同杜氏姦宿將葉咏紅所遺之衣穿去該
犯向訃被張有道辱詈撲扭張有道業經倒
地該犯輒用柴疊毆殞命傷多且重覈其情
節均無可緩之理刑部所改俱是秋獄大典
自應悉心斟酌以期允當乃已延三率行擬
題失出至六案之多而臬司為刑名總匯恩
明所司何事於罪無可貸人犯寬縱若此其
何以明罰勅法已延三恩明均著交部議處
○諭軍機大臣等朕閱刑部進呈甘肅省秋
審冊內由緩改實者二起雖不似陝西六起
之多但覈其情節李仲統與李田氏之夫係
同祖弟兄因伊弟砍伐地內樹枝田氏阻攔
詈罵牽及伊父該犯趨至責問田氏揪衣碰
頭不放該犯用小刀扎傷其右腿等處殞命
刃斃徒手婦人即應問擬情實或係因該犯

一時情急尚在可實可緩之間。不為大錯。至藍貴寶串通回子偷販私玉。至一百餘觔之多。違禁藐法。即與竊盜滿貫無異。該督何以擬入緩決。殊為寬縱。且該督於私販大黃。與偷買玉石兩種人犯。每意存姑息。不知此等匪徒。一係交通外國。一係盜賣官物。情節均屬可惡。該督不思嚴加懲創。轉為有意存寬。實不可解。勒保著傳旨申飭。○又諭昨閱廣西省秋審冊內。刑部由緩決改入情實者。共有三起。數其情節。如唐氏鍾毓成。尚在可緩可實之間。至船戶陳國漢。因客民古功烈。乘坐伊船。該犯見其行李沉重。起意圖財害命。乘古功烈睡熟。潛入中艙。摸取古功烈枕邊之劍。因黑暗向摸頭顱。古功烈驚覺喊叫。該犯隨用劍砍傷其胳膊。又因奪劍劃傷左右手指。雖古功烈驚覺喊叫。未致殞命。而陳國漢圖財謀害。摸劍向砍。且傷其胳膊手指等處。已有致死之心。向來圖財害命。已死者定

擬斬決。今古功烈傷而未死。亦當入於情實辦理。該撫何得定擬緩決。殊覺失之寬縱。孫永清著傳旨申飭。○軍機大臣等議。覆倉場侍郎蘇凌阿等奏。稱奉天錦縣寧遠廣寧義州。四州縣額運黑豆四萬二千餘石。向係分起由海運至天津起撥。赴通運京收貯。今初次黑豆海船已全數進口。抵津後即須起撥。現在挑濬通惠河。勢不能由閘河轉運進京。請將運到黑豆三萬五千餘石。就近收貯。通倉於明歲春季八旗及漢俸應領粟米項下。儘數抵給。應如所奏。從之。○是日駐蹕中闕行宮。○庚寅。吏部等部議。覆閩浙總督覺羅伍拉納等奏。稱臺灣淡水同知所轄之新莊巡檢。該處地廣人稠。巡檢難資佐理。又臺灣縣所轄之羅漢門縣丞。該處民戶無多。祇須設一巡檢。足以彈壓。請將新莊巡檢改為新莊縣丞。仍歸淡水同知管轄。羅漢門縣丞改為羅漢門巡檢。仍歸臺灣縣管轄。該縣丞巡

檢各有原建衙署額編養廉及書役俸工祇須互為改駐支撥無庸議增應如所請從之
○豁免雲南運員遭風沉溺銅六萬七千二百一十觔○是日駐蹕避暑山莊至丙申皆如之○辛卯諭前日刑部進呈湖廣省秋審黃冊內劉兆瑞同妻李氏違犯伊母劉郭氏教令以致劉郭氏氣忿自縊身死一案朕細加披閱劉兆瑞與李氏竟係忤逆不孝致逼迫伊母忿激輕生該撫從前僅照違犯教令例擬以絞候已屬錯誤刑部率行照覆具題朕亦未經看出為之駁正均不能無過例設違犯教令之條原指為人子孫者或偶有越禮之事父母向其禁止子孫未能遵從仍私行蹈犯事後父母聞知畏累輕生無心致死者而言今劉兆瑞年甫三歲經伊母撫養成人為之娶妻成室詎劉兆瑞素性懶惰伊母屢訓不悛該犯遂逃避外出其妻李氏因夫被姑逼走益不孝順迨該犯由外回家伊母

向伊索錢不給嗣令盛飯又不答應伊母生氣不食走至堂屋烤火令李氏取柴添燒李氏亦未往取是劉兆瑞夫婦疊次違犯竟屬有心忤逆劉郭氏之投繯殞命皆由其不孝逼迫所致此而僅擬以絞候俾得保全首領久稽顯戮將悖戾者無復知儆甚非明刑教孝之道劉兆瑞李氏俱著即處斬不必復待勾決將此通諭知之○又諭據永慶奏京口副都統文常病故等語所遺員缺著陽春保補授陽春保現丁父憂永慶現在該處署理印務陽春保俟百日後再赴任所○又諭據吉祿奏本年雨水較多松花江一帶河水漲溢打牲人等所種地畝多被浸淹等語著交吉祿查勘被水情形妥為辦理給與口糧以資接濟勿使一夫失所以副朕軫卹災黎之至意○又諭據都爾嘉等奏本年黑龍江等處口糧不敷屯丁能否納糧之處俟查明另奏又打牲索倫達呼爾等殺亦歛收請借給

齊齊哈爾墨爾根城兩處倉貯穀一萬石以資接濟等語。都爾嘉著即前往黑龍江所屬地方辦理。借給倉穀接濟口糧等事。其上年接濟打牲人等穀石。毋庸展限補還。著加恩豁免。以示軫恤。○諭軍機大臣等。本年直隸保定河間天津等府屬州縣。因夏秋雨水過多。河淀並漲。地畝被淹。成災地方較廣。業經降旨令該督督率藩司確查妥辦。加意撫卹矣。現在朕迴蹕熱河。初七、八兩日秋雨連宵。

勢甚綿密。而雲氣廣遠。近畿一帶諒必同時霑被。永定河及淀河等處。是否因積雨稍有長水。其各州縣被水積澇之區。橋梁道路。是否復有被淹。朕心甚為軫念。著該督詳悉查明。據實覆奏。以慰廑注。將此諭令知之。尋奏九月初七、八兩日保定一帶僅微雨片時。永定河及淀河等處並未長水。各州縣積澇漸消。橋梁道路均經修治完整。得旨覽奏稍慰。○又諭。前據蘭第錫等奏周家樓漫工。東西

兩壩約於九月中可以合龍。現在督同將備加鑲追壓次第進占。共已做成一百二十丈。惟有晝夜趕辦。以期早為藏功等語。現屆九月初旬。與該督等所奏合龍之期計已相距不遠。該處工程已有幾分。所築兩壩能否步步堅實。依期完竣。朕心深為廑注。再此間九月初七八日陰雨綿密。未識江南一帶近日有無雨澤。河湖水勢不致續有增長。工程是否不致因雨稽遲。著蘭第錫等即將現在壩

工情形及水勢。是否有消無長之處。速行五百里覆奏。以慰廑念。將此諭令知之。尋奏口門原寬二百三十餘丈。截至九月十二日共築成一百六十七丈。覈計工程已有十分之七。所築兩壩俱甚堅實。惟因秋雨稍多。九月初八九日風暴更大。施工稍難。而加高壩面鑲築邊埽並未停工。其未築之六十餘丈。約兩旬內可以堵合。現已節逾霜降。河湖水勢有消無長。工程易於趕辦。得旨。惟佇待佳音。

勉之。○又諭前據李奉翰等奏。水勢消落。工程平穩。已降旨將該督等交部議敘矣。本年河水盛漲。豫省如銅瓦廂及睢州等處。屢次報險。俱經搶護穩固。現在九月初七日。連日熱河一帶。雨勢綿密。且雲氣廣遠。該處或亦一律得雨。現在雖已過霜降。水力漸綿。各工自不致再有著重之虞。但該省日內曾否得雨。及上游有無增長之處。朕心深為廕念。著傳諭李奉翰。梁肯堂。即將近日情形。據實覆奏。以慰懸注。尋奏。豫省近日天氣晴霽。九月初七日。等日。並未遇雨。河工安穩。得旨覽奏。稍慰。○又諭據閔鶚元奏。徐州所屬之銅山。沛縣。蕭縣。碭山。豐縣。並海州。沐陽。七州縣。因夏間大雨時行。上游河湖漲漫。又有毛城鋪。峯山。四閘。洩黃之水。同時並注。致有淹浸。查徐海所屬地方。本以麥收為主。秋收稍薄之區。民力不無拮据。被水村莊無多。不過收成分數。牽算稍減。現已飭勘是否成災。分別辦

理等語。徐海等屬州縣。既因夏雨過多。河湖並漲。田間積水。入秋以後。未能消退。致有歉收。雖據該撫奏稱。被水村莊無多。收成不過稍減。但徐州等屬。向稱地瘠民貧。現距明春麥收之期尚早。該處貧民。或致失所。是否尚須接濟。如有成災。即應實力撫卹。該撫務須董飭所屬實力查辦。毋得稍存諱飾。至睢寧。邳州。宿遷。桃源。等州縣。本年被水較重。前經降旨賞給一月口糧。現在民氣是否稍紓。如有應行續加撫卹之處。亦著一併查明。據實覆奏。尋奏。碭山縣成災八九分。不等。蕭縣。成災七分。現分別撫卹給賑。其餘銅山。豐縣。沛縣。海州。沐陽。併睢寧。邳州。宿遷。桃源。不過收成稍減。應照成災五分及勘不成災。分別辦理。得旨。督率屬員妥為之。俾受實惠。○壬辰。予多羅果郡王永瑤祭葬如例。諡曰簡。○癸巳。上御依清曠勾到秋審官犯。服制及雲南貴州。

情實罪犯停決官犯絞犯二人。服制斬犯三十八人。絞犯一人。雲南絞犯八人。貴州斬犯二人。絞犯六人。餘四十七人。予勾。○諭前據伊齡阿等奏本年順天鄉試諸生中年屆八十以上者左昌宗等九名。七十以上者高日新等三十二名。俱三場完竣等語。現在榜發俱未中式。俯念該生等年臻耄耋。猶踴躍觀光。洵為藝林盛事。其年在八十以上之左昌宗。武宅鎬。鄭學洙。李垠。涂文魁。章敬修。王朝臣。胡自勉。孫有誦。九名。並年在七十以上之副榜單備。俱著加恩賞給舉人。准其一體會試。其年在七十以上之高日新。馬克惠。倪克勤。孫大興。王錫桓。王家相。安永宜。馬元倬。潘掄元。安容璣。楊世法。張應楨。郭斌。劉夢桂。畢汾。劉懿廣。阮錫嘉。王琨。張日新。黎淳。張鑣。宋炳炎。賀雲程。劉詰。史彭年。王文。崔九州。梁棟。劉素位。謝立吉。高璣。林見性。俱著加恩賞給副榜。以彰壽世。作人至意。○又諭前據綿恩

奏直隸永年縣生員喬庚辛。呈明五世同居。伊父監生喬文源。現年八十五歲等語。喬文源身列成均。年登耄耋。其子孫五世同居。洵為昇平盛事。喬文源著交直隸總督查明咨部酌量旌賞。以示嘉惠敦睦至意。○又諭軍機大臣覈議書麟奏查明護江西鹽道恒寧多報四月分銷引數目一摺。已依議行矣。各省銷鹽數目。該管道員自當按月據實造報。方足以備稽覈而昭功過。今恒寧以四月分銷數較少。將五月分多銷之數劃抵。設五月分又復少銷。勢必復將六月分所銷之數提作五月。如此月復一月。遞相積壓。伊於何底。顯係該員因暫行署任。故那後作前。以見其任內多銷。意存討好。將來設有虧缺。悉歸新任後人之事。此乃取巧。何得謂為實力督催。尚稱急公奮勉。看來此事竟係何裕城因恒寧為其首府。意存袒護。而書麟前往查辦。並不將遞壓情弊。將來如何辦法。向恒寧究詰。

據實具奏。以定是非。亦未免意存和事調停。將就完案。該督撫既稱恒寧護理鹽道。辦理尚係認真。何裕城且請將恒寧免其撤回。竟似該省鹽道。非恒寧不足以勝任。恒寧即著照所降之級。留於江西。護理鹽道事務。並令照所定每月銷鹽二萬數千引之數。按月督銷。如銷能足數。俟一年之後。該督撫鹽政據實奏聞。候朕酌量加恩。如不能按月照數疏銷。以致該省應銷引額稍有缺乏。即將所缺

引課著落該員賠補。仍交部治罪。倘恒寧力不能賠。即著書麟。何裕城代為賠繳。以為封疆大臣袒徇屬員。辦事模稜者戒。其四五兩月所銷鹽價。曾否全數解交揚商。及此後恒寧承辦鹽務。有無弊混。並著全德留心查察。如查有情弊。立即奏。勿稍迴護。○諭軍機大臣曰。伍拉納等覆奏。洋剗盜犯先後已獲一百二十餘名。其張殿魁案內之首犯陳禮。雖據各犯供稱。業已覆舟溺斃。但未獲屍

身。不足憑信。現仍上緊緝拏等語。陳禮禮一犯敢於拒捕傷官。情罪甚為重大。必須飭屬嚴拏。勿使久稽顯戮。其實獲與否。併今年底奏聞。其餘未獲各案盜犯。亦著上緊躡緝。毋任一名漏網。以盡根株。至温州大門洋盜。辦理已漸次完竣。閩省地方事務。尤為關係緊要。伍拉納應即回閩辦事。毋庸在溫久駐。其浙省營伍事件。前已降旨。諭令琅玕兼辦。著傳諭該撫。嗣後浙省如遇尋常。應行會辦之

件。期限尚寬。仍照舊札商會銜具奏。倘事關緊急。未便往返稽遲。琅玕即一面先行奏聞。一面再札知伍拉納。不必仍前拘泥。致使耽延要務也。○又諭。軍機大臣議覆。勒保奏。審擬海生蓮私販玉石一案。將該犯等從重擬流。行令該督定地發配一摺。所奏是。依議行。此案海生蓮係內地回民。膽敢私買玉石。輾轉埋藏。馬成保係明知私玉。因圖得銀兩。代為設法夾帶。情節俱刁狡可惡。自應從重定

擬何該督於此等偷買玉石案犯每存姑息失之寬縱輒以杖徒究事耶勒保著傳旨申飭又諭前經降旨駐藏大臣等如有辦事乖謬任意妄行者每年達賴喇嘛班禪額爾德尼遣使呈遞丹書不妨將在藏辦事大臣指名叅奏此特因慶麟等不能善理事務竟被噶布倫索諾木旺扎勒欺朦以致諸事錯誤始降此旨今舒濂普福均係受朕重恩伊等尚屬曉事諒不致如慶麟等種種錯謬倘因有此旨將一切事宜竟令達賴喇嘛衆噶布倫等得操權勢動多掣肘亦非慎重辦公之道著傳諭舒濂普福嗣後辦理庶務必須酌量情理如達賴喇嘛所言合理則行不合則止斷不可懼其控告以致諸事畏縮要之舒濂普福等若果持身清正凡事循理而行伊等自能畏服也○甲午諭軍機大臣曰書麟奏詢之江西各商並詳加訪察恒寧以銷鹽之數移後作前事已明白確鑿實無勒令

商人墊交鹽本何裕城亦無通同那移作抵情弊等語移後作前固無別項情弊但江西每月額銷二萬引每年共應銷二十四萬引本年適值閏五月書麟等除閏計算通融劃補似屬溢額若連閏計算勢必仍將見絀昨已有旨將恒寧照所降之級仍護理鹽道事務俟一年之後看其能否督銷足數分別加恩治罪但今年多一閏月若僅照往年定額銷售轉得為該員通那地步並令連閏按月督銷如能較每年定額多銷二萬餘引則已倘所銷不能如二十六萬之數是仍為短絀其短絀引課即照昨降諭旨於該護道及書麟何裕城名下賠交以示懲儆將此傳諭書麟並諭何裕城全德知之○乙未上御依清曠勾到四川情實罪犯停決斬犯十二人絞犯十三人餘七十四人予勾○諭本日勾到四川省秋審人犯內該督原定緩決經刑部改入情實者共有七起一係朱希商

因向龔大義索欠無償。令伊子朱子俸等趕上。將龔大義攢毆。該犯復刃傷龔大義殞命。一係謝起賢與胡義俱與馮白氏通姦。適在姦婦家中。邂逅相遇。口角。謝起賢用刀疊戳胡義致斃。一係王瓏玉因蔣世哀醉後謾罵持棍追毆。該犯既用刀戳傷蔣世哀左胳膊。透過肘肘。又傷其左脇。殞命。情近故殺。一係吳秀元與陶添名索債起衅。陶添名係屬徒手。經該犯金刃連戳斃命。一係劉守科與伊

兄劉守均將徒手之伍世華。逞兇刃斃。一係唐宗位與夏文名關毆於夏文名倒地後。該犯奪取尖擔回毆致傷殞命。一係宋二娃因索欠未還。將年逾七十徒手之廖安元刃斃。覈其情節俱無可緩之理。刑部所改均為允當。所有朱希商等七犯業經概行予勾。秋讞大典自應悉心斟酌。俾無寬縱。今四川省所辦秋審竟失出至七起之多。總督臬司何漫不經心至此。四川民風好鬪。正宜強弗友剛。

克之地李世傑念其年老且辦理地方事件向來尚肯留心認真著加恩免其議處。至臬司為刑名總匯乃於罪無可逭之犯輕縱多起實屬錯誤和寧著交部議處。○戶部議准四川總督李世傑疏稱天全州茶林繁盛額引不敷配銷請增茶引二千五百張自乾隆五十四年為始照例納課徵稅從之。○丙申諭據琳寧等奏查明琿春被水地方請接濟口糧一摺琿春連年被水旗民田地被衝深

為軫念著交琳寧等即散給口糧以資接濟其應交義倉糧石併上年被災借給倉穀俱著豁免琳寧務須妥協辦理毋使一夫失所以副朕撫卹旗民之至意。○軍機大臣等議覆烏魯木齊都統尚安奏稱鐵廠捐貲遣犯定例按年每名捐貲費銀三十兩滿十五年咨部分別為民回籍臣因近年捐貲人犯漸少廠費不敷奏請不必拘三十兩之數經軍機大臣議一律報滿恐啟避多就少之弊令

臣酌定章程。今請除捐銀三十兩。仍照向定十五年之例辦理外。其捐銀二十兩者。酌加一年。十餘兩者。酌加二年。統計年滿。能始終奮勉。方准回籍。其為奴人犯。祇准為民。不准回籍。應如所奏。從之。○丁酉。

上自避暑山莊迴鑾。○御行殿。勾到廣西廣東情實罪犯。停決廣西斬犯四人。絞犯三人。廣東斬犯五人。絞犯十一人。餘七十九人。予勾。○工部議覆江南河道總督蘭第錫等疏。稱

邳睢廳原設經費銀二千兩。今分為邳北邳南二廳。缺既分設。經費亦宜分支。惟事務繁簡不同。宜量加區別。請自乾隆五十四年為始。歲給經費銀。邳南廳一千二百兩。邳北廳八百兩。應如所題。從之。○福建學政劉躍雲。丁母憂。命通政使吉夢熊提督福建學政。○是日。駐蹕喀喇河屯行宮。○戊戌。諭曰。和昇額著加恩。以頭等侍衛授為巴里坤領隊大臣。前往更換永安。○工部尚書金蘭侍郎韓

鐸。會同倉場侍郎蘇凌阿。劉秉恬。奏。通惠河朝陽門外護城河。及溫榆河。臣等遵旨會勘。均係年久淤積。應行挑濬。其估需工料銀。通惠河二萬三千九百三十三兩有奇。朝陽門外護城河一千九百二十五兩有奇。溫榆河一萬二千七百五十兩有奇。動項興築。趕於明春二月內告竣。至朝陽門外西岸。改為砌石。現交石道工程處辦理。再各開所有壩座。俱係砌石。惟慶豐閘以西。北岸通州南門以東。護城河南岸。有木壩各一座。現皆腐朽。若照舊仍修木壩。恐難經久。應一律改修石壩。報聞。○是日。駐蹕常山峪行宮。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十八

實錄卷之一千三百三十八

卷之一千三百三十八

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十九

監修總裁官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十四年己酉九月己亥

實錄卷之一千三百三十九

下

上御行殿勾到福建奉天情實罪犯停決福建
斬犯八人絞犯十三人奉天斬犯三人絞犯
七人餘六十九人予勾○諭禮部侍郎員缺
著劉墉補授劉墉現出順天學差凡遇按試
之期著沈初兼署○又諭本日勾到福建省
秋審情實人犯內兵丁郭瑞龍等十六名因
隨避擊徐璋出巡洋面遇盜搶劫該犯等不
能抵禦輒棄兵船軍械各自泅水分逃按臨
陣脫逃律問擬斬候閩省營伍廢弛兵丁等

惟知包差庇賭。得受陋規。全不以操巡為事。以致盜劫頻聞。即如郭瑞龍等。身充行伍。乃跟隨該管遊擊出哨洋面。遇盜搶劫。非惟不能追捕殲擒。輒棄兵船軍械。畏葸逃避。實與臨陣退縮者無異。況羅英、徐璋之死。皆由該犯等畏盜先逃所致。此而不從重辦理。其何以靖奸宄而肅戎行。是以本日勾到時業將郭瑞龍等十六犯。概行予勾。嗣後該省管兵鎮將務宜加意整頓。實力訓練。俾兵丁等咸知紀律。痛革積習。若復仍前懦弱。郭瑞龍等是其前車之鑒。斷不能稍從寬宥也。○浙江巡撫覺羅琅玕疏報青田、雲和、二縣乾隆五十三年分開墾額內田地四十二頃五畝有奇。○是日駐蹕兩間房行宮。○庚子諭曰。劉綬奏本年直隸被水州縣較多。應給駐防兵米採運稍艱。請即於賞給通倉漕米四十萬石內撥出一萬六千五百三十石零。以為駐防兵米等語。著照所請。准其撥給。○諭軍

機大臣曰。琅玕奏。究出吳晏觀賄囑蔡寶吉頂充一案。細閱此案。吳晏觀因觀燈起衅。被寧波人混罵。蔡寶吉係其幫工。即攜取竹竿欲行毆打。經道人徐思旺勸開。寧波人復將燈打破。並欲上樓尋毆。吳晏觀將桌上磁器向樓下拋擲。並令陳芳觀等幫擲。誤傷樓下幼孩黃汝玉斃命。維時正當昏夜之際。吳晏觀與陳芳觀等同擲磁器。何以知為黃汝玉之傷。即係吳晏觀所擲。若云陳芳觀等幫擲磁器。係吳晏觀指使。又屬何人供出實證。摺內未據叙及。況黃汝玉誤傷身死。其擬抵之人。按律不過絞候。將來秋審亦不至情實。吳晏觀又何必賄囑蔡寶吉為之頂充。種種疑竇。琅玕何以未經逐一究詰。難成信讞。著傳諭該撫。即提集犯證。將指出各情節。覆加研鞠。務得確供。定擬具奏。尋奏。吳晏觀在樓首先拋擲磁器。主使陳芳觀等幫擲。有同在樓之吳炎觀目擊。至黃汝玉之傷。時當昏夜。原

不能指定何人。吳晏觀恐將先動手者抵命。因賄囑幫工蔡寶吉頂充。吳晏觀應擬絞監候。陳芳觀擬杖一百。蔡寶吉擬杖一百。流三千里。下部議。戶部議覆。閩浙總督覺羅伍拉納等奏稱。戍臺班兵例給眷口銀米。近年臺灣添設戍守弁兵一千二百一十六名。應得眷口銀於每年例賞四萬兩內同舊額戍兵按名分派足數支給。惟眷米難以勻攤。請照舊額戍兵例每名月給米一斗。共應添給眷米一千四百五十九石二斗。遇閏之年加給米一百二十一石六斗。所撥兵內如福寧鎮向來支給折色者仍彙入兵餉估撥。其餘各營俱支給本色。再新添戍兵換班往回盤費。遊巡弁兵車腳及革伍病故各兵回籍路費等項。每年約需銀一千八百六十六兩有奇。請動項開銷。應如所奏從之。直隸總督劉綏奏。加培隄工例不在歲修鑲埽之內。永定河南岸四工以下至六工北岸三工十五

號以下至六工各土隄均經加高培厚。惟頭二三工并七八九工未經估辦。本年夏秋間汎水盛漲。南北岸頭工三工北岸七八九工疊被汕刷。該處隄身卑薄。須擇要加培。共估需銀三千六百六十一兩。請動項興築。報聞。○是日駐蹕要亭行宮。○辛丑上御行殿。勾到陝西浙江情實罪犯。停決陝西斬犯九人。絞犯十二人。浙江絞犯五人。餘八十四人。予勾。○諭。前日刑部進呈直隸省秋審黃冊內劉尚達毆死大功服弟劉尚文一案。閱其情節。此案劉尚達同伊弟劉莊兒與伊父劉淵同居。劉莊兒娶親時該犯曾代為墊發轎錢。劉莊兒未經給還。劉尚達遂向伊父索討。伊父答以遲日再給。劉尚達輒出言抵撞。伊父追趕欲毆。適見劉尚文在街令其攔住。劉尚達自行毆責數下。該犯掙脫旋向劉尚文村斥。劉尚文分割爭吵。該犯忿恨。頓起殺機。將劉尚文毆傷殞命。劉尚達為弟墊

發轎錢乃向父索取已無此理。迨伊父未經即給該犯膽敢出言頂撞。又因劉尚文代伊父將其攔住毆責。復遷怒將劉尚文毆斃。是該犯之故殺服弟皆由忤逆不孝而起。故殺服弟已應抵償。況又加以忤逆之罪。豈可復照尋常鬪毆定擬。日前湖廣省劉兆瑞一案業經降旨將該犯夫婦即行處斬。今劉尚達所犯情節竟與劉兆瑞無異。從前僅擬絞候入於情實亦屬錯誤。夫明刑所以弼教而教莫先於孝親。似此悖戾之徒使得久稽顯戮其何以儆不孝而敦倫紀耶。劉尚達著即行處斬。諭軍機大臣等。據舒濂等奏薩嘉呼圖克圖遣人赴藏請安。貢獻佛像諸物。尚屬恭順。應賞賚以示鼓勵。著傳諭舒濂曉諭薩嘉呼圖克圖爾請安入貢。業代奏聞。仰蒙聖鑒有旨前來。爾從前未稟明駐藏大臣。私差人與巴勒布講和本屬不合。今蒙大皇帝加恩。不完已往。爾係紅教。與黃教不同。當各奉教。

律毋相參越。茲以爾悚懼恭順。大皇帝錫爾手帕鈴杵。爾其祇領。當益感聖恩。欽遵毋怠。軍機大臣等議覆直隸總督劉戡奏稱河屯協左營駐劄熱河。原建兵房五百二十四間。每兵一名給房二間。嗣經增改裁撥。並添募名糧。現在實存兵三百三十一名。計不敷房一百三十八間。查該協右營自土城子移駐熱河。設兵三百名。建兵房六百間。按名撥住。今左營兵加增。而原給住房不敷。每名二間之數。兼有坍塌傾圮。請添建一百三十八間。鈔舊兵房一律修葺等語。鈔舊兵房准其修理。至所稱添建不敷兵房。查乾隆四十九年甘肅循化等三營從邊內募往新兵。每名給房一間。再查從前河屯協右營初建新募兵房。原祇擬每名給房一間。其每名給房二間之處。係奉特旨賞給。未便援以為例。應將該督所請添建兵房一百三十八間。照甘肅循化等三營例。每兵給房一間。准其添建六

十九間。至名糧募補實兵。以後各省奏請添建兵房。兵工等部議覆。惟令各該督撫酌辦。究恐不能盡一。請嗣後除綠營舊有兵房悉循舊毋庸另議外。其續有增募之兵。務令各營弁專募本處土著之人充補。自各有舊時舍宇。毋庸議給兵房。其實有孤懸邊外。不得不從內地募補者。均照甘肅循化等營例。每兵給房一間。惟由此地移駐彼地兵丁。如原有官房二間者。准如數建給。至各處官建兵房。當責成現任兵。隨時粘補。不得援照熱河駐蹕之地。率請動項修葺。應交各該部通行直省一體遵辦。從之。○浙江巡撫覺羅琅玕疏報孝豐鎮海二縣。乾隆五十三年分開墾額。外田地五頃六十四畝有奇。○是日駐蹕密雲縣行宮。○壬寅。

上御行殿。勾到湖廣情實罪犯。停決斬犯十八人。絞犯十人。餘九十六人。予勾。○諭旨。特成額。前在湖廣總督任內。尚無貪婪入已情弊。

著加恩釋放。賞給頭等侍衛職銜。自備資斧。前往烏魯木齊。更換永泰。○又諭。曰。滿斗。現年九十歲。著加恩賞給內務府大臣職銜。○駐藏大臣舒濂普福奏。臣等原議於前藏建造倉廩。以備儲積。業蒙允准。但前藏不產木植。建造維艱。查從前雅滿泰所住樓房。現在空曠。請即於此處貯積米穀。毋庸另建倉廩。報聞。○又奏。西藏向未設立教場。殊乏校閱騎射之地。請於扎什地方建造。但此處採辦木植。路遠費繁。查從前雅滿泰所住樓房。除改建倉房貯米外。餘房甚多。應概行拆毀。蓋造教場。報聞。○是日駐蹕南石槽行宮。○癸卯。

上迴鑾。○詣

安佑宮行禮。○幸圓明園。○以戶部右侍郎汪承霈。知武舉。禮部尚書紀昀。為武會試正考官。翰林院侍讀學士平恕。為副考官。○甲辰。旌表守正捐軀廣東增城縣貢生周學濂妾。

何氏乙已諭曰奎林等奏拏獲盜犯及糾衆械鬪各犯分別辦理暨榜示有名逸匪審明正法各摺均已批交該部矣。臺灣搶劫兇鬪之案本年經奎林等督率訪緝已拏獲多案。逐次嚴辦尚為認真。奎林萬鍾傑著交部議敘。其在事出力之文武員弁並著奎林等查明一併咨部議敘。至閩省民風刁悍盜劫頻聞前經降旨將該省行劫糾鬪案犯從重定擬俟三年後再照舊辦理。但臺灣孤懸海外非閩省內地可比該處民人又屬五方雜處經上年大加懲創之後而奸究兇橫之徒仍敢接踵犯法看來積習已深非一時所能峻革所有臺灣行劫糾鬪之案總當隨時嚴辦不必拘定三年俟將來該處民人果能洗心革面實知畏法斂戢該督撫鎮道等據實奏聞候朕降旨再照舊例辦理嗣後奎林等仍宜加意整頓實力訪查遇有不法滋事者立予嚴懲以靖海疆而化頑獷該鎮道皆係

特加簡用之人諒不至以現拏多案仰邀甄敘遂爾心存懈弛也。諭軍機大臣等前因柴大紀之子柴際甲發遣伊犁至本年七月尚未解到遣所業經降旨令沿途各督撫將柴際甲究在何處稽遲查明據實覆奏。茲據陳用敷奏柴際甲已於四月二十七日經過安徽亳州遞解出境交替河南等語柴際甲既於四月內行抵河南該撫自己早經接奉前旨現在陳用敷業經覆奏而豫省距京較近何以梁肯堂至今尚未將該犯經過日期具奏殊屬延緩著再傳諭梁肯堂即查明柴際甲究於何日出河南境抑係別有逗留之處即行據實覆奏。梁肯堂不應如此疎慢也。尋奏柴際甲於四月二十八日解到河南柘城縣入境五月十六日由靈寶縣轉解陝西出境得旨覽。丙午諭曰那蘇圖著以護軍叅領等官補用。所有福建福寧鎮總兵員缺著岱德補授。諭軍機大臣等本日召見新

授福建福寧鎮總兵那蘇圖。看其漢仗。雖尚
去得。而詢以漢話。俱不能登答清楚。人亦羸
蠢。總兵有訓練兵弁。整飭營伍之責。那蘇圖
雖經出兵打仗。用為將領。或可稱職。而於專
閫大員。豈能勝任。況閩省營伍廢弛。尤非他
省可比。安能望其整頓。該員係李世傑保舉
堪勝總兵之人。豈該省別無才具出衆者。而
以那蘇圖平庸之員。一保塞責耶。除將那蘇
圖留京。以護軍叅領等官補用外。李世傑著
傳旨申飭。又諭據福康安奏查禁私販紅
鹽一摺。內稱粵東煎曬鹽。出於場而散於
埠。緣商人等力疲課絀。不能及時收買。各場
丁又因一時不能速售。勢必減價售私。以致
奸販乘機囤積。現在改幣歸綱。商民等捐輸
鹽本。當飭動撥綱本銀一十萬兩。令局商赴
場趕緊買運。並於鹽飭出場之後。仍嚴禁夾
帶。查緝透漏。場鹽不致壅滯。則私販自無從
囤積等語。各省官引暢銷。私販裹足。全在地方

文武各官不時嚴緝。則奸商自無由乘機出
沒。所謂有治人無治法也。至該督所稱粵省
現在改幣歸綱。商民等捐輸鹽本。業已完繳
銀一百餘萬兩。實貯在庫。當先撥綱本銀一
十萬兩。令局商赴場趕緊買運等語。與其動
撥十萬兩。收買有限。何不將場內煎曬之鹽。
儘數收買。則私販無從得鹽。而場丁等減價
私售之弊。亦可永除。且該場丁等並無恒產。
全仗煎曬鹽。若煎出之後。存積在場。無人
收買。則伊等口食無資。必至流而為盜。今若
儘數收買。場丁等隨煎隨可獲利。自不至流
為奸匪。於地方弭盜安良。亦屬有益。現在改
幣歸綱。存庫之銀。既已有百餘萬兩之多。則
高州府屬出鹽最旺之電茂博茂等場。自應
儘數收買。於該省餉務更為有裨。至湖南衡
州府例食淮鹽。非如楚之桂陽。臨武。藍山。宜
章等八州縣。本係行銷粵鹽可比。因衡州與
粵省全州接壤。是以私販易於充斥。著傳諭

福康安嚴飭所屬於水陸鹽勦經由處所及沿海一帶並於楚省接壤之區一體實力緝私毋使奸徒乘機興販俾粵鹽不至充賺淮網以期疏引遏私方為妥善將此傳諭福康安並諭郭世勳孫永清知之○又諭曰福康安奏請廣西撫臣孫永清暫緩陞見一摺內稱該撫辦理報銷軍需款項並料理阮光顯出關及豫備明春阮光平進京之事一切俱資經理未便即行啟程入都等語所奏甚是廣西自辦理安南以後所有奏銷各項及安插綏輯事宜自須該撫經理況明年阮光平進關入京瞻覲福康安帶同前來均須該撫在彼妥為辦理阮光平出都回國之時又須照料出關不宜遽離該省著傳諭孫永清俟明年福康安帶同阮光平入都瞻覲及伊回國時照料出關之後再行啟程來京陞見未為遲也將此傳諭福康安並諭孫永清知之○又諭曰福康安奏黎維祁之弟黎維祗潛

匿安南保樂地方與黃文通糾聚土兵攻打牧馬地方被阮光平手下殺敗等語黎維祗於伊兄進關後窮竄無歸而黎氏國祚頻移安南境土全為阮光平所得黎維祗係黎姓支子倘力有可圖與阮光平彼此爭鬪尚為情理所有但阮光平既已身受封爵其聲勢自必加增黎維祗即再思糾約舊時臣庶希圖恢復揆之時勢自必不能而阮光平意欲翦除後患四處尋覓黎維祗亦事所必至如黎維祗因阮光平逼迫叩求內地收留自當與黎維祁一同安置從前黃公纘以夷目內揆尚准收納豈有黎氏宗支反拒而不納之理若將來黎維祗不投入內地則已倘黎維祗祇投入內地阮光平或有具稟懇請賞還之事福康安當諭以黎維祁孱弱無能播遷失國但黎氏備列藩封百有餘年雖與國王構釁稱兵並無得罪天朝之處今黎維祗窮蹙來投念其祖宗臣事已久自當與伊兄一同

收留內地安插。大皇帝撫馭中外人民。大公至正。一視同仁。現以國王悔罪投誠。錫之封爵。豈肯將

天心已棄之黎氏。復予扶持。然因國王撫有安南土宇。遂欲將黎氏子孫盡行誅滅。天朝亦不忍出此。從前已經奏聞。此係遵旨而行。如此詳悉曉諭。方為妥善。○前任廣東巡撫圖薩布疏報。廣州肇慶廉州三府屬。乾隆五十三年分。開墾額外水田沙灘三百八十八頃

八十九畝有奇。旌表守正捐軀直隸咸安縣民婦張王氏女張氏。○丁未。諭軍機大臣等。據郭世勲奏。三場事竣一摺。內稱於額送科舉外。多取數百名入場。其應需經費。皆係督撫捐貲備辦等語。直省三年大比。典重掄才。所有科場經費。向來均係動支官項。從無督撫自行捐貲之理。外省地方官。於鄉試備辦供給等項。往往藉沾餘潤。其能實用實銷。不致從中取利。已屬難得。若矯枉過正。於例

需經費。自出已貲備辦。似此公項之事。紛紛賠累。伊於何底。即如順天鄉會各試。係禮部府尹率屬承辦。非督撫養廉優厚可比。若概令捐貲。勢必不能賠墊。國家亦無此政體。該督撫所辦殊屬非是。著傳諭該督撫。即將因何籌辦捐貲之處。據實覆奏。○又諭曰。朕明春巡幸山東。於二月初八日。由陸路啟蹕。計東省回鑾。經由水程。自三月十七日登舟。後至四月十一日抵寶稼營登岸。所有豫東二

省漕船。向例應於四月內。全數抵通。計朕於二月初八日。由陸路經行。至三月十七日登舟。中間共有四十日。為期甚寬。漕船於彼時例應早過津關。倘行走未能如期。不妨照南巡之例。於御舟經過時。令糧船暫於岸旁停泊。隨後過行。總使漕艘不致阻礙。方為妥善。著傳諭該督撫。豫為妥速籌辦。不可使糧艘稍有遲誤。其如何先行計算日期。及早開兌。並於何日可抵津關之處。即覈算查明覆奏。

將此諭令長麟梁肯堂並諭管幹珍知之。○又諭曰。長麟奏。今歲直隸偶被偏災。民船多裝載糧石。赴直販賣。現在出示曉諭。並嚴飭委員。不許封雇往來商船。所有東省受兌裝運米石。不敷船隻。即將空閒撥船通融載用。等語。所辦好。直省偶被偏災。業已加恩給賑。更得商賈流通。源源接濟。於災黎更有裨益。長麟將東省裝運漕米不敷船隻。即於現在空閒撥船內通融載用。而於往來商船概行

禁止封雇。不但東省商販藉免守候之累。即直省災民亦均受其利。籌辦甚為得當。長麟能不分畛域。深得大臣之體。實屬可嘉。著賞給大荷包一對。小荷包二對。以示優獎。將此傳諭知之。○又諭曰。閔鶚元奏。委署司道印務一摺。內稱按察使王士榮來京。陛見等語。就京師而論。則云來京。若以該處言之。祇宜稱進京。不應來去倒置。若此。已用硃筆改正。閔鶚元係科甲出身。且平日辦事尚屬老練。

何於陳奏摺內文義竟未留心耶。將此傳諭知之。○兵部以武會試中額請得旨。這考試漢軍取中二名。直隸取中七名。陝西取中六名。廣東取中五名。河南取中一名。山東取中四名。江南取中二名。山西取中三名。湖北取中一名。湖南取中一名。四川取中一名。廣西取中一名。福建取中一名。浙江取中二名。江西取中一名。雲南取中一名。貴州取中一名。○戊申。諭御史和琳。歷任巡視東漕。熟悉該

處情形。現據李奉翰奏。東省河道有需勘濬之處。所有巡視東漕事務。仍著和琳去。以便會同李奉翰勘辦一切。○諭軍機大臣曰。李奉翰奏。於督催幫船之便。即將運河各汎水深尺寸。隨路測量。逐段記誌。試看受淤之厚薄。即以定挑深之多寡等語。運河大小挑工。上年因和琳條奏。曾降旨不必復拘舊例。惟當於回空過竣時。確加履勘。若河道並無停淤。即無庸挑挖。若果有受淤之處。再確加估

計。奏明辦理。本年運河水勢既屬充裕。即不應復有淤淺之處。何以李奉翰尚未履勘。遽以為須加挑辦。是該督此奏。不免為工員開銷地步。現因和琳熟悉東省運河情形。所有巡視東漕事務。仍派該御史前往。著傳諭李奉翰。俟和琳到彼。會同確切履勘。如實有應挑之處。再奏聞估辦。倘河道並無淤淺。即可毋庸辦理。不得輒援舊例。復請挑濬。以節糜費。除就近傳知和琳外。將此諭令李奉翰知

之。○軍機大臣等議覆兩江總督書麟奏。稱江西建昌饒州二府。為淮鹽門戶。而所屬新城。瀘溪。德興。浮梁。安仁。五縣。又為閩浙私販咽喉。應請於此五縣內。每處由撫臣選派勤幹雜職一員。飭令各該地方官。撥鹽快十名。並令南昌鎮臣選派千總一員。撥兵十名。會同前往督率該處卡商巡役。於水陸兩途。分投巡緝。半年一次更換。所獲私鹽。交商變價。分賞兵役。其人犯。交地方官審辦。屆半年時。

比較獲私鹽之多寡。將該委員咨部。分別議敘議處。應如所奏。從之。○西藏辦事大臣巴忠奏。臣遵旨復往後藏。先遺書沙瑪爾巴。呼圖克圖。召之使來。嗣抵扎什倫布。見伊兄仲巴。呼圖克圖。詢知其因病已歸。臣復前進至脅噶爾。途遇沙瑪爾巴。呼圖克圖來使。並齋到書函。所言皆同。若必令其出見。恐已勒布人等生疑。因將賜物及節次諭旨寄往。臣亦即起程回前藏。報聞。○西藏辦事大臣巴忠。

駐藏大臣舒濂。普福奏。臣巴忠至前藏。查明濟龍。係達賴喇嘛所屬。扎什倫布各廟宇。係沙瑪爾巴。呼圖克圖所建。現在係伊弟子掌管。並無大喇嘛居住。今若另設住持。自應於扎什倫布所屬大喇嘛內揀選。但從前沙瑪爾巴。呼圖克圖所稱。需接手辦事之人。意欲顯其誠心報効。其實非目前急務。且伊年力方壯。亦無須派人幫辦。報聞。○已酉。上詣

大高殿

壽皇殿行禮○還宮○諭吏部進呈原任湖南學政錢澧失察生員匿喪冒考議處一本各省學政訓飭士子是其專責今生員楊德鏞於母喪未滿朦混冒考似此忘親躁進之徒不特違犯例禁實於倫紀有關錢澧身為學政竟若罔聞知所謂訓士者安在豈國家設立學政惟令坐享厚廉而於風化士習俱可置之不問耶錢澧前在御史任內自詡剛方節經叅劾畢沅國泰朕念其尚有風力一兩年間即擢至通政使副使簡放湖南學政並特令連任乃伊在湖南將及六年從未見其續有糾劾之舉豈該省大小官員盡皆廉法竟無一二應挂彈章者況近年湖廣活埋匪費江隄等案節次破露錢澧近在楚省寧獨無所聞知而默不一言可見伊從前叅奏畢沅國泰不過以自峻丰裁為售知邀陞之地及擢至京堂學政遂爾志滿意足欲思安享

豐腴自甘緘默其何以克副委用此而尚使硯顏留任豈為學政者必皆如謝墉吳玉綸聲名狼籍始謂之有忝厥職耶吏部堂官於議處此案自應將錢澧議以實降其任內尚有加級紀錄足敷抵銷之處一併聲明具題乃該部朦朧並不詳細聲敘率准抵銷而閣臣亦不過照例擬票朕發令改議始聲明錢澧無級可降應行革職吏部堂官辦理抵銷未免有心徇庇著交都察院議處至錢澧以特加簡擢之人乃玩愒至此本應即予褫革姑念其從前尚知持正著加恩以部屬主事用以觀後效○諭軍機大臣等前據福康安奏兩粵地方情形一摺內稱各屬士子赴考者多於往歲於額送科舉外多行錄取數百名入場所需經費由福康安與撫臣捐貲備辦等語此一節朕實未經細看出昨據郭世勲具奏朕以所辦非是業已降旨將因何籌辦捐貲之處令該督撫據實覆奏矣今思捐

貨一事必係福康安因令李天培代辦木植一案曾經獲咎未免心存惶懼遇事過於見好故將科場經費出貲捐辦夫掄才重典各省科場經費俱係動支官項從無督撫自行捐貲之理督撫能察屬員不於此中冒銷已恐不能若以此等公項之事皆須督撫自出已貲紛紛賠墊不但各省地方官心所不願且或生嫉妒即粵省亦未必樂從若以為節省官項起見試思朕臨御以來普免天下錢糧三次漕糧二次不下二萬萬若較之福康安所省區區科場小費不及千萬中之毫釐於帑項有何裨益福康安所見甚小如因木植一案獲咎勉思補過自應從此倍加清慎於地方要務有關國計民生者實力整頓豈徒以節省些微經費即為盡心見好耶著傳諭福康安嗣後務須力持大體遇事格外謹凜認真方為不負成全任使之意將此諭隨便寄知各省督撫令知朕意也○庚戌

孝慈高皇后忌辰遣官祭

福陵○諭公主等屬下官員本有定額固倫公主屬下原定八員第念公主不時入內請安導引隨從人員無多不敷當差著加恩固倫公主屬下再添設頭等護衛一員○諭軍機大臣等據伍拉納奏澎湖於七月初三四等日颶風大作擊碎該協營哨船一隻折桅斷桅損漏三隻又龍溪縣帶送各處公文商船一隻彰化縣配載兵米商船一隻俱在洋擊碎米石沉失惟舵水及縣役等泅水得生餘俱不知生死其沿海民房及衙署倉廩間有被風刮壞等語此次海洋颶風大發其勢甚猛彰化係臺灣所轄而澎湖地方亦相距甚近何以奎林等於該處擊碎船隻及刮壞房屋之事未見奏報想遠隔重洋尚未馳達也至沿海各處陡遭風暴民田廬舍自不無損壞之處著該督撫等飭屬詳悉查勘如有應行撫卹者即奏明分別辦理毋致失所其船

戶人。有無淹斃。亦著照例查辦。將此由五百里傳諭該督撫。並諭奎林等知之。仍著各行據實覆奏。尋奎林等奏。澎湖被風緣由。臣等於八月十一日。始接據澎湖廳詳報。聞該廳已於七月初六日。通詳督撫。所以臣等未經專奏報聞。又諭曰。伍拉納覆奏。徐嗣曾奏請責成族正。縛獻匪徒。及盜匪自首減等二條。所見實錯。嗣後惟有仰遵諭旨。於應辦公務。與徐嗣曾和衷商確。認真辦理等語。徐

嗣曾所奏。論其說斷不可行。且此等酌定章程。並非迫不及待之事。儘可會商具奏。乃該撫遽爾單銜入告。自因伍拉納本係閩省藩司。曾為其屬員。未免意存輕視。今據伍拉納奏。事事惟有與徐嗣曾會商妥辦。該督雖如此言。究恐伊等竟成參商。伍拉納甫任總督。其資望原不逮福康安。但果能奮勉自立。認真整頓。自不至為人輕視。國家官常。均有一定體制。而辦理公務。總當和衷商酌。以資治

理著再傳諭該督撫。嗣後務宜仰體朕意。遇事熟商。益矢寅恭。以期於公事有益。不可稍存意見也。○河南巡撫梁肯堂奏。安陽縣知縣陰海。派各地保領買麥石。差催滋事。請將陰海發往軍臺効力。諭軍機大臣曰。梁肯堂奏。定擬安陽令陰海。違例派買倉穀。差催滋事一摺。陰海應得罪名。亦祇可如該撫所擬辦理。但摺內上年五月間。因麥價平減。飭令各州縣採買麥石。該縣陰海。照依時價。給發

各地保等。令其購買。嗣因陰雨連綿。至六月內。麥價漸昂。不敷採買。地保等情願繳還銀兩。免交麥石。該縣以領價在前。不准呈繳。差催滋事等語。採買麥石。原應趁糧價平減之時。趕早購辦。數日內即可買竣。乃該縣於奉文後五月內。並不及時採買。至六月糧價漸增。以致原給價值。不敷採辦。是該縣發價遲延。實屬辦理不善。著傳諭該撫。嗣後採買倉穀。務宜嚴飭所屬。於糧價平減之時。立即發

給以便趕買。不得任其滋弊。除將原摺交部議奏外。將此傳諭知之。○又諭據巴忠奏稱。巴勒布貢使。於十二月初十日前。後到京。尚覺從容。巴忠由川省馳驛。意欲加緊行走。比巴勒布先到數日等語。此可不必。巴勒布來使。現有成德帶領。並有通事之人。巴忠先來。亦無緊要事件。何必趨程行走。況巴忠既欲迅速前來。必致額外擾動驛站。此乃巴忠思念家室。故借端具奏。著傳諭巴忠。令伊按站行走。毋庸加緊馳驛。以致徒勞郵傳也。○前任廣東巡撫圖薩布疏報廣州肇慶二府屬。乾隆五十三年分。開墾額外荒地。四頃六十六畝有奇。○是日起。

上以孟冬享

太廟。齋戒三日。○辛亥。諭軍機大臣。曰。畢沅奏查勘荊州萬城隄壩各工。並害金洲刷塌情形。一摺。覽奏欣慰。害金洲老礮漸次刷動。又有楊林洲石礮挑溜得力。北岸隄勝。自足資

鞏固。將來江溜能走中泓。順軌東趨。固屬甚善。但閱圖內害金洲之西南。有大溜一股。分向南行。恐日久大溜全往南趨。南岸隄工。又致著重。該處隄境之內。必有民田廬舍。所關並重。不可不豫為留意。著傳諭畢沅。務宜隨時留心察看。如大溜有直趨南岸之勢。即宜設法妥辦。不可專注意於北。以致南岸稍有頂衝受險也。○

御書荊州萬城隄

江神廟扁曰恬流普衛。○戶部奏江蘇通州竈戶翟起麟。呈控南北竈新淤沙地被民人元新成等混稱民地冒陞。撫憲業經具題。嗣經常鎮道勘明該地實係竈業。撫憲因恐咨部與前題不符。復飭議詳。司道無所適從。懸案莫結等情。請交兩江總督審辦。得旨。此案著派伊齡阿、姜晟馳驛前往。秉公審擬具奏。○以內大臣舒常為左都御史。○以翰林院侍讀學士法式善侍講學士馬啟泰贊善李

堯棟充日講起居注官。編修羅修源。署日講起居注官。○調鑲紅旗蒙古都統明亮為鑲紅旗漢軍都統。以回部郡王品級貝勒哈第爾為鑲紅旗蒙古都統。○壬子。

孝敬憲皇后忌辰。遣官祭。

泰陵。○諭。昨畢沅奏。湖北漢黃德道孟鈺。才不勝任。請以同知降補等語。已照所請交部矣。因思孟鈺係部員出身。其外放道府。必有人保送。茲據軍機大臣查奏。該員係三十五年。

經刑部堂官保送簡缺知府等語。六部郎中截取知府。該堂官於保送繁缺之員。尚知慎重。如有才具平常者。引見時。朕亦即予駁改。其保送簡缺者。該堂官往往視為無甚緊要。又可為屬員外任地步。向來未免率行姑息。保送。此大不可。知府為方面大員。無論繁簡。皆有表率屬員之責。所謂有民人焉。有社稷焉。即使缺分事簡。亦豈可以才不勝任者。濫竽貽誤。嗣後六部堂官。於俸滿郎中截取時。

其有才具平常者。即當留部當差。雖簡缺亦不得率行保送。倘該堂官仍前濫保。引見請訓時。經朕駁改。及外放後。該督撫奏請降補者。惟保送之該堂官是問。○是月。直隸總督劉峩奏。清苑等四十餘州縣水災。應領賑銀。向係易錢散給。恐市價增貴。查寶直局。每年額鑄錢。除搭放兵餉等項外。歲約餘錢八千七百餘貫。近年市價平減。未經出易。共積錢十七萬五千五百餘貫。今災賑需錢。應即在局錢內。出易十二萬貫。賑銀一錢。折錢一百。仍在應撥賑銀項下。扣還成本十二萬兩。造入鼓鑄案內報銷。得旨嘉獎。○兩江總督書麟。江蘇巡撫閔鶚元。奏。崇明縣孤懸海濱。應買大黃。由本縣起票。准於鎮洋縣之劉河鎮購買。買回出口時。責令松太道海關驗放。得旨。妥實為之。○漕運總督管幹珍覆奏。明歲漕運。臣等現在趕辦。豫省兌漕後。不必拘定臨清守凍。務乘河水未合以前。多趲數站。東

省幫船不得拘春兌春開舊例勒限十月內
以次受兌冰泮後一律進行約計明歲三月
十七日以前豫東漕船必已過津抵壩得旨
嘉獎○江南河道總督蘭第錫江寧布政使
康基田奏正河下游近來日報長水口門水
勢擡高分歸正河東注益速計壩工合龍時
全河復故尚易為力批不可為滿言慎重為
之又批覽奏稍慰佇待佳音○安徽巡撫陳
用敷奏宿州等處被水請先借給一月口糧

得旨即行賞給○安徽在籍原任戶部尚書
曹文植奏來年恭逢

萬壽臣應進京慶祝蒙垂念臣母年高倘不能
遠離即在籍望闕行禮竊臣母精力甚健觀
現在情形臣來年儘可進京得旨若能來朕
誠喜但不可稍涉勉強當體朕心○署江南
提督壽春鎮總兵王柄奏浙省現嚴拏健跳
大門洋劫盜恐竄入江省飭員於各海口堵
截擒拏得旨實力為之母久而懈綠旗惡習

不堪應留心○調任浙江溫州鎮總兵韓正
國奏蒙恩調補處州鎮俟謝斌到溫即交代
起程批此雖事簡處一切亦當勉力不可為
綠營之虛詐○湖廣總督畢沅奏漢江兩次
暴漲致濱臨漢水之荊門潛江江陵監利四
屬低窪田垸間段被淹荊門州地勢較高洄
出之區可望薄收其潛江江陵監利三屬被
水各垸並屯坐軍丁生計不無拮据請先撫
卹一月口糧並請將該三屬被淹民衛同荆

門州帶淹民衛本年應徵漕糧各項及帶徵
各年錢糧概行緩徵再目下漢水業已歸槽
儘力疏消尚可補種宿麥得旨覽奏稍慰一
切妥為之○協辦大學士公兩廣總督福康
安覆奏閩省副將馬龍福蘭泰俱堪勝總兵
報聞○廣東巡撫郭世勲奏粵東為海疆要
地任重事繁臣惟當奮勉辦理得旨汝有何
說一切勉為之期之以久而毋懈可也

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百三十九

書

書

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事務處管理

吏部理藩院事務正黃旗滿洲都統世襲副都統加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領侍衛內大臣稽察欽奉 上諭事務處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書銀鑲滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十四年己酉冬十月癸丑朔日食

書

二

享

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○頒乾隆五十五年時憲

書○順天府行鄉飲酒禮○諭烏爾圖納遜

現交部嚴加議處難以留任所遺察哈爾都

統員缺著保泰補授其科布多叅贊大臣員

缺著伍彌烏遜調補伍彌烏遜由彼即赴科

布多保泰交代後再赴新任○甲寅

上御乾清門聽政○諭前因各省鄉試中式人

數較多若等候各舉子齊集京師已屆會試

之期是以將鄉試覆試之例停止但思各省

鄉試俱係本省諸生應考尚不至滋生弊端

順天為五方輻輳之區其應試之人又係俊

秀監生居多未免良莠雜處現據順天府查

奏萬治庭項名中式並經步軍統領衙門拏

獲該犯審出聯號代倩情事看來順天鄉試

榜發後不可不覆加嚴試以覈真才而清弊

竊所有順天中式舉人著即於此科為始舉

行覆試其有托故不到者仍照舊例辦理○

又諭曰謝墉吳玉綸前於學政任內聲名很

藉謝墉業經降授編修而吳玉綸仍以四品

京堂開列不足以示懲儆而昭平允吳玉綸

亦著降補檢討在武英殿修書處効力行走

○乙卯

上御懋勤殿勾到江西安徽情實罪犯停決江

西斬犯九人絞犯八人安徽斬犯八人絞犯

八人餘六十三人予勾○諭前因梁肯堂奏

安陽臨漳二邑偶被水災業經降旨撫卹一

月口糧以資接濟並令該撫將應行撫卹蠲

緩事宜詳悉查明妥協辦理茲據梁肯堂奏

安陽臨漳偶被偏災麥秋雖尚有收但當積

歉之後若將本年漕糧一例徵收小民未免

拮据等語著加恩將安陽臨漳二縣本年應

徵米麥豆三項緩至乾隆五十五年麥後徵

收以紓民力。所有被淹之募村錢莊等處。應行緩徵麥豆並著照所請。准其於未被水各戶應徵粟米內照例改徵。以示軫念災黎至意。該部遵諭速行。○又諭據內務府議奏。請糶與打牲人等口糧四千餘石以資接濟。所糶銀兩於明年秋季餉銀內坐扣等語。本年六月雨水較多。松花江舒蘭河水溢打牲烏拉等所種田地被衝。理宜接濟。現在所需口糧。即照所請糶與併著加恩賞給一半。其應扣一半銀兩。自明年秋季為始。分三年坐扣。以示體卹。○以侍講學士李潢為內閣學士兼禮部侍郎。○以鑲黃旗滿洲副都統佛佳為烏里雅蘇台叅贊大臣。○丙辰諭據恒瑞等奏。請將盜竊商民貨物之蒙古綽克圖達什分別擬罪。首犯綽克圖現今在逃。照例擬絞。獲日絞決。從犯達什發往雲貴烟瘴地方等語。所辦未協。蒙古荒野地方並無墻垣。商人貨物。蒙古人等易於盜竊。必須立法嚴禁。

方能示懲。今綽克圖起意邀同達什行竊。而綽克圖尚未緝獲。即將從犯達什發遣。則蒙古人等於首犯擬絞之處。不惟無從得知。難以示儆。并將來首犯就獲時。伊既知無人質證。必致推委狡賴。不肯承認。著將達什暫緩發遣。送部監禁。俟緝獲綽克圖審明之日。再行照例發遣。如未經緝獲。綽克圖將達什永遠監禁。蒙古地方嗣後如有似此首犯逃逸者。俱照此辦理。○諭軍機大臣等。前因明年慶典在京師舉行。阮光平若到京較早。又須守候。是以令於七月二十日以後到京。嗣又思哈薩克各外藩蒙古等皆赴熱河慶祝。七月初十間。即在山莊筵宴。如該國王瞻覲情殷。不妨令其早行赴闕。復降旨令福康安不必阻止。福康安自當遵照辦理。阮光平於春間進關。計算道路日期。七月以前儘可到京。一俟抵關後。福康安即帶同起程。先赴熱河。以便與哈薩克各外藩蒙古等一同入宴。再

回京隨王公大臣等屆期共伸慶祝。調正黃旗蒙古副都統扎郎阿為鑲白旗滿洲副都統。正黃旗漢軍副都統伍彌烏遜為正白旗蒙古副都統。實授慶成為正黃旗漢軍副都統。○丁巳。

上御太和殿視朝。文武陞轉各官謝恩。○諭。向來鄉會試士子出場之日。例本不准給燭。聞本科順天鄉試於初十、十三、十六等日。多有遲至夜分始行交卷出場者。以致昏黑易於

混雜。滋生弊端。殊非慎重科場之道。此必係伊齡阿沽譽矣。嗣後凡遇鄉會試。於士子出場日期。知貢舉及監臨等。務須先行出示曉諭。屆時嚴催早行交卷。斷不准其給燭。以杜弊竇。著為令。○又諭。昨因察哈爾侍衛齊巴克扎布。控告該總管伊爾庫多款。現經審明。伊爾庫坐扣官兵錢糧入已各款。皆實。其原告伊爾庫之妻歸寧來京。擅用烏拉巡查牛馬牧場。索取馬二十匹。存公罰項。牲畜內取

用馬二十匹等款。齊巴克扎布俱係風聞。並無干證。伊爾庫照例定擬。齊巴克扎布所告重案皆實。輕案子虛。例不坐罪。此特指平民不知律例而言。今齊巴克扎布身為輕車都尉。兼三等侍衛。非不知律例者可比。所告重

案雖實。尚有多案皆虛。若不薄懲。其罪恐長。妄控之習。著交部察議。以為板告者戒。著為令。○諭。軍機大臣等。明年屆朕八旬萬壽。安南國王阮光平赴京祝釐。而暹羅等國使臣

亦俱屆期來京朝賀。因思明歲係四川各土司例應年班入覲之期。著傳諭李世傑酌量。若該土司不耐炎熱。熱河氣候比京城較為涼爽。不妨令其於七月初五以前。赴熱河慶祝。以便與哈薩克等在山莊筵宴。若該土司等能耐炎熱。即令於七月底到京。與安南暹羅等國一同朝賀。瞻仰祝釐盛事。該督務須計算日期。令該土司等按程行走。屆期到京。方為妥善。○又諭。據保寧奏哈薩克台吉

博普阿第勒呈請明年萬壽慶典於伊等子弟內各遣一人來京叩祝業經照依所呈令於明年與阿岱等同至京師等語。哈薩克台吉博普阿第勒等懇請於伊子弟內各遣一人來京叩祝具徵忱悃惟近據保寧永保等奏阿岱等明年來京奏到時曾經降旨伊等內恐有未出痘者令伊等於明年七月初五日以前來熱河想保寧尚未接到著交保寧即照所請令伊等同阿岱酌量明年七月

初五日以前能到熱河扣算日期遣往。惟哈薩克來使向由伊犁內地行走不准由烏里雅蘇台行走。今伊等誠心前來叩祝此次暫准由烏里雅蘇台行走。期於未出痘者有益。又稱小台吉內請來京者請即駁回不准亦是。但台吉內有因勞績賞給翎頂或伊父曾經出力者酌遣三四人來不必概行駁回。將此併諭保寧永保酌辦。又諭曰長麟奏拏獲越獄人犯審明正法一摺內稱五十一年

歷城縣監犯許四妮等越獄脫逃案內尚有許作名等五名未經弋獲茲據單縣知縣楊楷稟稱因奉檄飭差訪拏各案在河南永城縣地方躡有許作名蹤跡改裝易服將該犯拏獲當即審明正法等語。地方緝捕事宜該督撫果能認真督飭該屬員等知所敬畏自必上緊緝拏今長麟能實力督緝該縣楊楷遂能將年久越獄之犯留心緝獲殊屬可嘉楊楷自應送部引見至歷城越獄案內許作

名一犯既經拏獲其餘未獲四犯亦不難跟蹤躡緝著傳諭長麟仍應嚴飭所屬上緊緝捕毋因現既獲犯遂事疎懈也。旌表守正被戕陝西長武縣民賀淳聘妻魚氏戊午上御懋勤殿勾到江蘇山西情實罪犯停決江蘇斬犯四人絞犯六人山西斬犯十八絞犯十五人餘五十六人予勾。已未諭曰書麟等奏周家樓漫口大溜側向南趨幸荷硃筆指畫於西裏頭添築挑水壩挑溜得力進埽

得以平穩。於十月初三日卯時掛纜合龍口。門旋即斷流。大溜全歸正河東注。壩身並無腰漏滲水處。所等語。周家樓漫口共長二百四十餘丈。自開工堵築以來。從無姓失。茲得合龍穩固。迅速歲事自由。

天神嘉佑。而該督等董率在工員弁。辦理亦為妥協。該工西壩左近舊有

河神廟宇。著該督等即重加修葺。並御書扁額發往。以答

神佑。書麟蘭第錫康基田均著交部議敘。所有在工文武員弁。除疎防之員功過相抵。毋庸議敘外。其餘在事出力者。並著該督等查明分別等第。咨部議敘。又據另摺奏副將鄭永泰專管西壩。始終出力等語。鄭永泰著賞戴花翎。以示鼓勵。

御書睢寧隄工

河神廟扁曰金隄綏佑。又諭曰金德泰廟灣場等處村莊。間被黃水淹浸。現在雖經涸

出。但場埤池窰正須修理。窰丁等未免拮据

等語。廟灣等場地勢低窪。致被洩黃之水。下注淹浸。雖經陸續涸出。而窰丁等修理場埤池窰。未能及時煎曬鹽鹵。若將應完新舊錢糧。一時並徵。窰丁等未免稍形拮据。所有廟灣場成災五分之十二莊。本年應徵折價錢糧。著加恩照例分別蠲緩。其未完舊欠錢糧。及借給口糧。併著一並遞緩徵收。至勘不成災之七莊。及海州三場。本年應徵錢糧。並歷年因災帶徵錢糧。及舊欠借給口糧。亦著展至來年麥熟後分作二年帶徵。以示朕軫念窰丁至意。該部即遵諭行。庚申。

上詣

雍和宮行禮。諭軍機大臣曰。畢沅奏勘佑郝穴鎮磯嘴壩裏頭石方銀數。分別辦理一摺。批閱後。又觀所進之圖。該督因許仙觀對岸新長淤洲。恐其日向北漲。擬於許仙觀隄外建築雞嘴壩一座。挑溜南趨。江流浩瀚。豈一

二石壩遂能挑動大溜。況沿江一帶隄塍從前亦並未有工。即云此項工作係用民力。但將來仍須按糧攤派。小民生計有常。詎能於額徵之外復事增加。此次該督奏請於許仙觀建築石壩。係為保護郝穴鎮市起見。姑准照所請辦理。惟閱所繪石磯圖樣形勢太直。恐致著重。應斜向東南順溜進做。方為穩妥得力。已於圖中硃筆標出。再石磯距白沙草家兩洲江面尚遠。溜勢一時亦恐未能挑至對岸。或仿照辦理窖金洲之法。將該處新淤量為挑切。自更易於衝刷。著傳諭畢沅將能否如此籌辦之處詳勘熟商。據實覆奏。不必泥於遵旨。其沿江隄塍嗣後不得濫添工作。為屬員多派開銷之漸。又據另摺奏降調糧道劉錫嘏請留楚學習辦工。俟應繳官項完繳合例。再准其捐復等語。劉錫嘏前任淮揚道任內聲名甚屬平常。是以未植一案。部議上時。予以革職。其人惟捷於應對。毫無實際。

畢沅此奏。自必為其所愚。今該督既請將伊留楚辦工。劉錫嘏著留於該省差遣。但將來官項完竣後亦止准其捐復佐貳等官。不得仍准捐復道府。現在委辦工務。該督亦當留心查察。不得委以錢糧。任其從中侵冒。此等伎倆。彼所能為。又據奏江陵被水後。逸出監犯除陸續投到拏獲。及現獲九犯外。尚有十三名未獲等語。江陵被水。距今業已兩年。未獲人犯尚有十三名之多。可見該督等督緝不勤。再江陵被水時。在監未動各犯若干名。頗知守法。於本罪上應量減二等。衝失逸出後。而自行投到者若干名。應量減一等。其逃後拏獲者若干名。應於本罪上加等懲治。均當如此辦理。何以該督撫總未查明具奏。殊屬遲緩。著該督撫查明。迅速辦理具奏。其未獲各犯。仍飭屬認真躡緝。務獲毋得視為具文。久而生懈。將此諭令知之。○又諭曰。書麟奏恒寧將銷鹽數目移後作前。肇啟弊端。不

便寬貸。所有豫提五月分引數應完課銀二萬兩。應請先於恒寧名下賠交等語。此事恒寧以銷鹽之數移後作前。明係取巧討好。其豫提鹽引應完課銀自應著落恒寧按數賠交。書麟從前何以未曾奏及。經朕節次降旨詢問。該督自知不能再為迴護隱飾。始將恒寧提報銷數致啟弊端。不便寬貸覆奏。而何裕城仍未奏及。可見該督撫從前實不免有迴護屬員之意。除將原摺交部叢議外。將此

傳諭書麟並何裕城知之。○又諭曰。閏正祥等奏。拏獲夾帶腰刀火藥之車夫田四海等。訊據係由蒜市口憑河南店戶楊六說合裝載。並不知有違禁貨物。請將田四海等解送刑部收審等語。腰刀為兵丁必須之物。京師鋪戶製造售賣。事所常有。即裝載出口。安知非賣與熱河滿洲駐防及綠營兵丁。且古北口尚係腹地。非沿邊要隘。私行夾帶者可比。此非大事。不值如此嚴辦。但既經解送刑

部。自應將因何攜帶腰刀出口作何使用。售賣之處。訊問明確。除就近傳知刑部將店戶楊六傳訊外。將此諭令閏正祥等知之。○辛酉。

上御懋勤殿。勾到河南山東情實罪犯停決河南斬犯六人。絞犯十六人。山東斬犯四人。絞犯十三人。餘八十一人。予勾。○諭曰。畢沅等奏。稱武陵縣疊遭水旱。本年雖屬豐稔。究係積歉之區。民力未紓。華容安鄉二縣上年湖水倒漾。亦有緩徵錢糧。及借給種麥工本銀兩。若同時並徵。不免稍形竭蹶。等語。武陵縣係積歉地方。閭閻不無拮据。所有積年未完民欠銀五萬八千五百餘兩。未完穀二萬八千六百餘石。俱著加恩。分為乾隆五十四五十六等年。按年帶徵。華容安鄉二縣上年曾經被水。所有借給之項。未便一律徵收。亦著加恩。將華容縣上年借給麥本銀三千六百餘兩。安鄉縣借給麥本銀九千四百餘兩。一併

緩至五十五年秋後徵收以示朕軫念災區有加無已之至意。又諭曰伍拉納等奏守備董秉玉緝捕洋盜生獲傷斃多名因見餘盜漂浮水面復坐小船追捕致被覆溺等語董秉玉生擒洋盜並傷斃多名殊為奮勇復因追捕餘盜遭風沉溺深堪憫惻董秉玉著交該部照例議卹。諭軍機大臣曰伍拉納奏續獲大門健跳各案盜犯審明辦理一摺已批交該部議奏矣。又奏署副將徐景超擊

獲盜首林明灼并夥盜五名現在解省審辦等語林明灼一犯係屢在洋面糾夥肆劫並在大門洋拒捕戕官實為洋盜巨魁情罪最為可惡既經擊獲即當解京嚴辦但查擊該犯必有都守弁兵等協同躡捕自非徐景超一人所能擊獲著伍拉納查明擒獲林明灼時若尚有都守等出力擊獲即行指名奏聞與徐景超一併送部引見所有林明灼一犯即著出力擊獲之都守押解來京如實係該

副將一人擊獲亦即據實陳明毋庸廻護海洋劫盜頻聞若非朕節次降旨飭令該督等嚴行查拏此等匪徒日聚日多勢必釀成海寇更不成事體至林明灼與陳禮禮既在浙省大門洋行劫何以反在閩省地方就獲可見此等盜犯出沒無常雖在洋面肆劫仍須上岸變賊况海船內不能多帶淡水該犯等豈能久住海洋若果道府州縣隨時留心購拏原無難立時破露著傳諭該督撫嗣後於

緝捕盜犯務須嚴飭岸上地方官於各海口及盜犯原籍地方一體實力躡緝毋得因匪徒在洋面行劫之案概諉之水師營伍意存膜視以致獲犯稽遲。○又諭曰伍拉納等奏哨船在洋遭風一摺內稱黃巖鎮標汛弁趙存高雙蓬船一隻兵丁三十三人出洋巡哨於七月初九日夜在主山洋面猝遇暴風收駕不住被風飄刮不知去向當經該鎮分派弁目於內外洋面四路尋覓並無蹤影旋准

江蘇巡撫閔鶚元咨稱呂四洋面見有無桅船身一隻板上刻有黃標左營字樣乘浪漂淌船內並無一人等語船隻在洋遭風飄失固屬事所時有但弁兵三十餘人豈竟全行落水斷無不奔岸逃生之理其有登岸之人即可根究飄失情由即或盡數淹斃其屍身亦必有漂浮水面者又何至四路尋覓全無一人撈獲據所奏其中難保無另有別情乘機竄匿等事不可不嚴密訪查切實根究此等事再不能瞞陸地著傳諭伍拉納等嚴飭通省營縣地方官並移咨隣省一體嚴查務得實在下落據實覆奏○禮部題冬至節應行慶賀禮得旨今年冬至次日著停止行禮○以故奉恩將軍德良阿子連祿襲職○壬戌大學士公阿桂議奏據欽差尚書慶桂等將侍衛齊巴克扎布呈控察哈爾總管伊爾庫克扣俸餉苦累兵丁一案審訊得實應將伊勒庫擬斬監候齊巴克扎布降一級留任

仍罰俸一年都統烏爾圖納遜於伊勒庫克扣之處毫無覺察應照例革職其歷任失察各員分別降調得旨伊勒庫依擬應斬著監候秋後處決烏爾圖納遜身為都統於伊勒庫攸扣俸餉不但未留心查辦且特保舉本應照部議革職並革去世職姑念其在乾清門行走有年於此案尚無入己情事伊所有雲騎尉世職係從前打仗出力所得仍著加恩賞留在乾清門二等侍衛上効力行走○諭軍機大臣等都察院奏雲南民人黃相武等呈控州差劉國相等率眾燒搶一案本應特派大臣前往審訊因雲南距京遙遠而黃相武等並未經在該省上司衙門申訴是以不復派員前往仍交該督撫審辦向來各省督撫於本省控案往往因一經審實屬員即有處分意存袒庇此係特交之件該督撫斷不可稍存迴護此案如黃相武等所控屬實則劉國相以州差膽敢率領多人私挾平民

甚至焚燒房屋。搶奪妻女什物。大千法紀。不可不嚴加懲治。但黃相武充當牌頭鄉約。亦恐非良善。或伊等另有犯案之處。因而架詞。聳聽。亦未可定。其刁風更不可長。總之黃相武所控焚搶情事。其虛實無難一驗而得。如勘明房屋人口俱在。其証控即屬顯然。若果被焚搶。是所控得實。自應為之徹底根究。現在黃相武等已交部照例解往。到滇尚需時日。著傳諭富綱譚尚忠。或於伊二人中的擬一人親赴該處。或派誠實可信道府大員前往。詳細查驗。並提集卷證。先行嚴訊。一俟黃相武等解到。即可質訊明確。定擬具奏。富綱等不可意存袒護。致將來別經發覺。自干重戾也。將此由六百里諭令知之。○又諭本年直隸保定河間天津順天等府屬各州縣。因夏秋雨水較多。河流漲發。田禾被淹。致成偏災。江蘇徐州淮安等府屬各州縣。安徽鳳陽府屬宿州靈璧二州縣。並泗州。均因黃流漫

水下注。被淹成災。又河南歸德等府屬永城夏邑安陽臨漳等四縣。秋禾被水成災。湖北荊門潛江江陵監利四州縣。漢水陡發。低窪處所。均被水災。節經降旨。分別賑恤。令該督撫等實力撫卹。毋使一夫失所。第念各該處被災地方。秋成失望。於明春青黃不接之時。民力恐不無拮据。是否應需展賑。並此外勘不成災地畝。應否酌借口糧籽種之處。著傳諭劉綬閔鶚元陳用敷畢沅惠齡梁肯堂。即行體察情形。據實覆奏。候朕於新正酌量加恩降旨。○以翰林院侍讀學士平恕為順天武鄉試正考官。編修朱攸為副考官。○癸亥上幸圓明園。諭軍機大臣等。昨據伍拉納奏。建寧中營黃華山下。創獲廢礮二尊。漳州城守營大藥局內。起獲大小鐵礮二百二十五尊。據該鎮道等查係故明舊礮。又福州興化及連江等營。於五十一二等年報獲大小鐵礮一十六位。現在分別存留銷燬等語。閩省

上年濂澳汛曾有失去礮位。究出弁兵等移取舊礮抵換之事。此次所獲礮位。安知非從前弁兵等私行竊取。恐被查出。藏埋地中。且圍牆山下。何以豫知有礮藏埋其中。或另有捏飾情弊。自須確實查明。若皆係前明舊礮。必有鐫刻年號。可查。況起獲至二百數十尊之多。是否皆係鐵礮。抑其中間有銅礮。俱未據該督分晰奏明。著傳諭伍拉納。將各該處所獲礮位。有無弁兵偷取藏埋等弊。是否皆係前明何代舊礮。及或銅或鐵之處。俱著詳晰覆奏。以便分別辦理。○山東巡撫覺羅長麟奏本年山東收獲豐稔。自六月以來。糧價日平。惟至九月間。有外來商販流通。糧價稍有增長。得旨。增價者。蓋運販直隸者多耳。然於本處無礙乎。○甲子諭。前因各省鄉試中式舉人。人數衆多。距京遠近不一。及至齊集京師。已屬會試之期。是以停止覆試。而順天應試之人。五方輻輳。非外省可比。且俊秀監

生居多。現又查出萬治庭頂名代倩聯號諸弊。業經降旨。以此科為始。順天鄉試榜發後。按名嚴加覆試。但恐此次中式諸生。於未經降旨之先。多有出京回籍者。一時未能趕到。姑再寬期限。於明年二月初一日以前。齊集京師。聽候示期覆試。除實有父母事故。不能赴考。取結報明外。如有託故不到者。明係意存規避。俱著革去舉人。不准與試。以清科場。而示懲儆。○又諭。曰。千總陶起鳳。徐京。吳武仁。於漕船灑帶木植。隱忍諱匿。不行稟報。議以革職。固屬咎所應得。但究由上司抑勒。且係徵求運弁。非道府守備可比。著加恩改為革職留任。其從前叅革之千總程國枚。邱潤黃。祚煥。亦著改為革職留任。嗣後此案內。如有再應議之押運千總。俱著照此辦理。○又諭。浙閩海洋盜犯充斥。正當嚴加懲創。該汛弁等。遇有具報搶劫等案。自應即時詳報。以便據實審辦。乃把總朱雲於事主李茂忠具

報被刦時。尚敢勒令改報失風。實屬有心諱盜。該撫僅擬發往伊犁。不足蔽辜。著交刑部從重定擬。具奏其餘失察各員。弁亦著該部議奏。至琅玕辦理此案。殊屬失之輕縱。並著飭行。○乙丑諭軍機大臣曰。福康安等奏。據洋行商人蔡世文等。兩粵鹽商陳章元等呈稱。明歲恭遇萬壽。慶祝情殷。請敬輸銀三十萬兩。以伸蟻悃等語。粵省洋鹽商人。貿貨行。嚮向來獲利本不及兩淮浙江。明年朕八旬

萬壽。該商等雖懇請効悃。但粵東商務疲乏。正值清釐調劑之際。商力未能充裕。且伊等藉隸嶺海。道路遙遠。亦非兩淮浙江。距京較近。親自來京承辦。設落者可比。所有兩粵洋鹽商人。請輸銀兩。竟不必收。並著福康安等飭令該商。亦不必再行續懇也。將此諭令知之。○又諭曰。奎林等奏。拏獲疊次行刦首夥盜犯。及榜示有名逸匪。審明正法各摺。已批交該部矣。前因奎林等於臺灣搶刦械關之

犯節次拏獲多名。已降旨將奎林等交部議敘。今又能查拏疊次行刦盜犯。並榜示有名逸匪。逐一嚴辦。尚屬認真。臺灣孤懸海外。五方雜處。盜刦械關之風。一時尚未能戢。奎林等仍當加意整飭。實力辦理。遇有不法滋事者。立予嚴懲。以靖海疆。而化頑悍。該鎮道皆係朕特加簡用之人。想不至以已邀甄敘。始勤終怠也。將此傳諭知之。○丙寅諭據福康安奏。查明土田州知州岑宜棟於本年正

月初五日。被賊圍繞。實係受傷陣亡。請旨勅部議卹。並將土田州世職以伊子岑煜係屬庶出。與承襲之例不符。請暫行協理。俟伊孫岑裕塏年已及歲。再行請襲等語。岑宜棟以邊土世職。深明大義。於官兵進討安南。即帶兵助剿。又復策馬陷敵。臨陣捐軀。情殊可憫。該土州前因出力。經前任督臣李侍堯奏明。賞給四品頂帶。著交部即照四品之例。從優議敘。至土田州世職。既據福康安查明。其第

四子岑煜質性醇良不必復拘嫡庶之例著
即令岑煜承襲管理州務但知州係屬五品
今岑宜棟奮勉出力又復陣亡岑煜亦著加
恩賞戴四品頂帶岑煜承襲後若果克繼家
聲始終勤奮出力將來其子承襲時亦准其
戴用如不過循分供職即仍照舊戴知州頂
帶以示朕優恤勤勞一視同仁至意○以故
翰林院五經博士邵心女姪煥襲職○丁卯
和孝固倫公主行初定禮

上御正大光明殿賜皇子王公大臣額駙宴○
諭軍機大臣等昨據德成泰甘省回民新舊
二教每至互生嫌衅蓋因舊教念經須用羊
隻布匹所費較多新教念經僅取贓錢五十
六文小民希圖省費是以願歸新教若令舊
教亦照新教舍多取少恐一時難於更改勢
必陽奉陰違轉致滋生事端等語該省回民
舊教傳習多年嗣因新教從中煽惑輾轉相
傳以致屢有聚眾滋擾之事今據德成泰舊

教念經勢難令其改照新教少取錢文自係
實在情形但不可不密為防範善為勸導使
舊教者知其價錢則不致趨新教或亦一法
總在地方官留心勸導使舊教之人明知此
意亦不可繩之以法也著傳諭勒保等隨時
察訪如可設法化導令舊教舍多取少新教
無從爭競固屬甚善若體察情形驟難更改
亦不必多事紛更止須飭令地方官加意防
閑並著鄉約保甲人等實力稽查倘有無故
糾合人眾夜聚曉散形迹可疑者立即稟明
嚴辦示懲該督撫務須不動聲色杜漸防微
俾新教不致再行滋蔓方為妥善

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十

實錄卷之一千三百四十

文

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲領侍衛內大臣稽察欽奉 上諭事件處管理

總辦官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲領侍衛內大臣加十九級隨帶加二級又加二級臣董誥內大臣戶部尚書總辦滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆五十四年己酉十月戊辰

上還宮。○策試中式武舉劉國慶等四十三人
於太和殿前。○補行福建省乾隆五十二年
大計。罷軟官四員。年老官四員。有疾官六員。
才力不及官六員。處分如例。○己巳。

上御懋勤殿。勾到直隸情實罪犯停決斬犯二
人。絞犯十二人。餘六十七人予勾。○廣西巡
撫孫永清奏據成林等稟稱九月二十三日。
行抵安南嘉橘地方。阮光平遣子光垂率員
目百數十人恭遞阮光平呈文內稱八月在

義安築城。接到檄會。知己封為安南國王。即停工起身。行至東城縣。因病暫留調治。俟稍痊。即趕赴黎城。祇迎恩命等語。又成林稟稱。自出關後。阮光平遣該國文目黎春材等。率領衛士五百名。護從龍亭儀仗。十分整肅。日夕行禮。極其恭敬。諭軍機大臣曰。阮光平聞知天朝遣員恭捧勅書。並御製詩章。前往宣封。該國王即將城工停緩。迅赴黎城。豫備祇迎錫命。是其欣幸感激。實出至誠。現因患病未痊。於途次暫停調理。遣其幼子陪臣等。親來迎候。稟懇展期受封。自屬實情。不必責其改期也。計成林具稟之期。距今已閱兩旬。阮光平病體。此時諒已痊愈。自必趕赴黎城。謁吉受封。著傳諭孫永清。俟成林續有稟報。阮光平於何日前赴黎城。並於何日宣封之處。仍即迅速覆奏。○以故廣西鎮安府上峽土知州許甫子維藩襲職。○庚午。上御紫光閣。閱中式武舉騎射。○諭曰。伊齡阿

本年派辦順天鄉試監臨。有心沽譽。並不認真查察。致有萬治庭頂冒聯號等弊。非尋常疎玩可比。除聽候部議外。不必兼管崇文門。其崇文門稅務。著福長安接管。○軍機大臣議准。兩廣總督公福康安奏稱。粵東地處海疆。若大黃任其出洋。勢必轉入俄羅斯境。瓊州一府。緊接外洋。應准商民等。由省城佛山。每年販賣五百觔往售。官為給票。如無官票。及多買夾帶者。即嚴拏治罪。其西洋各國。每年每國。不得過五百觔。飭令省城洋行。及澳門商人。將售賣大黃數目。並賣與何國夷人。均於洋船啟棹之先。分晰列冊呈繳。南海香山二縣。一面通詳。移行守口文武員弁。按冊稽查。如查有夾帶多買。嚴拏行商通事。從重治罪。仍將大黃變價歸官。於保商夷商名下。各追十倍價銀充公。其暹羅安南二國。遇該國進貢之年。每次准買帶五百觔。俟俄羅斯通市後。仍照常賣運。從之。○辛未。

上御紫光閣閱中式武舉技勇。諭曰：劉戡奏審明殺死三命，並誤傷親父身死重犯，定擬一摺。內稱：王三因疑妻陳氏與胞弟王七有姦，將王七、陳氏及王七之妻趙氏砍斃，並誤傷伊父王奇虎，又壓傷幼女。將王三問擬凌遲，俟命下再行處決等語。王三之妻與胞弟王七並弟婦趙氏對房居住，偶因自外回歸，見伊妻陳氏由王七房內走出，即心疑有姦，雖事屬有因，但逞兇殺死三命，壓斃一命，並誤傷親父身死，倫紀攸關，兇殘已極。此等決不待時之犯，自應一面正法，一面奏聞。乃該督猶復請旨辦理，殊屬拘泥。劉戡著傳旨申飭。王三一犯著即凌遲處死，該部知道。○壬申。

上御太和殿傳臚，賜中式武舉一甲劉國慶、馬承基、陳四安三人。武進士及第：二甲吳三泰等五人。武進士出身：三甲毛秉剛等三十五人。同武進士出身。○諭軍機大臣曰：伍拉納

奏審明閩省各案洋盜，分別正法一摺，已批交該部矣。又另片奏據福州府稟稱：探得陳禮禮、經總兵丁朝雄、參將海亮等，於長樂縣下目洋擒獲等語。所辦姦陳禮禮係在大門洋戕害，參將張殿魁首犯，今既就獲，自應解京盡法處治，以彰國憲而快人心。著伍拉納即派委委員與林明灼一併隔別解京嚴辦。再該犯擒獲時，雖據稱係總兵參將等在下目洋截拏，但必有弁員等幫同下手，並著伍拉納查明如係兵丁首先拏獲，即酌加獎賞。若係都守等所獲，著即送部引見。至陳禮禮一犯，前據伍拉納奏稱：於拒傷張殿魁身死後，在犁洋地方遭風打翻船隻落海等語。曾經降旨，以該犯屍身並未撈獲，是否溺斃，殊難憑信。仍應上緊根緝。今該犯實未身死，現經就獲，果不出朕之所料。但陳禮禮遭風溺斃之語，從前若係地方文武稟報，則是不肯上緊搜捕，有意消彌，如出於夥犯供稱，明係

捏詞開脫。希圖陳禮禮漏網。二者必居一於此。不可不徹底根訊。著傳諭伍拉納琅玕據實查明覆奏。勿得稍有迴護。又諭本日李世傑奏。兇犯陳年富殺死一家三命。於審明後。即恭請王命。凌遲處死等語。自應如此辦理。昨劉綏奏。王三因疑姦殺死三命。歷斃一命。並誤傷其父身死。其情節較陳年富更為兇惡。且誤傷父命。倫紀攸關。乃劉綏猶復拘泥請旨辦理。即此一端。其辦事之不如李世傑。已可概見。昨已降旨申飭。該督能不自愧耶。著將李世傑原摺鈔寄劉綏閱看。將此諭令知之。○癸酉。諭軍機大臣等。據保寧奏。稱土爾扈特車凌德勒克游牧較前充裕。請不必督其耕作。聽自謀生理等語。土爾扈特等歸附之初。因無牲畜。不得已而督其耕作。年來馬畜繁滋。各臻充裕。蒙古習俗。利於牧養。著照所奏。不必督其耕作。聽自謀生。其餘土爾扈特等有請示者。亦照此辦理。兩江總

督書麟等奏。查勘毛城鋪上下外灘一帶。張王莊以北新河。現寬一百八十餘丈。直捷暢順。張王莊以南舊河。轉彎灣曲。水面寬七十餘丈。稍分溜勢。驟難歸併新河。而毛城鋪滾壩。現仍過水四尺餘寸。今外灘漫決之竇。家寨民堰一股。已刷成溝槽。更恐一時未能斷流。若不即為堵截。則來年大汎水發。又致散漫衝刷。於毛城鋪宣洩機宜。漫無節制。必於舊河頭分流處用料堵截。令匯歸新河。即竇家寨溝槽。亦可斷流掛淤。補還民堰。較為易為力。其所需工料。民力不繼。必須官為辦理。應請照乾隆四十年堵築該處丁家集民堰之例。歸豐碣廳來年庫貯覈銷。毋庸另動錢糧。得旨是。如所議行。○甲戌。諭軍機大臣等。廣東提督高瑤。係漢軍人。粵省水陸兼轄。最為緊要。非精明果敢之員。弗克勝任。現在提督高瑤。雖人尚穩妥。但才具畧軟。恐於海洋要地。未能辦理裕如。著傳諭福康。密留心察看。

如該提督於整飭營務緝捕洋盜或有不能勝任之處即行奏聞候朕酌量簡調想福康安自必詳加察覈據實具奏斷不肯稍為袒庇也○又諭曰勒保奏地方情形摺內稱平涼府屬之靜寧等處回民最多傳集該處頭人鄉約等剴切曉諭以新教實為回教之大害現在各村莊老教頭人實力訪察一有見聞即當稟首如實無其人出具連名甘結等語所奏不過敷衍成文並未知新舊教實在情形全不得其要領回民同是一樣經咒初無新舊之分從前馬明心亦不過因曾至葉爾羌喀什噶爾地方學習回經遂在甘肅設立新教其實所念之經與舊教無異近聞舊教念經須用羊隻布匹所費較多而新教念經僅取贖錢五十六文是以窮民願歸新教者較衆此語頗中竅要若地方官留心勸導使舊教舍多取少新教自無從招集或竟能使舊教所取念經錢文更減於新教則小民

希圖省費新教亦自必皆歸舊教其新教不禁而自止矣即如喇嘛所念之經傳自西竺而內地僧人俱以漢音傳習不無舛誤朕節次將大藏經咒俱令照西番譯出不過欲釐正訛舛亦非有意崇尚喇嘛而廢絀僧人也即此可以類推總之新舊教回民皆吾赤子若新教回民果能奉公守法即屬善良又何必官為區別扶舊教而除新教耶若如勒保所奏以新教為回教中之大害其實勒保亦不知其所以為何害也欲令該頭人連名出具甘結仍不過有名無實斷無此辦法足見不實著傳諭該督務須遵照前降諭旨不動聲色使舊教之人知少取錢文則民人自不致競趨新教總在設法化導不可區別新舊之名轉滋倚角也○乙亥

上御懋勤殿勾到朝審情實罪犯停決官犯內斬犯一人絞犯一人常犯內斬犯三人絞犯六人餘十七人予勾○諭軍機大臣曰劉我

奏豫省漕船於十月十五日入境現在咨會東省一體委員接推遇有薄冰即多撥人夫敲擊過行等語本年各省漕船回空較早而河南首幫船隻比之上年入直隸境已早至二十餘日明歲抵通自不虞遲誤現在天氣尚和即遇有薄冰亦不至即行凍阻又何必多撥人夫敲擊若遇寒水厚即敲擊亦不能為力況此項打水夫價豈地方官出貲辦理抑係該旗丁等賠墊耶所奏不過虛詞敷衍殊不確實著傳諭劉綬等如豫省漕船稍有凍阻本年過行較早不妨俟春融冰化後趲程赴通所有雇夫打水之處儘可不必要將此並諭長麟等知之○山東巡撫覺羅長麟奏東省糧價本平茲有外來商販轉運既多本地市價稍形增長在災地得食豐區獲利原係兩有裨益之事但恐奸僧見商販日多乘機囤積希圖日後居奇現飭州縣營員密訪懲治批此慮是然不可露此意反滋居奇

也又稱本年東省漕糧已於十月十九日兌竣開行總可於十一月初一二等日趕出臨清至河南省漕船現准梁肯堂咨稱約於本月十五日兌竣開行不日趲抵東境批亟力整頓漕運竟有起色矣○丙子諭曰尚書胡季堂辦理刑名尚屬認真所有從前停支應得之項嗣後著准其支給○又諭曰伊齡阿汪承霽派辦鄉試監臨並會試知貢舉業已三次朕因伊二人在侍郎中尚能辦事且恐科場外簾監試提調等官承辦日久易滋弊端是以屢次特派伊齡阿汪承霽辦理該侍郎等自必倍加認真釐剔弊竇方為無負委任乃本年順天鄉試竟有頂冒代倩聯號等弊則是伊二人一味邀眾舉子之譽並未實力查察以致士子串通胥役作奸犯科非尋常疎玩者可比其咎實難寬貸現於萬治庭等舞弊一案交部嚴加議處自必予以實降伊齡阿汪承霽俱著先行解任聽候部議所

有兵部侍郎員缺。著明興補授。明興現在出差。其未到任之前。著度禮寶調署。其刑部右侍郎員缺。著玉德補授。韓鏞著調補戶部右侍郎。伊現有應繳漫口官項較多。是以加恩調任。以便坐扣完項。所遺工部侍郎員缺。著張若淳補授。張若淳雖非科甲。但尚謹慎。且係大學士張廷玉之子。特加擢用。以示朕眷念舊臣之意。○以直隸按察使富尼善為安徽布政使。○旌表守正捐軀河南祥符縣民

傅某妻鄭氏。○丁丑。諭海洋會哨。立法綦嚴。該鎮將等訂期會巡洋面。本有一定章程。原不得因偶遇風信。觀望不進。前因護溫州鎮李定國巡洋會哨。因風大難行。停泊小門洋。自應據實報明。乃既未經前往沙角山會哨。復捏叙會哨印文。繞道齎投。朦混捏飾。是以發往伊犁。以示懲儆。但念巡洋會哨。非出兵打仗。機不容緩者可比。若屆期遇有颶風陡發。該鎮將等因恐遲逾程限。身獲重譴。輒冒

險放洋前進。使專閫之員。及將備兵丁。嘗試於暴風巨浪之中。國家政體。亦不忍出此。嗣後各該鎮定期會哨。如實有風大難行。許其據實報明。督撫並令該鎮等。彼此先行知會。即或洋面風大。雖小船亦不能行走。不妨遣弁由陸路繞道札知。以便訂期展限。再行前往。但該督撫等。務須詳加查察。設有藉詞捏飾。即應嚴參治罪。若果係為風所阻。方准改展日期。以示體恤。而崇實政。前聞閩省海面

每遇九月。颶風較多。而江南浙江廣東海洋風信。大畧相同。曾經降旨。令該督撫按照各處洋面風信平順之期。另行會商。酌定月分。不必拘定三月九月會哨。旋據伍拉納等覆奏。海壇金門二鎮。每年三九兩月。於涵頭港會哨之期。因其時風信靡常。並多海霧。改為四八兩月。已如議准行。嗣後自必遵照定期。不致冒險。今復格外加恩。若該鎮將等。恃有此恩旨。遂爾任意託故遲延。或藉詞耽逸。致

誤巡洋要務一經查出必照李定國之例治罪。若該督撫並不留心察訪。輒據該鎮等捏詞稟報。扶同徇隱。亦必一併治罪。斷不能稍為寬貸也。將此通諭知之。○諭軍機大臣等。刑部議駁四川省張亭桂誤傷小功服叔張洪先身死。該督既將張亭桂問擬斬決。復以並非有心干犯。夾簽聲請與例不符。部駁甚是。此案張亭桂係張洪先小功服侄。張亭文即係小功服兄。張亭桂因張洪先疑伊偷竊

桑葉。同子張亭文爭論。追毆該犯。輒行拾石擲打。無論擲傷服叔服兄。倫紀攸關。均應以毆死小功尊屬。按律斬決。不得以並非有意干犯。援請末減也。且石之大小。擲之遠近。傷之輕重。原自不同。該督亦曾詳查乎外省遇有此等案件。州縣刑書。往往意存開脫。李世傑歷練封疆。辦理刑名。素所熟悉。何於此案亦相沿外省習套。並不留心察覈耶。李世傑不應若此。著傳旨申飭。○裁鎮江府水利通

判。移駐桃源。為桃源南岸通判。改江防同知為桃源北岸同知。各專司河務。從兩江總督書麟請也。○以山西歸綏道忠泰為直隸按察使。○予故喀爾喀輔國公丹巴旌準致祭如例。○戊寅。諭滿漢各項考試閱卷大臣。吏禮二部。自應按照衙門通行開列。候朕酌點。若豫先知會各員。聽其自行咨送。再為開列。其情願列名者。安知非意中實有關節之人。希冀入場照應。於考試殊有關係。今吏部請

點考試庫使閱卷大臣單內。所開僅止五人。殊屬非是。嗣後凡遇考試事宜。除實係患病。仍照例扣出外。所有各衙門例應請派閱卷之各堂官。俱著通行開列。聽候點用。此次考試庫使著派常青。鐵保。圖敏。閱卷。○諭軍機大臣等。本日軍機大臣面奏。據海寧報稱。河東鹽商尉世隆等捐銀六萬兩。恭辦慶典。現在委員解京等語。河東商力向來未能充裕。非兩淮浙江可比。且該商等現無赴京承辦

段落之事。尤可不必出貲捐辦。況粵東商人前經籲請輸銀三十萬兩。以伸忱悃。據福康安等奏及朕當經降旨。不准呈進。著傳諭海寧。即將此項銀兩發還各該商收領。亦不必再行懇請也。○又諭朕明春巡幸山東。所有需用車驛。俱係京中豫備帶往。向來蹕路經臨之地。該省多有僱進車驛。在地方官用價購辦。不無多費。而其實所進之驛。率皆徒取飾觀。不能適用。殊屬有名無實。祇滋煩費。著

傳諭長麟。於明歲臨幸之時。毋庸呈進驛頭。以省糜費。倘該撫拘於向例。仍照舊僱進。亦斷不准收也。○調鑲紅旗蒙古副都統鐵保為鑲黃旗蒙古副都統。以內閣學士圖敏為正藍旗蒙古副都統。○旌表守正被戕陝西城固縣民楊升庚妻陳氏。守正捐軀河南汝陽縣民吳某妻董氏。○己卯。諭軍機大臣曰。孫永清奏。接據成林稟稱。阮光平病已稍減。於十月初三日。自義安起程。前赴黎城。約月

半前後。可以趕到。成林等定於二十前。詣吉成禮。並稱有吳文楚等願於明年跟隨阮光平。一同進京叩祝等語。所辦甚好。阮光平。聞知天朝遣員恭齋御詩。勅書前往宣封。即停止城工。迅速趕赴黎城。因途中患病。暫駐義安停留。今該國王病已痊愈。即具呈知照。成林於十月初三日起身。此時自必早抵黎城。宣封成禮。朕心深為欣悅。著傳諭孫永清。速行知照該國王。以國王前因聞知天朝遣員

勅封。克日馳赴黎城途中。偶染微疴。暫留義安調攝。今國王體中痊愈。具呈前來。本部院據情奏聞。大皇帝甚為嘉慰。特賜珊瑚朝珠一盤。御用大荷包一對。小荷包二對。為國王誌欣喜而慶安痊。再該國係新造之邦。諸事正資整飭。經理聞吳文楚乃國王得力之臣。若明歲隨同赴闕。居守無人。於國事殊有關係。吳文楚既情殷瞻就。不妨俟國王於明年祝釐回國後。遇下次進貢之期。再令吳文楚

前來以遂其親仰之忱此係大皇帝格外優恩多方體恤特令本部院傳知國玉務須仰體聖懷永承恩眷也如此詳晰曉諭阮光平自必倍加感激更足以堅其向化之誠此旨著孫永清備文付成林若成林離黎城未遠仍即回面諭該王若已遠則付彼受人持去成林續有稟報阮光平於何日已抵黎城何日宣封即行迅速覆奏將此由六百里傳諭孫永清並諭福康安知之○轉兵部右侍郎

覺羅吉慶為左侍郎工部右侍郎鄒奕孝為左侍郎○庚辰

上御乾清門聽政○以廣東高廉道開嘉言為廣西按察使○辛巳諭理藩院蒙古郎中向無調補銀庫郎中之例軍機章京台布行走有年辦事甚為出力著加恩調補戶部銀庫郎中內閣中書趙秉洵現已俸滿以主事用尚未得缺該員在懋勤殿行走年久頗為勤慎著加恩以戶部主事補用以示鼓勵○諭

軍機大臣曰畢沅等奏審擬劉詩勝遣僕赴京呈控負屈不實一摺已批交該部議奏矣至所稱劉詩勝本係好訟劣監前因詐欺胡李氏錢文被縣拏究挾嫌上控已經定擬充軍因患病尚未起解復遣僕赴京妄訴等語劉詩勝既因侵匿胡李氏贓錢捏告挾制經該督撫審明問擬發極邊烟瘴充軍於接准部咨後自應即行起解乃事隔經年猶任該犯捏病耽延在籍逗留以致復遣家人鄧發

貴赴京控告畢沅惠齡於此事殊屬疎懈俱著傳旨申飭若該督等早將該犯起解何至又有潰控之事可見外省督撫等於發遣要犯並不督飭所屬迅速辦理嗣後遇有此等遣犯接准部覆後務須飭屬即為起解毋使捏病逗留滋生事端○調閩粵南澳鎮總兵陸廷柱為廣東雷瓊鎮總兵廣東左翼鎮總兵魏大斌為南澳鎮總兵以浙江候補水師總兵陳蔭為廣東左翼鎮總兵○壬午

上詣

奉先殿

壽皇殿行禮。○諭曰。福康安奏粵省駐防綠營兵丁紅白銀兩。遞年支放共溢額銀二萬四千四百餘兩。請設法酌減支放。分年籌補歸款等語。兵丁賞項。經費有常。原不應逾額多支。遞年短絀。第念粵省駐防綠營兵丁。前因時疫盛行。兵屬事故較多。賞項增於往歲。以致節省餉銀不敷撥用。且進勘臺灣。該兵丁等尚屬出力。自當格外加恩。以示體卹。所有此次溢額銀二萬四千四百二十七兩。俱著全行賞給。不必扣減歸款。○諭軍機大臣曰。梁肯堂奏劉種之在學政任內。場規整肅。士子安靜。細訪考試事宜。亦無非議等語。前因學政按考地方。俱係督撫所轄。耳目甚近。無難訪查確實。遇有貪污劣蹟。令該督撫指名糾參。原欲嚴考成而肅功令。乃歷來各督撫於學政任滿回京者。率以考試無弊聲名尚

好具奏。從無一省舉其劣蹟者。如果學政皆屬公慎之員。無可非議。何以謝墉吳玉綸徐立綱等。聲名狼籍。督撫等並無一言奏劾。及朕有所聞。降旨嚴切詢問。始行據實陳明。先後破露。可見各督撫於學政任滿及年終彙奏。俱意存見好干譽。不肯據實直陳。殊非朕慎重覈實之意。著傳諭各督撫。嗣後務須將學政考試。實在有無弊實。及士子輿論。是否翕服之處。據實詳細奏聞。毋得稍有瞻徇。若學政中再有如謝墉等之聲名狼籍。該督撫不為舉劾。一經發覺。必將徇隱之督撫。一併治罪。決不寬貸也。○是月。原任大學士蔡新奏。臣陛辭以後。已經四載。慶際八旬萬壽之年。冀赴京祝釐。以慰茲生大願。謹擬春夏之交。從水道緩行。亦不致過為勞頓。得旨欣慰。覽之既喜。相見之近。復慮跋涉之勞。體朕此心。不可勉強。所謂適百里者年九十也。近作發去數篇看。○河東河道總督李

奉翰等奏。勘估南旺之分水口塘河。劉老口長河。濟寧塘河。彭口塘河。共應挑土八萬九十四方。需募夫銀。請照例動支發給。臣等查照成法。按段逐時量驗。務使河底一律平坦。以備來年重運經行。得旨。以實為之。勿令屬員滋弊。

實錄卷一百一十五

五

大清高宗法天隆運至誠先覺體元立極敷文奮武孝慈神聖純皇帝實錄卷之一千三百四十一

大清高宗法天隆運至誠先覺體元立極敷文奮武孝慈神聖純皇帝實錄卷之一千三百四十二
監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理 吏部理藩院事務兼理滿洲都統世襲騎都尉軍功加七級隨帶加一級奉常加二級軍功紀錄一次臣等謹將 總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務 世襲騎都尉軍功加九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次 奉常紀錄十四次臣等謹將經筵講官太子少保工部尚書紀錄六次臣等謹將纂修等奉

校修

乾隆五十四年己酉十一月癸未朔諭軍機

大臣曰海寧奏審擬忻州民人李承光等呈控該州管門長隨祁三短發錢文誣騙銀兩將祁三問擬發遣一摺所辦甚屬錯誤各衙門幕友書吏家人長隨往往藉端誣騙滋事受財情節最為可惡一經發覺必須嚴行治罪方足以示懲儆今祁三因李承光以銀價加長鋪戶不能獲利商同各鋪湊銀四百三十兩求增錢價祁三收受既不能為之辦理又不將銀退還以致李承光情急控告是祁

三以管門長隨。膽敢誣受財物。至四百三十兩之多。賊已逾貫。非尋常受賄者可比。若將該犯問擬發遣。則該州業以失於覺察。連累獲咎。而該犯不過發往近邊。轉得置身事外。且此等不安本分之徒。到配後。又安知不復行詭詐。別生事端。海寧所擬實屬不知律法。失於寬縱。此中幸無人命。若有人命。當立決無人命。亦當監候。除將原摺就近交刑部。照舊役詐贓例。另行從重定擬外。海寧著傳旨申飭。○山東巡撫覺羅長麟等奏。豫省重運漕船。現俱趕赴臨清。東省各幫船。亦趲出臨清閘外。連日河水漸結。中溜猶有暢流。惟兩省漕船。同時並集。必致攬越爭先。運員亦難照料。若同在臨清守凍。兩省舵工水手。人數衆多。火燭偷竊等事。兵役彈壓匪易。臣等酌議。東省漕船。暫泊停讓。倘致氷結。即於該處守凍。河南漕船。儘可乘時趲至德州。分處守凍。既免氷泮時爭開擁擠。亦於巡防約束。更

昭慎重。得旨嘉獎。○甲申。遣官祭先醫之神。○諭朕明春恭謁兩陵。巡幸山東。並親詣曲阜。祇謁孔林。於二月初八日啟鑾。所有一應事宜。著各該衙門照例豫備。○又諭禮部。按例題耕藉。所謂具文而已。朕臨御以來。恭遇郊廟大祀。無不祇肅躬親。即中祀之禮。亦嘗親行。而耕藉則不啻數十次矣。仰荷上蒼眷佑。列祖鴻庥。春秋日高。精神強健。明歲又屆八旬。是以一切中祀典禮。如先農朝日夕月等壇。俱於八旬以前兩年內。以次親祭一週。即今春亦曾耕藉矣。至於八旬後恭遇南郊。

北郊

太廟祫祭大祀仍當歲歲躬親以及歸政之年始終勿懈若此六年內筋力設有不逮未克躬親鉅典朕亦不敢或有勉強稍滋隕越臨時自有旨其餘

中祀及耕耤之禮若復仍事親行轉非體天勅躬保養精神或有類於矯枉沽譽不肯為也即如木蘭秋獮朕恪遵

家法四十餘次無不控騎行圍今秋圍場仍乘

騎而行至明年八月以後則理宜頤養起居

擬勿策馬而今歲仍必舉行者亦猶

中祀親祭一週之意也嗣後凡遇

中祀耕耤著禮部即於本內奏請遣官行禮

其應否親詣之處不必聲明請旨矣若

太廟時享及致祭

社

稷壇仍著內閣將親詣遣官之處雙簽呈覽候朕臨時酌量降旨庶鉅典不尚虛文而祀禮

益昭誠恪其每年經筵講學從容坐論原不

勞筋力較衛武公之年尚少十歲歸政以前

仍應照舊舉行以示始終典學至意○諭軍

機大臣等據保成奏請陛見一摺已批令來

京矣其貴州提督印務著古州鎮總兵馬詔

蛟署理古州地方緊要保成可將提督印篆

遣員齎送該鎮馬詔蛟即在古州接受任事

不必前赴安順也將此諭知保成並傳諭馬

詔蛟知之○四川提督成德奏已勒布貢使

經過各土司地方禮貌極恭恭敬而各土司

素奉佛教見官兵赴藏凱旋遠夷來歸接替

應付夫馬莫不踴躍輸將茲於十月初十日

抵打箭鑪城酌將各土司予以賞賚均極感

戴歡欣再臣帶有兩金川屯練三十餘名隨

同行走甚屬安靜亦已量為賞給派令員弁

帶由章谷一路就近各回本處得旨嘉獎○

是日起

上以冬至祀

天於

園丘齋戒三日。乙酉諭軍機大臣曰富綱等
奏。前署昭通府事永北同知謝洪恩。豫發
京銅運腳銀四千二百餘兩。現在飭查無著。
該員既違例濫放。又不即時賠補。請將謝洪
恩革職嚴審。並分咨原籍安徽。及遷居之湖
北浙江。各省查封家產。一體備抵等語。已將
謝洪恩革職。交該督撫嚴審定擬具奏矣。謝
洪恩向任直隸州縣。朕知其不過小有才具。
本非實心辦事之員。今在滇省濫發運腳無
著銀。至四千餘兩之多。其有無侵那情弊。必
須徹底根究。嚴行辦理。且該員原籍安徽歙
縣。遷居湖北漢陽。現又移居浙江嘉善。遷徙
無定。輾轉搬移。安知非因有侵蝕官項。恐被
發覺。豫為隱匿地步。不可不從嚴查辦。著傳
諭富綱。譚尚忠將該員任所貲財。嚴密查封
外。並著陳用敷惠齡琅玕於該員原籍寄籍
處所家產。一體查封備抵。毋任有絲毫偷漏。

寄頓情弊。○又諭曰孫永清奏據成林稟報
阮光平於十月十四日至黎城。誦吉十五日
宣旨錫封。阮光平感忭出於至誠。來年三月
間。親自進京叩祝。先遣陪臣等隨同成林進
關。謝恩進貢。現在太平南寧一帶。稍為停待。
俟奉到諭旨遵辦。其年例應進貢物。循照向
例。派員護送赴京等語。阮光平祇受封爵。得
備藩封。其歡忭感激忱悃。出於至誠。呈進謝
恩貢物。自應賞收。所遣陪臣人等。現已隨同
成林等進關。亦應准其進京。著傳諭福康喀
孫永清。即行派委妥員護送。迅速赴京。務於
年底趕到。俾得與巴勒布。暹羅等國使臣。同
與朝正盛典。以遂其覲仰之誠。即或計算程
期。趕行不及。亦須於明歲燈節前到京。庶可
與各外藩蒙古等。一同入宴。恩加賞賚。仰沐
寵榮也。其呈進年例貢物。陪臣等。亦著與謝
恩進表貢使。一同進京。○又諭曰阮光平。承
受天朝封爵。鎮撫夷邦。其感忭實出至誠。所

有呈進貢物。已諭知福康安。孫永清傳旨賞收。其陪臣人等。自應准其赴京瞻覲。前因阮光平之姪阮光顯入覲時。經過沿途地方。該督撫賞給未免過優。曾經降旨。諭知該督撫等。於阮光顯回國時。祇須供頓無缺。不必過事繁費。此次安南陪臣等齎貢進京。若各督撫拘泥前旨。概不量為賞給。恐陪臣等。檢知阮光顯既邀優賚。而伊等未得一律均霑。厚薄懸殊。轉非體卹懷柔之意。著傳諭各督撫。於該陪臣等到境時。所有應行賞給物件。較之阮光顯酌量減半。並詳悉告以阮光顯係爾國王親姪。故赴京時。沿途賞賚加優。爾等係屬陪臣。分位不同。天朝體制。自有區別。是以賞給稍減。並著飭知伴送委員。及各該地方官。一切夫馬。務須豫為備辦。俟該陪臣入境。即妥為照料。按程迅速。遑行不可稍有耽延。務於年內到京。即或趕行不及。亦須於燈節前抵京。毋得遲誤。○戶部議覆兩江總督

書麟等奏稱。江西漕船行月二糧。向俱全支折色。買食不敷。請將該省徵給船戶水腳。並縣倉扒夫等項銀米減半。節省銀一萬二千零米一萬九千二百石零。分給十三幫。以為增補行月之用。其軍船積欠通濟長蘆及糧道各庫銀十四萬八千兩。請於江西藩庫閒款內。動借銀十萬兩。先還通濟長蘆等庫項。以應支放。仍將前動借各項銀十四萬八千兩。併為一款。分作十年。按船扣還。至各丁屯田地方。間有錯入江南等縣境內。請將屯坐本管地方者。限以一年。分隸別府州縣者。限以二年。責成該管府州縣衛。細查報部。如有私典之田。另行設法議贖。此後再有私相典當。治以盜賣之罪。均應如所請。得旨依議。速行。○以四川督標中軍副將諸神保。為重慶鎮總兵。○丙戌

上諭
南郊齋宮齋宿。○諭曰。陳用敷奏。安徽省江北

各屬連年俱被偏災。舊欠銀米業經分別遞緩催徵。本年宿州靈璧等處。因黃水漫注。又被偏災。除被水各州縣外。其餘各處尚屬有收。惟所欠各款錢糧。及隨漕銀米等項。連年積壓。為數較多。同時並徵。民力不無拮据等語。安省鳳潁等屬。本有積欠銀米。本年宿州靈璧等州縣。又被黃水偏災。雖該處亦有秋收成熟地方。但積欠既多。若同時新舊並徵。閭閻生計。不無竭蹶。所有本年秋收成熟之懷寧。無為。廬江。巢縣。定遠。壽州。鳳臺等七州縣。積欠地丁。隨漕及借給籽種口糧等項。應徵銀米。著加恩自五十四年起。分限四年帶徵。其被災歉收之宿州靈璧。泗州。盱眙。五河。鳳陽。懷遠。霍邱。亳州。蒙城。太和等十一州縣。及鳳陽。長淮。泗州。三衛。積欠各銀米。竟予寬免。以副朕軫念民依有加無已之至意。該部即遵諭行。又諭據孫永清奏。成林到黎城。後詠吉於十月十五日宣旨。錫封阮光平為

安南國王。該國王祇受恩命。感忭情形。實屬至誠流露。定於來年三月間。親自進京。恭祝萬壽。現具表文。並謝恩貢品一分。又本年例貢一分。恭遣陪臣呈進等語。阮光平祇受封爵。備位藩封。仰藉寵榮。鎮撫該國。其恪恭感戴忱悃。出於至誠。情願趨赴闕廷。謝恩祝嘏。並於例貢之外。復進謝恩貢品。實屬恭順可嘉。但念該國王造邦伊始。兩貢同時並進。未免太費其力。今貢品業已進關。若不一併賞收。轉恐阻其向化之誠。著加恩將本年例貢。留抵下次正貢。用示體恤。至該國王已受封爵。亦係天朝臣子。與陪臣貢使不同。明歲來京瞻覲。經過沿途各省地方。與各督撫接見。自應以賓主之禮相待。所有一應接見儀注。著大學士會同禮部。詳悉酌議具奏。即行頒示。該國遵行。并賜詩一律。以示朕格外優眷文獻之邦至意。御製詩曰。孚意君臣事不難。誠肫那藉設盟壇。

來朝北闕親而近弗異南邦衣與冠班接諸王鄰雁列筵開八月享難寒賢藩貢悃殊侍御紀實聊憑信史看○諭軍機大臣等昨孫永清奏安南國王阮光平恭遣陪臣等齎進隨表謝恩及年例貢品既於十月十七日進關孫永清若即派員護送起程計距年底尚有七十餘日儘可按程趕到乃該撫轉令在太平南寧一帶稍為停待恭候諭旨遵行孫永清不應如此拘泥糊塗昨降諭旨係由六百里加緊發往計本月初十外可以接奉彼時該撫即照料起身至年底尚有五十日若沿途趨程行走尚可趕到並告以爾等如能於年底到京即可於元旦令辰與巴勒布達羅等國共與朝正盛典該陪臣等係屬外藩夷使俾得瞻仰朝會禮儀欣觀生平所未見自必踴躍遙行即程期迫促亦所樂從若歲內竟實不能趕到亦不必勉強但當於明歲燈節前到京庶可與外藩蒙古等一同入宴

倘遲至燈節以後則宴費已過豈有因安南陪臣復舉行筵宴之理該撫自應早計及此著再傳諭孫永清務須飭知伴送委員加緊行走並知照經過各地方一切夫馬豫為妥備以便迅速遙行年內到京即或趨行不及必須於燈節前抵京不可稍有遲誤至前次護送阮光顯之副將德克精額道員湯雄業沿途照料頗為妥協且該二員本缺現俱有人署理此次仍著伊等護送貢使進京自必更為熟練毋庸另委他員致易生手也將此由六百里加緊再行傳諭孫永清並諭福康安知之○丁亥冬至祀天於園丘上親詣行禮○遣官祭永陵福陵昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○大學士公阿桂等議奏

直省總督巡撫接見安南國王之禮賓至轅

門從官啟辭執事官轉啟賓乘輿至大堂督

撫延賓於大堂上賓西面主人東面賓行一

跪三叩禮主人答拜興賓東主人西升階各

就坐安南從官階下北面向上行一跪三叩

禮興執事官獻茶賓受茶揖主人答飲訖令

通事傳語慰問致辭畢從官下跪一叩先退

賓離席一叩辭主人答興降階送賓升輿退

司道以下各官接見俱用賓主禮直省總督

巡撫筵宴安南國王之禮總督巡撫主席在

省之文武大小各官咸赴陪宴賓席西向主

人席東向均專席北上安南從官席檻外檐

下及露臺左間稍後咸共席賓至主人迎入

行禮序坐如相見儀既入坐從官就檻外行

一跪三叩禮各入坐宴畢從官謝宴行禮先

出各行禮出席賓辭出送如迎禮得旨允行

尋諭軍機大臣曰安南國王阮光平明年三

月來京瞻覲經過沿途各省地方與督撫接

見自應以賓主之禮相待昨經降旨令大學

士會同禮部詳悉酌議並親製詩章以賜用

昭優眷文獻之邦至意茲據大學士等將相

見禮儀詳議具奏已依議行矣著將昨降明

發諭旨及所定儀注并御製詩章一併發交

孫永清令該撫遵委妥員將詩章儀注齎至

鎮南關即交該國鎮目恭齎轉交該國王祇

領並告以此次御賜詩章及頒定儀注天朝

未經派員齎往之故誠恐爾國王又須豫備

供頓祇迎不無繁費此係大皇帝格外體卹

之意爾鎮目當轉稟國王仰承優眷如此詳
悉諭知俾該國王益深感激以堅向化之誠
將此由六百里傳諭孫永清並諭福康安知
之○戊子諭本日吏部將四川省八年俸滿
之川北道明岑帶領引見朕看其年力已衰
不勝道員之任乃該督李世傑咨送文內尚
出具老成端謹辦事實心考語豈該督於屬
員衰邁情形竟無聞見從前大計時既不據
實叅劾復為出具籠統考語顯屬意存干譽
李世傑向來辦事尚知認真不應出此除將
明安以部屬改補外李世傑著交部嚴加議
處○又諭前因明陵修葺工竣每年令工部
奏派堂官一員前往查勘茲據阿彌達查奏
明陵各處殿宇尚屬整齊潔淨惟牆垣紅灰
及門扇油飾間有脫落請將霸昌道同興交
部議處等語明陵牆垣門扇灰飾間有脫落
自係風雨損壞該道未及隨時修理祇須罰
令賠修免其交部議處嗣後派往查勘之工

部堂官著三年奏派一次○又諭旨奎林等
奏拏獲結會匪犯審明分別正法及審擬汎
弁兵丁得贓縱放偷越船隻各摺已交該部
覈議速奏矣臺灣搶劫械鬪之案本年節經
奎林等拏獲多犯逐次嚴懲前已交部議敘
今於李効等犯創立邀會名目糾眾煽惑一
案該鎮等一經稟聞即迅速查拏就獲訊出
實情立予正法辦理甚為妥速奎林萬鍾傑
著再交部議敘其會同訪拏出力之文武員
弁著該鎮等查明咨部一併議敘○諭軍機
大臣等前據孫永清奏成林在黎城宣封後
於十月十七日起程進關等語成林前往黎
城宣旨錫封該國王感激歡忭及安南一切
風土人情自必目擊朕欲面為詢問較之該
撫據稟轉奏情形更為親切著傳諭孫永清
於成林進關後即令其迅速馳驛來京以備
垂詢○己丑諭軍機大臣等據保泰奏杜爾
伯特汗瑪克蘇爾扎布貝勒巴桑土爾扈特

郡王舍拔。貝子沙喇扣肯。俱各呈請。情願明年來京叩祝萬壽。瑪克蘇爾扎布。舍拔。色桑。俱未出痘。請令伊等與輪應木蘭班次之烏梁海等。一同遣赴熱河。沙喇扣肯。業經出痘。請令赴京等語。瑪克蘇爾扎布等情願前來叩祝。足見忱悃。即照所請。准其前來。將此因事之便。令伊等與輪應明年木蘭班次之烏梁海等。一同酌於明年七月初五日以前。可抵熱河。量期起程。沙喇扣肯。雖已出痘。僅止一人。不必到京。著同瑪克蘇爾扎布等。齊赴熱河。○吏部議奏。江西新城。瀘溪。浮梁。德興。安仁等五縣。派文武員弁。水陸巡緝私鹽。應明定功過條例。其多銷引一分以上者。紀錄一次。二分以上者。紀錄二次。三分以上者。紀錄三次。四分以上者。加一級。五分以上者。加二級。數多者。以次遞加。其短銷不及一分者。罰俸六個月。一分以上者。罰俸一年。二分三分者。降一級留任。四分。五分者。降一級調用。

六分以上者。降二級調用。七分者。降三級調用。七分以上。未及八分。及八分以上者。俱革職。從之。○兵部議准。廣東學政關槐奏。稱廣州府新寧縣客籍額。取進文童二名。武童一名。查近年考試武童。人數多少不等。請照廣東商籍童生之例。十名取進一名。未滿十名。不得濫取。或人數增多至十名之外。仍照原額。不得加添。至童生例。非廩生保結。不得入場。原議客籍生員。不准撥給廩增。赴考文武童生。由教官保送。恐平時不相認識。臨時難以稽查。應即令客籍附生。照例出保。從之。○旌表守正捐軀河南安陽縣民李明理妻王氏。○庚寅。諭。朕紹膺丕緒。仰荷天祖垂庥。康強逢吉。明年為朕八旬壽辰。數天臚慶。諸皇子。稟承家法。孝道克循。朕與和親王。從前在藩邸時。曾以皇子受封親王。今諸皇子年齒已長。允宜式遵

成憲錫授親藩。用昭慈眷。皇六子永瑤著晉封為質親王。皇十一子永瑒著封為成親王。皇十五子琰著封為嘉親王。皇十七子永璿著封為貝勒。其皇十一子以下俱著仍在內廷居住。暫緩分府。所有冊封一切應行典禮著宗人府會同各該衙門查例具奏。○又諭明歲係朕八旬萬壽。皇子公主等各有所需之項。著施恩。皇六子。皇八子。皇十一子。皇十五子。皇十七子。和敬公主。和孝公主。綿恩阿哥。各賞銀五千兩。綿億阿哥。綿惠阿哥。綿懿阿哥。各賞銀二千兩。俱由寧壽宮支領。○諭軍機大臣曰。福康安奏黎維祗潛匿安南保樂地方。被阮光平殺敗潰逃。一月以來未據探有下落。如果叩邊內擾。當與黎維祗一同安插等語。黎維祗係黎姓支子。在安南地方尚與宗黨舊臣糾聚。與阮光平爭鬪。原可置之度外。因思黎維祗曾為國王。現在桂林省城安插。究仍密邇安南。恐其舊時臣庶假以

為名。又致滋生事端。阮光平亦恐因此心存疑慮。且黎維祗柔懦無能。不克自振。投回內地。本無大罪。若竟齒於齊民。亦非朕興滅繼絕之意。應令黎維祗率同屬下人戶。全行來京。歸入漢軍旗下。編一佐領。即令黎維祗為世管佐領。黎維祗既有官職承襲。所屬人戶皆得食錢糧生聚。亦可以出仕伊等自屬樂從。著傳諭福康安。即行詳加酌覈。將黎維祗等及伊屬下之人。在各府安插者。分起送京。編隸旗籍。用示朕格外矜恤至意。至黎維祗若窮蹙內投。亦著一併送京。庶使阮光平聞知黎氏支屬。全已來京。不致復留後患。自當倍加感激也。將此各諭令知之。○以故多羅果簡郡王永璿子綿從承襲多羅貝勒。辛卯。諭文淵。文源。文津三閣四庫全書。前已派員逐分校閱。將錯誤處所。詳晰簽改。至文溯閣全書一分。現在應往盛京。原勘之陸錫熊等。業已差滿。俟到齊。即行前往校辦。其管要

二分。尚未重加校正。著派懋勤殿翰林會同紀昀悉心勘校。以期並臻完善。○諭軍機大臣曰。畢沅奏。建築郝穴鎮。碎石壩工。及潛江縣易家拐補築隄。膝一摺。江流浩瀚。向無施工之事。而沿江一帶。隄膝。百有餘年。並未有工。即云此項工程。例係民修。但既借帑墊辦。仍須按糧攤派。小民生計有常。豈能於額徵之外。復有增加。且江隄工作。此次既令民為經理。立有成規。則每年必須循例歲修。所有工價錢糧。雖據奏公舉誠實紳耆專司收放。但督率稽查。仍不能不假手於官吏。其中難保無勒索剋剋之弊。是衛民之事。轉以累民。殊非惠愛閭閻之意。此次畢沅所奏。應修各工。既為保護郝穴鎮市。及江陵等縣城垣。起見。著交軍機大臣。速議外。嗣後沿江一帶。隄膝。倘有實在關係民生。應行修防。各要工。方准據實奏明。候旨遵辦。其無關緊要者。不得藉詞民為捐修。濫添工作。以啟官吏派累浮

銷之弊。將此傳諭知之。○壬辰。諭軍機大臣等。前因黎維祁曾為國王。在桂林省城安撫。密邇安南。恐其舊時臣庶。假名滋事。業經降旨。將黎維祁及伊屬下人戶。全行來京。歸入漢軍。令為世管佐領矣。黎維祁怯懦無能。棄國投回內地。已等齊民之列。今復加恩賞給官職。子孫得以世世承襲。而其屬下人等。得食錢糧。伊等自必倍加感激。踴躍樂從。而阮光平聞知。更可不生疑慮。著傳諭福康安等。遇便照會該國王。以黎氏世有安南。歷年已久。黎維祁雖不能振作。棄印投歸。但其支庶臣民。心懷疑貳者。聞黎維祁尚在桂林。未免藉以為名。糾聚煽動。此時國王已受天朝封爵。鎮撫夷民。自不慮其滋擾。然新造之邦。一時不能綏靖。未免又勞區畫。今大皇帝曲加體卹。恐黎維祁在桂林居住。其國中支屬。藉端滋事。特令黎維祁及伊屬下在粵西居住者。全行來京入旗。授以佐領之職。至黎維祁

現在高平。糾約尋釁。若其窮蹙內投。亦當照
黎維祁之例。一體送京安置。國王撫有安南
全境。永無後患。此大皇帝格外恩施。無微不至。
國王當益矢恭誠。仰承渥眷。如此詳悉知
照。阮光平自必倍加感激歡忭。更堅其向化
之誠也。○癸巳。

上詣

雍和宮行禮。○諭曰。李世傑奏本年夏秋以後
脾氣失調。步履益覺重滯。較之五十一年患

病之時。更為衰憊。若復勉強供職。必致貽誤
地方。懇請解任調理等語。李世傑久任封圻。
實心辦事。茲因患病。一時未能就痊。自應准
其解任。並著加恩。派乾清門侍衛慶成。帶同
御醫胡增。馳驛前往診視。俾得加意調理。以
冀速愈。其四川總督員缺。著孫士毅馳驛前
往署理。所有兵部尚書事務。仍著彭元瑞兼
署。○諭軍機大臣曰。李世傑奏本年夏秋以
後。脾氣失調。步履重滯。兼以目眩頭暈。較五

十一年患病之時。更為衰憊。懇請解任調理
等語。李世傑老成歷練。久任封圻。今以患病
未能即愈。奏請解任。朕心甚為廕念。現已降
旨。令孫士毅馳驛前往暫行署理。並著乾清
門侍衛慶成。帶領御醫胡增。馳驛前往診視。
俾得安心調養。迅速就痊。該督自調任兩江
陞見後。已逾三載。未經入覲。該督自揣病體
如可支持。於交印後起身來京。緩程行走。朕
欲面為垂問。或令署理尚書。俟病痊後再回

川督之任。亦無不可。若病勢尚未輕減。難勝
長途勞頓。亦不必定於來京。川省距該督貴
州原籍較近。即就近回籍調攝。以冀速痊。後
來京。總當遵諭。不必勉強。著傳諭李世傑。於
接奉後。自行酌量。據實奏聞。並將近日是否
畧痊之處。一併具奏。以慰廕注。尋奏。臣一月
以來。兩腿麻木不仁。步履益為踈蹢。倘診視
調理。竟得精神漸復。自當緩程赴京。不敢稍
有勉強。得旨。甚望即得痊可。然不必勉強。想

御醫已到近況如何。○甲午軍機大臣議奏。據湖廣總督畢沅奏稱。江陵縣郝穴鎮地方。居萬城隍下游。緊臨大江。該處舊有沙洲。江溜漸趨北岸。今許仙觀對岸。新長於洲。江流大溜。緊走北岸埽灣。東岸日見塌進。較為著重。恐江流北趨。鎮市有衝刷之患。實非建築磯嘴石壩一座。斜向東南順溜進。做不能得力。至新洲尚係嫩沙。趁此水枯之時。於洲尾開挖引渠一道。挑溜刷沙。即於碎石壩工內。撈節挑辦。毋庸另行籌款。自應均如該督所奏。趕緊興修。又稱襄陽老隄。應築碎石護隄。約須碎石八九千方。業經奏明。於本款籌備銀內支用。毋庸另行動項。外現因老龍隄對岸。長有砂礫。以致大溜生成頂衝。今年八月中。是段復衝。姓一百數十丈。並應歸歲修案內辦理。亦應如所請。至所稱潛江縣易家拐地方。應行補築隄塍之處。應令該督另行確勘。如係必須修防要工。再行據實奏請。

倘不過偶有衝刷。無關緊要。不得藉詞民修。濫添工作。以啟官吏派累浮冒之弊。從之。○旌表守正捐軀直隸開州民王某妻廉氏。○乙未。聖祖仁皇帝忌辰。遣官祭景陵。上詣奉先殿。壽皇殿行禮。○丙申。上御乾清門聽政。○丁酉。諭軍機大臣曰。伊桑阿等奏。哈密郡王品級貝勒額爾德錫爾。懇請明年來京。叩祝萬壽等語。額爾德錫爾。懇請來京。叩祝萬壽。足見忱悃。應照所請。令其前來。著寄諭伊桑阿。傳諭額爾德錫爾。令其於明年八月初旬。與年班伯克一同來京。○以陝西布政使額勒春。為貴州巡撫。甘肅布政使福寧。為陝西布政使。山西按察使蔣兆奎。為甘肅布政使。陝西督糧道顧長綾。為山

西按察使。

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十二

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十三

監修總裁官總纂纂官太子太傅文淵閣大學士劉世明領事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級尋常加一級尋常加二級軍功紀錄一次臣慶桂
總裁官總纂纂官太子太傅大學士文淵閣領事稽察欽奉 上諭事件處管理刑部戶部工部事務
世襲騎都尉軍功加十九級尋常加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛總纂纂官太子少保工部尚書紀錄六次臣曹振鏞等奉

纂修

乾隆五十四年己酉十一月戊戌諭據嵩椿

等奏盛京等五城連年被災所有本年借支
倉穀請展限追繳等語盛京等五城連年被
災其本年春季借支倉穀若仍令展限繳完
兵力仍不無拮据所有盛京遼陽廣寧岫巖
復州兵丁領借倉穀一萬九千五百五十四
石並著加恩寬免以示體卹○又諭曰孫永
清奏據署東蘭州知州黃圖稟報該州安插
福建臺灣案內股頭鄭管陳廷三名於本年
八月二十二日與派犯周亞卿同逃當差兵

役追拏。見該犯等乘坐小船順流而下。兵役等趕上。拏獲周亞卿一名。其鄭管陳廷持篙拒捕。被兵役打落水中。現在撈捕無獲。生死未定。請將東蘭州吏目繆晉階革職。拏問。署知州黃圖。革審等語。臺灣股頭。皆係從賊。匪徒因投首免死。安插各省。地方官遇有此等人犯。該撫等自應諄飭所屬。時刻留心。嚴加防範。不容稍有疎縱。今鄭管等膽敢勾同流犯結伴同逃。殊屬不法。該管官平日既不能嚴行管束。致匪犯脫逃。及追捕時。又不能即時擒獲。打落水中。復未撈獲屍身。安知非受賄縱放。裝點情節。希圖了事。若不從嚴懲治。無以示儆。東蘭州吏目繆晉階。著革職。拏問。署知州黃圖。僅予革職。不足蔽辜。著一併革職。拏問。其該管道府。並不隨時稽查。漫無管束。非尋常玩忽可比。著交部嚴加議處。至巡撫臬司。不能先事督飭所屬。防範匪徒。咎亦難辭。亦著交部議處。所有鄭管陳廷三犯。著

該撫等迅速查拏務獲。毋任遠颺漏網。○又諭曰。魁倫奏。閩海關徵收稅課。一年期滿。比較五十一年分。少徵銀四萬五千七十七兩零。請照數賠補。分限完繳等語。該省本年漳泉一帶。雨澤稍缺。商民販運較稀。以致稅課短少。尚屬有因。所有短缺銀四萬五千七十七兩零。著加恩寬免一半。餘著分限完繳。○諭軍機大臣等。前據書麟等奏。查勘黃河上游毛城鋪民堰情形。圖內所繪新舊河形。牽混不清。傳旨詢問。茲據該督等覆奏。並另繪新圖呈覽。仍不明白。已於圖內批示。並將舊河口代為畫出矣。毛城鋪外灘黃河。原由張王莊迤南行走。本年秋汛水漲。將張王莊迤北衝出新河一道。舊河淤墊。大溜全由新河行走。是圖內淤墊之處。即係舊河口。該督等並未將舊河口繪出。轉於寶家寨地方向東南分注支流。畫一河口。究竟該處新舊河口。是一是二。抑係舊口之外。支河更有一口。今

因大溜全歸新河。該處業已淤塞。經朕反覆披閱圖中所繪情形。總屬牽混。何不明白至此。其毛城鋪之河。原有唐家灣。倒勾引河。分洩黃水。實家寨地方。不應復有引河下注。詳閱該督等摺圖。並未分晰聲叙。殊屬糊塗。仍著將硃筆圖。發交書麟。蘭第錫閱看。著即另行詳細展寬繪圖。貼說呈覽。不得再有牽混。將此傳諭知之。○又諭曰。孫永清奏據署東蘭州知州黃圖稟報。該州安插福建臺灣案內股頭鄭管陳廷二名。於本年八月間。與流犯周亞卿同逃。現在分飭偵拏等語。此事大奇。已明降諭旨。將知州吏目等革職拏問。並將該管各上司。分別交部矣。臺灣股頭。皆係從賊匪徒。即應正法之犯。因其遵示投出。貸以一死。從寬安插。原屬格外加恩。乃該犯等到配後。不思感激。悛改。膽敢結伴同逃。及經兵役追拏。復敢持篙拒捕。實屬目無法紀。雖據奏被兵役打落水中。但現在屍身未獲。安

知非赴水潛逃。竄回原籍。著傳諭孫永清。分飭地方文武。懸賞偵拏。務期弋獲。不得因該犯被打落水。即以為業經身死。致滋疎縱。並著伍拉納。徐嗣曾。嚴飭所屬。於該犯等原籍地方。一體嚴密查拏。毋任潛匿。至該犯等由粵西竄回福建。必經由廣東地方。著傳諭福康安。郭世勳。密飭各屬。於水陸關隘地方。分投查察。一遇該犯過境。立即盤獲。嚴辦示懲。勿使免脫漏網。○廣西巡撫孫永清奏。探聞安南牧馬督鎮。帶兵前往高平。那呂保樂等處。已將黎維祇。舊目阮儗。擄獲。并聞舊目閉農二姓。叔姪弟兄。或已投降。或已逃匿。查該國牧馬保樂。即係高平一路地方。前聞黎維祇之弟黎維祇。與黃文燭。有糾眾攻打牧馬之事。今既被該督鎮趕散。其閉農二姓。即係黎維祇糾合之人。現在阮儗已被擄獲。黎維祇亦不聞下落。此外或降或逃。是該國高平一路。亦已漸就寧帖。來年阮光平起程

進京。自必更無顧慮。報聞。○旌表守正捐軀福建晉江縣民翁沛女翁氏。已亥。諭軍機大臣曰。蘭第錫奏調任南河。遵旨速赴新任。未及請訓。現在並無緊要事件。請於本年封印後。起程來京。陛見等語。南河各工。現在雖無要務。但一應收蓄水勢。購備歲料。及疏濬漫水。經過河渠。均須該督在彼辦理。朕明春巡幸山東。在泉林行宮駐蹕。距清江不遠。蘭第錫即可前至泉林迎駕。面聆訓諭。較為近便也。將此諭令知之。○又諭山海關監督德綸奏。一年任滿。該處所到海船。僅一千七百餘隻。較上二年。短少十分之六。其大關及各邊陸路各口。經徵錢糧。不甚懸殊。通盤覈計。短少比較盈餘銀四萬九千八百八十餘兩。等語。山海關徵收稅銀。正額盈餘。歷年並無短缺。今德綸一年期滿。共少徵盈餘銀四萬九千八百餘兩。自應令其按數賠交。但既據稱。該處徵收錢糧口岸。全賴奉省南來海船

貨物。因連年被水。收成歉薄。商船到口較少。是否實情。無難查詢得實。著傳諭嵩椿宜興。穆和蘭。即將該處運販海船貨物。是否因年歲歉收。舊貨未經銷售。商本一時不能轉輸。觀望不前。赴口上稅者較少。以致徵收短缺。其書役人等。有無從中賣放偷漏之處。逐一詳細查明。據實覆奏。毋得稍有瞻徇。○以詹事翁方綱為內閣學士兼禮部侍郎。○庚子。改湖北武昌府清軍同知缺歸部選。從湖廣總督畢沅請也。○辛丑。湖北巡撫惠齡奏。本年夏秋。潛江江陵監利荊門四州縣被淹。田垵實止一隅中之一隅。該軍民均係上年賑卹之戶。底冊可查。無從弊混。業將撫卹一月口糧。按戶散給。現在接放正賑。且值城隄各工並舉。即無業貧民。亦得藉工食力。惟被淹極低各垵。積水未涸。現飭地方官。上緊設法疏消。勸令趕種二麥。並飭該管道府。督率放賑辦工各員。實力妥為經理。得旨覽奏稍慰。

○壬寅

上幸瀛臺。○癸卯。諭。據。鑲。藍。旗。滿。洲。都。統。奏。請。補。放。盛。京。世。襲。佐。領。一。缺。將。出。缺。伯。英。額。之。子。富。倫。擬。正。伯。英。額。之。弟。明。阿。圖。擬。陪。雖。係。照。例。辦。理。但。伯。英。額。係。因。騎。射。平。常。革。退。之。員。滿。洲。世。僕。自。應。加。意。嫻。習。騎。射。今。伯。英。額。以。騎。射。平。常。革。退。其。佐。領。員。缺。若。仍。著。伊。子。承。襲。是。與。未。革。無。異。不。足。示。懲。所。遺。佐。領。員。缺。即。著。伯。英。額。之。弟。明。阿。圖。承。襲。嗣。後。佐。領。內。遇。有。因。騎。射。平。常。革。退。者。出。缺。人。員。之。子。不。准。承。襲。俱。著。其。伯。叔。兄。弟。承。襲。著。交。八。旗。一。體。遵。照。辦。理。○諭。軍。機。大。臣。等。據。秀。林。等。奏。阿。奇。木。伯。克。公。品。級。邁。瑪。第。敏。懇。請。明。年。來。京。叩。祝。萬。壽。等。語。邁。瑪。第。敏。誠。心。懇。請。又。係。噶。岱。默。特。之。孫。著。照。所。請。與。明。年。年。班。伯。克。等。一。同。起。程。前。來。近。日。伊。斯。堪。達。爾。額。爾。德。錫。爾。等。俱。准。來。京。其。別。城。伯。克。聞。之。亦。必。有。告。請。來。京。者。但。伊。等。來。後。又。須。派。人。署。缺。

各處辦事。不可無人。著傳諭駐劄回疆各城辦事大臣。衆伯克。內。伊。祖。父。有。類。噶。岱。默。特。鄂。對。之。從。前。出。力。朕。曾。施。恩。者。其。子。孫。若。懇。請。來。京。即。行。具。奏。其。尋。常。伯。克。概。行。駁。回。○甲辰。

上幸瀛臺。○諭。曰。梁。肯。堂。奏。考。城。縣。城。工。案。內。應。建。壇。廟。倉。庫。衙。署。監。獄。等。工。於。乾。隆。五。十。年。據。前。任。藩。司。江。蘭。率。行。詳。請。具。題。經。畢。沅。駁。飭。後。並。未。題。估。江。蘭。輒。發。銀。三。萬。兩。後。又。未。經。具。詳。自。行。動。款。續。發。銀。二。萬。八。千。兩。交。知。縣。陳。士。駿。承。辦。今。照。城。工。例。覈。估。計。浮。多。銀。二。萬。四。千。四。百。餘。兩。其。中。顯。有。情。弊。請。將。江。蘭。解。去。職。銜。降。調。知。縣。陳。士。駿。革。職。確。審。其。失。察。之。歷。任。河。南。巡。撫。兩。司。及。該。管。道。府。應。請。交。部。察。議。並。自。請。與。署。藩。司。陳。奉。茲。一。併。議。處。等。語。江。蘭。著。解。去。職。銜。解。赴。豫。省。質。訊。其。承。辦。之。降。調。知。縣。陳。士。駿。著。革。職。一。併。交。與。梁。肯。堂。嚴。審。定。擬。具。奏。所。有。失。於。查。察。

之梁肯堂陳奉茲及歷任河南巡撫兩司本
管道府等俟定案時著該撫查送職名交部
分別議處○諭軍機大臣曰梁肯堂奏豫省
考城縣移建城垣案內有應建壇廟衙署倉
庫等項該縣估計詳報經畢沅以冊開款項
太繁駁飭另造此後並未題估乃前任藩司
江蘭輒先發銀三萬兩其續發銀二萬八千
兩則並未具詳竟入於季報冊內開除今按
照城工則例估計浮發銀二萬四千餘兩顯
有情弊請將江蘭暫解職銜解豫審辦等語
已明降諭旨將江蘭解職交梁肯堂嚴密查
辦矣著傳諭全德即派委妥員將江蘭迅速
解赴豫省聽候質訊此項城工帑項攸關自
應覈實辦理乃江蘭於駁飭後並未題估即
浮發銀至二萬餘兩之多將來審訊得實江
蘭不但情罪重大即應賠官項為數必多現
在江蘭居住揚州其房產鹽業均須查明備
抵並著全德密行訪察勿任稍有隱匿寄頓

情事方為妥善又此案工程經江蘭估計具
詳畢沅以冊開款數太繁駁飭另造此後並
未題估即不應發銀辦理乃江蘭擅行動款
任意浮多顯有通同捏飾冒銷情弊著傳諭
梁肯堂即行調查案卷嚴切究訊毋庸另派
大臣前往查辦此案係梁肯堂查出參奏且
非該撫任內之事自無所用其迴護也○兵
部議准安徽巡撫陳用敷奏稱安徽省阜陽毫
州六安宣城潁上五河等處事務殷繁須酌
設站馬請於南陵貴池練潭三溝等驛撥馬
五十六匹夫四十三名於阜陽等處安設從
之○旌表守正捐軀河南商邱縣民趙胖妻
王氏○乙巳諭軍機大臣曰福康安奏報阮
光平受封成禮一摺並將該國王謝稟進呈
覽其感忭欣幸惻實出至誠流露至稟內
所稱明年三月間親來瞻覲祝釐言詞尤屬
堅確毫無游移前於孫永清奏到時曾經降
旨以該國王已受封爵亦係天朝臣子與貢

使不同。明歲來京。經過沿途地方。各督撫俱應以賓主之禮接見。酌定儀注。頒示該國。並賜御製詩章一律。用昭優眷。並令黎維祁率其屬下人戶。全行來京。編入漢軍旗下。黎維祁既離桂林。使該國心懷疑貳之人。無從藉端滋擾。該國王聞知。更可釋其疑慮。又因該國王患病新痊。賞給珊瑚朝珠荷包等物。並以吳文楚係該國得力之人。不便同來瞻覲。或致居守無人。應俟阮光平回國後。於下次貢期。再行赴闕。以示體恤。此旨。曾著孫永清速即備文交付成林。令其面諭阮光平知悉。若成林離黎城已遠。即交該國妥協鎮目。齎交祇領。計算日期。孫永清早應接奉。此旨。遵照辦理。該國王見天朝屢次加恩。寵賚便蕃。體恤周至。自必益加感激。更足堅其向化之誠。今福康安已自粵東起身。前赴梧州。照料阮光顯出關。而成林宣封事畢。回至內地。福康安諒於途次遇見。即可面詢該國王如何。

感戴歡悅情形。先行由驛奏聞。如續有接到該國王節次加恩謝表。及呈遞謝稟。一併迅速具奏。將此由四百里傳諭福康安。並諭孫永清知之。○又諭曰。昨據梁肯堂奏。奉考城縣工程銀兩。藩司江蘭並未具詳。擅行動款。任意支給一案。朕以該撫查出叅奏。必係實有情弊。是以即交梁肯堂從嚴審辦。本日適臬司陳奉茲來京陛見。召見時。面加詢問。並令軍機大臣。將此案情節。詳細傳詢。據稱江蘭於未經題估之工。輒行勝混具詳。擅發銀兩屬實。而陳士駿所領銀兩。作何侵冒之處。經梁肯堂嚴加詰訊。以質證無人。堅不吐實等語。是此案江蘭與陳士駿通同捏飾勝混情弊顯然。殊出朕意料之外。昨已降旨。令全德委員。將江蘭解豫質訊。但江蘭現在原籍。到豫尚需時日。陳士駿係承辦工程之人。江蘭所發銀兩。皆其請領。所有修建工程。已據該撫查明。實屬草率。是其中顯有侵冒情弊。

無難一望而知。祇須嚴詰該員。即可得實。不得因江蘭現未到豫。任其狡展。著傳諭梁肯堂。即先向陳士駿嚴切根究。務得確情。迅速先行覆奏。勿得稍有袒庇。○丙午。

上幸瀛臺。○諭曰。烏梁海散秩大臣總管烏爾圖納遜。病故。所遺散秩大臣總管。著伊長子布延德勒克承襲。布延德勒克年幼。未能辦事。著派和通協同幫辦。○又諭曰。伍拉納奏。審擬邵武營備弁濫扣兵餉一案。內稱辦理

臺灣軍務時。運送軍裝。請領餉銀。及公用路費等項。該營革備余朝佐。革弁林云照。擅於公費內濫行支用。將各兵月餉攤扣歸補。雖係因公使用。尚無入己情事。但以例不准銷之項。濫扣兵餉。即與侵盜錢糧無異。請將余朝佐。林云照。問擬杖流。從重發往新疆充當苦差。已革參將張潮。守備查城。不即究辦。亦應與余朝佐等同罪。從重發往新疆効力贖罪。字識符章。官嵩甯元。稿不行稟阻。問擬杖

徒等語。余朝佐等支用公費。攤扣兵餉。如有藉端浮冒。分肥染指情事。自當從重治罪。今既審明。所扣月餉。俱係因公實用。並未入己。况辦理臺灣軍務之時。所需路費。及修補號帽等項。均關急用。若得詳請給發。轉致遲誤。即各營例支夫腳。亦不無隨時加貼。革備余朝佐等。當軍興之際。通融辦理。實與擅扣兵餉。侵冒入己者迥異。伍拉納所擬罪名。實屬過當。守備余朝佐。千總林云照。及未經查出

之參將張潮。守備查城。業經革職。已足蔽辜。俱著免其治罪。字識符章等。聽從本官辦理。尚無不合。所擬杖徒之罪。亦著寬免。朕辦理庶務。權衡至當。不稍存畸重畸輕之見。閩省營伍廢弛。綠營官弁等。如有玩縱營私之事。無不從嚴究辦。以示懲創。今此案事屬因公。既審無別項情弊。自應量予從寬。不使稍有屈抑。以昭允當。○又諭曰。伍拉納等奏。革職副將李長庚。自留閩協緝以來。前後獲犯八

十九名尚屬出力等語。李長庚准其留於福建。如果始終奮勉。遇有遊擊缺出。著該督酌量奏補。○丁未。

上詣

壽康宮行禮。○諭軍機大臣等。據巡城御史穆克登額等奏稱。拏獲葛太李二兩犯。究出葛大之姪葛二。於七月內在景州偷盜餉鞘。十月內來京。帶回元寶三個。交葛大收藏。將元寶二個換當錢文使用。葛二又將元寶一個。

同李二葛四等往京南夥做買賣。行至雄縣地方。葛二被該縣拏獲。葛四逃逸等語。景州地方餉鞘被竊。迄今已閱五月有餘。並未據該督具奏。現在正賊葛二已被雄縣差役拏獲。並有景州差役來京。在阜城門外緝訪。亦未據該督奏明審辦。或竟係地方官規避處分。諱匿不報。希圖將就了事。著傳諭劉綬。即行據實查明。迅速覆奏。毋稍迴護。所有已獲之葛二一犯。著解京交刑部歸案審辦。其未

獲之葛四苗太周黑子等。仍交該督通飭各屬嚴緝務獲。毋任漏網。○旌表守正捐軀河南上蔡縣民張廷印女張氏。○戊申。

上幸瀛臺。○諭軍機大臣等。河南臬司陳奉蒞來京。陛見。召對時。詢以淮揚道趙載元在豫省日久。居官若何。據稱趙載元在豫時。屬員頗多抱怨。雖無劣蹟。但其人究不可深信等語。趙載元係河員出身。於河工尚為熟悉。是以用至道員。淮揚係緊要之缺。地方河務均

資經理。必須實心辦事之人。方克勝任。趙載元前在豫省知府任內。屬員既多抱怨。陳奉茲又稱其人不可深信。是否屬實。著傳諭書麟蘭第錫密為留心訪察。其居官究竟如何。即行據實覆奏。毋稍徇隱。○調直隸正定鎮總兵蘇寧阿為天津鎮總兵。以江寧城守營副將海亨為正定鎮總兵。○己酉。

上幸瀛臺。○諭軍機大臣曰。穆和蘭著來京。陛見。有旨訓諭。該處既有宜興。穆和蘭接奉此

旨。即速起程前來。○改陝西漢陰通判為撫民通判。沔縣黃沙驛驛丞為漢陰巡檢。均為在外調缺。從陝甘總督勒保請也。○庚戌諭據惠齡奏。江西委員樂平縣丞徐寶麟管解雲南餉銀五十鞘。行至鍾祥縣地方。該縣知縣葉治赴鄉相驗。經典史黃寶璋僉差撥夫至荊門州交替。查點失去一鞘。現在提集兵役等。嚴審定擬。請將典史黃寶璋委員徐寶麟革職。至知縣葉治是否先已赴鄉容俟查明參奏等語。江西解滇餉鞘經過湖北鍾祥縣地方。該典史黃寶璋並不慎重僉差委員徐寶麟亦不小心管押。致被中途串竊。非尋常疎玩可比。黃寶璋徐寶麟俱著革職拏問。交該撫提同案犯嚴行確審具奏。知縣葉治雖因公出。但平時不能約束差役。致有疎虞。及失去餉鞘。又不能即時拏獲究辦。咎實難辭。湖北政治廢弛已久。若不從嚴懲治。不足示儆。葉治亦著一併革職拏問。其該管道

府及疎防武職各官。著該撫即行查參。照例議處。○諭軍機大臣曰。陳用敷奏阜陽縣知縣張護差役盤獲山東歷城縣越獄案內逸犯楊二。審明正法一摺。已批交該部知道矣。歷城縣監犯越獄係五十一年之事。迄今已逾三載。今陳用敷摺內稱訊問楊二據供越獄時同許四妮等九人先後跳出監牆。各自逃散等語。此案越獄人犯已經拏獲者幾人。未經拏獲者幾人。著傳諭長麟即行查明。其未經拏獲之犯。即嚴飭所屬實力躡緝。務須按名弋獲。不可久而生懈。以致要犯潛匿漏網。所有盤獲楊二之阜陽縣知縣張護著該撫給咨送部引見。以示鼓勵。將此並諭陳用敷知之。○河東河道總督李奉翰奏運河應挑工段飭各地方雇夫與河工額夫分段挑挖。其應挑處所。先經簽釘誌樁。工完量驗。今各處底水已掣入不估挑之河內儲蓄。河底顯露。一切挑工器具齊全。日來天氣晴霽。人

夫踴躍可期。依限完竣。得旨。妥實為之。又奏。濟寧以南。兩岸排樁。土石等工。歷年完固。其微山湖水勢。頗為旺盛。該湖為第一要緊水樞。兼濟江南運道。寧使存蓄有餘。時飭該廳等。將湖口閘填土嚴閉。以利來年漕運。所有濟寧以北兩岸工程。緯道應行修理處。已次第修做。務期隄堰普律平整。得旨。好。勉為之。○旌表守正捐軀四川富順縣民田如志妻李氏。○辛亥。

上幸瀛臺。○諭軍機大臣曰。陳用敷於前年冬底在京陛見。迄今已逾兩載。現在安徽亦無緊要事件。且屆封篆之期。著傳諭陳用敷。即來京陛見。該撫接奉此旨後。即將巡撫印篆交書麟暫行兼署。迅速起程。於年底到京。將此并諭書麟知之。○又諭。向來各省督撫於學政任滿。及年終陳奏時。大率以聲名尚好為辭。含糊具奏。從未有舉發學政劣蹟者。即如謝墉。吳玉綸。徐立綱等。聲名平常。相繼破

露。皆經朕傳旨詢問。始據各督撫具奏。今又聞廣西學政潘曾起。在學政任內。聲名亦屬平常。因檢查孫永清上年歲底陳奏摺內。據稱潘曾起聲名中等。並無劣蹟等語。學政與巡撫同在一省。其聲名優劣。斷難掩人耳目。潘曾起。校士未能公正。外間多有議論。孫永清豈不知之。乃並不切實具奏。為此模稜籠統之語。以冀見好干譽。甚屬無良心。本應將該撫從重治罪。以欺罔之罪。但因阮光平於明

春入覲。孫永清在彼照料一切。較為妥協。熟諳。未便遽行更易。致阮光平或生疑畏。故加恩免其治罪。與福康安托辦木植一案。加恩予留公爵章服者。事同一例。仍著傳旨嚴行申飭。必將潘曾起如何作弊之處。據實參奏。莫至為人害己。慎之。○是月。河東河道總督李奉翰奏。豫省黃河水勢消落。新舊埽壩工程穩固。其蘭陽新河頭蔡家樓。前因水落走灣。溜勢上提。續添新埽七段。今已鑲成堅穩。

又睢州下汎七堡新南隄前經鑲做護埽九段續添做六段并於工尾添築挑水小壩一道以資挑護迤下不致再生新工得旨嘉獎○陝甘總督勒保奏臣到甘以來節次曉諭舊教回民將仍習新教之人按名查緝並明立條款回民禮拜日期止准於本村寺內念經不許另赴別寺亦不得多索贓錢如有婚喪事件止准延請本寺鄉約頭人別寺之人不得攬奪仍令照依編造保甲之法將某某回戶應歸某寺念經之處造冊備案其平時教習經文亦止准延請本寺回民教讀不許勾引隔村別寺人及添建禮拜寺私築城堡等事至專設回民義學教以詩書尤為化導良法通飭實力奉行以上立定章程責成該管道府隨時稽查按月稟報該回民等深知邪教最易滋事為切己之害無不互相戒免遵守條約實屬安靜畏法得旨有治人無治法實力為之○四川總督李世傑等奏已勒

布頭人貢使由打箭爐入內地以來見一路標營軍容壯盛經由邛州新津雙流等處平疇沃野人烟稠密至成都省更見規模宏整百貨豐盈該番等欽慕華風倍形鼓舞惟即日由川赴京正值嚴寒該番等涉遠而來隨帶衣履無多自應量加體卹先經臣等查照該番所穿服色製備溫暖皮衣並靴帽等件隨傳齊該大小頭人番衆面加賞賚並犒以羊酒該番等叩首歡欣同聲感頌臣等隨飭經過川省各站將應用夫馬妥為應付並咨明陝西山西直隸各省一體照料外臣成德帶領該番自成都起程督同將備等沿途經理務於十二月上旬到京報聞

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十三

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十四

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部主事書務
世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆五十四年己酉十二月壬子朔

上詣

大高殿行禮○以禮部尚書常青禮部右侍郎
鐵保內閣學士扎郎阿吏部左侍郎金士松
右侍郎朱珪兵部左侍郎沈初充經筵講官
○豁免江蘇吳縣乾隆五十年分坍沒田地
一十九頃十四畝有奇額賦○癸丑
上御乾清門聽政○諭已革副榜施鑾坡前因
應試懷挾照例斥革今檢閱南巡時諸生所
進迎鑾冊頁內有施鑾坡集千字文一本文

理尚優。若令終身廢棄。未免阻其上進之心。因思從前已革舉監。如能改過自新。原有准其應試之例。施鑾坡著加恩准其以原名應試。如再敢舞弊。必加倍從重治罪。○又諭。據科靈阿奏。一年之內。並無私造烏鎗。照例彙奏等語。督撫年終彙奏稽查私造烏鎗一事。原屬具文將軍副都統。並無民社之責。亦於年終彙奏尤屬虛行故事。況旗人能打造烏鎗。甚屬美事。嗣後東三省駐防各處將軍副都統。年終不必彙奏禁止私鎗之事。但吉林黑龍江等處。其人素皆善於騎射。捕獵本不需。用烏鎗。若因停止私鎗之禁。專用烏鎗。竟致廢弛騎射。亦不可不防其漸。該將軍等仍宜加意操演。勿使專習烏鎗而荒騎射。○戶部議准。兩江總督書麟等奏。稱本年編查安省軍丁田地房產。因地方遼闊。兼趕辦災賑。請展至五十五年五月為止。以便詳細編查。再各省軍丁多有私典屯地之事。請照江西

奏定事例。將屯坐本管者。限以一年分隸別府州縣者。限以二年。詳查咨部。歸入編審冊內。得旨依議速行。○兵部議准。陝甘總督勒保奏。稱甘省嘉峪關外花海子地方。路通王子莊。野麻灣等處。為緊要之地。請於花海子分駐把總一員。兵三十名。並於通花海子之紅泉口。笄笄槽。紅柳井子。四十井子。草湖。爬腰樹等六處。各安兵五名。所派把總兵丁。於赤金靖逆二營內。按年輪流派撥。更換令該把總於紅泉口等六處輪轉巡查。並令赤金營都司。每月赴花海子等處稽查結報。又木籠泉。梧桐窩石人子。斷山口。均通花海子路徑。請於橋灣營撥兵十名。分駐木籠泉。梧桐窩於威虜堡營撥兵五名。分駐石人子。於嘉峪關撥兵五名。分駐斷山口。仍令各本營將弁隨時查察。以專責成。從之。○以告退二等鎮國將軍永惠子麟志。照例降襲二等輔國將軍。○甲寅。戶部議准。四川總督李世傑奏

捷為縣報開鹽井。自乾隆五十四年始。歲增課額三百十兩。從之。○以少詹事鄒炳泰為詹事。○乙卯。

上幸和孝公主第。○諭曰。福康安等奏。成林自安南宣封進關後。於途次接見。福康安詢悉安南一切情形。摺內稱。阮光平以安南僻處炎荒。籲請天朝頒示正朔。又以該國物產本微。加以連年兵燹。物力衰耗。懇恩將水口關。准令商販出入。則全境生靈俱獲利用等語。

阮光平膺受封爵。得備藩服。感激歡忭。具見肫誠。前經遣使進貢。並再三籲懇。於明春親自赴京。瞻覲祝釐。忱悃可嘉。業已俯允所請。今又以交南僻處荒陬。懇頒正朔。該國王於締造之初。即能崇奉天朝。以定時正朔為急務。朕心深為嘉慰。自應即為頒發。俾得敬受正朔。永遠遵循。但向來朝鮮國係遣使臣先期赴京。於十月朔日。祇領憲書。今安南遠在南交。若每年照朝鮮國之例。遣陪臣到京。謹

領返國時。已逾春正元旦之期。該國臣民。轉未能及時遵奉。殊非體念遠人之道。今諭該部。即將五十五年時憲書發往。交該督等。即委員齎至鎮南關。令該國鎮目。轉交國王。祇領。嗣後每年。即著該部。照朝鮮國請領數目。將時憲書發交廣西。令該撫。照此次之例。屆期頒給。無庸該國遣使赴京。以示體恤。至安南向通貿易。自設禁以來。罕有內地貨物。該國民用所需。諒必日形短絀。今該國王。抒誠効悃。已就藩封。其境內黎元。皆吾赤子。自應准其開關貿易。早一日即民受一日之利。況安南甫經兵燹之餘。閭閻凋敝。物力維艱。尤須亟為通市。俾得有無懋遷。漸臻饒裕。並著該督撫。將水口等關。即令照常貿易。以副朕胞與為懷。一視同仁至意。○諭軍機大臣曰。阮光平祇受封爵。撫有安南。知敬奉天朝正朔。籲求頒給時憲書。自應准其所請。由報先行發給。五十五年時憲書二十本。嗣後著禮

部每年查照朝鮮國之例頒發時憲書令廣西巡撫發交左江道知照該國差官到關祇領至粵西水口等關通市之處若不即允所請恐該國貨物罕至民用有闕轉非體恤外藩一視同仁之意現已明降諭旨准其開關通市不必俟該國王來京面為奏懇再行允准著傳諭福康安等接奉此旨後即行照會該國王以安南與內地通市前經設禁未便擅開本部堂已據實奏明並令國王於入觀時自行奏懇今大皇帝俯念安南連歲被兵物產衰耗該國夷民俱係天朝赤子若待明年國王入觀奏懇回國後始准開關為期將及一載通國日用所需未免短絀是以不俟國王面奏先已特降恩旨准行以示體恤如此明白宣諭庶使安南通國夷民益仰天朝撫育深仁倍加感戴也又福康安等奏稱安南所建陣亡提鎮廟宇供祀許世亨等牌位極為整齊並據吳文楚面稟成林以大兵在

黎城傷亡官員不知姓名官職無從立位祈開示銜名以便補祀等語亦應准其所請著福康安等即查明陣亡副參遊等員職分較大應行列祀者發交該國王令其按照官銜名姓一體設牌供祀用慰忠魂至該國欲為福康安建立生祠固屬愛敬之心業經福康安照會該國王令其毋庸建立所見亦為得體又據福康安另摺奏稱阮光平所遣貢使現已催令起身計算程期必能於燈節前趕到本應令湯雄業護送入京但阮光平明春入觀必須熟諳大員在關照料請令候補道黃符綵同德克精額伴送來京等語該貢使久已進關若即令起身前來此時已抵豫省年內儘可從容趕到今甫自寧明起身不能年底到京皆由孫永清拘泥遲誤所致至湯雄業熟悉夷情留在鎮南關一帶照料阮光平入觀事宜較他員自為妥協所有此次貢使來京即令黃符綵與德克精額伴送迅速

起程務於燈節前到京。勿再遲緩。將此由六百里傳諭知之。○丙辰

上幸瀛臺。諭本年鄉試諸生年屆八十七十以上。未經中式者。除順天業經降旨分別加恩外。茲據各省陸續奏到諸生中年躋耄耄踴躍觀光。共百有餘人。雖未經中式。而三場均能完竣。洵為士林盛事。所有江南省八十以上之胡椿。周宗勛。許以恭。劉鴻。宣鵬。徐日暄。董作礪。翁炳。魏文鴻。劉湘。翟皋。王道烜。汪

飛熊。劉繩。準。葉逢年。張進。履。姜球等十七名。江西省八十以上之黃景亮。胡道南。蕭士芝。董夢江等四名。浙江省八十以上之方宗華。何大烈。閔之賢。馮全修。魯學孟。張謩等六名。福建省八十以上之吳維新。朱先章。陳卜仁等三名。湖北省八十以上之劉化觀。王奉元。涂宗詔。朱有榮等四名。湖南省八十以上之劉平年。李光昱。李國霞。李逢源。歐陽謨。吳家修。文承發等七名。河南省八十以上之馮希

賢。程紹光。喬元熙。武仲。席梧。貴。呂。撲。李如璧等七名。山東省八十以上之王有年。王宗遠。

郭偉勳。趙泉。趙瑞。嵐等五名。山西省八十以上之李文明。孫公輔。李如山。孫元麟。郭長源。吳企哲等六名。陝西省八十以上之張大烈。張守經。閻輔輝。張大振。師尚友等五名。四川省八十以上之潘履謙。戴文璧。劉洪文。王體亨。王昇平。李維岱等六名。廣東省八十以上之李賴予。楊家樹。馬登翰。李光雲。邱修己。關

睿南。何紹綱等七名。雲南省八十以上之湯祚昌。錢大有等二名。貴州省八十以上之楊宜科。黃中理。趙錫爵。徐必。王德洪等五名。俱著加恩賞給舉人。准其一體會試。其浙江省七十以上之沈志超。胡以晉。徐由。湘。黃敏。樓象春。范鈺。潘兆謙。李鴻。鄭拱秀。張爰士。周嘉祺。沈慧業等十二名。湖北省七十以上之劉中陵。蕭光泰。張元瓏。袁國桂。邱雨濬。李華。盧薰揚。大謨。劉先士。方玉堂。冉之桂。邱文開。閔

力魁周之鼎等十四名。湖南省七十以上之黃佑啟。山西省七十以上之宋守祀。蕭鳴山。薄文龍。王夢熊。劉煥。王克惠。杜霸。高日敬。郝兆珠。周汝第。郭延山。萬之幹。強岫。王振祚。孫大發。李時旺。劉依德。薛掄。魁趙學普。李溥。趙掄。達。李晚榮。孫膺祐。王憲武。王儀煥。陳丹書。馮憲鄴等二十七名。俱著加恩賞給副榜。以彭壽世作人至意。○工部議覆盛京戶部侍郎宗室宜興題修寧遠旗倉。天字。日字。月字。三殿。應准照例估修。外查本年八月內京師貢院及各省考棚。所有天元帝皇等字俱停止。編列倉廩事同一體。所有寧遠州旗倉廩座字號內。如天字等字樣。應令該侍郎改編報部。至各處倉廩有似此者。應行文倉場侍郎及各省督撫查明改編報部。從之。○丁巳。孝惠章皇后忌辰遣官祭。

孝東陵。○諭軍機大臣曰。梁肯堂奏。江蘭擅發考城縣工程銀兩一案。提訊草職知縣陳士

駿據供所領前項銀兩。江蘭每百短發銀二兩四五錢不等。約共短銀一千三百餘兩。恐其中尚有不實不盡之處。仍當悉心根究等語。江蘭係素辦鹽業家資豐厚之人。即欲藉端侵冒。或係二三萬兩。尚在情理之內。豈肯因一千數百兩平餘擅行動款。任聽陳士駿浮領工銀至二萬餘兩。且向來淮商俗習。即尋常宴會。所費尚不止此。斷不至因此些須扣項。自蹈擅發重罪。梁肯堂所訊供詞殊非情理。若非該撫有意周內。審出剋扣工程銀兩。以實其罪。即係避重就輕。以江蘭侵蝕無多。希圖末減。二者必居一於此。豈能逃朕洞鑒耶。聞得城工甚粗糙。必係工程冒剋。何不於城工覆勘。則其侵蝕畢露矣。著傳諭梁肯堂再行向陳士駿嚴切根究。務得確情。不得因質證無人。任其狡展。昨據全德奏。已將江蘭派員起解。俟其到豫時。再令與陳士駿質對。無難訊究得實。此案關係藩司擅動庫項。

必係案情確鑿。方成信讞。朕斷不肯似此顛預了事也。著將審得情形。迅速據實具奏。軍機大臣議奏。請增設順天鄉會試防弊各事宜。順天鄉會試。謄錄請於順天直隸各州縣衙門。挑取誠實書吏。鄉試一千名。會試七百名。由該督委員送交順天府。屆期會同知貢舉等。驗明印臂。押送入場。進場辦事書吏。請於各部院衙門。經承書吏內。每處挑送六名。吏禮二部。各挑送八名。按照鄉試籤掣二十四名。會試籤掣二十名。入場充用。鄉試生員。請令該督每府派教官二員。到京識認。其國子監肄業貢監生。令助教等官識認。其不在監肄業者。取具同鄉官印結。令出結官識認。其在部候選及各館謄錄。亦令同鄉出結官識認。墨卷填寫添注塗改字數。請增派受卷官四員。收卷時設立冊簿登記。並於簿面註明受卷官某人。於榜後送磨勘官覈對。鄉會試卷。印卷時以四十本為一

束。令印卷官查清用印。送入場內。並請交禮部另鑄知貢舉關防。監臨關防。各一顆。於試卷送進時。逐卷鈐用。卷面坐號戳記。請令四所官將四十號戳為一串。卷四十本為一束。隨手拈取號戳一串。於卷簿及卷面印用。其未經投卷者。即於簿內本生名下。印用未投卷三字戳記。三場俱照此辦理。士子入闈後。請派員清查號舍。將某號係某員查看登記號簿。倘有亂號等弊。即將原查官叅處。并請派監試滿漢御史各四員。並令科道通行開列候點。以上各條。請即於庚戌年會試為始。從之。戊午諭。前經降旨。直隸解到旗租銀兩。足數普賞八旗兵丁一月錢糧。即行普賞一次。現在直隸解到租銀。已足數賞資之用。著加恩普賞八旗兵丁一月錢糧。俾生計益臻充裕。以示春祺錫慶。有加無已至意。該部即遵諭行。又諭。烏爾圖納遜著賞給副都統銜。前往喀喇沙爾更換德勒格楞

貴。增保著授為頭等侍衛前往哈密。更換范建中。勒爾謹著授為頭等侍衛領隊大臣。前往古城。更換博厚。○諭軍機大臣等。據李世傑奏。川省十月分各屬米糧價值。披閱所報單內。打箭鑪地方。私米每石銀五兩五錢零。小麥每石銀五兩零。與該處接壤地方價值。一兩上下者。大相懸殊。因思打箭鑪地在邊陲。即係明正土司地方。本非產米之處。該處番人雜處。民戶無多。皆以青稞油麥充食。無藉米糧。即有他處運往糧石。不過地方官衙門買食。亦與民食無關。若民間日食所需。果如所開價值。則閭閻生計維艱。更屬難資餬口。自係該處地方官。向因承辦軍需。故將米糧多報價值。以為開銷地步。陋習相沿。未能覈實。李世傑亦僅據屬員稟報。照例具奏。未及詳查。竟成印板俗文。著傳諭孫士毅。即行查明打箭鑪米糧市價。究竟若干。據實具奏。若該處民間。向不以米糧充食。嗣後糧價單

內。祇須開報青稞油麥其米麥等項。即可毋庸列入。○又諭。昨劉我叅奏景州知州沈長春。私自賠補被竊鞘銀。匿不詳報。請將該知州及委員等。革職拏問。並自請與陞任臬司富尼善交部議處一摺。已批交該部矣。景州地方被竊鞘銀。該督與臬司。未能查察。自有應得處分。但藩司係錢糧總匯之地。此項餉銀。由山東省撥解直隸。為賑濟之用。係交藩司衙門兌收。轉發各府州縣。按戶散給。今鞘內既失去元寶三個。其鐵箍封條。皆已損壞。該藩司驗收劈鞘時。無難一望而知。馮光熊未經查出。亦不得為無過。乃劉我僅自請與富尼善交部議處。而竟置藩司於不論。殊屬失之疎漏。著傳諭劉我。即將藩司何以未經查出之處。據實查明覆奏。勿稍迴護。○已未上幸瀛臺。旌表守正捐軀安徽靈璧縣民劉兆祥妻馬氏。○庚申。諭。前因國史館所進貳臣傳乙編內。有先順流賊。仍降本朝。投誠後

復行從逆者。皆係反覆小人。不值為之立傳。是以降旨。令將伊等列傳。概行撤去。祇為立表。排列姓名。摘敘事蹟。今思此等偷生嗜利之徒。進退無據。實為清議所不容。若僅於表內畧摘事蹟。敘述不詳。使伊等醜穢之行。不彰後世。得以倖逃訾議。轉不足以示懲戒。但貳臣傳內。原分甲乙二編。如甲編內洪承疇。李永芳諸人。皆曾著績宣勞。本朝有功可紀。即列入乙編者。歸順本朝之後。並未嘗別生

反側。若吳三桂。耿精忠。李建泰。姜瓖。王輔臣。薛所蘊。張炘等。或先經從賊。復降本朝。或已經歸順。復行叛逆。此等行同狗彘。醜類無耻之人。并不得謂之貳臣。若亦一同編列。轉乖史例。著國史館總裁。即行詳悉查明。特立逆臣傳。另為一編。庶使叛逆之徒。不得與諸臣並登汗簡。而生平穢蹟。亦難逃斧鉞之誅。方為公當。至如馮銓。龔鼎孳等。因顧名節。身事兩朝。降附之後。又無功績可紀。從前歿而錫

謚。蓋因本朝定鼎之初。

世祖章皇帝尚在沖齡。未嘗親政。睿親王等綜理事務。皆在草創權宜之際。或欲藉此收拾人心。不服覈實。被彼時為史者所欺耳。今久而論定。使伊等倖竊易名之典。實不足昭彰瘴之公。所有貳臣傳內。似馮銓等之曾給美謚者。亦著國史館查明。概行追奪。以示朕維植綱常。慎重名教至意。○辛酉。諭軍機大臣曰。梁肯堂奏。據署按察使吳璥詳稱。訪得叅司江蘭。差人來豫。呈繳考城縣城工案內賠項。帶來銀四十兩。並帶有玉器蟒袍藏經紙等物。欲變價湊繳賠項等語。考城不過一縣。何致覈減。即至七萬之多。不無疑竇。且考城縣城工銀兩。早經工部駁減。著賠江蘭家計殷實。非力不能完者可比。乃於應交之項。任意延緩。並不即行完款。直至將屆服滿。始差人來豫呈繳。自係聞有豫省叅奏之信。方將此項呈交。且所交之項。又不全交銀兩。將玉器

蟒袍等件。帶來變價。奏交。以見其措辦艱難。力非充裕。所謂欲蓋彌彰。居心已為巧飾。前據梁肯堂奏。訊據陳士駿供稱。江蘭發給工程銀兩。扣平一千三百餘兩。朕即以所奏殊非情理。降旨令其覆訊。今見江蘭似此見小取巧。則其擅發銀兩。竟不無從中染指。該撫前奏之剋扣平餘千餘兩。顯係代為開脫。尤不可信。此案頭緒甚多。竟不可收拾。著再傳諭梁肯堂。即細心研究。徹底清查。據實具奏。

勿得稍有徇隱。致干因人害己。○壬戌。諭曰。尚安奏烏嚕木齊所屬。新遷綏來縣戶民。除現在應納地糧及新借房馬價銀。照例分年完納外。實不能再將阜康縣等處舊欠銀糧一併交納等語。該處戶民。甫經遷移耕種。若將新舊銀糧併徵。民力未免拮据。所有該戶民舊欠房馬價銀九百六十兩零。糧一千二百九十二石零。著加恩俟新借銀糧徵完後。於五十六年起。再分作三年。帶徵完納。以示

朕體恤邊氓有加無已至意。○諭軍機大臣等。前因江蘭擅發壇廟工程銀兩一案。降旨詢問畢沅。令其據實覆奏。查考城縣城工。又係該縣陳士駿承辦。畢沅前在豫省巡撫任內。即不應將此二項巨工。竟交知縣一人專辦。以致諸弊叢生。至題估城工。共估銀十一萬九千九百餘兩。經部駁減。交梁肯堂確查。共減去銀七萬三千餘兩。向來各省題估工程。有與例不符者。經部覈減。至多不過十分之二三。從未有駁去大半者。即云原照汲縣之例題估。後經部駁。令改照曹縣之例覈算。及將城磚改折條磚。所有運腳工價。多寡不同。亦不至減去七萬三千餘兩之多。其中必另有情弊。畢沅受恩深重。歷任封圻。斷不致與屬員通同染指。朕亦不逆億及此。想係江蘭所愚。不加確勘。率行具題乎。然其咎不過失察。畢沅自應將從前題估時實在情形。據

實奏明。無所用其隱飾。況該督前因李天培代辦木植一案。瞻徇欲化為無事。未能及早查叅。獲咎甚重。經朕格外加恩。念其在督撫中尚屬能事之人。特予寬宥。今考城縣工程一案。朕復不加嚴飭。降旨委曲開導。畢沅益當感激涕零。即將此案弊實。和盤托出。庶不負朕格外矜全。諄諄訓諭至意。或另實有屈抑之處。亦不妨據實直陳。若再存欺隱之見。稍有諱飾。則是全無良心。若經梁肯堂查出。實在情弊。畢沅自問。安能當此重戾耶。將此由四百里諭令知之。○又諭曰。刑部議覆琅玕審擬姚勝立致傷胞叔姚文暉身死。將姚勝立問擬斬決一本。朕詳閱本內所訊情節。殊多疑竇。姚勝立既先行喊阻。復持鋤趕打姚文暉。恐伊子受傷。向前拉奪。是鋤頭在前。鋤柄在後。則所傷應係前面之人。且鋤頭在死者姚文暉之手。何以姚文暉轉受傷身死。而伊子姚勝憲供詞。又與姚勝立供相脗合。

明係刑書人等。有意刪減。希圖完事。遂致案情多未真確。且所稱姚勝立喊阻姚勝憲。不許在伊蕩內捕魚。即手持竹柄鐵鋤。趕來扎罾一節。亦非情理所有。試思魚罾係無知覺之物。非比馬牛。觸之即知痛癢。姚勝立向姚勝憲尋衅欲毆。與魚罾何涉。豈有不扎姚勝憲而扎魚罾之理。自係將鐵鋤趕扎姚勝憲。伊父護子情急。奪鋤受傷身斃。而刑書人等。裝點扎罾情節。以見姚勝立並非有心趕毆。

使案情不實。其理顯而易見。雖於該犯罪名無關出入。但人命至重。必須詳鞠明晰。方成信讞。乃琅玕於此案。既不能聲敘明確。遽為之聲請。並非逞亮干犯。而刑部又未經詳細看出。亦隨同聲敘。皆似有意從寬。是內外官員。無一人將此情節指出。何以定真偽而昭平允。著傳諭琅玕再親提該犯等。虛衷嚴訊。將所指各情節。逐一詳究。據實覆奏。○又諭曰。福康安奏。豫籌明春阮光平入覲沿途程

站供頓各事宜。所辦好。惟請於護送該國王過梅嶺後。即先赴熱河行在。未免太早。阮光平此次來京瞻覲。所帶陪臣人等較多。自梅嶺至南昌。由湖北湖南一帶進京。程站遙遠。經歷數省。僅令副將道員等護送照料。尚恐未周。福康安自應與該國王一同行走。至直隸保定府時。再行先來熱河。亦不為遲。至黎侗係黎氏舊臣。見阮光平歸順天朝。撫有安南境土。無處逃匿。窮蹙內投。並未帶回印信。猶復藉稱繫懷故主。仍欲別圖舉事。自不便遣送出關。致滋煽惑。且阮光平已受天朝封爵。代黎有國。黎侗等尚思為黎氏復仇。與阮光平為難。以現在辦理情形而論。亦祇可留於內地酌量安插。但伊等既藉忠義之名。出言堅執。著福康安即將黎侗等四人派員送京。候朕詢問。另行酌量降旨。其黎侗手下之人。恐尚有在鎮南關以外附近逗留者。並著福康安等設法招致。送赴內地安插。免致別

生事端。再黎維祁及伊屬下人等。前經降旨。令其全行來京。歸入漢軍旗下。編一佐領。原屬格外加恩。今據福康安查明。現在各府安插者。共有三百七十六名。人數未免太多。各旗佐領所屬。每佐領不過一二百人。若令伊等全數入旗。不特房屋住址有所不給。抑且伊等人地生疎。一時聚集京師。生計亦屬不易。著福康安等即行酌加分別。將黎氏支屬親戚及曾任官職者。約計百餘人。足數編一佐領之數。分起送京。其餘從人等。及從黎侗進關之段旺等二十九人。俱送往江南浙江四川等省。分隸督撫標下。令其入伍食糧。藉資約束。以徐歸民。至潘啟德丁廷衡阮廷沛等。前經賞給都司守備職銜。既據福康安奏稱。伊等言語不通。未諳營務。自應一併送京。歸旗。以驍騎校等官酌量補用。兵部議准。直隸總督劉我奏稱。請將小章汎千總移駐深澤縣城。方順橋經制外委。移駐滿城縣城。

其方順橋另於郡城留駐額外外委派撥一員駐劄。凡遇滿城縣城內以及方順橋地方遇有功過事件。將調駐之經制外委為專管。方順橋額外外委為協防。大激店把總為兼防。保定營參將為統轄。從之。○癸亥。諭從前各省城守尉員缺。並將宗室一體補放。城守尉一官。皆受督撫節制。身係宗室。受滿洲大臣節制。尚可。若受漢大臣等節制。於體制不協。是以各直省城守尉員缺。停用宗室。曾將

山西。河南。城守尉安慶長慶均已調補盛京所屬城守尉矣。但念宗室於外省文職府道等官武職綠營官員。俱不選用。而各省城守尉員缺。又不補放。伊等陞途。未免過少。著加恩嗣後所有盛京城守尉員缺。皆以宗室補放。現在藍帶人員。暫且毋庸更調。俟缺出時。再將宗室等揀選帶領引見補放。○諭軍機大臣等。昨據福康安等奏夷官黎伺等來至內地不肯雜髮。仍欲出關為黎氏復仇言詞

堅執。已令將黎伺等四人送京。候朕詢問。另行降旨矣。黎伺係黎氏舊臣。上年隨黎維祁母妻內投。復出關找尋黎維祁。及黎維祁棄國奔竄。未及隨來。今又自隘店隘潛行來至內地。並非從諒山而來。亦必另有情節。其探聽故主消息。流離播遷。不肯易節。復盛稱關外屯聚多兵。各思復仇討阮。其意蓋欲天朝出師致討阮光平。以遂其興復黎氏之心。見福康安時。自必將前來乞師之語。面行陳訴。

何以福康安摺內並未敘及此語。或係黎伺自恃忠於黎氏。過於憤激。經福康安再三駁詰。詞色加厲。伊復出言頂撞。福康安因而未及詳詢來意。遽請安置新疆。此時黎氏久已敗亡。阮光平輸誠効悃。極為恭順。已經撫有安南境土。承受藩封。斷無更張之理。就現在情形而論。祇可如此辦理。黎伺所言。自當置之不論。但黎伺曾經臣事黎氏。不以盛衰為去就。雖言詞愚戇。而鑒其心迹。究可矜原。福

康安仍當向黎伺稍假詞色。平心詢問。究竟其來意如何。即行據實詳悉覆奏。朕不過欲明白此事。並無他意。想福康安自能仰體朕意也。將此諭令知之。○兵部奏多羅果簡郡王永瑤薨逝。伊子綿從承襲貝勒。所有郡王分內官員。除應照貝勒額數存留外。多一等護衛六缺。三等護衛一缺。五品典儀一缺。散騎郎三缺。均應裁汰。從之。○又議覆山東巡撫覺羅長麟奏稱。東省各汛駐防弁兵。多有距本營較遠者。請改撥附近營分管轄。以聯聲勢而嚴巡察。請將沂州營泗水汛。改歸充標中營管轄。沂州營龐家渡汛。改歸臺莊營管轄。充標右營單縣汛。改歸曹州營管轄。范縣營堂邑汛。兼防觀城縣汛。改歸東昌營管轄。曹州營濮州汛。改歸范縣營管轄。即令觀城汛兼防。東昌營館陶汛。改歸臨清營管轄。臨清營恩縣汛。改歸德州營管轄。德州營商河縣汛。改歸登標武定營管轄。德州營濟陽

汛。改歸濟南城守營管轄。即令歷城外汛兼防。登標青州營之沂水縣垛莊汛。並沂水縣汛。均改歸充標沂州營管轄。應如所請。從之。○甲子。命御前行走土默特貝勒索諾木巴勒珠爾。固倫額駙豐紳殷德。紫禁城騎馬。○乙丑。諭軍機大臣等。據全德奏。准書麟查明江西春夏二季。共賣鹽價一百五十萬五千餘兩。知會前來。隨交各商查對。自本年正月。起至六月止。所收鹽價。較書麟所報銀數。尚少銀十餘萬兩。查向來省店遇滯銷時。不能賣至定價。恐干駁查。仍復照定價開報。致有賣少報多情事。今銷數彼此不符。是否相沿陋例。抑或有藉端影射之弊。現飭該護道恒寧。提取買賬前來。以便覈對等語。前因江西鹽引滯銷。恒寧虛報銷數。書麟等將就完案。復稱其辦理鹽道事務。尚屬認真。是以降旨。將恒寧留於江西。護理鹽道。按月督銷。如稍有缺乏。即著該員賠補。仍行文部治罪。今全

德查覈江西銷售鹽引。因辦運迴環轉輸。一時難於劃清。書麟所報四五兩月鹽價。不能逐月提出另算。惟自本年正月截至六月。春夏兩季。所收鹽價。覈之書麟所報一百五十萬五千餘兩之多。尚少銀十餘萬兩。自係恒寧以江西所銷鹽斤。不敷足數。以少報多。希圖掩飾。書麟何裕城。意存袒護。並不確切詳查。率行奏報。以致實銷銀數。與報數多寡不符。自應徹底清查。以杜弊混。著傳諭書麟。何

書麟等

著

裕城。即將該省春夏兩季。實在銷引若干。有無賣少報多情弊。據實具奏。毋得再有徇隱。並著全德。提取各商省店底簿。及江西水販鋪戶等買賬。逐一覈對。如有虛捏開報。立即奏明查辦。○陝甘總督勒保。疏報乾隆五十二年分。烏嚕木齊塔西河所開墾田地。一十六頃五十畝。○旌表守正捐軀山西陽城縣民鄭小三妻郭氏。○丙寅。

上御太和殿視朝。文武陞轉各官謝恩。○諭。河

南考城縣移建城垣案內。應建壇廟衙署等項。尚未題估。江蘭即詳請發銀三萬兩。又自行動款。發銀二萬八千兩。前經梁肯堂查明。奏。即降旨詢問畢沅。因何於未題之工。輒行據詳准發。茲據奏稱。前任撫臣等奏請移建考城縣治於堽陽地方。該處原係曠野。並無人烟。畢沅於乾隆五十年蒞任後。親往相度。見官員僑寓村莊。倉庫分寄鄰縣。興工不可再緩。一切物料工價。俱需現銀發給。是以

江蘭詳請

著

江蘭詳請發銀三萬兩。當經批准動用。其續行動銀二萬八千兩。未詳緣由。實不能解。彼時未經查出。自請交部察議等語。考城縣移建縣治。自乾隆四十七年。富勒渾奏准後。延宕三載。尚未開工。畢沅以縣治荒僻。採運寫遠。是以先行給發銀兩。以期迅速興工。但該撫既經親往勘視。堽陽地方。並無居民。俱從平地築建。工用浩繁。即應據實具奏。另擇鎮店地方。移建。方為妥善。乃畢沅附和富勒渾

前奏不即陳明承辦之員藉口工鉅費繁以致覈估浮冒諸弊叢生及朕降旨詢問又復以採運艱難不得不豫行給發為辭支飾具奏實屬非是畢沅素係能事之人前因其在陝西巡撫任內辦事尚屬認真是以調任河南俾資整頓乃獨於此等工程緊要事件並不覈實改建其過在此其於江蘭擅發銀兩不過失察咎反為小矣俟梁肯堂審明定案時再行酌量降旨

實錄卷一千三百四十四

手

大清高宗法天隆運至誠先覺體元立極敷文奮武孝慈神聖純皇帝實錄卷之一千三百四十四

大清高宗法天隆運至誠先覺體元立極敷文奮武孝慈神聖純皇帝實錄卷之一千三百四十五

監修總纂官經筵講官太子太傅文淵閣大學士文淵閣領侍衛內大臣稽察欽奉 上諭事件處管理
吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次至慶廷
總裁官經筵講官太子太傅文學士大學士文淵閣領侍衛內大臣稽察欽奉 上諭事件處管理刑部戶部三庫事務
世襲副都統軍功加十九級隨帶加二級又加二級臣董誥內大臣戶部尚書鑲黃旗滿洲副都統軍功紀錄五次
尋常紀錄十四次臣德齡經筵講官太子少保工部尚書紀錄六次臣曹振鏞尋常

教修

乾隆五十四年己酉十二月丁卯諭從前毓

奇獲罪革職後朕復加恩授為頭等侍衛差往烏什辦事伊本身所有子爵例應出缺另行承襲但念毓奇之罪尚屬因公現已差往新疆著加恩所襲子爵不必出缺仍留本身隨帶○以故三等子兼三等男富保子羅布藏多爾濟一等伯李侍堯子毓秀各襲爵○戊辰諭曰趙秉冲在懋勤殿行走有年尚屬勤慎前經賞給戶部主事茲因其辦理石鼓篆文應書職銜著加恩以本部員外郎補用

○以故一等侯博清額子永德。一等子巴圖章嘉子班党拉卜吉各襲爵。○已巳

上御乾清門聽政。○諭軍機大臣曰。閏鶚元奏本年五六月內雨水稀疏。禾苗間有受傷。結實之候。復因天氣驟寒。顆粒未能十分圓綻。間有白臍紅斑。篩扇不能淨盡。又琅玕奏浙省杭嘉湖三府。六月內得雨稍遲。且係閏五月。節氣較早。晚稻含苞之際。天氣驟寒。以致米色間有白臍。各等語。南漕為天庾正供。米粒自應圓綻純潔。方准驗收。今既據該撫等聲明。江浙二省。本年因雨水稍遲。又值閏月。霜信較早。天氣驟寒。二禾結實。未能圓綻。米色間有紅斑白臍。自屬實在情形。著傳諭管幹珍。於該二省漕船過淮盤驗時。如驗明顆粒堅實。並非攙雜細碎。米色間有不能一律圓綻純淨之處。不必過於飭駁。及早盤驗。趨行。並著該倉場等。於江浙漕糧抵通交倉後。另嚴收貯。俟支放兵米時。即行先儘開放。無

庸拘泥進倉先後。庶此項米石。不致在倉久貯。致有霉變也。除就近傳知蘇凌阿劉秉恬外。將此諭令知之。○又諭曰。孫永清奏。安南陪臣阮宏匡等於十一月二十九日到省。照例賞犒。於十二月初一日。自桂林省城起程前進。並飛咨各省。豫備應付。計期於來年正月初十以前。總可趕到。不致遲逾等語。該貢使等。久已進關。若即今起身前來。此時應至直境。年內儘可從容趕到。今十二月初一日。始自桂林起身。途中趕緊行走。雖可於明歲燈節前到京。然令該陪臣等。過行前進。長途究屬勞頓。此皆由孫永清拘泥糊塗。以致程期迫促。其咎實無可辭。前因該省學政潘曾起聲名平常。孫永清並不據實劾參。模稜具奏。本應治以欺罔之罪。特因辦理阮光平入覲之事。尚係熟手。是以加恩。暫予留任。今該撫照料貢使來京。起程遲滯。及奉到前次訓飭諭旨。竟欲顛頂混過。並不專摺請罪。尤屬

不合。嗣後該撫益當感激格外寬宥之恩。力圖改悔。於地方緊要事件。認真辦理。若敢仍前延玩欺飾。斷不能復邀寬宥也。將此諭令知之。○庚午。諭曰。全德奏查辦江蘭家產一摺。將伊運本鹽地及田產衣物等項。開單具奏。並將伊弟江蕃家產及伊堂弟江春甸附本銀兩一併查封。所辦過當已於摺內批示矣。前因江蘭擅發工程銀兩一案。恐有應賠官項。諭令全德將伊房產留心防察。豫備抵繳。將來豫省審明定案時。若江蘭罪止過發別無贓私。不過罰令賠交。尚不至於查產。即另有通同染指情弊。亦祇應查抵江蘭家產。與伊兄弟有何干涉。今全德輒將江蕃江春甸一併查辦。竟至如辦理大案。實屬輕重失宜。全德著傳旨嚴行申飭。並即令該鹽政將伊弟江蕃江春甸名下運本鹽窩田產等項。全行給還。以免拖累。且令衆商知之。○又諭本日閱洗馬周瓊呈請代奏謝恩摺內有補

授司經局洗馬兼翰林院修撰字樣。因思修撰係一甲一名進士專銜。何用假借兼攝。所謂名不正也。因思詹事府衙門自詹事庶子中允贊善等官亦俱兼翰林院讀講學士侍讀侍講編修檢討等銜。此係相沿前明舊例。詹事等官既各有專銜。嗣後毋庸再兼翰林院虛銜。以昭覈實。○又諭山海關監督德綸一年任滿。短少比較盈餘銀四萬九千八百餘兩。因降旨令盛京將軍等將奉省南來海船貨物。是否因連年被水收成歉薄。商船到口較少。以致稅銀短絀之處。查明具奏。茲據嵩椿等委員分往錦州等處各海口調取上稅底簿。覈詳到口貨船。比較上二年實係短少十分之六等語。此項盈餘銀兩既因年歲歉收。商本一時不能轉輸。以致貨船到口稀少。其短絀尚屬實情。德綸著罰俸四年。以示薄懲。所有短少比較盈餘銀四萬九千八百餘兩著加恩免其賠繳。○補行乾隆五十二

年福建省大計。卓異官九員。議敘如例。○辛未。

上以來年八旬萬壽。命鑄八徵耄念之寶。

御製記曰。予年七十時。用杜甫句。鑄古稀天子之寶。而即繼之曰。猶日孜孜。不敢怠於政也。蒙。

天眷佑。幸無大隕。越於茲又浹旬矣。思有所以副八旬開袞之慶。鑄為璽以殿諸御筆。蓋莫若洪範八徵之念。且予夙立願。八十有五滿。

乾隆六十年之數。即當歸政。今雖八十。逮歸政之歲。尚有六年。一日未息肩。萬民恒在懷庶徵之。八可不念乎。念庶徵。即所以念萬民。曲禮八十曰。耄老而智衰之謂。茲逮八十。幸賴。

天佑。身體康強。一日萬幾。未形智衰。不可不自勉也。如至果不能自勉。則亦不敢曠職。以待六年之期。何則。

壇

廟之祀。不可不躬親。雨暘之時。不可不常驗。中。

外之政。不可不日勤。民物之養。不可不心存。苟失其一。叢咎隨之。則吾豈敢是則耄而敬念庶徵。仍古稀猶日孜孜之意也。亦五福五代堂之說。所謂皇極。敘錫之志也。亦即近讀洪範著論。所謂六極中不能去其三曰憂之義也。夫漢唐以來。古稀天子。纔得六六之中。至八旬者。纔得三。而三帝之中。惟元世祖可稱賢。其二。則予所鄙也。即元世祖亦未如予。

之五代同堂。是予沐。

昊乾鴻貺。為獨深。而予之所寅承。

錫羨。當何如。亦曰體。

天愛民。誠心勤政。與洪範五之敘。錫八之念。徵九之三憂。孜孜惕惕。日進无疆云爾。予之子孫。能心予之心。政予之政。惕予之惕。憂予之憂。或得仰邀。

天眷。有年至七旬八旬者。繼用此寶。則又我大清國億萬斯年无疆之休。所不敢必而深願。

者也是為記○諭軍機大臣曰畢沅奏湖南省驢腳南米未完一案。浦霖於五月內開列經徵督催各職名題叅。嗣據各該州縣趕緊徵輸。於三月定限之內解交糧道一律全完。例應免議。緣糧道武調元入關辦理提調事務。迨九月內始行彙請咨部開復。咨文未到之前。部議業經將該員等照例革職。相應請旨。照例開復。並將出詳遲延之武調元。交部察議等語。已批交該部議奏矣。武調元係該

省糧道。事務較繁。且近年糧運稽遲。督催一切尤關緊要。即不應派令該員入關。今各州縣解交未完銀米。業於限內全完。因武調元帶印入關。未即詳報。致各員皆被叅處。武調元遲延之咎。固屬難辭。而浦霖係屬監臨。將糧道派入關場。致誤本任要務。亦屬不合。除武調元交部察議之處。聽候部議外。將此諭令知之。○又諭據慶成奏。李世傑自服胡增湯劑後。病勢稍輕。今復用補益之劑調治。充

養筋骨。想步履自漸能轉動。朕心甚屬欣慰。著傳諭孫士毅。告知胡增。留川加意診視。如李世傑病體漸愈。可以於明春緩程赴京。即著胡增一同行走。俾得沿途隨時調治。以冀速痊。現在太醫院御醫尚多。亦無須胡增急於來京也。將此傳諭孫士毅。並賞李世傑人後一觔。以資服養。○是日庚戌年立春。

順天府進土牛春山寶座。○壬申。

上幸瀛臺。○回部阿克蘇三品阿奇木伯克貝

子品級輔國公邁默特阿布都拉。及烏什庫車葉爾羌喀什噶爾和闐伊犁等處伯克。朝鮮國正使李性源。副使趙宗鉉。琉球國正使向處中。副使鄒永功。暹羅國正使帕史滑里。遜通亞排那。赤突。副使啞嗎汶。悉呢。霞。哩。無。塞。廓。爾。喀。使臣巴拉。八都爾。喀。哇。斯。哈。哩。薩。野。等。於西華門外瞻觀。命隨至瀛臺賜食。○諭曰。索約勒積園場甚遠。俱與索倫蒙古扎薩克接壤。盛京吉林地方。現成園場甚多。俱

足敷行圍。何必每年又須各扎薩克等紛紛派人安設卡座巡察。滋多繁費。但與其廢而不用。莫若分賞原獻圍場之索倫蒙古扎薩克等。以作游牧。較為有益。拉旺多爾濟巴忠現往車臣汗部落查辦事件。事竣後。著即由彼前往。會同黑龍江將軍酌定分給原獻圍場之索倫蒙古扎薩克等。務須秉公查明舊日疆界分給。永杜爭端。○諭軍機大臣等。據保寧奏。貨買哈薩克牲畜官布。如有不敷。臨

時購買商民回子布匹。應用不無參差。請於正月借用庫項五千兩。豫買布一萬匹。備用等語。此雖似有通融之益。惟是向商民購買。其採買官員商民。自必從中沾潤。現在伊犁所需官布。皆由喀什噶爾葉爾羌等處辦運。此項不敷布匹。即將喀什噶爾葉爾羌各城回子應交糧石。折布交納。著傳諭保寧。如何令回子折交。所折布匹。可得若干。是否足用。如何運往。於哈薩克回子等有無利益。可能

永行之處。熟籌妥擬奏聞。○癸酉。上御寧壽宮景祺閣。賜王貝勒貝子公額駙大臣蒙古王貝勒貝子公額駙台吉等食。○甲戌。

上御撫辰殿大幄次。賜王貝勒貝子公額駙大臣蒙古王貝勒貝子公額駙台吉回部伯克朝鮮琉球暹羅廓爾喀等國使臣宴。○乙亥。大學士公阿桂等議准。閩浙總督覺羅伍拉納等奏。稱內地客民領照赴臺灣。責令行保船戶。開報姓名籍貫。年貌住址。並往臺灣作何生業。呈報該管廳員查驗。立即給照放行。移明臺灣各廳。驗放入口。其出口之處。仍令守口員弁查驗放行。如有給照遲延。驗放留難等事。即將該員弁嚴行叅處。人照不符。照私渡例治罪。又官渡商船。由廈門至鹿耳門。每名許收番銀三圓。由南臺至八里坌。蚶江至鹿仔港。每名許收番銀二圓。不准多索。仍飭專管各汛口員弁兵役。每日將所泊商漁

等船查驗字號船牌按旬列報一有無照船隻即行根究如兵役等拏獲偷渡之犯即將船隻貨物一併賞給以示鼓勵其沿海有底無蓋小船俱令驗烙編號止許就近撥載不得遠出以防弊混得旨依議此事有治人無治法亦祇可如該督等所奏辦理但沿海小港查禁既嚴凡有搭載前往臺灣民人非由正口無從逕渡恐不特胥吏兵役等從中多索錢文即守口文武員弁亦難保無從中染指是私渡之弊或可禁絕而勒捐賣放之端即由此起總在該省督撫及臺灣鎮道等督飭守口文武員弁實力稽查隨時嚴察若查出胥吏兵役人等婪索私放即行嚴辦示懲不得視為具文久而生懈自此立定章程之後再有多索搭載船租飯食銀兩故意留難及得贓賣放私越海口諸弊惟該督撫鎮道等是問不僅將守口員弁從重治罪已也○

丙子

孝莊文皇后忌辰遣官祭

昭西陵○

上詣

慈寧宮

壽康宮行禮○諭曰福崧等奏元旦慶賀摺內並未列阿奇木伯克之名雖屬照例辦理但慶賀行禮為朝廷大典原非具文著令伊等一併列銜俾益曉敬君之道喀什噶爾葉爾羌阿克蘇三處較大嗣後元旦朝賀並萬壽朝賀等事其阿奇木伯克著列名於大臣之次○又諭前聞廣西學政御史潘曾起聲名平常降旨詢問孫永清今將潘曾起在廣西考試情形有無劣蹟據實查奏茲據孫永清覆奏潘曾起輕喜易怒性情不好未能滿愜士心曾飭各府提調官密行訪察雖無舞弊營私實蹟而其聲名實屬平常等語潘曾起屢經簡用學政如果潔清自矢訓迪有方何至士心不服乃竟不知自檢士論紛然現在

雖查無確據。但聲名物議如此。豈可復勝臺諫之任。潘曾起著交部嚴加議處。○諭軍機大臣曰。秦承恩奏陝西省局內積存洋滇高銅。為數較多。而現有低銅。不敷配用。請照例暫用高銅。按卯鼓鑄等語。該省局內現存低銅。不敷鼓鑄。而洋滇高銅積有一十六萬六千餘觔。自應通融籌辦。俾免停鑄歇卯之虞。但該撫祇知其一。不知其二。如卯錢全用高銅鼓鑄。則成色較高。恐不肖之徒。乘機取利。

將此項錢文。多為收積私銷。滋生弊端。不可不防其漸。莫若於鼓鑄時。將高銅酌量多用。鉛觔配入。其鑄出錢文銅色。與向例高低搭配者一律。是高銅既可致多費工本。而於私銷之弊。亦可杜絕。豈不一舉兩得。除將該撫原摺。交該部速議具奏外。將此諭令知之。○丁丑。諭曰。徐立綱。潘曾起。在學政任內。聲名俱屬平常。業經先後降旨。將徐立綱降補司務博士等官。潘曾起交部嚴議矣。巡撫與

學政同在一省。其聲名優劣。平日斷無不知之理。乃陳用敷。孫永清。並不及早據實劾參。及至朕降旨詢問。陳用敷則以徐立綱初任聲名不好。原有風聞。自復任以來。考選尚屬公平。模稜具奏。而孫永清則僅以潘曾起性情不好。未愜士心。委婉開脫。俱屬意存隱飾。厥罪惟均。本應皆予降調。但孫永清辦理安南投誠一事。尚屬妥協。明春阮光平親自入覲祝釐。仍須該撫在彼照料進關。若遽易生

手。恐阮光平心存疑畏。是以將孫永清暫予留任。至陳用敷。自擢任安徽巡撫以來。不過循分供職。毫無出力之處。而於徐立綱學政聲名。又不據實參奏。似此有心欺飾。豈可復膺封疆之任。陳用敷著降補奉天府尹。安徽巡撫員缺。即著穆和蘭補授。是日起。上以歲暮裕祭。

太廟齋戒三日。○戊寅。諭曰。鄂岳著留京。仍在散秩大臣上行走。色克圖著調補福州副都

統張漢傑著調補廣州漢軍副都統○巳卯以歲暮裕祭遣官祭

太廟中殿

後殿○諭曰章佳氏與伊夫弟扎郎阿通姦被伊婿巴揚阿挾制詐騙侵奪貨產遂前赴步軍統領衙門自行自首雖姦罪不准自首仍應照律問擬絞決但向來辦理姦情案件如姦夫致死本夫姦婦並不同謀即行首告將姦夫指拏到官以尚有不忍致死其夫之心

俱從寬減等問流今章佳氏自知追悔復慮伊夫在外家產盡被占奪幼子恐遭陷害即行呈首其情尚屬可原章佳氏著改為應絞監候扎郎阿本應照擬絞決但章佳氏業已從寬且現屆歲暮封篆之時未便行刑扎郎阿亦著暫行監候並交刑部將章佳氏扎郎阿俱牢固監禁候旨遵行○諭軍機大臣等畢沅奏考城縣城垣原在曠野憑空建造與修改工程難易迥別該處灰石木料概不出

產而鄰近地方東係曹單南係歸德北係大名西係封邱延津四路皆平原沙磧均無物料可購不得不遠赴汲縣採運等語考城移建城垣自應在鎮店地方相度形勢鳩工興築從前富勒渾勘定於垆陽空野之處憑空興建以致採運寫遠糜費運腳例價多有不敷富勒渾辦事糊塗既經錯誤於前而何裕城茫無主見復因循於後畢沅接任後曾親往該處勘視自應據實奏明另行擇地移建何必如此拘泥仍照富勒渾原定處所憑空建造其過實在此畢沅歷任封圻尚屬曉事明知在垆陽建城與尋常工程難易迥別輒復遷就辦理據江蘭詳報率行題估經朕節次降旨詢問猶復意存迴護以本地及鄰近四路府縣均無物料可購執詞具奏更不成話即就該督所指四路地方而論如曹單歸德大名封邱延津等處皆有城垣村莊非無一人之處豈從前興築時所用料物悉皆取

資遠縣而各該處廟宇衙署以及紳衿富民鋪戶等起蓋房屋亦無遠赴及縣購備灰石之理即考城縣舊城興建時所有一切物料亦未必皆自遠處運往此將誰欺畢沅並不確覈情形檢查舊案轉以此等支飾之詞出之於口更屬不合且考城新城地處荒僻並無人烟所有衙署倉庫勘定後延宕多年始行興築其未建以前地方官吏審斷詞訟收納錢糧又在何處辦理若僅建空城有官無民豈不更成笑話耶至考城舊城雖被黃水衝塌其城內民居亦未必盡歸蕩析以致房屋人民淨盡之理今將城垣改建僻地令民人等遷移前往既非樂從即云貧民等皆搭蓋茅屋居住移居較易而紳士富民等起造瓦房必須遠至二百餘里外之及縣購料所費亦屬不貲亦斷無此事也此事種種格礙難行畢沅竟一錯百錯矣看來江蘭擅發工程銀兩轉為此案末節而畢沅不將埧陽地

方難以建城之處及早奏明其咎轉大著傳諭畢沅將諭旨內指出各條逐一明白回奏並著梁肯堂按照查明實在情形據實具奏不得稍有迴護○庚辰禘祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○遣官祭

太歲之神

上御重華宮。賜回部伯克廓爾喀使臣等茶果。並賞賚有差。○諭曰。福康安奏查改外海內河船隻。及清查海島占住居民。現在分別確辦。悉心妥議。若欲趕副歲底彙奏之期。為時未免迫切。懇請展限等語。海島搭蓋建屋。私行占種。漸至匿匪藏奸。不可不嚴行飭禁。至各省沿海地方。額設戰船。原以操練水兵。且為出洋巡哨捕匪之用。於酌留一半外。屆期次第改造。亦須覈實查看。原不可視為奉行故事。僅以年終一奏塞責。今福康安以事關海疆營制。不肯拘泥定期。據實陳請展限三月。足見辦理詳慎。但須行之以實。為之以妥。亦何妨再展數月。總期於公務實有裨益。第恐他省地方文武員弁。於海島搭蓋民戶。並不親身履勘。僅以空文具報。雖稱驅逐淨盡。實則仍舊占居。而酌改戰船。亦恐未能如法造成。外省此等惡習。均所不免。督撫等若不實心詳查。率行依限具奏。以致洋島未能肅

清。戰艦不堪駛用。仍屬有名無實。所有福康安奏請展限三月之處。竟著展限半年。並著沿海之福建。浙江。江南。山東各督撫。俱照福康安所奏。妥協辦理。該部知道。○諭軍機大臣曰。梁肯堂奏提訊江蘭續發壇廟工程銀兩。緣值籌辦。雖汎漫口。堵築匆忙之際。是以未及專詳。其短平餘。係例扣市平。應行解部之項。工程項下。應扣平一千三百餘兩。城工項下。應扣平二千兩。交存府庫。如陳士駿工程需用。即令該府將此銀發給。工竣歸還。現有府庫底簿可查等語。所奏盡屬枝節。而於案內緊要情節。未能訊明具奏。朕思江蘭係家產豐厚之人。其未詳擅發銀兩。祇係任意濫發。即扣平一款。亦係照例存庫。惟考城縣移建城垣。從前勘定時。並不移於鎮店地方。轉在曠野之處。憑空興建。以致糜費運腳。藉端開銷。富勒渾辦事糊塗。勘定已經錯誤。何裕城茫無主見。又復任意宕延。卑沆接任後。

既經親往勘視。明知該處本無人烟。實非可以建城之地。乃因循富勒渾原定處所。憑空建造。不行陳奏。江蘭身任藩司。有錢糧奏事之責。亦不奏明。二人之過。實在於此。若從此查究詰訊。畢沅。江蘭實屬咎無可辭。即令其分別賠繳。伊二人亦必心服。而富勒渾何裕城之錯誤延宕。亦不得謂之無罪。前朕查閱工部駁案。及梁肯堂議令分賠之摺。即以爲所辦未免苛求。今細思此案情節。竟係畢沅

江蘭因循貽誤於始。其江蘭之未詳擅發。轉爲過之小也。著傳諭梁肯堂遵照節次諭旨。逐一研訊。據實具奏。毋得再有遷就。自干咎戾。○辛巳。

上御保和殿。賜朝正外藩筵宴。左翼烏珠穆沁和碩親王瑪哈索哈巴林親王品級多羅郡王巴圖固山貝子和碩額駙德勒克公品級一等台吉索特納木多爾濟賽尚阿多羅額駙丹津喀喇沁親王品級多羅郡王滿珠巴

咱爾固山貝子丹巴多爾濟輔國公拉扎布和碩額駙永庫爾忠索納木巴勒丹一等塔布囊品級二等塔布囊格勒克薩木魯布科爾沁多羅郡王鄂勒哲特穆爾額爾克巴拜鎮國公薩木丕勒扎木素輔國公色當噶瑪勒公品級一等台吉拉旺丹津旺布和碩額駙敏珠爾多爾濟奈曼多羅郡王拉旺刺布坦一等台吉巴勒楚克敖漢多羅郡王齊默特魯瓦固山貝子桑濟扎勒德威多爾濟多

羅額駙伊拉瑚固山額駙巴顏巴圖爾二等台吉濟克濟扎布三等台吉察克都爾扎布土默特多羅貝勒索諾木巴勒珠爾翁牛特多羅貝勒濟克濟扎布固山貝子圖們巴顏阿巴噶輔國公拉旺多爾濟蘇尼特輔國公額琳臣右翼科爾沁和碩親王旺扎勒多爾濟多羅郡王羅布藏占三多羅貝勒三音察察固山貝子錫第多羅額駙索諾木延丕勒阿拉善和碩親王旺沁班巴爾鎮國公烏爾

圖納遜阿巴噶多羅郡王喇特納錫第喀爾
喀多羅郡王桑齋多爾濟多羅貝勒衮布多
爾濟車布登納木扎勒固山貝子巴爾津多
爾濟德沁喇木丕勒貢楚克扎布鎮國公丹
津多爾濟輔國公三丕勒端多克扎薩克一
等台吉布達齊素龍回子郡王品級多羅貝
勒哈第爾阿克蘇三品阿奇木伯克貝子品
級公邁默特阿布都拉輔國公託克託阿魯
科爾沁多羅貝勒阿爾達什第鄂爾多斯多
羅貝勒喇什達爾濟厄魯特輔國公達什喇
布坦扎薩克一等台吉特默齊二等台吉烏
勒木濟四等台吉納旺楚勒提木捫圖斯喀
喇沁和碩額駙衮楚克扎木素克什克騰扎
薩克一等台吉根敦達爾扎青海扎薩克一
等台吉貢格杜爾伯特扎薩克一等台吉布
達什哩一等台吉貢楚克扎布敷漢二等台
吉巴勒珠爾喇布坦等及朝鮮國正使李性
源副使趙宗鉉琉球國正使向處中副使鄭

永功暹羅國正使帕史滑里遜通亞排那赤
采副使卮嗎汶悉呢霞囉無采廓爾喀使臣
巴拉叭都爾喀哇斯哈哩薩野及領侍衛內
大臣等召左翼烏珠穆沁和碩親王瑪哈索
哈巴林親王品級多羅郡王巴圖固山貝子
和碩額駙德勒克喀喇沁親王品級多羅郡
王滿珠巴咱爾奈曼多羅郡王拉旺喇布坦
敷漢多羅郡王齊默特魯瓦固山貝子桑濟
扎勒土默特多羅貝勒索諾木巴勒珠爾翁
牛特多羅貝勒濟克濟扎布右翼科爾沁和
碩親王旺扎勒多爾濟多羅貝勒三音察衮
固山貝子錫第阿拉善和碩親王旺沁班巴
爾圖子郡王品級多羅貝勒哈第爾阿魯科
爾沁多羅貝勒阿爾達什第喀爾喀多羅貝
勒衮布多爾濟固山貝子德沁喇木丕勒阿
克蘇三品阿奇木伯克貝子品級公邁默特
阿布都拉等至
御座前賜酒成禮○是月湖南巡撫浦霖奏湖

南回空幫船陸續全行抵次本年各州縣應解漕米先期運赴水次貯倉候兌空船抵次後即飭各幫丁將應行修驗船隻趕辦完工於十二月初十日開兌現令兌竣之船先於十六日起以次開行得旨好欣慰覽之○河東河道總督李奉翰奏開歲南漕北來較早東省運道須迅速挑完以待新運現在各工人夫踴躍挑出土方日起有工臣等由臨清濟寧一帶南北查催務期上下普律深通如式早竣俾來歲重運速行得旨嘉獎○是年追予出師安南陣亡土田州知州岑宜棟一員副將邢敦行一員叅將楊興龍英林王宣三員遊擊明柱于宗範張純王檀張會元劉越六員守備黎致明一員土千總阿吉一員額外委黃一等十八員馬步兵王恩浩等四千六百一十九名祭葬卹賞如例俱入祀昭忠祠○旌表孝子直隸等省民戴伸等三名孝女湖北朱氏一口守節合例八旗閒散

實錄卷五十五

妻

宗室完楚和妻伊爾根覺羅氏等七口滿洲護軍三達色妻宋佳氏等一百二十四口蒙古護軍福雲保妻趙氏等四十七口漢軍馬甲倉兒妻陸氏等十五口內務府披甲八存妻郭氏等四口奉天等省駐防披甲馬力虎妻李氏等一百十六口直隸等省監生查泳妻李氏等四百二十五口夫亡殉節江蘇等省民劉淑慎妻陸氏等十六口未婚守志正黃旗滿洲馬甲興福聘妻馬佳氏一口直隸等省民李士瑜聘妻董氏等十八口百歲壽民婦浙江等省毛文玉等五名口各給銀建坊如例○一產三男直隸等省民李成用等九家○會計天下民穀數各省通共大小男婦二萬九千七百七十一萬七千四百九十六名口各省通共存倉米穀四千三百二十萬九千九百十八石一升二合四勺


實錄卷五十五

妻

大清高宗法天隆運至誠先覺體元立極敷文
奮武孝慈神聖純皇帝實錄卷之一千三百四十五

實錄卷之一千三百四十五

庚



統一書號:11018·1355-25

定 價: 58.00 元